

UTL AT DOWNSVIEW



D RANGE BAY SHLF POS ITEM C  
39 12 11 23 02 008 2

BINDING SECT.

SEP 17 1984


CALL NO:	AUTHOR:
	<del>Ahmed Cevdet Pasa</del> Ahmed Cevdet Pasa
	TITLE: "qisas-i enbiya ve tevarih-i hulefa"
	VOL:
DATE CHARGED:	

D

BP  
166  
.4  
C48  
1912







Digitized by the Internet Archive  
in 2011 with funding from  
University of Toronto



K. 1545-1 enbiyā

اثر خاتمه احمد جودت

# قصص انبياء

## و تواريخ خلفا

جزء اول و ثانی

صاحب و ناشری : قناعت کتبخانه سی صاحبی الیاس

کافه حقوق محفوظ در

قناعت کتبخانه سنک مهری حای اولیان نسخه لر ساخته اولوب طابع و بایی مسئولدر



کتابخانه سنک

در سفادت — قناعت مطبعه سی

۱۳۳۱

325

2


BP

166

.4

C48

1912





قصص انبيا عليهم السلام

# بِسْمِ اللَّهِ الرَّحْمَنِ الرَّحِيمِ

## قصه آدم عليه السلام

الله تعالی حضرتلری، عالمی یوقدن وار ایتدی و (آدم) ی طوبراقدن یاراتدی . صکره آدمک جسدینه روح ویردی و «آکا سجده ایدیگز» دیو ملکلره بیوردی .

هپ ملکلر، حضرت آدمه سجده ایلدی . فقط ابلیس، کبر و حسدندن ناشی سجده ایتدی . بونک ایچون حضور حقدن مطرود و ملعون اولدی و کندوسنه (شیطان رجیم) دنیلدی . بوسیدن اودخی آدمه دشمن اولدی . آندن صکره حق تعالی حضرتلری (حوّا) یی یاراتدی و حضرت آدمه آشن ایتدی .

ایکیسنی دخی جناب حق، جنته قویدی و «بیگز، ایچگز» لکن شو آغاجه یا قلاشمیگز» دیدی .

شیطان ایسه بر تقریبله جنته کیردی و آدم و حوّا یانته واردی و آنلره وسوسه ویردی . «ربگز، سزی او آغاجدن نیچون نهی ایتدی بیلور میسگز» اکر سز آندن یر ایسه گز آرتق سزک ایچون اولوم اولماز، مؤبدآ جنتده قالورسگز، دهرک ابتدا حوایی و آنک واسطه سیله آدمی آلدادوب ایکیسنه دخی او آغاجک میوه سندن یدردی .

بونك اوزرينه باري تعالى حضرتلري ، جله سني جنتدن چيقاردی  
وير يوزينه اينديردي . آدم ، هند طرفنه وحووا ، جده يه دوشدی .  
آدم ، چوق آغلادی وجناب حقه يالواردی . نهايت جناب حق ،  
آنك توبه سني قبول بيوردی . و « مکه طرفنه کيت » ديو وحی کوندردی .  
آدم عليه السلام دخی اورايه کيدوب حوا عليها السلام ايله بولوشدی .  
آندن صکره سائر ناس ، آنلردن اورهدی ونيجه قوملر وصف صنف  
انسانلر توره دی .

شيطانك دخی ذرّتي چوغالدي و آدمك اولاد واحفادينی آزديرمق  
ايله مشغول اولدی .  
حضرت آدمك وفاتندن صکره پيغمبرك اوغلی ( شيت ) عليه السلامه  
کلدی وجانب حقدن آکا الی صحف نازل اولدی . کعيه يي ابتدا طاشدن  
بنا ايدن اودر .

### قصه ادریس عليه السلام

حضرت شيتدن صکره پيغمبرك ( ادریس ) عليه السلامه کلدی و آکا  
دخی اوتوز صحف نازل اولدی .  
ابتدا قلم ايله يازی يازان والسه ديکن اودر . آندن اول آدم اوغللری  
حيوان ده ريسي کيیردی .  
ادريس عليه السلامه کوکلرک اسراری آچيلمشیدی . نهايت جناب حق ،  
آنی دیری ايکن کوکه قالدردی .

### قصه نوح عليه السلام

حضرت ادریس ، کوکه چکلدکدن صکره آدم اوغللری ، طوغری  
يولدن آيرلدير و پتله طاپار اولدير . جناب حق ، آنله ( نوح )  
عليه السلامی کوندردی .



حضرت نوح ، نیچه ییلار قومنی توحیده دعوت ایلدی . یالکز اوغللری ( سام ) و ( حام ) و ( یافث ) ایله زوجهلری و دیگر پک آز کیمسه لر ایمان ایدوب ساثری قولاق آصمدی . حتی کندوسنک ( یام ) نامنده بر اوغلی دخی ایمانه کلمدی .

نوح علیه السلام ، قومنه نصیحت ایتدیکجه آنلر ، آکا جور و اذا و تحقیر واستهزا ایدرلردی .

نهایت کندوسنه یأس کلمدی و آنلره بد دعا ایتدی . دعاسی مقبول اولدی و « گمی یاپ » دیو الله طرفندن کندویه وحی کلمدی .

حضرت نوح ، قیرده و صودن اوزاق بر محله گمی یایمغه باشلادی . قومی ، اورادن کچرکن آنکله اکلنورلردی و « پیغمبر ایدک » دولکر اولدک « دیرلردی . او دخی « خوشمدی ! بزده سزگله اکلنورز » دیر ایدی .

گمی بیتدی ، طوفان علامتلری ظهور ایتدی . حضرت نوح ، مؤمنلر ایله گمی یه بیندی و هر نوع حیوانلردن برر چفت آلدی .

هر طرفدن صویریدی . حضرت نوح ، اوغلی یامی دخی گمی یه دعوت ایلدی . « بن طاغه چیقار ، قورتیلورم » دیو گمی یه کیرمدی . « بو کون اللهک مرحمتندن بشقه صیفینه حق یر یوقدر » دیو حضرت نوح ، نصیحت ایدرکن آره یه بر طالغه کیردی ، یام بوغولدی .

بابالق بو یا . حضرت نوح ، مکدر اولدی . نه چاره که جناب حق ، جمله مشرک لک هلاکنی اراده بیورمشیدی . یام دخی مشرک اولدیغندن آنلره قاتیلدی .

طوفان هر طرفی قاپلادی . صو ، طاغلری آشدی . یر یوزنده کی انسانلر و حیوانلر هپ تلف اولدی .

او حالده نوحک گمیسی ، طاغلر کبی بیوک طالغهلر آره سنده یوزردی . ایشته بو وجهله طوفانک حکمی ، آلتی آی قدر سوردی . صکره اللهک امریه یا غمورلرک آرقه سی کسیلدی و صولر چکیلدی .

گمی ( جودی ) طاغنك اوزرينه اوتوردی وگمیده کیلر سلامت بولدی .  
عالم ، بر بشقه عالم اولدی .  
آندن صکره ناس ، حضرت نوحك اوچ اوغلندن اورهدی . آنك  
ایچون نوح علیه السلامه ( ایکنجی آدم ) دنیلدی .  
عرب و فرس و رومك باباسی ( سام ) و سودان خلقنك باباسی ( حام )  
و قبائل ترکك باباسی ( یافث ) در .  
آدم اوغلاری ، بویله بر بیوک بلا کورمشیکن صکره ینه آزیتدیلر  
ویوللرینی صاپیتدیلر . توحید باری یی اونوتدیلر . پتله طایدیلر . نته کیم  
تفصیلاتی آشاغیده بیان اولنه جقدر .

### قصة هود عليه السلام

طوفاندن صکره یمن دیارنده ( حَضْرَ مُوت ) جوارنده ( أَحْقَاف )  
دنیلان یرده ( عاد ) قومی ظهور ایتدی .  
اوحوالی یی معمور ایتدیلر و کوزل بنالر یاپدیلر . لکن طوغری یولدن  
صاپدیلر و پتله طایدیلر .  
جناب حق ، آنلره ( هود ) علیه السلامی کوندردی . ایچلرندن پك  
آز کیمسه لر ایمان ایلدی . سائر یی شرک و ضالته قالدی .  
الله تعالی حضرتلری ، آنلری شدتلو روز کار ایله هلاک ایلدی . حضرت  
هود ایله آکا ایمان ایدنلر ، بر یره چکیلوب قورتولدی .

### قصة صالح عليه السلام

عاد قومندن صکره شام ایله حجاز آره سنده ( حِجْر ) دنیلن محله  
( ثَمُود ) قومی ظهور ایلدی .  
آنلر دنخی طاغلری ده لدیلر ، طاشلری اویدیلر ، غایت محکم اولر  
یاپدیلر و طریق حقدن صاپدیلر .



جناب حق ، آنلره ( صالح ) عليه السلامی کوندردی . او دخی قومنه بیوک معجزه لر کوستردی .

ایچلرندن پک آز کیمسه ایمان ایتدی . سائرلری ایمانه کلیوب کفر وضالته قالدیلر .

نهایت کوکدن برصیحه کلدی ، جمله سی هلاک اولدی . حضرت صالح ایله آکا ایمان ایدنلر ، مکیه واروب آنده عبادت ایله مشغول اولدیلر .

### قصه ابراهیم علیه السلام

نوح علیه السلامک اولادی ابتدا ( عراق ) دیارنده ساکن اولمشلر و فرات نهینه قریب محله ( بابل ) شهرینی یامیشلر ایدی .

صکره ایچلرندن برطافه آریلوب ( دجله ) کنارنده وشمدی ( موصل ) دیدیکمز شهرک قارشو یقه سنده ( نینوا ) شهرینی بنا ایتمشلر ایدی .

بابلک قدیم اهالیسی اولان ( نبط ) قومی ( سریانی ) لسانی سویلر وچوق وقت بابلی پای تخت ایدوب اورادن هر طرفه حکم ایلردی .

صکره نینواده ظهور ایدن ( دولت آثوریّه ) غالب کلدی و نینوایی پای تخت ایدوب بابل دخی اورایه تابع اولدی .

مؤخرأ بابلده ( کلدانی ) طائفه سی قوت بولمش و نبط قومنک علوم و معارفه وارث اولمشدر .

بابل اهالیسی بیننده ( صابئه ) دینی ظهور ایتمشیدی که ییلدیزلره طاپارلردی . جناب حق ، آنلره ( ابراهیم ) علیه السلامی کوندردی و آکا یکریمی صحف ایندردی .

حضرت ابراهیم ، قومی توحیده دعوت ایتدی . اینانمدقلرندن بشقه ، ملک بابل اولان ( نمرود ) آنی آتسه آتدی .

الله صافلادی ، آتش یاقدی . ابراهیم علیه السلام ، سلامته ایردی .  
 بعضیلر ، بو معجزه نی کوروب آکا ایمان کتوردی .  
 حضرت ابراهیم ، مؤمنلر ایله برابر شام دیارینه هجرت ایتدی و مصره  
 کتیدی . صکره کنعان ایله کادی ، آنده ساکن اولدی .

### قصه لوط علیه السلام

حضرت ابراهیمك قرنداشی (حران) اوغلی اولان (لوط) علیه السلام که  
 آنکه برابر بابل دیارندن شام یاقه سنه کچمشیدی . ( سدوم ) ناحیه سنه  
 مبعوث اولدی .  
 بو ناحیه نك اهاالیسی ایسه اهل کفر و فجور ایدی . یولسز کیدرلردی  
 و هیچ بر قومك یامدی فی فحشیتانی اجرا ایدرلردی .  
 حضرت لوط ، آنلری طوغری یوله دعوت ایتدی ، دیکله مدیلر و چوق  
 نصیحت ایتدی ، قبول ایلدیلر .  
 جناب حق دخی آنلرک باشنه طاش یاغدیددی و زلزله ایله کویلرینک  
 آلتی اوسته کتیردی .  
 جمله سی هلاک اولدی . یالکز لوط علیه السلام ، اهل بیتله کیجه این  
 ایچلرندن چیقوب قورتولدی .

### قصه اسماعیل واسحق علیهما السلام

حضرت ابراهیمك زوجه سی (ساره) چوجق طوغورمازدی (هاجر)  
 نام جاریه نی قوجه سنه باغشلادی . آندن ( اسماعیل ) علیه السلام طوغدی .  
 بوندن طولانی ساره ، زیاده کدرلندی . جناب حق دخی آکا مرحمت  
 و عنایت ایتدی . اختیارلق وقتنده (اسحق) علیه السلامی طوغوردی .  
 صکره هاجر ایله اوغلی اسماعیلی قصقاندی و « بو دیاردن ایراغ  
 اولسونلر ، دیو ایاق باصدی .

ابراهیم علیه السلام ناچار قالدی. همان هاجر ایله اسماعیلی آلدی و مکّه یه  
کوتوروب اوراده براقدی. ( جَرِّهْمُ ) قبیله لری او وقت مکّه جوارنده  
ایدیلر. حضرت اسماعیل ، آنلرله الفت ایتدی و آنلردن قیز آلدی و اون  
ایکی اولادی اولدی . بو مناسبتله جرهم قبیله لرندن بعضیلری کلوب مکّه ده  
ساکن اولشلردر .

بعده جناب حَقِّک امریله حضرت ابراهیم، مکّه یه کیتدی و حضرت  
اسماعیل ایله برلکده کعبه مکرّمه یی یکیدن بنا ایتدی .

اسماعیل علیه السلام ، یمن قبائلنه و عمّالقه یه مبعوث اولدی که او وقت  
عمالقه قبیله لری ، جزیره العربک شام جهتنده ساکن ایدیلر .

صکّره حضرت اسماعیلک اوغوللری و طورونلری چوغالدی و اطرافه  
یایلدی . نزهیه واردیلر ایسه غالب اولدیلر و عمالقه یی او دیاردن سوروب  
حیقاردیلر .

حضرت ابراهیمک وفاتنده یرینه ( اسحق ) علیه السلام کچدی و ایکی  
اوغلی اولدی. بری ( عِیْص ) و دیگرى ( یَعْقُوب ) ایدی .

عیص ، عموجه سی اسماعیل علیه السلامک قیزی نی آلدی و آندن چوق  
اولادی اولدی . آنلر دخی چوغالدیلر و دمشق شام طرفنه مالک اولدیلر .

حضرت یعقوب ایسه پدری اسحق علیه السلامک وفاتنده آنک یرینه  
کچدی ، پیغمبر اولدی و پدرینک یوردی اولان کنعان ایلنده قالدی. آنک  
دخی او دیارده اولاد و احفادی چوغالدی .

یعقوب علیه السلامک لقبی ( اسرائیل ) ایدی . آنکچون اوغوللرینه  
و طورونلرینه ( بنی اسرائیل ) دنیلدی .

### قصه یعقوب و یوسف علیهما السلام

حضرت یعقوبک اون ایکی اوغلی وار ایدی . ایچلرنده ( یوسف ) ی  
جمله سندن زیاده سور ایدی .

يوسف ، بررؤيا كوروب پدرينه سويلدى « كوردم كه : اون بر ييلديز وكونش و آى ، بگا سجده ايتديلر » ديدى .

يعقوب عليه السلام آكلادى كه : اون برييلديز ، يوسفك اون برقرنداشنه اشارتدر و جناب حق ، آنى قرنداشلرينه فائق ايده جكدرد « اوغلجغزم ! بو رؤيا كى قرنداشلريگه سويله . زيرا شيطان ، انسانه دشمندر . شايدكه قرنداشلريگه وسوسه ويرر و قبلارينه حسد دوشورر . صكره سگا برخدعه ايدرلر . جناب حق ، سكا نبوت و بيوك دولت ويره جك » ديدى ويوسفه دهها زياده محبت ايتدى .

يوسفك بيوك قرنداشلرى ايسه آكا حسد ايتديلر و حيله ايله آنى قييره كوتوروب بر قويويه آتديلر .

آندن كيرو عودت ايلديلر و « يوسفى ، قورت يدى ، ديو پدرلرينه يلان سويلديلر .

صكره ايجلرندن بريسى ، يوسفه يمك كوتورمشيدى . نه كورسون كه : قويو باشنه بر كاربان گلش ، يوسف ، قويودن چيقاريلش . دونوب ديكر قرنداشلرينه خبر ويردى . همان اورايه كيتديلر « بو بزم كوله من ايدى قاجدى » ديهرك بازارلق ايتديلر و بك اوجوز بها ايله يوسفى ساتديلر . يوسف ، او وقت اون سسكز ياشنده ايدى . قرنداشلرندن قورقوب سكوت ايتدى واللله متوكل اوله رق كاربانه قاتيلوب كيتدى .

كاربان ، مكر مصره كيديورمش . يوسف دخى برابرجه مصره واصل اولدى و ( عزيز ) يعنى ملك مصرك ماليه ناظرى ، آنى صاتون آلدى . يوسفك كوزلكده مانند و نظيرى يوق ايدى . رشد ورويتده اقران و امثاله فائق ايدى .

يوزنده نور لمعان ايدردي و بر بيوك ذات اوله جنى يوزندن و كوزندن بللو اولوردى .

عزيزك اولادى اولمازدى . يوسفك طور و مشاورينى بكندى و آكا



محبت ایلدی. حتی «آکا اکرام و اعتبار ایت» دیو حرمی (زلیخا) یه [\*] اصهارلدی.

صکره یوسف، بر افتزایه اوغراددی. هیچ صوچی یوق ایکن زندانه قونلدی.

راست کله یوسفله برابر ایکی کوله دها زندانه کیردی. بریسی ملک مصرک شربتجیسی و دیگرکی ا کمکجیسی ایدی. برر رؤیا کورمشلر و مغالرینی یوسفدن صورمشلرایدی. یوسف، براز و عظ و نصیحت و آنلری توحیده دعوت ایتدکن صکره «ای زندان آرقداشلری! بریگز چیقوب افندیسنه ساقی اولاجق و دیگر یگز آصیله جق. ایشه رؤیا لریگزک تعبیری بودر» دیمش و شربتجی یه «افدیگک یاننده بنی یاد ایت» دهرک کندوسنک حبسدن خلاصی ایچون آندن شفاعت ایستمش ایدی.

رؤیا لر، عینله یوسفک تعبیر ایتدیکی کبی چیقدی. شربتجی، زنداندن چیقوب اولکی کبی ملک مصره ساقیلک ایدراولدی. ا کمکجی دخی زنداندن چیقاریلوب آصلدی.

اما یوسفک رجاسی شربتجینک خاطرندن چیقدی. نیچه ییللر کلوب کچدی. یوسفک حالنی ملک مصره عرض ایده مدی.

وقت حاجتده قولدن مدد ایستمک مذموم دکلدرد، فقط پیغمبرلرک شانسه یاقشماز بر کیفیتدر.

یوسف کبی برنجی ذیشانه کوره هرایشنی اللهه تفویض ایلمک و هر مرادینی اللهدن ایستمک لازم ایکن شربتجیدن شفاعت ایستمسی و ملکدن مدداووماسی کندوسنک یدی سنه زندانده قالمسنه سبب اولمشدر.

نهایت ملک مصر، بر رؤیا کورمش و معبرلردن مغاسنی صورمش «بو، بر قاریشیق دوشدرد، یعنی یلانجی رؤیادر. بویله قاریشیق رؤیا لرک تعبیری یوقدر» دیمشلر.

[\*] بوکله بی عربلر، زانک فتحی و لامک کسر یله، عجلدرده زانک ضعی و لامک فتحیله او قورلر. تورکجه ده و عوام آراسنده ایسه (زلیخا) تلفظ اولونور.

اووقت شریحینک خاطرینه یوسف ککش « طوریکز ، بن سزه بو  
رؤیایی تعبیرایتدیریم » دیوب زندانه کیتمش ، یوسفی کوروب ملکک رؤیاسنی  
سویلش و تعبیرینی رجا ایلش .

یوسف دخی ملکک رؤیاسنی تعبیر ایدوب دیمش که « یدی سنه بوللق  
اولاجق . بیچدیککز ا کینلردن ییه جککز قدرینی آلوب باقیسنی باشاقلرنده  
برایککز . صکره یدی سنه قحط اولاجق . اولکی یدی سنه ایچنده بریکدیرمش  
اولاجککز ذخیره لری یرسکز . آندن صکره ینه بوللق اولور . »

شریحی دونوب بو تعبیری ملکه عرض ایتدی . ملک دخی « او ذاتی  
بکا کتورک . بن آنی کندی خدمتمده آلیقویاجغم » دیدی .

بونک اوزرینه یوسف علیه السلام زنداندن چیقدی و ملک ایله کوریشوب  
سویلشدی . ملک ، آنک رشد و رویتنه باقوب فوق العاده بکندی و بو آراق  
عزیز ، فوت اولمغله آنک یرینه یوسفی مالیه ناظری نصب ایلدی و آنی  
کندوسنه وزیر ایتدی و زلیخایی نکاح ایله آکا ویردی .

زلیخا ایسه بر حکمدارک قیزی و کوزلارک سرافرازی ایدی . حضرت  
یوسفک آندن ( افراییم ) و ( منشا ) نام ایکی اوغلی ایله ( رحمت ) نامنده  
بر قیزی اولدی .

حضرت یوسف ، مصرده زراعتی چوغالتدی و یدی سنه ایچنده پک  
چوق ذخیره ادخار ایتدی .

بعده قحط و غلا سنه لری کلدی . یدی ییل سوردی . اقلیم مصردن  
بشقه شام طرفنده دخی قحط و غلا واریلدی .

مصرک میری انبارلرندن بشقه بر یرده ذخیره بولماز اولدی . هرکس  
وارینی و یروب ذخیره آلوردی . مصر خزینهلری نقود ایله طولدی .

هر کسه ایستدیکی قدر ذخیره ویرلسه بر طاقم طمعکارلر لزومندن زیاده  
ذخیره آلوب ودها زیاده بهالو صاتمق ایچون صاقلایوبده بر مرتبه ده  
اسعارک غلا سنه سبب اولورلر دیو حضرت یوسف ، ذخیره یی نفوس موجوده یه  
کوره ویرردی .

ایشته اووقت یوسفك قرنداشلىرى دخى كنعان ایلندن قالقوب ذخیره  
آلمق ایچون مصره کیتمکه مجبور اولمشلر ایدی . یعقوب علیه السلام ایسه  
یوسفدن آیریلالی آغلاردی وحسرتی آتشیله جکریخی داغلاردی .

فقط کوچوك اوغلی (بنیامین) سائر قرنداشلردن زیاده یوسفه بکزدردی .  
حضرت یعقوب ، آنی یوسفك یرینه قویوب براز آنکله متسلی اولوردی .  
بو سبیدن ناشی یعقوب علیه السلام ، بنیامینی یاننده آلیقویوب دیگر  
اون اوغلانی ذخیره کتورمک ایچون مصره کوندردی . اون قرنداش ، مصره  
واردیلر ، یوسفك حضورینه کیردیلر . یوسف ، آنلری طانیدی . آنلر ،  
یوسفی طانیه مدیلر . زیرا بونجه ییللردنبرو آندن بر خبر آلمدینی جهتله  
« کیم بیلور ، نرده فوت اولدی ، کیتدی » دیرلر وصاغ قالمسینی خاطره  
کتورمزلر ایدی . قالدیکه : یوسفك دیوانی مهابتلو اولدیغدن آنك یوزینه  
پكده دقتلو باقمه مازلردی . حضرت یوسف ، آنلره « سز کیمسگز ، ایشگز  
نهر ؟ جاسوس اولمیه سگز » دیدی .

« حاشا بز جاسوس دکلز . بز ، بر بابانك اولادی یز و پدریمز بر پیرمخترمدر ،  
نبیّ ذیشاندر . آدی یعقوبدر » دیدیلر .  
« قاج قرنداشسگز » دیو سوردی .  
« اون ایکی قرنداش آیدك . بریمز قیرده تلف اولدی ، اون بر قالدق »  
« دیو جواب ویردیلر .

« شمدی بوراده قاجگز موجوددر » دیدی .

« بوراده اون نفرز » دیدیلر .

« بریگز نرده » دیدی .

« پدریمزك یانندهدر . تلف اولان قرنداشمزك یرینه آنکله متسلی اولور »

« دیدیلر .

« بو سوزلرگزك طوغری اولدیغنه شاهدگز وارمی » دیدی .

« بز غریب الدیارز ، بزى بوراده کیم طانور » دیدیلر .



يونك اوزرينه يوسف عليه السلام، هر برينك حصه سنه كوره ذخيره وبردكدن صكره بنيامين ايچون دخي بشقه جه بر حصه وبردی و جمله سنه ضيافت ورعايت ايتدی .

لكن « كوروپورسكز كه ذخيره خصوصنده نه قدر دقت وعدالت ايدپورم ومسافرله نصل رعايت ايدپورم . بر دها كلشكزده اوتنه كي قرنداشكزي دخي كتوريكز كه طوغري سويلديككزي بيلهيم واكر آني كتورمن ايسه گز سزه ذخيره يوقدر ، بنم يانمه كليكز » دیدی .

« آنلر، آگاه اولمقسزين ذخيره بدللريني يوكلرينك ايچلرينه يرلشديريكز » ديو مأمورلرينه تنيه ايلدی .

دونديلر، بابالرينك ياننه كلديلر « بابا ! اكر بنيامين بزمله برابر كيتمز ايسه بزه ذخيره ويرليه جك . آني ده بزمله برابر كوندلر . بز ، آني هر وجهله محافظه ايلرز » دیدیلر . يعقوب عليه السلام « مقدا يوسف حقنده نصل امين اولدم ايسه بنيامين حقنده دخي اويله جه امين اولورم . لكن الله تعالى خير الحافظين وارحم الراحمين در » دیدی .

برده يوكلريني آچوب ذخيره بدللريني بولونجه « دها نه ايسترز . ايشته سرمايه لر مزده كيرو ويرلش . همان ينه مصره كيدلم وزياده ذخيره كتوردم . بو كتورديكمز ذخيره بزه يتشمز » دیدیلر و بنياميني كوزتمك اوزره پدرلرينه قوي سوز وبردیلر والله عهد و پيمان ايتديلر و بنياميني دخي آلوب مصره كيتديلر . مصره وارد قلدننده يوسف عليه السلام ، آنلره ضيافت وزياده اكرام ورعايت ايلدی و بر آراق بنياميني تنها بولوب « بن سنك قرنداشكم . لطيفه يوللو بر وسيله ايله سني يولدن دوندروب اليقويه جغم . قيد ايمه ، ديو كيزلوجه سويلدی .

جمله قرنداشلرينك يوكلريني حاضر ايتديردی و بنيامينك يوكنه برالتون طاس قويدردی و دونوب كيتملري ايچون رخصت ویردی .

تمام يوله دوزيلوب كيدرلر كن آرقه لرندن مأمور مخصوص يتشدي « ای قافله ! سز خير سز مشكز ، ديو چاغردی .

يعقوب اوغللىرى دونوب « غيگىز ندر » ديدىلر .

« ملكك طاسى يوق . آنى هر كيم كتوررسه بر دوه يوكى ذخيره

مژدهسى وار . بنده اداسنه كفيلم » ديدى .

ديدىلر كه « بز بورايه فساد ايچون كلك ، خيرسزده دكلز »

ديدى كه « سوزيگىز يلان ايسه چالانك جزاسى ندر »

« هر كيمك يوكنده بولتورسه جزاسى اودر ، يعنى آنى اخذ واسير

ايتمكدر . بز ، خيرسزلره بويله جزا ايدرز » ديدىلر .

يونك اوزرينه قافله يي چويردى ويوكارى آرامغه باشلادى وابتدا بيوك

قرنداشرلك يوكلىرىنى آرادى . نهايت طاسى بنيامينك يوكندن چيقاردى .

ملك مصرك قانوننده خيرسزلى اخذ واسير ايتمك يوق ايدى . حضرت

يوسف ، بنيامينى آليقومق ايستدى . پدريتك شريعتنى قرنداشرلرينه

سويلتدردى وبو تقريبله بنيامينى اللرندن آلدى .

بيوك قرنداشرلى ديدى كه « اى عزيز ! بنيامينك بر اختيار پدرى

واردر . آنى بك سور ، آريلغنه طايانه ماز . آنك يرينه بزم برىمىزى

آليقوى . بيوك احسان ايتمش اولورسين » .

حضرت يوسف ديدى كه « بز ، سزكفتوا گىز اوزرينه آنى آليقويدق .

معاذالله بشقه سنى آلور ايسهك ظالم اولورز » آندن مايوس اوليجق كيرو

چكلدىلر وبريره كلدىلر . جمله سنك بيوكى ، ديكرلرينه خطاب ايدرك

« بيلمىسكز كه پدريگىز سزدن عهد آلدى . مقدا يوسف حقنده

نه پايديگىزى دخى بيلورسكز . بن ، بورادن آريلوب كيتم . مكر كه پدرم

طرفندن بكا اذن ورخصت ويريله ، ياخود الله طرفندن بو ايشه بر صورت

ويريله . كيديكز ، بابا گىزه سنك اوغللك خيرسزلق ايتدى . بز آنحق

كوردىكمزه شاهدز . طاس ، آنك يوكندن چيقارلدى ، كوردك . بز نه پايالم ؟

اينا نماز ايسهك تحقيق ايت . مصردن صور . بزمه برابر بولنان قافله دن صور .

ده ييكز « ديوب مصرده قالدى .

ديگر طقوز قرنداش دونديلر ، اوتانه رق وصيقيله رق پدرلری يانه  
کلديلر وکيفيتی کوردکاری کبی سويلديلر .

يعقوب عليه السلام ، آشوری محزون اولدی و « بوده بر دولابدر .  
يوخسه بزم شریعتمزده سارق اسیر ایدلديکني ملک مصر ، نه بیلور؟ صبر  
کوزل شیدر . اولا که جناب حق ، بکا اوچ قرنداشی بردن کتوره »  
دیدي . برو طرفه دوندی ( واه يوسف ! ) دیدي و حزن ايله آغلامقدن  
کوزلرینه آق کلدی .

اوغلاری « والله سن ، يوسف ديه ديه خسته ، يا خود هلاک اوله جقسین » دیدیلر .  
« بن قلبمه طوتامديغم حزن و کدرمی آنجق الله تعالی حضر تیرینه  
عرض ایدرم ، آندن غیری کیمسه يه عرض حال ایتیم . بنی حالمه براغکز ،  
بيلمديکگز شی وارکه بکا معلومدر ، دیدي .

يوسف ، غائب اوله لی یکر می بر ییل اولمشیدی . او وقتدنبرو برخبر  
آلنه مامش اولمسیله قرنداش لری آنک صاغلغندن امیدلرینی کسمش لری ایدی .

يعقوب عليه السلام ايسه يوسفك حالا حیاتده اولديغنی بیلوردی .  
يا ، اودر که الله طرفندن آگاوحی کله رک يوسفك صاغ اولديغنی بیلدر لمشیدی ،  
يا خود يوسفك کوچوکلکده کوروبده کندوسنه سويلش اولديغنی رؤيايه نظر آ  
آنک حضورنده قرنداش لری سجده يه وارمدجه وفات ایتیه جکني بیلوردی .  
بناء علی ذلك « اوغللرم ! کيدیگگز ، يوسف ايله بنیامینی آرايوب صوریکز  
واللهک لطفندن مأیوس اولمايیکگز » دیدي .

طقوز قرنداش ، ينه مصره واردیلر ويوسف عليه السلامك حضورينه  
کیردیلر . بنیامین دخی اوراده حاضر ایدی . « ای عزیز ! آچلقدن حالز  
یماندر . بیيجی چوق ، ينه جک يوق . المزده کی سرمایه دخی جزئی شیدر .  
سن ، لطف واحسان ایت ، احتیاجمه کوره ذخیره ویر . بزه تصدق ايله ،  
قرنداشمزی باغشلا . پدرمز پیر فانیدر ، يوسفدن آریله لی پک محزوندر .  
شیمدی بنیامینک آریلغی ، آکا بلا اوسته بلاددر . آغلامقدن کوزلری  
کورمز اولدی » دیوب یالواردیلر .



یوسف علیه السلام ، آرتق لطیفه‌ی برطرف ایتدی و تبسم ایدرهك « سز جاهل لكه یوسف نه یایدیغكزی بیلورمیسكز ؟ » دیدی .  
 قرداشلری ، اووقت آگاه اولدیلر . « آ ! سن ، یوسفمیسین » دیوب حیرتده قالدیلر .

« اوت . بن ، یوسفم . بوده قرداشمدر . جناب حق بزله لطف واحسان ایتدی . الله ، صبر ایدن قوللرینی محروم براتماز » دیدی .  
 آنلر دخی « جناب حق ، سنی بزله فائق ایلش . بزخطا ایتشز . » دیو عذر دیلدیلر وتوبه واستغفار ایلدیلر .

بونك اوزرینه حضرت یوسف ، آنلره تسلیت ویردی و « بوكون سزه سرزنش یوقدر . الله تعالی ، ارحم الراحمین در . سزی عفو ایدر . شوکوملكمی کوتوریکز ، پدریمك یوزینه سوریکز ، کوزلرینك پرده‌سی کیدوب اولکی کبی کورور . همده بالجه اهل وعیالکزی آلوب بورایه کتوریکز » دیدی و آنلری پدرلری طرفنه کونده‌ردی . وقتا که قافله ، مصردن آیریلدی . صانکه روزکار ، اوکوملكك قوقوسی آادی ودرحال کنعان ایلنه کوتوردی که همان اووقت یعقوب علیه السلام « یوسفك قوقوسی کلیور . آه بگا ، عته کتوردی دیمه‌سه‌یدیگز » دیو بیوردی . یاننده بولنانلر « سن حالا اسکی یا گلشلق واسکی شاشقینلق اوزرنده‌سین . یوسنی افراط اوزره سودیکگدن آنی لسانگدن دوشورمزسین و آنکله بولوشاجم دیو آرزو ایلرسین » دیدیلر . صکره اوغللری کلدی . یوسفك کوملكنی یوزینه قویدقلری کبی کوزلری آچیلدی . « بن ، سزه یوسفك قوقوسی کلیور دیمدیمدی » دیدی .

بعده یعقوب علیه السلام ، بالجه اوغللری واهل وعیاللری ایله مصره کیتدی .

یوسف علیه السلام ، مصرک (مَلِكْ) ی واهالیسی ایله برلکده اوله‌رق آنلری مصرک طیشاروسنده قارشولادی و آنلری آلوب سراینه کوتوردی . باباسنی

و آناسنی سریره چیقاردی. جمله سی، آنک ایچون سجده شکر ایتدیله. حضرت یوسف، او وقت باباسنه «ایشته بنم مقدا کوردیکم رؤیانک تعبیری بودر که عینیه چیقدی. ربم بکا لطف واحسان ایتدی که بنی زنداندن چیقاردی و سزی چولدن کتوردی، جمله مزی برلشدیردی. ربمک حکمتی چوق و لطف و کرمنه نهایت یوق، دیدی و دونوب جناب حقه حمد و شکر ایتدی.

بووجهله یعقوب علیه السلام، یوسفنه قاوشدی و مرادینه ایردی. آندن صکره جمله اوغلرله برابر مصرده اون یدی سنه دها عمر سوردی. حضرت یعقوبک و فاتنده یوسف علیه السلام، اللی آلتی یاشنده ایدی. بعده یوز اون یاشنه قدر یاشادی.

ایشته بووجهله بنی اسرائیل، ممتاز و محترم بر صنف اوله رق مصرده یرله شوب و تناسل ایدوب چوغالدیلر.

ابتدا حضرت یوسفی وزیر ایدن ملک، وفات ایتدی. بعده یوسف علیه السلام دخی دار عقبایه کیتدی. آندن صکره کلن ملوک مصر، بنی اسرائیله اعتبار ایتدیلر.

### قصه ایوب علیه السلام

اسحق علیه السلام اوغلی اولان عیصک اولاندن (ایوب) علیه السلام ظهور ایتدی. پک چوق مالی و دمشق طرفنده نیجه املاکی وار ایدی. جناب حق، آتی محک امتحانه چکدی. جمله اموالی و املاکی لندن کیتدی، او شکر ایتدی. مریض اولدی، صبر ایتدی. بدننه یاره لر آچیلدی، ینه صبر ایتدی. یاره لر ی قورتلاندی، یننه کیمسه وارماز اولدی، یالکز زوجه سی (رحمت) آکا خدمت ایدردی. او، ینه صبر ایدر و عبادتنه دوام ایلر ایدی.

صکره شفا بولدی. جسمی اولکی کی تروتازه اولدی و جمله اموال و املاکی یرینه کلدی دنیا و آخرت سعادتنه نائل اولدی.

( بشر ) نامنده براوغلی اولوب کندوسندن صکره یرینه کچدی . ویغمبر اولدی .

### قصه شعیب علیه السلام

( شعیب ) علیه السلام، حضرت ابراهیمك آتسه آتدینی کون ایمان ایدوبده آنکله برابر دیار شامه هجرت ایتش اولان برقیله دندر و بیوک والدہ سی لوط علیه السلامک قیزدر .

( مدین ) و ( ایکه ) اهالیسنه مبعوث اولدی . طاتلی دیلی و سوزی . تأثیرلی ایدی . لکن قومه سوزکچره مدی . بونجه مدت کوزل کوزل نصیحتلر ایلدی و یک چوق تأثیرلی سوزلر سویلدی ، تأثیر ایتدیره مدی .

نہات جناب حق ، اصحاب ایکه اوزرینه برشدتلی صیجاق مسلط ایلدی . بوصیجاق، یدی کون سوردی . بتون ایرماقلر قینادی . صکره اوزرلرینه بر بولوط کلدی . صیجاقدن قاجوب هپسی آنک آتته طویلاندی . بولوطدن آتش یاغدی ، جمله سی یاندی . اهل مدین دخی بر صیحه ایله تلف اولدی .

حضرت شعیب ، کندوسنه ایمان ایدنلری آلوب مکيه کیتدی . آندن صکره وفاتنه دکین مکده عبادت ایله مشغول اولدی . مدینده ایکن بر قیزی حضرت موسایه ویرمشیدی . نته کیم آشاغیده بیان اولنه جقدر .

### قصه موسی و هارون علیهما السلام

حضرت یوسفدن صکره مصرده بنی اسرائیل ، یک زیاده اوره یوب چوغالدیلر ویعقوب ویوسف علیهما السلامک شریعتلری اوزره قالدیلر .

مصرک قدیم یرلوسی اولان ( قبط ) قومی ایسه ییلدیزلره و بتلره طاپارلردی و بنی اسرائیله حقارت کوزیله باقارلردی .

فرعونلر، یعنی مصرملکلری دخی بنی اسرائیلی کندولرینه رعیه ایدوب



آنلری اسیر کی آغیر و مشقتلی ایشلرده قوللانورلردی و آنلرک کوندن کونه چوغلاملارندن شبه‌لنورلردی .

بنی اسرائیل، قبط قومنک معامله‌لرندن و ملکلرینک آغیر تکلیفلرندن بزمش، اوصانمش ایدیلر . دده‌لرینک قدیم یوردلری اولان (کنعان) دیارینه کیتمک ایستزلردی، لکن بر درلو یاقه‌لرینی فرعونک پنجه‌سندن قورتاروبده مصردن چیقمازلردی .

زیرا بنی اسرائیل، اون ایکی قبیله ایدی وهر قبیله، حضرت یعقوب اوغللرندن برینه منسوب ایدی وهر قبیله‌نک بر شیخی وار ایدی. بونلره (اسباط بنی اسرائیل) دنیلورکه یعقوب طورونلری دیمکدر .

اشبو اسباط بنی اسرائیلک جمله‌سی بر یره کلکسه خلیجه قوت حاصل اوله‌بیلوردی، لکن جمله‌سنه بر باش کرک ایدی که هپسی برله‌شهرک یکوجود اولوبده کندولرینی اسارتدن قورتاره بیلسونلر .

او آنده برکاهن، فرعونه خبر ویرمش و « بنی اسرائیلدن بر چوجق طوغاجق و سنک دولتکک زوالنه سبب اولاجق » دیمش .

فرعون، بوندن اورکوب بنی اسرائیلدن طوغان ارکک چوجقلری اولدرتمکه باشلادی وهرسمته جلادلر تعیین ایلدی .

جلادلر، بنی اسرائیلک خانه‌لرینی طولاشوب یکی طوغان ارکک چوجقلری اولدرمکده اولدقلری ائنده (لاوی) سبطندن، یعنی حضرت یعقوبک اوچنچی اوغلی اولان لاوینک طورونلرندن (عمران) نام ذاتک صلبندن حضرت (موسی) دنیا‌یه کلدی .

والده‌سی، آنی برصندوقه ایچنه قویوب نهرنیله آتدی. نیل ایله آقوب کیدرکن فرعونک زوجه‌سی (آسیه) آنی طوتدی . آچوب موسایی کورنجه آککا جان و کوکلدن محبت ایتدی. « امان بونی اولدرمیگیز. بلکه بی‌سورده ایش‌مزه یارار، یاخود آنی اوغول ایدینورز » دیدی و آنی

امزیرمك اچون پك چوق سوت آنار كتورتدی . موسی، هیچ بریسنك  
ممه سنی آلمدی .

والده سی ایسه آنی نیله براق دق دق نصکره آرقه سنه کوزجی قومشدی .  
سرای فرعونه آلدیغنی وسوت آنا آراندیغنی اوکرندی وسوت آنالغه  
کندوسنی عرض ایتدردی .

آسیه، آنی کتورتدی . موسی، درحال آنك ممه سنی آلدی وفرعونك  
طاقندن کیمسنه آگاه اولمق سزین والده سی، کندی اوغلنی فرعونك  
سرائنده امزیروب بیوتدی .

حضرت موسی، بیودکن صکره برکون مصرده کزرکن کوردی که:  
بنی اسرائیلدن بریله بر قبطی، غوغا ایدیور . قبطینك کوکسنه بر یومروق  
اوردی، قضارا قبطینك جانی چیقویردی .

حضرت موسی، لندن بویله بر قضا چیقدیغنه تأسف ایتدی وفرعوندن  
قورقوب هان مصردن فرار ایله (مدین) ه کیتدی وشعیب علیه السلام  
بر قیزی آلدی . بو جهته اون سنه منینده قالدی .

بعده اهل و عیالی آلوب مصره کیدرکن (طُور) طاغنه اوغرا دی .  
اوراده الله تعالی حضرتلریله سویله شدی و آندن مصره واروب بیوک  
قرنداشی (هارون) ایله کوروشدی .

موسی و هارون علیهما السلام، فرعوننی دعوته مأمور اولدقلرندن  
فرعونك یانسه کتدیله و آنی دین حقه دعوت ایتدیله و «بنی اسرائیلی  
براق. آنلری الالم، اجدادمنك وطن قدیملری اولان دیار کنعانه کیده لم»  
دیدیلر .

فرعون، تعجب ایدرك حضرت موسایه «سن چوجق ایکن بزم سرائم زده  
بیودك، صکره بر صوچ ایشله دك و بورادن فرار ایلك . شمدی دونوب  
کمش سك، نه دیمك ایستورسین» دیدی .

موسی علیه السلام دخی «اوت . المدن بر قضا چیقدی . بر قبطی یی  
اوردم، خطاء اولدرم و قورقومدن قاچدم . شمدی رب العالمین، بکا

نبوت و رسالت و یردی و سنی دعوت ایچون کوندردی « دیو جواب و یردی .

فرعون دیدی که « رب العالمین نه در » .

موسی علیه السلام « یرلک و کوکلرک و سائر مخلوقاتک رببدر » دیدی .  
فرعون، غضبه کلوب « مصرده بندن بشقه رب یوقدر . اکر سن بندن  
بشقه رب و آله طانور ایسه ک سنی زندانه قورم » دیو حضرت موسایی  
قورقوتدی .

موسی علیه السلام، عصاسنی یره یراقدی . همان بر بیوک اژدر اولدی،  
حرکته باشلادی .

فرعون ، آندن اورکدی و مقدا کاهنک خبر و یردیکی چوجق بو  
اولسون دیو فکر و اندیشه یه دوشدی . اطرافنده کی قرناسنه « نه بیوررسکیز،  
موسی صنعتنده ماهر بر بیوک ساحردر . سحر بازلقه سزک اعتقاد گزی  
بوزوبده مصر حکومتی ضبط ایتک ایستر » دیدی .

آنلر دخی « براز امهال ایت . اطرافه مأمورلر کوندرد . نه قدر ماهر  
ساحرلر وارسه کتورسونلر . موسی ایله هارونه غالب کلسونلر » دیو رای  
و یردیلر .

او وقت سحر بازلق ، عالمده پک رواجلی بر صنعت اولمش و هر طرفده  
اعتبار بولمش ایدی .

فرعون طرفندن هر ناحیه یه مأمورلر کوندردی . نه قدر صنعتنده  
ماهر ساحرلر وار ایسه مصره کتورلدی و قبطیلرک سنه باشنده کی بیرام  
کونی بر محل معینه طویلانمق اوزره هر کسه اعلان ایدیلدی .

او کون هپ مصر اهالیسی ، اوراده طویلاندی . سحر بازلر دخی  
اورایه جلب اولندی . سحر بازلر ، میدانه چیقوب « فرعونک عزتی حق  
ایچون بز غالبز » دهرک آلات و ادوات سحر اولان ایپلرینی و دکنکلرینی  
اورته یه آتدیلر و کوز باغچیلق ایله بر طاقم ییسلانلر کزیور کبی کوسترشلر  
ایتدیلر .

هان موسی علیه السلام، عصاسنی، براقدی. عصا، بریوک اژدر اولوب  
آلات وادواتی یوتدی .

سحر باز لر کوردیلر که نه ایپ وار، نه دکنک وار. حال بوکه اکر  
موسانک ایشی دخی سحر اولسه یالکیز کندی کوسترشلی محو اولمالی  
ولکن ایپ ودکنک کبی آلات وادوات موجود قالمالی ایدی. «بومطلقا  
طوق بشرک خارچنده بر معجزه در» دیدیلر و حضرت موسایه ایمان ایتدیلر.  
فرعون، پک زیاده غضبه کلدی و «مکر موسی سزک اوسته گز ایمش.  
اولجه آنکله ایشی پیشورمش سگیز و بنی اسرائیل ایله برلکده مصری ضبط  
ایتمکه قرار ویرمش سگیز. باقکیز بن سزه نه یاپارم. اللرگزی وایاقلرگزی  
کسرم و سزی خرما داللرینه آصارم» دیدی.  
آنلر دخی «بأس یوق. بزه، موسانک تگریسنه ایمان ایتدک. بزه، آنجق  
آنک عفو و مرحتنی ایسترز» دیدیلر.

بوندن صکره دخی موسی علیه السلام، پک چوق معجزه لر کوستردی.  
کک فرعون وکک قومی ایمانه کلدی.

قبط قومک برطاقی «موسایه نیچون بو قدر میدان ویرملی، خلقک  
ذهنلرینی اخلاص ایدیور. آنک حرکتی، عادتاً افساد مملکت وخلق عصیان  
دعوت دیمکدر» دهرک فرعوننی تحریک ایدرلردی.

حال بوکه اسباط بنی اسرائیلک کافه سی حضرت موسایه تابع اوله رق  
یکوجود اولمشلر و بو سببله کندولرینی اسارتدن قورتاره بیله جک بر حاله  
کلشلر ایدی.

بناء علی ذلک فرعون دخی بر آزالق دفع بلا قیلنندن اوله رق بنی  
اسرائیلک مصردن چیقوب کیتملرینه رخصت ویرمشیدی. صکره نادم  
اولدی.

موسی علیه السلام ایسه بر وقت تعیین ایدرک بتون بنی اسرائیل ایله  
خبرلشدی و کیجه لین آنلری مصردن چیقاردی. (و بحر قلزم) یعنی سویش  
دکزی کنارینه کوتوردی.



فرعون، طویوب همان اطرافده کی عسکری نی طویلا دی. بنی اسرائیلک آرقه سنه دوشدی و صبا حلین آنلره یاقلاشدی. موسی علیه السلام، عصا سیه دکزه اوردی. دکنز یاریلدی، اون ایکی یول آچلدی. اون ایکی اسباطک هر بری بر یولدن کیتدی. فرعون عسکریله آنلری تعقیب ایتدی. بنی اسرائیل کچوب قورتولدی. صکره دکنز قاووشوب فرعون، عسکریله برابر بوغولدی.

بو صورتله موسی علیه السلام، دشمنلرینه ظفر بولدی و بنی اسرائیل ایله برابر دیار کنعانه عازم اولدی.

یولده عمالقهدن بر قومک یوردینه اوغرا دیلر. کوردیلرکه: اوکوز صورتنه طایورلر. بنی اسرائیل ایسه هر نه قدر حضرت موسایه تابع اولمشلر ایسه ده مصرده ایکن کوزلری بو مثللو صورتلره آلمش و ذه نلرنده هنوز توحیدباری یرلشمه مش اولدیغندن او قومک اوکوز صورتلر نی کوردکلری کبی آنلره میل ایتدیلر و همان «یا موسی آنلرک آلهه سی کبی بزه دخی بر اله تدارک ایت» دیدیلر.

حضرت موسی «سز بر جاهل قومسکنز. آنلرک عبادت لری باطلدر. اللهدن غیری آله اولورمی؟ سز رب العالمین حضرتلرینک ویردیکی نعمتک قدر و شکرینی بیلمیورسکنز. سزی سائر قوملردن ممتاز قیلدی، فرعون، سزه اذیت ایدروا و غلار گزی کسرایکن الله سزی قورتاردی» دیو نصیحت ایتدی. او وقت دیار کنعانه ک بیوک شهرلر (اریحا) و (نابلس) و (قدس) اولدیغندن همان اوغورلرینه کلن اریحا بلده سنه طوغری کیتدی.

فقط بورلری او وقت عمالقه طوائفندن بر طاقم جباره النده اولوب آنلری اورادن محاربه ایله چیقارمق لازم کلوردی.

بنی اسرائیل «بز، جباره ایله محاربه ایده میز» دیو کیر و چکل دیلر. حضرت موسی دخی کو جنوب آنلره بد دعا ایتدی. بوسبدن ناشی (تیّه) صحرا سنه دوشدی و قرق سنه اوراده طولاشدیلر، بر طرفه چیقوب کیده مدیلر.

مصرده ایکن چکدکری بونجه اذیت و سفالتلری اونوتدیلر و «کاشکی مصردن چیقماسه یدق» دیمکه باشلادیلر .

تیه صحراسنده بولندقجه آنلره جناب حق ، قدرت حلواسی کوندرر و سلوی قوشی ایندیرر ایدی . آنلر دخی بونلرله خوشجه کچینورلردی . قدرت حلواسیله سلوی قوشندن اوصاندیلر «بز ، بقله و صوغان کبی حبوبات و سبزه ایسترز» دیدیلر .

حضرت موسانک آرتق جانی صیقیلوب «هایدی مصره کیدیکز . ایستدیکز شیلر اوراده واردر» دیو رد ایله جواب ویردی .

جانب حقدن حضرت موسایه بر کتاب ایندیرلک موعود اولدیغندن طور طاغنه دعوت بیورلدی . موسی علیه السلام دخی قرنداشی هارونی یرینه وکیل ایتدی و کندوسی طوره کیتدی .

قرق کون طورده خلوت و عبادت ایدوب واسطه سز اوله رق جناب حقک کلامنی ایشتدی . ایشته اووقت آکا (تورات شریف) نازل اولدی . حال بوکه بنی اسرائیل ، مصرده ایکن دوکون ویرام دیو قبط قومندن ایکره قی اوله رق بر طاقم آلتوندن مصنوع حلیات آلمشلر و آب آنسزین مصردن چیقوب آنلری صاحب لرینه ویره ممشلر ایدی .

تیه صحراسنده ایسه کوی و قصبه اولمادیغندن آلتونک و کومشک اعتباری یوق ایدی . بوجه تله بی اسرائیل ، بوایکره قی حلیاتی بیونلرنده کی وباللری کبی یهوده کندولرینه یوک ایدوب طاشیورلردی .

ایچلرنده (سامری) نامنده بر منافق اولوب آنلری آلدادی و او حلیاتی طوپلاتدی . جمله سنی آتشه قویوب اریتدی و صنعتله آلتوندن بر بوزاغی صورتی یابدی که بوزاغی کبی سس ویریردی «ایشته سزک آلهمکز و موسانک دخی آلهمی بودر . موسی ، آنی ارایوب بولمق ایچون طوره کیتدی . کلیگز ، بوکا طاپکیز» دیدی . آنلر دخی او بوزاغی یه طایمغه باشلادیلر .

هارون علیه السلام ، هر نه قدر نصیحت ایتدیه ده قولاق آصمدیلر . «موسی کلهنجیه دک بز بوزاغیدن واز کچمیز» دیوب هارونه مخالفت ایلدیلر .

موسیٰ علیہ السلام، تورات شریف ایلہ طور دن کلدی . نه کورسون که بنی اسرائیل بوزاغی یه طاپور لر . پک زیاده غضبلاندی . سامری یی لعنلمه ایتدی و بوزاغی صورتی یاقددن صکره دکزه آتدی . « نیچون قومی کوزتمدکده سامری یه آلداندیلر » دیو هارون علیه السلامک صقالندن طوتدی .

هارون « بن نه یاهیم . بوقدر نصیحت ایتدم ، دیکله مدیلر . آز قالدی که بنی اولدیره یازدیلر ، دیو اعتذار ایتدی . بوزاغی یه طاپمش اولانلر دخی ایتدکدرینه پشیمان اولدیلر . یالواردیلر و کناهلرینه توبه و استغفار ایلدیلر .

بووجهله حضرت موسانک حدتی کچدی وبعده تورات شریفی میدانه قویدی . آندن صکره بنی اسرائیل، آنک مقتضاسیله عمل ایتمکه باشلادیلر و توحید باری یی کوچ حال ایلہ ذهنلرنده یرلشدیره بیلدیلر .

بونک اوزرینه نیچه ییللر کچدی و برقرن ده کیشدی . جبارله ایلہ محاربه دن اورکوبده کیر و دونلرک چوغی فوت اولدی و آنلرک یرینه چولده بیومش و شهر و قصبه کورمه مش یوره کلی یکیتلر یتشدی . بوجهتله بنی اسرائیل ، دشمن قارشوسنه چیقہ جق و حرب و ضربه قادر اوله جق بر حاله کلدی .

حضرت موسیٰ، بنی اسرائیلی آلوب بحر لوطک جنوب طرفه کتوردی و آندن ایلرو حرکت ایدرک (عوج بن غنق) نام ملک ایلہ محاربه ایتدی و آکا غالب کلدی . بوجهتله (نهر شریعه) نک شرق طرفده کی بلاده مالک اولدی . (حتی) (اردن) دینلن نهر شریعه یالسنه ایندی و اریحاشهرینک قارشوسنده کی طاغه چیقدی و اورادن بنی اسرائیله موعود اولان کنعان دیارینی تماشا ایتدی .

مقدما هارون علیه السلام فوت اولمشیدی . بو کره موسیٰ علیه السلام دخی یوسف علیه السلامک اوغلی (افراییم) ک سبطدن (یوشع) نام ذاتی یرینه خلیفه تعیین ایتدی و کندوسی دار عقبایه کیتدی .

بنی اسرائیلک تیه صحرا سنده مدت اقامت لری ، حضرت موسانک وفاتنده تمام قرق سنه یه بالغ اولمشیدی .

دنیا یارادیلالی قاچ ییلدر؟ بونی الهدن باشقه کیسه بیلمز .

حضرت آدمک یر یوزینه ایندیکی وقتدن طوفان نوحک ظهورینه قدر و طوفاندن حضرت موسانک وفاتنه قدر قاچ ییل کچمشدر ؟

بو دخی مورخلر بیننده بر اختلافلی مسئلهدر . طوغریسنی آنجق الله تعالی حضرتلری بیلور . زیرا او زمانلرده یازلمش بر تاریخ یوقدر . او و قتلرک احوالی ، یالکز تورات شریفده مذکوردر . حال بوکه شمدی الده بولنان تورات نسخهلری بر برینه اویماز . قغیسی طوغریدر نه بیللم؟

فقط مورخلر بیننده مشهور و معتبر اولان روایتیه کوره دور آدمدن طوفانه قدر ( ایکی بیک ایکیوز قرق ایکی ) و طوفاندن حضرت موسانک وفاتنه قدر ( بیک آلتی یوز یکرمی آلتی ) ییل کچمشدر . بو حسابیه کوره دور آدمدن وفات موسایه قدر ( اوچ بیک سکز یوز آلتمش سکز ) ییل کچمش دیمک اولور .

حضرت موسانک شریعتی ، حضرت عیسانک بعثتنه قدر باقی قالدی . ایکینسک آراسنده کلوب کچن پیغمبرلر ، هپ شریعت موسی علیه السلام ایله عمل ایتمک اوزره مبعوث و مأمور اولدی .

موسی علیه السلامدن صکره پک چوق وقت بنی اسرائیلک امورینی بربری آرقه سی صره کلن حاکمکر ، تدیر و اداره ایتدی .

بو حاکمکر ملک اولیوب جمهور بنی اسرائیلک رئیس لری و قاضیلری مقامنده ایدیلر .

فقط اسباط بنی اسرائیلک اون ایکیسی دخی آنلرک حکمنه اطاعت ایدرلردی . بو جهتله آنلر ، ملوکک یرینی طوتارلردی .

ایشته بولنره ( حکام بنی اسرائیل ) دینلورکه اولکیسی یوشع واک صکره کیسی ( اشموئیل ) علیهما السلامدر . ایکیسی دخی بنی اسرائیل پیغمبرلرنددر .



## قصه يوشع عليه السلام

موسیٰ علیہ السلام دن صکره یرینه (یوشع) علیہ السلام کچدی وحضرت موسانك وفاتندن اوچ کون صکره بنی اسرائیلی آلوب چولدن چیقاردی. شریعه نهری کنسارینه کتوردی، کوپری وقایق اولمدینی حالده معجزه اوله رق بنی اسرائیلی نهیر شریعه نك بری یاقه سنه کچوردی وهمان ایلرو یوریوب اریحا بلده سنی فتح ایلدی.

بو طریقله بنی اسرائیل چوللرده طولاشمقدن قورتولدیلهر ووده لرینك وطن قدیملری اولان کنعان دیارینه داخل اولدیلهر.

حضرت موسیٰ، مصردن چیقارکن حضرت یوسفك تابوتی برابر آلوب تیه صحراسنه کتورمشدی. وفاتنده آنی یوشع علیہ السلامه تسلیم ایتدی واریحایی فتح ایتدکن صکره نابلسه کیتدی وحضرت یوسفك جسد شریفی مقدما قرنداشلری طرفندن صالتش اولدینی یرده دفن ایلدی. آندن صکره یوشع علیہ السلام، دیار شامی ضبط ایتدی وهر طرفه مأمورلر طاغندی ویکرمی سکز سنه بنی اسرائیلک امورینی تدبیر ایتدکن صکره دارعقباه کیتدی. بعده صره سیله پك چوق حاکم کلوب بنی اسرائیله رئیس اولدیلهر. بنی اسرائیل، کاه طوغری یوله کیدرلر وکاه عصیان و طغیان ایله شریعته مخالف حرکت ایدرلر ایدی.

آنلر اویله یولسز حرکت ایتدکجه جناب حق، آنلرک اوزرینه بر دشمن مسلط ایتمکله کاه اسارته وکاه باشقه درلو مصیبتیه اوغرارلر وکاهیجه حاکمسنر قالب پریشان اولورلر و صکره الله تعالی یه یالواروب بو مثللو فلاکتلردن قورتولورلر ایدی. نهایت اشموئیل علیہ السلام، حاکم اولوب اون بر سنه بنی اسرائیلک امورینی تدبیر ایتدی.

بو اون بر سنه نك ختامنده حضرت موسانك وفاتندن درت یوز طقسان اوچ سنه کچمشدی. ایشته اووقت حکام بنی اسرائیلک دوری، بیتدی و(ملوک بنی اسرائیل) دوری ظهور ایتدی.

شویله که : او ائناده فلسطین دبارنده حکومت ایدن عمالقہ بقیہ سی بنی اسرائیلہ غالب کلشیدی .

بنی اسرائیل، کندولرخی دہروب دہوشیروب دہ عمالقہ دن انتقام آلا بیلیمک ایچون ایچلرندن برینک ملک نصب اولمنسی حضرت اشموئیلدن نیازایدیلر . اودخی ( طالوت ) انتخاب ایلدی . ایشته ملوک بنی اسرائیلک برنجیسی بودر . طالوت ، تخت سلطنتہ کچدکدن صکرہ اشموئیل علیہ السلامک تدیری اوزرہ بنی اسرائیلدن براردو ترتیب ایتدی وفلسطین اوزرینہ کبتدی .

عمالقہ اردوسی قارشو کلدی ورئیساری اولان ( جالوت ) کہ غایت بویلی ویورہ کلی برشخص ایدی . میدانہ چیقوب اردیلہ دی .

( یہودا ) سبطندن ، یعنی حضرت یعقوبک اوغلی یہودانک نسلندن اولان حضرت ( داود ) دخی طالوت طرفندن چیقدی و جاوتی قتل ایلدی .

بونک اوزرینہ عمالقہ اردوسی بوزلدی و بنی اسرائیل نائل مرام اولدی . حضرت داود دخی زیادہ شہرت آلدی . بعدہ اشموئیل علیہ السلام فوت اولدقده بنی اسرائیل حضرت داودہ میل و محبت ایتکله داودک قدر و اعتباری بر مرتبہ دہا ترقی بولدی .

طالوت ایسہ آگا حسد ایدرک حضرت داودی اولدرمکہ قالدقشدی . او دخی قاچوب بر طرفہ صاوشدی و بعدہ طالوت ینہ عمالقہ ایله محاربه یہ کیرشدی و نہایت عمالقہ النده مقتول اولدی . یرینہ اوغلی کچدی . لکن اسباط بنی اسرائیل آرمسنہ تفرقه دوشدی . بر فرقه سی ، یعنی یہودا سبطی داودہ تابع اولوب باقی اون برقیلہ طالوت اوغلنک حکمنده قالدی . لکن صکرہ بو اون برقیلہ دخی حضرت داودہ بیعت ایتدی و جملہ بنی اسرائیل آگا رام اولدی .

### قصہ داود و سلیمان علیہما السلام

اشموئیل علیہ السلامک وفاتندن صکرہ داود علیہ السلامہ پیغمبرک کلدی و طالوتک وفاتندہ بروجہ بالا ابتدا یہودا قبیلہ سی و صکرہ اسباط

سائر بيعت ايتدی . الحاصل اسباط بنی اسرائيلك كافه سی آنك حکمنه کچدی .

بوصورتله داود عليه السلام ، نبوت ايله سلطتی جمع ایلدی و بلاد کنعان دن هنوز بنی اسرائيلك یدینه کچمه مش اولان قدس طرفلرینی و سائر یرلری ضبط ايله قدس شریفی پای تحت ایتدی . بونلردن باشقه بلاد عمانی و حلب و نصیبین و ارمنستانی دخی فتح ایلدی و حضرت داوده زبور نازل اولدی . لکن زبور، هپ نصاح و الهیاتدن عبارتدر . آنده احکام شرعیه یوقدر . بناءً علیه داود عليه السلام دخی سائر انبیاء بنی اسرائيل کبی شریعت موسی ايله عامل ایدی .

قرق سنه بو منوال اوزره حکومت ایتدی و حضرت موسانك وقتندن بشیوز اوتوز بش سنه کچدکه دار آخرته کیتدی .

اوغلی سلیمان علیه السلام ، اون ایکی یاشنده ایکن آنك یرینه کچدی و او دخی پدری کبی سلطنت ايله نبوتی جمع ایتدی .

درت سنه صکره پدرینك وصیتی اوزره بیت المقدسك، یعنی مسجد اقصانك بناسنه باشلادی ویدی سنه ده آتمام ایلدی . بعده قدس شریفده بر بیوک حکومت سرایی انشاسنه کیرشدی . او دخی اون اوچ سنه ده ختامه ایرشدی و برسنه صکره ملوک حمیردن یمن ملکه سی اولان ( بلقیس ) کلوب آنکله کوروشدی .

بعده شرق و غربده اولان ملوک ، هپ آکا صورت اطاعت کوستردیلر و پك چوق هدیه لر کوندردیلر .

حضرت سلیمان دخی قرق سنه بو وجهله حکومت ایتدکن صکره وفات ایتدی . و اوغلی تحت خلافتیه کچدی . لکن یالکز ( یهودا ) و ( بنیامین ) سبطلری آنك زیر اطاعتنده قالدی ، امادیکر اون قبیله آیریلوب ( افرایم ) سبطندن و حضرت سلیمانك خدمه خاصه سندن برینی کندولرینه ملك انتخاب ایتدیلر و باشقه بر دولت تشکیل ایلدیلر .

بوصورتله بنی اسرائیل، ایکی دولته منقسم اولدی . بریسنه ( یهودا دولتی ) و دیگرینه ( اسرائیل دولتی ) دینلدی . یهودا دولتنک پای تختی قدس شریف اولوب ملکری دخی حضرت سلیمانک اوغلری و طورونلری ایدی و بونلر سانکه خلفای اسلام مقامنده ایدیلر .

بو دولت ، اگرچه ایکی سبطدن عبارت ایسه ده علماء بنی اسرائیلک کباری ، هپ قدس شریفده و بنی اسرائیلک معبد و زیارتگاهای اولان بیت المقدس و تورات شریف ایله حضرت موسانک عصاسی کی امانات شریفه هپ اوراده بولندیغندن بو دولت ، انظار ناسده معتبر اولوب حکومتلرینه مشروع و صحیح نظریله باقیلور ایدی .

اسرائیل دولتی ، اون سبطدن عبارت اولوب ملکرینه ( ملوک اسباط ) دینلور و بونلر حضرت سلیمانک نسلندن اولان دولت یهودا خلیفه لرینه عاصی و باغی صاییلور ایدی . ملوک اسباطک پای تختی ابتدا نابلس اولوب صکره ( سامریه ) یعنی ( سَبَسْطِیَه ) شهرینی بنایتیدیلر و آنی پای تخت اتخاذ ایلدیلر .

بنی اسرائیلک اون قبیله سی ، اشبو اسرائیل دولتنه تابع ایدی . آنجق ایچلرنده احکام شرعیه لایقوله اجرا اولمازدی . حتی قدس شریف زیارتی دخی ترك ایتشلر ایدی . بر آراق بو اسرائیل دولتنده بت پرستلک آیینی دخی ظهور ایتدی . حتی ( بعل ) دینلن بته طاپار اولدیلر و کیده کیده بتون بتون شریعت موسویه دن آیریلدیلر .

اگرچه یهودا دولتنده دخی بر آراق بو مثللو شرك و معاصی یه دائر بدعتلر ظهور ایتدیه ده آنک حالی ، اسرائیل دولتنه نسبتله دهاهون ایدی . زیرا هر وقت قدس شریفده پک چوق علما بولنور و مسجد اقصاده تورات شریف اوقونور ایدی .

ایشته او عصرده ( الیاس ) و ( الیسع ) علیهما السلام ، اسباط بنی اسرائیله مبعوث اولشلر ایدی .



## قصه الیاس و الیسع علیهما السلام

الیاس علیه السلام، مبعوث اولدقده قومی (بعل) نام پته طایمقده ایدیلر. «بعلدن واز کچیکیز و جمله نك خالق اولان الله تعالی حضرتلرینه عبادت ایدیکیز» دیو نصیحت ایتدی. دیکله مدیلر. اللهك عذابيله قورقوتدی، قولاق آصمیوب حضرت الیاسی بلده لرندن طرد ایتدیلر.

جناب حق، آنلرك بلده لرندن برکتی قالدیردی. یاغمور یاغماز اولدی. آچلقدن لاشه لر یدیلر و نهایت حضرت الیاسی آرایوب بولدیلر و آنك نصیحتيله عامل اولدیلر. الله تعالی حضرتلری دخی آنلرك اوزرندن بو بلایي رفع ایلدی.

صکره ینه کافر وفاجر اولدیلر. الیاس علیه السلام دخی اوصاندی واللله نیاز ایدوب اذن آلدی و آنلرك ایچندن چیقوب بر طرفه کیتدی و آنلردن آریلوب عزلت ایتدی.

آندن صکره یرینه (الیسع) علیه السلام کچدی وناسه وعظ ونصیحت ايله مشغول اولدی. بعده کندوسنه نبوت کلدی و او دخی بر مدت بنی اسرائیلک احوالی اصلاحه چالشدی.

بنی اسرائیل ايسه کوندن کونه آزیتدیلر و کتاب اللهی ترك ایتدیلر وهان ملك و مملکت منازعه لريله اوغراشور اولدیلر. نهایت جناب حق آنلرك اوزرینه دولت (آثوریه) یی مسلط ایلدی. ایشته او عصرده (یونس) علیه السلام دخی دولت آثوریه نك پای تختی اولان (نینوا) شهری اهالیسنه مبعوث اولمشیدی.

## قصه یونس علیه السلام

حضرت یونس دخی انبیاء بنی اسرائیلدن اولوب نینوا اهالیسنه مبعوث اولدی و آنلری توحیده دعوت ایتدی. آنلر بتلرینی ترك ایلدیلر. «الله

طرفندن عذاب کله جک و قرق کونه قدر نینوا شهری یره باتاجق» دیو قورقوتدی، ینه قولاق آصمدیلر.

حضرت یونس دخی آنلره طاریلدی و مایوس اولدی، غضب وحدت ایله دجله کنارینه ایندی و بر طولش گمی به بیندی.

حال بوکه الله تعالی طرفندن وحی کلدکجه پیغمبرلرک محل مأموریتلرینی بر اقوبده بر طرفه کیددیورملری جائز دکل ایدی. آنک ایچون گمی یورومدی. گمی رئیس ایچمزدده بر صوچلی آدم اولمالی. قرعه آنالم، گیمه اصابت ایدرسه دکزه آنالم، دیدی.

قرعه آتدیلر، یونسه اصابت ایتدی. اودخی «صوچلی. نم» دیوب کندیسینی صویه آتدی، در حال آنی بر بیوک بالق یوتدی.

حضرت یونس، ایتدیکنه پشیان اولدی. توبه واستغفار ایلدی. جناب حق، دخی توبه سنی قبول ایتدی و همان بالق آنی چیقاروب بر کناره آتدی.

بالغک قارنده حضرت یونسک جسمی پالوزه کبی اولمشیدی. جناب حق، آکا تازه قوت و صحت و یردی و آتی ینه نینوا اهالیسنی دعوته کوندردی. مکرکه حضرت یونسک گمی به بیندیکي کون کوک یوزی قارارمش و نینوا شهرینی بر قره دومان قابلامش. اهالی، قورقوب یونسی آرامشلا بولامدقلى کبی صحیحاً آنک خبر و یردیکي وجهله بر مصیبت کله جکنى آکلامشلا و همان خارج شهرده توبه تپه سی دینلن محله چیقمشلا و فریاد و فغان ایدرک الله یالوارمشلا. الله تعالی حضرتلری دخی آنلرک توبه سنی قبول بیورمش و موعود اولان عذابی اوزرلرندن قالدیرمش ایدی.

حضرت یونس، دونوب نینوایه کیتدی و اهالیسنه احکام الهیهی تبلیغ ایتدی. آنلر دخی آنک نصیحتیه عامل اولدیلر و برمدت عذابدن مصون قالدیلر. صکره لری شرق و غربده بیوک بیوک وقعهلر ظهوره کلدی. نیچه دولت و ملتلرک رابطهلری بوزولدی و یکیدن یکيیه دولتلر و جماعتلر پیدا اولدی.

از جمله شمرده (مدیا) قومی و بابل یالنده کی (کلدانی) طائفه سی دائره اطاعتدن چیقدی و مدیا ایله بابل وایلری بالاتفاق دولت آثوریه عصبان ایدرک پای تحت دولت ارلان نینوا شهرینی محاصره ایتدیلر.

نینوا شهری محاصره دن قورتولدی و آثوریه دولتی یکیدن قوت بولدی و بابل ینه بر والی ایله اداره اولنور اولدی. لکن شرق طرفی اسکی حاله کتوریله میوب مدیا حکومتی باشلو باشه قالدی.

دولت آثوریه، ینه اسکی بیوککلکنی قازانق ایچون شرق و غربه اردولر سوق ایتدیکی ائنده اسرائیل دولتی اوزرینه دخی مسلط اولدی و بر آراق نی اسرائیلدن برچوق اسیرلر آلدی.

برمدت اسرائیل دولتی، نینوا خزینه سنه ویرکو ویرمکه مجبور اولدی. صکره ویرکو اعطاسندن امتناع ایله دولت آثوریه قارشو کلدی.

بونک اوزرینه نینوا ملکی، بریوک اردو ایله اسرائیل دولتی اوزرینه کیتدی و پای تختی اولان سبسطیه شهرینی استیلا ایتدی. اسرائیل دولتنک حکمدارینی و بالجه ایلرو کلنلرینی طوتدی و آنلری خراسان طرفلرینه طاغیتدی. آثوریلردن و کلدانیلردن بر چوق خلق کتوروب بنی اسرائیلک بلده لرینه اسکان ایتدی.

اسباطدن اولوب ده او وقعه ده قاچوب قورتولانلر و کوشه ده بوجاقده قالانلر یهودا دولتنه صیغیدیلر و او وقت حضرت سلیمانک احفادندن قدس شریفده خلیفه بولنان (حزقیّا) نک باشه طوبلاندیلر.

ایشته بو صورتله اسرائیل دولتی، حضرت موسانک وفاتندن (سکیز یوز اوتوزیدی) سنه مرورنده باتدی. ظهوری ایسه (بشیوز آلتش آلتی) سنه سی اوائلنده ایدی. بو حسابه کوره ملوک اسباطک مدت حکومتلری (ایکیوز آلتش بر) سنه دن عبارتدر.

آندن صکره بنی اسرائیل حکمدارلنی، حضرت سلیمانک طورونلرینه منحصر اولدی و یهودا دولتی اسرائیل دولتنک اضمحلاندن صکره ده (یوز آلتش بر) سنه باقی قالدی.

یهودا دولتیله اسرائیل دولتی، اگرچه بر برینی قیصقانونرلر و دایما بر برینک علیهنده بولنورلر ایدی. لکن قرنداش اوغللری دیمک اولدقلرندن اسرائیل دولتنک اووجهله منقرض و بونجه بنی اسرائیلک اسیر اولماسی یهودا دولتنه پک زیاده تأثیر ایلادی.

حتی او وقت قدس شریفده بر حیات بولنان حضرت اشعیا علیه السلام آثوریلره بددعا ایتدی.

دولت آثوریه ایسه اسرائیل دولتی محو ایتدکن صکره یهودا دولتنه کوز دیکدی و آرمسی چوق کچمیوب قدس شریف اوزرینه بر اردو کوندردی. لکن حضرت اشعیا علیه السلام، آثوریه عسکرینک من طرف الله منهزم اولاجغنی اولجه خبر ویردی.

فی الواقع آثوریه اردوسنده خستهک ظهور ایله کلیتو عسکر تلف اولدی. نینوا ملکی مایوس اوله رق نینوایه عودت ایتدی و بو صورته یهودا دولتی قورتولدی.

لکن بنی اسرائیل، آندن صکره ینه یولسز حرکتلره باشلادیلر و حضرت اشعیانک نصایحنی دیکله مدیلر. نهایت او ذات شریفی شهید ایلدیلر.

حزقیانک وفاتنده یرینه کچن اوغلی، خلقه ظلم و تعدی ایدر اولدی. و انواع معاصی و فسق و فجوره طالدی.

او وقت دولت آثوریه، او غدار و کنهکار اولان ملکک اوزرینه مسلط اولدی و آنی طوتوب بر مدت حبسدن صکره سنوی بر مقدار ویرکویرمک اوزره ینه یهودا ملکی نصب ایدرک قدس شریفه کوندردی. بعده بنی اسرائیل، ینه آذیتدیلر. احکام شرعیه یی بر طرفه آتدیلر و اللهک امر و نهینی اونوتدیلر.

ایشته او وقت قدس شریفده حضرت (ارمیا) علیه السلام بنی اسرائیله مبعوث اولدی و تورات شریفی میدانده قویدی. احکام شرعیه یی اجرا ایتدیرمکه باشلادی.



او ائسادہ دولت آثوریہ ، شرق طرفہ حرکت ایتدی . ظفریاب اولہمدی . بعدہ غربہ توجہ ایدرک قدس شریف اوزرینہ هجوم ایلدی . لکن بر یہودی قیزی ، اردو سرعسکری چادری ایچندہ تلف ایتدی . بو جہتلہ آثوریہ عسکری بوزولدی و یہودا دولتی خلاص بولدی . اما دولت آثوریہ ، بو بوزغونلغک شأمتندن قورتولامادی . زیرا او بوزغونلق اوزرینہ آثوریہ تبعہسندن اولان بر چوق قوملر عصیان ایلدی . نینوانک بر طرفہ حکمی کچمز اولدی و بابل والیسی قوتلی بولنغله بر حکمدار مستقل مرتبہسنہ کلدی .

بعدہ مدیاحکومتیلہ بابل والیسی ، نینوا علیہنہ اتفاق ایتدیلر و بابل والیسنک اوغلی و سرعسکری اولان ( بخت نصر ) بر بیوک اردو ایله کیتدی و مدیا عساکریلہ برلکده نینوایی محاصره ایتدی . نہایت غلبہ ایلدیلر . نینوا شہرینی یاقدیلر ، ییقیدیلر ، یوق ایتدیلر .

او ائسادہ بخت نصرک پدری وفات ایلمش اولدیغندن بابله عودتسندہ تخت سلطنتہ جلوس ایلشدور . بوصورتلہ دولت آثوریہ ، بتون بتون انقراض بولدی و آنک یرینہ ایکی دولت قائم اولدی .

بری مدیا دولتیدر کہ شمدی ایران دیدیکمز یرلر آندہ قالدی . دیکری کلدانی دولتیدر کہ آثوریہ دولتنک غرب طرفی آنک حصہسنہ دوشدی و بابل شہری آکا پایتخت اولدی .

بابل شہری ، بو وجہلہ تکرار پایتخت اولدقدن صکرہ بخت نصر ، آنی بیوتدی . بر چوق ابنیۃ عالیہ واستحکامات جسیمہ ایله تزین واعمار ایتدی .

حضرت موسیٰ نک وفاتندن بخت نصرک جلوسنہ قدر قاچ ییل کچمش اولدیغی اختلافلی بر مسئلہدر . فقط مؤرخلر بینندہ مشہور و معتبر اولان روایتہ کورہ ( طقوز یوز یتمش طقوز ) سنہدر .

بخت نصر ، جلوسسندن بر قاچ سنہ صکرہ بنی اسرائیل اوزرینہ هجوم

استدی. ملك بنی اسرائیل، کوردی که قارشو طور مق قابل دکلدر. چاره سز آکا سرفرو ایلدی. آنک طرفدن نصب اولمش بروالی کی قدسده قالدی و اوچ سنه بو وجهله آکا مطیع اولدی.

بعده ملك بنی اسرائیل، سرکشلك ایدرك بخت نصره قارشو طور دی. اودخی عسکر کوندردی و آنی قدسدن قالدیردی ویرینه اوغلنی کچیردی. لکن چوق کچمیوب آنی دخی طوتیدردی، بر چوق علما و اشراف بنی اسرائیل ایله برابر بابله کتورتدی، جمله سنی حبس و توقیف ایلدی.

حضرت (دانیال) علیه السلام ایله حضرت (عزیر) دخی بو اسیرلردن اولوب آنجق صکره دن بخت نصر، حضرت دانیالک قدرینی آکلامش و آکا زیاده حرمت و رعایت ایلشدر.

بخت نصر، اووجهله ملك بنی اسرائیلی بابله جلب ایتدکدن صکره یرینه عموجه سی اوغلی (صدقا) نام ذاتی کندی طرفدن بر قائم مقام حکمنده اولق اوزره بنی اسرائیل اوزرینه ملك نصب ایدوب قدسه کوندردی.

اودخی بر مدت بخت نصره مطیع اوله رق قدسده حکومت ایتدی و او اثناده حضرت ارمیا علیه السلام، قدس شریفده اولوب بخت نصر ایله صدقایی قورقودوردی و بنی اسرائیله دخی کناهلرندن توبه ایتلری ایچون نصیحت ایدردی.

بنی اسرائیل ایسه الله عاصی اولدقلری کی کناهلری سببیه، الله طرفدن اوزرلرینه مسلط اولان بخت نصره دخی عصیان ایتک ایسترلردی. حضرت ارمیا علیه السلام کوردی که بنی اسرائیله سوز کچمز و وعظ و نصیحت تأثیر ایتمز همان ایچلرندن چیقوب بر طرفه صاوشدی. صدقا دخی بخت نصره قارشو حرکته قالقشدی.

آنک اوزرینه بخت نصر، کلیتلو عسکر ایله وزیرینی کوندردی. اودخی واروب بر مدت قدس شریفی محاصره ایتدکدن صکره زور ایله ایچرو کیردی. قدسی یاقدی و بیت المقدسی بیقدی. بنی اسرائیلک کیمیسنی اولدردی و کیمیسنی صدقا ایله برابر اسیر ایدوب بابله کوندردی.

بنی اسرائیلدن بعضیلری مصره و بعضیلری مکّه مکرمه یه قاچوب قورتولدی.  
قدس شریفده یالکز عجزه و فقرا کروهی قالدی .

بخت نصر، بابلدن و سائر طرفلردن برچوق خلق کوندروب قدس  
شریف طرفنده بقیه بنی اسرائیل ایله قاریشیق اوله رق اسکان ایتدیردی  
واوزرلرینه کندو طرفندن بر قائم مقام نصب ایلدی .

بووقعه بخت نصرک تاریخ جلوسنک اون طقوزنجی سنه سنده وقوعه  
کلدی. بو صورتله یهودا و بنیامین سبطلری دخی پریشان اولدی. یهودا دولتی  
بتون بتون باتدی و بنی اسرائیلک اللرندن حکومت کیتدی .

صدقیاء ملوک بنی اسرائیلک صوکی اولوب آندن صکره ایچلرندن ملک  
ظهور ایتدی واکرچه صکرملری بر آراتق بنی اسرائیله ایچلرندن رئیسار  
نصب اولندیسه ده آنلر، شیخ البلد مقامنده اولوب حکملری قدس شریفک  
دیشاریسنه جاری اولماشدر .

بخت نصر، او وجهله قدس شریفی خراب ایتدکدن صکره بتون  
دیار شامی ضبط ایتدی و امر و فرمائی مصره قدر یوروتدی . اطراف  
و جوارده بولنان اقوام و طوائفی قورقوتدی . صکره کندوسنک خلفلری  
دخی بر مدت آنک ایزینه کیتدی .

بووجهله دولت کلدانیه، آلتمش سکنزسنه قدر بابلده حکومت ایلدی. صکره  
ایرانده ظهور ایدن (کیانیان دولتی) کلوب بابلی ضبط ایله دولت کلدانیه یی  
محو ایتدی . او وقت بنی اسرائیل دخی اسارتدن قورتولوب وطنلرینه  
کیتدیله و قدس شریفده طوپلانوب یتمش سنه دنبرو خراب طوران مسجد  
اقصایی یکیدن بنا ایتدیله .

بوکره بابلدن عودتلرنده ایکی بیکسدن زیاده علمالری برابر بولنوب  
حتی بریسی دخی حضرت عزیر ایدی .

لکن مقدا قدس شهری یانوب بیت المقدس دخی ییقلدینی وقت تورات  
شریف دخی ضایع اولمش و او وقت دنبرو بنی اسرائیل ایچنده احکام شرعیه  
اونوتولمش ایدی.

بناءً عليه حضرت عزیر، برچوق علما و مشایخ بنی اسرائیل ایله بریره کلدی و تورات شریفی ازبر اوقودی. سائر دیگله یوب یازدیلر و شریعت موسویَه نك احکامنی یکیدن میدانه قویدیلر.

بو وجهله بنی اسرائیل، کلدانیلرک الندن قورتولدیلر. لکن حکومتی کندو اللرینه کچوره میوب ایرانلره تابع اولدیلر. بعده تاریخ بخت نصرک درتیوز اوتوز بشنجی سنه سنده مشهور (بیوک اسکندر) ایران دولته غلبه و بابلی فتح ایتسدیکی صرهدده دیار قدسی دخی ضبط ایتمکله بنی اسرائیل، یونانیلرک حکمی آلتنه کیردیلر.

صکره رومالور چیقوب ممسالك یونانییهنی ضبط ایتدکلرنده دیار قدسی دخی ضبط ایتملریله بنی اسرائیل، رومالورک حکمی آلتنده قالدیلر. ایشه اووقتلر بنی اسرائیل اوزرینه ایچلرندن بررئیس نصب اولنوردی. لکن بو رئیس لر قائممقام و شیخ البلد مقامنده بولنوردی.

### قصه زکریا و یحیی و عیسی علیهم السلام

حضرت (زکریّا) سلیمان علیه السلامک نسلنددر. بیت المقدسده تورات یازان و قربان کسن رئیس ایدی. جناب حق آکا نبوت ویردی. زوجہ سی (ایساع) چوجق طوغورمازدی. ایساعک قیز قرنداشی (حنّه) که بنی اسرائیلک بیوکلرندن (عمران) نام ذاتک زوجہ سی ایدی. آنک دخی اولادی اولمازدی.

حنّه «جناب حق، بکا بر چوجق احسان ایدرسه بیت المقدس خدمته وقف ایدیم» دیو نذر ایتمش.

اووقت ارکک چوجقلری بیت المقدس خدمته تعین ایتک عادت ایدی. حنّه نك دخی ایستدیکی ارکک چوجق اولدیغندن اووجهله نذر ایتشیدی. حامله ایکن قوجه سی عمران، وفات ایتدی. کندوسی دخی مأمولنک خلاقی اوله رق قیز طوغوردی و آکا (مریم) دیو آد قویدی.

« یارب نه یاهیم . قیز طوغوردیم ، سن آنی قبول ایت » دیو جناب حقه یالواردی و آنی آلوب بیت المقدسه کوتوردی « آلكز بونی، مسجده نذرده دیوب خدمه بیت المقدسه ویردی. بر بیوک ذاتک قیزی اولدیغندن جمله سی آنی بیودوب تربیه اتمکه رغبت کوستردی و حضرت زکریّا علیه السلام، آنی آلوب زوجه سی یاننه کتوردی .

بو صورتله حضرت مریم، تیزه سی ایساعک یاننده بیودی . صکره حضرت زکریّا، آکا بیت المقدسه مخصوص براوطه یاپدیردی. حضرت مریم، اوطه سنه چکلدی و عبادت ایله مشغول اولدی. یاننه حضرت زکریّا دن بشقه کیمسه کیره مزدی .

حضرت زکریّا علیه السلام، کندیسندن صکره یرنی طوتاجق اولادی اولدیغندن مکدر ایدی . زوجه سی ذاتاً چوجق طوغورمیوب کندیسی دخی پیرفانی اولمسیله آرتق چوجنی اولق احتمالی قالماشدی .

جناب حقک لطفی چوق واحسان و عنایتنه نهایت یوق . بر کون جبریل علیه السلام، طرف الهیدن حضرت زکریّا به کلدی. ایساعدن (یحیی) نامنده بر چوجنی اولاجغنی خبر ویردی و حضرت عیسانک دخی دنیا به کله جکنی بیلدیردی .

بعده جبریل علیه السلام، حضرت مریمک یاننه واردی و یاقه سندن اوفوردی ، حضرت مریم فی الحال کبه فالدی .

مقدحه ایساع، کبه قالب یحیایی طوغوردی . آلتی آی صکره دخی مریمدن (عیسی) طوغدی . حضرت مریم ؛ آنی صاردی ، بشیکه قویدی و آلوب قومنک یاننه کتوردی .

« مریم ! سن نه یاپدک ؟ باباک فنا آدم دکل ایدی. آناک دخی فاحشه دکل ایدی . سن بر فنا ایش ایشلمش سین ، دیوب همان آنی رجم ایتک اوزره الارینه طاش آلدیلر .

حضرت مریم : « آندن صوریکنز ، دیو الیه عیسایه اشارت ایلدی . بز بشیکده کی چوجقله نصل سویله شهلم » دیدیلر .



همان حضرت عیسی سوزه باشلادی : « بن ، اللهك قولییم . بكا كتاب ویردی و بنی پیغمبر ایتدی و زرده اولسه م بنی مبارک قیلدی . طوغدیغ کون و اولدیکم کون و بعده دیریلدیکم کون بكا سلامت ویره » دیدی .  
یهودیله ، بونی ایشته کلری کبی حیرته قالدیلر و حضرت مریمدن ال چکدیلر .

لکن « باباسز چوجق اولورمی ؟ » دیو یهودیلر بیننده دیدی ، قودی چوغالدی . حضرت زکریا حقنده سوء ظن ایتدیلر و نهایت آنی شهید ایلدیلر . او وقت زکریا علیه السلام یوز یاشنده ایدی .  
نه غربب شیدرکه یهودیلر ، حضرت آدمک آناسز و باباسز اوله رق یارادلدیغنه اینانورلر ایکن حضرت عیسانک یالکز باباسز اوله رق یارادلدیغنه اینانه مدیلر .

مریم علیها السلام ، عیسائی آلدی و عمو جه سی اوغلی ( یوسف نجار ) ایله برابر مصره کیتدی . اون ایکی سنه اوراده قالدیلر .  
بعده حضرت مریم ، اوغلی عیسا ایله برابر دوندیلر . دیار قدسه کلدیلر و ( ناصره ) قریه سنه ایندیلر . حضرت عیسی ، اوتوز یاشنه کیرنجیه دک اوراده ساکن اولدیلر .

حضرت یحیی ، کوچک چوجق ایکن تورات شریفی الله آلدی ، بنی اسرائیله وعظ و نصیحت ایتمهک باشلادی و باباسی کبی حضرت موسانک شریعتیله عمل ایتک اوزره بنی اسرائیله مبعوث اولدی .  
بعده حضرت عیسی علیه السلام ، اوتوز یاشنه بالغ اولدقده بر ، یکی شریعت ایله مبعوث اولدی و اکا ( انجیل شریف ) نازل اولدی و آنک شریعتیله شریعت موسی ، منسوخ اولدی . حضرت یحیی علیه السلام دخی آنک شریعتنه تابع اولدی .

حتی او آناده بنی اسرائیل اوزرینه رئیس اولان کیمسه قرنداشنک قیزیخی آلمق ایستدی و شریعت موسی اوزره عقد نکاحنی حضرت یحیایه تکلیف ایلدی .

او وقت شریعت عیساده قزنداش قیزی آلتق حرام قیلنمشیدی .  
آنکچون حضرت یحیی دخی عقد نکاحدن امتناع ایتدی .  
قیز و آناسی کوجنوب حضرت یحیانک اولدیرلمسی ایچون اصرار ایلدیلر  
رئیس قدس بولنان کیمسه دخی حضرت یحیایی کتوردوب آنلرک حضورنده  
بوغازلاتدی .

حضرت عیسی علیه السلام، بر اولوی دیریلندی و آنادن طوغمه کورلرک  
کوزلرینی آچدی . صو اوزرنده یورودی ودها بویولده چوق معجزه لر  
کوستردی .

یالکز اون ایکی کشی ایمان ایتدی که آنلره ( حواریون ) دنیلور . آنلرک  
برنجیسی ( شَمْعُونُ الصَّفا ) درکه نصارا آره سننده آکا ( بُطْرُس ) دنیلور  
و بریسی دخی دیگر ( شمعون ) نامنده بریدرکه نصارا آره سننده آکا  
( یودا ) دنیلور .

سائر یهودیلر، ایمانه کلک شویله طورسون حضرت یحیی کبی حضرت  
عیسای دخی اولدرمکه قرار ویردیلر . حضرت عیسی علیه السلام، صوک  
دفعه اوله رق حواریون ایله برکیجه برلشوب کیزلیجه مصاحبت ایدیوردی .  
یهودیلر ایسه آنی اولدرمک ایچون صیقی صیقی یه آرایوردی .  
حضرت عیسی، حواریونه دیدی که « خروس اوتمه دن یعنی، صباح اولمادن  
سنزک بریکز بنی انکار ایده جک وپک آز پاره یه صاته جق در » .

فی الواقع حواریوندن ( یودا شمعون ) صباح اولمادن واردی، یهودیلردن  
بر مقدار رشوت آلوب حضرت عیسانک یرینی خبر ویردی .  
یهودیلر، همان حضرت عیسای طوتوبده اولدرمک ایچون سکر تیلر  
و اورایه کیتدیلر . حرص و تلاش ایله یا کُیلوب او خائن یودایی طوتدیلر .  
آنی آصدیلر و صحیحاً عیسای آصدق ظن ایتدیلر .

الله تعالی حضرتلری ایسه حضرت عیسی علیه السلامی ادریس، علیه السلام  
کبی کوکه قالدردی و آنی دنیا غائله سندن قورتاردی .

بو سبیدن ناشی یودانك اسمی نصارا بیننده حقارتله یاد اولنور . فنا  
و خائن کشی دیه جك یرده یودا دیرلر .

حضرت عیسیٰ، کوکه چکلد کدن قرق سنه صکره رومالیلر، قدس شریف  
اوزرینه هجوم ایله یهودیلرک کیمنی اولدر دیلر و کیمنی اسیر ایلدیلر . قدس  
شریفی یغما و خراب ایتدیلر . یهودی کتابلرینی کاملاً یاقدیلر و بیت المقدسی  
بیقدیلر و قدس شهرینی بنی اسرائیلدن خالی براقدیلر .

بو صورتله یهودیلر ، تارمار اولدی . آندن صکره بر یرده طوپلانوب ده  
بر جمعیت تشکیل ایده مدیلر . هر یرده خور و حقیرا ولدیلر و ذلت و مسکنتده  
قالدیلر .

حضرت موسانك وفاتندن حضرت عیسانك ولادتنه قدر (بیك یدی  
یوز اون آتی) سنه چکمشیدی .

حضرت عیسیٰ علیه السلام ، اوتوز یاشنه ایرشد کده کندوسنه نبوت  
و رسالت کلدی . اوچ سنه قومی دعوت ایتدی . نهایت اون ایکی کشی  
ایمانه کلوب طریق حقه آکا رفیق اولدیلر . آنلرک دخی بریسی صوکنده  
کندوسنه خیانت ایلدی . آندن صکره حواریون، عیسیٰ علیه السلامک وصیتی  
اوزره اطرافه طاغیلدیلر و دین عیسوی بی ناسه تلقین ایله مشغول اولدیلر .  
صکره دن انجیل شریف دیو میدانه بر چوق کتابلر یاییلدی . برازی  
حواریوندن بعضارینه و برازی آنلرک شاگردلرینه اسناد ایدیلدی .

بونلر ایسه سیر حضرت عیسیٰ حقننده تاریخ یوللو یازلمش کتابلر  
اولوب بونلرده عیسیٰ علیه السلامک بعض احوال و اوصافی یازلمش  
و آره یرده انجیل شریف آیتلری درج ایدلمش ایدی . لکن بربرینه مطابق  
دکل ایدی .

رؤسای نصارا کوردیلرکه : بونلر بربرینه اویمور . جمله سنی کوزدن  
چکوردیلر و ایچلرندن درت نسیخه آردیلر . آنلری سائرینه نسبتله صحته  
اقرب کوردیلر . ایشته (انجیل شریف) دیو نصارا بیننده تداول ایدن بو

درت نسيخه در كه آنلر دخي تماميله بربرينه اويماز. اصل انجيل شريف، اله كچمه مشدر .

حواريون، طاغيلوب اوزاق محللره كيدر ك شريعت عيسوييه ناسه تعليم ايتمشلر ايسده او وقت دنيا كفر وشرك ايله طولوايدي. دين عيسوي علناً اجرا اولنه ميوب اوچيوز سنه دن زياده مكتم طوتولدي. عيسويلر، يرآلترلنده ومغازه ومخزن كي يرلرده كيزلوجه عبادت ايدرلردي . طويولوب طوتولانلر، جور و جفا كورلر وبعضاً اشكنجهيه دوچار اولورلر ايدى .

نهايت روما ايمپراطوري ( قسطنطين ) تاريخ ميلاد عيسادن ( اوچيوز اون ) سنه صكره دين عيسوينك علناً اجرا سنه رخصت ويردى . بعده، قسطنطينيه شهريني ياپدى ورومادولتنك اسكي پايتختي اولان روما شهريني ترك ايله اشوقسطنطينيه شهريني پايتخت ايتدى وكندوسى دخي عيسوي دينته كيردى. آندن صكره حضرت عيسى عليه السلامه ايمان ايدنلر چوغالدى ودين عيسوي پك چوق يرلره ياييلدى وعيسوي اولانلره ( نصارا ) دنيلى . لكن وقتيله شريعت عيسوييه نك اصول وفروعي كوزلجه ضبط اولنه مديغدن ايش، بسقوسلرك اللارينه قالدى وبرطاقم اغراض ايله اختلاف چوغالدى ورومادولتي ايكيه بولندى. برى ( شرق ايمپراطورلنى ) دركه پايتختي استانبول ايدى وديكرى ( غرب ايمپراطورلنى ) دركه پايتختي روما شهرى ايدى .

بويكي واسكي پايتختلر، بربريني قشقاندى. بوجهته ( روما دولتي ) ايكيه منقسم اولديني كچي مذهبجه دخي نصارا ايكيه بولندى . بر طاقى ( ريم پاپا ) يه يعنى روما بسقوسنه تابع اولديلر. بولنره ( قاتوليك ) دنيلى وبرطاقى استانبول بطريقه تابع اولديلر. بولنره دخي ( اورتودوكس ) دنيلى . صكره لرى بربرينه مغاير برچوق مذهبلر ظهور ايتدى ودين نصارا بتون بتون وضع اصليسندن چيقاريلدى . حتى ديانتدن مقصد اصلى شركدن صاقنمق اولوب بوجهته نصارا

مشرک‌ه مخصوص اولان بتلردن بغایت اجتناب ایدرلرکن صکره‌لری نصارا معبدلرینه تصویرلر آصیلدی و کلیسالر، بیانی مشرک‌لرک معبدلرینه بکزه‌دیلدی .

سائر ملتلر ایسه کفر و شرک اوزره ایدیلر. خیلی وقت پیغمبر دخی کلمدی. براوزون زمان فترت اولدی . بتون دنیا ضال‌لنده قالدی .

رومالولر، بتون اوروپا قطع‌ه سنی ضبط ایتدکن بشقه آناطولینی و دیار مصر و شام و عراقی دخی آلدیلر و او عصرلرده رومالولر ملل سائر‌هیه نسبتله متمدن ایسه‌لرده سوء اخلاقه مبتلا و سفاهت و فسق و فجور ایله مألوف اولدقلرندن واردقلری یرلرده مدنیت ایله برابر پک فنا عادتلر براقدیلر. بوجهتله کثر ملل واقوامک اخلاقی بوزولدی. برکت ویرسون‌که رومالولر، جزیره‌العربی اله کچوره‌مدیلر و کندولرینک چیرکین خویلری و فنا عادتلی ایله عربلری بولاشدیرامدیلر .

فقط قبائل عرب دخی بتون بتون بدویت حالنده بولنه‌رق کندولرینی جهالت قابلا‌مشیددی. کیمی نصارا دیننه و کیمی یهودیلکه میال اولوب بر طاقمی دخی طرناق کسمک و غسل ایتمک و سنت اولمق کبی حضرت ابراهیم واسماعیل علیه‌السلامک شریعتلرندن قاله احکام ایله عمل ایتمکده اولدقلری حالده بر طاقمی دخی بت پرست ایدیلر و هر سنه موسم محجده قبائل عربدن پک چوق کیمسه‌لر مکیه کلوب کعبه مکرمه‌یی زیارت ایدرلرکن بیت‌الله الحرامده بتلر طوروب بر طرفدن دخی آنلره پرستش اولنوردی .

الحاصل او عصرلرده دنیا پک قرا کلق و قاریشیق برحاله کلش و اصلاحی بر پیغمبرک ظهورینه موقوف قالمش ایدی .





خاتم الانبیا محمد مصطفیٰ صلی اللہ علیہ وسلم حضرت تلمینک  
ولادتندن مقدم ظهور ایدن خارق العاده

### حالات

آخر الزمانده دیار عربده اولاد اسماعیلدن (خاتم الانبیا) کله جکی کتب  
سماویّه مندرج ایدی . انبیاء سالفدن بعضیلری دخی آنی وصف و تعریف  
ایتمشیدی .

خاتم الانبیا که فخر عالم و افضل بنی آدمدر . او وقتک حکمنجه آنک  
عربدن ظهور ایتسی مقتضای حکمت و مصلحت ایدی .

زیرا عربلر، او وقت دنیا یه یایلمش اولان قنالقره بولاشمیوب و رومالورک  
چیرکین عاتلرینه آلمشیوب جزیره العربده بدویت سایه سنده فطرت  
اصلیه لری اوزره قلمش لر ایدی واکرچه عربلر، علوم و صنایعدن بی بهره  
ایسه لرده ایچلرنده فصاحت و بلاغت مراقی زیاده لشمش و یک چوق شعرا  
وغایت فصیح و بلیغ ادبا و خطبا یتشمش ایدی .

امی اولدقلری حالده غایت کوزل اشعار سوبلرلر و دائماً فصاحت و بلاغت  
ایله تفخر و مباهات ایلرلر ایدی . حتی مکه جوارنده (سُوقُ عُکَاظُ) نام محله  
هر ییل ذی القعدة آینده بر بیوک پانایر قورولور. هر طرفدن اورایه شعرا  
و بلغا طویلانور، کوزل شعرلر و کزیده خطبه لر اوقونور، سوز میداننده  
یاریشلر اولور، باش اولانلر آفرین آلور و شعری کعبه دیوارینه آویلور  
ایدی .

بو صورتله کعبه دیوارینه آویلشمش یدی قصیده و ارایدی که آنلره (معلقات

سبعه) دنیلور . آنلرک برنجیسی (امری القیس) ک قصیده سی ایدی که اک یوقاری آصیلمش وبعثت محمدیه قدر اوله جه قالمش ایدی .

الحاصل شعرا وخطبا کوزل شعرلر ومؤثر خطبه لر ایله جمهور انامه وعظ ونصیحت وتهذیب اخلاق عوامه پک چوق همت ایدرلردی .

زمان جاهلیتده عربلرک فصاحت وبلاغتجه بودرجه ایلرولملری دقت اولنه جق وعبرت آله جق بر کیفیت ایدی وبلکه عرب لساننک او مرتبه کاله کلمسی، الله طرفدن بولسان اوزره برکتاب نازل اوله جغه اشارت ایدی .

ابوالانیا حضرت ابراهیم علیه السلام، اوغلی حضرت اسماعیل علیه السلامه دعا ایدوب جناب حق دخی آنک دعاسنی قبول ایدهرک اولاد اسماعیلدن بر بیوک ملت ظهور ایده جکنی تبشیر ایش اولدینی (تورات) شریفده مذکوردر .

حضرت ابراهیمک دیکر اوغلی حضرت اسحاق علیه السلامک اولادندن پک چوق پیغمبرلر کلوب کچمش وآنلرک دوری یتوب آرتق نسل اسماعیله نوبت کلمش ایدی . نسل اسحاقدن کلن بونجه پیغمبرلره مقابل اولمق اوزره نسل اسماعیلدن دخی خاتم الانیا کله جک ایدی .

عربلر، علم انسابه زیاده اعتبار ایدوب هر قبیله، کندی نسبنی حفظ ایدر و قبیله لرک بر برینه نسبتله فضل ورجحانی اولوب هر بری قیز آلوب ویرمکده اقراتی آرار وکفونی کوزه دیر ایدی .

حضرت اسماعیلک اولاد و احفادی چوغالادی وجزیره العربک هر طرفنه طاغیلدی . ایچلرندن (بنی عدنان) وعدنانیلر ایچنده (بنی مضر) ومضریلر ایچنده (قریش) قبیله سی سائرلرندن ممتاز اولدی . قریشلر ایچنده دخی (هاشم قوی) جمله سندن زیاده فضل وشرف بولدی .

هاشمک باباسی (عبد مناف) وآنک باباسی (قُصّی) وآنک باباسی (حکیم) وآنک باباسی (مُرّه) وآنک باباسی (کعب) وآنک باباسی (لُوی) وآنک باباسی (فهر) وآنک باباسی (مالک) وآنک باباسی (نضر)

وَأَنكَ بَابَاسِي (كِنَانَه) وَأَنكَ بَابَاسِي (خُزَيْمَه) وَأَنكَ بَابَاسِي (مُذْرَكَه)  
وَأَنكَ بَابَاسِي (الْيَاس) وَأَنكَ بَابَاسِي (مُضَر) وَأَنكَ بَابَاسِي (نَزَارُ)  
وَأَنكَ بَابَاسِي (مَعَد) وَأَنكَ بَابَاسِي (عَدْنَان) در. عدنان دخی (قِيْدَارُ)  
ابن اسماعیل علیہ السلام نسلنددر .

ایشته خاتم الانبیا علیہ السلامك اجداد عظامی بوذاتلرددرکه هربرینك  
ذریقی چوغلمش وهربری پك چوق جماعتلك رئیس و نیچه قبائل وعشارك  
ددهسی وبابی اولمش در .

فقط هر نه وقت برینك ایکی اوغلی اولسه، یاخود برقیله ایکی قول  
اولسه خاتم الانبیاك صوبی الكشرفلی وخیرلی اولان طرفده بولنور وهر  
عصرده آنك جدّ اعلاسی کیم ایسه یوزنده کی اولکرندن بیلینور ایدی .

چونکه حضرت اسماعیلك آئنده برنور وار ایدی، اولکر ییلدیزی کی  
پارلار ایدی . بونورایت، آکا پدرندن قالمش وبعده اولاددن اولاده انتقال  
ایدرک عدنانه وآنندن (معدّ) و (نزار) ه کلمش ایدی .

(نزار) عربجه آز برشی معناسنه اولان (نزار) دن کلور. بووجهله آدقونلغه  
سبب بودرکه : دنیایه کلدکه باباسی (معدّ) آنك آئنده کی نوری کورنجه  
پك زیاده ممنون اولمش وقومنه بر بیوک ضیافت و یروب بویله اوغل ایچون  
بو قدر ضیافت آز برشیدر، دیمکله اوغلنك آدی (نزار) قالمشدر .

بونورایسه نور محمدی اولوب حضرت آدم دنبرو اولاددن اولاده انتقال  
ایده کلمش ونهایت اصل صاحبی اولان خاتم الانبیا حضرتلرنده قرار قيلمشدر.  
ایشته بوجهتله بنی عدنان ایچنده نور محمدی بی حائز اولان بر، گزیده  
صوی پیدا اولمشیدی که هر عصرده بوصویدن اولان ذات کیم ایسه یوزینك  
فوق العاده ملاححت ونورایتی حبسیله سائرلرندن سچیلور وقنی قبیله ده ایسه  
او قبیله سائر قبیلهلردن ممتاز اولور ایدی .

بناءً علی ذلك نزارك اولاد واحفادی ایچنده (بنی مضر) سائرلرندن زیاده  
شان وشهرت بولدی .

بنی مضر دخی چوغالدی، اطرافه یاییلیدی. نیچه قبیله لره منقسم اولدی. ایجارلندن (قریش) قبیله سی سیچیلیدی.

قریش قبیله سی (فهر بن مالک) ک اولاد واحفادی دیمک اولوب آنک اوغلاری ایچنده (لوی) و آنک اوغلاری ایچنده (کعب) سائرلرندن ممتاز و محترم اولدی.

اشببو (کعب بن لوی) جمعه کونلری قومنی جمع ایله خطبه او قوردی. کندی نسلندن خاتم الانبیا کله جگنی سویلر و آنک زمانه کیم یتیشورسه آکا ایمان ایتسون دیو نصیحت ایلر ایدی.

کعبک احفادنن اولان سالف الذکر (قصی) دخی قریش قبیله سی ایچنده یک بیوک برزاندیرکه: شوراده، بوراده متفرق اولان قریشلاری طوپلایوب قوت بولدی و مکه ریاستنه نائل اولدی.

بیت اللهک خدمتی، فی الاصل حضرت اسماعیلک اولاد واحفادنده ایکن صکره بو خدمت شریفه (جرهم) قبیله سنه کچمش و بعده هجرت ایله مکه جوارنده اقامه ایدن (خزاعه) قبیله سی، بر آراق کعبه خدمتی و مکه ریاستی ضبط ایلش ایدی. قصی، بر تقریبله کعبه نک آناختارلرینی خزاعه دن آلدی. آندن صکره کعبه خدمتی دخی قریش قبیله سننده قالدی.

قصیک (زهره) نامنده بر قرداشی اولوب آنک دخی اولاد واحفادی چوغالدی. قریش طائفه سی ایچنده شرف و رفعت بولدی که خاتم الانبیا حضرت تلرینک والده سی اولان جناب (آمنه) آنک نسلنددر.

قصی، فوت اولدقده (عبدمناف) و (عبدالدار) و (عبدالعزی) نام اوغلاری قالدی. عبد مناف، دیکرلرندن زیاده شان و شرف بولدی. ریاست و سیادت آنک نسلنده قرار قیلدی. عبدالدارک نسلندن دخی خدمه کعبه اولار (بنی شیهه) کلدی.

عبدمنافک (هاشم) و (عبدشمس) و (مطلب) و (نوفل) نام درت اوغلی اولدی. هر برینک ذریقی چوغالدی. حتی (بنی امیه) دنیلن طائفه امویه، عبدشمسک نسلندن کلشیدی. لکن جمله سنک افضل و اشرفی (هاشم) درکه عبدمنافدن

صكره قريش قومنك اولوسى ، اويدى . آنك نسل پا كندن كلنلره (بنى هاشم) و (هاشمى) دنيلور . خاتم الانبيا حضرتلرى دخى آنلردندر .

قريش قومى ، تجارتله مألوف بر طائفه ايدى . قيشين يمنه ويازين شامه كيدرلر ، هر سنه ايكي طرفله دخى يك حوق آليش ويريش ايدرلرايدى . بناءً عليه هاشم دخى قافله شام ايله مكدن چيقوب كيدركن مدينهيه اوغرادى . اوراده (بنى تجار) طائفه سندن (سلمى) نام قىزى تزوج ايتدى . آندن شام ديارينه كيتدى ، (غزّه) ده فوت اولدى .

سلمى ايسه آندن حامله قالب غايت كوزل ويوزى نورلى بر اركك چوجق طوردى و (شيبه) ديه آدقويدى .

شيبه بيودى ، دايى زاده لريله برابر چيقوب كزمكه باشلادى . لكن هيچ برينه بگزمه مزدى . يوزنده اولسكرى وار ، آلنى آي كې پارلار ، جمال با كمالى كورن حيران قالور ، بشقه بر صويدن اولدينى يوزندن بللى اولور ايدى .

انصاردن مداح رسول اولان شاعر مشهور (حسان) ك پدرى (نابت) او انشاده مدينه دن مكده كيدوب هاشم دن صكره قريشك اولوسى اولان قرنداشى (مطلب) ايله كوروشدى . « آه اكر قرنداشك اوغلى شيبه يي كورسه ك تعجب ايدر دك . پدرينه نه قدر بكزر ونصل شرف و جمال صاحيدر تعريف اولماز » ديه شيبه يي وصف اتمكله مطلبك قلبه شيبه يي كورمك آرزوسى دوشدى .

قريش قومى ايچنده اباعن جد انتقال ايده كان نور نبوت ، هاشمه كلش و آنك يوزنده كورولمش ايدى . حال بو كه هاشمك شيبه دن باشقه (اسد) نامنده بر اوغلى اولمش ايسه ده آندن يالكرز (فاطمه) آدلو بر قىز قالمش ايدى كه حضرت علينك والده سيدر . شو حاله نظراً هاشمه آنجق شيبه نك خير الحلف اولماسى بر امر طبيعى ايدى . نابتك افاده سى دخى بونى تأييد ايتدى . بناءً عليه مطلب ، شيبه يي كورمكه مجبور اوله رق همان مكدن قالقوب مدينه يه كيتدى .



بو وجهله مطلب ، مدینه یه واردی ، بر محله بنی نجار چو جقلری .  
آردسند شیهی کوردی . بر کره آنک طور و طرزینه و یوزنده کی ملاحه  
و نورایتیه باقدی ، کیمسه سویله مه دن برادرزاده سی اولدیغنی بیلوب کوزلرندن  
یاش آقدی .

نته کیم مطلب ، شیهی طور و طرزندن بیلدیکنی و کوزلرندن یاش کلدیکنی .  
بعض اشعارنده پک سوزشلی اوله رق بیان و حکایه ایلشدر .  
مطلب همان اوراده شیهیه بر قات روبه کیدیردی و آندن والده سنه  
کوندردی . بعده والده سنی ارضا ایدرک شیهیه یی آلوب مکیه کوتوردی .  
مکیه کیررکن شیهیه یی کورنلر « عجبا بو چو جق ، مطلبک کوله سیمی اوله ؟ »  
دیمشله . آندن شیهیه نک آدی ( عبدالمطلب ) قالمش و مطلبک وفاتنده یرینه  
کچوب ، قریش قومنک سید وریشی اولمشدر .  
عبدالمطلبک آکنده نور محمدی لمعان ایدردی . قریش قومی ، آنکله  
تبرک و تئمن ایلردی .

حتی مکه دیارنده قحط و غلا اولسه آنک اله یاپیشوب ( شیر ) طاغنه  
چیقارلر ، آنک یوزی صوینه جناب حقدن یاغمور ایسترلر ایدی . جناب  
حق دخی نور محمدی حرمتنه آنلره رحمت و برکت احسان ایدردی .  
خاتم الانبیا حضرت تلرینک دنیایه کلمسی یا قلاشد قجه کاهنلر ، آنک تشریفنی  
خبر ویرمهک ، عجیب و غریب حالتلر و خارق العاده علامتلر بلیرمهک باشلادی .  
از جمله عبدالمطلب ، بر کون حرم شریفده یاتوب او یورکن بر رؤیا  
کوروب قورقو ایله او یاندی . کاهنلره واروب رؤیاسنی تقریر ایتدی .  
کاهنلر دخی « سنک نسلکدن بر چو جق طوغه جق ، یر و کوک خلقی آکا  
ایمان کتوره جک » دیدیلر .

بونک اوزرینه عبدالمطلب ، مخدرات قریشدن ( فاطمه ) آدلو بر قیز آلدی .  
آندن اوغلی ( عبدالله ) دنیایه کلدی و نور محمدی آنک آکنده نمایان اولدی .  
مقدمامکده حکومت ایدن ( جرهم ) قبیله سی اوزرینه دشمن مسلط اولمغله  
یمن دیارینه فراره مجبور اولدقلرنده کعبه خزینه سندن بر خیلی اشیا

آلوب زمزم قويوسنه آتمشله واوزرينه طاش ووطوراق دوکوب یرنی بلیرسز ایتمشله .

نیجه ییللر بو حال اوزره قالدی . زمزمك نروده اولدینی کیمسه نك معلومی دکلدی . برکیجه عبدالمطلبه رؤیاسنده زمزمك یری خبر ویرلمش وئشانه سی کوسترلمش .

بو صورتله عبدالمطلب ، زمزم قويوسنی بولدی و اوغوللریله برابر آنی قازمغه باشلادی . ایچندن قلیجلر وزرهلر و آلتوندن یامه گه ییک صورتلری چیقدی . عبدالمطلب ، آنلری آلدی و گه ییک صورتلرینی کعبه نك قبوسی اوکنه وضع ایلدی و زمزم قويوسنی کاملاً آیقلا یوب حجاجه زمزم اولاشدیرمغه باشلادی .

قریش قومی ، جد اعلالری اولان حضرت اسماعیلدن قاله بر مبارک قويونك میدانه حقیق ماسندن طولایي فوق العاده ممنون و متشکر اولدی . بو یوزدن عبدالمطلب دخی او لکیدن زیاده شان و شهرت وانظار ناسده قدر و مزیت بولدی .

عبدالمطلبك اوغللری ( حارث ) ، ( ابوطالب ) ، ( ابولهب ) ، ( غیداق ) ، ( حُجَل ) ، ( عبدالکعبه ) ، ( مُقَوِّم ) ، ( زُبَیْر ) ، ( ضَرَّار ) ، ( قَتْم ) ، ( عبدالله ) ، ( حمزه ) ، ( عَبَّاس ) در . فقط ( قَتْم ) کوچوک ایکن فوت اولمشدر .

عبدالمطلب اوغللری ایچنده اك زیاده ( عبدالله ) ی سوه ردی . زیرا ایچلرنده اك کوزل واك زیاده صاحب عفت او ایدی . نور نبوت آنك یوزنده نمایان ایدی .

بنی زهره شیخی ( وهب ) قیزی ( آمنه ) حسب و نسبجه قریش قیزلرینك افضللی اولمغله عبدالمطلب آنی ( عبدالله ) ه آلدی .

( آمنه ) ، ( عبدالله ) دن خاتم الانبیایه حامله قالدی وهمان ( عبدالله ) ك آئنده کی نور ملاحات ( آمنه ) نك آئنده نمایان اولدی .

اوائنده قریش قومی ، قحط و غلایه مبتلا اولوب زیاده مضایقه چکمه کده

ایکن رسول اکرم، آنا رحمنه دوشدییکی کبی آنک حرمتنه حق تعالی  
حضرتلری، قریشک باغ و باغچه لرینه او قدر فیض و برکت و یردی که جمله سی  
زنکین اولدی .

اوسنه یه عربلر (سنة الفتح والابتهاج) دیدیلر که فتوحات و مسرت ییل  
دیمکدر . ( آمنه ) حامله ایکن ( عبدالله ) شام قافله سیله مدینه یه کیتدی  
واوراده خسته لنوب یکر می بش یاشنده اولدینی حالدده داییلری یاننده  
وفات ایتدی .

بوجهته خاتم الانبیا حضرتلری ، در یتیم کبی آناسی قارنده ایکن تک  
ویتیم قالدی .

ایشته اوائنده خارق العاده وقوعاتدن اوله رق مشهور (فیل وقعه سی)  
ظهور ایتدی .

شویله که: نیچه ییللر یمنده حکومت ایدن (ملوک خمیر) ک قوتلرینه ضعف  
کلکله حبشلر، عربستان یاقه سنه کچوب یم دیارینی ضبط ایتشلر ایدی .  
حبشیلردن نوبت سلطنت (ابرهه) ام ملکه کلدکده پای تخت یم اولان  
(صناعا) ده بر بیوک کلیسا یاپدی. بوندن غرضی: عربلری، کعبه زیارتندن واز  
کچیرمک و یوزلرینی صنایه چویرمک ایدی .

عربلر ایسه از قدیم سنه ده بر کره مکیه کلوب کعبه یی زیارت ایده  
کلدکلرندن بویله صنعاده یکی یاپیش بر کلیسایه میل و توجه ایتک شویله  
طورسون، آکا حقارت کوزیله باقوب حتی ایچلرندن بریسی او کلیسا ایچنه  
کیروب پیسله دی .

بوندن طولایی ابرهه، پک زیاده غضبه کلدی . همان کعبه یی ییقمق  
اوزره بر بیوک اردو ایله مکیه طوغری حرکت ایلدی .  
طائفه کلدکده بر مقدار عسکرله بر آدمی مکیه کوندردی . او دخی  
کلوب مکه اهالیسنک حیوانلرینی سوردی . بو صره ده عبدالمطلبک دخی  
درت یوز ده وه سنی کوتوردی .

عبدالمطلب، همان ابرهه نك اردوسنه کیتدی « قریشک رئیس کلدی، دیو

خبر ويردیلر . آنى يانسه دعوت وپك چوق حرمت ورعايت ايتدى .  
و «نيچون كلكڭ» ديوصوردى .

عبدالمطلب، ده وه لرینی ایستدی .

ابرهه « بن صاندم كه كعبه نى بيقيمايم ديونياز ه كلكڭ » دیدى .  
عبدالمطلب دیدى كه « بن ، دوه لرك صاحبي يم ، آنلرى ايستم . كعبه نك  
صاحبي واردر ، آنى او صاقلار . »

هان ابرهه ، امر ايتدى ، حيوانلرینی كير و ويردیلر .

عبدالمطلب، حيوانلرینی آلدی مكه يه كتوردی و « بو بيتك صاحبي ، آنى  
محافظه ايلر قورقمايكنز » ديوقريشه تسليت ويردى .

چونكه خاتم الانبيا حضرتلری ، آنا رحمة دوشمش و مولد سعادتلری  
پك ياقلاشمش ، قریباً تشریف بيوره جقلرينه دائر نيچه خارق العاده علامتلر  
بلورمش و عبدالمطلب رؤياسنی كورمش و بو جهتل ه ابرهه نك بيت اللهی  
ييقاما ياجفتی كندی وجداننده كسديرمش ایدی .

فی الواقع ايکي آي صكره خاتم الانبيا دنيايه كله جك و بعده كعبه نى قبله  
ايدينه جك و ابرهه اردوسنك حالى دخى علمه بر بيوك عبرت اولاجق ایدی .  
شويلاه كه : ابرهه نك بر بيوك فيلى وار ایدی . دائماً آنى عسكرينك  
او كنده يوروتور وانكله نره يه وارسه مظفر اولق اعتقادنده بولنور ایدی .  
اويله تجربه ايلش و اويله جه بلله مش ایدی .

بوكره دخى ابرهه ، او فيلى اردوسنك اوكنه قاتدى وهان مكه مكرمه  
اوزرينه يوروتدى .

مكه يه ياقلاشوب ده ايجرو كيرمكه حاضر لانورا يكن فيل ، يره چوكدى .  
قالديروب يوروتتمكه چاليشديلر ، يورومه دى . باشنى باشقه طرفه چويردجه  
هان سكيردوب كيدر ومكه يه طوغرى چويردجه كيتميوب يره ياتار ایدی .  
آنلر بوكشا كشه ايكن حق طرفندن برچوق (ابايل) قوشلری كلدى .  
هر بيرينك آغزند ه و آياقلرنده برر اوراق طاش وار ایدی . ابرهه  
عسكرينك اوزرلرينه صاليويريرلردى . هانكيسنه اصابت ايلرسه مجروح

وتلف اولوردی . بر چوغی بو صورتله تلف اولدی وبقیه سی دوشه قالقه  
یمنه قاچوب قورتولدی .

ا برهه دخی بو صورتله صنعایه واره بيلمش ایسه ده فنا حالده مریض  
اولمغه چوق کچمیوب تلف اولمشدر وآندن صکره ایکی اوغلی صرهمیله  
برآز مدت صنعاده حکومت ایتش ایسه ده چوق سورمیوب دولتری  
انقراض بولمشدر .

ا برهه نك عسکری او صورتله پریشان اولدقده مکّه مکرمه اهالیسی،  
طیشارو اوغرایوب آنک اردوسنده بولدقلى اموال وایشایی آلدیلر .  
خاتم الانبیا حرمتنه قریش قبیله سی ، هم اويله بر بیوک دشمن شرندن  
قورتولدیلر ، هم ده بویله زحمتسزجه بر خیلی مال غنیمته نائل اولدیلر وبر  
قات ده اشان وشهرت بولدیلر .

قریش طائفه سیله معارضه اوزره بولنان قبائل عرب ، آرتق آنلرایله  
جنك وجدالدىن واز کچوب آنلری من طرف الله مؤید بیلدیلر . بو سنه یه  
عربلر ( فیل ییلی ) دیوآد قویدیلر که میلاد حضرت عیسانك ( بشیر ز آلتمش  
طقوز ) نجی سنه سی ایدی .

خاتم الانبیا حضرتلری دخی او ییل طوغدی که ا برهه نك بروجّه بالا  
فیل ایله مکّه کلوب کیتمی محرم اینك اواسطنده ایدی . اللى بو قدر کون  
صکره ربیع الاول ایچنده دخی ولادت محمدیّه وقوع بولدی .







## مولد محمدی

فیل ییلندہ وشہور رومیہ دن نیسان ایچندہ ربیع الاول آینک اون  
ایکنجی بازار ایتسی کیجہ سی صباحہ طوغری ہنوز طاٹک یری آغاردینی  
وقت عالم ، برباشقہ عالم اولدی . یعنی خاتم الانبیا محمد مصطفی صلی اللہ علیہ  
وسلم حضرتلری طوغدی وکون طوغمدان عالم ، نور ایلہ طولدی .

عبداللہ دن ( آمنہ ) نک آلننہ کچمش اولان نور ملاحت ، آنک آلننہ  
کچدی . دور آدمدن برو اولاددن اولادہ انتقال ایدہ کلن نور خاتمت ،  
شمدی صاحبی بولدی و آرتق آندہ قرار قیلدی .

فرداسی بازار ایتسی کونی صباحلین ہپ پتار ، یوزی اوستہ  
دوشمش بولندی ، کورنلر حیرتدہ قالدی .

آمنہ دن مرویدر . دیر ایمش کہ : « بن ، سائر خاتونلر کی کہلک زحمتی  
چکمدم ، کہلرہ عارض اولان آغرقلری کورمدم . فقط کیجہ رؤیامدہ  
کوردم . برکیمسہ کلوب یا آمنہ ! محقق بیلملیسین کہ سن خیر العالمین ایلہ  
حاملہ سین . طوغدینی وقت آدینی ( محمد ) قویہ سین دیدی . وقت ولادت ایرشد کہ  
قولانغمہ بر بیوک سس کلدی ، اورکدم . ہان بر آق قوش کلدی ، قانادیلہ  
آرقہ می صیغادی . بندن ، قورقہ واورکہ حاللری کچدی . بریانمہ باقدم :  
بر بیاض کاسہ ایلہ شربت صوندیلر . آلوب ایچدیکم کبی ہر طرفی نور  
قابلا دی . او آندہ ( محمد ص . ع ) دنیایہ کلدی . اطرافہ باقدم ، کوردم کہ :  
عبد مناف قیزلرینہ بکزر ، فقط غایت اوزون بویلی برچوق قیزلر ، بنی  
طواف ایدیورلر . تعجب ایتدم ، یارب ! بونلر کیملراولہ ؟ » دیدم .

وقت ولادت محمدیہ ( آمنہ ) نک کوزندن پردہ قالدیریلوب اووجہلہ

حور جنانی وملائکہ کرامی کورمش ودها نیچہ خارق العادہ حاللر تماشا بیورمش اولدینی مرویدر .

عشرۂ مبشرہ دن ( عبدالرحمن بن عوف ) حضرت تلرینک والده سی ( شفا ) [۱] خاتون اوکیجه ( آمنہ ) نک یاننده بولنمش و آنک کوزینہ دخی وقت ولادت محمدیہده مشرقدن مغربہدک بتون دنیا نور ایله طولق کبی نیچہ خارق العادہ شیلر کورونمش اولدیغی اوغلی ( عبدالرحمن ) ه سویلش ، اودخی سائرلرہ حکایہ ایلمشدر .

اوکیجه عبدالمطلب ، مسجد حرامده جناب حقہ توجه و مناجات اوزرہ ایکن «مژده یا عبدالمطلب! شمدی ( آمنہ ) دن برچو جق طوغدی . وجودی عالمہ رحمتدر» دیو هاتقدن بر سس ایشیتمش وهان ( آمنہ ) نک یاننه کیتمش اوراده دخی نیچہ خارق العادہ شیلر تماشا ایتمشدر .

خاتم الانبیا حضرت تلری ، سنتلی و کوبکی کیلشمش اولدینی حالده طوغمشدی . آرقه سنده ایکی کورہ کی آره سنده تاقلبنک حذاسنده بر نشانه سی وارایدی که آگا ( خاتم نبوت ) و ( مهر نبوت ) دنیلور .

حضرت عایشه دن مرویدر . دیمش که : « مکده بر یہودی وارایدی . ولادت محمدیہ کیجه سنک فرداسی ، مجمع قریشه کلوب بوکیجه آرا گزده بر اوغلان طوغدیمی ؟ دیو صورمش . اوت . عبدالله بن عبدالمطلبک بر اوغلی اولدی . دیمشدر . ایشته خاتم الانبیا اودر و آرقه سنده علامتی واردر . دیو خبر ویرمش . وارمشلر ، او حضرتی کورمشلر . یہودی ، آنک شکل و شمائلنه باقوب آرقه سنده کی خاتم نبوتی کورنجه عقلی باشندن کیتمش و نبوت ، آرتق بنی اسرائیلدن کیتدی . بوندن صکرہ باشقه پیغمبر کلک امید ییتدی . قریشه بر مرتبه دولت و سطوت الویرہ جک که خبری مشرقدن مغربہدک ایرہ جک . دیمش .

انبیاء بنی اسرائیل ، خاتم الانبیا حضرت تلرینی کاه ( محمد ) و کاه ( احمد ) دیو ذکر ایلمش و علامت لرینی سویلش اولدق لرینی و علوم غیبیہ اصحابی دخی

[۱] بوخاتونک اسمی ( شفا ) و ( شفا ) اولق اوزرہ مختلف الروایه در .

برر صورتله استخراج ايتدكلرندن اووقت يهود كاهنلري آره سنده خاتم الانبيا  
حضرتلرينه دائر چوق سوزلر سويلنور و تشريفنه انتظار اولنور ايدى .  
بناءً عليه تاريخ ولادتى دخى بو وجهله كشف و تعيين ايتمشلر ايدى .

( حسان بن ثابت ) دن مرويدر . ديمشكه : « بن ، سكر ياشنده ايدم .  
ييليرم كه بركون صباحلين مدينه ده بر يهودى ، ديكر يهوديلره حاقيروب  
بو كيجه ( احمد ) ك ييلديزى طوغدى . ديدى . مكره حساب ايتدم .  
مولد محمدى كيجه سنه موافق دوشدى »

عبدالمطلب ، او مثلاً خير لوعلامتلى كوروب فوق العاده ممنون اولدى  
و « بواو غلملك شانى بك بيوك اوله جق » ديدى . كندوسنه الله طرفندن اويله  
بر سعادتلى اوغول احسان بيورلدیغنه دائر بر كوزل قصيده سويلدى و بر  
بيوك ضيافت يابوب قریش قومنى دعوت ايلدى . كلديلر ، يديلر ، ايجديلر ،  
« بو ضيافته سبب اولان چوجغه نه آد قويدك » ديو صورديلر .

عبدالمطلب ، ( محمد ) ديو جواب ويردى .  
آنلردنخى « بويله اجداد كده اولمايان آدى قومى قىمقدن مقصدك ندره » ديديلر .  
« مقصدم و تمى ايتديكم بوكه : آنى كوكده حق و يرده خلق بك چوق  
مدح و ثنا ايله » ديدى .

خاتم الانبيا ، حضرتلرينك بك چوق اسملى واردر . اك مشهورلرى  
( محمد ) و ( احمد ) در . ( محمد ) عربجه بك چوق حمد و ثنا اولمش اولان  
ذات ديمكدور .

( محمود مصطفى ) ، ( صاحب البيان ) ، ( صاحب الخاتم ) ، ( صاحب  
المقام المحمود ) ، ( صاحب القضيبي ) ، ( صاحب الهراوه ) دخى  
خاتم الانبيا ، حضرتلرينك القاب جليله لرندندر .

وقت ولادت محمد يده ظهوره كلن خارق العاده حاللردن برازى دخى  
يونلردر كه ذكر اولنور :

ولادت محمد يده ايوان كسرى ، صار صيلدى . اون درت شهنشينى ييقيلدى  
هوفارس ولايتده ( اصطخر آباد ) نام بلده ده آتش پرستلر يك سنه دنبرو

یاقمده اولان آتشکده لری سونویردی و (ساوه) کولی یره باتوب نابدید اولدی و (سماوه) وادیسندہ بالعکس صولرطاشدی و (موبدان) [\*] که فارسک قاضی القضاتی دیمکدر . او کیجه او دخی رؤیاسندہ کورمش که : بر آلائی سرت و سرکش ده و ولر ، بر بلوک عرب آتلیخی یدہ رک دجله نه رینی کچوب بلاد فارس ایچنه طاغلمشیر .

او وقت (آل ساسان) دن شاه عجم اولان (نوشروان) او وجهله ایوان صار صیلوبده شهنشینلرک یقیلماسندن مضطرب اوله رق قرناسیله بومستله یی سویلشورکن (اصطخر آباد) دن آتشکده نک سوندیکی خبری کلدی . ینه بوصره ده ساوه کولنک باتدینی و سماوه ده صولرک طاشدینی ایشیدیلدی . حساب ایتدیلر . هپ شهنشینلرک یقیلدینی و قته مصادف اولدی . بونک اوزرینه نوشروان ، تلاش ایدوب هان موبدانی جلب ایله بو وقعہ لری درمیان ایلدی . او دخی او کیجه کورمش اولدینی رؤیائی سویلدی .

نوشروان ، دهازیاده تلاش واندیشه یه دوشوب « عجب ابوعلامتر نه اوله ؟ » دیو موبداندن سوردی . موبدان ، نه اوله جغنی بیلورودی . هان « عربستانجه بر امر عظیم ظهوره کلک کر کدر » دیو جواب ویردی . در حال نوشروان ، ملوک عربدن او وقت کندوسنه تابع اولان (نعمان بن منذر) ، فرمان کوندروب بکا : « بر بیلگیج آدم کوندهر » دیو امر ایتمکه (نعمان) دخی (عبدالمسیح) نام فاضل بنامی کوندردی . (عبدالمسیح) هان پای تخت کسری اولان شهر (مدائن) ، واردی و نوشروانک حضورینه کیردی .

نوشروان ، وقوعاتی سویلیوب « بوعلامتر نه معنایه دلالت ایلر ؟ » دیو [\*] موبد : کسر باایله ، فتحلده مرویدر . مجوسده اولور . دانشمندر که مسائل مشکلیه جواب ووروب آندن نقل روایت اولنه . مجتهد و مفتی کی . برهان قاطع ترجمه سنی (موبدان) ایسه (موبد موبدان) دن مخففدر که (قاضی القضاة) مألئی افاده ایدر . عربلر ، بولکله یی (موبدان) شکلنده لسانلرینه نقل ایله مشلردر .

صوردی . ( عبدالمسیح ) دخی « بنم شام دیارنده ساکن ( سَطیح ) نام بر دایم واردر . بونلک معناسنی آنحق او ، ویره بیلور » دیو جواب ویردی .

آنک اوزرینه نوشروان « هایدی چابوق ( سَطیح ) ک یانه وار . آندن صور ، بکا جوانی کتور « دیو امر ایتدی . ( عبدالمسیح ) دخی همان ( مداین ) دن چیقوب دیار شامه کیتدی .

اووقت عربلر ایچنده ( کاهن ) و ( عرافه ) دینور برطاقم بیدگیج آدملر وار ایدی که اسرار الهیه دن بحث ایدرلر وکله جک شیرلی خبر ویررلر ایدی . اک مشهورلری ایشه بو ( سَطیح کاهن ) دیدکلری ذات ایدی که فوق العاده یاشلی بر آدم اولوب حتی ( نزار ) ک وفاتنده میراثی اوغلی ( مضر ) ایله دیکر اوغوللاری بیننده تقسیم ایدن او ، ایدی دیرلر . اصلی یمندن اولوب آنحق شام طرفنده بر صومعه ده یرلشوب قالمش ایدی . حال بوکه بدننده کمیک یوق ، شکل و قیافتجه مثلی نامسبوق ، دائما آرقه سی اوستنه یاتار و بر طرفه کوتور یله جک اولدقده کندوسنی دوشه مه کبی ده و شیروب حیوان اوزرینه یوکه دیرلر ایمش . الحاصل انسانه بکزه مز ، لسانندن باشقه اعضاسی اویناماز بر شخص عجیب اولوب فقط غایت فصیح و بلیغ سوزلر سویلر و نیجه ییللر صکره اوله جق و قوعاتدن بحث ایلر ایمش .

بزینه صده کله لم : ( عبدالمسیح ) آشوری مرتبه سرعت ایله ( سَطیح ) ک اولدینی محله واردی . یانه کیردی ، سلام ویردی .

( سَطیح ) ایسه اولوم دوشه کنه دوشه نمش و کوزلری قانمش اولدیغندن ( عبدالمسیح ) ک سلامنی ایشیتیمور و دنیا کلامی قولاغنه کیتیمور ایدی .

( سَطیح ) ک بو حالی ( عبدالمسیح ) ه پک زیاده تأثیر ایلدی وهمان سَطیحک جاننه تأثیر ایده جک سوزشلی سوزلری حاوی بر قصیده سویلدی .

شویله که : « عجبایمک اولومی صاغر می در ، یوقسه ایشیدیورمی ؟ یوقسه اولوب کیتدی ده بزلی بتون بتون مایوس ایتدیمی ؟ ای شیخ



فاضل و حلال مشکل ! بر بیوک و محترم جماعتک شیخی اولان همشیره زاده ک، شاه عجم طرفندن کوند رلش اولمسیله طاغ و دوز، کیجه و کوندوز دیموب و یوللرده کی مهالک و مخاطر آتی قید ایتیموب فوق العاده سرعت ایله سکا کلدی. جمله بیلگیج لارک عاجز قالدینی امور عظیمه یی سندن صوروب او کر نمک ایستر » دیدی .

بونک اوزرینه (سطیح) کوزلرینی آچدی و دیدی که « عبدالمسیح ، سرعت ایله سطحه کلدی . سطیح ایسه قبره کیرمک اوزره در . سنی ملک ساسان کوندردی . سراینک صار صیلمسی و آتشکده نک سونمی نهیه دلالت ایلدیکنی صورو یور ، برده موبدانک کوردیکی رؤیانک تعبیرینی ایستیور که رؤیاسنده بر آلا ی سرکش ده و ولر بر بلوک عرب آتیرینی یدرک دجه یی کچوب مملکتته طانیلدیغنی کورمشیدی . ای عبدالمسیح ! او دم که تلاوت چوغاله و ( صاحب هراوه ) ظاهر اوله و نار فارس سونه و سماوه وادیسی طاشه و ساره کولی باته ، شام آرتق ( سطیح ) ایچون شام دکلدی . بنی ساساندن ییقیلان شهنشینلرک عددنجه اون درت ملک و ملکه کلور و آرتق اوله جق اولور » دیدی وهان وفات ایتدی .

( عبدالمسیح ) ، ( مداین ) دن عودت ایلدی و (سطیح) دن ایشتیکی سوزلری نوشروانه سویلدی .

نوشروان ایسه کندوسنک زمان سلطنتنده بر فنالق ظهورندن خوف و اندیشه ایتمکده ایدوکنه مبنی بو خبردن متسللی و ممنون اولدی و « بزم نسلمزدن اون درت حکمدار کلوب کیدنجه دک نلر اولور » دیدی .

واقعا اون درت حکمدارک عادت اوزره عصر سلطنتلری کلوب کچنجه یه دک نیجه قرنلر کلوب کچمک لازم کلور . حال بوکه نوشرواندن صکره بر آراق دولت ساسانیّه نک حالی مختل اوله رق یالکیز درت سنه ظرفنده آل ساساندن اون حکمدار کلوب کیتمشدر و ساسانیلرک مدتی ظن اولندیغنی قدر اوزامیوب آز وقت ظرفنده مملکتلری اهل اسلام انه کچمش و نوشرواندن صکره اون دردنجی ملک اولان ( یزدجرد ) حضرت عثمانک خلافتنده تلف اوله رق آنکه دولت ساسانیّه منقرض اولوب بیتمشدر .



خاتم الانبیا حضرت تارینک ولادتندن بعثتنه قدر

ظهوره کلن خارق العاده

### حالات

مکه اهالیسی، اوتہ دنبرو یکی طوغان چوجقلرینی مکده طوتمیوب  
عشاردن بر سوت آنایه ویررلر وعشار ایچنده هواسی لطیف یرلرده  
تربیه ایتدیررلر ایدی .

بو جهتله عشاردن آره صره مکیه سوت آنالر کلور وامز یروب  
بو یوتمک اوزره برر چوجق آلور وچوجقلری بیودوبده آناسنه باباسنه  
تسلیم ایتدکارنده نائل اکرام وعنایت اولورلر ایدی .

ولادت محمدیه هنکامنده ( بنی سعد ) قبیله سندن مکیه برچوق سوت  
آنالر کلدی وهر بری برر چوجق آلدینی صرده ایچلرندن ( حارث )  
نام کیسه نك زوجه سی ( حلیمه ) دخی حضرت ( محمد ) ی آلدی وکندی  
یوردینه کوتوردی .

او سنه ( بنی سعد ) دیارنده قحط و غلا وار ایدی . ( حلیمه )  
فخر عالمی آلوبده کوتوردیکی کبی حیوانلرینک سودی چوغالدی وخانه سنده  
فوق العاده برکت پیدا اولدی . ( حارث ) بوکا دقت ایدوب « یا حلیمه !  
بوکتیردیکک یتیمک آیاغی نه اوغورلی ایمش . او، کلهلی کیجه مز خیر اولدی .  
امان آکا ایجه باقالمه دیدی .

( حلیمه ) ایسه آنی اوز اولادندن زیاده سوردی . حتی بو یویوبده  
ایاق اوزرنده کز مکه باشلادقده ( آمنه ) آنی آلمق ایستدی . لکن  
حلیمه « مکهنک هواسی آغیردر . امان طوقونماکنز . بر مدتجک دها بزم

يائمزده قالسون ، ديهرك ( آينه ) يي قانديردي و آني كندى يانسده  
آليقويدى .

حليمه ، آني جاني كبي سهووب واسن روزكاردن صاقينوب اصلا  
يائندن آيرماز ايدى .

بركون هر نصلسه ( حليمه ) غفلت ايتمش اودخى سوت قيز قيرنداشى  
( شيا ) ايله برلكده اوكلهين قوزيلرك يانه كيتمش . كلدكلرنده ( حليمه )  
قيزى ( شيا ) يه « نچون بويله كونشك شدتلى وقتنده طيشارو چيقيورسكز »  
ديمش . ( شيا ) دخى « بز صيجاق كورمديك . قيرنداشمك باشى اوجنده بر  
پاره بولوط طولاشيور . اوزره يه كيدرسه بولوط دخى برابر كيديور وبريرده  
طورسه طورويور . بورايه قدر هپ كولكه لكده كلديك » ديوجواب ويرمش .  
بونك اوزرينه ( حليمه ) و ( حارث ) فيخر عالمك طور و طرزينه  
زياده دقت ايدوب كوررلر كه : يوزينك نورانيتى و سيماسنك روحانيتى حسييله  
سائر چوجقلردن ممتاز اولدينى كبي اطواري دخى سائر چوجقلر اطاوارينه  
بكزه مز ، چوجقلر اويناركن او ، قارشودن باقوب اويونه قاريشماز .  
( حارث ) و ( حليمه ) آنك بو مثللو اطواريينه باقوب آنده بر باشقه  
تجلى اولديغى آكلامشلا و اولكيدن زياده آني حرمت كوزيله كوزه تمكه  
باشلامشلا .

وقتا كه درت ياشنه ايريشهرك كزوب طولاشيور اولدى و خارق العاده  
حاللى چوغلدى . ( حارث ) بو حاللردن اوركدى و زوجه سنه « يا حليمه !  
وقتيله بو چوجنى والده سنه ويرملى يز » ديدى .  
( حليمه ) دخى ناچار آني آلوب مكيه كوتوردى و ، والده محترمه - ي  
( آينه ) يه ويردى .

بعده ( آينه ) آني آلوب مدينه يه كوتوردى و دايي زاده لرى اولان  
( بنى نجار ) ايله كوروشدوردى .

اووقت مدينه ده بولسان يهود كاهنلرى ، آنك شكل و شمائلنه باقوب  
« بوايمك بيغمبرى ايشته بو چوجق اولسه كر كدر » ديرلردى .

( آمنه ) آنكه برابر مدينه دن مكه به عودت ايدوب انساى راهده وفات ايلدى . فخر عالم ، آنادن دخى يتيم قالدى ودهه سى عبدالمطلب آنى كندى يانه آلدى .

او وقت مكه ديارنده زياده قحط و غلا وار ايدى . قريش طائفه سى ، عبدالمطلبه كلوب ياغمور دعاسنه چيقمسنى نياز ايلديلر . اودخى فخر عالمك الله يايشوب ( ابو قيس ) طاغنه چيقدى . جناب حقه يالواردى . جناب حق دخى فخر عالمك حرمنه ياغمور ياغديردى وعظيم فيض وبركت ويردى .

شعراء عرب دن بعضيلرى ، او وقت بوقصه يه دأثر اشعار سويلشدر و بوندن طولاني عبدالمطلبه تشكر ايلشدر .

فخر عالم ، او وقت يدى ياشنده ايدى . برسنه صكره عبدالمطلب ، يوز بو قدر ياشنده اولدينى حالده وفات ايلدى وفخر عالم حضرتلى عمر جهه سى ( ابو طالب ) ك خانه سنده قالدى .

اوسنه دخى مكه ديارنده قحط و غلا اولغله قريش طائفه سى ، ابوطالبه كلوب ياغمور دعاسنه چيقمسنى استدعا ايلديلر . او دخى فخر عالمك التدن طوتدى و برلكده حرم شريفه كيتدى و كعبه ديوارينه طايانوب دعا ايتدى . فخر عالم ، پارمغنى كو كه طوغرى قالديردينى كي ياغمور ياغمغه باشلادى .

نته كيم ( جلهمه بن عرفطه ) نام ذات ، او وقت مكده بولنغله بوقصه يي شو وجهله تفصيل ايتشدركه . برسنه مكه به كيتدم . قحط و غلادن مكه اهاليسنك حالى يمان اولغله بينلرنده مشورت ايدوب بعضيلرى ( لات وعزى ) نام بتلردن و بعضيلرى ( منات ) نام بتدن استمداد ايددم . ديدكلرى صره ده ايجلرنده براختيار كي مسه : حالا آرا كزده سلاله ( ابراهيم ) ك بقيه سى موجود ايكن نيچون باشقه سبب آرايورسكنز ؟ ديمكه اشراف قريش ، همان قالقوب ابوطالبك يانه كيتديلر و ياغمور دعاسنه چيقماسنى نياز ايتديلر . اودخى چيقوب حرم شريفه كلدى . آرقه سنى كعبه ديوارينه ويردى . دعا به باشازدى . ياننده يوزى كونش كي پارلار بر او غلانسق وار ايدى .

پارمق‌لریله کوکه اشارت ایلدی . کؤک یوزنده بر پار، بولوط یوق ایکن  
هرجانبدن بولوطلر پییدا اولوب یاغمورلر یاغدی . سیلار آقدی « دیو  
بیان ایلشدر .

بو قصه‌ی، ابو طالب دخی بر قصیده‌سینده کمال فصاحت و بلاغت ایله  
ذکر ایلمش و فخر عالمک کرامت و سعادتیه دأثر سوزلر سویلشدر .  
فخر عالم، اون ایکی یاشنده ایکن ابوطالب، تجارت ضمیمه شام قافله‌سیله  
حقیقوب آتی دخی برابر کوتوردی .

شام ولایتیه واقع (بُصری) بلده‌سینده ایرشدکلرنده بر صومعه قارشوسه  
ایندیلر و بر آغاج آلتنه قوندیلر .

اوصومعه‌ده‌کی راهب‌ایسه (بحیرا) [\*] دیومعروف اولان (جرجیس)  
نام زاهد و منزوی بر ذات ایلمش .

کاربان کلورکن (بحیرا) باقوب کوررکه : کاربان ایله برابر بر بولوط  
دخی کلیسور . کاربان کلوب قوندقده بولوط دخی او آغاجک اوزرنده  
استقرار ایدوب طورویور و او آغاج خیلی مدتدنبرو قوروویوب قالمش ایکن  
در حال یشیل لشمش .

(بحیرا) کندی معلومات و کشفیاتنی بو حالته تطبیق ایله بیلورکه :  
خاتم الانبیا حضرتلری، بو قافله ایچنده و او آغاجک آلتنده در. همان برضیافت  
ترتیب ایله آشاغی اینوب ابوطالبی، رفقاسیله برابر صومعه‌سینه دعوت ایتدی .  
ابو طالب دخی او حضرتی یوکلرک یاننده بر اقوب سائر رفقاسیله برابر  
صومعه‌یه کیتدی .

جمله‌سی سفره‌یه حاضر اولدقلرنده بحیرا، آنلری برر برر کوزدن  
کچیردی . برینک یوزنده آرادینی علامتلی کورمدکن باشقه او بولوطک  
دخی حالا آغاج اوزرنده طوردیغنی کوردی وهان «آرقداشلر کزدن کله‌ین  
وارمی؟» دیه ابوطالبه صوردی . اودخی «یالکزر بر کوچوک چوجق قالدی»

[\*] بفتح الموحدة و كسر الحاء المهملة و سکون المثناة التحتية آخره راء مقصورة .  
سيرة الحلیه .



دیه جواب ویردی . بحیرا « آنک تشریفنی دخی نیاز ایدرم » دیمکه ابو طالب، او حضرتی آلوب سفرده کتوردی .

بحیرا، اثنای طعامده دقت ایدوب کوریر که : خاتم الانبیا حقنده انبیاء سالفه دن و علماء ماضیه دن مروی اولان علامتله ، هپ او ذات شریفده موجوددر . همان بعدالطعام آنی یانه آلدی و سکا براز شیر صورده جغم . لات و عنزی حقیچون طوغری سویله ، دیدی .

او حضرت دخی « لات و عنز آیه یمین و یرمه . زیرا بنم ، عالمده اک زیاده مبغوضم بتاردر ، دیو بیوردی .

آنک اوزرینه بحیرا ، الله تعالی حضرتلرینه یمین و یردی و او حضرتک احوالی لایقوله آکلامق ایچون صورده جغی شیرلی سورددی .

آلدینی جوابلر دخی کندوسنک اجتهدینی تأیید و اعتقادینی تأکید ایتدی وهمان بر تقریبله او حضرتک مبارک آرقه سنی آچوب خاتم نبوتی کوردی و کمال ادب و احترام ایله اوپدی .

برو طرفده اشراف قریش « بحیرانک عننده محمدک نه بیوک قدر و اعتباری وار » دیو تعجب ایدرک سویلشورلر ایکن بحیرا ، ابو طالبه « آدک نهدر و بو شرف و سعادت فدانی کیم در » دیو سورددی .

او دخی « بکا ابو طالب دیرلر . بوده او غلم در ، دیو جواب ویردی . بحیرا « یوق ، یوق . آنک شکل و شمائلنه باقیلیرسه بر در یتیم اولمق کرک در » دیدی .

ابو طالب ، « اوت . صلی او غلم دکلدر ، قرنداشمک او غلیدر و پدر و والدہ سی وفات ایتمکه یتیم در . فقط بنم تحت تربیه مده اولمغله او غلم مقامنده در » دیدی .

بحیرا ، اجتهدانده اصابت ایلمش اولدیغندن ممنون اولدی و آرتق کندوسنه اطمینان تام کلدی و دیدی که « یا ابا طالب ! بو چوجق ، انبیا و مرسلینک خاتمیدر . شام یهودیلری ایچنده آنک اوصافنی بیلور و علامتلرینی طانور

کاهنلر وارددر. شایدکه اهانت قیدینه دوشه لر. سن، آنی شامه کوتورمه. بورادن کیرو جویر، دیو نصحیت ایتدی.

ابو طالب، دخی بحیرانک سوزینی طوتدی و مالنی بصری بلده سنده ساتدی وهان کیرو کیتدی.

فخر عالم، ایام صباوتی کچیردی و سن شنبابه ایردی. یوزی نورانی و سوزی روحانی، خطاب و جوابی کوزل ورشد و رویتده بی بدل، سوزنده. صادق و حلم و مر و تبحه سائره فائق ایدی. بناء علیه قریش طائفه سی ایچنده ممتاز و مستثنا اولدی و (محمد الامین) دیو شهرت بولدی.

اون یدی یا شنده ایکن عمو جه سی (زبیر بن عبد المطلب) ایله برلکده. مننه کیدوب کلدی. بو سفر نده دخی کندوسندن خارق العاده حاللر کورلدی.

مکبه عودت لر نده رفیق لری، بو حاللری نقل و حکایه ایتمکه قریش ایچنده بو ذاتک شانی یک بیوک اوله جق « دیو سویلنور اولدی.

یکرمی یا شنه بالغ اولدقده کوزینه بعضاً ملکلر کورونمکه باشلادی. شویله که: آکا اشارت ایدوب « ایشته بتون عالمه هدایت ایریشدیره جک بودر. لکن هنوز ایام دعوتی ایریشه دی « دیرلردی.

فخر عالم، بو حالات عجیبه بی ابو طالبه آچدی. او دخی برکونه خسته لک اثری اولسون دیو آنی عرب کاهنلرندن برینه کوستردی و علاج و دوا سی صورتی.

کاهن، آنی دقت ایله معاینه ایتدی. « یا اباطالب! اندیشه ایتمه. بو وجود مقدس، هر درلو علل و امراضدن بریدر. کوزینه کورونن شیلرایسه ملائکه کرام ایله انسیته باشلانغچ اولق کرکدر و احتمال که نبی آخر الزمان بو، اوله « دیدی.

او، اوانده اشراف قریشدن کنج ایکن طول قلمش (خدیجه) نامنده. غایت زنکین بر خاتون وار ایدی. بعض ذواته اورتاقلق ایله سرمایه ویریر ایدی.

« محمدالامينه بر مقدار سرمايه و يرسهك خيلي خير و منفعت كوردرك ،  
ديو بعضيلر طرفندن كندوسنه اخطار اولمغله خديجه دخي او حضرته كلتي  
سرمايه ويردي و كولهسي ( ميسره ) يي دخي ترفيق ايدرك شامه كوندردى .  
فخر عالم ، حضرتلري قافله شام ايله كيدر كن بحيرانك صومعهسي  
اوكنه اينديلر و ميسره ايله برلكده بر آغاچ آلتنه قونديلر .

بحيرا ايسه مقدا فوت اولمغله يربنه كچن ( نسطورا ) نام راهب  
اورايه كلدى و ميسره ايله اسكيدن الفتى اولديغدن آنكله كوروشدى  
و سوزه كيريشدى . اللهمك برلكنه و محمدك پيغمبرلكنه شهادت ايتدى  
و « ياميسره ! حضرت عيسانك خبر ويرديكي خاتم الانبيا ، ايشته بودر . شامه  
كيتمه يكر . خونه يهود كوروب طانورلر واهانت داعيه سنده بولنورلر ،  
ديدى . بناء عليه فخر عالم ، دخي شامه كيتمه يوب بصراده آليش و يرش  
ايدرك اورادن كيرو دونديلر .

بك صيحاك بر كونده مكيه واصل اولديلر . خديجه ، بر قاچ قادينلر ايله  
بر محله طوروب شام قافله سنك كليشني تماشا ايديورلردى . كورديلركه :  
يولجيلردن برينك باشي اوزرنده ايكي قوش ، قاناد گوروب كليور و چادر كي  
كولكه ايديورلر . « بو كيم اوله ؟ » ديركن ميسره چيغه كلدى . ( محمدالامين )  
اولديغني بيلديردي و صيحاك و قتلرده ايكي ملك ، آنك باشي اوزره قاناد  
گوروب كولكه لنديرمك كي نيجه خارق العاده حاللر كورديكني و ( نسطورا ) نك  
سوزلريني خبر ويردي .

محاسبه كورولدى ، سائر سنه لره نسبتله كلتي كار و منفعت كوروندى .  
لكن خديجه نك كوزينه شام تجارتنك كار و منفعتي كورونمزدى .  
زيرا مقدا خديجه ، بر رؤيا كوروب عمى زاده سي اولان ( ورقه بن نوفل )  
تقرير ايتدكه « سن ، آخر الزمان پيغمبرينك زوجه سي اوله جقسين » ديو  
تعير ايتمشيدي .

ورقه بن نوفل ايسه نصارا ديننده اولوب ( انجيل ) و ( تورات )

او قور وکله جک شیلردن خبر ویریر غایت اختیار بر کاهن مشهور ایدی .  
بناء علیه خدیجه نك افکاری بوکا صارمش و سائر شیلری ذهندن چیقارمش  
ایدی .

ایشته بو صرمده طرفیندن واسطه لر پیدا اولدی و خدیجه نك فخر عالم  
حضرتلرینه عقد نکاحی خصوصنه قرار ویریلدی .  
همان خدیجه نك خانه سنده مجلس نکاح عقد اولتدی و قریش طائفه سنك  
اولولری طوبلاندی .

فخر عالم ، حضرتلری دخی عموجه سی حمزه ایله برلکده کیدوب  
اوراده بولندی .

اولا ابوطالب ، بر خطبه بلیغه انشا ایتدی که خلاصه وجهله ترجمه سی  
بوراده ایراد اولنور :

« شکر الله ، که بزلی ( ابراهیم ) ک ذریتندن و ( اسماعیل ) ک  
نسلسندن و ( معد ) ک اصلندن و ( مضر ) ک عنصرندن یاراتدی و بزلی  
بیت مکرمنک بکجیسی و حرم شریفنک خدمتجیسی و بو جهته ناسک حاکم  
ورثیسی ایتدی . بوندن صکره صده کله م . قرنداشم اوغلی اشبو ( محمد بن  
عبدالله ) ایله قریشدن هانکی نوجوان موازنه اولنسه بو ، آکا حسب و نسبجه  
وعقل و فضیلتجه فائق و مرجح اولور و اگرچه مالی آزا ایهده آکا باقیلماز .  
زیرا مال ، برطل زائل و امر حائل در و آلتون ویریلور ، ایکره تی برشیدر .  
والله بوندن صکره آنک حال و شانی پک بیوک اوله جقدر . حال بوکه سزک  
بو وجهله شرف و شان صاحبه سی اولان کریمه کز خدیجه یه رغبت بیوردی .  
شو قدر معجله و مؤجله و یردی . »

ابوطالبک بو خطبه سی اوزرینه ( ورقه بن نوفل ) دخی بر خطبه انشا  
ایتدی و « الله شکر ، که بزلی بیان ایتدیکک کی یاراتدی و صایدیغک  
شیلردن زیاده فضل و شرف ایله ممتاز ایتدی . ایمدی بز ، عربک اولولری  
وریسلری یز . سزده بویه سکز . عشیرت ، سزک فضلکزی انکار ایتمز  
و هیچ بر کیمسه سزک خیر و شرفکزی ردایلز . بزده سزکله کسب قرابته

راغبز . ای جماعت ! شاهد اولیکز . بن ( محمد بن عبدالله ) ه ( خدیجه بنت خویلد ) ی نکاح ایتدم « دیدی وقریشک اولولری شاهد اولدی . فخر عالم ، او وقت یکریمی بش یاشنده اولوب خدیجه ایسه آ کانستله خلیجه یاشلی ایدی .

ایشته ( خدیجه الکبری ) ده نیلن سیده النساء بودر . آنک وفاته قدر فخر عالم حضرتلری ، آندن خوشنود وراضی قالدی و آنک صاغلغنده باشقه خاتون تزوج ایتدی .

فخر عالمک حضرت ( خدیجه ) دن ابتدا ( قاسم ) نامنده بر اوغلی دنیایه کلدی . بناء علیه عرف و عادت عرب اوزره فخر عالمه ( ابوالقاسم ) ده نیلدی . فقط قاسم کوچوک ایکن وفات ایلدی .

فخر عالم ، اوتوز یاشنده ایکن ( زینب ) و اوتوزاوج یاشنده ایکن ( رقیه ) وبعده ( ام کلثوم ) نام کریمهلری دنیایه کلدی . کندویه نبوت کلدیکی اوانده ( فاطمة الزهرا ) نام کریمه محترمه لری طوغمشدرکه فخر عالم ، آنی جمله اولادندن زیاده سوه ردی و آنک حقنده ( سیده النساء ) دیو بیوردی . ینه فخر عالمک نبوتندن صکره ( عبدالله ) نام بر اوغلی دنیایه کلمشدر . لکن اودخی کوچوک ایکن وفات ایلشدر .

اووقت قریش طائفه سی ، جمهور طورنده ایدی . لکن احقاق حقه یک زیاده اعتنا ایدرلردی . اشراف قومک معرفتیه مظلومک حق ظالمدن آلیویریلوردی . حتی بر بیوک مجلس یاپوب مکّه مکرمده کیمسه یه غدر و ظلم ایتدیرمامک اوزره عهد و پیمان ایتشلر ایدی و او مجلسده فخر عالم حضرتلری دخی بولنمشیدی .

مقدما کعبه نک ایچنده بر قویو اولوب خزینه اتخاذا اولنه رق کعبه یه کتوریلن هدیهلر اورایه قونیلور ایدی . سیلدن کعبه نک بعض محملری ییقلمقله برخرسز ، اشبو کعبه خزینه سندن بعض اشیا چالمش وقریشک اولولری بیننده ویریلن قرار اوزره اللری کسلمش ایدی . بونک اوزرینه قریش طائفه سی ، کعبه نک مجددا بناسنه باشلادیلر و بنا



موضع رکنه چیققدقه بعض طوائف (حجر آسود) ی محله بز قویاجنز دیو ادعا ایلدیلر . دیکرلری ایسه مخالفت ایتمکله آرده مجادله پیدا اولدی . بو دعوانی قلیجله کسمک اوزره محاربهیه قرار ویردیلر . صکره بوقراردن واز کچوب حضرت (محمدالامین) ی حکم نصب ایدرک آنک حکمنه راضی اولدیلر . او حضرت دخی بر پارچه بز کتوروب (حجرالاسود) ی آنک ایچنه قویدی وهر قبیلهیه بر اوچندن طوتدیروب یوقارو قالدردی و مبارک اللریله (حجراسود) ی آلوب یرینه وضع ایتدی .

قریش قومی ، آنک بو حکم و تدبیری قبول و تحسین ایتدی و بو صورتله یینلرنده منازعه و مجادله بیتدی .

اووقت فخر عالم حضرتلری ، اوتوز بش یاشنده ایدی . اوتوزیدی یاشنه بالغ ایلدقدقه هاتقدن کندوسنه «یا محمد ، دیو ندا اولنغه و بعض طرفرده نور کورونمکه باشلادی . بو اسراری یالکیز خدیجه ایله سویلشوردی .

خاتم الانبیا ، کله جکنی اولجه خبر ویرمش اولانلردن بریسی دخی (ایاد) قبائلک اولوسی اولان مشهور (قس بن ساعده) در ، که پک چوق معمر اولمش و فصاحت ایله پک زیاده شهرت بولمش بر ذاتدر .

حتی ، پیر فانی ایکن (سوق عکاظ) ده بر قیزیل دهوه اوزرنده اولدینی و بلغای عرب ، اوراده حاضر بولندیغی حالده بر خطبه بلیغانه او قومشیدی .

اووقت فخر عالم حضرتلری دخی (سوق عکاظ) ده بولنوب آنک بو خطبه سنی دیکله مشیدی . فقط هنوز ناسی دعوته مأمور اولماشیدی .

(قس بن ساعده) نک او خطبه سی ، بلغای عرب ییتنده پک زیاده شهرت بولمش و دیلرده داستان اولمش در . بز دخی خلاصه وجهله ترجمه سنی بورایه درج ایله علاوه ایدلم :

«ای ناس ! کلیکیز ، دیکله یکیز ، بلله یکیز ، عبرت آلکیز . یاشایان اولور ، اولن فنا بولور ، اولاجق اولور . یا غمور یا غار ، اوتلر بیتر . چو جقلر طو غار .

آنالرينك بابالرينك يرينى طوتار . صكره هېسى محو اولوب كيدر .  
وقوعاتك آردى آردى كسىلمز . همان بربرينى ولى ايدر . قولاق طوتكز ،  
دقت ايدىكز . كوكده خبر وار ، يرده عبرت آلاچق شيلر وار . ير  
يوزى بر فرش ايوان ، كوك يوزى بريكسك طاوان . ييلدزلر يورور ، دكزلر  
طورور . كان قالماز ، كيدن كلز . عجب وار دقلرى يردن خوشنود  
اولوبده مى قاليورلر . يوقسه اوراده براقيلوبده اويقيه مى طاليورلر ؟  
يمين ايدر . اللهم عندنه بردين واردركه شيمدى بولنديغكز ديندن دها  
سوكيلودر واللهك بر كه جك پيغمبرى واردركه كلسى بك يقين اولدى .  
كولكسى باشكز اوستنه كلى . نه موطلو او كيمسيه كه آكا ايمان ايدوبده  
اودخى آكا هدايت ايله . وای اوبد بخته كيم آكا عصيان ومخالفت ايله .  
يازقلر اولسون عمرلرى غفلت ايله كچن امتلره !

ای جماعت ايا د ! هانی آبا واجداد ، هانی مزین کاشانه لر وطاشدن خانه لر  
ياپان (عاد) و(نمود) ، هانی دنيا وارلغنه مغرور اولوبده قومنه « بن سزك الكيوك  
ربكزم » دين فرعون ايله نمرو د ؟ آنلر سزه نسبتله دها زنكین وقوت وقدرتجه  
سزدن افزون دكيدیلر ؟ بوير ، آنلری دکرمننده او کوتدی ، توزایتدی ،  
طاغیتدی . کيکلی بیله چوریوب طاغیلدی . اولری یقیلوب ایصسزقالدی .  
یرلری ، یوردلری شمدی کوپکلر شنلندیوریور . صاقین آنلر کی غفلت  
ایتمه یك ، آنلرک یولنه کیمه یك . هرشی فانیدر . باقی آنجق جناب حق دركه  
بردر ، شريك ونظیری یوقدر . طاپاچق آنجق اودر . طوغماش ،  
وطوغورمامشدر . اول کلوب کچنلرده بزه عبرت آله جق شی چوقدر .  
اولوم ایرماغنك کیره جك یرلری وار ، اما چیقاجق یری یوقدر . بيوك ،  
كوچوك هب كوچوب كيديور . كيدن كيرو كليور . جزم ایتدم كه عامه یه  
اولان بكاده اوله جقدر . »

( قس بن ساعده ) خاتم الانبياءك قريباً كله جكنى كشف واستخراج  
ايدوب ( سوق عكاظ ) ده بويه على ملائ الناس سويلرايكن بيجاره ، آندن بی خبر  
ايدى كه خاتم الانبيا حضرتلری ، دخى اوراده حاضر وآكا ناظر ايدى .

آرەسى چوق كچمە يوب خاتم الانبىا حضرتلرينە نبوت و رسالت كەلدى . لىكن ( قس بن ساعدە ) وفات ايتىمكە كەلەندە كوروشىمىك كەندوبە نصيب اولدى .

آندن سىكرە ( بنى اباد ) ك اولوسى ( جارود ) نام ذات دخى آنك كى موحد و دين عيسوى يە معتقد اولدىنى حالە قومنىك اشرافيلە بىرلىكە كەلەن بىر كۈن حضور محمدى يە كىردى واسلام ايله مشرف اولوب آنىكە بىر بىر قومنىك اشرافى دخى ھې ايمان كىتەردى .

خاتم الانبىا حضرتلرى ، آندن مەن اولدى و « ايتىمكە قس بن ساعدە بى بىلەن وارمى » دىو سوردى .

( جارود ) دخى « يارسول الله ! جەلە مەن بىلورۇ . على الخصوص بىن ، دائما آنك ايزەندە كىدنلەردىم » دىو جواب وىردى .

خاتم الانبىا حضرتلرى « قس بن ساعدە نىك ، سوق عكاظە دەۋە اوزرەندە ( ياشايان اولور ، اولن قنا بولور ، اولاجق اولور ) دىھرك خطبە اوقۇدىنى خاطرمدن چىقماز . بىر خىلى سوزلەر دىھاس سويلەشەيدى . ظن ايتىم ، كە ھېسى خاطرلەردە قالمىش اولسون » دىو بىوردى .

ابوبكر الصديق حضرتلرى ، اوجىلسەدە حاضر بولۇپ « يارسول الله ! بىن دەۋە اوكون سوق عكاظەدە حاضر ايدىم . قس بن ساعدە نىك ، سويلەدىكى سوزلەر ھې خاطرمدەدە دىھرك مەذكور خطبە بى اوتۇندىن آخىرەندەدە اوقۇدى . آنك اوزرەندە ، ( جارود ) ك آرقاداشلەرنى بىر آياغە قالقۇپ ، قس بن ساعدە نىك ، بەئز اشعارىنى اوقۇدى كە حرم شەرىفە ( بنى ھاشىم ) دن محمد عليه الصلاة والسلامك بەئتنى صراحة ذ كر و بىيان ايتەشەيدى .

خاتم الانبىا حضرتلرى ، دخى « مامول ايدىم كە جناب حق ، روز قىامتە قس بن ساعدە بى آيروچە بىر امت اولەرق بەئ ايلە » دىو بىوردى . بىر شەيىمدى ، بەئت محمدى نىك كىفەتە و آندن سىكرە ظەھورە كلن وقوعاتك تفصىلاتە كەلم .



## بعثت محمدیه

فخر عالم ، محمد صلی الله علیه وسلم حضرتینہ قرق یاشندہ ایکن نبوت وقرق اوچ یاشندہ ایکن رسالت کلدی .

نبوتی ، رؤیای صادقہ ایله باشلایوب آلتی آی قدر رؤیاشندہ ہرنہ کوریر ایسہ عینیلہ ظہور ایدردی .

او انسادہ عزات و خلوتی سوردی و (جبل حرا) یہ کیدوب آندہ کی مغارہ دہ تنہاجہ عبادت ایلردی .

ایستہ او وقت ، جبیل علیہ السلام ، کلوب کندوسنہ کوروندی و ( اقرأ باسم ربك الذي خلق خلق الانسان من علق اقرأ وربك الاكرم الذي علم بالقلم علم الانسان ما لم يعلم ) آیت کریمہ لرینی کتیردی .

وہلہ اولادہ وحی الہینک مہابتی ، فخر عالمہ خوف و دہشت ویردی .  
ہان تیردیہ رک خدیجہ نک یاننہ واردی « بنی اورتک ، بنی اورتک » دیو بیوردی .

در حال خدیجہ ، او حضرتک اوزرینی اورتدی ، اودخی بر مقدار تنفس واستراحت بیوردقدن صکرہ وقوع حالی خدیجہ بیان ایتدی .

خدیجہ ، او حضرتی آلوب عمزادہ سی اولان مشہور ورقہ بن نوفلک یاننہ کیتدیلر و کیفیت وحی الہی بی آکا حکایہ ایتدیلر .

ہان ورقہ « مژدہ یا محمد ! سن عیسی بن مریمک خبر ویردیکی نبی آخر الزمانسین وسکا کورینن ملک ، حضرت موسایہ دخی نازل اولان ناموس اکبرد . کاشکی کنج اولوب دہ سنک اعلان دعوت ایدہ جکک وقتہ ایریشہ یدم وقومک سنی مکدن چیقارہ جفی وقت سکا یاردم ایدیم ) دیدی .

نبی مکرم صلی الله علیه وسلم حضرت تلی «یا، قوم بنی مکدن چیقاره جقمی؟» دیو سؤال بیوردی .

ورقه «اوت . منصب نبوت ، هر کیمه احسان بیورلدیسه قومی ایچندن آکا دشمنلر پیدا اوله کلشدر . سنی ده قومک مکدن چیقارسه لر کر کدر» دیو جواب ویردی .

آندن صکره وحی الہینک آرقه سی کسیلدی وجبریل علیه السلام کلوب کورغز اولدی . حضرت پیغمبر ، آندن پک زیاده صیقلدی .

فقط اسرافیل علیه السلام ، آره صره کلوب کیدر ورسول اکرمه بعض شیرتعلیم ایدر ایدی . بو حال ، اوچ سنه قدر سوردی .

بعده برکون حضرت پیغمبره کوکدن برندا ایردی . یوقاری باقوب جبریل امینی کوردی .

ینه کندوسنه خشیت ودهشت کلوب خدیجہ نک یانسه واردی ، لباسنه بورندی . او وقت ینه جبریل علیه السلام کلوب کوردی و (یا ایها المدثر) سورہ سنی کتوردی .

ایشته رسالت محمدیہ نک مبدئی بودر . آندن صکره جبریل امین ، پیدر پی آیات قرآنیہ ایله کلوب کیتمکه باشلادی ویکرمی سنه بو حال اوزره دوام ایلدی .

الحاصل فخر عالم حضرت تلی ، بریکی شریعت ایله کافه انس وجنّه مبعوث اولدی . آنک شریعتیله سائر شریعتلر ، منسوخ اولدی وخاتم النبیین اولوب آندن صکره پیغمبر کلک احتمالی قالدی .

ورقه بن نوفل ، اولجه فوت اولغله کندوسنک استخراج ایلدیکی کبی رسول اکرمک وقت دعوتنه یتیشه مدی .

بودعوتنه ابتدا اجابت ایدرک اسلام ایله مشرف اولوب ده رسول اکرم ایله برابر نماز قیلان ( حضرت خدیجہ ) رضی الله عنہادر .

بعده ( حضرت ابوبکر الصدیق ) ایله ( حضرت علی ) رضی الله عنہما وکرم الله وجهہما اسلام ایله مشرف اولمشلردر .



اگرچه او وقت حضرت علی، هنوز سنّ بلوغه واصل اولمامشیدی .  
لکن کوچوک ایکن رسول اکرمک سعادتحانه سنده و آنک تحت تربیه سنده  
بولمغله رسول اکرم، ناسی دعوته باشلادینی کبی اودخی ایمان ایتمشدر. فقط  
اسلامنی اظهار ایتیموب کیزلی طوتاردی .

اما ابو بکر الصدیق حضرتلری، زمان جاهلیتده قریش ایچنده بیومش  
اولدیغنی حالده نصل که فخر عالم حضرتلری، کوچوک کلکدن برو بتلره بغض ایده  
کلش ایسه اودخی اوته دنبرو بتلره سجده ایتزدی وعقل سلیمی ایله قریشک  
دیتندن بشقه عندالله مقبول بر دین اولدیغنی دوشونوب فقط آکا دالت  
وهدایت ایده جک بر قولاغوز بولامازدی. رسول اکرم، دعوته باشلادینی کبی  
جمله دن اول ایمان ایلدی، امنیت ایتدیکی ذواتی ده ال آلتندن دعوته باشلادی.  
بو صروده رسول اکرمک آزادلوسی اولان ( زید بن حارثه ) دخی  
اسلام ایله مشرف اولمشدر .

آندن صکره حضرت ابوبکرک دعوتی اوزرینه حضرت (عثمان بن عفان)  
( عبدالرحمن بن عوف ) و ( سعد بن ابی وقاص ) و ( زبیر بن العوام )  
( طلحه بن عیdale ) ایمان ایتدیلر و حضرت صدیق ایله برلکده  
حضور محمدی یه کیتدیلر و آبدست آلوب نماز قیلدیلر. رضی الله عنهم.  
ایشته اول باؤل اسلام ایله مشرف اولان اصحاب کرام، بوذاتلردر .  
آنلردن صکره ( ابو عیdale بن عبدالله بن الجراح ) و ( حباب بن ارت  
وعمر بن الخطابک عمزاده لرندن ) سعید بن زید بن عمر و بن نفیل ) ایله  
زوجه سی ( فاطمه بنت الخطاب ) و ( ابوسلمه بن عبد الاسد ) و ( ارقم  
بن ابی الارقم المخزومی ) و ( عثمان بن مظعون ) و قرنداشلری ( قدّامه  
ایله ) عبدالله ) و ( عیdale بن الحارث بن المطلب بن عبد مناف ) و ( عبدالله  
بن مسعود ) و ( بلال حبشی ) و ( صهیب رومی ) و ( عمار بن یاسر )  
ایله والده سی ( سمیه ) ایمان ایلدیلر . بعده ناس طاقم طاقم ایمان ایتمه  
باشلادیلر .

ابتدای امرده حضرت پیغمبرك دعوتی کیزلو ایدی . حتی نمازده قرآن کریم دخی جهر ایله اوقونمازدی .  
 صکره ( فاصدع بما تؤمر ) آیت کریمه سی نازل اولدی که مأمور اولدیغک نیئی آشکار ایت دیمکدر .  
 آنک اوزرینه رسول اکرم دخی ناسی علناً دعوته و قرآن کریمی جهرأ تلاوته باشلادی .

اول امرده قومنك اکثری ایمان ایتدیسه ده پکده آندن اوزاق طورمدیلر و او ، آنلرک پتلی حقنده سوز سویلدکجه آنلر دخی آنک حقنده فنا معامله بی روا کورمدیلر .  
 متعاقباً بتلره طایمق شرک و ضلالت اولدیغنه دائر و یالکز الله تعالی حضرتلرینه عبادت اولنمسنی آمر آیتلر نازل اولدی . بویسه قریشه کوچ کلدی .

او وقته قدر رسول اکرم دن یالان صادر اولدیغنی جمله سی بیلوب حتی بیلرنده ( محمدالامین ) دیو شهرت بولمغله هر سوزینه اینسانورلر ایکن بو خصوصده اینانمدیلر و هر نه قدر معجزه لر کوستردیسه ده قانمدیلر .  
 آرتق هر قنغیسنه هدایت الهیه ایرشدی ایسه ایمانه کلدی . باقیسی رسول اکرمه بغض و عداوت ایتک اوزره متفق اولدی .

بوجهتله ( ربیعہ بن عبد مناف ) کراوغوللری اولان ( عتبہ ) و ( شیبہ ) و ( ابوسفیان بن حرب بن امیہ ) و ( ابوالخثری ) و ( ابوجهل ابن هشام بن المغیره ) ایله عموجه سی ( ولید بن المغیره ) و ( عمرو بن العاص ) ک پدری اولان ( عاص بن وائل ) و سائر کبار قریش ، طویلانوب جمله سنک اولوسی اولان ابوطالبک یانته واردیلر . قرنداشک اوغلی ، بزم دینمه دخل و تعرض ایدیور ، بابالرکز و دده لرکزده ضلالتده ایدی دیور . یا آنی نهی ایت ، یاخود آنی حمایه دن واز کچ » دیدیلر .

ابوطالب ، آنلری طاتلی یوز و ملایم سوز ایله دفع ایتدی . رسول اکرم دخی اولکی کبی ناسی دعوته دوام ایلدی .

بو ايسه قريشه کران کلدی. تکرار طوپلانو بوطالبك ياننه واردیلر.  
« آرتق بز، بوحاله صبر و تحمل ایدمه بز. نه اوله جق ايسه اولسون. باری ایکی  
فرقه دن بری تلب اولوب ده دیکری راحت اوزره قالسون. اکر سن محمد دن  
واز کچمز ايسه ك بز سندن آریلورز » دیدیلر.

ابوطالب، ایشك بر مرتبه دها کوچلشدیکنی آکلادی و رسول اکرمه  
« قومك شویله، بویله دیور، دیو حکایه ایلدی.

« آرتق سنی حمایه ایدمه میه جکم » دیمدیسده سوزینك کلیشندن اومغنی  
آکلایشیلدی.

رسول اکرم ايسه بوندن پك زیاده محزون و مکدر اولدی، حتی  
مبارك کوزلرندن یاش کلدی.

« ای پدرم مقامنده اولان عثم! بن، الله تعالی حضر تلی طر قندن تبلیغه  
مأمورم، آنک امرینی یرینه کتورمکه مجبورم. آنلر، هر نه یاپارلر ايسه یاپسونلر  
بن بوندن واز کچمم، دیو بیوردی وهمان قالقوب یوریویردی.

ابوطالب، هر نه قدر ایمانه کلماش ايسه ده رسول اکرمی اوز اولادندن  
زیاده سوه ردی و آنک هر وجهله حمایه سنه اهتمام ایدردی.

رسول اکرمك اویله محزون اوله رق قالقوب کیتمی ابو طالبه پك  
زیاده تأثیر ایتمکه همان آرقه سنده چاغردی.

« ای برادر زاده م! سن ایشکه باق، بن صاغ اولدقجه آنلر، سکا برشی  
یایه مازلر، دیو تأمین ایلدی و بومآله بر قاچ بیت سویلدی.

فی الواقع رسول اکرمك حمایه سی خصوصنده ثبات کوستردی، اودخی  
کافی السابق امر دعوته دوام بیوردی.

عربلر بیننده عصبیت و قرابت غیرتی پك زیاده اولوب هر بری کندی  
عشیرت و اقرباسنك فوق العاده غیرتتی کوده ردی و ایجابنده هر قبیله یکوجود  
اوله رق دشمنه قارشو کیدردی.

دین اسلامك ظهورنده مؤمنلر بیننده دیانت اوزرینه بر، یکی اتفاق  
پیدا اولدی، آکا نسبتله اقربالقی اتفاقی کیر و قالدی.

رسول اکرم (کرم) دامادی یعنی (زینب) رضی الله عنها حضرت تارینک زوچی و تیزه زاده سی اولان (ابوالعاص) ایمانه کلیوب مشرکر ایله برابر ایدی . رسول اکرم ، پیدرپی نازل اولان آیت کریمه یی تلاوت وناسی دین حقه دعوت ایتدجکه عمی (ابولهب) آرقه سندن طولاشور و محمد ، سزی آبا واجداد کزک دینندن دوندرمک ایستر . صاقین آکا آلدانمیکز و آنک سوزینه اینانمیکز ، دیر ایدی .

ابولهبک زوجه سی (ام جمیل) که ابو سفیانک قیز قرنداشیدر . قوجه سی کبی اودخی ایله و دیلیله رسول اکرمه اذا وجفا ایلردی ، حتی دیکنلر طولایوب کیجه رسول اکرمک کچه چکی یوللر اوزرینه صاچاردی . رسول اکرمک کریمه لرندن (رقیه) رضی الله عنها حضرتلری ، ابولهبک اوغلی (عُتْبَةُ) یه و (ام کلثوم) رضی الله عنها حضرتلر ابولهبک دیکر اوغلی (عُتْبَةُ) یه نکاح اولنمشیکن ایکسی دخی مشرک اولدقلرندن آنالری و بابالری ایله برلکده رسول اکرمه دشمن اولدیلر .

حالبوکه (وانذر عشیرتک الاقرین) آیت کریمه سی نازل اوله رق رسول اکرم ، بالخاصه یقین اقرباسنی الهک عذابیه قورقوده رق دین حقه دعوت ایتکه مأمور اولنجه همان حرم شریفه کتیدی و صفا اوزرینه چیقوب قومنی دعوت ایتدی .

بنی هاشم ، هپ کلوب اوراده حاضر و رسول اکرم حضرتلرینک خطابنه منتظر اولدیلر .

رسول اکرم «ای عبدالمطلب اوغللری، ای فهر اوغللری! اکر شو طاغک آردنده بر دشمن وار ، سزی غارت ایتک ایچون کلش دیسه م اینانورمیدیکز ؟» دیو سؤال ایتدی .

جمله سی «اوت» دیدیلر .

رسول اکرم «اوله ایسه بن ، سزی اوککزده کی قیامت کوننک عذابیه قورقوتمغه مأمورم ، ایمان ایدیکز» دیو بیوردی .

عمی (ابولهب) قیزدی و قیزغینقله آغزینی بوزدی . «بزی بو سوز

ایچونمی چاغیردک « دیو تکدیر ایلدی ورسول اکرمک خاطرینی قیره جق سوزلر سویلدی .

آنک اوزرینه ، ( تبّت یدا ابی لهب و تبّ ) سورهمسی نازل اولدی .  
( ابو لهب ) ک کندو علیهنده بویله مخصوصاً سورهم نازل اولمسندن  
وزوجهسی ( آم جیل ) ک ( حمالة الحطب ) دیو یاد و تشهیر اولمسندن طولانی  
پک زیاده جانی صیقیلدی .

هان اوغللری ( عتبه ) ایله ( عتیبه ) بی چاغردی و حضرت ( رقیه )  
ایله حضرت ( آم کلثوم ) ی بوشامالری ایچون قطعاً امر ویردی .  
آنلر دخی مشرک اولدقلرندن درحال بو امری یرینه کتیردیلر  
وخاتم الانبیا حضرتلرینک دامادلغی کبی بر دولت و سعادت الیرندن  
چیقاردیلر .

( آم کلثوم ) ک نکاحلیسی اولان ( عتیبه ) یالکز آنی بوشادیغنه  
قناعت ایتیموب حضور نبوییه کتیدی « بن ، سنک دینکی منکرم ، سنی سوم .  
سنده بی سومز سین . آنک ایچون قیزیکی بوشادم « دهرک حضرت پیغمبرک  
اوزرینه هجوم ایتدی و یاقاسندن طوتدی ، کوملکنی یرتدی .  
خاتم الانبیا حضرتلری دخی « یارب ! آنک اوزرینه جاناوارلرکدن  
بر جاناواری مسلط ایت « دیو بددا ایتدی .

جناب حق ، حبیب اکرمک دعاسنی قبول ایلدی . شویله که : عتیبه ،  
شامه کیدرکن ( زرقا ) مرحله سنده بر آرسلان چقبوب آنی پارالادی .  
رسول اکرم ، آندن صکره کریمهسی ( رقیه ) رضی الله عنها حضرتلری  
عثمان بن عفان رضی الله عنه حضرتلرینه ویرمشدر .

حضرت پیغمبرک مقدما ( قاسم ) نام اوغلی ومؤخرآ ( عبدالله ) نام  
اوغلی فوت اولوب آنلردن باشقه ارکک اولادی قالمادیغندن کفار قریشدن  
بعضیلری « محمدک یرینی طوناجق اوغلی قالمادی . فوت اولدیغی کبی آدی  
اونودیور « دیدیلر .



بیلیوراردی ، که جناب حق ، حبیب اکرمه نملر ویرمش و آنی نه بیوک رتبه لره ایریشدیرمشدر .

خاطرلرینه کلیوردی که آنک شریعتی قیامته قدر قاله جق و امتی کندوسنک اولاد واحفادی مقامنده اوله جق در .

خاتم الانبیا حضرتلری ، اولاددن اولاده قالاجق بر دولت و سلطنت تشکیل ایتک ایچون کلدی که ارکک اولادی قالمادی دیو اندیشه اولنسون .

او ، آنجق عالمی شرک وضلاتدن خلاص ایتک ایچون کلدی . قیامته قدر قاله جق بر شریعت بر اقوب کیتمک ایچون کلدی .

بلکه ، آرقه سندن ارکک اولادی قالماق دخی بونکته یه اشارت و بو جهتله موافق حکمت ایدی .

مشرکار ، او حضرتقی فرصت بولدقجه بویه لسانلریله اینجیدرلر ایدی . لکن عممی ( ابو طالب ) ک حمایتسنده اولمغله باشقه بر شی یاپه مازلردی .

( ابوبکر ) رضی الله عنه حضرتلرینک عشیرتی چوق اولدیغندن آکا دخی برشی دیه مزلردی .

اما سائر مؤمناره درلو اذا وجفا ایدرلردی و دین اسلامدن دوندرمکه پک چوق چالیشورلردی .

حتی ( عمار بن یاسر ) ک والده سی ( سُمَیَّه ) خاتونه دین اسلامدن دونمک ایچون اذیت ایدرلرکن ( ابو جهل ) کلوب بر حربیه ایله بیچاره یی شهید ایلشد .

( بلال حبشی ) رضی الله عنه که کوله لردن ابتدا اسلام ایله مشرف اولان اودر . کفاز قریش ، آکا درلو اذیتلر ایدرلردی .

حتی بوینه ایپ طاقوب و چوجقارک اللرینه و یروب مکه زقاقلرنده طولاشدیرلرلردی . حضرت بلال ایسه « الله بر ، الله بر ، دیر و دیننده ثبات ایلر ایدی .

بناءً على ذلك اهل اسلامدن بعضيلرى ، اسلامنى اظهارايدمه ميوب كيزلو  
طوتارلر ايدى .

ابوبكر الصديق رضى الله عنه ايسه ، اول و آخر اسلامنى آشكار  
ايتدكدن باشقه مستعد كوردىكى كيمسه لرى اقناعه جهد ايدر و ايمانہ كلن  
كوله لرى صاحب لردن صتون آلہرق آزاد ايلر ايدى .  
مشركلرك ، اهل اسلامه اذا وجفالرى ايسه كوندن كونه زياده اولمقده  
ايدى .

بو جهتله فخر عالم حضرتلرى ، نبوتنك بشنجى ييلنده اهل اسلامك  
ديار حبشه هجرت ايللرى ايچون رخصت ويردى .  
ابتدا ( عثمان بن عفان ) ايله زوجه سى و رسول اكرمك كريمه محترمه سى  
اولان حضرت ( رقيه ) و ( زبير بن العوام ) و ( عثمان بن مظعون )  
و ( عبدالله بن مسعود ) و ( عبد الرحمن ابن عوف ) مكدن چيقوب  
ساحل درياه وارديلر و بجرأ آفريقا ياقاسنه كچديلر و حبش ملكى اولان  
( نجاشى ) نك ياننه كيتديلر .

بعده ، حضرت علينك بيوك برادرى اولان ( جعفر بن ابى طالب )  
دخى هجرت ايتدى و آنلرك ياننه كيتدى .  
( نجاشى ) نصارا ديننده اولدنى حالده اهل اسلام مهاجرلرينه ير  
كوستردى و حرمت و رعايت ايتدى . طوغرىسى انسانيته خدمت  
ايتدى .

بعده ، اهل اسلامدن بر خيلى ذاتلر بربرى آرقه سندن اورايه كيتديلر .  
بو جهتله ( نجاشى ) ياننده اهل اسلام ايجه چوغالدى .

اهل اسلامك بو وجهله ، ديار حبشه چوغالمسندن و دين اسلامك  
اطرافه ياييلماسندن طولاي قريش طايفه سى ، فكر و اندیشه دوچار  
اولدى .

هان ، اهل اسلام مهاجرلرينى كيرو چويرمك ايچون ( عبدالله بن ابى  
ربيعه ) ايله ( عمرو بن العاص ) ي كوندرديلر .

آنر دخی نجاشینک یانه واروب ، آندن اهل اسلامک کندولرینه تسلیم اولمسنی طلب ایتدیلر .

نجاشی ایسه، کندوسنه دخالت والتجا ایدنلری، دشمنلری یدینه تسلیم ایتکی انسانیتنه مغایر کوردی و آنلره رد ایله جواب ویردی . بو جهتله ایکسی دخی مایوس اوله رق دونوب مکّه کلدیلر .

خاتم الانبیا حضرتلری ، نبوتنک آلتنجی سنه سنده برکون ( صفا ) ده اوطورور ایکن ابو جهل اورادن کچوب آکا سبّ ایتدی .

حضرت پیغمبر بر شی دیمه یوب سکوت بویورمش ایسه ده ( عبدالله بن جدعان ) ک بر جاریه سی آنی ایشیتدی .

عمّ رسول اولان ( حمزه بن عبدالمطلب ) اوکون اوده بولمغله آودن کلوب اوینه کیدرکن بر معتاد طواف ایچون سلاحلری اوزرنده اولدینی حالده حرم شریفه کیتدی .

حال بوکه ( حمزه ) حرم شریفه کیدرکن اوجاریه ( ابو جهل ) ک رسول اکرمی سبّ ایلدیکنی کندوسنه خبر ویردی .

حمزه ، هنوز ایمانه کلامش ایسه ده برادر زاده سی حقنده فنا سوز سویلندیکنی ایشیدنجه حمیت قرابت طمارلری حرکت ایتمکله همان مجمع قریشه واردی . « بنم برادر زاده می سبّ ایدن و خاطرنی اینجیدن سمنی سین ، دهرک بویننده کی اوق یایی ایله ( ابو جهل ) ک باشنی یاردی .

اوراده بولنان بعض کسان ( حمزه ) نک اوزرینه هجوم ایده جک ایده جک اولدیلر . آز قالدی که بر بویوک عریده چیقّه یازدی .

فقط ابو جهل ، « طوقونما یکنز . حمزه نک حقّی واردر . زیرا بن آنک برادر زاده سی حقنده صحیحاً فنا سوزلر سویلدم ، دیو مانع اولدی وانصاف وحقانیت صورتی کوستردی .

حمزینی ، باشندن صاودی وکندی یاراننه « امان آکا ایلشمه یکنز . واروب حدت ایله مسلمان اولور و آنکله محمدیلر قوت بولور ، دیو نصیحت ویردی .

چونکه حمزه، قریش ایچنده عزیز و محترم و غایت بهادر بر آدم ایدی و هنوز ایمانه کلامش ایسه ده عربلر بیننده عشیرت و اقربا غیرتی زیاده اولدیغندن برادر زاده سی ایچون هرشیئی کوزینه آلمشیدی .

ابو جهلک متعلقات و طرفدارانی چوق ایسه ده یینلرنده عربده بویودیکی تقدیرده حمزه نك طرفنده دخی برفرقه پیدا اولوب بودخی بالطبع اهل اسلامه طرفدار بولنوردی .

ابو جهلک ، عقل و فکری ایسه اسلامک قوت بولماسی خصوصنه مصروف ایدی . بناءً علیه حمزه نك سبيله قریش ایچنه برفرقه دوشوبده بو جهتله دخی اهل اسلامک قوت بولسندن صاقینوردی .

یوقسه ابو جهل ، قریشک اولولرندن مرعی الحاطر و سوزی نافذ و مؤثر ، طرفداری چوق و کیمسه دن پرواسی یوق بر حریف ایدی .

حتی رسول اکرم « یارب! بودینی ابو جهل ایله ، یاخود عمر بن الخطاب ایله عزیز ایت » دیو جناب حقه دعا ایتمشیدی .

چونکه اووقت قریش ایچنده اک زیاده سوزینی یورودن و خاطرینی صایدیران بویاکیسی ایدی و رسول اکرمه اک زیاده عداوت کوسترن دخی آنلر ایدی .

الحاصل ابو جهل ، حمزه بی بوتون بوتون محمدیلک غیرتنه دوشورمامک ایچون باشنی یارمش ایکن آندن انتقام آلمق سوداسنه دوشمه دی .

حمزه ایسه ، شرف اسلامه پک مستعد اولدینی حالدّه حضور محمدییه واردی و ابو جهل ایله اولان ماجرای حکایه ایدرک تسلیت ویردی .

رسول اکرم ، دخی آنجق کندوسنک ایمان ایتسیله متسلّی و بمنون اوله جغنی بیان بویوردی . آنک اوزرینه ( حمزه ) درحال کلمه شهادت کتوردی .

حضرت حمزه رضی الله عنه ، اسلام ایله مشرّف اولنجه فیما بعد رسول

اکرمی حمایه ایده جکنی قریشه اعلان ایلدی و بو مألده بر کوزل قصیده سویلدی .

آنک ایمان ایتسیله دین اسلام ، پک زیاده قوٓت بولدی . اهل اسلام فوق العاده ممنون اولدی . بو ایسه قریشه پک زیاده کوچ کلدی .  
آنک اوزرینه قریشک اولولری طویلانوب مشورت ایتدیلر « محمدیلر ، کیتدجکه چوغالیور ، بو ایشک صوکی فنا کورینیور . وقتیه بوکا باشلیجه بر چاره دوشونمیلدر » دیدیلر .

هر بری بر رأی ویردی . ( ابو جهل ) دخی « محمدی اولدیرمکدن غیری چاره یوقدر و بوکا کیم ظفریاب اولورسه آکا شو قدر ده وه و بوقدر پاره ویریرم » دیدی .

عمر بن الخطاب ، یرندن قالقدی « بو ایشی ، خطّاب اوغلندن باشقه یابه جق یوقدر » دیدی .

مجلسده اولانلر ، عمری آلقشلا دیلر « هایدی خطّاب اوغلی ! کوره لم سنی » دیدیلر .

عمر دخی هان قلیجی قوشانوب کیتدی . و کیدرکن یولده ( نعیم بن عبدالله ) ه راست کلدی .

نعیم کوردی که : عمر ، قلیجی بلنده پک حدتلی کیدیور « نره یه یاعمر ! » دیو سوردی .

او دخی « ملت عربک آره سنه تفرقه دوشورن محمدک وجودینی دنیادن قالدیرمغه کیدیورم » دیو جواب ویردی .

نعیم « یاعمر ! مشکل ایشه تشبث ایتمش سین . محمدک اصحابی ، آنک باشی اوچنده طولاشیور . آکا ظفر بولمق کوچدر . طوته لم که ظفر بولدک . صکره بنی عبدالمطلبک انندن خلاص بوله مزسین » دیدی .

عمر بو سوزدن حدتلندی « او یله ایسه سن ده محمدیلردن سین . ابتدا سنک ایشکی بتورملی یم » دیو قلیجه ال اوردی .



نعيم « يا عمر ! سن بنى براق. همشيرەڭ ( فاطمه ) ايله زوجى ( سعيد بن زيد ) . باق كه ايكيسى دىخى محمدلردندىر ، ديدى .  
عمر ، آنلرك اسلامنه اينامدى .

نعيم « اكر اينانماز ايسەڭ تحقيق ايت آكلارسين ، ديدى .  
عمر ك بوحركتى ، فى الواقع كندوسنجه غايت تهللكو ايدى . زيراثشبت ايلدىكى ايشك عهدە سندن بالفرض كلش اولسە درحال دين دعواسى برطرفه قاله جق وعادت عرب اوزره بريىوك قان دعواسى پيدا اوله جق وقريش قومى ايكي فرقه اولوب آرمەدە بيوك مقاتلەر وقوع بوله جق ايدى .  
بو تقديرجه دكل يالكىز عمر بن الخطاب ، بلكە بتون خاندان خطاب تلف اولوردى .

لكن عمر ، كندى رآى وعزمندە مصر وغايت جرى وبهادر بر آدم اولديغندن بويله فدايىك يولندە كندوسنى ميدانە آتدى .  
فقط همشيرەسى ( فاطمه ) ايله زوجى ( سعيد ) ك اسلامى خصوصى كندوسنە مراق اولديغندن هان آنلرك خانه سنە كيتدى .  
مكر او ائنادە ( طه ) سورە شريفەسى نازل اولمىغە ( سعيد ) ايله ( فاطمه ) آنى بر صحيفە اوزرينە يازديروب و اصحاب كرامدن ( خطاب بن ارت ) ي خانه لرینە كتوردوب آنى تعلم ايدورلرمش .

عمر ، او خانه نك كوشە باشندن طولاشور ايكن آنلرك تلاوتى ايشيدنجه هان شدت ايله قپويى چالدى .

عمر ك قليج بلندە وحدتلى برحالدە كلديكى كورلمكلە سعيد و فاطمه تلاش ايدرك او صحيفەنى صاقلاديلر و خطابى بر كوشە يە كيزلديلر .  
بوصورتله قپو آجيلوب عمر ايجرو كبردى « او قودىغكز نه ايدى ؟ »  
ديو صوردى .

سعيد « خير ، برشى يوق » ديهرك تلاش ايله بر جواب ويردى .  
عمر ، غضبه كلوب « ايشيديكمز صحيج ايمش . سزده محمدك سحرينه آلدانمش سكر » ديهرك سعيدك ياقە سندن طوتدى ، يره آتدى .

فاطمه، آنی قورتاریم دیرکن عمر، آنک یوزینه ده برطوقات اوردی. همان یوزندن قان روان اولدی.

عمر، قیز قرنداشنک یوزندن قان آقدیغنی کورنجه کندوسنه پشپانلق الیوردی و بوجهتله حدتی سکونت بولدی.

فاطمه، اگرچه آل قانه بویاندی و جانی یاندی. لکن غیرته کلوب حمیت دینه سی او یاندی و جناب حقه طیاندی.

همان «یا عمر! نیچون الهدن اوتانمز سین و آیات و معجزات ایله کوندردیکی پیغمبره اینانماز سین. ایشته بن و زوجم، شرف اسلام ایله مشرف اولدق. باشمزی کسه ک بوندن دونمیز» دیویوردی و شهادت کتوردی.

عمر، نه یاپه جغنی شاشیردی و همان یره اوتوردی «هله شو اوقود یغکنز کتابی چیقاریکنز» دهرک صورت ملایمت کوستردی.

فاطمه، او صحیفه یی کتوردی، عمره ویردی. عمر، یازی اوقومق بیلوردی. طه سورمه سی اوقومغه باشلادی.

قرآن کریمک فصاحت و بلاغتی و معانی و مزایاسنک حلاوت و لطافتی عمرک قلبنه فوق العاده تأثیر ایلدی.

یوقارودن آشاغه طوغری تلاوت ایدرک «نه مافی السموات و مافی الارض و مابینهما و ماتحت الثری» آیت کریمه سنه کلدی.

معناسی: کوکلرده و یریوزنده و بونلرک آرمسنده و طوپراغک آلتنده کی شیلر هپ آنکدر، یعنی الله تعالی حضر تلرینکدر. دیمک اولور.

عمر، بو آیت کریمه یی ذهننه آلدی و معناسنه دقت ایدرک برده رین فکر و مطالعه یه طالدی.

قیز قرنداشنه خطاباً «یا فاطمه! بو قدر مخلوقات، هب سزک طاپدیغکنز تکرینکمیدر» دیو صوردی.

فاطمه «اوت، او یله یا. شبه می وار؟» دیو جواب ویردی.

عمر «یا فاطمه! بزم بیک بشیوز قدر مکلف و مزین بتلریمز وار. هیچ

بريسنك يريوزنده بر قيراط ملكى يوق » ديو سويلنه رك حال حيرت  
وتردده قالدى .

فقط دين حقه ايجه ميلى آقدى واو آيتك آلت طرفنه باقدى .  
( لاله الاھولہ الاسماء الحسنی ) آيت كريمه سنى كوردى .

معناسى : باشقه طاهاجق يوقدر . آنجق اودر . اك كوزل اسملر  
آنك در . ديمك اولور .

عمر ، بو آيت كريمه نك معناسنى مطالعه ايتدى . اراده سى الندىن كيتدى .  
همان كوكسى كورله يه رك كلمه شهادت كتوردى .

خباب ، آنى ايشتكده تكبير كتوره رك كيزلنش اولدينى يردن ميدانه  
چيقيوردى .

« يا عمر ! حضرت پيغمبر ، يارب ! بو دينى ابو جهل ايله ، ياخود  
عمر بن الخطاب ايله عزيز ايت . ديو دعا ايتمشيدى . ايشته بودولت وسعادت  
سكا ميسر اولدى » ديو عمره مژده ويردى .

عمر ك دين اسلام عليهنده اولان افكارى تماميله عكسسه دوندى . همان  
« رسول اكرم نره دده در ؟ » ديو صوردى .

اوكون رسول اكرم ، صفا جوارنده بر خانه ده اصحاب كراميله كيزلوجه  
مصاحبت ايدىوردى . خباب رضى الله عنه ، عمرى آلوب اورايه كوتوردى .  
عمر ، واروب اوخانه نك قپوسنى چالدى . قپوده اصحاب كرامدن برى  
كوزجى بولمغله عمر ك مسلح اوله رق كلديكنى خبر ويردى .

عمر ، صحيحاً بر قورقونج آدم اولدينى ايچون آنك بووجهله كليشندن  
اصحاب گزين اوركدى .

حمزه رضى الله عنه حضرتلرى ايسه « عمر دن قورقه حق نه وار ؟ اكر  
ايلك ايچون كلش ايسه خوش كلدى ، صفا كلدى . آلا او قليجنى چكمه دن  
بن ، آنك باشنى يره دوشوريرم » ديركن عمر ايچرو كيردى .

اصحاب كرامك عمره امنيتى اولمدينى جهتله برى صاغندن وديكرى  
صولندن طوتارق حضور نبوى يه كتورديلر .

حال بوکه اولجه جبریل امین کلوب عمرک ایمانه کلدیکنی وهان حضور نبوی یه کلمک اوزره اولدیغنی رسول اکرمه بیلدیرمشیدی .  
 بناءً علیه اصحاب کرام، عمرک کلایشندن تلاش ایدرکن رسول اکرم تبسم ایدیوردی .

او وجهله عمری ایجری کتوردکلرنده حضرت پیغمبر « براقیکز » دیدی . همان براقیدیلر . او دخی کلوب حضور نبویه دیز چوکدی .  
 رسول اکرم، عمرک قولندن طوتوب « ایمانه کل یاعمر ! » دیو بویوردی .  
 او دخی خلوص قلب ایله شهادت کتوردی .

بوندن اصحاب کرام، او قدر ممنون اولدیلرکه اووقته قدر برکیمسه ایمانه کلمسه اعلان اولمق عادت دکل ایکن بلند آواز ایله تکبیر آلدیلر . شویله که :  
 هب مکة زقاقلرنده ایشیدیلدی .

اولجه حضرت حمزه نك واوچ کون صکره حضرت عمرک ایمان ایتسیله دین اسلام خیلیدن خیلی قوت بولدی . بناءً علیه شرف وشانی او وجهله اعلان ایدیلدی .

آنک اوزرینه عمر رضی الله عنه حضرتلری « یارانمز نه قدردر ؟ » دیو سوردی .

صایدیلر « سنکله برابر تمام قرقه بالغ اولمشز » دیدیلر .  
 « اولیه ایسه نه طور ویورز ؟ هایدی چیقلم ، حرم شریفه کیده لم واعلاء کلمة الله ایدلم » دیمکله جمله سی یرلرندن قیام وحرکت ایتدیلر .  
 شویله که : اک اوکده عمر و صکره علی وبعده رسول اکرم صاغنده ابوبکر و صولنده حمزه و آرقه سنده سائر اصحاب کرام یورویه رک حرم شریفه کیتدیلر .

قریشک اولولری ، حرم شریفده طویلانوب عمر طرفندن برخبر بکله مکده ایکن کوردیلرکه عمر ، جماعت اسلامک اوکنه دوشمش کلیور .  
 یکدیگره دیدیلرکه « باقمه کز آ عمر ، بتون محمدیلری آرقه سنه آلمش کتیریور »

ابوجهل، جن فکری بر شیطان حریف اولدیغدن بو کلیشی بکنمدی. سکیردوب ایلرو واردی «خیر اوله یاعمر بونه؟» دیو سوردی. حضرت عمر وقارینه خلل کتورمیه رک «اشهد ان لا اله الا الله و اشهد ان محمداً رسول الله» دیو جواب و بردی. بونک اوزرینه ابوجهل، نه دیه جکنی شاشیردی. سائر اعیان قریشه دخی حیرت الویردی.

حضرت عمر رضی الله عنه، عمومه خطاباً «بنی بیلن بیلور، بیلمین بیلسون که عمر بن الخطابم» دیدی. بوجهتله قریش طائفه سنه فوق العاده شاشقینلق کلدی. هان بر طرفه طاغیدیلر.

ایشته او لون اهل اسلام، حرم شریفده صف اولدیلر و جهر ایله تکبیر آله رق میدانده نماز قیلدیلر.

قریش طائفه سی کوردیلر که: اهل اسلام، کوندن کونه چوغالیور و دین اسلام قوت بولویور. رئیس قوم اولان ابوطالب، اگرچه ایمان ایتماش ایسه ده حضرت پیغمبری اولادی کبی حمایه ایدیور، بنی هاشمدن سائر ایمان ایتمانلر دخی آنکله برابر اولوب عشیرت و قرابت غیری تی کودویور. بورالری نیلرنده مذاکره و مشاوره ایدوب اکنه بوینه اولجیدیلر، بیچیدیلر.

نهایت نبوت محمدیه نک یدنجی سنه می اوائلنده کرک مسلم و کرک غیر مسلم اولسون علی العموم بنی هاشم ایله الفت و اختلاطدن واز کچدیلر.

شویله که: فیما بعد هاشمیلرله آلیش و یریش ایتمامک و آنلردن قیز آلامق و آنلره قیز و یرمأمک اوزره بینلرنده اتفاق ایدرک بومألده بر قطعه عهدنامه یازدیلر و کعبه ایچنه آصدیلر، آنک خلافتنه حرکت ایتمامک اوزره آند ایچیدیلر.

بوجهتله هاشمیلر، کرک مسلم و کرک مشرک جمله سی (شعب ابی طالب) ده محصور کبی قالدی. فقط ابولهب، انلردن آیرلدی و سائر مشرکلر ایله برابر اولدی.

(شعب ابی طالب) مککک بر محله سیدر که: مولد بنی اولان محله در. بنی هاشمک



خانەلری هپ اوراده اولوب مقدا رئیس‌لری عبدالمطلب ایدوکندن او محله‌یه (شعب عبدالمطلب) دینلوردی . آندن صکره ابوطالب ، رئیس قوم اولدیغندن اورایه (شعب ابی طالب) دیندی .

بوکره ابولهبدن ماعدا جمله‌هاشمیلر ، ابوطالب ایله برابر اوراده قالوب سائر قریشیلر ایله اختلاطدن کسیدیلر . دیگر محله‌لرده خانەلری اولان اهل اسلام دخی سمت و محله‌لرینی ترک ایله اورایه چکیدیلر .

هاشمیلر ، اقبالق غیرتیه رسول ا کرمی دشمن شرنندن محافظه‌یه چالیشور و اهل اسلام اولانلر ایسه دائماً او حضرتک اطرافنده پروانه کبی طولاشور ایدی .

ایشته او ائناده ، یعنی نبوت محمدیه نک سکنزنجی سنه‌سنده (انشقاق قر) معجزه‌سی وقوع بولدی .

شویله که : قریشدن بعضیلری ، برمهتاب کیجه‌سنده رسول ا کرمدن معجزه ایستدیلر . او دخی دعا ایتدی ، آی ایکی پاره اولدی . حتی برپاره‌سی دیگر طرفنده کورلدی .

اوحالده رسول ا کرم « ای فلان وفلان ! شاهد اولکنز » دیویوردی و حاضر اولانلر آیک او یله ایکی یه بولوندیکنی هپ کوردی .

مشرکر ، ینه ایمان ایتیموب « بوده محمدک اظهار ایده کلدیکی سحرلردندر ، دیدیلر و کما فی السابق اهل اسلامه و بلکه بالجله هاشمیلره بغض وعدوات ایتک اوزره دوام و اصرار ایتدیلر .

شعب ابی طالبده اهل اسلامک محصوریتی ایکی سنه‌دن زیاده سوردی و بو کیفیت اهل اسلامه پک زیاده اضطراب و یردی .

زیرا اهل اسلامدن بری بازاره کیتسه مشرکر ، تحمل اولتماز مرتبه ادا وجفا ایدرلردی و موسم حجه تجارتدن بری ، بنی‌هاشمه آلیش و یریش ایده‌جک اولسه مانع اولورلردی .

الحاصل اهل اسلام ، چارشی و بازارده سربست کزه مزلردی . علی

کرم الله وجهه بيله اووقت رسول اکرمک سعادتخانه سنده بولنديني حالده اسلامي اظهار ايده ميوب کيزلردى .

اما حضرت حمزه رضى الله عنه، قليجي سايه سنده اسلامي اظهار ايدرك ايستديکي يرده کزوب طولاشوردى .

حضرت عمر بن الخطاب رضى الله عنه ايسه مشرکلىر ايله پنجه پنجه يه کله ركبى پروا اوغراشوردى .

جمله اصحاب کرامک اولوسى اولان ابو بکر الصديق رضى الله عنه حضرت تلىرى، قریش طائفه سى، ايچنده پک زياده خاطرلى صاييلور بر ذات اولديني حالده اکرچه او دخى قومندن استتقال کوريردى . لکين اصلا قيد ايتيوب ومشرکلىر سوزلرينه باقايوب آشکاره نماز قيلاردى وکافى السابق اسلامه مستعد کورديکي ذاتلىر ال آلتندن جلبه چاليشوردى .

قریش طائفه سنک اهل اسلام حقنده بومرتبه شدت کوسترملرى آنجق آنلىرى دين اسلامدن دوندرمک وهيچ اولماز ايسه دين اسلامک دها زياده ايلروله مه سنى منع ايتمک غرضنه مبنى ايدى .  
دوشونمورلردى که کونش بالچق ايله صيوانماز واللهم يا قدينى موم ، آنلرک صوغوق نفسلريله سونمز .

آنلر نه ياپسەرلر اهل اسلام ، بيلديکندن شاشمايوب غيرت اسلاميه لرى قوت بولمقده ومعجزات محمديه ايله دين اسلام ، طرف به طرف ياييلماقده ايدى .

مؤمنلر ، دار بقا سعادتنه نائل اولق ايچون بو دار فناي هيچه صايوب ودينلرى اوغورنده هر شئي فدا ايليوب کيمى وطنلرينى ترک ايله حبشستانه کيتمشلر وکيمى هر درلو مخاطره ينى کوزينه آله رق شعب ابى طالبده محصور کي اقامتى اختيار ايتمشلر ايدى .

سائر عقل وانصافى اولانلر دخى آنک معجزاتى کوره ركب وحق پيغمبر اولديغنى بيله ركب برر برر ايمانه کلکده ايدى .

زيرا اوخاتم الانبيا حضرت تلىرى، امم ماضيه نك احوالندن بي خبر اولان بر

قوم ایچنده واصحاب معلوماتدن خالی برشمرده بویودی و باشقه دیاره کیدوب ده درس آلامدینی جمله نك معلومی ایدی . الحاصل نبی آئی ایدی .

حال بوکه الله تعالی حضرتلرینك وحی والهامی ایله نیچه علوم غیبیه یی بیلدیرر و (تورات) و (انجیل) ده و سائر کتب سهاویه ده کی اموری صحتی اوزره خبر ویرر ایدی .

بو کیفیت ، آنك نبوتنه دلیل کافی اولوب باشقه وجهله اثباته حاجت یوق ایکن دها نیچه معجزه لر کوستردی .

او فخر عالم حضرتلرینك معجزاتی پك چوقدر . آنلری صایمغه بو رساله نك تحمیلی یوقدر .

فقط بالمناصبه بعضیلری ذکر اولنش و بعضیلری دخی بوندن صکره صره سی کلدکجه ذکر اولنمق مصمم بولنشدرد .

اك بویوك معجزه لرندن بری و بلکه برنجیسی قرآن کریمدر ، که قیامته قدر باقی در .

چونکه : بر عصرده هر نه که اعتبار واشتهارده ایسه او عصرده مبعوث اولان پیغمبرك معجزاتی آکا کوره اولوردی .

مثلا حضرت موسی علیه السلامك عصرنده سحر بازلق ، پك زیاده شهرت بولمغه جناب حق ، آکا عصاسی اژدر اولمق کبی ساحرلره غلبه ایده جك معجزه لر ویردی .

حضرت عیسی علیه السلامك عصرنده دخی حکمت ، پك زیاده اعتبارده اولمغه جناب حق ، آنی اعمالرك کوزلرینی آچق و اولولوری دیر یلتمک کبی اطبانك یاپه میه جنی معجزه لرله مبعوث بویوردی .

خاتم الانبیا حضرتلرینك عصر سعادتلرنده ایسه شعر و انشاء پك زیاده اعتبار و شهرت بولمشیدی .

عربلرك كرك مدیلری و كرك بدویلری بیننده فصاحت و بلاغت ، انسانه محك و معیار فضیلت اولمشیدی .

نته کیم یوقاروده دخی بیان ایتمشیدك که عربلر ، بر برینه فصاحت و بلاغت

ایله فخر ومباهات ایدوب کیمی معلقات سبعة اصحابی کبی بی نظیر قصیده لر سویله رک سائر شعرايه میدان اوقورلردی و کیمی ( سوق عکاظ ) پاناییری کبی بویوک جمعیتلرده عامه یه وعظ و نصیحت یوزنده کوزل خطبه لر اوقورلردی .

مدنیلرنده فصاحت لائقه و بلاغت فائقه اولدینی کبی بدویلیری دخی غایت مطبوع و ساده کوزل شعرلر و خطبه لر نظم و انشا ایلردی و جمله سی نظماً و نثراً سحر کبی سوزلر سویلردی .  
بناءً علی ذلك فخر عالم حضرتلرینه بلاغتك طبقه علیاسنده اولان بر کتاب کریم نازل اولدی .

آنک مثنی اتیان ایله مکدن و هیچ اولماز ایسه بر سوره سنه نظیره سویله مکدن جمله فصحا و بلغا عاجز قالدی .  
حال بوکه سوره به سوره و آیت به آیت نازل اولدقجه رسول اکرم آنی امتنه اوقوردی و « بوکا نظیره سویله مزسکز » دیو بالجمله فصحا و بلغابه میدان اوقوردی .

« لو اجتمع الانس والجن علی ان یأتوا بمثل هذا القرآن لایأتون بمثله ولو کان بعضهم لبعض ظهیرا » آیت کریمه سی نازل اولدی . یعنی « بوقرآنک مثنی وجوده کتیرمک اوزره انس و جن بریره کلسه لر و بربرینه یاردجی اولسه لر دخی آنک مثنی وجوده کتیره مزلر » دیو بویورولدی .

منکر و معارض اولان بونجه فصحا و بلغا ایچندن بر شخص ، یاخود بر جماعت چیقوبده آنک بر قیسه سوره سنی بیله تنظیر ایدمه دی .  
آیات کریمه نک بعضیسنده آ ز لفظک چوق معنایه دلالتی وار و بعضیسنده کی تفصیلاتک فوق العاده بر حلاوت و لطافتی وار .

بورالری آنجق اهل فصاحت و بلاغت اولانلر بیلور و لایقیله ذوقه آنلر واریر .

قرآن کریمی تکرار به تکرار تلاوت ایله انسان صفا و حلاوت بولور و اوقودقجه اوقویه جنی کلور .

حال بُوکه بر شعر، یا انشا نه قدر اعلا اولسه بر قاج کرّه او قوندقدن  
صکره طبعیت اوصانور .

بونک ایچون فصحا وبلغادن عقل وانصافی اولانلر، همان شرف اسلام  
ایله مشرّف اولدیلر . ایمانه کلیانلر دخی طوق بشرک خارچنده بر کلام  
اولدیغنی اقرار واعتراف ایله معارضه دن واز کچوب بر طرفه چکیلدیلر .  
نته کیم ، مشرکین قریشک اولولرندن ( وَلَدُ بْنُ الْمُغِيرَةِ ) بر کون  
سیدالانبیا حضرتلرینک یاننه کلوب « بکا بر مقدار قرآن او قو دیکلیه یم »  
دیدى .

رسول اکرم دخی « ان الله يأمر بالعدل والاحسان وايتاء ذی القربى  
وينهى عن الفحشاء والمنکر والبغی يعظکم لعلکم تذكرون » آیت کریمه سنی  
او قودى .

ولیدبن المغیره ، آنی جان قولاغیله دیکله دی « والله، بونده برحلاوت  
وار واوزرنده بر حسن لطافت وار . یک ده رین وغابت مفید بر کلامدر .  
آنى بشر سويله مز « دیو وصف و ثنا ایلدی و دونوب قومنه « سزک  
ایچکزده شعر احوالی بندن اعلا بیلور کیمسه یوقدر . شعرك هر نوعی  
وجن شعرلرینی جمله کزدن اعلا بیلورم . محمدک او قودینی کلام ، بونلرک  
هیچ برینه بکزه مز . او کلام، هر کلامه غالب اولور . آ کا هیچ بر کلام  
غالب اوله ماز ، دیو سوبلدی .

ینه بر کون خاتم الانبیا حضرتلری ، حرم شریفک بر گوشه سنده  
اوطورورکن دیگر طرفه دخی مشرکین قریش اوطوریوردی . اولولرندن  
( ابوالولید ) دیو معروف اولان ( عُبَّه بن رَبِيعَه ) دیکرلرینه « نه دیرسیکیز  
کیدوبده محمد بر آرز نصیحت ایتسم بزدن نه ایستر ایسه ک ویره لم و سنی  
ایسته دیکک رتبه یریشدیره لم . تک بزم الهه مزه سوز آتمه و دینزه دخل  
وتعرض ایتمه دیسمه شایدکه قبول ایدرده آرهدن بو کشا کش کیدر» دیدکده  
« نه بئس وار ، بر کره نصیحت ایدیور » دیدیلر .



عتبه، رسول اکرمك ياننه کلدی واویولده بر چوق سوزلر سوبلدی،  
زعمنجه خلیجه نصیحت ایلدی .

رسول اکرم « سوزك تمام اولدی » دیو صوردی. عتبه « اوت » دیو  
جواب ویردی . رسول اکرم « اويله ایسه شیمدی بنی دیکله » دیو  
بووردی .

هان « بسم الله الرحمن الرحيم . « حم تنزیل من الرحمن الرحيم » دیو  
سوره سجده یی تلاوته باشلادی وسجده آیتنه کلدکه قلقوب سجده ایلدی  
و « ایشتمکی یا « ابالولید ! » دیدی .

عتبه « ایشتم . ایشته سن ، ایشته او » دهرک یرندن قیامتدی وبوزوق،  
دوزن یاران یاننه کتیدی .

« نه اولدی ؟ » دیو صوردیلر « هیچ صورمايك . برکلام ایشتم که عمرمده  
مثلنی ایشتمشم . والله بوسوز ؛ شعر دکل ، سحر دکل ، کهانت دکل ، ای  
جماعت قریش ! بنی دکارسه کز بو آدمی کندی حاله براقکز » دیدی .

مشرکین ، بونجه معجزاتی کوروب وپیدرپی نازل اولان آیات بیناتی  
ایشیدوب رسول اکرم حقنده نه دیه جکلرینی شاشردیلر .

کیمی مجنون وکیمی کاهن وکیمی شاعر دیدیلر و هیچ برینک یاقیشق  
آلدیغنی کندولری دخی آکلادیلر . حتی قریش قومی ، دین اسلامک اطرافه  
یا یلمسندن خوف ایتدکلری جهتله برسنه حج موسمی کلدکه بریره  
طوپلانیدیلر « هر طرفدن قبائل عرب کلمک اوزره در . محمدک حقنده نه دیه جک  
ایسهک آکا قرار ویرهلم وسوزی برایدلمده بربریزی یلانه چیقارمیهلم »  
دیدیلر .

ایچلرندن بعضیلری « کاهندر دیهلم » دیدکه ولیدبن المغیره « کاهن  
دکلدر . سوزلری ، اصلا کاهن سوزینه بکزه مز » دیدی .

اويله ایسه « مجنوندر دیهلم » دیدکلرنده ولیدبن المغیره « مجنون دیسهک کیم  
اینانور؟ آنده اصلا جنون علامتی یوق » دیدی .

آنك اوزرينه بعضيلرى « شاعر در ديهلم » ديدكده وليد بن المغيرة « شاعر  
دكلدر. زيرا شعرك جميع اقسامنى بيلورز. آنك سوزلرى، بواقسامك برينه  
اويماز ، ديدى.

« شاعر دكل ايسه ساحر ديهلم » ديدكلرنده دخى وليد بن المغيرة « ساحر  
نرهمسى بکزر ؟ او قویوب اوفورمسی یوق ، دوکوم باغلامسی یوق ، ساحر  
ایشلرینه بکزر برایشی یوق . بوجهتله ساحرده ديهميز » ديدى .

« اويله ايسه نه ديهلم » ديديلر . وليد بن المغيرة « نه ديملى بيلمم . فقط  
شو سويلديککز سوزك هيچ بريسى ياقيشيق آلماز وقغيىسنى سويلسهك  
اينالماز » ديدى .

الحاصل رسول اکرم حقنده نه ديه جکلرينه برقرار ويره مديلر . چونکه:  
بيغمبر ديمکدن باشقه ياقيشيق آلور برصفت بوله مديلر . بوکا دخى آنلر قائل  
اولاماديلر .

رسول اکرم ايسه هر سنه حج موسمنده خارج مکيه چيقوب اطرافدن  
کلن قبائله « اى فلان اوغللرى ! » ديو باشقه باشقه خطاب ايدرك مقتضای حاله  
موافق اولان آيات کریمه يي تلاوت و آنلرى دين حقه دعوت ايلردى .  
بو جهتله قبائلدن نيجه کيمسه لر ، اسلام ايله مشرف اولمقده و دين اسلام  
عرىستانك هر طرفنه ياييلمقده ايدى .

حتى ( بنى سلمه ) قبيله سندن بر قاچ يکيت ، مکيه کلديلر . بعض آيات  
فرانسيه يي دیکله یوب همان حضور محمدیده اسلام ايله مشرف اولديلر .  
عده دونوب يرلرينه کيتديلر و رسول اکرمک اوصافنى سائرلره بيان  
يتديلر .

ايچلرندن برينسك باباسى اولان ( عمرو بن جوح ) اوغلنه « او ذاتدن  
باشيتديکک سوزلرى بکا سويله ، ديمش . اودخى سورة فاتحه يي اوقومش .  
عمرو بن جوح « نه کوزل کللامدر . سائر کللاملرى ده بويله کوزليدر ؟ »  
يو صورمش . اوغلى « دها اعلالرى وار ، ديو جواب ويرمش .

بدوی عربلردن بری ( فاصدع بما تؤمر ) آیت کریمه سنی ایشیتیدیکی  
کبی سجده وارمش « بو سوزك فصاحتنه سجده ایتدم » دیمش .  
بر دیکری ( سورة یوسف ) اوقونور ایکن « فلما استیأسوا منه  
خلصوا نجیاً » آیت کریمه سنی ایشیتدکده « بن شهادت ایدرم که هیچ بر مخلوق  
بوکا بکزر سوز سویلیه مز » دیمش .

( ابوذر ) رضی الله عنه حضرتلرینک ایمانه کلمسنه سبب دخی بوایدی که :  
کندوسی شعرای بنامدن اولوب قرنداشتی ( انیس ) ایسه شعرده آکا وسائر  
امثاله فائق ایدی .

انیس ، مکیه کلوب ، کیتمش وبرادری ابوذره فخر عالم حضرتلرینک  
احوال واوصافی بیان ایتمش .

ابوذر ، خلق « آنک حقنده نه سویلیور؟ » دیو صورمش . انیس  
دخی « شاعردر ، کاهندر ، ساحردر ، دیورلر . اما بن ، کاهنلر سوزینی  
ایشیتدم وانواع شعره قیاس ایتدم . والله هیچ برینه اویماز وبوندن صکره  
آکا شاعر دیمک کیمسه نک آغزینه یاقیشماز . الحاصل ( محمد ) صادقدر  
وآنلر کاذبدر ، دیو جواب ویرمش . آنک اوزرینه ابوذر رضی الله عنه  
دخی همان اسلام ایله مشرف اولیورمشدر .

فی الواقع ، قرآن کریم : نه کلام منظومدر ، نه کلام منشوردر . ایکی  
قسمک خارجنده بر کلام لطیفدر ، سراپا فصیح وبلوغدر .  
جمله آیات کریمه ، بلاغتجه بر درجهده اولیوب بعضیسنک بعضیسنه  
نسبتله بلاغتجه درجهسی ده اعلادر . فقط جملهسی معجزدر . یعنی مثلنی  
وجوده کتورمکدن انسان عاجزدر .

ابتدای امرده بلغای عرب ، آیات قرآنییه بی بعض اشعار ایله موازنه  
ومقایسه ایلدیلر . نهایت هیچ برینه وبلکه بشر سوزینه بکزه مدیکنو  
آکلادیلر .

فقط ( معلقات سبعة ) ینه کعبه دیوارنده آصیلی طوروب آره صر  
اوقونور وفصاحت وبلاغت بمحنده لسانه آلتور ایدی .

طبقات بلاغتك اك اعلا درجه سنده بولنان آيات كريمه دن « يا ارض ابلى مائك ويا سماء اقلعى وغيض الماء وقضى الامر واستوت على الجودى وقيل بعداً للقوم الظالمين » آيت كريمه سى نازل اولنججه بلغايه بك زياده تاثير ايلدى ، شويله كه : ايليكلارينه ايشله دى .

اووقت ( امرى القيس ) ك قيز قرنداشى صاغ ايدى . او آيت كريمه يي ايشدكده « آرتق كيمسه نك بر ديه جكي قالمادى . قرنداشمك شعري دخى ميدان افتخارده طوراماز » ديه رك واردى ، امرى القيسك قصيده سنى كجه ديوارندن اينديردى .

آنك آلت طرفده كى معلقاته هيچ برديه جك قالماديغندن آنلر دخى برر برر اينديريلدى .

آرتق ميدان افتخار و اشتهاارده يالكز قرآن كريم قالدى وبلاغت قرآنيه نك تاثيراتيله بالمله فصحا وبلغا مبهوت وملزم اولدى .

نيچه لرى قرآن كريمك الله كلامى اولديغنه قانديلر ومضمون منيفنه عن صميم القلب اينانديلر .

مؤمنلر، دين اسلام اوغورنده هر شيئى فدا ايدوب كيمي حبشستانه هجرت ايله وطن واقربا ويارانندن كچديلر وكيمي شعب ابى طالبده محصور قالوب مشركلرك اذا وجفاسنه قاتلانديلر .

قريشك اولولرى ، بونجه معجزه لر كورمش و قرآن كريمك بلاغتى كندولرني عجز وحيرته دوشورمش ايكن اكرثرى عناد وانكارلرى اوزره مصر اولديلر وعنادلرى حسييله شرك وضالانده قانديلر .

چونكه : اووقت عرب قومى ، متفرق وعشاىر و قبايله منقسم ايدى . وهر عشيرت وقيله نك رئيسلرى اولوب حكم و حكومت آنلرك اللرنده ايدى .

ايشته آنلر، قوم وقيله لرينك رئيس ومتبوعى ايكن ايچلرندن بر ذاته تابع اولمق ايستمزلردى .

قالدى كه : نظر شزع شريفده اهل اسلام فقير وغنى وضعيف وقوى

هې متساوی ایدی . رؤسای قریش ایسه آحاد ناس ایله برابر اولمقدن عار ایدرلردی .

بناء علی ذلک ، رؤسادن هربری کندویه متعلق اولان کسانى مسلمان اولمقدن و دین اسلامى اطرافه یایلمقدن منعه اللرندن کلدیكى قدر چالیشدیلر ایسه ده بوکا چاره بولامادیلر .

حتى یوقاروده بیان ایتدی کمز وجهله اهل اسلامى تضییق ایچون علی العموم هاشمیلردن قطع علاقه ایتدیلر و بوکا دائر بر عهدنامه یازدیروب کعبه ایچنه آصدیلر ایسه ده ینه دین اسلامک شیوع وانتشارینه مانع اولامادیلر .

حال بوکه : طوائف عربک اشرفی اولان قریش قومنک او یله ایکی فرقه اولوب ده اوچ سنه یه قریب مدتدنبرو بینلرنده هر درلو معاملاتک منقطع اولسندن طولایى مشرک لک دخی چوغنه فتور و ندامت کلشیدی . و او عهدنامه یی یازمش اولان ( منصور بن عکرمه ) نک الی قورویوب چولاق اولمشیدی .

برده جناب حق طرفندن او عهدنامه یه کووه نوعندن بر بوجک مسلط اوله رق آنده اسم اللهدن باشقه نه قدر یازی و ارایسه هپسنى ییوب محو ایتمشیدی .

جبریل علیه السلام کلوب آنی رسول اکرمه بیلدیردی . او دخی عتمی ابوطالبه خبر ویردی .

ابوطالب ، همان مجمع قریشه کیتدی و رسول اکرمدن ایشیتدیکنی حکایه و محمدک دیدیکی صحیح ایسه آرتق سزده انصاف ایدیکز ، شو آره مزده کی تفرقه یی قالدیرلم واکر آنک دیدیکی یالانه چیقارسه بنده آنی حمایه دن واز کچرم « دیدی .

قریشک بیوکلری ، بوسوزی معقول کوردیلر و همان او عهدنامه یی کتوردیلر .



باقوب کوردیلر که: ایچنده « بسمک اللّهم » عباره سندن باشقه نه قدر یازی وار ایسه هپ محو اولمش .

بوندن جمله سی محجوب اولوب اگرچه ابوجهل ، ینه عنادنده اصرار یتمک ایستدیه ده اکثریت آرا ایله اوصحیفه سخیفه یی یرتدیلر وهاشمیلر علیهنده اولان عهد و اتفاقی نقض ایتدیلر .

بووجهله هاشمیلر ، آلیش ویرشده وسائر معاملاتده سربست اولدی . اهل اسلام ، شعب ابی طالبده محصوریت بلاسندن قورتولدی و مکه ده برمسرت عمومیه حصول بولدی .

لکن بوفرچ و مسرتلر چوق سورمدی . آره سی چوق کچمیوب باشقه مصیتلر وقوعه کلدی .

شویله که : نبوت محمدیه نك اونجی سنه سی ( ابوطالب ) وفات ایتدی . آندن اوج کون صکره حضرت ( خدیجه ) رضی الله عنها دخی دنیادن کوچوب دار عقبایه کیتدی .

ایکی سنک بویله بربری آردنجه وفاتلری رسول اکرمه پک زیاده حزن و الم ویردی . بناء علیه بویلی ( سَنَةُ الْحَزَنِ ) دیوتسمیه بیوردی .

ابوطالبک رسول اکرم ایله افتخار ایلدیکی و آنک نبوتی قلباً تصدیق ایتدیکی بعض اشعارندن آ کلاشیلور .

لکن کندوسی قومنک رئیس اولوب رسول اکرم ایسه آنک النده بیومش اولدیغندن لسانیه اقرار ایدوبده آکا تابع اولمقدن عار ایدردی . حتی « بن ، بیلورم که محمد ، یلان سویلز و باطل سوز ، آندن صدور ایلز . اگر قریش طائفه سنک عورتلری ، بنی تعیب ایتسه آکا تابع اولوردم » دیر ایدی .

وفاتندن اوّلجه رسول اکرم حضرتلری « ای پدرم مقامنده اولان عمّم ! باری برکره لسانکله کلمه شهادت کتورکه آخرتده سکا شفاعت ایده بیله یم » دیدکده « قورقارم که ابوطالب ، اولومدن قورقدی ده ایمانه

کلدی دیو بنی لوم ایدر لر. ایشته بوندن عارایتمه سه م شهادت کتورردم، دیمش ایدی .

بونکله برابر ابوطالب، وفات ایده جکی وقت اعیان قریشی طوبیلامش ورسول اکرمی آنلره ایصهارلامش ایدی .

شویله که « محمد امیندر. طوغریدر، یلاندن بریدر. بنم سزه ویره بیله جکم نصیحتلری اوھپ جامعدر . کتوردیکی دین اسلام ایسه قلبك قبول ایده جکی برشیدر. آنی انکارایدن آنجق لساندر. والله بن، کوزمله کورر کبی بیلیورم که قریشك فقرا وضعفاسی وادیه نشینلر واطراف عالم خلقی، ھپ آنك دعوتی قبول وسوزینی تصدیق ایتسہ لر کر کدر . قریشك باشلری قویروق اولسه کر کدر « یعنی آکا اطاعت ایتیمان اکابر و اشراف قریش، ھپ ذلیل وحقیر اولسہ لر کر کدر » ای جماعت قریش! والله بن صاغ اولسہ م آنی دشمن شرندن حفظ وحمايه ایلردم. سزده آکا یارم ایتلیسکمز » دیو وصیت ایاش ایدی .

جناب حقك هدايت ایتدیکی کیمسه طریق حق بولاماز ولطف واحسان الھیبسی اولمدقچه کیمسه بردولت وسعادتہ نائل اولاماز. نته کیم قرآن کریمده « انك لاتھدی من احببت ولكن الله یھدی من یشاء » بیورلمشدر .

یعنی « یا محمد ! سن سودیککه هدايت ایده مزسین. لکن الله دیلدیکنه هدايت ایدر » دیمك اولور .

آنکچون رسول اکرم، ابوطالبك اسلامنی پك زیاده ایستر و او دخی آنی فوق العاده سورایکن لسانیلہ آنك نبوتی اقرار ایتدی . وفاتندن صکره قومی دخی کندوسنك وصیتنی طوتمدی .

چونکه: آندن صکره ابولھب، آنك یرینه قومنك رئیس اولق وسائر کبار قریش دخی کندو عشرتلرینك ریاستلرینی الدن چیقارماق و ابوھل ایسه قریش ایچنده جمله سندن زیاده نفوذ وحیثیت قازانق داعیه سندنه ایدیلر .

بناءً عليه ابوطالب ايله حضرت خديجه نك وفاتلريني فرصت بيلدیلر  
ورسول اکرمه اولکيدن قات قات زیاده اذا وجفا ايدر اولدیلر .

رسول اکرم ، آنلرک اذا وجفالرندن بيزار اوله رق مکدن چيقوب  
( زيد بن حارثه ) رضی الله عنه ايله برلکده طائفه کيتدی .

اووقت طائفده ساکن اولان ( ثقیف ) قبیله سی اشرافنی دین اسلامه  
دعوت ایتدی .

آنلر ايسه ایمانه کلمک شویله طورسون ، رسول اکرمی تحقیر ایتدیلر .  
ایچلرندن بعضلری آکا طاشلر آتدیلر .

حتی زيد بن حارثه رضی الله عنه ، رسول اکرمی آتیلان طاشلردن  
محافظه ایچون کندوسنی سپر ایتمکه بر قاچ یرندن یارالاندی وبره لندی .  
آندن خاتم الانبیا حضرتلری کیرو دوندی ومکيه بر مرحله مسافه سی  
اولان ( بَطْنِ نَحْلَه ) نام محله ایندی .

ایشته ، اوراده رسول الثقلین اولان خاتم الانبیا حضرتلری « الرَّحْمَن »  
سوره سنی تلاوت ایدرکن ( جن ) طائفه سندن بر گروه کلوب دیکله مشلر  
وآکا ایمان ایلشلر ایدی .

رسول اکرم ، بر مدت ( بطن نخله ) ده اقامت ایتدکدن صکره  
مکيه کلدی و ( مَطْعَمُ بنِ عَدِي ) نام ذاته مهمان اولدی .

هان حرم شریفه کيتدی . ( حجر اسود ) ی استیلام ایتدی وایکی  
رکعت نماز قیلدی . بعده بیت سعادتنه عودت بویوردی .

عادت عرب اوزره ( مطعم ) کندی اولاد واتباعی ايله او حضرتک  
اطرافنده طولاشوب حفظ وحمايه سنده فوق العاده اثر غیرت وحیت  
کوستردی .

او ، اوانده ( زَمْعَه ) نك کریمه سی ( سَوْدَه ) رضی الله عنها حضرتلری  
رسول اکرمه تزویج ایدیلدی .

( ابو بکر الصديق ) رضی الله عنه حضرتلرینک کریمه سی ( عایشه )

رضی الله عنها حضرت تترینک دخی او ائشاده رسول اکرمه نکاحی قییلدی .  
فقط پک کوچوک اولدیغدن زفانی تأخیر بویورولدی .

رسول اکرم هر سنه حج موسمنده و ( سوق عکاظ ) پاناری ایامنده  
مکه شهرینک خارجه چیقوب اطرافدن کلن قبائل ایله کوروشه رک آنلری  
دین اسلامه دعوت ایده کلدیکی کبی نبوتنک اون برنجی سنه سی موسم  
حجنده دخی خارج مکه یه چیقدی . ( عَقَبَه ) قربنده مدینه اهالیسنندن بر  
جماعته راست کلدی .

آنلر مکر ( خَزْرَج ) قبیله سنندن ایمشله . خزرجیلر ایله هاشمیلر بیننده  
ایسه قرابت صهریه وار ایدی .

زیرا ( عبدالمطلب ) ک والده سی که ( سَلْمَى ) خاتوندر . آنک عشیرتی  
اولان ( بنی نجّار ) اشبو ( خزرج ) قبیله سنک بر شعبه سی ایدی .

رسول اکرم او جماعته « سز کیملر سکز » دیو صوردی . « خزرج  
قبیله سنندز » دیو جواب ویردیله .

« اوطورسه کزده سز کله بر آز سویلشسه ک اولمازمی؟ » دیو بویوردی .  
« پک اعلا! » دیوب اوطوردیلر .

رسول اکرم حضرتلری، آنلره بر مقدار قرآن کریم تلاوت و آنلری  
دین اسلامه دعوت ایلدی .

آنلر ایسه « غالب بن فهر اولادندن بر پیغمبر کله جک » دیو کندی  
اختیارلرندن ایشیدیرلر مش . مدینه ده کی یهودیلر دخی « پیغمبر کله جک وقت  
یاقلاشدی » دیرلر مش .

بو کرّه رسول اکرم، آنلری دینه دعوت ایدنجه بر برینه باقیشدیلر .  
« یهودیلرک دیدیکی پیغمبر، ایشته بودر » دیو بینلرنده سویله شدیلر .  
اوتهدنبرو یهودیلرله بینلرنده عداوت اولدیغنه منی همان ایمان ایدرک  
حضور نبویه کله شهادت کتوردیلر .

آنلر ( ابوامامه اسعد بن زراره ) ایله ( رافع بن مالک ) و ( عوف

ابن حارث) و (قُطَبَه بن عامر) و (عُقَبَه بن عامر) و (حارث بن عبدالله بن ریاب) ایدی .

ایشته انصاردن اوّل باوّل شرف اسلام ایله مشرّف اولان بو آلتی ذاتدر . رضی الله عنهم .

بونلر موسم حجدن صکره مدینه یه کلدیلر و دین اسلامک انتشارینه سعی و غیرت ایدر اولدیلر .

بوجهتله دین اسلام خزر جیلر یینده کرکی کبی منتشر اولدقدن باشقه ( اوس ) قبله سنه دخی سرایت ایلدی .

نبوت محمدیه نك اون ایکنجی سنه سی موسم حجّنده ( اسعد بن زراره ) ایله رفیقعلری اولان ( رافع ) و ( عوف ) و ( قطبه ) و ( عقبه ) وینه خزر جیلردن ( معاذ بن حارث ) و ( ذکوان بن عبد قیس ) و ( عبادة بن صامت ) و ( ابو عبدالله یزید بن ثعلبه ) و ( عباس بن عبادة بن فضله ) و ( اوس ) قبیله سندن دخی ( ابوالهیثم بن تیهان ) و ( عویم بن ساعده ) مکه یه کیتدیلر وینه ( عقبه ) ده فخر کائنات ایله کوریشوب عقد بیعت ایتدیلر . رضی الله عنهم .

شویله که : فیما بعد شرک و زنا و سرقت و افترا دن اجتناب ایلمک و اولاد لرینی اولدورما مک اوزره تعهد ایلدیلر .

زمان جاهلیتده عربلر ، آنجق ارکک اولاد ایله افتخار و اولادی ارکک اولمایوبده قیز اولانلر عار ایدرلردی .

بوجهتله پک چوغی ، یکی طوغان قیز چوجقلرینی دیری دیری دفن ایله تلف ایلردی .

برده عربلرک مدار تعیشی طار اولوب اولاد و عیال لرینی اداره ده زحمت و مضایقه چکمکده اولدقلرندن بعضیلری ، فقر و فاقه بهانه سیله قیز چوجقلرینی و بعضاً ارکک چوجقلرینی دخی او یله دیری ایکن دفن ایدرک اولدیرلردی .



بناءً على ذلك مدينة ليلر ايله عقد اولئان بيعته اولاديني اولدرمامك خصوصى برماده مخصوصه اوله رق شرط ايديلدى وبوماده ، انسانيت حقنده بر بيوك عنايت اولدى . او وجهله بيعت ايدنلر ، بروجه بالا اون ايكي كيشي اولوب ايكي سي اوس قيله سندن ، باقي سي خزرچ قيله سندن ايدى وجهله سنك رئيسى ( اسعد بن زراره ) ايدى .

جهله سى او وجهله عقد بيعت ايتدكدن صكره دونوب مدينه يه كلديلر و همان دين اسلامى نشر ايله مشغول اولديلر .

او ، اوانده معراج محمدى وقوع بولدى . شويله كه : جبرائيل عليه السلام بر كيجه كلدى و رسول اكرمى آلدى ، كعبه دن مسجد اقصايه كوتوردى . آندن يوقارو چيقاردى . بالمله سماواتى سير ايتديردى . بعده او حبيب خدا ، بو عالم شهودك خارجنه چيقاريلدى . كندوسنه نيجه عجائب و غرائب تماشا ايتديريلدى . جناب حقك بالذات كلامنى ايشتدى و جمال پاكنى مشاهده ايتدى . ينه او كيجه خانه سعادته كلدى .

ايشته بش وقت نماز ، اشبو معراج كيجه سى فرض قيندى و اكرچه آندن اول دخى نماز قينلوردى . لكن بش وقت مراتب اوله رق نماز قينلنمق او كيجه امر اولندى .

فرداسى او خاتم الانبيا حضرتلى ، معراجنى امتنه سويلدى . ابتدا ابوبكر الصديق و بعده سائر اصحاب كرام تصديق و تبريك ايلدى . مشركلر ، انكارايدوب مسجد اقصانك نشانه لرينى سورديلر . رسول اكرم ، عينيله خبر و يردى . آنلر ، ينه انكارلرنده اصرارايدوب طورديلر . بو ائنده ايسه دين اسلام ، عربستانك هر طرفنه يايلىمده و على الخصوص مدينه ده بك سرعت ايله منتشر اولمده ايدى .

حتى ( اوس ) و ( خزرچ ) قيله لرى ، اصحاب كرامدن برينك مدينه يه كوندرلمسنى عرض و نیاز ايش اولدق لرندن رسول اكرم دخى آنلر قرآن كريمى تعليم ايتك و آداب اسلاميه يي اوكرتمك اوزره ( مصعب بن عمير ) ي مدينه يه كوندرمشيدى .

حال بوکه مصعبك مدینه یه وصولنده اوراده کی اهل اسلامك عددی قره وارمشیدی .

رئیساری اولان ( اسعد ) و معلماری اولان ( مصعب ) ایله برلکده جمله می جمعه کونلری مدینه خارجه چیقوب بر محله جماعت ایله نماز قیلغه پاشلادیلر .

فقط ، ( اسعد ) ك تیزه زاده سی و ( اوس ) قبیله سنك رئیس اولان ( سعد بن معاذ ) ایله ینه رؤسادن بولنان ( اسید بن حضیر ) هنوزایمانه کلامش اولدقلرندن دین اسلام تمامیه منتشر اوله میوردی .

بر کون ( مصعب ) ایله ( اسعد ) ، ( بنی ظفر ) خانه لرندن برنده مصاحبت ایدرلرکن ( اسید بن حضیر ) حربه سی النده اولدینی حالدله آنلرك اوزرینه کلدی . « غرضکنز ندر . بر طاقم ضعیفای آلدادوب آزدیریورسکنز » دیو صورت حدت و شدت کوستردی .

مصعب ، آکا نازکانه « هله بر آ زطور ، اطور . سوزمزی دیکله ، مقصدمزی آکلا » دیکله ( اسید ) دخی اطوردی .

مصعب ، آکا دین اسلامی تعریف ایتدی وبره مقدار قرآن اوقودی بلاغت قرآنیه کندوسنه تأثیر ایتمکله اسید نه کوزل شی « دیدی و « بودینه کیرمک ایچون نه یاملی ؟ » دیو صورتی .

مصعب ، آکا تلقین دین ایتدی . او دخی اسلام ایله مشرف اولدی . « بن واریم ، سزه برینی کونده رهیم . اکر او دخی ایمانه کلورسه آرتق بو بلده ده ایمان ایتدک کیمسه قالماز » دیوب کیتدی و ( اسعد بن معاذ ) ی کونده ردی .

سعد ، ایسه اورایه بر حدت اوله رق چیقه کلدی . « یا اسعد ! اکر سنکله آره مزده قرابت اولسه بویله قبیله من ایچنه صوقدیفکنز چیرکین ایشلره صبر و تحمل ایده مزدم » دیو تکدیر و تهدید ایلدی .

مصعب ، آکا دخی « هله بر آ زطور یکنز . اطور یکنز ، دیکله یکنز ،

آ کلا یکزده بکنیرسه کز قبول ایدیکز . بکنمز ایسه کز بزده سزه چیرکین کوردیککز ایشی تکلیفدن واز کچرز « دیو نازکانه سویلدی .

آنک اوزرینه سعد بن معاذ ، اوطوردی و مصعبک سوزلرینه قولاق ویردی .

مصعب ، دخی آکا دین اسلام نه دیمک اولدیغنی آکلاتدی و برمقدار قرآن کریم تلاوت ایتدی .

قرآن اوقونور ایکن سعدک یوزنده ایمان آماره لری به لیردی . همان « سز بو دینه کیرر ایکن نه یاپیوردیکز؟ » دیو صورتی .

مصعب ، آکا دین اسلامک ارکان و آدابی بیلیردی . اودخی خلوص قلب ایله دین اسلامه کیردی .

سعد بن معاذ ، بو وجهله ایمان ایتدکن صکره قالقوب عودت ایتدی وهان کندی قومی اولان ( بنی عبد الاشهل ) طائفه سنک یانه کیتدی . آنلره « ای جماعت! بنی نصل بیلورسکز؟ » دیدی . آنلر دخی « سن بزم اولومر و افضلمز سین » دیدیلر .

« او یله ایسه سزده اللهه ورسولنه ایمان ایتلیسکز وایمان ایتدکجه فیما بعد هیچ بریکزله کوروشه م » دیمکله ( بنی عبد الاشهل ) عشیرتی ایچنده اوکون ایمان ایتدک کیمسه قالمادی .

بعده ، سعد بن معاذ ایله مصعب ، اسعد بن زراره نک خانه سنده اوطوروب سائر ناسی دخی دین اسلامه دعوت ایله مشغول اولدیلر .

آز مدت ظرفنده دین اسلام مدینه ده او قدر شایع اولدی که ( اوس ) و ( خزرج ) قبیله لری ایچنده ( بنی امیه بن زید ) ک خانه سنندن باشقه نور اسلام ایله روشن اولدق خانه قالمادی .

اوس و خزرج قبیله لری ، قبائل ( آزد ) دن آیرلش بر فرقه در . وطن اصلیلری ( سبا ) دیو معروف اولان مدینه ( مارب ) ایدی مرور زمان

ایله بو بلده نك صو بندلری خراب اولنجه قبائل ازد ، شورایه بورایه طاغیدیلر .

ایشته آنلرك برفرقه سی دخی کلوب اووقت مدینه ده متوطن اولان یهود طائفه سیله عقد معاهده ومقاوله ایدرك مدینه دیارنده قالیدلر .

اووقت مدینه دیارنده متوطن اولان یهودیلر ( قُرَیْضَه ) و ( نَضِیر ) نامیله ایکی قبیله یه منقسم ایدی .

ازدیلرك رئیس اولان ( حارثه ) فوت اولدقده ( اوس ) و ( خزرج ) نامنده ایکی اوغلی قالدی . برفرقه سی بوکا تبعیت ایتمکله ازدیلر دخی ایکی قبیله یه منقسم اولدی .

صکره یهودیلر ایله ازدیلر آره سنه عداوت دوشدی و پك چوق محاربه لر وقوع بولدی .

ازدیلر، هر نه قدر ایکی قبیله یه منقسم اولمشلر ایسه ده دشمنه قارشو متفق و یهودیلر نه نسبتله چوقلق اولدقلرندن اکثریا یهودیلر غلب اولورلردی .

مؤخرأ اوس و خزرج قبیله لری آره سنه عداوت کیردی و بربریه اوغراشه رق ایکیسنه دخی ضعف کلدی .

فقط بوکره جهت وحدت اسلامیه ایله برله شدیلر و بارشدیلر و بوجه ته قوت بولدیلر و یهودیلر غلب اولدیلر .

نبوت محمدیه نك اون اوچنجی سنه سی موسم حنجد مصعب، مکیه عودت ایتدی. آنکله برابر اهل اسلامدن یتمش اوچ ارکک وایکی خاتون دخی مکیه کیتدی. بونلرك کیمیی اوس و کیمیی خزرج قبیله لرندن ایدی.

بنی نجاردن ( ابویوب انصاری ) دیو معروف اولان حضرت ( خالد ) دخی آنلرك بریسی ایدی .

مکیه وصوللرنده جمله سی ینه عقبه ده رسول اکرم ایله بولوشدیلر و رسول اکرمک مدینه یه هجرت بیورمسی خصوصنی سویله شدیلر .

رسول اکرم، آنلره بعض آیات کریمه تلاوت بیوردقدن صکره نفسلرینی

واولاد وعیالترینی نصل صاقینور لر ایسه آنی دخی اولوجهله صاقینه جقلرینی تعهد ایتمک اوزره آنلردن بیعت ایستدی .

دوشوندیلر، طاشندیلر « یارسول الله ! سنک اوغور کده اولور سه ک بزه نه وار ؟ » دیدیلر .

رسول اکرم « جنت وار ، ده نیجه » او یله ایسه الکی ویر « دیدیلر . رسول اکرم، مبارک الی اوزاتدی . همان بیعت ایلدیلر، یعنی جان و یروب جنت آلدیلر و پک خیرلو بر آلیش ویریش ایتدیلر و همان دونوب مدینه یه کیتدیلر .

آنک اوزرینه رسول اکرم، آرتق مدینه یه هجرت ایتمک اوزره اصحاب کرامه اذن ویردی .

آنلرده همان مهاجرتیه قیام ایتدیلر و محرم، صفر آیلرنده وطنلرینی ترک ایلر بربری آرقه سندن مدینه یه کیتدیلر .

شویله که: مقدما دیار حبشه هجرت ایدوب ده مؤخرأ مکیه کلش و کفارک اذا وجفاسندن بیزار قالمش اولان ( ابوسلمه ابن عبدالاسد ) رضی الله عنه بورخصتی ایشیتدیکی کبی جمله دن اول قالقبوب مدینه یه هجرت ایتدی . آرقه سندن برچوق اهل اسلام دخی کیتدی .

بعده حضرت عمر بن الخطاب و برادری ( زید ) و ( عباس بن ربیع ) رضی الله عنهم . یکر می نفر اولدقلری حالد مدینه یه کیتدیلر و مدینه نک ( عوالی ) دینلان قریه لرنده اقامت ایتدیلر .

نهایت مقدما حبشه کیدوب کلنلردن داماد پیغمبری اولان ( عثمان بن عفان ) رضی الله عنه حضرتلری دخی کیتدی .

مکده رسول اکرم ایلر برلکده اصحاب کرامدن یالکز ابوبکر الصدیق ایلر علی بن ابوطالب رضی الله عنهما و کرم الله وجههما حضرتلری قالدی . رسول اکرم دخی هجرت ایتمک نیتنده اولوب آنجق کندوسی ایچون اذن اللهی و رودینه منتظر ایدی .

حتى ابوبكر الصديق حضر تلرى، مدينه يه كيتمك ايستدكجه رسول اكرم  
 « صبر ايت . مأمول كه جناب حق ، سكا بر رفيق احسان ايله ، ديو  
 بيورردى .

اصحاب كرام، پيدرپي مدينه يه مهاجرت ايتدكجه اوس و خزرج قبيله لرى  
 ير كوستروب آنلرى باريندير لرلر و آنلره پك زياده حرمت و معاونت ايدر لر  
 ايدى .

دين ميين اوغورنده اووجهله وطنلريني ترك ايله مهاجرت ايدن اصحاب  
 كرامه ( مهاجرين ) دينور .

اهل مدينه دن اولوب ده آنلره بووجهله رعايت و دين اسلامه نصرت ايدن  
 اصحاب كرامه دخی ( انصار ) دينلور .

كرك مهاجرين و كرك انصار ، جمله سندن الله راضى اولسون كه دين  
 اسلامه طوغريسى پك بيوك خدمت ايتمشلردر .







## هجرت محمدیه

مشرکین قریش، کوردی که : اوس و خزرج قبیله‌ری ایمانه کلدی. بو جهتله دین اسلام، مدینه‌ده قوت بولوب یرلشدی. آنلرک عقبه‌ده کی بیعتلرندن صکره اصحاب کرام دخی آرقه‌لرندن کیتدی وهان بر ایکی آی ظرفنده اکثری مدینه‌یه واروب آنلرله یرلشدی.

مشرک‌لرک عقللری ایردی که: رسول اکرم دخی آنلرک یاننه کیدرسه مدینه‌ده بر بیوک قوهٔ اسلامیّه پیدا اولاجق و قریشک شام یولنده پک مهم بر کذرکاهی اولان مدینه دیاری، اهل اسلام النده قالاچق.

قریشک اولولری بورالرینی دوشوندکجه تلاشه دوشدیلر وهان مشورت ایچون (دارالندوه) ده یرلشدیلر.

(دارالندوه) (قصی بن حکیم) ک خانه‌سیدر که یوقاروده بیان ایتدیکمز وجهله قصی، شوراده بوراده متفرق اولان قریش طائفه‌سنی طوپلایوب قوت بوله‌رق مکه ریاستنی قازانمش اولدیغندن آنک خانه‌سی، مشورت یری اتخاذاولنه‌رق هر نه‌وقت قریشک بر مهم ایشی اولسه اوراده طوپلایوب مشاوره ایدرلردی.

بوکره دخی اوراده طوپلایوب «محمد ایچون نه‌تدیر اولتمق لازم کلور» دیو مشاوره ایله‌دیلر. وهر بری برر سوز سویله‌دیلر.

بعضیلری «آنی بر محله حبس ایدلم» دیدیلر، مناسب کورلمدی.

بعضیلری دخی «بر طرفه نفی ایدلم» دیدیلر، بو رأی ایسه هیچ قبول ایدلمدی.

نهایت ابو جهل « آنی ، اولدرمکدن غیری چاره یرقدر . فقط هر قبیله دن برآدم واروب و جمله سی بردن اوروبده اولدرمه لیدرکه قاتل معین اولمایه . او حالده هاشمیلر ، چاره سز دیته راضی اولورلر . بو صورتله ایش بئتر وقان دعواسی قبائل ایچنده محو اولوب کیدر ، دیدی . سائرلری دخی ، آنک رآینی قبول و تنسیب ایله دی .

بو قرارک اجراسی ایچون بر طاقم خیثلر ، آریلوب سچیلدیلر و جمله سی کیجه رسول اکرمک خانه سی اوکنده بیریکوب آنک او یومسنه منتظر اولدیلر .

( ابو جهل ) و ( حکم بن عاص ) و ( ابولهب ) و ( امیه بن خلف ) [\*] و ( ابی ابن خلف ) و آنلرک امثالی رؤسا دخی آنلرله برابر ایدی . جبرائیل علیه السلام کلوب کیفیتی رسول اکرمه خبر ویردی و مدینه یه هجرت ایتک اوزره مآذون و ابو بکر الصدیق برلکده کوتورمکه مأمور اولدیغنی بیلدیردی .

رسول اکرم ، همان علی بن ابی طالب حضرتلرینی چاغردی و کندوسنده شونک ، بونک امانتلی اولان اشیایی ویردی . « یاعلی ! بن ، مدینه یه کیدیورم . بو امانتلی صاحب رینه تسلیم ایت . آندن صکره سن ده طورمه ، کل فقط شیمدی بنم دوشکمه یات که مشرکلر ، بنی یاتور ظن ایتسونلر ، دیو بیوردی . علی کرم الله وجهه حضرتلی ، رسول اکرمک دوشکنه یاندی و رسول اکرمک یشیل خر قه سنی کندی اوزرینه اورتدی .

رسول اکرم ، همان بر آو وچ طوپراق آلدی و ( یس ) سورۀ شریفه سنک اولندن ( وجعلنا من بین ایدیم سداً و من خلفهم سداً ) فاغشیناهم فهم لا یبصرون ) آیت کریمه سنک آخرینه قدر اوقودی . او طوپراغی ، قیوسی اوکنده بکله بن مشرکلرک اوزرینه صاچدی و ایچلرندن چیقوب کیتدی . کور کی باقوب طور دیلر و آنی کورمدیلر . بر مدت صکره

[\*] خلف : فتح تباه پدردن صکره یه قالان ولد صالحه دبنور . اگر ولد ، فاسد ایسه لامنی اسکان ایله ( خلف ) دبنور . قاموس ترجمه سی

كندی هم جنسلرندن بری كلدی «بوراده نه بكليورسكز» دیدی «محمّدی بكليورز» دیدكلرنده «محمّد، سزك باشكزه طوپراق صاحب و ایچكزدن قاجوب كیده لی خیلی وقت اولمش . هله بركره قیاغكزه باقكز» دیهرك آنلری استهزا ایتدی .

بربرینه باقوب اوزرلری توز، طوپراق ایچنده قالمش اولدیغنی كوردیلر . لکن خانه سعادتك ایچروسنه باقوب رسول اكرمك دوشكنده حضرت علمینك یاتدیغنی كورهرك «ایشته محمد یاتیور» دیوب طوردیلر . صكره حضرت علی قالقدی . آنی كوردكلری كبی نهیه اوغراقلرینی بیلدیلر و «محمد نرهد» دیو صوردیلر .

حضرت علی «بيلم» ده نیجه خیئر ، حیرتده قالوب نه یاپاچقلرینی شایردیلر .

رسول اكرمك بویله كوزلردن نهان اولیورمسی قریشك اولولرینه بك كوچ كلدی ومكینی آلت اوست ایدوب حضرتی بولامدقلر یچون چیه سی جانلری بك زیاده صیقیلدی .

هان «محمّدی هر کیم بولوب كتورور ایسه یوز دوه ویریرز» دیو هر طرفه اعلان ایتدیلر .

ایچرلرنده نه قدر خرسز و قانلی وخیر وشرینی بيلمز دملی قانلی وار ایسه کیمی قلیجلر وکیمی صوپالر ایله خارج ککیه چیقوب اطرافه سکیرتدیلر . رسول اكرم ایسه اوکیجه سعادتخانه لردن چیقوب کیزلندی وهر نرهد اكلندی ایسه اكلندی .

فرداسی اوکلین ابوبکر الصّدیق رضی الله عنه حضرتلرینك خانه سنه واردی ، قبوسی اوکنده طوردی . آداب شرع شریف اوزره «ایچرو کیرمکه او صاحبك اذنی وارمی ؟» دیو صوردی .

حضرت ابوبکر «بیوریکز یارسلو الله» دیدکده رسول اكرم ایچرو کیردی و طرف باریدن هجرته مآذون اولدیغنی بیلدیردی .

ابوبکر الصدیق حضرتلری ، « بن ده برلکده مییم ؟ » دیو صورتی .  
رسول اکرم « اوت » جوابی ویردی .

حضرت صدیق ، رسول اکرم ایله برلکده هجرت ایده چکنه او قدر  
منون اولدی که کوزلرندن سرین سرین یاشلر آقیتدی . همان خانه سنده  
موجود اولان ده وه لرن برینی رسول اکرمه عرض ایتدی .

رسول اکرم « بك اعلا ، اما شیمدی هدیه قبول ایتیم ، صاتون آلورم »  
دیددی وهمان پاره سنی اعطا بویوردی .

او ده وه بی حضرت پیغمبر ایچون ودیکر بر ده وه دخی ابوبکر ایچون  
حاضر ایتدیلر وقولا غوزلقده ماهر اولان ( عبدالله بن اُرَیقُط ) نام کیمسه بی  
قولا غوزلق ایتک اوزره اجرت ایله طوتدیلر و او ده وه لری وقت معینه  
مکنک آلت طرفنده وتخمیناً بر ساعت مسافه سنده واقع ( جبل ثور )  
کوتورمک اوزره عبدالله ایله مقاوله ایدرک ده وه لری آکا تسلیم ایتدیلر .  
اوکون رسول اکرم ، آقشامه قدر حضرت ( ابوبکر ) ک خانه سنده  
اوطوروب کیجه ابوبکرایله برابر چیقیدیلر وجبل ثوره کیتدیلر .

جبل ثورده بر ایصمزم مغاره وار ایدی . اورایه کیریدیلر . درحال  
اللهک امریله بر اوروجک کلوب او مغاره نک آغزینه آغنی گهردی وبر  
چفت یبانی کوکرچین کلوب یومورطلادی .

قریشک آراییحیلری کلوب جبل ثورک هر طرفنی طولاشدیلر . بر  
فرقه سی دخی ( امیه بن خلف ) ایله برابر او مغاره نک آغزینه ایریشدیلر .  
« شو مغاره بی دخی آرایالم » دیو بربریه سویلشدیلر .

امیه بن خلف « الله عقللر ویرسون . اوراده نه ایشکز وار ؟ اوراده  
محمد طوغمدان بواورو مجکلر آغ گهرمش . صکره کوکرچینلر یووا یامش »  
دیمکه جمله سی دونوب کیتدیلر .

حال بوکه مغاره آغزینه کلدکلرنده ایچرودن رسول اکرم ایله حضرت  
ابوبکر ، آنلری کوریردی . لکن آنلر بوا یکی حضرت قی کورمزلردی .

حتی آنلر مغاره جوارینه کلدکلرنده حضرت ابوبکر، پک زیاده محزون اوله رق « یارسول الله ! بنی اولدیریرلر ایسه نه غم . بن بر شخصم ، اما الله کوسترمسون سکا بر زیان ایرشدیره جک اولورلر ایسه بوتون امتک هلاکنه سبب اولور » دیدکده رسول اکرم « غم چکمه ، الله بزمه برابردر » دیو تسلیت ویردی .

آنلر دونوب کیتدکدن صکره حضرت ابو بکر « یارسول الله ! اگر ایچلرندن بریسی شویله جه اوکنه باقیویرسهیدی بزى کوروردی » دیدکده رسول اکرم « یاسن نهظن ایدرسین او ایکی رفیق حقنده که آنلرک اوچنجیسی الله اوله » دیو بویوردی .

حضرت ابوبکر ، مغارهیه کیردکده بر ده لیک کوردی . اورادن ییلان وچیپان کی بر مضر حیوان چیقوبده رسول اکرمه ضرر وزیان ایتسون دیو آنی آیاغیله طیقایوب اوطوردی . رسول اکرم دخی آکا طایانوب اویقویه واردی .

حال بوکه او ده لیکدن بر ییلان چیقیدی و ابو بکر رضی الله عنه حضرتلرینک آیاغنی صوقدی .

فخر عالم ، اویقودن اویانوبده راحتسز اولسون دیه حضرت صدیق آیاغنی چکمدی . لکن جانی آجیوب کوزلرندن یاش آقدی وکوز یاشلری رسول اکرمک مبارک یوزینه طاملامغله اویقودن اویاندی « نه واریا بابکر؟ » دیو صوردی .

او دخی « یا رسول الله ! آیاغنی بر شی صوقدی . اما بئس یوق . آنام ، بابام سکا فدا اولسون » دیو جواب ویردی .

رسول اکرم قالقدی ، ییلانک صوقدینی یره توکوردی . درحال آجیسی زائل اولدی و حضرت صدیق ، شفا بولدی .

حضرت ابوبکرک آزادلوسی اولان ( عامر بن فهیره ) جبل ثورده بر سوری قویون کوده وکیجه لری صاغوب مغارهیه بر مقدار سوت کوتورور ایدی .

حضرت ابوبكر اوغلى ( عبدالله ) كيجهلرى كيزليجه اومغارديه كلوب قريشك حال وحركتلرينه دائر خبرلر كتيرير ايدى .

رسول اكرم ايله يارغارى ، اوچ كيجه بو حال اوزره او مغارده قالديلر . بعد ( عبدالله بن اريقط ) ده وهلى كتيردى . بينديلر . آنى وعامرى دخی برابر آلدیلر وساحل يوليله كيدرك ( قُديذ ) نام محله واصل اولديلر .

اوراده ساكن اولان ( ابومعبد ) ك چادري او كندن كچر كن ساتون آلتق اوزره خرما وياخود سائر ييه جك بر نسنه وارمى ديو صورديلر . ابومعبد ، اوراده بولنمىوب فقط زوجه سى و ( خالد خزاعى ) نك كريمه سى اولان ( عائكة امّ معبد ) اوراده بولنه رق « ييه جك برشى يوقدر » ديو جواب ويردى .

رسول اكرم ، بر طرفده بر قويون كوردى « بونه در ؟ » ديو صوردى . امّ معبد « بر زبون قويوندر كه يوريمكه بحالى اولماديغندن سوري ايله كيدمىوب قالمش » ديدكده « اذن ويرسهك صاغلم » ديو بويوردى . امّ معبد ، نه ديسون ؟ سوري ايله اوتلامغه كيدمىان بر ضعيف حيواندن نه چيقار ؟ اما مسافره اولماز ديمك جائز اولامايه جفندن « بك اعلا آنده سوت بولورسهك صاغويور » ديدى .

رسول اكرم ، او قويونى طوتوب مهنسى صيغادى و « بسم الله الرحمن الرحيم » ديدى . قويونك سودى كلكله بر بويوك قاب ايستهدى وقويونى صاغدى . قاب طولدى . ابتدا امّ معبد وبعده سائر اوراده بولنانلرم طويونجه ايچيردى واك صكره كنديسى ايچدى . تكرار صاغدى ، ينه ايچديلر . اوچنجى دفعه صاغوب آنى امّ معبد براقدى . آندن قالقوب يارغارى ايله برابر يوله روان اولديلر .

آره سى چوق كچمىوب ابو معبد كلدى . او قاب ايچنده كى سودى كوردى « بونه ؟ » ديو صوردى .



زوجه سی ام معبد «والله بورایه بر مبارک ذات کلدی. شویله دیدی، قویونی بویله صاغدی» دهرک کیفیتی بر تفصیل سویلیدی.

ابو معبد «بونده بر حکمت وار. اوداتک شکل و سیاسی نصل ایدی» دیو موردی. زوجه سی دخی «اورته بویلی، قره قاشلی، قره کوزلی و غایت نورانی یوزلی بر لطیف آدم ایدی» دهرک حلیه نبویه بی بیان ایلیدی.

زوجی ابو معبد، «والله بوسنک دیدیکک ذات، قریش ایچنده ظهور ایدن پیغمبردر. اگر بن بوراده بولونسه ایدم آکا تابع اولوردم» دیمش. ام معبددن مرویدرکه «او، قویون، حضرت عمرک خلافتنده وقوع بولان قوراقلق اوانته قدر یاشادی. یر یوزنده حیوانلرییه جک شی بولاماز ایکن بز، آنی آقشام، صباح صاغاردق» دیر ایمش. بز مانحن فیه مزه کله لم. رسول اکرمی اله کچیرنلره قریشک یوز دهوه وعد ایلدیکی (کنانه) قبیله سندن او حوالیده خیمه نشین اولان (بنی مدلج) عشیرتی ایچنده طویولمش و ساحل یولندن ایکی دهوه ایله درت کشینک کچوب کیتدیکی دخی ایشیدلمش ایدی.

بناء علیه (سراقه بن مالک المدلجی) یوز دهوه طمعنه دوشمش، یعنی آتنه بینوب آنلرک آرقه سنه دوشمش ایدی. آنلر ایسه (قدید) نام محله دهوه (ام معبد) ک چادرندن کیدر ایکن سراقه، آنلره یتیشدی.

ابوبکر رضی الله عنه حضرتلری «امان یازسول الله! طوتولدق» دهرک تلاشه دوشدی.

رسول الله «غم یمه. الله بزمه برابردر» دیو تسلیت ویرر ایکن سراقه کلوب چاندی. لکن آتنک آیاقلری دیزلرینه قدر یر باتدی. سراقه «یا محمد! دعا ایت، قورتولایم. بوینومه بورج اولسون که کیرودن کن آرییحیلری صاوبوب دفع ایدیم» دیو یالواردی.

خاتم الانبیا حضرت تبری دعا ایتدی . جناب حق دخی آنک دعاسنی قبول بویوردی و سراقه یه نجات ویردی . سراقه ، بو وجهله اوغرامش اولدینی بلادن قورتولوب آنلرک یانه کلدی . اوچ کون قدر آنلرک حالنی مکتوم طومق اوزره تمهد ایلدی وایلروده شوکت اسلامیه نک میدانه چیقاجغنی ملاحظه ایدرک بر اماننامه ایستدی .

رسول اکرم ، عامر بن فهیره ده ری اوزرینه بر اماننامه یازدیروب سراقه یه ویردی ویولنه کیتدی .

سراقه ، اوراده قالدی وقریشک کیرودن کلن آراییحیلرینه « بن ، بورالرینی آرایوب طارادم . کیمسه لر یوق . باشقه طرفه باقالم » دیه رک آنلری کیرو چویردی .

مؤخرأ ابو جهل ، سراقه نک حالنه واقف اولدقده پک زیاده غضبه کلوب سراقه نک غیرتسزلکنندن بحث ایدرک حقنده بر قطعه هجویه سویلشدر .

سراقه ، دخی آکا « اکر آتمک آیاقلری نصل یره کومولدیکنی کوره یدک ، سن ده محمدک پیغمبرلکنه ایمان ایدردک » دیو بر قطعه ایله جواب ویرمشدر .

بعده ابوبکر الصدیق رضی الله عنه حضرت تبری دخی بو وقعیه دائر بر کوزل قصیده نظم ایلشدر .

فتح مکه سنه سی ، رسول اکرمک حنین غزاسندن عودتنده سراقه ، او اماننامه ایله حضور نبوی به کلمش و اسلام ایله مشرف وانتفات نبوی به نائل اولمشدر .

رسول اکرم ، آکا « یا سراقه ! نصل سین کسرانک بیله زیکلرینی طاقیناجنک وقت ؟ » دیمش و ، صانکه کوزومک اوکنده کی کورویورم که سراقه ، کسرانک بیله زیکلرینی طاقنیور « دیو بویورمش ایدی .

او وقت بو سوزلرک معناسی گرگی کی آکلاشیلماش ایدی . صکره حضرت عمرک ، خلافتنده کسرانک اموالی اغتنام اولنهرق مدینه به

کتوریلوبده بيله زیکلرینی سراقه نك طاقیندینی وقت معجزات محمدیه دن اولدینی میدانه چیقمشدر . نته کیم محلنده بیان اولنه جقدر . بزینه صدیمزه کله لم :

رسول اکرم ، یارغازی ایله برابر ( قدید ) نام محلدن آیریلوب کیدرلر ایکن یولده بر چوبانه راست کلوب سوت ایستدیلر . چوبان « صاغلور قویونم یوق ، شوراده بر کچی وار . آنکده سودی قلمادی ، دیدی . حضرت پیغمبر « آنی کتور ، دیو بویوردی . چوبان دخی اوکچی بی کتوردی .

رسول اکرم ، مبارک الی آنک ممه سی اوستنه قویدی . همان سودی کلدی . حضرت ابوبکر ، قالقانی طوتدی . قالقان ، سوت ایله طولدی . فخر عالم ، آنی حضرت ابوبکر وعامر وعبدالله وچوبانه ایچیردی . بعده ینه صاغوب کندی ایچدی .

چوبان « سن کیمسین ؟ بن سنک کبی آدم کورمدم . امان بکا کندیکچی بیلدیر ، دیو یالواردی .

رسول اکرم « اکر کیمسه یه طویورماز ایسه ک سوبیلیم ، دیو بویوردی . چوبان دخی کیمسه یه سوبیله میه جکنه سوز ویردی . فخر عالم ، « محمد رسول الله دیدکاری بنم » دیدکده چوبان « ها ! شو قریشک دینندن دونن کیشی دیدکاری سنمیسین ؟ » دیدی . رسول اکرم دخی « البته آنلر اوילה سوبلر یا » دیو بویوردی .

چوبان « بن شهادت ایدرم که سن حق پیغمبر سک وسنک یاپدیغکی کیمسه یاپاماز ، مکرکه پیغمبر اوله . بن سنکله برابر کیدرم » دیدی . رسول اکرم ، « شیمدی اولماز . صکره بنم ظهوریمی خبر آلدیغک وقت کل ، دیدی ویولنه روان اولدی .

ابوبکر الصدیق حضرتلری ، پک چوق کره شامه کیدوب کلش اولدیغندن یول اوزرنده آنی طانیانلر چوق ایدی . « بو اوککده کی کیمدر ، دیو صورانلره « قولاغوزدر . بکا یول کوسترر ، دیو جواب ویردی .

فقط (زیر بن العوام) رضی الله عنه حضرتلری ، شام قافله سیله هنوز مدینه دن چیقوب مکّه کَلور ایکن آنلره راست کلدی و رسول اکرم ایلّه یارغارینه آق ویگی جامه لر گیدیردی .

زیر بن العوام حضرتلری ، قافله ایلّه مکّه کَلوب امورینی تسویه ایتدکن صکره او دخی مدینه یه هجرت ایتشد .

رسول اکرم مکدن چیقدینی اولجه مدینه ده طویلغله اهل اسلام ، برقاق کون صباحلین خارج مدینه یه چیقوب صیجاق باصینجه یه قدر تشریف نبوی یه منتظر اولورلردی .

ینه بر بازار ایرتسی کونی چیقوب زیاده صیجاق باصدقه کیرو دونمشلر ایدی . بر ایش ایچون خانه سنک طامی اوستنه چیقمش اولان بر یهودی ، اوزاقدن رسول اکرم ایلّه یارغارینک آق جامه لره بورونمش اولدقلری حالدّه کلکده اولدقلرینی کوردی و « ایشه ایستدیکینگز کلیور » دیو اهل اسلامه مزده ویردی .

اهل اسلام ، سلاحلانونب او طرفه سکیرتدیلر و فخر عالمی کمال احترام ایلّه استقبال ایتدیلرکه نبوت محمدیه نك اون دردنجی سنه سنده واقع ربیع الاول اینک اوائلنده ایدی .

بک صیجاق بر کون و رسول اکرم یورغون ایدی . مدینه یه بر ساعت قدر مسافه سی اولان ( قُبَا ) قریه سنه ایندی و بنی نجاردن برینک خانه سنه قوندی چندروز قباده اقامت ایتمک اوزره قرار ویردی و اوراده بر مسجد انشابویوردی . آندن اول اهل اسلامدن بعضیلری ، کندولری ایچون مسجد یامیشلر ایسه ده جماعت مسلمین ایچون الک ابتدا بنا اولتان مسجد ، اشبو مسجد قبادر .

رسول اکرمک (قبا) یه وروندده [\*] انصار کرام هپ کَلوب دیار مدینه یه

[\*] وکان نزوله صلى الله عليه وسلم ( عند کلثوم بن الهدم ) لانه کان شیخ بنی عمرو بن عوف و هم بطن من الاوس . السيرة النبوية والاثار المحمدية . لسید احمد زینی دحلان .

قدومنی تبریک ایلدکلی صرمدہ مدینہ نیک اک ماہر و مشہور شاعری اولان  
( حسان بن ثابت ) رضی اللہ عنہ حضرتلری دخی تشریف نبوی یه دائر بر  
برکوزل قصیدہ مدحیہ سویلدی و قدوم نبوی یه شکرانہ اوله رق آنی فیخر عالم  
حضرتلرینه عرض ایلدی .

حضرت علی کرم الله وجهه ، رسول اکرم دن صکره اوچ کون مکده  
اقامت و کندوسنه براقلمش اولان امانتلی اصحابنه اعطا و تسلیم ایتدکدن  
صکره مکده چیقمشیدی . رسول ، اکرم هنوز قباده ایکن او دخی  
کلوب قبايه وصول بولدی .

بعده رسول اکرم ، بر جمعه کونی کندی ده وه سنه بیدی و یوز نفر  
اهل اسلام ایله قبادن قالقدی و نفس مدینه یه عازم اولدی .

ائناى راهده صول طرفنه میل ایله ( بنی سالم بن عوف ) یوردنده  
( رانونا ) دینیلن وادینک اوست طرفنه ایندی و اوراده غایت بلیغانه بر  
خطبه او قویوب جمعه نمازی قیلدی .

خاتم الانبیا حضرتلرینک اک ابتدا قیلدینی جمعه نمازی بودر وابتدا کی  
خطبه سی اوردرکه خلاصه وجهله ترجمه سی بوراده ایراد اولنور .

رسول اکرم ، قالقوب حق تعالی حضرتلرینه لایق اولدینی وجهله  
حدوثنا ایتدکدن صکره بویله بویورمشیدی :

« ای ناس ! صاغلغکنزده آخرتکنز ایچون تدارک کوریکنز . محقق  
بیلورسکنزکه یوم قیامتده برینک باشنه اورولاجق وچوبانسز براقیدینی  
قویونندن صورولاجق . صکره جناب حق آکا دیه جک . اما نصل دیه جک .  
ترجانی یوق ، پرده داری یوق ، بالذات دیه جک که : سکا بنم رسولم کلوب ده  
تبلیع ایتدیمی ؟ بن سکا مال ویردم ، سکا لطف واحسان ایتدم . سن  
کندک ایچون نه تدارک ایتدک ؟ او کیمسه دخی صاغنه صولنه باقاجق ، بر  
شی کورمیه جک . اوکنه باقاجق جهنمدن باشقه بر شی کورمیه جک . اوپله  
ایسه هر کیم که کندوسنی ولوکه بر یاریم خرما ایله اولسون آتشدن  
قورتاره بیله جک ایسه همان او خیری ایشله سون . آنی ده بولاماز ایسه

بارى كلمه طييه ايله كندوسنى قورتارسون . زيرا آنكله برخيره اون مثلندن  
يدى يوز مثلنه قدر ثواب و يريلور . والسلام على رسول الله ورحمة الله  
وبركاته »

رسول اكرم ، برنجى خطبه يي بوجهله اتمام ايتدكن صكره ايكنجى  
خطبه يه دخى قيام ايدوب بو وجهله بويورمشيدي :

« الله حد اولسون ، الله حمدايدرم و آندن يارديم ايستم . نفسلرمزك  
شرلرندن و كوتو عمللرمزدن الله صيغندق . اللهم هدايت ايتديكنى  
كيمسه اضلال ايدم . اللهم اضلال ايتديكنه دخى كيمسه هدايت ايدم .  
اشهد ان لا اله الا الله وحده لا شريك له . كلامك اك كوزلى كتاب اللهدر .  
هر كيم كه جناب حق ، آنك قلبنده قرأنى مزين قيله و آنى كافر ايكن  
اسلامه ادخال ايدم و او دخى قرأنى سائر سوزلره ترجيح ايله . ايشته  
او كيمسه فلاح بولور . طوغرىسى كتاب الله ، كلاملك اك كوزلى واك  
بليغيدر . اللهم سوديكنى سويكز ، اللهم جان و كوكلدن سويكز . اللهم  
كلامندن و ذكرندن اوصانمايكز و اللهم كلامندن قلبكزه قسوت كلسون .  
زيرا كلام الله ، هر شئك اعلاسنى آيروب سچر . عمللك خيرلوسنى و قوللك  
گزيدهسى اولان پيغمبرلرى و قصه لك ايسنى ذكر ايدر و حلال و حرامى  
بيان ايلر . آرتق الله عبادت ايديكز و آكا بر شئي شريك اتمه يكز .  
آندن حقيه صاقينكز . كوزل سوزيكز ايله او سوزكز دخى الله طوغرى  
اولسون و ينگزده كلام الله ايله سويشكز . محقق بيلمليشكز كه الله تعالى  
عهدي بوزانلره غضب ايدر . والسلام عليكم »

عقبه كي بيعته انصار كرام حضراتى ، هر نه وقت رسول اكرم ،  
كندى بلده لرينه كلورسه هر وجهله آنى محافظه ايتك اوزره عهد و ميثاق  
ايتمش ايديلر .

اولجه رسول اكرم ، آنلك ديارينه كلوب بر مدت قباده اقامت  
ايتدكن صكره بوكره نفس مدينه يه كيرمك اوزره بولنديغندن آرتق  
آنلك ايفاي تعهد مجبور اولدقلرى وقت كلش ديمك اولدى .



بناءً عليه رسول اکرم ، بو خطبه نك آخرنده جناب حقك عهدي  
بوزانلره غضب ايدم چكي بيانيله ختم كلام بيورمشدر .

رسول اکرم او وجهله ( رانونا ) ده جمعه نمازني قيلدقدن صكره  
ينه ده وه سنه بيندى ومدينه شهرينه توجه ايتدى . لكن كيمك خانه سنه  
قونا جنى كيمسه نك معلومى دهل ايدى .

انصار كرامك مقدم ومؤخر مهاجرين ايتدكلى معاونت و حقارنده  
كوستردكلى حرمت و رعایت طوغريسى تعريف اولماز درجه ده ايدى .  
بوكره حضرت پيغمبرك مدينه ورودنده ايسه عادتاً دوكون ، بايرام  
ايدرجه سنه شنك ايلديلر . او كون مدينه ليلر حقنده صحیحاً بر بيوك بايرام  
كونى ايدى .

چوجوقلى سه وينوب زقاقلرده « رسول الله كلدى » ديو چاغريشورلر ،  
خاتونلرى طاملرك اوستنه چيقوب كوزل كوزل شعرلر اوقورلر و « خوش  
كلديگنز » ديو باغريشورلر ايدى .

هر هانكيسنك خانه سى او كندن كچسه « بيوريگنز يا رسول الله ! » ديو  
ديو خانه سنه دعوت ايدرلر و ده وه سنك يولارندن طوتوب دوندرمه  
چاليشورلر ايدى .

آلر ، بو وجهله ده وه نك يولارينه صاريلدقجه رسول الله « آكا  
طوقونمايگنز مأموردى ، الله طرفدن مأمور اولدني محله كيدييور .  
طوريگنز باقلم ، نره كيدهك » ديو منع ايدردي و رسول اکرم ، ده وه نك  
يولارني بر اقوب هيچ طوقونمازدى . او مبارك حيوان دخی صاغه صوله  
باقارق كندولكندن كيدردي .

نهايت ( مالك بن نجار ) ك خانه سى او كنده كى خالى عرصه ده چوكدى ،  
لكن طورميوب قالقويوردى و طاموس كى سوزيلوب كيدهك بنى نجاردن  
( خالد ) يعنى ( ابو ايوب انصارى رضی الله عنه ) حضرت تليرنك خانه سى  
او كنه واردى و اوراده چوكدى . لكن طورميوب ينه قالقدى و دونوب  
اولكى چوكديكى يرده چوكدى و همان بويونى اوزادوب باغيردى .

رسول اکرم دخی « ان شاء الله قوناغمز بوراسیدر ، دیه رک ده وه نک اوزرندن ایندی و ابو ایوب خالد انصاری خانه سنی تشریف بیوردی .

حضرت خالد رضی الله عنه ( زید بن حارثه ) ایله برابر ده وه نک اوزرنده کی شیلری آلوب خانه سنه کتوردی .

انصارک اک اولوسی اولان ( اسعد بن زرارہ ) رضی الله عنه حضرتلری دخی تبرکاً ده وه بی آلوب کندی خانه سنه کتوردی .

خاتم الانبیا حضرتلرینک شرف قده میله مدینه شهری مشرف و مسعود اولدی ، نور ایله طولدی .

وطنلرندن آیرو دوشوب ده کوکلری محزون اولان مهاجرینه تازه جان کلدی . انصارک دخی یوزی کولدی .

او کون مدینه اهالیسی ، حضرت خالدک خانه سنه کلوب رسول اکرمی زیارت ایتدکلری صرعه ده علماء یهوددن ( عبدالله بن سلام ) دخی کلدی و دقت ایله حضرت پیغمبرک یوزینه باقدی « بو یوز ، یالانچی یوزی دکلدیر » دیوب همان اسلام ایله مشرف اولیوردی .

انصار کرامک هر بری ، رسول اکرمی کندی خانه سنه مهمان ایتک ایستردی و هانکیسی ترجیح اولنسه دیکرلرینک محزون اولسی خاطرلره کوردی .

حال بوکده : قوناق یرینی ده وه تعیین ایدنجه کی مسه نک بر دییه جکی قالمادی . فقط او خالی عرصه ده چوکه سنک سبب و حکمتی نه ایدی ؟ آنی بیان ایدم : او عرصه ، بنی نجاردن ایکی چو جوغک ملک موروثی ایدی .

رسول اکرم ، آنی اون مثقال آلتونه ساتون آلدی . او مقدار آلتونی ابوبکر الصدیق رضی الله عنه حضرتلرینه حواله بیوردی . او دخی بو مبلخی صاحب لرینه ویردی .

بعده رسول اکرم ، کرپیچ کسیدردی و کراسته تدارک ایتدیردی . او عرصه ده بر مسجد شریف انشاسنه و بر طرفنده کندیسی ایچون او طهر بنا سنه شروع بیوردی .

صكرملر وقت به وقت نيجه ابيه عاليه علاوه اولنه رق الحاله هذه معمور  
ومزين اولان مسجد نبوى ، ايشته بو جامع شريفدر وقبوسى ده وهنك  
چوكديكى يردر .

اشبو جامع شريف ياپيلوركن رسول الله ، اصحاب كرامى ايله برابر  
بالذات آنده چاليشيرلر والليله كرييج طاشيرلر ايدى .

كعبه مكرمه ، مشركلر انده بولمغله رسول اكرم ، مدينه يي تشریف  
ايدى ليدنبرى بيت المقدسه ، يعنى مسجد اقصايه طوغرى نماز قيلاردى .  
بناءً عليه بو مسجد شريفك قبله سى قدس شريف جهتي اولمق اوزره  
بناسنه مباشرت بيوردى .

رسول اكرمك كريمه لرندن ( رقيه ) رضى الله عنها حضرتلى ، مقدما  
زوجى عثمان بن عفان رضى الله عنه حضرتلىله برلكده مدينه يه هجرت  
ايتمشيدى .

بوكره مسجد شريفك بناسنه مباشرت اولندقدن صكره رسول اكرم ،  
ديكر كريمه لريله زوجه سى ( سوده ) يي كتورمك اوزره كندو آزادلولرى  
اولان ( زيد بن حارثه ) ايله ( ابو رافع ) ي مكيه كوندردى .  
آنلر دخى واروب ورسول اكرمك كريمه لرى اولان ( ام كلثوم )  
و ( فاطمه ) رضى الله عنهما حضرتلىله زوجه سى ( سوده ) رضى الله عنها  
حضرتلىنى وزيد بن حارثه نك زوجه سى ( ام ايمن ) واوغلى ( اسامه )  
رضى الله عنهما يي آلوب مدينه يه كتورديلر .

آنلرله برابر حضرت ابو بكر الصديقك اوغلى رضى الله عنهما ايله  
عيال واتباعى دخى كليورديلر .

اما رسول اكرمك بيوك كريمه سى ( زينب ) رضى الله عنها حضرتلىنك  
زوجى ( ابو العاص بن الربيع ) هنوز اسلامه كلامش اولدنى جهته حضرت  
زينب ، مكدهن چيقاميوب كيرو قالمش ايسه ده مؤخرأ او دخى مدينه يه  
هجرت بيورمشدر .

الحاصل مهاجرینک بالکلیہ مکہ دن علاقہ لری کسیدلی و رسول اکرمک تشریفله مشرف و منور اولان مدینه شهری، آرتق کندولرینک وطن محترمی اولدی .

لکن آره سی چوق کچمه یوب حضرت ابوبکر الصدیق ایله بلال حبشی رضی الله عنهما صیتمه علتله اوغرا دیلر . صیتمه طوتار کن مکنک آب وهواسنی یاد و تذکر ایله اظهار تحسیر ایدرلردی .

بلال حبشی ، مکہ دن چیقماغه سبب اولانلره وعلی الخصوص ( عتبه بن ربیعہ ) و ( شیبہ بن ربیعہ ) ایله ( امیہ بن خلف ) . بددا ایلردی .

فخر عالم حضرتلری دخی « یارب! سن بزه مکہ کبی مدینه یی دخی سه و دیر و بوراده بزه برکت و وسعت معیشت ویر » دیو جناب حقه یانوار یردی . جناب حق دخی دعاسنی قبول بیوردی و مدینه یی مهاجرینه سه و دیردی .

حتی عمر بن الخطاب رضی الله عنه حضرتلری « یارب! بکا سنک یولکده شهادت میسر ایت و رسولکک بلده سنده اولک مقدر ایت » دیو دعا ایدردی .

مسجد شریف ایله یاننده کی اوطه لک ختامنه قدر رسول اکرم ، یدی آی قدر ابو ایوب انصاری خانه سنده اقامت بیوردی .

انصار کرام حضراتی ، هر کون اورایه رسول الله ایچون نوبت ایله طعام کتورلردی .

رسول اکرمک تشریفنه شکرانه اولق اوزره انصارک هر بری بویله برر صورته معاونت ایتمش و هر بری برر شی ویره کلش ایکن ( انس بن مالک ) ک والدہ سی، پک فقیر اولدیغدن هیچ برشی کوتوروب ویره مدیکنه تأسف ایدردی .

نهایت بر کون ، اون یاشنده اولان اوغلی ( انس ) ک الدن طوتدی و کوتوروب « یارسول الله ! بوده سزه خدمت ایتسون » دهرک براقوب

کیتدی . آندن صکره ( انس ) رضی الله عنه دخی خدمت نبویه دوام ایتدی .

مسجد نبوی ایله یاننده کی اوطه لر ختام بولدقن صکره رسول اکرم ، ابو ایوب انصاری خانه سندن آنلره کوچ ایتدی .

ابوبکر الصدیق رضی الله عنه حضرتلرینک کریمه محترمه سی اولوب مکده ایکن رسول اکرمه نکاح ایدلمش اولان ( عایشه ) رضی الله عنها حضرتلرینک زفانی دخی اوئانده اجرا ایدیلدی و آنک اوطه سندن مسجد شریفه بر یول آچیلدی . او وقت هجرت نبویه دن سکرز آی چکمشدی .

مسجد شریفک بر طرفده بر صفه وار ایدی که اوستی صوندورمه ایدی . آنده اصحاب کرامک فقراسی یاتور ایدی و آنلره ( اصحاب صفه ) دینلوردی . آنلرک آقشام ییه جکاری یوق ایدی . هر کون آقشام اولدقده بر آزینی رسول اکرم ، کندی یاننده آلیقویوب سائرینی اصحاب کرامک خانلرینه اولاشدیرر ایدی . هر بری واروب بر خانه ده یمک یردی .

رسول اکرم ، صدقه قبول ایتیوب آنجق هدیه قبول ایدردی و کندوسنه صدقه دیو کلن شیرله ال سورمیوب آنلری اصحاب صفه یه ویریردی و کلن هدایادن دخی آنلره حصه چیقاریردی .

اصحاب صفه ، دائما مسجد شریفده حاضر بولنورلردی . اما سائر اصحاب کرام ، نماز وقتی اولنجه مسجد شریفه کله رک حضرت پیغمبر ایله برلکده نماز قیلوب کیدرلردی .

صکره اذان او قومق مشروع قیلندی . نماز وقتی اولنجه بلال حبشی رضی الله عنه حضرتلری ، اذان او قوردی . اصحاب کرام دخی آنی ایشیتدکاری کبی جامع شریفه طویلانورلردی .

بو سنه مکده مشرکلرک رؤسا سندن ( عاص بن وائل السهمی ) ایله ( ولید بن مغیره ) دنیادن کوچوب دار مجازاته کیتدیلر .

مدینه منوره ده دخی انصار کرامک ال بیوکلری اولان ( اسعد بن زراره ) ایله ( برآء ) رضی الله عنهما حضرتلری دنیا غائله سندن کچوب

دین اسلامه ایتدکمری خدمتک اجر جزیلنی آلمق اوزره دار بقایه عزیمت ایتدیلر .

بو سنه یه ( سنه الاذن ) یعنی رخصت ییلی دینلورکه ایتداسنده مکدن مدینه یه هجرت ایتک اوزره اصحاب کرامه اذن ورخصت ویربلوب آنلر دخی همان محرم آینده مهاجرته قیام ایتمشلر و پیدرپی مکدن مدینه یه کیتمشلر ایدی . نهایت رسول اکرم دخی صفر آینده مکدن حیقوب ربیع الاولده مدینه دیارینه وصول بولمشیدی .

مؤخرآ بو ، سنه نك غرّه محرمی تاریخ اسلامك مبدئی اعتبار ایدلمشدر .

ایشته ، تاریخ هجرت دیدیکمز بودر که : ولادت محمدیه نك ( الی دردنجی ) و تاریخ میلاد عیسانك ( آلتیوز یکرمی ایکنجی ) ییلیدر .

اهل اسلامك عموماً مکدن حیقوب کیتملری ایلک نظرده مشرک لرحه بر نوع مظفریت بیلینوردی و مکّه ، آرتق اغیاردن خالی اولارق آنلره قالدی ظن اولونویوردی .

حال بوکه مدینه ده مهاجرین یرلشهرک وانصار ایله برلشهرک مشرک لرحه علیه بر بیوک اردو طوبلانویوردی .

حقیقت کوزیه باقانلره بوسنه نك هلال محرمی ، کفاره قارشو اهل اسلامك النده یالین قلیج کبی بر سلاح مظفریت کورینوردی .

مقدما اصحاب کرامدن بعضیلری « کفارک نیچون بوقدر جوروجفالرینی چکه لم ؟ » دیه رک کندولرینه تعرض ایدن کفاره سلاح ایله مقابله ایتک اوزره رخصت ایستدکجه رسول اکرم « هنوز حرب وقتاله مأذون دکلم ، دیر ایدی . بو سنه کفار ایله مقاتله ایتک ایچون دخی اهل اسلامه رخصت ویریلدی .

چونکه ( اوس ) و ( خزرج ) قبیله لری ایمانه کلمکه دین اسلام ، قوت بولمش و اهل اسلامك شوکتی مشرک لرحه جنک ایده بیله جک درجه یه کلش ایدی .



بناءً علیه هجرت نبویه دن بش ، آلتی آی مرور ایتدکدن صکره آره  
صره مهاجریندن برر فرقه ترتیب ورسول اکرمک عمتی اولان حمزه بن  
عبدالمطلب و عثمزاده سی اولان ( عییده بن الحارث بن مطلب بن عبد مناف )  
رضی الله عنهما حضرتلری کچی کبار اصحاب گرامدن بری باشبوغ نصب  
وتعین وبر بیاض بایراق اعطا بیوریلهرق مکه مشرکترینک کاربانلرینه تعرض  
ایتمک اوزره مدینه دن چیقاریلور اولدی .

هجرتك ایکنجی سنه سی صفرنده رسول اکرم آلمش نفر مهاجرین  
ایله مدینه دن چیقدی و ( سعد بن عباده ) رضی الله عنه حضرتلرینی مدینه ده  
قائم مقام براقدی ولواء شریفنی عمتی حمزه رضی الله عنه حضرتلرینک الله  
ویردی . همان مدینه ایله مکه آره سنده واقع ( ودان ) و ( ابواء ) قریه لرینه  
طوغری عزیمت بیوردی .

بو سفر نبویدن مقصد او حوالیدن کچوب کیدن بر قریش کاربانه  
یتیشمک و ( کنانه ) قبیله سندن اولان ( بنی ضمیره ) عشیرتی تحت اطاعت  
وانقیاده ادخال ایلمک ایدی .

حال بوکه ( ابواء ) قریه سنه واریلدقده کاربانک صاووشوب کیتمش  
اولدیفنی تحقق ایلدی . بنی ضمیره شیخی کلوب امان دبله دی .

رسول اکرم دخی نیما بعد اهل اسلامک دشمنلرینه یاردم ایتمامک  
واجببنده اهل اسلامه طرفدار اولمق اوزره بنی ضمیره ایله عقد مصالحه  
و کندولرینه بر قطعه اماننامه اعطا بیوردقدن صکره مدینه یه عودت  
ایلدی .

بعده ابو سفیانک بر قافله ایله مکدن چیقوب شامه عزیمت ایتدیکچی  
ایشیدیلکله ینه هجرتک ایکنجی سنه سی جمادی الاولاسنده رسول اکرم  
یوز الی قدر اهل اسلام ایله مدینه دن چیقدی و بو کره ( ابو سلمه بن  
عبدالاسد ) ی مدینه ده قائم مقام براقدی . لواء نبوی ینه حضرت حمزه نک  
اوموزنده ایدی .

يَنْبَغُ طرفنده (عُشِيرَه) نام محله واردیلر. کاربان قریشک ینہ صاووشوب کیتمش اولدینی خبر آلدی وهان کنانہ دن اورادہ سا کن اولان (بنی مُدِج): ایلہ مصالحہ و آنلرہ دخی بنی ضمیرہ کبی بر قطعہ اماننامہ اعطا اولندقدن صکرہ مدینہ یہ عودت اولندی .

چند روز مرورندہ مکہ جہتندہ بادیه نشین اولان طوائف قریشدن و (فہر بن مالک) ک نسلدن (کُرُز بن جابر الفہری) مشرکیندن بر فرقہ ایلہ مدینہ جوارینہ کلوب مدینہ اہالیسنک حیوانلرینی غارت ایلش اولدینی خبری آلدی .

آنک اوزرینہ رسول اکرم درحال (زید بن حارثہ) یی مدینہ دہ قائم مقام براقوب ولواء شریفی حضرت علی یہ ویروب مہاجریندن بر فرقہ ایلہ مدینہ دن چیقدی و (کرز بن جابر) ک آرقہ سنہ دوشدی. کرز ایسہ صاپہ یوللردن صاووشوب کیتمش اولدیغدن رسول اکرم آ کایتیشہ میوب کیرودوندی.

بعده رسول اکرمک خالہ زادہ سی اولان (عبدالله بن جحش الاسدی) اون قدر مہاجرین ایلہ قریشک احوالی تحسین ایتک اوزرہ مکہ جانبہ کوندرلمشیدی . سلخ رجبہ مکہ ایلہ طائف آرسندہ (بطن نخلہ) نام محلہ قریشک طائفدن مکہ یہ کلکدہ اولان بر کاربانہ راست کلدیلر کہ رئیس (عمر بن حُضرمی) اولوب (عثمان بن عبدالله) ایلہ (حکم بن کيسان) دخی برابر ایدی. اہل اسلام (عمر بن حُضرمی) یی اعدام ایتدیلر و (عثمان) ایلہ (حکم) ی طوتدیلر. دیگر رفیقلری قاچدی (عبدالله بن جحش) دخی بو ایکی اسیری وکاربانہ بولدینی اشیانی آلدی و دونوب رفیقلری ایلہ برابر سالماً و غانماً مدینہ یہ کلدی . ایشتہ ملت اسلامیہ دہ برنجی غنیمت بودر .

عثمان بن عبدالله ، بعدہ بدل اعطاسیلہ اسارتدن قورتولدی . (حکم بن کيسان) ایسہ شرف اسلام ایلہ مشرف اولوب مدینہ دہ قالدی .

اہل اسلامک بویلہ مکہ جوارینہ قدر کیدوب دہ کاربان اورمالری قریشک طائفہ سنہ پک زیادہ طوقوندی .

بو سنه نك شعبانده ايسه قبله بيت المقدس دن كعبه يه تحويل قيلندی .  
يعني مسجد اقصايه طوغری نماز قيلنور ايكن فيما بعد كعبه يه طوغری نماز  
قيلنمق امر اولندی . بو جهته اهل اسلامك يوزى مكه يه دوندى .  
بش وقت نمازده مهاجرينك وطن اصليلرى اولان مكه ديارى خاطرلرينه  
كلور اولدى .

مكه مشركلرينه ، غلبه ايتمك آرزولرى كوكلكرده شدت وقوت بولدى .  
بووقته قدر مدينه منوره دن شورايه ، بورايه ارسال اولنه كلن عساكر  
اسلاميه ، هپ مهاجريندن اولوب انصاردن هنوز غزا ايجون چيقان  
اولماديسده مهاجرينه باقهرق آنلره دخی جهاد وغزا آرزولرى كلدى .  
بونكله برابر اوس وخزرج قيله لرى ايجنده برطاقم منافقلى وارايدى كه  
رئيسلرى ( عبدالله بن ابى بن سلول ) ايدى .

چونكه: عبدالله بن ابى بن سلول ، اشرف خزر جدن اولوب مدينه ده پك  
زياده سوزى كچركن ظهور اسلامدن صكره اسكى نفوذى قالمدى . اودخی  
حسدندن ناشى دين اسلام عليه دوشدى . ديكر منافقلى ايله برلكده يهود  
طائفه سيله متفق اولوب كيزلوجه فتنه وفساددن خالى اولمازلردى ، لكن علناً  
مخالفته جسارت ايدمه زلردى . زيرا اسلامك شوكت و قوتى كالمده ايدى .  
بوسنه رمضان آينده اوروج طومتق فرض اولدى و خلال رمضانده  
بدر غزاسى وقوع بولدى .

بدرده كي مظفريتله اهل اسلامك يوزى كولدى ومكه مشركلرينك  
سطوت وقوتى قيريلدى .

وقت سعادتده وقوع بولان غزواتك هپسنى بر تفصيل يازمغه بورساله نك  
تحملى يوقدر .

فقط اك مشهور اولان غزالرى اجمالاً بيان ايله لم وهان بدر غزا سندن  
باشلايلم كه ملت اسلاميه نك ميدان آلمسنه منشأ و دين اسلامك سرعت اوزره  
طرف بطرف ياييلمسنه مبدأ بوغزوؤ كبرادر .

## غزوة بدر

بدر غزاسی ، تاریخ هجرتك ايكنجی سنهسی رمضاننده وقوع بولدی  
واولجه تصور وترتيب اولمش بر محاربه اوليوب راست كله بروقة عظيمة  
اولدی .

شويلاه : يوقاروده بيان ايتديكمز وجهله مكدن چيقوب شامه كيدن  
قريش كارباننه يتشمك اوزره رسول اكرم مدينه دن چيقوب (عشيره) نام محله  
قدر كيتمش ايكن اوكارباننه تصادف ايده ميوب آنجق (بنی مدلج) طائفه سنی  
تحت عهد وامانه آله رق مدینه منوره يه عودت ايتمش ایدی .

بوكاربانك رئيسی ابوسفیان اولوب شامدن كلتيلوما مال آله رق كيرو دوندی .  
(عمر بن عاص) دخی ابوسفیان ايله برابر ایدی ويانلرنده آنجق اللى قدر  
آدم وار ایدی .

اويله كلتيلو اموال ايله شامدن چيقوقلری خبر آلمسی اوزرينه رسول  
اكرم ، او اموالی اغتنام ايچون اصحاب كرامی ترغيب وتشويق بيوردی .  
وكاربانك احوالی تجسس ايتمك اوزره (طلحه بن عبيدالله) ايله (سعيد بن  
زيد) رضی الله عنهما حضرتلری شام طرفه كوندردی .

بعده رسول اكرم ، اوائل رمضان شريفده مدينه دن چيقوب (روحا) نام  
محله واردی واوراده اردوسنی معينه بيوردی . اوفقا چوجقلری وعليل  
وسقط اولانلری كيرو چويردی .

(ابن أم مكتوم) رضی الله عنه حضرتلری ، مسجد نبوی امامته مأمور  
اوله رق مدينه ده قالمش و (أبولبابه الانصاري) رضی الله عنه حضرتلری  
مدينه نك امر محافظه سی ايچون قائم مقام بر اقلمش ایدی .

مدینه نك (عوالی) دنیلان قریه لرنده نفاق وشقاقه دأثر بعض حوادث ایشیدلمش اولدیغندن (عاصم بن عدی العجلانی) رضی الله عنه حضرتلری دخی (قبا) و (عوالی) قریه لرینه حاکم نصب اولنه رق قبايه کوندرلمش ایدی .

عثمان بن عفان رضی الله عنه حضرتلری ، نامزاج اولدقدن بشقه زوجه سی ورسول اکرمک کریمه سی (رقیه) رضی الله عنها حضرتلری دخی خسته اولمغه حضرت عثمان رسول اکرم ایله برلکده کیده مدیکی کبی (ابو امامه) رضی الله عنه حضرتلرینک والده سی آغرجه کیفسز اولدیغندن مدینه ده قالمق اوزره مأذون اولمش ایدی .

سائر کبار اصحاب کرام رضوان الله علیهم اجمعین حضراتی ، هپ رسول اکرم ایله برلکده اولدقلری حالد (روحا) دن قالقیلوب (صفرا) مرحله سنه عزیمت بیورلدی .

مجموع عساکر اسلامیة ، (اوجیوز بش) نفر اولوب آلتش دردی مهاجرین و باقیسی انصار کزین ایدی . ایچلرنده یالکز اوج نفر آتلو وار ایدی که : (مقداد بن اسود) و (زبیر بن العوام) و (مرثد غنوی) ایدی .

یانلرنده یتیم ده وه اولوب نوبت ایله بینرلردی . حتی رسول اکرم ایله حضرت علی بن ابی طالب وزید بن حارثه رضی الله عنهما ایچون برده وه اولوب اوجی نوبت ایله بینردی .

مهاجرینک بیاض سنجاغنی (مصعب بن عمیر) چکیوردی . انصارک دخی ایکی سنجاغنی اولوب بری خزرچ قیله سنه و دیگری اوس قیله سنه مخصوص ایدی .

سکره لری کره ارضک قطعات مشهوره سنده مظفریت بیراقلری آچوب ده عالمی تیره تن ملت اسلامیة نك برنجی اردوسی اشته بودر .

رسول اکرمک کاربان اوزرینه حرکتی ابوسفیان اولجه خبر آلمغه (ضمضم بن عمر والغفاری) پی فریادجی اولمق اوزره اجرتله طوتوب



مکيه کوندرمش واودخی سیرسریع ایله مکيه واروب قریشی تلاشه دوشورمش ایدی .

ابوسفیان ایسه اووجهله مکيه فیرادجی کوندرمکه برابر ساحل یولندن آشوری مرتبه سرعت ایله حرکت ایدرک اهل اسلامک مدینه دن چیقدیغی اناده اودخی کاربان ایله ( بدر ) حذاسندن صاووشوب کیدیوردی .

غریبدرکه ضمیمک مکيه وصولدن اوچ کون مقدم ( عاتکه بنت عبدالمطلب ) رؤیاسنده کورمش که : ده وه ایله مکيه برکیمسه کلوب « ای جماعت اوچ کونه دک معرکه یه یتشیکز » دیو ندا ایتدکن صکره ( جبل ابی قیس ) اوزرینه چقه رق بریوک قایای یزندن قوپاروب اشاغه آتمش و او قایا ، پاره پاره اولوب مکهنک هرخانه سنه برپارده سی اصابت ایتمش .

صباحلین عاتکه ، بورؤیای برادری ( عباس ) ه سویلش و « بو کونلرده قریشه بریوک مصیبت ایریشه جک » دیو تعیر ایدرک مکتوم طومتسنی اخطار ایلش .

عباس ایسه بو کیفیتی محرمانه ( ولید بن عتبه ) یه ، اودخی پدری ( عتبه بن ربیع ) یه و اودخی بعض کسانه افاده ایتمش و آغزدن آغزه یاییلار قبتون اشراف قریشک قولاغنه کیتمش ایدی .

برکون صکره عتبه بن ربیع و برادری شیه و ابو جهل و امیه بن خلف وزمه ابن الاسود و ابوالبختری و سائر کبار قریش ، حرم کعبه ده طوپلانوب عاتکه نک رؤیاسنی سویلشورلر کن عباس دخی آنلرک یانه واردی .

ابوجهل ، عباسه خطاباً « همشیره کزه نه وقت نبوت کلدی ؟ ای بنی عبدالمطلب ! ارککلر کزده پیغمبرلک دعواسی ظهور ایتدیکنه قناعت ایتوب ده شمعی قاریلر کزده می پیغمبرلک دعواسنه قالفیشاجق ؟ » یوللو بدزبانلق ایلدی و بتون عبدالمطلب خاندانه طوقوناجق سوزلر سویلدی .

ابوجهلک بو سوزلری ، او کون بتون مکه ایچنده شیوع بولدی ، حتی قادینلرک قولاق لرینه واصل اولدی .

اقشام اولوب ده عباس ، خانه سنه وارد قدده هپ بنی عبدالمطلب



قادينلری ، آنك باشنه طوبلاندیلر و جمله سی بر آغزدن « ابوجهله نچون بوقدر یوز ویریورسکیز ؟ ارککلریگیز حقنده سویلدك سوز براقیوب شمدي قاریلریگزمده دیل اوزاتمغه باشدی . بوکاده می سکوت ایده جکسکیز ؟ » دیو سویلندیلر .

قادينلرك بومعامله سی عباسك پك كوچنه كیتدی « هله صباح اولسونده واروب شو حریفه ، یعنی ابوجهله بولاشایم ولساناً اولسون اوجمی آلایم » دیو نیت ایتدی .

فرداسی علی الصباح حرم شریفه کیدوب ابوجهلك یاننه طوغری واردی و آنکله مجادله یه برهانه آرادی .

ایشته اووقت ابوسفیانك فریادجیسی ، یعنی ضمضم غفاری کلوب « ای قریش ! چابوق تیشیشکیز . یوقسه شام کاربانی محمدك اله دوشور و بونجه اموالکیز الدن کیدر » دهرک عاتکهك رؤیاسنده کوردیکی وجهله فریاد ایدیوردی و هرکس آنك سسنه طوغری قوشوب کیدوردی .

بناءً علیه عباسك ابوجهل ايله محاوره و مجادله سنه میدان قالیوب آنلر دخی بوفریادك اصلی نه اولدیغنی آ کلامق افکارینه دوشدیلر و فریادجینك یاننه طوغری قوشدیلر .

اشراف قریش ، هپ فریادجینك باشنه اوشدیلر وهان ابوسفیانه یاردیم ایتمك اوزره ناسی ترغیب و تشویقه قالشدیلر .

على الخصوص ابوجهل ، بتون مکه اهالیسنی نفیر عام صورتيله سفره دعوت ایلر و ( سهیل بن عمرو ) دخی ناسك غیرت و حمیت دامارلینه تأثیر ایده جك سوزلر سویلر ایدی .

نهایت اشراف قریش ، هپ حاضرلانونب نفیر عام صورتيله بتون حرب و ضرب اصحابی آیاغه قالدیردیلر .

فقط عاتکهك رؤیاسی نچهلرینی وهمه دوشوردی . بناءً علیه ابولهيك اهل اسلام حقنده پك زیاده عداوتی اولدیغنی حالده بالذات کیتمهک جسارت ایدهمیهرك یرینه بر بدل طوتوب کوندرمکه قرار ویردی و ابوجهلك برادری

(عاص بن هشام) ك دمنده اولان درت بيك درهم آلاجنه مقابل آنی كندی يرينه طوتوب كوندردی .

بوصرده عتبه بن ربيعه ايله برادری شيبه دخی كيرو قالمق ايستديلر ايسه ده ياقه لرینی ابوجهلك النذن قوتاره مديلر .

قالدی كه: عتبه نك ابوسفیان ايله آره لرنده كي قرابته نظراً آكامداداچون سكيرتمكه مجبور ایدی .

زیرا عتبه ، (ربيعه) نك اوغلی و ابوسفیان دخی (حرب بن امیه) نك اوغلی اولوب امیه ايله ربيعه ايسه (عبد شمس ابن عبد مناف) ك اوغوللری ایدی . بوندن باشقه ابوسفیانك زوجه سی اولان مشهور (هند) دخی عتبه نك قیزی ایدی .

امیه بن خلف دخی اختیارلغندن بحثله كيرو قالمق ايستد ايسه ده ابوجهل ، برسر مه دان وعقبه بن ابی معیط برنجوردان آلوب امیه نك خانه سنه كيدرك «قاريلر كي او قدن و قلیج دن حذرايدنلره بونلر ياقیشور» ديوتعرض ايتملر ايله اودخی برلكده سفر ایتكه مجبور اولدی .

عانهكه نك رؤياسندن طولانی عباس ايله ابوجهلك آراسی بوزولش و بلكه بتون بنی عبدالمطلب ابوجهله داريلش ايسه ده سقايت زمزم منصی و كعبه مكرمه نك تعميرات امانتی ، عباسك عهدده سنده بولندينی جهتله آكا كوره كيرو قالمق قابل دكل ایدی . سائر بنی عبدالمطلب دخی ايستر ايستمز قریش اردوسی ايله برلكده كیتكه مجبور اولديلر .

الحاصل ابوله بدن ، باشقه نه قدر اشراف قریش وار ايسه جمله سی بر بيوك جمعیت ايله مكه دن چيقوب كيتديلر و ابو سفیان ايله عمر و بن عاصه امداد اچون كمال سرعت ايله سير و حرکت ايتديلر .

قریش مكه ، بو اردوده هپ برابر ایدی . يالكر حضرت عمر ك قيله سی اولان (بنی عدی) برلكده دكلر ایدی .

بو اردو ، مكه دن قالقوبده (بدر) قريه سنه وارنجه يه قدر هر قوناق محلنده (ابوجهل) و بعده (صفوان بن امیه) و (سهيل ابن عمرو) و (شيبه بن ربيعه) و (عتبه بن ربيعه) و (قيس بن صبابه) و (عباس

بن عبدالمطلب ( و ) ابوالبحترى ( بالناوبه اوزر ، ياطقوزر ددوه كسوب  
عسكر قريشى اطعام ايلديلر .

آنلر ، مكهدن قالقوبده بدره كلور ايكن ابوسفیان ، ساحل يوليله  
ساووشوب كاربانى منزل سلامتة ايريشديرمكه اردونك كيرو عودت اياسى  
ايچون خبر كوندرمشيدى .

لكن ابوجهلك تشويقاى اوزرينه قريش طائفهسى ، كيرو دونمهيوب  
اهل اسلامدن انتقام آلمق اوزره بدره قدر كمشلر ايدى .

فقط ( بنى زهره ) ايله متحد ومعاهد اولان ( اُبى بن شريق التقي )  
كاربان قورتولدى . مقصدمر حاصل اولدى . آرتق كيرو دونمك لازم  
كلى « ديهرك بنى زهره دن اردوده بولنان ذوات ايله بالاتفاق كيجهلين  
اردودن چيقوب كيتمشلر ايدى .

بنى عدى ، ذاتاً اردو ايله حركت ايتيوب بنى زهره دخى بو وجهله  
آريلارق عودت ايلش اولدقلىرندن ( بدر ) وقعه سنده بوايكى طائفهدن  
دخى تلفات وقوع بولماشدر . اما سائر طوائف قريش ، هپ بو وقعه ده  
بولنه رق خال ومقدارلرينه كوره خسار وزيان كورمشلردر .

رسول اكرم ، كاربان قريشك نروده اولديغنى آراشديرمقده ايكن  
( صفرا ) مرحله سنه وروندنه مكهدن اويله بر اردو چيقمش اولدينى  
خبر آلندى واردوى اسلام برموقع مشكلده بولندى .

زيرا اللى كيشى ايله محافظه اولنان بر كاربانك اوزرينه سوق اولمش  
بر جمعيت ايله اويله برمكمل اردويه قارشو وارمق دشوار ايدى .

حال بوكه : كاربانك پيشنه دوشولسه برامانسز يرده قريش اردوسنه  
تصادف اولمق احتمالى وار ايدى . كيرو دونولمك ايسه بيوك عار ايدى .

بناءً على ذلك رسول اكرم ، اصحاب كرامنى جلب وجع ايله استشاره  
ضمننده آنلره « نه ديرسيكز ؟ كاربانك پيشنه مى دوشمك ايدرسيكز ، يوقسه  
قريش اردوسنه قارشو وارمق صورتينمى ترجيح ايدرسيكز ؟ هله بوايكى  
طائفهدن برينى بكا جناب حق وعد ايتمشدر » ديو بيوردى .

آنلر دخی «بز، کاربان نیتیله چیققدق . اکر بویله بریوک اردو ایله محاربه اولنه جغنی بیلسه یدک دها تدارکلیجه چیقاردق» دیو جواب ویردیلر و کاربان طرفنه میل کوستردیلر .

رسول اکرم ، آنلرک بوجو ابندن مغبر الحاطر اولدی . فقط ابوبکر الصدیق رضی الله عنه حضرتلری ، خاطر نبوی بی تطیب ایده جک سوزلر سویلدی . عمر بن الخطاب رضی الله عنه حضرتلری دخی آنی تأیید ایلدی . آنک اوزرینه (مقداد بن اسود) رضی الله عنه حضرتلری، میدان چیقوب «یارسول الله ! اللهم امری نه ایسه بز آکا اطاعت ایلرز و هر حالده سنکله برابرز . والله ، اراضی معموره نك اك نهایتنه قدر کیتسه ک سنکله برابر کیدرز» دیدی .

رسول اکرم ، مقداد رضی الله عنه حضرتلرینک بوسوزلردن پک زیاده ممنون اولدی . فقط انصار کرام ، مقدا عقبه ده بیعت ایتدکلرنده رسول اکرم ، کندی بلده لرینه کلورسه آنی اولاد و عیالاری کبی هرشیدن اسیرکه یوب صاقینه جقلرینی تعهد ایتشلر ایسه ده خارج مدینه ده محاربه ایده جکلرینه دائر تعهدلری اولمدیغدن آنلرک رأیلری صورولمق لازم کککله آنلره خطاباً «سزلر ، بررأی ویریگز» دیو امر ایتدی .

انصار طرفندن (سعد بن معاذ) رضی الله عنه «یارسول الله ! بز لریمی مراد بیورو یورسگز» دیو صوردی . رسول اکرم «اوت» دیو بیوردی . سعد بن معاذ «یارسول الله ! بزسکا ایناندق . طرف باریدن کتوردیکک شیلر حق اولدیغنه اعتماد و اعتقاد ایتدک و سکا اطاعت و اتباع ایتک اوزره عهد و میثاق ایلدک . آرتق سزنه دیلر سه گز امرایدیگز . سنی کوندرن الله حقیچون اکر دکزه کیرسه ک سنکله برابر کیره رز ، هیچ بریمز کیرو قالماز . بز دشمنه قارشو وارمقدن چکنمیز . وقت محاربه ده کیرو دونمه یز . صابرلرز ، صادقلرز . جناب حقدن رجایدرم که بز دن ممنون اوله جغکز ایشلر کوستره . هان علی برکة الله بزمه مراد ایتدی ککگز طرفه عزیمت بیوریدگز )

ده نيجه رسول اکرم، فوق العاده ممنون اوله رق «اويله ايسه على برکة الله يورويکمز»  
 ديو بيوردی . اردوی سعادت دخی بدر قريه سنه طوغری يوریدی .  
 رسول اکرم «سزه مزده ايدرم که الله تعالى حضرتلری ، بکا ايکی طائفه دن  
 بريني وعد ايتدی . والله ، بن صانکه قريش قومنک دوشوب تلف اولاجقلىرى  
 يرلره باقيورم » ديو بيوردی .

بدره واريلدقدهده « بوراسی فلانک مقتلى وشوراسی فلانک مقتلى »  
 ديو مبارک اليله کوستردی .

صکره هپ اويله اولدی . هيچ برينک یری شاشمادی ، يعنى مشرکلردن  
 هر قغیسی ايچون برير کوستردی ايسه هنکام محاربه ده اومشرك ، اوراده  
 دوشوب جان ويردی .

اوصورتله اهل اسلام ، بدره قریب محله واردی وبر قوملق موقعده  
 اردو قوردی که يورورکن انسانلرک وحيوانلرک آياقلىرى قاياردی .

اولجه قريش اردوسی کلوب بدر صوينی ضبط ايلش اولماسيله اهل  
 اسلام ، صوسزلقدن زحمت چکوب شيطان دخی بعضيلرينک قلبنه  
 صوسزلقدن قيرياق وهمنی القا ايدهرک وسوسه ويردی .

هل بوکه : جناب حق ، او کيجه قريش اردوسنک ايچنه بر قورقو  
 دوشوردی واهل اسلامه برطاتلى اويقو ويردی .

قريش طائفه سنک اهل اسلامه نسبتله قوتلری قات قات زیاده ايکن  
 آنلر، تلاش وانديشه اوزره اولوب اهل اسلام ايسه امنيت اوزره اويوردی .  
 فرداسی که رمضان شريفک (اون يدنجه) جمعه کونيدر . على الصباح ياغورلر  
 ياغدی وسيللر آقدی . اهل اسلام صويه قاندى وبعضيلرينک قلبنه کی  
 وسوسه شيطانيه زائل اولدی ويرلر ، بکله شوب سيرو حرکت سهاوت  
 کلدی .

(حُبابُ بن مُنْذَرُ) رضى الله عنه حضرتلرينک رأى وتديري اوزره  
 اردوی سعادتک موقعی ده کشديريلدی .

شويله که : بدر قريه سنک اک نهایتنده کی قويسی اوکنده اردو قورولدی



ویاننده اهل اسلام ایچون بر بیوک حوض یاپیلدی و صو ایله طولدورولدی. بیکر قوییلرک اوزرینه چورچوب آتیلدی. بوجهته قریش اردوسی صوسز قالدی.

(سعد بن معاذ) رضی الله عنه حضرتلری، رسول الله ایچون خرما دالارندن بر خیمه، یعنی کولککالک یاپیدردی.

رسول الله، یارغاری ابوبکر الصدیق رضی الله عنه حضرتلریله برلکده و خیمه نك آلتنه کیردی.

سعد بن معاذ رضی الله عنه حضرتلری دخی قلیجنی طاقوب انصار گرامدن برقاچ ذات ایله برلکده خیمه نك قپوسنده بکلردی.

ایشته اوخالده قریش اردوسی میدانه چیقوب کوروندی. کروه مشرکین، کوک تیموره مستغرق اولدقلری حالده ایلرو یوریدیلر.

بونلرک مقداری بیسک نفر قدر اولوب ایچلرنده یوز آتلو ویدی یوز ددوملی وارییدی.

الحاصل عددجه اهل اسلامک اوچ مثلندن زیاده اولدقلری حالده سباب واسلحه جه قوتلری قات قات زیاده ایدی. اوچ بایراقلری اولوب برینی (ابو عئیز زراره بن عمیر) و دیگر برینی (نضر بن حارث) و بر دیگرینی دخی (طلحه بن طلحه) چکیوردی. میدان حربه کلدیله و موقع طوتوب صف اولدیله.

اهل اسلام دخی آنلره قارشو صف اولوب طوردی. لکن نه غربب نمشا ایدی که (ابو عئیز بن عمیر) قریش اردوسنک برنجی بایراقداری و برادری (مصعب بن عمیر) رضی الله عنه حضرتلری، مهاجرینک سنجاقداری ایدی.

قریش اردوسنک سائر اشراف ورؤساسی ایله دخی مهاجرینک اکثری اوزاق یاقین هر نه ایسه هپ یکدیگرک اقرباسی ایدی.

از جمله رسول اکرمک بیوک دشمنلری اولان (امیه بن خلف) و برادری (ابی بن خلف) رسول اکرمک جداعلاسی اولان (مره بن



كعب) ك برادری ( هصيص بن كعب ) ك صويندن واو وقت ابوسفیانك معهود كاربانده يولدائی اولان ( عمرو بن العاص ) دخی بنی سهمدن و ( بنی سهم ) ایسه كذلك ( هصيص بن كعب ) ك نسلندن اولدقلری حالدہ اكابر اصحاب كرامدن ( عمر بن الخطاب ) و ( سعید بن زيد ) رضی الله عنهما حضرتلری دخی ( مرّه ) نك دیگر برادری اولان ( عدی بن كعب ) ك نسلندن ایدیلر .

جمله اصحاب كرامك اولوسی اولان ابو بكر الصّدیق رضی الله عنه حضرتلریله ینه كبار اصحاب كرامدن طلحه رضی الله عنه حضرتلری ( نیم بن مرّه ) نك صويندن اولدقلری حالدہ رسول اكرمك عدو اكبری اولان ( ابو جهل بن هشام ) ایله ( خالد بن الولید ) دخی بنی مخزومدن ایدیلر . ( بنی مخزوم ) ایسه ( یقظه بن مرّه ) نك احفادندندر .

دها غریبی بو ایدی كه : ابو بكر الصّدیق رضی الله عنه حضرتلری نك اوغلی ( عبدالله ) رضی الله عنه كندی یاننده و دیگر اوغلی ( عبدالرحمن ) دخی مشركین قریش میاننده ایدی .

نضر بن حارث ، كه رسول اكرمه شدت عداوتی اولوب حتی رسول اكرم قرآن اوقور ایكن « محمد ، سزه اسكى ماصالاری سدویلیور » دیو استهزا ایلردی . او دخی ( عبد مناف ) ك برادری اولان ( عبد الدار ) اوغوللردن اولدینی حالدہ كبار اصحاب كرامدن ( زبیر بن العوّام ) رضی الله حضرتلری ، عبد منافك دیگر برادری اولان ( عبدالعزی ) اولادندندر . ینه سیّده النساء خدیجة الكبرى رضی الله عنها حضرتلری ، عبد العزی اولادندن اولوب برادری ( نوفل بن خویلد ) ایسه اهل اسلامك بیوك دشمنلردن ایدی .

معهود كاربانك رئیس اولان ابوسفیان ، و رسول اكرمه شدت عداوتی اولان ( عقبه بن ابی معیط ) دخی ( امیه بن عبد شمس بن عبد مناف ) ك حفیدلری و قریش اردوسنك اك بیوك رئیسلردن اولان مشهور ( عقبه ) و ( شیبه ) ، ( ربیعہ بن عبد شمس بن عبد مناف ) ك اوغوللری اولدقلری حالدہ

شیخ المهاجرین اولان ( عیسیدہ ) رضی اللہ عنہ حضرت تلمیذی ( حرث بن مطلب بن عبد مناف ) ک اوغلی ایدی .  
عتبہ بن ربیعہ ک اوغلی ( ولید ) کندی یانندہ و دیگر اوغلی ( ابو حذیفہ ) اهل اسلام میانندہ ایدی .

مقدما امیر مکہ مقامندہ بولان عبدالمطلب ک اوغلی و رسول اکرم ک عمی ( عباس ) دخی قریش اردوسنک ک بیوکلرندن اولدینی حالده میدان حربہ کلنجہ قارشوسندہ بیوک برادر ی ( حمزہ بن عبدالمطلب ) رضی اللہ عنہ حضرت تلمیذی کوردی .

( حارث بن عبدالمطلب ) ک اوغوللری اولان ( ابوسفیان ) ایله ( نوفل ) دخی کروہ مشرکین ایله برابر ایدی .

عبدالمطلبدن صکرہ قومنک رئیس اولان ( ابوطالب بن عبدالمطلب ) ک اوغلی علی کرم الله وجهه حضرت تلمیذی، صف حربده بیوک برادر ی ( عقیل بن ابی طالب ) قارشو طورویوردی .

رسول اکرم کرم الله سی ( زینب ) رضی اللہ عنہا حضرت تلمیذی زوچی اولان ( ابوالعاص بن ربیع ) دخی مظهر اولدینی صهریت نبویه شرفی بر طرفه براقه رق رسول الله قارشو سلاح چکوب کلیوردی .

عربلر ، مجرد قومیت غیرتیه جنک ایدرلرکن بویله بر قوم وقبیلهدن اولان برچوق خلق ک ایکی فرقه اولوبده یکدیگره قارشو صف باغلا یوب طورمالری قریش طائفه سنک چوغنی ترده دوشوردی .

علی الخصوص عبدالمطلب اوغوللرینک حربہ کیریشملری مجرد سائر اشراف قریشک زوریله ایدی . حال بوک : قارشولرنده برادر و عمزاده و دای زاده لرینی کوردکلری کبی کندولرینه ترّد و حیرت الیوردی .

ایشته صرقوم عتبہ بن ربیعہ ، بورالرینی درخاطر ایدهرک بر دهرین مطالعیه واردی و :

« ای جماعت ! کیم کیمکله جنک ایدهرک ؟ یکدیگرک برادرینی ، یاخود عمزاده و یاخود دای زاده لرینی اولدیره جک . صکره بونلر ، نصل یوزیوزه

باقاچقار ؟ بو اولور ايشمی ؟ سز بو ايشدن واز كچيگنر و آره دن چيقيگنر .  
محمدي سائر قبائل عربيه براقينگنر . اكر آنلر ، محمده ظفر بولورلر ايسه  
سزكده مرادكز حصوله كلش اولور والا سز برشي ضايع ايتمش اولمازسكز ،  
ديو ( حكيم بن حزام ) ايله ابو جهله خبر كوندردي .

ابو جهل ايسه ، پيدري خلقى جنكه تشويق وتحريك ايلر وخلقك  
غيرت وحميت دامارلرينه طوقوناجق سوزلر سويلر ايدى .

حتى اوكون ، آتى تهوب صف حربدن ايلرو چيقارق « بزلر ،  
يكوجود بر جمعيتز . اوزرينه واريلماز ويگيلمز بر جماعتز . بز ، بوكون  
محمدين واصحابندن انتقام آلاچغز » دير ايدى و غلبه ايده جكنده اصلا  
شبهه ايتيوردي .

في الواقع اهل اسلامه نسبتله قریش اردوسنك مادی قوتی قات قات  
زياده ايدى . لكن اردوى سعادتك معنوى قوتى فوق العاده ايدى .

قریش اردوسنده جنك ايستمه ينلر چوق ايدى و كندولرينه قوميت  
غيرتدن باشقه جان فدا ايتديره جنك بر كيفيت يوق ايدى .

اهل اسلام ايسه غيرت دينيه يي هر شيئه تقديم و ترجيح ايدرك جمله سى  
جهت وحدت اسلاميه ايله متحد و متفق ايدى و شهيد اولدق لرنده كیده جكلرى  
يرى كورور كي بيلور اولدق لرى جهته غنديلرنده شهادتدن اعز بر دولت  
و سعادت يوق ايدى .

ايسته ابو جهل ، بو دقيقه لر دن غافل اولارق محاربه يي قازانمق ايجون  
عسكرك كرتى كفايت ايدر ديو زعم ايدردى و « محمد يلرى اولدرمكه لزوم  
يوق . آنلرك اللرينى آرقه لرينه باغلايوب ده يه ده رك مكه كيه كوتوره جكلر »  
دير ايدى .

بناءً على ذلك ، عتبه بن ربيعه نك سوزلرندن دلگير اولوب آنك نصيحتنى  
غرضكارلغه حمل ايدرك آكالوم ايتدى .

« عتبه ، اوغلى ابو حذيفه يي اسير كه يوب ده بو وجهله خلقك افكارينى

اخلال ایدیور ، یوللو خلقلک نظرندہ عتبہنی کوچوک دوشورہ جک سوزلر ایله آنک رأینی چوروتدی .

( بطن نخله ) ده ( عبدالله بن جحش ) وقعه سنده مقتول اولان ( عمرو بن حضرمی ) نك قرنداشی ( عامر بن حضرمی ) دخی ابوجهلك ، تعلیم وتشویقی ایله میدانہ چیقوب قرنداشنك اسمنی یاد ایله فریاد ایتدی . زعمنجه قرنداشنك قانی آلمق اوزره اهل اسلام طرفنه اوق آتدی .

اتفاقاً عامر بن حضرمينك اوق ، عمر رضی الله عنه حضرتلرينك آزادلوسی اولان ( مهجع ) رضی الله عنه حضرتلرينه طوقوندى وآندن متأثراً حضرت مهجع ، وفات ایتدی .

اووقت رسول اکرم « مهجع ، سيدالشهدادر » دیو بیوردی . ایشته ملت اسلامیهده ابتدا یارالانوب شهید اولان بودر . رضی الله عنه او عصرلرده طرفین محاربهیه کیریشمزدن اول برر ، ایکیشر کیمسه میدانہ چیقوبده مقاتله ایتک عادت ایدی . بوکا ( مبارزه ) واو کیمسهلره ( مبارز ) دینلوردی .

ابتدا مبارزلر ، میدانہ چیقوبده خلقی جنکه قیزیشدیرمق عادت ایکن بوکره ابوجهلك تشویقیله عامرک میدانہ چیقوبده برادرینك قانی دعوا ایتسندن واهل اسلامه اوق آتماسندن طولای مبارزه دن اول محاربه قیزیشدی وآرہیه قان دوشدی .

بنی مخزومدن ( اسود بن عبدالاسد ) ، « یابن ، محمدیلرک حوضندن صو ایچرم ویا او حوضی هدم ایدرم ویاخود او حوضک یاننده اولورم » دیو یمن ایتدی وفداییلک یولنده سل سیف ایدرک اهل اسلامک حوضنه طوغری سکیرتدی .

رسول اللهک آرسلائی حمزه رضی الله عنه حضرتلری ، او طرفه قوشدی وحوض یاننده اسوده یتیشدی . همان بر قلیج اوردی . اسود ، آرقه سی اوزره دوشدی . لکن زعم باطلنجه یمنی یرینه کلسون دیو کندوسنی حوض ایچنه آتدی . حضرت حمزه دخی آنی حوض ایچنده قتل ایتدی .

رسول اکرم ، میدانہ چقبوب اہل اسلامک صفارینی دوزہ لتدی وبعضیلری صفدن خارج طورمغلہ مبارک النده کی عصا ایله خفیفجه دورته رك صره سنه کتوردی و « بن امر ایتدکجه دشمن اوزرینه هجوم ایتیمگر . فقط تمام اوق منزله کلدکارنده اوق آتگز » دیو توصیه وتنبیه بیوردی . الحاصل ، ایکی طرفده دخی اذهانه غلیان کلدی و ابو جهلک مراحمی حاصل اولدی .

عتبه ابن ربیعہ ایسه انظار ناسده کوچوک دوشدیکندن اکمال ناموس ایچون ایلری آتیلدی وهان بر طرفه برادری شیبہ یی و دیگر طرفه اوغلی ولیدی آلدی و میدانہ چقبوب مبارز ایستدی ، یعنی ار دیله دی .

بنی نجاردن ( عَفْرَا ) نام خاتونک یدی اوغلی اولوب یدیسی دخی بدرده حاضر ایدیلر . آنلردن ایکیسی ، یعنی ( عَوْف ) ایله ( مُعَاذ ) نام نوجوانلر وینه خزرچ قبیله سندن ( عبدالله بن رواحه ) رضی الله عنهم حضراتی آنلره قارشو چیقیدیلر .

عتبه ، آنلره « سز کیملرسکز » دیدی . آنلر دخی « فلان و فلانز » دیو جواب ویردیلر .

عتبه ، « بزم سزکله برایشمز یوق . بز ، عمزاده لرمنی ایسترز » دیو آنلری رد ایلدی .

چونکه : دیار مدینه اهالیسی ، زراعت وفلاحت ایله کچینورلردی . قریش طائفه سی ایسه بیوک تجارتلرله مشغول اولارق چیفتجیلره حقارت کوزیله باقارلردی .

آنک ایچون عتبه وشیه ، انصار ایله مبارزه تنزل ایتوب « یا محمد ! بزه کفو واقرانمز اولان عمزاده لرمنی کوندهر » دیو ندا ایتدیلر .

رسول اکرم دخی « قالح یا عیده ، قالح یا حمزه ، قالح یا علی » دیو بیوردیلر .

اوچی دخی قالقوب حضرت عییده بن حارث بن مطلب ، عتبه یه

وحضرت حمزه بن عبدالمطلب ، شبیهه وحضرت علی بن ابی طالب ، ولیدم قارشو کتدیلم .

اووقت عیده ، آلتش اوچ وحزه ، الی سکز وعلی ، یکر می بر بشارنده اولوب هر بری یاشجه قارشوسنده کی خصمنک اقرانی ایدی وجهله سی ، عربک اڭ ایلرو کلور شجعی ایدی . علی الخصوص حضرت حمزه ، اللهک بر مهابتلو آرسلائی ایدی . حضرت علی ، اگرچه هنوز بویله بیوک وقعه لرده بولنماشیدی . لکن آنک دخی بر آرسلان یاوروسی ولدینی سیاسندن بللی ایدی .

اوچی دخی میدان مبارزه یه چیقوب عادت اوزره اسم وشهرتلیخی بولدیلم .

عتبه وشبیهه ایله ولید دخی « تمام کفو وقران کرامتسگز ، بیوریکز ، یدیلر وجهله سی سل سیف ایلدیلم .

بویله اشراف قریشدن بهادرقلری مشهور ومسلم اولان آلتی بیوک اڭک مبارزله لی او وقتک حکمنجه شایان تماشا وقوعاتدن معدود ایدی . بناء علیه طرفین ، جنکه حاضر ومهیّا اولارق کیمنک اوق یانی النده کیمنک الی قلیجنک قبضه سنده اولدینی حالده طرفین بو بهادرلرک مقاتله سنه کوز دیکوب تماشایه طور دیلم .

حضرت عیده ایله عتبه ، یکدیگره بر ایکی حمله ایلدی وایکی اختیار بر برینی یارالادی ایسه ده بریسی دیکرینک ایشنی آتام ایده مدی .

حضرت حمزه وعلی ایسه برر حمله ده خصملرینی اولدردیلم ودونوب بیسده یه اعانه ایله عتبه نک دخی ایشنی بیتوردیلر وعیده یی آلوب حضور بوی یه کتوردیلر .

عیده نک ایاغنده قلیچ یاره سی اولمغله قانلری آقارق حضور نبوی یه لدکده « یارسول الله ! بن شهید می یم ؟ » دیو صوردی .

رسول اکرم « اوت » دیو جواب ویردی ویری ، جنه الفردوس ولدینی تبشیر بیوردی .



آنك اوزرينه عييده ، ممنون ومسرور اولارق دين اسلام ، اوغورنده  
آياغلك كسيلمسندن طولايي اصلا قساوت چكميه جكنه دائر كوزل وموثر  
بيتلر سويلدى .

فقط ، يارهسى آغير اولديغندن اوچ كون صكره مدينه يه كوتوررلر ايكن  
ائناى راهده عزم دار جنت ايلدى . رضى الله عنه

اوته طرفده عتبه وشييه كې قريش اردوسنك ايلرو كلور رؤساسندن  
ايكي بيوك كيشى ايله برده نوجوان اولان ( وليد بن عتبه ) نك اوچى بردن  
ميدان مبارزده دوشوب قالمالرى سائر دهشت ويردى .

ابو جهل ايسه ، اصلا فتور كتورميوب « سز ، عتبه وشييه باقايگن .  
آنلر ، مغرورانه حركت ايدرك كندولرني مهلكيه دوشورديلر ، ديو  
قومنه جسارت ويرر و « همان يورويكز » ديو امر ايلر ايدى .

اواننده ابوبكر الصديق رضى الله عنه حضرتلرى ، اوغلى عبدالرحمانى  
مشركلارك آره سنده كورنجه ميدانه چيقوبده آنكله مقاتله ايتك اوزره  
رخصت ايسته ديسده رسول اكرم « يا ابابكر ! بيلمز ميسين كه سن ، بنم  
كورور كوزم وايشيدير قولاغم منزله سنده سين » ديه رك رخصت ويرمدى  
ويانندن آيرمادى .

ايكي طرف ايلرو يورومكه ويكديكره ياقلاشمغه باشلادى . اوqlر ايسه  
ايكي طرفدن على التوالى ايشلر ايدى .

خزرج قيله سندن ( حارث بن سراقه ) نام نوجوان كه كيروده طوروبده  
ايلروده كي شجعمانك مقاتله سنى تماشا ايدنلر ايچنده ايدى . دشمن طرفدن  
آتيلوبده اوگده كي صف حربك اوزرندن كچن براوق ، آ كا طوقوندى  
ويىچاره يي شهيد ايتدى . ايسته انصاردن ابتدا شهيد اولان بودر .

ابتدا كي اوق جنكنده ايلروده كي صف حربده بولنان غزوات اسلامك  
اوزرندن آشوب كيدن بر اوقك كيروده حارثيه طوقونماسى جمله يه موجب  
عبرت اولدى .

اجل او قلرینک او کده کیلرله آرقاده کیلری فرق ایتدیکی وایلروده کیلرک تهلهکسی کیروده کیلرک تهلهکسندن زیاده اولمادیغی آ کلاشیلدی .

مؤخرآ حارثه نك والده سی اولان ( رَبِيع ) حضور نبوی یه کلوب « یارسول الله ! او غلم جنتده ایسه کندیمه تسلیت و یروب صبر ایده یم ، دکل ایسه نه یاپایم ؟ » دیو سؤال ایتدکده رسول اکرم « جنت بر دکل ، متعدددر . سنک او غلک جنۃ الفردوسده در » دیو بیورمشدر . بز، ینه صدده کله لم :

رسول اکرم ، یارغازی ایله برلکده خیمه ده ، یعنی سعد بن معاذک یاپدیرمش اولدینی گولگه لکده بولنوب « یارب ! بکا وعد ایتدیگک نصرتی ویر » دیو کال سوز و گداز ایله دعا و نیاز ایلر ایکن کندوسنه بر خفیفجه اویقو کلدی وهمان تبسم ایدرک اویاندی . « مژده یا ابا بکر ! ایشته ملائکه کرام ایله جبرائیل علیه السلام امداده کلدی » دیو بیوردی .

بعده رسول اکرم ، زرهنی کیوب ( سیهزم الجمع و یولون الدبر ) آیت کریمه سنی تلاوت ایدرک خیمه دن طیشارو چیقدی .

معناسی « یاقینده او جمعیت بوزولوب آرقه دوندیرلر » دیمکدر . و اوست طرفنده کی آیت کریمه « ام یقولون نحن جمیع منتصر » اولوب آنک معناسی دخی « یوقسه مشرکین قریش ، بز طولو ویکو جود بر جماعتی دیرلر » دیمک اولور .

یوقاروده بیان ایتدیکمز وجهله فی الواقع ابوجهل ، اشبو یوم بدرده « بز ، یکو جود بر جماعت منتصره بز ، بوکون محمدله اصحابندن انتقام آلاجفز » دیمشدی .

بو آیت کریمه ایسه مقدا مکده ایکن نازل اوله رق کله جکدن خبرو یرن آیاتدن و نبوت محمدیه نك دلیل علنسی اولان معجزاتنددر .

حتی حضرت عمر دن مرویدرکه « بو آیت کریمه نازل اولدقه عجا فنی جمعی بوزولاجق ؟ دیدم . یوم بدرده رسول اکرم زرهنی کیوب ده ( سیهزم الجمع و یولون الدبر ) دیدیکی وقت مراد ، نه اولدینی آکلام » دیو بیورمشدر .

مرویدرکه : مقدّمه مدینه جوارینه قدر کلوبده مدینه اهالیسنک حیوانلرینی سوروب کوتورمش اولان (کرزبن جابر فہری) نک بادیه نشین اولان طوائف قریش ایله بوکره قریش مکہ اردوسنه امداد ایچون کله جکی اوکون ایشیدیلدی .

حال بوکه قریش اردوسنک قوتی ذاتاً اهل اسلامه نسبتله قات قات زیاده ایکن بادیه نشین اولان کروه عربان دخی کلوبده آنلره قاتیلایق اولورسه قوتلری فوق العاده اولور دیو اهل اسلام تلاش وانیشیه دوچار اولدی . آنک اوزرینه طرف باریدن ملککر ایله اهل اسلامه امداد اولنه جنی تبشیر بیوردی .

کرزبن جابر ، فی الواقع قریش مکہ اردوسنه امداد ایتک نیتده بولمش ایسه ده بروجه آتی قریش اردوسنک بوزولدیغنی خبر آلدینی کبی امداددن صرف نظر ایلشدر .

مرویدرکه : او ائنده مثلی کورولمه مش غایت شدتلو برروزکار چیقوب کوز کوزی کورمز اولمش . بوايسه مکر ، ملائکه کرام ایله جبرائیل علیه السلام کلشی ایش که میدان حربه کلش وابلق آنلره بنمش انسانلر صورتده کورونمشلر و مشرکله قارشو صف باغلا یوب طورمشلر .

بودخی روایات مشهوره دندرکه قریش ایله (کنانه) آره سنده و قتيله محاربه لر وقوع بولمش ایدو کندن بوکره کنانه قبیله سی ، فرصتی غنیمت اتخاذا ایدرک آرقه دن کلوبده هجوم ایتسونلر دیو قریش طائفه سی اندیشه ایدرکن کنانه شیخارندن مشهور (سراقه بن مالک مدلجی) بر فرقه سوار ی ایله قریش اردوسنه کلوب « بنده سزکله برابریم » دیرک آنلره جسارت ویرمش .

حال بوکه سراقه ، (حارث بن هشام) الاله طوتشوب کززلر ایکن او یله بر شدتلو بورا ایله ملککر کلنجه سراقه ، حارثدن آیریلوب وعسکرینی آلوب صاووشمش و آنک صاووشوب کیتمیسی قریش طائفه سنی وهم وتلاشه دوشورمش .

حتی ابو جهل، آنک اوزرینه « سز، سراقه یه باقییکز. آنک محمد ایله کیزلو اتفاقی واردر. محمدیلری بتوردکن صکره دونوبده (قدید) منزله واردیمزده بن، آکا محمدک طرفدارانی نه دیمک اولدیغنی اوکره دیرم. همان سز یورویکیز « دیو قومنه جسارت ویرمش ایدی .

قریش اردوسی بوزولوبده مکیه واردقلرنده « عسکرک انهمزانه سراقه سبب اولدی « دیمشله . سراقه ایسه آنی ایشیتدکده « والله، بن سزک بدره عزیمتکیزی طویمدم ، فقط هزیمتکیزی ایشتمدم « دیمش .

مکر، سراقه صورتنده کورونن ابلیس و بنی مدلجن برطاقیم آدملرک صورتنده کوروننلر ابلیسک عونہسی اولان شیطانلر ایمش .

برمدت صکره سراقه وسائرلری اسلام ایله مشرف اولدقده بوراسنی بینلرنده سویلشمشلر و شیطان ایشی اولدیغنی جزم ایلمشله . بز، ینه صده کله لم .

او ائنده رسولا کرم بر آووج اوفاجق طاشلر آلوب (شاهت الوجوه) یعنی « یوزلری قبیح وقاره اولسون » دیه رک دشمنلرک اوزرینه آتدی . او طاشلرک برر دانهسی ، مشرکلرک کوزلرینه و برونلرینک ده لیکلرینه اصابت ایله آنلری سرسام ایتدی .

بو کیفیت ، معجزات محمدیه دن و قریش اردوسنک بوزولماسنی موجب اولان اسباب معنویه دن در .

بومثللو سببلردن طولانی قریش اردوسنه تزلزل کلش اولدینی حالده حضرت پیغمبر ، حمله و هجوم ایچون امر ویردی .

شویله که : « هرکیم ، بوکون دشمندن یوز چویرمیوبده ثبات ایلر و شهید آ وفات ایلر ایسه جناب حق ، البته آنی جنته قویا جقدر . بوکون شهید اولانلره جنة الفردوس حاضر و آنلره رضوان ، منتظر در » یوللو هم صحیح ، همده مؤثر سوزلر ایله اصحاب کرامنی تشویق ایدیه رک « هایدی شدتلو حمله و هجوم ایدیکنز » دیو بیوردی .

خزرج قبیله سندن ( غمیر بن حَمام ) رضی الله عنه حضرتلری ، خرما یرکن

جنت مژده سنی ایشند کده « په په ! جنته کیرمک ایچون شو حریف لرك الله . اولمکدن باشقه برشی لازم دگلی ؟ پک ای » دیه رك الله کی خر مالری یره آتدی وهمان سَل سیف ایدیه رك شهادتک فضیلتنه دائر کوزل ومؤثر بیتلر سویله یه رك دشمن اوزهرینه هجوم ایتدی . آرتق کیرو دونیوب نیجه مشرکینی قتل ایتدکدن صکره نهایت کندوسی دخی شهید اوله رق جنة الفردوسه کیتدی . ملت اسلامیه ده اوقدن بشقه سلاح ایله شهید اولانلرک برنجیسی اشبو عمیر بن حماد ر . رضی الله عنه . عفرا خاتونک بیوک اوغلی ( عوف ) دخی شهادت مرتبه سنه نائل اولمق ایچون آ کا مانع اولابیله جک زرهنی صرتندن چیقاروب آتدی وهمان سَل سیف ایدرک دشمن اوزهرینه هجوم ایتدی . مشرکیندن نیجه لرینی اولدردی . نهایت کندوسی دخی شهید اولوب مرادینه ایردی . رضی الله عنه

سائر اصحاب کرام دخی هپ دالقلیج اولوب ایلرو سکیرتدیلر و طرف طرف حمله و هجوم ایله دشمنک صفلرینی یرتدیلر .  
 علی الخصوص اللهک ارسلانی حضرت حمزه رضی الله عنه ، هرقتنی قوله هجوم ایتسه دشمن فرقه لرینی یاروب کچردی .  
 حضرت علی رضی الله عنه دخی آ کا پیرو اوله رق اوکنه کلن مشرکلری قلیج ایله ایکی یه بیچردی .

قریشک مشهور رئیس لرندن ( زَمْعَةُ بن الاسود ) حضرت حمزه ایله علینک اوغورینه راست کملکه درحال آنی قتل و اعدام ایلدیلر . برادری ( عقیل بن الاسود ) دخی بوضرعه قتل اولندی .

( بنی سهم ) ک رؤسائندن اولان عمر بن العاص ، ابوسفیان ایله برابر اولمغله بووقعه ده بولمندی .  
 امامنی سهمک الک بیوک رئیس لری اولان درت کیشی بومهاجمه ده قتل اولندی .

شویله که : ( مُنَبِّه بن حجاج سهمی ) یی ( أَبُو سِرَالانصاری ) حضرت لری و برادری ( نیه بن حجاج ) ی حضرت حمزه ایله حضرت سعد بن ابی وقاص

واوغلی ( عاص بن منبه بن حجاج ) ی و برده ( ابوالعاص بن قیس سہمی ) ی  
حضرت علی قتل ایتدیلر .

بولردن بشقه حضرت علی ، رؤسای قریشدن حضرت طلحه نك عمی  
( عمرو بن عثمان بن عمر التیمی ) و حضرت خدیجة الکبرانك برادری ( نوفل  
بن خویلد ) ایله ( عبیده ابن سعید بن العاص بن امیه ) ی دخی قتل  
ایتدی .

بنی امیه نك رئیس اولان ابوسفیان ، معهود کاربان ایله صاووشوب کیتمش  
اولدیغندن بوملحه کبراده بولمندی . فقط اوغلی ( حنظله ) بولنوب اودخی  
بوصرده قتل اولندی .

قریشك مشهور رئیسارندن ( ابوالبختری بن هشام ) دخی بواشاده  
( مجذّر بن زیاد ) النده مقتول اولدی .

اهل اسلامك بیوك دشمنی اولان ابو جهلی اولدرمك موجب مباہات  
برکیفیت اوله جغندن هپ اصحاب کرام آنی راست کتورمك ایسترلردی .  
حتی ابو جهل ظنیه حضرت حمزه ، رؤسای مشرکیندن و بنی مخزومدن  
خالد بن الولیدك برادری اولان ( ابوقیس بن الولید ) ی و حضرت علی  
ینه بنی مخزومدن ( عبدالله بن المنذر ) ی قتل واعدام ایلدیلر .

ینه رؤسای قریشدن ( ام سلمه ) نك قرنداشی اولان ( مسعود بن  
امیه المخزومی ) دخی حضرت حمزه نك قلیجندن کچدی . ( ابوسلمه ) نك  
برادری اولان ( اسود بن عبد الاسد ) دخی بو صرده قتل واعدام  
اولندی .

ابو جهل ایسه یتمش یاشنده پك کوزلی وقورقونج یوزلی عنود و متمرد  
برملعون اولوب « انام ، بنی بوکون ایچون طوغور مشدر » دیو اظهار  
جسارت ایدر وهان عسکرینی جنکه سورر ایدی و کندی عشیرتی اولان  
بنی مخزوم یکیترلی آنك اطرافنی آلوب میخ چیقینی اولدقلردن یانسه  
واریلاما ز ایدی .

ایکی عسکر بربرینه قاووشاجنی اثناده عبدالرحمن بن عوف رضی الله



عنه حضرتلری ، صف حربده اولوب صاغنده وصولنده بنی نجاردن برر نوجوان بولنش ایدی .

بری عبدالرحمن بن عوفك یگندن چكوب كیزلوجه آ كا « عموجه ! سن ابوجهلی طانورمیسین؟ بكا کوسترسهك آ » دیمش وابن عوف « نه یابه جقسین؟ » دیدکده « الله ایله عهد ایتدم . ابوجهلی کوردیکم کبی اوزرینه حمله ایدوب یا آنی اولدیره جکم ، یاخود بو اوغورده اوله جکم ، دیو جواب ویرمش . ایکی نوجواندن دیکری دخی ، کذلک ابوجهلی صورمش وابن عوف « نه یابه جقسین؟ » دیدکده اودخی ، اوبرینک سویلیدیکی کبی سویلش .

عبدالرحمن بن عوف ، بویله بر قورقولی وقتده روز کارك گرم و سردینی کورمه مش ایکی چوجوق آره سنده قالدیم دیو دوشونورکن آنلرك بوجسورانه سوزلرندن تعجب ایلش .

ایکی نوجوان ایسه مکر ( عفرا ) خاتونك اوغللری ( معاذ ) و ( معوذ ) نام ایکی فدایی قرنداشلر ایش .

ایشته بوصرده ابوجهل ، بنی مخزوم یکیتلری ایله طوموز طوبی اولوب کاورلر ایکن ابن عوف آنلره « ایشته آرادینغکز » دیو ابوجهلی کوسترمش . همان ایکیسی بردن فیرلایوب وچفته شاهین کبی سوزولوب ابوجهلك اوزرینه هجوم و حمله ایتشلر .

حال بوکه : ینه انصاردن ( معاذ بن عمرو بن جموح ) نام برفدایی دخی ابوجهلی کوزده دیرمش . بواثناده فرصت دوشورمش و ابوجهلك آیاغنه بر قلیج اورمش . فقط ابوجهلك اوغلی ( عکرمه ) دخی قلیج ایله آنك قولنی یارالامش . بوصرده عفراک اوغللری معاذ ایله معوذ دخی یتیشوب ابوجهلك ایشنی تمام ایلشلر .

ابو جهل ، کندوسنی اشرف قبائل عرب اولان قریشك رئیس بیلور و اهل مدینه یی چفتجی دیو تحقیر ایده کلور ایکن آنلرك السده اولمك پك کوجنه کیدوب حتی بو کره معاذ حضرتلری ، کندوسنی قلیج ایله اوردقده « کاشکی بنی چفتجیلردن بشقه بر آدم اولدرسهیدی ! » دیمشیدی .

او ائناده رسول اکرم «عجبا ابوجهل نه یاپیور، کیم کیدوبده آندن بزه بر خبر کتوریر؟» دیدکده عبدالله بن مسعود رضی الله عنه حضرتلری، سکیرتدی و ابوجهلک یاننه کیتدی. کوردی که جان چکیشیور. همان باشی کسمک اوزره صقالندن طوتدی و آیاغله بونونه باصدی. ابوجهل، کوزلرینی آچدقده «یا اباجهل سنمیسین؟» دیدی.

ابوجهل ایسه، صوگ نفسه کلش اولدینی حالده بی پروا ابن مسعود «ای قویون چوبانی! پک صرپ یره چیقمشسین. بر بیوگ کیشی بی قوم وقیلهسی اولدورمک همان شیمدی اولمش برایش دکل آ. بو، اولاغان شیدر. فقط غلبه هانکی طرفده در؟» دیو صورتدی.

ابن مسعود دخی «نصرت و غلبه اهل اسلامه یوز کوستردی» دیو جواب ویردی و بو یوزدن دخی ابوجهلی حالت یأسه دوشوردی. ابوجهل، بویله هر جهتدن مایوس اولنجه «محمد سویله که: شیمدی به قدر آنک دشمنی ایدم. شمدی دشمنلکم بر قات دها آرتدی» دیدی. ابن مسعود دخی همان باشی کسیدی.

الحاصل ابوجهل، صوگ نفسده دخی ایمانه کلیوب کفر وضالانده اصرار ایتدی و هر یوزدن مایوس اولارق جاتی جهنمه ایصار لایوب کیتدی. لعنة الله علیه

ابن مسعود حضرتلرینک جتهسی نحیف و کوچوک و ابو جهلک باشی بیوگ اولدینی جهتله آنی یوکلنهوب کوتورمسی شایان تماشا بر کیفیت اولدینی حالده «ایشته اللهک دشمنی ابو جهلک باشی» دهرک حضور نبوی به کتوردی.

رسول اکرم دخی اللهک نصرتنه تشکر ایتدی «بو امتک فرعونی، ایشته بودر» دیو بیوردی.

بو ائناده عفرا خاتونک اوغلی (معوذ) نیچه ایشلر کوردکدن صوکره برادری (عوف) کی او دخی شهید اولدی. رضی الله عنهما. ابوجهلک، برادری اولان (عاص بن هشام) دخی بوصره ده قتل و اعدام

اولندی وقریشك مشهور رئیسارندن ( طُعیمَه ) اهل اسلامدن بر ایکی ذاتی شهید ایتدکن صکره او دخی ، حضرت حمزه نك قلیجندن کچدی .

ابوجهلك ، اعدامندن صکره قریش اردوسنده طایاناجق کیمسه قالمایوب علی العموم یوز چویردیالر .

آرتق فرار ایدنلر قورتولدی . فرار ایده میانلر دخی اسارتی جاننه منت بیلدی .

قریشك ، برنجی درجه ده کی رئیسارندن اولان ( امیه بن خلف ) که هم اختیار ، هم ده شیشمان ایدی . محاربه نك صوك دورینه قدر طایانندی . لیکن نهایت اوغلی ( علی ) ایله برابر کندوسنی عبدالرحمن بن عوف حضرتلرینه تسلیم ایتمکه مجبور اولدی .

ابن عوف ، دخی معارفه قدیمه یه منی آنلری صاغ براقق اوزره اسیر ایتمکه قرار ویروب بوکا دائر لاقیردی ایدرلر ایکن امیه بن خلف « کیمدر شوتیمورلره بورونوب صفلی یرتان بهادر ؟ » دیو صورمش .

ابن عوف ، دخی « عم رسول الله اولان حضرت حمزه بن عبدالمطلب » دیو جواب ویرمش .

امیه بن خلف « آه ! بزه بو ایشلری ایدن ویزلری بو حاله قویان هپ اودر » دیمش .

آنلر بوسوزده ایکن امیه ، بلال حبشی رضی الله عنه حضرتلرینك کوزینه ایلیشدی .

حال بوکه مکده ایکن امیه ، حضرت بلاله پك چوق اشکنجه لر ایتمش اولدیغندن بلال ، آنی کوردیکی کبی « یا انصار الله ! ایشته کفره وفجره نك رئیس امیه بن خلف . اوریکز ، اولدیریگز » دیمکه عفرا خاتونك اوغلی معاذ ایله انصاردن دیگر بعضیلری ، سکیردوب امیه بن خلفی اولدر دکلری اثناده عمار بن یاسر حضرتلری دخی آنك اوغلی علی بن امیه یی قتل ایتدی .

الحاصل قریش اردوسی، پك فنا حالده بوزولدی واهل اسلام بیوك مظفریته نائل اولدی.

میدان محاربهده دوشوب قالانلر ایله مجروح اولوبده بعده وفات ایدن شهدانك مجموعی (اوندرت) نفر اولوب آلتیسی مهاجریندن و آلتیسی خزرج قبیلهسندن وایکیسی اوس قبیلهسندن ایدی.

مشركلرك مقتوللری ایسه (یتیمش نفر) اولوب یكرمی دردی قریشك اشراف ورؤساسندن ایدی.

اسیر اولان مشركین دخی (یتیمش نفر) اولوب حضرت پیغمبرك عمنی (عبّاس بن عبدالمطلب) وعمزادهلری (عقیل ابن ابی طالب) و (نوفل بن عبدالمطلب) وحضرت زینبك زوجی (ابوالعاص بن الربیع) اشبواسیرلرك اشراقندن ایدیلر. برمدت صكره بونلر هپ اسلام ایله مشرف اولمشلردر. مصعب بن عمیرك برادری (ابوعزیز بن عمیر) دخی بو اسرانك اشراقندن اولدینی حالده یوم بدرده اسلام ایله مشرف اولمشدر.

(سهیل بن عمرو العامری) و (خالد بن هشام المخزومی) و (ابی ابن خلفك) اوغلی (عبدالله) وحضرت (سوده) نك برادری (عبد بن زمعه) و (ولید بن الولید) و (امیه بن خلفك) آزادلوسی اولان (نسطاس) دخی بو اسرانك اشراقندن ایدی.

رسول اکرم امر ایتدی. مقتول اولان رؤسای قریشك جسدلری یرقویواچنه آتیلدی. فقط (امیه بن خلف) زرهی ایچنده شیشمش اولدیغندن اولدینی یرده اوزرینه طاش و طوپراق آتیلارق اورتولدی. سائر افراد مقتولین دخی شوراده بوراده دفن ایدیلدی.

رسول اکرم، بومظفریتی مژده ایتمك اوزره (زید بن حارثه) رضی الله عنه حضرتلرینی مدینهیه کوندردی. اودخی واروب اهل مدینهیه مژده ویردی.

او ائناده ایسه رسول اکرمك کریمهسی (رقیه) رضی الله عنها حضرتلری وفات ایتمکله حضرت زیدك مدینهیه وصولنده هنوز دفن

ایدلش ایدو کندن مدینه ده بولنان اهل اسلام ، حزن وماتم ایچنده ایدی .  
بز ، ینه اردوی سعادتك وقوعاتنه کله لم .

اسیرلر قاجامق ایچون عمر بن الخطاب رضی الله عنه حضرتلری ، آنلری  
باغلامغه مأمور اولمغله جمله سنک اولوسی اولان عباسی پک صیقی باغلامش  
اولدیغندن کیجه ایکلردی .

رسول اکرم ایسه اوکیجه عمتک ایکیلدیسنی ایشیتمکه متأثر اولارق  
کوزینه اویقو کیرمدی .

انصار کرام حضراتی ، رسول اکرمک اصلا راحتسز اولماسنی التزام  
ایدر اولدقلرندن کیجه اویقوسز قالدیغنی ایشیتدکلری کبی بعضیلری کلوب  
عباسک باغلرینی چوزدیلر ومجاناً عفو واطلاقنی استدعا ایتدیلر .

حال بوکه : اسیرلر حقنده نه درلو معامله اولنمق لازم کله جککنه دائر هنوز  
وحی الهی وارد اولمادیغندن بونلر حقنده رأی ایله معامله اولنمق لازم  
کلوردی .

رأی ایله اولان ایشلرده ایسه اصحاب کرام ایله مشاوره ایتک فحر عالم  
حضرتلرینک سنت سنیه لری ایدی .

مجلس مشورتده هر کس رأینی سربست سویلردی . علی الخصوص  
عمر بن الخطاب رضی الله عنه حضرتلری ، وحی الهی به امتالده نه قدر سرعت  
وصلابت کویسترر ایسه رأی ایله اولاجق ایشلرده دخی اصلا خاطره وکوکله  
باقیوب بلاتردد رأی قطعی ویرر وسوزی کسیدیرر ایدی . اکثریا رأینده  
مصیب اولوب نیچه دفعه رأی صکره دن نازل اولان وحی الهی به موافق  
دوشمشدر .

بناءً علیه کندوسنه ( عمر الفاروق ) دینلمشدر که حق ایله باطلک آره سنی  
کالیه فرق وتمیز ایدیجی دیمکدر .

بوکره اسرا حقنده دخی نه یایمق لازم کله جککنه دائر حضرت پیغمبر ،  
اصحاب کرامیله استشاره بیوردی .

شویله که « جناب حق ، سزی آنلره غالب وظفریاب ایتدی . شیمدی آنلرک حقنده نه یایمق ایستریسکیز » دیو صورتدی .

حضرت عمر الفاروق ، « یارسول الله ! جمله سنک بوینوتنی اورددر » دیدی . سعد بن معاذ رضی الله عنه حضرتلری دخی بو رأیده بولتدی . رسول اکرمک رحم وشفقتی بوصورته مساعد اولمادیغندن اولکی سؤالی تکرار ایتدی .

حضرت عمر ، « یارسول الله ! آنلر رؤسای مشرکیندندر . جمله سنک بوینوتنی اورمالی » دیوب کندی رأینده اصرار ایلدی ایسه ده رسول اکرم ینه قبول بیورمدی .

آنک اوزرینه حضرت ابوبکر الصّدیق ، قالقوب اسرادن بدل آلتهرق عفو واطلاق بیورملرینی رأی وتنسیب ایلدی .

رسول اکرم دخی آنک رأینی قبول ایدوب اسرادن دردر بیک درهم بدل آلتهرق صالیورملرینی امر ایتدی .

فقط مدینه یه کیدرکن اثنای راهده ( عقبه بن ابی معیط ) ایله ( نضر بن حارث ) ی قتل ایتدیردی .

رسول اکرم ، بدرده اوچ کیجه قالدقندن صکره اردوی هایون ایله قالقوب مدینه یه عودت بیورمشیدی .

اسرا واموال غنائم دخی برابر ایدی وبنی نجّاردن ( عبدالله بن کعب ) اشبو اموال غنائم اوزرینه مأمور ایدی .

کاربان قریشی تجسسه مأمور اولان ( طلحه و سعید بن زید ) رضی الله عنهما حضرتلری دخی اطرافی جستجو ایدرک مدینه یه عودتلرنده رسول اکرمک جانب بدره تشریفنی خبر آلملر ایله آنلر دخی او طرفه سکیکرتمشلر وبو کرّه رسول اکرم دونوبده مدینه یه کلورکن اثنای راهده بولوشوب غزاسنی تبریک ایتمشلردر .

( صفرا ) بوغازندن چیقیلدقده رسول اکرم ، اموال غنائمی مساوات



اوزره اصحاب كرامه تقسيم ايتدى و اسرايى كىروده براقوب مدينه يه كيتدى .

رسول اكرم مدينه دن چىقماسيله بوكره مدينه يه وصول بولماسى ييننده اون طقوز كون مرور ايتمىدر .

بر كون صكره اسرا دخی مدينه يه كتورلدى و رسول اكرم ، آنلرى اصحاب كرامنه طاغيتدى « آنلره كوزلجه باقىگز » ديو تنيه ايتدى .

بو جهتله هر كس ، كندى خانه سنده كى اسيره كوزلجه باقار و مأ كولات و مشروباتنه اهتمام ايدرايدى .

رسول اكرم عمى عباس بن عبدالمطلب ، خلیجه زنکین بر ذات ایدی . مکهدن چيقارکن ( ام الفضل ) ه ، يعنى زوجه سنه کليتلو آلتون و يروب « بن محاربه يه کيديورم . شايدکه بکا بر حال اولور ايسه بو آلتونلر سنکله اولادمکدر » ديمش . فقط بوكا ايکيسندن باشقه کيمسه واقف دکل ايمش .

بوندن باشقه عباس ، عسکره صرف ايتمک اوزره ياننه دخی خلیجه آلتون آلمش ، لکن وقت حربده الندن آلمش .

رسول اكرم ايسه ، بوكره آکا ، كرك كندوسى ايچون و كرك برادر زاده لرى اولان ( عقيل ) و ( نوفل ) ايچون بدل و يرمىسنى امر ايتدکده محاربه ده الندن آلمش اولان آلتونلرک بو بدلره محسوب ايدلمسنى طلب ورجا ايتدى .

رسول اكرم دخی « بزم عليهمزه صرف ايتمک اوزره طاشيديغك آلتونى سکا براقاماز » ديهرك آنك بو رجاسنى قبول ايتدى .

عباس « يا ، بنى آووج آچديروبده ديلنديره جكميسين ؟ » ديدى .  
آنك اوزرينه رسول اكرم « هانى ، ام الفضله براقديغك آلتونلر ؟ » ديو بيوردى .

حال بوكه : عباس ، او آلتونلرى زوجه سنه و يريركن ياننده کيمسه يوق ايمش .

بناءً علیه « سکا بونی کیم خبر ویردی ؟ » دیو صورمش .  
 رسول اکرم « ربم خبر ویردی » دیو بیورمش .  
 عباس دخی « بن شهادت ایدرم که سن صادق سین » دیمش و کلمه شهادت  
 کتورمش .

لیکن بدلی عفو ایتدیره میوب سائر اسیرلر کی بدل معینی تدارك واعطا  
 ایدرك مکيه عودت ایلدی .  
 مکهدن بدل معینی جلب واعطا ایدن سائر رؤسا دخی پیدرپی عودته  
 باشلادی .

بدل ویرمکه اقتداری اولمایوبده النده یازیسی اولان اسرا دخی انصاردن  
 اوزر چوجغه یازی اوکره تمک وبعده بلا مانع مکيه کیتمک اوزره مدینه ده  
 آلیقونیلدی .

مکه اهالیسنده اوقور یازار چوق اولوب مدینه اهالیسی ایسه صنعت  
 کتابتدن بی نصیب ایکن بو وسیله ایله مدینه ده دخی اوقور یازار کیمسه لر  
 چوغالدی .

بو صروده رسول اکرمک کریمه سی ( زینب ) رضی الله عنها حضرتلری  
 دخی زوجی ( ابوالعاص ابن الربیع ) ک بدلی اولق اوزره بوینونده کی  
 کردنلکی چیقاروب مدینه یه کوندردی .

بوکردنلکی ایسه ابوالعاصه تزویج اولندینی وقت ، بوینونه والده سی  
 سیده النساء ( خدیجه الکبری ) رضی الله عنها حضرتلری طاقش ایدی .  
 حضرت خدیجه نک بیوک کریمه سنه بر کزاری اولان کردنلکک دلال  
 النده کزر صاتیلق مال کی بدل اسارت اولارق میدانه چیقمیسی اصحاب  
 کرامه تاثیر ایتدی .

رسول اکرمه دخی آنی کورنجه فوق العاده رقت کلدی . « رأی  
 وتنسیب ایدرسه گز ( زینب ) ک اسیرینی صالیویریکز ، بدلنی دخی کیرو  
 چویریکز » دیو بیوردی . اصحاب کرام دخی ( ابوالعاص ) ی صالیویردی لر  
 وکردنلکی کیرو چویردی لر .

بوصورتله ابوالعاص ، بلا بدل اسارتدن قورتولوب مکه کیتمش فقط کفر و شرک اوزره مصر اولدیغندن مؤخرآ زینب رضی الله عنها حضرتلری، آندن آریلوب مدینه هجرت ایتمش در .

اسراند ( ابو عزة الجمعی ) نام شاعر مشهورکه شعرندن باشقه سرمایه سی یوق ایدی . فیما بعد اهل اسلام علیهنده بولنماق شرطیله بلا بدل صالیویریلدی .

ینه اسراند ( مطلب بن حنطب ) ایله ( صفی بن رفاعه ) دخی بویله مجانا آزاد بیورلدی .

رمضان شریفک اواخرنده صدقه فطره و یرمک واجب اولدی وعید فطرده بیرام نمازی قیلندی . زکات و یرمک دخی بوسنه فرض اولدی . بوجه بالا بدرده منهزم اولان قریش طائفه سنک یتمش نفری مقتول و یتمش نفری اسیر اولوب بقیه السیوفی تارمار اولارق دوشه ، قالقه مکه کیتمش لر ایدی . ابوسفیان ابن حارث بن عبدالمطلب دخی آنلرله برابر مکه واردی و ابولهب ایله کورشد کده عباسک زوجه سی ( ام الفضل ) و کوله سی اولوب اسلامی کیزلو طوتان ( ابورافع ) دخی حاضر بالمجلس اولدقلری خالد ابولهب ، ابوسفیان ابن حارثدن بدر وقعه سی صورتی .

اودخی « والله هیچ برشی دکل . الا بز ، محمدیلره ملاقی اولدیغمزده آرقه لر مزی آنلره تسلیم ایتدک . دیله دکارینی قتل و دیله دکارینی اسیر ایتدیلر . لکن ناسی لوم و تعیب دخی ایلم . زیرا ابلق آنلره بینمش برآلای سواری وار ایدی . آنلره مقاومت ممکن دکل ایدی » دیو جواب ویردی .

ابورافع دخی « او کوردیککز سواری ، ملائکه ایدی » دینجه ابولهب ، غضبه کلوب آکا برسله اوردی .

ام الفضل ایسه غیرته کلوب « بیچاره کوله یی ، افندیسی بوراده یوق دیو دو کو یورسین » دیرک برچادر دیره کی ایله ابولهبک باشی یاردی . آنک اوزرینه ابولهب ، غم و کدرندن آغز خسته اولدی و برهفته صکره جانی جهنمه اصهارلیوب دار مجازاته کیتدی .

ساتر قریش دخی مکده بر آی قدر بدرده مقتول اولان رؤسای  
یاد ایله ماتم ایتدی .

رسول اکرم ایسه بدردن منصور ومظفر اوله رق عودت ایتدکه  
دین اسلام پک زیاده قوت بولدی وهپ دشمنلرک کوزلری ییلدی .  
مدینه ده کی یهودیلر «توراتده مذکور اولان نبی آخرالزمان بودر ،  
دیمکه باشلادی وهنوز ایمان ایتینلردن بعضیلری ایمان ایلدی ، بعضیلری  
دخی ظاهر آ اسلامه کلدی . ایشته بوجهتله اهل اسلام ایچنده برخیلی منافق  
پیدا اولدی .

هجرت نبویه دن صکره یهود طائفه سی ، رسول اکرم ایله جنک ایتمه مک  
و آنک دشمنلرینی جنکه تشویق وتحریک ایتمه مک اوزره معاهده ایتمشلر  
ایدی .

مدینه دیارنده کی یهودیلر ، اگرچه باشلوجه ( قَرِیْضَه ) و ( نَضِیْر ) نام  
ایکی قبیله یه منقسم ایدی . آنجق بونلردن باشقه یهوددن ( بنی قَیْنَقَاع ) دینلور  
برقبیله وار ایدی که مدینه نك ( عالیه ) دینلان ناحیه سی جوارنده ( جسر  
بطحان ) نام محله ساکن اولوب قلعه لری متین و کندولری جسارت ایله  
معروف ایدی وخزرج قبیله سی آنلرک معاهد وحامیسی ایدی .

اهل اسلامدن برینی قتل ایله نقض عهدایش اولدقلردن رسول اکرم  
هجرتک اشبو ایکنجی سنه سی شواننک اواسطنده انصاردن واوس قبیله سی  
اشرافندن ( ابولبابه ابن عبدالمندر ) رضی الله عنه حضرتلرینی مدینه ده قائم مقام  
براغوب ولواء شریفی عمتی حمزه رضی الله عنه حضرتلرینک الله ویروب  
غزات اسلام ایله مدینه دن چیقدی وکیدوب اون بش کون قدرینی قینقاعی  
محاصره ایتدی .

نهایت غرّه ذی القعده ده تسلیمه مجبور اولدیلر . اشراف خزرجدن  
رئیس المناقین اولان ( عبدالله بن ابی ابن سلول ) دخی آنلرک قتلدن عفوینی  
استرحام وبوخصوصده زیاده اصرار و ابرام ایتکله رسول اکرم ، آنلری

قتل و اعدامدن صرف نظرايدرك شام طرفه نفی و طرد ايتدی و قلعه لرنده بولنان اسلحه و اموال ساثره نك خمسی بیت الماله آلوب باقیسنی غزات مسلمین بینده تقسیم ایلدی .

ابوسفیان بن حرب بن امیه ، معهود کاربان ایله مکيه واروب آرقه سندن بدرده منہزم اولان عسکر دخی بوزوق دوزن مکيه واصل اولدقلرنده قریشك برنجی درجه ده کی رئیسری ، کیمی تلف و کیمی اسیر اولدیغندن ابوسفیان ، بالطبع قریشك رئیس مقامنده بولنه رق اهل اسلام اوزرینه برسفر ایتدکجه قاریلرک یاننه وارماق و عطریات سورونمه مک اوزره یمین ایتشدی . بناءً علیه ایکوز آتلاویه مکهدن چیقوب جوار مدینه یه کلدکده ایلرویه براز آتلو کونده رمش . آنلر دخی مدینه یه برسات قدر مسافه سی اولان برحله کلوب اهل اسلامدن برذاتی شهید ایتشلر .

رسول اکرم ، آنی ایشیتدیکی کبی سکسان سواری و یوزیکرمی پیاده ایله مدینه دن چیقوب او طرفه عزیمت ایتدیلر .

قریش طائفه سی ایسه هنوز ( بدر ) بوزغونانی آجیسنی اونوتماش اولدقلرندن همان فراره یوز طوتدیلر و خفیفله مک ایچون یانلرنده کی زاد و ذخیره چواللرینی آتارق کمال سرعت ایله قاچوب کیر و کیتدیلر .

بوجهتله اهل اسلام ، قریشه یتشه مدیلر . فقط آرقه لرندن بوچواللری طوبلایوب زحمتسزجه خیلی زاد و ذخیره نائل اولدیلر .

بوسفرده رسول اکرم ، بش کیجه خارج مدینه ده قالمش و ذی الحجه نك طقوزنجی کونی مدینه یه واصل اولمش ایدی .

فرداسی ، بایرام نمازی قیلدی و قربان کسدی ، اصحاب کرامه دخی قربان کسملری ایچون امر ایتدی .

ینه بوذی الحجه آینده رسول اکرم کرمه محترمه سی ( فاطمة الزهرا ) رضی الله عنها حضرتلرینی ، عمزاده سی ( علی ابن ابی طالب ) رضی الله عنه حضرتلرینه تزویج بیوردی .



اووقت حضرت فاطمه، اون بش یاشنده وحضرت علی، یکریمی بر یاشنده ایدی.

کبار اصحاب کرامدن (عثمان بن مظعون) رضی الله عنه حضرتلری، بوسنه دار بقایه رحلت ایتمشدر.

ینه بوسنه رؤسای قریشدن (أمیة ابن الصلت) دخی دنیادن کوچوب کیتمشدر.

اشبو امیة، کتب سماوییهی مطالعه ایله بعثت نبویهیه مطلع اولمش، فقط کندوسی نبی آخر الزمان اولق املنه دوشمش ایکن محمد مصطفی صلی الله علیه وسلم حضرتلری ظهور ایتمکه حسدنن ناشی کفر وضالته اصرار ایلردی. (بدر) وقعه سننده شامده بولنوب بعده مکهیه کیدر ایکن بدر قریه سنه اوغرا دقده کندوسنه (بدر) وقعه سننده مقتول اولان رؤسای قریشک آتیلمش اولدقلری معهود قویو کوسترلمش و دایی زاده لری اولان (عتبه بن ربیع) ایله (شبه بن ربیع) نک اوراده اولدقلری خبر ویریلش اولدیغندن او قویو باشنه واروب آنلرک مرثیه سی اوله رق بر اوزون قصیده سویلش و متعاقباً کندوسی دخی عزم جهنم ایلشدر.

بعده هجرت نبویه نک اوچنجی سنه سی اولدی و بوسنه نک ربیع الاولنده یهود طائفه سندن و (نضیر) قبیله سی رؤسا سندن (کعب ابن اشرف) ک اعدای وقوع بولدی.

شویله که: کعب ابن اشرف، شاعر اولوب رسول اکرمی هجو ایدردی. بو ائساده مکهیه کیدوب کلش و مکهده ایکن بدر وقعه سنه دائر مرثیه لر سویله رک قریشی اهل اسلام علیه خلیجه تحریک ایتش ایدی.

انصاردن و اوس قبیله سندن (محمد بن مسلمة)، کندی قبیله سی دلاورلرندن درت نفر رفیق له واروب کعبک باشی کسدیلر و سائر عبرت کوستردیلر. یهودیلر، صبا حلین حضور نبوییه کلوب بوندن طولانی شکایت ایتدیلر.



رسول اکرم دخی کجک نه درلو ساعی بالفساد اولدیغنی بیان ایتمکله یهودیلر برشی دیه میوب کیتدیلر .

بدر وقعه سندن صکره قریش ایچون اوتهدنبرو کیدوب گلکده اولدقلری شام یولی مخاطره لو اولدیغندن عراق یولیه طولاشه رق شامه کیدوب گلکله باشلا دیلر .

بو ائنده عراق یولیه بر قریش کاربانی حرکت ایدوب ( صفوان بن امیه ) ایله ( خُوَیْطُ بن عبد العزی ) دخی برابر ایدی .

رسول اکرم، آندن خبردار اولدقده یوزسواری ایله ( زید بن حارثه ) رضی الله عنه حضرت لرینی کوندردی .

نجدده ( قَرَدَه ) نام صوباشنه واردیلر و اوکاربانی اوردیلر . موجود اولان اموالی آلوب مدینه یه کتوردیلر و بیت المال ایچون خمسینی چیقاردیلر که بو خمسک قیمتی یکرمی بیک درهمه بالغ اولدی .

یوقاروده بیان اولندیغنی اوزره بدر وقعه سی ائناسنده رسول اکرمک کریمه سی و عثمان بن عفّان رضی الله عنه حضرت لرینک زوجه سی رقیّه رضی الله عنها حضرت لرلی وفات ایتمشیدی . بعده عمر الفاروق رضی الله عنه حضرت لرینک دامادی ( حُنَیْس ابن خُذَافَة السهمی ) وفات ایتکله کریمه سی ( حفصه ) رضی الله عنها حضرت لرلی طول قالدی .

بناء علیه حضرت عمر الفاروق ، کریمه سی ( حفصه ) یی حضرت عثمانه ویرمک ایستیب حضرت عثمان دخی بونیتده بولنمشیکن صکره دن واز کچمکله حضرت عمر الفاروق، مغیرا خاطر اولدی .

رسول اکرم ایسه بو ائنده حضرت حفصه یی تزوج ایله حضرت عمری کندولرینک قاین پدرلکی شرفیله دلشادیوردی و کندی کریمه سی ( امّ کاثوم ) رضی الله عنها حضرت لرینی عثمان بن عفّانه ویردی . بناء علیه آکا ( عثمان ذی النورین ) دینلدی .



## غزوة اُحُد

یوقاروده بیان اولندیفی اوزره بدر وقعهسی اثناسنده ابو سفیان بن حرب وعمر و بن عاص، ساحل یولیه صاووشوب بدر وقعهسینه سبب اولان معهود کاربانی مکیه اولاشدرمشلر ایدی .

بو کاربانده بیک دهوه یوکی مال اولوب سرماییهسی اللی بیک آلتون ایدی . بونده اشراف قریشدن پک چوق کیمسه لک حصهسی اولوب حال بوکه آنلرک اکثری بدر جنسکنده ایدیلر .

بناء علیه کاربانک مکیه وصولنده اموال موجودهسی، ( دارالندوه ) یه وضع وتوقیف اولندی .

بدرده قریش اردوسی قنا حالدہ پریشان و پراکنده اوله رق مکیه واردقده ( صفوان ابن امیه ) و ( عکرمه ابن ابی جهل ) و ( عبدالله ابن ربیعہ ) کبی پدرلری یاخود برادرلری تلف اولانلر ، ابو سفیانک یانسه طوپلانیدیلر و محمد ، بزم بیوکلرمزی اولدردی . بزلی بیکس براقدی . شو کاربانک کار و تمتعی ایله بزه اعانه ایدیکزکه آندن انتقام آلام « دیدیلر .

ابو سفیان ، درحال موافقت ایدوب سائر سرماییه صاحبلرینی دخی اقناع ایتدیلر و کاربانده کی اموالی صائدیلر .

قریش طائفهسی ، شام تجارتندن بره بر کار ایدرلردی . بو کره دخی ماللری صائدیلر ، سرماییهسی اولان اللی بیک آلتونی صاحبلرینه ویردیلر . اللی بیک آلتون قدر کار قالدی .

ایشته بو کاردن یکر می بش بیک آلتون آیزوب آنکله عرباندن  
عسکر طوپلامق اوزره قرار ویریلدی .

فقط بدرده مقتول اولان اشراف قریشی یاد ایلدیرک و آنلر ایچون  
مرثیه لر سویلیه رک ناسی جنکه تشویق و تحریک ایتمک اوزره بر قاج  
ناطقه لی ذاتک بو ایشه همت ایلرلی ایجاب حالدن کورلدی .

ایشته بونک ایچون ( عمرو ابن عاص ) و ( هبیره ابن ابی وهب )  
و ( ابن الربی ) و ( ابو عزة الجمحی ) انتخاب اولنهرق قبائل ایچنه  
کوندرلدی .

ا کرچه ابو عزة ، بدر وقعه سنده اسیر اولوب فیابعد اهل اسلام  
علینه بولنامق شرطیه مجاناً عفو و اطلاق اولنش ایدوکندن بومأموریتی  
قبولده تردد ایلش ایسه ده تیغ زبانیه قومنه امداد ایلسی ایچون ( صفوان  
ابن امیه ) پک زیاده ابرام ایتمکه آنک ابرامنه طیانهمیوب اهل اسلام  
علینه خلقی تحریک ایتک وبو یولده اشعار سویلک ایله مشغول اولدی .

بو وجهله قریش طائفه سی ( بنی مُصْطَلِق ) و ( بنی هون ابن خزیمه )  
و بنی ( حارث ابن عبد منات ) قبیله لرندن ایکی بیک قدر عسکر طوپلادیلر  
واوچ بیک نفردن مرکب بر اردو ایله مکدن چیقیدیلرکه یدی یوزی  
زرهلی و ایکیوزی آتلو ایدی و اوچ بیک ده وه لری وار ایدی .

بو اردونک رئیس و امیری ( ابوسفیان ) اولوب زوجه سی ( هند )  
دخی برابر ایدی که بدرده مقتول اولان پدری ( عتبه ) ایله عموجه سی  
( شیه ) نک و برادری ( ولید ) ک انتقامی آلمق ایچون عسکری تشویق  
و تحریک ایلرلی .

( عکرمة ابن ابی جهل ) ک زوجه سی ( حارث ابن هشام ) ک قیزی  
اولان ( ام حکیم ) و حارث ابن هشامک زوجه سی و ( ولید بن مغیره ) نک  
قیزی ( فاطمه ) و صفوان ابن امیه نک زوجه سی و ( مسعود ثقفی ) نک  
قیزی ( برزه ) و عمرو ابن عاصک زوجه سی و ( منبه سهمی ) نک قیزی

( ریطه ) قوجه لرله برلکده اولدقلری کبی ( مصعب ابن عمیر ) ک برادری اولان ( ابو عزیز ابن عمیر ) ک والده سی ( خنّاس ) دخی اوغلی ابو عزیز ایله برابر ایدی .

بونلردن بشقه دیگر قاریلر دخی وار ایدی . مجموعی اون بش خاتون اولدقلری حالده دف چالارلر و عسکری غیرته کتوره جک اشعار او قورلر ایدی .

عبّاس ابن عبدالمطلب ، بدر وقعه سنده فلا کته اوغرا دیغندن بحثله اعتذار ایدرک کیری قالدقدن بشقه قریشک بو حال و حرکتیه دائر بر مکتوب یازدی و اوچ کونده مدینه یه اولاشدرمق اوزره ( بنی غفار ) دن اجرته بر ساعی طوتوب کوندردی .

ساعی کلوب رسول اکرمی ( قبا ) قریه سنده بوله رق مکتوبی ویردی . رسول اکرم او مکتوبی ( ابی ابن کعب ) رضی الله عنه حضرتلرینه او قوتدی و مکتوم طوتلسنی تنیه ایتدی .

بعده قبا قریه سی اشراقندن و کبار انصاردن ( سعد ابن الربیع ) رضی الله عنه حضرتلرینک خانه سنه کیتدی و محرمانه اوله رق آنکله بو کیفیتی مذا کره ایتدی .

بعده مدینه منوره نی تشریف بیوردی و قریش اردوسنک احوالی تجسس و تحقیق ایچون ( حباب ابن المنذر ) رضی الله عنه حضرتلرینی کوندردی .

او دخی چیقوب مدینه یه بر قوناق مسافه سی اولان ( عریض ) نام محله قریش اردوسنی کوردی و احوالی تحقیق ایدرک مدینه یه کسوب کیفیتی رسول اکرمه خبر ویردی .

حباب ابن المنذر رضی الله عنه حضرتلرینک تحقیقاتی ، عبّاس ابن عبدالمطلبک تحریراته تمامیه موافق کلدی .

هجرت محمدیه نک اوچنجی سنه سی شوالنک اوائلنده که یوم چهارشنبه ایدی . قریش اردوسی ، مدینه منوره حذاسنه کلدی و ( جبل احد )

يافته واقع ( عَيْنِيَن ) نام جبل يافته قوندى. پنجشنبه و جمعه كوناى اوراده قالدی .

جمعه كيجهسى رسول اكرم ، رؤياسنده كورمش كه بر طاقم صيغيرلر بوغازلانيور ، ( ذوالفقار ) نام قليچك اوجى قيريلوب برگديك پيدا اولمش و آرقه لرينه بر محكم زره كيوب مبارك النى او زرهك ياقه سنه صوقش. فرداسى رسول اكرم ، بو رؤيائى اصحاب كرامنه سويلدى و « بوغازلانان صيغيرلر، اصحابدن قتل اولنه جق ذواته و قليچك اوچنده كي گديك ، اهل بيتدن برينك قتل اولمسه اشارتدر و محكم زره مدينه ديمكدر » ديو تعبير ايلدى .

« شو حاله نظرآ مدينه ايچنده طوريكز ، دشمن ايچرو هجوم ايدرسه تدافعى و تحفظى چك ايديكز » ديو بيوردى. اصحاب كرامدن بعضيلرى دخى بو صورتى مناسب كوردى .

رئيس المنساقين اولان ( عبدالله ابن ابى ابن سلول ) دخى بو رآيده بولندى و « يارسول الله ! زمان جاهليتده دشمن ظهورنده بز، نه وقت طيشارو چيقارسه ق مغلوب اولوردق ونه وقت مدينه ده قيانوب ده مدافعه ايدرايسه ك غالب كلوردك » ديدى .

فى الواقع ايله تدافعى حركت ، موافق حال و مصلحت ايدى . زيرا مدينه نك هر طرفى ، بنالر و ديوارلر ايله چوريلش و كچيد يرلرى ، استحكاملر ايله سد ايدلمش ايدوكندن بر قلعه حكمنده و رسول اكرمك رؤياسنده كوردى كى بر زره قوى مثابه سنده ايدى .

بناءً عليه بر مدتجك مدينه منوره ده صبر و ثبات اولمسه قریش طائفهسى، اردوگاهلرندۀ طوروب اهل اسلامك خروجنه منتظر اولدقلىرى تقديرده عريانۀ فتور كلهرك بر خيليسى صاووشوب كيدردى و مدينه اوزرينه هجوم ايتدكارى تقديرده ايچرودن اوق آتيله رق بر چوغى تلف ايديله بيلوردى . ايكي صورتده دخى قریش اردوسنه ضعف كلوب او حالده ايجابنه كوره طيشارو اوغرايله رق اوزرلرينه هجوم ايله محاربه يى قازانمق قولاي اولوردى .



فقط بدر غزاسنده بولنيان يکيتلر، اوراده بولتان غازيلرک نائل اولديني اجر و مثوباتي و شهداي بدرک واصل اولديني درجاتي رسول اکرمدين ايشيتمکله اوغزاده بولمقدقلرينه آشوري مرتبه متأسف اولملييله «يارسول الله! بز، اللهمدن بوکوني ايستردک. بزلي طيشارو چيقار. دشمنلريز ايله کوکس کوکسه جنک ايدلم» ديديلر .

اصحاب کرامدين بعضيلري «اکر طيشارو چيقمازسهق دشمن، بزم ضعفمزه و قورققلغمزه حمل ايدرهک شمارير» ديو چيقوبده ميدان جنکی ايتک صورتی ترجيح ايتديلر .

حضرت حمزه ابن عبدالمطلب ايسه غايت شجيع و بهادر برذات اوله رق مدينهده قيانوب طورمغه حوصلهسی متحمل اولامديني جهتله همان چيقوبده دشمن اوزرينه هجوم ايتک ايستردی .

آنک اوزرينه رسول اکرم دخي چارهسز طيشارو چيقوبده ميدان جنکی ايتک اوزره قرار ویردی و «صبر و ثبات ايدرهکيز بوکره دخي جناب حق، سزه نصرت احسان ايدر» ديو بيوردی .

جمعه خطبه بنده فضائل جهادی بيان ايتدی و ايکيندی نمازینی جماعت ايله ادا ايتدکن صکره شيخين، يعنی ابو بکر الصديق و عمر الفاروق رضی الله عنهما حضرتلريله برابر حجره مطهره سنه کيتدی .  
ايکيسی برلکده رسول اکرمک عمامه سنی دوزه لتديلر والبسه سفریه سنی الباس ايتديلر .

رسول اکرم، بربری اوزرينه ايکی زره کیدی و قليجی قوشانوب ينه آتلا ايله برابر حجره مطهره سندن طيشارو چيقدی .

سار اصحاب کرام، هپ حاضر اولوب و (عوالی) قريهلری اهاليسی کلوب کافه رسول اکرمک چيقمسنه منتظر ايديلر .

حال بوکه: عسکرلکک اک مهم وظيفهسی، حرکات حربيهده سرعسکر کيم اولورسه اولسون نماميله آنک امرينه اطاعت ايدرهک رأي و تدبيرينه اصلا قاريشماقدر . شو حاله نظراً فخر عالم حضرتلری، تحفظی جنکی



تسبب ايتميشكن بعض ناسك آنى طيشارو چيقمغه مجبور ايتملرى، بريوك  
خطا ايدى .

بناءً عليه اوس قبيله سنك رئيسى و انصار كرامك الك اولوسى اولان  
( سعد ابن معاذ ) ايله ( اسيد ابن حضير ) « سز ، رسول اللهى ايتميه رك  
چيقمغه مجبور ايتديكز . ايشى آكا براقاليديكز . آكا وحى كلور وايشك  
اقتضاسنى او ، سزدن اعلا بيلور ، ديو آنلره توييخ ايلديلر .

آنلر دخى ايتدكلرينه نادم اولديلر و بوكره رسول اكرم ، حجره  
مطهره سندن چيقدوده « يار رسول الله ! بز سنك امريكه مخالفت ايتميه ز .  
ديلديككى ايشله » ديديلر .

رسول اكرم ايسه آنلرك ابرامى اوزرينه سلاحلارنوب آتته بنك  
اوزره اولديغدن « بريغميره كوره سلاحلاندقن صكره جنك ايتمهدن  
دونمك دخى ياقيشماز » ديو بيورديلر و همان آتته بنوب اردوى سعادت  
ايله خارج مدينه يه چيقديلر . ( ابن ام مكتوم ) ي مدينه ده قائم مقام  
براقديلر .

( سعد ابن معاذ ) ايله ( سعد ابن عباد ) رضى الله عنهما ، زرهلو  
اولدقلرى حالد رسول اكرمك اوكنده يوررلردى .

احد طاغنه طوغرى عزيمت ايلديلر . مدينه ايله احد آره سنده كى  
مسافه ، بر ساعتدن آذرر . آنجق او كون اورايه قدر وارميوب يارى  
يولده ( شيخين ) دنيلن موقعده كيجهلديلر .

( اسامه ابن زيد ) و ( عبدالله ابن عمر ) و ( زيد ابن ثابت ) و ( ابو  
سعيد الخدرى ) كى كوچوك چوجقلرى ، بورادن رسول اكرم كيرو  
چويردى .

او كيجه ( محمد ابن مسلمة الانصارى ) رضى الله عنه حضرتلرى ،  
اللى نفر عساكر اسلاميه ايله اردوى سعادتك اطرافنى طولاشمق اوزره  
قره غوله چيقدى .

مشرکین طرفندن دخی ( عکرمه ابن ابی جهل ) برفرقه ایله قره غوله  
حقیقوب طولاشمقده ایدی .

( ذکوان ابن عبدالقیس ) رضی الله عنه حضرتلری دخی کیجه اردو  
 ایچنده طولاشوب رسول اکرمک چادرینی محافظه ایتمکده ایدی .  
 سحر وقتی رسول اکرم، اردوی سعادت ایله اوموقعدن قالقوب احد  
 طاغنه طوغری حرکت بیوردی . یاننده کی عسکرک مجموعی بیک نفر  
 مقداری ایدی .

لکن رئیس المنافقین اولان ( عبدالله ابن ابی ابن سلول ) کندینه  
 تابع اولان اوچیوز قدر منافقین ایله کیرو دوندی .

آنلرک دونوب کیتیمی ، خزرج قبیله سندن ( بنی حارثه ) طائفه سنی  
 و اوس قبیله سندن ( بنی سلمه ) طائفه سنی ترده دوشوردی .

بو ایسه مجرد وسوسه شیطانیه ایدی . جناب حقک هدیاتی ایرشدی .  
 او ایکی طائفه ، منافقینه اویمایوب اردوی سعادت ایله احد طاغی اتکینه  
 واردیلر .

اردوی هایونک مجموعی، یدی یوز نفردن عبارت قالدی ، آنلرک دخی  
 یالکز یوز نفری زرهلی ایدی .

یالکز رسول اکرم ایله ( ابو برده ) رضی الله عنه حضرتلرینک برر  
 آتی اولوب سائر عساکر اسلامیه هپ پیاده ایدی .

اهل اسلام اردوسی، احد طاغنه آرقه ویردی و مدینه یه قارشو صاف  
 اولوب طوردی .

مشرک لردخی اهل اسلامک قارشو سنده کی چوراق یرده صف اولدیلر .  
 قریش سنجاغی ، اوته دنبرو ( عبدالدار بن قصی ) اوغوللرنده اولدینی کبی  
 بو کره دخی ( عبدالدار ) اوغوللرندن ( طلحه ابن ابی طلحه ) قریش  
 اردوسنک سنجاقدار ی ایدی .

بناءً علیه رسول اکرم دخی مهاجرین سنجاغنی ینه عبدالدار  
 اوغوللرندن ( مصعب ابن عمیر ) رضی الله عنه حضرتلرینه ویردی .

اوس قبيله سنك سنجاني ايسه ( اسيد ابن حضير ) رضی اللہ عنہ  
حضرتلرينك النده و خزرچ قبيله سنك سنجاني ( حباب ابن المنذر )  
رضی اللہ عنہ حضرتلرينك النده ایدی .

قریش اردوسنك امیری ( ابو سفیان ) اولوب كانكشترلينك سرداری  
( عبدالله ابن ربیعہ ) و صاغ قول قوماندانی ( خالد بن الوليد ) وصول  
قول قوماندانی ( عكرمه ابن ابی جهل ) ایدی . ( صفوان ابن امیہ ) ايله  
( عمرو ابن عاص ) دخی برر فرقه قوماندانی ایدیلر .

رسول اکرم دخی اردوی هایونك وسطنده اولوب ( ابو عبیده ابن  
الجراح ) ايله ( سعد ابن ابی وقاص ) پیشدار و ( مقداد ابن عمرو )  
دمدار و ( عكاشه ابن محصن اسدی ) صاغ قوله و ( ابو مسلمہ ابن  
عبدالاسد ) صول قوله مأمور ایدیلر رضی اللہ عنہم .

اردی هایونك صول طرفنده کی ( عینین ) نام طاغده بر وادی اولوب  
اورادن دشمن سوارسیسی هجوم ایتك ملحوظ اولدیغندن رسول اکرم  
( عبدالله ابن جبیر ) رضی اللہ عنہ حضرتلرینی الی نفر كانكش ايله سواری  
هجومنی منع ایچون اول وادینك آغزینه مأمور بیوردی و « دشمن كرك  
غالب كلسون و كرك مغلوب اولسون ، بندن خبر كلدكجه سز بورادن  
آرلییكز » دیو امر قطعی ویردی .

بعده رسول اکرم ، انه برقلیج آلدی که اوزرنده عربجه ( قورقافلده  
عار وایلروکیتمکده شرف و عزت وار . حال بوکه کیشی قورقافلوق ايله قدردن  
قورتولاماز ) دیو یازلمشیدی « حقنی ایفا ایتك شرطيله بوقلیجی کیم آلور؟ »  
دیدی .

اصحاب کرامدن بعضیلری « بز آلورز » دیدیلر ايسه ده رسول اکرم ،  
التفات ایتیب ینه اولکی سوزینی تکرار ایتدی .

نهایت بهادران انصاردن ( ابو دُجانه ) رضی اللہ عنہ حضرتلری  
« یارسول الله ! بو قلیجك حتی ندر ؟ » دیو صورتی .

رسول اکرم دخی «آنک حق، ا کیلوب بو کیلنجیه دک دشمنک یوزینه اورمقدر» دیو بیوردی.

ابودجانه رضی الله عنه «اوشرط ایله بن آلورم» ده نیجه رسول اکرم، او قلیجی آکا ویردی.

فی الاصل ابودجانه رضی الله عنه، میدان حربده بی پروا سکیردوب طولاشان بهادرلردن اولدینی حالدہ بویله بر التفات مخصوصه مظهر اولنجیه هان قلیجی چکوب ایلو یورودی.

بو ائنده ایسه بر منافق ایله بر مرتد طرفندن حرب و قتاله مباشرت اولندی.

شویله که: (قُزْمَان) [\*] نامنده بر منافق اولوب بو کرّه رسول اکرم، اردوی هایون ایله مدینه دن چیققدقه او، کیر و قالمشیدی.

مدینه ده کی خاتونلرک آنی استهزا ایتمسی ناموسنه طوقونمغله درحال اردوی هایونه کلش واک ایلو چکوب جنکه مهیا اولش ایدی.

(اوس) قبیله سندن (ابوعامر راهب) دینلور. بر شیخص و ارایدی که: بعثدن مقدم رسول اکرمک تشریفی خبر ویرمشیکن ظهور محمدیه حسدندن ناشی کفر و ضلالت یولنه سلوک ایتمش و رسول اکرم دن آیریلوب اللی قدر اتباعی ایله مکیه کیتمش ایدی.

«میدان محاربه ده بن قومه ملاقی اولور سه م جمله سی بکا تابع اولور» دیو قریش ایچنده اوگونوردی.

حال بو که: رسول اکرم، آنی (ابوعامر فاسق) دیو تلقیب ایلمش اولدیغندن دکل قومی، کندی اوغلی بیله آنی قبول ایتمک احتمالی یوق ایدی. بناءً علیه بو کرّه ابوعامر، اوس قبیله سه نه مقابل اولان عربان ایچنه کله رک «بن، ابوعامر» دیوندا ایتدکده اوس قبیله سی «بره فاسق حریف!» دیو آنی سب ایلدیلر.

[\*] ثعبان وزننده ابن الحارث العبسی نام منافق درکه فخر عالم صلی الله علیه وسلم حضرتلری آنک حقنده (ان الله لیؤید هذا الدین بالرجل الفاجر) بیوردیلر. قاموس ترجمه سی

ابوعامر، کندی قومندن بویله اومادینی بر معامله یی کورنجه « بن ، قومك ایچندن چیقالی آنلرك افکاری بوزولمش » دیهرك اوس قبیله سیله جنك وجداله باشلادی .

قزمان ایسه ، قاریلردن اوتانمش وجنكه پك زیاده حرصلانمش اولدینی جهتله هر کسدن اوّل دشمنه اوق آنارق کمال شدت ایله حربه شروع ایلدی .

اوس قبیله سی ، دلاورلری ایسه ابو عامری طاشه طوتدیلر ، طاشلری واولقلى یاغمور کبی یاغدیدیلر .

ابوعامر فاسق ، فراره مجبور اولدقدن باشقه او قولده بولنان (هوازن) قبیله سی اورکوب کیرو دوندیلر ونهایت کیروده کی صفه دایاندیلر .

آنك اوزرینه قریشك علمدارى اولان ( طلحه ابن ابی طلحه ) میدان مبارزه یه چیقوب اردیله دی .

علی ابن ابی طالب رضی الله عنه حضرتلری ، آکا قارشو چیقدی وباشنه برقلیج اوروب کافری قتل واعدام ایلدی .

آندن صکره قریشك سنجانغی (عثمان ابن ابی طلحه ) طوتمشیدی . اللهمك آرسلائی ( حمزه ابن عبدالمطلب ) رضی الله عنه حضرتلری ، آنك اوزرینه حمله ایدوب قلیج ایله قولنی یارالادی .

درحال سنجانغی ( ابو سعید ابن ابی طلحه ) آلدی . آنی دخی ( سعد ابن ابی وقاص ) رضی الله عنه حضرتلری ، اوق ایله اوردی .

همان سنجانغی ( نافع ابن طلحه ) طوتدی . آنی دخی ( عاصم ابن ثابت ابن ابی افلح ) اوق ایله اوروب قتل ایتدی .

درحال سنجانغی ( حارث ابن طلحه ) طوتدیسده عاصم ، آنی دخی بر اوق ایله اوروب دوشوردی .

برادری ( کلاب ابن طلحه ) همان سنجانغی الله آلدی ایسه ده زیر ابن العوام ، حمله ایدرك آنی اولدردی .

بعده ، برادری ( جُلاس ابن طلحه ) سنجانی آلدی . او دخی ( طلحه ابن عبیدالله ) رضی الله عنه حضرتلرینک یدنده مقتول اولدی .  
الحاصل ، عبدالدار اوغوللرندن یدی نفر بابا و اوغول و برادر و عموجه بو سنجاق آلتنده دوشوب قالدی . بعده سنجانی ینه عبدالدار نسلندن ( آرطات ابن شَرَحِیل ) آلدی . آنی دخی حضرت حمزه ، قتل ایتمکله سنجانی ( شَرِیح ابن قَارِظ ) طوتدی . آنی ده اصحاب کرامدن بری قتل ایتمدی .

آرتق ، عبدالدار اوغوللرندن سنجانی طوتاجق کیمسه بولمیدیغندن ینه آنلرک کوله لرندن ( صواب ) نام شخص سنجانی آلدی . او دخی قزمانک برحله سیله تلف اولدی .

غریبدر که قزمانک اسمی یاد اولندجقه رسول اکرم آنک حقنده « اهل جهنمدر » دیر ایدی .

قزمان ایسه بوکره او قدر مردانه جنگ ایتدی که مشرکیندن یدیستی یره دوشوردی و نهایت کندوسی دخی مجروح اوله رق میدان محاربه ده دوشوب پک چوق یرندن قان روان اولویوردی .

او حالده ( قَتَادَه ابن نَعْمَان ) رضی الله عنه حضرتلری آنی کورمشو : « شهادت رتبه سی مبارک اولسون یا قزمان ! » دیه رک حال و خاطرینی صورمش ،

قزمان ایسه « بنم املم شهادت دکلدرد . دینک محافظه سی خصوصی دخی اصلا خاطرمدن کچما مشدر . فقط قریش طائفه سنک مدینه خرما قلرینه ضرر و زیان ایده مامسی ایچون چالیشوب چابالادم » دیو جواب و یرمش و نهایت حیانتندن مأیوس اولنجه کندی قلیجیله قارتنی یاروب کندی کندینی اولدرمشدر .

بو محاربه ده اک ایتدا شهید اولان ( ابوجابر ابن عمرو ابن حَرَام ) رضی الله عنه حضرتلریدر .



بعده قیز قرنداشنك زوجی اولان (عمرو ابن جُوح) رضی الله عنه حضرتلری که محاربه یه کلورکن « یارب! بی کیر و دوندومه » دیه رك جناب حقدن رتبه شهادتی نیاز ایتمشیدی . دعاسی مقبول اوله رق اوغلی (خلاد ابن عمرو) ایله برابر شهدا زمهره سنه ملحق اولمشلردر . رضی الله عنهما . ابو عامر فاسقك اوغلی (حَنْظَلَه) رضی الله عنه حضرتلری که (عبدالله ابن ابی ابن سلول) ك قیز قرنداشی (جمله) یی تزوج ایدوب هنوز بر کیجه لك یکی کوه کی ایدی . پدری مرشد وقاین برادری رئیس المنافقین اولدینی حالده کندوسی دین اوغورنده جاتی فدا ایدن یکیتلردن اولغله همان کندوسنی دشمن صفنه اوردی و دشمنك باش قوماندانی اولان ابوسفیانك اوزرینه واردی .

لكن (شَداد ابن اَوْس) نام مشرك یتیشوب آکا شربت شهادتی ایجیردی . رضی الله عنه

ابودجانه رضی الله عنه حضرتلرینه کلنجه : رسول اکرمدن شرط معلوم ایله او قلیجی آلدقندن صکره باشنه بر قیرمزی صارغی صاردی و اوکنه کلن مشرک لری قلیج ایله اوروب جرح و تلف ایدیه رك صف دشمنی یاردی ، حتی اوتنه طرفه کچوب ابوسفیانك زوجیه سی اولان (هند) ك یانه واردی . هند ایسه سائر خاتونلرله برابر کیروده دف چاله رق مشرکینی جنکه تشویق و تحریک ایدرکن ابودجانه ، دال قلیج اوله رق اوزرینه وارنجه نه یاپاغننی شاشیردی و آنی قورتارمق ایچون کیمسه یانه وارا مادی . ابودجانه ایسه « رسول اللهك قلیجی ایله بویه بیکس برقارینك باشنه وورمق لایق دکلدر » دیه رك کیر و دونیوردی .

اوکون ابودجانه دن ظهوره کلن شجاعت فوق العاده ، هر کسه حیرت ویردی .

بو صروده حمزه ابن عبدالمطلب رضی الله عنه حضرتلری ، آرسلان کبی هر نه طرفه حمله و هجوم ایدرسه اوغورینه کلن مشرک لری ، سورسیله آنك اوکندن صاووشوب قاجارلردی .

مشرک لکړه مطمح نظر لری ایسه آ کا ظفر یاب اولمقدن عبارت ایدی .  
لکن یاننه واریلماز برکو کره مش آرسلان اولدیغندن آنی اوزاقدن اوروبده  
دوشورمه نك چاره سنی آرارلردی .

حتی حضرت حمزه نك بدر غزاسنده قتل ایتیش اولدیغنی ( طعیمه ) نك  
برادر زاده سی اولان ( جَبْرِ ابنِ مُطْعَم ) ك ( وَحْشِي ) نامنده بر حبشی  
کوله سی اولوب حبشستان اصولی اوزره حربه اندازلقدن پك ماهر اولمغله  
جبر ، آکا « اکر حمزه یی اولدیرر ایسه ك آزاد اول » دیمش وهند دخی  
بونك ایچون وحشی به پك چوق مكافاتلر وعد ایتیش ایدی .

بناء علیه بوکره وحشی ، برطاش آرقه سنده پوصویه کیروب وباشقه  
کیمسه به باقیوب هان حضرت حمزه یی کوزه دیر ایدی .

حال بوکه : محاربه پك زیاده شدت بولدی وقریش اردوسی فنا حالده  
بوزولدی .

حتی کیروده دف چالان هندایله مصاحبه لری وسائر خاتونلر ، پاچه لری  
صیوایوب ( واویلا ) دیهرك طاغه طوغری فرار ایدر اولدیلر و عساکر  
اسلامیه ، غارت و یغما یه قویولدیلر .

كانكشدر ، بو حالی کورنجه « یولداش لریمز غالب اولدی . دشمن ، بتون  
بتون بوزولدی . نه طور و یورسکز ؟ غنیمت ای جماعت ! غنیمت » دیدیلر .  
عبدالله ابن جبیر رضی الله عنه حضرتلری « سز ، رسول الله ك امرینی  
اونوتدیگزمی ؟ » دیهرك یغما کرلکدن نهی ایتدیه ده دیکله میوب « بزده براز  
مال غنیمت آلام » دیهرك طاغیلدیلر .

عبدالله ابن جبیر رضی الله عنه حضرتلری ، یدی سسکز نفر صادق  
آرقداش لریله امر نبوی به امتثال ایدره ك محافظه سنه مأمور اولدقلری موقعده  
ثبات ایدوب قالدیلر .

قریش اردوسنك صاغ قول قوماندانی اولان ( خالد ابن ولید ) ایسه  
سواری عسکر یله اوموقعدن مرور ایدوب ده اردوی هایونك صول جناحنه

هجوم ايتمكى قاچ كره تصوّر ايتمشيكن كانكشردن صاقينوب بونيتنى اجرا ايدمه مشيدى .

بوكره كانكشرك طاعيدقلىرى كورنجه فرصتى غنيمت بيلدى وغنيمت ايچون طاعيلان كانكشلا اوزرينه بر شدتلو هجوم ايتدى .

آنلى چيكنه يهرك عبدالله ابن جبيرك ياننه كلدى وياننده كي آرقداشلايله برابر آنى دخى شهيد ايلدى . رضى الله عنهم .

خالد ابن وليد ، او موقعى ضبط ايتدكدن صكره اردوى هايونك صول جناحنده طولاشوب آرقه طرفدن هجوم ايله اهل اسلامى شاشيرتدى وايچلاينه برعظيم تفرقه دوشوردى .

شويلاه كه : اهل اسلام ، غالب اولمشيكن ايش ، دفعةً برعكس اولوب بوغاليت ، همان مغلوبيته منقلب اوليوردى . اواننده حضرت حمزه ، اوكنه كلن مشركينى اوروب طاعيت مقده ايكن (سباغ ابن عبدالعزى) نام بهادر آكا قارشو طوردى .

حضرت حمزه ، آنى بر اوروشده دوشوروب اولدوردكدن صوكره دونوب ديكر طرفه پرتاب ايدر كن سالف الذكر وحشى نام حبشى ، پوصودن چيقوب حربه سنى آتدى وحضرت حمزه يي اوروب شهيد ايتدى . سيّد الشهداء اولان حضرت حمزه ، بوكره سكزن نفر نامدار مشركى اوروب دوشوردكدن صكره كنديسى دخى بو وجهله وحشيك برحربه - سيله شهيد اولدى . رضى الله عنه وارضاه .

همشيره زاده سى اولان مشهور (عبدالله ابن جحش) رضى الله عنه حضرتلرينى دخى بوصرمده (ابوالحكم ابن الاخنس القفى) شهيد ايتمشدر . ينه مهاجريندن (شامس ابن عثمان) رضى الله عنه حضرتلرى دخى او ائنده شهيد اولمشدر .

وحشى ، بر آراق حضرت حمزه نك ياننه واروب قارتى ياردى وجكرينى چيقاروب هنده كوتوردى .

هند ، فوق العاده شاد اولدى وآشورى مرتبه حرص ايله او حضرتك

جکرینی آغزینه آلوب چیکنه دی، اوستنده باشنده بولنان حلیاتی و یاننده موجود اولان اموالی شکرانه اوله رق وحشییه ویردی .

بوندن باشقه مکیه عودتنده شوقدر آلتون ده ااحسان ایده جکنی وعد ایلدی و صاغ اولدقجه وحشییه متشکره اوله جغه دأثر بیتلر سویلدی .  
حضرت حمزه نك وفاقی ، اهل اسلام حقنده بر بیوك مصیبت ایدی .  
لکن اوحالده کیمسه نك آنی دوشونه جك وقتی اولیوب هر کس کندی باشی قایسنه دوشمشیدی .

زیرا بالاده بیان ایتدی کمز وجهله خالد ابن ولیدك کیروندن هجوم ایتسی اوزرینه اردوی هایون انهمزه یوز طوتمشیدی .

شویله که: اواننده «آرقه کزه باقکزی جماعت!» دیو برسس ایشیدیلدی، آندن اردوی هایونه برقاریشیقاق و اهل اسلامه شاشقینلق کلدی .

ایلرو سکیرتمش اولانلر، تلاش ودهشت ایله کیرو دوندیلر و آرقه لرنده کی اهل اسلامی ، دشمن ظنیه اوزرلرینه هجوم ایتدیلر .

ا کرچه اهل اسلام ، اثنای محاربه ده بربرینی طانیق ایچون اولجه بینلرنده (آمت، آمت) یعنی (اولدر ، اولدر) تعیری وضع اولنمشیدی .  
لکن شاشقینلق ایله آنی اونوتدیلر . بوجهتله دوستی دشمندن فرق وتمیز ایده مز اولدیلر وهان بربرینی قیرمغه باشلادیلر .

بوزولوب طاغیلمش اولان مشرکین دخی طوپلانوب وکیرو دونوب اهل اسلام اوزرینه هجوم ایلدیلر .

ایشته بو قارغاشه لقده انصاردن پك چوق ذاتلر مجروح وتلف اولدی .  
رضی الله عنهم .

کبار اصحاب کرامد (حَذِیْفَه) رضی الله عنه حضرتلرینک پدری اولان (یمان) رضی الله عنه دخی بوصره ده شهید اولمشدر ،

اشبو (یمان) ایله (ثابت ابن وقش) رضی الله عنهما، پیرفانی اولوب حرب

و ضربہ یاراما یا جقلری معلوم الاینی جهتله رسول اکرم ، احد غزاسنه کلورکن آنلری کیرو چویرمک ایسته مشیدی .

لکن ایکسی دخی رتبۀ شهادته نائل اولق ایچون برلکده کلک آروزسندہ بواندقلری جهتله استدعالرینه مساعده بیورلمشیدی . بو کرہ ایکسی دخی بر مراد اولدیلر .

دشمنلر ، بو وجهله فرجه بولدقدن صکره فخرعالم صلی الله علیه وسلم حضرتلرینک اوزرینه هجوم ایتدیلر ویاننده کی جمعیت اسلامیه بی طاغیتدیلر . اوزرینه پک چوق اوقلر وطاشلر آتدیلر .

سعد ابن ابی وقاص رضی الله عنه حضرتلرینک برادری اولان ملعون (عتبہ ابن ابی وقاص) حضرت پیغمبرک دوداغنی یاردی وبردیشی قیردی .

(عبدالله ابن مئہ) نام ملعون دخی مبارک یناغنسک اوستنی یاردی وزرهنک ایکی حلقه سی قیریلوب قوپارق بو یاربلان یرہ یاتوب ایچرو کیردی .

رسول اکرم ایسه کندوسنک قانی یر یوزینه داملا یوبده آندن طولای قومنه عذاب نازل اولمسون دیو یوزندن آقان قانلری سیلر و (یارب! قوم جاہلدر . سن آنلره هدایت ایت) دیو دعا ایلر ایدی .

او ائنادہ مشرکینک بر فرقه سی ، رسول اکرم اوزرینه هجوم ایتدکده حضرت علی رضی الله عنه وکرم الله وجهه ، قارشو چیقوب آنلرک رئیس اولان (هشام ابن امیہ المخزومی) یی قتل ایدنجه آرقداشلری فرار ایتدی .

مؤخرآ دیکر بر فرقه ایله (عمر وابن عبدالله جمعی) هجوم ایتدکده دخی حضرت علی رضی الله عنه ، آنی قتل ایدنجه آرقداشلری فراره یوز طوتدی .

بعده دیکر بر فرقه نک هجومنده حضرت علی کرم الله وجهه ، آنلرک رئیس اولان (بشرا بن مالک عامری) یی دخی قتل ایتمکله آرتق سائری صاووشوب کیتدی .

الحاصل حضرت علی ، اوکون دشمنلرک کوزینی قورقوتدی وعمی حمزه کی اللهک بر ارسلائی اولدیغنی اثبات ایتدی .



او ائناده (اُمُّ عُمَارَه) دیومعروف اولان (نسیبه خاتون) دخی میدانه  
چیقوب غایت مردانه جنک ایدیوردی .

اشبو نسیبه رضی الله عنها حضرتلری (مازن ابن نجّار) اولادندن  
اولان (کعب) ک قیزی وانصاردن (زید ابن عاصم) ک زوجه سیدر .  
هجرتدن مقدم مککه کیدوبده عقبهده رسول اکرمه بیعت ایدلرنددر .  
بوکره زوجی وایکی اوغلی ایله برلکده احد غزاسنده بولنوب بهادرلغی  
یار و اغیاره بکندردی و نیجه بهادر ارلری اوتاندردی .

حتی رسول اکرمک اوزرینه هجوم ایدن فداایلردن برسوارینک  
آیاغنی قلیج ایله قلم واری آیردی و آتندن اشاغی دوشوروب اولدردی .  
کندوسی برقاچ یرندن یارالانوب قانلری آقارکن بی پروا قوجه سنی  
واوغوللری جنکه تشویق و تشجیع ایلردی .

دشمن، هر نه طرفدن رسول اکرمک اوزرینه هجوم ایتسه همان زوجی  
واوغوللری ایله یتیشوب مدافعه ایدردی .

بناءً علی ذلک رسول اکرم « یارب ! بونلری بکا جتته رفیق ایله »  
دیو دعا ایتدی .

اوصرده ملعون (ابن قُئّه) « بکا محمدی کوستریگز . یااو، یابن » دیه رک  
رسول اکرم اوزرینه حمله وهجوم ایتدکده نسیبه خاتون رضی الله عنها ،  
آکا قارشو چیقدی و اوچ کرّه ابن قُئّه یه قلیج چالیدی . لیکن ملعون ، بربری  
اوزرینه ایکی زره کیمش اولدیغندن کسیدرمدی . ابن قُئّه ایسه قلیج ایله  
حضرت نسیبه نک اوموزینی یارالادی و علمدار نبوی اولان (مصعب ابن  
عمیر) رضی الله عنه حضرتلری، زرهنی کیدکده رسول اکرمه بکزه دیکندن  
ابن قُئّه ، آنی رسول اکرم ظنیه اوروب شهید ایلدی .

آنک اوزرینه رسول اکرم ، لواء شریفی حضرت علی یه ویردی  
واوزرینه کلن دشمنلرک یوزلرینی کیر و چویردی

ابن قُئّه ایسه همان ابوسفیانک یاننه واردی و « محمدی اولدردم » دیو  
مژده ویردی .



بوجهتله گروه مشرکین ، فوق العاده ممنون اولدی . بوحوادث ، عسکر ایچینه یاییلدی و طاع اوزرندن یوکسک سس ایله بری ده « محمد ، قتل اولندی » دیو باغیردی .

ایشته بوحوادث ، اهل اسلامی بتون بتون شاشیرتدی و تعریف اولنماز مرتبه یأس و حیرته دوشوردی .

گروه مشرکین ایسه پیدرپی رسول اکرمک اوزرینه هجوم ایله یاننده کی جمعیت اسلامییه پی طاغتدیلر و هرطرفدن آنی احاطه ایتدیلر .

حتی اووقت جبرائیل و میکائیل علیهما السلام ، انسان صورتنه کیروب و رسول اکرمک یاننده طوروب آنی محافظه ایتدکاری و اوحالده رسول اکرم ، اله برچوق اوفاجق طاشلر آلوب دشمنلرک اوزرینه آتمغله صاووشوب کیتدکاری مرویدر .

اهل اسلام ایسه رسول اکرمی کوره من اولدقلری حالده قتل اولندیغی حوادثی ایشدکاری کی نه یاپاچقلرینی شاشیردیلر .

جمله سی پراکنده و پریشان و مدهوش و حیران اولدقلری حالده قضا و بلا اوقلرینه سینه لرینی سپر ایدرک انجام کاره منتظر ایدیلر .

ایچلرندن بعضیلری « چونکه رسول اکرم قتل اولنمش ، بزده باشمزک چاره سنده باقالمیزی » دهرک بر طاقی طاغلوب طاغله استناد ایتدیلر ، رازی دخی دونوب مدینه یه قدر کیتدیلر .

اووقت ( انس ابن مالک ) رضی الله عنه حضرتلری عموجه سی اولان ( انس ابن نصر ) رضی الله عنه حضرتلری « ای جماعت مسلمین ! محمد قتل اولندیسه تگریسی باقیدر . دین مبین اوغورینه جنک ایدوب ده شهید اوله رق آکا قاوشمق ایستمز میسکمز ؟ » دهرک سائره جسارت و یرمش و شهید اولونجیه دهرک جنک ایتمشدر . رضی الله عنه

رسول اکرم ، اوحالده قطب عالم کی ثابت قدم اوله رق یرندن اصلا قیلملدامدی .

کبار اصحاب کرامدن برازی دخی پروانه کبی رسول اکرمک اطرافنده  
طولاشور اولدقلری جهته در حال آنک باشی اوجنه طولانیویردیله .

بونلر مهاجریندن ( ابوبکر ) و ( عمر ) و ( علی ) و ( عبد الرحمن  
ابن عوف ) و ( سعد ابن ابی وقاص ) و ( زبیر ابن العوّام ) و ( طلحه ابن  
عبیدالله ) و ( ابو عبیده ابن الجراح ) ایله ( مقداد ) وانصاردن ( ابودجانه )  
و ( حباب ابن منذر ) و ( عاصم ابن ثابت ) و ( حارث ابن الصّمم ) و ( سهل  
ابن حنیف ) و ( سعد ابن معاذ ) و ( اسید ابن حضیر ) ایله ( سعد ابن عباده )  
و ( محمد ابن مسلمه ) رضی الله عنهم حضراتی ایدیلر .

طوفان بلا ایچنده دومنسز کمی طولاشان اصحاب کرامدن ( کعب ابن  
مالک الحزرجی ) رضی الله عنه حضرتلری ، قارشودن رسول اکرمی  
کوردی و اطرافنده کی اصحاب کرامه خبر ویردی .

همان برر ، ایکیشر طولانوب حضرت پیغمبرک یانه کلدیلهر و اوتوز  
نفره بالغ اولدیلهر . بعده سائر اهل اسلام دخی کلوب طولانمغه  
باشلادیلهر .

او ائنده ( زیاد ابن السکن ) رضی الله عنه حضرتلری دخی انصاردن  
اون دوت نفر فدای ییکیتلرایله کلوب حضور نبویه اثبات وجود ایلدیلهر .  
کروه مشرکین ایسه کاه رسول اکرمه اوق و طاش آتارلر ، کاه طاقم  
طاقم اوزرینه هجوم ایدرلر ایدی .

ابودجانه رضی الله عنه حضرتلری دخی رسول اکرمک اوزرینه قاپانوب  
دشمنک اوقلرینه و طاشلرینه کندوسنی سپر ایلردی . بو جهته پک چوق  
یرندن مجروح اولدی .

حضرت طلحه رضی الله عنه دخی کندیسنی سپر ایده رک رسول اکرمی  
محافظه ایدرکن بر شدتلو ضربه ایله الی یارالانوب چولاق قالدی .

سعد ابن ابی وقاص رضی الله عنه حضرتلری ، دخی حضور نبویه  
اوق جنکی ایدردی . شوبله که : رسول اکرم ، آکا دعا ایدرک اوق و یروب  
اودخی آتاردی .

اوكون سعد ابن ابى وقاص حضرت تارينك دشمنه قارشو بيك اوق  
آتمش اولدینی مرویدر .

بو صرهدده مشرکینک بر فرقهسی شدتلو هجوم ایتدکده رسول اکرم،  
« بونلره کیم قارشو چیقاجق ؟ » دیو صوردی .

زیاد ابن السکن رضی الله عنه حضرتلری « بن حیقارم یارسول الله ! »  
دیو جواب ویردی وکندوسنک فدایی آرقداشلریله برابر قارشو چیقوب  
جملهسی شهید اولونجهیه قدر دوکوشدیلر . رضی الله عنهم .

زاد ابن السکن ، قلیج ایله یارالانوب یره دوشدکده رسول اکرمک  
امریله اصحاب کرامدن بعضلری، یتیشوب آنی قالدیردیلر وحضرت پیغمبرک  
یاننه کوتوردیلر .

رسول اکرم ، آنی قوجاغنه آلدی و صووک نفسده رسول اکرمک  
مبارک یوزینه باقارق جان ووروب جنت علیاه روان اولدی . رضی الله عنه.  
منصب نبوتدن صکره شهادت رتبه سنک فوقنده بر مرتبه یوقدر .  
فیخر عالمک قوجاغنده جان ویرمک ایسه پک بیوک بر مزیتدر .

( وهب ابن قابوس مزنی ) ایله برادر زادهسی ( حارث ابن عقب )  
رضی الله عنهمما وقعهدن بی خبر اولدقلری حالده مجرد رسول اکرمی  
زیارت ایچون ( جبل مُزَنَه ) دن قالقوب مدینهیه کلکشلر ورسول اکرمک  
احد غزاسنه تشریفنی خبر آلمشلر .

درحال مدینهدن چیقوب اردوی هایونه کلدیلر . اووقت ایسه هنوز  
عساکر اسلامیه ، منهزم اولمش ایدوکنندن همان میدانه کیردیلر و مرانه جنکه  
کیرشدیلر .

ایشته اووقت وهب رضی الله عنه حضرتلرندن کوریلان مردلک  
و بهادرلق طوغریسی طرفینه حیرت ویردی .

حتی ایکی دفعه رسول اکرمک اوزرینه هجوم ایدن فرقهلره قارشو  
چیقوب دشمنلری کبرو چویردی .

بعده دیگر بر او چنچی فرقه‌نک هجو منده رسول اکرم « یابونلره کیم قارشو چیقاجق؟ » دیو سورددی .

وهب ابن قابوس رضی الله عنه حضرت تلی « ینه بن یار رسول الله! » دیو جواب فخر کائنات علیه افضل الصلوات حضرت تلی ، وهبک بوسوزندن ممنون اوله رق « یا وهب! قالق و جنت ایله مبشر اول » دیو بیوردی .

وهبک اقضای املی ایسه حضور نبویده شهادت رتبه سنی آلمقدن عبارت اولمسیله اوفر قهیه دخی قارشو واردی و آنی ده اوروب کیرو چویردی . فقط بوکره کندوسی دخی شهید اوله رق مرادینه ایردی . رضی الله عنه بعده رسول اکرم ، وهبک جنازه سی یانه واردی . روحه سلام ودعا ایتدیکی صره ده « بن سندن خوشنودم » دیو بیوردی .

آنکچون عمر الفاروق رضی الله عنه حضرت تلی « قابوس اوغلی کبی اولمکی جانمه منت بیلورم » دیر ایدی .

مدینه ده ( مخیریق ) نامنده هم اهل علم و فضیلت وهم ده صاحب یسار و ثروت بر یهودی وار ایدی .

رسول اکرمک کتب سماویّه ده مذکور اولان نبی آخر الزمان اولدیغنه اینانمش ایدی .

فقط بردن بره دیندا شلرندن آیریلوب ده اسلامی اظهار ایده میوردی . غزوه احد کونی ، دیگر رؤسای یهودک یانه کیدوب « کتب سماویّه نه نظر آ بوکون احده جنک وجهاد ایدن ذات شریفک نبی آخر الزمان اولدیغنه شبه یوقدر . آکا یاردیم ایتک اوزریمزه فرضدر » دیدکده آنلر دخی « بوکون یوم سبتدر . برایشه یاپیشامیز . محاربه یه نصل کیده لم » دیمشله . مخیریق « آنک شریعتی ، یوم سبت رسمی نسخ ایتدی . قالفکز کیده لم ، او نبی ذیشانه یاردیم ایده لم » دیمش ایسه ده دیکله مه مشله .

او دخی آرتق طیانه میوب اعلان اسلام ایدره ک حضور نبوی یه کلدی . « یار رسول الله! اگر بن شهید اولور سه هم جمله اموالی امور جهاده صرف ایت » دیو وصیت ایتدی .

بعده کندوسنی اورتهیه آتدی و مردانه جنک ایدەرك شهید اولوب  
دار جنته کیتدی

ایشته آنک حقنده رسول اکرم «مخیریق، ملت یهودک انک خیرلوسیدر»  
دیدى . رضی الله عنه

ینه او ائنده (عثمان ابن مغیره الخزومی) رسول اکرمک اوزرینه آت  
سوردی .

حال بوکه ابوعاصر فاسقک اهل اسلامی دوشورمک ایچون قازمش  
اولدینی برقویویه دوشویوردی .

درحال (حارث ابن الصّمّه) رضی الله عنه حضرتلری یتشدی و قلیج ایله  
او ملعونی اوروب اولدیردی .

اسب و اسلحه سنی آلوب کتوریرکن (عبید ابن عامری) کیرودن  
ایرشدی و حارثک اوموزینی یارالادی .

لکن ابودجانه رضی الله عنه حضرتلری ، برودن صاعقه کبی یتشدی  
و عبیدی اوروب اعدام ایلدی .

مشرکینک ماهرکمانکشلرندن (حِیّان ابن العرقّه) ایله (مالک ابن زُهَیر)  
یقین یرده برطاش آرقه سنه صاقلانوب اوق آتەرق اصحاب کرامی ازعاج  
ایتمکده ایدیلر .

حتی رسول اکرمک آزادلوسی (امّ ایمن) رضی الله عنها حضرتلری ،  
غازیلره صو اولاشدیرر و یاره لولره باقار ایکن حِیّان ، براوق آتوب آز  
قالدی که بیچاره خاتونی اولدیره یازدی .

آنک اوزرینه رسول اکرم ، سعد ابن ابی وقّاصه براوق ویردی «آت  
یاسعد ! الله تعالی راست کتوره» دیوبیوردی . سعد ابن ابی وقّاص حضرتلری  
دخی آتدی و اوق اصابت ایتدی . حِیّان ییقیلوب درحال جان ویردی .

او حالده مالک ابن زُهَیر ، اوق آتمق اوزره ییلان کبی طاش آرقه سنەن  
باشنی چیقاریر چیقارماز حضرت سعد ، آکا دخی براوق آتدی و آتی  
دخی باشندن اوروب اولدردی .

الحاصل اعداء، هر نه طرفدن هجوم ایتدیسسه اهل اسلامدن بر طاقم فداییلر، فوق العاده جسارت ایله قارشولادیلر.  
 مشرکین دخی آرتق ایستدکلی کبی قوهٔ اسلامییه بتون بتون محو ایدهمیه جکلیرینی آکلادیلر.

بوصورتله محاربه پازاری بر آژطاسادی ایسهده اصحاب کرام، اويله آچیق و مخاطره لو یرده طورمنی مناسب کورمیوب رسول اکرم ایله برابر برمائن وادی یه کیردیلر و جبل احده آرقه ویردیلر.

رؤسای قریشدن و دین اسلامک اُک بیوک دشمنلرندن اولان (ابی ابن خلف) که مکده ایکن رسول اکرمه تصادف ایتدکده «یا محمد! بر آت بسلورم. آنک اوستنده ایکن سنی اوروب اولدیره جکم» دیوب رسول اکرم دخی «انشالله تعالی سن آنک اوزرنده ایکن بن سنی اولدیریرم» دیر ایش وابی ابن خلف، بدرده اسیر اولوب بدل اعطاسیله قورتولمشیکن اوصالتمیوب ینه اوسوزی تکرار ایدر ایش.

بناء علیه رسول اکرم، بوکره «ابی ابن خلفدن امین دکلم. شاید که آرقه دن هجوم ایدمک اولورسه بنی آگاه ایدیگنر.» دیو اصحاب کرامنه تنبیه ایتمشیدی.

ناگاه بوصرهده ابی ابن خلف، نعره اوروب «یاسن، یابن» دهرک طولی دیزکین رسول اکرمک اوزرینه هجوم ایدنجه اصحاب کرامدن بعضیلری، آنی قارشولامق ایستدی.

رسول اکرم «طوقونمايگنر» دیو بیوردی. اله بر حربه آلوب آتدی و آنی اوروب آتندن آشانی دوشوردی.  
 ملعونک بر، اکه کمیک قیریلدی. همان فریاد ایدرک و «محمد بنی اولدردی» دهرک قاچوب قومنک یانه واردی.

ابوسفیان، باقوب کوردی که برهسی وار ایسهده یارهسی یوق، قان آقیور «یهوده تلاش ایدیورسین، برشی یوقدر» دیو تسلیت ویردی.  
 ابی ابن خلف ایسه «مقدما محمد، بکا بن سنی اولدیریرم دیرایدی»



فی الواقع اولدردی . زیرا بوضربه دن نیم ایچون خلاص یوقدر ، دیرایدی .  
فی الواقع دونوب مکیه کیدرکن اوکوزکی باغیره رق انئی راهده  
هلاک اولمشدر .

« جناب حق ، ابن قثمی خوروخا کسار ایتسون » دیو رسول اکرم  
دعا ایلش اولدیغندن ابن قثم ، مکیه عودت ایدوب برقاچ کون صکره  
طاغه کیتدیکنده اللهم امریله آکا بریبان کچیسی مسلط اولوب بویوزلریله  
سوسه رک آنی پاره پاره ایتمشدر .

رسول اکرم ، عتبه ابن ابی وقاصه دخی « ییلنی تکمیل ایتسون » دیو  
بدعا ایتش اولدیغندن اوده سنه سی ایچنده مشرک اولدیغی حالد هلاک  
اوله رق جاتی جهنمه ایصماریلوب کیتمشدر . لعنة الله علیهم .

رسول اکرم ، اصحاب کرامیله وجه مشروح اوزره جبل احدک او  
وادیسنه کیدوب طویلاندیلر .

شوراده ، بوراده متفرق اولان اهل اسلام دخی اورایه کلوب  
باریندیلر .

بعده حضرت علی ، رسول اکرمه صوکتوروب یوزینی ییقادی  
وآبدست آلوب اوپله نمازینی قیلدی .

مبارک یوزینه باتمش اولان ایکی حلقه یی ( ابو عبیده ابن الجراح )  
رضی الله عنه حضرتلری ، اوک دیشلریله طوتوب چیقاردی وچیقاریرایکن  
کندوسنک ایکی دیشی دوشدی .

او حلقه لر ، چیققدن صکره یزلرندن قان بوشاندی : آنک اوزرینه  
( ابوسعید الخدری ) نک پدری ( مالک ابن سنان الخدری ) آقان قانلری  
امدی . رضی الله عنهما .

( هند ) ایله یولداشلری اولان سائر نساء قریش ، میدانی خالی بولنجه  
کلوب شهیدانک برونلرینی و قولقلرینی کسیدیلر و آنلردن بیله زیککلر  
وکردانلکلر یابدیلر .

ابوسفیان ، جبل احدک اووادیسنده بر جمعیت اسلامیه پیدا اولدیغی

کورونجه آنلری طاعیدوب محو ایتک اوزره بر فرقه مشرکین ایله باشقه یولدن آنلرک اوست طرفنه چیقماق ایستدی .

رسول اکرم « یارب ! آرتق اورایه چیقماسونلر » دیو دعا ایتدی و دعاسی مستجاب اولدی .

ابوسفیان ، هر نه قدر چابالادیسه ده یوقارو چیقما دی و رسول اکرمک تأثیر دعاسیله آرتق طوفان حرب و فتنه یه سکونت کلدی .

فقط رسول اکرمک صاغ اولوب اولمادیغنده ابوسفیانک شبهه سی اولدیغندن آنی حل ایتک ایستردی .

بناء علیه اوجمیت اسلامیه به خطاباً اوچ کرّه « ایچیکزده محمد و ارمی ؟ » دیو سوردی .

رسول اکرم ، اصحاب کرامنه « صوصکمز ، جواب ویرمه یگمز » دیو بیوردی .

ابوسفیان ینه اوچ کرّه « یا ، ایچیکزده ابوبکر و ارمی ؟ » دیو چاغردی . ینه سس چیقما دیغندن اوچ کرّه دخی « عمر ابن الخطاب و ارمی ؟ » دیو باغردی .

آندن دخی برسس چیقما دیغنی کی ابوسفیان ، آرتق دیگر اصحاب کرامی سورمادی .

چونکه دین اسلامک قیامی آنحق آنلرله اولدینی مجزومی اولدیغندن باشقه لرینی آریوب سورمغه لزوم کورمدی وهان دونوب کندی قومه « اکر صاغ اولسه لر البته جواب ویریرلردی . بونلرک اوچی ده وفات ایتمش و آرتق ایش بیتمش » دیدی .

حضرت عمر الفاروق ، آرتق طایانامایوب « اللهک دشمنی ! یالان سویلدک . صایدیگک ذاتلر ، هپ صاغدر . سنک حقکدن کله جککر باقیدر » دیدی .

ابوسفیان ، « محاربه نوبته در . بو کون ، بدر کوننه بدلدی » دیدی .

حضرت عمر ، « اوت . اما برابر دكلز . زیرا بزم مقتوللرمز جتده  
وسرك مقتوللريكز جهنمده در » دیدی .

ابوسفیان « عالی اول هبل ، عزیز اول هبل » ديهرك ( هبل ) نام بته  
دعا وتشكر ایتدی .

چونكه : هبل ، كعبهده بر بيوك بت ایدی . ابوسفیان ، بوكره سفر  
ایدهجك اولدقده آنك یانه كیتمش و « كیدهیم می ، کیتیهیم می ؟ » دیوقرعه  
آتمش و ( اوت ) دیو چقمش اولدیغندن بو غلبه سنی هبلدن بیلهرك آکا  
تشكر ایتمش ایدی .

آنك اوزرینه رسول اكرمك امریله حضرت عمر دخی « الله اعلى واجل »  
دیدی .

ابوسفیان ، « بزم عزّامن وار ، سرك عزّاگز یوق » ديهرك « عزّی »  
دیدكلری بت ایله مباهات ایلدی .

حضرت عمر ، دخی « الله بزم مولا مزر در . سرك مولاگز یوقدر ،  
دیدی .

ابوسفیان « بری كل یا عمر ! » دیدی . حضرت عمر ، دخی رسول  
اكرمندن اذن آلوب بر آز ایلری واردی .

ابوسفیان ، « یا عمر ! الله ایچون طوغری سویله . بز ، محمدی قتل  
ایتدكمی ؟ » دیو صوردی .

حضرت عمر ، « یوق والله . رسول اكرم ، شیمدی سنك سویلدیكك  
سوزلری ایشیديور » دیو جواب ویردی .

بونك اوزرینه ابوسفیان دخی « بن ، سكا ابن قئدن دها زیاده اینانورم »  
دیدی .

آندن صكره ابوسفیان دونوب كیدهجك اولدقده « كلهجك سنه سركله  
بدرده بولوشالم » دیدی .

حضرت عمر دخی ، رسول اكرمك امر وتعلیمی ایله « ان شاء الله »  
دیدی .

مشرکوں، جو مرتبہ غالب کلمش ایکن جناب حق، آنلرک قبلرینہ قورقو ویردی. همان محاربہ دن بوتون بوتون فراغت ایتدیلر ومکہ یولنی طوتوب کیرو کیتدیلر.

او وقت رسول اکرم، «عجبا سعد ابن الربیع، نہ حالہ در؟ شہدا آہ سندنہ میدر، یوقسہ یارالیر ایچندہ میدر؟ آکا طوغری اون ایکی قارغی ایلہ هجوم اولنہ دیغنی کوردم» دیو بیوردی و آنی آریوب بولمق ایچون (محمد ابن مسلمہ) رضی اللہ عنہ حضرتلرینی کوندردی.

اودخی شہدانک اولدینی محلہ واردی و برقاج کرہ (یاسعد ابن الربیع) دیو چاغردی. برسس چیقما یوب تا کہ «رسول اللہ، بنی سکا کوندردی یاسعد» دہیجہ برضعیف سس ایلہ «بن، اولولر ایچندہ یم» دیو جواب ویردی.

محمد بن مسلمہ، آنی شہدا آہ سندنہ بولوب کوردی کہ پک چوق قلیج و قارغی و اوق یارالیرلہ جسمی دہلیک دہشیک اولمش و حالت نزعہ کلمش.

او حالہ سعد ابن الربیع کوزینی آچدی و محمد ابن مسلمہ یہ خطاباً «رسول اللہہ بنم سلامی تبلیغ ایلہ و سویلہ کہ: بن، جنتک قوقوسنی طویورم. قومکدہ بندن سلام ایلہ و سویلہ کہ: کیرپکلر یکنز قیملدادتجہ پیغمبریکنزہ اخلاص خصوصندہ عنداللہ معذور اولہ مازسکنز» دیدی و درعقب تسلیم روح ایلدی.

اشبو سعد ابن الربیع، عقبہ دہ رسول اکرمہ بیعت ایدن کبار اصحاب کرامدن اولوب (سعد ابن زرارہ) دن صکرہ انصارک اولوسی او، ایدی. رضی اللہ عنہ وارضاه

محمد ابن مسلمہ، حضور نبوی یہ کلوب سعدک سلام و کلامنی تبلیغ ایتدکدہ رسول اکرم «یارب! سن سعد ابن الربیع دن راضی اول» دیو دعا ایتدی.

بعده رسول اکرم، شهیدلری معاینه بیوردی. حضرت حمزه یی کوردی که: بورنی و قولاقلری کسيلمش، قارنی یاریش، جسمی پاره پاره ایدلمش. آندن رسول اکرم، اوقدر محزون و مکدر اولدی که هیچ بروقده او مرتبه متأثر اولدینی کورلماشدر.

او وقت جبریل امین نازل اولدی و حضرت حمزه کوکلرده (اللهک آرسلافی و رسول اللهک آرسلافی) دیو یازلمش اولدینی خبر ویردی.

غریبدرکه او کون صباحلین (عبدالله ابن جحش) ایله (سعد ابن ابی وقاص) رضی الله عنهما، برکناره چکیلوب جناب حقه دعا ایتمشله. سعد ابن ابی وقاص «یارب! بریوک دشمنه راست کلوب جنک ایدهرک آکا غالب و مظفر اولایم» دیمش. عبدالله ابن جحش، آکا (آمین) دیدکدن صکره «بنده بریوک دشمنه راست کلوب جنک ایدیم و نهایت شهید اولایم. بورنم و قولاقلم کسيلمسون. یارین روز جزاده الله تعالی حضرتلری، بکا بورنک و قولاقلرک زرده کسيلمی ده نیجه یارب! سنک ورسولکک یولنده کسيلمی دییم» دیو دعا ایتمش. بوکره شهدانک معاینه سسندده سعد ابن ابی وقاص، آنی او حالده کورونجه تعجب ایلمشدر.

حضرت حمزه، رسول اکرمدن ایکی یاش بیوک ایدی. عبدالله ابن جحش، دخی او وقت قرق یاشنی متجاوز ایدی.

انصار کرامدن ابو جابر رضی الله عنه حضرتلری دخی اوقدر پاره پاره ایدلمشیدی که کیم اولدینی کوچ حال ایله پارماقلرندن بیلنه بیلدی.

الحاصل قریش طائفه سنک شهدا حقهده اصلا انسانیته یاقیشمایه جق صورتده وحشیانه معامله لر اجرا ایلمش اولدقلری کورولدی.

رسول اکرم، شهدایی او حالده دفن ایتدیردی. شویله که: برحیات ایکن بینلرنده انس و الفت اولان شهیدلر، ایکیشر اوچر بریره دفن اولندیلر.

از جمله حضرت (حمزه) ایله همشیره زاده سی (عبدالله ابن جحش)

ايکيسي بر قبره و ( ابو جابر ) ايله قيز قىزداشنىڭ قوجهسى اولان ( عمرو ابن جَمُوح ) و ( خارجه ابن زید ) اوچى بر قبره قونولدىلر .

بو محاربه ده مشركىنىڭ تلفاتى يكرمى ايله اوتوز نفر آرمى سنده اولدىنى خالد شهادتك مقدارى ( يتمش ) نفر ايدى .

بوندىن بشقه اهل اسلامك بر خيلى مجروحلىرى دىنى وار ايدى . بو يتمش نفر شهيدك يالكرز بش ، آلتىسى مهاجريندىن اولوب باقىسى هپ انصار ايدى .

بو هزيمت ، اهل اسلام حقنده بر بيوك بلا و مصيبت اولدىنى خالد عساكر اسلاميه من طرف الله بر تربيه معنويه ايدى .

زيرا افراد عسكريه كوره هيچ بر سر عسكرىك ايشنه قارىشمق جائز دكل ايكن عساكر اسلاميه ، رسول اكرمك رآى و تدبيرينه مداخله ايتدىلر و رسول اكرم ، مدينه منوره ده طور و بده تدافى جنك ايتىمك نيتنده ايكن آنى ميدان محاربهسى ايتىمكك مجبور ايلدىلر .

هر نه ايسه بو خطالىرى عفو اولنه رى رسول اكرم ، دشمنه قارشو واردى . دشمنك سواريسنه مقابل سواريسى يوق ايكن عساكر اسلاميه نى بر صورتده تعيه ايتدى كه سوارى هجوم ايدى بيله جنك يالكرز صول جناخنده بر موقع قالوب آنى دىنى كانكشلايله قياتدى و اهل اسلامه نسبتله دشمنك قوتى قات قات زياده ايكن دشمن اردوسنى منهزم و پریشان ايتدى .

چه فائده كه كانكشلىرك اكثرئى ، يغما گىرك سىوداسيله محافظه سىنه مأمور اولدىلرلى موقعى بر اقوب طاغىلىدىلر و بويله بر بيوك بوزغونلغه سبب اولدىلر .

عسكرىرك ، آمرىك امرينه اطاعتدىن عبارت اولوب كنىدى افكارينه اويان افراد عسكريه نك بويله بيوك فناقلره سبب اولاكلكدكارى مجرب و مستمدر .

ايشته وقت محاربه ده ترك موقع ايتىمك نه بيوك جنايت اولدىنى بوندىن رغنا معلوم اولور .



رسول اکرم، شهدای دفن ایتدکدن صکره مبارک یوزی مجروح وقلبی محزون اوله رق اصحاب کرامیلہ برابر احدثدن قلقوب مدینہ کلدی .  
 شہدائک اولاد وعیال واقربالری آغلادقجه کروه منافقین ، ممنون اولوردی . اهل اسلامک بومغلوبیتی اوزرینہ یہود طائفہ سی دخی شماردی .  
 الحاصل دین اسلامک دوست و دشمنی آیریلدی وصحیح مسلمان اولانلر سچیلدی .

قریش اردوسی عودت ایدوب کیدرکن ( عکرمہ ابن ابی جہل ) سائر رؤسایہ خطاباً « نه ایش کوردیکیز ؟ بوقدر غلبہ یہ مظهر اولمشیکن محمدیلری بتون بتون بیتیرمہ دن کیرو دوندیکیز . چوق کچمیوب آنلر ، ینہ طویلانورلر و اخذ انتقام ایچون اوزریمزه کلورلر . کارعاقل بودرکه : دونوب مدینہ کیدہ لم و آنلری کوکدن محوایدہ لم » دیش ( صفوان ابن امیہ ) دخی « شایدکه اوس وخزرج قبیلہ لری ، بوقدر آدملرینک تلف اولمسندن طولانی قیزوبده جنکه چیقمامش اولانلری دخی اخذ انتقامہ قیام ایدرک کافہ حرکت ایدرلر ایسه ایش ، برعکس اولور . حاضر مظفر اولمشیکن آغیزمک طادیلہ مکہ یہ وارہ لم » دیهرک عکرمہ نک رأینی جرح ایتمش .

ابوسفیان ایسه بویکی رأی بینده متردد اولدینی حالده بووجهله بحث ومجادله ایدرک ( رَوحاً ) مرحله سنہ وارمشلر واورادن کیرو دونوبده مدینہ اوزرینہ کلکه قرار ویرمشلر .

حال بوکه : آنلر ، اثنای راهدہ اووجهله مباحثہ ومجادله ایدوب کیدرلر ایکن ( عبدالله ابن عمرو والمزنی ) یانلرنده بولنہ رق آنلرک سوزلرینی ایشیتمش وفرداسی صباح نمازی وقتندن اول مدینہ یہ کلوب ایشیتدیکنی رسول اکرمہ افاده ایلہ مش . رسول اکرم ، ابوبکر الصدیق وعمر الفاروق رضی اللہ عنہما حضر تلرینی چاغیردی ومنینک سویلدیکنی آنلرہ افاده ایلہ استشارہ بیوردی .  
 آنلر دخی دونکی محاربه دن طولانی اهل اسلامک ضعیف دوشمدیکنی کوسترمک و دشمنہ برکوز داغی ویرمک اوزره چیقوبده آرقہ لرینہ دوشمک صورتی مناسب کوردیلر .

بناءً علی ذلك رسول اکرم ، صباح نمازینی جماعت ایله مسجد شریفده قیلدقدن صکره اصحاب کرامنی دعوت ایتمک اوزره ( بلال حبشی ) رضی الله عنه حضرتلرینه امر ایتدی .

اودخی مأمور اولدینی وجهله « دونکی کون ، احد جنکنده بولنانلر حاضر اولوب کلسونلر . دشمنک آرقه سنه دوشوله جکدر » دیوندا ایلدی . جله اصحاب کرام حاضر اولدیلر ، حتی مجروح اولانلر دخی یاره وبره لرینی صاروب کلدیلر .

رسول اکرم ، همان ابن ام مکتوم رضی الله عنه حضرتلرینی مدینه قائم مقاملغنه تعیین بیوردی ولواء شریفی علی ابن ابی طالب رضی الله عنه حضرتلرینه ویردی . کندوسی دخی مجروح اولدینی حالده آتیه بیندی و آلتیوز اوتوز قدر احد غازیله مدینه دن چیقوب ( حمراء الاسد ) نام موقعه واردی . حمراء الاسد : مدینه نك سکز میل مسافه بعدنده و مدینه دن ( ذوالحلیفه ) نام محله کیدرکن یولک صول طرفنده بریرک اسمیدرکه رسول اکرم ، بوکره اورایه واروب اردو قوردی .

( أبو معبد خزاعی ) نك اوغلی ( معبد ) لمصلحة مکیه کیدرکن اورایه اوغرادی و رسول اکرمک یانسه کلوب دونکی کون اصحاب کرامنک مصاب اولمسندن طولایی تعزیت ایتدی . بعده قالقوب کیتدی . معبد ، روحان کچرکن ابوسفیان ایله کورشدکده ابوسفیان ، آکا « کیروده نه وار ؟ » دیو صورمش .

اودخی « محمد ، بریوک اردو ایله چیقمش که عمرمه اويله جمعیت کورمدم . دونکی کون محاربده دن کیرو قالمش اولانلر دخی چیقمدقلرینه یشیمان اوله رق بوکون جمله سی طویلاشمش لر . سزک ایچون دیش بیله یوب کلیورلر » دیو جواب ویرمش .

ابوسفیان « سن نه سویلیورسین ؟ آنلرده حرکته مجال قالدیمی ؟ » دیدکده معبد « آنلر ، حمراء الاسده کلدیلر . ظن ایدرم که سز بورادن هنوز قالمقدن آنلرک آتلیرینک الینلرینی کوره جکسکز » دیش .

صفوان ابن امیه « کوردیکزمی ؟ ایسته بنم دیدیکم چیقدی . هایدی  
بر بلایه اوغرامادن صاووشوب کیده لم » دیدی . ابوسفیانك قلبه دخی قورقو  
دوشدی . همان اردولرینی قالدیروب کوچ ایتدیلر و طوغری مکّه یه کیتدیلر .  
معبده اووقت هنوز اسلام ایله مشرف اولماشیدی . فقط اهل اسلامك  
طرفدار ی ایدی . بناء قریش طائفه سنی بووجهله قورقوتدی و صاووشوب  
کیتدکارینی دخی بر آدم ارسالیله رسول اکرمه اخبار و اشعار ایتدی .  
قریش اردوسندن کیرویه قالمش اولان ایکی کیشی ، بوکرّه اهل اسلامك  
النه دوشدی .

بری بنی امیه دن ( معاویه ابن مغیره ) و دیگر ی بدرده اسیر اولوب ده  
فیما بعد اهل اسلام علیه نه بولنماق شرطیله مجاناً عفو و اطلاق اولمش ایکن  
بوکرّه یوقاروده بیان ایتدیکمز وجهله عربانی جنکه تشویق ایدن شاعر  
مشهور ( ابو عزنّه ) در .

ابو عزنّه ، بودفعه دخی فصیحانه و بلیغانه سوزلر سویلیه رك اهل اسلامك  
یچه سندن یاقه یی قورتارمق ایستدی . لکن مفید اولیوب ایکیسی دخی  
قتل و اعدام ایدیلدی .

رسول اکرم ، چند روز اردوی هایون ایله خارجه د قالدی ، بعده  
دونوب مدینه یه کلدی .

عبدالله جحش رضی الله عنه حضرتلرینك زوجہ سی ( زینب بنت  
خزیمه ابن حارث ) که دائما فقرایی اطعام ایدر اولدیغندن کندوسنه  
( امّ المساکین ) دینلوردی . بوکرّه طول قالدیغندن رسول اکرمه تزویج  
اولندی . لکن بر ، ایکی آی صکره جه وفات ایتشد . رضی الله عنها . ینه  
اواننده علی ابن ابی طالب کرّم الله وجهه . و رضی الله عنه حضرتلرله سیّده  
النساء فاطمة الزهرا رضی الله عنها حضرتلرندن ( حسن ) رضی الله عنه  
حضرتلری طوغدی .

ینه او ، اوانده شراب ایچمك وقار اوینماق حرام اولدی .



## بئرِ معُونَه و قومه‌سی

بنی عامردن و مشایخ نجددن (أَبُو بَرَاءَ عامر ابن مالک ابن جعفر) هجرت محمدیه نیک دردنجی سنه‌سی آوائلنده مدینه منوره‌یه کلدی و رسول اکرم ایله کوروشوب «یا محمد! اگر اهل نجده اصحابکدن براز کیمسه لر کونده رسه که اومارم که اسلام ایله مشرف اولور لر» دیدی .

رسول اکرم ، اهل نجده امنیت ایده میوب « قورقارم که اصحابمه غدر ایدر لر » دیو بیوردی .

ابو براء « آنلر ، نجده کلدکلرنده بنم عهد و امانم آلتنه کیرمش اولور . آنلره کیمسه برشی یاپماز ) دیو تأمینات ویردی .

آنک اوزرینه رسول اکرم دخی ابوبرائک برادر زاده‌سی اولان (عامر ابن طفیل ابن مالک) ه بر مکتوب یازدیردی و اهل نجده تعلیم قرآن ایچون خلال صفرده انصارک اولولرندن اولان (مُنْذِر ابن عمرو) رضی الله عنه حضرتلریله یتمش نفر قرآء کونده ردی .

حضرت ابوبکر الصدیقک آزادلوسی اولان (عامر ابن فهیره) رضی الله عنه حضرتلری دخی آنلره برابر ایدی . قلاغوزلری دخی (مطلب سلیمی) ایدی .

منذر ابن عمرو حضرتلری ، اشبو جماعت قرآ ایله حقیقوب مدینه منوره‌یه درت قوناق مسافه‌سی اولان (بئر معونه) نام محله واردی و اورادن (انس بن مالک) ک دایسی اولان (حرام بن ملحان) رضی الله عنه ایله رسول اکرمک مکتوبخی عامر ابن طفیله کوندردی .

ملعون عامر ابن طفیل ایسه مکتوب هایونی اوقومادن حرام ابن ملحانی اوروب اولدردی .

بعده او جماعت قرآ اوزرینه هجوم ایچون کندی قومی اولان بنی عامری دعوت ایلدی .

آنلر ایسه « بز ، ابو برانک عهد وامانی آیق آلتنه الامایز » دیوامتناع ایلدیلر .

آنک اوزرینه عامر ابن طفیل ( بنی سلیم ) دن ( عَصِیَه ) و ( رِغْل ) و ( ذِکْوَان ) قبیله لرینی طویلایوب بئر معونه کیتدی وبقته او جمعیت قرآ اوزرینه هجوم ایله جمله سنی شهید ایتدی .

یالکز بنی نجاردن ( کعب ابن زید ) رضی الله عنه حضرتلرینی فوت اولدی ظنیه شهدا آرمسند براقش اولدقلرندن او، صاغ قالمش و برآراق اورادن صاووشوب مدینه منوره یه کلش در .

برده ( عمرو ابن امیة الضمری ) ایله انصاردن ( منذر ابن محمد ابن عقبه ) رضی الله عنهما ، برطرفده ده وه لری رعی ایتمکده اولدقلری جهتله بومقاتله ده بولنیوب متعاقباً موقع محاربه یه ورود ایله واقف حال اولدقلرندن منذر ابن محمد ، آرقداشی عمرو « نه یایلم ؟ » دیو رأی صورمش عمرو دخی « همان دونوب ، مدینه یه کیده لم و کیفیتی رسول اکرمه افاده ایده لم » دیو جواب ویرمش . منذر ابن محمد ایسه « بن ، منذر ابن عمروک شهید اولدینی یردن آیریلوب ده یالکزجه صاغ دونمکی ایسته م ، دیو دشمن ایله مقاتله ایده رک نهایت اودخی شهید و عمرو اسیر اولمش در .

آنحج عمرو ، کندوسنک ( بنی مضر ) دن اولدیغنی خبر ویروب عامریلر دخی مضر نسلندن بولندقلری جهتله عامر ابن طفیل ، آنی آزاد ایتمش و بو جهتله اودخی سالماً مدینه منوره یه کلش در .

رسول اکرم ، بووقعی خبر آلدقدن فوق الغایه محزون اولدی و

« بوكيفيت ، ابو برانك ايشيدر. بن ، بوني آنحق آنك ابراميله ايستميرك  
ياپمشيدم » ديو بيوردي .

ابو برا دخي رسول اكرمك بوسوزيني ايشيتمكله فوق العاده متأسف  
ومتأثر اوله رق كدرندن خسته لنوب فوت اولدي .

فقط عهد وامانك اووجهله پايمال اولسندن عادت عرب اوزره كندى  
خاندانى اوزرنده بر لكه قالدى .

حتى اوغلى ( ربيعه ابن ابى براء ) بو لكه يى عمزاده سى اولان ( عامر  
ابن طفيل ) لك قانيله ييقامق اوزره آنك اعدامنه قصد ايتميشدى .

رسول اكرم ، ايسه آكا بالخاصه بد دعا ايتدكدن باشقه بر آى قدر  
هر صباح ( عصيه ) و ( رعل ) و ( ذكوان ) قيله لرينه بد دعا ايتدى .

بناءً عليه چوق كچميوب ( عامر ابن طفيل ) بر يومروجه چيقاردى  
ودر حال جاني جهنمه ايصمارلايوب كيتدى .

( عصيه ) و ( رعل ) و ( ذكوان ) قيله لريني دخي وبا و حما وقحط  
وغلا استيلا ايتمكله آز وقت ظرفنده ايجلرندن يدى يوز آدم تلف اولدى .







## غزوة بنی نضیر

بنی نضیر ، یهود ملتدن وهارون علیه السلام نسلندن بر بیوک قبیله در .  
مدینه یه ایکی میل مسافه سی اولان بر ناحیه ده سا کن اولوب محکم حصار لری  
و مکمل سلاح لری وار ایدی .

اهل اسلام علیه بنده بولنامق اوزره رسول اکرم ایله معاهده ایلشله  
ورسول اکرمک بدرده مظفریتدن صکره « کتب سماویّه ده موعود اولان  
نبی آخر الزمان ، بودر » دیمکه باشلامشله ایکن قریش مکه و منافقین مدینه  
ایله مخبره دن خالی دکلمر ایدی .

علی الخصوص احد وقعه سندن صکره فکر و طور لری بتون بتون  
ده کیشدیرمشله و برکون رسول اکرم ، بش اون قدر احباب کرامیله  
آنلرک ناحیه سه نه کیتدکده بر دسیسه ایله آنلری اعدام ایتمکه قرار  
ویرمشله .

ایچلرندن ( سَلام ابن مُشَکَم ) ، آنلره « سز ، بوافکاردن وازچیگز .  
والله بو سزک سوء قصدیگز آ کا طرف الّهیدن خبر ویریلور . بو قصدیگز  
ایسه آنکله بینمزده کی عهدی نقض دیمکدر » دیو نصیحت ایلش ایسه ده  
قولاق آصمامشله .

حال بوکه جبریل علیه السلام ، کلوب ( بنی نضیر )ک سوء قصدینی  
رسول اکرمه خبر ویردی .

رسول اکرم دخی « اون کون ایچنده بو دیاردن چیقوب کیتسونلر »  
دیو ( محمد ابن مسلمه ) ایله بنی نضیره خبر کوندردی .

بونك اوزرينه بنى نضير دخى ترك وطن ايدوب كىتمكه حاضر لاقمده  
ايكن رئيس المناقين اولان ( عبدالله ابن ابى ابن سلول ) آنلره « يريكزده  
ثبات ايدىكز. بز ، سزه ياردم ايلرز. يهود بنى قريضة ايله معاهد و متفقكز  
اولان قبيله غطفان دخى امداد ايدرلر » ديوكيزلوجه خبر كوندرمىش اولديغندن  
بنى نضير ، اولكى نيتلرندن واز كچهرك : « بز ، وطنمزدن چيقمايز .  
الكدن كلنى كيرو قويمه » ديو رسول اكرمه خبر كوندرديلر .

آنك اوزرينه ، رسول اكرم ، هجرتك اشبو دردنجى سنه سى  
ربيع الاولنده اصحاب كرامى طوپلادى و مسجد شريفده امامت ايتمك اوزره  
ابن ام مكتومى مأمور ايلدى .

لواء شريفى حضرت على به و يروب اردوى سعادت ايله خارج مدينه به  
چيقدى و بنى نضيرى محاصره ايتدى .

ابن سلول ، علناً معاونته جسارت ايدمدي . بنى قريضة ايله غطفان  
قبيله سندن دخى امداد كلدى .

بناءً عليه بنى نضير ، آلتى كون محاصره و اوق و طاش آتيله رق تضيق  
اولندقدن صكره امان ديله ديلر .

شويله كه : اسلحه دن ماعدا اولان ماللرندن ده وه لرينه يوكله ده بيلدكلرى  
قدر شى آله رق چيقوب كىتمك اوزره مساعده استدا ايلديلر .

رسول اكرم دخى بو صورته مساعده بيورمقله آلتى يوز ده وه به  
يوكله ده بيلدكلرى قدر اموال و اشيا آلوب كيى خيبره و كيى ديار شامه  
كىتديلر . منافقلىر دخى كيزلوجه ماتم ايتديلر .

بنى نضيرك ، سائر ماللرى رسول اكرمه قالدى واللى قدر زره ايله  
اللى تيمور طاس و اوچيوز قرق قليچ ، يد اسلامه كچدى .

انصار كرام حضراتى ، مهاجرينك امر تعيشلرينى اوزرلرينه آلوب  
آنلرى كندى ماللرينه بيانى حصه دار ايلدكلرندن مهاجرينك امر اداره لرى  
انصار اوزرينه ايجه بر يوك ايدى .

ايشته آنلرك بو ، يوكنى تخفيف ايچون ، رسول اكرم بنى نضيردن

آلئان اموال غنائمی یالکز مهاجرینه تقسیم ایتمک ایستدی وانصاره «اگر ایستر ایسه کز کما فی السابق مهاجرینی اموالکزه حصه دار ایتمک اوزره بو اموال غنائمی جمله کزه تقسیم ایدهیم . یوقا اگر ایستر ایسه کز کندی اموالکز منحصرأ سزک اولمق اوزره بو اموال غنائمی مهاجرینه ویرهیم» دیدی .

انصار کرام حضراتی ایسه « یارسول الله ! بو اموالی، مهاجرینه تقسیم بیوریکز. بزم ماللریمزدن دخی ایستدیککز قدرینی آلوب آنلره ویریکز» دیدیلر .

اووقت ابوبکر الصدیق رضی الله عنه حضرتلری، قالقوب انصار کرامه علناً عرض تشکر ایلشدر واووقت انصارک مدح وثناسی حقنده (ویوثرئون علی انفسهم ولوکان بهم خصاصة) آیت کریمه سی نازل اولمشدرکه : احتیاجلری اولسه بیله نفسلری اوزرینه مهاجرینی تقدیم و ترجیح ایدرلر. دیمکدر .

بناءً علی ذلك بوکره بنی نصیردن قالان اموال غنائم، یالکز مهاجرینه تقسیم ایدیلدی .

فقط رؤسای بنی نصیردن (ابن حقیق) ک مشهور قلیجی، سعد ابن معاذ رضی الله عنه حضرتلرینه احسان بیورولدی .

وینه انصاردن (ابودجانه) ایله (سهل ابن حنیف) رضی الله عنهما حضرتلرینک فقر و احتیاجلری اولدیغندن آنلره دخی بر مقدار شی ویریلدی .

مؤخرأ قبائل نجددن (غطفان) قبیله سنک مدینه منورهیه هجوم ایتمک اوزره عسکر طوبلادقلری ایشیدیلکله رسول اکرم، داماد مکرملری عثمان ذی النورین رضی الله عنه حضرتلرینی مدینهده قائم مقام براغوب اردوی هایون ایله دیار نجده سفر ایتدی و اراضی غطفاندن مدینهیه ایکی قوناق مسافه سی اولان (شدخ) نام محله قدر کیتدی. لکن اهالیسی، قارشو طور میوب طاغلره طاغیلمش و بوجهتله محاربه وقوع بولمقسزین عودت بیورلمشدر .

اشبو دردنجی سنه هجریه نك شعبانده سیده النساء فاطمة الزهرا  
رضی الله عنها حضرتلندن حضرت (حسین ابن علی) رضی الله عنهما  
تولد ایلشدر .

بنی مخزومدن (امیه ابن مغیره) نك قیزی اولان (امّ سلمه) رضی الله  
عنها حضرتلری که قرق درت یاشنده برطول خاتون ایدی . رسول اکرم ،  
بوئانده آنی تزوج بیورمشدر .

بدرده هر سنه ذی القعدة آینده برپانایر اولوردی وهرطرفدن اورایه  
تجارت ایچون برچوق خلق کلوردی .


یوقاروده بیان ایتدی کمز وجهله ابوسفیان ، احدثدن دونوب کیدرکن  
« سزکله کله جک سنه بدرده بولوشالم » دیوب عمرالفاروق رضی الله عنه  
حضرتلری دخی رسول اکرمک امریله « ان شاء الله » دیمشیدی .

بناء علی ذلک رسول اکرم (عبدالله ابن رواحه) بی مدینه قائم مقامی  
نصب وتعیین بیوردی . لواء شریفی حضرت علی یه ویردی و بیك بشیوز  
نفر اهل اسلام ایله مدینه دن چیقوب غره ذی القعدة بدره واردی .  
ایچلرنده اون نفر آتلو دخی وار ایدی .

ابو سفیان دخی قریش اردوسیله مکهدن چیقمش ایکن رسول اکرمک  
اویله جمعیت کشیره ایله مدینه دن چیقمش اولدیغنی ایشیتمکه قورقوب  
کیرو دوندی .

بو جهتله انظار قبائلده قریش مکه نك اعتباری قیریلدی . اهل اسلام  
ایسه پک چوق شان و شرف بولدی .

پانایرده کوزل آلیش ویریش اولوب آندن اهل اسلام ، پک زیاده  
کار ایتدیلر وکال فرح و منونیت ایله دونوب مدینه یه کلدیلر .



## هجرتك بشنچي ييلي

هجرت نبويهك بشنچي سنه سی ربیع الاولنده رسول اکرم (دومۀ الجندل) بلده سنه سفر ایتدی .  
بو بلدهك مدینه منوره ایله آره سی اون بش كونلك ودمشق ایله آره سی بش كونلك مسافه در .

اوراده بر طاقم اشقیا اولوب یولجیلره تعرض ایلدکاری جهته آنلری تأدیب ایتک ، همده اهل اسلامك دیار شام ایله تجارتی تأمین ایلک اوزره رسول اکرم ، خلال ربیع الاولده بیك نفر عسا کر اسلامیه ایله مدینه دن چیقوب (دومۀ الجندل) یاقلاشدقده اولده اهاالینك حیوان سوریلرینه راست کلدی . چوبانلر فرار ایتمکله حیوانلر میدانده قالدی . بعده دومۀ الجندل بلده سنه واریلدی .

اهالیسی هپ طاغیلوب فرار ایتمش اولدقلرندن یالکز ایچلرندن بر آدم اله کچوريله بیلدی ورسول اکرم ، آکا دین اسلام تکلیف ایتدکده اسلام ایله مشرف اولدی .

رسول اکرم ، اوراده برقاق کون اقامت ایله اطرافه قول قول عسکر چیقاردی . هیچ کیمسه یه تصادف اولنه مادیغندن بلا محاربه مدینه یه عودت بیوردی .



## غزوۀ مُرِیسِیع

( مرِیسِیع ) خزاعہ دیارندہ ( قُدَید ) ناحیہ سنده بر صویک اسمیدر کہ  
( فُرْع ) ہ بر کونلک مسافہ سی واردر . فرع دخی مدینہ یہ اوتوز ایکی  
ساعت مسافہ دہ واقع بر یردر .

( خُزاعہ ) قبیلہ سندن ( بنی مُصْطَلِق ) اویماغنک رئیس اولان ( حَرِث  
ابن ابی ضَرَار ) اهل اسلام ایلہ جنک ایتک اوزرہ کرک کندی عشیرتندن  
وکرک جوآرنده کی عسا کر سائرہ دن عسکر طوپلامقدہ اولدینی خبر آلندی .  
ہان رسول اکرم ، بیک نفر عسا کر اسلامیہ ایلہ شعبان آیندہ عجلالہ  
مدینہ دن چیقدی .

ایچلارندہ اون نفر آتلو وار ایدی . ( عایشہ ) و ( ام سلمہ ) رضی اللہ  
عنہما حضرتلری دخی برابر ایدی .

بو اردوی ہایونده منافق چوق ایدی . ہیج بر وقتہ اردوی اسلام  
ایلہ بو قدر منافق چیقدینی یوق ایدی .

رسول اکرمک مدینہ دن چیقدینی خزاعہ ایچندہ ایشیدیلدی . حرث  
ابن ابی ضرارک باشندہ کی جمعیتہ عظیم قورقو عارض اولدی ویانندہ مجتمع  
اولان عربان طاغیلدی .

آنلر ، پراکنده اولہرق ( مرِیسِیع ) نام صودن حیوان صولارایکن  
بقعہ اردوی ہایون کلوب چاتدی .

رسول اکرم ، آنلرہ « لا الہ الا اللہ دہ ییکز کہ جان و مال کزدن  
امین اولاسکنز » دیو دین اسلامی تکلیف ایتدی .



آنلر دیکله میوب باشی بوزوق طرزنده مقاومتہ قالقشدیلر وهان اوق جنکنه کیرشدیلر .

رسول اکرم ایسه عساکر اسلامیہ یی صف ایتدی و آنلری هیئت مجموعہ لر یله دشمن اوزرینه یوروتدی .

بنی مصطلق طائفه سی ، بوهجومه طایانامایوب درحال پریشان اوله رق اون نفری تلف وسائری اسیر اولدی . بش بیک قیون ایله اون بیک ده وولری اله کچیرلدی .

اسیرلرک مقداری ، یدی یوزدن زیاده اولوب آنلردن بریسی دخی حرث ابن ابی ضرارک قیزی ( جویریہ ) ایدی که ( ثابت ابن قیس ) ک حصه سنه دوشمش واودخی آنی بدله کسمش ایدی .

فخر عالم ، صلی الله علیه وسلم حضر تلی ، آنک بدلی ویردی و کندوسنه تزویج بیوردی .

اصحاب کرام ، آنی کورونجه « رسول الله اکبر اقباسی نصل اسیر اولور؟ » دیه رک هپ اللرنده کی اسیرلری آزاد ایلدیلر .

جویریہ ، نه بختیار قیز ایش که بر کونده اسیر ایکن هم زوجیت نبویه سعادت ی بولدی ، همده قومنک اسارتدن قورتولماسنه سبب اولدی .

آندن عودت ایله مدینه یه کلور ایکن اثنای راهده مهاجریندن بری ، انصاردن بریله منازعه و مجادله ایتدکده رئیس المنافقین اولان ( عبدالله ابن ابی ابن سلول ) یاننده کی آدم لرینه « هله شوم مهاجرینه باقی کز که بزم اعانه مزله کچینورلر ایکن بزلی تحقیر ایتک ایستیلرلر . آرتق آنلره برشی ویرمه یکنز که طاغیلوب کیتیلر . هله مدینه یه وارالم . دها زیاده عزت و غلبه سی اولان ، البته دها ذیل اولانی اورادن چیقاریر » دیمش و مدینه یه واریلدقده اورادن اهل اسلامی چیقاریرم ! معناسنی قصد ایتمش .

حال بوکه ، آنک بو سوزینی ( زید ابن ارقم ) رضی الله عنه حضر تلی ایشیتمکه کلوب رسول اکرمه افاده ایتدکده عمر الفاروق رضی الله عنه

حضرتلری، مجلس سعادتده بولمغله « یارسول الله! اذن ویر واروب اومنافقک وینوتنی اورایم، دیمش ایسهده رسول اکرم، اذن ویرمه مشدر. بو غزانک مدتی، یکریمی سکز کون سوردی و غره رمضانده اردوی مایون مدینه یه کیردی،

(سلمان فارسی) رضی الله عنه حضرتلری که رسول اکرمک خواص خدا مندن و کبار اصحاب کرامنددر. فی الاصل فارس، یعنی ایران اها لیسندن و مجوس طائفه سندن ایکن بر آراق نصاری دینه کوروب دیار شامه کیتمش و راده تحصیل علوم دینه ایتدکن صکره (نینوا) و (آموریه) طرفلرینه واروب رسول اکرمک ظهورینی ایشیتمش و (بنی کلب) دن بر گروه صارا ایله یولداش اوله رق جانب مدینه منوره یه عزیمت ایتمش.

یولداشلری اولان نصارا ایسه غدر ایدرک آنی بر یهودی یه صاتمشر. آندن دیکر بر یهودی صاتون آلوب آنی مدینه یه کتوردی.

سلمان، بر آراق حضور نبوی یه کلوب حالی بیان ایتدی و کندوسنی کتابته کسیدردی، یعنی بدله ربط ایتدیردی. بواثانده رسول اکرم آنک دلنی تأدیه بیوردی.

ایشته بوجورتله سلمان فارسی رضی الله عنه حضرتلری دخی بوسنه رسول اکرمک آزادلولری صره سنه کچمشدر.





## غزوۀ خندق

یوقاروده بیان ایتدیکمز وجهله یهود طائفه سندن (بنی قینقاع) اید (بنی نضیر) مدینه دیارندن طرد ونفی اولمشدی .

(حیی بن اخطب) و (کنانه ابن ابی الربیع) و (سلام ابن ابی الحقیق) و امثالی رؤسای یهود ، مکیه کیدوب رسول اکرم ایله جنک ایتک اوزر قریش طائفه سیله اتفاق ایتدکن صکره دیار نجده کیتمشلر . (غطفان و) (بنی سلیم) قبیله لرله دیگر بعض قبائلی دخی بو اتفاقه ادخال ایتمشلر . آنک اوزرینه رؤسای قریش ، دارالندوده طویلانوب رسول اکرم ایله جنکه قرار ویرمشلر ودرت بیک عسکر طویلانمشلرکه اوچیوزی آتا اولوب بیک بشیوز ده وه لری دخی وار ایدی . رئیساری ابوسفیا و سنجاقدارلری ابوطلحه نک اوغلی (عثمان) ایدی .

ابوسفیان بواردو ایله مکدن چیقوب (مصر الظهران) نام محله کلدکد نجد طرفندن غطفان عساکری کلوب قاتیلدی که باش قوماندانلری (فزار) قبیله سی شیخی اولان مشهور (عینه ابن حصن) اونوب (بنی مره) قبیله سی شیخی اولان (حارث ابن عوف) دخی آنلرک خاطری صاییلور رئیسارند ایدی .

ینه اوراده قبائل نجددن (بنی سلیم) و (بنی اسد) و (اشجع) قبیله لری دخی کلوب قریش اردوسنه ملحق اولدی .

الحاصل ابوسفیانک اردوسی ، کیتدکجه بیودی واون بیک نفردن زیا اولان برقوی اردوایله مدینه منوره یه طوغری یوریدی .

رسول اکرم ایسه قریشک بوتشباتنی ایشیدیکی کبی اصحاب کزینی جمع ایله استشاره ایتدی .

سلمان فارسی رضی الله عنه حضرتلری « یارسول الله ! بزم ولایتزده بر شهر اوزرینه دشمن هجوم ایدم جک اولدقده اطرافنه خندق قازمق عاتدر » دیدی .

عربده خندق قازمق عادت اولماش ایسه ده سلمانک بو اخطاری اوزرینه مدینه منوره نك اطرافنه خندق قازیلهرق تحفظ و تحصن اولنق صورتی مناسب کورولدی .

همان مدینه ده نه قدر قازمه و کولنک امثالی آلات و ادوات حفریه وار ایسه طولانندی .

رسول اکرم ایله یهود ( بنی قریظه ) بیننده مصالحه و معاهده اولدینی جهته آنلردن دخی ایکرمتی اولهرق برخیلی قازمه و سائر آلات حفریه آلدی .

همان رسول اکرم ایله اهل اسلام ، کافه خارج شهره چیقوب خندق حفرینه باشلاندی .

رسول اکرم ، اهل اسلامی تشویق ایچون بالذات طوپراق طاشیر و مبارک اللریله خندق حفرینه چالیشیر ایدی .

بو جهته علی العموم اهل اسلام ، آشوری مرتبه اهتمام ایله خندق ایشنه چالیشوب چابالاردی .

سلمان فارسی رضی الله عنه حضرتلری ایسه هم بدنأ قوتلی ، هم ده بومثللو ایشلره آلیشیق اولدیغدن اون کیشینک ایشنی کوروردی .

منافقلر دخی بوایشه بولنورلردی . لکن ایستیمیه رک ایش کورورلر و بک آخر طاورانورلر ایدی .

او وجهله خندق قازیلورکن فخر عالم صلی الله علیه وسلم حضرتلرندن آزیمک ایله چوق آدم طویورمق کبی غریب معجزه لر ظاهر اولمشدر .

از جملہ انصار دین ( بشیر ابن سعد ) کہ قیزی کہ ( نعمان ابن بشیر ) کہ قیزقنداشیدر . والدہ سی آنکله پدری بشیر و دایسی ( عبداللہ ابن رواحہ ) یہ براز خرما کوندہ رمشیدی . رضی اللہ عنہم . اوقیزجغز کچرکن رسول کرم ، آتی چاغردی و « شو خرما لری کتور » دیو بیوردی .

اودخی خرما لری رسول اکرم کی اوجنہ قویدی ، آووجلری طولمادی . حال بوکہ : فخر عالم ، بریز کتوردی و خرما لری اوبزک اوزرینہ یایدی و اصحاب کرامدن برینہ امر ایتدی . خندقده ایشلیانلری چاغرتدی . طاقم طاقم کلدیلر ، هپ طویونجه یدیلر . آنلر یدجکه خرما زیاده لشوب اودوشه منک اطرافندن طاشاردی .

ینہ انصار دین ( جابر ) رضی اللہ عنہ حضرتلرینک برضعیف قویونی وار ایدی . برکون خندق حفرینہ کیدرکن اوقویونی پیشیرمک و برازدہ آرہہ اکمکی یایمق اوزرہ زوجہ سنہ امر ایتمشیدی . آقشام اوستی خانہ سنہ عودت ایدرکن رسول اکرمی آقشام طعامنه دعوت ایتدی .

رسول اکرم دخی « بو آقشام رسول اللہ ایله برلکده طعام ایتمک اوزرہ جابرک خانہ سنہ بیوریکز » دیو دلال چاغرتدی . جابر ایسه یالکیز رسول اکرمی دعوت ایتمش اولوب بویله براردو خلقی ایچون هیچ حاضرلنی اولمادیغندن نہ یایه جغنی شاشردی . آرتق نہ یاپسون ؟ چاره یوق . همان خانہ سنہ کلدی و بر مقدار آرہہ اکمکی ایله اوقویونی حضور نبوی یہ کتوردی . فخر عالم ، آکا برکت ایله دعا ایتدی و بسم اللہ دیوب یدی . بعده هپ خندقده ایشله یین خلق کلدیلر . طاقیم طاقیم اوتوروب طویونجه یدیلر و بر قویونی بتورہ مدیلر .

ینہ او انساده ظہورہ کلن معجزات محمدیہ دن بری دخی بودرکہ : خندق بر یرندہ بر بیوک قایا چیقدی . کولنکلر ایشله من اولدی . اصحاب کرامدن بعضیلری کلوب رسول اکرمہ خبر ویردی .

رسول اللہ ، اورایه واردی . مبارک الہ کولنکی آلدی و بسم اللہ دیوب آوردی . او قایانک اوچده برینی یرندن قوباردی .

همان «الله اکبر». بکاشامک آناختارلری ویریلدی. واسه بن، شوساعتمه شامک قیرمزی کوشکلرینی کورو یورم «دیو بیوردی».

بعده، ینه بسم الله دیوب کولنک ایله اوردی و او قایانک دیگر اوچده برینی دها قوپاردی.

همان «الله اکبر». فارس اقلیمنک آناختارلری ویریلدی. والله بن شو آندم مدائن کسمرانک بیاض کوشکلرینی کورو یورم «دیو بیوردی».

آندن صکره اوچنجی دفعه اوله رق ینه بسم الله دیوب کولنک ایله اوردی و او قایانک بقیه سنی دخی یرندن قوپاردی.

ینه «الله اکبر». یمنک آناختارلری ویریلدی. والله بن شیمدی صنعانک قبولرینی کورو یورم «دیو بیوردی».

ایکی هفته ایچنده خندق تمام اولدی. بعده مشرکینک بالاده بیان اولونان بیوک اردوسی کلدی.

شویله که: ابوسفیان ایله قریش و کنانه عساکری، مدینه منوره نك کون باطیسی طرفندن کلوب کوروندیلر.

عینه ابن حصن و حارث ابن عوف ایله قبائل نجد دخی کون طوغیسی طرفندن کلوب احد طاعی جهتده قوندیلر.

رسول الله دخی عساکر اسلامیه ایله خارج شهره چیقوب (سَلْع) نام طاغه آرقه ویردیلر و دشمنه قارشو صف اولوب طور دیلر.

عساکر اسلامیه، اوچ بیک نفر ایدی و او توز آلتی آتلی واری ایدی.

مهاجرینک سنجانغی (زید ابن حارثه) حضر تلرینک الندم وانصارک سنجانغی (سعد ابن عباده) حضر تلرینک الندم ایدی.

کروه مشرکین، برحمهده اهل اسلامی یتیرمک اوزره مدینه منوره اوزرینه یورودی. خلق خوف و دهشت بورودی.

حال بوکه مشرکیر، او یله دهشتله هجوم ایدوب کلورلرکن اوکلرینه



خندق چیقیدینی کی طورہ قالدیلر و بویله خاطرلرینه کلمدک بر نقش غریب کوردکلی کی باقوب حیران اولدیلر .

اوتیه برویه طولاشدیلر، کچه جک یر آرادیلر، بولامادیلر وهرنه طرفه سکیرتدیلر ایسه برو طرفدن اوق و طاش ایله مدافعه اولندیغندن چاره سز آنلر دخی اوق و طاش جنککنده قرار قلدیلر .

بو صروده بنی قریضه نك نقض عهد ایتدکلی و اهل اسلام، خندق محافظه سیله مشغول ایکن آنلر، کیجه لین کلوب مدینه شهرینی باصاجقلی حوادثی شیوع بولدی .

بنی قریضه، یهود ملتندن بر بیوک قبیله اولوب مدینه منوره خارجنده کائن بر ناحیه ده ساکن ایدیلر . اوراده متین حصارلری وار ایدی . رئیسلی اولان ( کعب ابن اسد ) ایله رسول اکرم پیننده مقدما معاهده یاییلمش اولدیغندن اهل اسلام، او طرفدن امین ایکن نقض عهد ایتدکلی حوادثی موجب اندیشه اولدی .

بنی قریضه ناحیه سنه آدم کوندریلوب تحقیق کیفیت اولندقدن فی الواقع بنی نضیرک رئیسلی اولان ( حی ابن اخطب ) کلوب کعب ابن اسدی قاندرمش و بنی قریضه یه نقض عهد ایتدیرمش اولدینی آکلاشیلدی .

بنی قریضه ایسه ( اوس ) قبیله سننک عهد و امانی آلتنده بولندیغندن ( سعد ابن معاذ ) و ( سعد ابن عباد ) و ( عبدالله ابن رواحه ) و ( خوات ابن جبر ) رضی الله عنهم حضراتی، بنی قریضه نك حصارینه کیتدیلر . نقض عهدک شأمتی بیان ایله نصیحت ایتدیلر ایسه ده قولاق آصایوب نقض عهد ایلدکلینی اعلان ایلدیلر و رسول اکرم حقنده فنا سوزلر سویلدیلر .

بو معاملهدن سعد ابن معاذک پک زیاده جانی صیقیلوب حتی « بنی قریضه ایله جنک ایتدکجه الله جانمی آلماسون » دیو دعا ایتشدی .

الحاصل سعد ابن معاذ رضی الله عنه، یهودک نصیحت قبول ایتما ملرندن

مایوس اولغله « خوشمدی ! » دیهرك آرقداشلیله برابر دونوب حضور نبوی به کلدیلر و کیفینی اولدینی کبی افاده ایلدیلر .

رسول اکرم ، « حسبنالله ونعم الوکیل » دیدی و « مژده سزه ای جماعت مسلمین که بو ایشک صوکی خیردر » دیو بیوردی .

بونکه برابر هپ نسوان و صبیان، درون شهرده اولدقلرندن بنی قریضه نك نقض عهد ایدیشی اهل اسلامی تلاشه دوشوردی .

بناءً علیه رسول اکرم ، کیجه لری مدینه شهرینی محافظه ایچون اوچوز نفرله (زید ابن حارثه) حضرتلرینی وایکیوز نفرله (سلمة ابن اسلم) حضرتلرینی کوندردی .

کندوسی دخی باقی عساکر اسلامیه ایله صباحه قدر خندق خطنی محافظه ایلردی و خندق بر محلی ، صورت مطلوبه ده قازیلاماش اولدیغندن کیجه لین دشمنك اورادن کچه بیلیمی ماحوظ اولمسیله رسول اکرم اوراسنی بالذات بکلردی .

کروه منافقین ایسه « اولاد و عیالیزی یالکز بر اقوبده بوراده سفالت ایله بکله مک عاقل ایشی دکلدر » دیهرك بر طاقم بینی خفیف و اعتقادی ضعیف اولانلره وهم و وسوسه ویریلردی .

بناءً علی ذلك، خارج شهرده خانه سی اولانلردن بعضیلری ، حضور نبوی به کلوب « بزم خانه لری میز مستحکم دکلدر » دیهرك خانه لری نه استحکام و یرمک و اولاد و عیاللرینی محافظه ایتمک بهانه سیله صاووشوب کیتمک اوزره رخصت ایستدیلر . برده مدت محاصره ، اون بش کون قدر سوردی . عساکر اسلامیه به فتور کلدی و قحط و غلا ایله مضایقه لری کوندن کونه زیاده اولدی . بو جهتله پک زیاده جانلری صیقیلدی .

منافقلر، بو حاللری فرصت اتخاذا ایلدیلر و « محمد ، بزه قیصر و کسرانک خزینه لرینی وعد ایدیور . بزلر ایسه بو کون خندق ایچنده محبوس اولوب بر آدیم یره کیده میورز » دیمکه باشلادیلر .

حال بوکه طوائف عرب، بویه محاصره ایشلرینه آلیشیق دکلرایدی .

آنلرك محاربه لری چارپیشوب اوروشمق و غالب و مغلوب هر نه اولور ایسه اولسون جنکه بر نتیجه و یروب صاووشمق ایدی .

بناءً علیه بویه عربستانده عادت اولمایان بر خندق اطرافنده هفته لرجه طولاشمقدن طیشاروده کی دشمن دخی اوصانوب صیقلمش ایدی .

على الخصوص قیش موسمی اولدیغندن کندولری اوشویوب تیره مکده و حیوانلری یسه جک علف بولامایوب تلف اولمده ایدو کندن شاشوب قالمش ایدی .

الحاصل آمده خندق اولدیغندن ایکی اردو بر بریله چارپیشامیوب همان اوق آتشمقده ادیلر .

فقط ( عامر ابن لوی ) نسلندن ( عمرو ابن عبود ) نام جندی بنام و بنی مخزومدن ( عکرمة ابن ابی جهل ) و ( هیزه ابن ابی وهب ) و ( نوفل ابن عبدالله ابن مغیره ) ایله حضرت عمرک برادری اولان ( ضرار ابن الخطاب ) و ( مرداث ابن محارب ) نام جندیلر ، آتلینی زورلایوب خندق بر طار محلندن برو طرفه آتلا دیلر .

( ابوسفیان ) ایله ( خالد ابن الولید ) دخی آنلره آرقه اولق اوزره بر فرقه مشرکین ایله خندق کنارینه قدر کل دیلر . فقط خندق کچمییوب اونه طرفده سیرجی کی طور دیلر .

عمرو ابن عبود ، آرقداش لرندن آریلوب وایلو آت سوروب ار دیله دی .

اشبو عمرو ایسه پک چوق وقع لر کوروب کچورمش ، اعداسنه غلبه ایتش ویا لکز باشنه نیجه جمعیتلری اوروب طاعتیمش ، اقرانی یوق بر بهادر و سلا حشور لقمده ماهر بر سواری ایدی . جمله قبائل عرب ، آتی بر بلوک سواری به مقابل طوتارلردی .

آنکله دوکوشمک ، آرسلان ایله پنجه لشمک کی اولوب بوکا ایسه فوق العاده جسارت و جرأت کرک ایدی . بناءً علیه کیمسه آکا قارشو وارمغه رغبت ایتدی .

رسول اللهك أرسلاني حضرت علي « آ كا قارشوبن چيقارم يارسلو الله »  
 دیدکده رسول اکرم « سن اوطور یاعلی ! کلن عمرودر » دیو بیوردی .  
 عمرو ، تکرار اهل اسلامه میدان او قودی و « ایچیک زده میدان  
 مبارزه چیقاجق ار یوقیدر ؟ هانی سنك اولور کزه تعیین ایتدیکنگز  
 جنت نرده ؟ » دیدی .

حضرت علی ، تکرار چیقماق ایستدی . رسول اکرم ، ینه رخصت  
 ویرمدی .

عمرو ایسه بتون بتون شماردی و « ار میداننه چیقاجق کیمسه یوقمی ؟ »  
 دیهرک اوست پرده دن باغردی .

آنك اوزرینه حضرت علی « عمروده اولسه چیقارم یارسلو الله »  
 دیهرک یرندن قالقدقه رسول اکرم ، کندی زرهنی آ کا کیدردی  
 و ( ذوالفقار ) نام قلیجی آنك بلنه قوشا تدی و « یارب ! عثم عیمده ،  
 بدرده و عثم حمزه احده شهید اولدیلر . یانمده بر برادر زاده م علی قالدی .  
 سن آنی محافظه ایله . بنی یالکز براقه » دیو دعا ایتدی .

حضرت علی ، پیاده اوله رق میداننه چیقوب عمروه طوغری واردی .  
 ایکی اردو خلقی تماشا یه طور دی . علی رضی الله عنه ، ابتدا عمروی دین  
 حقه دعوت ایلدی .

عمر ، وقهقهه ایله کوله رك « بو آغزله بر کیمسه نك قارشومه چیقاجنی  
 خاطریمه کلزدی . سن کیمسین ؟ هله سویله باقیم » دیو صور دی .  
 اودخی « علی ابن ابی طالبم » دیو جواب ویردی .

عمرو « سنك عمو جهلرك ایچنده میداننه چیقاجق یاشلی باشلی بری یوقمی ؟  
 آ برادر زاده م ! سنك آغزك حالا سوت قوقار . بن سنك پدرکله پك  
 چوق وقت قرن داش کبی کوروشدم . شیمدی سنك قانگی دوکمک بکا  
 کوچ کلور » دیدی .

حضرت علی « اوت . اما بن سنك قانگی دوکمکله محظوظ اولورم .  
 فقط سنده آتندن اینوبده بنم کبی پیاده اولمالیسك » دیدی .

بوسوز، عمروك حيت جاهليه سنه طوقوندى. بك زياده اوفكه لندى  
و همان آتندن ايندى .

صاعقه كې حضرت علينك اوزرينه هجوم ايتدى. اودخى قالقاتى قارشو  
طوتدى .

عمرو، اويله حدت و شدت ايله بر قليج اوردى كه حضرت علينك  
قالقاتى ايكي پاره ايلدى وباشنى براز يارالادى .

نوبت حضرت على يه كلنجه ذوالفقار ايله بر اوروشده عمروى قتل  
واعدام ايلدى .

بعده ( نوفل مخزومى ) ميدان مبارزه آت سوردى ( زبير ابن العوام )  
رضى الله عنه حضرت تارى دخى آكا قارشو واردى وقليج ايله اويله اوردى كه  
نوفلى يوقارودن اشاغه ايكي شق ايدرك آلتنده كى اكرى كسديرى .

بونك ايچون حضرت زبيره « سنك قليجك كې قليج كورمديك »  
ديدكلرنده « آنى ياپان قليج دكلدر ، بيلكدر » ديمش اولديغى مرويدر .

بعده حضرت عمر الفاروق رضى الله عنه حضرت تارى ، قرن داشى (ضرار)  
اوزرينه هجوم ايتدكده حضرت على و زبير رضى الله عنهما دخى عكرمه  
و هيره و مرداث اوزرلرينه هجوم ايدنجه دردى بردن كيرو دونديلر  
و كلكلكرى يردن چيقوب كيتديلر .

عكرمه ، جان قورقوسيله قاچوب كيدركن مزراغنى دوشورمش  
اولديغندن حضرت حسان رضى الله عنه ، آنى تعقيب ايدرك بيتلر سويلشدر .

عمروابن عبدودك اووجهله ميدان مبارزه ده دوشوب قالمسى ، مسلمينى  
فوق العاده ممنون و مشركينى بك زياده دلخون ايتدى و ابو سفيان « بوكون  
بزم ايچون بر خيرلو ايش يوق » ديهرك خندق باشندن چكيلوب اردوكاهنه  
كيتدى .

فرداسى بالجمله مشركين ، يهود بنى قريضه ايله برلكده هر طرفدن  
اهل اسلامى احاطه ايتديلر و آقشامه قدر اهل اسلامه كوز آچدرميوب  
بيدر پى اوق آتديلر .

قحط و غلا ايله اهل اسلام ، پك زياده ضعيف و بي بحال دوشمش  
ولدقلى حالدہ كروه اعدا ، بويله قره بولوت كي هر طرفدن احاطه و تضيق  
يدنجه حاللى پك يمان اولدى .

هله آقشام اولوب دشمن چكيدى . اهل اسلام دخى بر مقدار نفس  
آلدى .

لكن « اعدا ، يارين ينه بويله هر طرفدن شدتلى هجوم و تضيق ايدرسه  
حالمز نه اولور ؟ » ديهرك هر كس تلاش و اندیشه اوزره ايدى . جناب حق  
يسه آنلرك خلاصى ايچون لازم اولان اسبابى حاضر لامشدى .

شويله كه ( نعيم ابن مسعود غطفانى ) او ائنده ايمانه كلوب آنجق هنوز  
اسلامنى اظهار ايتلامشدى .

خندق كنارينه كلوب قره غوللرك اذنيه برو طرفه كچدى . هان  
حضور نبوى كه كيردى و كلمه شهادت كتوردى و « قبائل عرب ، هنوز  
نم اسلامى بيلمزلر . امر ايدرسه كز شو حالدہ دين اسلامه بر خدمت  
يده بيلورم » ديدى .

رسول اكرم « محاربه ، بر نوع خدعه و حيله در . سن ده بزم ايچون  
ر حيله ايديور » ديو بيوردى .

نعيم ايسه ( اشجع ) قبيله سى اشرافدن هر ايشه يارار ، جن فكرلى ،  
دبّر بر آدم ايدى .

هان قالقوب بنى قريضة ناحيه سنه كيتدى و ( كعب ابن اسد ) ايله  
بلاقات ايتدى .

كعبك ياننده معتبران يهوددن بر قاچ كيمسه اولدينى حالدہ نعيم ، آنلره  
اي اشراف بنى قريضة ! سزى نه قدر سوديكى بيلورسكز . مجرد  
خلوص و محبت حسييله قاچ كوندر سزك حالكزى دوشونيورم » دينجه  
هوديلر « بزم سكا هر وجهله امنيتمز واردر . سويله باقالم » ديمشله .

آنك اوزرينه نعيم « بن ، شوراسنى دوشونيورم كه قبائل قريش  
غطفان ، بورايه كلديلر . محمدلىرى بتورمك اوزره غيرت ايديورلر .



لكن آنرده مقاومت و مدافعه دن هيچ كړو طور ميورلر . بوقبائل ،  
آرتق اوصانمغه باشلادی . پك صيقلورلرایسه سزی يالكز براغوب كيدرلر .  
سز ، محمدیرك پنجه سنه دوشرسكز . تقض عهد ايله متهم اولديغكز جهته  
آرتق ياقه گزی آنلك الندن قورتارامازسكز . بكا قالورسه سز قریش  
و غطفانك اشرافندن بر طاقم آدملى رهن آماليسكزكه آنلر دخ  
ايشى بتورمدكجه شاووشوب كیده ميهلر ، دینجه يهوديلر ، آنك سوزیخ  
تصديق ايتملر .

نعیم ، اورادن قالقوب ابو سفیانك مجلسنه وارمش « خبركز وارمی  
يهود طائفه سی ، محمدك عهدينى بوزدقلرينه پشیمان اولملر و آنكله كيزلوج  
اتفاق ايتملر . صوجلرينى عفو ايتدرمك اوزره قریش و غطفانك اشرافندر  
رهن صورتيله بر طاقم ذواتى آلوبده آكا ویرمكى وعد ايتملر . شاید  
سزلردن رهن ايسترلرایسه صاقين ویرميكز . زیرا بر طاقم اشرافكز  
يازيق اولور ، ديهرك رؤسای قریشی شهيه دوشورمش .

ابو سفیان دخى بنى قريضة نك افكارينى يوقلامق اوزره « بز ، بورا  
سزك رؤسا كزك تشويقيه كلذك . سز شمدى آغر طاورانورسكز  
بوراسى ايسه بزه كوره اوزون اوزادى يه اوتورولاجق ير دكلدر . آچلقد  
عسكریمز شكایت ايديور . حيوانلریمز تلف اولوب كيديور . بارى يار  
هپ برلكده بر شدتلى هجوم ايدلم و همان ايشه بر نهايت ویرهلم » د  
آنلره خبر كوندرمىش .

بنى قريضة « يارين جمعه ايرته سيدر . بز هيچ بر ايشه ياپيشه مايز  
او بركون جنك ايدميبيلورز . فقط او شرطله كه بزه اشرافكزدن يتما  
كشيني رهن ايتليسكزكه آنلرى حصاریمزده توقيف ايدلم و سزدن ام  
اولالم » ديو جواب ویرمشر .

رؤسای قریش و غطفان ، بونى ايشتكلىرى كې « نعیمك دیديكى صحیح  
ایمش » دیمشر و « بز ، سزه نه رهن ویریرز ، نه ده سزدن امداد ايستر  
جانكز ايستر ايسه چيقوب بزمه برابر جنك ايدرسكز ، ايتمزه گز و با

بوینگزه . بزمملکت مزه کیده رز . سز ، محمدیلرک پنجه سنه گرفتار اولورسگز  
وبلا گزی بولورسگز ، دیو بنی قریضه یه خبر کونده رمش لر .

بنی قریضه دخی « نعیمک دیدیکی صحیح ایمش » دیهرک رسول  
اکرم ایله اولان معاهده لرینی نقض ایتدکارینه عیحا پشیمان اولمش لر وهمان  
حصارلرینه قبانوپ محاربه دن کیر و طورمش لر .

بو سیدن ناشی قبائل عرب ایله طائفه یهود آره سنه اختلاف دوشدی  
وایشک رنکی ده کیشدی .

اگرچه آندن صکره برقاچ کون دها محاصره ممتد اولدیسده محاربه ده  
اولکی شدت قالدی .

نهایت برکون رسول اکرم ، او یله ایله ایکندی آره سنده جناب حقه  
دعا و نیاز ایدرکن یوزنده آثار بشاشت کورولدی .

مکرکه جبرائیل علیه السلام کلوب الله تعالی حضرتلری طرفندن روز کار  
و ملائکه ایله امداد اولنه جغفی خبر ویرمش اولدیغدن رسول اکرم دخی  
اصحاب کرامنه مؤده ایلدی . وایکندی ایله آقشام آره سنده بریوک فورتنه  
ظهور ایلدی . روز کار ، هم صوغوق هم ده امثالی کورلمدک صورتده شدتلی  
اسمکه باشلادی .

روز کارک یردن قالدیردینی توزو طوبراق ، مشرکلرک یوزلرینه و کوزلرینه  
اوروب کوز کوزی کورمن اولدی .

آقشام طعمای پیشورمک ایچون آتش اوزرینه قویمش اولدقلری  
چوملکلی باش آشاغی ده وریلدی .

چادرلری ، چوجقلرک اوچوردقلری یلقوان کی هوا ده اوچغه باشلادی .  
متعاقباً آقشام اولدی ، قراکلق باصدی ، اورتالنی برمرتبه دها وهم  
و دهشت قاپلادی .

بوفورتنه ، دشمن اردوسنه مخصوص اولوب خارجده برشی یوقایدی .  
فقط عسا کر اسلامیه نك دخی کیمی صوغوقدن و کیمی آچلقدن طاعیلوب  
رسول اکرمک یاننده اوچوز قدر آدم قالمشیدی .

دشمنك خاندن خبر آلوده كوتورمك اوزره رسول اكرم اصحاب  
كزيندن (حذيفه ابن يمان) رضی الله عنه حضرتلريني كوندردی .

اودنخي واروب قریش اردوسنك ايچنه كيردی . كوردی كه : دشمن  
كندويي شاشيروب نه ياپه جغني بيلمور و ابو سفیان یأس و فتور كتوروب  
« ای جماعت ! بوراسی اوتوروب اكلنه جك یر دكلدر . حال بو كه بنی قریضه  
ایله دخی آره مزه اختلاف دوشدی . ايشته بن كيدیورم ، سزده كوی  
ایديكز ، دیوردی .

مرویدر كه : اووقت ، دشمنه دهشت ویرمك اوزره كوكدن بيك ملك  
اینشیدی . حتی دشمن اردوسنك اطرافنده تكبیر صدالری وسال-  
شيقيرديلری ايشدیلیوردی .

حذیفه رضی الله عنه حضرتلری ، دونوب كلوركن اثنای راهده كوزیه  
يكرمی قدر سواری كورینوب آكادیملر كه « دوستكه خبر ویر . الله تعالی  
حضرتلری ، آنك دشمنلريني طاغیتدی . »

حضرت حذیفه كلوب حضور نبوییه كیردی . وقوعاتی اولدیني كه  
خبر ویردی . رسول اكرم ، طاتلی طاتلی تبسم ایتدی .

الحاصل ابوسفیان ، ده وه سنه بینوب کیتدی . سائر طوائف قریش ده  
آنك آرقه سندن حرکت ایتدی .

فقط عمرو بن عاص ایله خالد بن الولید ، ايكوز نفر سواری ایله دمد  
نصب اولندقلرندن قریش اردوسنك آرقه سنی آلنجه یه دك آنلر کیرو  
قالوب ثبات ایتدیلر .

قبائل غطفان ، قریش اردوسنك کوچديکني كوردکارنده آنلر ده  
قالقوب دیار نجه کیتدیلر .

طوائف مشرکین ، اويله کیجه لین قالقوب کیدرکن خیلی ذخیره واشیا  
سائرلريني اردو یرنده براقش اولدقلرندن فرداسی اهل اسلام ، آنلر  
طوبلایوب اردوی هایونه كتوردیلر .

آندن باشقه یکریمی یوکللی ده وه دخی اله کچوردیلر که ابوسفیان، آنلری رؤساء یهوددن (حیی) نام شخصی کونده رمش، اودخی خرما و ذخائر سائره یوکلله دوب کیر و چورمش ایدی. عساکر اسلامییه، او ده وه لک چوغنی کسوب پیشوردیلر. خرمایی دخی بول بول ییوب قرنلرینی طویردیلر. بوصورتله عساکر اسلامییه، قحط و غلابلاسنندن قورتولد ی واردوی هایونده دفعه بوللق پیدا اولدی.

رسول اکرم، اصحاب کرامنه خطاباً «آرتق نوبت سزه کلدی. بوندن صکره قریش سزک اوزریکزه کله جک دکدر» دیو بیوردی. یومحاربه ده مشرک لک تلفاتی دوت نفردن عبارت ایدی. اهل اسلامدن دخی بش نفر شهید اولدی که ایکسی اوس قبیله سنندن واوچی خزرچ قبیله سنندن ایدی.

برده انصارك الكاولوسی اولان (سعد ابن معاذ) رضی الله عنه حضرتلری، محاربه نك صوك دورنده اوق ایله قولندن آغزجه یارالانمشدی. الحاصل شدتلو روزکار و کوزه کورنمز عسکرایله دشمن اردوسی بوزولد ی و اهل اسلام مظفر اولدی.

ذی الحجه آینه برهفته قاله رسول اکرم، خندق غزاسندن عودت ایله خانه سعادتنه کلوب سلاخلرینی چیقاردی. درعقب جبریل علیه السلام کلوب بنی قریضه اوزرینه کیتمک ایمون طرف الهیدن امر کتوردی.

رسول اکرم، تکرار سلاخلاندی و بلال حبشی رضی الله عنه حضرتلرینه امرایدوب «اللهم امرینه مطیع اولانلر، ایکیندی نمازینی بنی قریضه ناحیه سنده قیلسون» دیو ندا ایتدیرردی. لواء شریفی حضرت علی یه و یروب آنی ایلر و کونده ردی. کندوسی دخی بینوب کیرودن عزیمت بیوردی.

ابتدا حضرت علی کرم الله وجهه، لواء شریف ایله بنی قریضه حصار ی اوکنه واردی.

یهودیلر، آنی کورنجه حدتلوب فنا سوزلر سویلمکه وحتی رسول اکرمی سب ایلمکه باشلادیلر وهمان مدافعهیه قیام ایلدیلر .

بعده رسول، اکرم اورایه واروب بر صوباشنه ایندی . عسا کر اسلامیة دخی فوج فوج آقوب کیده رک اقشامه قدر جمله سی طوبلاندی .

عسا کر اسلامیة نک مجموعی اوج بیك قدر اولوب اوتوزالتیسی آتلوایدی . یهودیلر، او وقت نهیه اوغرادقلرینی آکلادیلر وحقسنز اوله رق نقض عهد ایلدکلرینه پک زیاده پشیمان اولدیلر .

رئیسلری اولان (کعب) بر جمعه کونی آنلری طوبلادی وعقد مجلس مشورت ایلدی « وکتابلریمزده مذکور اولان نبی آخر الزمان، بو ذات اولدینی آکلایشیلدی . ایستر ایسه کز مسلمان اولالم وبوبلادن قورتولالم، دیدی .

یهودیلر، مسلمانلغه هیچ یاناشمادیلر . کعب دخی او یله ایسه « اولاد وعیالیزی اولدیرلم . کیروده بردوشونه جکمز قاللسون . آندن صکره سل سیف ایدرک چیقوب محمدیلرک اوزرینه هجوم ایلیم . کورلم حق نه کوستیر، دیدی .

یهودیلر « اولاد وعیالیز کیتدکدن صکره بزه یاشامق نه لازم؟ » دیه رک بو رای دخی قبول ایتمدیلر .

کعب « او یله ایسه باشقه بر تدبیر آرایالم . بو کیجه جمعه ایرتسی کیجه سی اولمق حسیله محمدیلر، بزدن امیندر . او قدر احتیاطه رعایت ایتمزلر . بقتة چیقوب اوزرلرینه هجوم ایدلم . احتمالکه ظفریاب اولورز، دیدی .

یهودیلر « بز جمعه ایرتسی کوننسک حرمتنه خلل کتوره مه یز » دیه رک بو تدبیری دخی رد ایلدیلر .

نبی نصیر کبی دمو لرینک طاشیه بیله جکی قدر اشیا یوکلهدوب کیتمک شرطیله چیقمق اوزره رسول اکرم ایله مخابریه باشلادیلر .

بو استدعالری طرف نبویدن رد ایدیلدی . حال بوکه مدت محاصره لری یکریمی کوندن زیاده تمتد اولدی . یهودیلرک آچلقدن تاب وطاقترلی کسیدلی وجهلنه کرکی کبی یأس وقتورکلدی .



ایشته او حالده اللهك آرسلائی علی ابن ابی طالب رضی الله عنه حضرت تلیری،  
 زیر ابن العوام رضی الله عنه حضرت تلیریله برلکده ایلرولیوب « یا بن عمم  
 حمزه نك ایچدیکی شربتدن ایچرم وبوطاتلی جاندن کچرم ویاخود بو حصارک  
 ایچنه طالارم » دهرک بنی قریضه حصارینه هجوم ایتک اوزره حاضرلاندی.  
 حال بوکه یورویش ایله حصاره کیریلسه بونجه نسوان وصبیان آیاقلر آلتندمه  
 قالور وناججا ایشلر ظهوره کله بیلور ایدی .

یهودیلرده ایسه اصلا مقاومتیه مجال قالمادیغندن بلاعهده وشرط تسلیمیه  
 مجبور اولدیلر .

جموعی طقوز یوز قدر نفوس ایدی . ایچلرلرندمه حرب وضریه قادر  
 اولانلری دوت یوز قدر اولمغله آنلرک اللری آرقه لرینه باغلاندی .

بنی قینقاع طائفه سی خزرچ قبیله سنک عهد واماننده بولندقلری کبی  
 اشبو بنی قریضه دخی اوس قبیله سنک عهد واماننده اولدقلری حالده اهل  
 اسلامک علیهنده بولنماق اوزره رسول اکرم ایله عهد وپیمان ایتمشلر ایدی .  
 حال بوکه : اهل اسلامک پک برطار وقتنده نقض عهد ایلدیلر . بوکره  
 اوزرلرینه وارلدقده رسول اللهی سبب ایتک کبی پک چیرکین سوزلر سویلدیلر .  
 بناءً علیه ، اهل اسلامک اکثری آنلرک اعدامی رأینده ایدی .  
 فقط مقدماتی بنی قینقاع دخی بو وجهله اله کیرمش ایکن خزرچ قبیله سی  
 اشرافندن عبدالله ابن ابی ابن سلولک نیاز وایرامی ایله آزاد ایدیاش  
 اولدقلرینه قیاساً بوکره بنی قریضه نك دخی آزاد اولملری اوس قبیله سی  
 طرفندن استدعا وشفاعت اولندی .

آنک اوزرینه رسول اکرم سعد ابن معاذ رضی الله عنه حضرت تلیری  
 حکم نصب ایلدی . سعد ایسه خندق غزاسنده مجروح اولمغله یتاقده ایدی .  
 همان آنی بر حیوانه بیندیردیلر . وحضور نبوییه کتوردیلر .

اوسیلر « یاسعد ، رسول الله سنی بنی قریضه حقهنده حکم نصب ایلدی .  
 حقوق قدیمه نی اونوتما . آنلره مرحمت ایله » دیو یالواردیلر .

سعد ابن معاذ ایسه بنی قریضه نك بلا موجب نقض عهد ایلدکلرندن



و کیدوب کندولرینه نصیحت ایتدکده بدمعامله ایتدکزدن طولایی پک زیاده کوجنمش و آنلردن انتقام آلمق ایچون فرصت کوزتمکده بولنمش ایدی . همان « بن حکم ایدرم که بنی قریضه نك حرب و ضربه یارایان نفوس ذکورینی قتل و اعدام و اولاد و عیاللرینی اسیر و ماللرینی تقسیم ایده سز » دیدی و دیدیکی کبی اجرا قیلندی .

بیك بشیوز قلیج و اوچیوز زره و بیك مزراق و بشیوز قالقان و برچوق دهوه و حیوانات سائر اله کچورلدی .

بالجمله اموال غنائمك بیت المال ایچون خمسی چیقاریلدی و باقیسی غزات مسلمینه تقسیم ایدیلدی .

بنی قریضه اراضیسی ، انصار کرامك رضا و موافقتی ایله دین اوغرنده دار و دیارلرندن مهجور اولان مهاجرینه احسان بیورولدی .

رسول اکرم ، کندولری ایچون اسیرلر ایچندن (ریحانه) نام قیزی انتخاب ایله تزوج ایتدی .

بعده سعدابن معاذ رضی الله عنه حضر تلرینك یاراسی فنا لا شوب شهید آ فوت اوله رق دارجته کیتدی .

مهاجرینك افضل حضرت ابوبکر الصدیق اولدینی کبی انصارك افضل دخی اشبو سعدابن معاذ ایدی و طور و اخلاقجه حضرت عمر الفاروقه بکیزردی . وفاتی اهل اسلامه پک زیاده حزن و کدر و یردی و رسول اکرم « سعد ابن معاذك وفاتیه عرش اعلی تیره دی و جنازه سنه یتش بیك ملك حاضر اولدی ، دیو بیوردی . رضی الله عنه و ارضاه .

بواننده (بلال مزنّی) کندی قبیله سندن درتیوز کشی ایله مدینه منوره یه کلدیله و اسلام ایله مشرف اولدیله رضی الله عنهم .

### هجرتك آلتنجی ییلی

هجرت نبویه نك اشبو آلتنجی سنه می محرمنده انصاردن ( محمد ابن مسلمه ) رضی الله عنه حضر تلی ، اوتوز نفر سواری ایله دیار نجده کیتدی

واوراده بر عشرت اوردی. یوز الی ده وه ایله بر خیلی قویون اله کچوردی. بنی حنیفه نك اشراقندن (ثُمَّامَه ابن اَنَال) ، نام ذاتی اسیر ایتدی . اشبو ثمامه ، مدینه منوره یه کتورلدکده رسول اکرم ، آنی بجانا آزاد ایلدی . متعاقباً او دخی ایمانه کلدی و کبار اصحاب کرامدن اولدی . رضی الله عنه .

خلال ربیع الاولده ( أَبُوذَر ) رضی الله عنه ، مدینه منوره یه اوچ ساعت مسافه سی اولان بر مرعاده اوغلی ایله بر لیکده رسول اکرم ک ده وه لرینی کوده رکن (عَیْنَه ابن حَصْن الْفَزَارِی) قرق آتلو ایله کلوب ابوذرك اوغلی اولدورمش وده وه لری آلوب کتورمش اولدینی خبر ویرلمکله رسول اکرم ، درحال مقدار ابن اسودك الله بر سنجاق ویردی و آنی سواری ایله ایلرو کوندردی . کندولری دخی بشیوز قدر عسا کر اسلامیه ایله بینوب نجد الکاسنده واقع دیار غطفانه عزیمت بیوردی .

خبیر یولنده مدینه یه ایکی کونلک مسافه سی اولان (ذُو قَرْد) نام محله دشمنلره یتیشیدیلدی و بر قاقچی اولدیرلدی وده وه لر کیرو آلدی وبعده مدینه یه عودت بیورولدی .

او ائنده قریشک بر کاربانی شامدن چیقوب مکیه طوغری کیتمکده اولدینی ایشیدیلدی . آنک اوززینه رسول اکرم خلال جمادی الاولاده زید ابن حارثه رضی الله عنه حضرتلرینی یتیش نفر عسا کر اسلامیه ایله مدینه دن چیقاردی .

زید دخی کیدوب مدینه یه درت میل مسافه سی اولان (عَیْض) نام محله قریش کاربانه راست کلدی وکاربانی اوروب موجود اولان اموالی آلدی . بو اموال ایچنده صفوان ابن امیه نك کیتلو کوموشی وار ایدی .

بوندن باشقه بر خیلی اسیرلر دخی آلدی که رسول اکرم ک کریمه سی زینب رضی الله عنها حضرتلرینک زوجی اولان (ابوالعاص ابن الربیع) دخی بو اسرا ایچنده بولوب مدینه منوره یه کلدکده حضرت زینبه التجا ایلدی .

اودخی حمایه ایتمکله رسول اکرم ، آنی مجاناً آزاد ایتدی . آندن صکره ابوالعاص دخی اسلام ایله مشرف اولغله رسول اکرم ، ینه زینبی آکا ویردی .

خلال شعبانده رسول اکرم ، ( عبدالرحمن ابن عوف ) رضی الله عنه حضرت نلرینی بر مقدار عسکرله ( بنی کلب ) قبیله سنی دینه دعوت ایتمک اوزره ( دومة الجندل ) نام بلده یه کوندردی ، اودخی واروب آنلری اوج کون دینه دعوت ایتدی . رئیساری ( اصْبَغ ابن عمرو ) که نصارا دینده ایدی . اسلام ایله مشرف اولنجه قبیله سی خلقنک چوغی ایمانه کلدی . ایمان ایتمائلر دخی جزیه ویرمک اوزره اوراده قالدی . ابن عوف رضی الله عنه ( اصْبَغ ) ک قیزی ( تَمَاضِر ) ی تزوج ایتدی و آنی آلوب مدینه منوره یه کتوردی .

ینه خلال شعبانده ( بنی سعد ابن بکر ) قبیله سی ، یهود ( خیر ) ایله اهل اسلام علمینه اتفاق ایتمک اوزره طوبلاقمده اولدقلری ایشیدیلکله حضرت علی رضی الله عنه ، بر مقدار عسکرله او طرفه کیتدی و بنی سعد راست کله میوب آنجق ( غمچ ) نام محله آنلرک حیوانلرینه تصادف ایتدی و بشیوز دهوه ایله ایکی بیگ قویون آلوب مدینه منوره یه کتوردی . رسول اکرم دخی آنلرک خمسنی بیت المال ایچون چیقاردی و باقیسنی غزات مسلمینه تقسیم بیوردی .

الحاصل خندق غزاسنده طوائف کفار ، پراکنده و تارمار اوله رق صاووشوب کیتملریله اهل اسلام ، آرتق میدان آلدی و هر طرفه بی پروا فرقه لر کوندریلور اولدی و دین اسلام کوندن کونه قوت و شرف بولدی .

ختم

جزء اول و ثانی

اثر خامه احمد جودت

# قصص انديانا


## تواریخ خلفا

جزء ثالث و رابع

ناشری : قناعت کتبخانه سی صاحبی الیاس

کافه حقوق محفوظدر

قناعت کتبخانه سنک مهرینی حاوی اولیان نسخه لر ساخته اولوب طابع وبایی مسئولدر



درسه ادب — قناعت مطبعه سی

۱۳۳۱



## قصص انبیا

### جزو ثالث و رابع

زمان جاهلیتده عربلر ، ناحق یره قان دوکمک و فقر وفاقه بهانه سیله قیز اولادلرینی دیری دیری طوپراغه کوئمک کبی انسانیتیه یاقیشمایان فنا خویلدن صاقینازلر و سرقت و زنا کبی چیرکین ایشلردن چکیتمزلر ایدی .

شریعت احمدیده بو مثللو مذموم خویلر وچیرکین ایشلر یاساق اولدی وناسه اخلاق حمیده واعمال صالحه ایله امر ونصیحت بو یورولدی . عقل وانصافی اولانلر ، حضرت پیغمبرک معجزاتی و دین اسلامک محسناتی کوروب ایمان کتوردیلر .

قبائل وعشائرک اکثر وجوه واشراف ، بلغادن اولق حسیله قرآن کریمک نهایت مرتبهده اولان بلاغتمه باقوب انسان کلامی اولمادیغنی آکلادیلر .

لکن قوم وقبیلهلرینه ریاست ایتمهک آلیشمش اولدقلرندن ریاستلرینی الدن چیقارماق ایچون خلقی اسکی عقاید باطلهده طوتمق اوزره اصرار ایلدیلر .

علی الخصوص قریش قومک رؤسای ، کندی ایچلرنده یتیشوب



بیومش اولان نبی ذیشانہ آحاد ناس ایله برابر اوله رق تابع اولمقدن عار ایدرلردی .

حتی بعضیلری معجزات باهره دن اولان بلاغت قرآنیه دیه جک بر سوز بولامیوب « بو قرآن ، اشراف مکهدن ( ولید ابن المغیره ) وطائف بلدہ سنک امیری اولان ( عروہ ابن مسعود الثقفی ) کبی بر بیوک آدمه نازل اولایدی » دیدیلر .

باق شو باطل خولیلرکه : کندی یئلرنده مال واعتبارجه بیوک بیلدکاری کسانا حقیقت حالده بیوک صانورلر ومنصب نبوتی آنلردن بکندکارینه توجیه ایتدیرمک ایستلر ایدی .

حال بوکه : بیوک بیلدکاری آدملردن ولید ابن المغیره کبی بعضیلری چوق کچمیوب مکده فوت اولدی ، بر چوغنی دخی بدرده تلف ایدیلدی . بوجهتله ریاست مکه ، ابوسفیانده قرار قیلدی .

عروہ ابن مسعود الثقفی ، اکرچه هنوز بر حیات اولوب طائفده ریاست وحکومت ایتکده ایدی . لکن برادر زاده سی اولان ( مغیره ابن شعبه الثقفی ) ، ( بنی مالک ) دن ( لاث ) نام بتخانه خدمه سی اولان اون اوچ کیشینی اولدورمش وبوندن طولایی ( بنی مالک ) ایله ( مغیره ) نک قبیله سی آره سنه عظیم عداوت کیرمش ایدی .

عروہ ، مدبر ومرعی الحاطر بر آدم اولوب بو اون اوچ کشینک دیتلرخی ویردی وایکی فرقه یی بربریه باریشدیردی . مغیره ایسه خندق غزاسندن صکره مدینه منوره یه کلدی واسلام ایله مشرّف اولدی .

اشبو مغیره ، غایت حاضر جواب وجن فکرلی وعموجه سی کبی شان وشهرت صاحبی بر آدم ایدی . بناءً علیه آنک ایمانه گلسی اهل اسلامی ممنون ایتدی ومشرک لک کوجنه کیتدی .

رؤسای قریشدن فوت وتلف اولانلرک یرلرینه کچن ( عکرمة ابن

ابی جهل ( و صفوان ابن امیّه ) کی یکی رئیس دخی پدرلرینک یولنده اصرار ایتمکده ایسه ده پکده او قدر افکار عامیه قارشو طورامیورلردی . فقط رسول اکرم ایله محارب اولدقلرندن آنلره تابع اولان آحاد ناسک اکثری ، اهل اسلام ایله الفت واختلاط ایدمدکاری جهته دین اسلامک محسناتی بیله میورلردی .

قبائل وعشائر سائر دخی قریش ایله اهل اسلام آره سنده کی محارباتک نتیجه سنه منتظر اولیورلردی .

مع مافیه بر تقریبه دین اسلامک محسناتی اوکره نلر وعلی الخصوص رسول اکرمک مبارک یوزینی کورنلر دخی پیدرپی ایمانه کلیورلردی . چونکه : فیخر عالم صلی الله تعالی علیه وسلم حضرترلرینک هر کسدن زیاده صورتی کوزل وسیرتی مکمل ایدی .

شویله که : هپ اعضاسی تام ومتناسب ومستثنا بر حاله . وجیع اوصافی حد اعتداله ایدی .

- یوزنده نور وملاحت ، سوزنده سلاست و لطافت ، لساننده طلاقت و فصاحت ، بیاننده فوق العاده بلاغت وار ایدی .

یهوده سوز سویله میوب هر کلامی حکمت و نصیحت ایدی و هر کسک عقل و ادراکنه کوره سوز سویلر ایدی .

کولر یوزلی وطاتلی سوزلی اولوب اهل بیتنه و خدامنه و اصحاب کرآمنه حسن معامله ایتدیکی کبی سائر ناسه دخی رفق ولطف ایله معامله ایلر ایدی .

حایم ومتواضع و جمله کمالات انسانیه بی جامع ایدی . بونکله برابر کال وقار و مهابتی وار ایدی .

مجلس سعادتنه داخل اولانلر ، فائده مند وفرحیاب اولوردی و آنی بیلمه ین برکیمسه ، بقتّه کورسه کندوسنی مهابت آلوردی .

الحاصل کافه اخلاق حمیده و اوصاف پسندیده نک کمالی آنده موجود ایدی . مثلی یارادیلامش بر وجود مبارک و مسعود ایدی .

شوحاله نظراً قریش ایلہ بر مصالحہ یابیلوبدہ ایکی طرف خلقی بربریلہ  
سربستجہ کوردوشور اولسہلر ہپ مشرککر، دین اسلامک محسناتی ورسول  
اکرمک معجزاتی کوروب اوکر نہ بیلورلردی .

بوصورتدہ ایسہ ہر طرفدہ دین اسلامہ بر میل عمومی حاصل اولاجنی  
وآز وقت ظرفندہ دین اسلام طرف طرف شیوع و انتشار بولاجنی  
درکار ایدی .

الحاصل دین اسلامک عربستاندہ قولایقلہ انتشاری ایچون بر مصالحہ یہ  
احتیاج وار ایدی .



## مصاحفہ حدیثیہ

رسول اکرم صلی اللہ تعالیٰ علیہ وسلم حضرت تلمیذی، آلتنجی سنہ ہجریہ نک  
عمرہ ذی القعدہ سندہ بیک بش یوز قدر اصحاب کرامیلہ مدینہ دن چیقوب  
مکیہ عزیمت بیوردی. زوجہ محترمہ لری (ام سلمہ) رضی اللہ عنہا حضرت تلمیذی  
دخی برابر کوتوردی.

نیت شریف لری محاربہ اولیوب مجرد (عمرہ) یعنی سعی و طواف ایلہ  
کعبہ معظمہ بی زیارتدن عبارت اولدیغنه دلیل اولمق اوزره مکمل آلات  
و ادوات حربیہ کوتورمینوب فقط اصحاب کرامنه یولجی سلاحی اولان برر  
قلیج طاقدیردی و اهل مدینہ نک میقاتی اولان (ذوالحلیفہ) نام محلہ  
واردقده احرامہ کیردی و یتمش قدر قربانلق دہولرہ نشان اوردی.

فقط شایدکہ قریش طائفہ سی ممانعت و محاربہ یہ قالدیشورلر دیو  
(غفار) و (مزینہ) و (جہینہ) کبی مدینہ اطرافقده بوانان بدوی  
قیلہ لری دخی برلکده حج ایتک اوزره دعوت بیوردی.

اشبو قبائل عربان ایسہ « پیغمبر » مقدمہ کندوسنی مدینہ دہ محاصرہ  
ایدن قریش طائفہ سی ایچنہ کیدیور، کندوسنی تہلکہ یہ القایدیور.  
آرتق کیزو کلک احتمالی یوقدر، دیو برلکده کیتمکدن امتناع ایلدیلر.  
کویا خانہ لری امورینہ باقہ جق کیمسہ لری اولماق بہانہ سیلہ عذر دیلدیلر.

رسول اکرم، قریشک احوالی تجسس ایچون جانب مکیہ جاسوس  
کوندرمشیدی. (عسفان) نام محلہ و ایلدقده او جاسوس دونوب کادی.  
قریش طائفہ سی، رسول اکرمک مدینہ دن حقیقدیغنی خبر آلدق لری کبی

طوپلانمش و بعض قبائل عربانی جمع ایله جنکه حاضر لائمش اولدقلری وایکیوز آتلو ایله ( خالد ابن ولید ) ی ایلرویه کوندرمش اولمالریله آنک دخی ( غمیم ) نام موقعده بکله مکده اولدینی خبرینی کتوردی .

بناء علیله عسفاندن ایلرو حرکت اولندقدمه فخر عالم حضرتلری « صاغ طرفی طوتگزر » دیو بیوردی .

بو جهتله اردوی هایون ، یولک صاغ طرفنه میل ایله بر صرب یوقوشه اوردی .

خالد ابن الولید ، آنی اوزاقدن کورنجه درحال دونوب قریشک یاننه واردی و کیفیتی خبر ویری .

اردوی هایون ایسه بر تپیه واردی که آندن آشیلدینی کبی قریشک خارج مکده ( حدیبیه ) نام محله اردو قوردقلری موقعه اینیلوردی .

بحکمۀ الله تعالی اوراده رسول اکرمک ( قصوا ) نام بنک ده وه سی چوکیوردی . اصحاب کرام ، هایدیدیلر . قالمادی حرون حیوان کبی عناد ایدوب طورددی .

« قصوا طورددی ، دیدیلر رسول اکرم » خیر طورمدی و بویله طورمق خوی یوقدر . فقط فیلی مکیه کیرمکدن منع ایدن ، آنی دخی طورددوردی ، یعنی الله تعالی حضرتلری ، اصحاب فیلی مکیه کیرمکدن منع ایتدیکی کبی بزدهده بو حال و هیئت ایله کیرمکه رخصت ویرمدی دیو بیوردی .

چونکه طوغری قرنش اوزرینه واریلسه بهمه حال محاربه اولنق لازم کلوردی .

حال بوکه: مدینه اطرافنده کی قبائل ، برابر کلدیکندن حجاج مسلمینک مجموعی بیک بش یوز قدر اولدقلری حالد حج نیتله کلمش اولدقلری جهتله تدارکات حربیه لری ده مکمل دکل ایدی .

قریش مکه ایسه آنلره نسبتله زیاده اولدقلری حالد جوار مکده بولنان قبائلی ده طوپلایویورمشلر ایدی .

حتی بالاده ذکری کچن ( عمرو ابن مسعود الثقفی ) و عربان ایچنده  
جنگاور لکله معروف اولان قبیله ( احایش ) شیخی ( حلّیس ) دخی  
برابر ایدی .

اگرچه اهل اسلام ، یکدل و یکجهت و انضباط تام تحتند بر هیئت  
اولدیفندن اردوی هایونه نسبتله قریش اردوسی باشی بوزوق طرزنده بر  
جمعیت ایدی .

شوحاله نظراً اهل اسلامک عون و عنایت باری ایله مظفریتی مأمول  
ایسهده بو صورتده طرفیندن بر چوق تلفات و قوعیله مکه مکرمهیه  
حرباً کیریلرک حرم شریفه چارهسز بر نوع حرمتسزلک ایدیش اولوردی .  
بوایه اراده الهیهیه مغایر ایدی .

برده مکه مکرمهده اسلامی اظهار ایده میوبده جانی کبی ایمانی دخی  
درونده کیزلو اولان بر چوق ضعفای مسلمین وار ایدی . بوقارغاشه لقدم  
آنر دخی بیلنیه رک پامال اولوب کیدردی .

قالدی که : هنوز ایمانه کلمه مش اولان اشراف قریشدن نیجه ذاتلر ،  
قریب العهده ایمانه کلوبده دین اسلامه بیوک بیوک خدمتار ایتلری  
نیجه خیرلو اولاد یتیشدیرملری مقدر ایدی .

ایشته ده وهنک او یله خلاف عادت اولارق من طرف الله چوکیورمسی  
بومثللو دقیقه لره رمز و اشارت ایدی .

بناءً علیه اصحاب کرام ، ده وهنی قالدیروب یوروتتمک ایستدکلرنده یرندن  
قیمیلداتمامش ایکن بعده رسول اکرم ، بالذات سوق ایدنجه قالقوب  
یوریویردی .

فقط طوغری یول ایله کیتمیوب بر طرفه صاپارق ( حدیبیه ) نک  
نهایتده صوبی چکیلش بر قویو باشنه ایندی . خلق دخی کلوب اطرافه  
قوندی .

اصحاب کرام ، اوراده صوسزلقدن شکایت ایتمکله رسول اکرم ،  
ترکشندن براوق چیقاردی و آنی او ، قویو ایچنه براقدیردی .



قوی بودن او قدر صو قاینادی که بتون اردو خلق ، طویونجه ایجدی ،  
آبدست آلدی ، حیوانلرینی صوواردی .

رسول اکرم ، محاربه نیتنده اولمدیغنی بیلدیرمک ایچون ( خراش ابن  
امیه الخزاعی ) بی قریشه کونده ردی .

قریش ایسه ( خراش ) ی اولدورمک ایچون اوزرینه هجوم ایتمشلر ،  
هله عربان ( احابیش ) آرمیه کیروب آنی قورتارمشلر اودخی همان کلوب  
کیفیتی رسول اکرمه بیلدیردی .

رسول اکرم ، محاربه نیتنده اولمدیغنی رؤسای قریشه کوزلجه آکلاتمق  
اوزره عمرالفاروق رضی الله عنه حضرتلرینی کونده رمک ایستدی .

حضرت عمر « رؤسای قریش ، بنم آنلر حقنده نه مرتبه غیظ و غلظتم  
اولدیغنی بیلورلر . قورقارم بکا سوء قصد ایدرلر . درون مکدهه عشرتمده  
یوق که بنی حمایه ایتسونلر . فقط عثمان ابن عفان کیتسه مناسب اولور .  
زیرا آنک نفس مکدهه عشرت واقرباسی چوقدر . نفسنجه قورقوسی  
یوقدر ، دیدی .

فی الواقع رئیس قریش مکه اولان ابوسفیانک پدری ( حرب ابن امیه  
بن عبد شمس ابن عبد مناف ) ایدی . عثمان ذی النورین رضی الله تعالی عنه  
حضرتلرینک پدری اولان ( عفان ) ک پدری دخی ( ابوالعاص ابن امیه ابن  
عبد شمس ) اولمغله اشراف مکده اولان بنی امیه ، هپ کندوسنک عمزاده لری  
ایدی .

بناء علیه رسول اکرم ، ابوسفیان وسائر قریش ایله کوروشوبده  
مقصد پیغمبری ، مجرد طواف زیارت بیت الله اولدیغنی آنلره بیلدیرمک  
وقریش مکه ایچنده کیزلو مسلمان اولانلر ایله کوروشوبده آنلره دخی  
تسایت ویرمک اوزره حضرت عثمانی کوندردی .

رؤسای قریش ، آنی ممنونیت ایله قارشولامشلر و « کعبه بی طواف  
ایت » دیو تکلیف ایتمشلر .

حضرت عثمان ایسه « رسول اکرم طواف ایتدکجه بن ایده م » دیمکله

حتی بالاده ذکری کچن ( عروه ابن مسعود الثقفی ) و عربان ایچنده جنکاورلکله معروف اولان قبیله ( احابیش ) شیخی ( حلّیس ) دخی برابر ایدی .

اگرچه اهل اسلام ، یکدل و یکجهت و انضباط تام تحتنده بر هیئت اولدیغندن اردوی هایونه نسبتله قریش اردوسی باشی بوزوق طرزنده بر جمعیت ایدی .

شوحاله نظراً اهل اسلامك عون و عنایت باری ایله مظفریتی مأمول ایسمده بو صورتده طرفیندن بر چوق تلفات وقوعیله مکه مکرمهیه حرباً کیریلهرك حرم شریفه چارهسز بر نوع حرمتسزلك ایدیش اولوردی . بوایه اراده الهیهیه مغایر ایدی .

برده مکه مکرمهده اسلامی اظهار ایده میوبده جانی کبی ایمانی دخی دروننده کیزلو اولان بر چوق ضعفای مسلمین وار ایدی . بوقارغاشه لقدمه آنلر دخی بیلنمیهرك پامال اولوب کیدردی .

قالدی که : هنوز ایمانه کلمه مش اولان اشراف قریشدن نیچه ذاتلر ، قریب العهده ایمانه کلوبده دین اسلامه بیوک بیوک خدمتار ایتملی و نیچه خیرلو اولاد یتیشدیرملری مقدر ایدی . ایشته ده وەنك اوילה خلاف طادت اولارق من طرف الله چوکیورمسی بومثللو دقیقه لره رمز و اشارت ایدی .

بناءً علیه اصحاب کرام ، ده وەینی قالدیروب یوروتمک ایستدکلرنده یرندن قیمیلداتمامش ایکن بعده رسول اکرم ، بالذات سوق ایدنجه قالقوب یوریوردی .

فقط طوغری یول ایله کیتمیوب بر طرفه صابارق ( حدیده ) نک نهایتنده صوبی چکیلش بر قویو باشنه ایندی . خلق دخی کلوب اطرافنه قوندی .

اصحاب کرام ، اوراده صوسزلقدن شکایت ایتمکله رسول اکرم ، ترکشدن براوق چیقاردی و آنی او ، قویو ایچنه براقدیردی .

قویودن او قدر صو قاینادی که بتون اردو خلق ، طویونجه ایجدی ،  
آبدست آلدی ، حیوانلرینی صوواردی .

رسول اکرم ، محاربه نیتنده اولدیغنی بیلدیرمک ایچون ( خراش ابن  
امیه الخزاعی ) بی قریشه کوندهردی .

قریش ایسه ( خراش ) ی اولدورمک ایچون اوزرینه هجوم ایشلر ،  
هله عربان ( احابیش ) آرهیه کیروب آنی قورتارمشلر اودخی همان کلوب  
کیفیتی رسول اکرمه بیلدیردی .

رسول اکرم ، محاربه نیتنده اولدیغنی رؤسای قریشه کوزلجه آکلاتمق  
اوزره عمرالفاروق رضی الله عنه حضرتلرینی کوندهرمک ایستدی .

حضرت عمر « رؤسای قریش ، بنم آنلر حقنده نه مرتبه غیظ و غلظتم  
اولدیغنی بیلورلر . قورقارم بکا سوء قصد ایدرلر . درون مکده عشیرتمده  
یوق که بنی حمایه ایتسونلر . فقط عثمان ابن عفان کیتسه مناسب اولور .  
زیرا آنک نفس مکده عشیرت واقرباسی چوقدر . نفسنجه قورقوسی  
یوقدر ، دیدی .

فی الواقع رئیس قریش مکة اولان ابوسفیانک پدری ( حرب ابن امیه  
بن عبد شمس ابن عبد مناف ) ایدی . عثمان ذی النورین رضی الله تعالی عنه  
حضرتلرینک پدری اولان ( عفان ) ک پدری دخی ( ابوالعاص ابن امیه ابن  
عبد شمس ) اولغله اشراف مکهدن اولان بنی امیه ، هپ کندوسنک عمزاده لری  
ایدی .

بناء علیه رسول اکرم ، ابوسفیان وسائر قریش ایله کوروشوبده  
مقصد پیغمبری ، مجرد طواف و زیارت بیت الله اولدیغنی آنلره بیلدیرمک  
وقریش مکة ایچنده کیزلو مسلمان اولانلر ایله کوروشوبده آنلره دخی  
تسایت ویرمک اوزره حضرت عثمانی کوندردی .

رؤسای قریش ، آنی ممنونیت ایله قارشولامشلر و « کعبه بی طواف  
ایت » دیو تکلیف ایشلر .

حضرت عثمان ایسه « رسول اکرم طواف ایتدکجه بن ایده م » دیمکله

روسای قریش ، دلگیر اومشلسر و آنی توقیف ایله کوز حبسنه آلمشلسر ایدی .

اواننده ( خزاعه ) قبیله سی رئیس اولان ( بدیل ابن ورقا ) کندی قومندن بر طاقم آدم لر ایله اردوی هایونه کلدی .

( خزاعه ) قبیله سی ( تهمامه ) قبائلندن اولوب زمان جاهلیتده بر خصوصدن طولای ( بنی هاشم ) ایله عقد اتفاق ایتمشلسر ایدی . ظهور اسلامدن صکره دخی بو عهدی اونوتمدیلر و رسول اکرمه طرفدارلقدن کیر و طورمدیلر .

بناء علیه خزاعه قبیله سی ، هنوز اسلام ایله مشرف اولماشلسر ایکن رسول اکرم ایله قریشک احوالنه دائر کیزلو مخابره ایدرلردی .

بوکره ( بدیل ) ک کلیشی دخی خیر خواهلر یولنده اوله رق حضور نبوی یه کیردی و « قریش طائفه سنی کوردم . حدیبیه نک صولی یرلرینه قومشلسر و تدارکلی بولنمشلسر . کیر و دونمک نیتنده دکلر . سزه ممانعت ایتسلسر کرکدر » دیو خبر ویردی .

رسول اکرم ، آکا دخی « بز ، کیمسه ایله جنک ایچون کلدک . آنجق عمره ، یعنی سعی و طواف ایچون کلدک و قریش طائفه سی مقدمکی محاربه لر ایله ضعیف دوشدی . حرب و ضربه مجاللری قالمدی . فقط ایسترلر ایسه آنلرله بر متارکه ایدرم . صکره بنم شریعتکم ظهور و انتشارنده ایسترلر ایسه آنلر دخی سائرلری کبی تابع اولورلر . یوقا کر امتناع ایدرلر ایسه شو حالده بن ، آنلرله یالکیز قالنجهیه قدر جنک ایدرم . آرتق جناب حق ، امری نه ایسه یرینه کتورر ، دیو بیوردی .

بدیل « ایله ایسه بن و ارایم ، بونی قریشه خبر ویرهیم » دهرک رخصت آلوب قریش اردوسنه واردی .

رؤسای قریش ایله کوریشوب « بن ، او ذاتک یانندن کایورم . ایشیتدم بر سوز سویلیور ایدی ، ایتر ایسه گز سزه عرض ایدهیم »

دیدکده عکرمه ابن ابی جهل و حکم ابن عاص کبی بعض سفها « سنک ویره جکک خبره احتیاجز یوق » دیمشدر .

عروه ابن مسعود الثقفی ایسه « بدیلک سوزینی دیگله یگز الویرر ایسه طوتکگز ، الویرمز ایسه آتکگز » دیو نصیحت ایش .

آنک اوزرینه حارث ابن هشام ایله صفوان ابن امیه ، بدیله « سویله باقم » دیمشدر . او دخی رسول اکرمدن ایشتدیکنی سویاش .

عروه ، القوب رؤسای قریشه خطاباً « بکا امنیتکگز وارمی ؟ » دیدکده « اوت ، سندن هر وجهله امیز » دیمشدر .

او دخی « بو آدم ، سزه مصلحانه و منصفانه بر یول کوستردش . براغکز بنی ، برکزه آنک یانسه واریم » دیمش . آنلر دخی « کیت باقم » دیمشدر .

بناءً علیه عروه ابن مسعود ، اردوی هایونه کلدی . رسول اکرم ایله کوروشدی و سوزه کیریشدی .

« یا محمد ! قریشک وجوه و اشرافی تدارکات کلیه ایله چیقدیلر و سنی مکیه قومماق اوزره بینلرنده معاهده ایتدیلر . سنک یانکده کی عسکرایسه بر درتی غلبه لکدن عبارتدر . یارین جمله سی قاجوب سنی میدانده یالکزر براقیوررلر » دیدی .

عروه نک بو سوزندن ابو بکر الصّدیق رضی الله تعالی عنه حضرتلرینک جانی صیقیلوب قاشلرینی چاتدی و « بزمی طاغیلوبده حضرت پیغمبری یالکزر براقاجغز ؟ » دهرک عروه یی تعذیر و تکدیر ایتدی .

بعده عروه ، عادت عرب اوزره رسول اکرمک صقائی طوتوب اوقشامق ایستدی .

بو ایسه تعظیمه منافی بر کیفیت اولدینی حالده رسول اکرم ، عروه یه لطف و نزاکت ایله معامله ایدردی .

لکن (مغیره ابن شعبه الثقفی) که رسول اکرمک باشی اوچنده طور و یوردی



روسای قریش ، دلگیر اولمشلر و آنی توقیف ایله کوز حبسنه آلمشلر ایدی .

اواننده ( خزاعه ) قبیله‌سی رئیسی اولان ( بدیل ابن وراق ) کندی قومندن بر طاقم آدم‌لر ایله اردوی هایونه کلدی .

( خزاعه ) قبیله‌سی ( تم‌امه ) قبائلندن اولوب زمان جاهلیتده بر خصوصدن طولایی ( بنی هاشم ) ایله عقد اتفاق ایتمشلر ایدی . ظهور اسلامدن صکره دخی بو عهدی اونوتمدیلر و رسول اکرمه طرفدارلقدن کیرو طورمدیلر .

بناء علیه خزاعه قبیله‌سی ، هنوز اسلام ایله مشرف اولمامشلر ایکن رسول اکرم ایله قریشک احوالنه دائر کیزلو مخابره ایدرلردی .

بوکره ( بدیل ) ک کایشی دخی خیر خواهلر یولتده اوله رق حضور نبوی‌یه کیردی و « قریش طائفه‌سنی کوردم . حدیبیه‌نک صولی یرلرینه قومشلر و تدارکلی بولنمشلر . کیرو دونمک نیتنده دکلر . سزه ممانعت ایتسه‌لر کرکدر » دیو خبر ویردی .

رسول اکرم ، آکا دخی « بز، کیمسه ایله جنک ایچون کلدک . آنجق عمره ، یعنی سعی و طواف ایچون کلدک و قریش طائفه‌سی . مقدمکی محاربه‌لر ایله ضعیف دوشدی . حرب و ضربه مجاللری قالمدی . فقط ایستلر ایسه آنلرله بر متارکه ایدرم . صکره بنم شریعتکم ظهور و انتشارنده ایستلر ایسه آنلر دخی سائرلری کبی تابع اولورلر . یوق اگر امتناع ایدرلر ایسه شو حالده بن ، آنلرله یالکیز قانجه‌یه قدر جنک ایدرم . آرتق جناب حق ، امری نه ایسه یرینه کتورر ، دیو بیوردی .

بدیل « اوایله ایسه بن واریم ، بونی قریشیه خبر ویرهیم » دهرک رخصت آلوب قریش اردوسنه واردی .

رؤسای قریش ایله کوریشوب « بن ، او ذاتک یانندن کلیورم . ایشیتدم بر سوز سو بیلور ایدی ، ایتر ایسه گز سزه عرض ایدهیم »



دیدکده عکرمة ابن ابی جهل و حکم ابن عاص کبی بعض سفها « سنک ویره جکک خبره احتیاجز یوق » دیمشله .

عروة ابن مسعود الثقفی ایسه « بدیلک سوزینی دیکله یگزر الویرر ایسه طوتگزر ، الویرمز ایسه آتگزر ، دیو نصیحت ایلش .

آنک اوزرینه حارث ابن هشام ایله صفوان ابن امیه ، بدیله « سویله باقالم » دیمشله . او دخی رسول اکرمدن ایشتدیکنی سویلش .

عروه ، قالقبوب رؤسای قریشه خطاباً « بکا امنیتگزر وارمی ؟ » دیدکده « اوت ، سندن هر وجهله امینز » دیمشله .

او دخی « بو آدم ، سزه مصلحانه و منصفانه بر یول کوسترمش . براغکز بنی ، برکره آنک یانسه وارايم » دیمش . آنلر دخی « کیت باقالم » دیمشله .

بناءً علیه عروة ابن مسعود ، اردوی هایونه کلدی . رسول اکرم ایله کوروشدی و سوزه کیریشدی .

« یا محمد ! قریشک وجوه و اشرافی تدارکات کلیه ایله چیقیدلر و سنی مکیه قویماق اوزره بینلرنده معاهده ایتدیلر . سنک یانگده کی عسکرایسه بر درتی غلبه لکدن عبارتدر . یارین جمله سی قاجوب سنی میدانده یالکزر براقویررلر » دیدی .

عروه نك بوسوزندن ابو بکر الصّدیق رضی الله تعالی عنه حضرتلرینک جانی صقیلوب قاشلرینی چاودی و « بزمی طاغیلوبده حضرت پیغمبری یالکزر براقاجز ؟ » دیره رک عروه بی تعذیر و تکدیر ایتدی .

بعده عروه ، عادت عرب اوزره رسول اکرمک صقالنی طوتوب اوقشامق ایستدی .

بو ایسه تعظیمه منافی بر کیفیت اولدینی حالده رسول اکرم ، عروه یه لطف و نزاکت ایله معامله ایدردی .

لکن (مغيرة ابن شعبه الثقفی) که رسول اکرمک باشی اوچنده طور و یوردی

همان عروه‌نك الى ايتدی و « چك الكئی » ديهرك عموجه-سنة عتف ايله معامله ايتدی .

عروه ، بو کیم ؟ دیو باقوب کوردی که برادر زاده‌سی مغیره در .  
« بره غدار ! بن سنك دوکدیکك قان لکه‌سنی هنوز تمیزلدم . شمدی بو  
طور و معامله‌ك ندر ؟ » دیدی .

عروه ، بو وجهله مغیره‌نی تکدیر ایلدی . مغیره دخی آکا قارشولق  
اوله رق سرت سوزلر سویلدی . بو وجهله سوزی اوزاتدیلر و حضور  
نبویده خیلجه مجادله ایتدیلر .

بعده نبی محترم ، مجرد طواف ایچون کلدیکنی وعقد متارکه ایده‌بیله‌جکنی  
و قریش اکر مخالفت ایدرسه صوڭ درجه‌یه قدر مقاتله ایده‌جکنی افاده  
ایلدی . الحاصل بدیله نه سویلدیسه عروه‌یه دخی سویلدی .

عروه « یا محمد ! طوالم که سن غالب کلدك . عربده سندن اول اصلی  
تلف ایدوب بتورمش کیمسه واری ؟ » دیدی .

عروه ، بو مکالمه لرائس‌سنده اصحاب کرامك حضور نبویده طور  
و معامله‌لرینه دقت ایدوب کوردی که اصحاب کرام ، پروانه کبی فخر عالمك  
باشی اوچنده طولاشورلر وهرنه امر ایتسه کال سرعت ايله اجراسنه  
چالیشورلر و یوزینه حدت ايله باقیوب حضورنده کال تعظیم ايله و آلچق  
سس ايله سوزه کیریشورلر و آبدست آلورکن دوکولن قطره‌لری آلوب‌ده  
یوزلرینه و کوزلرینه سورمك ایچون باشنه اوشرلر و بر قیلی یره دوشه‌جک  
اولسه آلوب و صاقلایوب‌ده حرزجان ایتك اوزره قاییشورلر . صانکه  
عروه‌نك دیدیکی کبی فخر عالمی بر اقوب‌ده طاغیلاجق بر جمعیت اولماقلرینی  
لسان حال ايله بیلدریرلر ایدی .

عروه ، عودت ایدوب‌ده قریش اردوسنه واردقده « ای جماعت ! بن  
قیصر و کسری و نجاشی دیوانلرینی کوردیم . نیچه حکمداران ايله کوروشدم .  
والله ، برینك قومنده محمد اصحابنك ایتدیکی حرمت و اطاعتی کورمدم .  
قولایقله طاغیله‌جق بر جمعیت دکدر ، ديهرك مصالحه‌نی ترویج ایتمش .

آنك اوزرينه عربان احابيشك رئيسى اولان حليس « هله بن ده بر كره كيدوب كورهم » ديهرك قالقوب اردوى هايونه كمش . كورمش كه كعبه يه قربان ايديلك اوزره بر چوق ده وەر علامتلمش . اصحاب كرام ( ليك ) ديو چاغريشور . همان دونوب قريشك ياننه كيدهرك « بويله زيارت بيت الله ايچون كمش اولان جماعت ، فصل منع اولنه بيلور؟ بز ، واقعا سزگله متفقز . لكن زوار بيت الله منع ايتمك اوزره متعهد دكلز » ديويرمش .

بناءً عليه رؤسای قريش دخی چاره سز مصالحه يه رضا كوسترمش و عقد صلح ايچون فصحاى عربدن مشهور ( سهيل ابن عمرو ) ي كونده رمشار .

سهيل ابن عمرو ، اردوى هايونه كلوب رسول اكرم ايله كوروشدى وهان شروط مصالحه مذا كرده سنه كيريشدى .

شروط مصالحه نك مذا كرده سنه پك چوق مباحثه لر واقع اولدى . نهايت اون سنه مدت ايله عقد مصالحه اولنه رق بو مدت ظرفندا طرفيندن يكديكركه تعرض اولنماسنه قرار ويريلدى و طرف نبويدن همان اهل اسلامك مكيه كيروبده كعبه يي طواف ايتملرى شرطى ميدان قونولدى .

سهيل ايسه « بو ، شيمدى اولاماز . زيرا مكيه جبراً كيريلش حوادو طوائف عرب ايچنه ياييلور و بو جهته قريشك شان و اعتبارينه خلل كلور فقط كله جك سنه اولاييلور » ديمكله سعى و طوافك كله جك سنه يه تاخيرى طرف نبويدن دخی قبول بيورولدى .

بعده سهيل ، پك آغر بر شرط درميان ايتدى . شويله كه : « سزد برى بزه كلورسه رد ايتيم . اما بزدن سزه بر آدم كيدرسه مسلم اولسه يي رد ايدسكز » ديدى .

اصحاب كرام ، بو سوزدن حدتlendir . « هيچ بو اولور شيمي؟ بزه مسلم كلديكى حالد آنى مشركلرك الله فصل تسليم ايدلم ؟ » ديديلر .

سهیل ایسه بو شرطه موافقت اولندقجه مصالحهیه قرار ویریه میه جکنی .  
 قطعياً بیان ایتمکه ، رسول اکرم ، چاره سز بو شرطی دخی قبول ایتدی .  
 اصحاب کرام ، بوکا تعجب ایدهرک « یارسول الله ! بو شرطی دخی .  
 یازدیره جقمیسین ؟ » دیدیلر .

رسول اکرم ، « اوت . بزدن آنلره کیدنلری الله بزدن ایراغ  
 ایتسون . آنلردن بزه کلنلر ایچون دخی جناب حق البته برچاره یارادیر »  
 دیو بیوردی .

چونکه : مدینه اطرافنده کی قبائل دخی حج وطواف نیتیه کلش  
 اولسه دیدیلر اردوی هایونده قریشک کوزینی ییلدیراجق مرتبه  
 غلبهک پیدا اولوردی . لکن آنلر قورقوب برلکده کلدکلرندن عسا کر  
 اسلامیه ، عددجه آز وحج نیتیه چیقمش اولدکلرندن اسباب سفریه جه  
 دخی تدارکسز ایدیلر .

قریش ایسه یرنده قوتلو وادوات حربیهلری مکمل اولدینی حالده  
 جوار مکده بولنان قبائلی جمع ایدیورمش اولدکلرندن اهل اسلامه نسبتله  
 قوتلری قات قات زیاده ایدی .

شوالده اهل اسلامک تا شهر مککک کنارینه قدر کیدوبده قریشی  
 هیچه صایمالری فوق العاده بر شجاعت و فقط اویله بر قوی دشمنه قارشو  
 اوراده اوزون اوزادییه طورمق دخی مخاطرهلر برکیفیت ایدی .  
 بناءً علی ذلک ، اهل اسلامه کوره هر نصل اولورسه اولسون قریش ایله  
 بر مصالحه یایمق مقتضای عقل و حکمت ایدی .

قالدی که : مکده سوز ، رؤسای قریشده اولغله ایام محاربه ممتد  
 اولدقجه آحاد ناس دخی سورسیله آنلره تابع اوله رق جنک وجدال ایله  
 مشغول اولور وبو جهتله دین اسلامک نشری ایچون طرفیندن یک چوق  
 قان دوکولمک لازم کلور ایدی .

اما مصالحه وقوعنده طرفین ، بربریه سربستجه کوروشوب رسول  
 اکرمک معجزاتی و حسن اطوار و عاداتی و دین اسلامک ، محسناتی

ایشیده رک و افراد مسلمینک مظهر اولدینی حریتی کوره رک آحاد مشرکینک  
کیمی مسلمان اولاجق و کیمی دین اسلامه میل ایله اهل اسلام حقنده  
اولان عداوتلری آزالاجق و او حالده رؤسای قریش یالکز قالاجق  
ایدی .

قبائل سائرہ ایسه قریشہ باققده اولدقلرندن رؤسای قریشک قوتلرینه  
او صورتله ضعف کلدکده آنلر دخی طرف اسلامیانه میل ایده جکلری  
جهتله دین اسلام ، آز وقت ظرفنده طبیعتیله بتون عربستانه یاییلاجق  
ایدی .

الحاصل آحاد مشرکینک اهل اسلام ایله سربستجه اختلاطی ، دین  
اسلامک آز وقت ظرفنده انتشارینه سبب اولاجق ایدی .  
هر وقت عقد مصالحده آرائیلاجق شی ایسه کله جکده حاصل اولاجق  
فوائدن عبارتدر .

لکن اصحاب کرام ، بورالینی کرکی کبی دوشونه مدکلرندن اويله آغر  
شرطلرک قبولی ، پک کوجلرینه کیتدی .

قالدی که : رسول اکرم ، مدینه ده ایکن رؤیاسنده اصحاب کرامیله  
برلکده مکیه واروب حج ایتدکلرینی کورمش وعینیه ظهور ایده جکنی  
خبر ویرمش ایدی . اصحاب کرام دخی رؤیا هان بو سنه چیقاجق ظن  
ایتمشل ایدی . بناء علیه بو کوره مکیه کیروبده کعبه یی طواف ایده جکلرنده  
هیچ شبهه ایتملرلر ایکن اويله آغر شرطلر ایله بر مصالحه یاییلوبده طواف  
کعبه دن دخی محروم اوله رق کیرو دونمک کندولرینه غایت گران کلدی  
و آز قالدی که بر چوغنی دائره اطاعتدن چیقہ یازدی .

حتی حضرت عمر ، حضور نبویه « سن اللهک رسولی دکلیسین و بزم  
دینز حق دکلی ؟ نیچون بو ذکات و حقارتی قبول ایدیورز ؟ » دیدی .  
رسول اکرم دخی « بن اللهک رسولی یم . لکن آکا عاصی اولامام .  
اوبنم یارد مجیمدر » دیو جواب ویردی .

بعده حضرت عمر « یا ، سن بیت اللهه واروبده طواف ایده جکسکزر

دیمدگمی ؟ « دیدکده رسول اکرم » اوت . دیدم ، اما بو سنه دیمدم .  
ینه دیورم که : مکیه کیروب سعی وطواف ایده جکیز « دیو بیوردی .  
الحاصل ، بالاده بیان اولندیغی اوزره مواد مصالحهیه قرار ویریلدی  
و حضرت علی ، صلحنامه یی یازمغه مأمور اولدی .

رسول اکرم « ابتدا بسم الله الرحمن الرحيم یاز » دیدکده سهیل « بو  
عباره یی طانیام . اوتدنبرو یازیه کلدیکی وجهله ( باسمک اللهم ) یاز »  
دیدى .

اصحاب کرام ، بوکا مخالفت ایتمک ایستدیلر ایسه ده بر نزاع لفظی  
اولوب معناه ایکی کلام بیننده فرق اولمادیغندن رسول اکرم « باسمک  
الله یاز » دیو بیوردی وبعده صلح نامه نك عنوانه ( محمد رسول الله )  
دیو یازدیردی .

سهیل « اکر بز ، سنك رسول الله اولدیغکی تصدیق ایتسه یديك سنكله  
محاربه و مجادله ایتمز ايدك . آنك یزینه بابا گك اسمنی یاز » دیدى .

رسول اکرم ، « سز تکذیب ایتسه کزده بن اللهك رسولیم .  
اما باس یوق . یا علی ! آنی بوزده ( ابن عبدالله ) یاز دیو امر ایتدی .  
حضرت علی « بن ، رسول الله لفظنی بوزامام » دیمکله رسول اکرم ،  
آنى کندی الیه بوزدی و ( محمد ابن عبدالله ) دیو یازیلدی .

بعده اون سنه مدت ایله عقد مصالحه اولدینی تحریر اولندوقدن صکره  
بو سنه اهل اسلام کعبه یی طواف ایتمکسزین کیرو دونمک وکله جئک سنه  
کله رك مکیه کیروب طواف ایتمک ، فقط اوچ کوندن زیاده طورماق  
واووقت قریش طائفه سی ، مکدن طیشارو چیقماق شرطلری یازیلدی .  
بعده طرف اسلامیان کئلرک ردی ماده سی درج ایدیلدی . فقط بو ماده  
قریشه تخصیص اولنوب قبائل سائر مستثنا طوتولدی .

شویله که : قریشدن ماعدا اولان قبائل ، ایسترلر ایسه عهد و امان محمدییه  
و ایسترلر ایسه قریشک عهد و امانه داخل اولمق اوزره مخیر بر ایلدیلر .  
حال بوکه : بوراسی تصدیق اولندیغی کبی همان ( خزاعه ) قبیله سی



« قاقوب عهد و امان محمدی به داخل اولدقلرینی اعلان ایلدیلر ، ( بنی بکر ) دخی قریشک عهدینه داخل اولدیلر .

صلح نامه ، بر منوال شروح تمام اولدقدن صکره ذیلنه اشراف مهاجرین وانصاردن ورؤسای مشرکیندن شاهد اولان کیمسه لک اسملری تحریر و علاوه ایدیلدی و اوصره ده پک آجی بر وقعه ظهوره کلدی .

شویله که سهیلک اوغلی ( أَبُو جَنْدَل ) اسلام ایله مشرّف اولدیغدن پدری ، آنی باغلا یوب حبس ایتمشیدی . نصلسه بو ائنده قورتولوب فرار ایله زنجیرینی سورویه رک و تکبیر کتوره رک اردوی هایونه چیقه کلدی . سهیل ، آنی کورنجه « ایشته صاحب نامه اقتضاسیجه ابتدا سزدن ردینی ایستیه جکم بودر ، دیدی .

برو طرفدن « هنوز شیمیدی مصالحیه قرار ویریلدی . بو آرده قاقوب قورتولان مستثنا اولق لازم کلور . بوندن صکره کله جکلر رد اولنور » دینلدی ایسه ده سهیل ، اکر اوغلی کندوسنه رد و تسلیم اولماز ایسه صاحب نامه یی کأن لم یکن حکمنده عد ایده جکنی قطعاً بیان ایتمه که نقض عهددن اجتناباً اوغلی ابو جندل ، کندوسنه ویریلدی و ابو جندله « صبر ایت . قریباً جناب حق ، سنی بوبلیه دن خلاص ایدر » دیو تسلیت بیورولدی .

ینه بو ائنده حضرت عثمانک عودتی جیکمش اولدینی حالد قتل اولمش دیو بر سوز ایشیدیلکه رسول اکرم « آرتق محاربه ایتدکجه کیرو دونه میز » دیدی . ایشته او ، وقت ( بیعت رضوان ) وقوع بولدی .

شویله که : رسول اکرم ، بر آغاج آلتنده اوطوردی . هپ اصحاب کرام کلوب اولنجه یه دیک صبر و ثبات ایله اصلاً فرار ایتماک اوزره عقد بیعت ایلدیلر . یالکز ( جد ابن قیس ) ده وه سنک آرقه سنه صاقلاندی و کلوب بیعت ایتدی . رسول اکرم ، ایکی النی بر برینه باغلا یوب حضرت عثمان طرفدن دخی غائبانه اجرای رسم بیعت ایلدی .

اهل اسلامک بو بیعتی ، قریشه خوف و دهشت ویردی . همان حضرت

عثمانی اردوی هایونه کوندردیلر پروطرفدن دخی سهیل کیتدی و مصالحه یی اعلان ایتدی . دیدی قودی دخی بیتدی .

رسول اکرم ، قربانلق ده وه سنی کس دی و باشنی تراش ایتدی . آنک اوزرینه اصحاب کرام دخی قربانلرینی کس دیلر و کیمی باشلرینی تراش ایتدیلر و کیمی صاچلرینی کس دیلر .

اکرچه درون مکیه کیروبده سخی و طواف ایدمه دکری ایچسون مخزون اولدیلر . آنجق او ائاده برروز کار اسوب آنلرک صاچلرینی حرم شریفه کوتورمکه متسلی و ممنون اولدیلر .

هجرتدن مقدم فرس دولتی ، روما دولته غلبه ایدمه رک انطاکیه و شام و قدس شریف طرفلرنده دین نصار ایی قالدیروبده مشرک لک بر نوعی اولان مجوس آیینی یوروتمه که تشبث ایتمشیدی . روم طائفه سی ایسه نصارا دیننده اولوب نصارا دخی اهل کتاب اولق حسیبیه اهل اسلامه یقین اولدیغدن مشرکین قریش ، فرسک رومه غلبه سنی ایشتمک لری کبی ممنون اوله رق اهل اسلامه « بزم اخوانمز ، سزک اخوانکزه غلبه ایتمش . البته بزده سزه غالب کلورز » دیم لریه اهل اسلام مکدر اولمشیدی . آنک اوزرینه ( الم غلبت الروم ) سورمه سی نازل اوله رق اون سنه یه وارمادن رومک فرسه غلبه ایدمه چکی تبشیر بیورلمغه ابوبکر الصدیق رضی الله تعالی عنه حضرت لری ، او وقت مشرکین قریشه « او قدر سویمیکیز . اون سنه یه وارماز روم ، فرسه غلبه ایدمه جکدر » دیدکده ( ابی ابن خلف ) آنی تکذیب ایدمه رک « کل سنکله بحث ایدمه » دیوب حضرت ابوبکر دخی موافقت ایتمه که طقوز سنه ظرفنده روم غلبه ایدر ایسه ابی بن خلف ، آکا یوز ده وه ویرمک و غلبه ایتمز ایسه حضرت ابوبکر ، آکا یوز ده وه ویرمک اوزره بحث ایلش ایدی .

اشبو حدییه سفری ائانسنده رومک فرسه کرکی کبی غلبه سی شایع اولدی . ابی ابن خلف ایسه احد غزاسنده رسول اکرمک بر ضربه سیله بره لوب تلف اولمش ایدو کندن حضرت ابوبکر ، او ده وه لری ابی ابن

خلفك ورثه سندن ایستدی، آنلر دخی ویردی. حضرت ابوبکر، ده وه لری  
آلوب رسول اکرمه کتوردی. او دخی « آنلری فقرایه تصدق ایله »  
دیو بیوردی.

بناءً علی ذلک حضرت صدیق، بویوز دوه یی تصدق ایدهرک فقرای  
مسلمینی طویوردی. بو صروده رومک فرسه غلبه سی حوادثنک شیوعی  
جمله مؤمنینه فرح ویردی.

رسول اکرمک حدیبیه ده اقامتی، یکریمی کون قدر اولوب یوقاروده  
بیان ایتدیکمز وجهله قربانلری کسدکدن صکره اصحاب کرامیله برابر  
مدینه یه عودت بیوردیلر.

اکرچه کعبه یی طواف ایتمکسزین کیرو دوندکلرندن طولانی مکدر  
ایدیلر. آنجق اثنای راهده قریباً بیوک فتوحاته مظهر اولاجقلرینه دائر  
سوره فتح نازل اولغله مننون اولدیلر و آنی تلاوت ایدرک سلامت ایله  
مدینه یه وصول بولدیلر.

آرهدن چوق وقت کچمدی (أَبُوبَصِيرَ تَقَفَى) نام ذات، مکده اسلام  
ایله مشرف اولدی وهان قریشک ایچندن صاووشوب مدینه منوره یه  
کلدی.

آرقه سندن اوچ کون صکره آنی ایستمک اوزره قریشک طرفندن  
ایکی مأمور کلوب معاهده مقتضاسنجه آنی رسول اکرمدن ایستدیلر.  
رسول اکرم دخی ویرمکه مجبور اولدی.

ابو بصیر، هر نه قدر « بن، کندی می هنوز چرکاب شرکدن  
تطهیر ایتمشیکن مشرکینک ایچنه نصل واره بیلورم؟ » دیو فریاد ایلدی ایسه ده  
ویریلسه تقض عهد ایدینک لازم کله جکندن رسول اکرم « یا ابابصیر! بز  
عهدمزی بوزمایز. آرتق سن ده براز صبر و ثبات ایت. جناب حق،  
الته سکا و سنک کبی مشرکین ایچنده قالان اهل اسلامه بر طریق نجات  
کوستیر، دهرک چاره سز آنی او مأمورلره تسلیم ایلدی.

مدینه منوره دن چیقوب (ذوالحلیفه) نام محله واردقلرنده اوتوروب

خرما رلر ایکن ابوبصیر، آنلردن برینک قلیجنه «باقیم نصلدر؟» دیه رک قیندن چیقارمش و همان آنی اوروب اولدورمش.

دیگر آرقداشی، قاچوب قورتولارق مدینه منوره یه کلوب رسول اکرمه ابوبصیردن شکایت ایتدی.

متعاقباً ابوبصیردخی کلوب حضورنبوی یه کیردی «یارسول الله! سن، بنی آنلره تسلیم ایله عهدکی ایفا ایتمش اولدک. اما شیمدی بنی جناب حق خلاص ایلدی» دیه رک مدینه منوره ده قالمق ایستدی.

حال بوکه: هر نه وقت قریش طرفندن طلب اولنسه معاهده اقتضاسنجه ویریلک لازم کله جکندن رسول اکرم، آنی مدینه ده آلیقومادی و «چیق ایستدیکک یره کیت» دیو کندوسنه رخصت ویریلدی.

ابوبصیردخی مدینه دن چیقوب ساحل دریا طرفه کیتدی و مکهدن شامه کیدن یول اوزرنده (عیص) نام موقعی طوتدی.

دائماً مکهدن شامه کیدن مشرکینه تعرض ایلردی. مکده مخفی اولان اهل اسلام، آنی ایشیتدکلی کبی همان طاقم طاقم چیقوب ابوبصیرک یاننه طوپلاندیلر و آز وقت ظرفده یتمش نفره بالغ اولدیلر و قریش طائفه سنک شام یوانی کسیدیلر.

مکهدن هر نه وقت یولجی چیقسه ایریشوب طوتارلر و مالی یغما ایدرلر ایدی. ابوبصیر، معیتنده کی جماعته امام اولوب نماز قیلارلردی.

فقط ابوجندل ابن سهیل دخی بر آراق پدینک قید و بنددن قورتولوب فرار ایله ابوبصیرک یاننه کلدی و آندن صکره او جماعته ابوجندل، امامت ایدر اولدی.

ابوجندلک خروجی اطرافده ایشیدیلدیکی کبی (غفار) و (اسلم) و (جهینه) قیلرلرندن و قبائل سائرهدن اسلام ایله مشرف اولان بر چوق کیمسه لر، آنک یاننه کلوب او جماعته قاتیلدیلر و آز وقت ظرفده اوچوز نفره بالغ اولدیلر.

مکەنک شام يوللرينى بتون بتون کسـڊيلر . قريش ايسـه تجارت ايله چکينور بر طائفه اولديغندن پک زياده صيقيلدیلر .

هان رسول اکرمه ايلچي کوندرروب او جماعتی مدينهيه جلب ايتمک اوزره قريشدن مدينهيه واراندلرک ردينه دائر اولان شرطک مصالحه نامه دن طی اولنمسی و بوندن صکره قريشدن هر کيم مدينهيه کيدرسه رد اولنماسی خصوصى رجا ايتديلر .

آنک اوزرينه رسول اکرم دخى ابوبصيرايله يولداشلرينى دعوت ايجون ابوبصيره مکتوب کوندردى .

ابوبصير ، او ائنده آغير خسته اولوب مکتوب هايونک کنديسـنه وصولنده صوک نفسـه کلشيدى ، مکتوبى الله آلوب يوزينه وکوزينه سوره رک تسليم روح ايلدى . رضى الله تعالى عنه

ابوجندل ، آنى اوراده دفن ايتدکدن صکره او جماعتی آلوب مدينهيه کلدى و آندن صکره هر طرفدن اسلام ايله مشرف اولوب کلنلر چوغالدى .





۰۰۰

## فتح خيبر

خيبر، مدينه نك شام جهتنده و مدينه يه درت قوناقلق بر محله كاڻ بر بيوك شهر ايدى. اطرافنده متعدد قلعه لر و پك چوق خرماقلر و مزرعه لر وار ايدى.

يوقاروده بيان ايتديكمز وجهله جوار مدينه ده متوطن اولان يهوديلرك كيمى نفى واجلا، كيمى قتل و اعدام اولمغله بقيه سنك چوغى خيبرده اجتماع ايتملر ايدى.

حتى بنى نضيرك رئيسى اولان (حي بن اخطب) (آل حقيق) كذى قيمت اشياىنى كتوروب خيبرده بر كيزلى رده دفن ايتمشيدى.

عربك الكبيوك تجارتي شام ايله اولدينى حالده شام يولى اوزرنده يهوديلرك اويله طوبلانوبده قوت پيدا ايتلملى اهل اسلام حقنده مضر ايدى.

لكن اهل اسلامك قريش مكه طرفندن دائما شبهه و وسوسه سى اولدينى جهتله شام طرفنى دوشونمكه و قتللى مساعد دكل ايدى. مؤخرأ حديبيه ده قريش ايله عقد مصالحه اولمغله آرتق شام جهتنى دوشونمكه فرصت الويردى. بناءً عليه رسول اكرم، حديبيه دن عوت ايله يكرمى كون قدر مدينه ده اقامتدن سكره هجرتك يدنجى سنه سى محرمى خلالنده بيك درتيوز پياده و ايكوز سوارى ايله مدينه دن چيقوب خيبر طرفنه عزيمت بيوردى.

بركون صباحلين ايركندن خيبره واردى و قلعه لرني محاصره ايتدى. مدت محاصره، اون كوندن زياده سوردى.

(دوس) قيسله سى رئيسى اولان (طفيل ابن عمرو دوسى) رضى الله تعالى عنه حضرتلرى كه هجرتدن مقدم مكيه واروب اسلام ايله مشرف



اولش و او وقتدنبرو قبیله سی خلقی ایمانه کتورمکه چالیشوب چالامقده بولنش ایدی . بو گره درتیوز آدمی ایله مدینه یه کلوب رسول اکرمک خیر غزاسنه چقیدیغنی خبر آنجه اردوی هایونه کلدی و بو شانلی محاربه ده بولندی .

ینه بواشاده اشبو دوس قبیله سندن مشهور (أَبُو هُرَیْرَه) رضی الله تعالی عنه حضرتلری دخی کلوب اصحاب صفیه ملحق اولدی .

آندن صکره فخرعالم حضرتلرینک یانندن آیرلیوب قوه حافظه سی دخی متین اولدیغندن پک چوق حدیث شریف روایت ایتشدر .

کندوسندن مرویدرکه : « بندن زیاده حدیث بیلن یالکز عبدالله ابن عمردر . او ، ایشیتدیکنی یازاردی ، بن یازمادم » دیر ایش . بز ، ینه صده کلهلم :

اشبو خیر محاربه لرنده اهل اسلامدن اون بش نفری شهید اولدی . یهودیلردن ایسه طقسان اوچ نفری قتل اولندی .

بو محاربه ده حضرت علیدن فوق العاده آثار قوت و شجاعت کورولدی . حتی بر قلعه قپوسنی قوپاروب قالقان کبی قوللاندی . نهایت خیر قلعه لری برر برر آ لیندی . پک چوق اموال و اشیا اله کچیریلدی و آل حقیقک بالاده مذکور اولان دینه سی بولندی . یالکز بو دینه دن چیقان اوانی و حلیاتک قیمتی اون بیک آلتون تخمین قیلندی .

اواشاده خیر یهودیلری طرفندن رسول اکرمه قیزارتیلش بر قویون اهدا و تقدیم اولندقده بعض اصحاب کرام ایله آنی یمک اوزره سفریه اوطوردی . بر پارچه سنی بر آز چیکنه دکدن صکره آغزندن چیقاروب آتدی و « ال چکیگزکه بو قویون زهرلی اولدیغنی بکا خبر ویریور » دیو بیوردی . لکن ( برآ ابن معرور ) ک اوغلی ( بشر ) برلقمه یوتمشیدی .

رسول اکرم ، اوزهرلی آتی بر آز آغزنده چیکنه مکله مبارک وجودینه بر مقدار تأثیری اولمشیدی . درعقب مداواته قیام ایله ایکی کوره کی آره سندن

حجامت ایتدیردی وزهرک تأثیراتی صاووشدی . اما بشر ، پک آغر خسته دوشدی .

او قویونی تسمیم ایدن ( سَلَامُ ابنِ مَشْكَم ) ك زوجه سی ( زینب بنت الحارث ) اولغله حضور نبوییه کتورلدی و « بو خیانتیه نصل جرأت ایتدك » دیو سورولدی .

زینب دخی « اکر حق پیغمبر ایسهك کار ایتمز و اکر یلانجی ایسهك الگدن قورتولمش اولورز دیو بو ایشه جسارت ایتدم . شمدی حق پیغمبر اولدیغکی آگلادم و سگا ایمان ایلدم » دیو جواب ویردی . رسول اکرم دخی آنی صالیوردی .

لکن متعاقباً بشر، وفات ایدنجه آنك وارثلری معرفتیه زینب دخی قصاصاً قتل و اعدام ایدیلدی .

خیبر اراضیسی ، بیت المال ایچون ضبط اولندی و نسوان و صبیانی اسیر ایدیلدی . باقی اهاالیسی دخی یاریجیلرله یرلرنده براغیلدیلر و عمرالفاروق رضی الله تعالی عنه حضرتلرینك ایام خلافتنده عموماً یهودیلر ، او حوالیدن نفی و اجلا اولندقلری وقته قدر خیبرده قالدیلر .

مدینهیه ایکی قوناق مسافهسی اولان ( فَدَک ) نام قریه اهاالیسی ، خیبرك فتح اولندیغنی ایشیتدکلری کبی خوف و خشیتیه دوشهرك اراضیلری رسول اکرمك اولمق اوزره یاریجیلقله یرلرنده ابقا اولملرینی استدعا ایلدکلرندن او وجهله آنلر دخی وطنلرنده ابقا بیورلدیلر .

خیبراسیرلری ایچنده حیّ ابن اخطبك قیزی ( صَفِیّه ) دخی وارایدی که رؤساء یهوددن ( ربیع ابن حقیق ) ك اوغلی ( کنانه ) هنوز آنی تزوج ایتمش اولدینی حالدیه بوکره خیبرده مقتول اولغله صفیه ، یکی کلین اولدینی حالدیه طول قالمشیدی .

صفیه ایسه فوق العاده کوزل اولدیغندن اسیرلرک تقسیمنده هر کیمک حصه سنه دوشسه دیکرلرینك کوکلی قالاچق ایدی .

بناءً علیه رسول اکرم ، هیچ کیمسه نك خاطری قالماق اوزره صفیه یی کندوسی ایچون سچوب آردی .

لکن جاریه اولدینی حالمی قالاچق ، یوقسه اممات مؤمنین اولان زوجات مطهرات صرهمی قونولاچق ؟ بوراسی اصحاب کرامک معلومی اولمديغندن حجاب و پرده آرقه سنه آلنه جقمی ؟ دیو منتظر اولدیلر .

چونکه : حضرت پیغمبرک زوجه لرینی اصحاب کرام ، هپ کندی آنلاری مقامنده طوتارلردی . قازیلرک یبانیجی ارکسکله کورونملری مقدا حرام قیلنمش ایسه ده بو کیفیت ، حرّه اولان خانونلره مخصوص ایدی . جاریه لره کوره تستر واجب اولوب آنلر آچیق کز لرلردی .

متعاقباً رسول اکرم ، صفیه یی حجاب و پرده آرقه سنه آلنجه اممات مؤمنین صرهمه کچه جکی آکلاشیلدی و چوق کچمیوب رسول اکرم ، آنی تزوج بیوردی .

رسول اکرم ، خیبردن عودت ایتدکده ( وادی القری ) ناحیه سنه کیتدی و اوراده کی یهودیلری دینه دعوت ایتدی .

یهودیلر ، ایمانه کلیوب قارشو طور دیلر . ایچلرندن بری طیشارو اوغرایوب اردیلهدی . زیر رضی الله تعالی عنه حضرتلری ، آنی قتل ایتدکن صکره دیگر بری چیقدی . حضرت زیر آنی دخی اعدام ایلدی .

بعده پیدرپی مبارزه یه چیقان یهودیلرک برینی حضرت علی کرم الله وجهه و ایکسینی ابودجانه رضی الله تعالی عنه حضرتلری اولدوردی . بو صورتله یهودیلرک اون بر نفری اعدام قیلندی .

بعده یوروش ایله وادی القری ، ضبط ایدیلوب ایچنده بولنان اموال و اشیا ، غزاته تقسیم و اهالیسی خیبرلیر کبی چفتجی اولق اوزره یرلرنده ابقا اولندی .

بونک اوزرینه مدینه منوره ییدی ، سکز قوناق مسافده و مدینه ایله شام آره سنده بولنان ( تیم ) بلده سی اهالیسی دخی جزیه و یرمک اوزره اطاعت ایلدیلر .

الحاصل اطراف وجوارده بولنان قبائل و عشائر ، سطوت اسلامیہ دن اور کوب برر برر عرض انقیادہ باشلادیلر و مدینہ منورہ یہ عودت بیورلدقدن صکرہ آرہ صرہ اطرافہ فرقلر کوندریلور و هر طرفده سطوت اسلامیہ کوستریلور اولدی .

بناءً علیہ آز وقت ظرفنده ملت اسلامیہ ، پک بیوک قوت قازانوب بوندن ایکی سنہ صکرہ قولایقله مکہ نك فتحنه مقتدر اولمشدر .

بوفتوحات ایسه هب حدیدیه مصالحه سنك محسناتنددر . زیرا اکر قریش ایله مصالحه اولنماش و اوطرفدن اهل اسلام امین و مطمئن بولنماش اولایدی ، برو طرفك ایشلرینه بویله سربستجه باقیلامازدی .

بوسبیدن ناشی اومصالحه نك شروطنی مضر کوروبده اعتراض ایله ینلر ، صکره پشیان اوله رق توبه و استغفار ایتمشلردر .

ینه بوسنه دیار یمنده متوطن اولان ( اشعری ) قبیله سندن برچوق کیسه لر ( ابوموسی الاشعری ) ایله برلکده مدینہ منورہ یه کلدیلر و اسلام ایله مشرف اولدیلر .





## سفرء پیغمبری

حذیبیه دن عودت بیورلدقدن صکره کافه انس و جنّه مبعوث اولان خاتم الانبیا حضرت تلمی طرفدن دین اسلامه دعوت ایچون ملوک اطرافه کوندرملک اوزره یدی سنه هجریه سی محرّمده اتی قطعه نامه هایون یازیلدی و عندالملوک مهره اعتبار اولنه کلسیله کوموشدن بر مهر یاپدیریلدی، اوزهرینه (محمد رسول الله) دیو حک ایتدیریلدی و او نامه لره باصیلدی . هرنامه بی کوتورملک ایچون برر ایلمچی تعیین وارسال بیوریلدی .

شویله که : نجاشی ، یعنی سلطان حبش اولان ( اَحْمَدُ ابن بحر ) .  
( عمرو ابن امیّه الضمری ) و مصر حکمداری اولان ( مَقْوَقَس ) .  
( خاطب ابن بلتعہ ) و قیصر روم اولان ( هرقل ) . ( دَحِیَّه ابن خلیفه )  
و ( بلقا ) ملکی اولان ( حارث ابن ابی شمر غسانی ) . ( شجاع ابن وهب )  
اسدی ) و دیار نجدده بنی حنیفه دن یمامه ملکی اولان ( هَوَذه ابن علی ) .  
( سَلِط ابن عمرو عامری ) و کسرای عجم اولان ( خسرو پرویز ) .  
( عبدالله ابن خُذَافَه سهمی ) کونده رلدی .

حبشستانده کی مهاجرین اسلامی ایسته مک و ( امّ حبیبه ) رضی الله تعالی عنها حضرت تلمی، رسول اکرمه نکاح ایلک دخی عمرو ابن امیّه نک مأموریتی اقتضاسندن ایدی .

چونکه : امّ حبیبه رضی الله تعالی عنها ، رئیس قریش اولان ابوسفیانک قیزی اولوب مقدما زوجی ( عُبَیدُالله ابن جَحْش ) ايله برابر مکدن حبشه

هجرت ایلش اولدینی حالده مؤخرآ عیدالله ، نصارا دینه کیروب امّ حبیبه ایسه دینده ثبات ایدرک آندن آیریلش و عرب خاتونلری کفونی بولمادقجه ازدواجی قبول ایتیموب بویله اسیلزاده بر خاتونک اویله دیارغربنده دینداشلرندن کفونی بولمق دخی مشکل اولدیغندن ییچاره امّ حبیبه پک کوچ بر حالده قالمش ایدی .

بویله دین مین اوغورنده وطنندن دور واقربا وتعلقاتندن مهجور اوله رق بی کس قالان اسیلزاده بر خاتونک تلطیفی ایسه الزم اولدیغندن رسول اکرم ، آنی تزوّجه طالب وراغب اولمش ایدی .

نجاشی ، عمرو ابن امیّه رضی الله تعالی عنه حضرتلرینه لایق وجهله اکرام واحترام ایتمش ومهاجریندن ، رسول اکرمک عمّزاده سی اولان (جعفر ابن ابی طالب) رضی الله تعالی عنه حضرتلرینک حضورنده اسلام ايله مشرف اولمش وامّ حبیبه بی رسول اکرمه نکاح ایتدیرمش و آنلر ايله برابر سائر مهاجرین اسلامی ایکی کمی یه بیندیروب عربستان طرفه کوندرمش ایدی .

رسول اکرم ، خیر غزا سنده ایکن آنلر مدینه یه کلدیله و رسول اکرم ، خیبردن عودتنده آنلره کوروشوب فوق العاده ممنون اولدی . حتی « بیلیم بو ایکی شینک قنغیسیله فرحلانایم ؟ فتح خیبرله می ، یوقسه قدوم جعفرله می ؟ » دیو بیوردی .

بو صورتله امّ حبیبه ، سائر امّهاث مؤمنین صره سینه کچدی و رسول اکرم ايله رئیس اعداسی اولان ابو سفیان بیننده قرابت صهریه پیدا اولدی .

مقوقس دخی خاطب ابن بلتعہ رضی الله تعالی عنه حضرتلرینه اکرام واحترام ایتمش و رسول اکرمه هدیه اولمق اوزره درت جاریه و (دُلل) دیو معروف و مشهور اولان بیاض بر استر ايله (یعفور) نامنده بر حمار کوندرمش ایدی .



او جاریه لردن بری ( ماریه ) رضی الله تعالی عنہا در کہ رسول اکرمؐ  
آندن ( ابراہیم ) نامندہ بر اوغلی دنیاہ کلدی .

قیصر روم دخی نامہ ہایونی تعظیم ایلہ الہ آلوب یوزینہ سورمش  
و ( دحیہ ) یہ پک زیادہ احترام ایدوب بر چوق ہدیہ لر دخی ویرمش در .  
چونکہ : قیصر روم ایلہ کسری بینندہ برمدتدنبرو محاربات شدیدہ  
وقوعہ کلوب مقدما کسری ، غلبہ ایدرک سوریه قطعہ سنی ضبط ایلش وبتون  
عربستانی بنمہ مش ایدی . اہل فرس ایسہ مشرک اولدیغندن علی العموم  
اہل کتابک دشمنی ایدی و روم طائفہ سی اہل کتاب اولان نصارا دینندہ  
اولوب اہل اسلامہ آلیشقین ملت ایسہ نصارا طائفہ سی ایدی . بناء علی ذلک  
یوقارودہ بیان ایتدی کمز وجلہ اہل فرسک روملرہ غلبہ سندن طولایی  
مشرکین قریش ، منون و اہل اسلام محزون اولمشیدی . مؤخرآ روملرک  
اہل فرسہ غلبہ سی خبری ، حدیبیہ دہ ایکن ایشیدیلدیکی کبی اہل اسلام  
فرح بولمشیدی . بو اثنادہ ایسہ قیصر روم ، قدس شریفہ کلوب او طرفک  
اصلاح احوالیلہ مشغول اولہرق او حوالی اہالیسنی تلطیف وتالیف ایتک  
ایستردی . ایشتہ بوصرہ دحیہ ، کیدوب کندوسنہ نامہ ہایونی تسلیم  
ایلش اولدیغندن پک زیادہ التفات و احترام قیصری یہ مظهر اولمشدر .

ملوک غسان ، فی الاصل یمندن بو طرفلرہ مهاجرت ایدن طوائف عزبدن  
اولوب پک چوق و قتلردنبرو بو حوالیدہ حکومت ایدہ کلشدر . فقط  
بونلر ، قیصر رومہ تابع اولہرق آنک طرفندن شام جہتندہ کی عربان اوزرینہ  
مأمور ایدیلر .

شوالہ نظراً ( حارث ابن ابی شمر غسانی ) قیصرک بروالیسی حکمندہ  
ایدی . حال بوکہ شجاع اسدی رضی الله تعالی عنہ حضر تری ، کیدوب آکا  
رسول اکرمؐ نامہ سنی ویردکدہ او قویوب یرہ آتمش و « ایشتبہن ، آنک  
اوزرینہ واریورم » دیہرک بد معاملہ ایتمش و قیصرہ مکتوب کوندہ روب  
عسکریلہ مدینہ یہ هجوم ایتک اوزرہ استیذان ایلش ایسہ دہ قیصر ، آکا رخصت  
ویرماش ایدی .

شجاع اسدی، مدینه منوره یه کلوب حارثک او یله بد معامله سنی افاده یئتدکده رسول اکرم، حارثه «ملکی زائل اولسون» دیو بد دعا ایتدی. چوق کچمیوب حارث، کفر اوزره وفات ایدهرک جانی جهنمه ایصهار لایوب یئتدی.

یمامه ملکی (هؤده) دخی نصارا دیننده اولدینی حالدہ سلیط عامری رضی الله تعالی عنه حضرتلری، واروب آکا رسول اکرمک نامه سنی ویردکده اکر بنی کندیسنه ولی عهد ایدرسه مسلمان اولورم و آکا یاردیم ایدهرم والا آنکله جنک ایلرم «دیمش اولدیغندن رسول اکرم «یارب! سن آنک حقندن کل» دیو بیوردی. آره سی چوق کچمیوب هؤده دخی کافر اولدینی حالدہ وفات ایلشدر.

هؤده طرفندن مدینه یه کوندولمش اولان (رحال) نام کمنسه مسلمان اولوب ایچه قرآن کریم دخی تعلیم ایلش ایکن یمامه یه عودتنده مرتد اولهرق کویا «رسول اکرم، مسیلمة الکذابی نبوتده کندیسنه شریک ایتدی» دیو نامعقول بر یالان سویلشدر.

عبدالله ابن حذافه رضی الله تعالی عنه حضرتلری دخی پای تخت کسرایه واروب رسول اکرمک نامه سنی تسلیم ایتدکده خسرو پرویز، حدتله رک نامه هایونی یرتوب پاره پاره ایلش اولدیغندن رسول اکرم «الله، آنک ملک و دولتی پاره لسون» دیو پرویزه بد دعا ایلدی.

پرویز، کندو طرفندن یمنده والی بولنان و آل ساساندن اولان (بازان) خبر کونده روب «شو حجاز طرفنده دعوی نبوت ایدن آدمی بکا کونده ر» یواصر ایلش اولدیغندن بازان دخی رسول اکرمه «همان کسرانک یانسه آره سین» دیو مکتوب یازوب ایکی مأمور ایله مدینه یه کونده رملکه مأمورلر لوب حضور نبوی یه کیردیلر و بازانک مکتوبنی ویردیلر و «همان کسرانک ننه کیدر ایسه ک بازان دخی سنک ایچون کسرایه شفاعتنامه یازار و اکر ایدر ایسه ک سنی تلف ایدر» دیدیلر. رسول اکرم دخی «یارین جواب یریرم» دیو آنلری حضورندن چیقاردی.

متعاقباً رسول اکرمه وحی الہی کلدی. طرف الہیدن پرویزه ، اوغلی (شیرویه) مسلط اوله رق اوکیجه آنی اولدورمش اولدینی خبر ویریلدی. رسول اکرم دخی اومامورلری چاغردی ، کیفیتی آنلره خبرویردی و «بنم شریعتم یقینده دوات کسرانک ایریشدیک یرلره ایریشه جکدر. باذانه سویله یگ ایمانه کلسون ، دیو بیوردی .

اومامورلر دونوب صنعایه وارمشلر و کیفیتی باذانه خبر ویرمشلر . بر قاچ کون مرورنده شیرویه طرفندن پدرینک اعدام اولندیغنه دائر و حضرت پیغمبره تعرض اولنماسنی مشعر باذانه فرماننامه کلنجه حساب ایتدیلر . کوردیلرکه :

پرویزک قتلی ، رسول اکرمک خبر ویردیک کونک کیجه سنه تصادف ایدیور . بو معجزه یی کورونجه کرک باذان و کرک اهل فارسدن آنک معیتنده بولنان کسان ، هپ ایمانه کلدیلر .

رسول اکرم دخی باذانی صنعا والیسی نصب ایتدی . ایشته حضرت پیغمبرک ابتدا نصب ایتدیک والی بودر و ملوک عجمدن ابتدا ایمانه کلن دخی اودر .





## عمره پیغمبری

اشبو یدنجی سنه هجریه ذی القعدة سنک اوائلنده ( عمره ) ، یعنی سہی و طواف کعبہ نیتلہ رسول اکرم ، مدینہ منورہ دن چیقدی و قربانلق آلتمش دہوہ کوتوردی و یہ دکدہ یوز آت وار ایدی .

صبيان و نسواندن باشقہ اولارق ایکی بیک نفر اصحاب کرام دخی برابر ایدی .

مکہ یہ یاقلاشدقلرنده قریش طائفہ سی ، مکدن چیقوب اوزاقدن رسول اکرمک قدومنی تماشا ایلدیلر .

رسول اکرم ، دہوہ اوزہ رندہ اولوب اصحاب کرامی اطرافنی احاطہ ایتمش اولدقلری خالدہ ( عبدالله ابن رواحہ ) رضی اللہ تعالی عنہ ، رسول اکرمک اوکنده یورور والہی طرزندہ کوزل اشعار اوکور ایدی .

عبدالله ابن رواحہ حضرتلری ، خزرج قبیلہ سندن وعقبہ بیعت ایدوب بدر غزاسندہ بولنان انصار کرامدن وشعرا ی بنامدن اولوب دائما کفارک دین باطلارینی ذم و قدح یولندہ اشعار سویلردی .

بوکرہ دخی رسول اکرمک اوکنده اودرلو اشعار سویلیوب کیدردی . بوصورتلہ مکہ مکرمہ یہ کیردیلر . همان رسول اکرم بیت اللہی طواف و ( صفا ) ایلہ ( مروہ ) بینندہ سہی ایتدی .

اصحاب کرام دخی کذلک طواف وسی ایتدیلر و زیارت کعبہ معظمہ احکامنی یرینہ کوتوردیلر .

رسول اکرمک حدیبیہ وقعہ سندن اولجہ کورمش اولدینی رؤیا ، ایشته بوکرہ عینلہ چیقدی و عمتی عباس ، بوکرہ کندی زوجہ سی

(ام الفضل) ك قیز قرنداشی اولان (مِمْوَنَه بنت حارث) ی رسول اکرمه نکاح ایتدیردی .

رسول اکرم ، اوچ کون مکّه مکرمهده اقامتدن صکره چیقوب اصحاب کرامیله برابر مدینهیه عودت بیوردی ،

### هجرة مك سنکزنجی سنهسی

( خالد ابن الولید ) و ( عثمان ابن ابی طلحه ) و ( عمرو ابن العاص ) اشبو سنکزنجی سنّه هجریه نك صفرنده مدینه منورهیه کلوب اسلام ایله مشرف اولدیلر .

خالد ابن الولید ، بنی مخزومك اشراقندن اولوب قریشك سوارى باشبوغی مقامنده ایدی و فن حرب کندوسنه داد حق بر کیفیت ایدی . احد غزاسنده قریش طائفهسی مغلوب اولمشیکن غالب کلمرینه او ، سبب اولمشیدی . اسلام ایله مشرف اولدقدن صکره دین اسلامه پك بیوک خدمتler ایتمشدر .

عثمان ابن ابی طلحه دخی عبدالدار اوغوللرندن اولوب کعبه معظمه نك پرده داری ایدی و مفتاح کعبه آنلرك النده ایدی .

عمرو ابن العاص ، بنی سهمك اشراقندن و دهات عربدن ، یعنی عربك جن فکلولرندن عاقل و حکیم برذات اولوب مشکل ایشلرك حل و تسویه سنده مانندی یوق ایدی .

اشراف قریشدن بویله اوچ بیوک ذاتك برلکده کلوب ایمان ایتلری اهل اسلامه باعث ممنونیت اولدی .

بو اووانده دخی مدینه منوره دن طاقم طاقم عسا کر اسلامیه چیقهرق اطرافده راست کلدکلری کروه مشرکینی اوروب غارت ایتمکده وکاه غالب وکاه مغلوب اولوب مع مافیه آره صره مدینهیه اموال غنائم کتورلمکده ایدی .





## محاربه مَوْتَه

( مَوْتَه ) شام دیارنده ( كَرَك ) بلده سنك حانب قبلیسندہ ( بَلَقَا ) یه تابع بر یردر .

سكزنجی سنه هجریه نك جمادی الاولاسندہ اورادہ بر بیوك محاربه وقوع بولشدر .

اهل اسلامك عساكر روم ایله اك اول وقوعه كلن محاربه سی بو وقعه در .

سببی بودرکه : رسول اکرم ( حارث ابن عُمیر آزدی ) رضی الله تعالی عنه حضرتلرینی نامه هایون ایله بصری والیسنه کونده رمشیدی .

حارث رضی الله تعالی عنه مَوْتَه یه واصل اولدقده قیصر رومك امراسندن ( شَرَحْبِيلُ ابن عمرو الغسانی ) آنی رسول اکرمك ایلچیسینی اولدیغنی اوکره نمش حالده قتل ایتمشیدی و آندن بشقه رسول اکرمك هیچ بر ایلچیسینی قتل اولنماشیدی .

رسول اکرم ، ایلچیسنك قتل اولندیغنه مطلع اولدقده پك زیاده متأثر اولدی وهان کندی آزادلو سی اولان ( زید ابن حارثه ) رضی الله تعالی عنه حضرتلرینی امیرالچیش ، یعنی سرعسكر نصب ایدرك لواء شریفی انه ویردی . اوچ بیک عساكر اسلامیه ایله آنی مدینه دن چیقاردی وبالذات فخر عالم حضرتلری ، خارج مدینه ده ( ثَنِيَّةُ الْوَدَاعِ ) نام محله قدر چیقوب آنلری کچوردی .

« زید ابن حارثه ، شهید اولورسه یرینه جعفر ابن ابی طالب و اودخی



شهید اولورسه عبدالله ابن رواحه کچسون . او دخی شهید اولورایسه اهل اسلام، ایچلرندن برینی انتخاب ایتسون، دیو بیوردی .

شرحیل ، اردوی اسلامک حرکتی ایشندیکی کبی برادری (سدوس ابن عمرو) ایله ایلرویه بر مقداری سواری سرق ایتمکه برابر کلیتو عسکر جمعنه تشبث ایتمش وجانب قیصریدن دخی استمداد ایلش ایدی .

بناءً علیه اهل اسلامه قارشو کلک اوزره دیار شامده بولنان روم عسکر یله قیصره تابع اولان عربلردن مرکب غایت جسم بر اردو تشکیل اولمشیدی . سدوس ابن عمرو، زیاده سرعت ایله حرکت ایدرک وادی القراده عسا کر اسلامییه قارشو کلدی . لکن جنکه کیرشدکده عسکری بوزولدی وکندوسی مقتول اولدی .

عسا کر اسلامییه آندن قالقوب (معان) . واردقلرنده یوزبیک نفردن زیاده مکمل بر روم اردوسنک حرکت ایلش اولدینی ایشیدیلدی ورؤسای عسکره طور غونلق کلدی .

ایکی کون معانده اقامت ایتدیلر و «کیفتی رسول اکرمه یازده کله جک جوابه منتظر اولالم» دیدیلر .

لکن عبدالله ابن رواحه رضی الله عنه حضرتلری، دیکر لرینی تشجیع و تشویق ایتمکه همان متوکلاً علی الله ایلرو یوریدیلر .

(موتہ) نام محله واصل اولدقلرنده دشمن عسکری کلوب کوروندی . کرک عددجه وکرک آلات و ادوات حربیه جه او قدر جسم و مکمل بر اردو ایدی که اوچ بیک عسکرله آکا قارشو وارمق ممکن دکل ایدی . لکن کیرو چکیلوبده یاقه یی قورتارمق دخی مشکل ایدی .

همان زید ابن حارثه رضی الله تعالی عنه حضرتلری، سنجاغی اله آلوب میدان حربیه کیردی . اهل اسلام دخی آنک اطرافنده صف باغلا یوب طور دی .

زید رضی الله عنه ، مزراق ایله اوریلوب شهید اولنجه سنجاغی، جعفر ابن ابی طالب رضی الله تعالی عنه حضرتلری ، طوتدی اودخی پک چوق

یرندن یارالادی . لکن اصلا فتور کتورمیوب یرنده ثبات ایتدی . حتی صاغ الی کسیدلی . همان سنجاغی صول انه آلدی . صول الی دخی کسیدلی . همان سنجاغه صاریلدی و نهایت شهید اولدی .

همان عبدالله ابن رواحه رضی الله تعالی عنه حضرتلری ، سکیرتدی و سنجاغی آلوب حربہ قیام ایتدی .

اودخی شهید اولنجه اردوی اسلام ، باشبوغسز قالدی و بو صرہ ده دها اون قدر اهل اسلام شهید اولدی . بوجهتله عسا کر اسلامیه بوزولوب طاغیلدی .

فقط سنجاق یره دوشمه سون دیو ( ابویسر الانصاری ) رضی الله تعالی عنه حضرتلری آلدی و اهل اسلام طرفندن امارته هرکیم انتخاب اولنه حق ایسه آ کا تسلیم ایتک اوزره ( ثابت ابن اقرم عجلانی ) رضی الله تعالی عنه حضرتلرینه ویردی .

عسا کر اسلامیه ، منہزم اوله رق کیر و دونوب کیدرکن خالد ابن الولید رضی الله تعالی عنه حضرتلری ، اوکلرینه کچوب آنلری آلیقویمق ایستدیسده مفید اولمدی . لکن کندوسی بر موقع انتخاب ایله طیانوب طوردی .

بعده ( قُطْبَةُ ابن عامر ) رضی الله تعالی عنه حضرتلری ، عسکرک اوکنه کچوب « ای جماعت مسلمین ! فرار ایدرکن اولمکدن ایسه پنجه پنجه مردهانه جنک ایدرک جان و یرمک خیرلودر » دیرک حیت اسلامیه بی تحریک ایده جک سوزلرله بوزغون عسکری کیر و چویردی .

جمله سی کلوب خالد بن ولیدک یاننه طویلاندیلر . ثابت ابن اقرم دخی لواء شریفی کتوروب آ کا ویردی .

حضرت خالد ، قبول ایتوب « سن ، آ کا بندن دها زیاده مستحق سین . زیرا بندن یاشلی سین ، هم ده بدرغزاسنه حاضر اولان کبار اصحاب کرامند سین ، دیدی .

نابت ابن اقرم دخی آکا « سن ، فن حربی دها اعلا بیلورسین . بن سنجانی آنجق سکا و یرمک ایچون آلدن » دیدکدن صکره « ای جماعت مسلمین ! خالدك امارتنه راضیمیسکمز ؟ » دیدکده هرکس « اوت » دیدیلر وهان آنک امری آلتنه کیردیلر .

حضرت خالد دخی سنجانی اله آلدی و عسکری کوزلجه ترتیب ایله مردانه مدافعهیه کیرشدی . نهایت آقشام ایرشدی وایکی عسکر بربرندن آیریلدی .

او کون خالدك محاربهجه مسلم اولان مهارتی قدر آثار شجاعتی دخی کورولدی . حتی الذمه طقوز قلیج قیریلدی .

دشمنك کثرت و قوتنه نسبتله اردوی اسلامك قوتی، پک آاز اولدینی حالده عسا کر اسلامیهنك میدان محاربهده بویله مردانه و فدا کارانه طاورانشنه دشمن عسکری ، حیرت نظریله باقوب متعجب اولدی و بیانی کوزلری ییلدی .

بونکله برابر اهل اسلامه نسبتله فوق العاده کثرتلری اولدیغندن فرداسی همان عسا کر اسلامیهنی هر طرفدن احاطه ایدوب بیتیرمک نیتنده ایدیلر .

حضرت خالد ایسه علی الصباح عسا کر اسلامی تنظیم و تعییه ایتدیکی صروده وضعی ده کشیدردی .

شویله که : پیشداری دمدار و دمداری پیشدار ایتدی و صاغ جناحدهکی عسکری صول جناحه و صول جناحدهکی عسکری صاغ جناحه کچوردی . دشمنك هر فرقهسی، کندی اوکنده دون کورمش اولدینی عسکردن بشقه عسکر کورمکله اهل اسلامه امداد ایچون تازه عسکر گلش دیوب طورورکن خالد، آنلرک اوزرینه بغته برشدتلو هجوم ایدنجه دشمن بوزولدی و میدان محاربهده برچوق اسلحه و سائره براغوب کیرو چکیلدی .

لکن دشمنك کیروسی چوق ایدی . مصلحت آنجق عسا کر اسلامی بو دریای فلاکتدن چیقاروب قورتارمق ایدی .

بناءً علیه حضرت خالد، دشمنك بو انهزامنی فرصت و بوفرستی غنیمت بیهلرك همان کړو چکیلدی .

عسكرك هیئت مجموعه سنه خلل كتورمه یهرك یاواش یاواش دونوب سالماً مدینه منوره کلدی و طوغریسی بو خصوصده فن حربجه پك زیاده مهارت کوستردی .

موتده او وجهله محاربه اولنورکن رسول اکرم، او محاربه یی کوزی اوکونده تماشا ایدر کپی نه اولدیغنی بیلیوردی .

حتی موتده محاربه اولندیغنی کون رسول اکرم، مدینه ده کی مسجد شریفده اصحاب کرامیله اوطورور و بصیرت کوزیله عالم معنایه متوجه اولوب طورور ایکن زید ابن حارثه نك شهید اولدیغنی سویله دکن صکره برمقدار سکوت اوزره طوردی و مبارك کوزلرندن یاش آقهرق جعفر بن ابی طالبك و ابن رواحه نك دخی شهید اولدیغنی خبرویردی . بعده « اللهم قلیجلرندن بریسی اولان خالد، سنجاغی آلدی و ایش آنك یوزندن فتح اولدی » دیو بیوردی .

آندن صکره خالد ابن ولیده (سیف الله) تعبیری لقب اولدی . فی الواقع اهل اسلامك اللهك برکسکین قلیجی ایدی . آندن صکره دخی یوزندن پك چوق فتوحات ظهوره کلدی .

ینه او وقت رسول اکرم « جعفرک کسین ایکی انه بدل جناب حق ، آکا ایکی قاناد ویردی . کوردم که : ملکر ایله برلکده اوچویردی » دیو بیوردی . بوسیدن ناشی جعفر ابن ابی طالب دخی آندن صکره « جعفر طیار » دیو شهرت بولدی .



## بعض وقایع حریه

قضاعه طوائفندن (بلی) و (عذره) قبیله لرینک مدینه منوره حیواناتی غارت ایتمک اوزره (وادی القری) آرقه سنده تجمع ایتمکده اولدیغی خبر آندی.

عمرو ابن عاص رضی الله تعالی عنه حضرت تلرینک پدری اولان (عاص ابن وائل) ک والده سی ایسه (بلی) قبیله سندن اولمسیله رسول اکرم، عمرو ابن عاصی امیرالجیش، یعنی باشبوغ نصب ایدرک اشبو سکزنجی سنه هجریه نک جمادی الآخره سنده مهاجرین وانصاردن اوچیوز نفر ایله او طرفه کوندردی. بونلرک اوتوز نفری آتلا ایدی.

عمرو ابن العاص او طائفه یه یاقلاشدقه کثرت اوزره اولدقلرینی خبر آلمغله (رافع ابن مکیث) رضی الله تعالی عنهی رسول اکرمه کونده روب امداد ایستدی.

رسول اکرم دخی آکا امداد ایچون ابو عبیده ابن الجراح رضی الله تعالی عنه حضرت تلرینی ایکیوز نفر ایله اورایه کوندردی و «اختلاف ایتمیکز، متفقانه حرکت ایدیکز» دیو بیوردی.

ابوبکر الصدیق و عمر الفاروق رضی الله تعالی عنهما حضرت تلری دخی بو ایکیوز کیشی ایچنده ایدیلر.

ابو عبیده، عمرو ابن عاصک یاننه وارددقه عسکره امام اولوق ایستدی عمرو ایسه «سن، بکا امداد ایچون کلدک. اصل امیرالجیش بنم» دیدی. ابو عبیده، ملایم بر ذات اولدیغندن «رسول اکرم، اختلاف ایتمیکز دیو امر ایتدی. سن بکا اویماز ایسه ک بن، سکا او یارم، دیمکله عمرو ابن العاص، جماعت مسلمینه امام اولوب نماز قیلدیردی.

بوجهتله اصحاب كرامك اولوسى اولان ابوبكر الصديق ايله عمر الفاروق  
رضى الله تعالى عنهما حضرتلرى ، عمرو ابن عاصك رياستى آلتنه كيرمش  
اولدى .

عمرو ابن عاص ، حكيم و مدبر بر آدم اولوب اهل اسلامك درجه  
اطاعت و انضباطنى كورونجه همان حريجه لازم كلان تدابيرك كمال شدت ايله  
اجراسنه باشلادى .

حتى كيجه اردوده آتش يانمىنى صيقى يساغ ايدىرك « هر كيم آتش ياقار  
ايسه آتى ، او آتش ايچنه آتارم » ديو اعلان ايلدى .

هوا ايسه پك صفوق اولديغندن عسكر كلوب ابوبكر الصديق ايله  
عمر الفاروقه شكايت ايتدكه حضرت عمر « نه ديمك ؟ بو آدم ، عسكرى  
صوغوقدن قيراجقمى ؟ » ديو عمروك يساغنى قالديرمق ايستدى ايسه ده  
حضرت ابو بكر « طوقونما يا عمر ! حضرت پينمير ، آنى مجرد احوال  
حربه وقوفى ايچون باشبوغ نصب ايتدى . مادامكه بو ساعتده باشبوغدر .  
آنك ايشنه قارشىمق جائز دكلدر » ديمكه حضرت عمر دخی سكوت  
ايتدى .

عمرو ابن عاصك بو يساغى ايسه نفس الامرده بر كوزل تدبير ايدى .  
زيرا اردوده آتشلر يانسه عساكر اسلامك نه قدر اولدينى قارشودن تخمين  
اولنه بيلوردى .

دشمن ايسه كثر اوزره اولديغندن عساكر اسلامك بش يوز نفردن  
عبارت اولديغنى بيلسه تلاش ايتمهرك طيانوب طوروردى .

عمرو ابن عاص ايسه قوردينى ترتيبى كيمسه يه آچيوب همان على الصباح  
دشمن اوزرينه بغته بر شدتلو هجوم ايتدى .

دشمن دخی اهل اسلامك نه مقدار اولديغنى بيلمديكى جهتله بردن بره  
اوركوب ، بوزولدى و بر چوق حيواناتى ترك ايله تارمار اوله رق فراره يوز  
طوتدى .



هیچ بر وقته بر سر عسکرک ایشنه قارشق جا نر اولیوب عسکرک برنجی وظیفه سی آمرینه اطاعتدن عبارت اولدیغنه بو وقعه دلیل واضعدر. عمرو ابن عاص، هنوز اسلام ایله مشرف اولمشیکن بویله کبار اصحاب کرامدن مرکب بر فرقه عسکریه امیر اولوبده مظفرآ مدینه یه عودتنه فوق العاده سویوب بایلدی و « رسول اکرم غنندنه بنم سائره فضل ورجحانم اولسه بویله ائ سوکیلی اصحاب کرامنی بنم معیتمه ویرمزدی، یوللو یا کلش بر فکره ذاهب اولدی .

آنک بو کرّه مهاجرین وانصاردن اوچ یوز قدر اصحاب کرامه باشوغ نصب اولمسی ایسه مجرد حکیم و مدبر و اعمال عسکره مقتدر ذواتدن اولمسیله برابر بیوک والده سی، قضاعه نسلندن بولندیغنه مبنی ایدی. ابو عییده نك آ کا تبعی دخی مجرد میانه ده بر گونه اختلاف حادث اولماق ایچون مماشات قیلندن ایدی .

حال بوکه : بر کیمسه نك بر خصوصده ممتاز اولوبده اوجه تله بر طائفه یه فائق ورئیس اولمندن طولای هر خصوصده فائق اولمسی لازم کلز . بناءً علی ذلك عمرو ابن عاص، مدینه منوره یه عودت ایتدکن صکره حضور نبویه « یارسول الله ! ائ زیاده سودیکک کیمدر، دیو صوردی . رسول اکرم دخی « عایشه در « دیو جواب ویردی .

بعده عمرو ابن عاص « نسواندن دکل، ارککلرایچنده ائ زیاده سودیکک کیمدر، دیدکده رسول اکرم دخی « عایشه نك پدری ابو بکر در، دیو بیوردی .

آنک اوزرینه عمرو ابن عاص « یا، آندن صکره ائ زیاده کیمی سورسین؟، دیدکده « عمری سورم « دیدی .

عمرو « دهاصکره کیمی سورسین؟ « دیو صوردقجه رسول اکرم دخی صرهمسیله سائر اصحاب کرامی سویلدی .

بو وجهله خیلی اصحاب کرامک اسملری یاد اولنوب هنوز کندوسنه نوبت کلمدیکندن عمرو ابن عاص سکوت ایلدی .

عمرو ابن عاصدن مرویدرکه : بویله رسول اکرم ایله واقع اولان  
فاورده سنی حکایه ایتدکدن صکره « اک صوکه قالورم دیو خوفدن ناشی  
سمی کسوب صوصدم » دیر ایمش .

فی الواقع عمرو ابن عاص رضی الله تعالی عنه ، کبار اصحاب کرامدن ایسه ده  
وقت اصحاب کرام ایچنده آکما نسبتله عندالله و عند رسول الله دهاسوکیلو  
دها افضل بک چوق ذاتلر و آنک طبقه سنک اوست طرفنده خیلی طبقه لر  
ارایدی . ایشته او طبقه لرده بولنان کبار اصحاب کزین صایلدقدن صکره  
مرو ابن عاصه نوبت کله جکنی کندوسی دخی درک ایتمکله سوزی اوزاتیموب  
بصه کسمشدر .

### استطراد

اصحاب کرامک برنجی طبقه سی اول باول ایمان ایدن ( خدیجه الکبری )  
( ابوبکر ابن ابی قحافه ) و ( زید ابن حارثه ) ایله ( عثمان ابن عفان )  
( عبدالرحمن ابن عوف ) و ( سعد ابن ابی وقاص ) و ( زبیر ابن العوام )  
( طلحه ابن عبیدالله ) و بعده ( ابو عبیده ابن الجراح ) و ( سعید ابن زید )  
( عثمان ابن مظعون ) و ( ارقم ابن یاسر ) و ( بلال حبشی ) ایله عمر ابن  
لخطابک اسلامندن مقدم ایمانه کلن سائر صحابه کزیندرکه اوتوز طقوز  
فره بالغ اولدقلری خالد حضرت ( ارقم ) ک ( صفا ) اوزرنده اولان خانه سنده  
لویلا نوب رسول اکرم ایله کیزلو مصاحبت ایدرلردی .

حضرت عمر دخی او خانه ده ایمانه کلدی و آنکله اهل اسلامک عددی  
رقه بالغ اولدی . آنک اوزرینه دین اسلام اعلان ایدیلدی .  
آنلردن اون کشی بی حال حیاتلرنده ایکن رسول اکرم ، جنت ایله  
رده لهدی .

ایشته آنلره ( عشره مبشره ) ده نیلورکه ( ابوبکر الصدیق ) و ( عمر  
فاروق ) و ( عثمان ابن عفان ) و ( علی ابن ابی طالب ) و ( طلحه ابن  
عبیدالله ) و ( زبیر ابن العوام ) و ( سعد ابن ابی وقاص ) و ( سعید ابن

زید ) و ( عبدالرحمن ابن عوف ) و ( ابو عبیده ابن الجراح ) حضرات ایدر .  
( رضی الله عنهم ورضوا عنه ) .

فیخر عالم ، صلی الله تعالی علیه وسلم حضرت تلی ، بر محله اوطور سه  
صاغنده ( ابوبکر ) وصولنده ( عمر ) اوطور وردی وقارشوسنده ( عثمان )  
اوطور وب سرکتابت وظیفه سنی ایفا ایدردی . علی دخی رسول اکرمک  
سرکابی ومحرم اسراری ایدی . رضی الله عنهم .

فیخر عالم حضرت تلی ، ابوبکرک قزی ( عایشه ) بنی وعمرک قزی ( حفصه ) بنی  
تزوج ایدوب ایکسینه دخی داماد اولمشیدی وعثمانه بر کریمه سنی و آنک  
وفاتنده دیگر کریمه سنی و یردیک کبی علی یه دخی اک سوکیلو کریمه سی اولان  
( فاطمة الزهرا ) رضی الله تعالی عنها حضرت تلینی و یروب ایکسینی دخی  
کندوسنه داماد ایتمشیدی .

بو دردی ( خلفای راشدین ) درکه جمله اصحاب کزینک افضلیدرلر .  
یوقاروده بیان ایتدیکمز وجهله حضرت ابوبکر ، زمان جاهلیتده  
بیومش ایکن اصلا بتلره طامامشیدی .

حضرت علی ایسه خانه سعادتده بویویوب صبی ایکن اسلام ایله مشرف  
اولمشیدی .

بناءً علیه اصحاب کزین ایچنده هیچ بتلره سجده ایتمه مش اولق ، ب  
ایکسینه مخصوص بر شرف ومزیتدر . ( کرم الله وجههما ) .

حضرت طلحه ، زید ابن حارثه دن صکره اول باول ایمانه کان بشر  
کشینک بریسیدر . احد غزاسنده کفار دن بری ، رسول اکرم اوزرینه  
قلیج حواله ایتدکده طلحه او حمله بی الیه دفع ایدوب بو ضربه دن  
چولاق قالمشیدی .

حضرت زبیر ، حضرت خدیجة الکبرانک برادر زاده سی وحضر  
ابوبکرک دامادیدر . والده سی دخی رسول اکرمک خاله سیدر . هپ غزالر  
رسول اکرم ایله برلکده بولنشدر .

حضرت (سعد ابن ابی وقاص) دخی اوّل باوّل ایمان ایدنلردندر .  
ابتدا فی سبیل الله اوق آتان و دین اوغورنده قان دوکن اودر . ( احد )  
جنکنده ثبات ایدنلردن بریدرکه رسول ا کرّمک یانندن آریلیوب اوکون  
بیک اوق آتمشیدی .

حضرت سعید ابن زید ، حضرت عمرک عمزاده سیدر و آنک قیز  
قرنداشنی تزوج ایتمشدر . زوجه سیله برلیکده حضرت عمرک اسلامنه سبب  
اولمشیدی .

حضرت عبد الرحمن ابن عوف ، بنی زهره دن و رسول ا کرّمک  
والده سی ( آمنه ) خاتونک اقرباسندندر . ( احد ) جنکنده یکریمی بر  
برندن یارالانمش و یارده نک بری آیاغنده اولغله طوپال اولمش ایدی .

حضرت ابو عبیده ابن الجراح دخی ( احد ) جنکنده رسول ا کرّمک  
یوزینه باتان حلقه لری ، دیشلریله طوتوب چیقاریرکن ایکی اوک دیشلری  
چیقوب دوشمشیدی .

اصحاب کرّمک ایکنجی طبقه سی : حضرت عمرک اسلامندن صکره  
اسلام ایله مشرف اولانلردر .

اوچنجی طبقه سی : ( عقبه ) ده ابتدا بیعت ایدن انصار کرّامدر .  
دردنجی طبقه سی : ایکنجی دفعه ( عقبه ) ده بیعت ایدن انصاردرکه  
یتمش بو قدر ذوات ایدی .

بشنجی طبقه سی : رسول ا کرّمک مکدن هجرتنده هنوز ( قبا ) ده  
ایکن کلوبده آکا واصل اولان مهاجریندر .

آلتنجی طبقه سی : ( بدر ) غزاسنده بولنان مهاجرین و انصاردرکه  
آنلره ( اصحاب بدر ) دینیلور .

یدنجی طبقه سی : ( بدر ) غزاسیله ( حدیبیه ) سفری آره سننده هجرت  
ایدنلردر .

سکزنجی طبقه سی : حدیبیه ده ( شجره رضوان ) آلتنده عقد بیعت  
ایدن اصحاب کرّامدر .

طقوزنجی طبقه سی : ( مصالحهٔ حدیبیہ ) دن صکرہ ہجرت ایدنلردرکہ  
عمر و ابن عاص ، آنلرک اشرافندندر . بزینہ صددہ کلہلم :

### بعض وقایع عسکریہ

خلال رجیدہ ابو عبیدہ ابن الجراح رضی اللہ تعالیٰ عنہ حضرت تلی ،  
باشبوغ اولہرق اوچیوز عساکر اسلامیہ ایلہ سواحل طرفنہ کوندہ ریلدی .  
عمر الفاروق رضی اللہ تعالیٰ عنہ حضرت تلی دخی آنک معیتندہ ایدی .  
بوندن مقصد ( جہینہ ) قبیلہ سندن بر طائفہ بی تأدیب و تربیہ ایدی . لکن  
محاربہ وقوع بولمقسنزین عودت ایدیلدی .

خلال شعبانده ( ابو قتادہ ابن ربیع ) رضی اللہ تعالیٰ عنہ حضرت تلی ، اون  
بش نفر اهل اسلام ایلہ جانب نجدہ واردی . برعشیرتی اوردی ، اکیوز  
دہوہ وایکی بیک قویونلرینی سوروب کتوردی .





## فتح مکه مکرمه

یوقاروده بیان ایتدی کمز وجهله حدیده عقد مصالحه اولندی کبی ( خزاعه ) قبیله سی ، رسول اکرمک عهد و اماننه و ( بنی بکر ) قبیله سی قریش مکهنک عهد و اماننه داخل اولمشلر ایدی .

حال بوکه : خزاعه ایله بنی بکر بیننده عداوت قدیمه اولدیغندن اشبو سکیزنجی سنه هجریه خلالنده بنی بکر، بقتة خزاعه اوزرینه هجوم ایدوب رؤسای قریشدن ( صفوان ابن امیه ) و ( عکرمة ابن ابی جهل ) و ( سهیل ابن عمرو ) و ( خویطب ابن عبدالعزی ) و ( مکرز ابن حفص ) دخی بر مقدار قریشلر ایله بنی بکره یاردم ایدرک خزاعه دن یکر می اوچ کشی قتل ایتمشلر .

آنک اوزرینه خزاعه قبیله سی طرفندن ( عمرو ابن سالم خزاعی ) قرق نفر ایله بینوب مدینه منوره یه کلدی و رسول اکرمه عرض حال ایتدی .

او وجهله قریش طائفه سی ، بنی بکر ایله برابر خزاعه یه تعرض ایتدکلرندن طولای حدیبه مصالحه سی بوزمش اولدیلر . بو جهتله رسول اکرم دخی خزاعه یه مأموللرندن زیاده یاردم ایدم جکنه سوز و یردی . و قریش طائفه سنه « یا خزاعه دن مقتول اولان آدملرک دیتلرخی و یریگز ، یاخود بنی بکری حمایه دن واز کچیگز » دیو خبر کونده ردی .

قریش طائفه سی ، ایکی صورتی دخی قبول ایتدیلر ایسه ده کندولری نقض عهد ایش اولدقلرینی دوشوندکجه تلاشه دوشدیلر .

حتی ( حارث ابن هشام ) و ( عبدالله ابن ابی ربیع ) صفوان ایله



آرقداش لرینه واروب « سزك صنع و حر كتكز ، محمد ايله بینمزده اولان عهدی نقض دیمكدر » دهر ك آنلری تعیب و تقییح ایلدیلر .

الحاصل رؤسای قریش ، بر برینه دوشوب نهایت رسول اکرم ايله مصالحه یی تجدید و تمید ایلک اوزره ابوسفیان مدینه یه یوللادیلر .

ابوسفیان ، مدینه منوره یه کلدی . کریمه سی ام حبیبه رضی الله عنها حضرت تلریله کوروشدی . بعده رسول اکرم ايله بولوشدی . تجدید مصالحه خصوصنی استدعا ایتدی ، لکن بر جوابه نائل اولمادی .

بعده ابو بکر الصدیق و عثمان ذی النورین و علی ابن ابی طالب و انصارك اولوسی اولان سعد ابن عباده رضی الله تعالی عنهم حضراتی کبی کبار اصحاب کرامك حمایه سنه مراجعت ایتدکده « بزلر ، کندولکمزدن کیمسه یه عهد و امان ویره میز . رسول اکرم ، هر کیمی حمایه ایدرسه بزده آنی حمایه ایتمکه مجبورز » یوللو برر سوز سویلریله هیچ برندن بر جواب شافی آلامادی . اما عمر الفاروق رضی الله تعالی عنه حضرت لرینه واروب شفاعت ایتدکده حضرت عمر « بنی شفاعت ایده جکم ؟ علمده بکا بر آرقداش اولمایوبده یالکز بر خرده قاریجه بولسهم آنی کندیمه رفیق ایدر ك سزكله جنك و جهاد ایلردم » دیو آچیقدن آچیفه لسان شدت ايله جواب رد ویرمشیدی .

ابوسفیان ، هر طرفدن مأیوس اولنجه رسول اکرمك اك سوکیلو کریمه سی اولان ( فاطمه الزهرا ) رضی الله تعالی عنها حضرت لرینك یانه واردی که اوغلی و رسول اکرمك نور عینی حضرت حسن رضی الله تعالی عنه ، آیق اوزرنده کزردی .

ابوسفیان « ای کریمه محترمه محمد ! باری سن بنی حمایه ایلسهك اولمازمی ؟ » دیو یالواردی .

فاطمه رضی الله تعالی عنها حضرت لرلی « بن ، بر خاتونم . کیمسه یی حمایه ایده م » دیو جواب ویردی .

ابوسفیان « شواوغلکه امر ایت که جمع نامه چیقوب بنی حمایه ایتدیکنی

اعلان ايتسون، بكا يتيشور . او دخى دنيانك صوك دورينه قدر بتون .  
عربك اولوسى اولور « دهرک حضرت حسنى کوستردى .  
حضرت فاطمه « او غلم کوچوکدر . هنوز کيمسه يى حمايه ايده جک  
و کيمسه يه عهد و امان ويره جک سَنّه بالغ اولمادى « دهرک اعتذار  
بيوردى .

ابوسفیان ، شاشيردى وینه حضرت عليک ياننه واردى . « يا على !  
بن ايشک صاربه صارديغنى آکلادم ، نه ياپيم ؟ بکا بر نصيحت ايت و ايشمه  
ياراياحق برتدير اوکرت « دهرک حضرت علي يى خيليجه صيقشيدردى .  
حضرت على ، ناچار قلوب « سن قریشک اولوسى سين . چيق ،  
ناس ايچنده بر عمومى حمايه اعلان ايت . بعده چيق ، کيت « دهرک آنى  
باشندن صاموق ايسته دى .

ابوسفیان « بو تدیر ، کافی اولورمى ؟ نه دیر سين « ديدکده حضرت  
على « اوراسنى بيله م . فقط بشقه تدیر دخى بولامام « ديدى .  
آنک اوزرينه ابوسفیان ، همان مسجد نبوى يه کلوب عامّه ناسه خطاباً  
« اى ناس ! بن ايکى طرفى دخى عهد و امانم آلتنه آلدم . والله کيمسه  
بنم عهدىمى قيرماز ظن ايدرم « ديدى و کندوسنى تصديق ايدن کيمسه  
اولمادينى حالده همان ده وه سنه بينوب کيتدى . اصحاب کرام دخى « بونه ؟ «  
دهرک آنک آرقه سندن بررينه باقوب کولوشديلر .

حل بوکه : ابوسفیان ، مدينه ده زياده جه اکلنديکندن قریش طائفه سى  
« غالباً او دخى طرف محمدى يه ميل ايله کيزلوجه آکا تابع اولدى « دهرک  
آنى اتهام ايتمشل ايدى .

ابوسفیان ، کيجه لين مکيه وارمش ، خانه سنه کيرمش ، قومنک  
کندوسنى اووجهله اتهام ايلديکنى زوجه سى هند ، آکا بيلديرمش و « سن ،  
نه ياپدک ؟ « ديو صورمش . او دخى بر شى ياپاماديغنى خبر ویرمش . هند  
ايسه حد تلنهرک آنک کوکسنه بر تکمه اورمش .

ابوسفیان ، قومنک کندوسنى اتهام ايتمشدن وقايريسنک بد معامله سندن

طولايي دنيايه کوسمش و تبرئه ذمت ايچون صبا حلين صفا و مروه ده کی (آساف) و (نائله) نام بتلرک ياننه واروب آنلر ايچون قربان کسمش و اولنجيه قدر سزک عبادتگزدن آيريلام «ديو آنلره عهد و پيمان ويرمش .

اشراف قریش ، ابوسفیانک ياننه کلوب «محمددن نه خبر وار ، آنکله تجديد مصالحه ايتدکمی «ديو صورمشلر .

ابوسفیان «والله محمددن مصالحه ايستدم ، بکا بر جواب ويرمدی . ابوبکرک ياننه کيتدم ، آندن دخی بر خير کورمدم . عمر ابن الخطابه مراجعت ايتدم ، بزه ائک بيوک دشمن آنی بولدم . سائر اصحاب محمدی طولاشدم ، هر بری بر سوزايله بی باشندن صاودی . برندن معاونت کوره مدم . حکمدار لر يينه بو مرتبه اطاعت ايدر بر قوم کورمدم . بو جهته تجديد مصالحه ايده مدم . نهايت علينک اخطاريه کندولکمدن بر مصالحه عموميه اعلان ايتدم «ديو جواب ويرمش .

«يا ، محمد سنک بو اعلانگی تصديق ايتدی ؟ «ديو صور دقلرنده دخی ابوسفیان «خير ، او تصديق ايتدی . اما باشقه چارده بولامدم «ديمش .

آنلر دخی «اويله ايسه سن هيچ بر شی يامامش سين . سنک کندی کنديگه اعلان ايتديکک عهد و صلحک نه حکمی وار ؟ علی ، سنکله عادتاً اکلنمش . سن بزه مصالحه خبری کتورمدک که امين و مطمئن اولام ، محاربه خبری کتورمدک که صاقينام و جنکه حاضر لانام «ديو آنی لوم و توبيخ ايتمشلر .

رسول اکرم ايسه ، ابوسفیانک عودتندن صکره صيقي صيقي به تدارکات سفر ييه باشلادی .

برکون حجره سعادتندن چيقوب قیوسی اوکنده اوپوردی و ابوبکری چاغير يگنز «ديو امر ایلدی .

ابوبکر الصديق رضی اللہ تعالیٰ عنہ حضرت تلمی ، کلوب رسول اکرمؐ اوکنده اوطوردی . خلیجہ کیزی لاقیردی ایتدکن صکره رسول اکرمؐ ، آتی صاغ طرفنه کچوردی وعمر الفاروق رضی اللہ تعالیٰ عنہ حضرت تلمی چاغیردی .

حضرت عمر دخی کلوب حضور نبویؐ ده اوطوردی وبر آ از محرمانه مصاحبتن صوکره اوست برده دن سوزه کیریشوب « یارسول الله ! آنلر کفرک باشیدر . سکا ساحر ، کاهن دین آنلردر . مفتری ، یلانچی دین آنلردر » دهرک فوق العاده غضب وحدت کوستردی .

رسول اکرمؐ ، امر ایتدکجه اصحاب کرامؓ ، آنک یاننه وارمادقلری جهتله قارشودن بو حالی تماشا ایدرلردی وبخت نه اوزرینه اولدیغنی بیلمیوب یالکز حضرت عمرک غضوبانه لاقیردیلمی ایشیتمکله « عجباً عمر ، ینه نیه طاریلدی ؟ » دهرک باقیشوب طورورلردی .

بعده رسول اکرمؐ ، حضرت عمری صول طرفنه کچوردی وسائر اصحاب کرامی چاغردی .

کلدیلمر ، حضور نبویؐ دیلیدیلمر . رسول اکرمؐ « سزه بو ایکی آرقداشکزک برر مثالی سویلیهیمی ؟ » دیو بیوردی و آنلر « بیوریکز یارسول الله ! » دیلمرله مبارک یوزینی حضرت ابو بکردن یگا چویردی . « الله یولنده ابراهیم ، یاغدن دهاملایم ایدی » دیو بیوردی .

بعده حضرت عمره باقوب « الله یولنده نوح ، طاشدن قاتی ایدی . لکن ایش ، عمرک دیدیکیدر . همان سفره حاضر اولک » دیو اصحاب کرامه تدارک کورملری ایچون امر ویردی .

اصحاب کرام ایسه مسئله نه ایدی ، نه اوزرینه قرار ویریلدی . آنی بیلمدکلری حالد رسول اکرمؐ صومادیلمر . حضرت عمر ، پک زیاده متهور و غضبناک اولدیغندن آنک دخی یاننه وارمادیلمر ، فقط مجلس طاغیلقدن صکره حضرت ابو بکرک یاننه واردیلر و کیفیتک تفصیلاتنی آندن صوردیلمر .

حضرت ابوبکر دخی « رسول اکرم ، قریش اوزرینه سفر ایتمک خصوصنده رأیی صورتدی . بنده یار رسول الله ! آنلر سنک قومکدر . نهایت الامر سکا مطیع اولاجقلری معلومکدر . دیدم . صکره عمری چاغردی ، آندن دخی صورتدی . عمر ایسه ، کفرک باشی آنلردر ، سکا شویله ، بریه دین آنلردر . دیه رک مشرکینک رسول اکرم حقنده سویلدکلری سوزلری برر برر صایدی . واقعا قریش طائفه سی بیون اکه دجه قائل سائره بیون اگمز . ایشته رسول الله دخی مکه سفرینه حاضر اولماگز ایچون امر ویردی « دیو مسئله یی شرح و ایضاح ایلدی . اصحاب کرام دخی تدارکات سفریه یه باشلادی .

مدینه منوره ده بو وجهله تدارکاته تشبث اولنمغله برابر حضرت پیغمبر « خدایه و روز جزایه ایمان ایدنلر ، رمضان شریفک اوائلنده مدینه یه کلسونلر « دیو ( غَفَار ) و ( اَسْلَم ) و ( سَلِمْ ) و ( اَشْجَع ) و ( مَزِینَه ) و ( جُهینَه ) قبیله لرینه خبر کونده ردی .

همان رمضان شریفک ابتداسنده مدینه منوره جوارنده بولنان قبیله لر طاقم طاقم کلمکه باشلادی .

حضرت حسان رضی الله تعالی عنه ، او ائنده خزاعه قبیله سنک انتقامنی آلمق اوزره اهل اسلامی جنکه تشجیع وتشویق ایده جک سوزلر سویلردی . رسول اکرم ایسه قریش طائفه سنی حاضر لانمغه میدان ویرمیه رک باصمق ایستردی . آنک ایچون تدارکاتی آنلردن کیزلردی .

حتی کندوسنی نجد طرفیله مشغول کوسترمک ایچون غره رمضانده ( اَبُو قَتَادَه ) رضی الله تعالی عنه حضرتلرینی بر فرقه عسکریه ایله ( وادی اَضَم ) طرفته کوندردی .

برده مکه یوللرینی طوتمق اوزره خزاعه قبیله سنه امر ایلشیدی . آنلر دخی طاقم طاقم طاغیدیلر . یوللری وبوغازلری طوتوب بر طرفدن دیکر طرفته قوش اوچورماز اولدیلر .

حال بوکه : بنی هاشمک آزادلولرندن ( ساره ) نام خاتون که رؤسای قریشه و علی الخصوص ( ابن خَطْل ) ه خوانندهک ایدر ، بعضاً رسول اکرم حقنده سوبیلان هجویهلری تغنی ایله اوقویوب آنلری اکلندیرر ، بو وجهله کندوسی دخی کچنوب کیدر ایدی . بو ائنده مدینه منورهیه کلوب بدر غراسندن صکره قریش طائفهسی دوچار اولدقلری حزن وماتم اوزرینه اولکی کبی خوانندهلره اعتبار ایتمز اولدقلری جهتله مکده مدار تعیش بولامادیغندن بختله صدقه ایسته مش و رسول اکرم دخی آکا برده وه یوکی ذخیره احسان ایلش ایدی . بو دفعه دونوب مکیه کیدرکن ( خاطب ابن بلتعَه ) رسول اکرمک تدارکات سفریه ایله مشغول اولدیغنه دائر بعض رؤسای قریشه خطاباً بر مکتوب یازوب آنکله کونده رمشیدی .

بو کیفیت ، طرف الهمیدن رسول اکرمه وحی ایله بیلدیریلش اولدیغندن علی وزیر و مقداد رضی الله تعالی عنهم حضراتی چاغردی « فلان محله وارینگز . اوراده ده وه ایله کیدر بر یولجی قاری بولورسکمز . آنک یاننده بر مکتوب واردر . آنی آلوب کتورینگز » دیو بیوردی .

آنلر دخی اورایه واردیلر ، ساره یی بولدیلر ، مکتوبی ایستدیلر . « بنده مکتوب یوقدر » دیدکده « رسول الله ، یلان سولمز . هان مکتوبی چیقار ، یوقسه سنی صویوب آرامغه مجبورز » دیدیلر . ساره ، ناچار صاچلری ایچندن مکتوبی چیقاروب ویردی .

آنلر دخی مکتوبی آلوب رسول اکرمه کتوردیلر . آچیلدی . خاطب ابن بلتعَه طرفندن اولدینی کورولدی ، فوق العاده حیرت و تعجبی موجب اولدی .

زیرا حرکات حربیهیه دائر دشمنه معلومات ویرمک پک بیوک بر صوچدر ، خاطب ابن بلتعَه ایسه بدر غراسنده بولان اصحاب کزیندن ایدی . اصحاب بدرک قدر و حیثیتلری دخی پک بیوک اولوب آنلر اصحاب کرام ایچنده ممتاز و مستتمنا ایدیلر .

رسول اکرم « نیچون بو ایشی ایشله دک » دیو خاطبه خطاب وعتاب



ایتدکده « یارسول الله ! والله بن مؤمن . ایماءه اصلا خلل کلامشدر ، فقط قریش ایچنده اهل و عیالم وار . آنلری اوراده حمایه ایده جک عشیرتم یوق . بو وسیله ایله قریش ایچنده ال پیدا ایتک ایستدم » دیو عذر دیلادی .

حضرت عمر الفاروق ، قالقوب « رخصت ویر یارسول الله ! شومنافقک بوینونی اورایم » دیدی .

رسول اکرم « یا عمر ! خاطب ، بدر غزاسنده بولندی . نه بیلورسین ؟ بلکه جناب حق ، اصحاب بدره هر نه یاپسه کز ، بن سزی عفو ایتیمشمدور . دیمش اوله ، دیو بیوردی .

آنک اوزرینه حضرت عمر « الله ورسولی اعلم ، در دیوب کیرو طوردی .

مقدما اهل اسلام علیهنده بولان پک چوق عشائر و قبائل ، حدییه مصالحه سندن صکره رسول اکرمه تابع اولدقلرندن بو کره بوجه بالا طرف نبوی دن واقع اولان دعوت سنیله اوزرینه اطراف وجوارده بولنان قبائل عرب ، اوائل رمضان شریفده پیدرپی مدینه منوره یه گمکه باشلادیلر . اصحاب کرام دخی حاضر اولدیلر .

بو جهته رسول اکرم دخی همان اشبو سکزنجی سنه هجریه رمضانندن اون کون مرور ایتدکدن صکره اون بیک نفر عساکر اسلامیله ایله مدینه منوره دن چیقدی .

اولجه برنمایش ایچون دیارنجده کونده رلمش اولان ابوقتاده حضرتلری ، دونوب یولده رسول اکرمه یتشدی . بعض قبائل دخی کلوب کذلک اثنای راهده رسول اکرمه ایریشدی . بو صورتله اردوی هایونک موجودی اون ایکی بیک نفره بالغ اولدی .

حدییه سنه سی ، مدینه دن حرکت ایدن اردوی اسلام بیک بشیوز نفر راده سنده ایکن ایکی سنه صکره مکه اوزرینه چیقاریلان اردونک اون ایکی بیک نفره بالغ اولمسی حدییه مصالحه سنک ثمره سیدر .

بناءً عليه اووقت مصالحه به اعتراض ایتش اولانلر ، صلحك بویه آثار  
حسنه سنی کوردکجه پشیمان و محجوب اولمقده ایدیلر .

رسول اکرمك عمی عباس رضی الله تعالی عنه ، مقدّمه ایمان ایلمش  
ایسه ده اسلامی کیزلر و مکده اقامت ایله سقایت زمزم خدمت شریفه سنی  
ایضا ایلر ایدی . بو کره اسلامی اعلان ایدرک اهل و عیالی ایله برلکده  
چیقوب مدینه به کلورکن اردوی هایونه راست کلدی و آغراغنی مدینه به  
کونده روب کندوسی رسول اکرم ایله برلکده مکیه عازم اولدی .

رسول اکرم ، آندن پک زیاده ممنون اولوب « یا عباس ! سن  
مهاجرینک خاتمهی اولدک ، دیو بیوردی .

حضرت پیغمبرك عمزاده سی ( ابو سفیان ابن حارث ابن عبدالمطلب )  
واوغلی ( جعفر ابن ابی سفیان ) و خاله سی اولان ( عاتکه بنت عبدالمطلب ) ك  
اوغلی ( عبدالله ابن ابی امیه ) دخی ( ابواء ) نام محله ده رسول اکرمه  
قارشو کلوب عذر دیله دیلر . لکن رسول اکرم ، آنلرک یوزلرینه  
باقدی .

چونکه : اشبو ابو سفیان ابن حارث ، بعثتن مقدّم ، رسول اکرم  
ایله غایت طائفی کورو شوب الفت ایدرکن بعثتن صکره رسول اکرمه پک  
زیاده عداوت ایدرک حقنده هجویه لر سویلر و حسان دخی آکا جواب ویرر  
ایدی . عبدالله ابن ابی امیه دخی کذلک رسول اکرمه اذا ایدردی .

بناءً علیه رسول اکرم ، آنلری قبول ایتدی . لکن صکره زوجات  
مطهراتدن آم سلمه رضی الله تعالی عنها حضرتلری ، شفاعت ایتکله رسول  
اکرم ، آنلری عفو ایتدی . آنلر دخی اسلام ایله مشرف اولدیلر .

یوقاروده بیان ایتدی کمز وجهله خزاعه قبیله سی ، یوللری طوتمش  
اولدق لرینه مبنی مدینه دن مکیه کیدوب کلن اولمدینی جهته قریش طائفه سی ،  
اولجه رسول اکرمك بویه تدارکات جسیمه سندن خبر آلامیوب غفلت  
اویقوسنده اولدق لرلی حالده اردوی هایون ( مرالظهران ) نام وادی به  
واردی .

رسول اکرم، کیچہ، اورادہ اون بیک آتش یاقدیردی و تشریفی  
اولہ بر بیوک آتش دونماسبیلہ قریشہ بیلدیردی .  
رؤسای قریش، آندن خبردار اولدقلری کبی حیرت وتلاشہ دوشدیلر  
وینہ ریسلری اولان ابو سفیانک باشنہ اوشدیلر .

او دخی ( حکیم ابن حزام ) و ( بدیل ابن ورقاء خزاعی ) ایله برلکده  
کلوب مرالظهرانک اوزرنده کی تپہ یه چیقديلر و « بوقدر آتش یاقان اردو،  
عجبا کیملر اوله ؟ » دیو دوشونوب طولاشورلر ایکن اردوی هایوندن  
چیقاریلمش اولان سوارى قره غولنه اسیر دوشدیلر .

برو طرفدن رسول اکرمک عمی عباس رضی الله تعالی عنه حضرتلری،  
دخی « یارین قریش طائفه سی ، غافل ایکن بو غلبه لک ایله بغته مکيه  
کیریه جک اولورسه بر بیوک قنالق اولق ملحوظدر . باری چیقایم ، بر  
آدم بولوبده قریشہ کونده ریم . کلوبده آمان دیلسونلر » دهرک رسول  
اکرمک استرینه یینوب اردودن طیشارو چیقمشدی . اوزاقدن ابوسفیانک  
سسنی ایشدکده « ابو سفیانمیسین ؟ » دیو صوروب او دخی « اوت » دیو  
جواب ویروب بیلشدیلر و کوروشدیلر .

حضرت عباس ، ابو سفیانی آرقه سنه آلوب حضور نبوی یه  
کتورورکن کیملرک یانندن کچسه لر بویله کیجه لین اردو ایچنده کزن  
کیمدر ؟ دیو باشلرینی قالدیروب رسول اکرمک استری اوزرنده حضرت  
عباسی کورونجه بر برینه « عم رسول ، عم رسول » دهرک باشلرینی اوکلرینه  
اگرلردی .

عمر الفاروق رضی الله تعالی عنه حضرتلرینک حذاسنه کلدکلرنده حضرت  
عمر ، ابو سفیانی کوروب طانیغله سکیرتدی . حضور نبوی یه کیروب  
« یارسول الله ! ابوسفیان کلیور . رخصت ویر ، هان بوینونی اورایم »  
دیرکن حضرت عباس ، کال سرعت ایله یتیشوب ابوسفیانک عفواطلاقی  
نیاز ایتدی .

حضرت عمرک الی ، قایجک قبضه سنده و حضرت عباسک دلی عفو

و مرحمت استدعاسنده یکدیگره معارض اولمالریله رسول اکرم حضرت عباسه « هله سن ، آنی بوکیجه توقیف ایت » دیو بیوردی .

اودخی ابوسفیانی آلوب اوکیجه کندی یاننده حبس و توقیف ایله فرداسی علی الصباح رسول اکرمک چادرینه کتوردی .

رسول اکرم ، « یا اباسفیان ! هنوز ( لاله الاالله ) دیه جکک وقت ایرشمیدی ؟ » دیو صورتی .

ابوسفیان ، « اکر اللهدن باشقه اله ، یعنی طاباجق یوق دیسه م بو قدر بتلری نه یاییم ؟ لات و عزّادن نصل کچه یم ؟ » دیو بر آزدوشونوب طوردی . نهایت ( لاله الاالله ) دیووردی .

بعده رسول اکرم « یا ، ( محمد رسول الله ) دیه جکک وقت دها ایرشمیدی ؟ » دیو بیوردی .

ابوسفیان « یا محمد ! بونک ایچون بکا بر آزد مهلت ویر . زیرا بوندن طولای ذهنده هنوز ایلشیک وار ، دیو جواب ویردی .

حضرت عمرایسه طیشاروده طولاشوب کزینوردی و « آه ! ابوسفیان سن طیشاروده اولسه ک ، بویله هزیان ایده مزدک » دیو کندو کندویه سوبلنوردی .

حضرت عباس ، دخی « نه یایورسین ؟ یا اباسفیان ! عقلگی باشنه ده و شیر . عمر ، طیشاروده قلیج ایله بکلیور . سنک باشگی کسمک ایچون فرصت کوزم دیور ، دیو آکا نصیحت ایلردی .

آنک اوزرینه ابوسفیان ، همان ( محمد رسول الله ) دیه رک عمرک پنجه سندن یاقاسنی قورتاردی .

ینه او مجلسده ( حکیم ابن حزام ) ایله ( بدیل ابن ورقاء ) دخی شرف اسلام ایله مشرف اولدیلر .

رسول اکرم ، حضرت عباسه « ابوسفیانی آلدده اردونک کچه جکی بوغازه کوتورکه اللهک عسا کرینی تماشا ایتسون » دیو بیوردی .

حضرت عباس ، « يا رسول الله ! ابوسفیان ، فخر و مباحاتی سور  
بر ذاتدر . آکا مدار افتخار اولاجق بر امتياز ویرسه گز » دیدی .  
رسول اکرم دخی « کیم که ابوسفیانک خانه سنه کیرر ایسه امیندر .  
کیم که مسجد شریفه کیرر ایسه امیندر . کیم که خانه سنه قاپانورسه امیندر .  
کیم که ترك سلاح ایدرسه امیندر . کیم که حکیم ابن حزامک خانه سنه کیررسه  
امیندر » دیو بیوردی .

آنک اوزرینه حضرت عباس ، ابوسفیانی آلوب اردوی هایونک  
کچه جکی بوغازک آغزینه کوتوردی .  
عسکر ، فوج فوج کچدکجه ابوسفیان صورار ، حضرت عباس دخی  
کیملر اولدقلرینی تعریف ایلر ایدی .

شویله که : ابتدا سیف الله خالد ابن ولید رضی الله تعالی عنه حضرتلری ،  
بیك نفر ( بنی سلیم ) قبیله سی دلاورلریله ابوسفیانک حذاسنه کلدکلرنده  
جمله سی بر آغزدن تکبیر آلدیلر .

ابوسفیان « بوکیم ؟ » دیدی . حضرت عباس « خالد ابن الولید »  
دینجه « شو بزم ولیدک اوغلی خالدمی ؟ » دیو صوردی .  
حضرت عباس « اوت » دیو جواب ویردی .

بعده زییر ابن العوام رضی الله تعالی عنه حضرتلری ، مهاجرین  
سنجاغنی چکه رک درتیوز نفر زرهلو ، یکتیلر ایله کذلک تکبیر آلهرق  
کلوب کچرکن ابو سفیان « بوکیم ؟ » دیو صوردی . حضرت عباس دخی  
« زییر ابن العوام » دیو جواب ویردی . ابوسفیان « ها ، همشیره زاده کز می ؟ »  
دیدی .

بعده ، ابوذر غفاری رضی الله تعالی عنه حضرتلری ، اوچیوز نفر  
سبکبار وچاپک رفتار اولان ( بنی غفار ) یکتیلریله کچرکن ابوسفیان « بونلر  
کیم ؟ » دیدی . حضرت عباس « بنی غفار ، قبیله سی دیدکده » آنلرله  
یشمزدده بر شی یوق ، دیدی .

آدن صکره ( خزاعه ) قبیله سنک بر شعبه سی اولان ( بنی کعب ) دن

بش یوز نفر سواری وبعده سکنز یوز نفر ( مزینه ) قبیله سی تیراندازلری ودرت یوز نفر ( بنی لیث ) ایله ( بنی ضمیره ) آرسلانلری کلوب کچدیلر .  
بعده ، اوچ یوز نفر شجعان عرب ایله ( اشجع ) قبیله سی کچرکن ابوسفیان، هانکی قبیله اولدیغنی صوردی . حضرت عباس « اشجع قبیله سی » دیو جواب ویردی .

ابوسفیان « سبحان الله ! محمدك اك بيوك دشمنی آنلر ایدی . شمدی نه عجب آ کا مطیع و منقاد اولمشلر » دیدی .  
حضرت عباس دخی « نور اسلام ، آنلرك قلبنی منور ایتمش . بوده اللهم بر فضل و عنایتیدر » دیدی .

بعده ، سکنز یوز نفر ( جهینه ) دلاورلری و دیگر بعض قبائل و عشائر ، فوج فوج کلوب کچدکله ابو سفیانک کوزی طولدی .  
« آز وقت ایچنده بو قدر قبیله لری طویلا یوب و جمله سنی یکو وجود ایلوبده خبرسزجه مکیه قدر سوق ایدیویرمک نه بیوک اقتداردر » دیو دهرین افکاره طالدی .

ابو سفیان ، بوراسنی دوشونورکن برده اوزاقدن اصل موکب نبوی کوروندی که بش بیک قدر کزیده عسکر ایدی و آتولرک و زرهلولرک اک کزیده لری برابر ایدی .

رسول اکرم ( قُصَوِی ) نام دده و سنه بنوب اوکنده انصارک سنجاغیله ( ابن عباده ) و صاغنده ابو بکر الصدیق وصولنده ( اُسَیدُ ابن حَضِر ) و اطرافنده سائر اصحاب کزین رضی الله تعالی عنهم حضراتی تیمورلره مستغرق اولدقلری حالده بش بیک کشی تکبیر آله رق کلیورلردی .

ابوسفیان، آنی کورونجه « یاعباس ! قرنداشک اوغلنک ملک و سلطنتی نه چوق بیومش ! » دیدکده او دخی « صوص ! او ملک و سلطنت دکل ، نبوتدر » دیمکله ابو سفیان دخی « اوت ، نبوت » دیدی .

بتون عسا کر اسلامیه ، او بوغازی کچدکن صکره حضرت عباس رضی الله تعالی عنه ، ابو سفیانی صالیویردی .



ابو سفیان ، همان حکیم ابن حزام ایله برلکده مکيه واردی و حرم شریفه کیدوب قریشه خطاباً « ای ناس ! ایسته کلن محمددر . قارشو طورامایاجغکز بر قوت ایله کلیور » دیو کیفیتی آنلره بیلدیردی .

و « محمد نه دیدی ؟ » دیو صور دقلرنده « ابو سفیانك خانه سنه کیرن امیندر . مسجده کیرن امیندر . اونده اوتوروبده قپوسنی قاپایان امیندر دیدی » دیو جواب ویردی .

بعده ای « جماعت قریش ! مسلم اولك سلامت بوله سگنر » دیو سوزی کسیدردی .

ابو سفیانك قاریسی معهود هند، همان قوجه سنك اوزرینه هجوم ایتدی و صقالندن طوتدی « ای آل غالب ! شو معتوه حرینی اولدیرگنر » دیو حایقردی .

ابو سفیان دخی « صقلمی براق . والله مسلمان اولماز ایسه ك سنكده بوینك اوریلور . هاییدی اوبگه کیت . سسگنی چیقارما » دیدی و قاریسنی اسكات ایتدی . او دخی صاووشوب خانه سنه کیتدی .

آنك اوزرینه مکه ایچنه بر عظیم غلغله دوشدی . خلق ، نه یاپه جغنی شاشیردی .

کیمی ابو سفیانك خانه سنه و کیمی حرم شریفه سکیردیر و کیمی کندی خانه سنه قبانور و کیمی بر یرده طورامیوب زقاقلرده طولاشور ، کیمی سلاحلنور و کیمی سلاحنی آتار ، کاه طوپلانونر لر کاه طاغیلور لر ایدی . رئیس قوم اولان ابو سفیانك ایمانه کلسیله قریشك اکثری اسلامه میل ایتدی .

فقط ( سهیل ابن عمرو ) ایله ( عکرمه ابن ابی جهل ) و ( صفوان ابن امیه ) ، ( بنی بکر ) و ( بنی حارث ) و ( هذیل ) و ( احابیش ) قبیله لرندن بر مقدار عسکر طوپلایوب مکه نك آلت طرفنده ( خندمه ) نام محله جنکه حاضر اولدیلر .

رسول اکرم ایسه ، مکہ نك اوست طرفنده ( کداء ) نام طاغ یوليله  
مکّیه کیرمک اوزره ( زییر ) رضی الله تعالی عنه حضرتلرینی و دیگر طرفدن  
کیرمک اوزره ( سعد ابن عبادہ ) رضی الله تعالی عنه حضرتلرینی برر فرقه  
ایله مأمور ایتدیکی کبی مکہ نك آلت طرفندن ( خندمه ) یوليله حرکت  
ایتمک اوزره ( خالد ابن ولید ) رضی الله تعالی عنه حضرتلرینی دخی بر  
فرقه یه باشبوغ تصب و تعیین بیوردی .

( قضاءه ) و ( سلیم ) و ( اسلم ) و ( غفار ) و ( مزینه ) و ( جهینه )  
قیلله لری هب حضرت خالد ایله برابر ایدی .

خاتم الانبیا حضرتلری ، « قریش طرفندن تعرض اولنمادقچه حربه  
کیرشمه یکنز » دیو جمله سنه تنبیه بیوردی .

بناءً علیه عسا کر اسلامیہ ، کیمسه یه تعرض ایتیمه رک کمال تعظیم و آداب  
ایله مکّه مکرمه یه کیرمک اوزره قول قول اوله رق یوریدیلر .

اهالی طرفندن دخی تعرض اولندی . فقط خندمه ده ( سهیل ) و ( عکرمه )  
و ( صفوان ) ک جمع ایلدیکی عسا کر ، ( خالد ابن ولید ) ک فرقه سنه  
سدد راه اولق ایستدیلر . حضرت خالد ، آنلره نصیحت ایتدیسده ده  
دیگه مدیلر وهان محاربه یه باشلادیلر . حتی ( کرز ابن جابر فہری ) ایله  
( حیث ابن الاشعری ) یی شهید ایلدیلر .

آرتق حضرت خالد دخی جنکه مجبور اولدی و آنلرک اوزرینه اوילה  
شدتلو بر هجوم ایتدی که درحال اون اوچ نفر مشرکینی اعدام ایتدی ،  
اقبسنی طاغیتدی .

اشبو کرز ابن جابر فہری ، بدر غزاسندن مقدّمه مدینه منوره نك  
حیواناتی غارت ایدن کیمسه درکه صکره اسلام ایله مشرف اوله رق اصحاب  
لریندن اولوب حتی بر دفعه رسول اکرم طرفندن بر فرقه یه سرکرده  
سب اولمشیدی . بوکره ( حیث ) ایله برابر مکہ نك فتحه قربان اولدی .  
رضی الله تعالی عنهما .

رسول اکرم ، حضرت خالدک محاربه سنی ایشیدوب « بن ، محاربه

اولئاسون دیو تنیه ایتمدی ؟ ، دیدکده « خالده تعرض اولندی ، او دخی چاره سز جنک ایتدی » دیو جواب ویریلدی .

باشقه طرفده اصلا محاربه وقوعه کلکسزین عسا کراسلامیه ، طاقم طاقم مکّه مکرمه یه کیردیلر .

ایشته او حالده خاتم الانبیا علیه افضل التحایا حضرتلری ، باشنده سیاه عمامه اولدینی حالده مکّه مشرفه یه داخل اولدی وهان کعبه معظمه یه عزیمت ایلدی .

کعبه معظمه کوروندکده خاتم الانبیا حضرتلری ، تکبیر آلتجه جمله اصحاب کرام تکبیر آلدیلر .

او قدر بیک آدمک تکبیرلریله طاغیر ایکله دی . صانکه طاغیردن خوش کلدیکنز صدالری کلوردی .

اوکون ، یوم جمعه ایدی وعید فطره اون کون قالمشیدی . اهل اسلام حقنده مسعود برکون ایدی .

خاتم الانبیا حضرتلری ، حرم شریفه واردی . بیت شریفک قبوسنده طوردی :

« ای جماعت قریش ! بندن نه اومارسکنز ، حقکزده نه معامله ایده جکم ظن ایدرسکنز ؟ » دیو صوردی .

حاضر اولان اشراف قریش « خیر اومارز . کرم صاحبی برادر وکر . صاحبی برادر زاده » دیو جواب ویردی .

آنک اوزرینه فخر عالم حضرتلری ، دخی « کیدیکنز . هپ آزادسکنز : دیو بیوردی .

رسول اکرم ، اووجهله قریش طائفه سی حقنده عفو عمومی اعلار ایتدیسده ایچلرندن بعض کسانى تعداد واستتا ایدوب آنلرک دملریف

قیلدی .

از جمله ( عکرمه ابن ابی جهل ) و ( صفوان ابن امیه ) و ( عبدالله ابن سعد ابن ابی سرح عامری ) و ( عبدالله ابن الزبیری السهمی

و (عبدالعزیٰ ابن خَطْل) و (حَوِیْرْث ابن نُقَیْد) و (مَقِیْس ابن صَبَاہ) و حضرت حمزہ نك قاتلی اولان معهود (وحشی) ایله طائفہ نسادن ابو سفیانك زوجه سی اولان (هند) و ابن خطلك ایکی خواننده جاریه لری و بی هاشمك آزادلولرندن (ساره) نك دملری هدر ایدلمشیدی .

عکرمه ، رسول اکرمه عداوته باباسنه بکزر دی . (صفوان) دخی دین اسلامك بیوك دشمنلرندن ایدی .

(عبدالله ابن سعد ابن ابی سرح) ایسه هجرتدن مقدم کاتب وحی اولمشیکن صکره مرتد اولمشیدی .

(عبدالله ابن الزبعری) ایله (حویرث ابن نقید) دخی مکهنك مشهور شاعرلرندن اولوب رسول اکرمی هجو ایلر وحقنده پك فنا سوزلر سویلر ایدی .

(ابن خطل) مقدما ایمانه کلمشیکن صکره مرتد اولمشیدی و سالف الذکر ایکی خواننده جاریه لره رسول اکرمك هجویه لرینی تغنی ایله اوقوتدیریر ایدی .

ساره ، دخی بر مشهوره خواننده اولوب او دخی رسول اکرمك هجویه لرینی (ابن خطل) ك قارشوسنده اوقویوب آنی اکلندیریر ایدی و یوقاروده ذکر ایتدی کمز وجهله فتح مکدن مقدجه مدینه منوره یه کله رك مسلمان اولوب رسول اکرمدن احسان و صدقه آلمش ، بعده (خاطب ابن بلتعنه) نك مکتوبی مکیه کوتورور ایکن طوتولش و مکیه عودتنده مرتد اولمش ایدی .

مقیس ابن صباه ، مقدما ایمانه کلمشیکن انصاردن بری ، خطاء آنك قرنداشنی اولدرمکله اودخی او انصاری بی قتل ایدرك مرتد اولوب مدینه دن فرار ایله مکه مشرک لرینه قارشمش ایدی .

وحشی ایله هندك احد غزاسنده سیّد الشهدا اولان حضرت حمزه حقنده معامله لری معلوم اولغله بشقه تفصیلاته حاجت کورولمز .

ایشته بونلرك هپ دملری هدر قیلندی . آنلر دخی مستحق اعدام

اولدقلربی بیلدکلرندن اشبو فتح مکه کونی هر بری بر طرفه صاووشوب  
صاقلاندی .

فقط ( سعید ابن حُرَیث المخزومی ) ایله ( ابو بَرزّة الاسلمی ) رضی الله  
تعالی عنهما ، ابن خطله تصادف ایتملریله آنی قتل ایتدیلر . ایکی خواننده  
جاریهلرندن بریسی دخی بو صرهدده قتل اولندی .

علی ابن ابی طالب رضی الله تعالی عنه حضرتلری دخی ( حویرث ابن  
نقید ) ایله ( ساره ) یه راست کلوب ایکیسنی دخی قتل ایتدی .

( خندمه ) ده مشرکلر منهزم اولنجه مقیس ابن صبابه ، برطاقم یارانیه  
بریره کیزلنوب شراب ایچیورلردی . ( نُمَیْلَة ابن عبدالله الکلبی ) رضی الله  
تعالی عنه ، آندن خبردار اوله رق اورایه واردی ، مقیسی قلیج ایله اوردی ،  
اولدردی .

دیگر دمی هدر قیلنلر ، هپ فرارده ایدی . آنلرک اسملری معلوم  
اولدیغندن سائر ناس ، هپ امنیت اوزره کزردی .

حقی اشراف قریشدن ( خُوَیْطِب ابن عبدالعزّی ) قاچوب بر محله  
کیزلنمیشیدی . ابو ذرّ رضی الله تعالی عنه حضرتلری ، آنی کورمکله کلوب  
رسول اکرمه خبرویردکده « بز ، قتلی امرایتدیکمز اشخاصدن بشقه سینه  
امان ویرمدمکی ؟ » دیو بیوردی . ابو ذرّ دخی واروب خویطبه خبر  
ویردی . او دخی حضور نبوی یه کلوب اسلام ایله مشرف اولدی .

بو وجهله عامیه امان ویریلدکدن صکره حضرت پیغمبر ، یدی کرّه  
بیت اللهی طواف ایتدی .

فخرعالم حضرتلری ، طواف ایدرکن اصحاب کرامی دخی آنک ایزینه  
باصوب کیدرلردی .

ابو سفیان ، بریرده طوروب تماشا ایدرکن « آه ! بر اردو طوبیلاسه  
وشو آدمله ینه جنکه باشلاسه فصل اولور ؟ » دیو دوشونورمش .

رسول اکرم دخی او وقت آنک یانندن کچرکن « او آدم ، سنی ینه  
رذیل و ذلیل ایدر » ده نیجه ابو سفیان ، توبه واستغفار ایتدی و « شمدی

بیلدم که حق پیغمبر سین . واقعا ذهنمده اوپله بر قوروتتی وار ایدی ، دیو اعتراف ایلدی .

( فضالة ابن عمیر ابن الملوح اللّیّی ) دخی رسول اکرمی طواف ایدرکن اوروب اعدام ایلک نیتله یواش یواش یاننه یاقلاشد قدّم رسول اکرم آکا « فضاله میسین ؟ » دیو صورتی او دخی « اوت » دیو جواب ویردی . رسول اکرم « نه دوشونویورسین ، دیوب او دخی « هیچ بر شی دوشوندیکم یوق . همان ذکر الله ايله مشغولم ، دیدکده رسول اکرم کولدی و « ذهنکده قوردیغک شیدن توبه و استغفار ایت ، دیو بیوردی و مبارک الی آنک کوکسنه قویدی . در حال فضاله نک ذهنده کی قوروتتی زائل اولمش و آنک اوزرینه ایمانی رسوخ و قوت بولمش ایدوکنی صکره دن کندوسی حکایه ایلشدر .

کعبه ده اوچیوز آلتش بت وار ایدی . او کون جمله سی قیریلوب آتیلدی و بیت الله آنلردن تطهیر ایدی .

( هبل ) نام بیوک بت قیریلوب ییقیلور ایکن زییر ابن العوام رضی الله تعالی عنه حضرتلری ، ابوسفیان « سنک احد وقعه سننده وجودیله افتخار ایتدیگک هبل کورو یور میسین ؟ » دیدکده ابو سفیان « آرتق توییخی براق یا زییر ! کورو یورم که محمدک الّه نندن بشقه اله اولسهیدی ایشلر بشقه درلو اولوردی ، دیدی .

رسول اکرم ، کعبه معظمه نک قبوسنده طوروب « ای ناس ! حاجبلک ، یعنی کعبه خدمتی ايله سقاییت زمزم مأموریتندن بشقه اسکیدن قاله نه قدر دعوا وداعیه و رسوم عادیه وار ایسه جمله سنی الغا و ابطال ایتدم » دیو بیوردی .

سقاییت زمزم منصبی ، عبدالمطلب اولادینه مشروط اوله رق او وقت بو مأموریت شریفه ، حضرت عباسک عهد سننده اولدینی کبی حاجبلک خدمت شریفه سی دخی ( ابو طلحة ابن عبدالدار ) اولادینه مشروط



اوله رق اووقت کعبه معظمه نك آناختاری ( عثمان ابن طلحه ابن ابی طلحه ) ده ایدی .

رسول اکرم ، آندن بو مفتاح سعادتی ایسته دی . اودخی خانه سندن مفتاح کعبه بی کتوردی و « آل اماتی ، دهرک رسول اکرمه ویردی . ابو طلحه و اوغوللری ، کندولرندن بشقه بر کیمسه کعبه بی آچاماز ظن ایدرلردی .

رسول اکرم ایسه مفتاح سعادتی آلوب بالذات کعبه بی آچیویردی و ایچرو کیردی . بر چوق صورتلر کوردی ، جمله سنی قالدیرتدی .

حضرت عباس رضی الله تعالی عنه ، حاجبکک سقاییت زمزم خدمته علاوه سیله بنی عبدالمطلبه تخصیص بیورلمسنی استدعا ایتدی .

حضرت علی رضی الله تعالی عنه دخی « یارسول الله ! حاجبک خدمت شریفه سنی اهل بیتکّه تخصیص بیورمیلین » دیدی .

عثمان ابن طلحه ایسه آباواجدادینه مخصوص اولان بر خدمت شریفه نك الندن چیقمسو سوزلرینی ایشدبکجه پک زیاده متأثر و متالم اولیوردی .

او حالده جبریل امین کلدی و حاجبکک ینه ابو طلحه نسلنده براغلمسی امرینی کتوردی .

آنک اوزرینه هان رسول اکرم « ای بنی ابی طلحه ! امانه اللهی مؤیداً عهدّه گزده قالمق اوزره آلکنز » دهرک کعبه آناختارینی عثمان ابن طلحه یه ویردی .

عثمان ابن طلحه نك وفاتنده مفتاح سعادت ، آنک عمرزاده سی اولان ( شبیه ابن عثمان ابن ابی طلحه ) یه کچدی . آندن دخی اولاد و احفادینه قالدی . الحاله هده بو حاجبک خدمت شریفه سی ( بنی شبیه ) ده در .

حضرت ابو بکرک والدیه سی ( سلمی ) رضی الله تعالی عنها حضرتلری ، اوّل باوّل ایمان ایدنلردن ایدی . اما پدری ( ابو قحافه ) پیر فانی اولدینی حالده هنوز ایمانه کلامشیدی .

بو کره حضرت پیغمبر ، مسجد حرامه داخل اولدوقده حضرت ابو

بکر الصدیق ، پدری ابو قحافه نك الدن طوتوب حضور نبوی به کتوردی .  
او دخی اسلام ایله مشرف اولدی .

بعده فیخر عالم صلی الله تعالی علیه وسلم حضرتلری ( صفا ) اوزره  
چیقوب اوتوردی . حضرت عمر الفاروق دخی آلت طرفنده طوردی  
وناس کلوب برر بر بیعت ایتمک باشلادی .

ابتدا ارککلر ، اسلام اوزرینه بیعت ایلدیلر . رسول اکرم دخی الله  
ورسولنه اطاعت ایتمک اوزره آنلرک بیعتنی قبول ایلدی .

ارککلرک بیعتی تمام اولدقه نوبت ، قادینلره کلدی . حضرت علینک  
همشیره سی ( ام هانی بنت ابی طالب ) و ( عاص ابن امیه ) نك قیزی  
( ام حبیبه ) و ( عتاب ابن آسید ) ک خالهلری ( اروی ) و ( عاتکه )  
و ( حارث ابن هشام ) ک قیزی و ( عکرمه ابن ابی جهل ) ک زوجه سی اولان  
( ام حکیم ) و خالد ابن ولیدک قیز قرنداشی ( فاخته ) کبی قریش ایچنده  
شانلو و اعتبارلو خاتونلر ، طائفة نسانک اوکلرینه دوشوب حضور نبوی به  
کلدیلر .

( عُبَّه ) نك قیزی و ابو سفیانک زوجه سی اولان ( هند ) دخی  
تبدیل قیافت ایدرک آنلرک ایچنه قاریشوب کلشیدی .

رسول اکرم ، آنلره شرک و سرقت و زنادن اجتناب ایتمک و اولادلرینی  
اولدرمامک و کیمسه به بهتان و امر حقه عصیان ایتمه مک اوزره بیعت ایتملرینی  
تکلیف ایتدی .

حال بوکه : ابتدا شرکدن اجتناب ایتمک شرطنی تکلیف ایتدکه هند ،  
میدانه چیقوب « والله ، سن ، ارککلره تکلیف ایتمدیکنک شرطنی بزه تکلیف  
ایدیورسین . هر نه ایسه بزده آنی یرینه کتوره جکز » دیدی .

بعده ، سرقت بجهنه کلدکه هند « والله ، اگر خرسزلق ایتسه یدم  
ابوسفیانک مالندن نیچه شیلر چارپاردم » دیدی .

ابوسفیان اورادہ حاضر ایدی « کچمشى وار ايسه سکا حلال اولسون .  
کله جکه باقالم » دیدی .

فیخر عالم حضرتلری ، او وقت ھندی طائیدی و « ھندميسين ؟ » دیو  
صوردی .

او دخی « بن ھندم . کچمشى عفو ایت . الله ده سنی عفو ایتسون »  
دیو جواب ویردی .

بعده رسول اکرم ، زنا ایتمه مک شرطنی تکلیف ایتدکده ھند ( حرّم  
اولان خاتون هیچ زنا ایدرمی ؟ » دیدی .

بعده رسول اکرم ، اولادلرینی اولدورمه مک بحثنه کلدکده ھند  
« بز ، آنلری کوچوک ایکن بویوتدک وبویوک ایکن آنلری سن بدرده  
اولدوردک . آرتق نه اولدی ايسه اوراسنی سن و آنلر دھا ای بیلورسکز ،  
دیدى .

حضرت عمرک فوق العاده تمکین ووقاری وار ایکن ھندک بو سوزینه  
طایانامایوب کولدی .

بعده رسول اکرم ، خاتونلرک بهتاندن صاقینمالرینی تکلیف ایتدکده  
ھند « والله بهتان چیرکین شیدر . سن ، بزه حسن اخلاق ایله امرایدورسین ،  
دیدى .

نهایت عصیان ایتمه مک تکلیفنه کلدکده دخی ھند « بز ، بودیوان عالییه  
صکره عصیان ایتمک نیتيله کلدک » دیو سوزی کسیدردی .

آنک اوزرینه رسول اکرم ، بو وجهله قادینلردن بیعت آلمق اوزره  
حضرت عمره امر ایتدی . او دخی آل ویردی وبالوکاله قادینلردن  
بیعت آلدی .

ھندک مقدبجه دمی ھدر قیلنمش ایکن بو وجهله مظهر عفو وامان  
اولدی و خلوص قلب ایله ایمانه کلدی .

حتی خانه سنه واروب ، نه قدر بتلر وار ايسه « بو قدر وقت سزه  
آلدانمشز » دهرک برر برر قیروب پارالادی وجهله سنی محو ایلدی .

فخر عالم ، صفا اوزرنده جناب حقه حمد و ثنا ایدرکن انصاردن بعضلری ، فکر و مطالعهیه واروب « حضرت پیغمبر ، وطننه قاووشدی ، عشیرتیه کوروشدی . هیچ بوندن صکره دونوبده بزم بلده مزه کیدرمی ؟ ، دیو تأسف واندیشه ایدرلر مش .

همان حضرت جبریل علیه السلام کلوب رسول اکرمه وحی کتوردی وانصارک بو اندیشه لیرنی بیله یدردی .

رسول اکرم ، صفا اوزرنده دعاسنی تمام ایتدکن صکره بو کیفیتی انصاردن صوردی .

آنلر دخی « اوت یار رسول الله ! ذهنمزه اوپله بر خاطره کلدی ، دیدیلر .

خاتم الانبیا حضرتلری دخی « ای جماعت انصار ! بن اللهک قولی ورسولی یم . سزک بلده گزه هجرت ایتدم . حیات وماتم سزک یانگزده در ، دیو بیوردی .

انصار کرام حضراتی ، رسول اکرمک بو التفاتندن فوق العاده سویندیلر وسوینجیلرندن آغلاشدیلر .

اوپله وقتی کلدکده حضرت بلال رضی الله تعالی عنه ، کعبه اوستنه چیقوب اذان او قودی .

نه بوبوک انقلابات حسنه درکه : کعبه اوزرنده ، صباحین قوجه ( هبل ) نام بت طور ورکن آن واحده خاکیله یکسان اولوب اوپله وقتی اذان محمدی او قونوبور و حرم شریفده بونجه بتلر وار ایکن جمله سی بردن محو ایدیلوب کعبه مشرفه نیک اطرافنده بو قدر بیک آغزدن تکبیر آلیور ولات وعزایه پرستش اولنور ایکن یالکز واجب الوجود تعالی حضرتلرینه عبادت اولنور ایدی .

قریش طائفه سی ، طاغیله رق کیمی بر طرفه قاچوب کیزلنش و کیمی مکهنک اطرافنده کی طاغله رب و بایرلر چیقوب اوزاقدن تماشا ایتمکده بولنش ایدی .

بر طاقی دخی ابوسفیان ایله برلکده کعبه حولیسندہ طوروب بویله  
بغۃً ظهوره کلن تبدلات عظیمه یه نظر حیرت وتعجب ایله باقیورلردی .  
ایشته اووقت ابوجهلک قیزی ( جَویریه ) « الله ، بابامه لطف واحسان  
ایتمش که وقتيله وفات ایدوبده بالاک کعبه اوزرنده باغردیغنی کورمدی »  
دیمش .

حارث ابن هشام دخی « کاشکی اولجه فوت اولوبده بوکونی کورمه یه  
ایدم » دیمش .

آنلرله برلکده بولغان دیگر اشراف قریش دخی بو سیاقده برر  
سوز سویلشلر .

فقط ابوسفیان « بن ، محمدک حقنده برشی سویلم . زیرا آکا کوکدن  
خبر ویریلیور » دیمش .

درعقب رسول اکرم ، آنلرک یاننه واردی ویدنلرنده کیزلوجه  
نه سویلشدکارینی برر کندولرینه خبر ویردی .

حارث ، همان « بن ، شهادت ایدرم که سن حق پیغمبرسین . زیرا  
بزم بو سوزلریمزه کیمسه مطلع اولمادی » دیهرک کلمه شهادت کتوردی .  
کلهلم شمدی بزمقدما دملری هدر قیلنمش اولان بالاده مذکور فرادیلرک  
احوالنه :

هندک مظهر عفو و امان اولسی سائر فرادیلره جسارت ویردی و ابن  
خطلمک خواننده جاریه لرندن بری که قاچوب کیزلنمشیدی . مسلمان اوله رق  
حضور نبوی یه کلوب عفو و امان دیله دی . رسول اکرم دخی آنی عفو  
ایلدی .

( عبدالله ابن سعید ابن ابی سرح ) دخی عثمان ذی النورین رضی الله  
تعالی عنه حضرتلرینک سوت قرنداشی اولمغله آکا التجا ایلمش و او دخی  
آنکیزله مش ایدی . عامه یه امنیت و اطمینان کلدکدن صکره حضرت  
عثمان ، آنی میداننه چیقاردی . حضور نبوی یه کتوردی ، عفوایتدیردی .

آندن صکره بو ذات ، قوی مسلمان اولوب پک چوق محاربه لرده بولنش و حضرت عثمانک خلافتنده مصر والیسی نصب اولنش در .

عکرمة ابن ابی جهل که خندمه ده منهزم اولدقدن صکره یمن طرفنه فرار ایتشیدی . زوجہ سی ام حکیم ، مسلمان اولوب رسول اکرم دن آنک ایچون امن و آمان آلدی و آرقه سندن کیدوب آنی یمن ساحلنده بولدی « ناسک ائک زیاده حلیم و کریمی اولان ذات طرفدن سکارای و امان ایله کلدن » دهرک آنی کیر و چویردی و حضور نبوی یه کتوردی . عکرمة دخی اسلام ایله مشرف اولدی .

صفوان ابن امیه دخی جدیه فرار ایتشیدی . ( عمیر ابن وهب جمعی ) حضور نبوی یه کلوب « یارسول الله ! صفوان ، بنم قومک اولوسیدر . سندن قورقوب قاچدی . آکا رأی و امان ویر » دیدی . رسول اکرم دخی امان ویردی .

آنک اوزرینه عمیر جمعی ، جدیه واردی . صفوان ایله کوروشدی . رسول اکرمک نصل حلیم و کریم و اقرباسنه نه مرتبه وفادار اولدیغنی بیان ایتدی و « او ، سنک عمزاده کدر . آنک عز و شرفی ، سنک عز و شرفکدر » دیدی و آنی کیر و چویروب و مکّه مشرفیه کتوردی و حضور نبوی یه چیقاردی .

صفوان ، حضور نبویه عمیره اشارت ایدرک « بو آدم ، دیورکه : سن ، بکا امان ویرمش سین . طوغریمی ؟ » دیو صوردی .

رسول اکرم دخی « طوغریدر » دیو جواب ویردی . صفوان « اويله ایسه مسلمان اولق ایچون بکا ایکی آی مهلت ویر ، دیدی .

رسول اکرم « درت آی مخیر سین » دیو بیوردی . بناء علیه صفوان ابن امیه ، بر مدت مشرک اولدینی حالدہ امن و امان اوزره قالدی .



( عبدالله ابن الزبیری ) حضرت علینک همشیره سی ام هانی حضرت تلرینک زوجی اولان ( هیره ابن ابی وهب مخزومی ) ایله برابر ( نجران ) ه کتیدی . هیره ، اوراده مشرک اولدینی حالده وفات ایتدی . ابن الزبیری ایسه دونوب مکیه کلدی وعذر دیله دی . رسول اکرم دخی آنی عفو ایلدی . آندن صکره او دخی اعتذار وادیسنده نیچه شعرلر و رسول اکرمه مدحیهلر سویلدی .

حضرت حمزه نک قاتلی اولان ( وحشی ) بر مدت اطراف واکنافده طولاشدی . لکن صیغینه جق یر بولامایوب نهایت رسول اکرمه دخیل دوشدی . رسول اکرم آنی دخی عفو ایتدی فقط « کوزیمه کورونمه ، دیو بیوردی . بناء علیه وحشی ، سربست کزردی . لکن رسول اکرمه اصلا کورونمزدی .

ساحل بحر اوزرنده ( مُشَلَّل ) نام طاغ که اورادن ( قُدَید ) نام محل مشهوره اینیلور . ایشته او طاغ اوزرنده ( اوس ) و ( خزرچ ) قبیله لرینک ( منات ) نامنده بر بتی وار ایدی . عید فطره آلتی کون قاله ( سعد ابن زید ابن اشهل ) رضی الله تعالی عنه حضرتلری ، آنی هدم ایتمکه مأمور اولمغله واروب هدم ایلدی .

مکیه بر قوناق مسافده واقع ( نَخْلَه ) نام محله قریشک ( عَزْی ) نامنده بر بتی وار ایدی که عندلرنده بتلرک الک بیوکی ایدی . عید فطره بش کون قاله آنی کسر وهدم ایچون دخی خالد ابن الولید رضی الله تعالی عنه حضرتلری مأمور اوله رق بز مقدار سواری ایله واروب آنی پارالادی .

مکیه اوچ میل مسافده ( هُذَیل ) قبیله سنک دخی ( سَوَاع ) نامنده بر بتی وار ایدی . اوئانده عمرو ابن العاص رضی الله تعالی عنه حضرتلری دخی واروب آنی اوردی ، قیردی ، خاک ایله یکسان ایلدی .



## وقعه خذیمه

فتح مکدن صکره رسول اکرم ، قبائلی دینه دعوت ایچون هر طرفه  
 مأمورلر کونده رمکله ( خالد ابن الولید ) ی دخی نخله دن عودتدن صکره  
 مهاجرین وانصار ایله ( بنی سلیم ) قبیله سندن مرکب بر فرقه ایله ( خذیمه )  
 قبیله سنه کونده ردی .

حال بوکه : زمان جاهلیتده خذیمه قبیله سی ، عبد الرحمن ابن عوفک  
 پدرینی و خالد ابن الولیدک عموجه سنی اولدورمش اولدقلرندن خالد، آنلردن  
 اخذ انتقام ایچون فرصت آراردی .

بناء علیه شوال آینه مکیه برقوناق مسافه سی اولان ( یَلَم ) ناحیه سنه  
 واردی . بنی خذیمه ، مسلح اوله رق قارشو چیققلرند « سلاحرگزی  
 براقیکز . زیرا خلق ، مسلمان اولدی ، دیدی . آنلر دخی اطاعت  
 ایدرک سلاحرینی بر اقدیلر .

شوحالده آنلره تعرض اولنق اصلا جائز دکل ایکن خالد ، آنلرک  
 اللرینی باغلادتدی و کندولرینی عسکره توزیع ایدرک « هر کس ، کندی  
 اسیرینی اولدورسون ، دیو امر ایتدی .

بنی سلیم قبیله سی ، کندی یانلرنده کی اولان اسیرلری اولدوردیلر .  
 اما مهاجرین وانصار، اوله برچیرکین ایشی ایشله مکدن ابا ایدرک یانلرنده کی  
 اسیرلری صالیوردیلر .

فی الواقع خالدک بوحرکتی ، پک چیرکین برایش اولدی . حتی صوحنی  
 باصدیرمق ایچون اکابر اصحاب کرامدن اولان ( عبد الرحمن ابن عوف )  
 حضرتلرینه « پدرینک انتقامنی آلام ، دیدکده ابن عوف حضرتلری

« اويله دكل . سن عموجه نك انتقامنى آلمق ايچون عصر اسلامده زمان جاهليت ايشنى ايشله دك » ديو آنى تكدیر ایلدی .  
 رسول اکرم ، اووقمه یی ایشته کده « یارب ! بن خالده ایشله دیکی ایشدن بری یم » ديو بیوردی وبرچوق مال ایله حضرت علی یی ، بنی خذیمه یه کونده ردی .

حضرت علی ، بنی خذیمه یه واردی . تلف اولان آدملرینک دیتلرینی ویردی « دهابر حقکز قالدیمی ؟ » ديو سوردی . « خیر قالمادی » دیدیلر . حضرت علی « بيلمه دیکگنز دها ضایعات وار ایسه آکا قارشولق » دییه رک یاننده فضلّه قالان ماللری دخی آنلره ویردی .  
 بعده حضرت علی دونوب کلدی ، کیفیتی حضرت پیغمبره خبر ویردی . حضرت پیغمبر دخی آنک بو اجرا آتتی تحسین بیوردی .





## غزوۀ حنین

مکہ مکرمہ فتح اولندینی کبی قریش قومنک اکثری مسلمان اولدی . ایمان ایتمه یئر ، پک آز قالدی . بو جهتله دین اسلام ، بر مرتبه ده میدان آلدی .

مقدم قریش قومنک طرفدار ی اولان قبائل وعشا ئر ، بالطبع طرف اسلامیانہ مائل ومتوجه اولدی و دین اسلام هر طرفده شان وشهرت بولدی .

فقط عربک ائک بیوک قبیله لرندن بری اولان ( هوا زن ) قبیله سی ، رسول اکرم ایله محاربه ایتمک اوزره بینلرنده اتفاق ایلدیلر . طائف ایله مکہ آرسنده ( حنین ) نام وادیده طویلا نغمه باشلادیلر .

( قارب ابن اسود ابن مسعود ثقیف ) ثقیف قبیله سیله اورایه کلدی . رسول اکرمک کوچوک ایکن سوت امدیکی ( بنی سعد ابن بکر ) قبیله سیله ( بنی چشم ) کبی دیگر بعض قبائل دخی کلوب آنلره قاتلدی . بو جهتله هوا زن اردوسنک موجودی یکر می بیسک نفر دن زیاده اولدی .

رسول اکرم ، کند ی علیهنده او یله بر بیوک اردونک طویلان دیغنی ایشیتدی وهمان تدارکات کلیه یه تشبث ایتدی . حتی صفوان ابن امیه دن ایکره تی اسلحه ایستدی . صفوان « غصبامی یامحمد ؟ » دیو سور دی .

رسول اکرم « خیر . غصباً دکل ، بلکه سکا رد واعاده اولنجیه دک تلف اولورسه اوده نمک شرطیله عاریت اوله رق ایسترم » دیو بیوردی .

صفوان دخی « اویله ایسه بَاس یوق ، دیدی و عاریت اوله رق اوچوز زره ویردی .

( نَوَلَّ ابن حارث ابن عبدالمطلب ) دخی بو وجهله اوچوز مزراق اعاره ایتدی .

الحاصل رسول اکرم ، تدارکات حربیه سنی اتمام ایلدی و فتح مکده صکره اسلام ايله مشرف اولان اشراف قریشدن ( عَتَّاب ابن اَسید ) رضی الله تعالی عنه حضرتلرینی مکده قائم مقام براقدی . اووقت عَتَّاب سنی یکریمی راده سنده ایدی .

اهل مکیه تعلیم احکام دین ایچون رسول اکرم ( مُعَاذ ابن جَبَل ) رضی الله تعالی عنه حضرتلرینی عتاب ايله برابر براقدی .

بعده شوالک یدنجی کونی رسول اکرم ( دلدل ) نام استرینه سوار اوله رق اون ایکی بیک عسکرله مکده چیقوب جانب حنینه عزیمت ایتدی . بو عسکرک بیک نفری مهاجرین و درت بیک نفری انصار و بش بیک نفری جهینه و مزینه و بنی سلیم و اسلم و غفار و اشجع قیله لری و ایکی بیک نفری اهل مکه ایدی .

برلکده سکسان نفر مشرک اولوب آنلردن بری دخی صفوان ابن امیه ایدی .

بنی سلیم قیله سیله مکه عسکری مقدمه الجیش ، یعنی چرخه جی اولوب رئیس لری او وقت الّه زیاده بهادر و ماهر سواری قوماندانی اولان خالد ابن الولید حضرتلری ایدی .

ایشته بویله بر مکمل اردو ايله رسول اکرم ، شوالک اون برنده وادی حنینه واصل اولدی .

اهل اسلامدن بعضیلری ، اردوی هایونک کثرت و قوتنه باقوب « بو عسکر ، هیچ بر وقتده آزلقدن طولای مغلوب اولماز ، دیدی .

بوايسه ياكليش برسوزايدى. زيرا : كثر وقت ، اكر چه اسباب غلبه دن ايسه ده نصرتي ورن جناب حقدرد .

كيشى ، اسباب لازمه يي حاضر ايتليدر . لكن نصرتي جناب حقدن بيلمليدر . يوقسه كنديني بكنن ، صكره اوتانور و كندى قوته كووه نن ، داما آلدانور .

حق تعالى حضرتلرى دخی حبيبي غالب ومظفر ايدن آنجق كندوسى اولديغنى بيلديرمك ايجون بو غزاده ابتدا عساكر اسلاميه بر هزيمت صورتى كوستردى . بعده محضا عنايت الهيه سى اولق اوزره بر بيوك مظفريت احسان بيوردى .

شويلاه : دشمن اردوسنك باش قوماندانى و هوازن قيله سنك شينى ولان ( مالك ابن عوف نصرى ) عسكرى غيره كتورمك و آنلره فداكارانه جنك ايتديرمك اوزره بالمله نسوان وصبيان ايله حيواناتى موقع حربه سوردى و « جمله گز » يكوچود اوله رق بردن بره هجوم ايدىگنر ، ديو سكرينه امر و يردى .

خالد ابن الوليد حضرتلرى ، وادى حننده لابلاليانه سكيردوب كيدر كن صولرده كيزلنمش اولان هوازن عسكرى ، بقتة چيقوب بر شدتلو هجوم نجه بنى سليم قيله سى ، بوزولدى . مكه عسكرى دخی آنلره پيرو اولدى . نلرك بو هزيمتى سائر عساكر اسلاميه سرايت ايدرك بتون اردوى الام بوزولوب طاغيلدى .

حضرت پيغمبرك ياننده يالكز عمتى ( عباس ) و عمزاده سى ( ابو بان ابن حارث ) ايله ( ابو بكر ) و ( عمر ) و ( على ) و ( اسامة ابن ) كى پك آرزاهاب كرام قالدى .

بو ، بوزغونلق اوزرينه ايمانى ضعيف اولان تازه مسلمانلردن بر غنك افكارى بوزولدى .

حتى اهل مكه دن بعضيلرى ، بربريله سويلشورلر ايكن ابو سفیان ابن ب . بو هزيمتك دكزه قدر آرقه سى آلتاز ! ، ديمش .



صفوان ابن امیه نك آنابر قرنداشی اولان (كَلْدَه) «بوكون، سحر بوزولدی !» دیوب صفوان ایسه هنوز مسلمان اولمامشیکن «صوص. الله آغزیگی یرتسون . بکا، هوازندن بری حاکم اولمقدن ایسه قریشدن بری حاکم اولق یکدر ، دیو کلدیهی تکدیر ایتمش .  
رسول اکرم ایسه ثبات و شجاعتده جمله ناسه فائق ایدی . ائک طار و مخاطره لو و قتلرده دخی تلاش و عجله ایتزدی .

حضرت علیدن مرویدرکه «محاربه ، شدت بولوبده باشمز صیقی به کلدیکی وقت بز ، هپ رسول الله صیغوردق ، دیر ایتمش .  
ایشته بو دفعه دخی فخرعالم حضرتلری ، جمله ناسک اشجعی اولدیغو کوستردی .

شویله که : بروجه بالا اردو بوزولوبده فخر عالم ، یالکز قالدقد اصلا فتور کتورمیوب و هیچ تلاش کوسترمیوب دلدلی دشمنه قارش سورهددی . حضرت عباس ایسه ایلرو کیتمه سون دیو دلدلک دیزکینه طوتاردی .

اووقت فخر عالم حضرتلری ، یاننده کی اصحاب کزینی ایله صاغ طر چکیلوب طوردی . «ای ناس ! کلیگز . بن رسول الله ، محمد ا عبداللهم» دیو ندا بیوردی .

حضرت عباس دخی گور سسلی بر ذات اولوب صوت جهیر «ای عقبهده بیعت ایدن انصار ! ای شجره رضوان آلتنده کیرودونمه ، اوزره سوز ویرن اصحاب !» دیو چاغردی .

ایشیدن اصحاب کرام «لَبَّيْكَ لَبَّيْكَ» دیهرك دوندیلر وهمان کلوب رسا اکر مک اطرافته طوپلانیدیلر .

هله (اسید ابن حضیر) رضی الله تعالی عنه حضرتلری (یا اوس (سعد ابن عباده) رضی الله تعالی عنه حضرتلری (یا خزرج) بو چاغردق لرنده نصل که آریلر ، بکلرینک باشنه اوشوب طوپلانورلر ای

(اوس) و (خزرج) قبیله‌لری دخی سکیردوب قوشوشدیلر و آنلرک باشنه اوشدیلر .

ایشته بو صورتله بوزغون عسکر ، هر طرفدن قوشوب رسول اکرمک یاننه کلدیلر و کمال شدت ایله جنکه کیرشدیلر .

هوازن عسکری ، کمال شدت ایله هجوم ایدوب کلورکن حضرت علی رضی الله تعالی عنه ، قارشو واروب آنلرک بایراقدارلرینی اولدوردی . اوئاناده رسول اکرم «شیمدی فرون قیزدی» دیوبیوردی و یردن بر آووج طوپراق آلوب دشمنلرک یوزلرینه قارشو آتدی و کوکدن ملکلر اینوب رسول اکرمه یاردیم ایتدی . بوجهته دشمنلر ، همان فراره یوز طوتدی .

عساکر اسلامیه دخی آنلرک آرقه‌لرینه دوشوب دیله‌دکلرینی قتل و دیله‌دکلرینی اسیر ایتدیلر .

یالکز انصاردن و خزرج قبیله‌سندن (ابو طلحه) رضی الله تعالی عنه حضرتلری ، اووقت مشرکاردن یکریمی نفرینی قتل ایتمشدی .

بو جهته مشرک‌لرک یتمش بو قدری تلف و بر چوغی اسیر و باقیسی منهزم و پریشان اولدی و کافه اموال و عیاللری عساکر اسلامیه ائنه کچدی . اهل اسلامک شهیدلری ایسه درت نفردن عبارت ایدی .

ابتدا عساکر اسلامیه‌نک بوزولدینی خبری اهل مککه واصل اولدقده بعضیلری «محمد اولمش و محمدیلر طاغیلمش» بوندن صکره عرب قومی دخی بابالرینک دینته دوزلر ، دهرک اظهار ممنونیت ایاشلر .

مکه قائممقامی اولان (عتّاب ابن اسید) رضی الله تعالی عنه حضرتلری دخی «محمد اولورایسه شریعتی باقیدر ، تکریمی دیریدر» دیمش .

متعاقباً اهل اسلامک منصور و مظفر اولدینی خبری مککه واصل اولنجه عتّاب ایله معاذ ابن جبل رضی الله تعالی عنهما ، یکیدن دنیایه کلشجه‌سنه ممنون اولمشلردر .

## غریبه

یوقاروده بیان اولندیفی اوزره رسول اکرم، مدینه دن حرکت بیورمدن اولجه ( ابو قتاده ) رضی الله تعالی عنه حضر تلرینی بر مقدار عسکرله جانب نجده کوندرمشیدی .

( اَضْم ) نام محله واردقلرنده ( عامر ابن اَضْبَط ) ه تصادف ایشملر . عامر ، آنلره سلام ویرمش وکندوسنک مسلمان اولدیغنی بیلدیرمش ایکن ابو قتاده نك معیتده کی عسا کردن ( مُحَلِّم ابن جُثَامَه ) بر اسکی ماجرادن طولایی عامری اولدرمش وده وده سیله اشیاسنی مال غنیمت دیو آلمش .

بعده ابو قتاده ، عسکريله عودت ایدوب رسول اکرم ایسه اردوی هایون ایله مکه اوزرینه حرکت ایش ایلش اولدیغندن ابو قتاده دخی آرقداش لریله برلکده مکیه متوجه اوله رق اثنای راهده رسول اکرمه یتشمش لرمکه فتحنده بولندقدن صکره خنین غزاسنه دخی چیقمش لرایدی .

رسول اکرم ، وادی حنینده اويله نمازینی ادا ایتدکدن صکره بر آفاج کولکده سنده اوتوردی . اصحاب کرامی دخی اطرافنده صف اولوب طوردی .

اووقت غطفاندن (فزاره) قبیله سنک رئیس اولان ( عَیْنَةُ ابن حصن ) قالقوب عامر ابن اَضْبَط کاتنی دعوی ایلدی .

بنی تمیم قبیله سی شیعنی اولان ( اَقْرَع ابن حَابِس ) دخی محَلِّم ابن جُثَامَه یی حمایه ایدرک مدافعه یه قالقیشدی .

حضور نبویه اوزون اوزادی یه محاکمه دن صکره ورنه نك موافقتیله دیته قرار ویردی لر و « محَلِّم کلسونده رسول اکرم ، آنک ایچون استغفار ایتسون » دیدیلر .

محَلِّم کلدی ، حضور نبویه اوتوردی . رسول اکرم « آدک ندر ؟ » دیو صوردی .

« محمّد ابن جثامه » دیو جواب ویردی .  
 رسول اکرم « عامر ابن اضبط ، اسلامی اظهار ایتمشیکن سن آنی  
 قتل ایتدگمی ؟ » دیو بیوردی .  
 محمّد « آنک اسلامی اقرار ایتسی ، آنجق اولومدن قورتولمق ایچون  
 ایدی ، دیدی .

رسول اکرم « یا ، سن آنک قلبی یاردگمی که طوغریمی ، یالانمی  
 بیله سین » دیدی .  
 محمّد « آنک قلبی برات پارچه سیدر . یاریسه نه آکلاشیلور ؟ » دیدی .  
 رسول اکرم ، « قلبی بیلمز سین ، لسانه دخی ایناماز سین . نه یاعلی ؟ »  
 دیدی .

محمّد ، باشقه دییه جک بر شی بولامایوب « یار رسول الله ! بنم ایچون  
 استغفار ایت » دیدی .

رسول اکرم « الله ، سنی عفو ایتمه سون » ده نیجه محمّد ، کوزلرندن  
 یاش آقاراق قالقوب کیتدی و کدرندن بر هفته ظرفنده وفات ایتدی .  
 دفن اولندقدمه یر ، آنی قبول ایتمه یوب طیشارو آتدی . تکرار دفن  
 اولندقدمه یر ، آنی ینه آتدی .

قومی کلوب رسول اکرمه خبر ویردی . رسول اکرم « بو یر ،  
 آندن دها قنارینی قبول ایدر . لکن جناب حق ، سزه وعظ ایتمک ایستر ،  
 دیو بیوردی .

آندن سکره ( محمّد ) ی قومی ، تکرار دفن ایتدیلر و اوزرینه بیوک  
 طاشلر قویوب کیتدیلر .

### وقعه اوطاش

وادی حنینده هوازن اردوسی ، منہزم و پریشان اولدقدن سکره  
 فراریلردن بر طاقی هوازن دیارنده ( اوطاش ) نام وادیده طوبیلاندی .

ابوعامر رضی الله تعالی عنه حضرتلری ، بر فرقه عسکریه ایله اورایه واروب حربه کیرشدکده شهیداولنجه یرینه ( ابوموسی الاشعری ) رضی الله تعالی عنه حضرتلری کچوب جنکی قازاندی وبر چوق اسیرلر ایله نیچه اموال غنائم آلوب کیرو دوندی .

بواسیرلر ایچنده ( بنی سعد ) قبیله سندن ( حارث ) ک قیزی ( شیما ) دخی وار ایدی . رسول اکرمک سوت قیز قرنداشی اولدیغنی خبر ویردی وحضور نبوی به کتورلدکده رسول اکرم ، آنی طانیوب متأثر اولدی . حتی مبارک کوزلرندن یاش کلدی . خرقه سنی یره دوشه یوب ( شیما ) یی آنک اوزرینه اوطورتدی وپک چوق حرمت ورعایت ایتدی . آکا بر کوله وجاریه وایکی دهوه وبر مقدار قویون ویردی وقوم وقبیله سی یاننه کونده ردی .

### محاصرة طائف

بروجه بالا قبائل متفقہ اردولری ، منهزم وپیشان اولنجه آرتق قبائل عربده اهل اسلامه قارشو کله جک تاب وطاق قالمدی .

فقط ثقیف قبیله سی ، وطنلری اولان ( طائف ) بلده سنه کیتدیلر وقلعه یه کیروب تحصن ایتدیلر .

هوازن قبیله سنک رئیس اولان ( مالک ابن عوف ) دخی آنلره برابر واروب طائف قلعه سنه قیاندی .

آنک اوزرینه حضرت پیغمبر ، اسرا ایله اموال غنائمک مکیه اون یوقدر میل مسافه سی اولان ( جعرانه ) نام موقعده جمع ایدیلسنی امر

ایتدی ومحافظملری ایچون اوراده بر مقدار عسکر آلیقودی . باقی عسکرله طائفه کیتدی واهل طائفی صیقی صیقی محاصره وتضیق ایتدی . حتی ( سلمان فارسی ) رضی الله تعالی عنه حضرتلرینک معرفتیه منجنیق دخی قوللاندی .

ثقیف قبیله سنک رئیس اولان ( عروه ابن مسعود ) ایله ( غیلان ابن سلمه ) مکهنک فتحندن صکره رسول اکرمک طائف اوزرینه یوروپه جکنی

اوله درخاطر ایدرک منجیق صنعتی اوکره نمک ایچون ( جُرش ) طرفنه  
کیتمش اولدقلرندن حنین وقعه سنده بولندقلری کبی بوکره طائفک  
محاصره سنده دخی بولنه مدیلر .

لکن ثقیف قبیله سیله طائفده بولنان سائر محصورین ، قلعهدن شدتلو  
مدافعه ایتدیلر . پک چوق اوق وسائر آتدیلر .

شویله که : آتدقلری اوقلر ، چکیرکه آلانی کبی هواده اوچار وبر برینه  
طوقوشه رق اهل اسلام اوزرینه دوشر ایدی .

بوجهتله اهل اسلامدن اون ایکی کشی شهید وبر چوق کیمسه لر مجروح اولدی .  
بو صروده طائفدن بر چوق کوله لر ، قاچوب اردوی هایونه کلدیلر .  
رسول اکرم ، جمله سنی آزاد ایتدی .

خالد بن ولید رضی الله تعالی عنه حضرتلری ، بر قاچ دفعه میدان  
مبارزه یه چیقوب ار دیله دی .

رؤسای مشرکیندن ( عبدیلیل ) نام شخص « درون قلعهدده سکافارشو  
چیقه جق کیمسه یوقدر . بزلر ، ذخیره من تمام اولنجه یه قدر طیانوب  
طورورز . ذخیره من بیتر ایسه او وقت طوپمز بردن طیشارو اوغرایوب  
اولنجه یه قدر اوغراشورز » دیو ردّ جواب ایلدی .

بوصورتله مدت محاصره ، اون سکز کون قدر ممتد اولدی . طائفک  
فتخی ایسه هنوز میسر و مقدر دکل ایدی .

بناء علیه رسول اکرم ، آندن واز کجدی واردوی هایون ایله طائفدن  
قالقوب جعرانه یه کلدی که اسرا واموال غنائم هپ اوراده ایدی .

اسرانک ذکور وانات مجموعی آلتی بیک نفوس واموال غنائم یکرمی  
درت بیک دهوه وقرق بیکدن زیاده قویون وپک چوق نقود ایدی .

### تقسیم غنائم

رسول اکرم ، چند روز اسرا واموال غنائمی تقسیم ایچون جعرانه ده  
مکث وتوقف بیوردی .



فتح مکه دن صکره یکی مسلمان اولانلر هنوز قلیلرندمه ایمانلری قوت بولماش اولانلرکه (مَوْلَفَةُ الْقُلُوبِ) دنیلور. رسول اکرم، آنلره اموال غنائمدن زیادهجه حصه چیقاردی .

شویله که : (ابوسفیان) و اوغوللری (یزید ابن ابی سفیان) و (معاویه ابن ابی سفیان) و (خُوَیْطُ بْنُ عَبْدِ الْعَزِزِيِّ) و ابو جهلک اوغلی (عکرمه) و برادری (حارث ابن هشام) و (سهیل ابن عمرو) کبی برنجی درجهده اشراف قریشدن اولان مَوْلَفَةُ الْقُلُوبِ یوزر دهوه و بررمقدار کومش وایکنجی درجهده اشرافدن اولان مَوْلَفَةُ الْقُلُوبِ قرقر دهوه و آکا کوره بررمقدار کومش ویردی .

بونلر، اووقت مَوْلَفَةُ الْقُلُوبِدن ایکن صکره هپ قوی مسلمان اولمشلردر. علی الخصوص ابوسفیان ایله اوغوللری یزید و معاویه و خویط ابن عبدالعزی، مؤخرآ رسول اکرمک خدمت کتابتدده بولنمشلردر .

رسول اکرم، نه مرتبه جود و کرم صاحبی اولدیغنی بوکره دخی یار و اغیاره بیلدیردی .

حتی احوال غنائم اووجهله تقسیم اولنورکن بو وادیده الک اعلاجنسندن اوله رق یوزقدر دهوه طویلانمشیدی. صفوان ابن امیه، آنلری کوروب «نه اعلا دهوه لر!» دیدکده رسول اکرم «اوله ایسه سنک اولسون، دیو بیوردی وهان دهوه لری آکا ویردی .

صفوان دخی مقدا مسلمان اولق ایچون درت آی مهلت آلمشیکن آرتق آکا باقیوب «بو مرتبه لطف و سخا، آنجق خصلت انیادر، دیرهک همان اسلام ایله مشرف اولیویردی .

رؤسای نجددن (عینه ابن حصن فزاری) ایله (اقرع ابن حابس تمیمی) یه دخی یوزر دهوه ویریلهرک اشراف قریشک برنجی درجهسه نه معادل طوتولدیله .

بوکره انصاره اموال غنائمدن سائرلره ویرلدیکی قدر حصه ویریلدیکنندن بعضیلرینک جانلری صقیلوب بینلرندمه سویلنمشلر .

فخر عالم حضرتلری ، آنلری حضور سعادتیه چاغردی « بن ، برطاقم  
ضعیف الاعتقاد اولان یکی مسلمانلرک جلب و تألیف قلوبی ایچون اموال  
غنائمدن آنلره زیادهجه حصه ویردم . آنلر ، مالی آلوب مملکتلرینه  
کیدجهلر . سزده رسول اللهی آلوب کندی دیارکزه کتورمکه راضی  
دکلیسکزر ؟ » دیو بیوردی .

جملهسی « راضی و خوشنودز » دیدیلر و بوتلفات ییغمبریدن ممنون  
و متأثر اولوب آغلاشدیلر .

فخر عالم حضرتلری دخی اللرینی قالدیروب خاصهٔ انصاره و آنلرک  
اولاد و احفادینه خیر ایله دعا ایتدی .

اوانئاده هوازن قبیله سنک اشرافی جعرانهیه کلدیلر و اسلام ایله مشرف  
اولدیلر . اولاد و عیال لرینک رد و اعاده سنی نیاز ایلدیلر و حضور نبویده  
غایت مؤثر سوزلر سویلدیلر .

رسول اکرم « بنی هاشمک حصه سنه اصابت ایدن اسرا هپ سزکدر »  
دیدی .

سائر مهاجرین و انصار دخی « بزم حصه لر مزه اصابت ایدن اسرا ، هپ  
رسول الله کدر » دیدیلر . دیگر قبیله لرده ایسترایسته هنز آنلره تبعیت ایتدیلر .  
بو صورتله بر کونده آلتی بیک اسیر آزاد ایدیلدی و جمله سنه طرف  
نبویدن اکراماً بر رقات روبه کیدیریلدی .

متعاقباً هوازن قبیله سنک رئیس اولان ( مالک ابن عوف ) کلدی و اسلام  
ایله مشرف اولدی . آکا دخی طرف نبویدن یوز ده وه احسان بیورولدی .

رسول اکرمک مککه یه و آندن مدینه یه عودتی

انساننده ظهوره کلن بعض وقایع

خاتم الانبیاء علیه افضل التحایا حضرتلری ، واسط ذی القعدة ده جعرانه دن  
قالقوب مککه کیتدی و بیت اللهی زیارت ایتدی و عتاب ابن اسید رضی الله  
تعالی عنه حضرتلرینی امیر مککه ، یعنی مککه والیسی نصب ایلدی .

ناسه احكام شرعيه ي بيلدير مك ايچون معاذ ابن جبل رضى الله تعالى عنه  
حضرتلرينى دىنى مكده براقدى .

كندوسى احباب كراميله برلكده مكدن چيقدى و او اخر ذى القعدة  
مدينه واصل اولدى .

عتاب رضى الله تعالى عنه ، بوسنه ناس ايله عربك اسكى عادتى اوزره  
حج ايتدى .

اشبو عتاب ، حضرت عثمان ذى النورينك عمنزادهسى و ( اسيد ابن  
ابى العاص ابن اميه ) نك اوغلى ايدى . ايلر حقنده شفقتلو ، کوتولر  
حقنده شدتلو ، عادل و صالح و بنى اميه ايچنده سوزى نافذ و ضبط و ربط  
ملكته مقتدر بر نوجوان ايدى .

ضعفای ناس ، آنك امارتندن ممنون وعدالتندن خوشنود قالدى .  
اماوته دىبرو مكده رياسته آليشمش اولان كبار قریش ، اويله نورسيده  
برذاتك امارتندن خوشنود اولديلر .

على الخصوص جمله سنك رئسى اولان ابوسفیان كوره اويله برنوجوانك  
حكومتى آلتنه كيرمك كوچ ايدى .

فقط ابوسفیان ايله فتح مكده يكي مسلمان اولان ديكر كبار قریشدن  
يچهلرى بعدالفتح مكدن مدينه كوچ ايتديلر .

ابوسفیان ، نجران واليسى نصب و تعيين بيورولدى . اوغلى معاويه  
دىنى كاتب و حى اولدى .

مكده ( ابو محذور ) دينور اون التى ياشنده غايت كوزل سسلى بر  
چوجق وار ايدى . فتح مكده رسول اكرم ، آكا تعليم اذان ايدوب  
آنى مكده براقدى . اودى هجرتك اللى طقوز سنه سنه قدر مكده مؤذلك  
ايتدى . بعده فوت اولدى . ايشته پيغمبرمىك مؤذنلرى ايچنده حضرت  
بلالدى صوكره اك مشهور اولان بودر رضى الله تعالى عنهما .

رسول اكرم ، جعراندىن عودت ايتدىكى ائنده ( بجرين ) حكمدارى

(منذر ابن ساوی) یہ خطاباً برنامہ یازدیرمش و (علاء ابن الحضرمی) رضی اللہ تعالیٰ عنہ حضرت تلیلہ کوندیرمش ایدی .

علا حضرت تلیری ، بحرینہ واردی . نامہ ہایونی مندرہ ویردی . منذر ، ایمانہ کلکله بحریندہ کی عربلر دخی ایمان کتوردی .

لکن اورادہ بولنان یہود و مجوس طائفہ لری ، ایمانہ کلیوب اسکی دین و آیینلرندہ اصرار ایتدکلرندن منذر ابن ساوی ، حضرت پیغمبرہ برقطعہ عریضہ یازوب آنلر حتمندہ نہ یاپایم ؟ دیو صورتی .

رسول اکرم دخی مندرہ جواباً بر امرنامہ یازدیروب اومقولہ لره جزیه باغلا دیو بیوردی .

ینہ او اثنادہ طرف نبویدن کاتب حضرت پیغمبری (ابی ابن کعب - الانصاری) رضی اللہ تعالیٰ عنہ حضرت تلیرینک قلمیلہ (عمان) حکمداری اولان (جاندی) اوغوللری (جیفر) ایلہ (عبد) نامہ ہایون یازیلش و عمرو ابن عاص رضی اللہ تعالیٰ عنہ حضرت تلیلہ کوندیریش ایدی .

عمرو ابن عاص ، عمانہ واردی . نامہ ہایونی جیفر ایلہ برادری عبدہ ویردی . جیفر ، براز تردد دن صکرہ عبد ایلہ برابر ایمان کتوردی .

بعدہ عمرو ابن عاص ، عمان اطرافندہ کی عرب اغنیاسنک زکاتی طویلادی و فقیرلرینہ تقسیم ایلدی . درون بلدہ بولنان مجوس طائفہ سنہ دخی جزیه باغلادی .

ینہ او اثنادہ ملوک غساندن بلقاوالیسی اولان (جبلة ابن ایهم) برقطعہ نامہ ہایون یازیلدی ، و دین اسلامہ دعوت بیورولدی .

جبلة دخی اطاعت کوستردی و رسول اکرمہ برقطعہ جوابنامہ ایلہ بعض ہدایا کوندہ ردی .

شام طرفندہ متوطن اولان قبائل عربدن (جندام) قبیلہ سی رئیس (فروہ ابن عمرو الجذامی) کہ قیصر روم طرفندن (معان) بلدہ سی متصرفی واو جوارده بولنان طوائف عربک امیری ایدی . بو اثنادہ رسول اکرم ،

آنی دخی دین اسلامه دعوت ایتدی . او دخی اطاعت ایدوب ایمانه کلدی .

رومالور ایسه فروه نك مسلمان اولدیغی ایشیتدکلری کبی آنی جلب ایله حبس واعدام ایلدیلر . رضی الله تعالی عنه .

خلال ذی الحجّه ده رسول اکرمک (ماریه) نام جاریه سندن (ابراهیم) نام اوغلی دنیایه کلدی و رسول اکرمک بیوک کریمه سی (زینب) رضی الله تعالی عنها حضرتلری دخی بوسنه دار قنادن کوچوب دار بقایه کیتدی .

ینه بوسنه مدینه منوره ده ما کولات بهایه چیقمله خلق ایستدی که رسول اکرم نرخی ویره . رسول اکرم دخی بیوردی که « نرخی ویریجی آنجق للهدر » .





## هجرتك طقوزنجی سنه سی

ز نكینلرك زكاتی طوبلا یوب ده فقیرلره تقسیم ایتك اوزره طرف  
ویدن قبائله مأمورلر کونده ریلدی.

خزاعه قبیله سی زكاتلری ویرمك اوزره ایكن ( بنی تمیم ) قبیله سی  
بو قدر اموالی نیچون الدن چیقارملی؟ « دیرك ممانعت صدندده اولدقلری  
شیدیلدی .

آنك اوزوینه رسول اکرم ( عینه ابن حصن فزاری ) نی بر مقدار  
ربان آتلاسیله بنی تمیم اوزرینه کوندردی .

عینه دخی خلال مجرمده مدینه منوره دن چیقوب ( صَفْرَا ) طرفنه  
وغری کیدرك ( سقیا ) نام محله واردی . اوراده بقتة تمیمی اوردی و بر  
نیلی اسیر و اموال غنائم آلوب کتوردی .

بنی تمیمك وجوه و اشرافی ، اسیرلری قورتارمق اوزره مدینه منوره یه  
دیلر واك فصیح و بلیغ آدم لر نی برابر کتوردیلر و باب سعاده کلوب  
یا محمد! چیق. سنکله مشاعره ایدلم و فخریه سویلشهلم « دیوباغردیلر .

رسول اکرم چیقوب « بن ، شعرا یله مبعوث اولدم . فخریه ایلده دخی  
مور دكم . فقط سویلیکنز باقایم « دیو بیوردی .

بنی تمیمك اك فصیح و بلیغ خطیبی اولان ( عَطَارِد ابن حاجب )  
قوب کندی قومك مدح و ثنای حقنده غایت فصیحانه و بلیغانه بر خطبه  
قوددی .

رسول اکرم ، اکا جواب ویرمك اوزره بلغای اسلامدن و کبار انصار  
آمدن ( ثابت ابن بن قیس بن شماس ) رضی الله تعالی عنه حضرتلرینه  
ارایتدی .



ثابت ابن قیس دخی قالقوب و جناب حقك عظمته و رسول اکرمك کیفیت بعثته دائر پك كوزل بر خطبه او قویوب عطارده غالب کلدی .

بعده بنی تیممك شاعر مشهوری اولان (اقرع ابن حابس) قالقوب فخریه یولده بر قصیده او قودی .

حضرت پیغمبر اکا جواب ویرمك اوزره (حسن ابن ثابت الانصاری رضی الله تعالی عنه حضرت لرینه امر ایلدی .

حضرت حسن دخی دین اسلامك شرف و شاننه دائر بالبداهه بر كوزل قصیده سویلدی .

اقرع ابن حابس ، انصاف ایدوب « بوذاتك خطیبی ، بزم خطیبیمز و شاعری ، بزم شاعریمزك فوقنده و آنلك سسلری ، بزم سسلریمز اوستنده در ، دیدی و آرقداش لرله برابر ایمانه کلدی .

دیار یمنده متوطن اولان قبائل (خمیر) بکلری طرفلرندن دخی بواننا ، مدینه منوره یه ایلچیلر کلوب رسول اکرم ایله ملاقات ایتدیلر و شرو اسلامی او کره نوب کیتدیلر .

بنی تیمم قبیله سی مبعوثلرینك مزاجلری غلیظ اولوب آنلره نسبتله ؛ ایلچیلری ، پك نازك و ظریف آدملر اولدقلرندن حضرت پیغمبرك مه و شناسنه مظهر اولدیلر .

ینه اول ائناده (عُذْرَه) قبیله سندن اون ایکی کیشی کلدی (جره ا نعمان) دخی آنلك ایچنده ایدی . قبیله لرینك زکاتلرینی کتوروب ویرد و جله سی ایمان کتوردیلر « یارسول الله ! بزم تجارتیمز شام ایله در . او طرفه ایسه روم قیصری هر قل وار . آنك حقنده سکا برشی وحی اولندی » دیو صور دیلر .

رسول اکرم « مژده سزه که یقینده شام فتح اولنه جقدر و هر قل ، حوالیدن صاووشوب کیده جکدر » دیو بیوردی .

فصحاً و بلغای عرب ، قرآن کریمه نظیره سویلکدن عاجز قاله

بو جهته جوغی مسلمان اولدیه ده برطاقی ، دین باطلارنده اصرار ایدرک  
سلاح ایله غلبه سوداسنه دوشدیلر .

لکن سلاح ایله مقاومتدن دخی عاجز قالنجہ بنی تمیم کبی بعضیلری  
ینه لسان قلیجنه مراجعت ایدرک خطبه و شعر ایله جنسکشمکه قالقشدیلر .  
خطبا و شعراء اسلام ایسه وادیء بلاغتمه آنلره غالب کلدیلر . نهایت  
آنلر دخی عجزلرینی اعترافه مجبور اولدیلر .

خطبای اسلام ایچنده ( ثابت ابن قیس ) رضی الله تعالی عنه ، سائرہ  
فائق اولدینی کبی شعرده دخی ( حسان ابن ثابت ) ایله ( کعب ابن مالک الانصاری )  
رضی الله تعالی عنهما حضرتلری فائق الاقران ایدیلر .

بعده ( کعب ابن زُہیر ) دخی کلوب آنلره قاتیلدی . رسول اکرمک  
مدح و تناسیله مشغول اولدی .

شویله که : ملغای عربدن مشهور ( زهیر ابن ابی سلمی ) نام شاعرمک  
( بُجَیر ) و ( کعب ) نامنده ایکی اوغلی اولوب ایکسی دخی آنک کبی  
شاعر ماهر ایدیلر .

هله کعب ، فوق العاده آتش زبان بر شاعر اولوب پدرینک وفاتندن  
صکره شهرتی آکا میراث قالدی .

بو کره رسول اکرم ، مکهدن مدینهیه عودت ایتدکده بحیر ابن زهیر ،  
مدینه منورهیه کلدی واسلام ایله مشرف اولدی .

کعب ابن زهیر ، آنی ایشتدکده جانی صیقیلدی و برادرینه « نیچون  
بابا کک دیتسندن دوندک ؟ » دیو تویسیخ و تکدیر یوللو برقصدیه یاپوب  
کونده ردی .

بحیر ، او قصیده بی حضور نبویه اوقودی . رسول اکرم ، دلکیر  
اولدی « هرکیم ، کعب ابن زهیره راست کلورسه اولدورسون . دمی هدردر »  
دیو بیوردی .

بحیر دخی برادرینه نصیحتنامه قیلیقلور بمنظومه یاپوب کونده ردی و بیوک  
تهلکده اولدیغنی کندوسنه بیلدیردی .

کعب ، نصل مخاطره لی بر حالدہ اولدیغنی آن کلادی ویک زیاده تلاش ایلدی . همان مدینه منوره یه کلوب ابو بکر الصدیق رضی الله تعالی عنه حضرت تلرینک یاننه واردی .

حضرت صدیق دخی آنی آلوب مسجد شریفه کتوردی و « یارسول الله بر آدم بیعت ایده جک » دهرک حضور نبوی یه چیقاردی . آنک اوزرینه کعب دخی رسول اکرمک النی طوتدی ، بیعت ایتدی و دیز چوکوب اوتوردی .

« کعب ابن زهیر ، نائب و مسلم اوله رق استیمان ایچون حضور سعادتکزه کلمک ایستر . قبول ایدرمیسکیز ؟ » دیو صورتدی . رسول اکرم دخی « اوت » دیو جواب ویردی .

در حال کعب « یارسول الله ! کعب ابن زهیر بنم » دینجه انصاردن بری قالقوب « رخست ویر یارسول الله ! شونک بوینی اورایم » دیدکده رسول اکرم « آندن واز کچ . زیرا دین اسلامه میل ایله توبه ایدوب کلشدر » دیو بیوردی .

او وقت کعب دخی رسول اکرمه مدحیه اولق اوزره نظم ایتدیکی ( بَانتُ سَعَادٌ ) قصیده سنی اوقومغه باشلادی .

بو مدحیه ( قصیده بُرْدَه ) دنیلور . ( برده ) ایسه عربجه خرقة دیمکدر . او وجهله تسمیه سنه سبب بودرکه : کعب ، آنی اوقورکن رسول اکرم ، غایت محظوظ اوله رق صرتندن خرقة شریفه سنی چیق-اروب کعبه کیدردی . کعب دخی آنی آلوب عمری اولدقجه او برکذار سعادت ایله افتخار ایلدی .

حتی صکره معاویه ابن ابی سفیان ، اون بیک درهم ووروب آنی آلمق ایستدکده حضرت کعب « بن ، رسول اللهک خرقة سنی کیمک ایچون کیمسه نی نفسه ترجیح ایده م » دیو رد ایتمشیدی . لکن کعبک وفاتنده معاویه ، آنک ورثه سنه یکرمی بیک درهم کونده روب او خرقة سعادتق آلمشدر .

ایشته آندن صکره ملوک و سلاطین بیننده خلفاً عن سلف تداول ایدن  
خرقه شریفه ، اشبو برده لطیفه در . بزینه صده کله لم .

( طئی ) قبیله سنک اولوسی اولان و علمده فوق العاده جود و سخا ایله  
شهرت بولان ( حاتم طائی ) نك محله سنده طئی قبیله سنک بر بتخانه سی اولوب  
آنده ( فلس ) نامنده بر بت وار ایدی .

کچن سکز سنه هجریه سنده ( حاتم طائی ) دنیادن کوچدی ویرینه  
اوغلی ( عدی ابن حاتم ) کچدی . او دخی پدری کبی مشهور بر ذات  
ایدی .

لکن اطراف و جوارده کی بتخانه لر ، یقیلوب بتلر قیریلقدده ایکن بتخانه  
طائینک حالی اوزره قالمسی جائز و روا دکل ایدی .

بناء علیه رسول اکرم ، آنی هدم ایتک اوزره اشبو طقوزسنه هجریه سی  
ربیع الآخرنده علی کرم الله وجهه حضرتلرینی بر فرقه عسکریه ایله او  
طرفه کوندردی .

حضرت علی دخی بر کون صباحلین ایرکندن حاتم طائی محله سنه واردی  
وهان او بتخانه یی ییقدی و فلسی قیردی .

عدی ابن حاتم ، شام طرفنه قاچدی . لکن قیز قرنداشی ( سفانه بنت  
حاتم ) اله کچدی .

حضرت علی ، بر چوق اسیر و اموال غنائم آلوب سفانه ایله برابر  
مدینه منوره یه کتوردی .

رسول اکرم ، سفانه یی آزاد ایدوب برادری عدی ابن حاتمک یاننه  
کونده ردی .

آنک اوزرینه عدی ابن حاتم ، مدینه منوره یه کلدی و اسلام ایله مشرف  
اولدی .

ایشته کبار اصحاب کرامدن اولان ( عدی ابن حاتم ) رضی الله تعالی عنه  
حضرتلری ، بو ذاتدر .





## غزوة تبوك

قیصر رومك امریله شامده اهل اسلام علیهنه بر بیوك اردو ترتیب اولمش و (جُذَام) و (لَحْم) و (غُصَان) قبیلهلری دخی روم عسکريله برلکده حرکت ایدمك ایش دیو ایشیدیلدی .

آنك اوزرینه رسول اکرم دخی دیار شامه کیتمك و روما دولتیله جنك ایتمك اوزره مدینه منورهده بر بیوك اردو جمع و ترتیبه مباشرت بیوردی .

مکهدن، سائر قبائل عربدن عسکر جلب ایتمك اوزره هر طرفه مخصوصاً مأمورلر کوندردی وایام قحط و غلا اولدیغندن ذی قدرت اولانلرك عسکره اعانه ایتلرینی امر ایتدی .

بناءً علیه قدرتی اولانلر، قدرتسزلره پك چوق اعانه ایلدیلر . حتی اهل اسلام خاتونلری، حلیاتلرینی عسکره هدیه ایتدیلر .

ابوبکر الصّدیق رضی الله تعالی عنه حضرتلری، جمیع اموالنی بواوغورده بذل و صرف ایلدی .

عثمان ذی النورین رضی الله تعالی عنه حضرتلری، اعانه عسکریه اوله رق اوچیز دهوه یوکی ذخیره و نقداً بیک آلتون ویردی .

ایشته آنك اوزرینه رسول اکرم، حضرت عثمانه خاصه دعا ایتدی و کندوسندن صدور ایش و ایدمك بالجمله تقصیراتنك معفو اولدیغنی تبشیر بیوردی .

رسول اکرم، اوتة دنبر بر سمتة سفر ایدمك اولدقده بشقه طرفه کیدمك کبی کوسترش ایتمك معتاد شریفلری ایکن بو دفعه هوالر صیجاق



و هر یزقوراق و دشمن قوی و کیدیه جک یر، اوزاق اولدیغندن هر کس، آکا کوره تدارک کورمک ایچون کیدیه جک سمت و محلی بیلدیردی .  
 گروه منافقین « بویه صیجاق و قتلرده یوله چیقیمیگز » دیو خلقه صیحت یولنده فساده سعی ایدرلردی . آنلره جواباً « جهنمک حرارتی ده اشدتلودر » دیو بیوریلدی .

رئیس المنافقین اولان ( عبدالله ابن ابی سلول ) « روما دولتی محمد ، اوینجا قی صانیور؟ آنک اصحابیله برابر طوتولوب اسیر اولاجقلرینی کوزله کورمش کبی بیلورم » دهرک ناسه خوف و دهشت ویرردی .  
 اعتقادی بتون اولانلر ایسه رسول اکرمک امرینه مطیع و جهاد و غزایه غایت ایستکلو اوله رق کمال سرعت ایله سفره حاضرلارلردی و بعضیلری زاد و ذخیره لرینی یوکلده جک دهوم بولامادقلرندن پک زیاده محزون و متأسف اوله رق آغلارلردی .

بدناً ، یاخود مالاً سفره اقتداری اولمایانلره دیه جک اولیوب آنلر ، حقیقه معذور اولدقلری جهتله کیرو قالدیلر .  
 عرباندن بعضیلری دخی حقیقه معذور اولمادقلری حالدیه بر طاقم اعداز واهیه سرد ایده رک سفره کیتمه مک اوزره رخصت آلدیلر .  
 لکن هر طرفدن کمال شوق و غیرت ایله فوج فوج آقوب کلن عساکر اسلامییه حد کفایه ایریشدی .

نام علیه رسول اکرم ، اولاد و عیالنه باقق ایچون علی کرم الله وجهه حضرتلرینی و امور مملکتی رؤیت ایچون ( محمد ابن مسلمه ) رضی الله تعالی عنه حضرتلرینی مدینه ده براقدی .

هجرتک اشبو طقوزنجی سنه سی رجبنده پنجشنبه کونی خاتم الانبیا حضرتلری ، اردوی هایون ایله مدینه دن چیقدی .

عبدالله ابن ابی سلول ، منافقیندن بر گروه ایله برلکده بلا عذر سفردن کیرو قلوب آچیقدن آچیغه رسول اکرمک امرینه مخالفت آلدیلر .



صحیح الاعتقاد اولان اهل اسلامدن بعضیلری دخی کذلک بر کونه  
عذرلری اولمדיنی حالدہ زحمت و مشقتدن قاجوب سفردن کیر و قالدیلر .  
اردوی هایون ایله کیدنلر ، فی الواقع صیجاقدن و صوسزلقدن پک زیاده  
کوچلک چکدیلر . لکن بیوک اجر و ثوابه نائل اولدیلر .  
رسول اکرم ایله برلکده کیدن عسا کرک مقداری اوتوز بیك نفردن  
زیاده اولوب اون بیکی آتلو ایدی .

آنانی راهده رسول اکرمک دده و هسی غائب اولدی منافقیندن ( زید  
ابن اللصیت ) « محمد ، پیغمبرم دیر و کوکلردن خبر ویریر . حال بوکه  
دده و سنک نرهدده اولدینغی بیلمز » دیمش .

او وقت رسول اکرم دخی « بر شخص ، بنم حقمده شویله ، بویله  
دیور » دهرک آنک بوسوزلرینی اصحابنه حکایه ایلدی و « بن ، والله برشی  
بیلزم . الا جناب حقک بیلدیردیکنی بیلیم . شمدی جناب حق ، بکه  
بیلدیردی که دده و ، فلان وادیده ، فلان یرده یولاری بر آغاجک دالنه ایلدیشوب  
قالمش . کیدک ، کتورک » دیو سویلیدی . هان اورایه واردیلر و دده و  
او حالدہ بولوب کتوردیلر .

بعده رسول اکرم اردوی هایون ایله ( تبوک ) نام مرحله یه واردی  
مدینه دن دمشق شامه کیدرکن یاری یولدر .

اوراده اردوی هایون ، بر صو باشنه قوندی که غایت آز آقوردی  
بویله بر بیوک اردونک اداره سنه کافی دکل ایدی .

رسول اکرم ، آندن آبدست آلدی . هان معجزه محمدیه اولهر  
صو ، اوقدر چوغالدی که بتون اردونک اداره سنه کافی اولدی .

اردوی هایون ، تبوک مرحله سنده اقامت ایله مهابتی اطرافی بورومنه  
اولدینی حالدہ کرک عسا کر رومیهدن و کرک قیصره تابع اولان عرباند  
بر حرکت کورولمادی . بو جهتله محاربه وقوع بولمادی .

لکن اردوی هایونک شام حدودینه قدر کلوبده روما دولته مید  
اوقوماسی هر طرفه دهشت ویردی .

بناءً علیه (عَقَبَةُ مَصْرِيَه) جوارنده و دگز کنارنده (أَيْلَه) نام بلده نك  
حکمداری اولان (يُوحَنَّا) کلوب اوچیوز آلتون جزیه ویرمک اوزره  
عهد و امان دیله دی . رسول اکرم دخی آکا او وجهله بر قطعه عهدنامه  
عطا ایلدی .

بلاد شامدن (جَرِبَا) و (أَذْرَح) نام بلده لرکه ایکیسنک آرده سی اوچ  
میل مسافه دن عبارتدر . آنلرک اهالیسی دخی سنوی یوز آلتون جزیه  
ویرمک اوزره عهد و امان ایستدیلر . رسول اکرم ، آنلره دخی اووجهله  
بر قطعه عهدنامه ویردی .

ینه او ائنده رسول اکرم ، درت یوز اللی آتلو ایله سیف الله ( خالد  
ابن ولید ) رضی الله تعالی عنه حضرتلرینی (دُومَةُ الْجَنْدَل) بلده سنک  
حکمداری اولان ونصارا دیننده بولنان (أَكْبِذَر ابن عبد الملك) اوزرینه  
کونده ردی .

سیف الله اورایه کیتدی ، اکیدری خارج قلعه ده خواص اتباعیله کررکن  
طوتدی و آلوب اردوی هایونه کتوردی .  
اکیدر ، دخی جزیه اعطاسنی تعهد ایتمکه رسول اکرم آنی اوشرطله  
صالیویردی .

رسول اکرم ، یکرمی کون قدر تبوک موقعنده طوردی و اصحاب  
کرامیله مشورت ایدوب ده ایلرو کیدیلک ایچون آنلرک رأینی  
صوردی .

عمر الفاروق ، رضی الله تعالی عنه حضرتلری «ا کر طرف باریدن  
مأمور ایسه ک بیوروک کیده لم» دیدی .  
حضرت پیغمبر «ا کر طرف باریدن مأمور اولسه یدم سزک رأیکزی  
صورمادم» دیو بیوردی .

آنک اوزرینه حضرت عمر «یا رسول الله ! دیار شامده قوت و جمعیتلر  
چوق . اهل اسلام هیچ یوق . حال بوکه : سزک بومرتبه یا قلا شما گز» آنلره

خوف و دهشت و پردی . بوسنه بو قدر جقله ا کتفا ایدلمده باقالم ایلروده جناب حق نه کوستر « دیدی .

برده شامده طاعون اولدینی ایشیدیلدی . رسول اکرم دخی « طاعون اولان بلده کیرمه یکنز « دیو بیوردی .

بناءً علی ذلک ، تبوکدن ایلری کیدیله یوب همان اورادن مدینه یه عودت بیورولدی .

رسول اکرمک ده وه سنی ( عمار ابن یاسر ) رضی الله تعالی عنه حضرتلری یه در ، ( حذیفه ابن یمان ) رضی الله تعالی عنه حضرتلری کیرودن سوره رایدی .

کیجه لین ( عقبه ) دن کچرکن بغته اوزرینه هجوم ایله سوء قصد ایتمک اوزره منافقیندن اون ایکی ملعون ، بینلرنده کیزلو اتفاق ایدرک حضرت پیغمبرک کچه جکی یرده طوروب فرصت کوزه دیرلرمش .

آنلرک بو سوء قصدی ایسه رسول اکرمه وحی ایله بیلدیریلش اولدیغندن احتیاطلی بولوب قارشودن او ملعونلرک قارالتیسنی کوردیکی کبی حضرت حذیفه امر ایدرک آنلری طرد و دفع ایتدیردی و منافق اولدقلرینی و سوء قصد ایله کلدکلرینی حذیفه یه خبر ویردی .

فرداسی ( اسید ابن حنبل ) رضی الله تعالی عنه حضرتلری ، بووقعه دن خبردار اولنجه اردوی هایونده نه قدر منافق وار ایسه اعدام ایتدیرمک ایستدی .

لکن رسول اکرم ، آکاراضی اولدی و « مادام که لسانلریله کلمه شهادت کتوریورلر . آنلره تعرض اولنق جائز اولماز « دیو بیوردی . رسول اکرم ، هپ منافقلری بیلوردی . لکن اعلان ایتزدی . فقط ضرب حذیفه یه سویلردی .

بناءً علی ذلک حضرت حذیفه دخی هپ منافقلری طانوردی . لکن یومثللو اسراری کیزلردی .

چونکه: حذیفه ، رسول اکرمک محرم اسراری ایدی . حتی دیرلرکه:

دنیاده نه قدر اولمش واولاجق شیر وار ایسه ، رسول اکرم ، آکا بیان ایلردی .

بعده ، ینه اثنای راهده رسول اکرمه طرف الهیدن (مسجد ضرار) ک کیفیتی بیلدیریلدی .

شویله که : رسول اکرم ، تبوک غزاسنه چیقمادن بر طاقم منافقلا ، مسجد قبانک جماعتی آیرتمق غرضیله جوارنده بر مسجد یامنی قورمشلا و معهود ابو عامر فاسق ، آنلره « سز اوילה بر مسجد یاپیکز وایچنه ممکن اولدینی قدر اسلحه قوییکز . بنده قیصر رومه کیدیورم . سزه کلیتلا روم عسکری کتوریرم و محمد ایله اصحابی دیار مدینه دن چیقاریرم ، دیوب جانب شامه کیتمکه آنلر دخی اوילה بر مسجد یامشلا و ابو عامرک وعدینه منتظر اولوب طورمشلا .

ایشته آکا (مسجد ضرار) دنیلورکه تبوکدن عودت ایله مدینه یه کلورکن رسول اکرمه طرف الهیدن اومسجدک اوילה غرض فاسداوزرینه بنا اولدینی بیلدیریلدی .

رسول اکرم دخی ، هان ( مالک ابن دَخْشَم ) ایله ( معن ابن عدی العجلانی ) رضی الله تعالی عنهما حضرتلرینی کونده رمکه واروب اومسجد ضراری هدم ایلدیلر .


بعده رسول اکرم ، خلال رمضان شریفده سالماً مدینه یه وصول بولدی .

او وقت بو سفر هایوندن بلا عذر کیرو قالمش اولانلر ، پک چوق پشیمان اولدی .

حتی ایچلرندن ( أَبُولْبَابَه ) کبی بعضیلری ، دییه جک سوز بولامیوب کندو کندولرینی مسجد شریفک دیرکلرینه باغلادیلر و کیجه کوندوز آغلادیلر و اوچ نفری یعنی ( کعب ابن مالک ) و ( مراده ابن الربیع ) و ( هلال ابن امیه ) حضور نبوی یه کلوب عفو دیله دیلر .

رسول اکرم ایسه ، خلق آنرا له اختلاط و مصاحبیدن منع ایتمکه  
اوچی دخی برر کوشه یه چکیلدیلر واللی کون خلق ایله الفتدن محروم  
قالدیلر .

بوجهتله دنیا باشلرینه زندان اولدی . بعده جناب حق طرفدن جمله سنک  
توبه لری قبول بیورولدی و صوچلری عفو ایدیلدی .  
بو غزاده ، صیت سطوت اسلامیه ، دیار شامه کرکی کبی یاییلدی  
و صادق و کاذب سچیلدی . هله کروه منافقین ، بوتون بوتون رسوای  
اولدی .





## اهل طائفك اسلامي

مكه نك فتحندن صكره رسول اكرم، مدينه يه كلوركن (ثقيف) قيله سنك رئيسي (عروة ابن مسعود الثقفي) كلوب اثنای راهده ايرشدي ورسول اكرم ايله كوروشدي .

اسلام ايله مشرف اوله رق دونوب طائفه كيتدي وقومني دين اسلامه دعوت ايتدي .

ثقيف قيله سنك برطاقم اراذل واسافلي ايسه رئيسلري اولان و بين العرب غايت معتبر ذواتدن بولنان اشبو (عروة ابن مسعود) ي اوقه طوتديلر وبيچاره يي اوق ايله اوروب شهيد ايتديلر .

رسول اكرم ، ايسه (هوازن) قيله سي رئيسي اولان (مالك ابن عوف نصري) يه ثقيف قيله سني تضيق ايچون امر و ير مشيدي .

بوجهتله (مالك ابن عوف نصري) ، فرصت بولدقجه ثقيف قيله سني اوروب يغمايدر اولديغندن ثقيف قيله سي ، طائفدن طيشارو چيقاميوب قلعه ده محصور كي بر حالده قالديلر وهوازن ، خلقنك تجاوزاتندن عاجز اولديلر . بو صورتله ثقيف قيله سي ، طائفده كفر و ضلالت اوزره ياشايامايه جقلريني آكلاديلر وهمان رسول اكرمك تبوك غزاسندن عودتنده ثقيف قيله سنك وجوه و اشرافي مدينه منوره يه كلوب عرض اطاعت ايلديلر . فقط نمازدن عفو اولمالريني ديله ديلر .

حضرت پيغمبر ايسه « بر دينده كه نماز اولمايه . آنده خير يوقدر ، ديو بيوردي .

برده رؤساي ثقيف ، اوتهدنبرو طايدقلى (لات) نام بتك اوچ سنه



قدر حالی اوزره بر اقیلمسنی ایسته دیلر . رسول اکرم ، قبول ایتدیکندن باری بر آی قدر بر اقیلمسنی نیاز ایلدیلر .

رسول اکرم ، آنی دخی قبول ایتدیکندن نهایت قیفلور ، هر تکلیفی قبول ایدرک یولیه ایمانه کلدیلر .

آنک اوزرینه رسول اکرم ( لات ) نام بی ییقمق ایچون ( ابوسفیان ابن حرب ) ایله ( مغیره ابن شعبه الثقفی ) بی طائفه کونده رمکله آنلر دخی واروب بی کسر و احما ایتدیلر .

غریبدرکه آنلر ، او بی کسر وهدم ایدرکن ثقیف قبیله سنک قاریلری چیقوب آ کا تحسّر آغلار ایدیلر . لکن صکره جمله سی خالص مسلمان اولوب لاتک آدینی بیله اونوتدیلر .

او ائنده ( سعد ابن ابی بکر ) قبیله سی طرفندن دخی ( ضام ابن ثعلبه ) کلدی . حضور نبوی یه کیردی ، مسلمان اولدی ، شروط اسلامی اوکره ندی و دونوب قبیله سنه واردی . قومنه ابتدا کی سوزی بو اولمش که « لات و عزّی نه فنا شیرلر ایش « دیمش . قومی « صوص یا ضام ! سکا جنون و برص و جذام کی بر علت کلسون . صاقین « دیمش . ضام رضی الله تعالی عنه ایسه « یازیق سزه ! لات و عزّی فائده و ضرر ویره مز . حال بوکه الله تعالی حضرتلری ، سزه پیغمبر کونده ردی و آ کا کتاب ایندیردی . ناسی ضالالتدن قورتاردی « دهرک اسلامنی میدان قویمش و قومنه خالصانه نصیحت ویرمش . آنلر دخی آنک نصیحتنی طوتمش و همان جمله سی ایمان ایتمش . شویله که : او کون آقشامه قدر ( بنی سعد ) قبیله سنده ذکور و انائدن ایمانه کلدک کیمسه قالمامشدر .

### سال حالک تتمه و قایمی

رسول اکرم خلال رجب شریفده بر کون نجاشینک ، یعنی حبش حکمداری اولان ( احممه ) نک وفاتی خبر ویردی و اصحاب کرامیه برلکده

آنک جنازه نمازی قیلدی . فی الواقع او کون نجاشینک وفات ایلمش اولدینی صکره دن معلوم اولدی .

شعبان معظمده رسول اکرمک کریمه سی و عثمان ذی النورینک زوجة محترمه سی ( ام کلثوم ) رضی الله تعالی عنها حضرتلری ، عالم فنادن کوچوب دار بقایه کیتدی .

شوال آینده دخی رئیس المنافقین اولان ( عبدالله ابن ابی ابن سلول ) فوت اولدی .

اوغلی ( عبدالله ) رضی الله تعالی عنه حضرتلری ، پدرینک جسمنی جهنم آتشدن محافظه ایچون حضرت پیغمبرک کوملکنی آلدی و پدرینی آکا صاروب دفن ایتدی . رسول اکرم دخی دعا واستغفار ایتک اوزره قبرینه کیتدی . حضرت عمر الفاروق ایسه باشی اوجنده طوروب « یا رسول الله ! آنک ایچون دعا واستغفار ایدم جکمیسین ؟ او ، فلان کون شویله دیدی ، فلان کون بویله دیدی » دهرک آنک ایام سیئاتی تعداد ایدردی . همان وحی الہی کلدی . « او یله کفر اوزرینه فوت اولوب کیدنلردن بریسی ایچون دعا واستغفار اتمه و قبرینه کیتمه » دیو نهی بیورولدی .

اشبو عبدالله ابن ابی ، اهل اسلام حقده بر بیوک بلیه ایدی . وفاتیلہ اهل اسلام ، آنک شر و فسادندن قورتولدی و آنک وفاتی اوزرینه بیک قدر منافق ، خلوص قلب ایله مسلمان اولدی .

بوسنه حج موسمی کلدکده رسول اکرم ، یارغاری ابوبکر الصديق کرم الله وجهه حضرتلرینی ، امیر موسم حج نصب ایدهرک اوچوز کیشی ایله مکه معظمه یه کونده ردی .

بعده حجاجه ( برامة ) سورہ سنی تلاوت ایتک و بوسنه دن صکره مشرکر ، مسجد حرامه یا قلاشماق و چیللاق اوله رق کیمسه بیت الہی طواف ایتمه مک کبی خصوصاتی ناسه تبلیغ ایلک اوزره علی کرم الله وجهه حضرتلرینی دخی مأموریت مخصوصه ایله آرقه دن ارسال بیوردی .

مکه مکرمه یه واردقلرنده موقفلرده خطبه لرلی حضرت ابوبکر الصديق

او قودی وناسه مناسک حجی او کره تدی. اهل اسلام، او وجهله حج ایتدی. کفار دخی زمان جاهلیته کی عادتلی اوزره حج ایلدیلر.

حضرت علی ایسه ناسه (براءة) سوره سنی او قودی و یوم الفحاده «بو سنه دن صکره مشرکله، حج ایتسون و چیللاق کیمسه بیت اللهی طواف ایتسون. رسول الله ایله عهدی اولانلرک مدت معینه لرینه قدر عهد لرینه رعایت اولنه جقدر» دیو ندا ایتدی.


مشرکله، بربرینه لوم ایتمهک باشلادیلر «ایشته قریش مسلمان اولدی. سز نه یابه جقسکز؟» دیدیلر ونهایت آنلر دخی ایمان ایلدیلر.

چونکه قریش طائفه سی، اسماعیل ابن ابراهیم علیهما السلامک ذریت خالصه سی و حرم شریفک اهل یسوی اولوب سائر قبائل عرب، هیچ بروقتده آنلرک فضل و شرفی آنکار ایتزلردی.

رسول اکرمه اعلان حرب ایدن آنجق قریش قومی اولوب قبائل سائر، آنلرک نتیجه احواله منتظر ایلدیلر.

مکه فتح اولنوب ده قریش طائفه سی دخی ایمانه کلنجه مهابت اسلامیه هر طرفی قایلادی و قبائل عربدن پیدرپی ایلجیلر و مبعوثلر کلوب کیتمهک باشلادی.

هر نه وقت بر ایلچی کلسه رسول اکرم، البسه سننک اعلاسنی کیر و ایلچی به کمال مرتبه مدارا و اکرام ایلر و هر کسک حال و شاننه و هر قبیله نک عرف و اصطلاحنه کوره سوز سویلر ایدی.





## هجرة تك اونجی سنه سی

سنه جدیده تك دخواستندن صكره دخی مدینه منوره یه ایلچیلر و مبعوثلر  
كلوب كیتمكدن خالی اولدی .

از جمله دیار بحرینده متوطن ( عبدالقیس ) دنیلن قبیله عظیمه دن  
اون آلتی کیشی کلدی که مشهور ( جارود ) نام قسیس نصرانی دخی برابر  
ایدی . جمله سی حضور نبویه اسلام ایله مشرف اولدیلر .

بنی عامر قبیله سندن اولان ( بنی مُتَفِق ) ك مبعوثلری دخی كلوب  
حضور نبوی یه کیردیلر . التفات کوردیلر رسول اکرم ، آنلره ال ویردی .  
آنلر دخی رسول اکرمك مبارك الی طوتدیلر ، بیعت ایتدیلر . بعده دونوب  
شرف اسلام ایله مشرف اولدقلری حالده قبیله لرینه کیتدیلر .

رسول اکرم ، دیار یمنده دین اسلامی تلقین ایچون ( ابو موسی الاشعری )  
رضی الله تعالی عنه حضرتلرینی ( زبید ) و ( عدن ) طرفلرینه و ( معاذ  
ابن جبل ) رضی الله تعالی عنه حضرتلرینی یمنك بر قطعه بالاسی اولان  
( جند ) الكاسنه کونده ردی . ایکیسی دخی کیدوب یمنك بر طرفده  
ناسه احکام شرعی یی اوکرتدیلر و دین اسلامی نشر ایتدیلر .

بو ائنده رسول اکرم ، طرف طرف امیرلر و والیلر نصب وارسال  
ایلدیکی صره ده ( زیاد ابن لیید الانصاری ) رضی الله تعالی عنه حضرتلرینی  
دخی ( حضرت موت ) والیسی نصب ایله او طرفه ارسال بیوردی .

ینه بو ائنده ( قبائل آزد ) ك بر بطنی اولان ( غامد ) قبیله سندن اون  
کیشی كلوب مسلم اولدقلرینی عرض و افاده ایتدیلر . رسول اکرم ، آنلره

دخی (ابی ابن کعب) رضی الله تعالی عنه حضرت لرینی امیر نصب و تعیین بیوردی و آنلره برابر غامده کوندردی .

(أَزْدِشْنُوهُ) قبیله سندن دخی اوئانده برکروه کلوب مسلمان اولدقلرینی

عرض ایتدیلر . رئیس لری (صُرْدُ ابن عبدالله الازدی) ایدی . رسول اکرم، آنی کندی مملکتنه والی ایدوب کونده ردی و دیار یمنده کی مشرکار اوزرینه غزا ایتسنی امر و تنبیه بیوردی . او دخی یمنده (جُرش) نام بلده اهالیسی اوزرینه کیتدی . آنلر دخی جنکه قیام ایتدی . لکن اهل اسلام ، غالب کلدی و جرش اهالیسندن پک چوق کسان تلف اولدی .

او ائانده جرش اهالیسندن دخی مدینه منوره یه ایکی کیشی کلشیدی . حضور نبوی یه کیردکلرنده رسول اکرم، آنلره قبیله لرینک بوغازلامقده اولدقلرینی خبر ویردی . دونوب مملکت لرینه کیتدکلرنده فی الواقع اوکون جرش اهالیسنک قیریلش اولدقلرینی اوکره ندیلر و کیفیتی قوم و قبیله لرینه خبر ویردیلر . آنک اوزرینه جرش اهالیسندن بر چوق کیمسه لر ، مدینه منوره یه کلدیلر و اسلام ایله مشرف اولدیلر .

ینه او ائانده یمنده واقع (نَجْرَان) ناحیه سی نصاراسنک رئیس لری بر خیلی آدم لر یله مدینه منوره یه کلدیلر . سنوی معلوم المقدار جزیه و یرمک اوزره تعهد ایلدیلر و جزیه لرینی آلوب کتورمک اوزره بر امین آدم ایسته دیلر . رسول اکرم « قالح یا اباعبیده ! » دیدی . ابو عبیده ابن الجراح رضی الله تعالی عنه حضرت لری ، آیاغه قالدی . رسول اکرم « ایشته بو امتک امینی ، بودر » دیو بیوردی و ابو عبیده ، آنلره برابر نجرانه کیدرک جزیه لرینی آلوب کتوردی .

برکون رسول اکرم ، اصحاب کرام یله اوتوروب مصاحبت ایدرکن « سزه شو طرفدن بر خیر لو کیشی کلیور که یوزنده ملک نشانه می واردر ، دیو بیوردی .

آره سی چوق کچم یوب (بَجِیْلَه) طائفه سندن (جریر ابن عبدالله

البجلی) یوز الی کیشی ایله حقیقه کلدی .



بجیله یمنده ( مَعَدَّ ) قبیله سندن بر جماعتدر . جریر ، بو جماعتدن  
واشراف یمندن ، ملک کبی کوزل ویوزی نورانی بر ذات ایدی . بو دفعه  
یوز الی آدمیله برلکده ایمانه کلدی وخواص اصحاب کرامدن اولدی .  
فخر عالم حضرتلری ، آکا احکام شرعییه اوکره تدی . بعده آنی  
یمنده ( ذوالخلصه ) نام بتخانه نک هدم و تخریینه مأمور ایتدی .

شویله که ( بجیله ) و ( خَشَم ) قبیله لرینک ( ذوالخلصه ) نامنده بر  
بر بتخانه سی وار ایدی . آنی زیارت قصدیه اطرافدن پک چوق خلق  
کلوب کیدردی . عربستانده او مثللو علائم کفریه هپ محو ایدیلشیکن  
یمنده او بتخانه نک حالی اوزره قلمسی روا اولمدیغندن رسول اکرم آنی  
هدم ایتک اوزره جریر بجلی حضرتلری او طرفه کوندردی .

حضرت جریر دخی یوز الی نفر کزیده آتلو ایله واروب او بتخانه یی  
ییقدی وایچنده کی بتی قیردی . بعده دونوب مدینه منوره یه کلدی .

مؤخرآ رسول اکرم ، اشبو جریر بجلی یی امراء یمندن ( ذوالکلاع )  
ایله ( ذوعمر و حمیری ) یه کونده ردی . اودخی واروب آنلری دین اسلامه  
دعوت ایتدی . ایکیسی دخی ایمانه کلدیله . حتی ذوالکلاع ، کندوسنک  
زمان جاهلبددکی کناهلرینه کفارت اولق اوزره درت بیک قول آزاد  
ایشدر .

دیگر قبائل یمنده دخی بر چوق کیمسه لر منوال مشروح اوزره  
پیدر پی کلوب کیتدکلری صرده قبائل یمندن ( عَنَس ) قبیله سی شیخی  
اولوب ( اسود عَنَسی ) دیومعروف اولان ( عبهلة ابن کعب ) دخی کلوب  
ایمان ایتدی و دونوب یمنه کیتدی . زیرده بیان اولنه جخی وجهله یمنه عودتنده  
مرتد اوله رق نبوت دعواسنه قیام ایتشدر .

او اثناده دیار نجددن دخی پیدر پی بر چوق خلق کلوب اسلام ایله  
مشرّف اولدقلری صرده اهل یمامه اولان ( بنی حنیفه ) دن بر گروه  
کلوب اسلام ایله مشرّف اولدیله که مشهور ( مُسَلِمَةُ الْکَذَّاب ) دخی آنرله



برابر ایدی . یمامیه عودتنده اودخی مرتد اولارق نبوت دعواسنه قیام ایشدر .

ینه بوصرده بنی اسد قبیله سنک شیخی اولان ( طلیحة ابن خویلد ) کلوب اسلام ایله مشرف اولمشدرکه فرط شجاعت ایله معروف بر آدم ایدی . اودخی صکره مرتد اوله رق نبوت دعواسنه چیقمشدر .  
خلال ربیع الاولده خالد ابن الولید رضی الله تعالی عنه حضرتلری ، بر فرقه عسکریه ایله نجران طرفنه کونده ریئشدی . مؤخرآ علی کرم الله وجهه حضرتلری دخی اوچیوز آتلو ایله او طرفه کیتدی و خلق دین اسلامه دعوت ایتدی .

یمن اهاالینک اکثری ، حضرت علینک دعوتنه اجابت ایدوب حتی یمنده کی ( همدان ) اهاالسی کافه بر کونده ایمان ایشدر . سائر قبائل یمن دخی گروه گروه کلوب ایمان ایتمه باشلامشدر .  
بوکا دائر حضرت علینک مکتوبی کلدکده رسول اکرم ، آشوری مرتبه بمنون اوله رق جناب حقک لطفنه تشکراً سجدهیه واردی و حضرت علینک آرتق عودت ایلسی ایچون خیر کونده ردی .

یمنده معاذ ابن جبل رضی الله تعالی عنه حضرتلری واسطه سیله ایمانه کلش اولان ( نَحْمَ ) قبیله سندن ( زرارۀ ابن عمرو ) دخی مؤخرآ ایکیوز کیشی ایله مدینه منورهیه کلوب مسافر خانهیه ایندیریشدر .

مسافر خانه ( عفرا ) خاتونک اوغلی ( معاذ ) رضی الله تعالی عنهما حضرتلرینک زوجه می و ( حارث نجاری ) نک قیزی اولان ( رملۀ ) خاتونک خانه سیدرکه رسول اکرمه کلن ایلچیلر و مرعی الحاطر مسافرلر ، اورایه ایندیریلور ایدی .

ایشته ( زرارۀ ) رضی الله تعالی عنه ایله آرقداشلری دخی اورایه قوندورلمش و حقارنده حرمت کامله اجرا بیورولمشدر .  
اشبو ( زرارۀ ) اثنای راهده غریب رؤیالر کورمش و رسول اکرم .

بیر ایتدیرمشدر . صوکره هپ عینله تعبیر بیورولدینی وجه اوزره ظهوره  
شدر .

الحاصل ، مکّه مکرمه نك فتحندن صکره قریش طائفه سی ، هپ  
اسلام ایله مشرف اولدی . بعده سائر قبیله لر دخی برر ، برر ایمانه  
دی .

عربستانده اهل اسلامه قارشو طور اچق طوائف وقبائل قالمادی . ناس ،  
رتق اوزاق ، یقین هر طرفدن فوج فوج کلوب ایمان ایتمه باشلادی .  
ایشته ، بونصرت ومظفریتلره دائر ( اذاجاء نصرالله والفتح ) سوره سی  
زل اولمشدرکه خلاصه معنای منینی « اودم که الله طرفندن نصرت  
فتوحات کله وکوره سین که ناس فوج فوج اللهم دینته داخل اولیورلر .  
ان ربکه حمد ایدرک تسبیح واستغفار ایت » دیمکدر .

بو ایسه خاتم الانبیا علیه اکمل التحایا حضرت تلرینک عمری آز قالمش  
لیدیغنه رمز و اشارت ایدی .

زیرا ، آنک بعثی ، دین اسلامی تأسیس ایتک حکمتنه مبنی ایدی .  
بن اسلام ، بو وجهله انتشاره باشلادقده او مقصد حصوله کیش ایدی .  
برده « ناسک فوج فوج اسلامه کلدیکنی کوردیککنده تسبیح  
استغفار ایت » دیمکدن « آرتق برو طرفه توجه ایت و آخرت سفرینه  
اضر اول ، معنای حیقار .

حق ، بو سوره شریفه تلاوت اولنورکن حضرت عباس رضی الله تعالی  
ه ، بونکته بی آ کلامش و آندن متأثر اولوب آغلامش .

رسول اکرم ، آنی کورمش و « نیچون آغلا یورسین ؟ » دیو صورمش .  
دخی « یارسول الله ! بو ، سزک عالم فانی یه وداع ایدوب کیمه گزه  
الت ایدیور » دیو جواب ویرمش . رسول اکرم دخی « اوت . دیدیکک کبی در »  
و بیورمش ایدی . ایشته ( حبیج وداع ) دخی اوئانده وقوع بولمشدر .





## حج وداع

مهرتک اشبو اونجی سنه سی خاتم الانبیا علیه اکمل التحایا حضرت تیرینک  
حج شریف نیتله مکّه مکرمه یه کیده جکی ناسه اعلان اولندی .

ناس دخی فخر عالم ایله برلکده حج ایتک اوزره اطراف واکنافتن  
فوج فوج مدینه منوره یه کلوب طویلا نغمه باشلادیلر .

ذی الحجه یه بش کون قاله رسول اکرم ، او یله نمازینی قیلدقدن صکره

اهل بیت و اصحاب کرامی ایله مدینه دن چیقوب ( ذُو الْحَلِیْفَه ) یه واردی .

کیجه اوراده قالدی . فرداسی احرامه کیردی و او یله نمازینی قیلدی .

بعده اورادن قالقوب قرق بیک حجاج ایله مکّه مکرمه یه عزیمت بیوردی .

ذی الحجه نك دردنجی بازار کونی علی الصبح او یله بر عظیم قافله حج

ایله مکّه یه واردی و ( بنی شیبّه ) قیوسندن حرم شریفه کیردی .

بیت شریفی کوردکده « یارب ! سن بو بیتک شرف و شان و مهابتی

زیاده قیل » دیدی . همان بیت اللهی طواف ایتدکدن صکره صفا اوزره

چیقدی . جناب خدایه حمد و ثنا و نیاز و دعا ایتدکدن صکره مرویه ایندی

و ، سعی ایتدی .

اوانتاده حضرت علی کرم الله وجهه ، یمندن عودت ایدرک بر قافله ایلا

مکّه مشرفه یه کلدی و رسول اکرم ایله کوروشدی .

دیگر طرفلردن دخی قافله به قافله پک چوق حجاج مسلمین کلدی و موس

حج شریفه ایریشدی .

حج موسمی شهر ( آذار ) یعنی مارت ایچنده کون ایله کیجه نك

متساوی اولدینی زمان ایدی و جمعه کونی عرفه اولوب خاتم المرسلین ، یوز  
 بوقدر بیک حجاج مسلمین ایله حج اکبر ایلدی .  
 اوکون رسول اکرم ، غایت مؤثر بر خطبه اوquدی و بو خطبه سنده  
 زمان جاهلیتدن قالمه قان دعوالرینی یساغ ایتدی و ایشله مش فائض دعوالرینی  
 قالدیردی .

بعده ، « ای ناس ! سزك قایلریکیز اوزرنده حق لریکیز واردر . اما  
 آنلرک دخی سزك اوزریکیزده حق لری واردر . آنلر سزك حقو قکیزه  
 رعایت ایتلیدر ، سزده آنلره حسن معامله ایتلیسکیز . مؤمنلر ، هپ بر برینک  
 قرنداشیدر . برکیمسه یه قرنداشنک مالی حلال اولماز . مکرکه حسن رضاسیله  
 ویرمش اوله . بن ، سزه لازم اولان احکام شرعیه یی تبلیغ ایتدم و سزه  
 ایکی شی بر اقدم که آنلره تمسک ایتدکجه هیچ بر وقت ضالانده قالماسکیز .  
 آنلری بری ، اللهم کتابی و دیکری پیغمبرینک سنتیدر ، دیو دهانچه احکام  
 دینییه یی بیان ایتدکن صکره « ای ناس ! تبلیغ ایتدمی ؟ » دیو صوردی .  
 و اصحاب کرام « اوت » دیمکله اوچ کیره « شاهد اول یارب ! » دیو  
 بیوردی .

غلبه لك پك زیاده اولوب هر کس رسول اکرمک سسنی ایشیده مدیکندن  
 ( ربیعة ابن امیة ابن خلف ) رضی الله تعالی عنه ، فخر عالم حضرتلرینک  
 خطبه سنی حضاره تبلیغ ایدردی .

ایکیندی وقتی کیش و حال بوکه او یله نمازی قیلینمـامش ایدی . بلال  
 رضی الله تعالی عنه حضرتلری ، اذان اوquدی و اقامت کتوردی . ابتدا  
 او یله نمازی قیلندی ، بعده حضرت بلال ، ینه اقامت کتوردی ، ایکیندی  
 نمازی قیلندی .

آقشام اوستی حضرت پیغمبر ، هنوز موقوفده ایکن « الیوم اکملت  
 لکم دینکم و اتممت علیکم نعمتی و رضیت لکم الاسلام دیناً » آیت کریمه سی  
 نازل اولدی .

معنای لطیفی « بو کون سزك دینکزی اکمال ایتدم و سزك اوزریکیزه

نعمتی تمام ایلدم و سزك ایچون دین اولمق اوزره اسلامی بکندم واختیار ایتدم « دیمکدر .

حال بوکه : حضرت پیغمبرك تبلیغنه مأمور اولدینی احکام دینیّه ، تمام اولنجه آنک دخی بو عالم فائیده ایشی بیتمش اولور .

هرنه وقت که بر ایش تمام اولدی دینلور ایسه بر نقصانه منتظر اولمق لازم کلور .

بناءً علیه بو آیت کریمه ، خاتم الانبیا حضرت تلرینک آرتق بو عالم فائیدن رحلت ورب العالمینه موصلت ایده چکنه اشارت ایتدی .

ابتدا ابوبکر رضی الله تعالی عنه حضرت تلری ، بو آیت کریمه یی ایشیتدیکی کبی ، اوشارتی آکلادی و رسول اکرمک وفات ایده چکی خبر ویریلور دیو آغلادی .

غروب شمسده فخر عالم حضرت تلری ( قُصُوا ) نام ده وه سنه بیندی و ( اسامه ) رضی الله تعالی عنه حضرت تلرینی ترکیسنه آلدی . عرفاتدن حرکت و کمال تمکین و وقار ایله ( مُزْدَلَفَه ) یه موصلت ایلدی .

آقشام نمازی قیلنمش اولمایوب یاتسی وقتی ایسه ایریشمش اولدیغندن رسول اکرم ، ابتدا آقشام نمازینی و آرقه سندن یاتسی نمازینی قیلدی .

فرداسی صباحلین ایرکندن صباح نمازینی قیلدقدن صکره ینه ده وه سنه بیندی . بو کره ترکیسنه ( فَضْل ابن عباس ) ی آلدی و ( مَنی ) یه کلدی .

مناسک حجّک اتمامنه قیام ایتدیکی صروده قربان کسیدی و تراش اولدی و کسیلن صاچلری ، اصحاب کرامنه یادکار اولمق اوزره برر ، ایکیشر طاغیتدی . آنلر دخی بو مبارک قیللری آلوب حرزجان ایتدی .

فخر عالمک بویله اصحابنه یادکار و یرمسی ایسه عمری آز قالدیغنه اشارت ایدی .

او ائنده « ای ناس ! مناسک حجّی بندن او کره نکیز . بیلمم اما ، بلکه بوندن صکره بنمله بوراده کوریشه مز سکیز » دیدی .



ینه مناده او قودینی خطبه سنده امتنه خطاباً « هر بریکزک قانی و مالی دیکرینه حرامدر . یوم قیامتده ربکزک حضورینه کله جکسکز . او دخی عملرکزدن صوراجق و عملرکزه کوره مجازات بیوراجق در . صاقین بندن صکره کفّار کبی فرقه فرقه اولوبده بربریکزک بویننه اورمایه سکزر . « ای ناس ! تبلیغ ایتدیمی ؟ » دیووردی و حصار « اوت » دیمزلیله رسول اکرم دخی « شاهد اول یارب ! » دیدکن صوکره « حاضر اولانلر ، غائب اولانلره تبلیغ ایلسون » دیو بیوردی و سوکیلو امتیه وداع ایتدی .  
بعده رسول اکرم ، مکیه کلدی . طواف وداع ایتدی و ابن عباس لندن زمزم ایچدی .

حج تمام اولدی . حجاج طاغیلدی . رسول اکرم دخی دار هجرتی اولان مدینه یه عودت بیوردی .

دونوب مدینه یه کلورکن عالم بقایه مدعو اولدینغی صحابه کزینه خبر ویردی . ذوالحلیفه یه کلدکده کیجه اوراده قالدی و فرداسی مدینه یه کیردی .

او ائساده فخر عالم حضرت تلرینک اوغلی ( حضرت ابراهیم ) دنیادن کوچوب دار عقبایه کیتدی . پدر اکرمی دلخون ایتدی .  
رسول اکرم آنک حقنده « اکر صاغ اولسه نبی اولماسی لازم کلوردی . سزک نبی کزدن صکره ایسه نبی یوقدر » دیدی .  
آنک وفاتی کونی ، کون طوتولدی . ناس دیدی که « حضرت ابراهیمک وفاتی ایچون طوتولدی » .

رسول اکرم ، آنلری ردایدوب « کون و آی ، جناب حقک وحدانیت وعظمتنه دلیل اولان ایکی آیتدر . آنلر ، هیچ برکیمسه نک حیات و مماتی ایچون طوتولماز » دیدی .

رسول اکرمک ( فاطمة الزهرا ) رضی الله تعالی عنها وارضاهای حضرتلرندن باشقه اولادی قالمادی .



آنك اوغوللری ( حسن ) و ( حسین ) رضی الله عنهما حضرتلرینی اوز اولادی کبی سوه ردی .

برده ( زید ابن حارثه ) رضی الله تعالی عنه حضرتلرینك اوغلی ( اسامه ) رضی الله تعالی عنه حضرتلرینی کندی اولادی مقامنده طوتاردی .

زید ابن حارثه ، رسول اکرمك آزادلولرندن اولوب آکا، آزادلولرندن ( امّ ایمن ) رضی الله تعالی عنها حضرتلرینی تزویج ایتمش واشبو اسامه ، آنلردن تولد ایلش ایدی .

هجرتك اشبو اونجی سنهسی خالانده ( مسیلمة الکذاب ) ( یمامه ) ده تبوت دعواسنه چیقیشدینی کبی ( اسودعسی ) دیو معروف اولان ( عبهله ابن کعب ) دخی یمنده بودعوایه قالدیشدی .

شویله که : اشبو عبهله ، حقه بازلقده ماهر و سوزی مؤثر بر ملعون کافر اولوب یمن اهالیسندن پك چوق کیمسهلری آلداتدی ونجران اهالیسی، آکا تبعیت ایتدی .

بعده عبهله ، صنعایه کیتدی واوراسنی دخی ضبط ایله دائرة فسادی بویوتدی .

بوجهتله یمنده کی مأمورین اسلامیه پریشانلق کلدی . حتی ( معاذ ابن جبل ) رضی الله تعالی عنه حضرتلری ، محمل مأموریتدن صاووشدی و ( مأرب ) بلده سنه واروب اوراده ( ابو موسی الاشعری ) رضی الله تعالی عنه حضرتلریله کوروشدی . ایکسی برلکده مأربدن چیقوب ( حضر موت ) کیتدیله .

رسول اکرم ، بو کیفیت و واقف اولنجه یمنده کی اهل اسلامه مأمور مخصوص کونده ردی و « هر نصل اولور ایسه اولسون عبهله نك حقندن کله سکیز » دیو بیوردی .

دیار نجدده اولان اهل اسلامك دخی ( مسیلمة الکذاب ) اوزرینه واروب حقندن کلملری ایچون امر ویردی و بو ایکی ملعونك قریباً تلف

اولا جقلری عالم معناده رسول اکرمه بیلدیرلمش اولدیغندن اودخی کیفیت  
اصحاب کرامنه بیلدیردی .

ینه او ائنده ( بنی اسد ) قبیله سی شیخی اولان ( طَلْحَةُ بْنُ خُوَيْلِدٍ )  
دخی دعوای نبوت ایتمکه رسول اکرم آنک اوزرینه دخی بر مقدار  
عسکر کوندردی .

### هجرتک اون برنجی سنه سی

نجدده ( مسیلمة الکذاب ) ک و یمنده ( اسود عسی ) نک اختلال  
چقارمالری اوزرینه ایکی طرف ایچون تدابیر لازمه ته تثبیت بیورولدی  
حالدده عربک الک بیوک تجارتی شام ایله اولدیغندن اهل اسلام ایچون اوطرفی  
آجق بک مهم برایش ایدی .

بناء علی ذلک خاتم الانبیا علیه اکمل التحایا حضرتلری ، صفرا یکرمی  
آلتیسنده شام شریف ملحقا تندن ( بلقا ) طرفنه کونده رمک اوزره بر  
اردو ترتیبنه باشلادی .

مقدما اوطرفده شهید اولان ( زید ابن حارثه ) رضی الله تعالی عنه  
حضرتلرینک اوغلی ( اسامه ) رضی الله تعالی عنه حضرتلرینی سر عسکر  
نصب ایله « بابا گئ شهید اولدینی یره کیت و دشمنلری آتله چیکنیت »  
دیو امر ایلدی .

برکون صکره خاتم الانبیا حضرتلری ، خسته اولدی لیکن امر جهاده  
اصلا سکتته کتورمه دی .

حتی ربیع الاوله برکون قاله خسته اولدینی خالد حضرت اسامه ته  
سنجاق و یروب اودخی سنجانی ( بَرِیدَةُ بْنُ الْحَصْبِیِّ الْاَسْلَمِیِّ ) رضی الله  
تعالی عنه حضرتلرینه ویردی و خارج مدینه ته چیقوب ( جُرف ) نام محله  
اوردوسنی قوردی .

( ابوبکر ) و ( عمر ) و ( سعد ) و ( سعید ) و ( ابو عیبه ) کبی کبار  
اصحاب کرام ، هپ سفره مأور اولدقلری جهتله تدارک کورمکده ایدیلر .

فخر عالم صلی الله تعالی علیه وسلم حضرتلری ، خسته لکله بیتاب اولدینی  
حالدہ بر طرفندن ( فضل ابن عباس ) ودیکر طرفندن ( علی ابن ابی طالب )  
رضی الله تعالی عنهما حضرتلری طوتارق منبره چیقوب اوطوردی .

جناب حقه حمد ایتدکدن صکره « ای ناس ! هر کیمک آرقه سنه  
اورمش ایسه ایشته آرقه م . کلسون اورسون ، تقاص اولسون وهر کیمک  
آلاجنی واریسه ایشته مالم . کلسون آلسون » دیو بویوردی .

بعده ، منبردن اینوب اولیه نمازینی قیلدی وینه منبره چیقوب اولدی  
سوزینی تکرارلادی .

بودفعه بر آدم ، کندوسندن اوچ درهم ادعا ایتمکه درحال آنی تأدیه  
ایتدی وبعده اصحاب احد ایچون دعا واستغفار ایلدی .

بو صروده مشرک لک جزیره العربدن چیقاریلارینی وکلوب کیدن  
ایلچیلره کندی زماننده نصل حرمت ورعایت اولنوردیسه یینه اولیه جه  
اکرام اولنمسنی توصیه ایتدی وینه بو صروده بیوردی که : « الله تعالی ،  
برقوانی ، دنیا ایله وصلت آلهیه سی بندنده مخیر قیلدی . قول دخی آنک  
وصلت وملاقاتی اختیار ایتدی » .

قول تعیری ، رسول اکرمک ذاتندن کنایه اولوب بو وجهله عالم عقبایه  
ارتحال ایده چکنی اشعار ایلدی .

ابوبکر الصدیق رضی الله تعالی عنه حضرتلری ، مراد نه اولدیغنی  
آکلادی و « نفسمز سکا فدا اولسون یار رسول الله ! » دهرک آغلادی .  
رسول اکرم ایسه آنک سوزینی کسیدیردی . اصحاب کرامنه نصیحت  
ووصیته باشلادی و ابوبکرکدن پک زیاده خوشنود اولدیغنی بیلیدیردی .  
حال بوکه مبارک کوزلرندن یاش آقیوردی .

بعده مسجد شریفه آچیلان قپولری قپاتدی . فقط ابوبکر قپوسنک  
آچیق براقلمسنی امر ایتدی و « سزی اللهه ایصارلادم » دهرک حجره  
سعادتیه کیتدی .

آندن صکره فخر عالمک خسته لکی مشته اولدی . انصار کرام ایسه

آندن مضطرب اولوب مسجد شریفك اطرافده پروانه کبی طولاشمغه باشلادیلر .

آنك اوزرینه حضرت عباس رضی الله تعالی عنه ، رسول اکرمک اوکنه دوشوب واوغلی ( فضل ) ایله ( علی ابن ابی طالب ) رضی الله تعالی عنهما برر قولتوغنه کیروب تکرار حضرتی مسجد شریفه کتوردیلر .

خاتم الانبیا حضرتلری منبره چیقدی وانصاره خطاباً : « ای ناس ! بنم ارتحالمی دوشونوب تلاش اییدیورمش سکمز . بر پیغمبر ، امتی ایچنده مؤبد قالدیمی که بنده سزك آرا کزده مؤبد قالدیم ؟ معلومکنز اولسون که بن حضرت حقه واصل اوله جغم و شرف وصلته جمله کزدن زیاده مستحقم . سزه نصیحتم اودرکه مهاجرین اولینه حرمت و رعایت ایده سکمز ، دیو بیوردی .

بعده : « ای مهاجرین ! سزله دخی وصیتم بودرکه : انصاره کوزل معامله ایده سکمز . آنلر ، سزه ایلیک ایتدیلر . سزی کندی مملکتلرینه کتوردیلر ، خانه لرنده باریندیردیلر ، کچیمه ده مضایقه لری وار ایکن سزلی نفس لری اوزرینه ترجیح ایله مالارینه اورتاق ایلدیلر . هر کیم ، انصار اوزرینه حاکم اولور ایسه آنلره رعایت ایلسون و ایچلرنده قصور ایدنلر اولورسه عفو ایله معامله ایتسون » دیو نصیحت و یردی و جمله یه خطاباً : « ای ناس ! علمده جریان ایدن ایشار ، قضا و قدر الهی یه منوط و معلقدر . وقتيله اولاجق ایشك تعجیلنده فائده یوقدر . جناب حق ، کیمسه نك تعجیلی ایله عجله ایلز . اللهمك قضا و قدرینه غلبه سوداسنده اولانلر ، مغلوب و مقهور اولور . طرف الهی یه خدعه ایتمك ایستیانلر ؛ آلدانور ، خائب و خاسر قالور . بن ، سزه شفقتلو و مرحمتلویم . سزلینه بکا قاووشاچسکمز . بولوشاچغمز یر ، حوض کوثر کناریدر . هر کیم ، کنار حوضده بنمله بولوشمق ایستر ایسه النی و دینلی مالایعیندن صاقینسون . ای ناس ! کناه و معصیت ، سبب تغیر نعمت اولور . اکر خلق ، یار و مطیع اولور ایسه امیر و آمرلی دخی اوילה اولور و اکر خلق ، فاجر اولور ایسه آنلرده او طور و حال اوزره اولورلر ، دیدی .

رسول اکرمؐ خسته لکی زیادہ لشد کده اهل بیتک اتفاقله (عایشہ) رضی اللہ تعالیٰ عنہا حضرت تدرینک حجرہ سنده یاتمانسہ قرار ویریلش اید و کندن بوکرہ دخی خاتم الانبیاؑ حضرت تدری، امتہ او وجهله وعظ ونصیحت ایتد کدن صکرہ منبردن اینوب ینہ (حضرت عایشہ) نک حجرہ سنہ کیتدی و دوشکنہ یاندی .

خسته لکی انناسنده دائما اذان او قوند قجه مسجد شریفہ چیقار و امام اولوب جماعت ایله نمازینی قیلار ایدی . فقط وفاتنه اوچ کون قاله خسته لکی آغرا لشدی و آرتق مسجد شریفہ چیقاماز اولدی .

ایشته او وقت « ابوبکرہ سویله یکنز . ناسہ نماز قیلدیرسون » دیو امامتی حضرت ابوبکرہ تفویض ایلدی .

بناءً علیه حضرت پیغمبرک حیاتنده ابوبکر الصدیق ، جماعت مسلمینہ امام اوله رق اون یدی وقت نماز قیلدیردی .

ربیع الاولک اوننجی جمعه ایرتسی کونی جانب حقندن جبرائیل علیه السلام کلوب خاتم المرسلین حضرت تدرینک حال و خاطرنی صوردی .

فرداسی بازار کونی ینہ استفسار خاطر ایچون کادی ویننده دعوائی نبوت ایدن یالانجی (اسود عنسی) نک اعدام اولندیغنی خبر ویردی [\*] رسول اکرمؐ دخی اصحاب کرامنه بیلدیردی .

فی الواقع ربیع الاولک اون برنجی بازار کیجه سی (اسود عنسی) صنعاده سراینده یاتور ایکن طرف اسلامیانندن اعدام ایتدیرلش و آنک فتنه و فساد سیبیلہ اطرافه طاغیلان مأمورین اسلامیه ، یرلرینه عودت ایدوب صنعا امارتنه ینلرنده اتفاق آرا ایله (معاذ ابن جبل) رضی اللہ تعالیٰ عنه حضرت تدری ، انتخاب ایدیاش اولدیغنی بعده تبیین ایتمشدر .

بازار کونی رسول اکرمؐ خسته لکی زیادہ مشد اولدی . حتی (اسامه) رضی اللہ تعالیٰ عنه حضرت تدری ، اردودن کلوب حضور سعادتہ کیردی . رسول اکرمؐ ایسه طالغین یاتیوردی . (اسامه) یه بر شی سویله مدی .

[\*] اعدام ایدن (فیروز دیلمی) حضرت تدری ایدی .

فقط اللہ ربی کو کہ قالدیردی و آنک اوزرینه سوردی . آکا دعا ایتدیکی  
آکلاشیلدی .

بعده رسول اکرم ، آچیلوب کندویه کلدی . حتی فرداسی بازار  
ایرتهسی که ربیع الاولک اون ایکنجی کونی ایدی . هپ اصحاب کرام ،  
مسجد شریفده صف باغلا یوب ابوبکر الصدیق کرم الله وجهه حضرتلرینک  
آرقه سنده صباح نمازینی قیلارلر ایکن فخر عالم حضرتلری ، مسجد شریفه  
کلدی . امتنک او یله صف صف طوروب عبادت ایتمکده اولدقلرینی  
کوردی . ممنون اولارق تبسم بیوردی ، کندوسی دخی حضرت ابوبکره  
ایوب نماز قیلدی .

اصحاب کرام ، حضرت پیغمبری مسجد شریفده کوردکلری کی بتون  
بتون افاقت بولدی ظنیه پک زیاده مسرور اولدیلر .  
رسول اکرم ایسه ینه حضرت عایشه نیک حجره سنه کیتدی و آرتق  
راحت دوشه کنه یاتدی .

اسامه کلوب حضور نبوی یه کیردکده رسول اکرم آکا « آرتق ، علی  
یرکة الله کیت » دیدی . اودخی چیقوب اردوسنه کیتدی . وهان حرکت  
ایتمک اوزره عسکره امر ایتدی .

حال بوکه : او ائنده فخر عالم حضرتلرینک خسته لکی شدت بولدی  
و کریمه محترمه لری فاطمة الزهرا رضی الله تعالی عنها حضرتلرینی یانه چاغروب  
قولاغنه برشی سویله دی . حضرت فاطمه آغلادی . بعده ینه برشی سویله دی .  
اودخی کولدی . مکر ابتدا حضرت فاطمه نیک قولاغنه « بن اولسه م کرک »  
دیو بیورمش . اودخی یرینوب آغلامش ، صکره « اهل بیتدن اک اول  
یم یانمه کله جک سنسین » دیو مژده ویرمش . اودخی سوینوب کولمش  
بعده وقت زوال شمسدن اولجه حضرت جبرائیل ایله عزرائیل علیهما  
السلام برلکده باب سعاده کلدیلر

جبریل امین ، ایچرو کیردی . عزرائیل قبوده بکلدیکنی و ایچرو کیرمک  
ایچون رخصت ایستدیکنی خبر ویردی .



طرف نبویدن رخصت ویریکله حضرت عزرائیل، هان اچرو کیردی. سلام ویردی واللهم امرنی بیلدیردی.

خاتم الانبیا علیه اکمل التحایا حضرت تلی، حضرت جبریلک یوزینه باقدی. اودخی « یارسول الله! ملا اعلی سکا منتظر در » دیدی. آنک اوزرینه فخر عالم « یاعزرائیل! کل مأموریتگی یرینه کتور » دیو بیوردی.

حضرت عزرائیل دخی روح پرفتوح محمدی بی قبض ایله اعلای علیینه اولاشدیردی. صلی الله علیه وسلم ایشته دنیانک حالی بودر. کیشی، نه قدر یاشاسه انجامی فنادر. باقی، آنجق خدادر.

بو قوناغه هر کون کلوب کیدن چوق، اما دونوب کلن یوق. وفاسز دنیا کیمسه یه قالماز. دنیا وارلغی کیمسه یه مال اولماز. انسان دنیایه کلور. کنج اولور، اختیار اولور، شویله اولور، بویله اولور. نهایت اولور اولنلر، صانکه دنیایه کلامش کی اولور. فقط خیر ایشله ینلرک کوزل نامی قالور. ایملک ایدنلر، اجر و مکافاتنی کورر. کوتولک ایدنلر دخی جزاسنی بولور.

بونلره باقوب عبرت آلمالی. غفلت اویقوسسندن اویانوب آگاه اولمالی. بزینه صده کله لم:

رسول اکرمده اولوم علامتلی بلوردکده ام ایمن رضی الله تعالی عنها حضرت تلی، اوغلی اسامه یه خبر کونده ردی.

اسامه وعمر وابوعبیده رضی الله تعالی عنهم حضراتی، بویله برکدرلی خبر آلدقلی کی هان اردودن قالقوب مسجد نبوی یه کلدیله.

حال بوکه: امهات مؤمنین، روح محمدینک اوچوب اعلای علیینه کیتدیکنی کورنجه فریاده باشلا دیله. آنلرک فریاد و فغانی ایسه مسجد شریفده که

اصحاب کرامی شایر تدی و عظیم تلاش و اضطرابه دوشوردی .  
حضرت علی ، قالب بی جان کبی اولدینی یرده طوکا قالدی . حضرت  
عثمانک دیلی طوتولوب دیلسز کبی اولدی .

حضرت عمر ، بویله بردهشتلو حالی کورنجه مدهوش اوله رق قلیجه  
طاوراندی . « هرکیم ، حضرت پیغمبر فوت اولدی دیر ایسه بویینی اوریرم ،  
دیهرک قلیج النده و آیاق اوزرنده طوره قالدی .

حضرت ابوبکر ، کندی محله سنده ایدی . کلوب بو حالی کوردی .  
همان حجره سعادته کیردی . فخر عالمک یوزینی آجدی ، کوردی که روح  
پرفتح محمدی اوچوب کیتمش . فقط سائر ناسک جنازه لرنده کی چیرکین  
حالر ، آنده یوق . جسد شریفی ، لطیف و نظیف اوله رق ینه نور کبی  
یاتیور . « آمماتک دخی حیاتک کبی کوزل » دیهرک اوپدی ، آغلادی  
و مبارک یوزینی اورتدی ، اهل یته تسلیت ویردی .

بعده او یار غار صدیق ، چیقوب مسجد شریفه کلدی . « ای ناس ! هرکیم  
که محمد طایبور ایسه بیلملی که محمد ، اولدی و هرکیم که الله طایبور ایسه  
بیلملی که الله ، باقیدر . اولمز » دیدی و همان ( و ما محمد الا رسول قد خلت  
من قبله الرسل أفان مات او قتل انقلبتم علی اعقابکم ومن ینقلب علی عقبیه  
فلن یرضی الله شیئاً و سيجزى الله الشاکرین ) آیت کریمه سنی او قودی  
معنای منافی ( محمد ، دکل الا بر رسولدر . آندن اول نیچه رسوللر کلوب  
کچمشدر . او ، اکر اولور و یا خود قتل اولور ایسه سز کیر و دونه جکمیسکز ؟  
هرکیم کیر و دوزر ایسه الله بر ضرر ایتمز . الله ایسه نعمت اسلامک شکرینی  
ایدنلره مکافات ایددجکدر ) دیمک اولور .

بو آیت کریمه ، احد غزاسنده ( محمد قتل اولندی ) دیو برسس ایشیدیلر  
اهل اسلامه یک زیاده شاشقینلق و پریشانلق کلکی اوزرینه نازل اولمشیدی .  
او وقتدنبرو اصحاب کرام ، بو آیت کریمه نی کرات ایله ایشیتمشلر و دفعات  
ایله تلاوت ایتمشلر ایدی .

لکن رسول اکرمک وفاتی اوزرینه او مرتبه حیرتده قالدیلر و او ایله

بر دهرین دریای غم و افکاره طالیدیلر که گویا او آیتی هیچ ایشیتمه مش کی اولدیلر .

یا لکز ابو بکر الصّدیق رضی الله تعالی عنه حضرتلری ، کندوسنی شاشیرمیوب واردی ، حضرت پیغمبری کوردی و کلوب سائر اصحاب کرامه کیفیتی خبر ویردی و او آیت کریمه بی تلاوت ایله آنلره انتباه کتوردی .

حضرت ابوبکر ، او آیتی اوقور ایکن حضرت عمرک عقلی باشنه کلدی . رسول اکرمک وفاتنه ایناندی . دیزلرینک باغی چوزولدی ، یره دوشدی .

بعده حضرت ابو بکر ( اَنْتَ مَيِّتٌ وَ اَنْتُمْ مَيِّتُونَ ) آیت کریمه سنی دخی اوقودی که ( یا محمد ! بهمه حال سن اوله جکسین و بهمه حال آنلر ، یعنی مشرکلر دخی اوله جکلردر ، دیمک اولور .

وفات پیغمبری وقعه سنک دهشتله حیران و سرکردان اولان سائر اصحاب کرام دخی حضرت ابوبکرک خطابتی اوزرینه صانکه بقتّه بر آخر اویقودن او یاندیلر و کندولرینه کلوب حضرت ابو بکرک سوزینه قاندیلر .

یعنی ، حبیب خدا محمد المصطفی علیه اکمل التحایا حضرتلرینک وفاتنه ایناندیلر .

ایشته او آناده حضرت اسامه نک اردوسنده کی عسکر ، درون شهره کوردی . حضرت ( بریده ) دخی سسنگاج شریفی کتوروب حضرت پیغمبرک قبوسی او کنه دیکویوردی . بو ایسه بر مرتبه دهها ناسه دهشت ویردی ،

فخر عالم حضرتلرینک ، مکدن هجرت ایله مدینه یه تشریفلری کونی مدینه شهری نصل که تعریف اولماز صورتده منور و روشنا اولدیه بو کوره وفاتنده دخی شهر مدینه یی او مرتبه ظلمات حزن و کدر قاپلادی .

حزن و کدر ، صانکه اهل اسلامك ، يوره کنه بر زهرلی خنجر  
صابلادی .

کوزلر آغلار ، کوز یاشلری چاغلار ، آتش حسرت هر کسک  
جکرینی داغلار ایدی .

حضرت ( عباس ) و ( علی ) وسائر اهل بیت نبی ، کوز یاشی دوکهرک  
حضرت پیغمبرک تجهیز و تکفینی خدمت شریفه سی ایله مشغول ایدیلر .  
حضرت ابوبکر دخی سعادتخانه حضرت پیغمبریده بولنه رق آنلرله  
برابر یانوب یاقیلمقده و او خدمت شریفه یه باقمقده ایدی .

لکن یانوب آغلامله ایش بیتیبوصالح امتی کورمک و احکام  
شریعتی اجرا ایتک ایچون هرشیدن مقدم رسول اکرمه خلیفه اوله حق  
برامیر انتخابی الزم ایدی و او وقت بو منصب جلیله جمله دن احق واولی ،  
خاتم الانبیا حضرت تهرینه مغاره ده رفیق اولان حضرت ابوبکر صدیق ایدی .  
زیرا اصحاب کرامک طبقه علیسی ، ابتدا مکده ایمان ایدن خواص  
اصحاب کزین اولوب آنلرک دخی اول وافضلی حضرت ابوبکر ایدی .

اگرچه حضرت عباس و علی قرابتجه جمله دن زیاده رسول اکرمه  
یقین ایسه لرده فخر عالم حضرت تهری ، یارغاری اولان ابوبکری جمله اصحابک  
اوست طرفنده طوتاردی و خسته لکی اثناسنده اصحاب کرامنه وداع  
ایتدیکی کون محبتجه اک زیاده ابوبکردن ممنون اولدیغنی بیلیدردی .

مسجد شریفه آچیلان قبولری هپ قبادوب یالکز ابوبکر قپوسنی  
آچیق براقیدردی و ارتحاله اوچ کون قاله امامتی ابوبکره تفویض بیوردی  
وارکان دینک اعظمی اولان نمازده آنی جمله نک اوکنه کچوردی .

شو حاللره نظر آ خلافته حضرت ابوبکر ، تعیین ایتمش دیمک اولمسیله همان  
همان اصحاب کزین برلشوبده آنی رسماً انتخاب ایتلری لازم کلوردی .

حال بوکه : انصاردن بعضیلری کندو ایچلرندن امیر انتخاب ایتک املنه  
دوشدیلر و بنی ساعده صفه سنده برلشدیلر .

خزرج قبیله سنك رئيسی اولان (سعد ابن عبادہ) نامزاج اولدینی حالده اورایه کلوب انصاره خطابت ایلدی

شویله که : « ای جماعت انصار ! سنك دینجه نائل اولدیغکز فضل و مزیت بشقه قبیله لرده یوقدر. محمد صلی الله تعالی علیه وسلم ، نیچه ییللر قومی ایچنده اکلندی ، آنلری دینه دعوت ایلدی . ایچلرندن پک آز کیمسه ایمانه کلدیسه ده کفار ایله جهاده و دین اسلامی اعزازه قادر اولامادیلر . وقتا که جناب حق ، سنك سعادتکنزی مراد بیوردی . سزی شرف اسلام ایله مشرف قیلدی و رسول اکرم ایله محابنک محافظه سنی و جهاد ایله دین اسلامک اعزاز و اعلاسنی سزه میسر ایلدی . دشمنلر اوزرینه الک زیاده شدت کوسترن سزلر اولدیکز. طوائف عرب ، سنك قلیج لکز سایه سنده ایستر ایستمز اطاعته کلدی و رسول اکرم ، سزلردن راضی اولدینی حالده وفات ایتدی . شمعی امارت و ریاست سنك حقکزدر . آنی بشقه سینه و یرمیکز » دیدی .

انصاردن حاضر اولانلر دخی آکا « الله موفق ایلیه . رأیکده اصابت ایلدک . بزده سنی امارته انتخاب ایلرز » دیدیلر .

خزرج قبیله سی ، کندی رئیس لرینک امارته انتخابی سوزندن غایت ممنون اولدیلر .

اما اوس قبیله سی ، کندی رئیس لری اولان ( اسید ابن حضیر ) ک باشنه اوشدیلر و تردد و اندیشه یه دوشدیلر .

چونکه : اوس و خزرج قبیله لری ، ایکی قرن داش اوغوللری اولدقلری حالده مقدماتی بینلرنده عداوت ظهور ایله محاربه لر وقوع بولمشیدی . بعده ، اسلام ایله مشرف اوله رق باریشدیلر و هپ دین قرن داشی اولوب برلشدیلر .

هجرتدن مقدم ( مکه ) یه واروب ( عقبه ) ده حضرت پیغمبره بیعت ایتدکلرنده ایلرو کلنلرندن اون ایکی کیمسه ، سائرلرینک اوزه رینه نقیب و رئیس نصب و تعیین بیورولمشدی .

ایشته بواون ایکی تقییدن بری (سعد ابن عبادہ) و دیگر بری دخی  
اسید ابن حضیر) ایدی .

انصاردن امیر انتخاب اولنه جق اولدینی تقدیرده بو ایکیمسندن بریسی  
تخاب اولنق لازم کلوردی .

حال بوکه : ایکیمسندن هر هانکیسی ، انتخاب اولنسه دیگر طرفک رقابتی  
موجب اولوردی .

واقعا جمله سی ، انصار رسول الله اولوب ، دین اسلام اوغورنده  
جان و باش فدا ایتدیلر و جمله سی دین قرنداشی اولوب ، بربری ایچون  
نانلر دوکدیلر .

لکن هر هانکی قیلهدن امیر اولسه دیگری ، آنی قیصقانمق وینه  
(اوسیلک) و (خزرجیلک) غیرتی میدانہ چیقماق برامر طبعی ایدی .

قرنداش ، قرنداشک غیرتی کوده در وایجابنده بری دیگری ایچون  
جانی اسیرکه مز . لکن فطرت بشریه اقتضاسنجه بریسی ، دیگرینک کندوسنه  
نفوقی دخی چکه مز .

بناء علیه خزرج قیلہ سی ، (سعد ابن عبادہ) یه بیعت ایچون پک زیاده  
حرصلاندیلر . اوسیلر ایسه (اسید ابن حضیر) ک یاننه طویلاندیلر و امارت ،  
رکمره خزرجیلرک اننه کچر ایسه فیابعد تحکم داعیه سنه دوشرلر و بزى  
سلا ایشه قاریشدیرمازلر ، دیو فیصیلدی یه واردیلر .

مهاجرین ایسه انصاردن برینک امارتی قبول ایتک احتمالی یوق ایدی .  
زیرا قرشیلر ، اشرف قبائل عرب اولدقلری جهتله باشقه بر قیلہ نک  
مری آلتنه کیره مزلردی .

فقط (سعد ابن عبادہ) نک نطقی انصاره پک زیاده تأثیر ایتدیکندن همان  
کا بیعت اولنق اوزره ایدی .

حال بوکه : ابتدا (خزرجیلر) ایله (اوسیلر) بیننه رقابت کیره جک  
آنلر، بینلرنده اتفاق ایتسه لر مهاجرین ، آنلر مخالف ایده جک والحاصل



اهل اسلام ایچنه بر عظیم تفرقه دوشه جک ایدی . بوا یسه ملت اسلامیه حقدنه بر بیوک تهلکه ایدی .

ایشته او یله طار وتهلکه لی بر وقتده (ابوبکر الصّدیق) و (عمر الفاروق) و (ابو عبیده ابن الجراح) رضی الله تعالی عنهم حضراتی ، اورایه خضر کی کلوب ایریشدیلر .

شویله که : حضرت عمر الفاروق ، انصارک او وجهله جمعیت ایتدکلرخی ایشیتدیکی کی حضرت پیغمبرک خانه سعادتنه واردی . حضرت ابوبکری ، چاغردی ، کیفیتی خبر ویردی .

حضرت (ابوبکر الصّدیق) دخی حضرت (عمر) ایله حضرت (ابو عبیده) یی آلوب آنلر ایله برلکده (بنی ساعده) صفه سنا واردی .

او وقت انصاردن بری قالقوب « بزلر ، انصار رسولز . بزلر ، اسلامک مهیا عسکری یز . ای مهاجرین ! سزلر ، بزم ایچمزدده کلوب صیغینمشر برجماعت سکیز . امارت ، بزم حقمزددر » دیوردی .

حال بوکه : رسول اکرم ، هر هانکی مجلسده بولونسه صاغ طرفه (ابوبکر) ی و صول طرفه (عمر) ی آلوردی . (ابو عبیده) حقد دخی « بوامتک امیندر » دیر ایدی .

بوکره اوچی بردن میدانک کلنجه صانکه رسول اکرم دیریش واورا کلش کی اهل اسلامک قبلرینه تأثیر ایلدی وهر کس آنلرک سوزیه منتظر اولوب طوردی .

حضرت ابوبکر الصّدیق دخی ، نصل که رسول اکرم خطبه ده کلام بانلار ایدیسه او وجهله ابتدا جناب حقه حمد و ثنا ایتدکدن صکره عمو خطاباً :

« بوامت ، مقدما طاشدن و آغاجدن یایمه بتاره طاپاردی . جنار حق ، کندوسنه عبادت و کندوسنی توحید ایتملی ایچون آنلره رسو کونده ردی . عرب قومنه ، بابالرینسک دیننی ترک ایتمک کوچ کلدی .

عالی حضرتلری ، مهاجرین اوّلینی ایمان ایله ممتاز قیلدی . آنلر ، حضرت پیغمبره یار و غمکسار اولدیلر و آنکله برلکده مشرکینک اذا رجفاسنه صبر و تحمل ایتدیلر . ایشته یر یوزنده ابتدا حقه طاپان و رسولنه ایمان ایدن آنلردر . رسول اکرمک یار وفاکاری و نصیر صدیقی و عشیرتی آنلردر . بو جهتله آنلر ، امارته جمله دن زیاده احق و اولادر . و بایده آنلره کیمسه منازعه ایده من . مکرکه ظالم اوله . ای انصار ! سزکده دینجه قدمکز و فضل و مزیتکیز انکار اولنه ماز . جناب حق ، سزی دیننه و رسولنه نصرت ایچون انتخاب ایتدی و سزلره رسولنک هجرتی ییستر قیلدی . بزجه دخی مهاجرین اولیندن صکره سزک مرتبه گزده باشقه کیمسه یوقدر . رسول الله نصرت ایتدیکیز . آنک ایچون دعوی ایتدیکیز فضل و شرفک اهلی سکیز . بوکا کیمسه نک بر دییه جکی یوقدر . فقط امارت بختده قبائل عرب ، آنجق قریشی بیلور . باشقه سنک امارتنی قبول ایتیز . زیرا قریش قومی ، حسب و نسبجه عربک افضلیدر . و مملکتلری جزیره العربک اوسطیدر . بز ، امرایز . سز ، وزراسکیز . هیچ بر مشورت دن کیرو براقیلمازسکیز . سزک رایکیز آلمادجه بر ایش کورولمز ، دیدی .

حضرت عمر دخی انصاره خطاباً : « رسول اکرم ، خسته ایکن سزی بزه وصیت ایتدی . اکر سز ، امرا اولاجق اولایدیکیز بزی سزم وصیت ایلردی » دیو حضرت ابوبکرک کلامنی تأیید ایتدی . انصار ، بر دییه جک سوز بولا مایوب فکر و مطالعیه طالیدیلر . فقط یچلرندن ( حباب ابن منذر ابن جموح ) قالدی . « بزدن برامیر و سزدن دخی برامیر اولسون » دیدی .

حضرت عمر الفارق « ایکی امیر ، جمع اولاما و پیغمبر ، هانکی قبيله دن بسه خلیفه سی دخی او قبيله دن اولما دجه والله عرب قومی ، قبول و اطاعت ایتیز » دیدی .

حباب ابن منذر ، آنی رد ایله « ای انصار ! بو دینه عرب قومی

سزك قلیجلیریكز ایله اطاعت ایلدی . حقكزی باشقه سینه قایدیرمایکیز « دیدی .

حضرت عمر ، آنی تکدیر ایلدی . او دخی سرت جوابلر ایله مقابله و مجادله یه باشلادی .

اووقت ( عبیده ابن الجراح ) سوزه باشلایوب « ای انصار ! ابتدا بو دینه نصرت ایدن سز لر ایدیگز . صاقین ابتدا ایشی بوزان دخی سز اولمایسکیز » دیدی .

آنک اوزرینه انصاردن و خزرچ قبیله سندن ( سعد ابن نعمان ابن کعب ابن خزرچ ) ک اوغلی ( بشیر ) رضی الله تعالی عنه حضرتلری ، آیاغ قالدی : « ای ناس ! محمد ، قریش دندر . کندی قومی ، آنک خلافتنا احق و اولادر . بزم کرچه اسلامه مسابقت و جهاد و نصرت حقمز واردر لکن بزم آندن مرادمز ، اللهم و رسولنک رضالری ایدی . بز ، بوندز طولای دنیاچه عوض و مکافات ایسته مه یز » دیدی .

حباب ابن منذر « یابشیر ! سن ، عمیزاده گه ( یعنی سعد ابن عبادیه حسد و نفسانیت ایدیورسین » دیدی .

بشیر ابن سعد « یوق . والله او یله دکل . لکن بو قومک حقوق تعرض و تجاوزی جائز کورمیورم » دیدی .

ایشته اووقت حضرت ابوبکر الصّدیق « سزه بوایکی ذاتی انتخاب ایتدم رینه بیعت ایدیگز » دیو ( عمر الفاروق ) ایله ( ابو عبیده ) یی کوستردی ایکیمی بردن امتناع ایتدیلر و « حضرت پیغمبرک ایلر و کچوردیکو ذاتک اوکنه کیم کچه بیلور ؟ » دیدیلر .

بو صروده کورولتو بویودی . کفتکو چوغالدی . هر قفادن برسمر وهر آغزندن بر سوز چیقار اولدی .

آنک اوزرینه حضرت ( عمر الفاروق ) سوزی کسیدردی و حضرت ابوبکر الصّدیق خطاباً : « رسول اکرم ، سنی اعظم ارکان دین اولر نمازده کندوسنه خلیفه ایتدی . سنی جمله مزه امام ایلدی . الکی اوزات

ن، سکا بیعت ایدیم» دیوب ( ابو عییده ) ایله برلکده ( حضرت ابوبکر ) ه بیعت ایده جک اولدقلرنده ( بشیر ابن سعد ) سگیرتدی ، آنلردن اول ابوبکرک النی طوتدی ، بیعت ایتدی .

حضرت ( عمر ) و ( ابو عییده ) دخی بیعت ایدنجه برو طرفده بربریه فیصلیدی ایتمکده اولان ( اوس ) قبیله سی دخی رئیس لری اولان ( اسید بن حضیر ) ایله برلکده کلوب بیعت ایلدیلر .

بوصورتله خزر جیلرک اتفاق بوزولدی ( سعد ابن عبادہ ) یه بیعت بحقی برطرف اولدی .

هپ انصار و مهاجرین ، بر اوغوردن حضرت ابوبکره بیعت ایتمک اوزره او مرتبه مسارعت ایله سگیرتدیلرکه آ ز قالدی ( سعد ابن عبادہ ) یه چیکنه یه یازدیلر .

اول امرده حضرت علی کلوب بیعت ایله مدیکی کبی ( زبیر ابن العوام ) و ( مقداد ابن الاسود ) و ( سلمان فارسی ) و ( ابوذر غفاری ) و ( عمار ابن یاسر ) ایله ( عُبَّهٔ ابن ابی لهب ) کبی بنی هاشمندن دیکر بعض ذوات دخی حضرت ( علی ) یه بیعت ایتمک ایستدیلر . بو جهته کلوبده حضرت ابوبکره بیعت ایله مدیلر . لکن صکره جمله سی کلوب بحق خلیفهٔ رسول الله اولان حضرت ابوبکره بیعت ایلدیلر .

مرویدرکه : حضرت ( علی ) کرم الله وجهه و ( زبیر ) رضی الله تعالی عنه « بز ، ابوبکرک شرف و فضیلتی بیلورز . او ، رفیق غاردر . رسول الله ، آنی حیاتنده ایکن امامته کچوردی . خلافته جمله دن احق واولا اولدیفنی تصدیق ایلرز . فقط بو خصوصده مشورت دن خارج طوتولدیفمز ایچون کوجندک « دیمشیر .

فی الواقع امر خلافت ، ملت اسلامیه جه اک بیوک بر مصلحت در . حضرت پیغمبرک وفاتی اوزرینه بالجمله کبار اصحاب کرام ، برلشوبده بالاتفاق ایچلرندن برنی انتخاب ایتلری لازم کلوردی . او حالدہ حضرت

(علی) و (زبیر) کجی کبار اصحاب کزینک رایلرینه مراجعت اولنق دخی امر ضروری ایدی .

نه چاره که حضرت پیغمبرک وفاتی اوزرینه هر کس نه یاپاجغنی شاشیردی . انصارک دخی کندو ایچلرندن امیر انتخابنه قالقیشمه لری ایشی چیغیرندن چیقاردی .

درحال (ابوبکر) و (عمر) و (ابوعبیده) یتیشمه سه یدیلر (سعد ابن عباده) یه بیعت اولنه حق و بو جهته له (خزرجیلر) ایله (اوسیلر) یئینه رقابت دوشه رک ابتدا انصار ، ایکی یه بولونه جک وقریش ایسه اصلا قبول ایتیوب ملت اسلامیه ایچنه بر بیوک تفرقه دوشه جک ایدی . ایشته ، بو فناقلرک دفعنه حضرت (ابوبکر الصّدیق) موفق اولدی و آنک خلافته انتخاب اولماسیله ملت اسلامیه ، بر بیوک تهله که دن قورتولدی . (رضی الله تعالی عنه و کرّم الله وجهه) .

ایشته خاتم الانبیا حضرت تلرینک وفاتی کونی که ربیع الاولک اون ایکنجی بازار ایرته سی کونی ایدی . او یله غریب مجادله و محاوره لر وقوع بولدی و نتیجه سنده حضرت ابوبکر الصّدیق خلیفه رسول الله اولدی . فرداسی صالی کونی بیعت عامه وقوعه کلدی . شویله که :

حضرت ابوبکر ، مسجد شریفه کلوب منبره چیقدی و جناب حقه حمد و شکر ایتدکن صکره « ای ناس ! بن ، سزک اوزه ریکزه والی و امیر اولدم . حال بوکه : سزک اک خیر لوکز دکل . اکر ایبلک ایلر سه م بکا اعانه ایدیکز و اکر فنا ایشلر سه م بکا طوغری یولی کوستریکز . طوغریلق امانت در . یالانچیلق خیانت در . سزک ضعیفکز ، بنم عنده ده قویدر که حقنی آلیویر یرم و قویکز ، بنم عنده ده ضعیفدر که آندن باشقه سنک حقنی آلورم . ان شاء الله تعالی . بریکز ، جهادی ترک ایتسون . جهادی ترک ایدن قوم ، ذلیل اولور . بن الله و رسولنه اطاعت ایتدکجه سزده بکا اطاعت ایدیکز و اکر بن ، الله و رسولنه عاصی اولور سه م سزکده بکا اطاعتکیز لازم کلز . قالقیکیز نمازه . رحمکم الله » دیدی .

بعده ، خاتم الانبیا حضرت تیرینی تجهیز و تکفین ایله دفن ایتدیردی .  
طرف نبویدن حضرت ( اسامه ) یه ویریش اولان سنجاغ شریف که  
رسول اکرمک و فاتنده ( اسامه ) نک علمداری اولان ( بریده ) آنی  
کتوروب سعادتحانه نبوی اوکنه دیکویر مشدی . حضرت ابو بکر ،  
انی ینه ( بریده ) یه ویردی و ( اسامه ) نک قبوسی اوکنه دیکدیردی  
و « کیمسه سفردن کیرو قالمسون » دیو ندا ایتدیردی .

اسامه رضی الله تعالی عنه حضرت تیری ، سنجاغ شریف ایله خارج  
مدینه یه چیقوب اسکی اردو یرینه واردی وینه اوراده اردوسنی قوردی .  
سائر اصحاب کرام دخی خلیفه رسول الله اطاعت ایدرک هان سلا حلا ندیلر .  
اردوگاهه طوپلان دیلر .

فقط اسامه ، یک کنج اولدیغندن انصاردن بعضیلری ، آنک عزلیله  
یرینه قدمای اصحاب کرامدن برینک نصبی ایستدیلر .

حضرت ابو بکر الصدیقک جانی صقیلیدی « رسول اکرمک نصب  
ایتدیکی سرعسکری بن ، فصل عزل و تبدیل ایده بیلورم ؟ » دیدی .

ربیع الآخرک غرّ مسنده خلیفه رسول الله ، اردوگاهه کیتدی و حضرت  
اسامه یی آتیه بیندیروب کندوسی یا یا اوله رق آنی تشییع ایتدی .

حضرت اسامه آکا « یا سنده بین ، یا خود بنده اینیم » دیدی .  
خلیفه حضرت تیری « نه بن بینیم ، نه ده سن این . الله یولنده برآز بنمده  
آیا قلم طوز لانس نه اولور ؟ » دیدی . لازم کلن محله دک یورویره رک اردوی  
اسلامی کچوردی .

اسامه یه « الله سلامت ویرسون . کیت و رسول الله ، سکا نه امر ایتدیه  
آکا کوره حرکت ایت » دیو وداع ایتدیکی وقت « اکر رأیگه موافق  
کاورسه عمری بکا معین اولمق اوزره براقیور » دیدی . حضرت اسامه دخی  
راضی اولوب حضرت عمری براقدی .

بناء علیه - خلیفه حضرت تیری ، عمر الفاروق ایله برلکده مدینه یه عودت



ایتدی . اسامه دخی عسکر اسلام ایله جانب شامه کیتدی . بلقا ناحیه سینه  
 واردی و دشمنلری آتله چیکنه تدی و بدرینک قاتلنی بولوب اولدوردی .  
 منصور و مظفر اولدی و نیچه اموال غنائم آلدی .  
 ایشته رسول الله ک صکره تجهیز ایله دیکی و برنجی خلیفه سنک الک  
 اول سوق ایتدیکی اردو بودر .

اللهم صل على محمد وعلى آله واصحابه اجمعين



## جزء رابع

### رسول اکرم صلی اللہ علیہ وسلم حضرت تلمینک تجہیز و دفنی

جزء ثانیہ بیان اولوندینی اوزره ابوبکر الصدیق رضی اللہ عنہ  
حضرت تلمینہ بیعت اولوندقدن صکرہ فخر عالمک دفنی خدمت شریفہ سنہ  
مبادرت قیلندی . لکن مدفن حقیقہ اختلاف اولوندی .

اصحاب کرامدن بعضیلری ، مسجد شریفہ وبعضیلری ( بقیع ) ده ،  
یعنی مدینہ منورہ مقبرہ سنہ وبعضیلری جدی ابراہیم علیہ الصلوۃ  
والسلامک قبری یانده وبعضیلری مکده دفن اولنق رأینده بولندی .

حضرت صدیق ایسہ « بن ، رسول اللہ صلی اللہ علیہ وسلمدن بر شیء  
ایشیتدم وحالا اونوتامدم . اللہ تعالی ، بر پیغمبری قبض ایتدی ، الا دفن  
اولمنسی ایستدیکی یرده قبض ایتدی . دیو بیوردی . آنی دوشه کینک  
اولدینی یرده دفن ایدیکز ، دیمکله حضرت عایشہ رضی اللہ عنہا خانہ سنده ،  
اوزرنده عازم دار بقا اولدینی دوشه کی قالدیریلدی و یری قازیلدی . برلحد  
یایلیدی که حالا ( روضہ مطهرہ ) دینیلان محل مبارکدر [\*] .

[\*] پاشا مرحوم ، مدفن شریف نبوی ایچون ( روضہ مطهرہ ) دهنیلن محل  
بوراسیدر . دیمش ایسده ( روضہ مطهرہ ) قبر سعادت ایله منبر شریف آراسنده کی  
بقعہ مقدسه اولوب قبر پیغمبرینک بولوندینی موقع اقدسه ( حجرہ سعادت ) تعبیر  
اولونور .

بو لحد مسعودی قازوب یابان انصار کرامدن ( ابو طلحه ) رضی الله عنه حضرت لریدر .

غسل اوله جنی وقت دخی اثواب سعادتی چیقازوب چیقارماق خصوصنده بین الاصحاب اختلاف وقوع بولدی .

بو آراق اصحاب کرامه من طرف الله اویقوکلدی . بو صروده « آنی اثوابی اوزرنده ایکن غسل ایدیکز » دیو بر سوز ایشیدیلدی ، قائلی بیلینهمدی فقط موجنبجه عمل اولوندی .

غسل ودفن نبوی خدمت شریفه سنده بولنانلر ( علی ابن ابی طالب ) و ( عباس بن عبدالمطلب ) ایله اوغوللری ( فضل بن عباس ) و ( قثم بن عباس ) و ( اسامه بن زید ) و رسول اکرمک آزادولندن ( شقران ) اولوب انصار کرامدن واهل بدردن ( بنی عوف ) ک جدی اولان ( اوس بن حولی ) دخی آنرله برابر بولندی . ( رضی الله عنهم )

سائر جنازه لرده بر معتاد کورولن شیلردن آنده بر اثر کورولدی . حضرت علی « حیاتکده و مماتکده پاکسین » دهرک غسل ایدر و عباس ایله اوغوللری چویریر و ( اسامه ) ایله ( شقران ) صو دوکر ایدی .

بو وجهله غسل و تکفین اولوندی . ارککلر وقادینلر و چوجوقلر و کوله لر ، بلوک بلوک کوروب نمازینی قیلدیلر .

قبر شریفه اینلر ( علی ) و ( فضل ) و ( قثم ) و ( شقران ) رضی الله عنهم ایدی . نقط ( اوس بن حولی ) رضی الله عنه « الله عشقنه یا علی ! بزم رسول الله بن حظ و نصیبمزی کوزت » دیمکله حضرت علی ، امرایتدی . اودخی قبر شریفه ایندی و حائر شرف و مباهات اولدی .

تجهیز و تکفین ایشی کجیکمش و کیجه ایریشوب آفاقی قارالنق باصمش ایدی . انفسی استیلا ایدن ظلمات حزن و کدر ایسه آندن ده باصقین ایدی . زیرا انوار وحی الهیه مظهر اولان رسول اکرمک جسم مسعودینی طوپراغه کومک اصحاب کرامنه الک بیوک مصیبت ایدی .

ایشته او ائنده قره العین رسول حضرت ( فاطمة البتول ) رضی الله عنها وارضاهما حضرتلری ، قبر نبویدن بر آووج طوبراق آلارق قوقلایوب « احمد مختارک ترانی قوقلایانک حالی نه اولور ؟ الی آخر العمر قاینامش آتش قوقوسی آلامق لازم اولور . بنم اوزدریمه بر طاقم مصیبتلر دوکولدی که اکر کوندوزلرک اوزدرینه دوکولسه کیجه اولمالری لازم کلور » دیو مرثیه نظم ایدرک آغلاردی وهر کسک جکرینی داغلاردی . آندن صکره غمخانه سنه چکیلدی و انس والقتدن کسیلدی .

نه چاره که ، قافله بشره قاریش-انلر ، هپ بو منزله قونوب کوچمک احوال طبیعیه دندر ورسول اکرمدن صکره آنک شریعتنه خدمت ایله مک آکا محبت و اخلاصک اقتضاسندندر .

بناء علیه صحابه کزین ، حضرت پیغمبرک نار فراقیله سوزان اولدقلری حالده آنک تأسیس بویورمش اولدینی احکام دینییه بی احکامه حصر افکار ایتمشلردر . از جمله حضرت صدیق ، رسول اکرمک حال حیاتنده تجهیز بویورمش اولدینی اسامه اردوسنی ، دفن نبوی عقبنده سمت مأموریتنه سوق ایله مشدر .



## بعض اوصاف سنیہ محمدیہ :

حلیہ شریفہ و شمائل محمدیہ نیک تعریفی ، بویله کوچوک رسالہ یہ صیغماز . فقط جزء ثالثہ آنلردن بلننا سبہ بر آ ز بحث اولوندینی کبی بوراده دخی بر نبذه جک بحث اولنق مناسب کورولمشدر .

رسول اکرم وفخر عالم محمد المصطفی صلی اللہ علیہ وسلم حضرتلری ، خلقتجه و اخلاقجه نوع بنی آدمک ا کملی ایدی .

هپ انبیاء عظام علیهم الصلوٰۃ والسلام حضراتی ، تام الاعضا و کوزل یوزلو اولوب حبیب خدا ، آنلرک اڭ کوزه لی ایدی .

مبارک جسمی کوزل ، هپ اعضاسی متناسب ، اندامی غایت مطبوع آلنی و کوکسی و ایکی اوموزلرینک آره سی و آووچلری کنیش ، بویونی اوزون و موزون و کوموش کبی صاف ، اوموزلری و بازولری و بالدرلری ایری و قالین ، بیله کلری اوزون ، پارمقلری اوزونجه ، اللری و پارمقلری قالینجه ایدی . مبارک قارنی کوکسیله برابر اولوب شیشمان دکل ایدی و آیاقلرینک آلتی چوقور اولوب دوز دکل ایدی . اوزونه قریب اورته بویلی ، ایری کیمکلی ، ایری کووده لی ، کوجلی قوتلی ایدی . نه ضعیف ، نه سمیز ، بلکه ایکسی اورته سی و صیقی اتلی ایدی . مبارک جلدی ایسه ایپکدن یوموشاق ایدی .

کمال اعتدال اوزره بویوک باشلی ، هلال قاشلی ، چکمه بورونلو ، آ ز ده کیرمی چهره لی و سوبوجه یوزلو ایدی . شیشمان یوزلو و یومرو یاناقلی دکل ایدی .

کیریکلری اوزون ، کوزلری قاره و کوزل بویوجک و ایکی قاشنک

آرەسی آچیق ، فقط قاشلری بر برینه قریب ایدی . چایق قاشلی دکل ایدی وایکی قاشنک آراسنده بر دامار وار ایدی که وقت غضبده قاپاروب کورونور ایدی .

اونی مجتبی ، ازهرالدون ایدی ، یعنی نه کیرج کبی آق ، نهده قاره یاغیز ، بلکه ایکیمی اورتهسی وکل کبی قرمزی یه مائل بیاض ونورانی وبر آق اولوب مبارک یوزنده نور لمعان ایدردی . کوزلرینک آقنده دخی آرز قیرمزلیق وار ایدی . دیشلری ، اینجو کبی آبدار وتابداری اولوب سویلرکن اوک دیشلرندن نور صاحیلور ، کوزلرکن فم سعادت ، بر لطیف شیمشک کبی ضیالر صاچاراق آچیلور ایدی .

صاچلری ، نپک قیویرجیق ، نهده پک دوز ایدی وصاچلرینی اوزاتدینی وقت قولقلرینک مملرینی تجاوز ایدردی . صقالی صیق وتام ایدی . اوزون دکل ایدی وبر طوطامدن زیاده سنی آلوردی .

عالم بقایه رحلت بیوردقلرنده صاچی ، صقالی هنوز آغارمغه باشلایوب باشنده بر آرزوصقالنده یکرمی قدر بیاض قیل وار ایدی .

جسمی نظیف ، قوقوسی لطیف ایدی . قوقو سورونسون ، سورونمه سون تنی وتری الک کوزل قوقولردن اعلا قوقاردی . بر کیمسه آنکله مصافحه ایتسه بوتون کون آنک رایحه طیبه سنی طویاردی ومبارک الیه بر چوجوغنک باشنی مسح ایتسه رایحه طیبه سیله اوچوجوق ، سائر چوجوقلر آرەسنده معلوم اولور ایدی .

طوغدینی وقت دخی نظیف وپاک ایدی وسنتلی وکوبکی کسینک اوله رق طوغمش ایدی .

حواسی فوق العاده قوی ایدی . پک اوزاقدن ایشیدیر وکیمسه نک کورمه چکی مسافه دن کورور ایدی .

هپ حرکاتی معتدل ایدی . بر یره عنیمتنده عجله وصاغ وصوله میل ایتوب کمال وقار الیه طوغری یولنه کیدر وفقط سرعت وسهولت الیه یورور ایدی .



سویله که : عادتاً یورور کبی کورونور ، لکن یاننده کیدنلر ، سرعت ایله یورودکلری حالده کیرو قلورلر ایدی .

الحاصل جزء نائنده بیان اولوندیغی اوزره اک مکمل ومستثنا صورته یارادیش بر وجود مسعود ومبارک ایدی .

کولر یوزلو ، طائلی سوزلوایدی . کیمسه یه فنا سوز سویله مز و کیمسه یه بد معامله ایله مز و کیمسه نک سوزینی کسمز ، ملایم ومتواضع ایدی ، خشین و غلیظ دکل ایدی . فقط مهیب و وقور ایدی . بهوده سوز سویله مزیدی . کولمه سی دخی تبسم ایدی .

آنی آنسزین کوره ن کیمسه یی مهابت آلوردی و آنکله الفت ومصاحبت ایله ین کیمسه ، آکا جان و کولکلدن عاشق ومحب اولوردی . اهل فضله درجه لینه کوره احترام ایلردی . اقرباسنه دخی پک زیاده ا کرام ایلردی . لکن آنلری کندولرندن افضل اولانلرک اوزرینه تقدیم ایتزدی .

خدمتکارلرینی پک خوش طوتاردی . کندیسی نه یر ونه کییرسه آنلره دخی آنی یه دیریر و آنی کیدیریر ایدی .

سخی و کریم ، شفیق و رحیم ، شجیع و حلیم ایدی . عهد و وعده نده ثابت ، قولنده صادق ایدی . الحاصل حسن اخلاقجه و عقل و ذکاوتجه جمله ناسه فائق و هردرلو مدح و ثنایه لایق ایدی .

کتاب او قومامش ، یازی یازمامش اولدینی حالده عوام و خواصک ظاهری وباطنی امورنده واقع اولان حسن تدبیر و تصرفی بر آدم دوشونسه او حضرتک نه مرتبه عقل وفهم و ذکاسی اولدینی درحال آکلاروظلمات جهل ایچنده قالمش قبائل عرب آره سننده بویویوب و جزیره العرب کبی بر هجرا محمله ظهور ایله یوبده امی اولدینی حالده انفس و آفاقی انوار علوم ومعارف ایله منور ایتدیکنی بر عقل سلیم صاحبی تأمل ایتسه بلاتردد آنک دعوا ی نبوتی جزماً تصدیق ایلر .

یه مده ، گیمده قدر ضرورت ایله ا کتفا و زیاده سنندن ابا ایلردی

بولديغنى ييردى ، بولديغنى گيوردى وتام طويونجه وقارنى طولونجه يه مزدى .  
اوزرنده ياتوب اويودينى دوشك ، دهريدن معمول اولوب ايچى دىخى  
خرما لىنى ايدى .

آز وقت ايچنده بونجه فتوحاته مظهر اولمش و واردات اسلاميه  
چوغلش ايكن دنيا مالنه اصلا التفات ايله مزدى وغنائمدن كندوسنه عائد  
اولان اموالك اكثرينى مستحققرينه صدقه ايدوب كندى تعيشى ايچون  
بك آزر شى آليقوردى . بو جهتله بعضاً استقراضه مجبور اولوردى .  
اهل بيتنك اكثر يايه ديكلى آره اكى ، ياخود خرما ايدى و دارعقبايه  
عزيمنده اك سوكىلى زوجەسى اولان عايشە رضى الله عنها حضرتلرينك  
حجره سنده جزئى آره دن باشقه ييه جك يوق ايدى وزرەى بر يهودى يندە  
مرهون ايدى كه عيالتك نفقهسى ايچون اوتوز صاع [\*] آره اودونج آلوب  
زرهنى ره ايتمشيدى .



[\*] بر صاع ، بيك فرق درهمدر .



## ترکه نبویه

رسول اکرم ، صلی الله علیه وسلم حضرت تلرینک وفاتنده کرک آلتون، کرک کوموش نقدی قلمادی . البسه وایکی کلیم وبر چارشف وبر قاچ صو قابی وقاواطه وطاراق مقاص ، مسواک کبی ضروری اللزوم اولان اشیا سندن باشقه بر کوموش مهری وار ایدی که : اوزه ری ( محمد رسول الله ) دیو حاک اولمشیدی . ( ابوبکر ) و ( عمر ) و ( عثمان ) رضی الله عنهم حضرت آتی ، آنی ایام خلافتلرندسته استعمال ایتشلردر .

بر سریری وار ایدی که : آیاقلری ( ساج ) دینیلن آغاچدن ایدی . رسول اکرم ، بعد الهجره ( ابویوب انصاری ) حضرت تلرینک خانه سنده ایکن ( اسعد بن زراره ) رضی الله عنه حضرتلری ، آنی تقدیم ایتمشیدی . رسول اکرم ، آنک اوزه رنده یاتوب او یوردی . وفاتنده آنک اوزه رینه قونولوب نمازی قیلندی . بعده حضرت ( عایشه ) رضی الله عنها خانه سنده قالدی . صکره ناس ، تبرکاً آنک اوزه رنده موتالرینی کوتورور اولدیلر . حضرت ( صدیق ) و ( فاروق ) ک جنسازملری دخی آنک اوزه رنده کوتورولمشدر .

مدینه منوره اطرافنده اوتلار ، یکریمی رأس صاغیلور ده وملری وار ایدی که : هر کون بونلردن ایکی قربه سوت کلوب زوجه لرله برابر کندولری تغدی بویورور وبقیه سنی اصحاب صفیه ویریر ایدی . یوز قویونی وآلتی ، یدی قدر کچیکسی اولوب آنلرک سودلری دخی او یولده صرف اولونور ایدی .

بوندن باشقه ترکه سی : سلاخلریله بر بیاض ( استر ) دن عبارت اولوب

حضرت ( صدیق ) آنلری ، ( علی المرتضی ) رضی الله عنه حضرت تدرینه  
ویرمش و « ماعداسی صدقه در » دیو بویورمشدر .

اگرچه رسول اکرمک مدینه منوره ده بر آزاراضیسی و ( فدک )  
( خیر ) اراضیسنده بر مقدار حصهسی وار ایدی . لکن حال محنتده  
آنلری وقف ایدوب حکملرینی دخی تعیین بویورمشیدی .  
شویله که : آنلردن اکثرینک وارداتی کلوب کیدن ایلچیلر ومسافرلر  
ویولچیلر مصارفنه تخصیص ایتمشیدی .

خبرک حاصلاتندن زوجهلری ایچون معین المقدار آریه وخرما تخصیص  
ایدوب فضله سنی دخی فقرايه ، مهاجرینه اعطا بویورورلر ایدی .  
( ابوبکر الصدیق ) رضی الله عنه حضرتلری ، ایام خلافتنده بو مرتباتی  
وقت سعادتده اولدینی کبی صرف ایدوب اصلا تغییر ایتدی .

حضرت عمر رضی الله عنه ، خلیفه اولدقده خیر اراضیسی تقسیم  
وزوجات مطهره یی تخیرایله « ایسته ین کافی السابق تعیناتی وایسته ین اراضیدن  
حصه سنی آلسون » دیوب آنلرک بعضیلری ، تعیناتی وبعضیلری اراضی یی  
اختیار ایتمشلردر .

سائر طول قالان قادینلرک مدتلری منقضی اولدقدن صکره ایستدکلری  
اره وارده بیلورلر . اما زوجات مطهره ، امهات مؤمنین اولدقندن کیمسه یه  
ترویجیلری جائز دکلدر .

بناء علیه برحیات اولدقجه نفقه لری جاری اولمق لازم کلش و سنا کن  
اولدقلری خانلر ، وفاتلرینه قدر کندولرینه ترک ایدیلشدر . رسول اکرمک  
وارثلری ، کریمه محترمه سی ( فاطمه الزهرا ) رضی الله عنها وارضاه ،  
زوجات مطهره لری رضی الله عنهن و عمتی ( عباس ) رضی الله عنه  
حضراتی ایدی .

لکن ( ابوبکر ) رضی الله عنه ، ترکه نبویه یی تقسیم ایتوب وقت  
سعادتده جاری اولان ترتیباتی بعینها اجرا بویوردی وحضرت ( فاطمه )  
رضی الله عنها ، حصه میراثی ایستدکده « رسول الله یی ایشیتدم . بزه ،

یعنی پیغمبرلره کیسه وارث اولاماز . بزم ترك ایتدیکمز شی ، صدقه در . دیدی . رسول الله ، هر نه یاپاردیسه بن ، اصلا تغییر ایتتم . زیرا قورقارم که بر یا کلیش یوله صاپماییم « دیو جواب ویردی . مرویدرکه : حضرت ( فاطمه ) نزد ( صدیق ) ه کلوب « سکا کیم وارث اولور؟ « دیو صورمش و حضرت ( صدیق ) « عیال و اولادم اولور » دیدکده « یابن ، نیچون پدرمه وارث اولمیورم » دیو بویورمش . حضرت ( صدیق ) دخی « بن ، سنک پدرک اولان رسول اکرم حضرتلرندن ایشیتتم . بویوریوردی که : کیسه بزه وارث اولاماز . آنک ایچون سنده وارث اولامازسین . لکن بن ، آنک خلیفه سییم . آنک حیاتنده اتفاق ایلدیکی کیسه لری اتفاق ایدرم ، سنک مصارفکی و اموریکی دخی رؤیت ، وظیفه ذمتدر « دیو جواب ویردی . آنک اوزهرینه حضرت فاطمه ، سکوت ایتدی و بردها میراث لاقیردینسی ایتدی .





## زوجات طاهرات

آّمهات مؤمنین اولان زوجات طاهراتك اول وافضلى (خديجة الكبرى) رضی الله عنها حضرت تلیدرکه : سیدة النساء (فاطمة الزهرا) رضی الله عنها حضرت تلرینك والده سیدر .

فخر کائناته ابتدا ایمان ایدن و آرقه سنده نماز قیلان اودر . او، بر حیات اولدقجه رسول اکرم ، آنك اوزه رینه باشقه خاتون تزوج ایتمدی . ذریت نبویه دخی آندندر . زیرا رسول اکرمك حضرت (فاطمه) دن باشقه اولادی قالمادی .

آندن صکره زوجات مطهره نك افضلى ، ابوبکر الصّدیق رضی الله عنه حضرت تلرینك کریمه سی (عایشة الصّدیقه) رضی الله عنها حضرت تلیدر . آندن بك چوق حدیث شریف روایت اولمشدر . رسول اکرمك بكر اوله رق تزوج ایتدیكى آنجق اودر . سائر لرینی هپ طول اولدقلری حالده تزوج ایتمشدر . رسول اکرم ، حضرت (عایشه) بی بك زیاده سوردی . مع هذا حضرت عایشه دیر ایش که «خدیجه» رسول اکرمك بنی تزوجندن اوچ سنه اول فوت اولمشیکن آنك قدر هیچ بر خاتونی قیصقانماد . زیرا رسول الله ، دائما آنی یاد ایلردی و قربان کسوب اتندن آنك متعلقاتنه اهدا ایلردی و آکا جنتده مجوف انجودن برکوشك ايله مژده ایلک اوزره رسول اکرمه ربّ تعالی امر ایتمشیدی «

حضرت خدیجه نك وفاتندن صکره رسول اکرمه (سوده بنت زمعه) تزویج اولمشدی . صکره ابوبکر الصّدیق حضرت تلری ، کریمه سی عایشه بی تزویج ایلمشدر . سوده ، مقدما اشراف قریشدن عمّی زاده سی و حدیبیه مکالمه سنده بولنان مشهور (سهیل بن عمرو) ك برادرى (سکران) ك زوجه سی



اولوب آنکله برابر اسکیدن اسلام ایله مشرف اوله رق حبشه هجرت ایتشلر ایدی .  
 سکرانک و فاتیه طول قالمش و رسول اکرمک ازدواجیه شرف تسلیت بولمش  
 ایدی ، کندوسنه اختیارلق کلدکده نوبتی حضرت عایشه یه بخش ایتشدرد .  
 مؤخرآ عمر رضی الله عنه حضرت تلرینک کریمه سی ( حفصه ) رضی الله  
 عنها حضرت تلرینک زوجی فوت اوله رق طول قالدقده رسول اکرم ، آنی  
 تزوج ایله حضرت عمری تلطف بیوردقدن صکره پدرینک همشیره سی  
 ( امیمه بنت عبدالمطلب ) ک قزی و ( زید بن حارثه ) نک مطلقه سی اولان  
 ( زینب بنت جحش ) ی دخی تزوج ایتشدرد .

زوجات طاهرادن بری دخی ( ابوسفیان بن حرب ) ک قزی ( ام  
 حبیبه ) درکه زوجی ( عیدالله بن جحش ) ایله برابر سابقین اولندن اوله رق  
 حبشه هجرت ایتشلر ایدی .

عیدالله ، اوراده مرتد اوله رق فوت اولوب ام حبیبه ، اسلام اوزره  
 ثابت و دیار غریبده بی کس قالمغله طرف نبویدن بیکس نوازلق یولنده وقوع  
 بولان امر و اشعار اوزرینه ( نجاشی ) آنی اوراده رسول اکرمه نکاح  
 ایدرک مدینه منوره یه کونده رمش . ام حبیبه نک پدری ابوسفیان ، اوزمان  
 هنوز ایمانه کلیوب مکده رئیس الرؤسا ایدی . ینه حبش مهاجرلرندن ( بره  
 بنت عبدالمطلب ) ک اوغلی ( ابوسلمه ) احد جنکنده آلدنی یارهدن وفات  
 ایلدکده زوجه سی ( ام سلمه ) یی دخی رسول اکرم تزوج بیورمشدرد .

بعده بنی المصطلق غزاسینده ( جویریّه ) و خیرک فتحنده ( صفیه )  
 اسیر اولوب رسول اکرم آنلری دخی تزوج ایتشدرد . جویریّه ، بنی المصطلق شیخی  
 ( حرث بن ابی ضرار ) ک و صفیه ، رؤسای یهوددن ( ابن اخطب ) ک قزیدرد .  
 جزء ثالثده بیان اولندیغی اوزره رسول اکرم ، عمره ایچون مکده  
 واردقده عمی عباس ، کندی زوجه سی ( ام الفضل ) ک قیز قرنداشی ( میمونه ) یی  
 حضرت پیغمبره تزویج ایتشدرد .  
 رضی الله عنهن



## رسول اکرمؐ مُعْتَقٌ وَمُعْتَقَةٌ لَرَى [۱]

رسول اکرم صلی اللہ علیہ وسلم حضرت لری، کولہ و جاریہ لری مالک اولدینی کبی، یاخود بر مدتجک صکرہ آزاد ایلردی و آنلری مخیر قیلوب ایستیانلری خدمت سنیه لرنده آلیقور ایدی. حین وفاتنده آزاد اولمامش هیچ بر کولہ و جاریہ سی بولنمادی. آزاد کرده لری چوقدر. ابتدا والدہ سندن موروث اولان (ام ایمن) نام حبش جاریہ یی آزاد ایلشیدی. لکن ام ایمن، ینہ خدمت سنیه لرنده قائم اولوردی.

بعده (خدیجۃ الکبری) رضی اللہ عنہا رسول اکرم (زید بن حارثہ) نام کولہ یی باغشلا دی. رسول اکرم دخی آنی آزاد و کندوسنه اوغول اتخاذا ایلدی و «برجنتک خاتون اَلْمُقِ ایستہ یں ام ایمنی تزوج ایتسون» دیو بیورمغله زید، آنی تزوج ایتدی و آنلردن (اسامہ) تولد ایلدی. رسول اکرم، آنی دخی کندی اولادی کبی سوردی.

بابا و اوغول، ایکیمی دخی رسول اکرمؐ خواص اصحابنددر و ایکیمی ده وقت سعادتده سر عسکر اولمشلردر. ام ایمن دخی مبارک و متیمن بر خاتون ایدی. احد غزاسنه حاضر اولوب غزاتہ صو اولاشدیریر و یارہ لولرہ تیمار ایدر ایدی. رسول اکرمؐ صکرہ حضرت ابوبکر و عمر، آنی زیارت ایدر لردی.

(صہیب رومی) موصل نواحی سندن اولوب روملر، اورالری غارت ایلدکلرنده آنی اسیر ایتشلر و بعض عربانه صاتمشلر ایدی. عرباندن دخی

(ابن جدعان) آلوب رسول اکرمه کونده رمشدی. اڤ اول اسلام ایله مشرف اولان اصحاب کزیندندر.

(سَلْمَانُ فارسی) ایران اهالیسندن اولوب برآراق اسیر دوشه رک بر یهودی به صاتیلمش و جزء ثانیده بیان اولدینی اوزره رسول الله، آنی اسارتدن خلاص ایتمشدر. اودخی خواص اصحاب کرامدندر.

(شُقْرَانُ) بدر غزاسنده بولندینی وقت کوله ایدی. صکره حضرت پیغمبر، آنی آزاد ایلشدر. رسول اکرمک غسل و دفنی خدمت شریفه سنده بولنانلردن بریدر.

(ابو رافع) حضرت عَبَّاسُ کوله سی اولوب آنی رسول اکرمه باغشلامشیدی. حضرت عَبَّاسُ اسلامنی تبشیر ایتدکده رسول اکرم، آنی آزاد و معتقه لرندن (سَلْمَى) یی آکا تزویج بیوردی. آنلردن (عبدالله بن ابی رافع) تولد ایلدی که حضرت علینک ایام خلافتنده کاتبی ایدی.

(سفینه) نامنده برکوله سی دخی اولوب آنی آزاد بیورمشلر ایدی. آندن (عبدالرحمن بن سفینه) تولد ایلشدر.

یونلردن باشقه رسول اللهک دها نیچه معتق و معتقه لری وار.

(رضی الله عنهم)





## خدمه رسول الله

رسول الله خدمت مخصوصه سنده بولنانلردن بری ( انس ابن مالک ) درکه اون سنه رسول الله خدمت ایدوب دعاسنی آلمش و یوز سنه دن زیاده معمر اولمشدر .

( ربیعہ بن کعب الاسلمی ) اصحاب صفہ دن اولوب رسول اکرمک آبدستی خدمتندہ بولنور ایدی وعجبا بر خدمت ظهور ایدرمی ؟ دیو صبا حه قدر باب سعادتده بکلردی .

( عبدالله بن مسعود ) حضرت پیغمبرک مسوا کداری ایدی وبر محله تشریف ایدہ جک اولدقلرنده نعلین شریفنی کیدریرر و چیقاردقلری وقت ، آنلری قوللرینه کچیروب محافظه ایلر ایدی .

( عقبه بن عامر الجهمی ) سفرلرده فخر عالمک استرینی یهده ردی . عالم وفقیه وشاعر فصیح اللسان ایدی . معاویه زماننده مصر والیسی اولمشدر . ( ابوذر الغفاری ) دخی فخر کائناتک خواص اصحابندن اولدینی حالده خدمت مخصوصه لرنده بولونور ایدی . بولنلردن باشقه شرف خدمت نبویه ایله مشرف اولان دهها بعض ذوات واردر .

( قیس بن سعد بن عبادة الانصاری ) دخی حضرت پیغمبرک یاننده بولونوب صانکه ( مدینه منوره ) نک ضبطیه ناظری مثابه سنده ایدی . حضرت ( علی ) و ( زبیر ) ایله برابر ( مقداد بن الاسود ) دیو معروف اولان ( مقداد بن عمرو ) و ( محمد بن مسلمة الانصاری ) و ( عاصم بن ثابت ) ایسه مستحق عقوبت اولانلرک جزالرینی اجرا ایدرلردی . ( رضوان الله علیهم اجمعین )



## مؤذّنلر

فخر عالمك درت مؤذنى وار ايدى كه ( بلال حبشى ) و ( ابن ام مكتوم القرشى ) و ( ابو مخذوره سمره ) و ( سعد القرظ ) در . ( بلال حبشى ) حضرت تلى ، اك اول اسلام ايله مشرف اولانلردن بريد . كوله ايكن اعلان اسلام ايله مشركلرك جور واذالرينه صبر وتحمل ايتمكده ايكن حضرت ابوبكر الصديق ، آنى صاتون آلوب حسبه الله آزاد ايلدكن صكره خدمت نبويه مداوم اولدى . ابتدا اذان و یرن واقامت كتورن اودر . بعد الهجره اصحاب كزينك اكثرى ، تجارت وفلاح ايله مشغول اولارق فرصت بولدقجه حضور نبوى كه كورلرايدى . بلال ايسه بر آن خدمت نبويه دن آريلمازدى . وقت فجر دن اول غایت مؤثر براذان ايله اصحاب تهجدى اويانديرير و نماز و قى جماعت ، حاضر اولدقده فخر كاشانى مسجد شريفه كتيرير ، بعده حجره منوره سنه كوتورور ، باب سعادتده طورور ، حضرت پيغمبرك هر خدمتى كورور ايدى . ايام سفرده دخى بر آن يانندن آريلمازدى . فخر عالمك وفاته قدر او وجهله مؤذنلكى خدمتنده بولندى . آندن صكره جهان باشنه طاركلدى . رسول اكرمك هجر و فراقيله مدينه ده طوراماز اولدى . حضرت ابوبكر ، وقت سعادتده كى احوالك اصلا بوزولماسى املنده اولديغندن بلال كندوزماننده دخى مؤذنلك ايتمىنى طاب و تكليف ايتدكده حضرت بلال ، آكا « اكر بنى نفسك ايچون صاتون آلدك ايسه آليقوى واكر الله ايچون آلوب ازاد ايلدك ايسه بنى كندى حالمه براق » ديو جواب و ير مش ايسه ده ابوبكر الصديق حضرت تلى ، نام خدايى ياد ايدرك يالوارمغله حضرت بلال ، برمدت مؤذنلكده قالمشيدى . لكن نهايت الامر طيانه ميوب جانب شامه كيتدى ، غزات مسلمينه التحاق ايتدى .

- فقط بلال حضرت تری ، جانب شامده ایکن رؤیاسنده رسول اکرمی کوروب « یابلال ؟ بو جفانه در ، بنی زیارت ایده جکک وقت کلدیمی ؟ » دیو بیورمش . بلال حبشی ، خائف وحزین اوله رق اوپامش . همان ده وه سنه بینوب تک وتنها چوللری یاره رق مدینه منوره وه وارمش وروضه مطهره اوزرینه قبانوب یوزینی طوپراقلره سورهرک آغلامقه ایکن سبطین مکرمین ، یعنی حسن وحسین رضی الله عنهما وارضاهما حضرت تری حقیقه کلمشار . بلال ، ینه حزن وتحسرایله بکا ایده رک خاک پاک قبرنبوی بی براغوب آنلره صاریلش . آنلر دخی « یابلال ! سنک مسجد شریفده رسول الله او قودیغک اذانی ایشیتمک ایسترز » دیملریله درحال حضرت بلال ، مسجد شریفک سطحنه چیقوب ووقت سعادتده اذان ویردیکی یرده طوروب ( الله اکبر ) دیدیکی کبی مدینه یرندن اوینادی ( اشهدان لا اله الا الله ) دیدکده مدینه چالقاندی ( ان محمداً رسول الله ) دینجه رسول الله دیریلش دهرک قیزلر ، سو قاقلره اوغرادی . مملکت آلت ، اوست اولدی . رسول اکرم دن صکره مدینه ده اوقدر آغلاش کورولما مشیدی . حضرت بلاله دخی حیرت کلدی او ، آذانی تمام ایده مدی .

بونک اوزرینه ینه شام طرفنه ، دوت و آرزوی شهادتله سرحداته طوغری عزیمت ایلشدر . بر مؤذن که اذان شریف مشروع اولدقه ابتدا آنک لساندن ایشیدیله وامامی فخر عالم اوله وداًما آکا همد اوله . آنک دیگر فضائلندن بحثه حاجت کورولمز .

( ابن ام مکتوم ) حضرت خدیجه الکبریاک دایسی اوغلیدر . بلال حبشی ، بوجه بالا اصحاب تهجدی اوپاندیرمق ایچون وقت فجر دن اول اذان ووروب ( ابن ام مکتوم ) ایسه صباح نمازینک تمام وقت اداسی کلدکده اذان ویریدی ورسول اکرم ، بر طرفه سفر ایتدکده ( بلال حبشی ) برابر کیمکه ابن ام مکتوم ، مسجد نبویه قالورایدی . کرات ایله رسول اکرم ، آنی مدینه ده قائم مقام برامشیدی .

( ابو محذوره ) نک صوتی لطیف اولوب پک کوزل اذان ویرایدی .



رسول الله ، آنی بعدالفتح مکده مؤذن تعیین بیورمشیدی . اولادی  
 ( هرون الرشید ) زمانده منقرض اولونجهیه قدر مؤذن اولمشلردر .  
 ( سعد القرظ ) عمّار بن یاسرک کولهسی ایدی . رسول اکرم ، آنی  
 قبايه مؤذن تعیین بیورمشیدی . بوجه بالا بلال حبشی ، شام طرفه  
 عزیمت ایلدکده ( سعدالقرظ ) مدینه منورهیه نقل ایله مسجد نبوی  
 مؤذنلکینه تعیین ایدیلدی . اولاکندوسی و صکره اولادی چوق زمان  
 مسجد رسول اللهده مؤذنلک ایتمشلردر . رضی الله عنهم ورضوا عنه .





## خطیب‌ار و شاعر‌ار

اصحاب کرام ایچنده پک چوق خطیب‌ار، یعنی کوزل نطق ایدنلر و نیچه شاعر‌ارلر وار ایدی . فقط ایچلرندن بعضارلی خطابت ، یا شعر ایله شهرت آلمشلر ایدی .

از جمله انصارک خطیبی اولان ( ثابت بن قیس بن شماس ) خطبانک و ( حسان بن ثابت الانصاری ) شعرانک اڭ شهرتیلرلی ایدی .

( عبدالله بن رواحه الانصاری ) هم خطیب ، هم شاعر ایدی . عقبه بیعتنده و بدر واحد و خندق وقعهلرنده و دیگر غزالرده بولمیش و ( موته ) جنککنده شهید اولمشدو .

( کعب بن مالک الانصاری ) دخی مشاهیر شعرای اسلامدندر . بیعت عقبهده و سائر مواقع مشهوردهده بولمیشدر ، فقط تبوک غزاسنه کیتامیشدر . جزء ثالثده بیان اولندینی اوزره ( کعب بن زهیر ) دخی صکرهدن مدینه منورهیه کلوب شعرای اسلامیهیه ملحق اولمشدر . رضی الله عنهم اجمعین .





## فقه‌های صحابه

(ابو بکر) و (عمر) و (عثمان) و (علی) و (عبدالرحمن بن عوف) و (عبدالله بن مسعود) و (ابی بن کعب الانصاری) و (معاذ بن جبل) و (عمار بن یاسر) و (حذیفه بن الیمان) و (زید بن ثابت الانصاری النجاری) و (ابوالدرداء) و (ابو موسیٰ الاشعری) و (سلمان الفارسی) اصحاب کرامت علما و فقهای اولوب وقت سعادتده بیله فتویٰ ویرلردی. عمر وعلی و معاذ بن جبل ، رسول اکرمک قاضیلری مثابه‌سنده ایدیلر . خلفای اربعه ایله عبدالرحمن بن عوف ، عشره مبشره‌دندر . ابن مسعود ، خدمه نبویه صره‌سنده دخی ذکر اولنمشیدی . ابی بن کعب ، عقبه‌ده بیعت ایدن انصار‌دندر . معاذ بن جبل ، تعلیم قرآن ایچون طرف نبویدن یمنه کونده‌ریلشدی . عمار بن یاسر ، خواص اصحاب کرام‌دندر . حذیفه بن الیمان ، رسول‌اللهک محرم اسراری ایدی . خدمت‌کتابتنده دخی بولنوردی . رسول اکرم ، آکا احوال آتیه‌یه دائر پک چوق سرلر کشف و بیان ایلش و منافق‌لرک اسم‌لرینی سویلش ایدی . حضرت عمر ، اسراره دائر اولان شیلری آندن صوراردی و بر جنازه وقوعنده حذیفه‌یی کوزه‌دوب آنک کیتمدیکی جنازه‌یه کیتمزدی . حضرت عمر ، بر حیات اولدقجه فتنه ظهور ایتیه‌جکنی دخی خبر ویرمشدی . رضی الله عنهم ورضوا عنه .





## کتاب حضرت پیغمبری

شیخین ، یعنی ابوبکر و عمر ، فخر کائنات ایکی وزیري مثابه سنده ولوب عثمان بن عفان و علی بن ابی طالب دخی وحی کاتبکی ایدرلردی .  
قط رسول اکرمک آنلردن بشقه کاتبلری دخی اولوب مشهورلری بوجه آتی بیان اولنور :

( سعید بن عاص بن امیة بن عبد شمس ) ک اوغلی ( خالد ) وحی کاتبی ولوب بسمله شریفه یی ابتدا یازان اودر و سابقین اولیندن اولوب هجرت اولنده حبشه کیتمش و فتح خیر ائناسنده مدینه منوره یه کلشدر . کوله سی ( معیق بن ابی فاطمه ) دخی قدمای مهاجریندن اولوب رسول اکرمک هر دارلق خدمتنده بولنمش و حضرت صدیق وفاروقک ایام خلافتلرنده یت مال امینی نصب اولنمشدر . سعیدک برادری ( ابان بن عاص ) دخی فتح مکه کونی اسلامه کلوب وحی کاتبی اولمشدر .

( شرحیل بن حسنہ ) ابتدا کی وحی کاتبلرندندر و سابقین اولیندن ولوب حبشه هجرت ایلش و ام حبیبه ایله برابر مدینه منوره یه کلشدر .  
اندن صکره دخی ملوک نامهلر یازمشدر .

حضر موت اهالیسندن و کبار اصحاب کرامدن ( علاء بن الحضرمی ) دخی وحی کاتبلرندن ایدی .

فقها صره سنده مذکور اولان ( ابی بن کعب ) که هجرت نبویه ده وحی کاتبی اولمشیدی . ابتدا مکتوب آخرنده امضا یازان اودر .

ینه فقهادن ( زید بن ثابت ) دخی وحی کاتبلرندن اولوب بشقه شیلرده یازاردی . اطرافدن کلن مکتوبلری ترجمه ایچون رسول اکرمک امریه یهود و سریانی کتابتی تعلیم و تحصیل ایتمشیدی . زیرده بیان اولنه جفی وجهله

حضرت صدیق اکبر علیه قرآن کریمی جمع ایدن اودر . ( عبدالله بن سعید بن ابی سرح ) حضرت عثمان بن عفانک سوت قرن داشی اولوب فتح مکّه دن اوّل اسلامه کلوب وحی کاتبی اولمشیدی . صکره نعوذ بالله مرتد اولغله فتح مکّه کونی دمی هدر قلنمشیکن حضرت عثمانک شفاعتیه عفو بیورولدی . بعده قوی مسلمان اولدی .

ابوسفیان که رؤسای قریشدن اولوب جزء ثالثه بیان اولندیغی اوزره فتح مکّه کونی اوغوللریله برابر اسلام ایله مشرف اوله رق مؤلفه القلوبدن اولمشیدی . قیزی ( امّ حبیبه ) امّهات مؤمنندن ایدی . بیوک باشلی وقیصیه قریب اوریه بویلو بر آدم ایدی . کرک کندوسی وکرک اوغوللری بعدالفتح مدینه منوره یه نقل خانه ایتشلردر . کرک ابوسفیان ، کرک اوغلی ( یزید ) کتابت نبویه خدمتده بولنشلردر . دیگر اوغلی ( معاویه بن ابی سفیان ) ایسه وحی کاتبی اولمشدر . اودخی درایت وبصیرت صاحبی بر ذات ایدی . بعض مورخین دیرکه : « ابی سفیان اوغوللرینک اکّ خیرلوسی ، مومی ایله ( یزید بن ابی سفیان ) در »

ابوسفیانک ( زیاد ) نامنده دیگر بر اوغلی دخی واردر . فقط زمان جاهلیتده جاری اولان اصول تزوج اقتضاسیجه دخی ولد زنا اولدیغندن ( زیاد بن ابیه ) دیرلرکه ( باباسنک اوغلی ) دیمکدر . صکره معاویه ، آنی برادرلکه قبول ایدرک ابوسفیان نسبته الحاق ایتمشدر .

( عبدالله بن ارقم القرشی ) که فتح مکّه سنه سی اسلام ایله مشرف اولمشیدی . طرف نبویدن ملوکه وسائر مکتوب یازاردی و نزد پیغمبریده یک مؤمن ایدی .

عشره مبشره دن ( زبیر بن العوّام ) ایله فتح خیر سنه سنده اسلام ایله مشرف اولان ( جهیم بن الصلت ) اموال زکات کاتبلری ایدی . ( مغیره بن شعبه الثقفی ) دخی ( حصین بن نمیر ) ایله برابر سائر معاملاتی یازارلر ایدی . اشبو مغیره بن شعبه ، بیعت رضوانده بولنشلدر وفرط ذکا ودرایت ایله معروف اولان درت ذاندن بریدر . آنلره ( دّهات

اربعة) دیرلرکه (مغیره) و (عمرو بن العاص) و (معاویه) و (زیاد ابن ابیه) در .

(بریده ابن الحصیب السهمی الاسلامی) که رسول اکرم، مکدن مدینه هجرت ایدرکن (غمیم) نام محله وصولرنده بنی سهمدن و کندی اهل بیتدن یتیمش نفر را کب ایله کلوب ایمان ایتشیدی . بر دفعه طرف نبویدن بنی سلیمه مکتوب یازمشدر .

(سہیل بن عمرو) برادری قدماى مهاجریندن (حاطب بن عمرو بن فہیره) و (ابو ایوب انصاری) و (عمرو بن العاص) دخی خدمت کتابت نبویه ده بولنان ذوات کرامنددر .

### امرای عسکریه

هجرت نبویه نك برنجی سنه سی جهاده و رخصت ویرلدى . سریه ، یعنی چته بکلری آره ، صره مدینه دن چیقوب مشرکلره تعرض ایدر اولدی . ابتدا کی امرای سریه ، حضرت پیغبرک عمتی (حمزه) و عم زاده سی (عبیده بن الحارث) و خاله زاده سی (عبدالله بن جحش) ایدی .

صکره (ابوبکر الصدیق) و (عمر الفاروق) و (عبدالرحمن بن عوف) و (ابو عبیده بن الجراح) دخی سریه امیری اولمشلردر . (علی بن ابی طالب) ایله (زید بن حارثه) ایسه دائما سریه و فرقه امارت لرنده استخدام بیوریله کلشلردر . اصحاب کرامدن (مقداد بن الاسود) دیو معروف اولان (مقداد بن عمرو) و خطبا و شعرادن (عبدالله بن رواحه) ایله (عکاشه بن محسن الاسدی) و (شجاع بن وهب الاسدی) و (محمد بن مسلمة الانصاری) دخی سریه بکلرنددر .

(عمرو بن العاص) و (خالد ابن الولید) اسلام ایله مشرف اوله رق مدینه منوره هجرت ایلدکلرنده ایکیمی دخی باشبوغلقدده استخدام



بیورلدیلر . علی الخصوص خالد بن الولیدی رسول اکرم (سیدالله) دیو  
تلقیب ایدرک دایما آنی امارت عسکریه ایله استخدام بیوردی .

او صرهدده (ابوقتاده الانصاری) و (سعد بن زید الانصاری) و (قیس  
ابن عباد الانصاری) و دیگر بعض اصحاب کرام دخی سریه بککنده  
استخدام اولنورلردی . جزء ثانیله بیان اولندیی اوزره ابوموسی الاشعری  
عممی (ابوعامر الاشعری) دخی او طاس محاربه سنده بر فرقه تک امیری  
ایدی .

زیر بن العوام ، قلیج اورمقده وسعد بن ابی وقاص ، اوق آتمقده  
فوق العاده ماهر و ایکسی دخی غایت شجیع و بهادر ایدیلر . (طلحه بن  
عبیدالله) دخی شجعمان اسلامدن ایدی . رسول اکرمک اک صکره نصیب  
ایتدیکی امیرالجیش (اسامة بن زید) درکه جزء ثانیله اولندیی اوزره  
حضرت صدیق ، بوامری انفاذ ایتمشدر . رضوان الله علیهم اجمعین .

سریه بکلرندن بری دخی قدمای مهاجریندن (عمرو بن امیه الضمری)  
رضی الله عنه ایدی که غایت جری و چالاک و الی چابوق ، چاقر پنجه لی بر  
مرد عیار ایدی و ایام جاهلیتده چوق سابقه سی وارایدی . نیجه مخاطره لردن  
قور تولمش ، آرته قالمش بر ذات غریب الطوار ایدی .

عصر اسلامده دخی (پیغمبر ساعیسی) دیو معروف اولوب امر تجسسده  
و تبلیغ مراسلاتده و دشمن ممالکینه کیروب چیقمهده حکایات غریبه سی  
واردر .

از جمله : هجرتک دردنجی سنه سنده (قاره) قبیله سندن بر جماعت ،  
حضرت پیغمبره کلوب « بزده اسلام وار . بر قاق آدم کوندهر . قرآن  
اوقوتسونلر ، تعلیم دین ایتسونلر » دیملیله رسول اکرم ، آلتی کشی  
کونده رمش و ایچلرندن (عاصم بن ثابت) ی آنلره رئیس تعیین بیورمش  
ایدی . مشرک لک غرضی ایسه آنلره غدر ایدوبده رؤسای مکهدن بر از  
شیء قایمق ایش . اوزرلرینه هجوم ایشلر ، عاصم ایله اوچ نفر رفیق ، مخالفت  
و مدافعه قیدنده اولمالریله آنلری شهید ایتشلر و باقی ایکسینی طوتوب احد

جنگنده اقباسی تلف اولان مشرکین مکيه صائمشر. رؤسای مکه، آنلری صلب و اعدام ایله تشفی صدر ایتمشر. حضرت پیغمبری اعدام ایتمک اوزره ابوسفیان طرفدن مدینه منورهیه کونده ریش اولان بر شخص دخی طوتولدی. بناء علی ذلک ابوسفیانی اعدام ایتمک اوزره طرف نبویدن عمرو بن امیه، مکيه کونده ریلدی. انصاردن ( سلمة بن اسلم ) دخی آکا ترفیق ایدیلدی.

عمروک برده وه سی اولوب سلمه یی دخی آکا بیدیریر ایدی. مکيه تقریرلنده عمرو، ده وه سنی ایکی جبلک آره سنده بند ایدوب براقدی. سلمه یه « هایدی طوغری ابوسفیانک یانه واروب آنی اعدام ایدیورمه » دیمش ایسه ده سلمه « اوللا بیت شریفه کیدوب طواف ایتمک وایکیشر رکعت نماز قیلسمهق » دیمکه کیدوب طواف ایتمشر و نماز قیلیمشر. او ائنده ابوسفیانک اوغلی معاویه، عمروی کوروب طانیقله « ایشته عمرو بن امیه » دیو باغرمش. عمرو ایسه زمان جاهلیتده سابقه لی وقورقونج بر آدم اولغله ایشیدنلر « عمرو، بورایه البته سوء نیت ایله کلمشر » دهرک قوشمشر و عمروک آرقه سنه دوشمشر. عمرو، آرقداشنه « ایشته بنم قورقدیغم بو ایدی. آرتق ابوسفیانه یول یوق. بز، همان باشمک چاره سنه باقلم » دیوب قاچمشر. خارج مکده برطاغه چیقوب بر مغاره یه کیرمشر و کیجه اوراده قالمشر. عمروی آرامغه چیقانلردن ( عثمان بن مالک التیمی ) آتیه سوار اوله رق صباخلین اومغارنه ک اوکنه کلدکده عمرو، قیلان کبی صیجرا یوب خنجر ایله عثمانی اورونجه جان آجیسیله او یله فریاد ایله مش که مکدن ایشیدنلر.

اطرافده سسنی ایشیدنلر، سکیردوب کلورلرایکن عمرو، ینه مغاره یه کوروب صاقلانمش. کلنلر، عثمانی صوک نفسمده بولمشر و « سنی کیم اوردی؟ » دیدکلرنده « عمرو » دیوب جان ویرمش « عمرو مغاره ده » دیمش. آنلر، جنازه یی نقل و دفن ایتمک تلاشنه دوشمشر. آرایجیلر ایسه عمروی بولق ایچون اطرافه قوشمشر. عمرو دخی « آرایجیلرک آرقه سی

کسیلسون ده اوزمان چیقالم ، دیه‌رک سلمه ایله برابر ایکی کیجه دها او مغاره‌ده قالدقن صکره چیقمشلر . سلمه ، ده‌وه‌یی بولوب یینمش و مدینه منوره‌یه کلوب کیفیتی رسول اکرمه بیلدیرمش . عمر وایسه اوکون یوریوب خیلی یول آلدقن صکره اخشام اوستی (ضَجَّان) نام محله واصل و برمغاره‌یه داخل اولوب کیزلیدیکی صمرده ( بنی دُئل ) قبیله‌سندن برقیون چوبانی کلوب مغاره‌یه کیرمش و « سن کیمسک؟ » دیمش عمرو دخی « بنی دئل قبیله‌سندیم » دیمکه چوبان یان یاتوب

( بیت )

صاغ بولندقجه مسلمان اولمام سالك مسلك ایمان اولمام  
دیو تغنی ایدرک او یودقده عمرو ، آنی اعدام ایتدکدن صکره چیقوب مدینه منوره‌یه کلورکن رسول اکرمک احوالی تجسس ایچون رؤسای مکه طرفندن چیقاریش اولان ایکی جاسوسه لدی التصادف برینی اوقایله اوروب اولدورمش و دیکرینی طوتوب حضور نبوی‌یه کتیره‌رک واقع حال نه ایسه خبر ویرمش . رسول اکرم ، تبسم بیورمش و عمروه دعا ایتمشدر . عمروک بوکبی دها نیجه غریب قصه‌لری واردر . صکره قصاصلر [\*] دخی آنلره برچوق ماصالدر قاتمشدر .

### امرای ملکیه و مأمورین مالیه

هجرت نبویه‌نک بشنچی سنه‌سی وقایعی صمره‌سنده بیان اولندینی اوزره ( بنی مصطلق ) عشیرتی ، تأدیب ایله اسلام و انقیاده کتورلمش ایدی . مؤخرآ آنلرک زکاتنی قبض ایچون حضرت عثمان بن عفانک آنا برقرنداشی اولان ( ولید بن عقیبة بن ابی معیط ) کونده ریلوب آنلرک یوردینه یا قلاشدقده تعظیم [\*] قصاص : قصه‌کو ، افسانه‌خوان ، ماصالجبی .

ایچون آکا قارشو چیقمشلر ایدی . حال بوکه : ولیدایله آرهلرنده زمان جاهلیتدن قاله عداوت اولدیغندن ولید ، اوغلبه ایکی کورونجه کندوسنه سوء قصد ایچون چیقمشلر دیو وهم وخوفه تابع اوله رق هان عودت ایله حضور نبوی یه کلوب « بنی مصطلق ، مرتد اولمش . اوزریمه سلاح ایله کلدیله . مال زکاتک اعطاسنه ممانعت ومخالفت ایلدیلر » دیمکله اوزرلرینه عسکر کونده رمکه قیام ونیت بیورولدی .

ایشته او ائنده ( یا ایها الذین آمنوا ان جاءکم فاسق بنبأ فتبینوا ان تصیبوا قوماً بجهالة فتصبحوا علی ما فعلتم نادمین ) آیت کریمه سی نازل اولمشیدی . مفهوم منیفی بودرکه : ای مؤمنین ! برفاسق ، سزه برخبر کتورر ایسه طورک ، تفحص وتحقیق ایدک که بیلیمه یرک برقومه کوتواک ایله طوقونوبده ایشلدیکنگزه نادم اولمایه سکز .

فی الواقع صکره بنی مصطلقک اذان ووروب تماز قیلیمقده اولدقلری تحققیق ایتمشدر وبعض معتبرانی ، حضور نبوی یه کلوب تبریه ذمت ایشلدر .

بدایت حالده تحصیل عشر وزکات ایشی پک مهم ایدی . حضرت علی وعدی بن حاتم طائی کی کبار صحابه دن بعض ذوات کرام ، بو خدمت سنیه ده استخدام بیورولمشدر . تحصیل اموال زکات وسائر خصوصات ایچون رسول اکرمک استخدام بیوردقلری مأمورلر چوقدر . جمله سنی تعداده حاجت یوقدر . فقط بعض مشاهیری بوجه آتی ذکر و بیان اولنور :

یمنده ( همدان ) قبیله سی مشایخندن ( قیس بن نمط الارحبی ) هجرت نبویه دن اول مکّه مکرمه یه کلوب اسلام ایله مشرف اوله رق عودت ایلدکده کندی قومی اولان ( ارحب ) عشیرتنک چوغنی ایمانه کلکله قیس ، هان رسول اکرمی آلوبده یمنه کوتورمک اوزره مکّه یه کلش ایسه ده رسول اکرم ، اولجه مدینه منوره یه هجرت بیورمش ایدو کندن مدینه منوره یه کلدکده قومنه حاکم نصب اولنه رق برقطه فرماننامه هایون ایله اعاده بیورولمشدر . موخرأ حضرت علی المرتضی ، یمنه تشریف ایتدکده اشبو همدان قبیله سی ، طوبدن اسلام ایله مشرف

اولمشدر . ملوك ايران نسلندن اولوب مقدماسرى طرفندن يمن واليسى نصب اولنان (بازان) مؤخرأ اسلام ايله مشرف اولدقده رسول الله ، آنى بتون اقليم يمنه والى نصب وتعيين بيوردى . فقط بعض نواحى يه تعليم امور دينه ايجون فقها وزكات وجزیه اموالى قبض ايجون امناسكوندهردى . حج وداعدن عودت بيوردقلى ائنده بازانك وفاى خبرى وارد اولمغله ممالك يمنى ، متعدد امارتلره بالتقسيم صنعانى ، آنك اوغلى (شهر بن بازان) . و (زَمْع) و (زَبِيد) جهتنى وحى كاتبلرندن (خالد بن سعيد بن العاص) . و بلدة (مأرب) فقهادن و قدماى مهاجريندن (ابو موسى الاشعري) يه و (كَنْدَه) يى اُمّ المؤمنين اُمّ سلمه رضی الله عنها حضرتلرينك برادری (مهاجر بن امیه) يه و (حضرموت) قطعه سنى انصار كرامدن (زياد ابن ليث الدياضى) يه و ديكر قطعه لرى دخى اصحاب كرامندن برر ذاته توجیه بيوردى .

فقهادن وانصارك سابقين اولينندن (معاذ بن جبل) دخى او حوالى يه معلّم نصب اولمغله يمن و حضرموت آره سنده دور ايدردى و مقدمات فتح مكده (عتاب بن اسيد) امير مکه و (عثمان بن ابى العاص الثقفى) امير طائف نصب و تعيين بيورلمشيدى .

(يزيد بن ابى سفيان) دخى (نِيْمًا) يه و عمرو بن سعيد بن العاص (وادى القرا) يه و برادری (سعيد بن سعيد) (عَرَبِيْنَه) قراسنه و ديكر برادری (أَبَان بن سعيد) بحرینده (خط) نام بلده يه حاكم اولمشدر . رضی الله عنهم اجمعين .

### مبعوثين و سفرای پیغمبرى

نبیّ محترم صلى الله عليه وسلم حضرتلری ، حدیبیه دن عودن ايلدكده نامه هايون ايله ملوك اطرافه آلتى ايلچى ارسال بيوردى ، يعنى كسراى عجم



اولان ( خسرو پرویز ) ه ( عبدالله بن حذافه السهمی ) یی و یمامه ملکی  
 ( هودنه بن علی ) یه ( سلیط بن عمرو العامری ) یی و قیصر روم اولان  
 ( هرقل ) ه ( دحیة بن خلیفه الکلبی ) یی و ملوک غساندن ( حارث بن ابی شمر ) ه  
 امرای عسکرینه دن ( شجاع اسدی ) یی و حاکم مصر اولان ( مقوقس ) ه  
 ( حاطب بن ابی بلتعہ ) یی و ( نجاشی ) یه ، یعنی حبش حکمدارینه امرای  
 عسکرینه دن ( عمرو بن امیہ الضمری ) یی کونده ردی .

بوسفرا ، هپ قدمای مهاجریندر . عبدالله بن حذافه ، تجارت ایلہ ایرانه  
 کیدوب کلنلردن ایدی . سلیط عامری ، سکران و سهیل بن عمروک برادریدر .  
 دحیه ، حسن و جمال صاحبی بر ذات اولوب رسول اکرمه جبریل امین ،  
 آنک صورتنده کلورودی . شجاع اسدی ، برادری عقبه بن ابی وهب ایلہ  
 برابر بدرده و غزوات سائرده بولمیشدر . حاطب بن ابی بلتعہ دخی اهل  
 بدردن معروف بر ذاتدر . عمرو بن امیہ ، سریه بکلرندن اولوب بالاده ترجمه  
 حالی بیان اولنان مشهور عمرودر .

بعده حارث بن عمیر الازدی ، سفارتله بصرای شام طرفنه کونده ریلدی .  
 امرای غساندن ( شراحیل عمرو الغسانی ) اثنای راهده آنی اخذ و قتل  
 ایتدی . ایشته موته غزاسی بوندن نشأت ایتمشدر .

بعده نامه هایون ایلہ بنی عبدالقیسدن ملک بحرین اولان ( منذر بن  
 ساوی ) یه وحی کاتبلرندن ( علاء بن الحضرمی ) و عمانده حکومت ایدن  
 ( جلندی ) اوغوللرینه مشهور ( عمرو بن العاص ) ارسال بیورولدی .  
 صکره علا ، بحرینه و عمرو بن العاص ، عمانه والی تعیین بیورولمشدر . زیر  
 بن العوامک برادری قدمای مهاجریندن ( سائب بن العوام ) دخی مکتوب  
 مخصوص ایلہ ( مسیلمه الکتاب ) ه کونده ریشیدی .

ینه سفارتله وحی کاتبلرندن ( شرحیل بن حسنه ) ( ایلہ ) حاکمنه  
 و ( ظیان بن مرید السدوسی ) ( بنی بکر بن وائل ) قبیله سنه ارسال بیورولمشدر .  
 ( هجر ) مجوسیلرینی دینه دعوت ایلک و قبول ایتزلر ايسه جزیه آلمق اوزرہ



اصحاب صفه دن مشهور ( ابوهریره ) مقدّماء علاء بن الحضرمی ایلہ برابر او طرفہ کونده ریشیدی. مؤخرّاً حضرت عمر الفاروقک همشیره سی ( صفیه بنت الخطاب ) ک زوجی قدمای مهاجریندن و اهل بدر دن ( قدّامة بن مظعون القرشی ) ابوهریره ایلہ برابر منذر بن ساوی یه کونده ریشلشدر .

بونلردن باشقه طرف نبویدن سفارته ، یا خصوصی مأموریتله اطراقه بعث وارسال اولنش خیلی ذاتلر واردر . از جمله معهود ابو جهلک آنابر برادر ی، سابقین اولیندن ( عبّاس بن ربیعۃ المخزومی ) سفارته بعض امرای حمیره کوندریش و صکره بالاده بیان اولندیفی اوزره یمنده ( کنده ) امیری نصب و تعیین بیورولمشدر .

وفات نبویدن آولجه اشراف یمندن ( جریر بجلی ) حضرتلری ، یمندن سفارته نزد پیغمبری یه کلوب اسلام ایلہ مشرف اولغله طرف نبویدن سفارته بعض امراء یمنه کونده ریشلشدر . رضی الله عنهم اجمعین .

( بحرین حکمدارلری ) کسرانک والیلری حکمنده اولدقلری کبی ( ملوک غسان ) و ( حاکم ایلّه ) دخی قیصرک والیلری حکمنده ایدیلر . مصر دخی قیصرک ایالاتندن معدود ایدی . لکن رسول اکرم صلی الله علیه وسلم حضرتلری ، اعلان واعلائی دین مبین ایچون مبعوث اولوب ملک و دولت صددند بولندیغندن تابیی متبوعدن آیریمبوب کسری و قیصر ایلہ برابر آنلره تابع اولان ملوکه دخی نامه وایلچی ارسال ایلہ جمله سنی برسیاقده دین اسلامه دعوت بیورمشدر . بورالری لایقیله آ کلاشیلحق ایچون اوزمانک احوالی بروجّه آتی مجملّاً بیان اولنور .

## اجمال احوال

زمان سعادتده جزیره العربیه مجاور ایکی بیوک دولت وار ایدی که بری ایران دولتی و دیکری قسطنطنیه قیصرلنی ایدی . بوایکی دولت ، خیلی مدت

یکدیگر به شدت ملی محاربه لر ایدوب کسرای عجم ، سوریه بی استیلا ایله مصره تجاوز ایلش و آناتولی بی استیلا ایله قسطنطنیه بی قورقوش ایکن قیصر هرقل ، ایرانلره غلبه ایدرک او ممالکی استرداد ایله موصله قدر تخطی ایلش و بوجهه ایکی دولت دخی ضعیفه مش ایدی .

وقتیله عربلرک یمنده بر بویوک دولتلری وار ایکن ( ملوک حمیر ) منقرض اولوب حبشلر ، برو طرفه عبور ایله یمنی ضبط ایلشلر ایدی . بعده کسری نوشروان ، عسکر سوق ایدرک حبشلری یمندن طرد ایله حمیرلردن بر والی نصب ایتمشیدی صکره ایرانلردن صنعاده بر یمن والیسی بولنور اولدی ،

( سَیْلُ الْعَرَم ) حادثه سندن صکره ، یعنی بلده ( مأرب ) ک سد و بندلری منهدم اوله رک مملکت خراب اولدینی صروده ابتدا ( بنی اَزْد ) و بعده ( بنی جُذَام ) و ( بنی طِی ) و ( بنی لَحْم ) یمندن چیقوب اطرافه یایله مشلر ایدی . بولر ، ایچلرندن برر معتبر ذاتی کندولرینه ملک ، یعنی شیخ المشایخ نصب ایدرلردی . صکره اوشیخلردن بعضیلری ، تزید قوت ایله بیوک وقوی حکومتلر تأسیس ایتشلردر . شویله که : بنی ازدک بر قسمی ، عمانه واروب اوراده حکومت ایدر اولدیلر . وقت سعادتده عمان حکومتی آنلردن جلندی اوغوللری ( جِیْفَر ) و ( عَبد ) نام ایکی برادر النده ایدی .

بر قسمی ، یتربده ، یعنی مدینه ده توطن ایتدی که انصار رسول الله اولان ( اوس ) و ( خزرج ) در .

دیگر قسمی ، سوریه حدودینه کلوب آنلردن ( آل جَفَنَه ) شامک جنوب شرقیه سنده بر حکومت تأسیس ایتدیلر و نصاری دینه کیردیلر . آنلره ( ملوک غَسَّان ) دینلور . حکومتلری ( بَلَقَا ) دن ( تَدْمُر ) و نهر فرات یالیدنه قدر ممتد و نیچه یوز سنه لر پایدار اولدی . لیکن حکومتلرنده مستقل اولیوب قیصر رومک والیلری حکمنده ایدیلر . آنلردن ( حارث

بن ابی شمر الغسانی ( حکمدار ایکن فخر عالم صلی الله علیه وسلم حضرت تلمی ، نبوت ایله مبعوث اولمشلردر .

( بنی جذام ) دخی ( یَبُوع ) و ( ایله ) حوالیسندن متوطن اولوب ( فروة بن عمرو الجذامی ) قیصر روم طرفدن ( معان ) حوالیسندن بولان عربلرک اوزرینه مأمور و حاکم ایدی ، بنی طیّی ، یعنی طی قبیلهسی ، شعوب کثیریه منقسم و اطرافه متفرق اولمشلردر .

اما بنی لخم ، بلاد عراقه کلوب آنلردن ( آل نصر ) ( حیره حکومتی ) نی تأسیس ایتدیلر . آنلره ( مناذره ) و ( ملوک حیره ) دینلور ، حکومتلری خیلی وسعت و قوت بولدی و نیجه یوز سنه لر باقی اولدی . ملوک غسان ایله بینلرنده بک چوق محاربه لر وقوع بولمشدر . آنلر دخی حکومتلرنده مستقل اولوب کسرای عجمک والیلری حکمنده ایدیلر .

آنلرک خاتمه سی اولان مشهور ( نعمان بن منذر ) یکریمی درت سنه حیره حکمدارانی ایتدکدن صکره کسرای عجم اولان ( خسرو پرویز ) آتی اعدام ایله حیره حکومتی بنی لخمدن آلوب طی قبیلهسی رؤساسندن ( ایاس ابن قیسّه ) یه ویردی و بنی لخمی ، حیره دن طرد ایله یرلرینه طی قبیله سندن خانه لر کتوردی .

ایشته او ائناده فخر عالم حضرتلری ، رسالت ایله مبعوث اولدی . آندن صکره عرب و عجم آره سندن مشهور ( ذی قار ) محاربه سی وقوع بولدی .

شویله که : کسری ، مناذره یی حیره دن طرد ایتمکه کندینی عربستانده تزیید نفوذ ایتمش ظن ایدردی . حال بوکه : نعمانک قتلندن طولانی قبائل عرب ، کوجنوب ایران دولتندن صوغومش اولدیلر .

ایاس ، هر نه قدر بر بیوک عرب قبیله سی شیخلرندن اولق حسیبله جنسلرندن ایه ده هنوز آکا ایصینه مامش اولدقلری جهته آکا اوته دن برو ریاستلرینه آلیشمش اولدقلری ( مناذره ) قدر احترام ایتملردی . حال بوکه

نعمانك ( بنی بكر بن وائل ) دن منشعب اولان ( بنی شیبیان ) قبیله سی شیخی ( هانی بن مسعود ) نزدنده ودیعه اولان کایتلوزره وسائر سلاحرینی آنک قتلدن صکره کسری ، آلمق ایستیوب هانی ایسه « بنده امانتدر ویره م » دیمکله کسری ، غضبه کله رک بتون بکر بن وائل قبیله لرینی احما ایتک اوزره حیره به براردو سوق ایتدی . ایاس طائی دخی بالذات آکا تابع اولان عشایر عرب ایله برابر بواردویه التحاق ایدوب سردار ایران ایله برابر کوفه جوارنده ( ذی قار ) نام موقعه قونمش اولان بنی بکر اوزرینه حرکت ایلدیلر .

بنی بکر ، بادیء امرده تلاش ایدوب حتی هانی بن مسعود ، چوللره چکیلوب صاووشمق رأینده بولنمش ایکن بکر بن وائلدن منشعب ( بنی عجل ) قبیله سی شیخی ( حَنْظَلَه ) ثبات کوستردی وسائر جسارت ویردی . هانی دخی آکا اقتفا ایتدی ونعمانك کندوسنده امانت اولان اسلحه سنی عسکره طاغیتدی .

هپ بنی بکر ، فداییلک یولنده مدافعه به حاضرلاندی و ایران اردوسنک ورودنده غایت خونریزانه برمقاتله به باشلاندی . پک شدتلو بر محاربه وقوع بولدی . ایران اردوسی ، تبدیل موقعه ایتمکه مجبور اولدی . فرداسی ینه حربه کیریش یلدی . ایران اردوسنده بولنان ایاد قبیله سی ، صورت انهمام کوسترمکله ایرانلور ، بوزولدی . پک چوغی قیریلدی . قاچانلر دخی صوسزلقدن تلف اولدی . ایاس طائی ، کوچ حال ایله قاچوب قورتولدی . اوکون رسول اکرم صلی الله علیه وسلم حضرتلری ، حضور سعادتلرنده بولنان اصحاب کزینه ( بوکون عربلر ، عجمدن انتقام آلدی ) دیمکله اوکون ضبط اولنوب بعده ذی قار محاربه سنک خبری کلدی ولدی الحساب اوکون وقوع بولمش ایدوکی معلوم اولدی .

ایشته بو محاربه ، کسرانك عربستانده کی نفوذینه خیلیدن خیلی ضعف و خلل کتورمشدر .

چونکه بنی عدنان ( مضر ) و ( ربیعہ ) دیو ایکی قسمه منقسم اولوب

بنی مضر (کنسانه) و (قریش) و (هوازن) و (ثقیف) و (بنی تمیم) و (مُزَینَه) کبی نیچه بطن وشعبه لره منشعب اوله رق حجاز و نجد طرفلرینه منتشر ایدیلر .

ربیعہ دخی (عَترَه) و (عبدالقیس) و (بنی وائل) کبی بطن وشعبه لره و بنی وائل دخی (بنی تَغَلَب) و (بنی بکر) دیو ایکی قسمه منقسم ایدی . بنی تغلبک منازلی (الجزیره) ده ایدی . بکر بن وائل ایسه قوت وشهرتجه دیکرلرینه فائق و (بنی عَجَل) و (بنی شبیان) کبی نیچه قبیله لره منقسم اوله رق عمان و یمندن بصره و کوفه جهتلرینه قدر منتشر ایدیلر . بکر بن وائلک بر شعبه سی اولان (بنی حنیفه) قبیله سی (یمامه) دیارینی ضبط ایشلر ایدی .

یمامه : شرقاً بحرین و دیار بنی تمیم و غرباً حدود یمن و حجاز و جنوباً نجران و شمالاً ارض نجد ایله محدود اوله رق طولی یکرمی مرحله در . بنی حنیفه نك رئیس اولان (هؤذة بن علی) نصرانی اولدینی حالدہ کسری، آنی عطایا و هدایا ایله جلب و تألیفدن خالی اولمازدی . زیرا یمنه کیدوب کلان ایران قافله لری ، آنک محافظه و حمایه سنه محتاج ایدی .

بحرین الکاسی که : شرقاً بحر فارس و غرباً یمامه و جنوباً بلاد عمان و شمالاً بصره دیاری ایله محدود و (هَجَر) و (قطیف) قطعه لری حاویدر . بادیه لرنده بنی تمیم ایله عبدالقیس و بکر بن وائل قبیله لری متوطن ایدی وزمان سعادتده بحرین ملکی تیمک بر شعبه سی اولان (بنی دارم) دن (منذر ابن ساوی ایدی) . الحاصل بنی بکر وائلک اوجهته زیاده قوت و کثرتلری وار ایدی . کسری ، آنلری کسمک ایچون جسیم اردولر سوقنه محتاج ایدی . حال بوکه ایران دولتنک حالی آکا مساعد اولمادیغی زیرده بیان اوله حق وقوعاتدن معلوم اولور .

یمنک حضر موت جهتنده متوطن اولان (کنده) قبیله سنک مقدمایمن و حجاز طرفلرنده حکومتلری اولوب بر آراق ملوک کنده ، خلیججه قوت

یوله‌رق برو طرفلره تخطی و دیار بکری ضبط و حیره ملوکنه غلبه ایتمشلر ایسه‌ده چوق سورمیوب متفرق اولمشلردر. بونلرک خاتمه‌سی اولان (حارث کندی) مقتول اولدوقده اوغلی شاعر مشهور (امری القیس) پدرینک حکومتی ضبطه خیلی چالیشدی ایسه‌ده موفق اولامادیغندن استمداد ایچون قیصر رومه کلوب او دخی کندیسینه اعانه ایچون عسکر ترتیب ایله آنی اعاده ایتمش ایسه‌ده عربستانه کیدرکن اثنای راهده فوت اولمشدر.

سائر قبائل عرب، بر حکومته بویون اکیوب کندی شیخلرینک هواسنه تابع اوله‌رق یکدیگریله جنک وجدالدن خلی دکلر ایدی.

فقط سنه‌ده درت آی (شهر حرم [\*]) اولوب بو درت آی ایچنده یکدیگره تعرض حرام اولدیغندن بو آیلرده سربست اوله‌رق دیله‌دکلری محالره کیدوب کلورلرایدی.

قریش قبیله‌سی ایسه جملة قبائل عرب عنندنه معزز و محترم اولوب هر وقت ایسته‌دکلری یرلرده سربست کزرلردی. چونکه سکان حرم شریف ایدیلر و عربلرک مطاف و زیارتگاه ای اولان بیت شریفک مفتاحی آنلرده ایدی و ماء لذیذ اوزاقدن جلب اولندینی جهتله مکده نادر بولندینی حالده آنلر، زواره ماء لذیذ و بلکه نیذ ایچیرلردی. ایام حجه سماطلر کشیده ایدوب حجاجه یمک یدرلرلر ایدی.

بناء علیه هر زرده اولسه «بز، اهالی حرم» دهرک هر درلو تعرضاتدن امین اولورلرایدی. بو وجهله یاز و قیش هر طرفه کیدوب کلورلروسربست اوله‌رق تجارت ایدرلردی و عبدمنافک درت اوغلندن هر بری برر سمتک تجارتیه مألوف ایدی، شویله‌که: (هاشم) شامه و (عبد شمس) حبشه و (مطلب) یمنه و (نوفل) ایرانه کیدوب کلوردی و هر بری کندوسنک سمت تجارتنده اولان ملوک و شیوخدن امان آلمشلر ایدی.

سائر تجارت قریش دخی بلاد مذکوریه بو درت برادرک امانیه کیدوب کلورلرایدی.

[\*] رجب، ذی القعدة، ذی الحجه، محرم آیلری.



بنی عبد مناف ، بو وجهله قبیله قریش ایچنده ممتاز اولدقلری خالد  
عبد المطلب بن هاشمك زمزم قویوسنی كشف و تطهیر ایتمی ، قریشه  
وبالحاصله بنی هاشمه بر مرتبه دها شرف و یردی و عبدالمطلب زماننده بر  
وقعه خارق العاده قریشك شان و مریتنی فوق العاده آرتیردی .

شویله که : کعبه یی ییقمق ایچون یندن کلن اصحاب فیلک بغته خارج  
مکده تلف اولمالری ، عربلرک بیت حقنده اولان اعتقادلرینه قوت و یردی .  
قریشك شان و شرفنی ائک یوکسك بر درجه یه چیقاردی و ( دارالندوه ) یعنی  
( دار شوری ) مکده اولوب بر امر مهم ظهورنده کرك قریشدن ، کرك  
سائر قبائل عربدن اهل ریاست اولانلرک قرق یاشنه بالغ اولان رئیسلی  
اوراده اجتماع ایله مشورت ایدرلردی . قریشك نکاحلری دخی دارالندومه  
عقد اولنوردی .

الحاصل بویله بین القبائل موجب شرف و اعتبار اولان منصب و وظیفه لر  
هپ قریشده ایدی واکرچه ایچلرنده جمله امورده مرجع اوله جق بر ملک یوق  
ایدی . لکن قریش قبیله سی ، ( هاشم ) و ( امیه ) و ( نوفل ) و ( عبدالدار )  
و ( اسد ) و ( تیم ) و ( مخزوم ) و ( عدی ) و ( جمح ) و ( سهم )  
عنوانلریله اون بطنه منقسم اولوب هر برنده بر ولایت عامه ، یعنی وظیفه  
معینه وار ایدی که رئیسلی ، آکا متصرف اوله رق جمله سی برر وجهله  
حصه دار شرف و افتخار اولورلردی .

شویله که : ( سقایات حاج ) بنی هاشمده اولوب مقدا بو وظیفه یی  
( ابو طالب بن عبدالمطلب ) ایفا ایدردی . صکره برادری عباس بن عبد  
المطلبه انتقال ایدوب کرك زمان جاهلیتده و کرك وقت اسلامده حجاجه زمزم  
اولاشدیر مشدر . حتی موسم حجه فخر موجودات علیه اکمل التحیات  
حضرتلری دخی عممی عباس النذن زمزم ایچمشدر .

( عمارت مسجد حرام ) دخی بنی هاشمه عائد بر وظیفه ایدی که حرم

شریفی ایجابنه کوره تعمیر و سوپوروب تنظیف و فرش ایله تزین و قندیل و موم و ذکر و عبادت و تدریس علوم ایله مادی و معنوی تنویر ایتک دیمک اولوب دنیا لاقیردییسی ایلک کبی عبات یرینه یاقیشمایه جق شیردن تخلیه دخی عمارتدن معدوددر . بناء علیه زمان جاهلیتده دخی مسجد حرامده رفع صوت ایله کورولتو ایله مک و فنا سوز سویلهمک قریشک آداب عمومیه سندن ایدی و ناسی بو درلو معامله لردن حضرت عباس ، منع ایدردی .

بیت شریفک مفتاحی عبدالدار اوغوللارنده اوله رق انلر آچوب قباردی ( بیراقدارلق ) وظیفه سی دخی آنلرده ایدی . احد غزاسنده آنلرک کیمی مقتول و کیمی مجروح اولدی . بو وظیفه ( عثمان بن ابی طلحه ) یه قالدی . ( عَقَاب ) دینلن قریش سنجانخی دخی بنی امیه النده ایدی . وقت حربده قریش کیمک اوزرینه اتفاق ایلر ایسه عقاب ، آکا و یریلوب امیر الجیش او، اولوردی و اتفاق ایتدکلری تقدیرده عقاب ، کیمک النده ایسه او، رئیس و امیر اولوردی .

وقت سعادتده عقاب ، بنی امیه دن ابوسفیانک النده ایدی . بدر غزاسنده قریشک قوماندانلری تلف اولمغله ابوسفیانه رقیب قالدیغندن ریاست و امارت جیش ، بالطبع آنده تقرر ایتمشیدی . ( موسم حجه حجاجه ضیافت و یرمک ) وظیفه سنی دخی بنی نوفلن ( حرث بن عامر ) ایفا ایدیوردی .

( مشورت ) دخی بنی اسددن ( یزید بن زمعه بن الاسود ) ده اولوب قریش ، آکا دانیشمان دارالنوده عقد مجلس مشورت ایده منزلردی . اشبو یزید بن زمعه ، طائف غزاسنده شهید اولمشدر .

( دیات و تضمینات ) بنی تمیمدن حضرت ابوبکر الصّدیقک وظیفه سی ایدی . بونلره آنجق او، قرار و یریردی و زمان جاهلیتده دخی کمال عفت و استقامت ایله معروف اولوب عامه نک آکا امنینی وار ایدی . صانکه قریشک امور عدلیه مأموری مقامنده ایدی .

( قبه ) که مهمات عسکریه نک جمعی ایچون قورولان چادردر . او

دخی بنی محزومدن خاد بن الوليدك النده ایدی . (سوارى نظارتى) دخی آنده ایدی .

(سفارت) دخی بنی عیدین عمر بن الخطابك وظیفهسى ایدی . صانكه قريشك امور خارجيه مأمورى مقامنده ایدی .

(ازلام) یعنی قار او قزلیله قال آچق . بنی جمحدن (صفوان بن امیه) نك وظیفهسى ایدی . شویله كه : برايشه تشبث اولنه جنی وقت ایكى اوكك برینه (امر) و دیگرینه (نهی) یازوب برظرف ایچنه قودقدن صكره النى صوقوب قغیسی چیقارسه موجبنجه عمل ایتمك قريشك عادتى اولوب یونى صفوان ، اجرا ایتمدكه قريش ، او ايشه تشبث ایلزدی .

(بتلره نذر و تقدیم اولسان اموالك محافظهسى) دخی بنی سههمدن (حرث بن قیس) ه عائد بروظیفه ایدی .

فتح مكده رسول اکرم بو تشریفات و اعتباراتى رفع و الغا و فقط مفتاح سعادتى عبدالدار اوغوللرنده و سقاییت زمزمى حضرت عباسده ابقا بیورمشدر .

رؤسای قريش ، ايشته او پایدار ايله انظار قبائله معتبر و مخترم اولوب بو قوت ايله دین اسلامك انتشارینه مانع اولورلردی . ابوبكر الصديق ايله عمر الفاروق رضی الله عنهما ، اسلام ايله مشرّف اولوبده وظیفه و پایهلرینی دین مبین اوغرنده ترك و فدا ایدرك رؤسای عشره دن آیریلالری ، سائرینه خیلی شاشقینلق ویرمش ایسه ده موسم حجه قبائل عربك مرجعیینه کندولری اولدیغندن ناشی دین اسلامدن تنفییه و اهل اسلام ايله اختلاطدن تبعییه چالیشورلردی .

قبائل عرب ایسه اسلامه پاك مستعد ایدی . حتی رسول اکرم حدیبیه ده ایکن (رفاعة بن زید الجذامی) قومندن برجماعت ايله کلوب اسلام ايله مشرّف اولدقده رسول اکرم ، آکا برسنجاق ايله برمکتوب ویرمش و باقی قومه کونده رمش و آنلر دخی دین اسلامى قبول ایدیورمش ایدی . مصالحه حدیبیه ، قبائل عربك مسلمین ايله اختلاطلرینه وسیله اولدی .

محاسن اسلامی کوره رك ایچلرنده دین اسلامه میل و رغبت چوغالدی .  
 فخر کائنات دخی ملوک اطراف ایله مراسله و مخبریه باشلادی .  
 بعده رسول اکرمک بر جمعیت عظیمه ایله کعبه معظمه زیارتنه وارماسی  
 و اوچ کون مکه مکرمه ده اقامت بیورماسی و اوکونلر قریشک خارج مکده  
 طورماسی ، افکار عامه یه پک زیاده تأثیر ایله ی .

متعاقباً ( عمرو بن عاص ) کبی بر مدبر آدم ایله برابر رؤسای عشره دن  
 ( عثمان بن ابی طلحه ) و ( خالد بن الولید ) ایمان ایدرک مدینه منوره یه هجرت  
 ایلمکله رؤسای مکمک بدرجه دها قوتلری آزالدی و مکده حل و عقد  
 اموره قادر اوچ بیوک کیشی ، یعنی ( ابوسفیان اموی ) و ( صفوان جمحی )  
 و ( عباس بن عبدالمطلب ) قالدی . حال بوکه : عباس دخی سقایت زمزم  
 وظیفه سیله مشغول و مقید ایسه ده دین اسلامه میل و رغبت ایله متهی  
 هجرت ایدی .

اوزمان ملت اسلامییه اک یاقین اولان ملت ، نصاری ایدی . ایکی ملت  
 دخی اهل کتاب اولمق حبیبله آتش پرست اولان عجملره و سائر مشرکاره  
 دشمن ایدیلر .

مدینه منوره یه هجرتدن مقیدم نیچه اصحاب کرام ، مشرکلرک جور  
 و اذاسندن بیزار اوله رق اهالیسی نصارا اولان دیار حبشه هجرت  
 ایلمشلدی . بروجه بالا سفارتله اورایه کونده ریلن ( عمرو بن امیه ) یه نجاشی  
 پک زیاده احترام ایتمش ، همده مسلمان اولمشدر .

قیصر رومک ایلاتندن معدود اولان مصرده دین نصارا منتشر اولوب  
 انجق قبط قومی ، یعنی مصرک قدیم یرلی اهالیسی ، روملرک سوء  
 معامله لرندن بیزار اوله رق اسکی استقلاللری آرزو ایتمکده و دولت  
 قیصریه نک نیچه سندن قورتولمق املنده ایدیلر . رئیسلی اولان ( مقوقس )  
 دخی بوافکاره خدمت ایلردی . رسول اکرمک ایلیچیسنه پک زیاده حرمت  
 و رعایت ایلدی و رسول اکرمه هدیه لر کونده ردی .

قیصر هرقل ، نیچه ییللردنبرو ایران محاربهلرله خراب اولان ممالکنی

کوروب اعمار ایتک اوزره قسطنطینیهدن چیقوب سوریهه کشیدی . سفیر نبوی ایله اوراده ملاقات ایدرک حسن قبول کوستردی .

عرب قومندن وملت نصارادن وقیصر رومک امراسندن اولان ( آل غسان ) سفیر نبوی به دهازیاده رعایت و احترام ایتک لازم کلورکن ملک غسانیان اولان ( حارث بن ابی شمر الغسانی ) ( شجاع اسدی ) به بدمعامله ایتدی .

امرای غساندن ( شراحیل ) دخی دیگر بر سفیر نبوی بی اعدام ایله مسبوق بامثل اولمایان برجنایت و خیانت اجرا ایلدی .

( بحر قلزم ) جهتنده واقع ( آیه ) حاکمی و جذام قبیله سنک ریشی وقیصر روم طرفندن معان حوالیسنک مأمور مخصوصی اولان ( فروه جذامی ) اسلام ایله مشرف اولدیغندن روملر ، حدتله رک آنی امیر غسانی بی طوتدیروب سوریهده صلب ایلدیلر .

ایشته بو حاللر ، شام سفرلرینک آچلمسنه بادی اولمشدر و چوق کچیوب حارث بن ابی شمر ، هلاک اولوب حکومت غسانیه پوستنه کچن ( جبلة بن ایهم غسانی ) به سفارته یه ( شجاع اسدی ) کونده ریاش و آنک طرفندن کندوسنه صورت احترام کوستریشدر . ملک یمامه اولان هوزده دخی رسول اکرمک ایلاچبسنه بدمعامله ایدوب بددعا آلدی و چوق کچیوب هلاک اولدی .

جزء ثالثده بیان اولندیغی اوزره خسرو پرویز ، نامه هایونی بیرتوب آتمش و حضرت پیغمبری طوتوب کونده رومک ایچون یمن والیسی اولان باذانه امر و اشعار ایتش ایدی . حال بوکه متعاقباً ایرانده ظهور ایدن عصیان و اختلال اوزرینه خلع و قتل اولندی و باذان ، معجزه نبویه بی کوروب یاننده کی ایرانیلر ایله برابر ایمانه کلدی . سائر اهالی یمن دخی اسلام ایله مشرف اولدی و خسرو پرویزه خلف اولان اوغلی ( شیرویه ) اونیدی برادرینی اعدام ایله بدنام اولدی . بعمده وقوعبولان طاعون علتندن ایران اهالیسنک نلشدن زیاده سی تلف اولدیغی صروده شیرویه دخی فوت اولدقده



یدی یاشنده اولان اوغلی ( اردشیر ) جالس تخت ایران اولمغله دولت ایرانیه وصی النده قالدی .

چوق کچمیوب اکابر ایراندن، سرحد رومک محافظه سنه مأمور ( ایران مهر ) نام سردار عصیان ایدرک اردوسيله پای تخت ایران اولان ( مداین ) ه کیتمش وارکان دولتن نیچه ذوات ایله برابر اردشیری دخی اعدام ایله تغلباً تخت سلطنته جلوس ایتمش ایسه ده خاندان سلطنتدن اولمادینی جهته ایرانلو، قیام و آنی اعدامله ایاغنه ایب طاقوب سورو کله دیلر و شهزاده لردن برینی تحته اجلاس ایلدیلر . لکن چوق کچمیوب فوت اولمغله خسرو پرویزک قیزی ( بوران ) ی [\*] تخت سلطنته کچیردیلر . بریجق سنه یه وارمیوب اودخی فوت اولدی .

بعده شهزاده لردن برینی اجلاس ایله یکرمی کون صکره ودیکر برینی اجلاس ایله ایام قلیله ظرفنده اعدام ایدوب خسرو پرویزک ( آرمیدخت ) نام قیزی اجلاس ایلدیلر .

آرمیدخت ، فوق العاده کوزل اولمغله خراسان والیسی ( فرخ هرمز ) آنی تزوج ایتمک املنه دوشه رک اوغلی ( رستم ) ی یرینه قائم مقام براغوب مداینه کلدکده ( آرمیدخت ) آنی بر طوزاغنه دوشوروب اعدام ایتدیردی . اوغلی رستم ، واقف حال اولدقده پدرینک انتقامنی آلق ایچون عساکر کلیه ایله پای تحته کلوب آرمیدختی خلع و قتل ایتدی و ( اتابک سلطنت ) اولدی . مؤخرآ ( قادیسته ) ده عساکر اسلامیه ایله محاربه ایدن ( رستم ) بودر .

آرمیدختک مدت سلطنتی ، آلتی آی قدر اولوب آندن صکره مدت قلیله ظرفنده ایکی شهزاده اجلاس و اعدام قیلندی . میدانده خاندان سلطنتدن کیسه قالدی . ایرانیلر ، کیچی اجلاس ایده جکلرنده متحیر قالدیلر .

نهایت ( شهریار بن پرویز ) ک بر آتشکده ده مختفی اولان اوغلی ( یزدجرد ) ی بولوب یکرمی بریاشنده اولدینی حالده اجلاس ایتدیلر . لکن سوز ، ارکان دولته اولوب آنک سلطنتی ، خیالی برکیفیت ایدی .

[\*] ایران تاریخلرنده کی اسمی ( بوران دخت ) در .



زمانی محاربات اسلامیہ ایلہ کجی، نہایت اعدام ایدیلدی و آنکله (آکسره) منقرض اولدی . تفصیلی زیرده کلور .  
ایرانک بواحوال اختلالیه سی ، فتوحات اسلامیہ یی تسهیل ایتمشدر .  
جناب حق ، بر امرک حصولی مراد ایتدکده اسبابی بویله تهیه ایدر .  
عاده الله اویله جاری اولمشدر .

### تته

رؤسای قریش ، بروجہ بالاسکان حرم شریف اولق حسیبله قبائل عرب اوکنده برپردہ ایدیلر .  
فتح مکده بوپردہ قالقدینی کبی دین اسلام، هر طرفده شیوع وانتشاربولمغه و جزیره العرب نور اسلام ایلہ طولمغه باشلادی .  
اوانتاده علا بن الحضرمی ، نامه همایون ایلہ بحرینه واردی . ملک بحرین اولان ( منذر بن ساوی ) کبی اوطرفده کی عربلر هپ ایمانه کلدی . ایمان ایتیمان یهود و مجوسیلره دخی جزیه باغلاندی .  
کذلک عمرو بن عاص دخی نامه همایون ایلہ عمانه واردقده ( جلندی اوغوللری ) و آنلره تابع اولان عربلر ، براز ترددن صکره ایمانه کلدی . عمرو بن عاص، زنکینلرینک زکاتی آلوب فقیرلرینه ویردی . درون مملکتده اولان یهودیلری دخی جزیه باغلادی .  
الحاصل آز وقت ظرفنده انوار اسلام ، هر طرفه یاییلدی و قیصر و کسرایه تابع اولان شام و عراق عربلرندن ماعدا عربلر ، هپ مسلمان اولدی . دین ، تمام اولوب بعث نبویه دن مراد اولان مصلحت ، ختاه بولدی .  
رسول اکرم دخی امتنه موعود اولان ممالکک فتحی اصحاب کرامت ترک و تودیع ایتدی و مشتاق اولدینی ربّک درگاه الوهیتنه کیتدی .  
صلی الله علیه و علی آله و صحبه وسلم .

## اصحاب کرامک مرآتی

اصحاب کرام، اوج صنفدر . بری مهاجرین، یعنی قبل الفتح مکدن . هجرت ایدنلردر . دیکری بری انصار، یعنی مهاجرینه معاونت و دین اسلامه نصرت ایلهین اهل مدینهدر . اوچنجی صنفی دیگر اصحابدر .

ابوسفیان و اوغوللری کبی فتح مکدن صکره مدینه منورهیه نقل خانه ایدنلر، بو صنفده داخل اولوب مهاجریندن معدود دکلردر .

مهاجرینک اک صوکی حضرت عباسدر . لکن رسول اکرمه نسباً اقرب اولدیغندن اصحاب کرام، آکا پاک زیاده احترام ایلردی . حتی عمر - الفاروق و عثمان ذی النورین، آت اوزرنده ایکن آکا راست کلسه لر آتدن اینوب عم رسول دهرک تعظیم ایدرلردی . رضی الله عنهم .

قبل الهجره عقبهده بیعت ایلهین انصار کرام، حضرت پیغبرک امریله کندی ایشلرینه باقق اوزره خزرجدن طقوز و اوسدن اوج رئیس انتخاب ایتشلردر . ایشته بو اون ایکی رئیس ( تقبا ) دینور . لکن اوس و خزرجده دائماً جمله نک مرجعی اولان برر رئیس بولنه کلسدر . رسول اکرمک وفاتنده اوسک رئیس ( اسید بن حضیر ) و خزرجک رئیس ( سعد بن عباد ) ایدی . رضی الله عنهما .

قبل الهجره خزرجک رئیس ( عبدالله بن ابی سلول ) اولوب هر ایش، آنک النده ایدی . ظهور اسلامدن صکره نفوذینه خلل کلدی . او دخی غیظ و حسدندن رئیس المنافقین و مظهر نفرین اولمشیدی .

اصحاب کرامک افضل ( شیخین ) یعنی ابوبکر الصدیق و عمر الفاروق بعده ( ختین ) یعنی عثمان ذی النورین و علی المرتضی و آنلردن صکره عشره مبشره نک باقی آلیسی و بعده باقی اهل بدر، یعنی ملت اسلامیه نک مبداء مظفریت و ترقیاتی اولان بدر غزاسنده بولتمش اصحاب کزین و صکره

اصحاب احد ، یعنی احد و قعه سنده بولنانلر و بعده حیدیه سفرنده شجره رضوان آلتده بیعت ایدنلردر . رضی الله عنهم و ارضاهم .

بیعت رضواندن صکره اسلامه کلنلر ایچنده دخی بیوک ذاتلر واردر . لکن آنلر ، سابقین اولین درجه سنه چیقاملزلر . حتی عبدالرحمن بن عوف ، برکون رسول اکرمه خالد بن الولیددن عرض شکایت ایلدکده رسول اکرم « یا خالد ! اهل بدردن هیچ برینه اذا ایتمه . احد طاغی قدر آلتون تصدق ایلسهک بربسنک درجه سنه واره مازسین » دیو بیورمشیدی .

الحاصل اصحاب کرامک درجه و رتبه لری ، بولندقلری مواقع مهمه و حائز اولدقلری فضائل ذاتیه اعتباریله در ، قوت و قرابت ایله دکلدر . مثلاً عشره مبشره ایچنده رسول اکرمه نسباً اقرب اولان حضرت علی اولدینی حالد شیخین ، آندن افضلدر و حضرت عباس جمله سندن اقرب اولدیغی حالد آنلرک درجه سنه وارا ماز .

رسول اکرم ، خواص اصحابی ، علی الخصوص عشره مبشره یی بر وجهله ثنا و هر برینی بر جهتله ممتاز مستثنا بیورمشدر . فضل و عزیتلری حقنده نیچه حدیث شریفلر وارد اولمشدر . هله خلفای راشدینک فضل و عزیتلری حقنده پک چوق حدیث شریفلر واردر .



### عشره مبشره نك انسابی

عشره مبشره نك جمله سی قرشیدر . رسول اکرمه نسباً درجه قرابتلری بوجه آتی بیان اولنور .

( محمد المصطفی ) صلی الله علیه وسلم بن عبدالله بن عبدالمطلب بن هاشم بن عبد مناف بن قصی بن حکیم بن مره بن کعب بن لوی بن غالب بن فهر .  
عبد منافک اسمی مغیره و حکیمک کلابدر

( علی بن ابی طالب ) بن عبدالمطلب

(عثمان بن عفان بن) ابی العاص بن امیه بن عبد شمس بن عبد مناف  
 (زبیر بن العوام) بن خویلد بن اسد بن عبد العزی بن قصی ،  
 (عبدالرحمن بن عوف) بن عبد عوف بن الحرث بن زهره بن قصی ،  
 (سعد بن ابی وقاص) بن مالک بن اہیب بن عبد مناف بن کعب بن  
 زهره بن حکیم ،

(ابوبکر بن ابی قحافه) بن عامر بن عمر بن کعب بن سعد بن تیم بن مرہ  
 (طلحہ بن عبیداللہ) بن عثمان بن عمرو ،  
 (عمر بن الخطاب) بن نفیل بن رباح بن قرط بن زراع بن عدی بن کعب ،  
 (سعید بن زید) بن عمرو بن نفیل ،  
 (ابوعبیدہ بن عبد اللہ بن الجراح) بن کعب بن ضبہ بن الحرث بن فہر .

### عشرہ مبشرہ نك اجمال احوالی

ابوبکر الصديق رضى الله عنه حضر تلى ، فصيح اللسان ، صبيح الوجه .  
 نحيف الجسم ، قوروجه يوزلو ، چوقور كوزلو ، يومرو آلىنىلى ايدى .  
 تاريخ فيلدىن ايكى سنه صكره طوغوب رسول اكرمدن ايكى ياش كوجوك  
 ايدى . احكام شرعيه يي كما يئبى عارف ، قرآن كريمك مزاياسنه واقف ،  
 اخلاق حميده ايله متصف ، فوق العاده متقى وعفيف وعادل ومنصف ايدى .  
 بو جمله ايله برابر يك شجيع ايدى . حتى بركون حضرت على ، مجلسنده  
 حاضر بولونانلردن « اشجع ناس كيمدر ؟ » ديو صورمش و « سنسين »  
 ديدكلرنده « بن ، فى الواقع هر كيمكله مبارزه ميدانه چيقدم ايسه اوجى  
 آلدن . اما اشجع ناس كيمدر ؟ » ديو بويورمش « بزبيلميورز . كيمدر ؟ »  
 ديو صورددقلرنده « ابوبكر دركه ( بدر ) كونى رسول اكرم ايچون بر  
 خيمه ياپيلدى . مشركلردن برى هجوم ايتسون . كيم بلكه يه جك ؟ دينلدى .  
 كيمسه ياناشمايوب ابوبكر قالدى . قليج النده اولدينى حالده رسول اكرمك  
 باشى اوجنده طوردى . هر كيم هجوم ايتديسه قليج ايله قارشولايوب دفع  
 ايدردى . ايشته ناسك اك شجيعى اودر ، ديدى .

حضرت صدیق ، اك اول اسلام ايله مشرف اولوب سائرینی دعوته باشلامش ونیجه ذواتی دائرة اسلامه ادخال ایلش ایدی . اوزمان کوله لر دن مسلمان اولانلره مشرکار ، بك زیاده اذیت ایدرلردی . اودخی آنلری صاتون آلوب آزاد ایلردی . بو وجهله آلوب حسبه لله آزاد ایلدیکی یدی کوله دن بری ( بلال حبشی ) رضی الله عنه حضرتلری ایدی .

اسلام ايله مشرف اولدینی کون خانه سنده قرق بیک درهم نقدی اولوب حین هجرتده بش بیک درهم قالمش ایدی . بالمله وارینی رسول الله اوغورنده فدا ایتشد . رسول اکرم ، آنک مالنده کندی مالی کبی تصرف ایلر ایدی وسفر وحضرده آنی یانندن آیرمزدی .

فیخر عالم ، صلی الله علیه وسلم حضرتلرینک « پیغمبرلردن صکره ابوبکر دن افضل برکیمسه اوزره کونش طلوع وغروب ایتدی » دیمش اولدینی مرویدر . اهل اسلامک ، عددی اوتوز سکزه بالغ اولدقده حضرت ابوبکر : « آرتق میدان چیقالم » دیدکجه رسول اکرم « یا ابابکر ! هنوز عددمن آذر » دیو اعتذار بویورورلر ایدی . بر کون آنک الحاحی اوزرینه رسول اکرم ، اصحابیله برابر حرم شریفه کیتدی . لکن ، جماعت اولمایوب اصحاب کرام ، کندی عشیرتلی ایچنده وحرم شریفک بر طرفنده متفرق اولدیلر . حضرت ابوبکر ، قیام ايله بر خطبه اوقویوب ناسی الله ورسوله دعوت ایتدی وملت اسلامیه نک برنجی خطیبی اولدی . لکن مشرکار ، قیام وهجوم ايله کرک کنديسنی ، کرک سائر مسلمینی ضرب وتحقیر ایلدیلر .

صکره حضرت حمزه رضی الله عنه ، اسلام ايله مشرف اولوبده اسلامه بر مرتبه قوت کلدکدن صکره حضرت عمر ، ایمانه کلنجه جزؤ اولده بیان اولوندینی اوزره اهل اسلامی آلوب حرم شریفه کوتوردی وجماعت ايله نماز قیلدیردی . حضرت صدیقک آرزو ایتدیکی حاله او ، موفق اولدی . اوکون رؤسای قریش « ایشته قوممز ، شیمندی ایکی به بولوندی » دیدیلر . رسول اکرم ، دخی آنی ( فاروق ) دیو تسمیه بویوردی .



( یا ایها النبی حسبک الله ومن اتبعک من المؤمنین ) آیت کریمه سی دخی  
او وقت نازل اولدی که ( ای پیغمبر ! سکا الله وسکا اتباع ایدن مؤمنلر  
کافی در ) دیمک اولور .

حین هجرتده هپ اصحاب کرام ، کیزلیجه مکدن چیقوب مدینهیه  
کلدیلر . الا عمر الفاروق ، علی اوله رق هجرت ایلدی . شویله که : قلیجنی  
قوشاندی ، یانی اوموزینه آصدی ، اوقلرخی انه آلدی ورؤسای قریش ،  
کعبه مکرمه حولیسندده حلقه حلقه اولوب اوطور مقده ایکن حرم شریفه  
کیتدی . بیت شریفی یدی دفعه طواف ایتدی وایکی رکعت نماز قیلدی .  
بعده « یوزلرگز قاره اولسون » دیو رؤسای قریشه بدعا ایدرک یانلرندن  
چکرکن « آناسنی آغلاتمق واولادینی یتیم وقاریسنی طول براقق ایستهین  
کیمسه ، شو وادینک اوتہ طرفنده بکا قاووشسون » دیوب مکدن چیقدی  
ومدینهیه هجرت ایتدی . آرقه سنه دوشن اولمادی . وقعه ( احد ) کونی  
اصحاب کرام ، شاشیروبده متفرق اولدقلری زمان رسول اکرمک یاننده  
پایدار اولانلردن بریدر . هم بویله شجیع و بهادر ، همده عالم و عاقل  
ومدبر ایدی . نه زمان اصحاب کرام آره سندده بر اختلاف وقوع بولسه  
آنک رأی طوغری چیقاردی . تاریخ فیلدن اوچ سنه صکره طوغمشدر .  
اوزون بویلو ، ایری کووده لی ایدی . کوزلرنده نوعما قیرمز بلیق وار ایدی .  
عثمان ذی النورین رضی الله عنه حضرتلری ، تاریخ فیلدن آلتی سنه  
صکره طوغمشدر . اورته بویلی ، بویوک صاقاللی ، اسمراللون ، کوزل  
یوزلو ایدی . یاناقلرنده چیچک بوزوغنی وار ایدی . اوتانغان و اخلاق  
حمیده ایله متصف واحکام قرآنییه واقف ایدی . جزؤ اولده بیان اولوندینی  
اوزره ( علی ) و ( زید بن حارثه ) دن صکره حضرت ابوبکرک دعوتیله اک  
اول ایمانه کلن بش کشینک برنجیسی در . اک ابتدا حبشه هجرت ایدن اودر .  
ثروت وغنا صاحبی اولوب فی سبیل الله مبالغ کثیره صرف ایتمش وامور  
جهادییه پک چوق اعانه ایلشدر .

علی المرتضی رضی الله عنه حضرتلری ، انادن ، بابادن هاشمیدر . باباسی ،



عبد المطلب بن هاشمك اوغلى (ابوطالب) واناسى اسد بن هاشمك قىزى (فاطمه در). اسمرا اللون، قيصه قىرب اورته بويلو ايدى. صقالى بيوك اولوب اوموزلرينك آره سنى طولدير ايدى ، باشك اوڭ طرفده صاچ يوق ايدى. ايكي اوموزلرينك آره سى كنىش و اوموزلى واللى قالين ، بيلكلرى ونجهلرى قوى ايدى. جنكده آرسلان كى سكيدر ايدى. هر كيمكه جنك ايتدى ايسه غالب كلشدر. بهادرلى السنة نامده دستان اولمشدر .

كولر يوزلو ، كوزل خويلو ، حلیم وكریم ومتواضع ، اسرارقر آنيه واقف ، عالم وعادل وفصیح وبليغ وخطيب بنى معادل ايدى . رسول اكريم ، آنى كوچوك ايكن خانه سعادته آلوب اوز اولادى كى تربيه ايتدى . اودخى كوزنى آچوب آنى كوردى . ظلمات شرك ابجه دوشمدى ، بتلره سجده اتمدى . صبى ايكن بعث نبويه دن چندكون صكره اسلام ايله مشرف اولمشدر .

عبدالرحمن بن عوف رضى الله عنه حضرتلى ، تاريخ فيلدن اون سنه صكره طوغمشدر . قرمزيله مزوج بياض رنگلى ، كوزل يوزلى ، بيوك كوزلى ، چوق كيرپيكللى ، چكمه بورونلى ، اللرى ايرى ، پارقلى قالين ايدى . بروجه بالا حضرت ابوبكر ك دعوتيله اڭ اول ايمان ايدن بش كشينك ايكنجيسيدر واحد كونى ثابتقدم اولانلردن بريدر . او كون يكرمى يرندن ياره لاندى وبو ياره لك برى آياغنه اصابت ايتمكه طويل قالدى .

سعد بن ابى وقاص رضى الله عنه حضرتلى ، قاره ياغيز ، اوزون بويلو ، كودده سى چوق قيللى ايدى . اون سكز ، اون طقوز ياشلرنده ايكن اسلام ايله مشرف اولدى . اول باول ايمان ايدن سالف الذكر بش كشينك اوچنجيسيدر. كانكشلك سرفرازى ايدى. فى سبيل الله ابتدا اوق آتان وقان دوكن ، اودر . (فارس الاسلام) ديو معروف اولمشدر .

احد كونى اعدايه بيك اوق آتمش وفيخر عالم صلى الله عليه وسلم حضرتلى آنك حقنده « يارب ! آنك دعاسنى مستجاب قيل ، ديو دعا ايتش اولديغندن سعد حضرتلى ، هر كيمك حقنده دعا ايتسه مستجاب اولوردى.

زبیر بن العوّام رضی اللہ عنہ حضرت تلی ، اسمروسمیزجہ ، اورتہ بویلو ،  
آز صقالی ایدی . پدری (عّوام) خدیجۃ الکبری رضی اللہ عنہا حضرت تلی رینک  
برادریدر . والدہ سی جد رسول اولان عبد المطلبک قیزی ( صفیہ ) در .  
ابوبکر الصّدیقک ( ذات النّطّاقین ) دیو معروف اولان کریمہ سی ( اسمہ بنت  
ابی بکر ) ی تزوج ایدوب آندن بش اولادی اولمشدر .

اول باول ایمان ایدن سالف الذ کر بش کشینک دردنجیسیدر . ابتدا  
فی سبیل اللہ سلّ سیف ایدن اودر . رسول اکرم « هر پیغمبرک حواریسی  
واردر . بنم حواریمده زیبرد ، دیو بیورمشدر .

طلحہ بن عید اللہ رضی اللہ عنہ حضرت تلی ، قرمزبجہ یوزلو ، قیصہ  
قرب اورتہ بویلو ، کوکسی کنیش ، آیقلری ایری وقالین ایدی . سالف  
الذ کر بش کشینک بشنجیسیدر . احد کونی ثابتقدم اولانلردن بریدر .  
کفاردن بری ، اوکون رسول اکرمہ بر قلیچ حوالہ ایتدکده حضرت طلحہ ،  
اول حملہ یی الیہ دفع ایدوب او ضربہ دن چولاق اولمشدی . خلی ثروت  
صاحبی ایدی . ابو عیدہ بن الجراح رضی اللہ عنہ حضرت تلی ، مذکور بش  
کشیدن صکرہ ایمان ایدنلرک برنجیسیدر . یوم احدده ثابتقدم اولانلردندر .  
حتی رسول اکرمک وجہ مبارکنہ کیرن زرہ حلقہ لرینی دیشلری ایلہ  
چیقاریرایکن ایکی اوک دیشی چیقمشدی . رسول اللہ ، آنک حقندہ « بو  
امتک امینی ، ابو عیدہ در « دیو بیورمشدر . نحیف وخفیف اللّحیہ وقور و  
یوزلو واوزون یوزلو واوزون بویلو ایدی . عابد وزاهد ومجاهد وجلیل  
القدر بر ذات کثیرالمحامد ایدی .

« رسول اکرم ، کندیسنه خلیفہ نصب ایدہ جک اولسه ایدی کیچی تعیین  
ایدردی ؟ » دیوعایشہ صدیقہ رضی اللہ عنہا حضرت لردن سواّل اولندقدہ « اولّا  
ابوبکری ، ثانیاً عمری ، ثالثاً ابو عیدہ یی تعیین ایلردی » دیو جواب ویرمشدر .  
سعید بن زید رضی اللہ عنہ حضرت تلی ، ابو عیدہ ایلہ برابر ایمان  
ایدنلردندر . حضرت عمر الفاروقک عمزاده سی وقیز قرنداشی ( فاطمہ بنت  
الخطّاب ) ک قوجہ سیدر .

## رسول اکرم صلی الله علیه وسلم حضرت قلرندن

### صکره ظهوره کلن بعض احوال

وقت سعادتده وحی الہی متوارد اولور و طرف نبویدن امته تبلیغ بیوریلور ایدی .

آندن صکره وحی کلمک احتمالی قالمادی . فقط قرآن کریم، نیچه اصحاب کرامک حفظنده قالدی و قرآن کریمده مصرّح اولمایان مسئله لر حقنده سنت سنیه ایله ، یعنی رسول الله نه دیمش ونه یامیش ایسه ؛ یاخود بر کیمسه بر ایش یاپارایکن کوروبده منع ایتمه مش ایسه آکا توفیق ایله عمل ایدیور اولدی . لکن سنت سنیه واحادیث شریفه ؛ هپ اصحاب کرامک تمامیه مضبوط و محفوظلری دکل ایدی .

چونکه : اصحاب کرامک ضیق معاشرلی اولق حسیله کیمی بازار یرلرنده آلیش و یریش ایله و کیمی خرماقلردده فلاحت ایله مشغول اولدقلرندن دائما مجلس سعادتده مجتمع اولامایوب آنجق اختلاس وقت ایتدکجه بولنورلر و طویلانورلر ایدی .

بناءً علی ذلک طرف پیغمبریدن بر حکم شرعی بیان و تعلیم بیورلدقده حاضر بولنانلر ، آنلری بللر و بولنمایانلر ، آتی بیلمز ایدی . لکن حاضر بولنانلر ، غائب اولانلره تبلیغ ایلر ایدی .

بوجهتله بعضلری ، بعض احادیث شریفه یی و دیگرلری دیگر احادیث شریفه یی بیورلر ایدی و بیلمدکلرینی بیلنلردن اوکره نورلردی .

حتی ( ابوبکر ) ( عمر ) ( عثمان ) ( علی ) ( عبدالرحمن بن عوف ) ( عبدالله بن مسعود ) ( ابی بن کعب ) ( معاذ بن جبل ) ( عمار بن یاسر ) ( حذیفه بن الیمان ) ( زید بن ثابت ) ( ابوالدرداء ) ( ابوموسی الاشعری ) ( سلمان الفارسی ) رضی الله عنهم حضراتی ، وقت سعادتده بیله فتوی و یرلر ایکن پک چوق حدیث شریفلر ، آنلرک محفوظی اولمایوب دیگر اصحاب

گرامه مراجعت ایدرلر و «فلان مسئلهیه دائر بر حدیث شریف وارمی؟» دیو سورادلر ایدی و بر حدیث شریف بولنور ایسه موجنبجه عمل ایدرلردی .

حتی بالاده بیان اولندیغی اوزره حضرت پیغمبرک وفاتنده مدفن حقنده اختلاف وقوع بولمش و حضرت صدیقک روایت ایلدیکی بر حدیث شریف موجنبجه اعلائی علینه عازم اولدقلری یرده دفن ایدیش ایدی .  
کذلک ترکئ نبویه مک بین الورثه تقسیم حقنده بین الاصحاب اختلاف وقوعه کلدیکی حالده ینه ابوبکر الصدیق «پیغمبرلردن میراث قالماز» دیو روایت ایلدیکی حدیث شریف موجنبجه عمل اولمش ایدی .

آم المؤمنین عائشه رضی الله عنها حضرتلردن مرویدرکه «رسول اکرم صلی الله علیه وسلم حضرتلری وفات ایلدکده نفاق باش قالدیردی ، عرب مرتد اولدی ، انصار بر طرفه چکیلدی . اگر پدریمک اوزرینه اینن بلالر ، طاغلوک اوزرینه اینسهیدی آزردی . او یله ایکن هر نه خصوصده اختلاف ایتدیلر ایسه پدرم ، یتشدی ، حل مشکل ایتدی » دیو بیورمشدر .

اصحاب کرام ، اگر سنت سنییه ده دخی بر صراحت بولامازلر ایسه رأی و قیاس ایله اجتهاد ایدوب موجنبجه عمل ایدرلردی .

ایشته بوجهتله عصر اولده بر اجتهاد قیوسی آچیلدی و کرك اصحاب کزین ، کرك سائر مجتهدین بر مسئله ده اتفاق ایتدکده آرتق تردد و اشتباهه محل قالمیوب ایشه بوکا ( اجماع امت ) دینلدی .

حال بوکه : ایش رأی و اجتهاده قالدجه بحسب البشریه نیچه مسائلده اختلاف آرا وقوع بولدی و هر مجتهد ، کندی رأییه و سائر ناس ، تابع اولدقلری مجتهدک قولیه عمل ایتمهک مجبور اولدی .

جزء ثالثده اجمالاً بیان اولوندیغی اوزره حضرت پیغمبرک وفاتی کونی ظهور ایدن ( خلافت مسئله سی ) دخی بوقیلدندرکه احادیث شریفه ده آکا دائر بر صراحت اولمادیغندن اصحاب کرام آره سندده اختلاف آرا وقوع بولدی .

اگرچه نیچه احادیث شریفه ده (ابوبکر) و (عمر) و (عثمان) و (علی) رضی الله عنهم حضراتنك خلافتلرینه دائر تلمیحات و اشارات وار ایدی و (عمر) و (عثمان) ك ابوبكر دن صكره خلیفه اولاجقلری بعض احادیث شریفه دن آكلاشیلمش ایدی . لکن هیچ برینك وقتی معین دكل ایدی و ابوبكر وعلیدن هانكيسنك دهامقدم خلیفه اولاجنی اشعار بویورلماش ایدی .

برده بونلر ، هپ كله جكدن خبر ویرمك ديمك اولوب حضرت پیغمبر بندن صكره فلانه بیعت ایدیکز دیو امر ایتهمش و بوايشی اصحاب کرامنك انتخابنه براقش ایدی . بناء علیه دارعقبایه ارتحال بیوردقلری کون امارت و خلافت حقنده اوچ رأی میدانه چیقدی .

برنجیسی : انصارك رأیدرکه دین اسلامه نصرت ایدن امارت و خلافته مستحق اولمق قاعده سنی اساس اتخاذا ایدرك « بو دینه قبائل عرب ، بزم قلیجلرمزك سایه سنده بویون اكدی . امارت بزم حقمزدر ، دیدیلر و کندی رئیسلری اولان ( سعد بن عباده ) رضی الله عنه حضرتلرینه بیعت ایللك ایسته دیلر .

ایکنجیسی : جمهور صحابه نك رأیدرکه آنلر ، بوبابده مصالح امتی رؤیت ایچون لازم اولان قدرت و کفایتیه حصر نظر ایتدیلر و قریش قبیله سی هپ قبائل عربك اشرفی واك قوتلیسی و نفوذلیسی اولوب رسول اکرمك قریشی اولماسی دخی آنلرجه بر مزیت مخصوصه اولدیغنه منی آنلرك ایچندن افضل اولان ذاتی انتخاب ایللك رأینده ایدیلر .

اوچنجیسی : هاشمیلرك رأیدرکه آنلر ، قوت قرابته اعتبار ایدرك « بنی هاشم ، قبیله قریشك اشرفی و رسول اکرمك یقین اقرباسی اولمغله خلیفه نك هاشمی اولماسی لازمدر » دیدیلر وعلی ابن ابی طالب رضی الله عنه حضرتلرینه بیعت ایللك ایستدیلر .

اگرچه رسول اکرمه نسباً اقرب اولان عمتی عباس رضی الله عنه ایسه ده مهاجرینك اك صوکی اولوب سابقین اولین وعلی الخصوص



عشره مبشره وار ایکن آنک انتخابی قابل اولمایه جنی جهته هاشمیلردن بری خلیفه اولق لازم کلدیکی تقدیرده حضرت علینک انتخابی طیبی ایدی .

بو باده صواب اولان آنجق جمهور صحابه نك رأی ایدی . زیرا انصارك دین اسلامه فوق العاده نصرتلری اولدیغندن فوق العاده احترامه شایان اولدقلری کبی رسول اکرمه نسبتاً قرابت دخی بر بیوک شرف ایسه ده خلافت نبویه ، نه خدمت سابقه مه مکافات اولاییوردی ، نده قوت قرابته کوره اقربای پیغمبری مه میراث قاله بیلوردی .

جمهور صحابه نك خلافتی قریشه تخصیص ایتلری دخی مجرد سلاله نبویه نك قرابت نسبییه ایله بالانتساب تبرك و تئمن ایچون اولمایوب بلکه قریشك اوزمان سطوت و قوتی و بین القبائل نفوذ و اعتباری اولدیغنه مبنی ایدی .

چونکه : خلافت نبویه ، اهل اسلام آره سنده رابطه و کله واحد اوزره اجتماعلرینه واسطه اولان بر امارتدر . امارت ایسه جناب حقك بر سر و حکمتیدر که تأسیسی دائماً سطوت و قوت ایله مشروطدر و آندن مقصد اصلی ، دفع فساد و حفظ آسایش بلاد و تنظیم امور جهاد ایله مصالح عامه یی حسن تنظیم و تسویه دن عبارتدر . بودخی سطوت و قوته منوطدر . عادت الهیه ، بو وجهله جاری اوله کلمشدر .

بو جهته اصحاب کرام ، اوزمان ملت اسلامیه نك متحد الافکار اوله رق حرکتیه کسب شوکت و سطوت ایلسی ایچون بر طوغری یول آرایورلردی ، فقط بویولی تعقیبده رأیلری مختلف ایدی .

( جمله نك مقصودی بر اما روایت مختلف ) .

وقت سعادتده انصار ، بیوک بیوک نصرتلره موفق اولدقلردن امارت اسلامیه یی احراز ایله کافی السابق دین اسلامه خدمت ایلک امنیه سنه دوشمشلر ایدی . لکن وهله اولاده شورالرینی کرکی کبی فکر و ملاحظه ایده مه مشلر ایدی که آنلرک مقدمکی موفقیترلری سایه حضرت پیغمبریده اولوب آندن



صكره احوال، بتون بتون تغير ايدرك خود بخود اويله بيوك ايشلره موفق اولامازلردى و كندولرينك نفوذى ، مدينه منوره جوارينه منحصر اولوب بونجه قبائل عربك سعد بن عباديه تابع اولمايه جقلى مسلماتدن ايدى . اوزمان ايسه دين اسلام ، جزيرة العربك هر طرفنده منتشر اولديغندن بالجله قبائل عرب حقنده اجراى نفوذ ايله هر يرده تنظيم مصالح امت و تنفيذ احكام شريعت ايلك لازم كلوردى . بواققدار ايسه اوزمان قريشه منحصر ايدى .

اكرچه زمان جاهليتده جارى اولان ( غيرت قوميه ) يرينه ( اخوت و اتحاد اسلام ) قائم اولمش ايسه ده عربلر ييننده احوال طيعيه دن اولان افكار عصيه اقتضاسنجه خلافت ، هر قننى قيله يه كچسه ديكرلرى آنى قيصقانه رق اطاعتدن ابا ايله ملت اسلاميه آرمسنه تفرقه دوشمك ملحوظ و هله اوس و خزرجه سرفرو ايتيه جكلرى دركار ايدى .

اماقريش قيله سى ، ذاتا سطوت و قوت صاحبي اولدقدن بشقه اوتهدنبرى بين القبائل محترم اولوب رسول اكرم دخى قرشى اولمق حسييله قريشك حكم مشروعى آلتنه كيرومك سائر قبائله كران كلزدى .

فقط خلافتى قريشك اون بطندن بر بطنى اولان هاشميله تخصيص ايتمكه بر كونه مجبوريت اولمدينى حالده موافق حكمت دكل ايدى . زيرا حكومتك تاسيسنه سى ايدن قومك افرادى ، خور مايه سى كيدير كه نه قدر چوق اولورسه آنسكه او قدر چوق خور مايه لنور ، اكسكك بيوكى ده خمورك چوغندن اولور . بناءً عليه بر حكومتك مؤسسلرى ، نه قدر چوق اولورسه او حكومتك وسعت و شوكتى او قدر زياده اولور .

عالم كون و فسادده عادة الله بو وجهله جاريدر . تاريخ عمومى و حكمت تاريخيه دقت ايله مطالعه اولدقدده بو دقيقه واضح و عيان اولور .

دينلمسون كه ، اصحاب كرام ، حكمت و تاريخ او قومامشلا ايدى . بودرلو دقيق مسئله لى نصل دوشونه بيلورلردى ؟ ، زيرا آنلر ، حكمتى

معدن علم و حکمت اولان فم سعادتنن اخذ ایتشلر ایدی . بو مثللو دقایق هر کسدن اعلا بیلورلردی .

حاصل کلام حضرت پیغمبرك وفاتندن صکره علی الاطلاق وجوه و اشراف قریشدن قبول عامیه مظهر اوله جق بر بیوک ذاته بیعت اولنق لازمه حالدن ایدی . فقط عصیتجه ، یعنی قوم و قبیله جه بیوکلک کافی اولمایوب اسلاجه افضل اولق لازم کلوردی .

والّا اوزمان زیاده قوت و غلبه لکی اولان ( بنی امیه ) نك اولوسی و فتح مکیه قدر قریشك ائ نفوذلیسی و حضرت پیغمبرك قانن پدوری اولان ( ابوسفیان بن حرب ) ك انتخابی جائز اولوردی . حال بوکه : احد وقعه سنده آنك یوزندن کورولن خسارات ، هنوز خاطرلردن چیقما مشدی . کرک انصار ، کرک مهاجرین آنك حکمی آلتنه کیره مزدی و فتح مکده مؤلفه القلوب صره سنه کچوب صکره قوی مسلمان اولمش ایسه ده اهل اسلام ، آکا امنیت ایده مزدی .

بوجه تله کرک ابوسفیانك ، کرک امثالی اولان وجوه قریشك انتخابلری قابل دکل ایدی و امویلردن بری انتخاب اولنه جق اولسه عثمان ذی النورین رضی الله عنه حضرتلرینك انتخابی لازم کلوردی .

لکن ائ اول اسلام ایله مشرف اولوب ده حضرت عثمانی دخی دائرة اسلامه آلان و رسول اکرمك مرض موتنده امر شریفله نمازده جماعت اسلامه امام اولان یار غار پیغمبری وار ایکن آنك اوزرینه دیکرینك تقدیمی قابل دکل ایدی .

حتی رسول اکرمك وفاتی ، هرکسه دهشت ویردیکی صره ده حضرت عمر الفاروقه دخی حیرت الویرمکله حضرت ابو عبیده بن الجراحه واروب « الکی اوزات . سکا بیعت ایدیم . زیرا رسول اللهک بیوردینی اوزره سن بو امتک امینسین » دیدکده ابو عبیده : « یا عمر ! سنك اسلامه کلدیکنک زماندنبرو بویله بر ضعیف رأیگی کوردمم . ایچکزده صدیق و مغارده

ايکينک ايکنجيسي وار ايکن بکا نصل بيعت ايلرسک ؟ ، ديو حضرت عمری ايقاظ ايتمیدی .

شو حاله نظراً افکار عمومیه مراجعت اولنديني حالده حضرت ابوبکر الصديقك خلافته انتخاب اولنه جني درکار ایدی .

بناءً على ذلك هب اصحاب كزین ، برلشوبده بالمشاورة بوامر اهمه برقرار و برملری لازم كلوركین جزء ثالثه بیان اولنديني اوزره انصارك (سقیفه بنی ساعده) ده اجتماع ايله خود بخود خلیفه انتخابنه قیام ایتلری ، ایشی صعوبته دوشوردی .

شویله که : حضرت ابو بکر و علی و دیگر بعض اصحاب کزین ، تجهیز و تکفین نبوی امر مهمیله مشغول ایکن مهاجریندن ( مغیره بن شعبه ) حضرت عمره کلوب « سقیفه ده انصار ، طویلاندی خود بخود برشیئه قرار ویرلر ایسه صکره بینمزده محاربه ظهور ایدر » دیمکله حضرت عمر ، درحال ابو بکر ايله ابو عبیده بنی آلوب سقیفهیه واردیلر . انصارك سعد بن عبادیه بیعت ایلک اوزره اولدقلرینی کوردیلر . حضرت ابو بکر ، سابقین اولیندن اولان مهاجرینك فضائلی بسط و تمهید ایتدکن صکره قریشدن باشقه سنك امارتی قبائل عربك قبول ایتیه جکنی پك کوزل افاده ایتدی . حضرت عمر دخی آنی تأیید ایتدکن باشقه انصار « بزدن بر و سزدن بر امیر اولسون » دیدکلرنده بر قینه ایکی قلیجك صیغمایه جفنی اثبات ایلدی . ابو عبیده دخی پك مؤثر سوزلر سویلدی . انصارك نیتی خلوصه مقرون اولمغله آنلر دخی قانوب سقیفه ده بولنان مهاجرین ايله برابر حضرت صدیقه بیعت ایدیور دیلر . یالکزر سعد بن عباده رأینده اصرار ایلدیسده یالکزر قالدیغدن آنك مخالفتی و منازعه برطرف اولدی .

بووقعه ، بریوک بلیئه ایدی . بیوک فساده باعث اوله بیلوردی . جناب حق ، آنک شرندن بوامتی محافظه بیوردی .

واقعا هب اصحاب کزین ، طویلانوبده یولیه مشاوره جاری اولمادیسده بمنّه تعالی اوغائله ، قولایلقله بیتدی و حضرت ابوبکر ، معلوم اولان وقار

وهیبتی ایله مقام خلافتده استقرار ایتدی . فقط شیطان لعین ، ینه دیگر مکر و خدعه ایله اهل اسلام آره سنه تفرقه دوشورمک ایستدی .

شویله که : حضرت علی ، سقیفه یه وارمیوب زوجہ سی فاطمة الزهرا رضی الله عنها وارضاهما حضرت تلرینک خانه سنده عزلت ایتمش و بنی هاشم ایله عشره مبشره دن رسول اکرمک حواریسی و ابو بکر الصدیقک دامادی اولان ( زبیر بن العوام ) و خواص اصحاب کرامدن ( مقداد بن الاسود ) ( وسلمان الفارسی ) و ( ابوذر ) و ( عمار بن یاسر ) ایله ( ابی بن کعب ) رضی الله عنهم دخی اورایه کیتمش ایدی .

بونلر ، هپ حضرت علی به بیعت ایله مک اوزره آنک یاننده طویلانش و امر انتخابک سقیفه ده اوله بغته اجرا سیله کندولرینک مشاوره دن خارج براغیلدقلرینه کوجنمش ایدیلر .

فی الواقع ، حضرت ( علی ) و ( زبیر ) و ( عباس ) کبی کبار اصحاب کرام ، مجلس انتخابده بولنق و رایلری آلمق لازم ایدی ، نه چاره که آنلری دعوت ایله استشاره یه وقت مساعد اولمادی . سقیفه حادثه سنک دفعی ایچون حضرت صدیقہ بیعت اولتیویرمک لازم کلدی . برده بو فرقه هاشمیه طرفدن وقوع بولان اعتراضه قارشو بری طرفدن « ابوبکر و عمر و ابو عبیده کبی آنلرده سگیردوبده سقیفه یه کله لی ایدیلر » دیو اعتراض اولونویوردی .

ایشته او ائنده حضرت عباس ، حضرت علی به « کل بن سکا بیعت ایدیم ، ناس ده بیعت ایلر » دیمش ایسه ده حضرت علی ، فتنه حدوئندن احتراز ایله قبول ایتمه مشدر .

ابوسفیان بن حرب ایسه ، تازه مسلمانلردن اولدیی جهته عصییتجه یعنی قوم و قبیله جه بویوکلک داعیه سی هنوز تمامیه ذهنندن چیقماش اولدیغنه منبی بوباده بوتون بوتون باشقه رأی و مطالعه ده ایدی . یعنی قوت قرابتہ باقیلمایه حق اولدینی حالدہ قوت عصییت جهتی کوزه دیمک رأینده ایدی . کندی قومی اولان ( بنی امیه ) به نسبتله حضرت ابوبکر الصدیقک

قومی اولان ( بنی تیم ) آزا اولدیغندن حضرت صدیقه بیعت ایلیوب جمعیت هاشمیّه قاریشدی و « پیغمبرک خلافتی ، قریشک الک کوچوک شعبه سنده قالمق نه دیمکدر ؟ » دییه سقیفه بیعتی تقبیح و حضرت علی به وزمان جاهلیتده همدی اولان حضرت عباسه توبیخ ایتدکدن باشقه حضرت علی به « الکی اوزات . سکا بیعت ایدهیم . والله ایستر ایسهک اطرافنی آتلو و پیاده ایله طولدیریرم » دیدکده حضرت علی « یا باسفیان ! سن ملت اسلامیّه آره سنه شقاق برابق ایستورسین » دیو آنی رد ایلشدر .

ابوسفیان ، ملک و سلطنت کبی خلافت نبویه دخی بر خاندان ایچنده توارث ایدوب قاله جق ظن ایدیوردی .

جمهور اصحاب کزین ایسه ، خلافتی حضرت صدیقک ذاتیله قائم بر وظیفه بیلورلردی . حضرت صدیق دخی آنی اوزه رنده ایکره تی بر خلعت کبی بیلوب کندوسندن صکره ملت اسلامیّه جه افضل اولان ذاته انتقال ایتک رأینده ایدی . زیرا مقصد اصلی ، زمان جاهلیتده معتاد اولان ( غیرت عصبیّه ) رینه ( اتحاد اسلام ) قائم اولمق مصلحتی ایدی .

احوال مشروحه دن آکلاشیلیورکه : کرک حضرت صدیق ، کرک حضرت علی ، هپ ملت اسلامیّه آره سنده شقاق و تفرقه حدوشندن صاقینورلردی و ایکسی دخی برر موقع مشکله بولونوبورلردی . زیرا جمهور صحابه ، حضرت صدیقه بیعت ایلش اولدقلرندن کیرو دونه مزلردی . حضرت علینک باشنه طوبالانان جمعیت دخی آنی خلافتده انتخاب اینک فکرنده اصرار ایدیورلردی . حتی زیربن العوام « علی به بیعت اولنما دجه قلیجمی قینه صوقام » دیو مصر اولوب حضرت عمر دخی تهور ایدرک « آنک قلیجنی آلک ، طاشه چالک » دییوردی .

رسول اکرمک عمرزاده سی اولان ( عُبَّه بن ابی لهب ) دخی « بوایش ، بطن هاشمدن و علی الخصوص ابوالحسن ( یعنی حضرت علی ) کبی بر ذات جلیل القدردن دوزر و غیری به توجه ایدر ظن ایتمز ایدم » دییه رک اظهار تأثر سیاقنده شعرلر سویلیوردی .



او ائناده کویا حضرت علی « خلافت دعواسنده ایش و حضرت صدیق خلافتی قبول ایتیمور ایش » یولو سوزلر ایشیدیلدی .  
 حضرت علی ایسه ، خلافت حقنده یولیه مشورت و کندی رأینه دخی مراجعت اولونمادیغندن طولانی جانی صیقلمش ایسه ده او یله دعوی و داعیه لرده بولونمایوب آنجق کوشه عزلت و انزوایه چکیله رک رسول اکرمک آتش افتراقیله یانوب یاقیلمقده ایدی .

لکن ، او یله مهم وقتده اختیار انزوا یله کرک کندوسنک ، کرک رفقاسنک هنوز کلوبده حضرت صدیق به بیعت ایله ملری ذهلره خدشه و خلجان ویرمکده ایدی .

حضرت صدیق ، بر مدت ده صبر و تحمل ایش ایسه ده بو حال ، تمادی و میانه ده مبایت و قوعنه بادی اولور و طرفینک آره سی آچیلور و مغرور جاهلر ، یا سیوری عقلیلر ، یا خود ساده دل و ضعیف القلب و اویصال آدملر سوزه قاریشور ، ایش فنا یول آلور دیو خوف ایتدیکنندن اصلاحی چاره سنی آرامغه مجبور اولمشدر .

شویله که : ( محی الدین العربی قدس سره ) حضرت ترینک ( محاضرات ابرار و مسامرات الاخیار ) نام کتابنده و ( حامد عمادی ) علیه رحمة الهادی حضرت ترینک ( ضوء المصباح فی ترجمة سيدنا ابی عبيدة بن الجراح ) نام کتابنده بسط و بیان اولوندی اوزره حضرت صدیق ، اولّا حضرت عمر الفاروق ایله محرمانه مذاکره و مشاوره ایتدکن صوکره حضرت ابو عیبه بن الجراح رضی الله عنه حضرت ترینی چاغیروب آنلر ، ایکسی برلکده اولدقلری حالد ابو عیبه یا نلرینه کیردکده حضرت صدیق ، آکا خطاباً « یا ابا عیبه ! سنک ناصیه ک نه تمیندر . یوز گده خیر نصل آشکاردر . رسول اللهک عندنده غبطه اولونه جق بر مرتبه ده ایدک . بر یوم مشهودده ( یعنی بر جمعیت علیه ده ) رسول الله سنک حقکده ( ابو عیبه بو امتک امیندر ) دیدی . جناب حق ، نیجه دفعه سنکله اسلامی عزیز و فسادینی دفع ایتمشدر . سن دائماً دینه ملجأ و مؤمنینه روح و اخوانگه معین اوله



کلمشکدر . سنی بر ایش ایچون ایستدم که حالی اوزره براقیلور ایسه صوکی قورقولودر . اصلاحی واجبدر . ای جراح اوغلی ! بویاره ، سنک میلک ورفق و ملایمتک ایله اونولماز و بوییلانک زهری ، سنک افسونک ایله مندفع اولماز ایسه یأس کلور ، ألمی شدت بولور ، صکره دها آجی و کوچ علاجلره محتاج اولور . بوایشک سنکله تمام اولماسنی و سنک الکده انتظام بولماسنی اللهمدن دیلهریم . ایمدی یا اباعبیده ! الله ایچون و رسول الله ایچون و بوجاعت اسلامیتهک سلامتی ایچون هر درلو جهد و سعی ده تجویز قصور ایتمهک بوایشه تائی و زراکت ایله طاوران . الله سنک حافظ و حامی و معینکدر . علی یه کیت ، متواضعانه تکلم ایت و خاطر کده طوت که او ، ابو طالبک سلاله سیدر و آنک ، دون غائب ایتدیکمز ذات قدسی الصفات صلی الله علیه وسلم حضر تیرینک عندنده کی مرتبه سی یرندهدر . آ کادی که :

« دکز تهلمکلی ، قره قورقولو ، هوا بوز زینکلی ، کیجه قارا کلک ، کوک آچیق ، یر چیپلاقدر . ( یعنی اوتی ، اورمانی یوقدر ) چیقماق متعذر ، اینمک متعسدر . حق ، رحم و شفقتی جالب و باطل ، علف و شدتی موجب . حسد ، هلاکه بادی و عجب ، شر و عداوته مؤیددر . ( یعنی اجماع امت ایله خلافتک حکمی ظاهردر . امت محمدیه ، ضلالت اوزره اجماع ایتمز . اجماعدن آیریلقدہ خطر واردر . آندن باشقه طریق سلامت یوقدر ) شیطان ، ملت اسلامیه آره سنده تفرقه و عداوت برافعه چالیشور . فسق و فجور یولنده و سوسه و یریر ، انسانی آلدادیر ، شریر کسانانی امنیهیه دوشورور . دور آدمدن بری دأب و عادت یودر . کیمسه آندن خلاص بولاماز . مکر که حق اوزرینه دیشنی صیقوب طور مق و باطلدن و عاجلدن ( یعنی دنیادن ) صرف نظر قیلماق و اللهک و دینک دشمنی اولان شیطانک تپه سینه شدتلی وجدتی باصمق و منحصر آ اللهک رضاسنی تحصیله ربط قلب ایتمک ایله خلاص بوله . شمدی فائده و یره جک بر سوز لازمدر . زیر سکوت ضرر و یردی ، نتیجه سندن قورقولدی . سکا غائب حیوانکی یددیرن ، سنی ارشاد ایلش اولور . سکا عتاب ایله بیان مودت ایلان ، خالص دوستلق ایدر .

سینکه برلکده قلمنی اختیار ایدن ، سکا خیر خواهلوق ایلر . ذهنکده قوردیغک ندر ؟ آکا قلباً میل ایدیورسک ، کوز اوجیه دقتلی باقیورسک . ایچکی چکیورسکده لائک سویلیور . عیان ، بیان سویلدکن صکره سویلیه مک واری ؟ ایضاحدن صکره اهام اولوومی ؟ دین آلهیدن بشقه دین و قرآن کریمده مندرج اولان اخلاقدن بشقه اخلاق و مسلك نبویدن بشقه طوغری یول واری ؟ بئم کی آدمه پوصودن کلنورمی ؟ یوقسه سنک کی برذاته کنیش میدان ، طار وقانیق و کوزینه ماه منیر ، طوتوق کورینورمی ؟ اورتهده بو کفتکولر ندر ؟ قاریشیق سوزلر و اوست پردهدن سسلر ندر ؟ اللهم و رسولنک دعوتنه کیفیت اجابتی وحسبه لله هجرت و رسول الله نصرت یولنده و طنلرمزدن خروجمزی ، اولاد و اموال و یارانمزدن آیرلدیغمزی سن پک اعلا بیلورسک . بزم اويله فدا کارلق ایتدیکمز و قتلر سن ، چوجقلق علمنده تربیه ایدیلور واکلندیریلور ایدک . نه مراد اولنیور ، نیه ندا قلنیور فهم و حفظ ایده مزدک ، سوره مزدک ، یده مزدک . صکره سن کاله ایردک ، منزل مقصوده ایریشدک . شمدی قدرک مجهول و فضلك منکر دکادر . اما بز ، او و قتلر طاغلری یرندن قالدیره جق و انسانک آلنده کی صاحب لری آغارد جق قورقونج حاللر ایچنه دوشوب دهرین یرلرینه طالهرق و طالغهرینه بینه رک آجی صولرینی ایچر ، قبالی یرلرینی آچار ، قلمنی احکام ایدر ، قویسنک ایلرینی بوکر ایدک . حال بوکه : کوزلر حسدله طولو ، بورونلر کبر ایله مملو ، کوکسلر غیظ ایله شعله لنور . بویونلر فخر ایله اوزانور و بیچاقلر مکر ایله بیله نور و یریوزی قورقودن دبره نور ایدی . آقشام اوستی صباحه ، صباحلین آقشامه چیقاجغمزه امیدوار دکل ایدک . اولومی کوزمزه آلامدجه کیسه یه مدافعه ایده مزدک . نیچه غصه لر یوتما دقجه براکری بی طوغر و لتمق ممکن اولمازدی . بو حاللرک هر برنده بابا و آنا ودایی و عمو جه لر مزی و آرز چوق بالمله مال و منالیزی طیب خاطر و ثبات قلب و کولر یوز و طاتلی سوز ایله رسول الله فدا ایده ردک . دها بونلر کی نیچه مکتوم سرلر و خفی خبرلر واردر که سن آنلردن غافل ایدک . صغر سنک

اولماسه غافل اولمازدك . نصل غافل اولورسين كه فكرك پارلاق ، لسانك فصيح ، اطوارك ممدوحدرد . سنك خصال حميده كه دائر سويلنه جك دها چوق سوزلر واردرد وشمدي جناب حق سني مرتبه كماله ايريشديرمش ، معدن خير قيلمش ، مرادكي اوكنه قومشدر . سنك ايشيتديكيكي بن علم سويلرم . وقتكه منتظر اول . قوللريكي صيغا ، بويله بر يرده ايليشوب طورما و سكا كلن كيمسه يه يان چيزه رك يوز بوروشدرما . بو ايش ، هنوز تازه ميوه كيدير . چابق چوريمكه يوز طوتمسون ديو ذهنلرده كدر وار . سن بو اتمك اكمكنه قاتيق كيسين . اصرار ايدوبده قورتلانما . بو اتمك كسكين قليجيسين . اكر يلوبده كسمز اولما . بو اتمك طاتلي صويسين . آجيوبده بوزولما . والله بن ، بو ايشي رسول الله دن صوردم . بويله جواب ويردي كه « يا ابا بكر ! بو ايش ، آكا طالب اولمايانكدر . آكا راغب اولوبده آنك ايچون مدافعه ايدنك دكلدر . آكا كوچوكلك كوسترنكدر . تعظم و تكبر ايدنك دكلدر . بو ، آنكدر كه اوسنكدر دنيلور . او ، بنمدر ديهه نك دكلدر ؟ ديو بيوردي . الله بيلور كه رسول الله ، دامادلق خصوصنده بمله مشورت ايدوب قریش دليقانلورندن بعضيلرني ياد ايتدكده « علي حقنده نه بيوررسكنز ؟ ديدم و « حدائت سني حسييله آني فاطمه يه مناسب كورميورم » ديدكده « الكز آلتنده مستور و نظر هايونكنز ايله مرعي و منظور اولدقجه ايكيسنه دخي بركت ، شامل و نعمت ، مبذول اونور » ديدم و دها چوق سوزلر سويلدم سنك دامادلغكي تروييج و ترغيب ايلدم . بنم بونده بر غرض مخصوصم يوق ايدى . سنك يريكه باشقه لرينك قوقوسي كلور كن بن سنك حقه كده ديديكمي ديدم . بنم او معامله م ، سنك شمدى بنم حقه كده كي معامله كدن دها خيرلو ايدى . اعتماد ايت كه : بو ايشده ( يعنى امر خلافتده ) رسول الله سكا اشارت ايتديسه سندن باشقه سنه دخي اويله ايمار ايتمشدر و سنك حقه كده بر شي سويلديسه باشقه سنك حقه كده سكوت ايتمه مشدر . اكر ذهنكده بر شك و تردد وار ايسه كل . صحابه نك حكمي مرضي و صواب ، مسموع و حق ، مطاعدر . رسول الله ، بو جماعتدن خوشنود و حقلرنده شفيق و مسرتلر يله

مسرور و کدر لر یله مکدر اولدینی حالده دار عقبایه انتقال بیوردی. بیلمز میسین که رسول اکرم، اصحاب و ندما واقربا و اصداقاسندن هر برینی بررفضیت ایله ممتاز، برمزیت ایله متمیز، برحالت ایله متفرد قیله رق براقدی. اکر هر طرفده کی امتی باشنه طوبیلا نسه حسن اداره لرندن عاجز قالماز و بوبابده وزیر و معینه محتاج اولماز ایدی. رسول الله، بوامتی باشی بوش و پریشان و باطله مفتون و حقندن خافل، باقیجیسی یوق، ایدیجیسی یوقی براقدی صانورسین؟ او یله دکل والله. ربی تعالیٰ حضرت تلرینه مشتاق اولوبده آنک درکاه رضوانه عزیمتی نیاز ایتمدن علامت لر وضع ایله یوللری تأمین و موقفلری و صورلرینی تسهیل و تعیین ایتمدی. باذن الله تعالیٰ شرکک دماغنی قیردی و لوجه الله تعالیٰ نفاقک یوزینی یاردی و، الله ایچون فتنه نك بورنی کسدی و بعون الله تعالیٰ شیطانک یوزینه توکوردی و او امر الهمیه یی اعلان بیوردی. بعد ازین ایشته انصار و مهاجرین، سنک یانکده و سنکله بریرده و بربلده ده در. اکر آنلر، بنم سکا بیعتی ایستلر و بنم یانمده سکا اشارت ایدرلر ایسه بن، المی سنک الک اوزرینه قورم (یعنی بیعت ایلم) و اکر باشقه صورت اولور ایسه سن ده مسلمینک کیردیکی یوله کیر (آنلرک بیعت ایلدیکنه بیعت ایت) و آنلرک مصالحنه معین اول و مغلق ایشلرینی فتح و یوللرینی شاشیرانلرینی ارشاد و آزعینلرینی منع ایت. چونکه: الله تعالیٰ، ایلاک اوزرینه یاردیملا شمع ایله امر ایتمشدر. همان حق اوزرینه یاردیملا شغه حاضران و براق بزى حقد و بغضدن عاری کوکسلر ایله شو دنیا دیرلکنی ختامه ایردیره لم و عداوتدن سالم کوکلر ایله الله قاووشالم. بعدذا ناس، بک ضعیفدر. آنلره آجی و آنلر حقدنه ملایم اول. کندیکه بزم سبیمزه زحمت و یرمه و فتنه قپوسنی قبالی براق. آرتق نه قیل و قال وار، نه ده لوم ایدن و ایشک آرقه سنی قوالایان وار. الله تعالیٰ، بزم دیدیکمزه شاهددر و بولندیغمز حاله ناظردر، ابوعبیده، حضرت صدیقندن بو وجهله تعلیمات آلوب قالقار ایکن عمر الفاروق رضی الله عنه حضرت تلری، آکا «قبوده براز اکلن. سکا ده سوزم وار» دیمکه ابوعبیده، قبوده براز اکلند کدن صکره حضرت عمر، بشاشت



ایله چیقوب دیمش که یا اباعییده ! علی یه دی که : اویقو، اصلی یوق خیالات کوسترن برحالتدر. خصومت، حربه مؤدی برکیفتدر. هوا وهوس، ایشک صوکنی صایمامقدن عبارتدر. هر بریمزک بر مقام معلومی وحق و مشاع، یا مقسومی، خبر ظاهر، یا مکتومی واردر. اذکیانک اذکیسی، قاچانی تألیف و اوزاق قالانی تلطیف ایدن و هرکی میزانیله طارتان و خبری عیانه قاریشدیرمایان (یعنی هر ایشندیکنه اینانمایان) و قاریشنک یرینه سره سنی قومایان آدمدر. مهم ایله قاریشیق معرفتده و، جهله مصروف اولان علمده خبر یوقدر. بز، یاره سندن قوچونان ده وه لر کبی دکاز. هر قیزغین شینک ناری و هر سیلک بر قراری واردر. بو جماعتک سکوتی، عجز لرندن ناشی دکل ایدی. بوکون کلاملری ده قورقودن دکلدر. الله تعالی، محمد ایله هر متکبرک بورتی و هر جبارک بلنی قیردی و هر یالانچینک دیلنی کسیدی. حقدن صکره ضالالتدن باشقه نه وار؟ بو تکبر و تعظم وال آلتندن تهییثی و تجسس ندر؟ رسول اکرم، دار عقبایه عازم اولدی. بو ایش (یعنی امر خلافت) ایسه معلق و وقوف قالدی. کیمسه نک آکا خصوصیتی یوقدر. رسول الله، سنک حقکده صراحة برشی بیورمادی. بز لر ایسه فرس و روم کبی بر دولت جابریه تابع دکاز. بلکه حق و صدق ایله هدایتیه ایروب متین قلبی و قوی بیلکی و نصرتلی الی و کوریحی کوزی اولان بر امت آره سنده نور نبوت و ضیاء رسالت و ثمره حکمت و حریت و عنوان نعمت و ظل عصمتده یز. ظن ایدرمیسین که ابو بکر، بو امته جبر و مکر ایدرک صیچرایوبده امارتی قایدی. ظن ایدرمیسین که ابو بکر، بو امتک شعورلرینی سلب ایلدی، کوزلرینی باغلادی، دوکوملرینی چوزدی، عقللرینی بوزدی، صولرینی یاتیردی. آنلری یولدن چیقاردی، ضالته دوشوردی، طریق هلا که کوتوردی. کوندوزلرینی کیجه، وزنلرینی کیله، یقظه لرینی اویقو ایتدی. صلاحلرینی فسادله قلب ایلدی. اکر او یله اولسه آنک سحری مبین و مکرری متین ایمش دیمک اولور. الله حقیچون او یله دکل. او یله اولسه هانکی آتلی

وپیاده وهانکی قارغی و قلیج و نصل قوت و مکنّت ایله وهانکی ذخیره و مهمات وهانکی ال و شدت وهانکی قبیله و عشیرت و نصل و سیله و وسعت ایله یابدی . طوغریسی ابوبکر ، معلومک اولدینی اوزره عزیز و عالی جناب برذاتدر . خلافته قوت و دیگر صورت ایله نائل اولمادی . والله او ، نازلاندی . خلافت ، آ کا مفتون اولدی . او ، چکیندی . خلافت ، آ کا صاریلدی . بو بر عطیه و عنایت درکه ، جناب حق ، آ کا احسان بویوردی و بر نعمت درکه شکرینی الله تعالی ، آ کا واجب قیلدی . آنک امارتیه بوامت دخی اللهک لطفه مظهر اولدی . رسول اللهک ایام سعادتند دخی بو های سعادت ، آنک باشنده طولاشدی . لکن او ، بوکا التفات ایتمز و وقتی کوزه تمز ایدی . الله تعالی ، مخلوقاتنی اعلم و قوللرینه ارحمدر . حقلرنده خیرلوسنی اختیار ایلر . سنک ده بیت نبوت و رسالت و کھف حکمت ده مقامک مجهول دکلدر . اللهک سکا ویردیکی علم ده حقل انکار اولونماز . لکن سنک اوموزگدن بویوک اوموزله و سنک قرابتگدن دها زیاده قرب ایله و سنک سنکدن عالی سن ایله وزمان جاهلیتده و اسلام و شریعتده و سنک نصیبک اولمایان و آدک یاد اولونمایان وقعهرده سیادت و ریاست ایله سکامزاحم اولان وار . اطرافکده کیلرک ( یعنی زیر و رفقاسی رضی الله عنهمک ) کومورده نمه لرینی دیکله مکده کنیدیگی معذور کورورسهک ابوبکر دن مکستوم طومایاجغمز ملایم سوزلریمزی ایشیتدیککده بزى دخی معذور طوت واکر آنلرک سوزلرینه باقوب طوره جق اولورسهک علی التحقیق سکا او سوزلری اونوتدیره جق و بو سوزلری مطالعه یه میدان ویرمه جک حاللر ظهوره کلور . اسمنی تصریح ایتمدیکمز ذات ، اکر لهنده وعلیه نده اولان افکارمزی بیلسه سکوت ایله مزدی . سن ده آنی بعض امورده محرم اتخاذا ایله مزدک . اما ابوبکر الصدیق ، دائما رسول اکرمک سویدای قلبی و محرم اسرارى و شریک احزان و اکدارى و مقبول و منظوری ایدی . بوده بالمله مهاجرین و انصارک حضورلرنده اولوب شهرتی دلاتدن مغنی در . الله ایچون طوغریسنی سوبیلیم . سن ، قرابتجه رسول الله اقربسین .



لكن ابوبكر، مرتبه جه اقرېدر. قرابت، ات ايله قاندر. مرتبه جه قرب ايسه روح ايله نفسدر. بو ايسه بر بيوك فرقدر. مؤمنلر، آنى بيلهرك بو باده متفق اولمشلردر. آنده شك ايدرسهك بونده شك ايمه كه اللهم الى جماعت ايله ورضاسى اهل اطاعت ايلهدر. ايمدى سكا بو كون خيولو ويارين فائدهلى اولان حاله دخول ايت وبوغازكده ايليشه شيدى چيقار، آت. اكر عمر، اوزون واجل مساعد اولور ايسه آنى سينر، سينمز ييه جكسك و خوش ناخوش ايجه جكسك. اما اويله بر وقده ييوب ايجه جكسك كه سكا خصوصيتى اولانلردن باشقه سوزيكى رد ايدن اولمايه جق وسنك دهريكي امهرك و قانادلريكك اوچلرينى كسهرك وسنك مسلككى تعيب ايدمرك سكا طمع ايدنلردن باشقه تابع اولان بولونمايه جق. او، حالده ندامتله ديشلريكي غيچيرداده جقسك وقانلى صويوده جقسك واوزمان كچن عمره و آخرته كيدن قومك ايچون تأسف و تحسر ايدم جكسك و ابا ايتديكك كاسه ايله سقى اولونمى و ايچندن چيقمق ايستديكك حاله اعاده قيلنمى تمى ايدم جكسك. بزم حمزمده وسنك حقكده جناب حقك بر سر و حكمتى و اركه بونى آنجق او، ييلور وبونك بر غايتى و اركه فرحلى و كدرلى و قتلرده عون و عنايت آنجق آندن اميد اولونور. الله تعالى ولى حميد و غفور و دوددر.

مبحث مخصوصنده بيان اولوناچى اوزره حضرت علينك ايام خلافتنده باشنه كان مشكلات متواليه دن دوچار تأسف و حيرت اوله رق حضرت عمره سوزلرى عينيله ظهوره ككشدر.

حضرت ابو عبيده، حضرت عمره بو تبليغاتى دخى حامل اوله رق سعادتخانه صدقن چيقوب ايشك عسرت و زراكتى دوشونهرك و دهرين مطالعه لره دوشهرك خلوت خانه حضرت على به كيتدى و حضرت صديق و فاروقدن آلاينى سوزلرى آكا تماميله تبليغ ايتدى.

حضرت على، دقت ايله ديكله دى. او سوزلرك تاثيراتى تا ايليكنه

ایشله دی ودرجه تأثیرینی بیان ضمننده دیدی که : « حلت معلوطة و ولت مخروطة . حل لاحلت . التعس اولی لها من قول لها .

نظم

احدى ليايك فهيسى هيسى لاتنعى الليلة بالتعريس .

یعنی : بونی تمغالی ده وه چوکدی ، بونی اینجه ده وه ده قاجدی .  
هایدی خیرسز ! کلز اول . آکا ، الله بلاسنی ویرسون دیمکدن ایسه الله  
خیرلر ویره دیمک اولار .

بیت

صاییلی کیجه لرکندن بریدر یوری هایدی . طور ، اوطور یوق بوکیجه  
( بونی اینجه اولان ده وه نک صر بلر عننده مکروه اولدینی معلومدر ) .  
حضرت علی ، بو ضرب مثللری ایراد ایلدکن صوکره : « اوت ،  
یا ابا عیبه ! بو سوزلر ، هپ قومک ضمیرلرنده مسترمی ، دوشونوب ده  
بویله معالرمی چیقاریورلر ؟ » دیدکده ابو عیبه : « بنده جواب یوقدر .  
بن ، آنجق دینجه اولان بورجی اوده ییجی و اسلامک سوکوکنی دیکییجی ،  
امتک گدیکنی سد ایدیجی یم . بوراسنی الله بیلور . خلجیان قلم وداغ  
دروتم ، آکا دلالت ایلر » دینجه حضرت علی دیمش که : « بو ، اوک بر  
بوجاغنده اوطوروشم ، خلافتی طلب ، یا امر معروفی انکار ویاخود بر  
مسلمه عتاب ایچون دکدر . بلکه رسول اللهک فراقی ، بنی چارپدی وایله  
یخود ایتدی که آندن صوکره هانکی جمعیتده بولندم ایسه دردی تازله دی  
وحزن وکدرمی قات قات ایلدی . آکا قاووشمق اشتیاقی ، بکا کافی وباشقه  
شیئه طمعدن مغنی در . الله بیلور که عهدالله ( یعنی کتاب الله ) ایله مشغول  
ایدم . متفرق اولانلرینی جمع ایدیورم و عملی اللهه اخلاص وایشنی آنک  
علم واراده سنه تسلیم ایدنلره حاضر لائمش اولان ثوابه نائل اولمق امیدله  
کتاب اللهه باقیورم . مع ذلك علیهمده بر اتفاق واقع وبنم ایچون سوق  
اولنان حقه مانع اولدیغنی بیلدم . مادام که بنم سببه وادی طولمش ونادی

( یعنی مجلس و دیوان ) مجتمع اولمش . آرتق مسلمیندن بر فردہ قانلق ایدنه مرجا یوق . کوکلده کلام وار . اکر قول وعہد ، سابق اولماسہ غیظمی سرچہ پارماغم و آدسز پارماغم ایله فاش ایدردم و آیاقلمک آلتی و باشمک تپہسی ایله انکین یرینہ دالاردم . لکن ربمہ ملاقی اولونجہیہ قدر آغزیمی آچمام . دعوامی حضور باریدہ کوریرم . یارین صباح سزک جماعتکزه کیدرم و صاحبکزه بیعت ایدہرم . بنی محزون ، سزی ممنون ایدہن حالہ دخی صبر ایلرم . تا کہ حکم قدر ، یرینی بولہ . اللہ ، ہر شئیٹا شاہددر .

ابوعبیدہ حضرتلری دیرکہ : بونک اوزرینہ عودت ایله ( ابو بکر ) و ( عمر ) ک یانہ کلدیم . آجی ، طاتلی نہ ایشتمدیم ایسہ جملہ سنی آنلر ، سویلدیم و یارین علینک کلہ جکنی اخبار ایلدم . فرداسی علی ، مسجد شریف کلدی . جماعتی یاروب کچہرک ابو بکرک یانہ واردی ، بیعت ایلدی . کوزل سویلدی وقار ایله اوطوردی .

او زمان ، ابو بکر الصّدیق حضرتلری ، حضرت ( علی ) یہ خطاباً « سن بزجہ عزیز و کریمین . حال غضبہ اللہدن قورقارسین ، حال رضا دخی رجا ایلرسین . نہ موطلو ، او کیشی یہ کہ اللہک احسان ایلدیکی فضلایا اکتفا ایلر . بن ، امارتہ راغب دکل ایدم و سرّاً و علناً اللہدن آنی ایستمدیم لکن فتنہ ظہور ایدر دیو خوف و دہشت کلوبدہ ناچار قبول ایتدم امارتہدہ راحتم یوق . بکا بر امر عظیم ، تقلید اولندی کہ آکا طاقا و قدرتم یوق . مکر ، اللہ قوت ویرہ . بنم صیرتمہ یوکلہ دیلن آغز یوکہ اللہ ، سنک آرقہ کدن ایندیردی . بز ، سکا محتاجز . سنک فضلکئی بیلورز ہر حالہ اللہہ راغبز » دیمش و حضرت ( علی ) و ( زبیر ) دخی خلافت حضرت ( ابو بکر ) ک جملہ دن احق اولدیغنی اقرار و مشورت دن خار براقلدقلری جہتلہ متاثر اولہرق بیعتدہ تأخر ایلدکلی بیانیلہ اعتدای ایدوب طرف خلیفہ دن اعتذارلری قبول بویورولمش و میانہ کی برودر کلیاً برطرف اولمشدر .

ینه ( ابوعمیده ) دیرکه : بعده علی ، استیذان ایله قالقدی . عمر ،  
اکراماً آنی تشییع ایدرکن علی دیدی که : « شمدی یه قدر کله ییشم ،  
صاحبگری قبول ایتدیکمدن وشمدی کلیشم قورقومدن دکلدر . بن ،  
سوزمی جدی سویلرم . کوزیمک کوردیکی وایاغمک باصدینی ، یایمک  
چکیلدیکی واولمک دوشدیکی یری بیلورم . لکن بلا اوزره کلن بلاحقنده  
اللهه اعتماداً آتمک گمینی طوتدم » ( بلا اوزره کلن بلا ، وفات نبوی  
اوزرینه طلب خلافت ایله اتهام اولونمسیدر ) . بونک اوزرینه حضرت عمر ،  
دیدی که « بحی اوزاتما ، سوزی طاغیتما . جماعتمزک حالی معلوم . بز ،  
بر قومز که چاقاغی چاقار ایسهک آتش چیقاریرز ، قویویه اینر ایسهک  
قووانی قاندر ارجق قدر طولدیریرز و اورورسهق قاناتیرز . دیگر ایسهک  
اصلاح ایدرز . سنک ضرب مثلاریکی ایشیتدم . ایسته سه م بنده سنک  
سوزلریکک اوزرینه بر طاقم سوزلر سویلردم که ایشیتدیگکه ده سویله دیگکه  
پشیمان اولوردک . دیمش سئک که : رسول اللهک فراقی ، بنی چارپدی .  
آنک ایچون بو اؤک بر بوجاغنده اوطوردم . رسول اللهک فراقی ، یالکز  
سنیمی چارپدی ؟ آنکه مصاب اولانک حالی ، بوندن آغیر واعظمدر .  
زیرا ربطی اولمایان سوزلر ایله جماعته تفرقه ویرمه مک ونتیجه سنده شیطانک  
مکرندن - خوف اولنان احوالده احتیاط ایله مک دخی مصاب اولان ذاتک  
وظائفنددر . شو اطرافمزده کی عرب ، بر صباح اوزریمزه طویلانسه  
آقشامه قالمایز . دیمش سئک که : رسول الله قاووشمق اشتیاقی ، باشقه شیده  
طمعدن مغنی در . ایددی آنک شریعتنه نصرت وبو بایده اللهک اوامرنی  
طوتانلره معاونت دخی آکا اشتیاقک ایجاباتنددر . دیمش سئک که : عهدالله  
ایله مشغول ایدم . عباداللهه نصیحت و خلقه مرحمت دخی عهدالله  
اقتضاسنددر . برده علیکده بر اتفاق واقع وسنک ایچون سوق اولونان  
حقه مانع اولدیفندن بحث ایتمشسک . هانکی اتفاق سنک علیکده واقع اولمش  
وهانکی حقک کتم اولونمش ؟ دون انصارک نه دیدکلری ونه یابدکلری  
معلومک اولمشدر . سنی یاد ایلدیلرمی ، یاخود سکا دائر بر اشارت

ايتديلمى؟ ايسته مهاجرين بوراده. سنك اتخابكي لسانه آلان وياخود ذهنده تصور ايله ين كيمدر؟ ناس، سنك ايجون طريق حقدن صايديلمى و سنك حقدده تجاهل ايله اللهى ورسولنى صايديلمى ظن ايدىورسين؟ والله اويله دكل. لكن سن، عزالت ايتدك. وحيه وملكه مشاوره يه مى منتظر اوليورسك؟ بوايسه برامردر كه الله تعالى، آنى سيدمر محمد صلى الله عليه وسلم دن صكره طى ايتدى. امر خلافتى، ايشكلنمش، ياخود قامش ياپراق ليله سد اولنمش حل و كشادى قولاي بر ايشمى صانيورسين؟ اويله دكل والله. اورمان قابلامش، آغاچلر ياپراقلامش. هپ عجميلر فصيح و ضعيفلر سميز واحمقلر فطين و ديكنلر خوشبو اولمشدر. اك غريبي بودر كه: قول و عهد، سابق اولماسه غيظى فاش ايدردم ديمشك. يادين اسلام، اهل ديندن برينه كندى ايله و دليله تشفى غيظ ايتكى براقدىمى؟ بو بر عادت جاهليه در كه الله، آنى كوكندن قالديردى وناسى آنك مضر تندن قورتاردى و آنى روح وريحان و دليل و برهانه تبديل بيوردى. بن آرتق آغزىمى آچام ديمشك. اللهدن خوف ايله رضاسنى اختيار ايدن؛ لساننى طوتار، آغزىنى قيار، خيره سى ايدر.

عمر ك بو افاداتى اوزرينه على ديدى كه «والله ياپديغمى بوزمق اوزره ياپمادم و دونمك نيتيله اقرار ايتدم. عندالله مبايعده اك زياده زيان كورن، نفاقى اختيار و شقاقى التزام ايدندر. هر بليده آنحق الله ايله تسلى بولنور. هر حادثه ده آنحق الله توكل اولنور. يا ابا حفص (ابو حفص حضرت عمر ك كنيه سيدر. برذاته كنيه سيله خطاب ايتمك برنوع احترامدر) آرتق منبسط و مستريح اوله رق دون، مجلسه كيت. ايشتديكك خارجنده عون و حسن توفيق الهى ايله آرقه يه قوت ويره جك صوچى عفو ايتديره جك، الفتى جمع ايدره جك، كلفتى رفع ايدره جك حالاتدن باشقه برشى يوقدر. حضرت علينك بو افاده سى اوزرينه حضرت عمر، دونوب مجلسه كيتدى، فرقه هاشميه دخى بيعت ايتدى. اختلاف مندفع اولدى، حضرت صديقك خلافتى حقدنه اجماع امت واقع اولدى.



حضرت ابو عبيده دیرکه « رسول اللهك فراقندن صكره باشمه كلن  
حالكرك اك كوچى بودر »

طوغرىسى پك مشكل و مخاطره لى بر حال ايدى . جناب حق ، بونده  
دخى اهل اسلامى اسيركه دى . اكر اوزمان جمهور صحابه ايله فرقه هاشميه  
آره سنده منافسه ظهوريله مدينه منوره ده بر فتنه حادث اولايدى ، اهل  
اسلام آره سنده عظيم تفرقه دوشردى و ارباب حل و عقدك تدابيري  
شاشاردى . خاطر و خياله كلدك فلاكتلر وقوعه كلوب صكره اصلاح  
احوال پك مشكل اولور و ملت اسلاميه نك يوره كنده قيامته قدر اونولمايه حق  
بر ياره آچيلور و بلكه او عربده لر آره سنده آداب اسلاميه كيرو قاله رق  
صرف قوميت افكارى ميدانه چيقوبده ابوسفیان ، ياخود ديكر رؤساي  
قريشدن برى ، رياستى دردست ايلك كى احتماللر خاطره كلوردى .

طوغرىسى بو حادثه ده كرك حضرت صديق كرك حضرت على ، پك  
زياده بصيرت و احتياط اوزره طاورانشلردر .

باقسه ك آ : فرقه هاشميه ، آتش پوسكوره رك حضرت علينك باشنه  
طوبلانده ده حضرت صديق ، تهوور ايدوبده اوزرلرينه و ارما دى . تا كه  
مقام خلافته استقرار ايله كندوسنه اعتماد كلدكه ده حضرت ابو عبيده نى  
كوننده ردى . حضرت على ده عجله ايتيوب « يارين كيدرم » ديدى . زيرا اودخى  
باشنده كى فرقه نك تسكينه محتاج ايدى . بعده كيتدى ، بيعت ايتدى . غائله ده  
ييتدى .

آ كلاشيليوركه ايكيى دخى اهل اسلام آره سنده تفرقه حدوشندن  
صاقي نورلر و دفع فساد كمال اخلاص ايله چاليشورلر ايدى . آنلرك بومثللو  
حال و حركتلرى ، عين حكمت و اخلافه درس عبرتدر .

يا حضرت علينك سقيفه يه كيتيوبده كوشه ازوايه چكيلمسى خطا  
دكلىدى ؟ كيم بيلور ؟ بلكه اودخى عين اصابت ايدى . احتمال كه اوكون  
سقيفه يه كيتمش اولايدى انصار ايله مهاجرين آره سنده كى منازعه يه برده



هاشميك بحی منضم اوله رق ایش، بر مرتبه دها صاریه صارار و دها قویو بر رنکه کیرر ایدی .

قالدی که : آنلرک احوالی محاکمه ، صکره کلنلرک حدی دکلدرد . قرون اسلامیه نیک خیرلوسی قرون صحابه در . آنلر ، هپ هدایت ییلدیزلریدر . قرآن کریمک تفسیری ، آنلردن اوکره نیلیدی . بونجه احادیث شریفه ، آنلردن ایشیدیلیدی . احکام دینییه ، آنلردن اخذ ایدیلیدی . آنلردن اوکره ندیکمز قواعد دینییه بی اله آلوبده آنلرک حرکتلرینی محاکمه ایتمک بزم حدیمز می ؟ .

اگرچه خطا ، انسانک شاننددر . مجتهدلر دخی خطا ایدر . لکن مجتهد ، اصابت ایلر ایسه اون و خطا ایلر ایسه بر ثوابه نائل اولور . آنلر ، هپ ارکان شریعتدر . بینلرنده وقوع بولان اختلاف و منازعه لر ، هپ مباحثه و مناظره اجتهادیه قیلندن ایدی واجتهادجه اختلاف ایتسه لرده حق و صوابی آکلادقلری کبی تسلیم ایله اتفاق و اتحاد ایدیوریرلر ایدی . اننای مباحثده بر برینه سرتجه سویلسه لر بیلر بر برینک قدرینی بیلورلردی . حضرت زبیرده ذره جه ذاتیات ملاحظه سی اولسه قاین پدردن آیریلمازدی . وبالاده تفصیل اولنان خلافت منازعه سنده حضرت علی ایله الک زیاده اوغراشان حضرت عمر الفاروق ، حضرت علینک الک زیاده قدرینی بیلنلردن ایدی . حتی حضرت عمر ، بر کون حضرت علیدن بر مشکل مسئله صورمش ، اوده در حال جواب ویرمش . آنک اوزرینه « حضرت علینک بولنمادیغی جماعت ایچنده بر مسئله مشکله ظهورندن الله صیغینورم » دیو بیورمشدر . حضرت علی دخی « رسول اکرمدن صکره بوامتک الک خیرلیسی ، ابوبکر و عمردر » دیر ایدی .

الحاصل اعجاب کزینک اختلافلری ، هپ اجتهاده مبنی مباحثات علمیه قیلندن ایدی . اغراض دنیویه دن ناشی دکل ایدی . آنلرک قلوب مطهره و منوره لر ی حب ریاست و امر سیاستدن عاری ایدی .

حضرت ابوبکر الصديق تجارت ايله كچينور ايكن بروج مشروح خليفه اولديفنك فرداسى صباحلين بر معناد اوموزينه بر طاقم بز لر آلوب صامق اوزره بازاره كيدر كن عمر ، و ابو عييده راست كلور « نه ياپيورسين يا ابابكر ؟ مسلمينك امورى سكا تفويض اولندى ، ديدكلرنده « يان عيالى نه ايله بسليه يم ؟ » ديمكله « بز ، سكا مال مسلميندن يوميه نفقه تقدير ايدرز » ديواصحاب كرامك اتفاقيه اوميه يارم قويون ويازلق ، قيشلق اولمق اوزره سنده ايكي قات البسه و سنوى ايكي بيك درهم تقدكوشم تحصيل قلمش ايسده حضرت ابو بكر « بونى زياده ايديكز . بنم عائلهم وار . حال بوكه سز ، بنم تجارتنه مانع اولديكز » ديمكله بشيوز درهم ضم اولنه رق ايكي بيك بش يوز درهمه ابلاغ اولمشدر و تاريخ كاملده ساليانه سنك آلتى بيك درهم اولديى محرر در .

مصالح مسلمينه حصر اوقات ايلين ذاتك مصارف ، اموال مسلميندن صرف اولمق امور طيعيه دندر . فقط بوده يكي ميدانه چيفمش بر مسئله اولديى حالده اجماع امت ايله قرار آلتنه آلمشدر .

بر آى صكره ، حضرت ابو بكر ، منبره جيقوب خطبه اوقور ايكن « اى ناس ! على التحقيق بدن بشقه بر ذاتك بو ايشه كفائت و كفالتنى آرزو ايتمكدنيم . اكر سز ، بنى تماميله بيعمبر كزك مسلكنده طوتارسه كز بن ، آ كامقتدر دكل . زيرا او ، شيطاندن معصوم ايدى و آ كا كوكدن وحى كلوردى ، ديوا عتراف عجر و قصور ايتمشدر . اويله ذاتلك قبلرنده حب دنيا بولنورمى ، اويله ذاتله سوء ظن اولنورمى ؟ .

الحاصل فخر عالم صلى الله عليه وسلم حضرت تارينك وقاتى كونى خلافت حقنده شايلان اهميت بر منازعه ظهور ايلش ايسده اجتهادجه بر اختلاف اولوب اصحاب كزينك نيتلى ايسه خلوصه مقرون اولديفندن انصار ايله مهاجرين آره سنده كى اختلاف ، اوكون و جمهور صحابه ايله فرقه هاشميه آره سنده كى اختلاف دحى ايام قليله ظرفنده بر طرف ايديش و جمله سى ال برلكيله ايشه صاريتمشدر .

اگرچه فاطمه الزهرا رضی الله عنها وارضاهما حضرت تلمی، پدرینک فراق و هجرانی ایله کوشه عن لده دلخسته و داغدار اولغله زوج مکرّمی علی کرم الله وجهه دخی آکا غمکسار و آنکله برلکده اختیار انزوایه مجبور اوله رق درگاه خلافته مداوم اولماز ایش . لیکن حضرت (فاطمه) نک وقاتنده تجدید بیعت و تأیید خصوصیت و آندن صوکره خلیفه حضورینه مداومت ایله آکا یاور و یار و مصالح امتک رؤیتده ظهیر و مستشار اولمشدر .

ایشته بووجهله ، زمان سعادتدن صکره (خلافت) عنوانیله برامارت اسلامیة تشکل ابتدی که عالمده هیچ بروقت اولیله بر حکومت فاضله تشکیل اولونما مشدر .

### بعض وقعات

رسول الله ﷺ ، معتقهلرندن اولوب ترجمه حالی یوقاروده بیان اولونان (امّ ایمن) رضی الله عنها حضرت تلمی که جنت ایله مبشّره اولوب بعضاً کبار صحابه ، آنی زیارت ایله تیمّن ایدرلردی . اشبو اونبرنجی سنه هجریه شعبانک اوائلنده ارتحال دار بقا ایش و صانکه کریمه محترمه نبیّ مجتبی و زوجه مطهره علی المرتضی (فاطمه الزهرا) رضی الله عنها و ارضاهما حضرت تلمینه قوناقچی کیتمشدر . بر آی صکره ، یعنی سنه مرقومه رمضان شریفک اوجنجی صالی کیجه سی دخی (حضرت فاطمه) دنیا غائله سندن کچدی . داربقایه کوچدی . آتی آیدنبرو حسرت کشی اولدینی پدرینه قاووشدی . علی النبی و آله الصلاة والسلام .

حضرت علیدن (حسن) و (حسین) و (محسن) نام اوغوللری و (امّ کلثوم) و (زینب) نام قزلری اولوب محسن ، کوچوک ایکن فوت اولش و دیکرلری آندن صکره بر حیات قالمشدر . بارک الله علیهم .

رسول اکرم صلی الله علیه وسلم حضرتلرندن صوکره حضرت فاطمه دن باشقه اولادی قالمایوب نسل نبوی سبطین مکرّمین (حسن) و (حسین) حضرتلرندن ظهور ایشمشدر .

(رضی الله عنهما و ارضاهما)

خلال شوالده دخی خلیفه حضرت تیرینک اوغلی ( عبدالله بن ابی بکر ) رضی الله عنهما ارتحال داربقا ایتشدر .

حضرت صدیق، خلیفه اولدقدن صوکره زیرده بیان اولونا جفی وجهله (مرتدین) ایله محاربه یه باشلامش وموسم حج کلدکده (حضرت عمر) ی امیر الحاج نصب ایدرک قافله حاج ایله مکة مکرمه یه اعزام ایلشدر .

### لاحقه

حضرت (صدیق) که نه قدر بویوک آدم اولدینی تفصیلات سابقه دن پک کوزل آکلا شلمشدر که فخر عالمک ارتحالی اوزرینه هر کس نه یاپه جفی شاشیرمش ایکن او، میدان چیقوب افکار ناسی بر صرکز طوبلامش وزمان سعادتده اولدینی کبی ملت اسلامیة تک اداره سنی یولنه قومشدر . فقط عمر الفاروق ایله امین امت اولان ابو عبیده تک دخی بیوک بیوک همت ومعاویشتری میداندهدر .

ارتداد غائله سنک ازاله سی حقنده حضرت صدیقک مشاهد اولان همت فوق العاده سی دخی کندوسنک بیوک کلکنه بشقه جه بر دایلدر .



### اخبار مرتدین

فخر عالم صلی الله علیه وسلم حضرت تیرینک ارتحالی بتون جزیره العربی سارصدی. طرف طرف اختلالر وعصیانلر ظهوره کلدی. مدینه منوره، مع اصحاب کزین اولدیغندن اوراده یالخر خلافت مباحثه سی ظهور ایدوب حضرت صدیقه بیعت ایله بر طرف اولدی .

امامک مکرمه یی بوده شتلی وقعه، ییلدیریم کبی اوردی. اهالی بی حیرته وشوردی. امیر مکة اولان (عتاب بن اسید) نه یاپه جفی شاشیردی، خوف جان ایله بر محله کیزلندی .

ایشته او یله نهلکه لی بر زمانده (سهیل بن عمرو) کعبه معظمه قیوسنده  
 طوردی (ای اهل مکه) دیو چاغیردی. خلق دخی آنک باشنه طوبیلا ندی.  
 سهیل ، آنلره خطاباً « ای اهل مکه ! سر ، جله دن صکره . مسلمان  
 اولدیکیز . کلیکیز ، جله دن اوّل مرتد اولما بکیز . رسول الله ک بیوردینی  
 کبی الله ، بوایشی اتمام ایدم جکدره . دیمکه مکه مکرمه ده ارنداد و قوعوبولما بوب  
 قریش قبیله سی ، هپ دین اسلام اوزره نابت قالدی .

او زمان ابو بکر الصّدیق رضی الله حضرتلرینک پدری ( او فحافه )  
 مکده بولمغله حلقک اضطرانی کورنجه بیچاره اختیار ، تلاش ایدرک « بونه ؟ »  
 دیو سورمش . دیمش لکه : « حضرت پیغمبر ارنحال بیورمش ، دیمش که  
 « فی الواقع بر امر عظیم . اما آنک ایشی کورمک اوزره یرینه کیم قائم  
 اولمش ؟ » دیمش لکه « سنک اوغلك » دیمش که « یا آکا عدمناف اوغوللری  
 ومنیره مک اوغوللری راضی اولمشلرمی ؟ » « اوت » دیمش لر . او دخی  
 « سنک قالدیردینگی قویاجق وقویدینگی قالدیراحق بوقدر ، دیمش و جناب  
 حلقک لطفنه منشکر اولمشدر .

ابوفحافه ، اوزمان پیر فانی ایدی . لکن کورمش کجیرمش ، بک جوق  
 وقعه لر آشیرمش ، ارباب تجربه دن بر ذات اولدینی جهته درحال اوغلك  
 خلافتده استقراری ، قریش اولولرینک قولنه موقوف اولدینگی تحطراتمشدر .  
 مکه مکرمه کبی طائفده دخی ارنداد و قوع بولادی قریش کبی ( تقف )  
 قبیله سی دخی بلیه ارنداددن قورتولدی .

اما دیگر قبائل عرب ، کیمی تماماً و کیمی قسماً مرتد اولدی . بعضیلری  
 دخی « نماز قیلارزه ، اما زکات و یرمه یز » دهرک بر غریب بول آلدی . بویه  
 زکات و یرمکدن امتناع ایدنلر حقتده نه معامله اولنق لازم کله سگی اوّل  
 امرده بین الاصحاب محل تردد و اشتباه اولدی . حتی حضرت عمر الفاروق  
 « لا اله الا الله محمد رسول الله دینلر اوزرینه نصل قلیچ چکرزه ؟ » دیدی .  
 خلیفه رسول الله ، بو مسئله یی صورت قطعیه ده حل ایتدی و دیدی که



« والله ، رسول الله ویردکلی بر دیشی چپیچی ( یعنی بریلق اوغلاخی )  
ویرمکدن امتناع ایدرلر ایسه الم قلیج طودنجه آنلر ایله مقاتله ایدرم .  
فی الواقع زکاتی نمازدن تفریق ایدنلر ، کلمه توحیدک حقنی ایفا ایتماش  
اولاجقلمی جهته مرتدینه ملحق اولاجقلمی درکار ایدی . حضرت عمر  
ودیکر اصحاب کزین دخی لدی الملاحظه رأی خلیفهک حق و صواب اولدیفنی  
تصدیق و علی العموم مرتدین ایله محاربه ایتمک اوزره اتفاق ایلدیلر .  
ا کر او وقت حقوق مالیهک استیفاسنده مسامحه اولونسه یدی خلافت  
اسلامیه ، مستعد اولدیفنی قوت وسطوقی کسب ایده مزیدی .  
حضرت پیغمبرک وفاتنده عمرو بن عاص حضرتلری ، عمامده ایدی .  
همان اورادن قالقوب بحرینه کلدکده ملک بحرین اولان ( منذر بن ساوی ) یی  
اولوم حالنده بولمش وچوق کچمیوب منذر ، فوت اولمشدر .  
عمرو بن عاص ، بحریندن مدینه یه کلورکن بنی عامر دیارینه اوغراقدده  
بنی عامر شیخک یاننده خلیجه عسکر کورمش وشیخ ، آ کاضیافت واکرام  
ایتدکدن صکره آنکله محرمانه کوریشه رک « ا کر سز عشر وزکات آلمقدن  
واز کچمز ایسه کز عرب سزه اطاعت ایلز » دیمش .  
عمرو حضرتلری ، مدینه یه لدی الورود اصحاب کرام ، آنک باشنه طویلانوب  
عربک احوالی سؤال ایتدکلرند « عمامده واقع ( دبا ) بلده سندن مدینه یه  
قدر هب اردولر قورولمش » دیوجواب ویرمش اولدیفندن اصحاب کزین ،  
دوچار اندیشه اوله رق حلقه حلقه اولوب سویلشمکه باشلامشدر .  
حضرت عمر الفاروق دخی عمرو بن عاص ایله کوروشمک اوزره  
کلورکن بر حلقهک یانسه اوغرامش که حضرت علی و عثمان وطلحه وزیر  
و عبدالرحمن بن عوف و سعد بن ابی وقاص بومسئله دن بحث ایدرلرمش .  
حضرت عمری کوردکلی کبی صوصمشلر و حضرت عمر « نه بخشده  
ایدیکز » دیدکده برشی دیمه مشلر . حضرت عمر « قورقاییکز یا معاشر  
قریش ! والله سز برده لیکه کبرسه کز عرب ، سزک آرقه کزدن کبرر » دیوب  
کچمشدر .



فی الواقع وجوه قریش ، زمان جاهلیتده قبائل عرب سوریلرینک کورسه منلری کیدیلر. آنلر ، نه طرفه کیتسه قبائل عرب دخی او جهته متوجه اولوردی. وقت اسلامده ایسه آنلر ، سائر هدايت ییلدیزلری اولدیلر. هپ قبائل عرب ، آنلره اتباع ایتمک طبیعی ایدی. لکن یولنی بولوبده بونجه قبائل و عشائرک افکار متنافیه سی بر نقطه ده جمع ایده بیلمک ایچون نه قدر عقلی باش و نه قدر متین قلب و نصل غیرت و نه مرتبه فداکارلق لازم ایدوکی تفصیله محتاج دکدر.

ارتداد غائله سی ایسه بردن بره پلشیودی، هر طرفی دهشت بورودی. آفاقی اختلال و عصیان بولوطلری قاپلادی. کرک یمنده ، کرک دیگر محللرده بولنان مأمورین اسلامیه ، عودت ایلمک و قریب و بعید محللردن هپ قاره خبرلرکلمکک باشلادی. اهل اسلام ، قراکلق کیجه ده یاغموره طوتولمش قیون سوریلری کبی حیرت و خشیتده قالدی.

مقدما ( اسود عنسی ) نبوت دعواسنه قیام ایله یمنی اختلاله ویرمش اولدینی حالده آنک قتیلله آسایش هنوز اعاده اولنمش ایکن وفات نبوی خبری اوزرینه بتون یمن و کنده و حضرموت مالکنده اکثری اهالی مرند اوله رق عظیم اختلالر پیدا اولدی.

عمانده دخی ( لقیط بن مالک الازدی ) نامنده برمرند خروج و نبوت دعواسنه قیام ایله ناسی آزدیردی ، حوالی بی اختلاله دوشوردی. عمان ملک لری اولان ( جیفر ) ایله برادری ( عبد ) قاجوب طاغلره التجا و مقام خلافتدن استمداد ایلدیلر.

بحرین حکمداری منذر بن ساوینک وفاقی اوزرینه بحرین اهالیسنک اکثری مرند اولدی. ( عبد القیس ) و ( بکر بن وائل ) قبیله لری بحرینده اجتماع ایله ( بنی لخم ) دن حیره ملوکنک خاتمهی اولان مشهور ( نعمان ) بن منذر ( اوغلی ) ( منذر بن نعمان ) ی ( بحرین ) حکمدارلقنه انتخاب ایتدیلر.

زمان سعادتده حضور نبوی به کلوب اسلام ایله مشرف اولان مشهور

( جارود ) ك نصایحی اوزرینه عبدالقیس قبیله می ، اسلامه رجوع ابتدیه  
بکر بن وائل قبیله می ، ارتداد اوزره قالدی .

او ائنده بنی اسد قبیله می شیخی ( طلیحه ) « بکا دوالنون نامنده بر ملك  
وحی کتیریور ! » دهرک ادعای نبوت ایلوب غطفان و هوارن و طی  
قیبیلری دخی آکا تابع اولمشلر ایدی .

یمامه ده ادعای نبوت ایله ( بنی حنیفه ) بی تسخیر ایدن ( مسیلمه الکذاب )  
ایسه کوندن کونه جمعیتی تزیید ایلکده ایدی .

ینه او ائنده ( بنی تمیم ) قبیله سیندن ( سجاح ) نامنده بر قاری دخی  
نبوت دعواسنه قیام ایله ( بنی تمیم ) و ( بنی تغلب ) قبیله لرینی و دیگر قبائلدن  
بر جوق عربانی اخلاص ایدرک اطرافنی غارتیه باشلامش و حتی یمامه اوزرینه  
حرکت ایلش ایدی .

مسیلمه الکذاب ، آنک حرکتندن اورکوب خدعه و دسیسه یولنه  
سالک اوله رق بالمخبره آنک یاننه واروب کوروشمشلر و میانه لرنده زوجیت  
وقوعه کله رک او یوشوب باریشمشلر . سجاح ، مسیلمه نك نبوتنی تصدیق  
ایدرک برقاج کون آنسکه برلکده یاتوب قالقدقن صکره بنی تغلبک یوردی  
اولان ( الجزیره ) جانبنه عودت ایلشدر .

بو و حمله هر طرفده باش کوسترن دشمنلرک مقدارینه نسبتله اهل اسلام ،  
اقل قلیل ایسه ده خلیفه رسول الله ، بوجه بالا زمان سعادتده کی احوالی اصلا  
تغییر اجمه مک و نیات سنیه نبویه بی تمایله برینه کتورمک عزم و جزمنده  
بولنه رق عموماً مرتدین ایله محاربه بی تصمیم ایتمش ایدی . فقط حضرت  
اسامه نك عودتنه منتظر اوله رق مخبره ایله وقت کچیریوردی .

شوقدرکه مکه مکرمه و طائف امیرلری ، مقام خلافتدن آلاقلری  
امر مو حنجه بمن جهنده تجمع ایدن مرتدلر اوزرینه سوق عسکر ایله  
جمعیتلری طاعتقمده ایدیلر .

مرتدلر ایسه وقت و یرمیوب ( عبس ) و ( ذبیان ) قبیله لری مدینه

منوره جوارنده (آبرق) نام محله انمشلر و طلیحه به تابع اولان عشاردن برکروه دخی کلوب نجد جهته (ذوالقصة) نام موقعه قونمشلر ایدی . مبعوثلری مدینه منوره کلوب زکات و یرمه مک اوزره نماز ایله اکتفا اولماسنی تکلیف ایله کلرنده خلیفه رسول الله ، آنلره رد ایله جواب ویردی و مدینه منوره مک کچید باشلرینی محافظه علی وزیر و طلحه و عبدالله بن مسعود رضی الله عنهم حضراتی کونده ردی . کندوسی اهل مدینه نی مسجد شریفه جمع ایله احتیاط اوزره طوردی .

او مبعوثلر ، قوم وقیله لرینک یانلرینه عودت ایله اهل مدینه مک قلتنی خبر ویرمکله مرتدلر ، کیجه لین یغما کرک یولنده مدینه منوره اوزرینه کلدیله ايسه ده ترصد اوزره بولنان محافظلر طرفلرندن خبر کلدیکی کبی خلیفه حضرتلری ، مسجده مجتمع اولان اهل اسلام ایله چیقوب مرتدلری قاجیردی .

بعده ابرقه اولانلر ، ذوالقصة ده بولنانلر ایله بالخباره مدینه اوزرینه هجومه حاضر لانشلر ایکن خلیفه حضرتلری ، موجود اولان عسکری اوکیجه ترتیب و تعیه ایدرک وقت فجرده آنلرک اوزرینه برشدتلی چیقیش ایتدی و طلوع شمس ایله برابر جمعیتلرینی طاغیتدی .

بوصرده اسامه رضی الله عنه حضرتلری ، مظفرآ و مفتناً عودت ایلدی . خلیفه حضرتلری ، مهاجرین و انصار ایله برابر خارج مدینه به چیقوب آنی قارشیلای .

اسامه مک شام طرفه کونده رلمسی ، مدینه منوره ده عسکرک قلتنه بادی اولمش ايسه ده آنک بوسفری اوجهته مستعد ارتداد اولان قبائلک سکوتی مؤدی اولمشدر .

کرک اسامه ، کرک عسکری یورغون اولدیفندن خلیفه حضرتلری ، آنی مدینه محافظه سنده براغوب کندوسی (آبرق) و (رَبَّه) ده ، (ذبیان) و (بخبکر) قیله لرندن مجتمع اولان مرتدلر اوزرینه کیتدی . جمعیتلرینی طاغیتدی و مدینه به عودت ایتدی .

اسامه نك عسكرى اطرافدن كلوب طوبلانهرق مدينه منوره ده قوه كافيّه حاصل اولدوقده خليفه حضرتلرى ، بالذات ذوالقصره موقعنه عزيمت ايله اوراده كي مرتهدينى قاچيردى و مرتهدين ايله محاربه ايتك اوزره اون بر اميرالچيش نصب و تعيين ايله هر برينه برر سنجاق و تعليمات مخصوصه ويردى و هر برينى برر ستمه اعزام بيوردى . قبائل و عشائره بياننامه لر كوندردى . مذكور اون بر امير بونلردر :

( خالد بن الوليد ) ابتدا طليحه و بعده سالفه الذكر سجّاح نام نيه كاذبيه تابع اولان ( مالك بن نويرة ) اوزرينه حرّكته مأمور اولدى . ( عكرمة بن ابى جهل ) مسيلمه الكذاب اوزرينه مأمور ايديله رك يمامه طرفه كونده ريلدى . آكا التحاق ايتك اوزره آرقه سندن ( شرحبيل بن حسنه ) دخى ارسال بيورولدى .

( خالد بن سعيد ) شام جهته و ( عمرو بن عاص ) قضاعه قيله سندن مرتهد اولانلر اوزرينه و ( مهاجر بن اميه ) يمنى جانيه و ( سويد بن مقرن ) تهامة يمه و ( طريف بن حازم ) بنى سليم ايله هوازدن آنلره تابع اولانلر اوزرينه و ( علا بن الحضرمى ) بحرينه كونده ريلدى .

( حذيفه بن محصن حميرى ) ايله ( عرفجة بن هرّثة الازدى ) دخى عمانه كونده ريلدى و حذيفه ، اهل ( وبار ) اوزرينه و عرفجه ( مهرة ) اوزرينه مأمور اولدى . ايكيى دخى كندو موقعنده آهر مستقل اولوب لدى الاقتضا برلشدكلرنده قنّى موقعده برلشورلر ايسه او موقعك اميرى ، آمر اولوب ديكري آنك معيته بولمق تعليماتلرى اقتضاسندن ايدى .

خليفه حضرتلرى ، ذوالقصره دن عسكرله برابر بالذات محاربه يه عزيمت ايلوب حتى ده وه سنه يئتمشدى . لكن حضرت على كرم الله وجهه ، ده وه نك يولارنى طوتدى . « نره يه يا خليفه رسول الله ؟ سكا رسول اللهك يوم احده سويلديكنى سويلرم كه ( قايجكى قينه صوق . نفسكله بزي آجيقلى ايمه ) ديو بويورمشيدى . والله سكا بر حال اولور ايسه اسلام ، فيما بعد انتظام بولماز » ديدى .

ديگر صحابه كزين دخي آني تصديق ابتداي . آلك اوزريه خليفه  
حضرتلري مدينه منوره يه عودت ايلدي .  
هنوز خلافت منازعه سندن فارغ اولان ذاتلك شو حال وحركتلرينه  
باق . حضرت علي ، كيمسه يه مداهنه ايتمز بر ذات عاليجناب اولوب حتي  
امر مشاوره يولنده جريان ايتمدي ديو حضرت صديقه بيغني تاخير  
ايتمدي . بو دفعه آني جهاده كيتمكدن قطعياً منع ابتداي . اكر كندوسنده  
دزه جه غرض دنيوي اولسه وارسون خليفه كينسونده آكا بر حال  
اولورسه بن ، برينه كچرم ديو تصور ايدرك هيچ اولمازايسه سكوت  
ايلردى .

حضرت صديق كبي دين مبين اوغورنده اصلا جاني اسپر كه مين  
بر ذاتك دخي جهاد كبي بر امر اهمه عزيمت ايلديكي حالده بر كيمسه نك  
خاطري ايجون فسخ عزيمت ايله ميه چكي دركار اولمقله نيتندن دوغمه سي  
مجرد حضرت علي نك راي صوابنه اتباعدن عبارت ايدوكنده اشتباه  
اولونماز وجهه سنك ذكر وفكري ، هب دين اسلامه حسن خدمت ايله مك  
نيت خالصه سنه ميني ايدوكي آكلاشيلور .

اصحاب كزيندن بعضباريني غرض دنيوي ايله انهام ايدن صاييقلر ،  
آنلك بو مثللو احواله دقت ايلسه لر اويله بويوك ذاتلر حقنده مؤظن ايله  
بويوك كناهه كبر منزل ايدى .

### خبر طليحه و سلمى

( خالد بن الوليد ) رضى الله عنه حضرتلري ، اون برنجي سنه هجره  
جمادى الاخره سنده طليحه اوزريه حركت ايلدي .  
فقط خيبر اوزرندن حركت ايله محاربه يه ( طى ) قيله سندن باشلاياجق  
كبي بر حركت كوستردى .

حضرت عدى بن حاتم ، آنكه برابر بولمقله بن ، كيده يمده ( طى )  
قيله سنى سزگله برابر اعدا عليه نه حركت ايلك اوزره جمع ايده يم ، ديدى .



کیدوب (طی) قبیله سنی دائره اسلامه ادخال ایدوب کتوردی و حضرت (خالد) ک معینده بولوندوردی. اوئانده حضرت خالد، (عکاشه بن محسن) و (ثابت ابن اقرم الانصاری) رضی الله عنهما حضرتلری کشف و تجسس احوال ایچون ایلری کونده رمشیدی. طلیحه، آنلره تصادف ایله ایکسینی دخی شهید ایلدی.

عسا کر اسلامیه، ایلری حرکت ایلر کن یول اوزه رنده آنلرک، جنازه لری کورونجه پک زیاده متأثر اولارق اخذ انتقامه حرصلاندیلر.

حضرت خالد، همان عسا کرینی تعیه ایدهرک (عدی بن حاتم) ایله (طی) عسکرینی (بنی اسد) اوزرینه هجوم ایتدیردی و (ثابت بن قیس) ایله انصار کرامی بر قوله تعیین بویوردی. کندوسنی دخی گوکره مش آرسلان کبی اعدانک ایچنه صالدیردی. مرتدلرک کیمی مقتول، کیمی اسیر اولدی. بقیه سی دخی اسلامه کلدی. طلیحه ایسه شام طرفنه فرار ایتدی.

طلیحه نك انحام حاله منتظر اولان (هوازن) و (سَلیم) و (بنی عامر) قبیله لری، آنک بروجه بالا مغلوبیت و منکوبیتی اوزرینه نزد (خالد) ه کلوب تجدد ایمان ایله دیلر.

بعده (غطفان) قبیله سیله (هوازن) و (سَلیم) و (طی) قبیله لری نك برا کنده لری (حوَّاب) نام محله (مالک بن حذیفه) نك قیزی (سَلمی) نامنده کی قارینک باشنه طوبلانوب بر جمعیت شقاوت تشکیل ایلدیلر.

بو، (سَلمی) وقت سعادتده اسیر اولوب ام المؤمنین (عایشه) رضی الله عنها حضرتلری آنی آزاد ایله مشیدی. بر کون بو (سَلمی) ازواج مطهرات ایچنده ایکن رسول الله صلی الله علیه وسلم حضرتلری یانلرینه کیروب: «بیلسم که هانکیگز حوَّاب کوپکتری، اورویه جک و اطر افنده چوق آدم لر اوله جک، دیو بویورسن اولدینی مرویدر. ایشته بو کره حوَّابده (سَلمی) نك باشنه بر گروه اشیا غریلا مشیدی.



حضرت خالد ، بو جمعیتی خبر آلدینی کبی اورایه واردی و آرسلاں کبی اوزرلرینه صالیدردی . ( سلمی ) ده وه سنک اوزرنده طوروب اشقیانک ثباتنه بادی اولمغله عسا کر اسلامیه ، آنک اوزرینه هجوم ایتدی . محفه سنک اطرافنده یوزکیشی قیلیدجن کجدی . نهایت ده وه سنی سیکیرله دیلر ، کندوسنی قتل ایلدیلر . آندن سوکره جمعیت اشقیا تارومار اولدی .

مؤخرآ ، حضرت ( عائشه ) رضی الله عنہا ، دم عثمانی طلب ایتک اوزره ( طلحه ) و ( زبیر ) رضی الله عنہما ایله بصره جانبنه کیدرکن ( حوآب ) صوینه اوغرا یوبده کوپککر اورومکله « نه صویی ؟ » دیو سورددقه « حوآب صویی » دهنیلدیکی کبی او حدیث شریف ، حضرت ( عائشه ) نک خاطرینه کله رک کیرو دونک ایسته مشدر . تفصیل ( وقعه جل ) ده کلور .

طلحه ، بر مدت شام طرفنده سرسری کزدکدن سوکره ( اسد ) و ( غطفان ) قیلهلرینک اسلامه عودت ایلدکالری لدی الاستماع اودخی اسلامه عودت ایلش حتی مکة مکرمه یه کیدوب حج ایتمشدر .

### وقعه مالک

( بطاح ) شیخی ( مالک بن نویره ) سجاجه تبعیت ایلش اولدیفندن ( خالد ) رضی الله عنه حضرتلری ، ( طلحه ) نک کارینی تمام ایتدکدن سوکره آنک اوزره رینه حرکت ایلله جک ایدی . حال بوکه ( سجاج ) الجزیره یه عودت ایلوب ( بنی تمیم ) دخی اسلامه عودت ایتمکله ( مالک بن نویره ) نادم اوله رق بر حال حیرت وترددده قالمشیدی .

لکن حضرت خالدک ، طرف به طرف طاعیتمش اولدینی جته لردن بری ( مالک ) ی و عیالنی و چند نفر آدملرینی طوتوب مهتلر کبی نزد خالده کتوردیلر . برلکده بولغان ( ابوقتاده ) رضی الله عنه حضرتلری ، آنلرک اذان اوقویوب نماز قیلدقلرینه شهادت ایلدی . خلیفه رسول اللهک

تعلیماتنده ایسه ایمانه کلمه یئرلرک قتل و اذان ایشیدیلن یرک خلقنه طوقونولماسی مندرج ایدی .

شوحاله نظرآ ( مالک ) ه ورفاقتنده اولانلره طوقونولماق لازم کلورکن خالد ، آنلری حبس ایتدیردی . حبسلرینه مأمور اولان آدم دخی امری یا کلش آ کلایوب کیجه آنلری اولدوردی . بعض ناسده « خالدک امری اولیه ایدی » دیدیلر . ( مالک ) ک فوق العاده حسن و جماله مالک اولان زوجهنی ( خالد ) تزوج ایتمکله « مالکی مجرد بونک ایچون اعدام ایتدی » دینلرده اولدی .

ابوقتاده ، غضبناک اوله رق مدینه یه عودت و ( خالد ) ک بومعامله سندن شکایت ایلدی . ( مالک ) ک برادری کلوب قان دعواسنه قیام ایتدی ، دعوی بویودی .

حتی متعاقباً خالد ، مدینه یه کلدکده حضرت ( عمر الفاروق ) آنی قصاص ایتدیرمک ایستدی ، خلیفه حضرتلری « خطاء بر ایش اولمش . قصاص لازم کلز » دیدی . حضرت عمر « اولیه ایسه باری عزل اولونسون » دیدی . خلیفه حضرتلری « اللهم شرکلا اوزه رینه صیردینی قلیجی بن ، قینه صوقامام » دیدی .

فقط ( خالد ) ک بومعامله سنی تقییح و حرب اوزه رنده مقتول اولان آدمک زوجهنی آلق ، انظار عربده چیرکین بر ایش اولدیغندن آنی توبیخ ایله اکتفا و مالک ایله دیکر مقتوللرک دیتلرینی بیت المالدن اعطا و ( خالد ) ی سرعسکرلکده ابقا ایدمک بوجه آنی بوسره ده کوریلن لزوم اوزرینه آنی یمامه جانبیه مأمور ایتشدیر .

### وقعه یمامه

( عکرمه بن ابی جهل ) یمامه اوزرینه واروب حال بوکه ( بنی حنیفه ) دن مسیلمه الکذابک یاننده قرق بیک قدر مرتد مجتعم اولدیغنه نظرآ عکرمه ،

کېرودن کلك اوزره اولان شرچيلي بکله مک لازم کلورايکن عجله ايدە رک محاربه يه طوتوشمش و بوزولمش ايدى .

آنک منهنزما کبرويه رجعتى ايسه سائر عسا کر اسلاميه يه خوف و دهشت کنوره حکندن خليفه حضرت تلى ، آنى عمان جهته مأمور اولان ( حذيفه ) و ( عرفجه ) ايله برلشمک اوزره اوطرفه اعزام ايدرک خالد بن الوليدى يمامه اوزرينه مأمور ايتمش و شرچيله دخى آنک معيته و ارماسى ايچون اشعار ايتمش در .

حضرت خالد ، اشبو اون برنجى سنه هجرية شوالنده عسکرى جمع ايدرک مدينه منوره دن چيقدى . فقط اطراف دن تجمع ايدە جک عسکرک ورودينه انتظار ايله بطاحده بر آرتوقف ايتدى .

بو ائزاده شرچيل ، عجله ايدرک مسيلمه ايله جنکه طونوشوب عکرمه کي او دخى بوزولمش و برطرفه چکيلمش ايدى . خليفه رسول الله ، حضرت خالدک خط رجعتى محافظه ولدى الحاحه آکا اعانه ضمتده بر مقدار عسکر سوق ايتمکه او حواليدە تجمع ايدن سجاج دوکونتولى ، طاغلمش اونديغدن خالد ، خط رجعتدن امين اولدينى حالده ايلرو حرکت ايله شرچيلي مقدمه الجبشه مأمور ايدرک يمامه اوزرينه يوريدى . مسيلمه دخى عسکرى جمع و ترتيب ايدرک جنکه حاضر لاندی و طرفين يکديکرمه ملاقى اوله رق بک شدتلى محاربه يه باشلاندى . ابتدا عسا کر اسلاميه بوزولدى . حتى بن حنيفه ، حضرت خالدک چادرلرينه کيروب يغمايه قويولدى .

بعد ، عسا کر اسلاميه ، دونوب شدتلى هجوم و اقتحام ايتمکه بنى حنيفه ، بک فتنا حالده بوزولدى و جوق عسکرلرى تلف اولدى .

بو صهرده سيدالشهدا ( حمزه ) رضى الله عنه حضرت تلى نى قاتلى اولان معهود ( وحنى ) حضرت حمزه نى شهيد ايلديکي حربه ايله مسيلمه الکذابى قتل ايتدى . غوغا و غائله دخى ييتدى .

بومظفريت عظيمه نك هر طرفجه تاثيرات حسنه سى کورولدى . مسيلمه ، اتباعى انقراض بولدى . سجاجک دخى آدى اوبوتولدى و کندوسى خيلي

مدت الجزیره ده بنی تغلب قبیله سی ایچنده قالدی ودها صکره نبوت دعواسندن  
واز کچهرک اسلام ایله مشرف اولدی .

اشبویماهه وقعه سننده بنی حنیفه نك تلفاتی یکر می بیکی واهل اسلامک  
شهداسی ایکی بیکی تجاوز ایتمشدر .

شهدانک اوچ یوز آلتش بو قدری مهاجریندن وبر او قدری انصاردن  
و باقیسی تابعیندن ایدی . حضرت عمرک بیوک برادری اولوب بو محاربه ده  
علمدار بولنان ( زید بن الخطاب ) و حضرت زبیرک برادری ( سائب بن  
العوام ) و خطیب نبوی ( ثابت بن قیس الانصاری ) و مشهور ( ابودجانه  
الانصاری ) و ( ابو حذیفه بن عتبه ) ابو حذیفه نك معتی اولوب عقل  
ودرایت ایله معروف اولان ( سالم ) کی کبار صحابه و یتمشدن زیاده قبرا  
هپ شهدا زمره سنه ملحق ایدیلر . صاغ قالانلرک اکثری دخی مجروح ایدی .  
رضی الله عنهم اجمعین .

## جمع القرآن

اصحاب کرامدن حافظ القرآن اولانلره ( قرآ ) دینلوردی . بعضیلری دخی  
سور و آیات شریفه یی متفرق اوله رق ده ریلر و تحتلر اوزرینه یازمشلر  
ایدی .

بروجه بالا یمامه وقعه سننده پک جوق قرآ ، شهید اولوب حفاظ قرآن  
آزالدی و آرتق قرآن کریمک جمعنه لزوم کوردولدی .

بناء علیه حضرت عمرک اخطاری اوزرینه خلیفه رسول اللهک امریله  
وخی کاتبلردن و فقهای صحابه دن ( زید بن ثابت الانصاری ) رضی الله عنه  
الباری حضرتلری ، هجرتک اون ایکنجی سنه سی خلاننده بذل مجهود ایده رک  
قرآن کریمی محیفه صحیفه جمع ایدوب مجموعنه ( مصحف ) دینلادی و خلیفه  
رسول الله یاننده حفظ ایدیلدی . آندن صکره حضرت عمرک یاننده و آنک  
دخی وفاتندن صکره ام المؤمنین حفصه رضی الله عنها حضرتلرینک خانه سننده  
محفوظ قالمشدر .

## وقایع بحرین

بحرین جہتی سرعسکری اولان علا بن الحضرمی رضی اللہ عنہ حضرت تلی، او طرفہ کیدر کن یمامہ حذا سنہ وارد قدہ بنی خیفہ دن و ملوک یمامہ دن ( ثمامہ بن اثال ) دیگر بعض مشایخ ابلہ برابر آکا تابع اولش و بنی تمیدن یانہ کندی عسکرینک بر مثلی قاتیلش و بو جہتلہ اردوسی خلیجہ قوت بولش ایدی . بکر بن وائل قبیلہ سی ایچندہ ظهور و خروج ایدن ( حطم ) نام شیخ المشایخ ایسہ مرتدلردن باشنہ کلّیتلو اشقیاء جمع ایتدکدن بشقہ فی الاصل ایمانہ کلین مشرک لر دخی آنک باشنہ طویلانمغلہ بر بویوک جمعیت تشکیل ایدرک ( ہجر ) و ( قطیف ) آره سندنہ بر جسم اردو قورمش ایدی . بحرین حکمدار لغنہ انتخاب اولتان ( منذر بن نعمان ) دخی آنک یانندہ ایدی . خطم، طرف طرف مأمور لر کوندردہ رک مواقع لازمہ یہ تقویت و برمش و ( جوانا ) دہ اہل اسلامی محاصرہ ایتدیرمش ایدی .

علا حضرت تلی ، طوغری آنک اوزرینہ واروب آکا قارشو اردو قوردی و اولجہ ( جارود ) ی دعوت ایلش اولدیغندن اودخی عبدالقیس قبیلہ سی آلوب اورایہ کتوردی .

آندن باشقہ اوحوالیدہ اسلام اوزرہ ثابت قالانلر، ہپ علا حضرت تلرینک یانہ طویلاندی . دارین اہالیسندن باشقہ بلاد بحریندہ نہ قدر مرتد و مشرک وار ایسہ آنلر دخی ( حطم ) ک یانہ طویلاندی و ایکی طرف دخی اردولرینک اطرافنہ خندق چوپروب شدید و مدید بر محاربہ یہ باشلاندی . ہر کون ، طرفین میدانہ چیقوب مقاتلہ ایدر و یورولدو قلرندہ اردو . کاہلرینہ کیدر ایدی . نیچہ کونلر محاربہ ، بووجہلہ تمتد اولدی . نہایت بر کیجہ مشرک و مرتدلرک سرخوش اولدقلری تحقیق اولنہ رق عسا کراسلامیہ ، شبخون ایدوب خندقدن ایجری کیردیلر و آنلرہ ایجہ بر قلیج اوشوردیلر . نہ خطم قالدی ، نہ منذر قورتولدی . جمعیتلری طاغیلدی ، کیمی مقتول



کیمی اسیر اولدی . بقیه سی تارمار اوله رق بر طرفه فرار ایتدی . فقط قسمی قایقلره را کبّا ( دارین ) ه کیتدی .

بونک اوزرینه علا حضر تلری ، هر طرفدن منهزمینک یوللرینی طوتمق وزره بکر بن وائل قبیله سندن اسلام اوزره ثابت قالانلره و( حصه ٔ تیمی ) به بنی شیبان قبیله سی مشایخندن مشهور ( مثنی بن حارثه ) به یازدی و اموال نامی غزاته تقسیم ایتد کدن صکره دارینه عزیمت ایلدی .

لکن آراده پک واسع بر خلیج وار ایدی . حال بوکه الده قایق یوق بدی . همان عسکره خطاباً « غازیلر ! الله تعالی حضر تلری ، سزه قره ده یاتی کوستردی تا که بحرده دخی آندن عبرت آله سکز . هایدی دشمن وزرینه یورو بکز و دریاه کیری کز » دیو بیوردی و آتئی صویه اوردی . سکره دخی کیمی آت ، کیمی ده وه صیرتنده اولدقلری حالدده صویه وردیلر وهپ بر آغزدن ( یا ارحم الراحمین یا کریم یا حلیم یا احد یا صمد حی یا محیی الموتی یا قیوم لا اله الا انت یا ربنا ) دیو دعا ایدرک او بیوک خلیجی قوم اوزرنده یورور کبی کچدیلر و دشمنه چاتوب درجنک اول غالب کلرک دارین اهالیسنی قتل عام و عیال و اولاد و ماللرینی اغتنام ایتدیلر .

اموال غنائمک خمسی بعد الاخراج باقیسی بین الغزات تقسیم اولندقدده سواریلرک حصه لری آلتیشربیک و پیاده لرک حصه لری ایکیشربیک درهمه بالغ اولمشدر .

بکر بن وائلک مسلمینی و حصه ٔ تیمی و مثنای شیبانی دخی اورایه کلش ولدقلرندن برلکده بحرینه عودت ایلدیلر .

بوفتوحات عظیمه ، هپ خلیفه رسول اللهک تداییر صائبه سی آئارندندر . مکن خالد و علا کبی کوزل و سائط اجرا ئیه سی دخی وار ایدی .

جناب حق ، حبیب ا کرمی حرمتنه او عصرده بویله فوق العاده ذاتلر راتمش و آنلرک وساطتیه شریعت محمدیه بی اعلا ایتمشدر .



## احوال عُمان و مهره و يمن

یوقاروده بیان اولوندینی اوزره ( عکرمه بن ابی جهل ) یمامه سفر  
منهزم اولدوقده خلیفه رسول الله ، آنی عمان طرفه کیدوبده ( حذیفه  
و ( عرفجه ) ایله بولوشمق و عمان ایشلرینی بیتیردکن صوکره یمنه وار  
اوزره مأمور بوپورمشیدی .

حذیفه و عرفجه ، هنوز عمانه وارمادن عکرمه ، اثنای راهده آن  
یتیشدی و برلکده عمانه قریب اولان ( رجاء ) نام محله واردقلرنده ( جیفه  
و ( عبد ) ایله مکاتبه ایتدیلر .

رئیس مرتدین اولان ( لقیط ) کندی اوزرینه عسکر کلدیک  
لدی الاستماع عسکرینی ( دبا ) قصبه سنه طوپلایوب اردو قورمشیدی .

( جیفر ) ایله ( عبد ) دخی ( صُحَّار ) ده اردو قوردیلر و ( عکرمه  
و ( حذیفه ) و ( عرفجه ) بی ایلری سوق ایتدیلر . ( دبا ) اوزرینه  
کیتدیلر .

دباده ، لدی الملاقات غایت شدتلی بر محاربه وقوع بولدی . عسا  
اسلامیه ، هان رجعت ایلک اوزره ایکن ( بنی ناجیه ) و ( عبدالقیسر  
قیبله لرندن امداد کلدی . دشمن بوزولدی . مرتدلرک اون بیک مقدار  
قیریلدی .

عسا کر اسلامیه پک چوق غنائم آلدی . خمسی ( عرفجه ) ایله مدیه  
منوره یه کونده ریلدی و ( حذیفه ) عمانده قالدی .


اما ( عکرمه ) عمان اهاالیسندن و دیگر قبائل و عشایردن خیلی عسکه  
جمع ایدرک ( مهره ) یه عازم اولدی .

اوانئاده ( مهره ) اهاالیسی ، ایکی فرقه اولوب یکدیگریله منازعه ایتمک  
ایدیلر . برفرقه سی ( عکرمه ) یه تابع و اسلام ایله مشرف اولغله هان فر  
اخری اوزرینه هجوم و غلبه اولوندی ، پک چوق اموال غنائم آلندی .

بومظفریت اوزرینه جوارده کی نواحی اهالیسی هپ اسلامه کلدی ، احوالی دخی مرتدلردن تخلیه و تطهیر قیلندی .

بعده عکرمه ، ( مهره ) دن دخی خیلی عسکر جمع ایدهدک بر جسم فرقه ایله یمنه واردی . ( مهاجرین امیه ) دخی مکّه و طائفدن عساکر کثیره ایله یمنه کیتمش اولدیغندن آ ز وقت ظرفنده یمن مرتدلری دخی قهر و تدمیر ایدیلشدر .

بوصورتله ، هر طرفده ارتداد غائله سی بر طرف اوله رق بیت الماله عاند اولان واردات ، بیدرپی مدینه منوره یه کلور اولدی و امارت اسلامییه قوت بولدی . ایرانه تابع اولان ( حیره ) حکومتی ایله قیصره تابع اولان حکومت ( غسانییه ) دن باشقه هپ عربلر دائره اسلامه داخل اولدی .



### غزوات عراق

بروجه بالا ، ارتداد غائله سی بر طرف اولغله ایرانه تابع اولان بلاد عربک فتحی زمانی کلشیدی .

حال بوکه ، بحرین سفرنده ( علا بن الحضرمی ) معیتنده بولسان ( مثنی بن حارثه الشیبانی ) خلیفه رسول اللهدن رخصت آلاق عراق عرب الکاسنده غزا ایله مشغول ایدی .

اشبو اون ایکی سنه هجریه سی محرمنده خلیفه حضرتلری ( سیف الله ) یعنی ( خالد بن الولید ) رضی الله عنه حضرتلرینی عراق عربک فتحنه مأمور بویوردی . ( مثنی بن حارثه ) ایله دیکر بعض مشایخه دخی ( خالد بن الولید ) معیتنه وارمالری ایچون تحریرات کونده ردی .

حضرت خالد ، اون بیک سواری ایله کیتدی . ( مثنی ) ایله رفیقلری اولان شیخلردخی سکز بیک سواریله کلوب آکا التحاق ایتدی . عساکر اسلامیه نک مقداری اون سکز بیکه واردی .

خالد حضرتلری ، سواد عراقدن ( باقیا ) و ( برسوما ) نام ایکی قریه یه وارد قدده اهلایلری ، اون بیک آلتون جزیه ویرمک اوزره امان دیله دیلر . او دخی موافقت ایده رک آلتونلری آلوب مرکز ایالت اولان ( حیره ) یه کتندی . حیره والیسی ( اَیَّاسُ بْنُ قُیَّصَةَ الطَّائِي ) دخی اشراف بلده ایله چیقوب طقسان بیک آلتون جزیه ویرمک اوزره عقد مصالحه ایلدی .

ایاسک بو وجهله مصالحه سی ، دولت ایرانیه نزدنده تقییح اولونارق عزل ایله یرینه امرای ایرانیه دن ( زَاوَوَیَّة ) نام مرزبان ( حیره ) والیسی نصب اولمشدر .

حضرت ( خالد ) ایسه ( حیره ) دن حرکتنده ( مثنی ) یی مقدمه الجیشه مأمور ایتدی و دیگر بر قولدن ( عدیّ بن حاتم ) ی یوروتدی . کندوسی دخی آنلرک آرقالرندن یورودی و ( حَفِیر ) ده طویلانمق اوزره آنلره تعلیمات ویردی .

او جهتک ، مرزبانی اولان ( هَرْمَز ) که دولت ایرانیه نک اک بویوک رتبه سی حائز ایدی و برآ عربلرله محاربه و بحرآ هندستانه سفر ایدردی . حضرت ( خالد ) ک حرکتی لدی الاستماع کیفیتی دولتنه عرض وانها ایله برابر عسکرینی جمع ایدوب ایران شهزاده لرندن و مشهور قهرمانلرندن ( قُبَاد ) ایله ( اَنُوشْجَان ) ی برر جناحه مأمور ایده رک مقابله یه شتاب ایله عسا کر اسلامیه دن اوّل واروب ( حَفِیر ) موقعی طوتدی .

حضرت خالد ، آنی کوروب ( کاظمه ) طرفه میل ایتدیه ده هَرْمَز ، هم بهادر و هم فن حربده ماهر بر سردار اولوب ده اوّل کاظمه یه ورود ایله صو محانی ضبط ایتدی .

سیف الله دخی واروب آکا قارشو اردوسنی قوردی و ایلرویه آت سوردی ، هر مزه میدان او قودی . هر مز دخی آکا قارشو بالذات میدان مبارزه یه چیقدی .

ایکی سر عسکر ، آتلرندن اینوب یایا اوله رق یکدیگره حمله ایتدیلر . ایکینسک حمله سی دخی بوشه کیتدی . سیف الله ، همان هر مزی قوجا قلا یوب آلت ایتدی و کارخی تمام ایتک اوزره ایکن هر مزک آدملی حضرت خالده غدر ایتک اوزره سکیرتدیلر ایسه ده ( قعقاع بن عمرو التیمی ) هجوم ایدرک آنلری قتل ایتدی . سیف الله ایسه هیچ تلاش ایتیه رک هر مزی اعدام ایله البسه سی آلدی . یالکز تاجی یوز بیکک ایدی . چونکه ایرانده یویله مراتب بشریه نک منتهاسی اولان رتبه یه چیقانلرک یوز بیکک تاج کیمه لری ، دولت ایرانیه نک تشریفاتی اقتضاسندن ایدی .

بو دهشتلی واقعه اوزرینه ایران اردوسی بوزولدی وعسا کراسلامیه ، آرقه لرینه دوشمکله آنجق آتی یوروک اولانلر قورتولدی . سیف الله ، مژده مظفریت ایله برابر اموال غنائمک خمسینی خلیفه رسول الله ارسال ایتدکن صکره ایلرو حرکت ایله مؤخرأ بصره شهرینک بنا اولندی محله قوندی .

منشایی تعقیب اعدا ایچون ایلرویه و ( مَعْلَ بن مِقْرَن ) ی ( اَبَلَه ) جانبنه کونده ردی .

بو طرفده کی ( ابله ) بحر فارسک شمالاً منتهاسنده و بصره موقعی جهتنده بر بلده ایدی .

اقدبجه هر مزه امداد ایچون ایرانک ینه یوز بیکک تاج کین سردارلرندن ( قارن ) نام سردار ، بر اردو ایله کسری طرفندن اعزام قلمشیدی . قارن ، عسکر یله کلورکن انای راهده بوزغون عسکرله قباد وانوشجانہ تضادف ایتدی . آنلری ده کندی عسکرینه قاتدی و ایلرو حرکت ایتدی . یکیدن محاربه یه کیریشیلدی . بوکره قارن ایله برابر قباد وانوشجان دخی میدان مبارزده مقتول اولدی .

ایران اردوسی ده فنا صورتله بوزولدی . اوتوز بیک قدر عسکرلری قیریلدی . آندن باشقه برچونگی دخی قاچار ایکن صولرده بوغولدی . عسا کراسلامیه ، بک چوق اموال غنائم آلدی . خلیفه رسول اللهک امر و تعلیماتی

اقتضاسندن اولديني اوزره بو محاربه لرده محارب لردن اله چكتر ، اموال و عيال لري ايله برابر اسير ايديلدی . اما ارباب فلاحه ، جزيه كذار قلنوب آنلر ، هر درلو تعرضدن محفوظ قالدی .

## ( وَجْهَ ) و ( لیس ) [ \* ] محاربه لری

بروجه بالا ايكي بويوك مرزبان و شهزاده لردن ايكي مشهور قهرمان ايله برابر بونجه عساكر ايرانك تلف اولماسی ايراني لری تلاشه دوشوردی . دولت ايرانيه همان ( اَنْدَرَزْغَر ) نام قهرمانی كونده ردى و آرقه سندن ( بَهْمَنْ ) نام سردار ايله برده مكمل اردو چيقاردی . اندرزغر ، ( حيره ) ايله ( كَسَكَر ) آره سنده کی عرب لردن و سائر طرف لردن كلتي عساكر طوپلایوب ( وجه ) نام موقعه بر بويوك اردو قوردی .

سيف الله ايسه خلال صفرا الحيره ييلديریم کبی ايريشوب آنلری اوردی ، قليجدن کچيردی .

اندرزغر ، بقيه السیوف ايله برابر قاچار ايکن صوسزلقدن تلف اولدی . ارباب فلاحه ، ينه جزيه كذار اوله ق تعرضدن مصون قالدی . اما محارب ل اسير ايديلدی کی صرمده بی وائل نصاراسندن ( بُجَيْر ) ايله ( اسود عجلي ) نك اوغول لری دنخی اسير اولدی .

بی وائل نصاراسی ، بوندن طولايي حد تلنديلر و ( اسود عجلي ) یی کندولرينه قوماندان نصب ايدرك انبار قريه لرنده نهر فرات اوزرنده واقع ( لیس ) نام قريه ده طوپلانديلر .

اواننده سالف الذکر ( بَهْمَنْ ) قيشنانا نام محله بولمغله همان ( لیس ) ده کی نصارا عرب اردوسنه وارماسی و او طرفه کيتمك اوزره بولنان ( جابان ) نام سردارک وصولنه قدر توقف ايله محاربه يه کيريشيلمه سی ايچون کندوسنه کسری طرفدن امرنامه كونده ريلشیدی .

[ \* ] ( معجم البلدان ) ده ( اَلْيَس ) و ( اَلْيَس ) شکلنده محرر در .



بهمن، حال حاضرک خطرناک اولدیغنی آکلایوب نه پایاجغنی شاشیرمقله  
لمشاوره تعلیمات موضحه آلمق اوزره پای تخت ایران اولان مداینه کیتدی  
یکندوسنک عودتنه قدر حربه کیریشلمه مسنی (جaban) ه توصیه ایتدی .

جaban ، عسکری استصحاب ایله خلال سفرده ( لیس ) موقعنه واردی  
یاوراده مجتمع اولان نصاری عرب یاننده اوردوسنی قوردی .

ایرانیلر ، هنوز طعام ایچون سباطلرینی سرمشکر ایکن عساکر اسلام  
ایله ( سیف الله ) کوروندی . رؤسای ایران « عجاها هان جنکه کیریشه لم می ،  
بوقسه عسکری طویوروبده صکره می جنک ایدلم ؟ » دیدکلرنده جaban  
« اکر سزه میدان ویریرلر ایسه یمک ییه بیلورسکزر » دیر ایکن حضرت  
( خالد ) ایریشوب اردوسنی قوردی وهان میدان مبارزه کیردی .

رؤسای عربدن ( مالک بن قیس ) آکا قارشو چیقدی . سیف الله ،  
درحال آنی اولدوردی .

بونک اوزرینه عربلر بینهده محاربه قیزشدی . ایرانیلر دخی براوغوردن  
حربه کیرشدی . هان بهمین کلوب ایریشور امیدیه چوق ثبات وشدتلی  
مقاومت ایلدیلر . لکن نهایت بوزولدیلر وپک چوق قیریلدیلر . قان ، سیل  
کبی روان اولدی . مشرکین ایران ایله نصاری عربک مقتوللری یتمش بیکه  
واردی .

اوکون میدان محاربه سراپا آل قانه بویاندی ، غایت واسع بر لاله زاره  
دوندی . اولاله زارک بر اوچنده ایرانیلرک بیاض یوققه لر ایله طونادلمش  
سباطلری دخی یر یر بیاض چیچکلر ایله طونادلمش طرحلره بکزرردی .  
حضرت خالد ، آنلر ایله عسکرینه بر مکمل ضیافت ویردی .

عربلر ، الک استعمال ایتمدکلرندن اونی کپکندن آیرمقسزین پیشیریر-  
لردی واکثریایدکلری آرپه اکمکی ایدی . خالص بغدای اونندن یاپلمش  
بیاض اکمک ویوققه بیلمزلردی . بویباض یوققه لری کورونجه جیلان  
ده ریسندن یاپیلمش یازی کاغدی صاندیلر « بویباض ده ریلر نه در؟ » دیدیلر .  
لکن طاندیلر ، حظ ایتدیلر وآندن صکره بیاض یوققه ده داداندیلر .



حضرت خالد « عسکری طویوردقن صکره طورمیوب ( امغیشیا )  
بلده سنه کیتدی . اهالیسی ، بر شی آلمغه وقت بولامیوب قاجدیله . بالجه  
تجملات و سائر اموال و اشیا لری میدانده قالدی . عسا کر اسلامیه ، سائر  
یرلردن زیاده اموال و غنائم آلدی .

بعده حضرت خالد ، امغیشیا بلده سنی خراب ایتدی و مژده مظفریت  
ایله اسرآنک و اموال غنائمک مقدارینی درگاه خلافته بیلدی .  
ایشته اوزمان ابوبکر صدیق رضی الله عنه حضرتلری ، « قادینلر ، خالد  
کبی برار طوغورمقدن عاجزدر » دیو بیوردی .

### فتح حیره

بروجه بالا ( خالد بن الولید ) رضی الله عنه حضرتلری ، امغیشیا بلده سنی  
تخریب ایتدکن صکره خلال ربیع الاولده ( حیره ) نی فتح ایلشدر .  
شویله که : امغیشیادان احوال و ائقالنی سفینه لره تحمیل ایله ( حیره ) یه عزیمتمده  
( حیره ) والیسی اولان ( زازویه ) حیره خارچنده اردوسنی قوروب مقابله یه  
حاضر اولمش و اوغلی واروب ( فرات ) ک صوینی کسمکله سفینه لره قروده قالمش  
ایدی . لکن سیف الله ، همان سواری ایله سگیرتدی و والینک اوغلنی فرات  
( بادقلی ) ی اوزرنده بولدی . آنی و آدم لرینی قتل ایتدی .

زازویه ، اوصرده اوغلنک قتل اولندیغنی ایشیتمکله برابر ایرانده یه  
اختلال وقوع بولدیغنی خبر آلمغله همان حیره نی ترک ایتدی و ایرانه کیتدی .  
حضرت خالد دخی واروب اونک اردوگاهنه قوندی . حیره والیسی ، دخی  
قلعه کبی مستحکم اولان قصرلرینه و دیرو کلیسالره قپاندی .

حضرت خالد ، آنلری حصر و تضییق ایدوب عسا کر اسلامیه دخی  
طرف طرف هجوم ایدرک قبولری قیرمغه باشلا دقلرندن ناچار قالب جزیه  
و یرمک اوزره امان دیله دیله . سیف الله دخی امان و یردی .

او ائناده ایاس طائی ، قصرلرک برنده ایمش . چیقوب اشراف بلده ایله  
برابر حضور خالده کلدیله . مشهور ( عبدالمسیح ) دخی آنلرله برابر ایدی

وسوز سويلهين او، ايدى. عبدالمسيح ، چوق زمان معمر اولوب حتى جزء اولده بيان اولديني اوزره ( نوشروان ) طرفندن تعبير رؤيا ايجون (سطيح)ه كونده ريلشدر .

حضرت خالد ، آكا « قاج سنه ياشادك ؟ » ديو صوردى « براقچ يوز سنه ! » ديو جواب ويردى وكوردىكي عجايبدن سؤال ايتدكده « آنى كوردم كه حيره ايله دمشق آره سنده كويلر ديزيلشدى . بر قادين ، ياننه يالكز برچورهك آلوب (حيره) دن (دمشق)ه قدر كيدردي « ديدى .

بعده جزيه نك تعيين مقدارى بختنه كيريشيلدكده حيره لولر، يوز طقسان بيك آلتون ويرمه راضى اولديلر . فقط آندن باشقه حضرت خالد ، عبدالمسيحك قيزى ( كرامه ) نك ( شريك ) نام ذاته تسليمى دخى شرط قيلدى . بو ايسه آنلره بك آغير كلدى .

سبى بو ايمش كه : شريك ، مقدا ( كرامه ) يي كنچ ايكن كوروب آكا ميل ايمش ايمش . فخر عالم صلى الله عليه وسلم حضرتلرى ، امتنك ( فارس ) ي و ( حيره ) يي فتح ايده جكنى اصحاب كرامنه تبشير بو يوردينى زمان ( شريك ) دخى حضور سعادته بولمغله ( كرامه ) نك كندوسنه ويرلمسنى نياز ايدوب طرف نبويدن دخى وعد بو يورولمش .

بو كره ( حيره ) فتح اولوندقده شريك ، حضور خالده ، اووعدى شهود ايله اثبات ايلش اولديغندن حضرت خالد ، بو وعد نبوى يي انفاذه مجبور اولدى وحيره لولر ، بوندن امتناع ايتدكده « ايشى تصعيب ايمه يكز . قيزى بكاكتور يكز . بر بدله ربط ايله تخلص اولونور » ديدى . آنلر دخى ( كرامه ) يي كتورديلر وخالد ، آنى ( شريك )ه تسليم ايله وعد نبوى يي يرينه كتوردى . بر مناسب بدله ربطى ( شريك )ه تكليف اولوندقده بيك درهم ايستدى . درحال ووروب ( كرامه ) يي كرو آلديلر . ( عبدالمسيح ) كى مشهور برذاتك قيزينه بيك درهم بدل آز اولديغندن بعده ( شريك )ه لوم ايتدكلرندن « بيكدن زياده صاي اولديغنى بيلمزدم » ديه اعتذار ايلشدر .

## حیره نك فتحندن صكره ظهوره كلن وقوعات

حیره نك، فتحی اوزه رینه اطرافنده کی شیخلر و مختارلر، همان (حیره) یه کلوب عرض اتقیاد ایله ویرکولرینك مقدارینی تعیین ایتدکلرندن طرف به طرف کونده ریلن مأمور واسطه سیله واردات مذکوره اللی کون ظرفنده تحصیل و بیت الماله ارسال اولمشدر .

( ضرار بن الازور ) و ( ضرار بن الخطاب ) و ( ( قعقاع ) و ( مثنی ) برر فرقه ایله ( دجله ) سواحلنه قدر ایلغار ایله بلاد ایرانیه بی غارت ایلدکلری صروده حضرت ( خالد ) دخی مکتوبلر تحریر و ارسال ایله ایرانیلری دین اسلامه دعوت ایلکنده بولمشیدی .

### فتح انبار

خندق ایله محاط و مستحکم اولان ( انبار ) بلده سی که ایرانیلرک ذخاری اوراده در انبار اولونور و دائماً اوراده کلیتلو ذخیره و سائره بولونور ایدی . امرای ایرانیه دن ( شیرزاد ) اوراده محافظ ایدی .

سیف الله حضرتلری ، حیره ایشلرینه نظام ویردکدن صكره اردوسیله واروب انباری محاصره ایتدی و اوقجیلری جمع ایله محصورینك کوزلرینی نشان آلمق اوزره تنیه ایلدی .

اوقجیلر ، هپ بردن اوقلرینی آتدیلر و آرقاسنی کسمیوب متوالیاً بلده بی اوقه طوتدیلر . بیك قدر محصورینك کوزلرینی کور ایتدیلر . شیرزاد ، ( ویره ) ایله ( انبار ) ی تسلیمه راضی اولدیسده در میان ایتدیکی شرطلره ( سیف الله ) راضی اولمادی وضعیف ده وه لری کس دیروب آنلر ایله خندق طولدورتدی . اوزرلرندن عسکر یوروتدی . محصورین دخی خندقده عساكر اسلامیه قارشو کلدی ایسه ده شیرزاد ، باشه چیقاما یه جغنی جزم ایله یالکز حیاتی تأمین اولنمق و کندوسی ، یانه اموال

واشیادن بر نسنه آلماتق شرطیله بلده نك تسلیمنه راضی اولدی . بو شرط ایله بلده ( انبار ) ی جمیع اموال و اشیاسی ایله ( سیف الله ) تسلیم ایتدی . « قوشجه جانم آزاد ! » مثلنجه قورتولوب ( بهمن ) ك یاننه کیتدی .

### فتح عین التمر

سیف الله حضرتلری ( زبرقان بن بدر ) نام شیخی ( انبار ) محافظه سنده یراقوب کندوسی ( عین التمر ) قلعه سی اوزه دینه کیتدی .

اوراده ( بهرام چوین ) ك اوغلی ( مهران ) کلیتلو ایران عسکریله محافظه ایدی . ( عقه ) نام شیخ المشایخ دخی ( بنی نمر ) و ( بنی تغلب ) و ( ایاد ) و سائر قبیله لردن کلّی عرب عسکریله برابر آنك معیتنده ایدی . عقه ، ( مهران ) خطاباً : « عرب ، عربك حالتی ده ااعلا بیلور . سن خالدی بزه براق ، دیمکله اودخی مع الممنونیه قلعه ده قالوب ( عقه ) عسا کر عرب ایله حضرت خالده قارشو کلدی .

عقه ، میدان حربه کلوب صفلرینی دوزه لدر ایکن حضرت خالد ، سگیرتدی و آنی قوجا قلا یوب اسیر ایتدی . عرب عسکرینك هنوز صفلری دوزه لمه دن بوزولدی و چوغنی اسیر اولدی .

مهران ، بونی خبر آلدینی کبی قلعه دن چیقوب ایران عسکریله برابر فرار ایتدی . بوزغون عرب عسکری قلعه یه کیردیلر . لکن محافظه ایده مدکلری جهتله خالد کیردی ، جمله سنی قلیجدن کچیردی ، ( عقه ) یی دخی اولدوردی . بو محاربه ده قدمای مهاجریندن ( عمرو بن رئاب سهمی ) و انصار کرامدن ( بشر بن سعد ) رضی الله عنهما شهید اولمشلردر .

### وقعة دومة الجندل

بروجه بالا ، ( عین التمر ) قلعه سنك فتحی عقبنده شام طرفنده کی نصارای عربك نقض عهد ایلدکلرینه دائر ( دومة الجندل ) موقعنده امیر

عسکر اسلام اولان (عیاض بن غنم) طرفدن مکتوب کلمکه سیفالله ،  
او طرفه توجه ایتدی .

دومة الجندل ، ناحیه سی ( اُکیدرن عبدالمک ) و ( جودی بن ربیعہ )

نام ایکی رئیسک حکمنه تابع ایدی . یانلرینه ( کلب ) و ( غسان ) و ( تنوخ )  
قبیله لرندن وسائر قبائل عربدن عساکر کلیه تجمع ایتشدی .

اکیدر ، سیفالله ک حرکتی ایشیتدکده مصالحه ایتک ایسته مش  
ایسه ده دیکرلری آکا موافقت ایلدیکندن او دخی ( دومة الجندل ) دن  
جیقوب کیدرکن ( سیفالله ) طرفدن کونده ریلش اولان بر چته ، آنی  
و آدم لرینی قتل ایله اموالی اغتنام ایتشدر . سیفالله ( دومة الجندل )  
کلوب بر طرفه قوندی . ( عیاض ) دخی دیکر طرفنده ایدی . ( جودی )  
عیاض اوزرینه بر فرقه سوق ایدوب کندوسی ( سیفالله ) قارشو کلدی .  
لکن ( سیفالله ) ک هجومه مقاومت ایده میوب عسکری بوزولدی  
و کندوسی اسیر اولدی . دیکر فرقه دخی بوزولدی . منہزم عسکر ، قلعه یه  
التجا ایلدیلر . لکن قلعه او قدر غلبه لکی آلمایوب چونغی طیشاروده قالدی .  
کیمی مقتول و کیمی اسیر اولدی . ( خالد ) بو اسیرلرک اکثرینی و حتی  
( جودی ) یی قتل ایتدی و اولاد و عیال لرینی اسیر ایلدی .

( جودی ) نک حسن و جمال ایله موصوف اولان قیزی صاتون آلدی  
و بر مدت ( دومة الجندل ) ده قالدی .

### بقیه وقایع عراق

خالد بن الولید رضی الله عنه حضرتلری ، دومة الجندل ده بولوندیغی زمان  
ایرانلر ( حیره ) نک استرداد املنه دوشدیلر و ( انبار ) اوزه رینه  
( زرمهر ) و ( روزه ) نام سرکرده لر ایله برر فرقه کونده ردیلر . بو ایکی  
فرقه ( حصید ) نام موقعده برلشیدیلر . ( بهبودا ) نام سردار دخی بر  
فرقه ایله ( خنافس ) موقعی طوتدی .



بروجه بالا ، ( عین التمر ) وقعه سنده ( عقه ) نك قتل اولنمسندن طولای  
حدتلمش اولان الجزیره عربانندن ( هذیل بن عمران ) ، ( مصیح ) ده  
و ( ربیعة بن بحیر التغلی ) ، ( رُصافه ) نك جانب شرقی سنده واقع ( ثنی )  
و ( بشر ) یعنی ( زمیل ) نام موقعلرده کلیتلو عربان ایله قونمش و ( زرمهر )  
و ( روزبه ) ایله برلشمك نیتنده بولنمش ایدیلر .

بوش فرقه ، برلشدیکی تقدیرده ایران و عرب عسا کرندن مرکب  
بر جسم اردو تشکیل ایدرلردی . لکن طوبلانمغه دکل ، داورانمغه وقت  
بولامادیلر .

شویله که : حضرت خالدك ( حیره ) ده قائممقامی اولان قعقاع تیمی ،  
( زرمهر ) ایله ( روزبه ) ك حرکتلرینی ایشیتدیکی کبی آنلره قارشو ایکی  
فرقه کونده رمشیدی .

متعاقباً ، دومة الجندلدن سیف الله کلدی وهان برر فرقه ایله ( قعقاع ) ی  
حصید اوزره رینه و ( ابولیلی بن فدکی ) یی خنافس اوزره رینه کونده ردی .  
قعقاع تیمی ، حصیده واردی . میدان مقاتله یه کیردی ( زرمهر ) ی  
اولدوردی . متعاقباً ( روزبه ) دخی مقبول اولدی . ایران اردوسی  
بوزولدی ، ایچلرندن پك چوق تلفات وقوع بولدی . عسا کر اسلامیة ،  
کلی اموال غنائم آلدی .

ایرانلر ك بقية السيوفی ، خنافس فرار ایتدی . ( ابولیلی ) ایسه  
قره قوش کبی اورایه اینك اوزره اولدیفندن ( بهبودا ) اورادن کوچوب  
( مصیح ) ده بولنان ( هذیل ) ك یاننه کیتدی .

سیف الله ، بو وقوعاتدن آگاه اولدیفنی کبی ( مصیح ) ه متوجه  
اولدی و « فلان کیجه فلان ساعتده اوراده برله شلم » دیو ( قعقاع ) ایله  
( ابولیلی ) یه تحریرات کوندردی .

وقت معینده اوچی دخی ( مصیح ) ده برلشدیلر . ( هذیل ) ایله  
یاننده کی رؤسا و عسا کر اویقوده ایکن آنلری اوچ طرفدن باصدیلر ،  
اکثرینی تلف ایتدیلر . هذیل ، پك آز آدم ایله فرار ایده بیلیدی .



( عبد العزّی بن ابی رهم ) ایله ( لید بن جریر ) که مقدّما اسلام ایله مشرّف اولوب حتی اسلامربنه دائر یانلرنده ( ابو بکر الصّدیق ) رضی الله عنه حضرتلرینک مکتوبی دخی وار ایدی . ( هذیل ) ک یاننده بولنمش اولدقلرندن ایکسی دخی بو وقعهده قتل اولوندیلر . حضرت صدیق اویله بر خطا وقوع بولدیغی خبر آلدینی کبی ایکسنک دخی بیت مالدن دیتلریغی ویرمش واولادی وعیاللرینی توصیه بویورمشدر .

حضرت عمر رضی الله عنه ( مالک بن نویره ) کبی بونلرک قتلنی دخی حضرت خالدہ اسناد ایلر ، حضرت صدیق دخی « اهل شرک ایله قونوب کوچنلر ، بویله قضایه اوغرایه بیلور ، دیر ایدی .

سیف الله ایسه ، مذکور معرکهدن صکره هیچ توقف ایتیموب ( ربیعہ بن بحیر تغلبی ) نک بولندینی ( ثنی ) موقعنده برلشمک اوزره ( قعقاع ) ایله ( ابولیلی ) یه بر ساعت تعین بویوردی و آنلری یوله چیقاردی . تعین اولنان وقت وساعتده اوچی دخی ( ثنی ) موقعنده برلشوب ینه اوچ جهندن ( ربیعہ ) فرقه سنی باصدیلر . جمله سنی قیردیلر ، کسدیلر . ایچلرندن دیل قورتولمادی . کافه اولاد وعیاللری اسیر اولدی وماللری اغتنام ایدیلدی . حضرت خالد ، اموال غنائمک خمسنی مدینه منوره یه کونده ردی .

ربیعہ نک قزی ( صہبا ) دخی بو اسیرلر ایچنده بولونوب حضرت علی رضی الله عنه ، آنی صاتون آلمش وآندن ( عمر ) نام اوغلی ایله ( رقیه ) نام قیزی اولمشدر .

هذیل ، بروجہ بالا ( مصیح ) دن فرار ایلدکده کلّی عرب عسکريله ( زمیل ) ده بولنان ( عتاب بن فلان ) ک یاننه فرار ایتمشدی . حال بوکه : آنلر ، هنوز ( ربیعہ ) وقعه سنی طویمادن حضرت خالد ، بقتہ اورایه واردی . آنلری ییلدیریم کبی اوردی . اکثرینی قلیجندن کچیردی واموال غنائمک خمسنی درگاه خلیفه یه کونده ردی .

بعده زمیلدن حرکت ایله ( عتاب بن عقه ) نک بولندینی ( رضاب )

نام محله سگیرتدی . لکن عتابك یاننده کی عربان ، طاغیلوب کندوسی دخی فرار ایلش اولدیغنه مبنی همان رضابدن حرکت ایتدی وشهر رمضان کلوب عسکر دخی یورغون اولدیغندن ( قراض ) واردی . عسکره استراحت ویردی .

قراض ایسه ، ایران و ( روم ) و ( الجزیره ) سرحدی اولدیغسندن حدود محافظه سنه مأمور اولان عسا کر رومیه ، عسا کر اسلامیه نك بورایه قدر کلوب صوقولدقلرینه قیزدیلر و او جوارده بولنان عسا کر ایرانیه یی دعوت ایدوب آنلر دخی روملر ایله برلشدیلر . ( تغلب ) و ( ایاد ) و ( نمر ) عربانی دخی کلوب آنلره قاریشدیلر و پك جسیم بر اوردو تشکیل ایله عسا کر اسلامیه نك آلت طرفندن فراتی کچدیلر .

روملر « بوکون کیملر ثبات ایدم جك و کیملر فرار ایلیم جك ایجه آ کلاشیلسون » دهرک عربدن آیریلدیلر و شدت ایله محاربه یه قویولدیلر . لکن خالدك هجوملرینه دایانامیوب پك چوق تلفات ویره رک دیکر لرندن اول بوزولدیلر . حضرت خالد ایسه « آرقه لردن آیریلاییکز » دیو عسکره امر ایتمکه روملر ، فرار ایدرکن ده ا زیاده تلفات ویردیلر . مقتوللرینك مجموعی یوز بیکه بالغ اولدی .

حضرت خالد ، ذی القعدة یه دک قراضده اقامت ایلدکن صکره حیره یه عودت امرینی ویردی . ( شجرة بن الاغر ) ی ساقیه ، یعنی دمداره مأمور بیوردی و کندوسنی ساقده برابر کیدیور کبی کوستردی . حال بوکه بعض خواص اتباعیله خفیا قراضدن آیریلوب جاده لرده انحراف و دره ، تپه سیر ایله مکیه کیتدی ، کیزلوجه حج ایتدی . دوندی ، حیره یه کلدی و طورمیوب همان بر فرقه ایله بر طرفه مثنایی کوندردی بر طرفدن دخی کندوسی ایلغار ایتدی . بغداد بازارینی و ( قطربل ) و ( تل عقرقوف ) طرفلرینی غارت ایلدی .

حضرت خالد ، طورماز ، اوتورماز ، آرام و راحت بیلمز و منلی بولتماز بر سر عسکر ایدی . لکن خود بخود اردوسندن آیریلوب ده مکیه کیتمی

خارج از اصول بر حرکت نامقبول اولدیغندن خلیفه حضرتلری ، آنک بو حرکتی اوکرندیکی کبی کندوسنه عتاب و توبیخ ایلشدر .  
صکرده بر نوع جزا اولق اوزره زیرده بیان اولنه جفی وجهله  
مأموریتی عراقدن شامه تحویل بیورمشدر .

### اون اوچنجی سنه هجریه وقایعی

بالاده بیان اولندی اوزره خالد بن الولید رضی الله عنه حضرتلری ،  
ایران عساکری و الجزیره عربانی ایله جنک ایدرک سرحد رومه کلدکده  
عساکر رومیه ایله بر بیوک محاربه ایتمش اولدیغنه نظراً روملر ایله دخی  
جنکه باشلامش اولدی .

ایرانه تابع اولان حیره ولایتی عربلری اله کجدیکی کبی قیصره تابع  
اولان عربلرک دخی دائرة اسلامه آلتیالری زمانی کلشیدی .

بناءً علی ذلک ابوبکر الصّدیق رضی الله عنه حضرتلری ، قریب وبعید  
محللردن اهل سیفی غزایه دعوت بیورمغله اشبو اون اوچ سنه سی اوائلنده  
هر طرفدن مسلمین ، فوج فوج مدینه منورهیه توارد ایدر اولدیلر . آز  
وقت ظرفنده خیلی عسکر تجمع ایدرک مدینه منوره خارجنده اردو  
قوریلوب وعشره مبشره دن ( ابو عبیده بن الجراح ) رضی الله عنه حضرتلری  
چیقوب آنلره امامت ایلردی . خلیفه حضرتلری ، ( خالد بن سعید بن  
عاصی ) رضی الله عنه حضرتلرینی بر مقدار عسکرله سرحد رومه کوندردی .  
او دخی حدوده واردقده اطرافنده کی قبائلی دعوت و آنلرده اجابت ایتمکله  
باشنه خلیجه عسکر طوپلانندی . روملر ، بوندن قوشقولانوب ( بهرا )  
و ( سلیخ ) و ( کلب ) و ( غسان ) و ( لخم ) و ( جذام ) قبیله لرندن کلّیتلو  
عسکر طوپلادیلر . لیکن خالد بن سعید ، آنلرک اوزرینه وارمغله طاغیلوب  
فرار ایلدیلر .

بونك اوزرينه خالد بن سعيد ، بر آز دها ايلرله دى و ( ماهان ) نام روم جنرالنك اردوسنه تصادف ايلهرك لى المحاربه آنى دخی بوزدى و پك چوق عسكرينى قيردى . لكن ايش ، كسب جسامت ايلش اولدينى جهته مقام خلافتدن استمداد ايلدى . بو ائاده يندن حمير عسكريله ( ذوالكلاع ) و ( تهامه ) و ( شحر ) و ( عمان ) و ( بحرین ) عساكرى ايله عكرمه بن ابى جهل ، مدينه منوره يه كمش اولدق لرن دن خليفه حضرتلرى ، بونلرى همان خالد بن سعيدك امدادينه كوندردى .

آندن صكره جهت شامه اهميت ويردى و تحصيل امواله مأمور اصحاب كرامدن بعضيلرينك مأموريتلرينى امارت عسكريله تبديل بيوردى . از جمله قضاعه قيله سندن تحصيل اموال مأموريتيله بولنان ( وليد بن عقبه ) يى او طرفلردن عسكر جمع ايتمك و خالد بن سعيدك ياننه واروبده آندن ( اردن ) ناحيه سنه كيتمك اوزره مأمور ايدوب اودخى قضاعه عسكريله شامه كيندى .

عمرو بن العاص ، وقت سعادته ( سعد ) ( هذيل ) و ( عذره ) قيله لر ينك تحصيل امواله مأمور ايكن طرف نبويدن عمانه ارسال بيورولدينى زمان عودتنده ينه اسكى مأموريتيه اعاده سى وعد بيورولمش ايدوكنه مبنى وفات پيغمبريدن صكره عماندن عودتنده خليفه رسول الله ، آنى ينه مذكور قيله لر ك تحصيل امواله مأمور ايدرك وعد نبوى يى يرينه كتورمشيدى . بوكره عمرو بن عاصى برفرقه امير ايتمك ايستوب بوكا دائر كندوسنه يازدينى مكتوبده « وعد نبوى يى انجاز ايچون سنى اسكى مأموريتكه تعيين ايتمشيدم . شمدى سنك دنياجه و آخرتجه دها خيرلى بر مأموريتيه نصبك آرزو ايتدم . مكر كه بولنديغك مأموريت سنجه دها مرجح كورينه ، ديو بيورمقله عمرو بن عاص دخی جوابنامه سنده « بن ، اسلامك اولق لرن دن بر اوقم . آنلرى آتة حق و جمع ايدو جك الله دن صكره سنسين . باق ، قنغيسى دها قوى و تاثيرلى ايسه آنى آت ، ديو يازمش اولديغدن خليفه حضرتلرى ، آنى برفرقه امير ايدوب ( ايله ) طريقيله جانب فلسطينه كوندردى .

بعده ( یزید بن ابی سفیان ) ی بر فرقه یه امیر ایدوب بلقا طریقله دمشق شام جانبه کوندرمشدر. آنک سنجانی آلتنده چوق کوکلی عسکر طویلاشمشدر. ایچلرنده اشراف مکدن ( سهیل بن عمرو ) امنالی بیوک ذاتلر وار ایدی. خلیفه حضرتلری، یایا اولدینی حالدہ آنی تشیع بیورمیش و آکا تعلیمات ویردیکی صرمدہ بویله نصیحت ویرمشدرکه « بن ، سنی تجربه ایتمک اوزره مأمور ایتم . کوزل حرکت ایلرسه ک اولکی مأمور . یتکدن دها بیوک بر منصب ویریرم و اگر فنا حرکت ایلر ایسه ک سنی عزل ایدرم . الله قورقوسنی قلبکدن چیقارما . زیرا اوسنک ظاهرکی نصل کوررسه ایچ یوزکی دخی اويله کورر . الله اک قریب اولان، آکا عمليله اک زیاده تقرب ایدندر . تکبر و تحجر جاهلیتدن صاقین . زیرا الله ، اوصفته و آنکله متصف اولانه بغض ایدر . عسکریکک یاننه واردینکده آنلر ایله کوزل مصاحبت ایله . آنلره نصیحت ایده جک اولدینکده سوزی قیصه سویله . زیرا سوز ، اوزون اولورسه بعضیسی بعضیسی اونوتدیرر و نفسکی اصلاح ایت . ناس سکا صالح اولور . بش وقت نمازی اوقات معینه سنده رکوع وسجودی اتمام ایدرک خشوع ایله قیل . دشمنک ایلیچلری یانکه کلدکده آنلره اکرام ایت وچوق اکلندیرمه . تا که عسکریکک احوالی اوکرنمدن چیقوب کیتسونلر . آنلره افکارکی بیلدیرمه واردونک خلل وقصورنی کوسترمه . هر حالده اسرارکی میدانہ قوماکه امورک مختل اولسون واستشاره ایتدیککده سوزی طوغری سویله که مشورت طوغری اولسون . کیجهلری او یانق اولوب اصحابک ایله مصاحبت ایله که سکا خبرلر کله وپردہلر آچیلہ . کیجهلری عسکریکه نوبت بکلهت وقره غوللریکی تکشیر ایت . وقتلی ، وقتسز آنلری طولاش . غافل اولانلری یولیله وعدالت اوزره تأدیپ ایله . مستحق جزا اولانلره جزا ایتمکدن قورقما . عسکرک حالندن غافل اولما که بادی فساد اولور . فقط حاللرینی تجسس ایله آنلری ترذیل دخی ایتمه . ناسک اسرارینی میدانہ چیقارما . ظاهر حاللری ایله اکتفا ایله . اهل کبر و عجب ایله دوشوب قالمما . اهل صدق و وفا ایله هم مجلس اول .



مال غنیمته خیانت ایله ، فقر کتورر ونصرته مانع اولور . قریباً نفسلری  
عبادتخانه لرده حبس ایتیش قوملر (یعنی راهب لر) کوره جکسکزر . آنلره  
ملوقونما . اونلری حاللری اوزره براق . .

خليفة رسول الله ، اميرال جيش اولانلره بويله تعليمات کافيه ونصايح لازمه  
اعطا ايدرك طاقم طاقم جانب شامه کونده رمشدر . بو امرانک هر بری ،  
بر جهته غزا ايدده جک وبرينک باشی صيقيلور ايسه ديکرلری ، آنک امدادينه  
سکيردوب کيده جک ایدی . بر موقعده مجتمع اولدقلرنده قنغيسنک دائره  
مأموریتی ايسه او ، اميرال جيش اولوب ديکرلرينک آنک معیتده بولماسی  
اوزمان اصول متخذدن ایدی . فقط ابو عییده بن الجراح حضرتلری دخی  
بو کره بر فرقه ایله حمص جهته مأمور اولدقده ذکر اولسان امرانک  
جمله سنه ناظر نصب اولنمشدر . رضی الله عنهم اجمعين .

(ولید بن عقبه) و (عکرمه) و (ذوالکلاع) ، خالد بن سعیدک یاننه واردقلرنده  
خالد ، عجله ایدرک ديکر امرایي بکله میوب هان بو اوچنی استصحاب ایله  
ماهانک اوزرینه یوریدی . ماهان ، کیرو چکیلوب دمشق شامه کیردی .  
خالد دخی آرقه سندن حرکت ایله دمشق یاننده (مرج صفر) نام موقعده  
اردوسنی قوردی . متعاقباً ماهان ، عسا کر رومیه ایله بر شدتلی چقیش  
ایتدی . طرق ومعارى طوتدی ویولده سعید بن خالدی بولوب شهید ایتدی .  
خالد ، اوغلنک شهادتی خبر آلدینی کبی بوزولوب عسکريله برابر  
فرار ایله قنادی قیریق شاهین کبی (ذو المروه) نام محله قوندی . (ولید بن  
عقبه) دخی آنکله برابر ایدی .

اما عکرمه ، شهره قریب بر محلهه آیاغنی دیره یوب طوردی . یوقسه  
ماهان ، قره قوش کبی یتیشوب عسا کر اسلامه چوق ضرر ایدده یلوردی .  
اواننده شرحیل بن حسنه ، جانب عراقدن عودت ایله مدینه منوره یه  
کلش اولدیغندن خلیفه حضرتلری ، آنی ولیدک یرینه اردن فرقه سی امیری  
تعیین ایتمکه شرحیل حضرتلری ، شام اردوسنه کلوب وخالد بن سعیدک  
معیتده کی عسکرک نصفی آلوب سمت مأموریتنه عزیمت ایتمشدر .



بعده مدینه منوره ده بر مقدار عسکر تجمع ایتمکه خلیفه حضرت تری، آنلری ( معاویه بن ابی سفیان ) و یروب آنی برادری، یزید بن ابی سفیانک معیته کونده رمش اولدیغندن معاویه، خالد بن سعید ایله بولوشدقه آنک یاننده کی باقی عسکری دخی آلوب کیتمشدر .

امرای مشار الیهدن عمرو بن عاص، ارض فلسطینه و شرحیل بن حسنه، اردنه و یزید بن ابی سفیان، بلقایه و ابو عبیده بن الجراح، جابیه جهته واروب اوردولرینی قورمشلردر . رضی الله عنهم .

( امپراطور هرقل ) عربلرک کوندن کونه تزید قوت ایدرک عراق عربی ضبط ایلدکن صکره دیار شامه دخی تختی ایلدکلرینی کورونجه تلاش دوشه رک قسطنطینیهدن چیقوب سوریه دیارینه کلدکده بر مقدار ویرکو اعطا ایلک اوزره عربلر ایله مصالحه افکارنده بولنش ایسه ده امراسی آکا موافقت ایلدکلرندن او دخی روملردن و نصارای عربدن عسا کر کلیه جمع ایدوب برادرینک تحت قومانداسنده اوله رق عمرو بن عاصه قارشو یوز بیک و دیگر برجنرال ایله ابو عبیده قارشو آلتش بیک و جورج ( یورکی ) نام جنرال ایله یزید بن ابی سفیانه قارشو بر مکمل اردو و دیگر بر جنرال ایله شرحیله قارشو دیگر بر اردو سوق ایتدی و کندوسی حصده استقرار ایلدی .

هر فرقه اسلامیهدنک مقابلی اولان اردولر، کندولرینه نسبتله قات قات زیاده اولدیغندن امراء، بریره طوبلانمنی رأی ایدوب مقام خلافتدن دخی بو یولده تعلیمات کلسکه ( یرموک ) وادیسند طوبلانیدلردر و بر طرفدن یرموک و بر طرفدن ( واقوصه ) یار و اوچوروملرینی کندیلرینه سپر ایتدیلر . روملر، بونی کورونجه آنلر دخی مواقع مختلفه ده اولان اردولرینی یرموک موقعنه جمع ایله عسا کر اسلامیهدن قارشو بر بیوک اردو قوردیلر . یرموک اوچوروملری، برجسم خندک کی طرفینک حرکتیه مانع طبیعی ایدی . عسا کر اسلامیهدن اعدایه نسبتله اقل اولدینی جهته ذاتاً تجاوزی

حرکت ایتیوب آنجق روملر ؛ هر قنی محلدن باش کوسترسه لر او طرفه اوشوندی ایدرک مدافعه ایدیورلردی. بو حال بر خیلی مدت ممتد اوله رق امرا ، خلیفه رسول اللهدن استمداد ایلدیلر .

### خالد بن ولیدک عراقدن شامه ورودی

امرانک بروجه بالا استمدادی اوزرینه خلیفه رسول الله ، خالد بن ولیده امرنامه کونده ردی و مشتایی یرینه قائم مقام براغوب و موجود معیتی اولان قوتک یاریسنی آلوبده امداد ایچون سریعا شامه وارماسنی اراده بیوردی. حضرت خالد ، اردوسنده اولان اصحاب کرامی کافه آلوبده یرلرینه بشقه آدملر براقق ایستدیسده بو تقسیمه مثنی راضی اولمایوب « بن ، اصحاب رسول الله ایله تین ایدرم . آنلرک یوزی صوی حرمته اللهدن نصرت دیلرم . مظفریتی آنلرک یوزندن بیلورم » دیدی

آنک اوزرینه حضرت خالد دخی عسکری ، آنک راضی اولاجنی وجهله ایکیه بولدی واون بیک قدر کزیده عسکرله حیره دن چیقدی . کلب قبیله سنک صو محلی اولان ( قُرَاقِر ) نام موقعه کلدکده اهاالیسی قارشو طورمغله آنلری اوردی . پک چوق اموال غنائم آلدی . بعده صوسز چوللردن وکسدرمه یوللردن سیرایله بش کونده ( بهرا ) قبیله سنک صویری اولان ( سوی ) نام موقعه واصل واهالیسنی اوروب ینه پک چوق غنیمته نائل اولدی .

آندن حرکت ایله ( آرَک ) نام محله کلدی . بورانک اهاالیسی جزیه ویرمک اوزره مصالحه ایله قورتولدی .

بعده ( تَدْمُر ) کلدکده اهاالیسنی اورکوب قلعه یه قیاندیلر ایسه جنکه کیریشمیوب صلحه یاندیلر .

آندن ( قریتین ) کلدی ولدی المحاربه مظفراولدی وخیلی اموال غنائم آلدی .

بعده (حوارین) نام محلہ کلوب اہالیسیلہ لدی المحاربہ غلبہ ایدرک  
کیمنی قتل و کیمنی اسیر ایندی .

بعده (قَصَم) نام موقعہ ورودندہ قضاعہ قبیلہ سندن اورادہ بولنان (بنی  
مَشَجَعہ) آنکہ عقد مصالحہ ایدرک تخلص کریبان ایتدیلر . حضرت  
سيف الله ، آندن دخی حرکت ایله شهر دمشق یانندہ کی طاغک عقبہ سنہ  
لدی الورود فخر عالم صلی اللہ علیہ وسلم حضرت ترینک (عُقَاب) نام سیاہ  
رنکلی سنجائی آنک یانندہ بولندیغندن بورادہ آنی کشاد ایلدی . عسا کر  
اسلامیہ نک شوق و غیرتی تازہ لدی . بوسیدن ناشی اورایہ (ثَنِيَّةُ الْعُقَاب)  
دنیلمشدر .

لواء شریف نبوی ایله سيف الله ، ثنیۃ العقابدن (مَرْجِ رَاهِط) ہ کلدی  
و غسانیلر اوزرینہ (یوم فصح) دیدکری بیرام کونی بقتہٗ هجوم ایله کیمنی  
قتل و کیمنی اسیر ایتدی .

بورادن (غوطۃ دمشق) اوزرینہ کوندہ ردیکی چتہ دخی برکلیسانی  
اوروب غارت ایدرک آل دینی غنائمی حضور سيف الله کتوردی . روملر ،  
حوران جہتنہ ناظر و یرموک حوادثنہ منتظر ایکن یان بوکورلردن بقتہٗ  
سيف اللهک ظہور ایدیورمسی ، آنلری شاشیرتدی .

سيف الله ایسہ سیر سریع ایله (بصری) یہ واردی . بقتہٗ اورادہ  
بولنان عسا کر رومیہ یی اوردی ، بوزدی ، پریشان ایتدی . بصری  
اہالیسی ، جزیه و یرمک اوزرہ امان دیلہ دیلر . حضرت خالد دخی صلحاً  
بصرای آلدی و بورادن اموال غنائمک خسنی ، مدینہ منورہ یہ کوندہ ردی .  
بعده بصرادن حرکت ایله یرموک یانندہ واقع (واقوصہ) یہ کلدی  
و خلال ربیع الآخرہ یرموک اردوسندہ کی امرا ایله برلشدی .

فقط اوئانادہ عمر بن عاص (غَوَر) موقعندہ بولتوب روملرک برجسم  
اردوسی ایسہ (جَلَّت) دہ (أَجْنَادِین) موقعنہ حرکت ایلش اولدیغندن  
ہب امرا ، خالد بن الولید ایله برابر عمرو بن العاصک امدادینہ سکیرتدیلر .

عمرو بن العاص ، امیرالجیش اولدینی خالد لدی المحاربہ روم اردوسی بوزولدی و یک چوق تلفاتی وقوع بولدی . اصحاب کرامدن دخی بعض ذوات شهید اولدی . بومحاربہ ده دخی خالد بن الولیدک یک چوق یارارلنی کورولدی .

بووقه واسط جمادی الاولی ده وقوع بولوب بعده هپ امرا ، ینه یرموک و واقوصه موقعنده مجتمع اوله رق زیرده بیان اولنه جنی وجهله مشهور ( یرموک محاربہ سی ) وقوع بولشدر .

او زمان روملرک اخلاقی بوزولوب هر طرفده اہالی یه ظلم و تعدی واردولرنده انواع فحشیاته تصدی ایتکده ایدیلر . اهل اسلام ایسه بویوک ، کوچوک کافہ حسن اخلاق ایله متصف و آداب اسلامیہ ایله مؤدب اوله رق ، واردقلری یرلرده هرکسه حسن معاملہ و هر خصوصده حقانیت و عدالت اوزره حرکت و هر درلو فحشیات و فواحشدن اجتناب ایدرلردی . حتی بو ائاده ، روم جنراللرندن برینک تحقیق احوال ایچون اردوی اسلامه کونده رمش اولدینی بر عرب ، بر کون بر کیجه اهل اسلام ایچنده بولنرق عودت ایله عساکر اسلامیہ نک احوالی جنزاله حکایه ایلدیکی صرہده « آنلر ، کیجه لین هپ راهب و کوندوزین هپسی عسکردر . ینلرنده احقاق حق ایچون زنا ایدنلری رجم ایدرلر و سارق ، کندو ملکلرینک اوغلی بیله اولسه النی کسرلر » دیدکده جنرال او یله ایسه « یر یوزنده آنلر ایله اوغراشمقدن ایسه یرک آلتی بزه دها خیرلی در » دیمش اولدینی مرویدر .

### یرموک وقعہ سی

ایمپراطور ( هرقل ) ک ، ( یرموک ) جهتده کی عساکری ، ایکی یوز قرق بیگ راده سنده ایدی . آنلره مقابل اولان عساکر اسلامیہ قرق آلتی بیگ قدر اولوب ایچلرنده بیگ صحابی وار ایدی که یوزی اهل بدردن

ایدی . او زمان روملر ، عسکرلرینی بیکر نفردن مرکب اولق اوزره  
آلایره تقسیم ایده کلدکلرندن مقابله بالمثل قاعده سنجه عساکر اسلامییه  
دخی شام اولکاسنه کلدکده او وجهه بیکر بیکر تقسیم اولمشدر .

فقط ( خالد بن الولید ) ک عراقدن ورودینه قدر هر امیر ، کندی  
فرقه سیله باشلی باشه جنک ایدردی .

اگرچه ( ابو عبیده ) حضرتلرینک نظارت عامه سی وارایدی وجهه سنک  
اولوسی ایدی . لکن امر محاربه ده امرانک هر بری مستقل ایدی .  
( خالد بن الولید ) حضرتلری ، آنلری امارت واحده آلتنه آله رق  
جمله سنی یکووجودکی قوللانمشدر .

شویله که : روملرک راهب وقسیسلری اوردولرینه کلوب بر ، آی قدر  
آنلری جنکه تشویق وتشجیع ایتدکدن صکره فدا کارانه هجوم واقته حمله  
قرار ووروب اوائل رجبده حرکتیه باشلادیلر .

اهل اسلام دخی آنلرک حرکتلرینی حس ایتدکلری جهته بر معتاد  
فرقه فرقه حرکتیه قیام ایلدیلر .

ایشته اوزمان ( خالد بن الولید ) حضرتلری میدانه چیقدی وجناب  
حقه حمد وثنا ایله بده ایدرک بر خطبه او قودی و بوجه آتی نطق  
ایتدی .

« بو کون ، اللهمک صایلی کونلرندن بریدر . بو کون ، اوکونمک  
وسرکشک ایتک لایق دکلدر . جهاد کزی خالص وعملکزلله الهی راضی  
قیلک . بو بر کوندرکه آنک صوکی واردر . نظام وترتیب اوزره جنک  
ایدن قوم ایله بویله متفرق اوله رق جنک ایتک جائز ولایق اولماز .  
آرقه کزده کی ذات ، بو حالی بیلسه منع ایدردی . مأمور اولمادیغکنز  
خصوصده ولی امرک رأینه موافق اولاجق صورتده رأی ایدک . »

حضرت خالدک بو سوزی اوزرینه « رأی نه در ؟ شویله » دینلمکله  
اودخی خطبه سنه بو وجهه دوام ایتدی .



« ابوبکر ، سزی یکدیگره رفق ایله معامله ایدوب سهولتله اویوشورلر . دیو کونده رمشدر . یوقسه نه اولدیغنی واولاجغنی بیلسه سزی جمع ایتمزدی . سزك بولندیغکز وضع و حال ، اهل اسلام حقنده کندیلرینی احاطه ایدن احوال شدیدهدن اشدر واعداد حقنده آنلره امداد ایلمکدن ده نافعدر . الله حقیچون بیلدم که دنیا سزك آره کزه تفرقه دوشورمش . ایچکزدن بعضیکز امارته انتخاب اولونسه الله عندنده وخلیفه رسول الله عندنده سزه نقیضه ویرمز . کلیکز ، شو دشمنلره باقکز : نصل مهیا اولمشلر . بو بر کوندرکه صوکی واردر . اکر بو کون ، بز آنلری خندکلرینه بوسکورتور ایسهك دائما آنلری بوسکورتورز واکر آنلر ، بز بوزارسه فیما بعد فلاح بولمایز . ایمدی کلیکز ، امارتی ( سر عسکرلکی ) الدن اله تداول ایتدیریکز . بریکز بو کون ودیکریکز یارین ، اوبریکز اوبرکون امیر اولسون ، تا که هر بریکز صره ایله امیر اولاسکز ، دیدی .

فی الواقع ، روملر ، اهل اسلامك اضعاف مضاعفی اولدقلرینه نظراً هر کون بر سر عسکر فدا اولمق خاطره گلز شی دکل ایدی . بونك اوزرینه امرایالاتفاق ( خالد بن الولید ) حضرتلرینی او کون سر عسکرلکه انتخاب ایلدیلر .

اوصرده روملر ، او یله مکمل بر نظام اوزره میدان حربیه چیقیدیلرکه هیچ بر وقت او مرتبه منتظم چیقمامشلرایدی . ایکی یوز بو قدر آلایلری میدانده تموج ایدیوردی .

سیف الله دخی قرق بو قدر آلایه شیجعان اسلامدن برر بك نصب ایدهرك عساکر اسلامی بر کوزل صورتده تعییه ایتدی که عربلر ، هیچ بر وقت او یله منتظم اوله رق میدان حربیه چیقمامشلرایدی .

آلایلری ( قلب ) و ( میمنه ) و ( میسره ) و ( مقدمه ) و ( ساقه ) یه تقسیم ایله ( امین امت ) اولان ( ابو عییده ) نی قلبکاهه آلدی . ( ابوالدردا ) دخی قاضی ایدی .



( عمرو بن العاص ) ایله ( شرحیل ) ی صاغ جناحه و ( یزید بن ابی سفیان بن حرب ) ایله ( قعقاع ) ی صول جناحه کچوردی و ( قَبَّاثُ بن اَشِیم ) ی طلیعلر اوزهرینه مأمور ایتدی . ( عبدالله بن مسعود ) دخی احتیاطده ایدی .

ابو سفیان بن حرب ، عسا کر اسلامیه بی جنکه تشویق و تشجیع ایتمکده اولوب آنکده بو یولده پک چوق اثر غیرتی کورلمشدر .

( مقداد بن الاسود ) دخی اهل بدر ایله برابر صف حربده (سوره انفال) اوقویوب مستمعینک تویلری اورپر مکده ایدی . رضی الله عنهم اجمعین .

سيف اللهک امریله جنکه کیریشیلوب سواریلر، چرخه لاشمغه و طرفین یکدیگره حمله ایتمکه باشلادیغی صرهده مدینه منوره دن بر ساعی کلدی . خلیفه حضرتلری نامزاج اولمغله بعض ذوات، آنک حالی اوکره نمک اوزره ساعینک باشنه طویلاندیلر ایسهده هنوز محاربه قیزیشمش اولدینی جهته « خلیفه طرفدن امداد کونده ریلک اوزره در » کبی سوزلرله کچشدیروب حقیقت حالی کتم ایتشدی . مکر ابو بکر الصدیق رضی الله عنه حضرتلری عازم جان اوله رق حضرت عمر الفاروق رضی الله عنه حضرتلری ، خلیفه اولوب سر عسکرلکی ابو عییدهیه توجیه بیورمش و ساعی ، سر عسکرلک امرینی کتورمش . لکن آل ده کیشه جک زمان اولمادیغدن ابو عییده حضر- تلی دخی موقه او، امری کتم ایله صکره دن اعلان ایلشدر .

ایشته او ائنده روم جنراللرندن مشهور ( یورکی ) میدانده کلدی . خالد بن الولید حضرتلرینی ایستدی . او دخی یانه واردی . طرفین ، بربرینی تأمین ایله محاربه بی براغوب محاورهیه کیرشدیلر .

شویله که : یورکی « یاخالد ! طوغری سویله ، یالان سویله . زیرا حر اولان آدم ، یالان سویلمز . بنی آلداتمه . کریم اولان آدم ، خدعه ایلمز . سزک پیغمبر کزه کوکدن بر قلیچ ایندی ده اوده سکامی ویردی که آنی قننی قوم اوزرینه صیرسهک او ، قومی بوزو یورسین ؟ » دیدکده حضرت خالد «خیر» دیمکه یورکی « یاسن نیچون سیف الله تسمیه اولندک؟ » دیمسی اوزرینه

حضرت خالد «الله تعالی، بزله پیغمبر کوندردی. بن، آتی تکذیب و آنکه جنک ایدنلر ایچنده ایدم. صکره بکا هدایت الهیه ایریشمکه آکا متابعت ایلدیکمده بکا (سن، اللهک مشرکلر اوزرینه صیردینی قلیجیسک) دیدی ونصرتله دعا ایتدی «دیمش.

آنک اوزرینه یورکی «بکا خبر ویرکه نهیه دعوت ایدیورسکز؟» دیمکه حضرت خالد «یا اسلام، یا جزیه؛ یا محاربه. بو اوچ شیئک برینه دعوت ایلرز» دیدکده یورکی «سزک دعوتکزه اجابتله ایچکزه کیرنلرک رتبه سی ندر؟» دیوب خالد دخی «آنک رتبه سیله بزم رتبه من بردر» دیمسی اوزرینه یورکی «آنک ایچوندده سزک کبی اجر و مکافات وارمیدر؟» دیو صورمش خالد دخی «اوت. بلکه او، بزدن افضلدر. زیرا بز، پیغمبر من صاغ ایکن آکا اتباع ایتدک که بزه غییدن خبر ویرردی. آندن عجایب و معجزات کوردک. کوردیکمزی کورن و ایشتدیکمزی ایشیدن کیمسه مسلمان اولق لازم کلور. سز ایسه بزم کبی کورمدیکز، بزم کبی ایشیتمدیکز. سزدن خلوص ایله دین اسلامه داخل اولان بزدن افضل اولور» دیو جواب ویرمش.

یورکی، هان قالدانی ترسنه چویرمش و خالدک تلقینله کله شهادت کتورمش. بونک اوزرینه یورکی، غسل ایدوب خالدک تعلیمی اوزره ایکی رکعت نماز قیلدندن صکره هان سل سیف ایدرک خالد ایله برابر دشمن اوزرینه حمله ایتمش و بویله مشهور بر جنرالک میدان حریده مسلمان اولیورمسی روملرک پک کوچنه کیتمشدر.

اول امرده روملر، فوق العاده شدتلی بر هجوم ایله عساکر اسلامیه بی موقعلرندن قالدیردیلر و خط رجعتلری اوزرنده بولنان عکرمة بن ابی جهل اوزرینه دوشوردیلر.

عکرمة «بن، رسول الله ایله بونجه محاربه لرده بولوندم. شمدی فرار ایتک نه دیمکدر. بنله اولوم اوزرینه عهد میثاق ایدن وارمی؟» دیو ندا ایلدکده عموجه سی (هشام) و (ضرار بن الازور) درت یوزقدر فدای ایله

برلکده اولوم اری اولوب خالد بن ولیدک چادری اوکنده جمله مجروح اوله رق دوشونجه یه دک مردانه جنک ایلدیلر . صکره بونلرک بر مقداری افقت بولمش و باقیسی شهید اولمشدر .

سر عسکر خالد و جنرال یورکی ، پک شدید و مدید محاربه لر ایتدیلر . عسا کر اسلامیه ، اوکله و ایکنیدی نمازلرینی ایما ایله قیلدیلر . او صروده اهل اسلام قادینلری دخی صحیحاً مردانه جنک ایلدیلر . کوندوزک صوک دمنده جنرال یورکی ، شهید اولدی . برکون ایچنده اک بیوک بر درجه یه وصول بولدی رحمة الله علیه رحمة واسعة .

نهایة الامر روملرک بیتاب و متزلزل اولدقلری صروده سیف الله ، آنلرک قلبکاهنه پک شدتلی بر هجوم ایتدی . سواریلریله پیاده لرینک آره سنه کیردی . سواریلر ، پیاده لری براغوب قاچدی . پیاده لری آنلرک آیاقلری آلتنده ازیلیدی . اردولری بتون بتون بوزولدی . عسا کر اسلامیه ، آرقه لرینه دوشدی . عرب آنلوسنک اوکندن قاچوب قورتولق نه قدر مشکل اولدینی معلومدر . روملرک میدان حربده دوشوب قالا نلرینه نسبتله قاچار ایکن تلف اولانلر قات قات زیاده ایدی . برچوق آایلری دخی یرموک و واقوصه اوچوروملرینه دوشوب تلف اولدیلر . برچوغنی دخی قاچارکن اهل اسلام قادینلری تلف ایتدی و روملرک وجوه و امرا سندن پک چوق تلفات وقوع بولدی . حتی ایمراطورک برادری دخی تلف اولدی و تلفاتک مجموعی یوز بیکی کچدی .

جانب اسلامیانده دخی اوچ بیک مقداری شهید وقوع بولدی . ایچارنده ( عکرمه ) و اوغلی ( عمرو ) و ( هشام بن العاص ) و سعیدک اوغوللری ( عمرو ) و ( ابان ) و ( سعید بن الحارث السهمی ) و ( نضیر بن الحارث ) کبی مشاهیردن و قدمای مهاجریندن نیجه ذوات کرام وار ایدی . ابوسفیانک دخی برکوزی ، اوق اصابتیله اعمی اولدی . ( رضی الله عنهم اجمعین ) .

ایشته بو مظفریت عظیمه ، متعاقباً بوتون اقطار شامیه نک فتحنه بادی اولمشدر .

## وقعة فحل

( یرموک ) وقعه سی اوزه رینه روملره ضعف کلّی کله رک ( حوران ) و ( جولان ) کی نیچه مملکتلر اهل اسلام الله کچمشدر .

آنجق ( اردن ) جهتنده ( فحل ) نام موقعده روملر ، سکسان بیك عسکر جمع ایتمکله بالمله امراء اورایه کیده رک خلال ذی القعدهده بر محاربه عظیمه وقوع بولمشدر .

شویله که : ( خالد بن الولید ) مقدمه الجیشه و ( عمرو بن عاص ) بر جناحه امیر اولوب ( ابو عبیده ) دخی بر جناحک اداره سنی الله آلمشیدی . اصل اردونک اداره سی ( اردن ) جهتی امیری اولان ( شرحیل بن حسنه ) ده ایدی . سواری اوزه رینه ( ضرار بن الازور ) و پیاده اوزه رینه دخی ( عیاض بن غنم ) مأمور ایدی .

شرحیل بن حسنه حضرتلری ، ( فحل ) موقعنه واردی . روملرک اردوسنه قارشو اوردو قوردی .


ایکی اوردو آره سنده کی صولر و باتاقلر ، حرکت تجاوزیه مانع ایکن روملر ، کیجه لین بر تقریبه کچوب عسا کر اسلامیه بی باصدیلر . ( شرحیل ) ایسه کیجه لری غافل یا تمایوب احتیاط اوزره بولونور اولدیغندن صباحه قدر پک کوزل مدافعه ایتدی .

فرداسی دخی محاربه صباحدن آقشامه قدر امتداد بولدی . روملرک برنجی و ایکنجی جنراللری مقتول اولدی واردولری بوزولدی .

حال بوکه : قارا کلک باصمش اولدیغندن یوللرینی شاشیردیله . صولره دوشدیله ، باتاقلره صاپلاندیله .

آرقالردن عسا کر اسلامیه تعقیب ایله یتشدکلرینی تلف ایدوب سکسان بیك نفرلردن پک آزی قاچوب قورتولا بیلمشدر .









اثر خامة احمد جودت

# قصص انديانا و تواريخ خلفا

جزء خامس و سادس

صاحب و ناشرى : قناعت كتيخانه سى صاحبى الياس

كافه حقوقى محفوظدر

قناعت كتيخانه سنك مهرينى حاوى اوليان نسخه لر ساخته اولوب طابع و بايى مسئولدر

قناعت كتيخانه

در سعادت — قناعت دنجامه سى

۱۳۳۱



## تَمَّةٌ وَقَالِيعُ سَنَةِ ۱۳

### کِفِیتِ وفاتِ صَدِیقِ وَخِلافَتِ فَااروقِ

ابوبکر الصّدِیقِ رضی اللّٰه عنہ حضرتلری ، اون اوج سنّۂ هجریه سی  
جمادی الآخره سنک یدیسندن خسته لنوب اون بش کون مسجد شریفه  
چقامادی وامامتی عمر الفاروق رضی اللّٰه عنہ حضرتلرینه حواله بویوردی.  
خلافتہ دخی آنی مناسب کوردی وابتدا عبدالرحمن بن عوف رضی اللّٰه  
عنه حضرتلرینی چاغیردی « عمرک خلافتی حقنده نه دیرسین؟ » دیووردی.  
او دخی « ایستدیککن اعلادر. فقط بر آز شدتی واردر » دیدکده « آنک  
شدتی ، بنم رقتعی تعدیل ایچوندرد. ایش ، کندی باشنه قالدینی حالدہ حدت  
وشدت کبی حاللردن واز کچر . بن ، آکا دقت ایتشم . بن ، بر آدمه  
غضب ایتدیکمده او ، رقت و ملایمت کوسترد و برینه ملایمت کوستردیکمده  
او ، شدت کوسترد » دیو بویوردی .

بعده عثمان ذی النورین رضی اللّٰه عنہ حضرتلرینی چاغیردی و حضرت  
عمری آندن ووردی . اودخی « ایچی ، طیشندن اعلادر و ایچمزدہ آنک  
نظیری یوقدر » دیو جواب ویردی .

بعده ، سعید بن زید و انصاریک اولوسی اسید بن حضیر و دیگر کبار  
مهاجرین و انصار رضی اللّٰه عنهم حضراتی ایله مشاوره ایتدی .

اسید بن حضیر « بو ایشه بر مقتدر ذات لازمدر و عمردن انسی یوقدر »

دیدی .

صوکره طلحه رضی الله عنه حضرت تئری ، ایچری کیردی « سن عمری ولی عهدمی ایتدک ؟ سن وار ایکن آنک خلقه نصل معامله ایتدیکنی کوردک . یالکز قالدینی حالد نه یاماز . اللهک حضورینه واردیغکده رعیه یی سندن صورار » دیدی حضرت صدیق « بنی قالدیریگز » دیو بویوردی . قالدیروب اوطورتدق لرنده طلحه یه جواباً « ربه ملاقی اولوب ده بن دن سؤال ایتدکده : یارب ! قوللریکک امورینی آنلرک اک خیرلوسنه حواله ایتدم دیو جواب ویریرم » دیدکن صکره حضرت عثمانی احضار ایله بر عهدنامه ، یعنی وصیتنامه یازدیردی که ترجمه سی بودر :

### عهد نامه صدیق

بسم الله الرحمن الرحيم

« عهد آتی ، محمد رسول الله صلی الله علیه وسلمک خلیفه سی ابوبکرک دنیاچه اک صووک و آخرتجه اک اول دمنده ، کافرک ایمانه وفاجرک ایقانه کلدیکی بر حالد ایتدیکی عهد و وصیتدر . بن ، عمر بن الخطابی خلافته انتخاب ایتدم . آنی دیکله یک . آکا اطاعت ایله یک . خیری تحریری ده قصور ایتدم . اکر صبر وعدالت ایلرسه بنی تصدیق ایتمش اولور واکر جور و تبدیل مسلك ایدرسه بن غیبی بیلمم ، معذورم . بن ، آنجق خیر مراد ایتدم . هرکس ، عملنک جزاسنی بولور و ظلم ایدنلر ، قریباً نه حاله کرفتار اولاجقلرینی بیلور . السلام علیکم ورحمة الله »

حضرت صدیق ، بو عهد نامه یی تحریر ایتدیردکن صوکره باشنی پنجره دن چیقاروب طیشاروده مجتمع اولان اصحاب کزینه خطاباً سزه بر خلیفه انتخاب ایتدم . راضی میسکز ؟ « دیو سوردی . « راضی یز یا خلیفه رسول الله ! » دیدیلر .

علی بن ابی طالب رضی عنه الغالب حضرت تئری « عمر دن باشقه سنه

راضی اولماز ، دیدی . حضرت صدیق « اودر » دیو بویوردی وعهدنامه یی . کوله سنه و یروب طیشارو کونده ردی ،

علناً قرائت اولوندی . هر کس « سمعاً و طاعة » دیدی و هر کسدن اول حضرت علی ، حضرت عمر الفاروقک یاننه واردی . « بو ایشک عهده سندن کله جک ایشته شو قوی و امین اولان ذاتدر » دیو بویوردی . بعده حضرت صدیق ، حضرت فاروقی یاننه احضار ایله آکا بر چوق نصیحت و وصیت ایلدی .

بر آراق سلمان فارسی ایله دیکر بعض اصحاب کزین رضی الله عنهم ، حضور صدیقه کیروب « بر نصیحت ایدیکز که موجبنجه عامل اولام » دیدکلرنده « قریباً سزه پک زیاده رزق قبولری آچیله جق . بر قاچ کونلک عمره آلدانوب ده یارین حضور باریده محجوب اولمایکز » دیدی .

جزء رابع ده بیان اولوندینی اوزره خالد بن الولید ، عراق عسکرینک نصفی آلوبده جانب شامه عزیمتنده آنک یرینه ( مثنی ) حیره امارتنده قالمشیدی . او ائنده ایران دولتی ، بر آز کندیسینی طوپلایوب ( هرمز ) نام سردار ایله ( حیره ) اوزرینه بر اردو سوق ایلش اولدیغندن مثنی ، برادرلری ( مهتی ) و ( مسعود ) ایله برابر چیقوب بابل یاننده ایرانلر ایله بر شدتلی محاربه یه طوتوشدقلرنده ایران اردو سنده بر فیل بولونوب عرب آتلی ، آندن اورکمکه تعییه الجیشه خلل کلش ایکن قهرمان مثنی ، بر آز یکتیلر ایله پیاده اوله رق فیلک اوزرینه هجوم ایله آنی قتل ایتدکلرندن ایران عسکری بوزولمش و پک چونغی قیریلش و بقیه السیوفی مداینه قدر قاچوب عساکر اسلامیه ، نهر دجله سواحلنه قدر چاپول ایتمش ایدی .

لکن ، ایرانلرک تدارکات کلّیه سی اولوب ( مثنی ) ایسه بر مدت خلیفه حضرتلرندن خبر آلامادینی جهته جانی صیقيله رق همان ( بشر بن حصاصه ) یی ( حیره ) ده یرینه قائم مقام براقوب کندوسی اورادن حرکت ایدهرک بوجه بالا ، خلیفه حضرتلرینک آغیر خسته اولدینی کون مدینه منوره یه کلدی و حضور خلیفه یه کیردی . خلیفه حضرتلری ، همان عمر الفاروقی



احضار ایلہ « بن اومارم کہ بو کون وفات ایلرم . سن ، همان خلقی ( مثنی ) ایلہ برابر کیتمک اوزره جهاده دعوت ایلہ . امر دینده سزی هیچ بر مصیبت مشغول ایتمسون . رسول اکرمک وفاتنده بنم نه یایدیغمی کوردک . حال بوکه ناسه آنک کبی بر مصیبت اصابت ایتمه مشدر . برده جناب حق ، عسا کر شامیه نصره احسان ایتمکده خالد بن الولید ایلہ شامه کیتمش اولان عراق عسکرینی عراقه اعاده ایت . آنلر ، اورانک اهلیدره دیو وصیت بو یوردی . آقشامدن صکره ، یعنی اشبو اون اوچ سنه سی حمادی الآخره سنک غایتنه سکز کون قاله صالی کیجه سی آقشام ایلہ یاتسو آره سنده آلتمش اوچ یاشنده اولدینی حالده وفات ایتدی . ایکی سنه ، اوچ آی ، اون کوندن برو حسرتکشی اولدینی فیخر کائناتک یانه کیتدی . رضی الله عنه و کرم الله وجهه .

صوک کلامی ( توفقی مسلماً والحقنی بالصالحین ) ایدی . مال منیفی ( یارب ! مسلم اولدیغم حالده روحی قبض ایت و بنی صالحلره الحاق ایلہ ) دیمکدر .

جنازه سی ، رسول اکرم صلی الله علیه وسلم حضرتلرینک سریری اوزره رنده کوتورولدی . نمازینی حضرت عمر ، قبر ایلہ منبر آره سنده قیلدی . فخر عالم صلی الله علیه وسلم حضرتلرینک یاننده دفن اولندی . باشی ، آنک کتفین شریفینی حذاسنه قوندی . غارده رفیق اولدینی کبی قبرده دخی آکا مجاور اولدی و قبرینه عبدالرحمن ایلہ عمر و عثمان و طلحه رضی الله عنهم حضراتی ایندی .

حضرت ابی بکرک زمان جاهلیتده تزوج ایتدیکی ( قتیلہ بنت عبدالعزی ) نام خاتوندن ( عبدالله ) نام اوغلی و ( ذات النطاقین ) دنیلان ( اسما ) نام قیزی وینه زمان جاهلیتده تزوج ایلدیکی ( أم رومان ) دن ( عبدالرحمن ) اوغلی و ام المؤمنین ( عایشه صدیقہ ) و زمان اسلامده تزوج ایلدیکی ( اسما ) نام خاتوندن ( محمد ) نام اوغلی تولد ایتمشدر . یینه زمان اسلامده تزوج

ایلدیکی (حبیبہ بنت حارثہ بن زید الانصاریہ) کندوسنک وفاتندہ حامل قالوب بعدہ (ام کلثوم) ی طوغورمشدر .

عبدالله ، پدرینک اوائل خلافتندہ فوت اولدی . اولادی قالمادی . (اسما) عشرہ مبشرہدن زبیر بن العوامہ تزویج اولنوب (عبدالله بن زبیر) ی طوغورمش و یک چوق وقت معمرہ اولمش ، حتی عبداللہدن صکرہ یه قالمشدر . (عبدالرحمن) دخی پدرندن صکرہ خلی زمان معمر اولمش واولاد واعقابی قالمشدر .

(محمد) مدینہ طوغمشدر . زہاد صحابہدن معدوددر . حضرت عایشہ ، مؤخرآ ام کلثومی ، عشرہ مبشرہدن طلحہ یه نکاح ایتمشدر .

پدری (ابو قحافہ) ایسہ پیرفانی اولدینی خالدہ مکہ مکرمہ ده ایدی . اوغلنک وفاتی خبری مکہ مکرمہ یه واصل اولدقده اہالی بربرینہ کیرمش . ابو قحافہ «بو قارغاشالق نہدر؟» دیو صورمش «اوغلک وفات ایلدی» دیدکلرنده «بر بیوک مصیبت» دیدکدنصکرہ «یرینہ کیم کچدی؟» دیو صورمش «عمر» دیدکلرنده «یار وھمدیدر» دیوب سکوتہ وارمش .

آلی آی صکرہ ، یعنی اون درت سنہ ہجریہ سی محرمنده ابو قحافہ دخی طقسان یدی یاشندہ اولدینی خالدہ وفات ایتمشدر . رضی اللہ عنہ .

حضرت صدیقک وفاتی کونی (ارقم بن ابی الارقم) رضی اللہ عنہ حضرت تتری دخی عازم دار بقا اولدی . سابقین اولندن اولوب رسول اکرم حضرت تتری ، اوائل بعثتندہ آنک خانہ سنده اختفا بیورمش و حضرت عمر الفاروق دخی او خانہ ده اسلام ایلہ مشرف اولمش ایدی .

حضرت صدیق ، خلیفہ اولدقده امور مالیہ سنی امین امت اولان ابو عبیدہ حضرت تتری درعہ ده ایتمشدر .

قاضیسی عمر الفاروق اولوب بر سنہ ظرفندہ ایکی کشینک مرافعہ یه کلدیکی مرویدر .

کاتبی علی ابن ابی طالب حضرت تتری ایدی . زید بن ثابت و عثمان بن عفان و دیگر بعض ذوات کرام دخی ایجابنہ کورہ یازولرینی یازاردی .

رضی الله عنهم اجمعین . حضرت صدیق فضاہی پک چوقدر . لیکن ترجہ  
حالی یوقارولرده کچدی . تکراره حاجت یوقدر .

رسول اکرمک برنجی خلیفه سیدر و جمله اصحاب کرامک افضلیدر .  
فضل وعفت وتقواجه و اخلاق حمیده جه جمله سنه فائق ایدی .

بیت المالدن تقدیر اولنان نفقه ایله اورته حالده بولنان بر مهاجر قرشی  
کبی کچینوردی . وفاتنده اصلاً نقد موجودی بولنمادی .

اموال امیریهدن یاننده برکوله ایله برده وه و ارایدی و کندوسنه بیت المالدن  
برده قفتان ویریلشدی .

حال احتضاره کلدکده کریمه سی ام المؤمنین عایشه رضی الله عنها حضر تلیخی  
چاغرمش و « بز ، خلیفه اولالیدنبرو مسلمینک درهم و دینارینی یمدک . قابا  
وبیانی طعاملرینی یمدک و قاتی روبرینی کیدک . بو کوله وده وه و قفتان ،  
بیت المالکدر . بز ، مصالح مسلمین ایله مشغول ایکن آنلر ایله انتفاع  
ایدردک . وفاتنده اوچنی ده عمره کوندهر » دیو بیورمش .

وفات ایتدیکی کبی حضرت عایشه ، آنلری کوندهر مکله حضرت عمر  
الفاروق ، عبدالرحمن بن عوف ایله اوطورورایکن اوچی برابر کتیریلدکده  
حضرت عمر « یا ابابکر ! کندیکن صکره کلنلری زحمته صوقدک ، موقع  
مشکله قودک » دهرک آغلا یوب کوزلرینک یاشی یره دوکیلور ایکن « آلاک  
بونلری بیت الماله تسلیم ایدک » دیدکده عبدالرحمن بن عوف « سبحان الله ؛  
ابوبکرک عیالنی مصادره می ایده جکسین ؟ بر کوله و بر ده وه ایله بش درهملک  
بر اسکی قفتانک نه ده کری وار ؟ امر ایتسه کده آنلری کیرو چویرسونلر ،  
دیسمی اوزرینه حضرت عمر « او ، بنم زمانده اولاماز . ابوبکر ، آنلرک ردینی  
امرا یتمش . بن ، آکا اتباع ایدرم . آنک ایزینه باصوب کیدرم . دیدی . فی الواقع  
هر حال وکارده حضرت صدیقک طوراً و مشوارینه توفیق حرکت ایلشدر .  
بعض ذوات ، آنک حدت و شدتنه نظراً اول امرده خلافتدن اورکمش

ایسه ده تام عدالت و حقانیت یولنی التزام و حضرت علی بی کندوسنه قاضی  
اتخاذ ایتمش و هر کس آنک معامله عادلانه سندن خوشنود و راضی قالمشدر .

حضرت صدّیقه بین الناس ( خلیفه رسول الله ) دینلیدی کبی حضرت فاروقه دخی بعضاً ( خلیفه رسول الله ) وبعضاً ( خلیفه خلیفه رسول الله ) دینلوردی . صکره ( امیر المؤمنین ) عنوانیه خطاب ایدیلکه باشلادی .

حضرت صدّیق ، بین الاطحاب ظهوره کلن اختلافلی دفع وارتداد غائله سنی رفع ایله قوه اسلامییه بر مرکز جمع و حیره ایالتی دولت ایرانیه یدندن تزع ایتدکدنصکره فتوحات شامیه نک اسبابی حاضر لامشیدی . حضرت عمر الفاروق ، بو سرمایه اقتداری حسن استعمال ایله بروجه آتی فتوحات عظیمیه مظهر اولمشدر .

خلیفه اولدینی کبی ( ابو عبیده بن الجراح ) حضرت لرینی شام سرعسکری نصب ایتمشیدی . چونکه : خالد بن الولید مثلی برلنماز بر سرعسکر ایسه ده بالاده ذکر اولندی اوزره ( مالک بن نویره ) حادثه سی کبی بعض خصوصاتدن طولایی حضرت عمر ، آندن دلکیر ایدی . بناء علیه ابو عبیده یی ، امیر الامرا تعیین ایدوب خالد ، دخی آنک معیتده قالمشدر . مع مافیه ابو عبیده نک یاننده بولنق حضرت خالد کوچ کلز ایدی . زیرا : ابو عبیده ، عشره مبشره دن وخلافت شایان اولان کبار اصحاب کرامدن ایدی . رضی الله عنهم اجمعین .

بروجه بالا حضرت صدّیق وصیتی موجب نبجه حضرت عمر ، بیعت عامه کونی ایلك خطبه سنده ناسی عراق غزاسنه دعوت ایتدی ویدی که : « حجاز ، سزه مقر اولاجق بر اولمایوب آنجق اتلاق آرایه جق بریور تدر . حجازی اهل حجاز ، آنجق بو وجهله الده طوتاییلور ( یعنی حجازک محافظه سی ایچون سفر لر ایدرک کندولرینه مرعی آرامالری لازم کلور ) . اللهم وعدنی انجاز ایده جکی زمانلردر . مهاجرین زرده ؛ اللهم سزه موروث ایتک اوزره وعد ایلدی یرلره یورویگز . الله تعالی ، قرآن کریمده دین اسلامی سائر دینلر اوزرینه غالب قیله جغنی وعد ایتکله دینی اظهار و دینه یاردیم ایدنلری برخوردار ایده جکدر . اللهم صالح قوللری زرده ؛ « دیننبجه ابتدا ( ابو عبیده بن مسعود الثقفی ) وبعده ( سعد بن عبیده الانصاری ) وبعده اهل بدردن ( سلیط بن قیس ) آریلوب سائرندن اول دعوته اجابت ایلدیلر .

او صرمده (مثنی) دخی قیام ایله « ای ناس ! بو ایشی اوقدر اعظام ایتمگیز. بز، اهل فارس ایله جنک ایتدک ، ظفریاب اولدق ، آنلرک معمور یرلرینی آلدق . ان شاء الله بوندن صکرده میدان بزمدر » دیدی .

بونک اوزرینه پک چوق ذاتلر ، عراق سفیرینه نامزد اولدیلر . امیر المؤمنین ، (ابوعبید ثقفی) بی خالد بن الولیدک یرینه عراق سرعسکری نصب و تعیین بیوردی .

سعد انصاری ایله سلیطی ، برر فرقه ایله آنک معیتته ویردی و (ابوعبید) « اصحاب رسول اللهک نصیحتنی دیکله و آنلری امورده تشریک ایله » دیو توصیه بیوردی و خلافتک دردنجی کونی آنلری یوله چیقاردی . رضی الله عنهم . او اثناده ایران دولتی ، عراق عربک استردادی ضمننده تدارکات قویه تشبث ایتمشیدی .

ابو عبید ثقفی و سعد انصاری و سلیط ایله مثنی ، مدینه منوره دن چیقوب عراقه عزیمت ایلدکلرنده مثنی ، ایلغار ایدرک آنلردن اول حیره یه کیتدی و عسکر جمعنه اقدام ایتدی . بعده ابو عبید و سعد و سلیط دخی عراقه واردیلر . اتابک ایران اولان (رستم) ایسه ( جابان ) نام سرداری بر اردو ایله فرات (بادقلی) اوزرینه و کسرانک خاله زاده سی اولان (نرسی) نام سرداری (کسکر) طرفنه سوق ایتمش و مثنی اوزرینه بشقه جه فرقه کونده رمش و فرات بوینده اولان قری اهاالیسنی فقیر عام صورتیله کافه اهل اسلام علیه قیام ایتدیرمش ایدی .

مثنی ، بو احوال دن خبردار اولدقده حیره دن چیقوب (خفان) نام موقعه قوندی . ابو عبید ایله رفیق لری دخی اورایه کلوب برلشدیلر . جابانک یاننده کلّیتلو عسکر مجتمع اولمغله همان (نمارق) نام محله کلوب اردوسنی قوردی .

ابو عبید دخی سواری اوزرینه مثنای مأمور ایدرک جابانک اوزرینه یوریدی .

نمارقده بر شدتلی محاربه وقوع بولدی ، ایران اردوسی بوزولدی .



فراریلری ، کسکرده بولنان نرسی اردوسنه ییغلدی . ابوعمید ، آرقه لرندن سکیرتدی و کسکرک آلت طرفنده وقوعبولان محاربه شیدیده نرسی اردوسنی منهزم ایتدی . اتابک سلطنت اولان رستم ، جابانک بوزولدیغنی خبر آلدقده نرسی به امداد ایچون ( جالینوس ) نام سرداری کوندرمش ایدی . لکن آنک وصولندن اقدم نرسی ، بوزولدیغنی کبی ( ابوعمیده ) طرفدن سوق اولنان ( مثنی ) و ( عاصم ) اعیان قصبات و قری معرفتلیله طویلانوبده ( جالینوس ) ک ورودینه منتظر اولان نفیر عام جمعیتلرینی اوروب طاغیتدیلر و سواد عراقک جزیه سنی تحصیل ایتدیلر .

ابوعمید ، بو صرهدده جالینوسک ( باروسما ) به ورودینی خبر آلدیغنی کبی درحال اوزرینه واردی . آنی دخی اوردی ، بوزدی ، پریشان ایتدی و بعده غانماً و سالماً حیره به کلدی .

### کوپری وقعه سی

جالینوس ، بروجه بالا مغلوباً مداینه عودت ایله کیفیت دولتته بیان ایتدکده رستم ، ایشه زیاده اهمیت و یروب ( بهمن حادویه ) نام سرداری سرعسکر نصب ایتدیردی و کسرایه مخصوص اولان مشهور ( درفش کاویانی ) نام سنجاغی چیقاردی و بهمنه تسلیم ایدرک بر بویوک اردو ایله آنی حیره جانبته کوندرده دی . ( درفش کاویانی ) قاپلان ده ریسندن مصنوع و انواع جواهر ایله مرصع و مطلسم اوله رق عرضی سکز و طولی اون ایکی آرشون بر سنجاق اولوب اک بویوک محاربه لرده قوللانیلور و ایرانیلر عنندنه آنکله تبرک اولنوردی .

بهمن حادویه ، آنی آلوب مدایندن حرکت ایله فرات کنارینه واردی و ( ناطف ) نام محله اردوسنی قوردی .

ابوعمید ، دخی کلوب آنک قارشوسنده قوندی و ایکی طرفدن فرات اوزرینه کوپریلر قورولدی .



بهن حادويه ، ابو عبيدي مخير قلوب ايستر ايسهك كچ ، ايستر ايسهك  
بن كچيم ، ديو خبر كوندردى .

حضرت سليط ايله ديكر امرا ، ابو عبيدي قارشويه كچمكدن منع  
ايتديلر ايسده او ، ديكلمه ميوب اشبو اون اوچ سنه هجريه سى شعبانده  
قارشو طرفه كچدى و حربه كيريشدى .

حال بوكه : ايران اردوسنده بر چوق فيلر اولوب اوزرلرنده دخى  
چوق جنكجیلر وار ايدى و بك چوق زيلر چالينور ايدى . عرب آتلى ،  
آنلردن اوركوب كيروله ديلر . ايرانيلىر ايسه فيلر ايله هجوم ايدهرك  
او قلى ياغمور كچي ياغدير ديلر .

ابوعبيد ، درحال عسكرى آنلردن اينديروب ياي و دال قليچ اولارق  
فيلرك اوزرينه هجوم ايتيردى .

كندوسى بر فيلك قولاتنى و محفهنك باغلىنى كسوب اوزرنده كى  
جنكجیلرى يره دوشوردى و جهله سنى اولدوردى . عساكر اسلاميه ،  
آنى كورونجه جسارتلنديلر و هپ بو وجهله فيلرك اوزرنده كى محفهلرى  
يره دوشوروب جنكجیلرى تلف ايتديلر .

بو صرمده ابو عبيد ، بر بياض فيله قارشو كمدى و قليچ ايله خرطومنى  
چالدى . فيل دخى آنى اوڭ آياغيله چارپوب آلتنه آلدى و شهيد ايلدى .  
امراى بنى ثقيفدن آنك يرينه كچلر ، فيلى تلف ايتديلر . لكن آنلرده  
برر برر شهيد اولديلر .

ابوعبيد ، كندوسندن صوكره امراى بنى ثقيفدن يدى كشى بنى كندوسنه  
خلف اولمق اوزره صرمه سيله تعداد ايليوب آنلردن صوكره (مثنى) يه اطاعت  
اولمىنى وصيت ايتشيدى . يديسى ده مقام امارته كچوب شهيد اولقدن  
صوكره مثنى ، مقام امارته كچدى . لكن عساكر كاكثرى ، آنك ياننده  
ثبات ايليوب طاغيديلر و سگيردوب كوپريدن عبور ايدر اولديلر .

عبدالله بن مرثد الثقفى ، كوپرى بنى كسوب « اى ناس ! يا اميرلر كز كچي  
سزده اوليكز ، ياخود مظفر اوليكز » ديدى .

ایرانیلر ایسه کوپری باشنه هجوم ایتمکله بوزغون عسکر ، بربری  
چیکنه یه رک نیچه لری فراته دوکولوب بوغولدیلر .

مثنی ، کندیسنه مطیع اولان سواری ایله آنلری آرقالرندن محافظه یه  
قیام ایتدی و « بن ، آرقا کزده یم . طوریکز ، قورقمایکز ، کندی کندیکزی  
تلف ایتمیکز . صوکره هپ هیئتک زله کچرسکز » دیدی .

( ابوزید الطائی ) لمصلحه حیره کلوب ( مثنی ) ایله برابر بورایه کلشیدی .  
نصرانی اولدینی حالد حمت قومیه سی حسیله مشانک یاننده دایانوب پک  
کوزل جنک ایتکده ایدی .

بو صرده مثنی ، اولجه صوی کچمش اولانلره ندا ایده رک کوپری یی  
باغلانندی و عسکرک آرقه سنی محافظه ایده رک کوپریدن کچیدی واک صوکره  
کندوسی دخی یاره لی اولدینی حالد کچدی .

اشبو کوپری باشی محاربه سنده پک چوق مشهور ذاتلر شهید اولمشدر .  
از جمله ، اصحاب احدثن ( عقبه ) و ( عبدالله ) ایله برادرلری و دیگر  
اصحاب کرامدن ( قیس بن سکن ) و ( ابوزید الانصاری ) و ( ابو عید ) ک  
برادر ( حکم بن مسعود الثقفی ) و برادر زاده سی ( جَبْرِ بن الحکم )  
شهید اولمشدر . رضی الله عنهم

کوپری باشنده اک صوکره شهید اولان ( سلیط بن قیس ) رضی الله عنه  
حضرتلری اولوب اونک معیتله مدینه منوره دن کلش اولان عسکر طایفه رق  
مدینه یه عودت ایلشدر .

بوکره میدان محاربه ده دوشوب شهید اولان ونهرده بوغولان عسا کر  
اسلامیه نک مقداری درت بیک و فراریلرک مقداری ایکی بیک و ( مثنی ) ایله  
برابر ثبات ایدنلر اوچ بیک قدر ایدی .

ایرانیلرک دخی درت بیک قدر تلفاتی وار ایدی . لکن میدان محاربه ،  
آنلرده قالدی .

بهمن ، فراتی کجوب ده اهل اسلامی تعقیب ایتک صدندده ایکن  
مداننده بر اختلال ظهور ایده رک اهالی ، ایکی فرقه اولوب بری ( رستم )

ديکری (فيروزان) ايله برابر بولونقلری خبری وارد اولونجه ، حرب ایشندن فراغت ايله مداینه عودت ایلشدر .

صاغ وصول قول قوماندانلری اولان ( جابان ) و ( مردانشاه ) آنک نه ایچون عودت ایلدیکندن بی خبر اولدقلری جهته آنک اثرینه دوشمشلر .  
مثنی ، آنلرک حرکتندن خبردار اولدینی کی قعقاعک برادری (عاصم بن عمرو) ی یرینه قائممقام براقوب کندیزی بر مقدار جرد آتلو ايله آرقه لرینه دوشدی و آنلره ایرشدی ایکیسنی دخی طوتوب اسیر ایتدی .  
لیس قریه سی اهالیسی دخی آنلرک آدملرینی طوتوب مثنایه تسلیم ايله جزیه گذار اولدیلر . بو وجهله مثنی ، مظفرآ و غانمآ اردوگاهنه عودت ایلدی .

### احوال مثنی

حضرت عمر رضی الله عنه ، کوپری وقعه سنی ایشیتدکده پک زیاده متأثر اوله رق مثنایه امداد ایچون اهل اسلامی غزایه دعوت ایلدی .  
عراق جانبنده کی امرانک همان ( مثنی ) معیتنه وارمالری ایچون امرنامه لر یازیلدی . ( عصمت بن عبدالله الضبی ) ی کندوسنه تابع اولان خلق ايله برابر ( مثنی ) معیتنه کونده ردی . ( جریر بجلی ) رضی الله عنہی کندی قومی اولان ( بجیله ) قبیله سنه امیر نصب ایتدی . اودخی اطرافده متفرق اولان قومی طوپلایوب ( حیره ) جانبنه کیتدی . ( مثنی ) دخی جوارنده کی قبایل و عشایر عربی جهاده دعوت ایلدکده باشنه کلّی عسکر طوپلانندی . حتی ( بنی نمر ) قبیله سی نصارا اولدقلری حالده « بز قومزله برابر جنک ایده رز » دیوب ( انس بن هلال ) ک تحت ریاستده اوله رق بر جمعیت عظیمه ايله ( مثنی ) معیتنه کلدیلر .

الحاصل عجمه قارشو عرب و مشرکینه قارشو اهل کتاب ، بالاتفاق مثنی حرب اولدیلر .

دولت ایرانیه ، بو کیفیتدن خبر آلدقده (مهران همدانی) نام سرداری بر اردو ایله (حیره) جانبنه کونده ردی .

مثنی (قادسیه) ایله (خقان) آرسنده ایکن مهرانک حرکتی ایشیتدکده فرات کنارنده وکوفه جوارنده (عذیب) نام موقعه کلوب (جریر) و (عصمت) دخی بورایه ورود ایله برلشدیلر .  
مهران ، آنلرک قارشوسنه کلدی و فراتی کچوب جنکه کیریشدی وهان هجوم ایله عساکر اسلامیة نك ایچنه قاریشدی .

بوصرمده مثانک برادری (مسعود بن حارثه) شهید اولدی . مثنی ایسه ایران اردوسنک قلبنه بر شدتلی هجوم ایدهرک مهرانی یرندن اویناتدی .  
بوصرمده جناح لر دخی بربری اوزرینه هجوم ایتدی .

غایت قاتلی بر محاربه وقوع بولدی . نتیجه سنده ایران عسکری بوزولدی . کوپر یلرندن کچمک اوزره سگیرتدیلر . لکن مثنی ، آنلردن اول کوپری باشی طومقله نه یاه جقلرینی شاشیروب آشاغی ، یوقاری حرکت ایدر اولدیلر . عساکر اسلامیة ، آرقه لرینه دوشهرک آقشامه قدریتشدکلرینی اوروب قیردیلر .

بقیه السیوفی ، تعقیب ایچون مثنی طرفندن سوق اولان فرقه (ساباط) بلده سنه واردی ، اوردی . اهالیسنی اسیر و دجله سواحلنه قدر اولان بلادی تسخیر ایدهرک پک چوق اموال غنائم آلدی .

بعده مثنی (بشر بن خصاصیه) یی حیره ده قائممقام براقوب کندوسی (لیس) و (انبار) طرفلرینه عزیمت ایلدی و (خنافس) پنایرینک یوم اجتماعنده بقتة خنافسی باصدی وکلّی غنائم ایله انباره عودت ایلدی .  
انبارده تدارک ایلدیکی قلاغوزلر ایله کیجه لین حرکت ایدرک (سوق بغداد) یاننده صباحلادی و بغداد پنایرینی اوروب یغما ایلدی و پک چوق آلتون و کومش و اشیای نفیسه آله رق عودت ایله غنائم و سالماً ینه انباره کلدی .

بعده (مضارب عجلی) یی (رکان) اوزرینه کونده روب بنی تغلبدن بر عشرتی اوردوردی .

صوکره ( فرات بن حیّان تغلبی ) و ( عُبَّه بن نَهْش ) ایله برلکده  
( صَفِین ) ه کلدی واوراده بولنان عشیرتله، فرار ایلش اولدقلری جهته  
اورادن فراتی عبور ایله الجزیره یاقه سنده بنی تغلبدن برعشیرتی اوردی ،  
ماللرینی اغتنام ایتدی .

بعده ، بو جهته بولنان عشیرتله دجله سواحلهنده طویلاندقلرینی  
ایشیتمکه ایلرییه حرکت ایلدی و ( تکریت ) ده او جمعیه اولاشدی .  
آنلری دخی اوردی و پک چوق مال غنیمت آلهرق انباره عودت  
ایلدی .

( عبّه ) ایله ( فرات ) دخی عودتلهنده نهر فراتی عبور ایله صَفِین  
طرفنده تصادف ایلدکلری بعض عشائری اوردیلر .  
بو جهته اهل اسلامدن جمله قبایل و عشایر اورکر اولدی و فرات ایله  
دجله مابینی اهل اسلامک نفوذی آلتنده قالدی .

### سعد بن ابی وقاصک امارتی

اتابک ایران اولان ( رستم ) ایله ( فیروزان ) نام سردارلر بروقتدنبرو  
نفوذ یاریشی ایتمکه اولدقلری حالده عساکر اسلامیه ، بروجه بالا عراق  
عربی استیلا ایتمکه عظمای ایران ، بالاتفاق رستم و فیروزانه واروب  
« سزک اختلافکنز ، دولتک اضمحلالنه بادی اولاجق . یا اتفاق اوزره  
حرکت ایدیکز ، یاخود بز عموماً سزک علیکزه قیام ایلرز » دیمشله .  
آنلر دخی جمله ایله برلکده کسری ( یزدجرد ) ک امری آلتنده بالاتفاق  
حرکتی تعهد ایتمشله .

بناء علیه ( یزدجرد ) ک فرمانی موجبجه مدائننده عساکر کلیه  
طویلانش و ( ابله ) و ( حیره ) و ( انبار ) طرفلرینه ینه باشقه باشقه اردولر  
سوق اولمشدر .

مثنی ، کیفیتی مدینه منورهیه یازوب جوابه منتظر ایکن سواد عراق

اهالیسی ، عصیان ایتدیکندن عسکرینی جمع ایله ( ذی قار ) نام موقعه چکیلدی .

امیرالمؤمنین حضرتلری ایسه ، هر طرفه تحریرات کونده روب بالمله مشایخ ورؤسای و اصحاب رأی و شجاعتی عراق سفرینه دعوت ایلدی .  
مثابه دنخی اهل اسلامک عجملر آره سندن چیقوب ده آنلره قارشو صولرک بوینه یاییلمالرینی و ( ربیعہ ) و ( مضر ) قبیله لرینک بالمله اصحاب حرب و ضربنک خواه ناخواه سفره سوق اولمالرینی یازدی .

بناءً علیه مثنی ، اهل اسلامی ( حله ) دن ( ابله ) یه دک عجملرله قارشولقلی اوله رق قوندوردی و دائره حکومتی داخلنسه اولانلرک کافه سنی سفره دعوت ایلدی .

او اثناده حج موسمی حلول ایتمکه امیرالمؤمنین عمر رضی الله عنه حضرتلری ، مکه مکرمه یه کتیدی و بعدالحج مدینه منوره یه عودت ایتدی .  
طرف به طرف تجمع ایدن عسا کر اسلامیة دن عراقه قریب اولانلر ، طوغری مثانک یانسه کیتمکه و بعید اولانلر مدینه منوره یه کلکده ایدی . بوضورتله مدینه منوره ده خلیجه عسکر تجمع ایتدکده خلیفه حضرتلری ، علی بن ابی طالبی مدینه منوره ده یرینه قائم مقام براقوب و بالذات عنزم سفر ایتمک اوزره خارج مدینه یه چیقوب ( حراز ) نام موقعه اوردو قوردی و حضرت ( طلحه ) یی مقدمه الجیشه و ( عبدالرحمن بن عوف ) ایله ( زبیر بن العوام ) حضرتلرینی برر جناحه مأمور بویوردی . رضی الله عنهم اجمعین .

لکن ( علی ) و ( طلحه ) و ( زبیر ) و ( عبدالرحمن بن عوف ) حضراتی ، آنک مقامنده استقرار ایله کبار اصحاب کرامدن برینک سر عسکر لکله کونده ریلسنی تنسیب ایدوب اودنخی آنلرک رأینی صواب کوردی ولدی الاستشاره تحصیل اموال مأموریتیه هوازنده بولنان ( سعد بن ابی وقاص ) رضی الله عنه حضرتلری ، سر عسکر لکله تنسیب اولمغله حضرت عمر ، درحال آنی جلب و احضار ایله عراق سر عسکر لکنه تعیین بویوردی و کندوسنه دیدی که : « یاسعد ! سکا رسول اللهک داییمی و صحابیسی دیدکالرینه مغرور



اولما . الله تعالى ، سیئات ایله سیئاتی محو ایتمز ، آنجق حسنات ایله سیئاتی محو ایدر . الله ایله قول آره سنده طاعتدن باشقه نسبت یوقدر . الله ، آنلرک ربّی و آنلر ، آنک قوللریدر . فقط عاقبت و خاتم اعتباریله بربرندن افضل اولور و طاعت ایله عندالله اجر و مکافات بولورلر . باق ، رسول الله نه یاپاردیسه سن ده اوله یاپ و صبری التزام ایت .

خليفة حضرتلری ، بو وجهله سر عسکرینه نصیحت ایلدکدن صوکره معیتته درت بیک عسکر ویردی که ایچارنده ( حمیصه بن نعمان ) و ( عمرو بن معدی کرب ) کبی مشاهیر شهعاندن امرا اولوب هربری ، بر عشیرتک رئیس ایدی .

سعد حضرتلری ، بو درت بیک عسکرله مدینه دن چیقدی . بعده آرقه سندن ایکی بیک یعنی وایکی بیک نجدلی عسکر دها کونده ریلدی . مثانک سکز بیک عسکری اولوب ( بنی اسد ) قبیله سی دخی اوچ بیک عسکرله آنک جوارینه وارمشیدی .

### وقایع

سعد بن ابی وقاص رضی الله عنه حضرتلری ( سپراف ) ه واردقه یاننه خیلی عسکر طوپلاندی . اردوسی ایچه کسب قوت ایلدی . فقط او ائنده مثانک یارمی آچیلوب متأزراً وفات ایتمش ویرینی بوش قویوب کیتمش ایدی . اوله مثل نادر بر بهادرک بویه حرب اوزرنده وفاتی بویوک ضایعاتدن ایدی .

دولت ایرانیه ، او ائنده ( منازره ) دن ( قابوس بن منذر ) ی آبا واجدادینک منصبی اولان ( حیره ) حکمدارلغنه تعیین ایله او حوالیده بولنان عربلرک جلب و تألیفنه مأمور ایدوب او دخی ( قادسیه ) نام موقعه ورود ایله عربانی جلب و تألیفنه چالیشمقده ایکن مرحوم مثانک برادری ( مهّنی ) آنی باصوب کندوسنی و آدم لرینی اعدام ایتمشدر . ایشته ( منازره ) نک خاتمهی بودر . بو خاندان ، آنکله یتمشدر .

مؤخرأ اهل اسلام طرفدن كوفه شهرى بناوالنمغله مناذره نك نيجه يوزييللر،  
مقرّ حكومتلى اولان ( حيره ) شهرى دخى خراب اوله رق مناذره نك  
هله آثارى محو اولوب كيتمشدرد .

مهني ، او وجهله ( قابوس ) ي اعدام ايتدكدن صكره ( ذوقار ) ه  
كلوب مثنانك زوجه سي ( سلمى ) ي آلهرق سيرا فله كلدى ومثنانك وصيتنى  
عرض ايتدى .

شويله كه : مثنى ، حياتندن مايوس اولدقده حضرت سعده عرض اولنق  
اوزره بو وجهله وصيت ايلش كه : « بلاد فارسه كيرمه يگز . اهل فارس ايله  
سرحد اوزرنده حرب ايديكز . الله تعالى ، مساميني مظفر ايدرسه اوته سي  
آنلركدر والا دونوب آرقه كزده كي گروهه استناد ايلرسكز و آنلرك يولنى  
دها اعلى اوكره نمش اولورسكز ودها زياده جسارت آلورسكز . تا كه جناب  
حق ، آنلرى مغلوب ايدنجه يه قدر بويله حركت ايديكز ، ديمش ايدى .  
مهني ، برادرينك بو وصيتنى تقرير ايتدكه كرك سعد و كرك ياننده .  
بولنان رفقاسى متأثر اوله رق مثنايه بك زياده آجيديلر .

سعد حضرتلى ، مثنانك عالمه سنده باقيلمق اوزره توصيه وتنيه  
بو يوردى و برادري مهني آنك يرينه كچيردى و ( سلمى ) ي تزوج ايله  
آكا تسليت و يردى .

اواننده امير المؤمنين طرفدن وارد اولان تعليمات دخى مثنانك وصاياسنه  
توافق ايتمشدر .

سعد بن ابى وقاص اردوسنك

قادسيه يه حركتى

سعد بن ابى وقاص رضى الله عنه حضرتلى ، سيرا فنده ايكن مقدمه الجيشه  
وصاغ وصول جناحاره وساقيه اصحاب كرامدن ومشهور و مجرب ذواتدن  
اميرلر نصب ايتدى وهر اون كيشي يه ( عريف ) ناميله برر باش ديكدى .

بوراده وجوه واشراف عربدن يك چوق ذاتلر وار ایدی وبيك قدر اصحاب كرام اولوب طقسان طقوزی اهل بدردن ایدی ویدی یوز صحابی زاده وار ایدی .

سلمان الفارسی رضی الله عنه حضرتلری، کشف و تفتیش احواله مأمور اولوب دائمًا اردویی طولاشور و عسکری جنکه تشویق ایلر ایدی و امیر المؤمنین طرفندن ( عبد الرحمن بن ربيعة الباهلی ) رضی الله عنه حضرتلری ، اوردو قاضیسی نصب اولمشیدی .  
دهات عربدن مشهور ( زیاد بن ابیه ) دخی اردونك امور تحریریه سنه مأمور ایدی .

عسکرك مقدارى اوتوز درت بیک نفردن عبارت ایدی . فقط اوردو مکمل و منتظم ایدی .

برده مقبدا ( خالد بن الولید ) ایله شامه کیتمش اولان اون بیک قدر عراق عسکرینك اعاده سی امر اولنش ایدو کندن آنلرك ورودنده اردونك موجودی قرق بو قدر بیک نفره بالغ اوله جق ایدی .

سعد حضرتلری ، سیرافدن قالقوب قادسیه یه واردی و فراتك بر قولى اولان ( عتیق ) نهری ایله قادسیه خندق آره سنده کی کوپری قارشوسنده اردوسنی قوردی و ایرانیلرك ورودینه منتظر اولوب طوردی .

اووقت شام سر عسکری ( ابو عیبه ) حضرتلری ، دخی دمشق شامك فتحنه چالیشیوردی . رضی الله عنهما .

### فذلکه

جزء رابعده بیان اولدینی اوزره عمر بن الخطاب رضی عنه الوهاب حضرتلری ، خلیفه اولدقهده ایکی بویوک دولت ایله ، یعنی روم و ایران دولترلیه محاربه وار ایدی .

یرموک وقعه سنده روملر ، خسارات عظیمه یه اوغرایوب قسطنطنیه ایمپراطوری ( هرقل ) ك قولى قانادی قیریلش ایدی .

لکن اصحاب کرامدن و مشاهیر اسلامدن دخی نیجه ذاتلر شهید اولمش  
بناءً علی ذلك شام سرعسکری اولان ( ابو عییده بن الجراح ) رضی الله  
عنه حضرتلری ، دمشق شامی فتح ایلک اوزره اوردوسنه تقویت و یرمک  
ایله مشغول بولمش ایدی .

عراق سرعسکری ( سعد بن ابی وقاص ) رضی الله عنه حضرتلری  
دخی قادسیه ده اقامت ایله ایرانیلری کندی اوزرینه چکمک و کرکی کبی  
مغلوب ایتدکدن صکره ایلری تجاوز ایتمک ایسترایدی . ایکسی دخی  
عشره مبشره دن اولوب بربریه یاریش ایدرجه سنه فتوحاته مظهر  
اولملردر .

شمدی بو فتوحاتک تفصیلنی بیان ایله لم و ابتدا وقایع شامیه دن  
باشلا یالم .

### فتح دمشق

یرموک ، وقعه سندن صکره ایمپراطور هرقل ، حمصده استقرار ایله  
کرمک حمصک و کرک دمشق شامک محافظه لرینه اعتنا ایتمکده ایدی .

اشبو اون درت سنه هجریه سی اوائلنده ( ابو عییده ) رضی الله عنه  
حضرتلری ، سائر امرا ایله برلکده دمشق اوزرینه یورویوب ( غوطه شام )  
قریه و کلیسالرینی فتح ایلدی و روملر ، شهر دمشق قبولرینی قاپایوب تحصن  
ایتمکله عساکر اسلامیه ، دمشق هر طرفدن محاصره ایتدی .

شویله که : ابو عییده ( باب الجابییه ) ده و خالد بن الولید ( باب شرقی ) ده  
و عمرو بن العاص ( باب توما ) ده و شرحیل بن حسنه ( باب الفرادیس ) ده  
و یزید بن ابی سفیان ( باب صغیر ) طرفنده و ابوالدرداء خزرجی دخی ( برزه )  
موقعنده قونمش ایدیلر .

ذوالکلاع ، دخی بر فرقه ایله حص یولنی محافظه مأمور ایدی .  
ایمپراطور ( هرقل ) ایسه حمصک محافظه سی ایچون بر جنرال ایله مقدار

کافی عسکر بر اقوب کندوسی نفس حصدن چیه رق خارجدہ بر موقع طوتمش و دمشق محافظہ سنی ( جنرال ماہان ) ہ حوالہ ایتمش ایدی .

الحاصل ہر قل ، بو ایکی شہرک محافظہ سنہ زیادہ اہمیت ویرمش و دمشق امداد ایچون بر فرقہ کوندہ رمش ایدی . لکن ذوالکلاع ، آنلری بوزدی . دمشق شہری امداددن محروم قالدی و محاصرہ ، بر قاج آی متمد اولہرق اہل دمشق ، پک زیادہ بونالیدی .

خلال ماہ رجبہ جنرالک بر اوغلی دنیاہ کلککلہ محصور اولان عسکرہ بر ضیافت ویریلش اولدیغندن عسکر ، ییوب ایچمکلہ مشغول اولہرق موقعلری بوش قالمشدر .

عساکر اسلامیہ ، آندن بی خبر ایسہدہ خالد بن الولید ، کیجہلری او یوما یوب دشمنک احوالی تجسس ایتکدہ ایدی و ایچلرندن ال پیدا ایتمش ایدی . بوجہتلہ آنلرک ہر حال وحرکتندن خبر آلودی ولدی الاقتضا قوللانمق اوزرہ ایپدن نردبانلر حاضر لامشیدی .

بوکرہ محافظہ محللرینک او وجہلہ بوش قالدیغنی لدی التحقیق ہان کیجہلین عسکرینی حاضر لادی « سز ، سور اوزرنده تکبیر صداسنی ایشتدیکنکیز کبی بزم یا نمزہ چیقک وقبویہ هجوم ایدک » دیو تنبیہ ایلدی . یانہ ( قعقاع بن عمرو ) و ( مزعور بن عدی ) کبی آرسلا نلری آلوب قلعه سورینک یانہ کیتدی و ایپدن نردبانلری قلعه بر جنک اوزرینہ آندی . قعقاع ایلہ مزعور ، یوقارو چیقوب نردبانلرک اوچلرینی ثابت قیلدیلر . خالد دخی یانندہ کی آدملریلہ یوقارو چیقدی و برج اوزرنده محافظلر براغوب تکبیر آلمالرینی تنبیہ ایتدی و کندوسی آشاغی اینوب قبوجیلری اعدام ایلدی وقبوی آچدی . یوقارودہ کیلر ( اللہ اکبر ) دیدکلری کبی عساکر اسلامیہ ، نردبانلرہ وقبویہ هجوم ایدہرک ایچری کیردیلر .

شہر ایچنہ بر غلغلہ دوشدی . اہالی ، نہ اولدیغنی بیلمیوب نہ یاباچقلرینی شاشیردیلر .

بونک اوزرینہ روملر ، ابو عیدہ خرجگذار اولمق اوزرہ عقد مصالحہ

ایده رک آنی عسکریه برابر ایجری آدیله. ابوعبیده (باب جابیه) طرفدن صلحاً و خالد بن الولید (باب توما) دن حرباً کیروب ایلری حرکت ایده رک شهر اورته سنده قاووشدیله. دیگر امرا دخی صلحاً کیرمشلردی. بناءً علی ذلک خالد کیردیکی جهت دخی صلحله آلمش حکمنده طوتولدی و ابوعبیده، خبر فتحی امیر المؤمنینه عرض ایلدی. رضی الله عنهم.

مقدما خالد بن الولید ایله شامه کلش اولان بیک قدر عراق عسکرینک اعاده سی، مقام خلافتدن امر اولمش ایدوکنه و عراق سرعکری سعد بن ابی وقاص رضی الله عنه حضرتلری بواننده قادسیه ده بولنه رق ایرانلر ایله متی، حرب اولدیغنه مبنی حضرت ابوعبیده، عراق عسکرینک و فیات ایله وقوع بولان نقصانلری شام اردوسندن بر مقدار عسکر علاوه سیله تمام لایوب و سعد بن ابی وقاصک برادر زاده سی (هاشم بن عتبه بن ابی وقاص) ی آنلره امیر و مقدمه الجیشه (قعقاع) ی مأمور ایلوب جانب عراقه اعاده ایلدی.

شرحیل بن حسنه (اردن) امیری و عمرو بن عاص ارض (فلسطین) امیری اولغله ضرب ابوعبیده، آنلری ده محل مأموریتلرینه اعزام ایتدی و (یزید بن ابی سفیان) ی دمشق شام محافظه سنده براغوب کندوسی، خالد بن الولید ایله برلکده (حصص) اوزرینه کیتدی.

### احوال اردن

شرحیل بن حسنه رضی الله عنه حضرتلری، (بیشان) ه واروب مقابله چیقانلری پریشان ایدرک بیسانی فتح ایتدی.

اوصرده (ابوالاعور) دخی (طبریا) ی محاصره ایتشیدی. اهالیسی، بیسانک فتح اولندیغنی ایشیتدکاری کبی آنلر دخی صلحله طبریانی تسلیم ایلدیله. سائر اردن بلده لری دخی برر برر صلحله ضبط اولدی.

بو صورتله اردن وادیسی، کاملاً اهل اسلام الله کچمشدر. بری



طرفه شام والیسی اولان یزید بن ابی سفیان ( تدمر ) ه ( دحیه کلبی ) بی  
و ( حوران ) ه ( ابوالاظهر القشیری ) بی مأمور ایدوب بورالرینی تحت  
انضباطه آلدیلر .

یزید بن ابی سفیان ، کندوسی دخی برادری ( معاویه ) بی مقدمه الجیشه  
مأمور ایدرک بر الشام ، یعنی بلاد ساحلیه طرفه کیتمش وبالسحواله ( صیدا )  
و ( جیل ) و ( بیروت ) بلده لرینی فتح ایتمشدر .

ابوعبیده ، حص جهتنده و عمرو بن عاص دخی ارض فلسطینده عظیم  
فتوحاته مظهر اولمشدردر . رضی الله عنهم . تفصیلاتی ، سنه آتیه وقایعی صره سنده  
بیان اولنه جقدر . شمعی غزوات عراقی بیان ایدلم .

### احوال عراق

عراق سرعسکری سمد بن ابی وقاص رضی الله عنه حضرتلری ، بالاده  
بیان اولندی اوزره اشبو اون دردنجی سنه هجریه خلانده ( قادسیه ) نام  
موقعده اردوسنی قوروب ایرانلورک ورودینه منتظر ایدی .  
بو ائنده ( کسکر ) ایله ( انبار ) آراسنه چتله ارسال ایله اطرافی  
غارتدن خالی اولمازدی . بوجهته پک چوق حیوانات اغتنام اولنه کلدیکندن  
اردوده ات وسائر ماکولات مبذول ایدی .

اوصرده مقدمه الجیشه مأمور اولان ( زهره بن عبدالله التیمی )  
طرفندن ( بکر بن عبدالله لیثی ) برچته ایله حیره کونده ریشیدی . مکر حیره  
مرزباننک قرنداشنک یوم زفافی ایش . بکر لیثی ، کلینی اوتوز قدر قاری ویوز  
قدر تبعه لر ی و عربلرجه قیمتی معلوم اولمایان برچوق اشیای نفیسه ایله برابر  
آلوب اردویه کتیرمش وحضرت سعد ، آنلری بین العساکر تقسیم ایتمش ایدی .

### رستمک سرعسکرلکی

عساکر اسلامیه ، منوال مشروح اوزره بر آی قدر اطرافی غارت  
ایدرک قادسیه ده اقامت ایلدی . ایرانیلر طرفندن بر حرکت ظهور ایتدی .

حال بوکه : فرات سواحنده کی کویار خراب و اهالیسی بیتاب اولدیغندن کسرایه عرض شکایت ایلشله و « بزى حایه ایتمز ایسه کز کافهٔ عربیه تابع اولاجغز » دیمشله .

آنک اوزرینه کسری یزدجرد ، اتابک سلطنت اولان رستمه اردو ایله چیقماسنی امر ایتمش ایسه ده رستم ، خارجه چیقدینی حالده آرقه سندن رقیلرینک کندی علیهنده حرکت ایله جکلری ملاحظه سیله پای تختدن آریلق ایستیموب اردو ایله ( جالینوس ) نام سرداری کونده رمک ایسترمش و کندوسی او عصرده ایرانک الک جسور و فن حربده ماهر و مدبر پهلوانی اولدینی حالده کاهن و منجم اولمق حسیله « عربک طالعی مسعوددر . شمدی مجموع قوتمزله چیقوب ده بر بیوک هزیمته اوغرامقدن ایسه متعدد فرقلر ارسال ایله مدافعه ایدیلهرک طالع حربک سعدن نحسه متحول اولدینی زمانه قدر وقت قازانمق اولادر ، دیر ایمش . یزدجرد ایسه شکایات واقعه دن متأثر اولهرق رستمه « یاسن کیتلیسین ، یا بن کیتلیم » دیمش اولدیغندن رستم ، ایستر ایستمز اردو ایله مدایندن چیقوب ( سابط ) . کلشدر .

### سفرای اسلامک مداینه کیدوب کلدکلری

سعد بن ابی وقاص رضی الله عنه حضرتلری ، کیفیتی امیر المؤمنینه عرض ایتمکله وارد اولان جواب عالیه سنده ( اعدای چوغونساما . اللهدن یاردیم ایسته . اللهه متوکل اول . اصحاب رأی وجلادتدن بر قاچ ذاتی سفارته کوندهر . ایرانیلری دینه دعوت ایلسونلر ) دیو بیورولمش اولدیغندن حضرت سعد دخی ( نعمان بن مقرن ) و ( یسر بن ابی رهم ) و ( حملته بن حویته ) و ( خنظله بن الربیع ) و ( فرات بن حیّان ) و ( عدی بن سهیل ) و ( عطارد بن حاجب ) و ( قیس بن زراره ) و ( اشعث بن قیس ) و ( حارس بن حسام ) و ( عاصم بن عمرو ) و ( عمرو بن معدی کرب ) و ( مهنی بن حارثه ) نام ذواتی ایلچیلکله جانب کسرایه کونده ردی .

ایلیچیلر، رستمک اردوسنه اوغرامایوب طوغری مداینه کیتدیلر. برر  
اسکی برنوسه بورومش ایدیلر. اوزرلرنده سلاخلرندن بشقه ده کرلی برشی  
یوق ایدی. لکن آتلی کیشنه یه رک مداینه کیرر ایکن ذاتلرنده مهابت  
وار ایدی.

یزدجرد، وزراسنی جمع ورستمی ساباطدن جلب ایله بعد الاستشاره  
ایلیچیلری حضورینه چیقاردی و ترجمان واسطه سیله «سبب ورودکز  
نهدر؟» دیو صوردی.

نعمان بن مقرن، آرقداش لرینه «ایستر ایسه گز طرفکزدن بن  
سویله یم. ایستر ایسه گز دیکرینی انتخاب ایدیگز، سویلسون» دیدی. آنلر  
دخی «سن سویله» دیمکه سوزه آغاز ایدرک «جناب حق، بزه مرحمة  
بر پیغمبر کونده ردی که بزه خیر ایله امر ایلر و شردن نهی ایلر ایدی  
واجبتر اوزرینه سعادت دنیویه و اخرویه وعد ایتدی. قبیله لرک برر  
فرقه سی، موافقت و دیکرلری مخالفت ایلدی. بعده بزه عربک مخالفلرندن  
باشلامنی امر ایتدی. بزده عربدن باشلادق. کیمی کرها و کیمی طوعاً  
دین اسلامه داخل اولدیلر. کرها اولانلر، صکره ممنون اولدی و طوعاً  
اولانلرک شرف و افتخاری افزون اولدی. نهایت آنک شرعی اوزرینه  
مجمع اولدق و کتوردیکی احکامک فضل و مزیتنی آکلادق. صکره امر  
ایتدی که بزه مخالف اولان امتلردن باشلایوب آنلری ده انصافه دعوت  
ایدلم. بناءً علیه سزی دینمه دعوت ایدیوروز. اسلام، حسنی تحسین  
و قبیحی تقییح ایدر بر دیندر. اکر سز آندن ابا ایدر سه گز جزیه، اهنودر.  
آنی ده قبول ایتمه سه گز شق دیکری، محاربه در. ایمدی بزم دینمه داخل  
اولدیغکز حالد بوراده اللهم کتابی و آنکله حکم ایتک اوزره بعض  
ذواتی براغوب کیدرز واکر جزیه ویره جک اولور سه گز آنی ده قبول  
ایدرز و سزی حمایه ایلرز و الا جنک ایدرز» دیو جواب ویردی.

کسری یزدجرد، دیدی که «یر یوزنده سزدن دها بدبخت وعددجه  
اقل ودها فنا حالد بر امت بیلیم. بز، اوتهدن برو سزک ایشگز

حیره نواحیسی قریه لرینک اها لیسنه حواله ایدردک . آنلر ، بزه کفایت ایلردی . سزده ایرانه قارشو قیامه طمع ایتمز ایدیگنز . اکر سزه نتیجه سی مخاطره لی بر خیال خام کلدیسه آکا آلدانما یگنز . یوق اکر کلیشگنز احتیاجدن ناشی ایسه فقرا گزه ییه جک ووجوه گزه کیه جک ویریرز وسزک اوزرگزه رفق ایله معامله ایده جک بر ملک نصب ایلرز .

بونک اوزرینه ( قیس بن زراره ) سوزه آغاز ایله « ای ملک ! بونلر عربک اشرافیدر . اشراف ، اشرافدن اوتانور . اشراف ، اشرافه تعظیم وتوقیر ایلر . بن سویله یمده آنلر شاهد اولسون . بزم سؤ احوالمر دیدیکگنز کی بلکه دها زیاده ایدی » دیدکدن صکره نعمانک سوزلرینی دیگر طرز اوزره افاده ایلدی و دیر یجه سویلیدی . نهایت « یاجزیه ، یاقیلیج . ایکیسندن برینی اختیار ایت . یاخود مسلمان اولوب جانگی قورتار » دیدی .

یزدجرد تهّور ایدرک « بندن اول ایلچی اولدورمش بر ملک اولایدی بن ، ایکنجیسی اولوب سزی اولدیرردم » دیدکدن صکره برزنیل طوپراق کتورتدی . « بن دهه سزک ایچون بشقه شی یوق . اک بیوکگنز کیم ایسه بونی یوکلنسوند ده رئیسگزه کوتوریگنز وییلگنز که جمله گزی قادسیه خندقنه دفن ایلمک وبلادگزی شاپوردن دها شدتلی صورتده چیکنه مک ایچون رستمی کونده رمک اوزره یم » دیدی .

هان ( عاصم بن عمرو ) قالقدی « آنلرک اشرفی واولوسی بّم » دیهرک زنبلی یوکلندی وچیقوب حیواننه بیددی . زنبیلی صرتنه آلدی ورفیق لریله برابر یوله روان اولدی . عودتنده « یاسعد ! مرده . الله تعالی ، آنلرک طوپراغنی بزه ویردی » دیمشدر .

یزدجرد ، رستمی چاغیروب « بونلرک اک بیوکی اک احقیدر که زنبیلی یوکلنه یویردی » دیدکده رستم « ظن ایدرم که اک بیوکلری دکل واحقده دکلدر . لکن بونکله تفاؤل ایتدی » دیمش و آنک ایران طوپراغنی کوتورمسيله کندوسی تشاؤم ایتمشدر .

(شاپور ذی الاکتاف) نام ایران شاهنک عرباندن چوق آدم تلف ایتدیکی مشهوردر . یزدجرد ، آنکله مباحات ایدوب حال بوکه اووقت ایله بو وقتک چوق فرقی وار ایدی .

ایران دولتنک قوتی ، ضعفه مبدل اولمش واهالیسنک اخلاق بوزولمش ایدی . هنوز تهذیب اخلاق ایدوب قلبلری نور ایمان ایله منور اولان عربلره قارشو طورامایه جقلری درکار ایدی . یزدجرد ، بو مثللو دقایقه واقف اولمادیغندن شاپور وقعه سنی یاد ایله سفرای اسلامی اخافه ایتمک خولیاسنده ایدی . اما رستم ، اولدقجه حقایق احواله واقف اولدیغندن انجام احوالی مطالعه ایله مأیوس ومضطرب ایدی .

### رستمک حیره یه وآنندن قادسیه یه حرکتی

رستم ، احکام نجومه باقوب عربک طالعی مسعود وعجمک طالعی منحوس اولدیغنی استخراج ایتمکله سرعسکرلک مأموریتندن یاقه یی صیرمغه چالیشمش ایسه ده کسری یزدجردک ، اصراری اوزرینه چاره سز قالوب بروجه بالا سفرای اسلامک عودتندن صکره اردوگاهی اولان (ساباط) . کلدکده ینه (یزدجرد)ه عربضه تقدیمله غوینی رجا ایش ایسه ده مساعده اولمادیغندن منفعل ومأیوس اوله رق حرکتی قرار ووروب همان اردوسنی تنظیم وتعییه ایله ساباطدن حرکت ایشدر .

شویله که : قرق بیک نفردن مرکب اولان مقدمه الجیشه جالینوسی مأمور ایدره ک ایلری یه سوق وساقیه یکریمی بیک نفر ترتیب وکندوسی آلتش بیک نفرله حرکت و جناح لرینه (مهران) و (فیروزان) نام سردارلری تعیین واوتوز فیل تهیز ایله اون سکزینی قلبکاهه واون بشنی جناحله تخصیص ایتمشدر . جالینوس ، دخی رستم کی منجم اولوب احکام نجومیه نک عربیه مساعده اولدیغنی استخراج ایش اولدیغندن (ساباط) کوبریسندن کچرکن رستمه ملاقی اولدقده ، سن ، بنم کوردیکمی



کورمیور میسین؟ « دیمش . رستم دخی » اوت . اما بن ، بر یولار ایله  
 یهدیلیورم . انقیاده مجبورم ، دیو جواب ویرمش .  
 رستم ، ساباطدن حرکت ایله قادسیه کیدرکن کندوسنک نزد کمراده  
 بولنان برادری ( بندوان ) ه حسب حال طرزنده یازمش اولدینی مکتوبنده  
 دیمش که « قلعه لرکزی تعمیر ایله یکنز ، اسباب حربیه یی حاضر لایکنز ،  
 جنکه حاضر اولکنز . عرب ، سزک املاک و اولادکزی پایلاشاجق کبی  
 کورونویور . اک زیاده کوجه کیدن شی ، شاهک بکا یا سن کیتملیسین ،  
 یا بن کیتملی یم دیمش اولماسیدر . بنم نیتم ، بر مدت عربله مدافعه ایله  
 سعدلری نحسه متحول اولونجهیه قدر وقت قازانق ایدی . چونکه حوت  
 برجی صوبی بولاندیردی . ( نعیم ) ییلدیزلری ایسه کوزل ( زهره ) ده  
 کوزل و میزان معتدل اولدی . ( مرئخ ) کیتدی . بونجومک احکامنه  
 نظراً او قوم ، بزه غالب کلور و بومالکی آلور . بو دولت باتار . خاندان  
 ساسانیان منقرض اولور . ایرانیلرک احواله کریان اولدم ، ساسانیلر ایچون  
 بریان اولدم . او تاج و تخته یازیق ، اوبختیارلغه یازیق ! بوسوزلری والديه  
 سویله . بنم طرفدن آنکله وداع ایله . بوسرای جهاندن کولککی آل .  
 زیرا وقت دارالدى . بوندن صکره شاه ، بنم یوزومی کورمیه جک . بنم  
 ایچون خلاص یوق . ایران زمین خوش قالسون . چونکه جهان ، شهریاره  
 دار اولاجق . اوغورنده فدای جان ایت . او مشهور خاندانن یالکنز  
 او ، قالدی . بنم عربله ایشم فیصل بولونجهیه قدر سن ، آنی محافظه ایله .  
 جهانده آندن باشقه افندی یوقدر . آندن باشقه ساسانیانک بر یادکاری  
 قالمادی . آندن صکره بو خانماندن کیمسه کورولمز . تخت ، چونکه منبرله  
 برابر اوله . هپ عالم ، ابوبکر و عمر نامیله طوله . بو یوقوشک اوکنده  
 بر اوزون انیش وار . آندن صکره نه تخت کورورسین نه شهریار .  
 بختیارلقدن آنجق عرب حصه دار اولور . بنم کولک پر خون اولدی ،  
 بکزم صاراروب صولدی ، آغزیمک صوبی قوریدی که بنم پهلوانغم زماننده  
 ساسانیلرک بختی منکوس اولدی . اکر سونکوی طاعه ، طاشه اورسه م کچر



واوقلم تیموری دهلر ایکن شمدی چیللق آدملره ایشله میور . قلیجم ، فیلک و آرسالانک بویته دوشسه یره دوشورور ایکن عربلرک ده ریسنی کسمیور . بیلشدن زیان کوردم . کاشکه عقم اولماسه یدی . فنا کونلره آگاه اولماسه یدم . ( قادسیه ) قبرم ؛ زره ، کفنمدر . سن ، بنم دردمله دلگیر اولما . شاه جهاندن آیریلما . سن صاغ اول ، شاهک کوکلی سنکله شاد اولسون . بعده رستم ، آغر رقتار و مأیوسانه اطوار ایله حیره طوغری کیدرکن ایرانیلر ، بر عربی اسیر ایده رک حضورینه کتوردکلرنده رستم ، آندن « بورایه نه یه کلدیکز ، نه ایسته یورسکز ؟ » دیو صورمش . او دخی « اسلامدن ابا ایتدیککز تقدیرده الله تعالی نک بزه وعد ایلدیکی یرلری ایسترز » دیو جواب ویرمش و رستم آکا « اکر ده ا اول قتل اولنور ایسه کز ؟ » ده نیجه « بزدن مقتول اولان جنته کیدر و کیرو قالانلری مزه جناب حق ، وعدینی انجاز ایدر » دیمش . رستم « اویله ایسه الله ، بزی سزک الکزه تسلیم ایتمش دیسه ک نه » دیدکده « سزی بزه تسلیم ایدن ، سوء اعمال کزدر . اطرافکده کوردیکک غلبه لکه آلدانما . سن ، انسان ایله اوغراشمیورسین . قضا و قدره قارشو کیدیورسین » دیمکله رستم ، تهوور ایدرک عربک بویینی اورمش .

او ائنده ایران غسا کری اطرافه یاییله رق غصب اموال وهتک عرض و ناموس کبی چیرکین ایشلره کیریشدکلرندن اهالی فریاد و اشتکا ایتمکله رستم « ای اهل فارس ! او مقتول عرب طوغری سویلش » دیوب او عسکرلردن بعضلرینی قتل ایتدکدن صکره حیره کیتمش و وجوه و اشراقی احضار ایله عربیه مقاومت ایلدکلری ایچون تکدیر ایتدکده ایچلرندن بری « سن نصرتدن عاجز اولوبده برده بزه لوم ایتمه » دیو آکا مقابله ایتمشدر ، رستم ( نجف ) موقعنه واردقده کیجه رؤیاسنده کورمش که کوکدن برملک اینمش . رسول اکرم صلی الله علیه وسلم حضرتلریله امیر المؤمنین عمر رضی الله عنه حضرتلری دخی برابر ایتمش . ملک ، اهل فارسک سلاحلرینی آلوب رسول اکرمه ، اودخی عمره ویرمش . رستم ، صباحلین

اویانوب بو رؤیادن متأثر و محزون اولمش و کندوسی نجف موقعنده ایکن سعد بن ابی وقاصك بلوك بلوك چیقارمش اولدینی چتهلر؛ اطرافنی غارت ایلمکده بولنمش ایدی .

رستم ایسه مدایندن چیقالی آیاق سورویه رك و جانب کسرادن استعجال اولندقدنه برر بهانه بوله رق کوچ حال ایله آلتی آیده قادسیه یه گلشدر .

الحاصل رستم، ایشك صوکنندن مأیوس ایدی . لکن عجم کاری مبالغه لرله و ساخته نمایشلر ایله عربلری اور کوتمك و برتقریبله مصالحه و متارکده ارضا ایتمك ایستردی و دائماً عربلره ایران دولتمك بیوکلکندن بحث ایدرك « یزدجرد ، مشهور نوشروانك حفیدی اولوب آنك فوقنده شاه یوقدر . یالکز اون ایکی بیك طاسمه لی و کویله یی کویکی و طوغانی واردر . فیللرینك و سائر اسباب حربیه سنك مقدارینی وار، آکا قیاس ایت . سزك ایسه فیللر کز یوق و سائر ادوات حربیه کز بك اکسیك . عسکرکز چیلاق، سر عسکرکز چیلاق . بو حال ایله او یله بر شاه عظیم الشانه قارشو حرکت، کار عاقل دکلدر . سز بر اكمكك هم آچی، هم طوقیسکز . سزه ییه جك ویرهیم، شاهدن احسانلر آلیویرهیم . یازیق سزه آجیریم . کندی محویکزه سبب اولمایکزه » یوللو سوزلر سویلر و عربلر ایسه آنك بویله بیهوده سوزلرینه قولاق آصایوب خالصانه آنی دینه دعوت ایلر ایدی .

### قادسیه وقعہ سی

قادسیه ده سعد بن ابی وقاص رضی الله عنه حضرتلرینك اردوسی اوتوز درت بیك نفردن عبارت ایدی .

بالاده بیان اولندینی اوزره ( هاشم ) و ( قعقاع ) ایله شامدن اعاده اولنان عراق عسکرینك وروندنه قادسیه اردوسی قرق درت بیك راده سنه بالغ اوله جق ایدی . لکن هنوز بو عسکرک وروندنن اول قادسیه ده محاربیه باشلامشدر .

کبی واضح وده کرلی سوز ایشیتدیکز می ؟ « دیدکده » معاذالله بو قیافتده اولان حریفک عقلنه اوپالم و دیننه میل ایدم. روبه لرینی کورمورمیسین ؟ « دیمه لر یله رستم » یازق سزه که روبه یه باقیورسکز . سوزه و رایه و سیرته باقیکز . عرب ، لباسه اعتبار ایتمز . شان و شرفنی محافظه ایلر ، دیمش .

فرداسی رستم ، ربینک اعاده سنی ایستدی . حضرت سعد ، آنک یرینه ( حذیفه بن محسن ) ی کونده ردی .

حذیفه دخی ( ربی ) نک زی و قیافتده اوله رق واردی ، آت اوزرنده اولدینی حالده رستمک چادری اوکنده طور ردی . رستم « اولکی سفیر ، نیچون کلمدی ؟ » دیو صور دی . حذیفه « امیرمز ، هر حالده بزم بینمزده عدالت ایلر . بو کون نوبت بنمدر » دیو جواب ویردی .

رستم ، متار که نک مدتی سؤال ایتدی . حذیفه « دوندن اعتباراً اوج کوندر » دیدی و آتندن اینمدی . دونوب کیتدی .

فرداسی رستم ، ینه بر مأمور ایسته مکه سعد حضرتلری ( مغیره بن شعبه ) یی کونده ردی . رستم ، بو کون دها زیاده حشمت و دارات کوستردی . چادرندن بر اوق آتیمی مسافیه قدر قالچه لر و کوزل دوشمه لر دوشه تمش و امرای عسکریه سینه صوم صرمه روبالر الباس ایتمش ایدی .

مغیره ایسه ، بر یرتیق کوملک ایله رستمک چادرینه واردی و آنک یاننه اوطوردی . همان آنی سریردن ایندیر دیلر و باشقه یر کوستردیلر .

بو معامله دن ( مغیره ) نک جانی صیقیلوب دیدی که « بن ، سزک کبی سفیه بر قوم بیلمم . بزم بعضمز ، بعضمزی قول اتخاذا ایتمز . سزیده اولیه صاندم . بعضکز ، بعضکزک ربی اولدیغنی بکا خبر ویرمه لی ایدیکز . مع هذا بن سزه کندولکمدن کلدم . سز بنی دعوت ایلدیکز . بو کون بیلدم که سز مغلوب سکز ، زیرا بر ملک ، بو سیرت ایله قائم اولماز .

ایرانیلرک آشانی طاقی « و الله ، بو عرب طوغری سویلیور » دیمش .

کبار کروهی ایسه « بوحریف ، میدانه قوللرمزك و خدمتکارلرمزك مائل اوله جنی بر سوز آتدی » دیوب دلکیر اولمشلر .

بعده رستم ( مغیره ) یه خطاباً سلطنت ایرانیه نك عظمت شانندن وعربك کوچوکلککندن وشانسنزلغندن ابحت ایله « سزك امر تعیشکیز ، بك فنا حالده ایدی . قحط وغلا زماننده بزه کلوردیکیز . بزه سزه خرما وآرپه ویریردك » دیو امتنان ایدرك « شمدی بو حرکتکیزده اوله بر احتیاجه مبنیدر . امیرکزه کسوه واستر و بیک درهم وافرادکزه برر یوک خرما ویرهلمده دونوب کیدیکیز . سزی تلف ایتك ایستمیورم » دیدکده مغیره « بز ، مقدما دیدیکیز کبی بك فنا حالده ایدك . لکن دنیا ، عالم انقلاب و مناوبه در . سز ، جناب حقك احسان ایتدیکی نعمتلرك شکرینی ایفا ایتدیکیزدن احوالکیز بوزولدی وبزه جناب حق پیغمبر کوندهروب آکا اجابت ایله سوء احوالز ، حسن حاله مبدل اولدی » دیدکدن صکره دیگر سفیرلر کبی آنی اسلام وجزیه ومحاربه بیننده مخیر قیلدی و « بزم آدملمز ، سزك بلادکیزك طعمانی طاندیلر . آرتق بوکا دایانامیز دیورلر » دیدی ورستم « نائل مرام اولمادن فوت اولورسه کز؟ » دیدکده مغیره « بزدن مقتول اولانلر جنته کیدر ، کیرو قالانلرمز سزه غلبه ایدر » دیو جواب ویردی .

رستم ، غضبه کلدی و « جمله کزی اعدام ایتدکجه عقد مصالحه ایتیم » دیو یمین ایتدی . ( مغیره ) ده دونوب کیتدی .

آرقاسندن رستم ، بر مأمور قوشدیروب « کوپری بی قیره جق اولورایسه یارین کوزینی باطلادیرم » دیو خبر کونده رمش . مأمور ، یتشوب رستمك بو افاده سنی تبلیغ ایتدکده ( مغیره ) آکا « بنی خیر واجر ایله تبشیر ایتدك . اکر بو کوندن صکره سزك کبی مشرکارله جنك و جهاد ایتیمه جك اولسم دیگر کوزك کیتدیکنی دخی تمنی ایدردم » دیو جواب وبرمش .

رستم ، سفرای اسلامک یاننده اکرچه بویله اظهار جلادت ایلردی .

تفرقه دوشدی . حضرت سعد ، آنلره امداد ایچون ( بنی اسد ) عسکرینه امر کوندهردی . بنی اسد ، همان سگرددوب فیللری کیرو چویردیلر .

( اشعث بن قیس الکنندی ) میدانه چیقوب کنندی قبیلهسنه خطاباً « ای کنده بهادرلری ! بنی اسدک حالنی کورمیورمیسکز ، سیرجی اولوب طورمق بزمه یاقیشورمی ؟ » دیمکه کندهلیلر ، برشدتلی هجوم ایدک کنندی حذالرنده بولنان ایران فرقهسنی سوروب قاجردیلر .

ایرانلر ایسه هپ بردن بنی اسد اوزرینه هجوم ایتدیلرکه ( ذوالحاجب ) و ( جالینوس ) دخی برابر ایدی .

ایشته اوزمان حضرت سعد ، دردنجی تکیری آلدی ، عسا کر اسلامیهده هر طرفدن هجوم ایتدی .

بنی اسد ایسه یرلرنده ثابت قدم اوله رق محاربه دکرمنی آنلرک باشنده دونوب طورویوردی . بناء علیه اوکون آنلردن بش یوز نفر شهید اولمشدر . بونک اوزرینه عجملر ، هپ فیللری صاغ و صول جناحلرک اوزرینه هجوم ایتدیردیلر و عرب آتلینی اورکودوب عسا کر اسلامیه نک تعیمه سنه خلل کتوردیلر .

حضرت سعد ، فیللرک بر چاره سنه باقق اوزره ( عاصم بن عمرو التمیمی ) یه خبر کوندردی . اودخی بنی تمیم اوقجیلرینی سوق ایله فیللرک اوزرلرینه اوق یاغدیددی و بنی تمیمک ارباب حذاقت و مهارتندن برفرقه آیروب « فیللرک آرقه لرینه طولاشکز ، دیو امر ویردی . آنلردخی فیللرک آرقه لرینه طولاشوب قولانلر و محفه لرینک بندلرینی کسیدیلر . محفه لرینی یره دوشوردیلر . ایچنده کی چنکجیلری تلف ایتدیلر .

بونک اوزرینه فیللرک کیرو دونوب قاچارکن ایشیدیلن قورقونج سسلری ایله اوقلرک جیویلیدی آره سننده عرب جندیلری ، میدان بوله رق عجملره براییجه قویولدیلر . آقشامه قدر محاربه بویله شدت اوزره تمتد اولدی . نهایت کیجه قراکخی ایریشوب طرفین بر بردن آیریلدی .

فرداسی سعد حضرت تلی، علی الصباح شهدایی دفن ایتدیردی و یاره لیلری  
تیمار اولنق اوزره اردوده بولنان طائفه نسایه ویردی .  
ایشته او ائنده باد صبا کبی شام طرفندن سکیردوب کلن بر طاقم عرب  
آتلینک مبارک آلینلری کورونمکه باشلادی هر کسک دقت نظرنی جلب  
ایلدی .

مکر بالاده بیان اولندیغی اوزره شامدن (هاشم بن عتبة بن ابی وقاص) ایله  
اعاده اولنان عراق عسکرینک مقدمه الجیشنه مأمور اولان قهرمان (قعقاع)  
ایمش که بیسک آتلو ایله ایلرولوب وقادسیهیه تقربنده عسکری بر موقعده  
توقیف ایلوب هراون نفرینی بر طاقم ایده رک کوز کوره جک قدر فاصله ایله  
برر طاقمک سوق اولمنسنی تنیه ایتدکدن صکره کندوسی قادسیهیه کلش .  
کلدیکی کبی عسکره سلام ویردی و هاشم حضرتلرینک اردو ایله  
کیروندن کلک اوزره اولدیغنی تبشیر و عسکری جنکه تشویق و تشجیع  
ایلدی .

مرحوم مثانک بومعرکده بولنه مامسنه تأسف اولتورایکن آنک سلاح  
آرقداشی اولان بهادر قعقاعک کایویرمسی ، عسا کر اسلامیه نک شوق  
وغیرتی تازهلدی .

ابوبکر الصدیق رضی الله عنه حضرتلرینک « قعقاع کبی بر آدمک بولندیغی  
اردو مغلوب اولماز » دیو بیورمش اولدینی سوز، میدان قونولدی .  
اهل اسلامه بادی تسلیت اولدی . قعقاع ایسه همان میدان مبارزهیه آت  
سوروب اردیله دی وقارشی چیقان (ذوالحاجب) ی اعدام ایلدی .  
ذوالحاجب ، عظمای ایرانندن اولدیغنه مبنی آنک قتلی ، اهل اسلامه  
سرور و ایرانلره قنور ویردی .

قعقاعک عسکری کیروندن طاقم طاقم کلهرک تکبیر آلدیجه هپ عسکر،  
تکبیر آلور و قعقاع ، هر دفعه سنده دشمنه هجوم ایلر ایلدی .  
قعقاع ، اوکون اتوز دفعه مبارزهیه چیقوب هر دفعه سنده ایران پهلوانلرندن  
برینی قتل ایتشد .



دیگر بهادران اسلامدن بعضیلری دخی مبارزه چیمش ومظفر اولمشدر .

فقط (اعوز بن قُطنه) حضرتلری، سجستان والیسیله مبارزه چیققدمه ایکسی بربرنی قتل ایتمشدر .

بنی تمیمدن بری بوصرمده رستمک اوزرینه هجوم ایتدیسهده آنی قتل ایدهمیوب کندوسی شهید اولمشدر .

دونکی محاربهده فیللرک محفلری قیریلش اولدیغندن بوکون میدان محاربهیه سوق اولنمدیلر . ایرانیلر دخی ده کرلی برایش کورهمدیلر .

قعقاع ایسه « ای جماعت مسلمین ! دالقیج اولگزن . انسانلر، قلیچ ایله یچیلوره دیو ندا ایتمکه عرب جندیلری، سل سیف ایله هجوم واقتحام ایدرک ایرانیلری کرکی کبی قیردیلر، قلیجدن کچیردیلر .

قعقاع، ده و لرک اوزرینه پرده لر چکدی و آدم لر بیندیردی و اطرافلرینی سواری ایله احاطه وحمایه ایدرک ایران سواریلری اوزرینه هجوم ایتدیردی .

ایران آتلری، ده و لردن اورکوب کیرو دوندیکی صرمده آرقه لرندن اهل اسلام سواریلری هجوم ایتمکه ایرانیلرک بوکون ده و لردن کوردکاری خسارات، دون عسا کر اسلامیه نك فیللردن کورمش اولدقلری خساراتدن زیاده اولدی .

اولیه و قته دک سواری محاربه سی اولوب آندن صکره طرفین، بربری اوزرینه هجوم واقتحام ایدرک کیجه یاریسنه قدر پک شدتلی و قانلی بر محاربه وقوع بولدی و ایرانک مشهور آدم لری هپ اعدام ایدیلدی .

مشاهیر شجعاندن و شعرای بنامدن (أَبُو مُحَمَّدٍ ثَقَفِي) که دیلی بلاسنه اوفرامش ایدی، یعنی شرایک مدخنه دائر بر قطعه سویلش و حضرت سعد دخی آنی محاربه نك بدآندن اولجه کندی کوشکنده حبس و بند ایلش ایدی . محاربه نك اشبو ایکنجی کونی ابو محجن، حضرت سعدک زوجہ سی (سلمی) به یالواروب « بنی صالیور وسعدک (بَلَقَا) نام قیصر اغنی

عاریهٔ بکا ویر . شو معرکده بولنه یم . الله تعالی سلامت ویریرسه کلورم  
وآیاقلرمی ینه بنده قوروم ، دیمش ایسه ده ( سلمی ) آکا مساعده  
ایده مدیکندن مایوس اوله رق یک سوزشلی بر شعر سویلدکده ( سلمی )  
طایانامایوب آنی صالیویرمش .

ابومحجن ، بیلنمیه جک بر قلیغه کیروب و ( بلقا ) یه بینوب اردونک  
صاغ قولی حذاسنه واردقده صف حربی یاروب کچهرک دشمنک صول قولنه  
هجوم ایله ایران سواریلرینی بربرینه قاتدی . بعده دونوب دولاشه رق  
دشمنک صاغ قولنه هجوم ایله کیجه یاریسنه قدر هرکسه حیرت ویره جک  
صورتده محاربه لر ایتدی .

کیمسه ، آنی طانیه میوب کیمی « ملکمیدر ، خضرمیدر ؟ » وکیمی  
« هاشمک آدملرنندن بری ، یاخود کندی اولمالی » دیمش لر .

حضرت سعد ، دخی کوشکک طامندن تماشا ایله « بو بهادر ، عجب کیم  
اوله ؟ ابومحجن ، محبوس اولماسه بو ، اودر ویندیکی بلقادر دیر ایدم »  
دیمش .

کیجه یاریسی ایکی عسکر ، بربرندن آیریلدینی وقت ابومحجن ، درحاک  
قصر سرعسکری یه کلوب آیاقلرینی بنده قودقده سلمی « سعد ، سنی نیچون  
حبس ایتدی ؟ » دیو صورمش . او دخی « شراب ایچوب کناهی کیرمدم .  
فقط زمان جاهلیتده اهل عشرت ایدم . بر شاعر آدم . لسانمندن شرابه  
دائر بر شعر صادر اولیویردی . آنک ایچون سعد ، بنی حبس ایتدی »  
دیو جواب ویرمش .

او آراق سلمانک سعد ایله آره سی شکر آب ایش . صباحلین یانه  
واروب باریشمش و ابومحجن فقره سنی حکایه ایش . حضرت سعد دخی  
آنو صالیویرمش و « آرتق فعل حرامی ارتکاب ایتدکجه سنی یالکز  
سوزک ایچون مواخذه ایتم » دیو بویورمش . ابومحجن دخی « فیما بعد  
بنده فنا سوز سویلک اوزره لسانمه مساعده ایتم » دیو سوز ویرمشدر .  
اوکونکی محاربه ده اهل اسلامک شهید و مجروحلری ایکی بیگ قدر اولوب

ايرانيلرك ايسه اون بيك قدر مقتوللري ميدان حربده ايكي صف آره سنده ياتيور ایدی .

فرداسی ، صباحلين شهدا دفن ايدیلدی و یازده لیلر ، قادینلره ویریلدی . ايرانيلرك مقتوللري ميدانده قالدی ، بوده مسلمينه قوت قلب اولدی .

قعقاع ، اوکجه دون عسکرندن آیریلدینی موقعه کیتمش و بقیه عسا کرینک یوزر یوزر سوق اولمسنی تنیه و هاشمک معیتندکی عسا کرک دخی بویه بلوک بلوک اوله رق سوقنی توصیه ایتمش ایدی .

صباحلين کونش طوغان ایکن قعقاعک بلوکاری حرکت ایله بربری آرنجه اردویه کلدجه کندوسی تکبیر آلور و عسکرده برابر تکبیر آلورلر و طرف طرف دشمنه هجوم ایدرلر ایدی .

آنلرک آرقه لرنده بهادر هاشم ، عسکرینی یتشر نفردن مرکب اوله رق بلوکاره تقسیم ایله بلوک بلوک کلوب اردونک قلیکانه لدی الوصول تکبیر آلهرق دشمن اوردوسنه هجوم و اقتحام ایله صفلرینی یاروب کچدی و نهزه قدر کیدوب کلدی .

ايرانيلر ، محفلرک انشا آتی اکمال ایتمش اولدقلرندن بو ائنده ینه فیللرینی سوق ایتدیلر . فقط قولانلری و بندلری کسلمسون دیو آنلری پیاده ایله احاطه و پیاده یی سواری ایله حمایه ایتدیردیلر . بو صورتده ايسه عرب آنلری آنلرک اطرافنده کی آنلری و آدملری کوره رک آنلردن اولکی قدر اورمکز اولدیلر .

مع مافیه فیللر ، متحرک بر قلعه کی اولوب اوزرلرنده کی جنکجیلر اوق آتهرق هجوم ایله عسا کر اسلامیه ایچه تفرقه ویریرلردی . شامدن هاشمه قاتیلوب کلش اولان ( قیس بن المکشوح ) نام بهادر ، بو صروده کندی عسکريله دشمن ایچنه طالوب فوق العاده بهادرلقلر ایتکده ایکن ( عمرو بن معدی کرب ) دخی فیل فرقه لرینک اوزرینه هجوم ایله ايرانيلىر بربرینه قاتیوردی .

( قعقاع ) ایله برادری ( عاصم ) ك حذاسنده بولنان بر بیاض فیل ایله ( بنی اسد ) رؤسانندن ( حمال ) و ( زبیل ) نك حذاسنده بولنان دیگر بر فیل ، اهل اسلامه زیاده خسارت ویرمکده اولدیغندن حضرت سعد « شو ایکی فیلک چاره سینه باقکز » دیو آنلره خبر کوندردی .

قعقاع ایله ( عاصم ) بر مقدار پیاده و سواری ایله ایلرولیوب بیاض فیل فرقه سنی طاغیتدیلر و قارغیلرینی فیلک کوزلرینه صوقدیلر و آنی واوزرنده کی جنکجیلری اتلاف ایتدیلر .

( حمال ) و ( زبیل ) دخی دیگر فیلک اوزرینه بو وجهله حمله ایتدیلر و ( حمال ) فیلک بر کوزینی چیقاردی ( زبیل ) دخی دوداغنی یاردی و ساری ( زبیل ) ی یارالادی . فیل اینسه جان آجیسیله اوته بروسگیدوب نهایت کندوسنی نهره القا ایتدی .

دیگر فیللر ، آکا پیرو اوله رق و عجملرک صفلرینی بیرتوب کچهرک مداینه طوغری کیتدیلر . اوزرنده کی جنکجیلر ایسه هپ تلف اولدی وفیللر کیدنجه طرفین باشلی باشنه قالدی .

وقت زوال صاووشدی . طرفین بر جنکه کیریشدی . آقشام اولدی . محاربه ، دها زیاده قیزیشدی . قارا کلک باصدی ، ایکی عسکر بر برینه قاریشدی .

شویله که : اردونك آلت طرفنده کی کچیدن کیجه لین ایرانیلر ، کچوبده اهل اسلامك آرقه لرینی آملارلی ملحوظ اولدیغندن سعد حضرتلری ، اوموقی طومتق اوزره آقشامدن بر مقدار عسکرله ( طلیحه ) و ( عمرو ) ی کونده رمشیدی . اورایه واردقلرنده « بز کچوبده ایرانیلرک آرقه سینه طولاشیق » دیو مشورت ایدرک ( طلیحه ) او وجهله ایرانیلرک آرقه طرفه طولاشوب اوچ کره تکبیر آلدقده ایرانیلر ، آنک آرقه سنده دوشدکاری صرهده ( عمرو ) کچید موقعنده کی ایران فرقه سی اوزرینه بر ساخته هجوم کوسترمش و ایرانیلره خیلی شاشقینلق ویرمش . ایرانیلر ، نهیه اوغراقلرینی یلمدکاری کی دیگر امرای اسلامیه دخی حقیقت حالدن بی خبر ایدیلر .

فقط بنو عزمده اوزرينه ( قعقاع ) دايانامايوب خود بخود كندى  
عسكريله دشمن اوزرينه هجوم ايتديكى ( كى آنك آردندن ) بنى اسد )  
وبعد ( نفع ) وبعده ( بحيله ) و ( كنده ) قيله لى دخى هجوم ايتدى .  
نهايت حضرت سعد دخى عموماً هجوم اميرنى و برمكه هر طرفدن دشمن  
اوزرينه اقتحام اولدى .

آندن صكره قارا كلق باصدى . سس ، صدا كسيلى . سلاح  
شيقيرديسندن باشقه سس ايشيديلن اولدى . حضرت سعد ، دخى  
عساكر اسلاميه نك منصورتي ايچون قصرلده جناب حقّه مناجات  
ايلردى .

عسكر ، اويقوسز و فوق العاده بيتاب اولدى حاليده صبا حلاذى .  
( قعقاع ) ايسه عسكرى جنكه تشويق ايدرك بعض رؤسايله بالاتفاق  
طوغرى رستمك چادري اوزرينه هجوم ايلدى و آنك عساكر خاصه سى  
ايچنه قاريشدى . آكا باقهرق سائر عساكر اسلاميه دخى كندى اوغورلرنده  
اولان عساكر ايرانيه اوزرينه هجوم ايلديك . محاربه ، دها زياده شدت  
بولدى . كوش قيزدقجه محاربه ده قيزيشدى .

اويله وقتى ياقلاشدى . ايران اردوسنك جناحلى كيروليوب قلبكاهى  
آچيلدى . شدتلى روزكار چيقوب رستمك چادري اوچوردى و نهره  
دوشوردى . ايشته او وقت ( قعقاع ) دخى هجوم ايدرك رستمك سريرينه  
قدر واردى .

رستم ايسه بر استرك كولك كنده كولك لنيوردى . ( هلال بن علقمه )  
آنى كوردى و اعدام ايتهدكن صوكره كلوب آنك سريرى اوزرينه  
اوطوردى . اى جماعت مسلمين ! برب العكبه رستمى اولدوردم ، ديو  
چاغيردى .

خلق ، آنك باشنه اطويلانوب بر آغز دن تكبير آلديلر و عنوز  
ومتشكر اولديلر . رستمك قتلى اوزرينه اولتق ايران اردوسنك ثبات



مجالى قالمادی . ( جالینوس ) دخی کوپری باشنه کلوب رنجت امرینی  
ویردی .

بو صرمده ایرانسلرک یوقاروده بیان اولنان زنجیرلی عساکری ،  
کوپریدن کچرکن عساکر اسلامیة نك هجوم و تعقیبندن ناشی نهره دوشوب  
بوغولایلر .

( ضرار بن الخطاب ) دخی ایرانك ( درفش کاویانی ) دیو مشهور اولان  
اك بویوك سنجاغنی آلدی که انواع جوامر ایله مرصع اولوب قیرمه بهاسی  
بر میلیوندن زیاده ایکن عربلرجه بو درلو شیرك قیمتی معلوم اولمادیغندن  
بدله اوتوز بیک درهم ویریلرک خمس غنائم ایله برابر درگاه خلافت  
تقدیم اولمشدر .

قادسییه ده اوقدر اموال غنائم طویلانندی که هیچ بر وقته امشالی  
کورولمه مشدر .

سر عسکر سعد حضرتلری ، رستمك اسلحه و اشیاسنی ( هلال بن  
علقمه ) یه ویردی و ( قعقاع ) ایله ( شرحیل بن السمط ) ی فراریلرک  
آرقه سندن کونده ردی . بعض رؤسا دخی آنلره قاتیلوب کیتدی . تسلیم  
اولانلری اسیر ایدوب مدافعه یه قیام ایدنلری اعدام ایلدکاری صرمده  
( زهره ) اوچ یوز آتلو ایله فراریلری اخندن جمع ایتمکده ایکن  
( جالینوس ) چاتدی و آنی قتل ایتدی .

بو محاربه ده عساکر اسلامیة نك مقدازی ، بروجه بالا قرق بو قدر  
بیک اولدینی حالده شهادتک مقداری ، سکیز بیک بش یوز راده سنده اولمغله  
عساکر اسلامیة نك ضایعاتی تقریباً بشده بر دیمک اولور و مشاهیر  
رؤسادن ( قیس بن الککشوح ) کی بعض ذوات دخی شهید اولمشلر  
ایدی .

اما ایرانك اک مشهور سردار و پهلوانلری هپ تلف اولدی و یوز  
یکرمی بیک عسکرلرندان يك آزی فرار ایله بابلده تحصن ایده بیتدی .



عرب و عجمك انجام احوالی ، قادسیه محاربه سنك نتیجه سینه مربوط اولمغه هرکس آ کا منتظر ایدی . عسا کر اسلامیہ مظفر اولنجہ ایشك فیه منجر اوله جنی آ کلاشیلدی .

سعد بن ابی وقاص رضی الله عنه حضرت تارینك فتح نامه سی ، مدینه منوریه واصل اولدقده علناً حضور انامده او قوندی و خلیفه رسول الله ( عمر الفاروق ) رضی الله عنه حضرت تری ، بك زیاده ممنون و منشرح اولدی .

کسری یزد جرد ایسه اردوسنك مضحل و رستم و سائر مشاهیر امراسنك مقتول اولماسندن ناشی فوق العاده متالم و متحیر قالدی .

سعد بن ابی وقاص حضرت تری ، بو مظفریتدن صکره بر مدت قادسیه ده اقامت واکمال نقصانه همت ایله اوردوسنه کرکی کبی قوت ویرمش و بعده امر امیر المؤمنین ایله مداین فتحنه عزیمت ایله مشدر .

## فتح ابله

سالف الذکر وقایع عراقیه اثناسنده و اون درت سنه سی خلالنده بحر فارس ساحلنده کی ( ابله ) بلده سی دخی فتح اولنمشدر . شویله که : امیر المؤمنین عمر رضی الله عنه حضرت تری ، مرحوم مشائی ( حیره ) جانبنه کونده ردیکی کبی ( قطبة بن قتاده السلوسی ) ی دخی ( ابله ) جانبنه کونده رمشدر .

قطبه ، استمداد ایله مکله حضرت عمر ( شریخ بن عامر بن سعد ) ی کونده روب اودخی او طرفه وصولنده ( اهواز ) جانبنه کچمش ایسه ده ایرانلر ایله لدی المحاربه شهید اولمغه حضرت عمر ، اورایه ( عتبه بن غزوآن ) رضی الله عنه حضرت تریخی مأمور بویورمش و آ کا امداد ایله مک اوزره بحرین والیسی ( علاء بن الحضرمی ) رضی الله عنه حضرت ترینه دخی امر نامه کونده رمش ایدی . عتبه ، شط العرب سهوا حانه تقرب ایله کوبری باشی

حذاسنه لدی الوصول اهالیسی چیقوب جنکه طوتوشمشلر ایسده منهزماً عودتلرنده خوفه تابع اوله رق یوکده خفیف و بهاده آغر ماللرینی اخذ ایله شطی کچوب ایران جانبنه کیتمشلر .

بوصورتله ( ابله ) بلده سی خالی قالدیغندن ( عتبه ) عساکر اسلامیة ایله ( ابله ) یه کیروب کلّی اموال غنائمه نائل اوله رق خمسنی مدینه منوره یه اوسال ایتمشدر .

بعده ( عتبه ) بصره موقعنه کلوب قوندی و بوراده مسجد و ابنیه سائرہ بناسنه باشلاتدی . بعده بوراده ( بصره ) شهری بنا اولمشدر .

### غریبه

بر آراق بر فرقه ایران عسکری ، بصره اوزرینه هجوم ایتمش عساکر اسلامیة دخی آنلره قارشو کیتمش و ( مرغاب ) ده جنکه باشلامشلر . کیروده قالان اهل اسلام قادینلری نه وار . بزده ارککلر مزله برلکده بولنلم « دهرک باش اورتیلرندن بایراق یاپوب ایلرو حرکت ایتمشلر . ایرانیلر ایسه آنلری کیرودن کلش بر فرقه امدادیه ظایله خوفه تابع اوله رق بوزولمش و عساکر اسلامیة مظفر اولمشدر .

### فائده

بوسنه عمر رضی الله عنه حضرتلری ، بعض کسانه شرب خبر ایتدکلری ایچون حد اورمشدر . آنلردن بری کندی اوغلی ( عبدالله ) در . بوسنه یه قدر رمضان شریفده یاتسو نمازندن صکره جماعت طاغیلوب تراویح نمازینی کندی خانه لرنده قیلاردی . بوسنه نک رمضان شریفده حضرت عمر ، مسجد شریفده قدیللر یاقدی و یاتسو نمازندن صکره طاغیلما یوب جماعت ایله تراویح قیلما لرینی تنیه ایتدی . سائر بلاد اسلامیة دخی کیفیتی بیلایردی .

۱۵ نهمی سنه هجریه

## وقایع شام

بالاده بیان اولوتدینی اوزره شام سرعسکری (ابوعبیده)، (شرحیل بن حسنه) ایله (عمرو بن عاص) ی اردن وارض فلسطین طرفنه اعزام ایتمش و کندوسی (خالد بن الولید) ایله برابر حمص اوزرینه کیتمش ایدی. اثنای راهده (ذوالکلاع) ایله بولوشوب (مرج الروم) نام موقعه قوندیلر. رضی الله عنهم.

روم ایمراطوری هرقل ایسه آنلره قارشو (تهئودور) و (یانس) نام جنرالر ایله ایکی اوردو کونده رمشیدی. آنلر دخی مرج الرومه کلوب (تهئودور) حضرت (خالد) و (یانس) حضرت (ابوعبیده) نک حذاسنده کیجیلدیلر.

صباحلین (تهئودور) اردوسنک صاووشمش اولدینی کورولدی و دمشق اوزرینه کیتمش اولدینی آ کلاشیلدی. حضرت خالد، جرد آتلو ایله آرقه سندن قوشدی.

یانس، دخی (ابوعبیده) اوزرینه هجوم ایتدی. لکن کندوسی مقتول و عسکری حمصه طوغری فراره مجبور اولدی. حضرت (ابوعبیده) دخی آرقه لرینه دوشدی.

دمشق شام محافظی (یزید بن ابن سفیان) دمشقدن چیقوب (تهئودور) ایله جنک ایدرکن کیرودن خالد یتیشدی.

تهئودور اردوسی، ایکی فرقه آره سنده قالب کلاً مضمحل اولدی. آنک اوزرینه (یزید) شهر دمشقه عودت ایلدی. (خالد) دخی دونوب ایلغار ایدرک (ابوعبیده) یه ایریشدی.

حضرت ابو عبیده (خالد بن الولید) ایله برابر مرج الرومده منهزم

اولان ( یانس ) اردوسنی تعقیب ایدرک حصه کیتدیلر و هر طرفدن شهری محاصره ایتدیلر .

هرقل ، حصی تخلص ایچون ( رها ) اورفهیه کتدی . الجزیره عشائرینی جنکه تشویق ایتدی . آنلر دخی یرلرندن قیام ایله حصه طوغری حرکتیه باشلادی .

لکن امیر المؤمنینک امری اوزره ( سعد بن ابی وقاص ) رضی الله عنه حضرت تلرینک عراق اردوسندن سوق ایلدیکی فرقه لر ( هیت ) و ( قرقسیا ) بلده لرینی محاصره ایتمکله الجزیره عشایری ، یوردلرینک محافظه سی ایچون رجعت ایلشیلردر . او جهتله حص بلده سی ، امداد سز قالدی و اهالیسی ، دمشق کبی جزیه و خراج و یرمک اوزره تسلیمیه مجبور اولدی . او ائشاده ( بعلبک ) بلده سی دخی بویه صلح ایله فتح اولمشدر .

ابوعبیده رضی الله عنه حضرت لری ( عبادۃ بن الصامت ) حضرت لری یر مقدار عسکرله حصک محافظه سنده بر اقوب کندوسی اوردو ایله حما اوزرینه یوروددی . اهالیسی دخی کذلک جزیه و خراج و یرمک اوزره حمایی تسلیم ایلدیلر .

بعده ( ابو عبیده ) حضرت لری ، ( شیزر ) و ( معیره ) بلده لرینی و ( لاذقیه ) یی حرباً فتح ایلدی . بوسمرده ( سلمیه ) دخی فتح اولمشدر .

بعده ابو عبیده حضرت لری ، حضرت خالد بن الولیدی حلب ولایتک مرکز حکومتی اولان ( قنسرین ) اوزرینه کونده ردی . هرقلک ( میناس ) نام جنرالی آکا قارشو کلدی . لکن لدی الحاربه پک فنا حالده بوزولدی . حضرت خالد ، عنوة ( قنسرین ) ی فتح ایله تخریب ایلدی .

بعده حضرت خالد ، ( قنسرین ) دن ( رهایه ) طوغری یوروددی . ( عیاض ) دخی آکا پیرو اولدی . عراق اردوسی امراسندن ( عمرو بن

مالك) قرقيسيا ناحیه سندن و (عبدالله بن غنم) موصل جهتندن كذلك رهايه توجه ايتديلر .

هرقل ، شام و عراق اردولرينك آره سنده طور مق مخاطره لي اولديغي آكلادي و آرتق اقطار شاميه نك محافظه سي قابل اوليه جفتي جزم ايلدي وهان اورفهدن (شمشاط) . لدي الورود بر بوكسك محله چيقوب وشام جهته نظر تحسر آيله باقوب « اي سوريه ! آرتق سنكله فيما بعد بولوشماق اوزره الوداع » ديمش و آندن قسطنطينيه عودتنده اسكندرون ايله طرسوس آره سنده كي قلعه لري تخليه وترك ايدرك آنطاكيه ايله سرحد روم آره سني چول كبي خالي عن الاهالي براقشدر .

ابوعبيده حضرتلري ايسه (قنسرين) فتحندن صكره حلي محاصره و صلحاً فتح ايتدي .

بعده آنطاكيه اوزرينه يوريدى . (قنسرين) دن و مواقع سائرهدن فرار ايدنلر ، هپ بورايه تجمع ايدرك خيلجه غلبه لك پيدا اولديغندن چيقوب مدافعه صددنده بولنديلر ايسه ده منهزماً رجعت ايله قلعه يه قاپانوب نهايت رأى و امان ديله يرك آنطاكيه يي دخي تسليمه مجبور اولديلر . اوقت آنطاكيه شهرينك شهرتي زياده اولديغندن امر امير المؤمنين ايله اوزاده ابوعبيده حضرتلري (مرايط) و سرحد نشين اولمق وعطيه لري لاي تقطع كندولرينه اولاشدير يلق اوزره بر مقدار مستحفظ عسكري اقامه ايتشدر .

بعده (معرة المصيرين) طرفنده روملك بر جمعيتي اولديغي خبر و يريلمكله ابوعبيده ، اورايه واردى . آنلري اوردى ، طاعيتدى و (معرة المصيرين) ي جوارنده كي بلادى فتح ايتدى .

بعده دونوب (منبج) ي فتح ايتدى . آندن (الس) . كيتدى وشامك بو جهتنده نهر فراه قدر اولان يرلر ، هپ اهل اسلام اله كچدى .

او اثناده (ابوعبیده) حضرتلری، (خاندن الولید) ی (مرعش) .  
کوندردی . او دخی واروب اهالیسی جلای وطن ایتک اوزره رأی وامان  
ایله مرعشی فتح و تخریب ایتمشدر .

الحاصل (دمشق) و (قتسیرین) و (حلب) و (آنطاکیه) و بونلره  
ملحق اولان یرلر کاملاً فتح اولوب آندن صکره حضرت ابو عبیده،  
ارض فلسطین جانبته کیتمشدر .

اردن قطعہ سی امیری (شرحیل حسنه) حضرتلری اولوب آنک  
معرقیله اردن وادیسی فتح اولدقدن صکره فلسطین اوزرینه واریلوب  
فلسطین امیری ایسه (عمرو بن عاص) اولغله (شرحیل) دخی بالطبع  
آنک معیتته کیرمشیدی . امیر المؤمنین طرفندن پیدرپی (عمرو بن العاص) .  
عسا کر امدادیه کونده ریلاکده ایدی .

عمرو بن عاص، دهات عربدن وفن حربده ماهر ذواتدن ایدی .  
لکن هرقلک فلسطین قوماندانی (ارتبون) نام جنرال دخی جن فکری  
ودّاس بر آدم ایدی .

ارتبون، رملهده و قدس شریفده عسا کر کایه جمع ایدوب بر بیوک  
اردو ایله دخی کندوسی (اجنادین) طرفنده اقامت ایلاکده ایدی .

عمرو بن عاص (علقمه) ایله (مسروق بن الفلان) ی قدس اوزرینه  
وامیر (ایوب مالکی) یی رمله اوزرینه کوندروب ایکی طرفده کی عسا کر  
رومیہ یی اشغال ایتمشیدی و اقدجه امیر المؤمنینک امری ایله دمشق شام  
والیسی (یزید بن ابی سفیان) برادری (معاویه) یی فلسطین جانبته  
کونده رمشیدی . معاویه، واروب (قیساریه) بلده سنی محاصره ایتمکله او  
جهتدن دخی روملر مشغول ایدی . قیساریهده کلیتلو عسکر بولندیغندن  
پیدرپی طیشارویه هجوم ایتدکجه معاویه، آنلری بوزوب قیرمقده ایدی .  
الحاصل (رملة) جانبده کی عسا کر رومیہ یی (ابوایوب) و قدسده -  
کیلرینی (علقمه) و (مسروق) اشغال ایدوب قیساریه یی دخی (معاویه)  
محاصره ایتمش اولدیغندن ارتبون، مجموع قوتی بریره طوپلایامدی . عمرو



بن عاص ايسه كركى كې اردوسنه قوت وانتظام ووروب آلك اوزرينه يوریدی . او دخی كال نبسات ايله مقابله ايتدی . یرموك وقعه سی كې بر شدتلی محاربه وقوع بولدی . نهایت ارتبون ، بوزولدی وبوزغون عسكریله قدسه كیتدی .

قدسی محاصره ایدن عساكر اسلامیه آچیلوب عمروك یاننه عودت ایلدیلر ، ارتبون دخی درون قدسه کیردی . متعاقباً عمرو بن عاص (غزه) و (سبسطیه) و (نابلس) و (یافا) بلده لرینی وجوارلرینی فتح ایتدکدن صكره قدسك تسلیمی ایچون خبر کونده ردی .

قدسك اعیان و اشراقی ، خلیفه حضرتلری بالذات کلوبده عهدوامان ویریرسه اووقت بلده یی تسلیم ایدم جککری جوابی ویردکدن کیفیت ، مدینه منوره یه عرض اولندی .

امیرالمؤمنین عمر رضی الله عنه حضرتلری ، قدسه کیده جک اولدقده علی بن ابی طالب رضی الله عنه الغالب حضرتلری « بالذات کیتمه کزه نه حاجت ؟ ایشی ، امرادن برینه حواله بیوریکز » دیمکله حضرت عمر « بن ، عباسك وفاتندن اوّل جهاده کیتمك ایسترم . زیرا آنك وفاتندن صكره سزه شر اینك قاتلری چوزیلور ، دیمش وفی الواقع حضرت عثمانك خلافتنده حضرت عباسك وفاتندن صكره درلو فناقلر ظهوره باشلامشدر .

حضرت عمر ، مدینه منوره ده یرینه حضرت علی یی قائم مقام براغوب کندیسى قدس شریفه عریمت بیوردی وامرای شامك یرلرینه برر قائم مقام براغوب کندیسيله کوروشمك اوزره (جابه) قریه سنه کلمه لری ایچون کندولرینه بر کون تعیین ایدرك مکتوبلر کونده ردی .

او کون امرای شام ، جابه یه کلوب کندوسيله کوروشدیلر . ابتدا ملاقات ایله ین (ابو عبیده) ايله (یزید بن ابی سفیان) بعده (خالد) ایدی که حضرت عمر ، یامالی کوملك ايله بر قیصراغه را کباً جابه یه کلورکن آنلر ، اعلی آتله بنبوب کوزل روبه لر کیمش اولدقلری خالد ایلرو واروب استقبال ایتدیلر .

حضرت عمر، آنلری بویه ملّس کورنجه حدتندی . حیوانندن  
ایندی، یردن طاشلر آلوب آنلری طاشه طوتدی و « سز نه چابوق فکر  
ورایکزدن دونمش سکز . بو قلیقله بنی استقباله می چیقدیکز؟ » دیو  
تکدیر ایتدی . آنلر دخی دخی « یا امیرالمؤمنین ! بو، بر قوری نمایشدن  
عبارتدر . اوزرلریمزده آنحق سلاحریمز واردر . » دیو اعتذار ایلدیلر .  
آنک اوزرینه « پک ابو » دیوب حیواننه بیددی و جابهیه واردی .  
حیوان اوزرنده ایکن ( عمرو بن عاص ) ایله ( شرحیل ) کلوب دیزینی  
اوپدیلر . او دخی آنلری قوچدی، التفات ایلدی .

جابهیه ایکن قدس شریفک وجوه معتبرانی کلوب آنکله کورشدیلر .  
او دخی آنلره امان ویردی و جزیه و یرمک اوزره آنلرایله مصالحه ایتدی .  
ارض فلسطینی ایکی سنجاچه تقسیم و برینی مرکزی ( رمله ) اولمق اوزره .  
( علقمه بن حکیم ) و دیگرینی مرکزی قدس شریف اولمق اوزره ( علقمه  
بن مجزر ) و توجیه ایلدی و بعده قدسه کیتدی .

ارتبون ایله آکاتباع اولانلر، مصالحه یی قبول ایتیبوب مصره صاوشمش  
اولدقلری جهته اهالی، قدس شریفی حضرت عمره تسلیم ایلدیلر .  
رسول اکرم صلی الله علیه وسلم حضرتلری، بلادشامیه نک فتح اولنه جغفی  
اصحابنه خبر ویرمشیدی .

حضرت عمر رضی الله عنه، بو معجزه نک کندو زماننده ظهورندن  
ناشی پک زیاده ممنون اولدینی حالده بوکره نیچه اصحاب کرام ایله برلکده  
قدس شریف شهرینه کمال فرح و شادی ایله داخل اولدی و صخرة الهمی  
سوپوروب تمیزله دی و بر مسجد شریف بناسنی امر ایدرک مدینه منوره یه  
عودت ایلدی .

### ترتیب عطا و تدوین دیوان

وقت سعادتدنبرو اهل استحقاقه بیت المالدن عطیه، یعنی عطار  
احسان اولنه کلوردی . فقط بونلر ایچون درجه و نسبت معینه یوق

ایدی . بکره عمر الفاروق رضی الله عنه حضرتلری ، قدس شریفدن  
عودت ایلدکده استحقاقی درجاته تقسیم و ترتیب و اسامی و استحقاقلرینی  
میین جریده ودفترلر تدوین بویوردی .

ایشته بوجریده ودفترلره ( دیوان ) دینلور . صکره بونلرک مجتمع  
اولدینی محله دخی دیوان دینلمشدر .

حضرت عمر ، اصحاب استحقاقی سابقه اسلام اعتباریله ترتیب ایتمشیدی .  
فقط بعض ذوات کرامی مستثنی برحاله طوتمشیدی .

شویله که : ترتیب دیوان ابجون اصحاب کزین ایله عقد مجلس ایدوب  
حضرت علی و عبدالرحمن بن عوف رضی الله عنهما آکا « کندیکدن باشلا »  
دیدکلرنده حضرت عمر « خیر بن ، رسول الله اقرب اولاندن بدأ ایدرم .  
بعده صره سیله کیدرم » دیدی و ترتیب دیوانه مأمور اولان کاتبلر ، ابتدا  
بنی هاشمی وبعده ابوبکر ایله قومنی وبعده عمر ایله قومنی یازمشلر ایدی .  
حضرت عمر ، کوردکده « بنی هاشمدن صکره حضرت پیغمبره اقرب  
اولانلری صره سیله ترتیب ایدیکیز . عمری ده صره سی کلدکده یازیکیز . بزم  
سعادت دارینه نیلمز ، آنجق محمد علیه الصلواة والسلام سبیلهدر . او ، بزم  
شرفزدر و آنک قومی ، اشرف عربدر . صکره آکا اقریت ، اعتبار اولنور ،  
دیدکدن صکره « والله اکر عجلر ، عملیله واروبده بز عملسز کیدرسهک  
یوم قیامتده حضرت محمد آنلر ، بزدن اولادر . زیرا عملی قاصر اولان  
کیسه یی نسبی ایلرو کوتورمز » دیدی .

الحاصل حضرت عمر ، اصحاب استحقاقی قرابت نبویه اعتباریله ترتیب  
ایتدی و عطا نك مقدارنده سابقه اسلامی کوزه تدی . فقط بعض ذوات  
کرامی مستثنی برحاله طوتدی .

شویله که : عم رسول اولان ( عباس بن عبدالمطلب ) رضی الله عنه حضرتلرینه  
اون ایکی بیک و ( علی بن ابی طالب بن عبدالمطلب ) رضی الله عنه حضرتلرینه  
سکزیبک درهم وبعده علی العموم اهل بدره بشر بیک و بدردن حدیبیه قدر  
اولان اصحاب کرامه دردر بیک درهم تقدیر و ( حسن ) و ( حسین ) و

(ابوذر) و (سلمان الفارسی) رضی الله عنہم حضراتی اہل بدردن اولمادقلری  
حالدہ اہل بدرہ الحاق ایلدی .

اہل بدر ایچندہ عربی الاصل اولمیان بش کیشی وار ایدی کہ (تمیم داری)  
ایله (بلال حبشی) دخی آنلردندر .

حدیبیہ دن صکرہ کی اصحاب کرامہ اوچر بیک درہم تقدیر ایلدی کہ  
بعدالفتح مسلمان اولانلر ایله قادیسیہ محاربہ سنہ قدر جہادده بولنانلر دخی  
بوصنفده داخلدر .

بعده قادیسیہ محاربہ سندہ و اوئنادہ شام غزالرندہ بولنانلردن فوق العادہ  
یارارقلری مشاهد اولان یکرمی بوقدر مشاہیر شجعانہ ایکیشر بیک  
ویرہ رک قادیسیہ وقعہ لرندن صکرہ کیلرہ بیکر ودها صکرہ کیلرہ بشر یوز  
و اوچر یوز درہم تقدیر ایتدی .

زوجات مطہراتہ اونر بیک درہم تقدیر ایتدی . فقط عایشہ یی رسول اکرم  
زیادہ سوردی دیو آکا اون ایکی بیک درہم تقدیر ایلدی . عایشہ رضی الله  
عنہا ایسہ رفیقارندن آریئادی وفضله اولان ایکی بیک درہمی قبول ایتدی .  
حضرت عمر، کندی اوغلی (عبدالله) ہ اوچ بیک درہم تقدیر ایلدیکی خالدہ  
(اسامہ بن زید) ہ درت بیک درہم تقدیر ایتمکله عبدالله « نیچون اسامہ نک  
عطاسنی زیادہ قیلدک؟ بن ، آندن دها زیادہ ایام مشہودده بولندم » دیدکده  
حضرت عمر « رسول اکرمہ او، سندن و آنک باباسی، سنک بابا کڈن دها  
سوکیلو ایدی » دیو جواب ویردی .

حضرت عمر ، سائر نسای دخی درجہ لره تقسیم ایتدی و اہل بدرک  
نساسنہ بشر یوز و آندن حدیبیہ قدر اولان اصحابک نساسنہ دردر یوز  
و حدیبیہ دن صکرہ کیلرک نساسنہ اوچر یوز و قادیسیہ غازیلرینک نساسنہ  
ایکیشر یوز و آندن صکرہ کیلرہ یوزر درہم تقدیر ایلدی .

بوعطیہ ، ہپ سنوی اولوب اصحاب استحقاقدن ہربری مخصّص اولان  
مقدار عطاسنی سنہ بسنہ بیت المال دن آلوردی .

حضرت عمر ، فقیر و مسکینلره دخی قارنلرینی طویوراجق قدر اون

تخصیص ایتمشیدی که بوکا (رزق) دینلوب مشاهره، یعنی ماه بماه ویریلوردی. (صفوان بن امیه) و (حرث بن هشام) و (سهیل بن عمرو) اعظم قریشدن اولدقلری حالده ترتیب مشروح اوزره حضرت عمر، آنلره سائرندن دها آز عطیه ویرمکه «والله بزدن اکرم کیمسه یوقدر» دیدکلرنده حضرت عمر «سابقه اسلام اوزرینه ویریوروز، حسب ونسب اوزره ویریوروز» دیمسی اوزره رینه آنلر دخی (اولیه ایسه یك اعلا) دیدیلر وچیقوب شام جانبنه عزیمت ایلدیلر ووفاتلرینه قدر جهاد ایله مشغول اولدیلر.

عطیه باینده حضرت عمر، عربلرله آزادلو کوله لرینی بولندقلری درجه ده متساوی طوتمشیدی. برکون حضرت عمرک مال مأمورلرندن برینه برقوم کلدکده عربلرک عطیه سنی ووروب آزادلو کوله لرینی ترک ایتمکه حضرت عمر، آکا «کیشی یه مسلم قرنداشنی تحقیر ایتمک قدر کوتولک یتیشور والسلام» دیو تکدیرنامه یازمشدر.

حضرت عمر، بوجه مشروح عطایایی ترتیب ایتدکدن صکره اصحاب کزینه خطاباً دیدی که «بن، برتاجر کیشی ایدم. تجارتله عیالمی کچندیریردم. سز، بنی بوایش ایله مشغول ایتدیکز. نه رأی ایدرسکز؟ بو مالدن خرج ایتمک بکا حلال اولورمی؟» دیدکده هربری برر سوز سویلدیلر. حضرت علی، سکوت ایدیوردی.

حضرت عمر «سن نه دیرسین یا علی؟» دیدی. حضرت علی دخی «سکا وعیالکده کفایت ایده جک قدر معرفدن زیاده سی سکا حلال اولماز، دیدی، سائرخی دخی آنی تصدیق ایتدی.

بناء علیه حضرت عمر، اقوات یومیه سنی بیت المالدن اخذ ایدر و فقط کفایت مقدارینی یك طار طوتمغله امر اداره ده عیالی مضایقه چکر اولدی.

حال بوکه: هب اصحاب کرام، مرتبه لرینه کوره عطیه لرینی آلوب وفاه اوزره کچینور اولدقلری حالده امیر المؤمنینک مضایقه چکمی لایق کورولمדיکندن حضرت (عثمان) و (علی) و (طلحه) و (زبیر) و دیگر



بعض اصحاب کزین رضی الله عنهم حضراتی ، اجتماع ایله حضرت (عمر) ک نفقه سنی زیاده ایتمکی تذکر و تنسیب ایدرک کیفیتی کندوسنه افاده ایتمک اوزره کریمه سی ام المؤمنین (حفصه) رضی الله عنها حضرتلرینک یانه کیتدیلر و کندولرینک اسملرینی میدانه قومقسزین پدرینه بو کیفیتی عرض ایلمسینی رجا ایتدیلر .

حضرت (حفصه) دخی پدرینه نفقه سنک تزییدی خصوصنی لسان مناسب ایله عرض ایتدی . حضرت عمر ، غضبه کلدی و « سنک زوجک رسول اللهک یمده ، کیمده و دوشه مهده حالی نصل ایدی ؟ » دیو صورددی . حضرت (حفصه) دخی « کفاف درجه سنده ایدی » دیو جواب ویردی .

آنک اوزرینه ، حضرت (عمر) بو یوردی که « ایکی رفیق ، یعنی رسول اکرم و ابوبکر ایله بنم حالم ، بریوله سلوک ایدن اوچ یولجی یه بکزر . بری نواله سنی آلدی کیتدی ، منزله ایردی . ایکنجیسی دخی آنک اثرینه اقتفا ایتدی و آکا ایریشدی . صکره اوچنجیسی کلدی . اکر آنلرک اثرینه اقتفا ایدرسه اولاشور و آلا اولاشاماز . »

## وقایع عراق

قادیسه محاربه سندن صکره (سعد بن ابی وقاص) رضی الله عنه حضرتلری اوردوسنه کرکی کبی تقویت ویردکدن صکره امیر المؤمنینک امری اوزره آغرلنی و نسوانی مقدار کافی عسکر ایله قادیسیه ده ترک ایتدی و کندوسی اوردوسیله ایلر و کیتدی .

عسا کر اسلامیة نک مقدمة الجیشنه ایرانیلرک بر اردوسی قارشو کلدی ایسه ده مغلوب اولدقلرندن عسا کر اسلامیة آنلری (بابل) قدر تعقیب ایلدی .

آرقه دن سعد حضرتلری ، ایریشوب بابل اوزرینه یوریدی . ایرانیلر ،



بابل حصارندن چيقوب حربہ کيريشديلر. لکن پريشان اوله رق بر فرقه سي (اهواز) و بر فرقه سي (نهاوند) طوغري قاچدي. بعض امراي ايرانيه دخي (مدائن) وارديلر، کويري بي قيرديلر، تحصنه قرار ويرديلر. بو صورتله بابل شهري، خالي قاله رق اهل اسلام انه کچدي.

### محاصره مدائن

مدائن، دولت ايرانيه نك پای تختي اولوب دجه ساحلنده ایدی. مدینه و قصبه دن مجتمع بر شهر جسم ایدی. بو مدینه لر دن بری (آردشیر) درکه شهرک جانب غریب سنده اولان مدینه در عربلر آکا (بهرسیر) دیمش لردر. بو مدینه، نهرک صاغ یاقاسنده اولوب دیگر مدینه لر نهرک صول یاقاسنده ایدی.

سعد بن ابی وقاص رضی الله عنه حضرتلری، بابلده ایکن بر فرقه ایله (زهره) یی ایلرو کوندردی و دیگر بعض امراي دخي آکا ترفیق بووردی.

آنلر (کوئی) بلده سینه تقربلرنده محافظی اولان (شهریار) مقابله یه چیقدی. فقط کندوسی مقتول و عسکری پريشان اولدی و زهره، کوئی یه کیردی.

متعاقباً حضرت سعد، کوئی یه کلدی و برمدتجک اوراده قالدی و زهره یی ایلرو کوندردی.

زهره (ساباط) طوغري حرکت ایتدکده اهالیسی، عرض اتیاد ایله جزیه ویرمک اوزره عقد مصالحه ایلدیلر.

بعده کسرانک عسکر خاصه سی قارشو کاردی. زهره آنلری بوزدی، پريشان ایتدی.

اوصره ده سر عسکر سعدک برادر زاده سی (هاشم بن عتبہ) بر آرسلان اولدوردی. کسری، آنی آدجیل ایتمیشدی.

بونك اوزرينه سغد حضرتلری، هاشمك باشنی اوپدی و آتی مقدمه الجیشه  
مأمور ایدرك مدینه (بهرسیر) اوزرينه کوندردی .

هاشم ، واسط ذی الحجه ده عسکریله بهرسیره ( اردشیر ) و واروبده  
اوزاقدن ایوان کسری کورندکده (ضرار بن الخطاب) رضی الله عنه «الله اکبر»  
ایشته کسرانك بیاض قصری . رسول اللهك بزمه وعد ایلدیکی بودر ، دیدی .  
واو تکبیر آلدینی کبی هپ عسکر ، بر آغزدن تکبیر آلدیلر .

بعده ، حضرت سعد ایله عساکر سائر دخی فرقه فرقه کلدیلر  
وایوان کسرانی کوردکجه او وجهله تکبیر آلهرق بهرسیری تحت محاصره یه  
آلدیلر .

جزء ثانیه بیان اولندینی اوزره خندق غزا سنده رسول اکرم صلی  
الله علیه وسلم حضرتلری « بکا فارسك آناختارلری ویریلدی . شو آنده  
کسرانك بیاض قصرلرینی کوریورم ، دیو بیورمشیدی . بناءً علیه بوکره  
عساکر اسلامیه ، ایوان کسرانی کوردکاری کبی تکبیر آلدیلر و مداینك  
قرباً فتحندن امین و مطمئن اولدیلر .

## ۱۶ نجی سنه وقایعی

سعد بن ابی وقاص رضی الله عنه حضرتلری ، بروجه بالا مدینه  
اردشیری محاصره ایلدی و بکرمی قدر مانجینق قوردیروب تضییقه باشلادی .  
ایکی آی قدر تمتد اولان محاصره اثناسنده سواریان ، طرف طرف  
ایلغار ایدرك مقابله ایدنلر ، ضرب و اعدام اولنور و اطاعت ایلینلره جزیه  
باغلانور ایدی . بو صورتله دجله نهرینك جانب غریبیمی هپ اسلام الله  
چکدی .

## فتح مداین

محصورینك تاب و طاقی قالمایوب خلال صفرده مدینه اردشیری ترك

وتخلیه و قایق‌لره را کبا دجله نهرینی عبور ایله قارشو طرفه کنار ودجله‌نک جانب غریب‌سنده کی مدینه‌لرده استقرار ایلدیلر .

سعد حضرتلری ، عسا کر اسلامیة ایله برابکده مدینه اردشیره کیردی . نهر دجله‌یی کچوب مداینک قارشو طرفده کی مدینه‌لری ده فتح ایلمک ایستردی که ایوان کسری دخی او طرفده ایدی . لکن ایرانیلر ، مدایندن (تکریت) ، قدر اولان قایق‌لری هپ قارشو طرفه کچورمش اولدقلرندن اردشیره توقفه مجبور اولدی .

بو صروده بر کیمسه حضرت سـعد کلوب دجله‌نک بر کچید یرینی کوستردی واوراده صو ، آنجق آتلیک بلنه قدر چیقاجغنی خبر ویردی . لکن دجله نهری ، کوپوک صاچه‌رق سرعت ایله جریان ایتمکه اولوب عربلر ایسه او یله بیوک نهرلردن عبوره مألوف اولمادقلرندن اول امرده سعد حضرتلری ، اورادن عسکری امراره جسارت ایده‌مدی . بو صروده که واسط ماه صفر ایدی . بمضیلر ، عالم معناده اهل اسلام سواریلرینک دجله اوزرندن کچدکارینی کوروب سعد حضرتلری دخی بو رؤیایی تعبیر سیاقنده عقد مجلس ایلدی و بر کوزل خطبه ایراد ایله نهری کچمک عزمنده اولدیغنی سویلدی .

حضار ، آکا موافقت کوستردی . او دخی ناسی تشویق و تشجیع ایتدی و «اڭ ابتدا کیم کچوبده قارشو کناری طوتار؟» دیدکده (عاصم بن عمرو) ایله آلتی یوز قدر فدایی سه‌چیلدی . عاصم ، آنلره رئیس اولدی . همان آنلری وقیصر اقلری نهر دجله‌یه اوردیلر و قارشو قبی صولرینه واردیلر . ایرانیلر دخی عربلرک آیاغنی قره‌یه باصدیدر مامق اوزره ایران سواریسنی صویه اوردیلر ، عربلری نهر ایچنده قارشولادیلر و کیر و چور مکّه جهد ایلدیلر .

عاصم ، همان یولداش‌لرینه «قطاباً» قارغیلری طوغرو واتکیز . اعدانک کوزلرینه قصد ایدیکیز ، دیمکله عسا کر اسلامیة ، قارغیلریله ایرانیلرک کیمنی اعدام و کیمنی کور ایدرک آنلری دفعله قارشو قبی یی طوتدیلر .

سعد حضرتلری ، عاصمك قارشو قیي بی طوتدینفی کورنجه علی العموم  
عسکرك عبورینه امر ویردی .

هپ عسا کر اسلامیه ( نستعین بالله ونتوکل علیه . حسبنا الله ونعم -  
الوكيل ولا حول ولا قوة الا بالله العلی العظيم ) دیو صیحه ایدرك نهره  
افتحام ایتدیلر .

حیوانلری ، یوزه ردی . قارغیلری ، بر بیوک کول کنارنده بیتمش  
قامشلره بکزه ردی . کندولری دخی حیوانلرینک اوزه رنده اولدقلری  
حالده بر بریله مصاحبت ایلریدیلر .

حضرت سعد ، عسکرك سلامتی ایچون جناب حقه دعا ایدردی .  
سلمان فارسى حضرتلری دخی آنکله یان یانه کیدهرك « اهل اسلامه قره لر  
مسخر اولدینی کبی دریالر دخی مسخر اولور . بویله فوج فوج صویه  
کیردکاری کبی ینه بویله جه ساحل سلامته چیقارلر ، یوللو آکا باعث قوت  
قلب اوله جق سوزلر سویلردی .

فی الواقع سلمانك دیدیکی کبی بر کونه ضایعات اولمق سزین قارشو یاقه یه  
کچدیلر . یالکنز ایچلرندن بریسی ، قیصراغك صرتندن صیریلوب صویه  
دوشمش ایسه ده قعقاع حضرتلری ، آنک طرفه اماله لجام ایدرك آتی  
طوتمش وسالما قارشو طرفه ایصال ایتمش در .

ایرانلر ، بویله کندی حسابلرنده اولمایان بر حالی کورنجه مدایندن  
چیقوب ( حلوان ) طرفه فرار ایتدیلر . کسری ایسه اولجه عیالی حلوانه  
کونده رمشدی . بوجهتله مدائن خالی قالدی .

شهر مداینه اک ابتدا عاصمك فرقه سی وبعده برادرى قعقاعك فرقه سی  
کیردی . زقاقلرده کیمسه یوق ایدی . فقط اهالینک بر قسمی ، ( قصر  
ابیض ) . قاپانمش اولدقلرندن آتی حصر واحاطه ایتدیلر . محصورین ،  
همان جزیه ویرمك اوزره رای وامن ایله آنلره قصر ابیضی تسلیم ایلدیلر .  
حضرت سعد کلدی ، قصر ابیضه قوندی . فراریلرک آرقه سندن بر فرقه  
ایله زهره بی سوق ایتدی ، ایوان کسرای مصلى اتخاذا ایلدی وسکزر رکعت

نماز فتح قیلدی. ایرانیلر، فرار ایدرکن یوکنده خفیف، بهاده آغری شیلردن  
برمقدارینی کوتورمشلر ایسه ده حد و نصابه کلز و تقدیر فیثات اولنه ماز کاتی  
البسه و امتعه و اوانی و اسلحه و تحف و تفاریق و حیوانات و ذخیره دن بشقه  
بیت المالدله کلیتلو تقود دخی برامشلر ایدی .

طرف طرف تعقیبیلرینه مأمور اولان عساکر اسلامیه یتیشهرک آنلرک  
آلوب کوتورمشل اولدقلری اموال و اشیانک چوغنی استخلاص ایدهرک  
مدینه یه کتوروب اموال غنائمک قبض و حفظنه مأمور اولان ذاته تسلیم  
ایتمشلردر .

از جمله ایرانیلردن برجات، یوک استرلریله (نهروان) کوپریسندن  
کچمک اوزره ایکن زهره نك عسکری ، آنلره یتشمش و بو ، یوکلرده  
کسرانک البسه سی و کوکسلکی و مجوهر زرهی و مرصع تاجی ظهور ایتمشدر .  
قعقاع بن عمرو دخی بر ، آتویه یتیشوب اعدام ایتمش و یاننده ایکی هکبه  
ظهور ایش ایدی . برنده بش و دیکرنده آلتی قلیج و برخیلی زرهلر وار  
ایدی. زرهلرک بعضیلری دخی ( هرقل ) ک و ( خاقان ) ک و ( ملک هند ) ک  
و ( بهرام چوبین ) ک و ( نعمان ) ک ایدی که ایرانلور، آنلری محاربه لرده  
اله کچوروب علامت مظفریت اوله رق حفظ ایدرلردی . قلیجلر دخی  
( نوشیروان ) و ( هرمنز ) و ( قباد ) و ( فیروز ) و ( هرقل ) و  
( خاقان ) ک و ( ملک هند ) ک و ( سیاوش ) و ( نعمان ) ک قلیجلرندن  
ایدی .

قعقاع ، آنلری حضور سعه کتوردی. حضرت سعد ، آکا بهرامک  
زرهنی و یردی و قلیجلر حقنده آنی خیر قیلدی. قعقاع دخی هرقلک قلیجینی  
الدی .

بعده سعد حضرتلری ، خمس غنائمه محسوباً کسرانک و نعمانک قلیجلرینی  
و کسرانک تاجیله حلیاتی مدینه منوره یه کونده ردی .

سعد حضرتلری ، اموال غنائمی جمع و خمینی طقوز یوز ده و ده یه تحمیل  
ایله مدینه منوره یه ارسال و باقیسینی عسکره تقسیم ایلدی. عسکرک مقداری



التمش بيك ايدى وجمهسى سوارى ايدى. هر برينك حصه سنه اون ايكيشر بيك درهم اصابت ايلدى. سعد حضرتلرى، مدائنك خانه لرني عسكره تقسيم ايله مدائنه مقيم اولديلر.

خمس غنائم مدينه به كلكده حضرت عمر، آنلرى مسجد ايجنه دوكدوردى ونامى جمع ايله «رسول اكرم» (كنوز كسرى وقيصر، فى سبيل الله صرف اولنه جقدر) ديدىكى كرچكى ايمش باقنيز، ديو بيوردى. (سراقه) كه جزؤ نائيه بيان اولندينى اوزره رسول اكرم، آكا (ياسراقه نصلسين كسرانك بيله زيكلرينى طاقينديغك وقت؟) ديو بيورمشيدى بو كره مسجدده حاضر ايدى. حضرت عمر، كسرانك بيله زيكلرينى كورنجه «ياسراقه! قالق، شونلرى طاقين، ديدى. اودخى قالقدى كسرانك بيله زيكلرينى آلوب طاقيندى. حضرت عمر «رسول اكرم» (بن صانكه سراقه نك اللرنده كسرانك بيله زيكلرينه نظر ايدىيورم) ديو بيورمشيدى. صدق رسول الله صلى الله عليه وسلم، ديدى.

سعد حضرتلرى، عمرلره بادي تعجب اوله جق شيلرى بروجه بالا خمس غنائمه محسوباً مدينه منوره به كونده رديكى صره ده كسرانك (بهار) نام قالچه سنى دخى كونده رمك ايستدى. لكن قيمتى تخمين و تعديل ايتدیره مدى. پارچه لامق دخى ايسته مدى. الحاصل آنى تقسيم ايده مدى. بو جهته عسكره «اكر درت خمس حصه لر بگزدن وازچر سه كز آنى مدينه منوره به كونده رهم. امير المؤمنين، آنى ديله ديكي يره قوسون» ديوب عسكر دخى راضى اولمغله حضرت سعد، آنى مدينه منوره به كوندردى.

بو قالچه، آلتيشر آرشون طول و عرضنده مربع بر بانچه شكلنده اولوب اوزرنده صيرمه طوقومه يولار و نه رلر و آره لرنده صدف و اينجو و ياقوتدن طرحلر و تمثاللر و داللى آلتوندن و يپراقلى حريردن، چيچكلرى آتون و كموش حبه لردن، ميوله لى جواهردن آغالر و ارايمش. قيشين ايوانه دوشه نير و ايام بهارى آنديرر و اكا سره، آنك اوزرنده عشرت ايدرلر ايمش.



مدینه منوره ده آنی دوشه یه جک یر یوق ایدی . حضرت عمر ، آنی تقسیمه یول بولامادی و نه یاپه جغنی بیله مدی . خمس غنائمی تقسیمدن صکره « بونی نه یاپالم ؟ » دیووردی . آنلر دخی اختلاف ایدوب بعضلری « سن بیلیر سین ، دیدیلر . فقط حضرت علی « یا امیر المؤمنین ! الله تعالی علمکی جهل و یقینکی شک قیلمادی . شبهه یوق که دنیادن سسکا آنجق و یردیکک قالور ، دیدکده حضرت عمر ، طوغری سویلدک و بکا خالصانه نصیحت ایلدک ، دیدی و آنی پارچه پارچه گسوب اصحاب کرامه تقسیم ایلدی . حضرت علینک حصه سنه اصابت ایلین پارچه که اک اعلاسی دکل ایدی . صکره حضرت علی ، آنی یکریمی بیلک درهمه صاتمشدور .

### فتح تکریت و موصل و نینوا

اشبواون آلتنجی سنه هجریه واسطنده تکریت شهری دخی فتح اولنمشدر . شویله که : روم جنراللرندن بری ، موصلدن قالقوب بر مقدار روم عسکرله تکریته ورود ایله اطرافنه خندق چویره رک مدافعیه قیام ایلش ونصارا دیننده بولنان ( ایاد ) و ( تغلب ) و ( نمر ) قبیله لری عرمانی دخی اورایه طوپلامش ایدی .

امیر المؤمنینک امری اوزره سعد بن ابی وقاص رخی الله عنه حضرتلری ، دخی برفرقه یه ( عبدالله بن مغنم ) ی امیر و مقدمه الجیشه ( ربی بن افکل ) ی و سوارسی اوزرینه ( عرفجه بن هرثمه ) ی مأمور ایدرک تکریت اوزرینه کوندرمشیدی .

عبدالله بن مغنم ، تکریته واروب قرق کون محاصره ایتدی ، بواشاده محصورین یکریمی درت دفعه شدتلی چیقیش ایدرک حرب ایلدیلر ایسه ده هر دفعه سنده مغلوب و منکسر اولدیلر .

نهایت روملر ، قایقلر ایله دجله نهرینک جانب شرقیسنه عبور ایله فرار ایتک تدارکنده بولندقلری صرده ایاد و تغلب و نمر عرمانی ، اسلامه

میل و عبدالله ایلہ کیزلو مخبرہ ایدرک ویریلن قرار اوزرینہ روملرک قارشو طرفہ مرور ایدہ جکلری کون عساکر اسلامیہ ، ساحل جہتی طوتوب هنوز اسلامہ کلن عربان دخی برو طرفدن هجوم ایتسکلہ روملر کاملاً قلیجدن کچیرلمشدر .

بعده عبدالله بن مغنم ، ربی ابن افکلی موصل و نینوا اوزرینہ کونده رملکہ ربی ، یکی مسلمان اولان ایاد و تغلب و نمر عربانی اوکنہ قاتوب موصل و نینوا اوزرینہ یوریدی .

نینوا ، نهر دجله نك جانب شرقیسنده موصل ، نهر مذکورك جهت غربیسنده برر قلعه ایدی . بو ایکی قلعه اهایسی ، الجزیره عربانندن ایاد و تغلب و نمر قبیله لرینك اهل اسلامه انقیاد ایلہ برلکده حرکت ایلدکلرینی کورونجه حاللرندن مأیوس اوله رق جزیه و خراج و یرمک اوزره ویره ایلہ نینوایی و موصلی ربی به تسلیم ایدیوریدیلر .

بو سفردہ دخی خلیجہ اموال غنائم آلدی . خمسی مدینہ منوره یه کونده ریلوب باقیسی عسکره تقسیم اولندی . سواری حصه سنه اوچر بیک و پیاده لرك حصه سنه بیکر درهم اصابت ایلدی . بو ایکی قلعه نك فتحندن سکره موصل ملحقانندن اولان کردستان بلده لری دخی برر بر فتح اولنمشدر .

## وقعه جُلولا و فتح حُلوان و ماسَبَدان

ایرانلور ، بروجہ بالا مداینندن فرار ایلہ ( جلولا ) نام موقعده طویلانمشلر ایدی که بورادن فارس و آذربایجان و داغستان یوللری آریلور . بوجهتله اوجعیت ، طاقم طاقم آریلق لازم کلور ایدی . حال بوکه « برکره طاغیلور ایسه ک فیما بعد طویلانامیز . بوراده مجتمعاً طوروبده عربلره مدافعه ایتلیزه دیه رك ( مهران رازی ) نام سردارک امری آلتنه کیرمشلر و خندق ایلہ تحصن ایتمشلر ایدی . حضرت سعد ، امیر المؤمنینہ بو کیفیتی عرض ایتدکده « اون ایکی بیک عسکرله هاشمی کونده ر وقعاعی مقدمه الجیشنه

مأمور قیل و ایرانیلرک انہزامندہ قعقاعی ، سواد عراق ایلہ جبل آره سندہ حدود و انغورک محافظہ سنہ تعیین ایت ، دیو امر و اشعار بیورمش اولدیغندن سعد حضرتلری ، اون ایکی بیک کزیدہ سواری ایلہ ہاشمی ، جلولاہ و قعقاعی دخی آنک مقدمہ الجیشہ تعیین ایلہ او جانبہ سوق ایتمشیدی .

ہاشم ، جلولاہ و اروپ سکسان کون ایران اردوسی محاصرہ ایتدی . آره صرم ایرانیلر ، شدتلی چیقیشلر ایتدیلر ایسہدہ ہر دفعہ سندہ منہزم و منکسر اولدیلر . نہایت خلال ذی القعدہدہ قہرمان قعقاعک فداکارانہ هجومیلہ جلولاہ غنۃ فتح اولندی ، ایرانیلرک اکثری قلیجدن کچیریلدی . یوز بیک قدر آدملرینک تلف اولدینی مرویدر . قاچوب قورتولانلری پک آزدرد . آنلرک آرقہ سندن دخی قعقاع سکیردوب خاتقینہ قدر کیتدی .

کسری یزدجرد ، حلواندہ ایکن جلولاہ وقعہ سنی ایشیتدیکی کئی حلوانک محافظہ سنی بر سردارہ احالہ ایلہ کندوسی ( ری ) جانبہ فرار ایتمشیدی . قعقاع ، حلوانہ واردقدہ ایرانیلر ، مدافعہ قیام ایتدیلر ایسہدہ منہزماً فرار ایتملرلہ قعقاع ، حلوانہ کیردی وخیلی مدت اورانک محافظہ سندہ قالدی .

بوکرہ دخی کلئی اموال غنائم الہ کچدی . خمسی بعد الاخراج باقیسی عسکرہ تقسیم اولندی . ہر سواری بہ طقوز بیک درہم ایلہ طقوزر دابہ اصابت ایلدی و خمسنی سعد حضرتلری ( زیاد بن ابیہ ) ایلہ مدینہ منورہ بہ کوندہ ردی .

زیاد ، بو اموالی مدینہ بہ کتوردکدہ امیر المؤمنینک حضورندہ عسا کر اسلامیہ نک نہایدقلرینی ونہ یاپہ بیلہ جکلرینی غایت فصیحانہ و بلیغانہ عرض و بیان ایلدی .

مدینہ منورہدہ اوقدر اموالی آلہ جق ابنہ اولمادیغندن کیجہ او اموالی مسجد نبویدہ ( عبدالرحمن بن عوف ) ایلہ ( عبداللہ بن الارقم ) محافظہ ایلدیلر . فرداسی حضرت عمر ، ناسی جمع ایلہ او اموالی تقسیم ایلدی . ذکر اولنان مظفریتدن صکرہ ہاشم ، جلولاہ مدینہ عودت ایلدکدہ

ایرانیلرک بر فرقه‌سی کلوب (اوه) طرفی طومغله سعد حضرتلری، بر مقدار عسکرله (ضرار بن الخطاب) ی او طرفه کونده ردی. ضرار، (اوه) یه واروب لدی المحاربه ایرانیلری پریشان ایتدی و آنلری تعقیب ایدرک (ماسبدان) و وارد قدده اهایسی طاعلمه فرار ایتش ایسه ده ضرار، آنلری دعوت، اونلر دخی کلوب یرلرنده اسکان ایله آکا مطاوعت و اودخی باده مرقومه ده توقف و اقامت ایشدر.

### متفرقه

رسول اکرم صلی الله علیه وسلم حضرتلرینک جاریه‌سی (ماریه) رضی الله عنها، اشبو اون آلتی سنه‌سی محرم‌نده فوت اولدی. ینه بوسنه حضرت عمر رضی الله عنه، علی بن ابی طالب رضی الله عنه حضرتلریله المشاوره مبدئی محرم اولق اوزره تاریخ هجری بی وضع ایشدر.

ملوک غسانک خاتمه‌سی اولان (جبله بن ایهیم) مقدما اسلام ایله مشرف و لمش ایدو کندن بوسنه او کنده یدکلری چکیلرک مدینه منوره یه واردی. کندوسی کوزل روبه لر و خدای دیبالر کینمش ایدی. حضرت عمر، حجه نیت ایش ایدو کندن اودخی برابر کیندی. کعبه ده طواف ایدر ایکن (بنی قزازه) دن بریسی، اتکنه باصمغله جبله، آکا بر سله اوردی، نورتنی قیردی. او کیمسه، عمره شکایت ایلدی. اودخی جبله یه «یا خصمگی رضا ایت، یا خود قصاص ایدرم» دیمکله جبله «بن بر ملکم. او حریف ایسه اهل سو قدن بر آدمدر. آنک ایچون بکا نیجه قصاص ایدرسین؟» دیدکده حضرت عمر «اسلام، سزک آره کزی جمع ایشدر» دیدی و جبله «بن اوماردم که اسلامده عزتم، زمان جاهلیتده کیندن ده ا زیاده ولا» دیدکده حضرت عمر «اویله در. لکن حکم شریعت کیر و قالماز» دیدی جبله «تنصر ایدر سه م نه اولور؟» دیدی حضرت عمر «تنصر ایدر سه ک بونینگی اورورم» دیدی. جبله «اویله ایسه یارینه قدر بکا

رخست ویر « دیدی . حضرت عمر « ایلہ اولسون » دیدی . جبہ ، اوکیجه اتباعی ایلہ برابر قاچوب قسطنطنیہ کلدی ، تنصر ایتدی واوراده وفات ایلدی .

## اون یدنجی سنه وقایعی

### بنای کوفه و بصره

جانب عراقدن مدینہ منوره یه کلن عسا کر اسلامیه نك لهجه لرنده اثر ضعف کورولدی ولدی السؤال واردقلری بلده لرك وخامت هواسندن اولدینی خبر ویریلدی . حضرت عمر رضی الله عنه ، بو کیفیتی سعد بن ابی وقاص رضی الله عنه حضرتلرندن استعلام ایتدکده سعد حضرتلری « عربلرك مزاجنه آنجق ده وه لرینه موافق اولان یرك هواسی موافق کلور » دیو جواب ویردی . حضرت عمر دخی بر محلك انتخابی ایچون ( سلمان فارسی ) ایلہ سر داش رسول الله اولان ( حذیفه ) نك مأمور ایدلسنی سعده اشعار بویوردی . او دخی ایکینسی کونده ردی .

سلمان ، انباره کلوب نهر فراثك جانب غریبسنده سیر ایدرك حیر ، ایلہ نهر فرات آره سنده واقع ( کوفه ) موقعی بکندی . ( حذیفه ) دخی فراثك جانب شرقیسنده سیر ایلہ او حذایه کلدی و اوراسنی مناسب کوردی .

ایکینسی برله شوب کوفه موقعنده نماز قیلدیلر و مبارک واهل اسلام مرکز ثبات اولماسی ایچون دعا ایتدیلر و دونوب کیفیتی ( سعد ) بیلدیردیلر .

آنك اوزرینه سعد حضرتلری ، قعقاع بن عمرو ایلہ عبدالله بن المغنم دعوت ایلکله یرلرینه برر قائممقام براقوب مداینه کلدیلر . حضرت سع دخی مدایندن حرکت ایلہ اشبو اون یدنجی سنه هجریه محرمنده کوفه

ایندی و دایسته‌ین مداینده مستحفظ صفتیه قالسون . ایسته‌ین کوفه کلسون ، دیو عسکری مخیر قیلدی و کیفیتی مقام خلافته عرض ایتدی .

بحر فارس جانبنده واقع ( ابله ) ناحیه‌سنده کی عسا کر اسلامیة ، مقمدا اوج دفعه بصره موقعنده قونمشلر ایکن ترک ایتمشلر ایدی . بو کره آنلر دخی خلال محرمده تکرار قونوب یرلشهرک بصره شهرینک اعمارینه باشلامشلردر .

اسکان مأموری کوفهده ( ابو هیاج بن مالک ) وبصرهده ( عاصم بن دلف ابو الجریا ) ایدی . ابتدا قامیشدن خانلر یاپیش ایسهده بر قاج ای صکره ایکیسنده دخی حریق ظهور ایتمکه خیلی خساری موجب اولدیغنه مبنی آندن صکره کریچدن خانلر انشاسنه باشلامشدر .

کرك کوفهده وکرك بصرهده ابتدا برر مسجد شریف انشا اولمش ومسجدلر وسط شهر اعتبار اولنهرق آکا کوره‌خانلر بنا و شهرلر توسیع قلمش ایدی .

( حیره ) ده اکاسره دن قاله مهر مر دیره کار بولمغله جلب اولنهرق آنلرک اوزرینه کوفه مسجدنده برسیابان ، یعنی کولکک انشا ایدیلدی ومسجدک حذاسنده حضرت سعد ایچون بر قصر یاپیلدی . بیوک جاده لر ، قرقر وآره لرنده کی یوللر ، یکر میشر وزقاقلر ، یدیشر آرشون اولق اوزره چیزیلدی . ایشته بو وجهله کوفه شهری ، مرکز اداره عراق اولوب سرحدلری درت بلده ایدی که ( حلوان ) و ( ماسبذان ) و ( قرقیسیا ) و ( موصل ) ایدی . حلوانده ( قعقاع ) و ماسبذانده ( ضرابن الخطّاب ) و قرقیسیاده ( عمر بن مالک ) و موصلده ( عبدالله بن مغنم ) سر حد بکلری اولوب غیوبتلرنده یرلرینه برر قائم مقام بر اقرارلر ایدی .

### الجزیره ایلله ارمنیه فتوحاتی

الجزیره اهالیسی ، بالاتفاق حص اوزرینه هجوم ایلک اوزره روملری



تحریرک و تشجیع ایتمکه ایمپراطور ( هرقل ) دخی او طرفه بر اردو کونده رمشیدی .

ابوعبیده رضی الله عنه حضرتلری ، قنسریندن خالد بن الولید رضی الله عنه حضرتلرینی و مواقع سائرمدن دهاسائر امرای عسکرلریله برابر یاننه جلب ایله خارج حصده اردو قوردی و کیفیتی امیرالمؤمنین عمر رضی الله عنه حضرتلرینه بیلدیردی . حضرت عمر ایسه سکر بلدهده فضله بیت المالدن خیلی آت بریکدیروب اوزرلرینه مخصوص مأمورلر و ناظرلر نصب ایتمشیدی . از جمله کوفده درت بیک میری حیوانی بسلتمکده ایدی . ( ابوعبیده ) نک تحریراتی آلدینی کبی آکا امداد ایلک اوزره ( سعد بن ابی وقاص ) . امر نامه کونده ردی .

حضرت سعد دخی هان درت بیک سواری ایله قهرمان ( قعقاع ) ی کوفهدن چیقاردی و برر فرقه ایله ( سهیل بن عدی ) ی رقیه و ( عبدالله بن عتبان ) ی نصیین اوزرندن حران واورفه طرفه و ( ولید بن عقبه ) ی الجزیره عربانسدن ( ربیعہ ) و ( تنوخ ) قبیلهلری اوزرینه و بو اوچ فرقیه امیر اولق اوزره ( عیاض بن غنم ) ی دخی اوجانبه کونده ردی . عسا کر اسلامیه نک بویله طرف طرف مهاجمانی ، الجزیره اهالیسنک معلومی اولنجیه روملره اعانهدن فراغت ایله متفرق اولارق عودت ایله کندی یوردلرینک محافظه سنه سگرتدیلر . بو صورته حص اوزرینه کلن روملر ، یالکز قالدقده ( ابو عبیده ) دخی ( خالد بن الولید ) ایله بالمشاوره روملر اوزرینه هجوم و اقتحام ایله لدی الحاربه غالب کلدیلر و روملرک اردوسنی پریشان ایدرک غنایم کثیره آلدیلر . بو مظفریتسدن اوچ کون صکره قعقاع دخی حصه کلدی و آنک عسکرینه دخی اموال غنایمندن حصه چیقاریلدی .

حضرت عمر ، ابوعبیده به بالذات اعانه ایچون جانب شامه عزیمت ایله ( جابیه ) یقدر کلشیکن بومظفریت خبرینی آلهرق آندن مدینه منوره به عودت ییوردی .

اوتہ طرفہ عیاض بن غنم، الجزیرہ نک اورتہ سندنہ اقامت ایلہ دیگر الجزیرہ امراسنہ امرایدرک (سہیل بن عدی) رقبہ ی محاصرہ ایتدکدہ اہالیسی جزیرہ ی قبولہ مجبور اولدی و (عبدالله بن عتبان) نصیبینہ لدی الورود اورانک اہالیسی دخی کذلک جزیرہ کذار اولدیلر و (ولید بن عقبہ) یہ الجزیرہ عربانک اکثری معاوحت ایلدوب بقیہ سی دخی فرار ایلہ ترک دیار ایلشدر .

ایشته بوصورتلہ الجزیرہ بلدہ لری، برر برر تسخیر و بعدہ (ارزن الروم) و (بتلیس) و (اخلاط) دخی فتح اولمشدر .

اوصردہ شام امیری بولنان یزید بن ابی سفیانک برادری معاویہ بن ابی سفیان دخی ارض فلسطیندن (قیساریہ) نام بلدہ ی فتح ایلشدر .

### بصرہ جانبندہ وقوع بولان فتوحات

(ہرمزان) نام سردارکہ ایرانک یدی مشہور خاندانلرندن برینہ منسوبدر . قادیسیہ دہ منہز مآفرار ایتدکدن صکرہ بلاد (آہواز) مرکز ادارہ سی اولان (خوزستان) کلوب اورالینی ضبط ایلہ بصرہ سرحدلرینہ تعرض ایدر اولدی .

بناء علیہ بصرہ امیری اولان (عُتْبَةُ بْنُ غَزْوَانَ) رضی اللہ عنہ، سعد بن ابی وقاص رضی اللہ عنہ حضر تلرندن استمداد ایلکلہ اودخی اکا امداد ایچون (نُعَیمُ بْنُ مُقَرِّنٍ) ایلہ (نُعَیمُ بْنُ مَسْعُودٍ) ی کوندہ ردی . بوایکی نعیم، بصرہ ایلہ آہواز حدودینہ قوندیلر . عتبہ دخی مهاجریندن (سلمی بن القین) ایلہ (حَرْمَلَةُ بْنُ مَرِیْطَةَ) ی کوندہ ردی . آنلر دخی بصرہ حدودینہ واروب (یحییٰ بن مالک) قبیلہ سنی دعوت ایلدیلر .

بونلر ایسہ قبایل عربدن اولدقلری خالدہ خراسانہ کیدوب کلور اولدقلرندن بودعوتہ اجابت ایلہ ایچلرندن (غالب وائل) و (کلیب بن وائل)

کلبی) کلوب (سلمی) و (حرمله) ایله کوروشدیلر و یوم محاربه ده یاردیم ایتمک اوزره سوز ویردیلر .

تعیین اولنان کون سلمی و حرمله ، عسکرلرینی ترتیب و تعیین ایدرک حرکت ایلدیلر و نعمی دخی قالدیروب برلکده هرمرزان اوزرینه یوریدیلر . بصره عسکرینک امیری سلمی ، کوفه عسکرینک امیری ، نعیم اولدینی حالده هرمرزان ایله حربه کیریشدیلر .

غالب و کلیب ایسه هرمرزانک خط رجعتی قطع ایله سلمی و نعیمه عساکر امدادیه کونده ردیلر .

هرمرزان ، بوحالی کورنجه منهزماً فرارایله نهر (دُجیل) ی مرورایلدی و عساکر ایرانیه دن کلی تلفات وقوع بولدی .

بونک اوزرینه هرمرزان ، ناچار قالدی و طلب صلحه مجبور اولدی . عتبه بن غزواندن بالاسیتیزان دجیل نهری ، طرفین بیننده حدود اولمق اوزره صلحه قرار ویریلدی و حدود اوزرنده مستحفظلر براغیلدی . غالب و کلیب دخی مستحفظلر ایله برابر قالدی .

صکره غالب و کلیب ایله هرمرزان آره سنده حدود منازعه سی ظهور ایتدی . منازعه یه باقق اوزره حرمله ایله سلمی اورایه کیتدی . ایکسی دخی غالب و کلیبی حقی کوردیلر . هرمرزان ایسه بوحکمه قانع اولمایوب نقض صلح ایتدی و اکراددن استعانه ایله عسکرینی تکثیر ایلدی ، آنک اوزرینه عتبه دخی امیرالمؤمنینک امری اوزره اصحاب کرامدن ( حَرَقُوصُ ) ی هرمرزان اوزره رینه کونده ردی .

( سوق اهواز ) یاننده وقوع بولان محاربه ده هرمرزان ، منهزم اوله رق ( رَاهُزْمَنْ ) نام بلده یه فرار ایلدی .

حرقوص دخی سوق اهوازی ضبط ایله آنده استقرار و حکومتی توسیع ایلدی ( تَسْتَر ) قدر اولان بلاد ایرانیه یی اله کچوردی و فتوحاتی امیرالمؤمنینه یازدی . اموال غنائمک خسنی تقدیم وارسال ایتدی و امیر المؤمنینک امریله ( جزء بن معاویه ) یی هرمرزانک اوزره رینه کونده ردی .

اودخی (سُرق) بلده سنی ضبط و اطرافه طاغلمش اولان اها لیسنی جزیه و یرمک اوزره اطاعته دعوت ایلدی. آنلردخی کلوب مملکتلرنده استقرار ایله جزیه گذار اولدیلر. حرقوص، اهواز جانبنده قلوب جزء بن معاویه، ایسه قنالر آچهرق و خالی یرلری احیا ایدرک احوالی بی معمور ایشدر، هرمران دخی اهل اسلامک ضبط ایلدیکی یرلر، کندولره قالمق اوزره عقد مصالحیه مجبور اولمشدر.

### بحرین سفری و بصره نك بعض احوالی

بحرین امیری علا بن الحضرمی رضی الله عنه حضرتلری، مرتدین محاربه لرنده بك بیوك شان و شهرت قازانمشیدی. صکره سعد بن ابی وقاص رضی الله عنه حضرتلرینک مظهر اولدیغی مظفریتلر، سائرینک صیت و شهرتی باصدیردی. علا حضرتلری، آکا غبطه ایدرک ممالک ایرانه غزا ایتک ایستردی، لکن بحریندن بحرأ کچمکه مجبور ایدی. حضرت عمر رضی الله عنه ایسه اهل اسلامک بك ایلرولره طوغری یاییلوب طاغیلما لرندن قوجونور و علی- الخصوص جالب مخاطرات اولان سفر بحرین صاقینور ایدی. بناءً علیه هب امرایی سفر بحرین منع ایتمشیدی.

علا حضرتلری، قارشودن سیرجی کبی طور مقدن اوصانوب ناسی غزایه تشویق و اوچ فرقه ترتیب و برینه (جارود بن معلا) بی و دیگرینه (سوار بن همام) ی امیر نصب ایتدی و جمله سنک آمری اولق اوزره (منذر بن ساوی) نك اوغلی (خلید) ی دخی برفرقة ایله مأمور ایلدی. جمله سنی بحریندن سفینه لر ایله (اصطخر) جانبنه کچیردی. اوقییده ایسه (هرید) [\*] نام سردار معیتده بر ایران اردوسی وار ایدی.

ایرانلیر، ساحل بحره اینوب سفینه لر ایله عساکر اسلامیه آره سنه [\*] هرید: سکون را و فتح با ایله مجوسده پیشوا معناسنه درکه آتشکده خدمتنده اولوب ماینلرنده قاضیلق و فصل حکومت ایدر. نصاراده بطریق و پسقبوس منزلده در. بعضلر عندنده حاکم آتشکده به اطلاق اولنور. برهان قاطع ترجمه سی.

کیردیلر . عسا کر اسلامیه ، خط رجعتلرینک انقطاعندن ناشی تلاشه  
دوشدیلر . خلید ، آناری جنکه تشویق ایتدی . او یله نمازینی قیلاقدن  
سکره جنکه طوتوشدیلر و (طاوس) نام محله پک شدتلی جنک ایتدیلر .  
جارود ایله سوار ، شهید اولدی . خلید ، عسکره جسارت و یروب  
جنکه دوام ایتدی . ایرانیلر ، پک چوق تلفات و یردی .

لکن سفینه لر ، الده اولمادیغندن عسا کر اسلامه شاشقینلق کلدی . بناءً علیه  
قرردن طولاشه رق بصره یه وارمق اوزره حرکت ایلدیلر ایسه ده ایرانیلر ،  
هر طرفدن احاطه ایتمکله بر یرده اردو قوروب تدافعی حرکت مجبور اولدیلر .  
حضرت عمر ، بو کیفیتدن آگاه اولدقده همان بصره امیری اولان عتبه  
بن غزوانه امرنامه کونده ردی و مکمل براردو ایله عسا کر اسلامیه یه امداد  
ایلسی ایچون امر و یردی و علا حضرتلرینک او یله بلا استیذان بر خطری  
حرکت جسارت ایلدیکی ایچون برنوع جزا اولمق اوزره آنی عسکر یله  
برابر سعد بن ابی وقاصک معیتنه مأمور بیوردی .

عتبه ، امیر المؤمنینک امری اوزرینه اون ایکی بیک کزیده سواری  
ترتیب ایدرک (خلید) ک امدادینه کونده ردی . بو عسکرک ایچنده (عاصم  
بن عمرو) و (عرفجة بن هرثمه) و (أحنف بن قیس) کبی مشهور ذاتلر  
وار ایدی . و جمله سنک اوزرینه (أبوسبرة بن ابی رهم) امیر ایدی .

بو عسکر ، استرله بینوب آت و قصر اقلرینی یدک چکدرک ساحل طریق یله  
طولاشدیلر و خلیدک بولندینی محله اولاشدیلر . ایرانیلر ایله بر خونریزانه  
حربه کیریشدیلر ، مظفر اولوب پک چوق اموال غنائم آلدیلر و خلیدی  
اردو سیله برابر قورتاروب بصره یه کتوردیلر .

ایشته بو واقعه ، بصره نک شهرتی جالب و اهمیتتی موجب اولمشدر .  
آنک اوزرینه (عتبه بن غزوانه) امیر المؤمنیندن بالاستیذان حجه کیمش  
و عودت ایله مدینه منوره یه و رودنده بصره امارتندن استعفا یتمش ایسه ده  
حضرت عمر ، قبول ایتیموب بصره یه کونده رمشیدی . لکن اثنای راهده  
فوت اولغله (مغيرة بن شعبه) بصره امیری نصب اولنمشدر .

مغیره ، دهات عربدن اولوب هرکس آکا عرض اتقیاد ایتدی . او  
دخی بصره امورینی تنظیمه باشلادی . لکن چوق کچیوب زنا ایله اتهام  
اولندیغندن حضرت عمر ، آنی عزل ایله ( ابوموسی الاشعری ) بی بصره  
امیری نصب ایتدی و مغیره ایله شاهدری مدینه منوره یه جلب ایله محاکمه  
ایلدی . لکن زنا جناحتی ثابت اولمامشدر .

### فتح ( رامهرمز ) و ( تستر ) و اسارت ( هرمزان )

بالاده بیان اولندیغی اوزره هرمزان ، بصره امیری ایله عقد مصالحه  
ایدرك ( رامهرمز ) بلده سنده اقامت ایلمکده ایدی .

کسری یزدجرد ایسه بتون ایران خلقی تشویق و تشجیع ایدرك  
پیدرپی هرمزانه امداد کونده رمکده اولدیغی حالده ( اهواز ) اهالیسنی دخی  
حربه قیام ایتک اوزره تحریک و افساد ایلیشیر ایدی .

سرحد بکلری ، کیفیت لای الاطلاع امیرالمؤمنینه انہا ایتدیلر .  
امیرالمؤمنین دخی هرمزانه قارشو ( نعمان بن مقرن ) معیتله کوفه دن  
بر ازدو سوقی سعد بن ابی وقاصه ( سعد بن عدی ) معیتله بر اردو سوقی  
دخی ابوموسی الاشعری یه یازدی . ( ابوسبرة بن ابی رهم ) کده ایکی اردویه  
امیر اولماسنی امر ایتدی .

نعمان ، کوفه عسکريله طوغری رامهرمز بلده سی اوزرینه کیتدی .  
هرمزان ، آنی خبر آلدیغی کبی خوف ایدرك ( تستر ) بلده سنه قاچغله نعمان  
دخی رامهرمزی ضبط ایتدی . بصره عسکری ، سوق اهوازده ایکن  
کیفیتدن خبردار اولدقلرندن طوغری تستر اوزرینه کیتدیلر . نعمان دخی  
رامهرمزدن قالقوب تستره عزیمتله هپ اوراده برلشهرک تستری محاصره  
ایتدیلر . چند ماه ممتد اولان محاصره اثناسنده ایرانیلر ، خروج ایله شدتلی  
محاربه لر وقوع بولدی . نهایت صویولندن هجوم ایله تستره کیریلدی ،  
عساکر ایرانیه افنا ایدیلدی . هرمزان ، ایچ قله یه قیاندی و حضرت عمرک  
حکمنه راضی اوله رق تسلیم اولدی .



اموال غنائمك خمسنى بعدالاجراج عسكره تقسيم اولندقدده سوارى حصهسنه اوچ بيك و پياده حصهسنه بيك درهم اصابت ايلدى .

ابوسبره ، اموال غنائمك خمسنى وهرمرزاني ( انس بن مالك ) و ( اخنف بن قيس ) و ديكر بعض ذوات ايله برلكده مدينه منورهيه كوندهردى . كندوسى نعمان ايله برابر منهرمينى تعقيب ايدرك ( سوس ) اوزرينه كيتدى . اصحاب كرامدن ( زر بن عبدالله بن كليب ) دخى برفرقه ايله ( جنديسابور ) اوزرينه حركت ايتدى .

بروجه بالا خمس غنائم ايله نزد خليفهيه كوندهريش اولان انس و اخنف ، مدينه منورهيه تقربلرند وهرمرزاني البسه رسميه سيله اصحاب كرامه كوسترمك اوزره صرمهلى ديبالردن معمول البسهسنى و يا قوت ايله مرصع تاجنى كيدرديلر و برنمايش فوق العاده ايله مدينه منورهيه كيدرديلر . حضرت عمرى صورديلر ، مسجد شريفده اولديغنى خبر آلوب اورايه وارديلر .

كورديلر كه : حضرت عمر ، مسجدده بورنوسنه بورونمش . قامچيسى النده اولديغنى حالده اوويور . آنك ياننده اوطورديلر . هرمرزان « عمر نرده ؟ » ديدى « ايشته بو » ديديلر « ياهانى بكجىلىرى و قوجىلىرى ؟ » ديو صوردى . « آنك بكجيسى و قوجيسى ، يازيجيسى يوقدر » ديو جواب ويرديلر . « اويله ايسه پيغمبر اولمالى » ديدى « خير پيغمبر دكل ، بلكه پيغمبرلرك عمليله عمل ايدر » ديديلر . حضرت عمر ، آنلرك سسلرندن اوياندى و قالقوب اوطوردى . هرمرزانه باقوب « هرمرزاني ؟ » ديدى « اوت » ديدكلرند « الله حمد ايدر كه اسلام ، بونى و امثالنى ذليل قيلدى » ديدى و درحال اوزرنده كى البسهينى چيقارتدى و خفيف البسه كيديرتدى و آكا ديدى كه « اى هرمرزان ! قدرك نهايتنى و امرالهيئك عاقبتنى فصل كوردك ؟ » هرمرزان ديدى كه « يا عمر ! ايام جاهليتده الله ، بزي و سزى باشلى باشمزه براقدى . بزده سزه غالب اولدق . وقتا كه الله ، سزكله برابر اولدى ، بزه غلبه ايتديگنز » .

بعده هر زمان، مسلمان اولدی. حضرت عمر دخی آکا سنوی ایکی بیک درهم عطا تقدیر و تخصیص بیوردی.

### فتح سوس و جندیسابور

هر زمانک برادری (شهریار) سوسده محافظ ایدی. بروجه بالا ابوسبره، سوسه واروب حصر و تضییقه ایتدکده اهالیسی، ویره ایله سوسی تسلیم ایتدیلر. بوسره ده عساکر ایرانیه، نهاننده اجتماع ایتدکده نعمان بن مقرن، کوفه عسکریله او طرفه حرکت ایلدی. زربن عبدالله دخی برمدت جندیسابوری محاصره ایتدکدن صکره صاحباً فتح ایلدی.

### اون سکزنجی سنه وقایعی

#### ظهور قحط و وبا

بوسنه جزیره العربیه یا غمور یا غمادی. یرلر قوروددی، طوپراق، کول کبی روزکار ایله اوچار اولدی. انسانلر، حیوانلر آچ قالدی. حضرت عمر، امرای اطرافدن استمداد ایلدی. ابتدا سوریه امیری ابوعبیده رضی الله عنه حضرتلری، درت بیک یوک ذخیره کونده ردی. ارض فلسطین امیری عمرو بن عاص رضی الله عنه دخی جانب مصردن ذخیره تدارک ایدمک بحر قلزمندن سفینه ایله سوق ایتشد. بوطریق ایله مدینه منوره ده بوللق پیدا اولدی.

حضرت عمر، ناس ایله برابر یا غمور دعا سنه چیقدی و رسول اکرم صلی الله علیه وسلم حضرتلرینک عمتی عباس رضی الله عنه حضرتلرینک لندن طوتدی «یارب! پیغمبریکک عمتی ایله سکا تقرب و توسل ایدرز» دیه رک دیز چوکدی، کال تضرع ایله دعا و نیازه باشلادی. اوزمان حضرت

عباس دخی جناب حقہ یالواریر وکوزلرینک یاشلری صقالندن آشاغہ دوکولور ایدی .

در حال بولو طر بلوردی، یا غمور یا غمغه باشلادی. او وقته قدر حضرت عمر، دیز چوکوب طور و یوردی. قرابت نبویہ نك انظار انا مده شان و شرفی ازدیاد بولدی. هر کس تبرکاً حضرت عباسک اتکلرینه یا پیشور اولدی .

ینه بو سنه سوریه قراسندن (عمّاس) نام قریه ده طاعون ظهور ایتدی و اطرافه یاییلدی. آندن یکریمی بش بیک قدر آدم ایله برابر دمشق شام والیسی (یزید بن ابی سفیان) و (حارث بن هشام) و (سهیل بن عمرو) کبی مشهور ذاتلر فوت اولدی .

حارث بن هشام، کندی اهل بیتندن یتیمش کیشی ایله شامه کلشیدی. بونلردن یالکیز درت نفری عودت ایدم بیلدی. (یزید بن ابی سفیان) کیرینه برادری (معاویه بن ابی سفیان) دمشق شام والیسی نصب و تعیین بویورولدی. بو آراق بصره جهنتمده طاعون ظهوریله اورالرده دخی بک چوق آدملر فوت اولدی .

بروجه بالا شامده طاعون ظهورنده حضرت عمر، مدینه دن شامه عزیمتله (سرغ) نام قریه کلدکده سوریه امراسی کلوب کندوسیه کوروشدیلر و طاعونک شدتی بیان ایتدیلر. شامه کیرمک، یا خود کیرو دونمک حقنده صحابه نك رایلرندم اختلاف وقوع بولدی. حضرت عمر، کیرو دونمک رأیی ترجیح ایتدی و عودت امرینی ویردی. عبدالرحمن بن عوف رضی الله عنه حضرتلری بر محله اولوب او ائسادم کلدی. وبا حقنده بر حدیث شریف روایت ایتدی. شویله که رسول اکرم دن ایشیتدم (بریرده وبا اولدیغنی ایشیدیرسه کز اورایه کیتمه یگ و بولاندیغکیز یرده وقوع بولورسه آندن فراراً چیقما یگ) دیو بویوردی، دیدی و عودت رأینده بولنلرک اجتهادلرندم اصابت ایلمش اولدقلری ثابت اولدی .

سوریه امیری ( ابو عبیدہ بن الجراح ) دخی طاعوندن وفات ایلدی  
وقبل الوفات ( معاذ بن جبل ) ی امارت قائم مقاملغنه انتخاب ایلمش ایسه ده  
متعاقباً اودخی بوعلتدن کیتمش و ( عمرو بن عاص ) ی قائم مقاملغنه انتخاب  
ایتمش ایدی . ( عمرو بن عاص ) ناسی آلوب طاغلره چیقاردی و بحکمة الله  
تعالی طاعون مندفع اولدی .

معاذ بن جبل رضی الله عنه حضرتلری ، فقهای اصحاب کرامدن بر  
ذات جلیل القدر ایدی .

ابو عبیده رضی الله عنه حضرتلری ایسه عشره مبشره دن اولوب ترجمه  
احوالی یوقارولرده کچدی . نه قدر بویوک بر ذات جلیل الصفات اولدینی  
آکلاشیلدی . تکراره حاجت یوقدر . حضرت عمر ، آنی ولی عهد  
ایلمک ایستردی .

لکن کندوسندن اول فوت اولمشدر .

بروجه بالا حضرت عمر ، مدینه منوره یه عودت ایلدی ایسه ده طاعون  
برطرف اولدقدنصکره حضرت علی بنی مدینه منورده قائم مقام بر اقوب  
کندوسی سوریه نك احوالی تحقیق ایتمک وبومصیبت عظیمه دن قورتولوب ده  
بر حیات قالانلره تسلیت ویرمک اوزره ( ایلَه ) طریقیله جانب شامه عزیمت  
بویوردی .

ایله یه وروندنه کوملکی یرتیلیمش ایدوکنندن دیکمک و ییقامق اوزره  
آنی ایلَه بسقمونه ویردی . او دخی دیکوب ییقادقدن باشقه کندوسنه  
بر یکی کوملک دیکوب ویردی . حضرت عمر ، آنی قبول ایتمیوب اسکی  
کوملکفی کیدی وشامه کلدی . نماز وقتی اولدی . کندوسی امام اولوب ده  
جماعت مسلمینه نماز قیلدیراجق اولدقدن بعضیلری « یا امیر المؤمنین ! بلالَه  
امر ایسه کده مؤذنک ایسه » دیوب اودخی امر ایتدی . حضرت بلالک  
قلبی ایسه آتش فراق نبوی ایلَه داغدار و حزین اولوب او قدر سوزشلی  
ومؤثر بر اذان ویردی که هپ حضارک تویلری اورپردی واصحاب کرام ،

بالاك سسنى ايشيتدكارى كې اينن وحنين ايله آغلاديلر وتابعينى دخى  
آغلاديلر .

فخر عالمك ، وفاتى كونندىرو اهل اسلامك او مرتبه آغلادىنى  
كورولمه مشدر .

حضرت عمر ، سوريه مصالحنى تنظيم وتسويه ايتدكن صكره ذى القعدة ده  
مدينه منوره يه عودت ايلدى .

بوسنه ( شريح بن الحارث الكندى ) يى كوفه يه و ( كعب بن سوار  
الازدى ) يى بصريه قاضى نصب ايتدى .

بوشريح ، مشهور ( قاضى شريح ) دركه وقت سعادت يه يتشمش ايسه ده  
رسول اكرمى كورمك شرفه نائل اولمادىنى جهته تابعيندن معدوددر .  
بك چوق سنه لر كوفه ده قاضىلق ايتمشدر . عدل وحقانيت مقامنده نامى  
ضرب مثل اولمشدر .

## ۱۹ نجى سنه وقايعى

اشبو اون طقوزنجى سنه هجريه خلالنده مدينه منوره جوارنده  
واقع ( حرّة ليلي ) نام موقعه ده آتش ظهور ايله صو كې آقدى .  
حضرت عمر ، رضى الله عنه تصديق اولمىنى امر ايتدى . هر كس صدقه  
ويردى . آتش دخى سوندى .

بوسنه حضرت عمر ، ناس ايله مككه كيتدى . حج ايتدى وبو ائنده  
حصص اوزرينه مأمور اولان ( سعيد بن عامر بن حذيم الجمحى ) وفات  
ايلدى . فضلاى اصحاب كرامدن ايدى . رضى الله عنه .

بكن سنه جزيرة العربده ظهوره كان قحط وغلا واكثر بلاد اسلاميه ده  
ظهور ايدن وبا بليته لر ينك سر سملكى خيلى وقت باقى اولدى ونجه تشبثات  
مهمه كيرو قالدى . فقط عمرو بن عاص ، بو ائنده بروج آقى مصر سفريله  
مشغول ايدى .

چونکه : زمان جاهلیتده ( عمرو بن عاص ) رضی الله عنه ، تجارت طریقله جانب قدسه کلدیکی وقت برتقریبله اسکندریه کیدوب، دیارمصرک ثروت و یسارینی کورمش اولدیغندن فتح مصره او قدر حریص ایدی که طاعون عمواسک ویردیکی پریشانلق آنک عزمنه اصلا فتور کتورمدی . اقدجه حضرت عمر ، جانب شامه کلدکده عمرو بن العاص ، آکا مصرک احوالی شرح وایضاح ایله مصر سفری ایچون رخصت ایستدکده حضرت عمر ، عساکر اسلامییه یی طاغیتمق ایسته مدیکندن رخصت ویرمه مش ایسهده عمرو بن عاص ، بوبخی تکرار به تکرار آچهرق و حضرت عمری تشویق و ترغیب ایدرک نهایت رخصت قوپارمشدی .

بناءً علی ذلک ، بو ائاده درت بیک قدر سواری ایله جانب مصره عزیمت و حضرت عمره عرض و اشعار کیفیت ایئشدی .

( عَرِيش ) . ورودی عید اضحایه مصادف اولغله اوراده بر قوچ قربان ایلدی وهان دیار مصره کیروب ( فَرَمَا ) بلده سنده جنکه باشلادی .

چونکه : اوراده روملرک خلیجه مستحفظ عسکری بولندیغندن شدیداً مقاومت قیام ایله همان بر آی قدر مدافعه ایتشلردر . او زمان قطعاً مصریهده آتی میلیون قدر قبط قومی اولوب آنلری تحت انقیادده طوته جق قدر عساکر رومیه دخی موجود ایدی . علی الخصوص او زمان مقرامارت و کرسی ولایت اولان ( اسکندریه ) شهرنده پک چوق روم عسکری وار ایدی ولدی الحاجه استانبولدن سفائن ایله عساکر کافیه سوق اولنه جنی دخی درکار ایدی .

شو حاله نظراً عمرو بن عاصک درت بیک سواری ایله مصره کیرمسی ، عقل و حکمتک خارجنده بر جرأت قیلندن کورونویور . لکن قبط قومی ، روملرک اطوار متغلبانه و معاملات متحکمانه سندن اوصانه رق آنلرک تحت تحکمندن قورتولمق آرزو سنده ایدیلر . رئیس لری اولان و مصر والیسی مقامنده بولنان ( مَقْوِس ) دخی قومی بو محکومیتدن قورتارم بيلمک ایچون



فرصت کوزه تمکده ایدی . فقط قبط قومی خیلی مدتدنبری خرسیتانلنی قبول ایشلر ایسهده اسکندریهده شایع اولان مذعب منازعهلری هرکی شاشیرتمشدی .

عمرو بن عاص ایسه یک جرأتلی ومدبر وفوق العاده جن فکری بر ذات ایدی . قبط قومیه نه درلو مخابره ایتدی وآنلره نه درلو لسان قوللاندی بیلیمیز . فقط اسکندریهده قبطیلرک ( ابو میامین ) نامنده بر یسقبوسی وار ایدی . عمروک فرمایه ورودینی لدی الاستماع قبطیلره . آرتق روملرک بوراده حکم وحکومتلری قالمادی . هان ( عمر وبن عاص ) ایله کوروشک وایوشک ، دیویازمش اولدیغنه مبنی قبط قومی ، روملره اعانه ایتیموب بالعکس عمرو بن عاصه معین اولمشلر ایدی .

## ۲۰ نجی سنه وقایعی

بناءً علی ذلك ، عمرو بن عاص رضی الله عنه ، آ ز وقت ظرفنده (فرما)نی فتح ایتدکن صکره خیفجه مقاومتلر کوروب کچوره رک وعسکرینی یایوب اعدانک کوزلرینه چوق کوسترمک کبی خدعهلر اجرا ایده رک ( بلپس ) . واردی برآی ظرفنده آنی دخی فتح ایتدکن صکره حالا ( اسکی مصر ) دینلن محله کلدی ، اوردو قوردی واوراده بولنان ( یونه ) قلعه سنی محاصره ایتدی . فقط قلعه ، مستحکم اولوب روملرک بوراده کثرتی دخی اولدیغندن فتیحی صعب ودشوار اولمشدر .

حضرت عمر رضی الله عنه ، بوجه بالا عمرو بن عاصک مصره عزیمتی عثمان ذی النورین رضی الله عنه حضرتلرینه بیان ایتدکده حضرت عثمان « یا امیر المؤمنین ! عمرو ، جری ومقدمدر وکندوسنده حب امارت واردر . قورقارم که احتیاطسز حرکت ایدوبده مسلمینی بر مهلکهیه دوشورمهیه » دیمش اولدیغندن حضرت عمر ، عمرو بن عاصه امداد ایچوز

(مقداد بن الاسود) و (عبادة بن الصامت) و (خارجة بن حذافة العودی) رضی الله عنهم کبی نادرالوجود امیر لر معیتله جانب مصره کونده زیلک اوزره اون ایکی بیک عسکر ترتیب ایلشدر .

او ائناده ایسه عشره مبشره دن زیبر بن العوام رضی عنه الملک العلام حضر تلری ، غزا نیتله انطاکیه سرحدینه کیتمک ایستبور دی .

حضرت عمر ، آکا « ولایت مصره رغبتک وارمی؟ » دیو صور دقده « خیر ، والیک ایسته م . فی سبیل الله جهاد و غزات مسلمینه اغانه و امداد ایلک ایسترم و مصره کیدرم . عمرو بن العاص ، اکر فتح ایلمش ایسه ایشنه مداخله ایتیموب آنجق مرابط اولق اوزره بعض سواحله اینرم و اکر هنوز مصری فتح ایتماش ایسه آکا معین اولورم ، دیمکله حضرت عمر ، آنی مذکور عسکر ایله امیر لک جمله سی اوزرینه امیر ایتدی .

حضرت زیبر ، بو اون ایکی بیک عسکر ایله مصره ایریشدی ، عمرو بن العاص ایله بولوشدی . عمرو ، یونه قلعه سی تضیق ایتمکده ایدی .

مقوقس ، عمروک او وجهله ایلروله دیکنی لدی الاستماع اسکندریه دن چیقوب یونه قلعه سنه کلش و مدفعیه قیام ایلمش ایسه ده اهل اسلامک بطش و شدتی کوروب خوف ایدرک قلعه نک محافظه سی روم جنرالنه ترک ایدوب کندوسی بعض رؤسای قبط ایله برلکده قایقلر ایله قارشو طرفده کی آطیه کذار ایتشدی .

عمرو بن العاص ، مانجیق قوروب قلعه یی تضیق ایلکده ایدی . حضرت زیبر ، آکا خطاباً « بن ، فداییلک ایدم جکم . اومارم که الله تعالی او یوزدن بو قلعه یی فتح ایلیه » دیدی و قلعه دیوارینه زردبان دایایوب یوقارویه چیقدی ، تکبیر کتوردی . عسکری دخی آنکله برابر تکبیر کتوردیلر . اهل بدر دن ( محمد بن مسلمة الانصاری ) دخی بعض مجاهدین ایله برابر زردبانه سکیردوب یوقارو چیقمغه باشلادیلر . حضرت زیبر ، دال قلنج اولدینی حالده قلعه ایچنه آتیلدی . روملر ، هپ عساکر اسلامیه هجوم و اقتحام ایتدی ظنیه خوف و تلاشه دوشه رک قویه سکیردوب عمرو

بن عاصدن رأى و امان ديله ديلر . اودخى امان و یرمکله قپوي آچديلر .  
حضرت زبیر دخی آنلر ايله برابر قپودن چيقوب عمروك ياننه كلدی .  
بونك اوزرينه مقوقس ، عمرو بن عاص ايله مكمله ايجون ايلجيلر  
كونده ردی . عمرو بن عاص دخی قوم قبط حقنده اولان وصیت نبويه  
سويلى . شويله كه : رسول اکرم صلى الله عليه وسلم حضرتلرندن (مصرى  
فتح ايتديككئزده اهاليسنه ايلك ايديكز . زیرا آنلرک رحم و صهریتلری  
واردر ) دیو بر حدیث شریف روایت اولمشدر . قوم قبطك صهریتلری ،  
حضرت اسماعیل علیه الصلوة والسلامك والدهسى (هاجر) دن و رسول  
اکرم صلى الله عليه وسلم حضرتلرينك اوغلى ابراهيمك والدهسى اولان  
(ماریه قبطیه) دن طولاييدر .

مراسله و مکمله نك نتیجه سنده سنوى معین المقدار جزیه و یرمک  
اوزره مقوقس ، مصالحیه موافقت ایلدی . لکن روم جنراللرندن اولوب  
ارض فلسطینده عمرو بن عاص ايله محاربه و منهزماً مصره فرار ایتمش اولان  
(ارتبون) صلحه موافقت ایلوب بغته عساكر اسلامیه اوزرينه هجوم  
ايتدی . وقوع بولان پك قائلی بر محاربه ده کندوسی مقتول و عسکری  
بریشان اولدی . عساكر اسلامیه ، پك چوق اسیر و اموال غنائم آلدی .  
بعده عمرو بن عاص ايله مقوقس بیننده مقرر اولان شرائط اوزره بر  
معاهده نامه تنظیم و امضا قلندی . روملردن بو شرائطه راضی اولانلر ،  
مصرده قالمق و اولمایانلر، چيقوب کیتمک خصوصی دخی معاهده نامهیه درج  
اولندی . بو معاهده نامهیه عمرو بن العاصك کولهسى و سنجاقدارى اولان  
(وردان) یازدی و عمرو ايله برابر امضا ایلدی . زبیر بن العوام ايله  
اوغوللری (عبدالله) و (محمد) دخی شاهد یازیلدی . قوم قبط ، بو عهده  
موافقت ایلدی . عمرو بن العاص دخی خارج بلدهده فسطاطنی ، یعنی  
چادرینی قوردی و اجرای احکامه باشلادی . بناءً علیه بؤرایه (فسطاط)  
دنیلدی .

بروجه بالا مصرک فتحنده زبیر بن العوام ايله سالف الذکر ایکی اوغلی

و امير الجيـش اولان عمرو بن العاص و سـنـجـاقـداري وردان و زبير ايله برابر نردبانه چيقانلردن (محمد بن مسلمة الانصاري) و فرقه اميرلري اولان (مقداد بن الاسود) و (عبادة بن الصامت الانصاري) و (خارجة بن حذافه) دن بشقه بك چوق صحابي وار ايدي .

از جمله (ابوذر الغفاري) و (ابو الدرداء) و (ابو ايوب خالد بن زيد الانصاري) و (مسلمة بن مخلد الانصاري) و (عبدالله بن سعد بن ابى سرح العامري) و (ابو عبد الرحمن يزيد بن انيس الفهري) و حضرت (عمر بن الخطاب) ك اوغلى ايله (عمرو بن العاص) ك اوغلى (عبدالله) و (شرحيل بن حسنه) نك اوغوللري (عبد الرحمن) و (ربيعه) و رسول اكرمك معتقلرندن (ابورافع) حين فتحده حاضر ايديلر .

### فتح اسكندريه

مقوقس، بروجـه بالا (عمرو بن العاص) ايله عقد مصالحه ايلديكني قسطنطينيه قيصرينه يازد قده قيصر، بو معاهدهني ومقوقسك حركتنى رد و تقييح سياقنده مقوقسه يازديني امرنامه سنده « مصره كلن عربلر، اون ايكي بيك نفر دن عبارتدر . مصرده حد و حسابـه كلز قبط قومى وار . قبط ، اكر محاربه دن نكول ايله عربـه جزيه ويرمكى ايسترلر و آنلري بزم اوزر يمزـه ترجيح ايدر لر ايسـه ديار مصرده يوز بيكـدن زياده روم موجود اولوب اسلحه و اسباب سائرلري مكملدر ، عربلرك ضعف حاللري ايسه معلوم و مشاهد كن اولدى . الكده بوقدر قوت وار ايكن معيتكده كي روملر ايله برابر عربك النده ذليل و حقير اولمغه فصل راضى اولدك ؟ ايمدى سن ، معيتكده روملر ايله برابر يافوت ، يا مظفر اولنجيه دك جنك ايديكز ، ديو امر ايتمش و بو مآلده جماعت رومه خطاباً بر امرنامه ياز مشدر .

قيصر ك مكتوبى اسكندريه كلكده مقوقس، روملك ايلرو كلنلريني جمع واحضار ايله قيصر ك امريني بيان ايتد كدن صكره « بن بيلورم كه عربلر،

آز وضعیف اولمغله برابر بزدن قوتلی و شدتیدرلر. آنلرک بر نفری ، بزم یوز نفریمزه معادل اولور. زیرا آنلر، بر قوم که اولوم آنلرک عندنده حیاتندن دها مرغوبدر. آنلر ، وطن و اولاد و عیاللرینه عودت ایلمه مک اوزره چیقمش اولدقلری حالده جنک و جهاد و مقتوللرینک اجر عظیمه نائل و جنته داخل اولاجقلرینه اعتقاد ایدیورلر. مدار تعیش اولاجق قدر بیه جنک و کیه جنک ایله اکتفا ایلمه سائر لذائذ دنیویه رغبتلری یوق . بزایسه بر قومز که اولومی کربه کوریرز و حیاتی و لذائذ دنیویه بی سوزز . بز، آنلرله نصل محاربه ایده بیلورز؟ ای جماعت روم! معلومکنز اولسون که : عربلرله یاپدیغم معاهده دن چیقامام و محقق بیلورم که قریباً سزده بنم قول ورایمه رجوع و کشکه بزده اطاعت ایده یدک دیو تمنی ایده جکسکنز» دیمش . بعده عمرو بن العاصه دخی ایمپراطورک مصالحه بی قبول ایتمدیکنی و محاربه ایتمک اوزره کندوسنه و جماعت رومه امرایلدیکنی تبلیغ ایله برابر . بن ، سنکله عقد ایلدیکم معاهده نك خارجنه چیقامام . فقط بنم حکم نفسمه و بکا تابع اولانلره کچر . سنکله قوم قبط آره سنده کی معاهده ، تمامدر و آنلر طرفندن نقض اولنماشدر . بن ده آنلرله برابر عهده وفا ایده جکم و روملردن بری یم . ایشته آنلر ، ایشته سن « دیدی . عمرو بن العاص دخی بونی قبول ایدوب آنحق اسکندریه قدر اولان طرق و معابرک تسویه و عسکره ارزاق ویرلمسنی تکلیف ایتدی . قوم قبط دخی بونی قبول و اسکندریه قدر اولان طرق و معابری اصلاح و هر صورته عساکر اسلامیه اعانه ایلشدر .

ایمپراطور هرقل ، قسطنطنیه ده ایکن مصرک اوزرینه اوپله بر هجوم اولتدیغنی لدی الاستماع بالذات اسکندریه کلمک اوزره بر جسم اردو تهیه ایدرکن فوت اولمغله بواردو سوق اولنماشدر . مع مافیه اسکندریه بحرأ خلیجه عسکر توارد ایده کلهشدر . اسکندریه ایله فسطاط آره سنده دخی نه قدر روم وارایسه بالاجتماع عمرو بن العاصک حرکتته مخانعت قیدنده اولمالریله عمرو بن العاص ، اسکندریه کیدرکن انسانی راهده



کرات ایله شدتلی محاربه لر وقوع بولش ایسه ده هپ روملر ، منہزم اوله کلدیکندن عسا کر اسلامیہ آنلری اسکندریہ دیوارلرینه قدر تعقیب ایله محاصره ایتدیلر . اوچ آی محاصره دن صکره یوروش ایله اسکندریہ یی فتح ایلدیلر و پک چوق اموال غنائم آلدیلر . بو صورتله اقلیم مصر ، کاملاً اهل اسلام الله کچمشدر .

بعده عمرو بن العاص (نوبه) دیارینه بر فرقه کونده ردی ایسه ده سودانلر، اوق آتمقده ماهر اولدقلرندن عسا کر اسلامیہ ظفریاب اولامایوب اکثری مجروح اوله رق عودت ایتشلردر .

### متفرقه

اشبو یکرمنجی سنه هجریه خلالتده ( ابوالبحریه عبدالله بن القیس ) دیار رومه سفر ایتمشدر .

بروجه بالا هرقل ، فوت اولدقده اوغلی ( قسطنطین ) قسطنطنیه ایمپراطوری اولمشدر .

ینه بو سنه الجزیره فاتحی ( عیاض بن غنم ) حضرتلری و امهات مؤمنیندن ( زینب بنت جحش ) رضی الله عنها حضرتلری وفات ایلدی . رضی الله عنهما .

کذلك مؤذن حضرت پیغمبری ( بلال حبشی ) حضرتلری دخی بو سنه دمشق شامده محفل عقبایه عازم اولدی . ترجمه احوالی یوقارولرده سبقت ایتمشدر .

حین وفاتنده زوجہ سی آغلایوب آم ایدرکن حضرت بلال « اوخ ! نموطلو بکا که یارین احبایه ، محمدہ و احبابنه قاووشاجم » دیر ایدی . حالات ایمان ، آکا اولوم آجیسنی حس ایتدیرموردی . ایشته ایمان کامل وحب رسول الله بویله کړک . رضی الله عنه وارضاه .

(مظهر بن رافع الانصاری) شامدن مجهول النسب بر شخص ایله بر لکده



مدینه منوره یه کلورکن خیبره ورونده یهودیلرک امریله بو شخص ، آنی قتل ایتشیدی .

حضرت عمر رضی الله عنه دخی خیبر یهودیلرینی نفی و تغریب ایله خیبر اراضیسنی بین المسلمین تقسیم ایلدی .  
ینه او ائنده حضرت عمر ، نجران یهودیلرینی دخی کوفه یه نقل واجلا ایتدی .

### بقیه احوال عراق

بالاده بیان اولنان جلولا وقعہ سندن صکره کسری یزدجرد ( ری ) شهرینه کیتمش و اهل اسلامک اهوازی فتح ایلدیکنی لدی الاستماع بالجمله بلاد ایرانیه اهل یسنی جنکه دعوت و ترغیب ایتمش ایدی .  
بناءً علیه بالجمله ایران خلقی ، هیجانه کلوب عموماً حربہ قیام ایلدیلر و هر طرفدن حرکت ایله نهاننده طویلانمغه باشلادیلر .  
سعد بن ابی وقاص رضی الله عنه حضرتلری ، کیفیتی امیر المؤمنینہ عرض و اشعار ایله برابر تدارکات حربیه به ابتدار ایندی .  
بویله بلالی بروقتده کوفه اهل یسندن و بنی اسد قبیله سندن بعض کسان ، مدینه منوره یه کلوب سعد بن ابی وقاصدن شکایت ایلدیلر ، « حتی نمازی ایی قیلدیرمیور ! » دیدیلر ،

حضرت عمر رضی الله عنه « شیمدی سزک دیارکزه بر بلیه کلیور . بویله شیلر ایله اوغراشمه نك زمانی دکل ایسه ده بنجه سزک باشکزه کن بلا دخی ینکزده کی اختلافک تحقیقنه مانع اولماز » دیو بیوردی و همان کشف و تحقیق احوال ایچون ( محمد بن مسلمه ) یی بر قاچ کیشی ایله کوفه یه کونده ردی .

محمد بن مسلمه ، کوفه یه واردی . حضرت سعدی آلوب هر قبیله نك مسجدینه کوتوردی . آنک احوالی صوردی . هر کس ، آنک حسن حالی سویلدی و شکر و ثنا ایلدی . فقط شاکیلر ، سکوت ایدیوردی .

نهایت عیسی قیامه سنك مسجدینه واروب صورددقه (ابوسعده) دیو معروف اولان (اسامة بن قتاده) حضرت سعدی «سریه لر ایله بالذات سفره کیتمز و اموالی علی السویه تقسیم ایتمز و مرافاعاته عدالت ایلمز» دیو اوچ وجهله جرح ایلدی .

ابوسعده نك بو جرأتی حضرت سعدك پك كوچنه کیتدی و آنك علیه اوچ وجهله دعا ایتمدی .

شویله که «یارب! اکر سنك بو قولك یالانجی اولوب، ده ریا و سمعه ایچون سویلدی ایسه عمرینی اوزون ، فقرینی افزون ، کندوسنی فتنه لره معروض و مقرون قیل « دیدی .

حال بوکه : رسول اکرم صلی الله علیه وسلم حضرتلری ( یارب! سعدك آتدینغی طوغری و دعاسی مستجاب قیل ) دیو دعا ایتمش اولدیغندن حضرت سعدك اوقلری نصل که هدفه اصابت ایلر ایسه دعاسی دخی مستجاب اولوردی . ابو سعده حقده او وجهله دعاسی دخی اوق کبی اصابت ایله مشدر که بو آدم ، چوق یاشایوب کیرپیکلری کوزلری اوزرینه ایتمش و چوق اولادی اولوب فقر وفاقیه و پك فنا بر حال ذلت و رذالته دوچار اولدینی حالد نسایه مفتون اولوب بعضاً زقاقلرده قیزلره طاقیلور و شوندن بوندن تکدیر ایشیدیر و « بورذالت نه در یا اباسعه ! » دنیلدکده « مبارک سعدك بد دعاسی » دیر ایتمش .

سعد بن ابی وقاص حضرتلری ، سابقین اولیندن و عشره مبشره دن اولوب دین مبین اوغورنده آچ قالمش و انواع محن و مشقتلره دوچار اولمش ایکن صبر و تحمل ایتمش اولدینی حالد نمازی ای قیلدیر میور . دیو کندوسنه طعن اولمنسی پك كوچنه کیتمز حتی « بن ، دین یولنده قان دوکنلرك و فی سبیل الله اوق آتالرك برنجیسی یم . محمد علیه الصلاة والسلام حضرتلرینك اصحابندن غزا ایدن بر جماعت ایچنده بولندم . ییه جك بولامایوب آغاچ یاپراقلرینی و ساقز اغاجی میوه لرینی یر ایدك . شیمدی ( بنی اسد ) نمازی ای قیلدیر میور دیو بنی تعذیر ایدورلر . او یله ایسه وای بنم حمله! ایتدیکم

سعیلر و چکدیکم زحمتلر ، هبامی اولدی ؟ ، دیو اظهار تأسف ایتش ایدی .

بویوکلر حقنده بو مقوله عزو و افتزالر ، واقع اولا گلشدر . فقط بوده آنلرک رفعت درجه لرینی موجب اولان حالاتندر . محمد بن مسلمه ، حضرت سعدی وجه مشروح اوزره تزکیه ایتدیردکن صکره شاکیلری ایله برابر مدینه منوره یه کتوردی و کیفیتی حضرت عمره بیلدیردی .

حضرت عمر « یا سعد ! نمازی نصل قیلدیریورسین ؟ » دیو بویوردی . حضرت سعد دخی « بن ، آنلره نمازی رسول اکرمک قیلدینی کبی قیلدیریوردم . یاتسونک ایکی اولکی رکعتی اوزادوب صکره کی ایکی رکعتی خفیف قیلوردم » دیوب جواب ویردی .

حضرت عمر « سنک حقکده هب ظنمز بویله در و احتیاطه رعایت مطالعه سی اولماسه آنلرک حقنده اولنه جق معامله آشکار ایدی » دیو بویوردی .

فی الواقع ، سعد بن ابی وقاصدن صکره کوفه یه آندن ده اعلی و عادل بر والی کیتیمیه جکی معلوم ایدی . لکن ایران دولتنک وار قوتی بازویه کتوروبده بر بویوک قوت ایله بلاد اسلامیه یه هجوم و اقتحام ایده جکی صروده عسا کر اسلامیه آره سنده ولوکه جزئی اولسون اختلاف وقوعی جائز اولمایه جفتدن احتیاطه رایة حضرت سعدک کوفه امارتندن انفصالی ایجاب حالدن کور و لمشیدی .

بناء علیه حضرت عمر ، حضرت سعد « کوفه ده قائم مقامک کیمدر ؟ » دیو صوردی . او دخی « عبدالله بن عبدالله بن عتباند » دیو جواب ویردی .

عبدالله ، وجوه انصار کرامدن اولوب حضرت عمر ، آنی کوفه امارتنده تقریر وابقا بویوردی و سفر ایران حقنده حضرت سعدک رأینی صوردقده ایرانیلره دهشت ویرمک اوزره تجاوزی حرکت ایله طرف طرف اوزرلرینه هجوم و اقتحام اولنق صورتی عرض ایتدی .

آنک اوزرینه حضرت عمر ، اصحاب کزینی جمع ایله « بن ، بالذات جیقوب و بر مناسب موقعده طور و پده هر طرفک عسکرینی ایران اوزرینه سوق ایتمک ایسترم . سز نه رأی ایدرسکز ؟ » دیدکده کیمی بو صورتی تصویب ایتدی ، کیمی « اهل شام و یمن ، علی العموم حدود ایرانه حرکت ایله سون . سنده اهالی حرمین ایله بصره و کوفه طرفه کیت و مشرکینک هیئت مجموعه لرینه قارشو اهل اسلامک هیئت مجموعه لرینی سوق ایت » دیدی . بعده ، علی بن ابی طالب گرم الله وجهه قالقدی « یا امیر المؤمنین ! شام عسکرینی ایرانه سوق ایدرسک روملر ، آنلرک اولاد و عیالی اوزرینه هجوم ایدر . یمن عسکرینی سوق ایدرسک حبشیلر ، بروچکر . بوحوالی بی خالی براقورسک اطراف و اکنا فزده اولان عرب ، عسیانه قیام ایدر و سکا آرقه طرفکدن شاشقین لق و یروب اوکده کی ایشی اونوتدیرر . بونلری یرلرنده براق و امر ایت که بصره خلقی ، اوچ فرقه یه منقسم اولسون ، بری اولاد و عیالارینک محافظه سنده قالسون ، دیکری اهل ذمتک محافظه سی ایچون احتیاط اوزره بولنسون ، اوچنچی فرقه سی دخی کوفه عسکرینه امداد ایچون حرکت ایله سون . عجملر سنی سر حده کوردکلری کبی امیر المؤمنین ، امیرالعرب دهرک دهها زیاده حرص و طمع ایله صاریلوب صالدریرلر . کثرت عددلری بختنه کلنجه بز ، شمده یه قدر کثرت ایله محاربه ایتمک . نصرت ایله ایش کوردک » دیدی .

حضرت عمر ، بو رأی تصویب ایتدی و « امرای عراقدن برینی انتخاب ایدیکز که او سر حدک امورینی آکا تفویض ایدیم » دیدی . اصحاب کزین « سن عسکرک احوالی دهها اعلی بیلووسین . زیرا سکا کلدیله ، کوروشدیله حاللرینه مطلع اولدک » دیدیلر و حضرت عمر ( نعمان بن مقرن مزن ) بی درمیان ایتدکده ، آنک بو ایشه اهلیتی تصدیق ایتدیله .

نعمان ، او زمان بر فرقه کوفه عسکریله ( جند یسابور ) و ( سوس ) قولنده ایدی . حضرت عمر ، آکا امرنامه یازدی . برصو اوزرینه قونوب

اطرافنده کی عسکری یاننه جمع ایله نهاوند اوزرینه هجوم ایتسنی امر  
ایتدی . کوفه امیری ( عبدالله بن عثمان ) ه دخی ناسی ( نعمان بن مقرن )  
معیتنه وارمق اوزره جهاده دعوت وتشویق ایتسنی یازدی . و ( مقرب )  
و ( حرمله ) و ( زر ) نام امیرلره اهواز عسکر یله ( فارس ) و ( اصفهان )  
حدودنده طوروبده او طرفدن نهاوندك امدادنی قطع ایملرینی امر  
واشعار ایلدی .

### ۲۱ نجی سنه وفایمی

امیر المؤمنینك امری اوزره ( نعمان بن مقرن ) عسکر یله بولندی  
جهته صو اوزرینه اردوسنی قوردی .

کوفه امیری ( عبدالله ) دخی ناسی ( نعمان ) ك معیتنه بولمق اوزره  
جهاده دعوت ایلدی .

هپ حرب وضرب اصحابی طویلانندی . ( حذیفه بن یمان ) آنلره  
رئیس اولدی . ( نعیم بن مقرن ) دخی برابر ایدی . جمله سی کوفه دن  
حرکت ایله ( نعمان ) ك یاننه کتیدیلر .

مغیره بن شعبه ، دخی مدینه منوره عسکری ایله نعمانك یاننه واردی .  
ونعمانك یاننده اوتوز بیک قدر عسکر طویلانندی . اوزمان نهاوندده  
سر عسکر ایران اولان ( فیروزان ) نام سردار ك معیتنه یوز اللی بیک  
قدر عسکر طویلانمشیدی . لکن نعمانك عسکری کزیده ایدی و ایچلرند  
( جریر بن عبدالله بجلی ) و ( مغیره بن شعبه ) و ( ابن عمر ) کی بویوک  
ومشهور ذاتلر و ( طلیحه بن خویلد ) و ( عمرو بن معدیکرب ) کی بیک  
کیشی یه صاییلان شجعان عربدن بهادرلر وار ایدی .

بوطلیحه ، مقدما مرتد اوله رق نبوت دعواسنه قیام ایتشیکن تکرار  
مسلمان اولان مشهور طلیحه در .

نعمان ، کشف ایچون ( طلیحه ) ایله ( عمرو ) ی نهاوند طوغری

کوندردی . ( عمرو ) کیمسه‌یه تصادف ایده‌میوب یولدن عودت ایلدی .  
( طلیحه ) ایسه نهاونده قدر کیدوب کلدی و اثنای راهده کیمسه‌یه  
تصادف ایتدیکنی سویلدی .

عسا کر اسلام ایله نهاوندك آره‌سی ایسه یکر می ساعتدن زیاده اولوب  
بو مسافه اوزرنده بر مانعه اولمادینی معلوم اولنجه نعمان ، هان عسکرینی  
تعیه ایدرك نهاونده‌عزیمت ایلدی .

شویله‌که : برادری نعیم بن مقّرّنی ، مقدمه‌الجیشه و دیگر برادری  
( سوید بن مقّرّن ) ایله ( حذیفه بن یمان ) حضرتلرینی صاغ و صول  
جناحله و ( مجاشع بن مسعود ) ی ساقه‌یه و ( قعقاع بن عمرو ) ی جرد  
آتلو اوزرینه مأمور ایدرك ایلرو حرکت ایلدی .

فیروزان دخی صاغ و صول جناحلرینه ( زرق ) نام سردار ایله  
( ذی‌الحاجب ) یرینه قائم اولان ( بهمن حادویه ) نام سرداری مأمور  
ایدرك ایران اردوسیه نهاوندن چیقدی .

بر چهارشنبه کونی ایکی عسکر، بربرینی کوردی . نعمان ، تکبیر آلنجه  
هپ عسا کر اسلامیه تکبیر آلدی . ایران اردوسنه تزلزل کلدی .  
عسا کر اسلامیه ، یوکلرینی ایندیردیلر و سرعسکرلری ایچون پک  
آلایشلی بر چادر قوردیلر .

نعمان ، هان کانون حربی قیزیشدیردی . اوکون و فرداسی پنجشنبه  
کونی جنك ایتدیلر . غلبه ، کاه بروده و کاه اوتوده ظهور ایتدی .  
جمعه کونی ایرانیلر ، اردوگاهلرینك اطرافنه خندق چویردیلر و پک  
چوق استحکام ویردیلر .

اهل اسلام ، ایران اردوسنی محاصره ایتمکله ایرانیلر ، ایسته‌دکلری  
وقت چیقش ایلر و ایسته‌دکلری وقت تدافعی جنك ایدر اولدیلر . عسا کر  
اسلامیه ایسه حربك بو وجهله امتدادندن صیقلوب اوصاندی .

نعمان ، برکون امرا و اهل رأی جمع ایله استشاره ایتدی . حضارک  
الك یاشلیسی ( عمرو بن ابی سلمان ) اولدیغندن ابتدا سوزه اوباشلادی



و «ایرانیلر، بویله خندق ایچنده متحصن اولدقلری حالدده ایشک اوزاماسندن آنلر دها زیاده صیقیلور. براق، ایسته دکلی قدر خندق ایچنده قالسونلر. همان طیشاری چیقانلر ایله جنک ایت، دیدکده رأی رد اولندی.

عمرو بن معدیکرب «آنلردن نه قورقارسکز؟ همان اوزرلرینه هجوم ایدیکز» دیدکده «دیوارلر ایله طوسی اورو شالم؟» دیو آنک رأی دخی رد ایلدیلر.

آنک اوزرینه طلیحه «بنم رأیم بودر که ایلرویه بر مقدار سواری کونده ربکز. محاربه یی قیزیشدیروب دشمن ایله قارشدقلرنده سواریمز، فرار صورتی کوسترسونلر. ایرانیلر، طمعده دوشه رک هپ استحکام ایچندن طیشاری اوغرایوب هجوم ایدرلر. ایشته اوزمان بزده بقتة آنلرک اوزرینه اقتحام ایلرز. الله یا بزم، یا آنلره ویریر» دیدی. (طلیحه) آنک رأی بکه نیلیدی و (قعقاع بن عمرو) «ایله بر خدعة حریبه اجرا ایلمی ایچون امر اولندی. بر جمعه کونی صباحلین ایرکندن (قعقاع) چیقدی، جنکی قیزیشدیردی. بر طاقم ساخته حرکتلر ایله هپ ایران عسکرینی استحکاملرندن طیشارو چیقارتدی.

شویله که: ایرانیلر، قعقاعک رجعتی عیجاً فرار ظنیله حرصلاندیلر وکافة استحکاماتدن طیشارو اوغرادیلر و بربرندن ایرلماسق ایچون بویوندوروغه قوشولور اوکوزلر کبی هریدی نفرینی بر طاقم اوله رق یکدیکره باغلامش اولدقلری حالدده هی، هی! دیه رک قعقاعی تعقیب ایله استحکاملرندن ایچه آریلدیلر. کیرو عودت ایله منهزم اولمالری ایچون آرقه لرینه (طوموز آیاغی) دنیلن تیمور دیکنلری یامشار ایدی. قعقاع اوکلرینه دوشوب کیروله یه رک اردوی اسلامه قدر کلدی. ایرانیلر دخی حرصلانه رق اردویه چاتدیلر و عسا کر اسلامیه یی اوقه طوتدیلر.

نعمان ایسه عسا کر اسلامیه یه یرلرنده ثبات ایدرک امر اولندقجه جنکه قیام ایتمه لری ایچون تنیه ایتمش اولدیغندن آنلر دخی تعیه و تذهیملری

اوزره طوروب امرء منتظر ایدیلر . حتی ایچلرندن بعضیلری اوق ایله یارالانمقله « دهانه طورویورز ؟ » دیدکجه نعمان « صبر ایدک » دیر ایدی . نهایت ، وقت زوال ایریشدکده نعمان ، آتیه پیندی ، عسکری طولاشدی . هر سنجاغک یاننده طوروب آنلری جنهکه ترغیب ایتدی و « بن ، اوچ تکبیر آلاجم ، اوچنجیسنده دشمنه حمله ایده جکم . سزده حمله ایدیکز و بن مقتول اولور ایسه امیر الجیش ، حذیفه بن یماندر » دیدکدن صکره « یارب ! دیلرم سندن که بو کون اسلامی عزیز قیله جق فتوحات ایله بنی مسرور ایت و شهید اولدیغم حلاله روحی قبض ایله دیدکده هپ عسکر ، آغلاشدی .

بعده نعمان ، کندی موقعنه کلدی ، اوچ تکبیر آلدی . عسکر ایسه مستمع و منقاد و حربیه متهی ایدی .

نعمان ، همان بر حمله ایتدی . ناسده آنکله برابر حمله ایتدیلر . نعمانک سنجاغی قره قوش کبی سوزولویوردی و بیاضلر کیوب باشنده دخی قلنسوه اولدینی جهته عسکر ایچنده بللی اولویور ایدی .

ایرانیلر اوزرینه اوپله شدتلی هجوم واپله شدتلی بر محاربه ایتدیلر که آندن اشد بر محاربه نک و قوعی ایشیدیللمشدر . اسلحه شیقیردیسندن باشقه سس ایشیدیلزدی . آقشام ، یاتسو وقتنه قدر محاربه تمتد اولدی . نهایت ایرانیلر بوزولدی ، میدان محاربه ده قان سیلان ایدر اولدی . یایانر بیله قایمغه باشلادی . نعمانک آتی دخی قایدی ویره دوشدی . علی روایه کندوسنه برده اوق اصابت ایتمکله شهید اولدی و برادری ( نعیم ) آتی روبه سیله اورتدی و سنجاغی آلوب ( حذیفه بن الیمان ) و ویردی . ایکسی ، پینلرنده نعمانک وفاتی ناسدن کتم ایله مک اوزره قرار ویردیلر .

ایرانیلر ایسه کیجه یوللرینی شاشیردیلر و آرقه طرفلرنده کی طوموز آیاقلری ، آیاقلرینه صاپلاندى .

کندیلری ایچون یاقش اولدقلری آتشلر ایچنه دوشدیلر و برمنوال سابق هر یدیی ، یکدیگره باغلی اولدیغدن بری بر مهلکه دوششه دیگر

آلتیسی دخی برابر دوشمردی . عسا کر اسلامیه ایسه آرقه لرینی براقایوب تعقیب ایلردی .

بنام علیه ایرانیلرک بو محاربه ده یوز بیک قدر تلفاتی وقوع بولدی . بونک یالکز اوتوز بیکی میدان محاربه ده اولوب باقیسی اثنای فرارده وقوع بولمشد .

بقیه السیوفی همدانه طوغری فرار ایتدی و بک آزی خلاص ایله همدانه واره بیلدی . زیرا آرقه لرندن ( قعقاع ) ایله ( نعیم بن مقرن ) تعقیب ایله یتیشدکلرینی تپه له مکده ایدیلر .

حتی فیروزان، دخی همدانه طوغری فرار ایدرکن بر بوغازده یوکلر سد اولمغله و آرقه سندن نعیم ، تعقیب ایتمکله فیروزان آتندن اینوب پیاده اوله رق طاغه چیقمش ایسه ده قعقاعک آدملری آقیر یایوب آنی اعدام ایتمشلردر . برو طرفده عسا کر اسلامیه ، امام مظفریتدن صکره امیرلری نعمانی صورمغه باشلادیلر . نعمانک برادری معقل بن مثنی « کوزیکز آیدین . جناب حق ، سزه مظفریت و نعمانه رتبه شهادت ویردی ، دهرک « ایشته امیریکز « دیو ( حذیفه ) یی کوستردی . آنلرده ( حذیفه ) تابع اولدیلر و نهانونده کیروب کرک درون شهرده و کرک اطرافنده بولدقلری اموال و اشیایی طویلا یوب اردونک محاسبه سنه مأمور اولان ( سائب بن اقرع ) ه تسلیم ایلدیلر . و ( نعیم ) و ( قعقاع ) ایله همدان جانبه کیدن یولداشلرینک عودتنه منتظر اولوب قالدیلر .

بوصرمده آتشکده صاحبی اولان ( هرید ) حذیفه یه کلوب کسرانک امانه محفوظ اولان جواهرینی چیقارمق اوزره کندوسنه و دیله دبیکی آدملره امان ویرلمسنی استمد ایتدی . حذیفه دخی امان ویردی .

هرید ، انواع جواهر کرانبها ایله مملو ایکی سله کتوردی . حذیفه ، محاربه ده فوق العاده یارارلغی ظاهر اولانلره آنلرک بر آزینی احسان بویوردی و باقیسی خمس غنائم ایله برابر ( سائب بن اقرع ) ه تسلیم حضرت عمره کونده ویردی .

اموال غنائمك باقى درت خمسى ، عسكره تقسيم اولندقده سواريلره  
آلتيشر بيك وپيادهلره ايكيشر بيك درهم اصابت ايله مشدر .  
سائب بن اقرع ، مدينه منوره يه واردى . حضرت عمرى كوردى ،  
كيفيت فتحى بيلديردى و خمس غنائم ايله برابر او سلهلرى دخی ويردى .  
حضرت عمر ، نعمانه چوق آغلادى و « بو ، سلهلرى بيت الماله تسليم ايله .  
باقالم بز ، آنلرى نه ياپارز . سن ، همان عودت ايت و آرقداشلريكك ياننه  
كيت » ديدى .

سائب ، همان او كون عودت ايلدى . قرداسى صباحلين حضرت عمر ،  
سائبي كىرو چويرمك اوزره بر مأمور كوندهردى . مأمور ، آكا يولده  
يتيشه ميوب كوفده بولدى و آنى آلدى مدينه يه كتوردى .  
حضرت عمر « يا سائب ! كوردكمى بنم باشمه كتورديكك بلاني ؟ »  
ديدى . اوده « نه وار يا امير المؤمنين ؟ » ديدى . حضرت عمر « عودت  
ايتديكك كونك كيجهسى ، ايكي ملك ، آتش كى آهوله نه رهك بنى او سلهلره  
طوغرى سوروكله يوب بونلرله سنى داغلاياجغز » ديديلر . آمان بونلرى آل  
كوتور ، سات . اثماننى امور عسكره صرف ايت » ديدى ،  
سائب او سلهلرى آلوب كتوردى . كوفه مسجدينه قودى ، صاتيلق  
ايتدى ( عمرو بن حارث المخزومى ) او جواهرى ايكي مليون درهمه صاتون  
آلدى . صكره ديار عجمه كوتوروب ايكي قات بهاسنه صاتمشر .  
ايران سفرلرنده بويله بك چوق مجوهرات و مرصعات اله كچمشر .  
لكن عربلر ، او مقوله شيلرك قيمتنى بيلمداكلرندن بكرمى بيك درهم  
قيمتى اولان جوهر ، چوق دئعه بش درهمه قدر صاتيلوردى .

### فتح همدان و اصفهان

بصره عسكرى اميرى اولان ( ابو موسى الاشعري ) رضى الله عنه ،  
نهاوندن عودتنده ( دينور ) بلده سنه اوغرايوب بش كون محاصره دن  
صكره اهاليسى ، جزيه كذار اولق اوزره عقد معاهده ايتمشردر .

بعده ابو موسی الاشعری ( شیروان ) اوزرینه کیتمش و او بلده یی  
دخی بویه صلح ایله فتح ایتمشدر .

بعده ( سائب بن الاقرع ) ی ( صیمره ) بلده سی اوزرینه کونده روب  
اودخی بوراسنی کذلک صلحاً فتح ایله مشدر .

ایران فراریلرینی همدانه قدر تعقیب ایدن ( قعقاع ) و ( نعیم بن مقرن )  
دخی همدانی شدتلی محاصره آلتنه آلدقلرندن اهالیسی ، جزیه کذار اولق  
اوزره امان دیله ملریله آنره دخی امان ویرلمشیدی .

همدانه امداد ایچون اطرافدن کلش اولان امرا ، بر مقدار بدل صلح  
ویره رک ( حذیفه ) ایله عقد مصالحه ایتمشلدر .

او سرده حضرت عمر ، کوفه والیسی بولسان ( عبدالله بن عبدالله  
بن عتبان ) رضی الله عنه حضرتلرینی ایران جانبیه کونده رمش و ( ابو موسی  
الاشعری ) رضی الله عنه حضرتلرینک دخی آکا امداد ایله مسنی اشعار  
بو یورمش ایدی .

عبدالله بن عبدالله حضرتلری ، بر جناحنه ( عبدالله بن ورقا ) یی  
ودیکر جناحنه ( عصمت بن عبدالله ) ی مأمورایدرك نهاونده کیتدی وحذیفه  
بن یمان ، مأموریت قدیمه سی اولان دجله ساقیه لری اوزرینه مأموراوهرق  
عودت ایتدی .

عبدالله بن عبدالله ، او طرفده اولان عسکری دخی معیتنه آله رق  
جانب اصفهانه کیتدی .

اصفهان سرداری ( اسیدان ) رستاق اصفهانه بولنوب معیتنده کلیتلو  
عسکری وار ایدی و مقدمه الجیشنه ( شهریار بن جادویه ) مأمور ایدی .  
محاربه یه لدی الشروع ( عبدالله بن ورقا ) شهریار ایله مبارزه یه  
چیقوب شهریاری قتل ایتدی . اصفهان عسکری بوزولدی و ( اسیدان )  
رأی و امان ایله رستاقی ترک ایلدی .

بعده عسا کر اسلامییه ( جی ) تسمیه اولنان نفس بلده اصفهان اوزرینه  
پورودیلر .

ملك اصفهان ، جزیه و یرمك و جانی ایسته بن قلوب ایسته مه بن دیله دیکی محله کیتمك اوزره عقد مصالحه ایتدی .

عسا کر اسلامیه ، ایران ایچنه طوغری ایلروله دکن صكره ( بیروز ) ده اکرادن پك چوق غلبه لك طوبلا تمغله بصره والیسی ( ابو موسی الاشعری ) رضی الله عنه او طرفه سگیردوب خلال رمضانده ( نهر تیرا ) ایله ( مناذر ) آره سنده واقع اولان محاربه ده کر دلر منهزم و پریشان اولمشدر .

بومظفریتدن صكره ( ابو موسی الاشعری ) جانب اصفهانه عزیمت ایله سالف الذکر اصفهان مظفریتی عقینده اورایه واصل و ( عبدالله بن عبدالله ) ایله برابر اصفهان شهرینه داخل اولمشدر .

اصفهان اهالیسنك برآزی کرمانه کیتمش ایسه دما کثری جزیه و خراجی قبول ایله یرلرنده قالمشدر .

### متفرقه

حضرت عمر ، بروجه بالا ( عبدالله بن عبدالله بن عثمان ) ی ایران سفرینه مأمور ایتدکن صكره ( عمار بن یاسر ) رضی الله عنه حضرت تلرینی کوفه والیسی نصب و تعیین بویوردی . حصده بولنان ( عبدالله بن مسعود ) رضی الله عنه حضرت تلرینی دخی معلم اولق اوزره کوفه یه کونده ردی . لکن چوق کچمیوب کوفه لیلر ، حضرت عماردن اشتکا و اودخی آنلردن تنفر ایله وایلکدن استعفا ایتمکه ( مغیره بن شعبه ) کوفه والیسی اولمشدر .

بحرین والیسی ( علا بن الحضرمی ) دخی او اثناده فوت اولمغله رینه ( ابوهریره ) نصب اولمشدر . رضی الله عنهما .

ینه یوسنه ( خالد بن الولید ) رضی الله عنه حضرت تلری حصده خسته لتوب و « آه بونجه محاربه لرده بولندم . نهایت یتاغنده می وفات ایده جکم ؟ » دیو تأسف ایدرك تسلیم روح ایشدر .



ینه بو سنه امیر مصر اولان ( عمرو بن العاص ) طرفندن غریبه کونده ریلن ( عُبَّه بن نافع الفهری ) صلحاً ( زَوْبَه ) یی فتح ایتدی .  
زوبه دن ( بَرَقَه ) یه قدر اولان یرلرک اهلاییسی دخی عرض انقیاد ایلدی .

## ۲۲ نجی سنه وقایعی

اشبو یکریمی ایکنجی سنه هجریه سی خلائنده عمرو بن العاص ، بالذات او جانبه حرکت ایله برقه یه وارد قده اهلاییسی ، جزیه و یرمک اوزره عقد مصالحه ایلدیلر .  
بعده عمرو بن العاص ، طرابلس غریبه کیتدی و برآی محاصره دن صکره طرابلسی فتح و محافظ بولنان روملری اعدام ایتدی . ایچلرندن پک آزی ساحلده کی کمیلرینه بنوب تخلیص جان ایده بیلدی .  
بزکله لم ینه وقایع شرقیه یه :

## بعض وقایع همدان

همدان اهلاییسی ، بوجه بالا جزیه و یرمک اوزره عقد مصالحه ایتشلر ایکن صکره نقض عهد ایتمکله حضرت عمر بن الخطاب رضی الله عنه الوهاب حضرت تلری ، نعیم بن مقرنی آنلرک اوزرینه مأمور ایتدی .  
نعیم بن مقرن ، واروب حرباً همدانی تکرار فتح ایدرک خراسانه قدر کیتدی .

او ائناده ( ذَیْلَم ) قومنک و ( ری ) اهلایسنک و مشهور رستمک برادری اولان ( اسفندیار ) ایله آذربایجان خلقنک کلمک اوزره اولدقلری خبری وارد اولمقله همان ( یزید بن قیس الهمدانی ) یی همدان محافظه سنه براقوب کندوسی آنلره قارشو کیدرک وقوع بولان محاربه عظیمه ده بر بویوک مظفریته مظهر اولدی .

بو محاربه ده دخی ایرانیا نلک کاتی تلفاتی وقوع بولدی .

## فتح قزوین و زنجان

او ائنه (براء بن عازب) رضی الله عنه حضرتلری بر فرقه عسکرایله (آهر) وارد قدده اهالیسی حربه قیام ایتدیلر ایسه صکره رای و امان دیله یوب (براء) دخی آنلره امان و یردی . صکره (قزوین) اوزرینه یوریدی . قزوین اهالیسی دیلدن امداد ایستدیلر . آنلر دخی امداد ایچون کلوب آنجق طاغ اوزرنده سیرجی کبی طور دقلرندن قزوین اهالیسی عقد مصالحه ایله داخل دائرة امن و امان اولمشلردر .

آندن صوکره (براء) دیله و (کیلان) و (طیلسان) مملکتلرینه غزا و حرباً (زنجان) ی فتح ایلشدر .

## فتح ری و قومس و جرجان و طبرستان

نعیم بن مقرن ، بوجه بالا بر بویوک مظفریت قازانوب همدان جهتنک ایشنی تمام ایتدکن صکره (ری) شهری اوزرینه یورودی .

ری ، اهالیسی طرفندن (ابوفرخان) کلوب استدعای مصالحه و (نعیم) دخی آکا مساعده ایتدیهده (ری) مملکتک ملکی و والیسی اولان (سیاوخش بن مهران بن بهرام چوین) بو مصالحه یی رد و (دُنبَاوند) و (طبرستان) و (قومس) و (جرجان) اهالیسندن استمداد و آنلر دخی امداد ایتمکله سیاوخش ، نعیمه قارشو کلرک شهره دخولدن آنی منع ایتدی . لکن (ابوفرخان) نعیمه کلدی «آنلر چوقدره سزه آرسکز . بکا بر آرسواری ویر ، آنلرک معلوماتی اولمقسزین بن ، بو سواری یی شهره ادخال ایدیم . سن ، اعدا اوزرینه هجوم ایت . بزده شهردن چیقوب آنلره شاشقینلق ویرهلم» دیدی .

نعم دخی بر مقدار سواری ایله برادر زاده سی ( منذر بن عمرو ) ی  
آکا ترفیق ایله شهره ادخال ایتدی و کندوسی ( سیاوخش ) ک جمعیتی  
اوزرینه هجوم واقحام ایتدکده قویاً مقاومت ایلدیلر ایسه ده منذر ،  
تکبیر آله رق بغته شهردن طیشارو اوغرا دینی کبی ایرانلره خوف  
ودهشت کله رک منہزم اولدیلر و یک چوق قیریلدیلر . عساکر اسلامیه  
بوراده دخی بویوک مظفریته نائل اولدیلر وهان مدائن فتحنده کی قدر  
اموال غنائم آلدیلر .

ابوفرخان ، اهالی نامنه عقد معاهده ایتمکله آندن صکره اولاد واحفادی  
( ری ) بلده سنده دائماً حائز شرف و اعتبار اوله کلمشدر و اومظفریتک اوزرینه  
( دنباوند ) اهالیسی دخی معین المقدار مال و یرمک اوزره امان آلمشدر .  
نعم ، اموال غنائمک خمسینی مدینه منوره یه کونده ردی و امیر المؤمنیندن  
وارد اولان امر و تعلیمات موجبجه برادری ( سوید ) ی بر فرقه ایله  
( قومس ) طرفه سوق ایتدی و کیمسه طرفندن مقاومت اولنماغله قومسی  
صالحاً فتح ایتدی . ( طبرستان ) والیسی دخی بالخباړه عقد مصالحه ایلدی .  
بعده سوید بن مقرن ، جرجانه کیدوب ( بسطام ) ده اوردوسی قوردی  
وملک ( جرجان ) اولان ( زرنان صول ) [\*] نام سرداره یازوب اودخنی کلدی .  
سوید ایله کوروشدی . جزیه و یرمک و جرجانک فتحنه اعانه ایتک اوزره  
عقد مصالحه ایتدی و سوید ، آنکله برابر جرجانه کیردی . خراج مملکتی  
جسایت و حدود و ثغوری ( دهستان ) ترکریله سد ایلدی و بو یولده  
محافظه حدوده قیام ایدنلردن جزیه یی رفع ایله سائرندن تحصیل ایتدی .

### فتح آذربایجان و شهر زور و دربند

مقدما ( عتبه بن فرقند ) ایله ( بکیر بن عبدالله ) آذربایجان اوزرین  
مأمور اولوب بری ( خلوان ) طرفندن و دیکری ( موصل ) جانبند  
[\*] بواسم ( معجم البلدان ) ده ( روزبان صول ) شکنده محرردر .

آذر بایجان) . داخل اولاجققلر ایدی . (ری) بلده سنك فتحندن  
سكركه (بكیر بن عبدالله) . امداد ایچون (سماك بن حرشة الانصاری) نك  
و طرفه كونده رلسنی حضرت عمر ، نعیمه امر و اشعار ایتدی .

بكیر بن عبدالله ، ایسه آذربایجان کیدرکن طاغلرده ، رستمك  
رادری اولوب نعیمك همدان یاننده کی محاربه سنده منهزم اوله رق فرار  
یدن (اسفندیار بن فرخزاد) . تصادف ولدی المحاربه غلبه ایله آنی اسیر  
یتیشیدی . اسفندیار ، آکا « بنی طوت . بو بلادی صلحه ربط ایدیم  
الطاغلره فرار و بر مدت شوراده بوراده تحصن ایدرلر » دیمکله بكیر  
دخی آنی تحت محافظه طوته رق بلاد آذربایجانی صلحاً ضبط ایلش ،  
فقط قلعه لر قالمش ایدی .

سماك ایسه جوارنده کی یرلری فتح ایدرک اورایه کلدی (عتبه بن فرقد)  
دخی کذلک کندو جوارنده کی یرلری فتح ایلشیدی . (بهرام بن فرح  
زاد) عتبه نك حرکته مانع اولق اوزره یولی اوزرنده طورور ایکن  
(اسفندیار) نك نزد (بكیر) ده اسیر اولدیغنی خبر آنجه « ایشته شمدی محاربه  
سوندی و مصالحه اتمام اولندی » دیوب (عتبه) ایله عقد مصالحه ایلدی و بو  
صلحیه یی بوتون آذربایجان اهالیسی قبول ایتدی .

بعده عتبه بن فرقد (شهرزور) و (فرقد) اوزرینه کیدوبا کراددن  
ك چوق آدم تلف ایدرک (شهر زور) ایله (صامغان) ی فتح ایلشدر .  
بكیر بن عبدالله دخی (دربند) . طوغری ایلروله مشیدی .

حضرت عمر ایسه او طرفه (سراقه بن عمرو) ی مأمور ایلش  
بدوکندن سراقه ، آذربایجاندن ایلرو حرکته مقدمه الجیشه (عبدالرحمن  
بن ربیعہ) یی و صاغ و صول جناح لرینه (حذیفه) ایله سالف الذکر بكیری مأمور  
بتدی و دربند اوزرینه کیتدی .

حضرت عمر ، موصل امیری اولان (حبيب بن مسلمة) یی دخی

سراقه نك امدادينه كونده ردی و موصله (زیاد بن حنظلّه) بی مأمور بیوردی .

دربند حکمداری اولان (شهریار) اهل اسلامك مهاجهمنی کورنجه رای و امان آلهرق کلوب سراقه ایله کوروشدی . اهل اسلامه نصرت وحدودك محافظه سنه غیرت ایلك و بو وجهله محاربه ده بولنانلر معاف اولهرق یرنده مقیم اولان اهاالی جزیه و یرمك اوزره ینلرنده بر معاهده عقد اولندی . بعده سراقه ، ارمنیه بی محیط اولان طاغلر اهاالینسی اطاعته کتورمك اوزره معیتده کی امرایی مأمور ایتدی .

شویله که : بکیر بن عبداللهی (مُوقان) . وحیپی (تفلیس) . وحذیفه بی (لان) طاغلرینه و سلمان بن ربیعیه بی دیگر طرفه کونده ردی . فقط بو ممالکک وسعتنه و طاغلرینك صارپلغنه کوره اوپله طرف طرف طاغیدیلار عسکرک مقداری پك آز ایدی . بناء علیه بو امرادن یالکز بکیر ، موفق اولهرق (موقان) ی فتح ایلشدر .

سراقه ، فوت اولدقده یرینه (عبدالرحمن بن ربیع) دربند سرحدینه مأمور اولمشدر و بعده عبدالرحمن (تمور قیو) دربندینی کچوب ایکی یو ساعتك مسافه محلاره قدر غزا ایتمشدر .

### طرف طرف ایران ایچنه اقتحام اولندی

امیرالمؤمنین عمر رضی الله عنه حضر بلری ، عساكر اسلامیه نك طولیه حرکتلرینی امر ایلر و پك ایلر و لیوبده ایران ایچنه یاییلمقدن نهی ایدردی ایرانیلر ایسه بر طرفدن عرض اقیقاد ایله عقد صلح و بر طرفد عصیان ایله نقض عهد ایتکده ایدیلر .

احنف بن قیس ، مقدما بصره دن مدینه منوره به واردقده حضر عمر ، آندن بو حالک سببی سورمش ، او دخی « قول قول ایرانه دخو

واقترام ایله دولت ایرانیه امحا اولمقدججه بو اختلاللرک اوکی آلتماز ، دیو جواب ویرمش و بو خصوصه حضرت عمری قاندرمش ایدی .

بناءً علی ذلك حضرت عمر ، خراسان قولنه ( احنف بن قیس ) ی و ( سابور ) ایله ( اردشیر خره ) قولنه ( عثمان بن العاص الثقفی ) ی و ( دارابگرد ) ایله ( فسا ) قولنه ( ساریه بن زنیم ) ی و ( کرمان ) قولنه ( سهیل بن عدی ) ی و ( سجستان ) قولنه اصحابدن مشهور ( عاصم بن عمرو ) ی و ( مکران ) قولنه ( حکم بن عمیر تغلی ) ی مأمور ایدوب هر برینه برر سنجاق کونده رمش و ابو موسی الاشعرینک دخی کیروده احتیاط اوزره بولنه رق ایجابنه کوره آنلره اعانه ایتسنی امر و اشعار بیورمش ایدی .

کسری یزدجرد ، بوجه بالا بتون ایران خلقی جنکه دعوت ایله نهاونده بر بیوک اردو جمعه ابتدار ایلش اولدیغندن بر مکمل اردو ایله نهاونده واریلش و نهاوندوقعه سنده ایرانیلر ، فیابعد دوزله میه جک صورتده بوزولش اولدقلرندن سالف الذکر امراک حرکتلری زمانی گلش اولدی وهمان قول قول دیار ایرانه کیروب یاییلمالری و طرف طرف غزایه قویولمالری ایچون جانب خلافتدن امر ویریلدی .

امرای مومی الیهک بصره دن حرکت ایلدکلری ائشاده ایرانیلر دخی ( توج ) بلده سنده طویلانمشلر ایدی . امرا ، آنلرک اوزرینه وارمایوب هربری ، سمت مأموریتنه توجه ایتمکله ایرانیلر دخی کندی بلده لرینک محافظه سی ایچون طاغیلدی . بووجهله تفرقلری ایسه کندولرنجه بر نوع انزام قیلندن اولدی .

کسری یزدجرد ، مقدما ری شهرندن اصفهانه و آندن کرمانه کیتمش و بر یرده دیکیش طوتدیره میوب نهاییب خراسان دیارینه عزیمت ایله ( مرو ) شهرینه واروب اوراده بر آتشکده انشا ایله استقرار ایتمش ایدی . او جوارده بولسان ایرانیلر ، کندوسنه اتباع ایله اوراده اجرای



حکومت ایلکده اولدینی حالدہ سائر بلاد ایرانیه اہالیسنی تحریکدن خالی دکل ایدی . بناءً علیہ خراسانک فتحی اہم و اقدم کورولمشیدی .

### فتح خراسان

بالادہ اسملری محرر اولان امرادن ( اَحْنَف بن قیس ) ( طَبَّسَان ) دن خراسانہ کیردی و غنوة ( ہرات ) ی فتح ایتدی . ( صُحَّار بن فلان العبدی ) یی ہراتدہ براقوب کندو ( مروشاہجان ) طرفنہ کیتدی و ( مطرّف بن عبد اللہ بن شخیر ) ی نیشابورہ و ( حارث بن حسان ) ی ( سَرَخَس ) ہ کوندردی . اخفک مروشاہجانہ تقریندہ یزدجرد ، اورادن چیقوب ( مَرُورُوز ) ہ کیتدی . اخف دخی بلامانع مروشاہجانہ نزول ایتدی . یزدجرد ، مروروزدہ ایکن خاقان ترکہ و ( صُغد ) و چین پادشاہلرینہ نامہ یازوب آنلردن استمداد ایلدی .

بو ائنادہ ایسہ کوفہ عسکری ایریشمکلہ اخف ، ہان ( حارثہ بن نعمان باہلی ) یی مروشاہجان محافظہ سندنہ براغوب کندوبی ( مروروز ) اوزرینہ یوریدی .

یزدجرد ، آرتق مروروزدہ طورامیوب ( بَلْخ ) ہ کیتدی . اخف دخی واروب مروروزی ضبط ایتدی و کوفہ عسکری ، بلخہ طوغری حرکت ایلدیکندن اخف دخی او طرفہ سکیرتدی .

حال بوکہ : کوفہ عسکری ، بلخہ واردقدہ یزدجرد ، آنلر ایلہ جنکہ ابستدار و منہزم اولہرق جیحون نہرینی عبور ایلہ تورانہ ، یعنی ترکستانہ فرار ایلش اولدیغندن کوفہ عسکری ، بلخی ضبط ایلش ایدی .

متعاقباً اخف دخی بلخہ واردقدہ ( نیشابور ) دن ( طَخَرَسْتَان ) ہ قدر اولان خراسان اہالیسی ، آکا اطاعت و او دخی مروروزہ عودت ایلدی . طَخَرَسْتَانک محافظہ سنہ ( ربیع بن عامر ) ی کوندردی و کیفیت

فتی حضرت عمره بیلدیردی . بونک اوزرینه حضرت عمر ، ایرانک  
مخلفه سیله اکتفا اولته رق ماوراءالنهره تجاوز اولنماسنی احنفه امر و اشعار  
بیوردی .

یزدجرد ، بروجه بالا ماوراءالنهره وارد قده ( خاقان ) آکا اعانه ایدوب  
( قَرَفَانَه ) و ( صُغْد ) اهالیسندن دخی خیلی عسکر طوپلاندی .

بناءً علیه کسری یزدجرد ، خاقان ترک ایله برابر نهر جیحونی عبور  
و خراسان یاقه سنه کذار ایله بلخه کلدکلرنده کوفه عسا کری بلخی ترک ایله  
خاقان دخی عسا کر کلیه ایله مروروز اوزرینه یوریدیلر .

احنفک یاننده اون بیک بصره لی و اون بیک کوفه لی که جمعاً یکرمی  
بیک عسا کر اسلامیه وار ایدی . اوراده بوانان طاغ اتکنه چکیلدی ،  
آرقه سنی طاغه دایادی . بر طرف دخی نهر ایله محفوظ ایدی .

بو جهته عسا کر کفار ، قات قات زیاده اولدیفی حالدده احنفک اردوسنی  
احاطه ایده میوب جبهه سندن هجومه مجبور اولورلر و مقاومت کورورلر ایدی .  
کوندوزین جنک ایدوب کیجه اردوگاهلرینه کیدرلر ایدی . خاقانک بر قاچ  
بللی باشلی آدمیری تلف اولمغله بو محاربه دن تشام ایدرک بغته اردوسنی  
قالدیروب بلخه کیتدی .

یزدجرد ایسه اولجه اهل اسلام قارشوسنده خاقانی ترک ایله کندوسی  
مرو شاهجانه کیدوب اوراده محافظ بولنان ( حارثة بن نعمان ) ی محاصره  
ایتمش و اوراده مدفون اولان خزینه لرینی چیقارمش ایدی .

یزدجرد ، بوخزینهلری آلوب خاقانک یاننه کیده جک اولدقده اکابر و اعیان  
فارس « بوخزینهلر ، ایران مالیدر . باشقه دیاره نقلی جائز دکلدرد . همده  
ماوراءالنهر خلقته امنیت و اعتماد اولتماز . عربلرله اویوشمق اولادر . زیرا  
آنلردن عهده وفا مأمولدر » دیمشلر ایسه ده یزدجردی اقناع ایده مدکلرندن  
خزینهلرینی الندن آلوب احنفه و یرمشلر و جزیه و یرمک اوزره آنکله  
معاهده ایتمشلر و یرلرنده مستریح القلب اوله رق کار و کسبلری ایله مشغول  
اولوب قالمشلدرد .

یزدجر ایسه بلخه واروب اورادن خاقان ايله برابر نهر جيحونی عبور ايله فراغانده قرار قيلمش واورادن ينه ايران خلقي تحريك ايله مشغول اولوب قالمشدر .

خاقان ايله يزدجرد ، بروجه بالا ماوراءالنهره عودت ايلدكدن صكره كوفه عسكری بلخه واروب موقعلرنده يرلشدیلر . احنف دخی كينيتی مدینه منورهیه عرض ایلدی .

بوخبر فتح ، حضرت عمره لدى الوصول ناسی مسجد شریفه جلبه وجمع ايله برخطبه اوقودی .

شویله كه : احنفك فتحنامه سنی قرائت ایلدكدن صكره جناب حقك فتح ايران حقنده اولان وعد الهیسنی انجاز بیوردیغنه تشكر ایتدی و دیدی كه « مجوس دولتی ، محو اولدی . بوندن صكره برقاریش يرلرخه استرداد ایده منزلر . جناب حق ، آنلرك ديار واموالنی سزه موروث قیلدی . تاكه سزك نه كونه عمل ایده جككزه نظر بیوره . ایمدی حالكزی تبدیل ایتمكز . یوقسه اوده سزی بشقه قوم ايله استبدال بیورر . بن ، بوامت حقنده برطرفدن قورقمام ، الا سزك كندی طرفكزدن قورقارم . »

## ۲۲ سنه سی فتوحاتی

بالاده مذکور اولان اصرادن ( سابور ) قولنه مأمور اولان ( مجاشع بن مسعود ) اوسمه حرکت ایلدكده ( توج ) اهالیسی مقابلهیه قیام ایتدیسه ده پك فنا حالده بوزولدیلر وپك چوق قیریلدیلر . مجاشع دخی توجی حصر و تضیق ايله فتح ایتدی وپك چوق اموال غنائم الدی .

( اصطخر ) قولنه مأمور اولان ( عثمان بن ابی العاص الثقفی ) دخی اوسمه کیدرکن ایرانیلر ، آتی ( جور ) ده قارشولایوب جنكه کیریشدیلر ایسه ده

آنزده بوزولدیلر وعسا کر اسلامیة (جور) ی فتح ایلد کدنصره (کازرون) طرفی مستولی اولدیلر .

بعده ابوموسی الاشعری ، اورایه واروب عثمان ایله برلکده (شیراز) بو (ستیز) ی فتح ایلدیلر .

بعده عثمان (جنا) طرفه کیتدی واوراسنی فتح ایتدی . (چهرم) ناحیه سنده مجتمع اولان ایرانیلر ایله لدی المصادمه انلری دخی یوزدی وچهرمی ضبط ایلدی .

(فسا) و (دار ابکرد) قولنه مأمور اولان (ساریة بن زیم الدلی) دخی بو ائنده او طرفه واروب ایرانیلر ایله براوواده جنکه طوتوشمش اییدی . ایرانیلر ایسه هر طرفدن استمداد ایله فارسک هپ اکرادی اورایه طویلانمش ایدو کندن هر طرفدن عسا کر اسلامیة ی احاطه ایتک اوزره ایلدیلر .

ایشته اوزمان حضرت عمر ، مدینه منوره ده منبر اوزرنده خطبه او قویوردی . جناب حق ، آکا اردونک حالنی کشف ایتدی کندن اثنای خطبه ده « یاساریة الجبل الجبل » دیو ندا ایتدی که : ای ساریه ! طاغه ، طاغه . دیمکدر . آنک سسنی ساریه ورفقاسی ایشیدوب آرقه طرفلرنده کی طاغه استناد ایلشیر و دشمن ، یالکیز بریوزدن کله رک بوزولمش و اهل اسلام ، غالب و مظفر اولمشدر .

حضرت عمرک بروجه بالا منبرده ( یاساریة الجبل ) دیمسی جماعته موجب تعجب اولغله اصحاب کرامدن بعضیلری ، علی کرم الله وجهه حضرتلرینه کلوب « امیر المؤمنینک خطبه ائناسنده مناسبتسز اوله رق ( یاساریة الجبل ) دیمسی ته اوله ؟ » دیدکلرنده حضرت علی « امیر المؤمنین ، معناسز سوز سولیز . بر اصلی اولق کرکدر . بو کونی بلله یگیز . باقالم نه ظهور ایلر ، دیمشدی . ساریه طرفدن فتحنامه ایله کلن مژده جیدن استیضاح اولندقدہ اوکون میدان حربده ایکن حضرت عمرک سسنی ایشیده رک کیرو چکیلوب طاغه استناد ایلدکارینی و بو وجهله مظفر اولدقلرینی بیان ایتمشدر .

( کرمان ) قولنه مأمور اولان ( سهل بن عدی ) او طرفه کیتمش و ( عبدالله بن عبدالله بن عثمان ) دخی آکا التحاق ایتمش ایدی . کرمان اهایسی، مقابلهیه قیام ایتدیلر ایسهده بوزولدیلر، تارمار اولدیلر و عسا کر اسلامیة بوراده دخی غنائم وافر آلدیلر .

( عاصم بن عمرو ) دخی ( سجستان ) ه کیتمش و ( عبدالله بن عمیر ) آکا التحاق ایتمش ایدی . اوزمان سجستان ولایتی، خراساندن دها واسع ایدی . اهایسی، قندهار اهایسیله و اترک و ام سائر ايله حرب ایدرلر ایدی . بوکره طویلانوب عاصمه قارشو کلدیلر . لیکن آنلرده بوزولدیلر، طاغیدیلر و اهل اسلام، غلبه کاملهیه مظهر اوله رق بتون سجستانه مالک اولدیلر . ( حکم بن عمیر التغلی ) دخی ( مکران ) ه کیتمش و ( شهاب بن المحارق ) و ( سهل بن عدی ) ( و عبدالله بن عثمان ) آکا التحاق ایتمش ایدی .

مکران و الیسی، ملک هنددن استمداد ایلوب اودخی خیلی عسا کر امدادیه کونده رمکه اوراده غایت شدتلی محاربه لر وقوع بولدی . مشرکینک میدان محاربهده یک چوق مقتوللری قالدی . نهایت بوزولوب پریشان اولمالریله دیار مکران دخی ممالک اسلامیة منضم اولدی .

### فذلکة ایام عمر

امیر المؤمنین عمر بن الخطاب رضی الله عنه الوهاب حضر تلرینک ایام - خلافتنده بروجه بالا آز وقت ظرفنده ممالک اسلامیة ، زیاده وسعت و دین اسلام ، فوق العاده قوت بولدی . هر طرفدن اموال وافر متوارد اوله رق بیت المال مسلمین مالا مال اولدی .

حال بوکه : برملتک ایچنده بردن بره بومرتبه ثروت و غنا حصولندن طولانی بین الناس اغراض دنیویه حادث و بوده اختلال و فتنه حدوثه باعث اولقی بو عالم کون و فسادک مقتضای احوالندن اولمغله بوراسی حضر عمرک ذهنی تحدیش ایدیوردی .

برده رسول اکرم علیه الصلوة والسلام ، امتك اعدالرينه غلبه ومكه  
 ويمن وقديس وشامى فتح وكسرى وقيصرك خزينه لرني تقسيم ايدم جكلريني  
 آره لرند فتنه واختلال ونفسايتلر حادث اوله رق ملوك سالفه مسلكنه  
 كيدم جكلريني بيان بيورمشيدى وعمر ، برحيات اولدقجه فتنه ظاهر  
 اولمايه جفتى دخی خبر ويرمشدى .

رسول اکرم صلى الله عليه وسلم حضرتلرى ، بويله مغيباته دائر اولان  
 اسرارك بعضيسنى ، بعض خواص اصحابنه وجمله سنى محرم اسرارى اولان  
 ( حذيفة بن يمان ) رضى الله عنه حضرتلرينه بيلديرمشيدى .

بركون حضرت عمر ، حضورنده بولنان بعض اصحاب كرامه « رسول الله  
 صلى الله عليه وسلمك فتنه حقنده اولان سوزى قنغيكزك خاطرنده در ؟ »  
 ديوصورمش . ايجلرندن حذيفة « يا امير المؤمنين ! رسولك فتنه حقنده  
 اولان سوزى عينيله بنم خاطرمددر كه كيشينك عيال ومال واولادندن  
 وقومشوسندن طولايي فتنهيه دوچار اولماسيدر . بومثللو كناهلره صوم  
 وصلوات وامر بالمعروف ونهى عن المنكر كفارت اولور » ديو جواب  
 ويرمش .

حضرت عمر « مرادم او دكل . دكز كجى تموج ايدم جك فتنهيه  
 سورويورم » ديدكده حذيفة « يا امير المؤمنين ! سنك ايجون آندن بر باس  
 يوق . سنك زمانكله آنك آره سنده بر قابالى قايى وار » ديمش .

حضرت عمر « بو قايى قيريلاجقمى ، يوقسه آچيلاجقمى ؟ » ديدكده  
 حذيفة « قيريلاجق » ديمكله حضرت عمر « اويله ايسه آرتق قابانماز »  
 ديوب اظهار تأسف ايتمش .

تابعيندن وكبار محدثيندن ( ابووائل ) بو محاورهيه حذيفه دن روايت  
 ايلدكدن صكره ديركه « قايى نك نه اولدينى حذيفه دن صورمغه قورقدق .  
 كبار ائمه دن اولان ( مسروق ) ، سن صور . ديك . اوده صوردى . حذيفه  
 « قايى عمردر » ديو جواب ويردى .

حذيفهيه ديدك كه : عمر ، قايى يي بيلورميدى ؟ حذيفه ديدى كه :



صباحدن صكره آقشامك كله جكنى فصل بيلور ايسه آنى ده اويله بيلوردى . بن ، آكا بر حديث شريف روايت ايلدم كه مغالطه قيلندن دكادر .

الحاصل حضرت عمر ، ملت اسلاميه آره سنده فتنه حدوئندن پك زياده اندیشه اوزره ايدى . بروجہ بالا بين الناس اغراض دنيويه يي موجب اولان ثروت و غنا حاصل اوله رق فتنه استعدادلى دخى پيدا اولمغه باشلامشيدى .

لكن حضرت عمر ك انظارا نامده دركار اولان مهابتى و ملت اسلاميه نك كندوسنه فوق العاده انقياد و اطاعتى فتنه ظهورينه مانع ايدى .

چونكه حضرت عمر ، ناسك درجه لرينه كوره مليونلرجه مال تقسيم ايدر كن كندوسى اورته حالحه بر مهاجر كى كمال تصرف ايله چكينوردى ، حتى بر كون خطبه اوقور ايكن كوملكنك اون ايكي يرنده ياما اولدينى كورولمشيدى .

بناء على ذلك ، آكا كيسه نك برديه جكي يوق ايدى . هر كس ، آندن اوتانور و مهابتندن قورقوب صاقنور ايدى . او ، هر ايشه دقت وبالذات تقيد ايلر و امن و آسايشى محافظه ايچون كيجه زقاقلرده كزر ايدى . حال بوكه : ممالك اسلاميه ، بروجہ بالا زياده وسعت بولدى . ايش چو غالدى ، هر يرده عدالت كامله اجراسى مشكل اولدى . حضرت عمر ، بو حالدن صيقلوب « يارب ! روحى قبض ايت » ديمكه باشلادى .

حتى بر كون آغلار كن سببى صور ولدقمه « فصل آغلاميم كه فرات كنارنده بر اوغلاق ضايع اولسه قورقارم كه عمر دن صورولور » ديو جواب ويردى .

حضرت عمر ك بريوك اندیشه سى دخى يرينه بر ذاتى استخلاف ايتك يعنى ولى عهد تعيين ايلك مسئله سى ايدى .

چونكه : حضرت صديق ، آنى استخلاف ايلش اولدينى كى آنك دخى برينى استخلاف ايتمسه انتظار اولنور و او دخى بو فكرده بولنور ايدى

اصحاب کرامت طبقه علیایی ، اهل بدر اولوب آنلرک ایچنده دخی عشره مبشره ممتاز اولمغه آنلردن برینک استخلافی لازمه حالدن ایدی .  
حضرت عمر ، کندوسندن صکره خلافتیه عشره مبشره دن ابو عبیده بن الجراح رضی الله عنه حضرتلرینی مناسب کورووردی .

ابو عبیده ایسه بالاده بیان اولدینی اوزره شامده امیرالامرا ایکن مطعوناً عازم داربقا اولمش وحین وفاتنده خانه سنده یالکز سلاحرلی و بر قویون پوستی و بر صو دستیسی قالمش ایدی . تمام استخلاف ایچون حضرت عمرک آرادینی ذات اولوب آنک وفاتندن صکره کندوسی بو باده متردد و متحیر قالدی .

عشره مبشره نك فضائلی چوقدر . تفصیله حاجت یوقدر . فقط خلافت و امارتدن مقصد اصلی ، تنظیم و تسویه مصالح امتدر . بو مقصده قنغیسنک انسب اولدینی جای مطالعه ایدی .

عشره مبشره دن سعید بن زید رضی الله عنه حضرتلری ، اوزمان بر حیات ایدی و عابد و زاهد و مستجاب الدعوه بر ذات ممدوح الصفات ایدی . لکن صرف آخرت آدمی اولوب امارت و ریاست قیندنه دکل ایدی . یرموک و قعه سنده و دمشق شامک فتحنده بولندی . لکن مجرد حبسی اوله رق بر مجاهد نفر کبی بولوب بر فرقه ریاست و امارتنده بولندی . بعده کوفیه کیتدی و اوراده اقامت ایتدی . اوله دن کندوسی اولمش حکمنه قومش ایدی . قالدیکه : حضرت عمرک عمزاده سی و همشیره سنک قوجه سی اولدیغندن آنی استخلاف ایتک حضرت عمرک مطالعه سنه الیر مزددی .

شوحاله نظر آ خلافتیه عشره مبشره نك باقی آلتیسندن ، یعنی ( علی بن ابی طالب ) و ( عثمان بن عفان ) و ( طلحه ) و ( سعد بن ابی وقاص ) و ( زبیر العوام ) و ( عبدالرحمن عوف ) رضی الله عنهم حضرتلندن بری تعیین و انتخاب اولمق لازم کلوردی . ایشته حضرت عمر ، بونده متردد و متحیر ایدی . زیرا

استخلاف ایدم جکی ذاتک زمانده فتنه ظهور ایدر ایسه معنوی مسئولیتی کندوسنه عائذ اولور دیو خوف ایدردی .

عبدالرحمن بن عوفک اهلیتتی تصدیق ایدردی . لیکن عبدالرحمن ، احد غزاسنده یکریمی یرندن یارم لایوب حتی یارم لک بری آیاغنده اولمغه طوبال قالمشیدی . وجودجه درکار اولان ضعفنه اختیارلق ضعیفی دخی منضم اولمغه امور خلافتک لایقیله ایفاسنه وجودی متحمل دکل ایدی .

سعد بن ابی وقاص ، عراق سرعسکرلکنده اثبات لیاقت ایلش ایسه ده خلافت ، باشقه برایش اولوب آنده دخی موفق اوله بیله جکنه حضرت عمرک اعتمادی یوق ایدی .

زبیر العوام ، تجارتدن لذت آلمش و اخذ و اعطا ایچنه طالمش و بو یوزدن پک چوق زنکین اولمش ایدی .

مدینه و بصره و کوفه ده و مصرده املاکی و پک چوق اراضیسی وار ایدی و بیک کوله سی اولوب کندوسنه خراج و یربورلر ایدی . زبیر ، بو اموالی مجلسنده بولسانلره بذل ایدوب بر آقچه سنی یاننده آلیقومازدی و ریاست و امارت قیئنده دکل ایدی . حتی بالاده بیسان اولندیغی اوزره حضرت عمر ، آکا مصر والیدکنی تکلیف ایتدکده قبول ایتیوب مجرد حبسی اوله رق جهاده کیتمش و مصرک فتحنده عمرو بن عاصه اعانه ایتمش ایدی . اوزمان خلیفه اوله جق ذات ایسه حضرت عمرک رأی و اجتهادینه کوره هر درلو آرزودن فارغ البال اوله رق مصالح مسلمینک رؤیقه حصر فکر ایلک لازم کلوردی .

طلحه دخی اصحاب ثروت و یساردن بر ذات اولوب کوزل کینور و اووقته کوره سوسلی کزر ، یعنی یرتیق و یامه لی روبه کینمز و یارماغنه قرمری یاقوتدن خاتم طاقار ایدی .

حضرت عمر ایسه یامه لی کوملک و صوف جبه کیر ، خلیفه آراردی . زیرا خلیفه ، او یله کوزل کینوب قوشانور و ذیقیمت اشیا قوللانور ایسه خلق ، آکا تقلید ایلر و جمع و ادخار اموال داعیه سینه دوشر و بوجه تله

بین الناس برطاقم اغراض و نفسانیتلر ظهور ایله ایش چیغیرندن چیقار دیو خوف و تلاش ایلردی .

عثمان بن عفّان دخی اغنیادن ایدی و خلیفه نك تجارت ایله زنکین اولوب سعادت دنیویه و اخروییه جامع اولماسنده بّاس کورمزدی . چونکه : تجارت حالدر ، زنکینك برقصور دکدر . اغنیای شا کرین ، فقرای صابرینه . قبالدر . داود و سلیمان علیهما السلامک حاللری بوکا دلیلدر . اهل اللهدن ایکی یوله ده سلوک ایدنلر واردر . فقرای اصحاب کرامدن بعضیلری « اغنیا ، بزم کبی عبادت ایلدکن باشقه وجوه برّه بذل مال ایله فضله ثواب قازانه رق درجات علیایه چیقایلر » دیو اغنیای شا کرینك حاللرینه غبطه ایدرلردی .

( دین ایله دنیا جمع اولورسه نه اعلا ، کفر ایله افلاس جمع اولورسه نه فنا ) دنیلمشدر .

اما حضرت عمر غندنده او زمان خلیفه نك جهت آخرته حصر نظر ایله یالکز مصالح امتی دوشونمسی و بیت المالدن آلاجنی مقدار کفایه علوفه ایله کچنمسی لازمه حالدن کورینور ایدی . بوایسه رأی و اجتهادجه بر اختلافدن عبارت ایدی .

فقط حضرت عثمانک خلافتی حقنده باشقه بر ملاحظه دخی وار ایدی . شویله که : حضرت عثمان ، بنی امیه دن اولدینی حالد بالجمله وجوه و اشراف قریش عنده غایت محترم و محبوب القلوب ایدی . لیکن خلیفه اولدقده امویلر باشنه اوشوب و هربری بر مأموریت قایمق داعیه سنه دوشوب اودخی پک ملایم و محبوب و زیاده حلیم و سلیم بر ذات ممدوح الصفات اولدینی جهتمله آنلره مساعدده ایده جکی و بوایسه دیگر قبیله و شعبه لرك و علی الخصوص هاشیملرك رقابتی جالب و نهایت بر فتنه حدوتی موجب اوله جنی وارد خاطر اولویوردی .

علی بن ابی طالب ، عابد و زاهد و مجاهد و بر خرقة و بر لقمه یه قانع بر ذات جلیل المناقب اولوب حضرت عمر ، آنک خلافته اهلیتی تصدیق ایلردی .

فقط حضرت علی ، بعضاً مزاج و لطیفه یه میل و رغبت ایلر و بونی شعار خلافته منافی کورمن ایدی . رسول اکرم صلی الله علیه وسلم حضرتلری بعضاً لطیفه یه تنزل بیورقلری جهتله ذاتاً ذاتاً لطیفه ده بر بئس کوروله من . حضرت عمر ایسه خلیفه نك مزاج و لطیفه دن اجتناب ایله دائماً کمال تمکین و وقار اوزره بولمنسی مقتضای حالدن کوروردی . لکن بوده رأی و اجتهاده بر اختلاف ایدی . مع هذ احضرت عمر ، بوبابده حضرت علی بی سائرینه ترجیح ایلردی .

آنلرک هربری بر مجتهد جلیل القدر ایدی . بر مجتهد ایسه دیگر مجتهدک قولیله ملزم اولمایوب هربری کندی رأییله عمل ایدردی .

حضرت عمر دخی حضرت صدیقه اتباعاً اوزرینه بر مسئولیت مغویه آله رق برینی استخلاف ایده جک اولدیغی تقدیرده کندی رأینه موافق بر خلیفه آرامقده حقی ایدی .

بومسئولیتی اوزرینه آلمغه مجبورده دکل ایدی . زیرا رسول اکرم صلی الله علیه وسلم حضرتلری ، امر خلافتی انتخاب امته براقش اولدیغندن حضرت عمر ، او یوله ده کیده بیلوردی .

بناءً علی ذلک حضرت عمر الفاروق ، بوبابده اوتنه دنبرو کندوسنجه برقرار قطعی و یره میوب متردد و متحیر ایدی . عبدالله بن عباس رضی الله عنهما حضرتلری دیرکه « برکون عمرک یانسه واردم . کندوسنی مغوم کوردم . دیدی که : امر خلافت حقنده نه یاپا جغمی بیلمیورم ، قالقوب اوطور و یورم . بوبابده متحیرم .

دیدم که : علی یه میل و رغبتک وارمی ؟ دیدی که : علی التحقیق علی ، یوایشه اهدر . فقط مزاجنده بر آز مزاحه میل واردر و بندن صکره او ، خلیفه اولورسه محقق سزی بیلدیککز طریق حقه سوق و ترغیب ایدر رأی و اعتقادنده یم . دیدم که : عثمان حقنده رأیک ندر ؟ دیدی که : آنی استخلاف ایتسم ( ابن ابی معیط ) ی ناسک باشنه بلا ایدر . عربده آکا

التفات اینز اولور . نہایت کندوسنک بونی اورولور . واللہ بن ، آنی  
استخلاف ایتسم اولیہ یاپار ، عرب دہ بویہ یاپار »

( یعنی عثمان ، خلیفہ اولورسہ آنا برقرنداشی اولان (ولید بن عقبہ بن ابی  
معیط) ی استخدا مایلر . عرب دہ آنک بوکی آدملری ایلری کچیرمسندن تفر  
ایدرك آنک علیہنہ قیام ایدر ونہایت کندوسنک قتلنہ سبب اولوزدیمکدر . )  
بودہ حضرت عمرک برکرامتیندرکہ عینیلہ ظہور ایتمشدر . شویاہ کہ :  
محلندہ تفصیل اولنہ جنی وجہلہ حضرت عثمان ، خلیفہ اولدقدہ ولیدی کوفہ  
والیسی ایتدی . کرک ولیدک ، کرک دیگر بعض امویلرک سوء حاللرندن  
طولایی فتنہ حادث اولہرق حضرت عثمانک شہادتہ سبب اولمشدر .  
بز ، کلہم ابن عباس حضرتلرینک سوزینہ :

« بعدہ عمرہ دیدم کہ : اولیہ ایسہ طلحہ بی استخلاف ایدرسکزر . دیدی کہ :  
رنک آمیز روبہلر کیر ، سوسلی کزر . اللہ تعالیٰ ، آنک بو حالنی بیلورکن آنی  
امت محمدک امورینہ متوّل قیلماز . دیدم کہ : سعد بن ابی وقاص وار . دیدی کہ :  
حرب ایدر ، لکن ولی الامر اولاما ز .

دیدم کہ : اولیہ ایسہ زبیر بن العوّام وار . دیدی کہ بازار یرندہ اولچکدن  
ومدّدن بحث ایدر . امور مسلمینہ اومی متوّل اولہجق ؟  
دیدم کہ : عبدالرحمن بن عوف قالدی . دیدی کہ : نہ کوزل آدمدر ، لکن  
ضعفدر . »

ابن عباس حضرتلرینک بومکلمہ سندن آکلاشلدینی اوزرہ حضرت عمر ،  
بوابدہ حضرت علی بی مرجع کورو یورمش . لکن بو خصوصدہ هنوز بر  
قرار قطعی ویرمدن کندوسنک شہادتنی موجب اولان بروقعہ غیر مأمولہ  
ظہورہ کلشدر .

### کیفیت وفات عمر

امیر المؤمنین عمر رضی اللہ عنہ حضرتلری ، مدینہ منورہ چارشوسندہ  
کزرکن ( مغیرہ بن شعبہ ) نک ( اَبُولُوْلُوْ ) نام نصرانی ، کولہ سی آکاملاقی



اولوب «يا امير المؤمنين! مغیره، بنم اوزريمه آغر خراج وضع ايتدی .  
آنی تخفیف ایتدیر» دیدی .

حضرت عمر «خراجك نه در؟» دیدکده «یومیه ایکی درهم» دیمکه  
«صنعتك نه در؟» دیدی .

ابولؤلؤ «تجارم، نقاشم، دمیرجیم» دیدکده حضرت عمر «بو  
صنعتلره نظراً خراجکی چوق کورمیورم . همده ایشیتدم که سن، یل  
ده کرمی یابه بیلورم دیمشین» دیدکده اودخی «اوت» دیمکه حضرت  
عمر «اویله ایسه بکا بریل ده کرمی یاپ» دیوب اودخی «سکا بر ده کرمی  
یابهیم که مشرقدن مغربه قدر دیلدرده داستان اولسون» دیوب کیتدی .

حضرت عمر «کوله، بنی تهید ایلدی» دهرک خانه سنه کیتدی  
وفرداسی صباح نمازی قیلدیرمق اوزره مسجد شریفه کلدی . صفر تسویه  
اولنورکن ابولؤلؤ کیردی، ایکی باشلی بر خنجرله حضرت عمری آلتی  
یرندن یارالادی وبر قاچ ذاتی اوروب اعدام ایتدکن صکره چیقوب  
فرار ایلدی .

حضرت عمر، مجروحاً یره دوشوب سریش اولدینی حالدہ نمازی  
قیلدیرمق اوزره عبدالرحمن بن عوف رضی الله عنه حضرتلرینه امر ایدوب  
اودخی امام اولوب جماعت ایله نمازی قیلدی و حضرت عمر قالدیریلوب  
خانه سنه کونورولدی .

اوصرده کندوسنه «یا امیرالمؤمنین! بر ذاتی ولی عهد ایت» دینلکده  
«ابوعبیده بر حیات اولسه آنی استخلاف ایدردم و نیچون ایتدک دیو  
طرف آهیدن صورولورسه یارب! رسولکک (ابوعبیده، بوامتک امیندر)  
دیدیکنی ایشیتدم. دیوجواب ویریردم و (ابو حذیفه) نک آزادلی کوله سی  
(سالم) بر حیات اولسه آنی استخلاف ایدردم و ربم سؤال ایدرسه  
رسولکک (سالم، اللهی اک زیاده سون ذاتدر) دیدیکنی ایشیتدم. دیوجواب  
«ویریردم» دیدی .

بعده « اوغلك عبداللهی استخلاف ایت » دینلده « بر خانه دن بر قربان یتیشور » دیدی .

بعده عبدالرحمن بن عوفی چاغردی « بن، سنی ولی عهد ایلک ایستورم » دیوب او دخی « بکا قبول ایت دیو رأی و نصیحت ایلر میسین؟ » دیدکده « ایدمه یارب » دیمکله عبدالرحمن « والله بن ده ابداً بوایشه کیرم » دیدی . حضرت عمر « او یله ایسه طورک ، بوایشی او ذاتلرک مشورتلرینه حواله ایدیم که رسول اکرم صلی الله علیه وسلم حضرتلری، آنلردن خشنود وراضی اولدینی حالده وفات ایلشیدی، دیدی وایشی مشورته حواله بووردی .

شویله که: عشره مبشره دن آلتی ذاتی ، یعنی (علی) و (عثمان) و (طلحه) و (زبیر) و (سعد بن ابی وقاص) و (عبدالرحمن بن عوف) رضی الله عنهم حضراتی مجلس مشورته مأمور ایدرک ایچلرندن برینی خلافته انتخاب ایلرینی وصیت ایلدی .

اوغلی (عبدالله) رضی الله عنہی دخی مجرد رأی ویرمک اوزره بو مجلسه مأمور ایدوب خلافته انتخاب اولنماسنی شرط ایتدی . طلحه ، اووقت مدینه منوره ده دکل ایسه ده یاقین یرده بولنه رق کلک اوزره ایدی .

حضرت عمر ، بووجهله کیفیته قرار ویردکن صکره عبدالرحمن بن عوف یاننده اولدینی حالده (علی) و (عثمان) و (زبیر) و (سعد) ی چاغردی . « سز ، بو امتک رئیس لر یسکیز . خلافته ایچکیزدن برینی انتخاب ایدیکیز و آکا ظهیر و معین اولیکیز . سزک حق کیزده ناسدن قورقام . سزک آره کیزه اختلاف کیروب ده ناس دخی اختلافه دوشر دیو قورقارم . طلحه ، رفیق کیزدر . اوچ کون آنی بکله یکیز . کاورسه فهبا ، گلز ایسه قرار کیزی انفاذ ایلکیز » دیدکن صکره او حالده ویربان قراری طلحه نک قبول ایدمه جکنی بکا کیم تعهد ایلر؟ » دیدکده سعد بن ابی وقاص « آکا کفیل و متعهدم » دیدی .

بعده حضرت عمر « يا علي: الله ايجون اولسون . ولي الامر اولور ايسه  
 بنی هاشمی ناسک باشنه بار ايمه . يا عثمان : ولي الامر اولور ايسه الله ايجون  
 ابي معيط ازغولاريني ناسک باشنه بار ايمه . يا سعد ! ولي الامر اولور ايسه  
 الله ايجون اقربا کی ناسک باشنه بار ايمه » دیدی .

« عبدالرحمن بن عوف ، نه کوزل صاحب رأيدر . آني دیکله يکيز ،  
 آکا انقياد ايله يکيز » ديو توصيه بويوردی .

اوغلي عبدالله دخي بو وجهله نصيحت ايلدی که « رأيلرده اختلاف  
 واقع اولور ايسه اکثريته تابع اول واکر رأيلرده مساوات بولنور ايسه  
 عبدالرحمن بن عوفک بولنديقي طرفده بولون » دیدی . هر کيم خليفه  
 اولور ايسه انصار کرام حقنده حسن معامله ايتمسي وصيت ايلدی .

« سعد ، اکر خلافته انتخاب اولنور ايسه اهليدر . اولتماز ايسه  
 خليفه اولان ذات ، آني استخدا م ايله استعانه ايلسون . بنم آني کوفه  
 امارتسندن عزل ايديشم ، ضعفندن ياخود قباحتندن ناشي دکل ایدی »  
 دیدی .

(ابوطلحة الانصاري) رضى الله عنه حضرتلری که انصارک ايجنده اک  
 زياده مالدار وفوق العاده شجاعت ايله شهرتشعار اولوب آنک حقنده  
 رسول اکرم (اردوده ابوطلحة نك سمي ، بر جماعتدن خيرلودر) ديو  
 بويورمشیدی . حضرت عمر آکا خطاباً « يا ابا طلحة ! چوق دفعهده  
 الله ، سنکله اسلامي عزيز قيلمشدر . بودفعهده خدمت ايله . ارباب مشورت  
 بر خانهده طويلانا جقلمشدر . سنده انصاردن اللي کيشي ايله قپوده بکله .  
 خارجدن کيمسيني ايجري صاليورمه . اوچ کونده ايجلرندن بريني انتخاب  
 ايتمک اوزره آنلری ترغيب ايت » دیدی .

(مقداد بن الاسود) خطاباً دخي « يامقداد ! بنی قبره قوديفکزده ارباب  
 شورايي طويللا وبر خانهيه قابات . ايجلرندن بريني انتخاب ايدنيجه دک آنلری  
 اوراده طوت » دیدی .

( صَهِیبِ رُومِی ) یہ خطباً « یاصہیب ! اوج کون ناسہ نمازی سن قلیدر واصحاب شورایی بر خاتہیہ قاپایوب سندنہ باشلری اوچندہ طور . بشی اتقاق ایدوبدہ بری ابا ایدرست قلیجلہ باشنی اور . دردی اتقاق ایدوبدہ ایکسی مخالفت ایلرسہ ایکسینکدہ باشلرینی اور وا کر تساوی آرا وقوع بولورسہ عبداللہی حکم نصب ایتسونلر . آکا راضی اولمازلر ایسہ عبدالرحمن بن عوفک بولندیفی طرفلہ برابر اولیکز ومخالفتدہ اصرار ایدنلری قتل ایدیکز » دیو بیوردی .

اوغلی عبداللہی ( عایشہ ) رضی اللہ عنہا حضرت تلرینہ کوندہ ردی وحجرہ سعادتدہ دفن اولمق اوزرہ رخصت ایستدی . او دخی رخصت ویردی . عبداللہ ، بوجواب ایلہ عودت ایلدکدہ « الحمد للہ . الکمہم ایشم ، بوایدی » دیدی بالادہ بیان اولندیفی اوزرہ رسول اکرم صلی اللہ علیہ وسلم وابوبکر رضی اللہ عنہ ، حضرت عایشہ نک خانہ سندنہ دفن اولمشلر ایدی . امہات مؤمنینک خانہ لری ایسہ بر حیات اولدقہ کندولرینک اولمغلہ حضرت عمر ، حجرہ سعادتدہ دفن اولمق اوزرہ حضرت عایشہ دن استیدانہ لزوم کورمشدر . بروجہ بالا اوغلی عبداللہ « وفاتمده بی حجرہ سعادتہ کوتوردیککزدہ ینہ عایشہ دن اذن ایستیکز . ویریرسہ اورادہ دفن ایدیکز ، ویرمزایسہ ( بقیع ) مزارستاندہ دفن ایدیویریکز » دیو وصیت ایلدی .

بعده بر طیب کتورولدی . کندوسنک یارہ لری معاینہ ایتدیریلدی . کوبکی آلتندہ کی یارہ ، دهرین اولمغلہ تہلکہ ظاہر اولدیغدن طیب آکا وصیت ایلہ یا امیر المؤمنین ! « دیدی اودہ » ایتدم » دیدی . حضرت عمر ، اویلہ مجروحاً یاتورکن طیشارودہ بر کورولتو اولمغلہ « نہدر ؟ » دیو صورتی . و « ناس ، یانکزه کیرمک ایستیور » دیدکلرنده اذن ویردی .

برکروہ ایچروکیروب « یا امیر المؤمنین ! عثمانی استخلافایت » دیدکلرنده « ہم مالی سور ہم ، جنتی سور » دیو بیوردی . آنلر طیشارو چیقدقن

صكره ديكبر بر كروه ايجرو كيروب « يا امير المؤمنين ! علي بن ابی طالبی استخلاف ايت » ديدكارنده « او، سزی بر يوله كوتورور كه طريق حق ، آنجق اودر ، ديدى . اوغلى عبدالله ، پدرينك حضرت علي به ميلاني آكلاينجه « يا امير المؤمنين ! نه مانع وار ؟ ايشته آنی انتخاب ايدويور » ديدكده « اى اوغلاجغزم ! بو ، يوكى حال حياتم زده يوكلكندك ، حال ماتم زده ده مى طاشيلم ؟ » ديدى .

آرتق كلمه شهادت و ذكر الله ايله مشغول اولدى و كيجه عزم روضه رضوان ايتدى .

خلافتى ، اون سنه ، آلتى آى وكسور كوندرد . وفاتى اشبو يكرمى اوچنچى سنه هجريه ذى الحجه سنك سلخنده ايدى .

نمازنى ( صهيب رومى ) رضى الله عنه حضرت تلىر قىلدى . نعشنى سرير نبوى اوزره قويوب حضرت عايشه رضى الله عنها خانه سنه كوتورديلر . وصيتى اوزره اوغلى عبدالله « يا عايشه ! عمر ، حجره سعادتده دفن اولمق اوزره رجا ايدر . اذنك وارمى ؟ » ديدى حضرت عايشه دخى كوزلرينك ياشلرينى شاهد طوته رق اذن ويردى . آنك اوزرينه حجره سعادتده ادخال ايله حضرت صديقك ياننه دفن ايتديلر . قبرينه اوغلى ( عبدالرحمن ) ايله برابر ( عثمان ) و ( عبدالرحمن بن عوف ) و ( سعد بن ابى وقاص ) اينشلا ايدى . رضى الله عنه و ارضاه .

مديونا وفات ايتمكله املاكى صاتيلوب ديونى ايفا ايديشدر .

## اولاد عمر الفاروق

زمان جاهليتده تزوج ايلش اولدينى ( زينب ) دن ( عبدالله ) و ( عبدالرحمن الاكبر ) نام اوغوللريله زوجة حضرت پيغمبرى اولان ( حفصه ) حضرت تلىر و ( مليكه ) نام زوجه سندن ( عبدالله ) نام اوغلى طوغشيدى . بعدالاسلام تزوج ايلديكى ( ام حكيم ) دن ( فاطمه ) نام قيزى و ( جميله ) نام زوجه سندن ( عاصم ) نام اوغلى طوغمشدر .

بعده علی بن ابی طالبك (فاطمه) رضی الله عنها حضرت تارندن متولد اولان  
(امّ کاثوم) ی قرق بیك درهم مهرايله نکاح ایدوب آندن دخی (رقیه)  
نام قیزی ايله (زید) نام اوغلی تولد ایلشدر .  
(فکیه) نام جاریه دن دخی (زینب) نام بر قیزی اولمشدر .

تمه

حضرت عمرک فتوحاتی وملت اسلامیة به خدماتی چوقدر . اجمال احوالی  
یوقارولرده مرور ایتمکله تکراره حاجت یوقدر . سوزینی دیکله دیر ،  
اورورسه آجیدیر ، امر دین ده لوم لائمن و طعن طاعندن حذر ایتمز و بر  
خصوصده خاطر کوزه تمز ، هر حال وکارده عدااتی التزام ايله قطعاً طرفدارلق  
یولنه کیتمز ایدی .

عادل و مدبر ، قانع و صابر ، عابد و زاهد بر ذات کثیر المحامد ایدی .  
(رضی الله عنه وارضاه)





## جزء سادس

۲۴ نجی سنه وقایعی

جزء خامسده بیان اولندیغی اوزره یکریمی اوچنجی سنه هجری ذی الحجه سنک صوک کونلرنده (مغیره بن شعبه) نک (ابولؤلؤ) کولهسی، عمر بن الخطاب رضی الله عنه الوهاب حضرتلریغی خنجرله اورو یارالامشدی. حضرت عمر، حیاتندن مایوس اولدیغی حالده خلیفه اتخا شورایه حواله وارباب شورانک بریره جمعینی (مقداد بن الاسود) رضی الله عنه حضرتلرینه امر وازاده ایلمشیدی.

(ابو طلحة الانصاری) رضی الله عنه حضرتلرینه دخی «انصاره» الی کیشی اتخاب ایله یاننه آلهرق اصحاب شورایی ایچلرندن برینی اتخا واختیاره اماله وترغیب ایت «دیو بیورمشدی».

شوحاله نظرآ امور ضابطه، ابوطلحه یه عائد اولوب (صهیب رومی) رضی الله عنه ایسه وائتاده امام اولهرق ناسه نماز قیلدیرمغه مأمورایدی. موقه خلیفه قائممقامی مثابه سنده اولهرق حضرت عمر، آکامأذونیت کافیه ویرمشیده اصحاب شوری، عشره مبشره دن آلتی ذات جلیل الصفات، ید (عثمان) و (علی) و (طلحه) و (زبیر) و (سعد بن ابی وقاص) و (عبد الرح بن عوف) ایله (عبداه بن عمر) رضی الله عنهم حضراتی ایدی.

آنحقی عبدالله بن عمرک خلافتہ انتخاب اولئامسی شرط اولوب او ،  
لکز رأی ویرمکه مأمور و خلافتہ مشارالیم آلتی ذاتدن بریسنک انتخابی  
قرر ایدی .

طلحه ، مدینہ منورہده بولمادیغندن اوچ کون آنک ورودینه انتظار  
ولنوب کلدیکی حالده دردنجی کون بهمہ حال آنلردن بریسنک انتخابی  
حضرت عمرک وصیتی اقتضاسندن ایدی .

طلحه نك غیابنده ویریله جك قراره آنک دخی راضی اولاجغه سعدبن  
ن وقاص ، متعهد اوله رق آنک طرفندن فضولی وکیل و آنک رأیی حامل  
یدی .

لکن عمر الفساروق کبی بتون عالمی لرزان ایدن برذات جلیل الصفاتک  
ینی کیم طوته جق؟ دیو هر کسی غم و غصه بوغمش ایدی .

حضرت عمر ، دفن اولندقدہ مقداد بن الاسود ، غیراز طلحه ، اصحاب  
ورای جمع ایله برخانه قودی و یانلرینه خارجدن کیمسه داخل اولماق  
یچون ابوطلحه دخی بکله مک اوزره کلوب او خانه نك قبوسنده طوردی .  
صهیب رومی دخی اوقات خمسده جماعت مسلمینه امامت و باب شوری  
شلرینه نظارت ایلردی .

امیر مصر اولان (عمر و بن عاص) ایله امیر کوفه اولان (مغیره بن شعبه)  
زمال مدینہ منورہده بولنوب آنلر دخی کلدیلر و خانه شوری قبوسنده  
وردیلر .

حال بوکه : آنلرک بوبابده برکونه مأموریتلری اولمادیغندن سعد حضرتلری  
صکره بزده داخل شوری ایدک. دیمک ایچونمی بوراده طور و یورسکمز؟  
به رک آنلره طاش آتدی وایکیسنی ده اورادن دفع ایتدی .

آنلرده اوسست پرده دن مجاوبه و مجادلہ یه قیام ایتمکله میانه ده سوز  
بوغالیدی وایلک آغزندن کبار قریش آره سنده مبیانت و برودت پیدا  
لیدی .

حال بوکه : کرک مدینہ منورہ اهاالیمسی، کرک خارجدن کلوبده اوزمان

اوراده بولنان اشراف عرب وامرای عسکر، هب مجلس شورانك ویره جگی قراره منتظر ایدی .

اوله مهم بر مسئله اوزرینه هرکسك قولانگی کیریشده اولدینی ائنده بویله پرده بیرونانه سوزلر و آهنگسز سسلر ایسه مصلحته مضر وقاعدۀ احتیاطه مغایر ایدی .

ابوطلحه، همان اصحاب شورایه خطاباً « عمرک جانی آلان الله حقیچون سزه عمرک ویردیکی اوچ کوندن زیاده مهلت ویرم . همان نه یاباقسه کز بومدت ظرفنده یاپکز » دیوب اوزرلرینه قیوی قبادی .

اولا عبدالرحمن بن عوف حضرتلری، برخطبه ایراد ایله سوزده باشلادی و اختلاف آرادن اجتنابك لزومنه دائر سوزلر سویلیدی و رفقاسنی اتحاد افکاره دعوت ایلدی .

فی الواقع افکار عمومیه نك بویله هیجان اوزره بولندینی ائنده الك زیاده صاقیناجقشی، اهل اسلام آره سنه اختلاف و تفرقه دوشمك ملاحظه سی ایدی .

عبدالرحمن بن عوفك بونصیحتی اوزرینه حضرت عثمان بن عفان وزیر بن العوام برر خطبه او قودقدن صکره کمال اخلاص ایله آنك دعوتنه اجابتلرینی بیان ایلدیلر .

بعده سعد بن ابی وقاص حضرتلری، برخطبه او قویوب بالذات بودعوته اجابتندن باشقه کندوسنك راضی اوله جنی صورتیه طلحه نك دخی راضی اولاجغنه متعهد اولدینگی بیان ایتدکدن صکره « یاعبدالرحمن ! ایش سنده دره همان ایشه خالصانه یاپیش وخیر خواهانه چالیش » دیدی .

اك صکره حضرت علی، سوزه کیریشوب « او، الله حمد اولسون که بزدن محمدی نبی و بزه رسول کونده ردی . ایمدی بز بیت نبوت، معدن حکمت . اهل ارضه امان . اهل حاجته نجات . بزم برحقمز وارد . ویریلورسه آلورز، منع اولنور ایسه ارض الله واسعه . دیوب ده و ملرك صرترلرینه بینرز . اکر رسول اکرم، بزه برعهد ایلش اولسه یدی آنك عهدینی انفاذ

ايدردك ويزه برسوز سويلش اولسه يدي آنك اوزرينه اولنجيه دك مجادله ايلردك . دعوت حقه وصله رحمه بندن اول مسارعت ايدم جك كمسه يوقدر ( لاحول ولا قوة الا بالله ) سوزمي ديكله يكر ، نطقمي بلله يكر . شو مجلسدن صكره بوايش ايچون قورقولوركه قيليجلر ميدانه چيقوب عهدلره خيانت اولنديغني كوررسكز . تاكه سز برجامت اولورسكز . بعضيلر دخی ائمه اهل ضالالت و فرقه اهل جهالت اولور . بكا كوره هوا خوش « دیدی . حضرت علينك كشي طوغري ایدی . برمدت صكره وقوعات ، آني تماميله تصديق ايلشدر .

چونكه : اتحاد اسلام ، بين العرب جاري اولان غيرت جاهليه يي برطرف ايتمش ايسه ده وقت سعادت اوزاد قجه غيرت قوميت ، اوج كوسترمكه باشلامشدر .

هاشميلر ، مقدم وه مؤخر خلافته حضرت علي يي وامويلر ، حضرت عثمانی انتخاب ايتمك ايسيتوب ديكر قرشيلرك ا كثرى دخی خلافت بر كره هاشمیلره كچرسه آنلرك پيننده تداول ايدمك آرتق ديكر شعبه وقيله لره كچمز ديو ملاحظه ايدرلردی .

حضرت علي ، عالم وفاضل وعارف بالله بر ذات حقايق ا كتناء اولوب كندوسنجه اسلامك ترايد شرف وشانندن باشقه بر آرزو اولاما ز ايسه ده هاشمیلرك وديكر بعض اصحاب كزينك آرزولريني رد ايدم مزدي .

حضرت عثمان دخی سابقين اوليندن ملايم وحليم وسليم ومحجوب ومحجوب القلوب بر ذات ممدوح الصفات اولديني حاله . قيله سي اولان امويلرك آرزولرينه سد اولامازدی .

مقصد اصلي ايسه اهل اسلام آره سنده اختلاف وتفرقه واقع اولما مق اوزره قبول عاميه مظهر اوله جق بر خليفه بولمقدن عبارت اولوب اصحاب شورانك پركار افكاري هپ بومركزه دائر ایدی .

بناءً على ذلك ، عبد الرحمن بن عوف حضرت تلي ، تكرار سوزمه باشلايوب « هانكيكيز خلافتي ايچكيزدن افضل اولانه توجيه ايتمك اوزره

دوعهد ايدوبده سندوسنی آندن نزع و اخراج ايلر ؟ « ديو صوردي .  
 بسوألنه جواب ویرن اولماديغندن عبدالرحمن « ايشته بن ، بو وجهله  
 کنديمی خلافتدن خلع و اخراج ايدرم » دیدی .  
 ابتدا حضرت عثمان وبعده ديکړلری آکا راضي اولوب فقط حضرت  
 علی سکوت ايله مکله عبدالرحمن آکا « نهديرسين يا ابالحسن ؟ » ديو صوردي .  
 حضرت علی « حق اختيار ايدره جککه و ذی رحمی ترجیح ايتيه جککه و امتک  
 خيرینی تحریده قصور ايله ميه جککه بنی عهد و میثاق ايله تأمین ایت ، بنده  
 راضي اولورم » ديو جواب ویردی .

عبدالرحمن « سز بنم اختيار ايدره جکمه راضي و مخالفت ایدن اولور  
 ايسه عليهنده بنمله برابر اولمق اوزره بکا عهد و میثاق ویریکمز . بنده  
 ذی رحمی ، قرابتی ایچون ترجیح ايتيه جکمه و مسلمینک خيرينه حصر نظر  
 ايله جکمه اللهم عهد و میثاقی ايله سزی تأمین ايدرم » دیدی . بو وجهله  
 آنلر ، آنی و او دخی آنلری تأمین ایلدی . عبدالرحمنک زوجہ سی و عقبه  
 بن ابی معیطک قزی اولان ( ام کلثوم ) عثمانک آنا بر قیز قرنداشی اولوب  
 بو قرابت صهریه ، بحسب البشریه عبدالرحمانک ذهنی عثمان طرفه میل  
 ایتدیرمک خاطره کلش ايسه ده تأمینات واقعه ، او خاطرہ نی کلیاً ازاله  
 ایتمیشدر .

زیرا اصحاب شوری ، ملت اسلامیه نک اخص خواصی اولوب هر جهته  
 مؤتمن و موثوق و عهدلرینک خلافتنه حرکت ایلک احتمالی یوق ایدی .  
 بوبابده آنلر یکدیگرنندن امین ایدیلر .

او وجهله عهد و میثاق اولندقدن صکره عبدالرحمن بن عوف حضرت تلی ،  
 حضرت علینک یاننه کلوب « سن ، رسول اکرمه قرابتک و اسلامده  
 تقدم و مسابقتک و دینده حسن آثارک حسیله حضارک ایچنده خلافتنه احکم  
 دیرسین . ذاتاً اهلیتک دخی مسلمدر . فقط بالفرض بوراده بولنسهک  
 و بوامر ، سندن آخره صرف اولنه حق اولسه بو جماعتک ایچنده هانکیسینی  
 آکا حق کورورسین ؟ » دیدکده حضرت علی « عثمانی » دیدی .



بعده عبدالرحمن ، حضرت عثمان ایله یالکز کوروشوب « سن ، بنی عبد منافدن برشیخم ورسول اکرمک دامادی یم و آنک عمزاده لرندم واسلامده قدم وفضل وار . بو امر ، بندن نزمیه صرف و تحویل اولنور؟ دیرسین . لکن حاضر اولماسهک بوجاعتک ایچنده قنغیسنی احق کورورسین؟ » دیدکه اودخی « علی یی » دیدی .

الحاصل خلافت ، حضرت علی و عثمان آره سنده دائر قالدی . حضرت عمر دخی بروجّه بالا اصحاب شورایه وصیت ایلدیکی صرمده « ظنمه بونلردن بری انتخاب اولنور » دیه رک ایگیسنه اشارت ایلش و « عثمانده یوموشاقلق وارددر . علی ، مزاحه مائلدر وناسی طریق حقه سوق ایتک آکا احراردر » دیمش ایدی .

عبدالرحمن بن عوف حضرتلری ، حکم اولمش و بو وجهله ایشی اله آلمش اولدیغندن افکار ناسی آکلامق اوزره چیقوب طولاشدی و اصحاب کزین و مدینه ده بولنان امرای عسکر و اشراف عرب ایله بولوشدی و لازم کلنلر ایله سویلشدی .

اوچ کون تمام اوله رق دردنجی کونی بهمه حال خلیفه انتخابی مقرر اولغله اوکونک کیجه سی عبدالرحمن ، خانه شورایه کلوب زیر ایله سعد بن ابی وقاصی چاغیردی وابتدا زیرک رأینی صوردی . اودخی « بنم نصیم علی ایچوندر » دیو جواب ویردی .

بعده سعد بن ابی وقاصه « سن نصیبکی بکا براق » دیدی اودخی « اگر کندیکی اختیار ایدم جک ایسهک پک اعلا واکر عثمان ایچون ایسه نجه علی ، اولادر . سن کندیکه بیعت ایتده بزی صیقنیدین قورتار » دیدی .

آنک اوزرینه عبدالرحمن بن عوف « بن ، انتخابچی اولق اوزره کندیمی خلافتدن خلع ایتدم . ایتهمش اولسم دخی خلافتی قبول ایتزدم . ابوبکر و عمر دن صکره هرکیم خلیفه اولسه ناس ، آندن خوشنود » قالماز دیدی .

بعده حضرت علی یی ایستیوب آنکله اوزون اوزادی یه کیزلو



سویلشد کدن صکره حضرت عثمان ایله تنها کوروشوب باشقهجه آنکلهده وقت فجره دک محرمانه سویلشدی. ایکیسیلهده نه سویلشدیکی میدانه چیقمادی. صباح نمازی قیلندقدن صکره عبدالرحمن بن عوف، اصحاب شورایی طولادی ومهاجرینی وانصارک قدما وفضلاسنی ومدینهده بولنان رؤسای عسکری دعوت ایلدی.

جملهسی کلدی، مسجد شریف آغزینه قدر طولدی. عبدالرحمن بن عوف آنلردن رأی صوردی.

عمار بن یاسر رضی الله عنه «اگر مسلمینک اختلاف ایتمهسنی ایسترسهک علییه بیعت ایله» دیدی مقداد بن الاسود دخی آنی تصدیق ایتدی. اوته طرفدن حضرت عثمانک سوت قرنداشی اولان (عبدالله بن سعد ابن ابی سرح) «اگر قریشک اختلاف ایتمهسنی ایسترایسهک عثمانه بیعت ایله» دیدی. عبدالله ابن ابی ربیعہ دخی آنی تصدیق ایتدی.

عمار بن یاسر، عبدالله بن ابی سرحی تکدیر ایلدی. اودخی آکا آجی سوزلر سویلدی. حضارک بر فرقهسی آنی ودیکر فرقهسی بونی تصحّب ایله جداله باشلادیلر، بربرلرینه اطاله سنان لسان ایلدیلر.

میانهده سوز چوغالدى. فتنه اماره لری رونما اولدی. سعد بن ابی وقّاص، همان «یا عبدالرحمن! فساد وقتنه ظهور ایتمدن برقرار ویر، ایشی بیتیر» دیدی.

عبدالرحمن ابن عوف «ای جماعت! صوصیکز، طوریکز، باشکزه بر ایش چیقارمایکز. بن، دوشوندم، طاشیندم، لازم کلنلر ایله مشاوره ایتدم» دیدی.

همان حضرت علی بنی یانه چاغیردی وآکا «اللهک کتابی ورسولنک سنتی وآندن صکره ایکی خلیفه سنک سیرتی ایله عمل ایده جککه الله ایله عهد وميثاق ایت» دیدکده حضرت علی «اومارمکه علم وطاقتم ایردیکی قدر عمل ایدرم» دیدی. عبدالرحمن، ایکی گره دهابوسؤالی ایراد ایتدی. حضرت علی، ینه اوילה جواب ویردی.

حضرت علینک جوابی صواب و موافق حکمت ایسده وقت پک تنک و تیک اولوب او یله قید و شرط تقید و توقفه مساعد دکل ایدی .

بناءً علیه عبدالرحمن ، همان حضرت عثمانی چاغیروب آ کا دخی اوچ کره حضرت علی به دیدیکی کبی دیدکده حضرت عثمان ، بی توقف « اوت . او یله عمل ایدرم » دیمکله عبدالرحمن حضرتلری ، باشی قالدیروب الی ، حضرت عثمانک الی اوزرنده اولدینی حالده « یارب ! شاهد اول . بوینده کی اماتی عثمانک بوینته قودم » دهرک بیعت ایلینجه سائر ناس دخی بیعت ایلدی .

مؤخرآ حضرت طلحه کلدی ، حضرت عثمانک یاننه کیردی . حضرت عثمان آ کا « مخیر سین . ایستر ایسهک بیعت ایله واکر ابا ایدر ایسهک امر انتخابی اعاده ایدرم » دیدکده طلحه « هر کس سکا بیعت ایلدیمی ؟ » دیووردی . « اوت » دیمکله طلحه « بنده راضی یم . ناسک اتفاقه مخالفت ایلهم » دیوب بیعت ایلدی .

### لاحته

کبار تابعیندن اولان ابو وائلدن مرویدر . دیمش که : « عبدالرحمن بن عوفدن صوردم وعلی بی نه جهتله ترک ایدوبده عثمانه بیعت ایلدیکز؟ دیدم . دیدی که : بنم صوچم یوق . بن ، علی به بیعتی تصمیم ایله ابتدا آ کا توجه ایدرک پیغمبرک سنتی و ابوبکرک و عمرک سیرتی ایله عمل ایده جکنه عهد و میساق تکلیف ایتدم . او ، قدرتم مرتبه دیو قید احترازی کوزمندی . تکرار ایستدم ، ینه او یله جواب ویردی . عثمانه عرض ایتدم ، بلا قید قبول ایلدی . »

### وقایع ایام خلافت عثمان

بالاده بیان اولدینی اوزره ( ابولؤلؤ ) خنچرله حضرت عمری جرح ایتدکن صکره طوتولدینی کبی کندوسنی دخی او خنچرله اوروب تلف

ایتمش و علی روایة آنی صکره حضرت عمرک اوغلی ( عیدالله ) دیگر  
ایکی رفیقہ برابر اولدورمشدر.

شویله که : اوزمان مدینة منورده بولسان عجملر ، یکدیگریله الفت  
واختلاط ایدرلردی و جزء سابقده بیان اولندیغی اوزره ملوک عجمدن  
اولدیغی حالدہ مدینة منوریه کلوب حضرت عمر طرفندن کندوسنه سنوی  
ایکی بیسک درهم عطیه تخصیص اولمش اولان مشهور ( هرمان ) دخی  
مدینة منورده مقیم ایدی. ابولؤلؤ و حیره اهایلسندن ( جفنه ) نام نصرانی،  
هرمان ایله مصاحبت ایدرلر ایکن هرمان ، ابولؤلؤک خنجرینی الیه  
آلوب برمدت نظر ایتدکن صکره کیرو ویردیکی صرده ( عبدالرحمن بن  
ابی بکر ) آنلرک اوزرینه وارمقله خنجر یره دوشمش. فرداسی ابولؤلؤ،  
خنجرله حضرت عمری جرح ایتمکله عبدالرحمن ، بو ماجرای ( عیدالله )  
خبر ویرمش. او دخی بو حادثه نیک اوچی بیننده مصمم بر جنایت اولدیغنه  
ذاهب اوله رق واروب هرمانی و رفیقلرینی اولدورمش. حال بوکه :  
اوله بر شبهه اوزرینه آدم اولدورمک شرعاً قصاصی موجب بر کیفیت  
ایدی. عشره مبشره دن سعد بن ابی وقاص ، راست کلهرک عیداللهی  
طوتوب حضرت عثمان، یاننده کی اصحاب کزین ایله مسجد شریفده اوطورور  
ایکن حضورینه کتوردی. حضرت عثمان ، آنلردن رأی صوردی.  
حضرت علی ، عیداللهک قصاصاً قتل اولمنسینی رأی ایتدی.

عمرو بن عاص ایسه « دون عمر ، بوکونده اوغلی قتل اولنق اولاماز،  
دیدی. آنک اوزرینه حضرت عثمان دخی « بن ولی الامر اولدیغ جهته  
قصاصی دیته قلب ایتدم. لازم کن دیتلرینی کندی مالمدن ویررم ، دیو  
عیداللهی صالیویردی.

ایشته بو وقعہ دخی اصحاب کرام بیننده رأی واجتهادجه وقوع بولان  
اختلافادن بریدر.

لکن جزء سابقده بیان اولندیغی اوزره هرمان کی مشهور بر آدمک  
بویله ظلماً اعدامی انظار انامده یک چیرکین کورونمشدر. حتی ( زیاد بن

لید الانصاری ( عیداللهک بغیر حق قاتل اولدیغنه دائر اشعار سویلیوب یوزینه قارشو اوقوردی .

عبداللهک اشتکاسی اوزرینه حضرت عثمان، زیادی چاغیروب بوحر کتدن منع ایلدکده عیداللهک عفوی دخی بر خطا اولدیغنی مشعر شعرلر سویله مشدر . الحاصل عیدالله، قصاصدن قورتولمش ایسه ده ناسک لسانندن قورتولامایوب و بو جهتله مطمئن القلب اولامایوب نهایت حضرت علی خلیفه اولدقده قصاص قورقوسیه شام والیسی معاویه نك یانه فرار والتجاء ایشدر و بعده محاربه صفینده مقتول اولمشدر .

ایشته حضرت عثمان، خلافته انتخاب عقبنده بویله بر وقعه غریبه ایله ایشه باشلامشدر .

بعده خطبه اوقومق اوزره منبره چیقدی . لکن صیقلدی ، نطقی طوتولدی . « هر شیک ابتدای کوجدر . یاشارسم سزه یولیه خطبه اوقورم » دیوب منبردن ایندی .

حضرت عمرک وصایاسنه توفیقاً هپ مأمورینی ابقا ایتدی و مغیره بن شعبه یی کوفه دن عزل ایله سعد بن ابی وقاصی کوفه امیری نصب ایلدی . جزء خامسده بیان اولندیغنی اوزره کسرانک بیله زیکلرینی طاقینمش اولان (سراقه) و اهل بدردن ( عبدالله بن کعب الانصاری ) بوسنه فوت اولدیلر . رضی الله عنهما .

## ۲۵ نجی سنه وقایعی

بوسنه قسطنطینیهدن ( مانوئل ) نام جنرال ، معیتله بحرآ اسکندریه ساحلنه کلتی عسکر کلدی . اسکندریه ده بولنان روملر دخی چیقوب آنلره ملتحق اولدی .

( مقوقس ) ایسه عهدنده ثبات ایدرک آنلری درون شهره قومادی .

بناءً علیه مانوئل اردوسیله مصره طوغری یورودی . عمرو بن عاص دخی مصردن قارشو چیقدی ولدی الملاقاة بر شدتلی محاربه وقوع بولدی . نهایت روملر ، بوزولدی . عساکر اسلامیه ، آنلری اسکندریه قدر تعقیب ایتدی . عساکر رومیه نك چوغی ، حتی مانوئل دخی مقتول اولدی .

ینه بوسنه ری اهاالیسنك نقض عهد ایلک اوزره اولدقلری ایشدیلکله سعد بن ابی وقاص ، درحال عسکر ارسالله اورانك احوالی اصلاح ایتمش ( ديلم ) ه غزا ایلشدر . لکن چوق کچیوب کندوسنك عزلی وقوع بولشدر .

شویله که : سعد بن ابی وقاص رضی الله عنه ، بیت المالدن اولق اوزره مال مأموری بولنان ( عبدالله بن مسعود ) رضی الله عنهدن بر مقدار آچه استقراض ایتشیدی . و قتيله ویره مدیکندن ابن مسعود ، آنی صیقیشدیردی وسعد حضرتلری ، مهلت ایسته دی ایسه ده ویرمدی .

بوندن طولایی سعد ایله ابن مسعود آره سنده ظهوره کلن منازعه و مجادله ، کوفه اهاالیسنه سرایتله ایکی فرقه اولدیلر . برفرقه سی ، آکا طرفدار اوله رق دینك تأخیر و تمهیلی و دیگر فرقه سی ، بوکا طرفدار اوله رق همان تحصیل رأینده بولندیلر . بلاد اسلامیه ده ابتدا بین الاهالی وقوع بولان تفرقه بودر وابتدا شقاقه محل اولان بلده کوفه در . ( اهل عراق ، اهل شقاق ) تعیری آندن قالمشدر .

امیر المؤمنین عثمان رضی الله عنه حضرتلری ، کیفیتدن خبر آلدقه ایکینه دخی غضب ایتدی و حضرت سعدی عزل ایله ( عقبه بن ابی معیط ) ک اوغلی و کندوسنك آنا بر قرنداشی اولان ( ولید ) ی کوفه امیری نصب ایلدی .

ولید ایسه حدید وشدید بر آدم و بعض منہیاتی ارتکاب ایله متهم اولدیغندن عشره مبشره دن سعد بن ابی وقاص کبی مستجاب الدعوه برذاتک یرینه آنک مأموریتی انظار انامده چرکین کوروندی و آنک بویله بیوک



مأموریتلرده استخدای ، عمر الفاروق رضی الله عنه حضرتلرینک جزء سابقده بیان اولنان نصیحتنه منافی ایدی .

ولید ، کوفهیه واردقده سعد حضرتلری ، آکا « سنی بزدن صکره عاقل اولدک ، یوقسه بز می سندن صکره احق اولدق ، دیدکده ولید ، آکا جواباً « تلاش و کدر ائمه یا ابا اسحق ! بونلرک هیچ بری دکل . لکن بو ملکدرکه آتی بر قوم، صباح و دیکری، آقشام طعامی ایدر » دیمکله سعد دخی « کوریورم سز، مأموریتلری ملک ایتمش سکز » دیدی .

اصحاب کزین ، بر نوع عبادت اولمق اوزره قبول مأموریت ایدرلری . بواننده میدانله چیقانلر ، علی الخصوص امویلر ایسه منصب و مأموریتلری بر نوع یمکملک ایدیندیلر و مالکانه حکمنه قودیلر . فقط کوفه لیلرک اخلاقی فاسد اولمغله ولیددن خوشلانیدیلر وخیلی مدت آنکله خوش کچیندیلر .

حضرت عثمان ، بو وجهله ولیدی کوفه امیری نصب ایتدکن صکره ( عتبة بن فرقده ) ی دخی آذربایجان امارتندن عزل ایتدی .

لکن آذربایجان خلقی عصیان ایتمکله ولید ، اطرافدن کللی عسکر طوللادی و فرقه لره مقتدر امیرلر تعیین ایلدی .

ایچلرنده جلیل القدر ذاتلر وار ایدی . حتی مداین عسکرینک امیری ( حذیفه بن الیمان ) رضی الله عنه ایدی .

ولید، همان ( عبدالله بن شبیل ) ی مقدمه الجیشه مأمور ایدرک آذربایجان اوزرینه کیتدی . برچوق یرلرینی غارت ایلهرک آذربایجان اهالیسنی اطاعتنه مجبور ایتدی . بعده اطرافه چته لر طاغیتدی واون ایکی بیک عسکرله ( سلمان بن ربیعہ الباهلی ) ی دیار ارمنیه اوزرینه یوروتدی .

حصرت عثمانک امریله ( معاویه ) دخی ( حبیب بن مسلمه ) یی شام عسکریله امداده کونده رمش اولدیغندن بودفعه دیار ارمنیه ده شام عسکری عراق عسکریله برلکده غزا ایتدی .

شامیلر ایله عراقیلر آرمسندله وجوه قرائتجه اختلاف اولوب هربری



کندی قرائتک صحتی ادعا ایدرک بینلرنده منازعه ظهور ایتدی. آزقالدی  
فتنه بادی اولیوردی .

بوغزاده کلّی اموال غنائم آلتوب ولید، مظفر ومقتم اوله رق کوفیه  
عودت ایلشدر .

مؤخرأ بریوک روم اردوسی، سیواس وملاطیه طرفلرینه طوغری  
یورومکله بوکره دخی اهل شامه امداد ایچون سلمان بن ربیعہ، بفرقه  
عراق عسکر یله دیار رومه کونده ریلشدر .

سلمان، عساکر شامیه ایله برلشوب دیار رومه داخل وپک چوق یرلری  
غارت ایدرک کلّی اموال غنائمه نائل اولمشلر وچوق قلعه لر فتح ایتمشلر درر.  
بعده معاویه بلاد رومه غزا ایتمش و(عموریّه) یه قدر کیتمش وکیدرکن  
انطاکیه ایله طرسوس آره سندله پک چوق خالی قلعه لر بولنمغله خط رجعتی  
محافظه ایچون آنلره مقدار کافی مستحفظ براقش ایدی .

کیدوب کلدکدن صکره تکرار دیار رومه سوق عسکر ایتدکده او  
قلعه لر ی هدم وتخریب ایتدیرمشدر .

آدی باته سی معهود (یزید بن معاویه) اشبو بکرمی بش سنه سنده دنیاه  
کلشدر .

### وقایع افریقا

(عبدالله بن سعد بن ابی سرح) که فتح مکده دمی هدر قیلنمشیکن  
حضرت عثمانک سوت برادری اولدیغندن آنک شفاعتیه عفو بیورلمشیدی.  
بواننده امیر مصر اولان عمر وبن عاصک معیتده کی عسا کردن ایدی .

حضرت عثمان، بوسنه آنک بفرقه ایله آفریقا جانبنه کونده ریلسنی  
عمرو بن عاصه اشعار بیوردی و(عبدالله بن نافع بن عبدالقیس) ایله (عبدالله  
بن نافع بن الحارث) ی برر مقدار عسکرله آنک معیتنه کونده ردی .

بووجهله عبدالله بن سعد، معیتده اون بیک کزیده عسکر مجتمع  
اولدی که ایچلرنده شجعان مسلمیندن نیچه ذوات وار ایدی .

عبدالله بن سعد، بوعسکرله مصردن چیقوب آفریقہ دیارینه واردی  
لکن آفریقہده غلبه لك زیاده اولدیغندن بك ایچرولرله طالمغه جسارت  
ایدهمدی وهان برمقدار مال اوزرینه عقد مصالحه ایدرك عودت ایلدی .



## ۲۶ نجی سنه وقایعی

بوسنه حضرت عثمان ، برخیلی خانه اشترا وهدم ایله مسجد حرامی  
توسیع ایلهدی .

مصرک امور مالیه سی، عمرو بن عاصک عهده سنده ایکن حضرت عثمان،  
امور مالیه یی آیرب سالف الذکر عبدالله بن سعد بن ابی سرحه توجیه  
بیوردی. عبدالله ایسه «امور مالیه یی اخلاص ایدیور» دیو عمرو بن عاصدن  
واودخی «تداییر عسکریه یه خلل ویریور» دیو عبداللهدن اشتکا ایدر  
اولدیلر . آنک اوزرینه حضرت عثمان ، عمرو بن عاصی عزل ایله مصرک  
امور عسکریه سنی دخی عبدالله ویردی وامور عسکریه ایله امور مالیه یی  
کافی السابق برلشدیردی . عمرو بن عاص ، مصرک فاتحی ایکن بروجه  
مشروح عزل ایله یرینه عبداللهک نصبندن طولای زیاده کوچندی ومدینه  
منوره یه کلوب حضرت عثمانک توجیهاته اعتراض ایدنلر صره سنده بولندی.  
جلد خامسده بیان اولندیغی اوزره عمرو بن عاصک (نوبه) اوزرینه  
کونده رمش اولدیغی عسکرک اکثری مجروح اوله رق عودت ایلش اولدیغی  
جهتله اووقدنبرو طرفین بیننده آره صره جنک وجدال وقوعه کلوردی .  
بوقومک ایسه شدتلی چوق ، آلاجق شیلری یوق ایدی . عبدالله  
بن سعد ، والی اولدقده نوبه لولر مصالحه ایستدی، اودخی موافقت ایلدی  
وآنلر طرفندن بهرسنه اوچ بیک رأس کوله وجاریه تسلیم ایدیلک وطرف  
اسلامیاندن دخی بونلرک قیمتلرینه معادل اولاجق قدر حبوبات ویریلک  
اوزره عقد مصالحه اولندی .

عبدالله بن سعد ، بر بیوک اردو ایله آفریقہ غزا ایتک اوزره حضرت عثمانن استیذان ایلدی وقوہ امدادیہ ایستدی .

حضرت عثمان دخی آکا امداد ایچون مدینہ منورہ دن کلتی عسکر کونوردی که ایچلرنده سبطين محترمين ، یعنی ( حسن ) و ( حسین ) ایله ( عبدالله بن عباس ) و ( عبدالله بن عمر ) و ( عبدالله بن عمرو بن عاص ) و ( عبدالله بن جعفر طیار ) و ( عبدالله بن زبیر ) کبی اعیان صحابه دن بر جماعت وار ایدی .

عبدالله بن سعد ، یویله بر مکمل اردو ایله مصر دن چیقوب ( برقه ) یه کیتدی . اوراده بولنان ( عقبه بن نافع ) دخی عسکر یله برابر آکا التحاق ایلدی .

آدن عبدالله بن سعد ، طرابلس غربه توجه ایله او طرفده بولنان روملری اوروب او حوالی بی غارت وتالان ایتدی . بعده آفریقہ جانبنه کیتدی وهر طرفه چتله طاعتیدی .

او زمان بو حوالی ، قسطنطنیه قیصرلغنه تابع اولوب قیصر طرفندن منصوب والیسی ( جیرجیر ) نام جنرال ایدی که طرابلس عربدن طنجه یه قدر اولان ممالکه متصرف اولوب مرکز حکومق ( سیطله ) ایدی .

جیرجیر ، یوز یکر می بیک عسکر جمع ایدرک مقابله یه قیام ایله سیطله یه بر کونلک مسافه سی اولان محله عسا کر اسلامیہ بی قارشولادی .

طرفین ، قارشو قارشویه اردولرینی قوروب جنکه باشلادیلر ، ایکی طرف دخی زیاده ثبات ایتکله محاربه پک زیاده مشد وتمد اولدی .

حضرت عثمان ، خیلی مدت عسا کر اسلامیہ دن خبر آلامدیغنه منی بر مقدار عسا کر امدادیہ ایله ( عبدالرحمن بن زبیر ) ی او طرفه کونده ردی .

عبدالرحمن ، سیر سریع ایله آز وقت ظرفنده اورایه واردی و طرفینی محاربه اوزره بولوب همان میدان حربه کیردی و آنک بویله کلوب کورومسی جیرجیره یأس وفتور ویردی .

بروجه بالا عبدالرحمن ، اورايه واردینی کبی حربه کیریشمشیکن امیر-  
الجیش اولان عبدالله بن سعدی میدان حربده کوره مدیکندن « سر عسکر  
ترده ؟ » دیو صوردی .

مکر اقدیجه جیرجیرک طرفندن منادیسی « هر کیم عبدالله بن سعدی  
قتل ایدرسه کندوسنه یوز بیک آلتون ویریه جک و جیرجیرک قیزی تزویج  
ایدیله جک » دیو ندا ایتمکه عبدالله ، قورقوب کیزلنش . عبدالرحمن ،  
یونی خبر آلدینی کبی سر عسکر عبداللهک یاننه واردی و آکا خطاباً :  
« سن ده هر کیم جیرجیری قتل ایدرسه آکا یوز بیک آلتون ویریه جک  
و جیرجیرک قیزی تزویج و آنک یرینه والی تعیین ایدیله جک دیو ندا ایتدیر »  
دیدی . سر عسکر دخی بورأی قبول ایدرک اووجهله ندا ایتدیردی .

آنک اوزرینه جیرجیر دخی قورقوب عبدالله کبی میدانه چیقماز  
اولدی . حرب ایسه ممتد اوله رق عسا کر طرفین ، هر کون یورولنجه به  
قدر جنک ایدرک اردوگاهلرینه عودت ایدرلردی .

نهایت عبدالله بن زییر ، بر کون عسا کر اسلامیه دن بر فرقه کزیده  
سواری آیروب آنلری حربه ادخال ایتیه رک چادرلرده مهیا طوتدی .

طرفین ، اوکون صباحدن اوکله وقتنه قدر جنک ایدوب بیتاب اوله رق  
اردوگاهلرینه عودت ایلدکلرند عبدالله بن زییر ، او دینج عسکر ایله  
روملرک اوزرینه غایت شدتلی بر حمله ایتدی .

روملر ایسه یورغون اولمقله حرکتدن قالدیلر ، تارمار اولدیلر و پک  
چوق قیریلدیلر .

او صرده عبدالله بن زییر ، جیرجیری راست کتوروب اولدوردی  
و بجته قونولان قیزی نی اسیر ایتدی . بو صورتله محاربه ختامه ایردی .

بعده سر عسکر عبدالله ، اردو ایله سیطله یه کیتدی و حصر و تضیق ایله  
شهری فتح ایتدی و پک چوق اموال غنائم آلدی .

غنائمک خمس بعد الاخراج باقیسی عسکره توزیع اولندی . عسکرک

مجموعی آتش بیک اولوب سواريلرك حصه لری اوچر بیک و بیاده لرك  
حصه لری بیکر آلتونه بالغ اولدی .

بعده سر عسکر عبدالله طرفدن هر طرفه چته لر چیقاریلدی و یک  
چوق محللر غارت ایتدیریلدی .

اوحوالی اهاالیسی ( اجم ) قلعه سنه التجا و تحصن ایتمکه اورایه عسکر  
کونده ریلدی و بو قلعه ده رای و امان ایله فتح ایدیلدی .

بونک اوزرینه آفریقیه اهاالیسی دخی ایکی بحق میدیون آلتون اعطاسیله  
عقد مصالحه یه مجبور اولدی .

عبدالله بن سعد ، بو فتوحاتی امیر المؤمنینه تبشیر ایتک اوزره عبد -  
الرحمن بن زبیری مدینه منوره یه اعاده و اموال غنائمک خمسنی تقدیم ایلدی .

### لاحقه

بروجه بالا آفریقا غنائمک خمسنی مدینه یه کلد کده حیوان و سائر اشیانک  
ارباب استحقاقه تقسیمنده صعوبت کور و لمکه طویدن مزایده یه چیقاریلدی  
و حضرت عثمانک کاتبی و عمزاده سی اولان ( مروان بن الحکم ) اوزرنده  
قالدی . اثمانی کلبی برمبلغ اولدیغی حالد مرواندن تحصیل اولمیبوب عطیه  
اوله رق ذمتندن آشاغی واریلش اولدیغندن بین الناس موجب قیل و قال  
اولدی .

قالدیکه : رسول اکرمک اوقاقدن اولان ( فدک ) اراضیسنی حضرت  
عثمان ، امارته عائد املا کدن عدايله بروجه مقاطعه مروان بن الحکم و یرمش  
و بودخی ناسک غیظنه باعث اولمش ایدی ،

بو اراضی ، مرواندن صکره اولادینه قالمش و صکره ( عمر بن عبد العزیز )  
رضی الله عنه حضرتلری ، او اراضی بی آنلرک اللرندن آلوب حال سابقته  
ارجاع ایتشدرد .

برده حضرت عثمانک عمتی و مروانک پدری اولان ( حکم بن ابی العاص ) که



افشای اسرار ابتدکیچون رسول اکرم آنی (ربّده) قریه سینه نفی ایتیشیدی واطلاق ابو بکر و عمر رضی الله عنهما دن رجا اولندقدّه مساعده یه جسارت ایتماشرل ایدی . حضرت عثمان، آنی اطلاق ایله مدینه یه کوتوردی . و رسول اکرم ، آنک اطلاقق بکا وعد بیورمش ایدی . لکن اجراسنه وقت مساعد اولمادی « دیو اعتذار ایلدی .

اوله بروعد اولماسه بیله امیرالمؤمنین ، موافق مصلحت کوردیکی حالده یر منفی بی اطلاق ایده بیلور ایسه ده ناس بونک ایچون دخی سوبلنمش و بوده اسباب شکایتدن عد اولنمشدر .

### غزای اندلس

بروجه بالا آفریقیه نك فتحندن صکره حضرت عثمان، اندلسه غزا ایتک اوزره (عبدالله بن نافع بن الحصین) ایله (عبدالله بن نافع بن عبدالقیس) ی هامور ایتدی و آنلرله برلکده کیتمک اوزره ناسی تشویق ایچون یازدینی امرنامه ده (قسطنطینه ، اندلس طرفدن فتح اولنور) عباره سی مندرج ایدی .

بو ایکی عباد ، قبیله بربر عسکرینی دخی برابر آله رق بحرأ اندلسه یکوب فتوحات عظیمه یه مظهر اولمشلردر .

### استطراد

ملت اسلامیه ، بدایت ظهورنده ایکی دولت عظیمه ایله جنکه کیریشدی . یری ایران شاهلغیدرکه آنک پای تختی و ممالك سائره سی آز وقت ظرفنده فتح ایتدی . ایکنجیسی شرق ایمپراطورانی، یعنی قسطنطینه (استانبول) قیصرلکیدرکه آکا تابع اولان سوریه و مصر قطعه لرینی فتح ایدوب سوریه امارتی ، اناطولی جهتنده و امارت مصریه ، آفریقا جهتنده ایلروله مکده ایدی .



مقصد اقصی ایسه بودولتک پایتختنه وارمق اولوب قسطنطنیه نك فتح اولنه جفته دأثر بر حدیث شریف دخی روایت اولنمغله اهل اسلامك نظرلری سوریه طرفنه متوجه ایدی .

حال بوکه : مصرده کی قوه اسلامیه ، افریقیه طوغری ایلروله مکّه مستعد اولدیغندن حضرت عثمان ، مجاهدینی تشویق ایچون بروجّه بالا « قسطنطنیه ، اندلس طرفندن فتح اولنور ، دیو بیورمشدی . ا کرچه اندلس قطعہ سی فتح اولنسه بیله اورادن برآ اوروپایی یاروب کچهرک استانبوله قدر کلمک پک مشکل ایدی . لکن بووجهله عبدالله بن نافع الحصین ایله عبدالله بن نافع بن عبدالقیس ، اندلس یاقه سنه کچوب خیلی اموال غنائم المشردر .

## ۲۸ و ۲۷ نجی سنه لر وفايعی

حضرت عثمان ، افریقیه والیلکنی ( عبدالله بن نافع بن عبدالقیس ) توجیه ایتدی . عبدالله بن سعد دخی مصره عودت ایلدی . مصردن او طرفه کیدوب کلمسی برسنه اوچ آی ممتد اولمشدر .

ایراندۀ واقع ( اصطخر ) طرفنده ظهوره کلن عصیان واختلال دخی یواننده ( عثمان بن ابی العاص ) معرفتله باصدیریلمشدر .

## فتح قبرس

دمشق شام امیری اولان ( یزید بن ابی سفیان ) حضرت تلی ، فوت اولدقده منصبی کندوسنک برادری و ( اردن ) امیری اولان ( معاویه بن ابی سفیان ) علاوه مأموریت قلنمشیدی .

بعده حضرت عثمانک زمان خلافتده ( حمص ) و ( وقّسیرین ) سنجاقلری امیری اولان ( عمیر بن سعید الانصاری ) نامزاج اوله رق استعفا ایتمکه حضرت عثمان ، بو ایکی سنجاغی دخی معاویه توجیه بیوردقدن صکره

چوق کجیوب فلسطین امیری (عبدالرحمن بن ابی علقمه) فوت اولدقه  
حضرت عثمان، فلسطینی دخی معاویهیه احاله ایتمکه بتون سوریه سنجاقلری،  
معاویه عهده سنده مجتمع اولمش و دائره مأموریتی خیلیدن خیلی وسعت بولمش  
ایدی .

معاویه ایسه اوتهدنبرو دریا سفری ایتک وبو طریق ایله ده توسیع دائره  
ثروت ومکنت ایلک املنده اولمقله بوکره حضرت عثماندن بحراً غزا ایتک  
اوزره رخصت ایستدی .

حضرت عثمان دخی قرعه ایله، یاخود دیگر صورتله عسکر سچمیوبده  
کوکلی اوله رق کیده جک اولانلری سفر بحریده قوللانمق اوزره رخصت  
یردی .

معاویه دخی ناسی قبرس غزاسنه تشویق ایتمکه بر جماعت کوکلی  
اوله رق سچیلدی که ایچلرنده (ابوذر) و (ابوالدردا) و (عباده بن  
الصامت الانصاری) کبی کبار صحابه دن ذاتلر وار ایدی .

معاویه، آنلرک اوزرینه (عبدالله بن قیس) ی امیر ایدوب اشبو  
یکرمی سکز سنه هجریه سی خلاننده سفینه لر ایله آنلری قبرسه کونده ردی.  
امیر مصر اولان (عبدالله بن سعد) دخی مصر دن حرکت ایدرک  
سفائن ایله قبرسه واردی .

مصر وشام دونمالری، بو صورتله قبرسه برلشوب چوق محاربه  
ایتدیلر و پک چوق اسیر و اموال غنائم آلدیلر .

قبرس اهالیسی، مقابله دن عاجز قاله رق سنوی یدی بیک آلتون جزیه  
ویرمک اوزره عقد مصالحیه مجبور اولدیلر .

عباده بن الصامتک زوجیه سی و انس بن مالکک خاله سی اولان (ام حرام)ک  
بوکره زوجیه برابر قبرسه کیتیمی بر معجزه محمدیه یی تصدیق ایتشدر .

شویه که : برکون رسول الله صلی الله علیه وسلم حضرتلری، ام حرامک  
خانه سنده او یورکن کوله رک او یانمش و ام حرام « نیچون کولدک یار رسول الله ! »  
دیدکه « اتمسدن بر جماعتک سریرلر اوزرنده کی ملک لر کبی دکره

بندکریخی کوروب تعجب ایتدم « بویورمش . امّ حرام » یارسول الله! دعا ایت که الله تعالی بنیده آنلردن قیلسون ، دیدکده « سن ده آنلرله بیله سین ، دیوبینه اویقویه وارمش وینه کوله رک اویانمش وامّ حرام « نیچون کولداک؟ ، دیدکده اولکی کبی جواب ویرمش . او دخی یینه « یارسول الله ! دعا ایت . الله بنیده آنلردن قیلسون ، دیدکده « سن او لیندن سین ، آخریندن دکلسین ، دیمش اولدینی امّ حرام دن مرویدر .

بو کره امّ حرام ، زوجی عبادۃ بن الصامت ایله برلکده قبرسه واردی . صکره حیواندن دوشوب فوت اولدی . رضی الله عنها .  
 بروجه بالا قبریس ، بالمصالحه فتح اولندقدن صکره عبدالله بن قیس ، اسفار بحریه یه دوام ایدرک الی دفعه بحرأ غزا ایتمش ونهایت بویولده شهید اولشد . شکر الله مساعیه .  
 اشبو ۲۸ سنه سنده حضرت عثمان ، کندوسی ایچون مسجد نبوی قربنده برسرای یاپدیردی که ( زوّراء ) دیو معروفدر .

## ۲۹ سنه سی وقایعی

عمر الفاروق رضی الله عنه حضرت تیرینک وفاتندن صکره ایران وگردستانده محل بمحل ارتداد وعصیان و اختلافلر پیدا اولدی .  
 بصره امیری ابوموسی الاشعری رضی الله عنه حضرتلری ، عصات اکرادی تأدیب ایچون بصره عسکریله حرکت ایلدکده آغرلغنی قرق استره یوکلتمشدی . بر سر عسکره کوره بو قدر اشیا چوق بر شی دکل ایسه ده بصره لیلردن بعضیلری ، آنی چوق کوروب علیهنده بر جوق سوزلر سویلدیلر وحضرت عثمانه شکایت ایلدیلر . حضرت عثمان دخی آنی بصره امارتندن عزل ایله یرینه ( عبدالله بن عامر ) ی نصب وتعیین بیوردی وعمان وبحرین عسکری امیری اولان ( عثمان بن ابی العاص ) ی دخی آنک معیتنه ویردی .

عبدالله بن عامر، اوزمان هنوز یکرمی درت یاشنده بر جوان ایدی .  
مکن غیور و شدید الشکیمه ایدی و حضرت عثمانک دای زاده سی اولدینی  
جهتله نافذ ایدی .

بصره عسکريله عمان و بحرین عساکرینی برلشیدردی . اصحاب کرامدن  
ارباب تجربه دن انتخاب ایلدیکی امرا ايله قول قول فرقه لر کوندردی .  
بو امرادن بری که اصطخر قولنه مأمور اولان (عبداه بن عمرو)  
بدی . محاربه ده مقتول و عسکری منهزم اولغله عبدالله بن عامر ، بالذات  
و طرفه عزیمت ایلدی .

شویله که : عمان و بحرین عسکری امیری اولان سالف الذکر (عثمان بن  
بی العاص) ی مقدمه الجیشه و (أَبُو بَرَزَه) و (معقل بن یسار) رضی الله  
نهمایی برر جناحه و (عمران بن الحصین) رضی الله عنہی سواری اوزرینه  
مأمور ایدرک اصطخر جانبنه کیتدی .

اصطخری آلدقن صکره (دارا بکرد) ی و (اردشیر خره) دنیلن  
بلده جور) ی فتح ایلدیکی ائاده فارسک اشرافی و بیوک خاندانلری  
صطخره التجا و اوراده تجمع و تحصن ایتمش اولدقنلرندن ابن عامر ،  
ونوب تکرار اصطخری محاصره و منجینقلر ايله تضییق ایدرک یورویش  
یله استیلا و محصورینک اکثرینی اعدام و افنا ایتدی .

ایشته بوکره فارسک ایلرو کلنلری ، هپ محو اولوب بیتدی . ابن عامر  
نخی بصره یه عودت ایتدی .

### حج عثمان

حضرت عثمان رضی الله عنه ، خلافتنک برنجی سنه سننده عبدالرحمن بن  
عوفی امیرالحج ایدوب کونده رمشیدی . آندن صکره هپ کندوسی کیدوب  
کلدی . بوسنه دخی کندوسی کیتدی و مناده چادرینی قوردی . ایشته مناده  
ابتدا قورولان چادر بودر .

رسول اکرم صلی الله علیه وسلم و ابوبکر و عمر رضی الله عنهما، مناد نمازی قصر ایتدکاری، یعنی دوت رکعتی فرضی ایکی رکعت قیلدقاری کچ حضرت عثمان دخی شمدی یه قدر او یله قیلمشیکن بوسنه آتام ایله دوت رکعت قیلدی.

اصحاب کرامدن بعضیلری، بوکا اعتراض ایتدیلر و حضرت علی کرم الله وجهه، آکا «برامر، حادث اولمادی. عهدده اسکیدی. سن، رسوا اکر مک و ابوبکر و عمر مک ایکی رکعت قیلدقارینی کوردک، سن ده اوائلا خلافتکده او یله قیلدک» دیدکده حضرت عثمان «بو، نم رأی و اجتهادمدر دیدی.

عبدالرحمن بن عوف، بو کیفیتدن خبر آلدینی کچی کلوب حضرت عثمان مؤاخذه ایتدی و بیان ایلدیکی اسبابی رد ایلدی. نهایت حضرت عثمان آکا دخی «بو، نم اجتهاد ایتدیکم بر رأیدر» دیدی.

عبدالرحمن، حضور خلیفه دن چیققدقه ابن مسعوده راست کلدی «بیلدیکمز شیلر بوزولمش» دیدی.

ابن مسعود «اختلاف، کوتو شیدر. بن ده رفیقلم ایله دوت رکعت قیلمشیدم» دیدکده عبدالرحمن «ن، رفیقلم ایله ایکی رکعت قیلدم. بوند صکره دوت رکعت قیلارم» دیدی.

آنلرک هریری، مجتهد ایدی. بر مجتهدایسه دیگر مجتهدک رأیله عمل ایتدک مجبور دکلدی. هریری کندو رأی و اجتهادی ایله عمل ایده کلشدر. بناء علیه ب خصوصده اصحاب کرامدن بعضیلری، حضرت عثمانه متابعت و بعضیلری مخالفت ایلشاردر.

لکن حضرت عثمانک خلافتکیرانی، بو مسئله یی دخی سائر موا اعتراضیه قانیدیلر و علینده سوز سویله مکه وسیله اتخاذ ایتدیلر. ینه بوسنه حضرت عثمان، مسجد شریف نبوی یی توسیع و تعمیر و تزین ایله مشیدی.

۳۰. نبی سنه وقایمی

ولیدك كوفه امارتندن عزلی

امیر المؤمنین عثمان رضی الله عنه حضرت لرینك آنا بر قرنداشی اولان ولید بن عقبه ( بالاده بیان اولندیغی اوزره كوفه والیسی اولدقده اهالی، ندوسندن خوشنود اوله رق خلی زمان خوش کچیندیلر . بو خوشنودلق سه اغراض دنیوییه مبنی اولوب حب فی الله قیلندن اولسادینی جهته سانه لرنده کی موالات و محبت ، بر مدت صکره مبدل مخاصمه و عداوت لمشدر .

حتی كوفه نك وجوه و رؤساندن ( آشر ) و ( ابو خشبة الفقاری ) ( جنذب بن عبدالله ) و ( ابن صعب بن جثامه ) کی کندوسنه پك زیاده رفدار اولانلر بیله خلافکیر اولدیار .

خلافکیر اندن بعضیلری ، عبدالله بن مسعود رضی الله عنه حضرت لرینه راجعت ایله ولیدك مدمن خمر اولدیغندن بحث ایتدکیرنده ابن مسعود بز ، مستور الحال اولان کیشینك کیزلی عیوبی آرقه سنه دوشمه یز ، بمش .

ولید ایسه کندوسنك حقنده اودرلو سوزلره قولاق آصیلوب ده موضوع م ایدیلش اولدیغنی ایشیتدکده پك زیاده غضبنك اوله رق ابن مسعوده ناب ایتمشدر .

كوفه لیلردن بعضیلری دخی مدینه منوره یه کله رك منوال مشروح اوزره لیددن اشتكا ایتدیلر ایسه ده حضرت عثمان ، هیچ بریسنه یوز ویرمیوب نلری خائباً و خاسراً اعاده ایلدی .

حال بوکه : اوزمان جماعت مسلمینه امامت ایلک امیر و والی اولان تله عائد بر وظیفه اولوب ولید دخی بر کون باده صبوحی زیاده ایچهرک



سرخوش اولدینی حالدہ جامعہ چقبوب صباح نمازینی درت رکعت قیلدیرم  
و «دها زیاده ایدہ یم می؟» دیو صورمش .

عبدالله بن مسعود حضرتلری دخی « بز ، بوصباح سنکله زیاده  
خالی قالمادق ، دیو جواب ویرمش و بویله مسبوق بالمثل اولمایان کیفیت  
طولایی جماعته حیرت الویرمش .

بو حال اوزرینه کوفه لیلردن بعضیلری ، مدینه منوره یه کله رک تسکر  
ولیددن شکایت ایلدیلر و مواد اشتکائیہ یی بیان صرہ سنده آنک مدمن -  
اولدینغی دخی علناً سویلدیلر .

حضرت عثمان ، ولیدی کوفه دن مدینه منوره یه جلب ایتدی . حضر  
علی دخی برابر اولدینی حالدہ مشتکیلر ، ولیدک شرب ، خمر ایش ایدو  
اثبات ایتمکله کندوسنه حد شرب اورولدی و کوفه امارتندن عزل ایدیلدی  
حضرت عثمانک توجیهائی حقنده واقع اولان اعتراضاتدن بری وبل  
برنجیسی ولیدک کوفه امارتنه تعینئی خصوصی اولدیغندن حقیقت -  
کرکی کبی آکلاشیلحق اوزره سوابق احوالی بروجہ آتی اجمالاً ی  
اولنور .

شویله که : ولیدک پدری اولان ( عَقَبَةُ بْنُ أَبِي مُعَيْطٍ ) کفار قریش  
ایلرو کلنلرندن ورسول اکرم صلی الله علیه وسلم حضرتلرینه اک زیادہ  
ایدنلرندندر .

حتی برکون رسول اکرم ، کعبه معظمه ده نماز قیلارکن برطرفده د  
( ابو جهل ) و ( عتبہ بن ربیعہ ) و ( شیبہ بن ربیعہ ) و ( ولید بن عتبہ )  
( امیة بن خلف ) و ( عمارة بن الولید ) ایلہ ( عقبہ بن ابی معیط ) برلک  
اوطور یورلر ایدی .

ایچلرندن بری « شومرائی یی کورمیور میسکز ؟ قنغیکز ، فلا  
سلخانہ سندن برده وه اشکنبه سی آلوب ده سجده یه واردینئی زمان آنک صیر  
قور ؟ » دیدی . اک شقیلری اولان عقبہ بن ابی معیط ، سکیردره رک  
اشکنبه آلوب کتوردی ورسول اکرم ، سجده یه واردقده آتی صر

دی . دیگر ملعونان دخی بر برینه باقوب کولوشدیلر . عبدالله بن مسعود  
بی الله عنه حضرتلری ، اوراده بولنش ایسهده ییچاره نك برشی یامق  
بن کلدیکی جهته همان واروب فاطمة الزهرا رضی الله عنها حضرتلرینه خبر  
دی . حضرت فاطمه ، کلوب او اشکنبه یی آتدی و قریشه سب ایتدی .  
آنك اوزرینه رسول اکرم ، سجده دن قالقوب اوچ کره « یارب !  
یشی سکا حواله ایتدم » دیدکن صکره اسملرینی تصریح ایدرک هر برینک  
هنه باشقه باشقه دعا ایتدی .

عماره ، بدرده بولنیوب ارض حبشه هلاک اولمشدر . اما دیگرلری  
رده قتل اولنه رق جزء ثانیده بیان اولدینی اوزره لاشه لری قویویه  
نیامشیدی .

فقط عقبه بن ابی معیط ، اسیر اولمشیدی واسرآنك اکثری بدل ایله  
الویریش ایکن بدردن عودتده رسول اکرم ، آنی قتل ایتدیرمشیدی .  
ایشته کوفه والیسی اولان سالف الذ کر ولید ، بو عقبه نك اوغلی اولوب  
جوه قریشدن شدید الشکیمه بر آدم ایدی . فتح مکه کونی اسلام ایله مشرف  
لدی .

هجرت نبویه نك طقوزنجی سنه سنده رسول اکرم ، ( بنی مُصْطَلِق )  
ایله سنك زکاتی تحصیل ایچون مومی ایله ولید بن عقبه یی کونده رمشیدی .  
لید ، آنلرک یوردینه تقرب ایتدکده آنی استقباله چیقمشلر . حال بوکده :  
لید ایله آنلرک میانه لرند زمان جاهلیتدن قلله عداوت وار ایمش ، کندوسنی  
ل ایچون کلیورلر زعمنه ذاهب اوله رق کیرو دوئمش .

حضور نبوی به کلدکده « آنلر مرته اولمشلر . زکاتی اعطادن امتناع  
تدیلر و بی قتل ایچون اوزریمه سلاح ایله چیقیدیلر » دیمکله رسول اکرم  
یاننده کی اصحاب کرامه حدت کلدی . بعضیلری ، همان بنی مصطلق اوزرینه  
سکر کونده ریلوب اورولمالرینی رأی ایتدی .

حال بوکده : صکره آنلردن بعضیلری ، حضور نبوی به کله رک ولیدک

کونده ریلدیکنی ایشیتملریله ا کرام واحترام ایچون استقباله چیقمشلر ایکر  
کیرو دونمسنک سبی کندولرنجه مجهول اولدیفنی بیان ایتمشلردر .

رسول اکرم ، تحقیق حال ایچون خالد بن الولید رضی الله عنه  
کونده رمشیدی . حضرت خالد ، آقشام اوزری بنی مصطلق جواریه  
وارمش ، اوزاقدن قولاق مسافری اولمش ، آقشام ویاتسی وقتلرنده اذان سسی  
ایشیتمش . بونک اوزرینه هان ایچلرینه کیره رک اموال زکاتی تحصیا  
وکتوروب رسول اکرمه تسلیم ایتدی .

ایشته اواننده ( یاایهاالذین آمنوا ) ای ایمان ایدن کیمسه لر ( ان جاء  
فاسق بنبا ) اکر برفاسق سزه برخبر کتورر ایسه ( فتینوا ) تفحص  
ایدیکز ( ان تصیبوا قوماً بجحالة فتصبحوا علی ما فعلتم نادمین ) تا که جهالت  
برقومه طوقونوبده ایشله دیکگنزه نادم اولمایه سکز . آیت کریمه سی نازا  
اولدی . رسول اکرم ، بو آیت کریمه یی او قویوب بنی المصطلق قبیله سنک  
زکاتی تحویل وآنلره احکام شرعیه یی تعلیم ایلک اوزره ( عباد بن بشر )  
رضی الله عنه یی مأمور بیوردی .

عمر الفاروق رضی الله عنه حضرتلری ، ولیدی الجزیره عشاری  
اوزرینه مأمور ایتدیسه ده بیوک مأموریتلرده استخدام ایتدی . جز  
خامسده بیان اولدیفنی اوزره خلافت دائر بحث آچیلوبده ابن عباس  
رضی الله عنهما « عثمان حقنده رأیکز ندر ؟ » دیدکده حضرت عمر  
« بن ، عثمانی استخلاف ایتسم اوده ابن معیطی ، یعنی ولیدی ناسک باشه  
بلا ایدر . ناسده آندن نفرت ایلر . نهایت کندوسنک قتلنه سبب اولور  
دیمشیدی . اصحاب شورایه وصیت ایلدیکی صره دهده حضرت عثمانه خطاباً  
« خلیفه اولورسه ک ابن ابی معیط اوغوللری خلقک باشنه بار اتمه » دیونصیح  
ایشیدی .

حضرت عمرک بوسوزلری کرامت قیلنددرکه حضرت عثمان ، خلیف  
اولدقده سعد بن ابی وقاص رضی الله عنه حضرتلری کوفه والیسی نصب  
ایتمشکن چوق کچمیوب آنی عزل ایله یرینه ولیدی نصب ایدوب بوند

ولايي حقتده بر چوق اعتراضلر وقوع بولدى وانجامنده وليدك سؤ  
نيغندن طولايي كندوسى محجوب قالدى .

### سعيدك كوفه اميرى اولديغى

حضرت عثمان رضى الله عنه ، بروجيه بالا كوفه اميرى وليدى عزل  
تدكدن صكره يرينه ( سعيد بن العاصى ) نى نصب ايلدى .  
بو، سعيد دخى بنى اميه دندر كه ( عاصى بن سعيد بن عاصى بن اميه ) نك  
غلدير و دردنچى جزءه بيان اولندينى اوزره ( مَرَجُ صَفَر ) وقعه سنده  
يرالجيش بولنان ( خالد بن سعيد ) ك برادر زاده سيدر .

كندوسنك جدى و خالدك پدرى اولان ( سعيد بن العاصى ) مقدما  
شرك اولدينى حائده قتل اولدى واوغلى ( سعيد ) كوچوك قالدى وفتح  
كردن اول اسلامه داخل اولدى . زمان سعادتن طقوز سنه يه يتشمش  
ولديغندن صغار صحابه دن عد اولمشدر . شامك فتحندن صكره بر مدت  
عاويه نك ياتنده بولدى . صكره حضرت عثمان ، آنى مدينه يه جلب  
ترييه ايله رجال قريش صره سنه كچيردى و زيرده بيان اولنه جنى وجهله  
و ائنده مصاحف شريفه يازمق ايچون ترتيب اولنان جمعيت كُتّابه آنى  
دخى الحاق وبو كرده كوفه واليكنه تعيين بيوردى . آنى عمرو بن عاصك  
رادرى ظن ايدن ، خطا و غفلت ايلمشدر . زيرا عمرو بن عاص ( بنى  
هم ) دندر ، ( بنى اميه ) دن دكلدر .

سعيد بن العاصى ، كوفه يه واردى . ناسى مسجده جلب و جمع ايله  
خطبه اوقودى و امير المؤمنينك امرينه مخالفتدن تحذير ايتدى .

حال بوكه : كوفه ده سوز آياغه دوشمشيدى . اسلامده سبق و قدمى  
ولانار كيرو قالمش و صكره دن كلوب ده آنلره قاتيلانلر يوزه چيقمش  
يدى .

سعيد ، بورالرينى تحقيق ايله حضرت عثمانه عرض ايتدى . او دخى

سبق وقدمی اولانلری تفضیل و تقدیم ایله صکره کلنلری آنلره تابع قیلدو اوزره سعیده امر نامه یازدی .

سعید ، بو امر نامه یی ناسه اوقودی ایسه ده آنلر ، خلیفه نك امریت اهمیت ویرمدیلر . سعید ، بو کیفیتنی حضرت عثمانه بیلدیردی . اوده آرتق کوفه نك انتظام امورندن مأیوس اولدی .

### ترتیب و تحریر مصاحف شریفه

قرآن کریم ، آیت آیت نازل اولدقجه جبریل علیه السلام ، هر آیتک یرینی ، یعنی قننی سورہ نك نره سنه یازیله جعنی بیلدیریدی . رسول اکرم صلی الله علیه وسلم حضرتلری دخی اوترتیب اوزره یازیلانسی وحی کاتبلرینه امر ایدردی ، آنلرده اوله یازاردی . اصحاب کرام ، هپ بو ترتیب اوزر قرآن کریمی ضبط ایلردی . فقط کیمی بر مقدارینی و کیمی جمله سنی ازی ایدردی و قرآن کریمک جمله سنی حفظ ایدلره شیمدی (حافظ) دینلدیکی کچ اوزمان (قرآء) دینلوردی .

بعض اصحاب کرام دخی وقت سعادتده قرآن کریمی ده ریلر و تختهلر و کیکلر اوزرینه یازارلردی .

( ابن مسعود ) ( ابی بن کعب ) و ( زید بن ثابت ) کی تماماً قرآء کریمی یازوب جمع ایدلر دخی وار ایدی .

زمان سعادتده پک چوق قرآء اولوب سائر ناسه تعلیم قرآن ایدرلردی فقط ایچلرندن ددی ، یعنی ( ابن مسعود ) و ابو حذیفه نك آزادلیسو ( سالم ) و ( ابی بن کعب ) و ( معاذ بن جبل ) رضی الله عنهم حضراتی سائرلرندن زیاده شهرت بولمشر ایدی .

ایشته بو وجهله قرآن کریم ، زمان پیغمبریده تمامیه حفظ ایدیلشر و یازیلشر ایدی ، فقط بر یره جمع اولنماشیدی .

ابوبکر الصدیق رضی الله عنه حضرتلرینک ایام خلافتنده وقوع بولار

( یمامه ) جنکنده یتیم قرآء شهید اولدی که آنلردن بری دخی قرآء اربعه مشهوره دن سالف الذ کر ( سالم ) ایدی .

حضرت عمر رضی الله عنه ، بوندن اورکدی . همان حضور خلیفه یه واردی « قورقارم که سائر مواقع حربیه ده دخی قرآدن بویله کثرت اوزره وفیات وقوع بولورسه آز وقت ظرفنده آنلره انقراض کلور و بعض آیات قرآنیه ، اونودولور . قرآنک جمعنی امر ایتمه لیسک » دیدی .

خلیفه حضرتلری دخی وحی کاتبی اولان ( زید بن ثابت ) رضی الله عنہی چاغیردی و قرآن کریمک جمعنی آ کا اراده بویوردی .

زید بن ثابت ، زمان سعادتده قرآن کریمی کاملاً جمع ایدنلردن بری ایدی . بونکله برابر بویابده فوق العاده دقت و احتیاطه رعایت ایله ایفای وظیفه یه باشلادی .

شویله که : هرکیمده قرآندن یازیلش برشی وارایسه جمله سنی طوبلادی . سائر قرآیه مراجعت ایله تصدیق ایتدیره رک قرآنی تمامیه صحیفه صحیفه یازوب جمع ایلدی .

بو صحف مطهره ، حضرت صدیقک یاننده ایدی . آنک وفاتندن صکره حضرت عمرک یاننده طورودی . بعده کریمه سی ام المؤمنین حفصه رضی الله عنها حضرتلرینک یاننده قالدی .

بروجه بالا آیات قرآنیه ، زمان پیغمبریده نه وجهله ترتیب اولندیسه بو صحف شریفه ده دخی هر سورده نک آیتلری او ترتیب اوزره یازیلش ایدی . فقط سورده لر ، صره سیله ترتیب اولنموب هر سورده ، یالکز باشنه بر کتاب ایدی .

صکره عثمان ذی النورین رضی الله عنه حضرتلرینک ایام خلافتنده سورده لر دخی صره سیله یازیلدی و ( مصحف ) ده نیلدی .

شویله که : قرآن کریم ، عرب لسانی اوزره نازل اولوب عرب ایسه قبائل کثیره یه منقسم ولقتلری بعض کلماتده یکدیگره مخالف ایدی .

بو لغات مختلفه نک یدییسی ، سائرینه نسبتله فصیح اولوب جمله سنک



افصح وارجی قبیله نبویه اولان ( قریش ) قبیله سنک لغتی ایدی . بوجهته قبائل عرب آرمسندده وجوه قرائتجه فرق واختلاف وار ایدی . بوندن باشقه مأخذلری دخی مختلف اولوب هر بری ، قرآء صحابه دن برینه استناد ایلردی .

چونکه : کوفه لیلر ( عبدالله بن مسعود ) دن وبصره لیلر ( ابو موسی الاشعری ) دن ودمشق شام اهاالیسی ( ابی بن کعب ) دن وحمص اهاالیسی ( مقداد بن اسود ) دن اخذ ایتمشدی .

بالاده بیان اولندینی اوزره یکریمی بش سنه سنده کوفه عسکری ، ارمنیه و آذربایجان دیارینه سفر ایتدکده ( حذیفه بن الیمان ) رضی الله عنه حضرتلری دخی برابر ایدی و آنلره امداد ایچون شامدن دخی او طرفه بر فرقه عسکریه کونده ریلش اولدیغندن بو سفرده اهل عراق ایله اهل شام برلشوب برلکده غزا ایتشاردی .

لکن هر بری کندی قرائتک صحتی ادعا ایله دیگرینک قرائتی بکه نمز اولدیغندن بیلرلنده منازعه وقوع بولدی . آز قالدی که فتنه ظهور ایدیوردی .

حذیفه حضرتلری ، بو اختلافدن اورکدی وناسی بر قرائت اوزره جمع ایتک افکارینه دوشدی وکوفه یه عودتنده بو بحثی میدانه قودی . لکن ابن مسعود ، آکا مخالف کلدی . اودخی مدینه منوره یه کتدی و بو اختلافک وخامت عاقبتی حضرت عثمانه عرض ایتدی .

حضرت عثمان دخی هر برده مرجع و مأخذ اولق اوزره بر مصحف شریف ترتیبی رأی ایدوب حضرت علی بی وسائر اصحاب کرامی جمع ایله بو رأی ، آنلره سویلدی . آنلرده قبول ایلدی .

آنک اوزرینه حضرت عثمان ، حضرت حنصفه نزدنده محفوظ اولان مار الذکر صحف مطهره بی جلب ایله آنلردن قریش قرائتی اوزره بر مصحف شریف یازمق اوزره سالف الذکر ( زید بن ثابت الانصاری ) بی مأمور بویوردی .

آکا ( عبدالله بن زبیر ) ايله مؤخرآ بروجہ بالا کوفہ والیسی اولان ( سعید بن العاصی ) کی بعض ذواتی ترفیق ایتدی .

هرسمته کونده ریلک اوزره متعدد مصحفلر یازیلق لازمکلیکنه منی صکره دیگر ذوات دخی الحاق اولندی که ( انس بن مالک ) و ( عبدالله بن عباس ) رضی الله عنهما دخی آنلره داخل ایدی .

قوة الظهر اولق اوزره ( ابی بن کعب ) دخی بوجعیته آلمش و جله سنک عددی اون ایکی یه ابلاغ اولمش ایدی .

چونکه : حضرت صدیقك زماننده کی جمع صحف ، آنجق متفرق اولان قرآنی یازوبده بریره جمع ایتمکدن عبارت اوله رق صرف کتابته عائد برایش ایدی . اما حضرت عثمانك اراده سی اوزره جمعه تشبث اولنان مصحف شریفده لغت قریش اوزره قصر اولنوب بو ایسه تدقیقه محتاج بر امر مهم ایدی .

برده مصحفده سورهلرک صره سیله تحریر و ترتیبی لازم کلوب بو دخی یک مهم و معتبرا بر مسئله ایدی .

زیرا اصحاب کرامدن بعضیلری ، زمان سعادتده قرآن کریمی تمامیه جمع ایلش و بعضیلری ، اکثرینی جمع ایدوب وفات نبویدن صکره تماملا مش ایدیلر . حال بوکه : مصحفلری ، بعض سور شریفه نك ترتیبنده یکدیگره موافق دکل ایدی .

مثلا ابن مسعود مصحفده ( سورة بقره ) دن صکره ( سورة نسا ) بعده ( سورة آل عمران ) یازیشیدی .

حضرت علی ایسه سورهلری ترتیب نزول اوزره جمع ایدرک مقدم نازل اولانی تقدیم ومؤخر نازل اولانی تأخیر ایتمشیدی .

بناءً علی ذلك قرائتده قدم و ملکه و مهارت اصحابندن بعض ذواتك تألیف مصحفه مأمور اولان جمعیتده بولمسی لازم کلشیدی .

حال بوکه : وقت سعادتده کسب شهرت ایلش اولان قراء اربعه دن

(سالم) بروجہ بالا (یمامہ) جنکندہ و (معاذ بن جبل) حضرت عمرؓ خلافتندہ فوت اولمغلہ بودرتدن یالکز (ابن مسعود) ایله (ابی بن کعب) قالمشیدی .

ابن مسعود ایسه کوفہده و بروجہ بالا حذیفہیہ مخالف رأیدہ بولمنش ایدوکنه مبنی آنک احضارندن صرف نظر اولنهرق ابی بن کعب ایله اکتفا اولمنشدر .

ذکر اولنان کتبدن بعضیلری اوقویوب بعضیلری یازهرق ایغای سہی و اقدام ایله متعدد مصحفلر وجوده کتوردیلر .

اشبو اوتوز سنہسندہ حضرت عثمانؓ، هر سخته بر مصحف کوندهردی و بر نسخہسی مدینہده توقیف و ذکر اولنان صحف شریفہی حضرت حفصہیہ اعاده بیوردی .

صحف مذکورہ ایله اشبو مصحف عثمانیدن بشقہ ایادی ناسده نہقدر صحف و مصحف وار ایسه محو ایدیلدی . فقط کوفہیہ مصحف عثمانی کوندهربلد کده ابن مسعود، کندی ترتینندن و اصول قرائتندن و از کچمه دیکندن بر مدت آنک مصحفی، کوفہ لیلردن آکا تابع اولانلر یدلرنده مرعی و معتبر قالدی .

ایکی سنہ صکرہ زیرده بیان اولنہجفی اوزره ابن مسعود و ابی بن کعب فوت اولدی و علم قرائتده ریاست، زید بن ثابتہ قالدی. آندن صکرہ ابن مسعودک مصحفی، دیگر صحف و مصاحف کی متروک و منسی اولمنشدر .

مصحف عثمانی ایسه هر یرده و هر عصرده معتبر و مشهور اولوب او زماندن برو ایادی ناسده متداول اولان مصاحف شریفہ، هپ آندن استنساخ اولنہ کلشدر .

ایشته بو صورتله قرآء بیننده کی اختلافلر، برطرف اولمنشدر. لکن ابن مسعودک نظر اعتباردن اسقاط اولمنسی نیچه کیمسه لک اغبرار خاطرینه بادی اولدینی جهتله آنلرده حضرت عثمانک علیهنده بولنانلره قاتیلدیلر .

## بعض وقایع

رسول اکرم صلی الله علیه وسلم حضرت تلمینک وفاتندن صکره مهرینی ابوبکر و عمر رضی الله عنهما طاقینوب قوللانقلری کی حضرت عثمان دخی قوللانمقده ایکن بوسنه قضارا لندن (بئر اریس) دنیلن قویویه دوشدی . حضرت عثمان ، قویونک صوینی بوشالتدیروب آراتدی ایسه ده بولدیرامادی . صکره آکا بکزر برمهر یاپدیرمش واوده کندوسنک وفاتنده ضایع اولمشدر .

خاتم نبوینک بووجهله قویویه دوشورولسنی بعضیلری ، حضرت عثمان علیه کفتکویه وسیله اتحاد ایتدی . دیرلرکه : آندن صکره حضرت عثمانک ایشلری اختلاله یوز طوتدی .

بوسنه اهل بدردن (خاطب بن ابی بلتعہ) و (عمرو بن ابی سرح الفهری) و (مسعود بن الربیع) و (عبدالله بن کعب الانصاری) و (عبدالله بن مظعون) و (جبار بن صخر) رضی الله عنهم وفات ایشلردر .

وقت سعادتده و ابوبکر و عمر رضی الله عنهما حضرت تلمینک ایام خلافتلرنده جمعه کونی امام ، منبره چیققدقه مؤذن ، اذان اووردی . شیمدی مناره لرده اوقونان اذان یوق ایدی . آنی حضرت عثمان ، بوسنه زیاده ایلدی . شویله که : مدینه منوره ، توسع ایدرک غلبه لک زیاده اولمغله حضرت عثمان ، هنوز سعادتخانه سنده ایکن جمعه نمازینک حاضر اولدیغنی ناسه اعلان ایچون کندوسنک مؤذنی (زورا) ده بر اذان اووقودقن صکره حضرت عثمان ، مسجد شریفه واروبده منبره چیققدقه ینه او مؤذن کما فی السابق اذان ویریر اولدی . « اولکی اذان ، بدعتدر ، دیو اعتراض ایدنلر اولدیسده کبار اصحاب کرام ، سکوت ایشلرایدی . امور مستحسنه دن اولدینی درکاردر .

زورا، مسجد نبوی خارجنده بر محل مرتفعدر. حضرت عثمانك ۲۸  
سنه سنده كندوسى ايجون بنا ايتمش اولدينى سرايه دخی (زورا) دنيلور.

## احوال ابی ذرّ و ظهور ابن سبّا

ابوبکر و عمر رضی الله عنهما حضرت تلرینك ایام خلافتلری عثمان  
ذی النورین رضی الله عنه حضرت تلرینك اوائل خلافتی، عینله زمان سعادت کبی  
کجدی.

آندن صکره اطعمه نفیسه یمك و كوزل البسه کیمك و كوزل اكرلی  
آتلر. ینمك و باغچه لرده کزینوب اکلنمك کبی ثروت و مدنیته متفرع عادتلر  
چیتمدی.

چوق کیمسه لر، مال بیر بکدیرمك داعیه سنه دوشوب علی الخصوص شام  
والیسی ( معاویه بن ابی سفیان ) اموال کثیره ادخار ایله تکثیر ثروت  
ویسار ایتکده ایدی.

ام المؤمنین عایشه رضی الله عنها حضرت تلرندن مر ویدرکه « ابوبکر و عمرک  
زمانلری، زمان سعادت کبی کجدی. عثمان زماننده ملک و سلطنت قوقولری  
دویولمغه باشلادی « دیو بیور مشلردر.

فقیه شام اولان ( ابوذر الغفاری ) رضی الله عنه الباری حضرت تلری ایسه  
آلتون و کوش ادخار ایدنلری طعن ایدر « ویرکونلك نفقه نك فضله سنی ادخار  
جائز دکلدرد « دیو بو آیت کریمه بی اوقور ایدی :

( یا ایها الذین آمنوا ) ای ایمانه کلن کیمسه لر ( ان کثیراً من الانخبار  
والرهبان ) علی التحقیق یهود و نصارانك عالم و زاهد لرندن چوغی ( لیا کلون  
اموال الناس بالباطل ) البته ناسك اموالی بغیر حق یرلر ( ویصدونهم  
عن سبیل الله ) و آنلری الله یولنده منع ایدرلر ( والذین یکتزون الذهب  
والفضة ولا ینفقونها فی سبیل الله ) و او کیمسه لرکه آلتونی و کوموشی کتز،  
یعنی جمع و ادخار ایدرلر و یونلری فی سبیل الله صرف ایتزلر ( فبشرهم

بمذاب الیم) آنلره عذاب الیم ایله مژده ایت . ( یوم یحیی علیها فی نار جهنم فتکوی بها جباههم وجنوبهم وظهورهم ) اوکون که بو اموال مدخره ، جهنم آتشنده قیزدیریلوبده بونلرله آنلرک آنلری ویا نلری و آرقه لری داغلا نور ( هذا ما کنتم لاتفسکم فذوقوا ما کنتم تکتزون ) ایشته نفسلریکنز ایچون صاقلادیغکنز بودر ، صاقلادیغکنزک عذابنی طادیکنز دنیلور .

بوآیت کریمه ده کنز وادخاری ممنوع اولان اموالدن مراده ، زکاتی ویریلمه یین مال دیمکدر . اما زکاتی ویریلمش اولان اموالک جمع وحفظی مجازدر .

کبار اصحاب کرامدن طلحه و عبدالرحمن بن عوف رضی الله عنهما کی نیچه زنکین ذاتلر وار ایدی . طریق زهد وورعی اختیار ایدنلر، آنلره طعن ایتمزلردی .

عبدالله بن عمر رضی الله عنهما « زکاتی ویریلن مال، یرآلتنده مدفون اولسه بیله کنز وادخاردکدر . زکاتی ویریلمه یین مال ایسه یر یوزنده اولسه دخی کنزدر » دیدی .

حضرت علی کرم الله وجهه « درتیوز درهمه قدر نفقه در . آندن زیاده سی کنزدر ، دیمش ایسه ده آنک بو سوزی ، اختیار اولی و مسملک زهد و تقوادر .

ابوذر حضرتلری ایسه او آیت کریمه نلک ظاهر یله عمل ایدر و برکونلک نفقه دن زیاده مال ادخارینی تجویز ایتیوب فضله سننک فی سبیل الله صرف اولمنسنی وعظ ونصیحت ایلر ایدی .

الحاصل ابوذر حضرتلری ، فوق العاده شدتلی زهد وورع و تقوی یولنه کیدر وناسی ده شدتلی لسان ایله بویله شدائد امورده سوق ایدر ایدی .

حال بوکه : حضرت عمر زماننده ظهور ایدن فتوحات متوالیه وترقی اسباب تجارتله ملت اسلامیه ، دفعه زیاده ثروت و غنایه نائل اولدی .



حضرت عثمان زماننده واردات ميريہ چوغلادی . تجارت بحريہ يولى ده  
آچيلدى ويك چوق اموال غنايم آليندى . ناس دخى بالطبع تنم وترفه  
مائل اولدى .

بووجهله حاصل اولان ثروت ومدنيته احوال طبيعيه سندن اولديني  
اوزره كوندن كونه اهل ثروت چوغلالمقده و ( ابوذر ) ك اراديني ارباب  
تقوى وقناعت آزالمقده ايدى .

بويله سيل كې آقوب كلن ترقيات مدنيه يي ، تقوايه توافق ايتمز ايسه  
فتوايه توفيق ايتمك وبر آزده صويك آقنديسنه كيتمك احباب وقت وحالدين  
كورولوردى .

ابوذر ايسه ، وقت سه ائتمه اولمايان بدعتلردن و نو ظهور عادتلردن  
نفرت ودائما « فقرايى كوزمديكيز » ديو اغنيايه نصيحت ايلر ايدى .

فقرا كروهى ، ابوذر ك سوزلرينى سند اتخاذايدرك اغنيايي ازعاج ايدر  
اولدقلردن اغنيا دخى آنلرك ازعاجاتندن اشتكا ايدر ايدى .

ايشته اوئانده ( ابن السودا ) ديو معروف اولان ( عبدالله بن سبأ )  
نامنده بر صابيق حريف ظهور ايله طرف طرف طولاشير وملت اسلاميه  
آره سنده بر تفرقه احداثه چاليشير ايدى .

شويله كه : فى الاصل يهودى ايكن مسلمان اوله رق بصره ده ظهور ايله  
« عيسى عليه السلام » تكرر دنيايه كله جك . يا ، محمد عليه الصلاة والسلام  
نيچون كلمسون ؟ « ديهرك رسول اكرمك ينه دنيايه كله جكنه قائل اولمق  
و « على ، آنك وصيسيدر . عثمان ، بغير حق خلافتى آلدى » ديمك كې  
بر مذهب باطل اختراعنه قيام ايتمش و آ كا تابع اولان طائفه يه ( سبئيه )  
دنيلمشدر .

( ابن سبأ ) ك سؤ عقيده سى آ كلاشيلمغله بصره دن طرد اولندوقده  
كوفه يه كلوب اوراده دخى افكار نامى افساده ساعى اولمغله كوفه دن دخى  
طرد اولنديغندن شامه ككشدى .

شامده ابوذر ايله معاويه بيننده رأى واجتهادجه رونما اولان مباينتى  
رست اتخاذايله بركون ابن سبأ، ابوذر حضرتلرينك ياننه كلوب  
معاويه تهعجب ايتزميسين؟ (مال الله) ديور. فى الواقع هر شى،  
للهمكدر. لكن (مال مسلمين) تعبیری معروف ايكن آنی تغيير ايتسی،  
سلمينك ابتدا اسملرينی، صكرمه كنديلرينی آره دن چيقاروبده بيت المال  
سلمينی بنمسه مك معنلرينی ايهام ايدییور، ديمش. آنك اوزرينه ابوذر،  
زد معاويه يه كيدوب «اموال مسلمينه اموال الله تسميه ايمه كه سبب نه در؟»  
يدكده معاويه «يا اباذر! مال، اللهمك مالی و بزده اللهمك قوللری دكلى يز؟»  
يمش ايسه ده ابوذر، بو تاويلی قبول ايتمه رك آكا عتاب ايتمكه معاويه،  
وندن صكره «مال مسلمين ديرم» ديه رك ياقه سنى قورتاردی.

ابن سبأ، آندن صكره بوامتك حكيمى اولان وشامك فقها سندن بولنان  
(ابوالدرداء) وكذا فقها دن اولان (عبادة بن الصامت الانصارى) رضى الله  
عنهما حضرتلرينه كيدوب آنلره دخى ابوذره سويلديكنى سويلش ايسه ده  
بوالدرداء، آكا هيچ يوز ويرمه دی. عباده ايسه آنی طوتوب معاويه  
كتوردی و «ابوذرى سكاملط ايدن، ايشته بودر» دیدی.

آندن صكره ابن سبأ، شامدن دخى طرد اولنمغه مصره عزيمت ايلش  
وام دنيا دن برفته توليد ايلك اوزره بصرمه وكوفه ده پيدا ايتديكى يارانيله  
مخابريه باشلامشدر.

ابوذر حضرتلری، ابتدا ايمان ايدنلرك بشنجيسيدر. لكن بعدالاسلام  
مكه مكرمه ده طور ميوب قيله سنه كيتمش و هجرت نبويه دن صكره مدينه  
منوره يه مهاجرت ايلشدر. رسول اكرم صلى الله عليه وسلم حضرتلری  
آنك حقده (دنياه ابوذر دن دها زياده لهجه مى صادق آدم كمدی) ديو  
بيورمشیدی.

سنوی درتيوز آلتونه بالغ اولان عطيه سنك نفقه يوميه سندن فضله سنى  
تصدق ايدوب ياننده بر آلتون آلقومازدی.

بناءً على ذلك بين الناس محترم بر ذات ایدی . لکن شدت زهد و تقوا و  
حسیله ناسی تحمل ایده میه جگرری شدائد امورده سوق ایدردی .

شویله که : هرکس ، کندی کبی عبارده ، که لره بور و نوبده فض  
اموالک فی سبیل الله صرف اولمنسی ایستردی . حسن نیتنه دیه جک یوق  
لکن احوال عمومیه ، آکا موافق دکل ایدی ،

معاویه ، ابو ذری محبوب و ملزم ایتمک اوزره بر کیجه آکا ، بر آدمیه  
بیك آلتون کونده رمش . اودخی او کیجه خواب و راحتتی ترک ایدرک  
آلتونلری ، فقرایه تصدق ایتمش . فرداسی معاویه نک تعلیمیه او آدم ، علی  
الصباح ابو ذره کیتمش « امان بنی معاویه نک عذابندن قورتار . او ، بنی باشه  
یره کونده رمش . بن ، یا کلسلقله سکا کلوب آلتونلری ویردم » دیمش  
ابو ذره « اوغلجغزم ! او ، آلتونلر کیجه لین فقرایه تقسیم اولندی . بردانه  
صبحاه قالمادی . سن ، اوچ کون مهلت آلدده او مقدار آلتون تدارک ایدیویره  
دیو اعتذار ایلمش .

معاویه کورمش که ( ابو ذره ) ک فعلی ، قولنی تصدیق ایدیور . بر دیه جلد  
یوق . اسکا قانی ممکن دکل . لکن شامده اداره سی ده مشکل . ناچار آلتون  
اطوار و مشوارندن حضرت عثمانه شکایت و اودخی ابو ذری مدینه یه دعور  
ایلدی .

امیر المؤمنینک امری اوزره ابو ذره ، مدینه منوره یه عزیمت ایلدی  
حال بوکه : مدینه ، اولکی مدینه دکل ایدی . چونکه : ممالک اسلامیه  
بر طرفدن نهر جیحونه و تیمور قبیوه و دیگر طرفدن نوبه دیارینه و سب  
بوغازینه قدر متمد اوله رق واردات چوغالادی . اموال غنائمدن دخی مدینه  
مبالغ کلیه کلدی ، خزینه طولدی .

حضرت عثمان ، بول بول عطیه لر احسان ایتمکه باشلادی . مدینه ده  
ثروت چوغالادی . درت یوز بیك درهمه بر باغچه و یوز بیك درهمه بر آرد  
آلتوب صاتیلور اولدی .

مدینه ده یکیدن یکیه پک چوق بنالر یاییلدی . براوچدن ( سلع

باغنه قدر امتداد ایله خیلیدن خیلیدن خیلی وسعت بولدی . دلنشین خانهلر  
له آبادان و کوزل باغچهلر ایله مثال جنان اولدی .

حضرت عثمان ، مسجد مدینه یی دخی مجدد صورتیله تعمیر و توسیع  
ترین ایله ابوزرک طانیامایه جنی بر شکل و طرزہ قومشیدی .

جماعت مسلمینی دائماً مسجد نبویده کورمکه مألوف اولان ابوزر ،  
دینه یه واروبده سلع طاعی اتکلرنده کی باغچه لرده بر طاقم آدمک آملرک اوبک  
بک اوطور و بده هم بزم صحبت اولدقلرینی کورونجه تأسف ایدرک همان  
دفعه طرف طرف نمایان اولاجق بر غارت مخوفه و دیل لرده داستان اوله جق  
محاربه عنیفه ایله اهل مدینه یه مژده ! « دهرک صاووشوب حضور خلیفه یه  
بتدی .

حضرت عثمان آکا « یا باذر ! شام اهایلیسی ، سندن نیچون اشتکا  
دیور ؟ » دیدکده کیفیتی شرح و ایضاح ایلدی . آنک اوزرینه حضرت  
ثمان « یا باذر ! ناسی زهد اوزرینه سوق و جبر ایتک ممکن اولماز . بزم  
زریمه لازم اولان ، آنلرک بیننده اللهک امریله حکم ایتک و آنلری  
دل و اعتداله ترغیب ایله مکدر » دیدی .

ابوزر آکا مقابله « اغنیا ، بذل صدقات ایله جیران و اخوانلرینه احسان  
بمدکجه و اقربالرینی کوزه تمدکجه بز ، آنلردن راضی اولماز » دیدی

حاضر بالمجلس اولان ( کعبُ الْأَحْبَارُ ) « فریضه یی ادا ایدن بورجنی  
وده مش اولور » دیدکده ابوزر ، حد تلنوب « ای یهودی زاده ! سن کی مسین که  
ویله بمخه قاریشیورسن » دهرک عصا ایله اوردی ، کعبک باشی مجروح  
ولیووردی . بو حالدله ابوزرک جزا کورمسی لازم کلدی . آنکده بوکا بر  
یه جکی یوق ایدی . فقط حضرت عثمان ، کعب الاحباردن بو حقک کندوسنه  
خس اولتمسینی رجا ایتدی ، اوده باغیشلادی .

ابوزر ، آرتق مدینه ده طورامایه جغنی آکلادی و حضرت عثمانه خطاباً  
رسول اکرم صلی الله علیه وسلم ( بنالر ، سلع طاعنه واردده مدینه دن

چيق ( ديو بكا امر ايتشیدی . اذن ويرميسين چيقوب كیدهیم؟ » دیدی حضرت عثمان دخی اذن ویردی .

ابوزر ، اقامت ايلك اوزره مدینه منوره جوارنده واقع ( ربذه ) قریه یه کتیدی . حضرت عثمان ، آکا بر سوری ده وه و ایکی کوله ویرد و مقدار کفایه ارزاق تعین بیوردی . معاویه ده آنک عیالی شامدن ربذه کونده ردی .

ابوزر ، ابتدا ربذه یه واروبده نمازه اقامت اولندقدمه خلیفه نك تحصی اموالی مأموریتله اوراده بولسان ( مجاشع ) نام کوله سی ، ابوزره احترا « کچ » دهرک امامتی تکلیف ایتدکده ابوزر « سن کچ . زیرا رسول صلی الله علیه وسلم بکا ( اکر سنک اوزریکه بورنی کسیک برکوله بیله مأمو اولسه سوزینی دیکله و آکا اطاعت ایله ) ديو بیورمشیدی . سن کوله بورنك کسیکده دکل » دیدی .

بعده ابوزر ، ربذه ده برمسجد بنا ایتدی . کلوب کیدنلره احادیث شری و مسائل دینه روایت و تعلیمی ایله مشغول اولدی ، وفاته قدر ربذه قالدی .

ایشته حضرت عثمان ، حقنه ایراد اولسان اعتراضلردن بری بوماده درکه « ابوزرکی مبارک برذاتی شامدن چیقاردی و مقدا حک بن العاصک منافسی اولان ربذه ده اقامته مجبور ایتدی » یولو سوز سویلنمشدی .

انصاف ایده لم ، حضرت عثمانک بونده نه صوچی وار؟ ابوزر ، هرکه برلقمه و برخرقیه قناعت ایلوبده فضله اموال مسلمین ، فی سبیل صرف اولنسون ديو اصرار ایدردی . پک کوزل آرزو . واعظلر ، ناسه بویله فدا کارلق یولنه ترغیب ایده بیلورلر . اما حکومت ، بویابه ناسه ج ایده بیلورمی ؟ مالنک زکاتی و یرن آدمه فضله اموالکی تصدق ایله . د جبر اولنه بیلورمی ؟ حضرت عثمان ، نه یاپسون ؟ خلق ، زنکین اولدی رفاه بولدی ، مدیتیدن لذت آلدی . بحسب الشریه کوکلره تنزه و تفر

وسی کلدی . حتی مدینه اهالیسی، بواناده کوکرجین اوچورمق مراقنه  
 وشدی . بوايسه بر بدعت سيئه اولديغدن حضرت عثمان، آتی یساغ  
 تمشدر .

## وقایع ایران

بالاده بیان اولدینی اوزره عمر الفاروق رضی الله عنه حضرت تیرینک  
 فاتندن صکره ایرانده ظهور ایدن اختلاللری کمری یزدجرد ، فرصت  
 نخاذ ایدرک الندن چیقارمش اولدینی ممالکی استرداد وحو و مضححل اولان  
 ولت ایرانیه یی احیا اتمک اوزره میدانه چیقوب طرف طرف عسکر  
 جمعنه قیام ایتشدی .

یکرمی طقوز سنه سنده بصره والیسی اولان ( عبدالله بن عامر ) بلاد  
 ارس اوزرینه هجوم ایتدکده یزدجرد ، کرمانه صاووشمغله ابن عامر ،  
 آنک آرقه سندن ( مجاشع بن مسعود ) رضی الله عنهی کوندرمشیدی .

مجاشع ، کرمان ملحقاتندن اولان ( شیرجان ) بلده سنه آلتی ساعت  
 نالجه یهدک یزدجردی تعقیب ایلش ایسه ده زیاده قار یاغوب مجاشعک  
 عسکری ، صوغوقدن تلف اوله رق مجاشع ، کوچ حال ایله نفسنی  
 فورتارمشیدی ، ابن عامر ، فارس جهتک ایشلرینی اکمال ایتدکدن صکره  
 بصره یه عودت ایلش ایسه ده خراسانک اختلالی زیاده اولمغله اشبو اتوز  
 سنه سنده ابن عامر ( زیاد بن ابیه ) ی بصره ده والی قائممقامی ایدوب  
 کندوسی برجسم اردو ایله جانب خراسانه عزیمت ایلدی .

اواننده کوفه والیسی ( سعید بن العاصی ) دخی طبرستان اوزرینه بر  
 مکمل اردو ایله کیدیوردی که سبطین مکرّمین، یعنی ( حسن ) و ( حسین )  
 و ( ابن عباس ) و ( ابن عمر ) و ( ابن عمرو بن العاص ) و ( ابن زبیر )  
 و ( حذیفه بن الیمان ) رضی الله عنهم حضراتی کبی اجله اصحابدن نیچه ذوات  
 کرام دخی آنکله برابر ایدی .



عبدالله بن عامر، اولجه واروب (نیشاپور) ه قونمش ایدوکندن سعید  
دخی (قومس) ه قونمش وابن عامر، خراسانه وسعید، جرجانه عزیمت  
ایلشدر.

جرجان اهایسی، عرض انقیاد ایله جزیه کذار اولدقلری کی جوارنده  
بلده لر خلقی دخی خواه وناخواه بویولده اطاعته مجبور اولدیلر. فقط  
بوصرده عصائدن پک چوق آدملر اتلاف ایدیلشدر.

### ۳۱ سنه سی وقایعی

یزدجرد، بروجہ بالا کرمان طرفه فرار ایتدکن صکره وادی حیرت  
دوشوب وشوراده بوراده سرسری طولاشوب نہایت (مرو) ه وارمش  
ومعینده کی عسکرک عربله مقاومت ایدمیه جکنی آکلایوب ترکستاندر  
عسکر کتورتک داعیه سنه دوشمش ایدی.

اهالی ایسه آنک عربلر ایله باشه چیقاما یا جغنی جزم ایله آندن یوز  
چویرمش وسطوتی یرنده ایکن اوغورینه جان فدا ایدنلر، یان چیزمکه  
باشلایوب حتی مرو شهرینه کیره جک اولدقدہ (مرزبان) ی ممانعت کوسترمش  
ایدی.

بوئانده اهالی ایله واقع اولان جنک وجدالده یزدجردک عسکری منهز  
وبریشان اوله رق کندوسی تک وتنها اورادن فرار ایله (شط مرغاب)  
کیتمش وبردکرمنده اختفا ایتمش ایدی.

یزدجرد، برقچ کون او دکرمنده کیزلندکن صکره دکرمنجی، آتی  
قتل ایتمش وآنکله (اکاسره سلاله سی) منقرض اولوب کیتمشدر.

ابن عامر ایسه (احنف بن قیس) ی مقدمه الجیشه مأمور ایدرک نیشاپوردن  
حرکتله (طَبَسَان) دن خراسانه کیردی. (قُہِسْتَان) اهایسنی جبراً وحرماً

طاعته کتوردی و طرف طرف فرقه لر ارسال ایله اوحوالیده کی بلادی  
 روبرر ضبط ایندیردی . ( بلخ ) و ( سرخس ) ی تماماً اله کچیردی .  
 بصره والیسی ، بووجهله جانب شرقده فتوحات کثیره نائل اولدینی  
 ناده شام و مصر والی لری دخی بروجه زیر بر مظفریت بحریه قازانمشلر .

### محاربه بحریه

اهل اسلامک افریقاده مظهر اولدقلری فتوحات عظیمه دن استانبول  
 فیصری ( قسطنطین بن هرقل ) پک زیاده متأثر اولمغله اخذ انتقام ایچون  
 عساکر کلیه جمع ایدرک سواحل شام و مصره تعرض ایتک اوزره بش  
 آلتی یوز قطعه سفینه دن مرکب بر دونما ایله آق دکزه چیقمشیدی .  
 قیصرک بویله بر جسیم دونما ایله بالذات آق دکزه چیقیشی جزائر  
 و سواحلی تیتهدی . بناءً علیه شام والیسی معاویه ، عساکر شامیه ایله  
 مقابلهیه سکیرتدی . مصر والیسی عبدالله بن سعد دخی سفائن مصریه ایله  
 حرکت ایتدی و ایکیسی برلشوب ترتیب ایتدکلری دونما ایله قیصره  
 قارشو چیقیدیلر .

طرفین دونمالری ، بربرینه چاتدی . ایکی طرف دخی قلیچ و خنجر  
 ایله بربری اوزرینه هجوم ایتدی . غایت خونریزانه بر محاربهیه باشلایوب  
 طرفیندن پک چوق تلفات وقوع بولدی . نهایت اهل اسلام مظفر اولدی .  
 روملرک اکثری قیریلدی . قسطنطین ، بر آرز آدملریله قاجوب بیک بلا  
 ایله تخلیص جان ایدمیلدی . لکن صکره سیچیلیا جزیره سنه واروب حال  
 بوکه : سیچیلیا اهالیسی ، امپراطورک سوء معامله لرندن اوصانمش اولدقلری  
 جهتله قسطنطینی اعدام ایشلردر .

( محمد بن ابی حذیفه ) و ( محمد بن ابی بکر ) سالف الذکر محاربه  
 بحریهده برابر ایدیلر . لکن ایکیسنکده ( عبدالله بن سعد ) ایله آرملری  
 شکر آب ایمش . بو جهتله محاربهده آغیرجه طاورانشلر و عثمان ، اصحاب

رسول الله مأموریت لرندن چیقاردی . یرلرینه و قتيله طرف نبویدن دمی هد  
 قیلنمش اولان عبدالله بن سعدی و عبدالله بن عامر و سعید بن عاصی کچ  
 کسانى کتوردی . بو مقوله آدم لرك معیتله جان و کوکلدن نصل جند  
 و جهاد اولنور ؟ ، دیو سویلنمشلر .

عبدالله بن سعد ، بو سوزلری ایشیدوب ایکیسنى دخی تکدیر و تهدید  
 ایلش ایسه ده بو سوزلرك شیوعى ناسك فساد افکارینه بادی اولدی .  
 ناس ، حضرت عثمان حقنه لسانه آلاما دقلری سوزلری بی پروا تقو  
 ایدر اولدیلر .

سبائیه ، یعنی عبدالله بن سبایه تابع اولان غلات شیعه کروهی ایسه  
 بو درلو اختلافاتی اجرای مفسده وسیله اتخا ایتکده ایدی . بو مثلا  
 سبیلردن طولایى مصرده حضرت عثمان علیهنندن بفرقه پیدا اولمشدر .

### وفیات اعیان

اشبو اوتوز بر سنه سنده اصحاب کزیندن و اهل بدردن ( ابوالدردا  
 الانصارى ) رضی الله عنه حضرتلری دار عقبایه کیتدی .  
 بوا تمك حکیمی و شامك عالم و فقیهی ایدی . شام و الیسی معاویه ، آند  
 صاقینور و آنکله متأدب اولور ایدی .

اهل بدردن ( ابو طلحه الانصارى ) رضی الله عنه حضرتلری دخی بو  
 سنه مدینه منوره ده عازم دار بقا اولدی . نمازینی حضرت عثمان قیلدی .  
 انصارك اغنیاسندن اولوب شجاعتی بین العرب ضرب مثل ایدی . حنین  
 کونی یکر می آدم قتل ایدوب سلا حلرینی آلمشیدی . رسول الله صلی الله علی  
 وسلم حضرتلری آنك حقنه ( ابو طلحه نك عسکر ایچنده سسی بر جماعتدن  
 خیرلور ) دیو بیورمشیدی .

بالاده بیان اولندی بی اوزره حضرت عمر ك وفاتنده عقد اولنان مجلس  
 شوری قبوسنى بکله مش و ضبطیه نظارتی وظیفه سنى ایفا ایلش ایدی .

رسول اکرمک عمّ زاده سی اولوب فتح مکه کونی اسلام ایله مشرف اولان (ابوسفیان بن الحارث بن عبدالمطلب) دخی بوسنه فوت اولدی. علی روایه حضرت عثمانک عمّی و مروانک پدری اولان (حکم بن العاص الاموی) دخی بوسنه فوت اولمشدر.

ینه بوسنه حضرت عثمانک عمّ زاده سی و معاویهک باباسی اولان (ابوسفیان بن حرب بن امیه) سکسان سکز یاشنده ایکن وقات ایلدی. قریشک اولولرندن ایدی.

### ۳۲ نجی سنه وقایعی

اشبو اتوز ایکی سنه سی خلانده رسول الله صلی الله علیه وسلم حضرتلرینک عمّی (عبّاس بن عبدالمطلب) رضی الله عنه حضرتلری دخی سکسان سکز یاشنده اولدینی حالدّه عزیم دار بقا ایلشدر. ترجمه احوالی یوقارولرده کچمشدر.

بالاده بیان اولندیغی اوزره (ربذه) ده مقیم اولان ابوذر رضی الله عنه حضرتلری، بوسنه قید بند حیاتدن قورتولدی.

کیفیت وفاتی بووجهله درکه: برکون قیزینه «چیق، باق کیمسه کورونویورمی؟» دیدکده قیزی چیقوب وباقوب «کورونورده کیمسه یوق، دیمکله ابوذر» هنوز وقت وساعتم کله مش، دیدکدن صکره «برقویون کس وپیشیر. بنی دفن ایده جک صالحین کلدکده آنلرمدی که: یمک یمهدن کیمیه سکز دیو ابوذر، آند ویردی» بونک اوزرینه قیزی قیونی کسوب تجره یه قومش. تجره قاینامغه باشلادقده ابوذر، ینه «چیق، باق کلن وارمی؟» دیمش. قیزی دخی چیقوب کورورکه برجماعت کلیور. ایجرو کیروب خبر ویردکده ابوذر «کل، بنی قبله یه چویر، دیوب اودخی آتی قبله یه چویردکده

ابوذر ( بسم الله وبالله وعلى ملة رسول الله صلى الله عليه وسلم ) دیوب تسلیم روح ایلمش . قیزده چیقوب مسافرلری قارشیلامش .

بوکلنلر ، هپ مشاهیردن اون درت کشی اولوب بری کوفه نك عالم وفقیه اولان ( عبدالله بن مسعود ) وبری دخی کوفه نك اشرافندن مشهور ( مالك اشتر نخعی ) ایدی . بوذوات کرام ، مکیه کیدرکن ابوذری زیارت ایچون ربذهیه اوغرامشلر وبو طریق ایله آنک جنازه سنه حاضر اولمشلر و « بویه بر مبارك ذاتك جنازه سنده بولنق ، جناب حَقك بزه بر لطف مخصوصیدر ، دیمشلر . ابن مسعود بو حالی کورنجه « صدق رسول الله . ابوذر حقنده ( یالکز وفات ایلر ویالکز بعث اولنور ) بیورمشیدی « دهرک بکا ایلمشدر . مرویدرکه : رسول اکرم صلى الله عليه وسلم حضرتلری ( الله بکا درت کشیه محبت ایله دیو بیوردی و آنلری سودیکنی خبر ویردی ) دیدکده « آنلر کیملردر ؟ « دینلمکله اوچ کره ( بری علیدر ) دیدکدن صکره دیکرلرینک بیاننه ابتدار ایله ( ابوذر و مقداد و سلمان ) دیمشلر .

بعده ابوذری غسل و تکفین و نمازینی ادا ایله دفن ایتدکلرنده قیزی « ابوذر ، سنزه سلام ایتدی ، ییمک ییمدکجه کیتیمیه سگزر دیو قسم ایدرک رجا ایلدی « دیمکله اوطوروب قویونی یدکدن صکره کیتمشلر و کیفیتی حضرت عثمانه اخبار ایتمشلر . اودخی ابوذرک قیزی کندی عیالنه قاتمیش ورعایت واکرام ایتمشدر .

عبدالله بن مسعود رضی الله عنه حضرتلری ، بوجه بالا ابوذرک نمازینی قیلدقدن صکره متعاقباً وعلی روایة اون کون صکره سنی یتمشی متجاوز اولدینی حالده ختم درس حیات ایلمشدر .

جزء رابعده خدمه خاصه نبویه صره سنده دخی ابن مسعودک ذکر کیچدی . اوّل باوّل اسلام ایله مشرف اولان مهاجرین کرامدن اولوب رسول اکرمک مساواک و مطهره و متکاسنی طاشیر و نعلین شریفینی حفظ ایلر ایدی . وقت سعادتدن صکره کوفه ده قالدی ، بیت المال مأموری اولدی .

اوزمان خواص اصحاب کرامدن (عمار بن یاسر) ایله (حذیفه بن الیمان) رضی الله عنهما دخی کوفه رجالندن ایله .

کبار محدثیندن (عَلَمَةُ بَن قَيْس نَحْيِي) دیرکه «شامه کیدوب مسجندنه ایکی رکعت نماز قیلدقدن صکره یارب ! بکا برهمدم کونده رکه مصاحبت ایدهیم، دیدم، ناگاه کوردم که براختیار ذات کلیور. ظاهر، الله تعالی دعای قبول ایتدی دیدم. بو ذات (یعنی ابوالدرداء رضی الله عنه) بکا تقرب ایتدکده زرده نسین؟ دیدی. کوفه اها لیسندیم. دیدیکده نعلین و متکا و مطهره صاحبی (یعنی ابن مسعود) سزده دکللی؟ شیطاندن محفوظ و محمی اولان (یعنی عمار بن یاسر) سزده دکللی؟ سائرک بیلمدیکی سَرک صاحبی (یعنی حذیفه بن یمان) سزده دکللی؟ دیهرک سوزده باشلادی»

ابن مسعود حضرتلری، قصیر القامه و صغیر الجثه ایدی. لکن اصحاب کرام ایچنده جلیل القدر و عالم و فاضل بر ذات ایدی.

والده سنک کنیه می (ام عبد) اولدیغدن کندوسنه (ابن ام عبد) دینوردی. حتی رسول اکرم صلی الله علیه و سلم حضرتلری (هرکیم، قرآن کریمی نازل اولدینی کبی طراوت و لطافتی اوزره اوقومق ایستر ایسه ابن ام عبدک قرائتی اوزره اوقوسون) دیو بیورمشیدی.

بالاده بیان اولدینی اوزره وقت سعادتده قرآن کریمک حفظ و جمع و ضبطنه زیاده اعتنا ایدن قراء اربعه مشهوره نک برنجیسی ابن مسعوددر.

عبدالله بن عمرو بن عاصک مجلسنده ابن مسعودک ذکر ی کچدکده دیمش که «رسول الله صلی الله علیه و سلمدن ایشیتدم (قرآنی درت کیشیدن، عبدالله بن مسعود و ابو حذیفه نک آزادلوسی سالم و ابی بن کعب و معاذ بن جبلدن آرایکز) دیو بیوردی. ایشته اوزماندن برو بن، اوداتی (یعنی ابن مسعودی) سورم»

علی روایة ابی بن کعب رضی الله عنه حضرتلری دخی بوسنه وفات ایلشدر. معاذ بن جبل ایسه جزء خامسده بیان اولدینی اوزده مقدا مطعوناً شامده وفات ایلشدر،



اما سالم ، فی الاصل اهل فرسدن بر آزادی کوله در. ابو حذیفه ، آنی کندوسنه اوغول اتخا ایلش اولدیغندن آکا نسبت اولنور . ایکسی ده سابقین اولیندن و کبار مهاجریندندر. سالم ، فضای صحابه دندر. حتی رسول اکرم دن اول هجرت ایله بن اصحاب کرام ، قبايه کلدکده سالم ، آنلره امامت ایلردی .

زمان خلافت صدیقه وقوع بولان یمامه جنکنده سالم حضرتلری ، پدر مغویسی اولان حضرت ( ابو حذیفه ) ایله برابر شهید اولمشدر . رضی الله عنهما .

حضرت عمر ، رضی الله عنه خلیفه ایکن « ابو حذیفه نك آزادلیسی سالم ، صاغ اولسه آنی ولی عهد ایلردم ، دیمش اولدینی موثوقاً مرویدر . ینه اشبو اوتوز ایکی سنه سنده عشره مبشره دن ( عبدالرحمن بن عوف ) رضی الله عنه حضرتلری عازم داربقا اولدی .

بالاده بیان اولدینی اوزره مجلس شوراده حکم اوله رق حضرت عثمانی خلافته انتخاب ایتشیدی .

حضرت عثمان ایسه غایت ملایم و محجوب بر ذات اولوب یوز پکلیکی ایده مزدی .

بو جهته اقرباسندن صغیر السن آدم لر ، بیوک ایشلرده استخدام اولمغه باشلادقه ناس « ایشته بونلر ، هب سنك ایشکدر » دیه رك ابن عوفه سرزنش ایتکله « بویله یاپار ظن ایتزدم . لکن الله ایله عهدم اولسون فیما بعد آنکله صحبت ایتیمیم » دیمش حتی خسته اولوب ده حضرت عثمان ، آنک عیادته واردقه آکا سوز سویله میوب یوزینی دیواره چویرمش اولدینی مرویدر .

### وقایع حربیه

جزء خامسده اشعار اوزره ارمنیه و داغستان سرحدلرینک محافظه سنه مأمور اولان ( عبدالرحمن بن ربیعہ ) ( خَزَر ) دیارینه چوق غزا ایدردی و ( باب الابواب ) ی کچوب ایکی یوز ساعت قدر ایلرو کیدردی .

بو ائناده دخی باب‌الابوابی کچوب ( بَلَنَجَر ) بلده‌سی اوزرینه کیتدی .  
آنک پیدرپی تجاوزاتندن متالم اولان اقوام ترکیه ، بوکره تجمع ایدرک  
جمعیت کثیره ایله مقابله‌یه قیام ایتدی .

وقوع بولان بر محاربه خونریزانه‌ده عبدالرحمن شهید اولمغله عسا کر  
اسلامیه منهزم و ایکی قرقه منقسم اولدی .

برفرقه‌سی که سلمان فارسی و ابوهریره برابر ایدی . ( جیلان ) و  
( جرجان ) طرفه کیتدی و دیگر فرقه‌سی ( باب‌الابواب ) طرفه کلوب  
عبدالرحمانک برادری اولان سلمان بن ربیعہ ایله برلشهرک سلامت بولدی .  
سلمان بن ربیعہ‌نی اقدحجه عسا کر اسلامیه امداد ایچون برفرقه ایله  
اوطرفه کوفه والیسی سعید بن العاصی کونده رمشیدی . بوکره برادرینک  
یرینه آتی کچیردی و آکا امداد ایچون برفرقه ایله حذیفه بن الیمان رضی‌الله  
عنه حضرتلرینی اوطرفه کونده ردی . امیرالمؤمنین عثمان رضی‌الله عنه  
حضرتلری دخی سلمانہ امداد ایچون عسا کر شامیه ایله ( حیب بن مسلمہ )‌نی  
اعزام بیوردی .

امیرالامرا سلمان اولدینی حالده حیب ، آکا بوخصوصده معارضه ایتمکله  
طرفین بیتنده ضدیت پیدا اولدی . ایشته شاملیلر ایله کوفه لیلر بیتنده  
ابتدا ظهور ایدن اختلاف بودر . حضرت حذیفه ایسه مجرد وظیفه دینی‌نی  
ایفا ایچون غزا و جهاد ایله مشغول ایدی .

خراسانده دخی ترکرلر ، بوصره‌ده قیام و تجمع ایدرک ( قارن ) نام سردار  
مشهور معیتده جمعیتلری قرق بیکه بالغ اولدینی حالده ( طبسان ) قدرکلدیله .  
بصره والیسی ابن عامر ، اوزمان حیح ایچون مکّه مکرّمه‌یه کیتمشدی .  
آنک امراسندن ( ابن حازم ) آنلره قارشو واردی . قارنک جمعیتی اوردی ،  
قیردی ، طاغیتدی ، تارمار ایتدی .

ینه بوسنه شام والیسی معاویه ، دیار رومه غزا ایدرک قسطنطنیه بوغازینه  
قدر کلوب کیتمشدر .

## ٣٤ سنه سی وقایعی

اشبو اوتوز اوج سنه سننده (مقداد بن الاسود) دیو معروف اولان (مقداد بن عمرو) رضی الله عنه حضرت تلی، یتیم یاشنده ایکن عازم دارالقرار اولدی. نمازیی کندی وصیتی اوزرینه زیر بن العوام رضی الله عنه قیلدی. سابقین اولیندن و کبار اصحاب کزیندن ایدی. بدر غزاسنده سواری ایدی. سائر غزواتده دخی رسول اکرم ایله برابر بولمیشیدی وبالاده بیان اولندیی وجهله حضرت عمرؓ وصیتی اوزره اصحاب شورایی بریره او، جمع ایتمشیدی.

ینه بوسنه افریقیه اهالیسی، نقض عهد ایتکله مصر والیسی عبدالله بن سعد اوطرفه کیتدی. شام والیسی معاویه دخی (مالاطیه) یه غزا ایتدی. رضی الله عنهم اجمعین.

اوتوز درت سنه سننده مشهور (کعب الاحبار) رحمه الله وفات ایتدی. یهود منتندن و اصحاب معلوماتدن برذات اولوب حضرت عمر زماننده اسلام ایله مشرف اولمشیدی.

ینه بوسنه اهل بدردن بعض ذوات فوت اولدی. بونلردن بری (عبادة بن الصّامت) رضی الله عنه حضرت تلیدرکه سابقین اولیندر وعقبهده بیعت ایلین انصار کرامک اون ایکی نقیندن بریدر.

## ناسک امرا حقنده واقع اولان اعتراضات وشکایاتی

یوقارولرده بیان اولندیی اوزره اهل اسلام، آز وقت ظرفنده فتوحات عظیمه یه مظهر اوله رق بصره و کوفه و شام و مصر کی معمور بلده لرده اقامت ایلدیلر.

ایچلرندہ رسول اللہ صلی اللہ علیہ وسلم حضرتلرینک شرف صحابیلہ ممتاز و آنک دلالت و آدابنہ اقتدا ایلہ سرفراز اولانلر مهاجرین و انصار ایدی کہ قریش اهل حجاز ایلہ قبائل سائرہ دن بوشرفہ نائل اولانلر در .

اما سائر عرب کہ ( بنی بکر بن وائل ) و ( عبدالقیس ) و دیگر ( بطون ربیعہ ) و ( ازد ) و ( کندہ ) و ( تمیم ) و ( قضاعہ ) و قبائل سائرہ در . آنلرک ایچندن شرف صحابہ نائل اولانلر آذر . فقط فتوحاتده سعی و اقداملری سبقت ایلشیدی .

اولہ شرف صحابتدن محروم اولوبده مجرد فتوحات اسلامیهده خدمتلری اولانلر، اگرچه بوفتوحاتی کندولرینه عائد بیلورلردی . لکن آنلرک فضلاسی، اهل سابقہ اولان صحابهیی تفضیل ایدرلر و قدرلرینی بیلورلر ایدی . برده امر جلیل نبوت و نزول وحی و توارد ملائکہ جملہ دهشت و یرمش و غیرت جاهلیہیی اونوتدیرمش ایدی . وقتاکہ بو ایرماق چکیلدی و احوال عالمہ کلی تغییر کلدی و زمان سعادت اوزادقجه اوتائیرات روحانیہ آزالدی . دشمن ذلیل اولوب ملک اسلام وسعت بولدی ایسه آنلرک جاهلیت دامارلری حرکتسه کلدی و آنلرده مهاجرین و انصارک ریاستلرینی چکه من اولدی و کیتدکجه بونلر آزالدی و آنلر چوغالدی . مع مافیہ احکام شرعیہیی فم سعادتدن اخذ ایدن، بالذات محاسن اخلاق محمدیہدن اقتباس فیض و سعادت ایلین اصحاب کرام، دائماً مرجع انام و حلال مشکلات خواص و عوام وهریرده مظهر اعزاز و احترام اوله رق اردولرده بیلہ وجودلریلہ تبرک اولنور و آنلرک یوزی صوبی حرمتنه الله تعالی دن نصرت ایسته نیلیر ایدی .

لکن امیر المؤمنین عثمان رضی الله عنه حضرتلری، اقرباسنی زیاده سودیکی جهتله اکثر مناصبی بنی امیّه دن اولان اقرباسنه توجیه ایلدی . هله بیوک امارتله، هپ بنی امیّهده ایدی .

زیرا اوزمان اک بیوک امارتله، بصره و کوفه و شام و مصر و الیکلری اولوب بصرهده ( ابن عامر ) کوفهده ( سعید بن العاصی ) و شامده ( معاویة

بن ابی سفیان ( و مصرده ) عبدالله بن سعد بن ابی سرح ( والی ایدی .  
بونلر ایسه هپ بنی امیه دن ایدیلر .

بصره والیسی بلاد فارس و خراسانه حکم ایلر و کوفه والیسنک بلاد  
آذربایجان و دیار ارمیه دن باب الابوابه قدر حکمی جریان ایدر ایدی . شام  
و مصر والیبری ایسه برر حکمدار مستقل کبی ایدیلر .

حال بوکه : ( ابن عامر ) بصره والیسی اولدینی وقت یکر می درت یاشنده  
ایدی . بو قدر کبار اصحاب کرام وار ایکن بویله یکی یقشمه آدملرک مجرد  
بنی امیه دن بولندقلری جهتله اولیله بیوک ایشلرده استخدای بادی اعتراض  
اولمشیدی .

عشره مبشره دن سعد بن ابی وقاص کبی بر ذات شریفک یرینه کوفه  
والیسی اولان ولیدک سؤ اشتهاری ایسه اک بیوک اعتراضله بادی اوله رق  
نهایت حضرت عثمان ، آکا حد شرب اورددقن صکره عزله مجبور  
اولدقده دخی یرینه ینه بنی امیه دن هنوز رجال قریش صره سنه کچمش  
اولان سالف الذ کر سعید بن العاصی نصب اولندی .

مصر والیسی عبدالله بن سعد ، شرف صحابته نائل اولدقنصکره مرته  
اوله رق دمی هدر قلنمشیکن حضرت عثمانک شفاعتیله قورتولوب صکره  
قوی مسلمان اولمش ایسه سائر اصحاب کزین راده سنده دکل ایدی . معاویه  
بن ابی سفیان ، حضرت پیغمبرک خدمت کتابتنده بولنمش بر صحابی ذیشان  
ایسه ده فتح مکده اسلام ایله مشرف اوله رق مهاجرین وانصار دن معدود  
اولمادینی جهتله اهل سابقه دن اولان صحابه کزین راده سنده طوتولماز ایدی .  
امویلرک بوجهلله اکثر مناصبی استیلا ایتملرندن ناشی سائر امرای  
اسلامک ، علی الخصوص بنی هاشمک کوکلری قیریلدی و یک زیاده جانلری  
صیقیلدی و هر بری منکسر الخاطر اوله رق بر طرفه چکیلدی و حضرت  
عثمانک سنی سکسانی تجاوز ایتمکله ایشلر ، بتون بتون امویلرک و علی الخصوص  
کندوسنک کاتبی و عمرزاده سی اولان مروان بن حکمک التده قالدی . بو  
دخی حضرت عثمانک یاران و اقراانه باعث اغرار اولدی .

امویلر ایسه کیتدکجه آزیدوب زقاقلرده طورلرندن کچیلمز و راحت کزیلز اولدی (فلان کلیور . صاوول یولدن) ده نیلمکه باشلادی .  
مرویدرکه : ملت اسلامیهده ابتدا ظهور ایدن بدعت (صاوول یولدن!) تعیری اولوب حضرت عثمان زماننده ظهور ایلدی .

برده مدینه منوره اطرافک اوتندن عامه انتفاع ایده کلورکن حضرت عثمان، بورالینی قورو ایدوب میری حیوانلرینه تخصیص قیلمش اولدیغندن ناس، آکا کوچنمشیدی .

ایشته بو مثللو سبیلردن طولانی ناس، دلگیر اولدی. حضرت عثمان حقنده سوز چوغالدی . امویلر ایسه کیتدکجه یوز بولدیلر و بولدقجه بونادیلر ؛ حتی عمار بن یاسر رضی الله عنه حضرتلرینی مسجد شریفده بایلهنجیه قدر دوکشلردر .

عمار کبی خواص اصحاب کزیندن بر ذات جلیل القدر حقنده بویه بر معامله تحقرانه اجرایی ایسه هرکسه داغ درون وناسک امویلر حقنده اولان بغض وکینی، بو جهته افزون اولمشدر .

امویلر «بز، قریشی بز» دیو هر طرفده طفره ساتارلردی . آنلره مخالف اولانلر دخی «قریش ایچنده امویلردن اشرف، بنی هاشم وار، دیو تعریض واعتراض ایدرلردی . بو جهته غیرت قومیه میدان کلدی .  
ایالاتده ایسه بو غیرت عصبیه، بر مرتبه دها ایلرو کتورلدی، داعیه عصیت بتون بتون میدان آلدی . قبائل سائرهدن بعضیلری، قریشک رجحان و تقدمنی اعتراف ایتمز اولدی .

علی الخصوص کوفه لیلر، کیمی خالد بن ولید معیتنده وکیمی قادسیه مظفریتنده کی خدمت ونصرتلرندن بختله تفاخر ایدرک بر طاقم نو ظهور آدملرک مجرد قرشی اولمالرندن طولانی حائر امارت اولمالرینه اعتراض ایدرلر ورسول اکرم قرشی ایسهده بالجه ام و قبائله مبعوث اولدیغنه نظراً جمله سنی بر طوتارلر ایدی .

معهود (ابن سبا) ایسه مصرده بر شیعه مذهبی احداث ایله خیلی کسان



اضلال ایدرك علی بن ابی طالب رضی الله عنه الغالب حضرت تهرینك اصلا رضاسی  
اولمادینی حاله ناسی آنك بیعتنه دعوت ایلر و بصره ده و سائر یرلرده پیدا  
ایلمش اولدینی یارانیه مخایره ایدرك خلق قیام و عصیانہ تشویق ایلر ایدی .  
بو سبیلردن ناشی ایالاتده امراتك اوامرینه اطاعت اولنماز و خلیفه تك  
امرینه اهمیت و یریلز اولدی . امراتك سؤ استعمالاتندن بختله عزله لری  
ایستیلور و هر طرفده حضرت عثمان علیه سوزلر سولنور ایدی .

حضرت عثمان حقنده طعن و تشنیعه سبب اصلی : بوجه بالا امویلره  
یوز و یرمسی و مناصب عالیہی آنلره حصری خصوصلری اولدینی حاله  
کروه مخالفین ، برچوق مواد اعتراضیه علاوه ایلدیلر .

شویله که : « وقت سعادته ( ربذه ) یه نفی اولنان حکم بن العاصی  
اطلاق ایله مدینه یه کتوردی و ( ابوذر ) حضرت تهرینی ربذه یه کونده ردی  
و ( مروان بن حکم ) « افریقه تك خمس غنائمی بخش ایتدی و جمعه کونی  
صلا و یرمک عادتتی احداث ایلدی و مناده سنت سنیه یه مخالف اوله رق  
نمازی تمام درت رکعت قیلدی و خاتم نبوی یی قویویه دوشوردی ، دیو  
اعتراض ایدرلردی . بو اعتراضلرک جوابلری یوقاروده بیان اولندی .  
اکثری ، اجتهاده اختلاف دیمکدر . شو قدر وارکه : اوتهدنبرو اصحاب  
کرام ، اجتهادجه اختلاف ایتسه لرده یکدیگری تخطئه ایتزلردی . اما  
حضرت عثمان زماننده ناس ، بربرینی تخطئه و تقبیح ایدر اولدیلر .

بر مرکزده مجتمع اولان افکار اسلامیه ، ناسک بو درلو اختلافاتی  
و بنی امیه تك سؤ اطوار و استعمالاتی اوزرینه برغریب تفرقه حاله دوشدی  
و طرف طرف اختلال و فتنه اماره لری ظهوره باشلادی .

مقدما جانب امارتدن ابن مسعود رضی الله عنه حضرت تهرینك شاننه شایان  
اولمایان بر معامله اولندیغندن طولای ( بنی هذیل ) و ( بنی زهره ) دلکیر  
اولدقلری کبی بالاده بیان اولدینی اوزره ( ابوذر غفاری ) رضی الله  
عنه الباری حقنده اولسان معامله دن ناشی پک چوق خلق ، علی الخصوص  
( بنی غفار ) قبیله سی و آنلر ایله معاهد و متوافق اولانلر و ( عمار بن یاسر )

رضی الله عنه حضرت تری ایچون ( بنی کنده ) حضرت عثمان رضی الله عنه حقنده کین باغلامشرایدی .

الحاصل عربلر ، از قدیم ظلمات جهل ایچنده داعیه عصیت و غیرت و میه ایله اوغراشوب طورورلر ایکن نور نبوت ایله بصر بصیرتلی وشنا وینلرنده کی تفرقه عصیت ، جهت وحدت اسلامیه ایله بر طرف ولسیکن زمان سعادت اوزادقجه عالمی ینه قارا کلک باصمغه باشلادی وینه یرت عصیه استعدادی ظهور ایلدی . امویلرک اطوار و مشواری دخی واستعدادی فعله کتوردی .

## کوفه و جوهندن بمضیلرینک شامه کونده ریلدکاری

کوفه والیسی سعید بن العاصی ، کیجه لری کوفه وجوه و امراسنی نلسنه قبول ایله کیجه صحبتی ایدرمش . اشبو اوتوز اوچ سنه سی خلانده کیجه اثنای مصاحبتده « سواد عراق ، قریشک باغچه سیدر » بیورمش .

حضاردن مشهور ( اشتر نخعی ) حدتله نوب « قلیجلرمن ایله فتح ایدرک ته تعالی نک بزه غنیمت قیلدینی سواد عراقی ، سنک و قومکک باغچه سیمی عم ایدیورسین ؟ » دیهرک اظهار حدت و شدت ایلش . دیکرلری دخی و یولده سرت سوزلر سولش .

ضابطه ناظری اولان ( عبدالرحمن اسدی ) « سز ، امیرک سوزینه ارشومی کلیورسکز ؟ » دیهرک اظهار غلظت و شدت ایلدکده ( اشتر ) رفقایسی ، آکا سوکمشر و باشنه اوشوب بایلنجه یه قدر دوومشر و صکره ییلتیق ایچون باشنه سو دوکمشر .

بوندن صکره سعید ، آنلری کیجه محبتنه قبول ایتمدی . آنلرده نندی مجلسلرنده طویلانونوب سعیدی علناً دم و قدح ایتدکاری صروده

سوزی بالایہ نقل ایله « عثمان ، کندی اقرباسندن حسن اداره مملکت مقتدر اولمیان کیمسه لری والی نصب ایدیور » دیو سویلنمکه باشلادیلر . ایش بورایه کلنجه : سعید بن العاصی ، کیفیتی حضرت عثمانه عرض وانه او ( اشتر ) ایله رفقاسنک کوفه دن دفعلرینی استعدا ایتمکه حضرت عثمان ، آنلرک شامه کونده ریلرینی سعیده اشعار بویوردی . شام والیسو معاویه به دخی کیفیتی بیلدیردی .

شویله که : « کوفه ده آلت فتنه اولان برکروهک طرفکه کونده ریلرینه امر ایتدم . کلدکلرنده اصلاح حاللرینه چالیش و کسب صلاح ایتدکلرنده کوفه به اعاده ایت « دیو معاویه به مکتوب کونده ردی .

ذکر اولنان کیمسه لر شامه واردقده معاویه ، آنلری برمحله کونده ردی و کندولرینه روی التفات کوستردی و کوفه ده آلدقلمی عطیه بی ش خزینه سنه نقل ایتدیردی . بونکه برابر آقشام ، صباح آنلرله برام طعام ایدردی .

بونلر ( اشتر نخعی ) و ( ثابت بن قیس نخعی ) و ( جمیل بن زیاد و ( زید بن صوحان عبدی ) و برادری ( صعصعه ) و ( جندب بن زهیر و ( عروه بن الجعد ) و ( عمر بن الحق ) و ( ابن الکواء ) نام کیمسه ایدی .

برکون معاویه ، آنلره « سز عربدن برقومسکمز . اسلام ایله شرام قازاندیکمز و نیچه امتلره غلبه ایله میرانلرینه قوندیکمز . ایشیتدم که : سه قریشی خوش کورمیورمش سکمز . قریش اولماسه سز ذلیل اولوردیکمز امرا و رؤسا کز ، سزه قالقاندر . قالقانک علیهنه تفرق ایتیمکز . و یا بو خالدن و ازکچرسکمز ، یا خود من طرف الله بیوک بر بالایه اوغراسکمز دیدی .

ایچلرندن صعصعه ، مقابله ایدوب دیدی که « زمان جاهلیتده قرید قیله سی ، عددجه و قوتجه سائر فائق دکل ایدی که بزی تخویف ایده سیز قالقان لاقیردیسنه کلنجه قالقان آلدقده ایش بزه قالور ،

بونك اوزرينه معاويه « شمدي آكلادم كه سزي بو دعوايه دوشورن عقل ا كسكلكيدر . سن بونلك خطيبي سين . سن ده اثر عقل كورميورم . بن ، سكا امر اسلامي اعظام ايدورم . سن ، بكا جاهليتدن بحث ايدورسين . سزك امر يكزي تروج ايدنلري الله تعالى ذليل ايتسون . كرك ايام جاهليتده ، كرك عصر اسلامده قريشك عز و شرفي ، اللهك برلطف ايدى . آنلر ، عربك ا كرك واشدى دكل ايديلر . لكن حسب و نسبجه اكرمى و مروتجه اكملى ايديلر . ايام جاهليتده عرب و عجم بربريني ييراينن آنلر ، حرم شريفده ساكن واللهك عنايتيله مصائبدن امين و مطمئن ايديلر . تا كه الله تعالى ، دينته تابع اولانلك دنيا مذلتندن و عقبا عقوبتدن تخليصنى مراد بيوردقه خلقنك اك خيرلوسنى نبوت ايله كوندهردى . صكره آنك ايچون صحابه انتخاب بيوردى كه آنلك اخيارى ، قريش ايدى و صكره بوملكي آنلك اوزرينه بسا و خلافتي آنلره توديع ايتدى . ايمدى بوامر ، آنجق آنلر ايله صلاح بولور . الله تعالى ، قريشي زمان جاهليتده حفظ ايتمشكن كندى دينى اوزره بولندقلرى حالده حفظ ايتزمى صانيورسكز ؟ تو ! سكا و يولداشليگه . » ديدى ويانلرندن چيقوب كيتدى . بعده معاويه ، ينه آنلك ياننه واروب نصح و پند ايلديكي صرهده « رسول اكرم صلى الله عليه وسلم معصوم ايدى . بنى استخدام ايتدى . بعده ابوبكر و عمر و عثمان دخى بنى والى قيلديلر و هپ بندن راضى اولدقلرى حالده مأمور ايتديلر . رسول الله ايسه اموره هپ اربابنى آراردى . بن ، والله سزه هر نه كه امر ايدرسه كنديمدن و اهل بيتمدن بدء ايدرم ، صكره سزه تكليف ايدرم . قريشك معلوميدر كه ابوسفیان ، آنلك اك كريمى واك كريمزاده سيدر . فقط پيغمبر ، مستنادر . زيرا الله ، آنى انتخاب ايله مكرم قيلمشدر . ظن ايدرم كه اكر ناس ، ابوسفياندن متولد اولسه يدي هپ ايشلرنده اهل رشد و بصيرت اولورلر دى . » صصعه ، معاويه نك سوزيني كسوب « على التحقيق يالان سويلدك . ناس ، ابوسفياندن دها خيرلو اولان آدمدن تولد ايلدى كه الله تعالى ، آنى قدرتييله ياراتدى و آكا نفخ روح ايتدى و ملكره امر ايلدى ، آكا سجده ايتديلر

حال بوکه : بنی آدمک کیمی صالح ، کیمی فاجر و کیمی احمق ، کیمی زکیر ، دیمکله معاویه ، ینه یانلرندن چیقوب کیتدی . فرداسی ینه یانلرینه کلوب برچوق سوزلر سویلد کدن صکره « ای قوم ! خیرایله رد جواب ایدیکنز یاخود صوصکنز . دوشونکنز ، کندیکزه واهالیکزه و بالجمله مسلمینه نافه اولان شیرلی مطالعه و مطالبه ایلکنز » دیدی .

صعصعه ، آکا مقابله « سن بونک اهللی دکلسین . حال بوکه : سکا اطاعت ایله خاطرک ایچون کنهه کیریلز » دیمکله معاویه « بنم سزه ابتدا کی سوز بودکلیدرکه اللهدن اتقا و پیغمبرینه اطاعت و شرع شریفه تمسک ایدیکنز و تفرق ایتیکنز . دیو امر ایتمشیدم » دیدکده دیدیلرکه « اویله دکل . بلکه سن زه تفرق ایله و رسول الله صلی الله علیه وسلمک کتوردیکی او امره مخالفن ایله امر ایدیورسین » .

آنک اوزرینه معاویه « بن ، شمدی سزه امر ایدیورم واکر مخالف برایش ایشله مش ایسه هم اللهه توبه ایدرم و سزه امر ایدرم که اللهه و رسولله اطاعت ایلکنز و جماعتدن آیرلیکنز و امر اکزی توقیر ایدیکنز » دیدی . صعصعه ، آکا معارضه ایدرک « بز ، امر ایدرزکه منصبگی ترک ایدوب چکیله سین . زیرا مسلمین ایچنده سندن احق و وار . اسلامده باباسی سنک بابا گدن و کندوسی سندن قدملی اولان وار » دیدی .

معاویه آکا جواباً « اسلامده قدم واردر . بندن دها قدملیسی ده وار لکن زمانده بولندیغم مأموریتک حسن اداره سنده بندن دها قوی وقادر کیمسه یوقدر . عمرده آنی کورمشیدی . اکر بندن دها مقتدر بری اولایدی آنی مأمور ایدردی . آندن صکره ده ایشمدن چکلیمکی موجب اوله حق برشو احداث ایلدم و امیر مؤمنین آنی رأی ایتسه بکا یازاردی . بنده ایشدر چکیلوردم . اکر ایشلر ، سزک رأیکنز اوزره یاپیله حق اولسه اهل اسلامک اموری برکون ، برکیجه طوغری کیتمزدی . ایمدی خیره توجه ایلکنز و خیر سویلیکنز . اللهک سطوتلری واردر . قورقارم که سز ، بویله شیطان مطاوعت ایله رحمانه معصیتده دوام ایدرسکنز . دنیا و عقباده دوچار ذل

و حقارت اولورسكز ، دينجه صيچرايوب معاويه نك صقالندن طوتديلر . معاويه « طوريكز . بوراسى كوفه دكل . والله اهل شام ، سزك بو معامله كزى كورورسه اللرندن قورتارامام ، سزى قتل ايدرلر » ديدى . نلرندن صاووشوب كيتدى و كيفيتى اميرالمؤمنينه عرض وانها ايتدى .

معاويه نك حلم و صبرى زياده اولمغله بين العرب ضرب مثل اولمشيدى . بو مكالمه له دخى چوق صبر و تحمل ايتدى . كوفه ليلرك آجى سوزلرينه چوق طياندى . نهايت صبرى ياندى « سز ، قريشه نه فائده ويره بيليرسكز ، نه ضرر ايريشديره بيلورسكز ؟ سزه اذن ويردم . ديله ديككز يره كيديكز » ديو آنلرى شامدن دفع و اخراج ايتدى .

او مكالمه له آره سنده معاويه ، بر كون ( ابن كوا ) دن « بنى نصل بيلورسكز ؟ » ديو صورمش . اوده « سن ثروتى زياده ، مرعاسى چوق ، حاضر جواب ، ده رين فكرلى ، حليم و اسلامك بر ركنيسين . سنكله بر قورقونج كديك سد اولمشدر » ديو جواب و يرمش . بعده معاويه « سن ، رفيقلىكك اعقليسين . بكا شهرلك احوال خصوصيه لرندن خبر و ير » ديدكده : « اهل مدينه ، شره اك حريص و اجر اسندن اك عاجز آدملردر . اهل كوفه ، طويلو كلور ، طاغنيق كيدر . اهل مصر ، اك زياده كوتولك ايدوب ده اك چابوق پشيمان اولان كيمسه لردر . اهل شام ، كندولرينى ارشاد ايدنلره اك مطيع و اغوا ايدنلره اك عاصى كيمسه لردر » ديمش اولديغى مرويدر .

ابن كوانك سوزلرندن معاويه ، منسبط اولمش ايسه ده صصعه نك سوزلرندن و ديكرلرينك تحمله كلز معامله لرندن پك منقبض اوله رق بروجه بالا جمله سنى طرد و دفع ايتمش و آنلر دخى الجزيره ياقه سنه چكمك اوزره حص جانبنه كيتمش ايدى .

حص متصرفى اولان ( عبدالرحمن بن خالد ) ايسه احوال مشروحه دن خبردار اولمغله آنلرى جلب و احضار و جمله سنى تهديد و تكدير و على الخصوص صصعه نى زياده تحقير ايتدى و « عبدالرحمن ، سزى تأديب ايتمز ايسه



خائب وخاسر قالسون . معاويه سويلديكگنر سوزلری بکا سويليکيز . بن ، خالد بن الوليدك اوغلي يم . بن ، ردتى احا ايدن ذاتك اوغلي يم « دیدى . خالد بن الوليد رضى الله عنه حضرتلرينك ديار عراقده فوق العاده صيت وشهرتى اولديغندن اوغلنك سوزلری ، كوفه ليلره بك زياده تأثير ايتدى . جمله سنى قورقوتدى ، صوصدوردى ، توبه ايتديردى .

عبدالرحمن ، بو وجهله كوفه ياراتى بر آي قدر حمصده اكلنديردى وبركون صمصعويه « اى ولد زنا ! كوردگمى خير ايله اصلاح اولتايان شر ايله اصلاح اولتور . سعيده ومعاويه سويلديكك سوزلری بكا نيچون سويله ميورسين ؟ » ديدكده معاويه نك حضورنده آرسلان كې كوكره ين صمصعه ، كدى كې سيندى ، سكوتنه واردى .

### امرانك مدينه ده اجتماعى

بروجه بالا ، اشتر ورفقاسى حمصده توقيف اولتمشلا ايسه ده افكار عامه يه سكونت كليوب كيتدجه عصيان و اختلال اماره لرى زياده لشمكده ايدى .

بروجه بالا اشتر ورفقاسى حمصده توقيف اولتمشلا ايسه ده افكار عامه يه سكونت كليوب كيتدجه عصيان و اختلال اماره لرى زياده لشمكده ايدى .

شويله كه : مقدجه بر طاقم آدملا اجتماع ايله حضرت عثمانك احوال و حركاتى موضوع بحث ايدرك و يردكلى قرار اوزره بنى تميمدن ( عامر بن عبدالله ) نام زاهدى مدينه منوره يه كونده رمشلا ايدى .

عامر ، حضرت عثمانك حضورينه چيقوب « مسلميندن بر جماعت طويلانه رق سنك اعمالكه باقديلر . كورديلر كه سن عظيم خطا ياده بولونويورسين . آرتق اللهدن صاقين وتوبه ايت » ديدى .

حضرت عثمان « شو حريفه باقك . خلق ، آنى قاره قرآن سانور . صكره كلوب بكا بويله محقرانه سوزلر سويلر . كندوسى اللهى بيلمز »

دیمکله عامر « بن ، اللهم حاضر و ناظر و منتقم اولدینقی بیلورم » دیه رک چیقوب کیتدی .

حضرت عثمان ، احوالک آغرلغنی درک و تقطن ایدرک هان ( معاویه ) و ( عبدالله بن سعد ) و ( سعید بن العاصی ) و ( عبدالله بن عامر ) ایله ( عمرو بن عاص ) . خبر کونده روب اشبو اوتوز دوت سنه سی خالانده آنلری مدینه یه جلب و جمع ایتدی . عمرو بن عاص دن ماعداسی ، هب کبار بنی امیه دن و حضرت عثمانک صمیمی غیرتکشی اولان ذواتدن ایدی . اما عمرو بن عاص ، بنی امیه دن دکل ایدی و بالاده بیان اولندیغی اوزره حضرت عثمان ، آنی مصر والیلکندن عزل ویرینه سالف الذکر ( عبدالله بن سعد ) ی نصب ایلش اولدینقی جهتله حضرت عثمانه دلگیر ایدی وطن ایدرم که او معزولیتک آجیسنی هنوز اونوتماشیدی . فقط دهاتدن بر ذات اولغله هرصلسه حضرت عثمانه صوقولمش و آنک محرمی اولان امرای صره سنه کچهرک بو کره کبار امرای امویه ایله برلکده بولندیرلمشدر .

حضرت عثمان ، آنلری حضورینه جلب ایله عقد ایلدیکی مجلس مخصوصده « سز ، بنم وزیرلم و معتمدلرم سکز . ناسی کورو یورسکز ، نه یاپورلر . بنم مأمورلریمی عزل ایتدیرمک ویرلینه ایستدکلرینی کتورمک ایستیورلر . سز نه رأی ایدرسکز ؟ » دیو وردی .

عبدالله بن عامر « یا امیر المؤمنین ! ناسی جهاد ایله مشغول ایت . تا که کندی باشلری قایغوسنه و دابهلری آرقه سنه دوشسونلر » دیو جواب ویردی . سعید بن العاصی دخی « یا امیر المؤمنین ! هر قومک رئیسلری واردر . آنلر اتلاف اولندقه ناس ، متفرق اونوب بر فکر اوزرینه اجتماع ایده مزلر » دیه رک طرف خلافته بولتان رؤسانک اعدامنی مناسب کوردی .

معاویه دیدی که « یا امیر المؤمنین ! امرایه تفویض امور ایت ، هربری کندی دائرة مأموریتی ضبط و ربط ایلسون . بن ، شام اهالیسنه متعهدم . » عبدالله بن سعد بن ابی سرح دخی « یا امیر المؤمنین ! ناس ، طمعکاردر .

آنلره بذل مال ايدرسهك سنك طرفكه مائل ومتوجه اولاجقلى دركاردرد .  
ديدى .

بعده عمرو بن عاص قالقوب « يا امير المؤمنين ! سن ، بنى اميه ايله برابر ناسه يوكلندك . سن كوندوز اويقوسنه ياتدك . آنلرده ياتدى . سن ميل وانحراف ايتدك ، آنلرده ايتدى . سن التزام اعتدال ، ياخود اختيار اعتزال ايت والا عزيمت قويه ايله ايلرو كيت » ديدكده حضرت عثمان « يا عمرو ! سكا نولدى ، بو سوزلرى جديمي سويليورسين ؟ » ديمكه عمرو ، سكوت ايلدى ومجلس طاغيلدقدن صكره « يا امير المؤمنين ! سن ، بنم غندمده بك كريم سين . لكن بيلدم كه قوده هر كسك سوزى ناسه يتشديره جك آدم وار . ايستدم كه بنم سوزم ناسه ، بالغ اولسونده بكا اعتماد ايلسونلر . بنده بو وسيله ايله سنك حقكده جالب خير ودافع شر اولاجق بر خدمت ايدم بيلهيم » ديو اعتذار ايتدى .

حضرت عثمان ، ابن عامر ك رايى ترجيح ايله ناسى طاقم طاقم جهاده سوق ايتك اوزره اصراني محل مأموريتلرينه كونده ردى . كوفه اهالىسى ، سعيددن اشتكا ايتمكه اولدقلى حالده آنى ده كوفه يه اعاده بويوردى وناسى اتقياده مجبور ايلك اوزره عطيه لر ينك قطعنه قرار ويردى .  
حال بوكه : سعيد ، هنوز محل مأموريتنه وارمادن عطيه نك قطعى حوادثى كوفه ياراننه واصل اولمش وكوفه ده بروجه زير بويوك براختلال وقوع بولمش ايدى .

### كوفه واليسى سعيدك عزلى

كوفه ده اختلال وعصيان ، قوه قريبيه كلش اولدينى حالده كوفه اميرى سعيد بن العاصى ، بروجه بالا امير المؤمنينك امرى اوزره مدينه منوره يه كيتمشيدى . حال بوكه : كچن سنه ( آذربايجان ) و ( رى ) و ( همدان ) و ( اصفهان ) و ( دماوند ) و ( موصل ) و ( قرقيسيا ) ايلتلرينه

و (باب الابواب) جانبہ وبعده (حلوان) ہ کوفہ وجوہندن برر والی نصب وارسال ایلہ کوفہدہ کندو ایشنه یارایہ جق رؤسادن یالکز (قعقاع) قالوب آنی دہ امور حرب اوزرینہ مأمور ایتمش ایدی (یزید بن قیس) کوفہنک او وجہلہ رؤسادن خالی قالدیغنی فرصت اتخاڈ و حضرت عثمانی خلع ایتک نیتیلہ خروج و (سبئیہ) ، یعنی (ابن سبأ) ایلہ مخابرہ ایتکدہ اولان کروه دخی آکا التحاق ایتدی .

قعقاع بن عمرو ، آنی اخذ ایتدیسهده سؤ نیتی کتم ایلہ یاقهسنی آنک الدن قورتاردی و حصہ مکتوب کونده ردی اورادہ کی ہمالرینی دعوت وآنلر دخی عودت ایلدی .

اشترنجی ، سائرینہ تقدم و مسابقت ایلہ ناس ، جمعہ نمازندہ ایکن کوفہیہ واردی . مسجد قپوسندہ طوردی . ناسی قیامہ دعوت وتشویق ایتدی .

سعید ، اولجہ مدینہدن چیقوب کوفہیہ کلک اوزرہ اولدیغندن یزید ، ہان میدانہ چیقدی « سعیدی کیرو چویرمک اوزرہ ایستہین یزیدک یانہ کلسون » دیو دلالرہ ندا ایتدیردی .

اہل رأی اولان ذاتلر ، ناسی نہی ولوم ایتدیلر ایسہده مفید اولمادی . زیرا سوز ، آیاغہ دوشمش و نصیحت تاثیر ایدہ جک زمان کچمشیدی . قلم ولسان یرینہ سیف و سنان کچمشیدی .

بناء علیہ افراد اہالی ، اہل رأیک سوزلرینہ قولاق آصمایوب ہب یزیدک یانہ کیتدیلر واختلال وعصیانہ قیام ایتدیلر .

اشراف ناس ، مسجده طوپلانندی والی قائممقامی اولان ( عمرو بن حریت ) بر خطبہ او قودی . ناسی اطاعت وانقیادہ دعوت ایلدی .

قعقاع بن عمرو ، قالقدی « سیلی کیرومی چویرمک ایستیورسین ؟ ہیات ! واللہ بو غوغا ، آنجق قلیج ایلہ سا کن اولور . قورقارم کہ آنکدہ وقتی کچیور . سز ، آرتق بکلہیک باقالم » دیہرک خانہسنہ کیتدی . یزید ایسہ جمعیت کثیرہ ایلہ کوفہدن چیقدی . اشتر دخی برابر ایدی .

قادسيه جوارنده ( جرعه ) نام محله وارديلر . متعاقباً سعيد دخی اورايه  
کلدکده « بزم سکا حاجتمز يوقدر » ديه رک آنی کيرو چويرديلر .  
کنديلري ده دونوب کوفيه کلديلر .

( ابو ثور حدانی ) ديمش که « اوکون مسجد کوفه ده حذيفه بن اليمانک  
يانه اوطور مشيدم . ابو مسعود الانصاري دخی برابر ایدی . « اويله  
کور ييورم که قان دو کلدکجه بو ايش بتمز » ديدکده حذيفه « والله سعيد کيرو  
دونر ، قان ده دوکولز و بوکون بر شي اولماز . اکر اوله جق اولسه  
رسول الله صلى الله عليه وسلم بر حيات ايکن بن اولاجغنی بيلوردم » دیدی .  
فی الواقع حذيفه نك ديدیکی کبی اولدی . سعيد ، مدينه يه عودت ایلدی وقان  
دوکوله دی . »

بروجه بالا کوفه لیلر ، سعيد بن العاصی يي اعاده ايله يرينه ابو موسی  
الاشعري نك نصبني استدعا ايتمشلر ایدی . سعيد بن العاصی ، مدينه يه عودت  
وحضرت عثمانه بيان کيفيت ایلدی .

حضرت عثمان ، کوفه لیلرک استدعالرينه موافقتدن بشقه چاره بولامیوب  
همان سعيدی عزل ايله يرينه ابو موسایي نصب ایتدی وکوفه لیلره استمالت  
يوللو امرنامه یازدی .

ابو موسی الاشعري رضی الله عنه حضرتلری که مشاهیر قرآء  
صحابه دندر . کوفيه واردي ، مسجده کيردي ، خطبه اوقودی ، حضاره  
نصيحت ويردي . آنلرده دیکله ديلر وهمان کندولرينه نماز قيلديرماسنی رجا  
ایلديلر .

ابو موسی الاشعري حضرتلری « سز امير المؤمنينه عرض اطاعت  
وانقياد ايله مدکجه اولاماز » ديمکله همان « سمعاً وطاعة » ديديلر . او دخی  
امام اولوب آنلره نماز قيلديردي .

بو صورتله عربده باصیلدی ، اختلال بر طرف اولدی ، آسایش  
عودت ایتدی . امير المؤمنينك امری اوزره حذيفه رضی الله عنه حضرتلری ،  
جهاد ایچون عسکرله باب الابواب طرفنه کیتدی .

## ظهور مبادی<sup>۱</sup> اختلال

بروجه بالا ابو موسی الاشعری حضرت تارینک امارتیلہ کوفہ اختلالی باصدیریلدی ایسده هپ ایالاتده حضرت عثمانہ طعن ایدیلور وامراسندن اشتکا اولنور ایدی .

بو جهتله ایالاتدن مدینه منوره یه پیدرپی چیرکین خبرلر اولاشور ، کروه مخالفینک لسانلرنده ایسه حضرت عثمانک خلعی لاقیردییسی طولاشور ایدی . مدینه منوره ده دخی حضرت عثمان ، طعن ایله استخفاف ایدیلور اولدی . کبار اصحاب کرام ایسه مداخله ایتیه رک بر طرفه چکیلدی .

۱ کرچه ( زید بن ثابت ) و ( ابو اسید الساعدی ) و ( کعب بن مالک ) و ( حسّان بن ثابت ) رضی الله عنهم ، ناسی منعه سعی ایدرلردی . لکن یالکز آنلرک منعی کافی دکلدی .

بناءً علیه اهل مدینه طوپلانوب علی بن ابی طالب رضی الله عنه الغالب حضرت تارینه کتدیلر و حکومتک اجرا آتندن یولسز کوردکلری موادی تعداد و بیان ایتدیلر . حضرت علی دخی حضرت عثمانک یانه واردی . کیفیتی خبر ویردی و حضرت عمرک یرینه کوره شدت و ملایمتندن بحث ایلدی و عاقبتک وخیم اولاجنی بیانیله نصیحت یوللو چوق سوزلر سویلدی .

حضرت عثمان « یاعلی ! بیلورم که سنک دیدیکگی دیورلر . لکن سن نیم یرمده اولسه ک بن ، سنی لوم ایتمز ایدم . بیلیرسین که عمر ، مغیره ابن شعبه یی والی قیلدی . یا بن ، ابن عامری قرابتته بناءً والی قیلدیغمدن طولای بنی نیچون لوم ایدرسین ؟ » دیدی .

حضرت علی دیدی که « عمر ، والی قیلدینی آدمک قولاغنی بوکر و آنک طرفندن بر سوز کلسه همان جلب ایله حقنده مجازات شدید ایدر ایدی . سن بونی یامیورسین . اقرباک حقنده ضعف ورتک وار »



حضرت عثمان « ياعلى ! آنلر سنكده اقربا كدر » ديدكده حضرت على « اوت . آنلر بنمده اقربامدر . لكن نه ياپايم كه فضل و رجحان بشقه لرنده در » ديدى .

حضرت عثمان « بيلورميسين كه معاويه بي عمر ، والى قيلمشيدي » ديدكده حضرت على « بيلورميسين كه معاويه ، عمر دن عمر ك كوله سندن زياده قورقاردى . شمدى ايسه معاويه ( عثمانك امريله ) ديو يولسز ايشلر ياپيور . حال بوكه : سن ، تبديل و اصلاح ايتيورسين » ديدى .

حضرت على ، قالقوب كيتدكن صكره حضرت عثمان ، منبره چيقدى . خطبه او قودى و ديدى كه « هر شيك بر آفتى واردر . بو امتك آفتى دخی اهل طعن و تعيبدر . سز ، ابن خطا بدن كوروب قبول ايتديكگز ايشلرده بنى تعيب ايديورسكز . لكن او ، سزك باشكزه باصدى . سزى اليله دوكدى ، لسانيله سوكدى . سزده آ كا منقاد و ملايم اولديكز . بن ، سزه ملايم اولدم ، سزى اوموزيمه باصديرم . سزدن المى منع ايتدم ، ديلمى طوتم . سز بنم اوزريمه جرأت ايلديكز . والله بنم جماعتم ده ا غالبدر ، عونم چوقدر . كليكز دير ايسه مكلورلر ، بنى لسانه آلايكز ، واليريكزى طعن و تشنيعدن وازكچيكز »

بوصرمده مروان ، قالقوب لسان شدت ايله سوزه قاريشدى . حضرت عثمان « صوص ! بن سكا سويله ديمه ديمى ؟ » ديهرك آ كا بر چيقيش ايتدى . بعده منبر دن اينوب خانه سنه كيتدى .

حضرت عثمانك بوسوزلر دن خلق دلكير اولدى . هله مروانك وضع و طور دنن بك زياده نفرت ايلديلر و اولكي دن زياده يكديكرينى امارت عليه قيشقيرتمغه باشلاديلر .

اوزمان مصرده بولنان ( ابن سبأ ) و رفقا سى ايسه بلاد سائرده كي همبالريله و آنلر دخی يكديكر لريله مخابره ايدرك واليرك مظالمندن بحثله نيجه حوادث كاذبه اختراع و اشاعه ايتدمه ايديلر .

بو وجهله کروه مخالفین ، بنی امیه نک کلتی و جزئی قصور لرینی اعظام  
ایتدیلر ، برینه بیک قاتدیلر .

بو جهته ایالاتده کفتکو چوغالدی و هر طرفدن مدینه یه امرانک مظام  
و تعدیاتنه دائر خبر لر کلور اولدی .

بناءً علیه اهل مدینه ، حضرت عثمانک یانه واردیلر . وقوع حالی خبر  
ویردیلر . اودخی « سز بر رأی ویریکز » دیمکله « بزه قالدور ایسه طوغری  
خبر آلمق ایچون ایالاته موثوق آدم لر کونده رملیسین » دیدیلر .

حضرت عثمان دخی کوفه یه ( محمد بن مسلمه ) یی و بصره یه ( اسامه  
بن زید ) یی و شامه ( عبدالله بن عمر ) یی و مصره ( عمار بن یاسر ) یی  
کونده ردی . کیتدیلر ، کلدیلر « بر منکر کورمدک » دیدیلر .

فقط عمارک عودتی تأخر ایتمکله موجب اندیشه اولدی . مصر والیسی  
عبدالله بن سعد ایسه عمار یی برکروه ایله جلب و استماله ایتدی که عبدالله  
بن سبا و خالد بن الملجم و سودان بن حمران و کنانه بن بشر برکروه ایچنده در  
دیو یازمشیدی .

بعده حضرت عثمان ، هر طرفه مکتوب لر کونده ردی ( بعضیلری ، ناسی  
شتم و ضرب ایدیورمش دیو اهل مدینه بکا خبر ویردی . بن ، موسم حجه  
امرای جمع ایدرم . هر کیمک دعواسی وار ایسه کلسون . بندن ، یاخود  
مأمور لر مدن حقنی آلسون ) دیو اعلان بیوردی .

بو مکتوب لر ، ایالاته واروبده علناً قرائت اولندقده هر کس متأثر اولوب  
آغلادی و حضرت عثمانه دعا ایلدی .

موسم حجه بصره والیسی ( عبدالله بن عامر ) و مصر والیسی ( عبدالله  
بن سعد ) و شام والیسی ( ابن ابی سفیان ) مکّه مکرمه یه واردیلر .

حضرت عثمان ، آنلر ایله برابر ( سعید بن العاصی ) یی و ( عمرو بن  
العاص ) یی دخی حضورینه کتوردی . « یازیق سزه ! بو شکایتلر نه در ؟  
بونلرک کرچک اولماسندن قورقیورم » دیو بیوردی . دیدیلر که « تحقیق  
مأمور لرینه کیمسه نک برشی سویلیدیکنی آنلر سکا افاده ایتدیلر می ؟ بونلر

مخصوصاً اشاعه ايديش ار اچيفدر. بز، اصلنى بيلمپوروز. فقط بويله شايه لرك اخذ و قبولى جائز اولماز » حضرت عثمان « اويله ايسه رآى و تدبير نه در؟ » ديدكده عبدالله بن سعد بن ابى سرح ديدى كه « ناسه حقلرينى اعطا ايتديكده بورجلرينى دخى ايفا ايتدير. آنلرى كندى حاللرى اوزره براما. »

معاويه ديدى كه « سن، بنى والى و امير ايتدك. بنده برطاقم آدملىر مأمور ايتدم. آنلردن سكا خيرون غيرون برشى كلز. ايكي آدم كندى ناحيه لرندن اعلمدر. رآى ايسه حسن ادبر. »

سعيد بن العاصى ديدى كه « بوشايه لر، ياپمه شيلردر. كيزلوجه اورتهيه آتيلور. ناسده آنلرى تفوه ايديبور، بونك علاجى، تحرى و تحقيق ايدوبده بوشايه لر كيملردن چيقور ايسه آنلرى قتل ايتكدرك »

عمرو بن العاص ديدى كه « ناس حقنده سن يك ملايم اولدك، كوشك طاورانلك. آنلره عمر ك ياپديغندن زياده ياپدك. سن، شيخنك مسلكنى التزام ايدوبده ايجايه كوره ملايمت و ايجايه كوره شدت كوسترمليسين »

الحاصل رآيده اختلاف ايتديلر. ايكي سنك سوزى بر رده كلدى. حضرت عثمان دخى « رآيلري كيزى ايشتدم. هر ايشك كيريله جك برقبوسى وار. قابالى قابى آچيلاجق. بوامت حقنده قورقولان شى اولاجق. حدود الهيه دائره سندن چيقمايالم كه او قابى آچيلاقده كي مسه نك بنم عليهمده سند اولاجق سوزى اولمايه. فتنه دكرمنى دونوبور. عثمان، آنى تحريك ايتدن وفات ايدرسه آكانه موطلو. الله بيلور كه ناس حقنده بن خيرون تحريده تجويز قصور ايتدم. ناسى تسكين و حقلرينى كندولرينه تبين ايديكز » ديدى.

بعده حضرت عثمان، حجدن عودت ايلوب امرا ايله برلكده مدينه منوره يه كلدكده على و طلحه و زبير رضى الله عنهم حضراتى حضورينه دعوت ايلدى. معاويه دخى او مجلسده حاضر ايدى. اوچنه خطاباً ديدى كه « سز رسول الله صلى الله عليه وسلم حضرتلرينك اصحابى و خلقك اخيارى سكر. امارت اسلاميه نك و ليلرى سكر. بوايشه سزدن بشقه كي مسه طمع ايتز.

بوکا صاحبکزی (یعنی عثمانی) انتخاب ایتدیکنز. شمعی اختیار اولدی، عمری آزالدی. صوکنه انتظار ایتسه کز چوق سورمز. حال بوکه: بر مقاله شایع اولدی. قورقارم که سزک حقکنزده مضر اولور. کندی امرکنزده (یعنی حقکنز اولان امارت خصوصنده) ناسی اطماع ایتیکنز. طمعنه دوشرلر ایتسه ابدی ادباردن غیری برشی کورمزسکنز.

حضرت علی، بوسوزلردن دلگیر اوله رق معاویه یی تکدیر وتغزیر ایتدی، اودخی مقابله یه قیام ایلدی.

همان حضرت عثمان، سوزه آغازایله «طوریکنز. سزه کندی احوالمدن بن خبر ویرهیم. بندن اول ایکی رفیق (یعنی ابوبکر و عمر) حسبه لله نفسارینه ظلم ایتدیلر. اقبالرینه دخی مانع اولدیلر. رسول اکرم صلی الله علیه وسلم ایتسه اقباسنه ویرردی. بنده قومک عیاللری چوق و معاشلری آز اولدیغندن آنلر حقنده سماحت ایلدم. اکر بونی خطا کوررسه کز رد ایدیکنز. نم امرم، سزک امرکنزه تابعدر» دیدی.

آنلردخی «اصابت ایلدک، احسان ایتدک. فلانه شوقدر بیک و مروانه بو قدر بیک ویرمشیدک» دیدکده حضرت عثمان «بن، بومبالی آنلردن استرداد ایلرم» دیمکله اوچی ده آنک بواطوار و کفتارندن خوشنود و راضی اوله رق یانندن چیقوب کیتدیلر.

معاویه، روش حالی بکنمیوب حضرت عثمانه «بنمله بیله چیق. شامه کیده لم» دیدکده حضرت عثمان «رسول الله صلی الله علیه وسلم حضرتلرینک جوارینی برشینه دکیشم» دیدی.

معاویه «اوله ایتسه سنی محافظه ایچون بورایه عسکر کونده رهیم» دیدکده دخی حضرت عثمان «رسول الله صلی الله علیه وسلم حضرتلرینک جیراتی تضییق ایتم» دیدی.

آنک اوزرینه معاویه «محقق سکا قیارلر» دیدکده حضرت عثمان «حسی الله ونعم الوکیل» دیدی. رضی الله عنه. نه چوق تحمل، نه بیوک توکل.

بعده معاويه ، البسة سفریه سنی لابس اولدینی خالدہ علی وطلحہ وزیر و دیگر بعض مهاجرین ایله کوروشوب حضرت عثمانی آنلره توصیه و تودیع ایله وداع ایتیش و شامہ کیتمشدر .

### استطراد

معاویه دیمش که « نه ابوبکر دنیایی ایستدی ، نه ده دنیا آکا توجه ایلدی . عمره دنیا ، توجه ایتمدی . او ، دنیایی رد ایلدی . عثمانہ دنیادن بر مقدار اصابت ایلدی . بز ایسه بتون بتون دنیایه طالدق » انتهى . حضرت عثمان ، ذاتاً زنکین اولدینی جهتله مصارفی بیت المالدن آلمغه محتاج دکل ایدی . لیکن اقرباسی حقنده سماحت ایلدی . بوجهتله کندی علمینده طرف طرف فرقه لر پیدا اولدی . ا کرچه معاویه نك دیدیکی کبی شامدن و بلاد سائرہ دن عساکر و افیه جلب ایتسه یدی کندینی محافظه ایدہ بیلوردی . لیکن او وقت حکومتی قوه قائمه ایله اداره ایتیش اولوردی و خلافت ، دها اوزمان سلطنته منقلب اولمق لازم کلوردی . بونک ایسه هنوز وقتی کلمه مشیدی . بناءً علیه حضرت عثمان ، محافظه نفس ایچون جیران رسول الله اولان اهل مدینه نك قوه عسکریه ایله تضییقنی روا کورمدی . رضی الله عنه .

### ۳۵ نجی سنه وقایعی

بالاده بیان اولندینی اوزره ناسی اشغال ایچون طرف طرف جهاده سوق اولمق اوزره قرار ویریش و حتی حذیفه بن الیمان رضی الله عنه حضرت تبری ، باب الابواب جانبنه کونده ریش ایدی . بعده ایالاتدن متوارد اولان شکایات اوزرینه موسم حجده امرا کیدوب حضرت عثمان ایله ملاقات و مشاوره ایتدیلر ایسه ده . بر حسن تدبیره موفق اولمقسزین عودت ایلشدر ایدی .

ایالاتده بولسان گروه مخالفین ایسه امرانک حضرت عثمان نزدینه بملرنده دفعهٔ قیام ایله هریرده اختلال حیقارمق اوزه بینلرنده مخابره ملر ایکن هنوز آنلر تدارککاری اتمام ایتمدن امرا ، عودت ایلمکله تلتیرینی فعله کتورده مدکلیرندن مدینه ده کی طرفدارلریله مخابره یه باشلامش لر ردخی «جهاد بوراده در. بورایه کلیکز، بورانک اکر یسنی طوغرولدیکز» رک آنلری مدینه یه دعوت ایلمش لر .

### حضرت عثمانک محصوریتی

اهل مصردن بعضیلری ، مدینه یه کلوب والیلری اولان عبدالله بن سعد بنی سرحدن شکایت وتظلم ایلدکلرنده امیرالمؤمنین عثمان ذی النورین علیه السلام عنه حضرت تلری ، آکا تهیدیدنامه کونده ردی . عبدالله بن سعد ایسه سرنامه نک حکمنی انفاذایتک شویله طورسون، بوندن طولای حدتلنهرک یجیلردن برینی دایاق آلتنده اولدردی. ایشته بو حادته دخی ناسی برمرتبه حدتلندردی .

حال بوکه : بالاده مشروح اولان سبیلردن ناشی هر طرفده کی اهل قیام ، یکرلیه مخابره ایدهرک حضرت عثمانی خلع ایچون مدینهٔ منوره یه وارمق ره بینلرنده قرار ویرمش لر ایدی .

مصر وکوفه وبصره اهل قیامندن یدیشر ، سکزر یوز قدر آدم نوب ویکدیکرلیه خبرلشوب زیارت بیت الله ایچون دیهرک یرلردن کت ایله مدینهٔ منوره یه عزیمت ایلدیلر. مصر لیلرک ایچنده (عبدالرحمن دیس) و(کنانه بن بشر) و(قتیره) کی مشهور سفاک رئیس لر وارایدی له سنک رئیس ی (غافقی بن حرب) ایدی .

کوفه لیلر ایچنده دخی (زید بن صوحان العبدی) و (اشتر نخعی) و(زیاد ر) و(عبدالله بن الاصم) کی مشهور آدم لر وار ایدی . بصره لیلر ایچنده دخی (حکیم بن جبلة العبدی) و (زریح بن عبّاد)



و (بشر بن شریح القیسى) و (ابن المحرش) نام مشهور آدملىر اولوب رئیسلىر (حرقوص بن زبیر السعدى) ایدی .

مصر لیلر ، حضرت علی یه و بصره لیلر ، حضرت طلحه یه و کوفه لیلر حضرت زبیره مائل اولدقلرى حالدہ جمله سى حضرت عثمانك خلعى خصوصاً متفق ایدیلر .

مدینه یه اوچ قوناق مسافه محللرده توقف ایلدیلر و هر فرقه دن برره سچیلوب ایلر اولدیلر . بصره طاقى جوار مدینه ده واقع (ذی خُشب) محله و کوفه طاقى (احوص) نام محله قوندیلر . مصر طاقنك اک (ذی المروه) نام محله قونوب برازی دخى کوفه لیلرک یاننه ایندیلر کوفه لیلر زیاده بن نفر ایله عبدالله بن الاصم «ایشتدک که مدینه ده بزه قارشو عسـ طوبلانمش . صحیح ایسه برایش کوره میز . صبر ایدک . ابتدا بز کیده و کیفیتى تحقیق ایدلم ، دهرک مدینه یه کلدیلر . ایکسى برلکده علی وط وزیر رضی الله عنهم و امتهات المؤمنین رضی الله عنهم حضرت ایلر کوروشده و «بز حج ایتمک و بعض مأمورینى مأموریتلرندن عفو ایتدیرمک ایچون کلد دهرک مدینه یه کیرمک اوزره رخصت ایستدیلر . لکن حضرت علی وط وزیر ، رخصت ویرمدیلر . ایکسى ده دونوب رفیقلرینک یاننه کیتد وینلرنده مشاوره ایتدیلر . ویردکلرى قرار اوزرینه ینه هر فرقه دن گروه آیریلوب مصر لیلر ، حضرت علینک و بصره لیلر ، طلحه و کوفه لیلر ، زبیرک یانلرینه کیتدیلر .

حضرت علی ایسه دارالخلافه یی محافظه ایچون بر مقدار عسکر ایدرک خارج مدینه ده (احجار الزيت) نام محله اردو قورمش و قلر قوشانوب اورایه وارمش و اوغلى حسن رضی الله عنه حضرتلرینى حضرت عثمانك یاننه کونده رمش ایدی .

مصر لیلرک مبعوثلرى ، ایشته بو اردوده حضرت علی ایله ماله ایلرک کندوسنه بیعت ایلنک اوزره خلافتى تکلیف ایتدکلرنده حضرت علی ، یوزلرینه حایقیروب آنلرى رد و طرد ایلدی و ذی المروه و ذی-

حوص عسکر لرینک ملعون اولدیغنه دائر بر حدیث شریف اولدیغنی یلدی .

بصره مبعوثلری ، حضرت ( طلحه ) یه وکوفه مبعوثلری ، حضرت زبیر ( ه ) مراجعت ایلدکده ایکسیسی دخی حضرت علی کبی جواب رد طاسینه آنلری طرد ایلدیلر .

مبعوثلر ، بروجه بالا اوچندن دخی جواب رد آلدقده جمله سی عودت کر اولنان اوچ موقعی ترک ایله اوزاقده اولان جمعیتکاهلرینه کیتدیلر .

لر بوتون بوتون صاووشوب کیتدی ظنیه مدینه عسکری طاغیلدی . اهل قیام ایسه خبرلشوب واوچ فرقه سی برلشوب شوالک سلخنده . یینه اوزرینه حرکت وبغته تکیر آلارق کلوب مدینه یه دخول ایله حضرت عثمانک خانه سی محاصره ایتدیلر و « سلاحه طاورانمایانلره امان » دیرک دلالر ندا ایتدیردکلرندن اهل مدینه ، خانه لرینه چکیلدی . حضرت یان دخی خانه سنده محصور قالدی .

شوحاله نظر آ اهل قیام ، هپ اهل بغی وطفیان دیمک اولدقلرندن حضرت عثمان ، آنلری کتاب وسنته دعوت ایچون دهات عربدن عمرو ، عاص ومغیره بن شعبه رضی الله عنهمای آنلره کونده ردکده ایکسیسی دخی ا صورتده تکدیر ایله طرد ایلدیلر وحضرت علی ، اصحاب کزینندن بعض ات ایله آنلرک یاننه واروب « کیتمشیکن نیچون دونوب اوزریمزه کلدیکر؟ » و استنطاق ایلدکده معقول بر جواب ویره میوب نهایت « بز ، بو آدمی ستمه یز . عزلت ایلسون » دیرک حضرت عثمانک خلافتدن استعفا سی صوصنی درمیان ایتدیلر .

حضرت عثمان ایسه آنلره جواب ویرمیوب کافی السابق مسجد شریفده امت ایلر ایدی . آنلر دخی آنک آرقه سنده نماز قیلار وناسی آنکله . جماع واختلاطدن منع ایتملر ایدی . جمعه کونی حضرت عثمان ، منبره یقوب آنلره خطاباً « اللهمن قورقک اللهمن . الله حقیچون اهل مدینه لورکه : سز ، لسان رسول الله صلی الله علیه وسلم اوزره ملعونسکرز . خطایی

صواب ايله احما ايدىكز « ديدكده محمد بن مسلمه رضى الله عنه « بن ، بو شهادت ايدرم » ديمكده حكيم بن جبلة ، آنى اوپورتدى . زيد بن ثابت رضى الله عنه قالقدى . آنى ده باغيلردن ديكر برى اوپورتدى .

همان باغيلر ، ناسى طاشه طوتديلر ومسجددن اخراج ايتديلر و آتيلار طاشلارك اصابيله حضرت عثمان ، باييلوب منبر اوزرينه ييقيلى و هم قالديريلوب خانه سنه كتورلدى . حضرت عثمان ، كوله لرني مدافعه دن « ايتديكي كبي ( سعد بن ابى وقاص ) و ( حسن بن على بن ابى طالب و ( زيد بن ثابت ) و ( ابو هريره ) رضى الله عنهم حضراتى ، بعض ذوا كرام ايله برلكده باغيلر ايله مقاتله يه قيام ايتمشلر ايكن حضرت عثمان خانه سنه كيردكده آنلرى دخی مقاتله دن منع ايله « سزده خانلركم كيدىكز » ديو امر ايتدى . آنلرده مقاتله دن واز كچوب يرينه كيتدى حضرت على و طلحه و زبير ، عيادت ايچون حضرت عثمانك يا وارديلر . ياننده بنى اميه دن براز آدملر وار ايدى كه بريسي مروان ايدى حضرت على يه خطاباً « بو ايشى سن ياپدك . بزي برباد ايتدك . والله امراديكه نائل اولور ايسه ك بتون دنيا عليه كه منقلب اولور » ديملر حضرت على ، غضبك اوله رق قالقوب كيتدى . طلحه و زبير دن صوغو قلق ايله قالقوب خانه لرينه كيتديلر .

بنى اميه دن اغراض دنويه ايچنه طالمش اولانلر ، حضرت على كندولرى كبي حريص منصب دنيا صانوب حقنده اووجهله سؤ ظنه ذاه اولمشلر ايدى . حضرت على ايسه مقدم ومؤخر ملت اسلاميه يي تفرقه حفظ و صيانت ايتمش اولديني كبي بو غائله يي بر طرف ايتمكه دخی غاي خالصانه و حسي اوله رق چاليشوردى .

لكن غائله نك بتمى و ايشك بر حسن صورت كسب ايتمى او مقو اهل غرض اولان امرانك عزليه افكارى ياتيشديرمغه موقوف ايدى . مصر ليلرك واليلرى اولان عبدالله بن سعد بن ابى سرحدن اشتكالر اوزرينه آنك عزليه عريده نك باصديريلماسى ايجاب حالان اولغله عشه

مبشره دن طلحه بن عبیدالله رضی الله عنه حضرتلری ، حضرت عثمانك يانسه واروب بو خصوصده يك زیاده شدت كوسترمشیدی .

ام المؤمنین عایشه رضی الله عنها حضرتلری دخی « محمد صلی الله علیه وسلمك اصحابی سكا كیدوب بو آدمك عزلی ایسته مشلر . سن ابا ایتمش سین . بو آدم ایسه آنلردن برینی اولدیرمش . سن ده كندو مأموركدن آنلرك حقی آلیور » دیو حضرت عثمانه خبر كونده رمشیدی .

حضرت علی ایسه حضرت عثمانك يانسه واروب « مصرلیر ، سندن بر آدمك یرینه بشقه برآدم ایستورلر . آندن قان دعواسی دخی ایتمشلر ایدی . سن ده بونی آنلرایله محاکمه وعلینده برحکم صادر اولورایسه اجرا ایت ، دیو بیورمشدر .

حضرت علی ، دائماً بو مثللو خصوصاتی اخطار ایدوب حضرت عثمان دخی قبول ایدرك ینلرنده اجراسنه قرارویریلوردی . لکن صكره مروان ، او مثللو قرارلری بوزار وایشی بشقه رنكه بویار ایدی .

حتی مرویدركه : حضرت عثمان ، بركون حضرت علینك اخطاری اوزرینه مروانك كتابتدن و ابن ابی سرحك مصر والیلكدن عزللرینی قویاً وعدایش وچند روز ظرفده ناسی خوشنود ایده جكنی منبراوزرنده علناً سويلش ایكن مروانك ابرامیله فسخ نیت و تحویل لسان ایتدكدن عمرو بن عاص « یاعثمان ! اللهدن قورق » دیوب بعده مدینه یی ترك ایله آرتق فلسطینه عزیمت و ختام مسئله یه دك اواده کی قوناغنده اقامت ایلشدر .

اوصرده مروان ، حضرت عثمانك قبوسی او كنده مجتمع اولان خلق تحقیر و تكذیر ایله دفع و طرد ایلش اولدیغندن بعضیلر كلوب حضرت علی یه اشتكا ایتدكلرندن حضرت علی ، بو حاللردن متأثر و دلگیر اوله رق « نه یاییم . خانه مده عزلت ایلسم بی ترك ایتدك ، حقوقه رعایت ایلدك دیر . واروب سويلسم مروان كلور ، نیم رأی و تدبیرمی ملعبه ایدوب ایشی باشقه یوله سوق ایدر » دیهرك حضرت عثمان يانسه واروب « سن اقربا كه مغلوب

اولدك . شان و شرفكى اخلال ايتدك . بن ده آرتق بورايه كله ميه جكم «  
ديوب كيتمشدر .

حضرت عثمانك زوجه سى ( نائله ) « مروانك بين الناس اعتبارى يوقدر .  
او، سنى قورتاراماز . على بنى ارضا ايت . سنى بوغانلهدن او، قورتاره بيلور، ديو  
حضرت عثمانه نصيحت ايلشيدى . مروان وساثر بنى اميه ايسه بومثللو نصايح  
خيرخواهانى هپ تاثيرسز براقمده ايديلر . فى الواقع بوغانلهدنك برطرف  
اولماسى حضرت علينك همت واقدامنه منوط اولدينى حالده اومثللو سبيلردن  
ناشى قيرياش و خانه سنه چكيلمش ايدى . ايشلر ايسه كيتدجه قاريشوب  
عرب صاچنه دونه رك مشكلات كوندن كونه آرتقمده ايدى .

شويلاه كه : اوتوز بر سنه سى وقايعى صره سنده بيان اولندينى اوزره  
حضرت ابوبكر الصديقك اوغلى زهاد صحابه دن ( محمد ) ويمامه جنكنده  
شهيد اولان ( ابو حذيفه ) حضرت تلرينك اوغلى ( محمد ) اهل مصرى  
حضرت عثمان عليهنه تحريك ايتكمده اولدقلى حالده بو كره ( محمد بن  
ابى بكر ) اهل قيام ايله برابر مدينه يه عازم اولمش و ( محمد بن ابى حذيفه )  
مصرده قالمش ايدى .

مصر واليسى ( عبدالله بن ابى سرح ) اهل قيامك آرقه سندن سگيردوب  
( ايله ) يه كلدكده آنلرك حضرت عثمانى محاصره ايتدكلرى و ( محمد بن  
ابى حذيفه ) نك مصرده اختلال چيقاردىنى خبرلرني آنجه مصره  
عودت ايلش ايسه ده اصحاب اختلال مانع اولمغله مصره كيره ميوب ارض  
فلسطينه كيتمش واوراده كى قوناغنده اقامتى اختيار ايتمشدر .

حضرت عثمان ، اوتوز كون قدر بروجه بالا مسجد شريفده امامت  
ايلوب اهل قيام دخى آرقه سنده نماز قيلار و تصرفات شرعيه سنه دخى  
مانع اولمازلر ايدى . حتى هر سنه حجاج ايله كيدوب حج ايده كلشيكن  
بو سنه محصور اولمغله ( عبدالله بن عباس ) رضى الله عنه حضرت تلرينى  
اميرالحاج نصب ايدرك مكيه كونده رمشيدى .

فقط مصر وشامده صحابه دن وتابعيندن نيجه ذوات كرام و كوفده صحابه دن

(عقبه بن عامر) و (عبدالله بن ابی اوفی) و (خنظلة الکاتب) رضی الله عنهم و تابعیندن (مسروق) و (اسود) و (شریح) و (عبدالله بن حکیم) رحمۃ الله علیهم و بصرمه (عمران بن حصین) و (مالک ابن انس) و (هشام بن عامر) رضی الله عنهم و (کعب بن سور) و (هرم بن حیّان) رحمۃ الله علیهما، میدانه چیقوب اهل مدینه نك امدادینه ایریشمک اوزره ناسی دعوت و تشویق ایتمکده اولوب مدینه ده کی اهل قیام ایسه ایالاتده کندولرینک علیهنه بویله حرکتلر وقوعه کلدیکنی ایشیتدکلرنده هان حضرت عثمانی خلافتدن استغفایه مجبور ایتمک و ایالاتدن امداد کلدن ایشه نهایت ویرمک اوزره امر محاصره یی تشدید ایله حضرت عثمانی امامتدن وخلق ایله اختلاطدن منع ایلدیلر .

بونک اوزرینه مصر لولرک امیری اولان (غافقی) بالجمله اهل قیامه امیر اوله رق مسجد شریف نبویده امامته کچدی ایسه ده اهل مدینه طاغیلوب خانه لرینه کیتدیلر و خانه لرنده مسلح طوروب زقاغه چیققدکلرنده دخی مسلح کزر اولدیلر .

مسجد نبوی مؤذنی (سعد القرظ) رضی الله عنه ایسه اوکون حضرت علینک یانسه وارمش « ناسه کیم نماز قیلدیراجق ؟ » دیو صورمش . اوده « خالد بن زیدی دعوت ایله » دیو بویورمش .

آنک اوزرینه (سعد القرظ) ابو ایوب خالد الانصاری رضی الله عنه حضرتلرینی دعوت ایلمکله چند روز حضرت خالد ، مسجد نبویده ناسه نماز قیلدیرمش .

حضرت خالد ، بین الناس ( ابو ایوب ) دیو معروف اولوب اسمی سویلممزدی . او کون اسمی ( خالد ) اولدینی معلوم اولمشدر .

علی روایه حضرت علینک امریله ( سهل بن حنیف الانصاری ) رضی الله عنه حضرتلری ، عید اضحایه قدر ناسه نماز قیلدیرمشدر . بیرام نمازینی بالذات حضرت علی قیلدیروب آندن صکره دخی ختام مسئلهیه قدر بش وقت نمازده امامته مداومت بویورمشدر .



ایش بوپره سه یه کلدکده ینه حضرت علینک وساطت همتنه احتیاج کورولدی وهرنه رأی وتدیر ایدرسه بلا تردد اجرا اولنمق تعهدیله حضرت عثمان طرفندن آکا مراجعت بویورولدی .

اودخی مهاجرین وانصاردن اوتوز کیشی استصحاب ایلدی که عشره مبشره دن ( سعید بن زید ) و دیگر مهاجریندن ( ابو جهم العدوی ) و ( جبیر بن مطعم ) و ( حکیم بن حزام ) و انصاردن ( ابواسید الساعدی ) و ( ابو حمید ) و ( زید بن ثابت ) و ( حسان ) و ( کعب بن مالک ) رضی الله عنهم حضراتی آنلرک ایچنده داخل ایدیلر . بنی امیه دن ( مروان بن الحکم ) و ( سعید بن العاصی ) و اشراف عربدن ( نيار بن مکرز ) دخی برابر ایدیلر .

حضرت علی ، بو جمعیت ایله برلکده واروب اهل قیام ایله بولوشدی ، کوروشدی ، سویلشدی . مظالمک دفعی و ایسته مدیکلری مأمورلرک عزلی ایله فیما بعد کتاب وسنته تمسک اولنمق شرطیله طاغیلوب کیتملرینه قرار ویریلدی .

بوقرار اوزرینه مصر والیسی ( عبدالله بن سعد بن ابی سرح ) عزل ویرینه ( محمد بن ابی بکر ) نصب ایله مصره اعزام بویورولدی و ابن ابی سرح ایله مشکیلری آره سنده کی دعوالره باقق اوزره مهاجرین و انصاردن بعض ذوات کرام دخی ( محمد بن ابی بکر ) ایله برابر کونده ریلدی . بونک اوزرینه طاغیلر ، باغیلر طاغیلوب کیتدی .

غوغا باصیلوب غائله بیتدی . اهل مدینه ، مضایقه دن قورتولوب موقه نفس آلدی ، کوکلر منشرح و مستریح اولدی .

### شهادت عثمان

بروجه بالا ( عبدالله بن ابی سرح ) عزل ایله یرینه مصر والیسی اولان ( محمد بن ابی بکر ) رضی الله عنهما ویانه ترفیق اولنان مهاجرین

وانصار و سائر ناس، مصره عزیمتله مدینه دن اوج قوناق آیریلدقلرنده صحابه دن بعضیلری کورمشلرکه: بر سیاه کوله، بر یوروک ده ویه ینوب فوق العاده سرعتله کیدیور. صانکه برندن فرار، یاخود برینی تعقیب ایدیور.

«زورک نه، بویله سرعتله نره یه کیدیورسین؟» دیدکلرنده «امیرالمؤمنینک کوله سییم. بنی مصر والیسنه کونده ردی» دیمکله «ایشته مصر والیسی» دیو (محمد بن ابی بکر) ی کوسترمشلر و «مرادم بو دکل، اوتنه کی (یعنی ابن ابی سرح)» دینجه کیفیتی (محمد) ه خبر ویرمشلر. محمد بن ابی بکر، آنی جبله استنطاق ایتدکده کاه امیرالمؤمنینک وکاه مروانک کوله سییم دیمش ایسه ده حضاردن بری آنی طانیوب امیرالمؤمنینک کوله سی اولدیغنی بیلدیرمشدر.

بعده محمد، آکا «نه ایش ایله کونده ریلدک؟» دیدکده «برخصوصی مأموریت ایله کونده ریلدم» دیمکله «یانگده مکتوب وارمی؟» دیو صورمش، اوده «یوق» دیو جواب ویرمش. کوله نک حالی ایسه شهینی داعی اولغله اوستنی، باشنی آرامشلر. بر شی بولامامشلر. لکن «یانگده بر قوری مطره وار. ایچنده بر شی دپره نیور. چیقسون» دیو تحریک ایتمشلر. چیقمامش. یارمشلر، ایچندن بر مکتوب چیقمش.

مکتوب، سابق مصر والیسی ابن ابی سرحه اولق اوزره حضرت عثمان طرفندن محرر و آنک مهریله مختوم اولوب (محمد بن ابی بکر) مهاجرین و انصارک حضورنده مهرینی فک ایله اوقومش. مالی، جمله سنی حدت ایله ممزوج بر حال حیرته قومش.

زیرا، ابن ابی سرحه خطاباً «محمد بن ابی بکر وفلان وفلان، سکا کلدکده بر تقریبه اعداملری چاره سنه باق واللرنده کی فرمانی ابطال ایت و امر جدید کلنجیه دک مأموریتکده قائم اول وسندن اشتکا و تظلم ایچون کلوب کیتمش اولانلری رأی جدید کلنجیه ده دک حبس ایله» دیو یازیلشیدی. محمد بن ابی بکر، بو مکتوبی اوقودقدن بصره یاننده کی ذوات کرامک

مهر لریله تختیم و ایچلرندن برینه تسلیم و تودیع ایلشدن . خلق ایسه فوق العاده حدتله رک و آغزی کوپورمش دووه سوریلری کبی کومورده نه رک دونوب مدینه یه کیتدیلر .

هان (علی) و (طلحه) و (زبیر) و (سعید بن زید) و سائر اصحاب کرامی جلب و جمع ایتدیلر و کوله قصه سنی حکایه ایدرک مکتوبی آچوب او قوتدیلر . ایشیدنلری هپ حیرت آلدی ، جمله سی مکدر و مضطرب اولدی . ایشک مرتب و مروج و کفیلی اولان حضرت علی ایسه بیوک حجاب آلتنده قالدی .

بریسی ، دیه جک سوز بولامایوب طاغیدیلر وهپ محزون و مغموم اوله رق کندو خانه لرینه چکیلدیلر . آرتق کیمسه ایشی اوزرینه آلمادی . اهل مدینه دن ده حضرت عثمان طرفه بغض ایتمه ین کیمسه قالمادی .

بالاده بیان اولندی یی اوزره مقدما ابن مسعود و ابو ذر رضی الله عنهمادن طولای حضرت عثمانه کوجنمش اولانلر ایسه برقات دها کین باغلادیلر . هان مصریلر واروب حضرت عثمانی محاصره ایلدیلر .

کوفیون و بصریون ، اثنای راهده مصرلیلرک عودت لری ایشیدوب آتلرده کیر و کلدی . محمد بن ابی بکر ، بنی تمیمی و سائره یی طولالادی . امر محاصره اولکنندن دها دهشتلی صورته عودت ایلدی .

بونک اوزرینه حصرت علی ، (طلحه) و (زبیر) و (سعید بن زید) و (عمار بن یاسر) و اهل بدردن اولان دیگر بعض اصحاب کرامه خبر کونده ردی و آنلری و مکتوب و کوله یی برابر آله رق حضرت عثمانک یانه کیردی . «بو کوله و بیندیکي ده وه سنکمی؟» دیو صوردی . حضرت عثمان «اوت» دیو جواب ویردی . «بو مکتوبی سنمی یازدک؟» دیدکده «خیر . بن یازمادم و یازماسنی امر ایتمدم . آکا علمم لاحق دکدر ، دیو بیوردی . «مهر سنکمی؟» دیدکده «اوت» دیمکله «یا نصل اولویورکه سنک کوله ک ، سنک ده وه ک ایله چیقار و مصره سنک مهرکله مختوم مکتوب کوتوروده سنک خبرک اولماز؟» دیدکده حضرت عثمان «بو مکتوبی بن یازمادم و یازماسنی امر ایتمدم و کوله یی مصره بن کونده رمدم ، دیو یمین ایتدی .

محمد بن ابی بکر « عثمان یالان سویله من . بو، مروانك ایشیدر » دیدی  
مکتوبك یازوسنه باقدیلر ، مروانك یازوسی اولدیغنی ییلدیلر . همان « بزه  
مروانی ویر ، دیدیلر . حضرت عثمان ، آتی تسلیمدن ابایتدی . حال بوکه :  
مروان ، اوزمان کندی قوناغنده ایدی .

حضرت عثمانك یالان یره یمین ایتیه جکی اصحاب کرامك مجزوملری  
ایدی . فقط بعض ناس « عثمان ، بزم قبلر مزده تبریه ذمت ایلیمه من . مکرکه  
مروانی بزه تسلیم ایدوب بزه استنطاق و تفتیش ایله بو مکتوب کیفیتنی  
اوکره نه لم و بغیر حق محمد صلی الله علیه وسلم حضرتلرینک اصحابندن بر آدمک  
قتله و نیچه مسلمینک حبسنه فصل امر ایدیور آکلایلم . اکر مکتوبی  
عثمان یازمش ایسه خلع ایدرز و اکر آنک نامه مروان یازمش ایسه  
ایجابنه باقارز » دیدیلر .

او ائنده مصر لیلر ، ایچری کیردی . آنردن ( ابن عدیس ) سعد  
ابن ابی سرحك مصرده کی مظالمندن و احداث ایلدیکی بدعتلری عثمانك  
امرینه اسناد ایلدیکنندن بخله اشتکا ایدرك حضرت عثمانه خطاباً « بز ،  
مصردن سنی قتل ایچون کلشیدك . علی و محمد ، بزى منع ایتدیلر و ابن  
ابی سرحك عزلیله مظالمك دفعی امرنده کفیل اولدیلر . بزه دونوب کیتدك .  
یولده بو مکتوبه تصادف ایتدك . ایچنده شویله امرک و اوزرنده مهرک  
وار . سنك خبرك اولمادینی حالدہ آدمرك بوکا فصل جرأت ایدیورلر ؟  
سن هر حالدہ مستحق الخلع سین . بو مرتبه ضعف حاله دوشن کیمسه ،  
ولی الامر اوله ماز . نفسکی خلافتدن خلع ایت » دیمکله حضرت عثمان « بن  
اللهك کیدر دیکی خلعتی چیقارامام . فقط توبه ایدرم » دیدکده ابن عدیس ، تهور  
ایدرك « سنی کورو یورز ، توبه ایدیور سین ، صکره دونیور سین . سنك  
خلعك ، یاخود قتلك لازمدر » دیدی . سائر طرفدن دخی چیرکین سسلر  
پیدا اولدی و سوز چو غالدی . همان حضرت علی ، آنلری طیشار و چیقاردی .  
حل مسئله دفع و بلیه ایچون مروانك استنطاق و محاکمه سی لازم  
ایدی . لکن وقت اختلال اولدیعدن میدانه چیقدینی کبی اهل قیام طرفندن

اعدام اولئور قورقوسيله حضرت عثمان ، آنی تسلیمدن ابا ایتدی . اصحاب کرام دخی متأسف و متحیر اوله رق یانندن چیقوب خانه لینه کیتدیلر . آنلرک طاغیلوب کیتملری اوزرینه همان ارباب اختلال ، طویلانوب حضرت عثمانک خانه سنی صیقی محاصره آلتنه آلدیلر، حتی صو اداخلنی منع ایتدیلر . حضرت علی ، بو کیفیته مطلع اولدوقده همان اوچ قربه صو کونده ردی . لکن بو قربه لر، حضرت عثمانک خانه سنه اداخل اولنجه دك بنی هاشم و بنی امیه آزادلولرندن چند نفری مجروح اولدی .

حال بوک: ایلاتدن استمداد اولمغله شام والیسی معاویه ، بر فرقه ایله قنسرین متصرفی ( حبيب بن مسلمه ) یی کونده رمش و مشهور قهرمان ( قعقاع بن عمرو ) کوفه دن و ( مجاشع بن مسعود ) بصره دن چیقمش، جمله سی مدینه یه طوغرو سکیردوب کلیورلردی . بونلرک وصولنده ارباب عصیان و اختلاله جای نجات قالمایه جنی مجزوملری اولدیغنه مبنی آنلرک وصولندن اوّل ایشه نهایت ویرمک اوزره حضرت عثمانک قتلنه قرار ویرمشلر . حضرت علی ، بو چیرکین خبری آنجه اوغوللری سبطین مکرمین ، یعنی حسن و حسین رضی الله عنهمای کونده ردی . « عثمانک قبوسنده طوریکمز ، کیمسه یی ایچرویه کیرمک اوزره بر اقایکمز ، دیو تنیه بیوردی . ( زبیر ) و ( طلحه ) و اصحاب کرامدن بعضلری دخی اوغوللرینی آنلرک یاننه کونده ردیلر . جمله سی، حسن و حسین ایله برابر قیلیچلرینی چکوب حضرت عثمانک قبوسنده طوریدیلر . هر کیم ایچرو کیره جک اولسه مانع اولورلر ایدی . فقط عربده نك بر طرف اولماسی ایچون مروانک ویریلسنی دخی رجا ایدرلردی .

مکهدن عودت ایله بن حجاجدن ( مغیره بن اخنس ) بر جماعت ایله سکیردوب بوانشاده مدینه یه ایریشدی . عصات ایله جنکه کیرشدی ، لکن مقتول اولدی . ابو هریره کلوب نصایح ایله عصاتی اقناعه چالشدی . « ای قوم ! بن ، سزی نجاته دعوت ایدیورم . سز بنی جهنمه دعوت ایدیورسکمز ، دیدی . لکن مفید اولمادی .



بر آراق عبدالله بن سلام، عصاتك يانلرينه واروب « ای قوم !  
 یچکزده جناب حقا قلیجی صیرمایکنز . اکر صیریر ایسه کز فیما بعد  
 نیننه قویامازسکنز . یازیق سزه که سلطانکنز، قامچی ایله قائم اولور . اکر  
 آتی قتل ایدرسه کز آندن صکره آنجق سیف ایله قائم اولور . یازیق  
 سزه که ، مدینه کز مطاف ملائکه در . اکر آتی قتل ایدرسه کز آنلر  
 مدینه کزی ترک ایدر . هر نه زمان بر پیغمبر قتل اولندیسه یتیمش بیک و خلیفه  
 قتل اولندقد . اوتوزبش بیک آدم قتل اولنه کلمشدر » دیدکده « بی یهودی  
 زاده ! بزه نصیحت ایدم جک سنی قالدک ؟ » دهرک آتی تکدیر ایتدیلر .  
 صوکر عبدالله بن سلامک دیدیکی ظهوره کلمش و آنک دیدیکندن  
 قات قات زیاده اهل اسلام قلیچدن چکمشدر .

اهل عصیان و اختلال کیتدجکه تهور ایلدیلر و حضرت عثمانک خانه سی  
 وزیرنه اوق سریمکه باشلادیلر . حسین و سائر اولاد صحابه، قپو اوکنده و بی  
 میهن بعضری و کوله لر طام اوزرنده ایدیلر .

حضرت عثمان ، صائم اولدینی حالد اوطه سینده مصحف شریف  
 اوقویوب یاننده زوجہ سی نائلدن بشقه کیمسه یوق ایدی . آتیلان  
 و قلرک اصابتله حضرت ( حسن بن علی ) و ( محمد بن طلحه ) یاره لاندی .  
 یکسی ده آل قانه بویاندی .

حضرت علینک آزادلوسی ( قنبرک ) باشی یاریلدی . مروان دخی براوق  
 صابتله مجروح اولدی .

محمد بن ابی بکر، حضرت حسنک اوزرنده قان کورونجه تلاشه دوشدی .  
 « امان بنی هاشم ، بونی کورورلر ایسه عموماً اوزریمزه هجوم ایدرلر و بو  
 غلبه لکی طاغیدرلر . ایش بوزولور ، مقصد فوت اولور . کلیک ، برکسدرمه  
 بول بولالم . دهرک یانسه برایکی کیشی آلوب و خانه عثمانه متصل بر خانه نک  
 دیوارندن آشوب حضرت عثمانک اوطه سنه کیردیلر .

اولا محمد بن ابی بکر کوروب « شمدی سنی معاویه و ابن ابی سرح  
 و ابن عامر قورتاراماز » دهرک حضرت عثمانک صقاندن طوتدی .



حضرت عثمان، مصحف او قویوردی. محمد بن ابی بکرک یوزینه باقوب  
«بابك سنك بو حالکی کورسه نه قدر محزون و مکدر اولوردی، دینجه محمد،  
متأثر و محجوب اوله رق چیقوب کیتدی.

بعده مصریلردن (غافق) و (قتیر) و (سودان بن حمران) و (کنانه  
بن بشر) کبی سفها کروهی ایچرو کیردی.

سودان، قلیج حواله ایتدی. نأله، النی سپرایتمکله پارماق لری کسیلدی.  
غافق و علی روایة کنانه بن بشر، امیر المؤمنین عثمان ذی النورین رضی الله  
عنه حضرت تلرینی بوغازلادی. قانی (فسیکفیکهم الله) آیت کریمه سی اوزرینه  
طاملادی. نأله نك فریادی اوزرینه حضرت عثمانك کوله لرندن بری ایچرو  
کیروب سودانی وقتیره ده آتی اولدیردی و طیشارو فیرلادی. لکن دیکر  
بر کوله دخی آتی اوردی، اعدام ایلدی.

قپوده بکله ینلر، ایچرو کیروب حضرت عثمانی بوغازلانش کورنجه فریاد  
ایلدیلر و اوزرینه قاپانوب آغلامغه باشلادیلر.

بودهشتلی خبر، حضرت علی و طلحه و زبیر و سعد و اصل اولنجه  
سکیردوب خانه عثمانه واردیلر. آتی او حالده کورنجه (انا لله وانا الیه راجعون)  
دیوب کیر و دوندیلر و خانه لرینه کیروب قاپاندیلر.

باغیلر ایسه حضرت عثمانك خانه سنی یغما ایتدکن صکره بیت المالی  
آچوب غارت ایلدیلر و مروان و ولید و سعیدی آرادیلر. آنلر ایسه بو  
قارغاشه لقدمه صاووشوب کیزلنمشلر ایدی.

بالاده اشعار اولندیغی اوزره حضرت عثمانه امداد ایچون شامدن  
چیقان عسکر، وادی القرایه و کوفه و بصره عسکری ربذه قریه سنه کلدکده  
بو فاجعه یی ایشیتدکلری کبی کیر و کیتمشلردر.

حضرت عثمانك سنی سکسانی و علی روایة طقسانی متجاوز اولدینی  
حالد اشبو اتوز بش سنه هجریه سی ذی الحجه سنك اون سکزنجی جمعه  
کونی منوال مشروح اوزره شهادتی وقوع بولمشدر.  
اوکونك کیجه سی رؤیاسنده رسول اکرم صلی الله علیه وسلم حضرت تلرینی

کورمش. حضرت پیغمبر، آکا (یارین آقشام بزم یانمژده افطار ایده جکسین) دیو بیورمش.

فی الواقع فرداسی جمعه کونی بروجه بالا شربت شهادتی نوش ایدرک نزد رسوله افطار ایتک اوزره عازم دارالنعم اولمشلردر.

ابتدا مؤذنلره ماهیه تخصیص و مسجدده مقصوره اتخاذایدن حضرت عثماندر. حضرت عمره واقع اولان غدر و خیانتدن محفوظ قالمق ایچون آنی یامیشیدی. حال بوکه: برآی خانه سنده محصور اولدینی حالدده اوقات خمسده مسجد شریفه چیقوب اهل قیامه امامت ایلدی. محفوظ قالدی، صکره کندی خانه سنده قتل اولندی.

اولاجفه چاره یوق. حکم قدر یرینی بولاجق، اوده بویوزدن رتبه شهادته نائل اولاجق ایمش اولدی. (وکان امرالله مقعولا).

رسول اکرم صلی الله علیه وسلم حضرتلری، اوילה بر بیوک فتنه وقوع بولاجقی اخبار وآنده حضرت عثمانک شهید اولاجقی رمز و اشعار بیورمشیدی.

ایشته عمر الفاروق رضی الله عنه حضرتلرینک جزء خامسده بیان اولندینی اوزره دکزکی تموج ایده جک دیو قورقدینی و صاحب سر نبی اولان حذیفه رضی الله عنه حضرتلرندن صورددینی فتنه عظمایا، بودر. حضرت حذیفه نك روایتته کوره حضرت عثمانک قانی مصحف اوزرینه دو کولمکله فتنه قایسی آچیلمش دکل، بلکه فیما بعد قاپانماجق صورتده قیریلشدر. آندن صکره ملت اسلامیه ده فتنه لر اکسیک اولمادی. اوقان، دینمدی، مصحف عثمان اوزرینه دو کولن قان لککسی سیلینمدی.

جناب حق، امت محمدی مصون بیورسون. فتنه، هر شیشدن فنادر. فتنه، برسیل بلادر. برکرم یول اولورسه اوزرینه کلنلری کوتور. لکن آکا یول ویرنلری دخی براقیوب نهایت برده رین باتاغه باطیریر. فتنه، براویومش ییلاندر، او یاندرمغه کلز. او یانورسه نه قارشو طورانلر قورتولور، نه ده آنی او یاندرانلر سلامت بولور. (سنت الله فی العالمین) رسول اکرم صلی الله

علیه وسلم حضرتلرندن مرویدر ( الفتنۃ نائمة لعن الله من ایقظها ) بیورمش که فتنه او یقوده در آنی او یاندیرانلره الله تعالی لعنت ایلسون دیمک اولور .

## حضرت عثمانک نسی و اولاد و ازواجی

عثمان ذی النورین رضی الله عنه ، عقیان بن ابی العاص بن امیه بن عبدشمس بن عبد منافک اوغلیدر . والدهسی ، کریز بن ربیعہ بن حبیب بن عبدشمس بن عبد منافک قیزی ( اروی ) نام خاتون اولوب آنک والدهسی دخی جد اعلای نبی اولان عبدالمطلبک قیزی ( امّ حکیم ) در .

حضرت عثمان ، مکّه مکرمهده رسول اکرم صلی الله علیه وسلم حضرتلرینسک کریمهسی ( رقیه ) رضی الله عنها حضرتلری ایله تزوج ایدرک آندن ( عبدالله ) نام اوغلی اولوب حبشه هجرتلرنده برابر ایدی . آلتی یاشنده ایکن وفات ایلشدر .

حضرت ( رقیه ) فوت اولدقده حضرت عثمان ، رسول اکرمک دیکر کریمهسی ( امّ کلثوم ) رضی الله عنه حضرتلرینی تزوج ایتمشیدی . امّ کلثوم حضرتلری ، اولادی اولمادیفی حالده وقت سعادتده وفات ایدی .

آنک اوزرینه حضرت عثمان ( غزو ان ) ک قیزی ( فاخته ) بی تزوج ایدوب آندن ( عبدالله اصغر ) نام اوغلی طوغدی .

بعده جنذب قیزی ( امّ عمرو ) ی تزوج ایدوب آندن دخی ( عمرو ) و ( خالد ) و ( ابان ) و ( عمر ) نام اوغوللری و ( مریم کبری ) نام قیزی تولد ایلدی و خالد ، کندوسنک خلافتنده فوت اولدی . فقط نسل و ذریقی قالدی .

کذلک حضرت عثمان ، ولید بن مغیرهک قیزی ( فاطمه ) بی تزوج ایدوب آندن دخی ( ولید ) و ( سعید ) نام اوغوللری و ( امّ سعید ) نام قیزی طوغدی .

و (عَيْنَةُ بن حصن الفزاری) نك قیزی (ام البنین) ی تزوج ایدوب  
 آندن (عبدالملك) نام اوغلی متولد و کوچوك ايكن فوت اولدی.  
 وشيبة بن ربیعہ نك قیزی (رمله) نام زوجه سندن (عایشه) و (ام ابان)  
 (ام عمرو) نام قیزلری و (نائله) نام خاتونندن (مریم صغری) نام قیزی  
 و بر جاریه دن (ام البنین) نام قیزی تولد ایلدی. حضرت عثمان، شهید اولدقه  
 زیر نکاحنده بر حیات بولنان زوجه لری (فاخته) و (ام البنین) و (رمله)  
 و (نائله) اولوب آنجق محصور ايکن ام البنینی تطليق ایتمشدر.

### بعض اوصاف و فضائل عثمان

حضرت عثمان ذی النورین، اورته بویلو، ایری یاغری نیلی کوزل یوزلی،  
 بیوک صقاللی و اسمراللون ایدی.  
 عالم و فاضل، عابد و صالح، سخنی و کریم، حلیم و سلیم پک نازک  
 و محبوب و قریش عندنده غایت ممدوح و محبوب القلوب ایدی.  
 حضرت صدیقك دعوتی اوزرینه اول ایمان ایدنلرك برنجیسیدر.  
 ابتدا دیار حبشه و بعده مدینه منوره یه هجرت ایلشدر و تأیید دین اسلام  
 ایچون مالاً دخی چوق خدمت ایلشدر. رسول اکرم صلی الله علیه وسلم  
 حضرتلری (عثمان، جنتده بنم رفیقمدر) دیو بیورمشدر.  
 مدت خلافتی، اون ایکی سنه دن اون ایکی کون نافصدر. آخر عمرنده  
 بروجه بالا برقتنه عظما ظهور ایتمکله باغیر النده شهید اولمشدر. رضی الله  
 عنه وارضاه.

### حضرت عثمانك کیفیت دفنی

حضرت عثمانك اقرباسی اولان امویارك سوء احوالندن طولایي ناسك  
 اکثری آنك علیهنده بولنمش ايکن مظلوماً قتل اولنمشي جمله یی آغلادی،  
 دلخون ایتدی.

اصحاب کرامدن ( ابو حمید الساعدی ) رضی الله عنه حضرت عثمانہ مخلص اولمایوب آندن یان چیز و اوزاق طولاشور ایکن بروجه بالا شهادتندہ « بز آنک قتلنی ایستمدک . یارب ! سنکله عهدم اولسون . آخر عمریمه دک کولیمیم » دیمشدر .

الحاصل چوق کیمسهر ، عصیان واختلالک بورادهیه و اراجغنی اومازلردی . حضرت عثمان ، اعدام اولنجه جمله سنه حیرت الویردی و افکار عامهیه عظیم تغیر کلدی . بونکله برابر علیهنده سوز سویلنلرده وار ایدی . باغیر ایسه هنوز ایتدکلرینه اظهار ندامت ایلورلردی و حکومت آنلرک النده اولوب کبار صحابه برر کوشهیه چکلمشلر ایدی .

فقط حضرت علینک بین الناس اعتباری زیاده اولدیغندن بر مرتبهیه قدر آنک سوزی اصغا اولونویوردی . بناءً علیه حضرت عثمانک نعشی دفن اولنه مایوب اوچ کون میدانده قالدقندن صکره ( حکیم بن حزام القرشی ) و ( جبیر بن مطعم ) آنک دفنی ایچون حضرت علیدن اذن ایسته مشلر اودخی اذن و یرمش و جنازه سنی طاشلامق اوزره یول اوزرنده بر طاقم خلق طوپلانمغله حضرت علی ، آدملر کونده روب آنلری دفع ایتدیرمش و آقشامدن صکره جنازه کونده ریلوب مدینه مزارستانی اولان ( بقیع ) جوارنده دیوار ایله محاط بر محله دفن ایدیلشدر .

مؤخرآ معاویه بن ابی سفیان ، ایام حکومتده دیواری هدم ایله اومحلی بقیعه الحاق ایتمش و سائر ناس دخی موتالرینی دفن ایدرک اوراسی بقیعه متصل اولمشدر .

حضرت عثمانک جنازه سنده جماعت قلیله بولنوب ایچلرنده زیر بن العوام و حسن بن علی و ابوجهم بن حذیفه و مروان و ارامش . و علی روایت حضرت علی ، طلحه و دیگر بعض اصحاب کرام دخی برابر ایتمش . رضی الله عنهم .

## فذلکە

خارجیلردن بعضیلری ، بووقه فاجعهده حضرت علی بی اتهام وسوء ظن وافتزایه قیام ایتمیشلر ایدی .

حال بوکه : بالاده بیان اولندینی اوزره حضرت علی ، دفع فتنه حقنده صرف مساعی ایتمشیدی .

حتی ایالاتدن کلن اهل قیاسی اقناع وحضرت عثمانی ارضا ایله تألیف ذات الین ایدرک عصیان جمعیتلرینی طاغتمشیدی .

صکریه برساعی یاننده برمکتوب بولندی ، میدانه قوندی . محضر صحابهده علناً او قوندی . حضرت علینک مساعیسی نمره سز قالدی .

بعده مروانک لاجل المحاکمه میدانه چیقاریلاسینه لزوم کورولدی . حضرت عثمان ایسه آکا مساعده ایتمدیکی جهته عصیان وطغیان مشتداولدی . بونکله برابر حضرت علی ، نور دیده پیغمبر اولان اوغوللرینی دارالخلافه قیوسنده باغیلرک اوقلرینه هدف ایتمک درجه سنده فدا کارلق کوستردی .

حضرت علی ، بوباده اصلاً تقصیر اینمیدی . لکن بی امیه کبارینک سوء معاملاتی هم آکا یأس وقتور کتوردی همده حضرت عثمانی خلقک لسانه دوشوردی .

حضرت عثمانک احوالنه کلنجه آکا طمن وقدرح ایتمک دخی خلاف قاعده انصاف وطریق حقندن انحرافدر .

حال حیاتنده جنت ایله مبشر اولان برذات جلیل القدر حقنده خیرایله یاد ایلمکدن غیری نه دنيله بیلور .

فقط مزاجی پک ملائم ایدی . حکومت ایسه شدت وملایمت ایله مزوج برقوت اولوب یرینه کوره شدت ویرینه کوره ملایمت کوستریتمک لازم کلیر .



بوشدت وملايمت ترازونك ايكي كوزي كيدير . بري خفيف اولو ايسه ديكرى آخر باصار ، ترازو اوطرفه آغار ، دنك اولماز . ميزان ما بويله در . قانون الهى بوزولماز . آنك خارچنده ايش كورولمز .

قالدى كه : حضرت عثمان زماننده اهل اسلام زياده زنكين اولدى بين الناس اغراض دنويه چوغالدى . عبادت قيلندن معدود اولان مأموريتلر مدار تعيش اتخاذا اولنمغه باشلادى . بناءً على ذلك بوزمان اولكيدن زياد موازنه يي كوزه تمك وقبائل وبطون وصنوف آره سنده مساوات اوزر معامله ايتمك لازم كلوردى . حضرت عثمان ايسه اقرباسنى زياده سورده وانلرى سائره ترجيح ايدردى اكرچه اقرباسنه دائماً عدالت وحسب حركت ايللرينى توصيه ايلردى . لکن يك حليم وسليم اولدينى جهتله آنلرا حركات خود سرانه لرينه مانع اولامازدى .

مع مافيه مبدأ خلافتندن آلتى سنه مرورينه دنك ممكن مرتبه حضرت عمر ك مسلكى اوزره كيتدى . ناس دنخى آندن يك زياده خشنود ومتشكه ايدى .

صكره بيوك منصبرى هب يكي يتيشمه اقرباسنه ويرير اولدى وزياذ اختيار اوله رق ايش ، بتون بتون حريص جاه ورياست اولان بنى اميه كبارينك وعلى الخصوص كاتبي وعم زاده سى اولان مروانك النده قالدى ايشته خلق بورالرينى چكه مدى . حضرت عثمان دنخى اقرباسندن چكه مدى بوجهتله عربده چيقدى . كورولتى چوغالدى . فتنه اوياندى . او كي آله ميوه يك فنا بريول آلدى .

بونلر هب حضرت عثمانك فرط ملايمت ونزاسكتندن نشئت ايلمش شيلردر . بوبابده شايان بحث ومطالعه مروانك استنطاق ومحاكمه آله التماسيدير .

چونكه : ميدانه مروانك خط دستيله برمكتوب جنائيت اسلوب چيقور حضرت عثمانك مهريله مختوم ايسه ده كندوسنك آكا علم وامرى لاح

ولمادیغنی یمین ایله تأمین ایلش اولدیغندن آرتق مروانک استنطاقی لازمه  
عالدن ایدی وبوصورتله فتنه برطرف اوله بیلوردی .

شوقدر وارکه : استنطاق ومحاکمه حکومت عائد بروطفه مهمه در .  
حکومت ایسه اوزمان محصور ایدی . مروانی جمهوره تسلیم ایتک بلاعماکه  
بلاد الله آدم ویرمک کبی اولوب بوکا ایسه حضرت عثمانک علو جنابی  
نع ایدی .

حتی حضرت طلحه « عثمان ، اکر مروانی ویرمش اولایدی قتل  
لمازدی » دیدکه حضرت علی « اکر مروان سزه تسلیم اولایدی حکم  
رعی لاحق اولمقسزین قتل اولتوردی » دیو بیورمش وبوجهته حضرت  
نانه حق ویرمش در .

حضرت عثمانک رأی وملاحظه سی یا ککش اولسه بیله اجتهاده خطا  
لمندن اوله رق آندن طولایی عندالله مسئول اولماز ، رضی الله عنه  
رضاه .

تفصیلات سابقه مزدن شو نتیجه چیقارکه : بو بابده حضرت عثمان  
التورین مظلوم وحضرت علی المرتضی معذوردر .

کبار تابعیندن وافاخم ائمه حدیثدن ( امام زهری ) رحمه الله علیه بو  
میهنی ( سعید بن المسیب ) رحمه الله علیه حضرتلرینه صورمش . شویله که :  
بکا خبر ویره بیلورمیسین ، عثمانک قتلی فصل اولدی ؟ ناسک حالی نه در ،  
نک حالی نه در واصحاب محمدصلی الله علیه وسلم آنی نیچون یالکز وامدادسز  
اقدیلر ؟ « دیمش .

سعید بن المسیب آکا جواباً « عثمان ، مظلوم اوله رق قتل اولندی  
آنق قتل ایدنلر ظالم ویالکز براقانلر معذور ایدی » دینجه زهری « بو  
مل اوله بیلور » دیمکه سعید بن المسیب دخی « اصحاب کرامک بمضیلری  
انک امانتدن خوشنود دکل ایدی . زیرا عثمان ، کندی قومنی چوق  
ره ردی . اون ایکی سنه قدر مدت خلافتنده اکثریاصحابی اولمایان بنی امیه بی  
لی وامیر نصب ایتدی وامراسندن صحابه نک مکروه کوردکلری حرکتلر

واقع اولدجه عثمان ، اكرچه آنلره عتاب ايدردى . لکن عزل ايتزدى .  
خلافتندن آلتى سنه مرور ايتدکدن صكره بوتون مناصبي عثمزاده لرينه  
حصر ايتدى ، ديدکدن صكره قصه يي بالاده بيان ايتديکمز وجهله حكايه  
ايتشد .

حضرت عثمان و على ايکيسي ده داماد رسولدر . ايکيسي ده عشره  
مبشره دندر . اويله بويوك ذاتلر حقنده کوچوك براعتراض ، بويوك خطادر .  
آنلر ، بربرينه کوچميش اولسه لر بيله آخرتده باريشورلر ، قرداش  
اولورلر . اعتراض ايدنلر ، ايکيسندن دخی محبوب قالورلر .

برکون حضرت على ، خطبه اوقورکن « ای ناس ! سز بنم حقمنده  
وعثمانك حقمنده چوق سوزلر سويليورسکمز . آنکله بنم مثالم ايسه الله تعالى  
حضرتلرينك ( و نزعنا ما فی صدورهم من غل ) قول شريفی کبی در ، ديو  
بويورمشدر . بو آيت کریمه نك معناسی ( بز ، اهل جنتك قبلرنده کی غل  
وغشی اخراج ايتسه ک کرکدر ) ديمک اولورکه اهل جنت ، جنته داخل  
اولدقلرنده قبلرنده يکديکزه بغض وعداوت اسبابی قالماز ديمکدر .  
الحمد لله على حسن الاختتام والصلوة والسلام على خير الانام  
وعلى آله واصحابه الکرام



اثر خامه احمد جودت

# قصص انديانا

## و تواریخ خلفا

جزء سیابع

صاحب و ناشری : قناعت کتبخانه سی صاحبی الیاس

کافه حقوق محفوظدر

قناعت کتبخانه سنک مهرخی حاوی اولیان نسخه لر ساخته اولوب طابع وبایی مسئولدر

قناعت کتبخانه

در سعادت — قناعت مطبعه سی

۱۳۳۱



## خلافت علی المرتضی

آلتنجی جزءده بیان اولندی بی اوزره (مصریون) و (کوفیون) و (بصریون) دیو اوچ فرقهیه منقسم اولان زوربالر، امیرالمؤمنین عثمان ذی النورین رضی الله عنه حضرتلرینی شهید ایلدکده مصریونک رئیس اولان (غافق) جمله سنه امیر اولدی، حکومتی الله آلدی. مدینه منوره چند روز قراکلق ایچنده قالدی. بو حال اختلاک نهیه منجر اوله جنی مجهول اولدیغندن اهل مدینه یی تلاش واندیشهیه دوشوردی، هر کس نه یایه جغنی شاشردی.

اوتوز سنه سی وقایعنده تحریر اولندی بی اوزره ابوذر الغفاری رضی عنه الباری حضرتلری شامدن مدینهیه واروبده اهل مدینه نک ذوق و صفایه قویولدقلرینی کورنجه «اهل مدینهیه قتل و غارت ایله مژده» دهرک سویلدیکی سوزلرک معناسی ظاهر اولدی.

زوربالر حضرت عثمان علیهنده متفق ایسه لرده خلیفه اتخابنده متخالف ایدیلر. مصر لیلر حضرت علی یی و بصره لیلر حضرت طلحه یی و کوفه لیلر حضرت زبیری ایستلر دی.

حال بوکه مصر یلرک مراجعتنده حضرت علی آنلردن اوزاق طور دی. و بصره لیلر طلحه یه و کوفه لیلر زبیره مراجعت ایلدکلرنده ایکسی دخی یان چیز دیلر.

بعده زوربالر سعد بن ابی وقاص ایله عبدالله بن عمر رضی الله عنهما یه مراجعت ایلدیلر ایسه ده آنلر اصلا قبول طرفه یاناشمدیلر. (بنی امیه) کباری ایسه فرار ایتشلر ایدی.

الحاصل مقام خلافت خالی قالوب اکابر امتدن بریسی قبول ایتدیکندن.



زوربار حيرته قالديلر . بو حالد مملكتلرينه عودت ايلسه لر عظيم فساد وفتنه يي موجب اوله جنی ملاحظه سيله مضطرب اولديلر وهان اهل مدینه يي جمع ايله « سز اهل شوراسكز، سزك امت اوزرينه حكمكزجاری ونافذره . سزه ايكي كون مهلت . اكر بو مدت ظرفنده بو ايشی بجره من ايسه كز علي وطلحه وزيري وفلان وفلانی قتل ايدرز » ديديلر . اهل مدینه قورقوب فوق العاده تلاشه دوشديلر وخلافتی حضرت علي يه قبول ايتديرمك اوزره آنك باشنه اوشديلر .

حضرت علي « بو سزك ايشكز دكلدر ، اهل بدرك ايشيدر . اهل بدر كيكي انتخاب ايدرسه خليفه اودر » دیدی .

انتخابچيلر اصحاب بدر اولنجه عشره مبشره دن برینی انتخاب ايدمچكلى دركار ایدی . واوزمان عشره مبشره دن حياتده علي وطلحه وزير وسعد بن ابی وقاص وسعيد بن زيد وار ایدی .

سعيد ايسه ذاتاً عزلت وازوايه راغب ودغدغه امارتدن مجتنب ایدی . سعد دخی حضرت عثمانك شهادتدن صكره اوقنی آتمش ، يانی آصمش وكوشه عزلت وازوايه يا صلا نمش اولوب حتی آندن صكره بر وقعه ده يولنماشدر .

شو حاله نظراً خلافته علي وطلحه وزيردن برينك انتخابی ايجاب حال ومصلحتدن وحضرت علينك رجحانی واضحاتدن اولدينی حالد مدینه ده موجود اولان اهل بدر طويلانوب خلافته حضرت علي يي احق كورديلر وآنك ياننه وارديلر « امان الكي وير بيعت ايلهلم » ديو يالوارديلر .

حضرت علي « بني براغكز، بشقه سنی آرايكز . او كمزه برايش چيقه جق كه آنك عقلر آماز، كوكلر متحمل اولماز شكل ورنكلری واردر . بنجه امير اولمقدن ايسه وزير اولمق اولادر . سز هر كيكي انتخاب ايدرسه كز بنده آكا بيعت وجهلدن زياده اطاعت ايلرم » دیدی .

چله سی « يا علی! الله ايچون انصاف ايت ، اهل اسلامك باشنه كلن فلاكتی

کور میور میسین « دیه رک ابرام ایتکه حضرت علی قبوله مجبور اولوب آنجق فردایه تعلیق ایتدی .

ناس بو وعد اوزرینه حضرت علینک یانندن چیقیدیلر . فقط طلحه وزیر میدانده اولیوب حال بوکه « آنلرده برابر بولنور ایسه بیعت قوی و مستقیم اولور » دیه رک آنلرکده جلبلرینه قرار ویردیلر .  
فرداسی یعنی ذی الحجه نک یکر می بشنچی جمعه کونی مسجد شریفده .  
طوپلان دیلر و بصره لیلر طرفندن ( حکیم بن جبّه ) بر مقدار عسکرله حضرت زیره و کوفه لیلر طرفندن ( اشتر ) دخی بر مقدار عسکرله حضرت طلحه یه کیدوب ایکسینی ده کتور دیلر و حضرت علی یه بیعت ایتدیر دیلر .

شویله که : علی المرتضی کرم الله وجهه حضرتلری مسجد شریفه کیدوب منبره چیقیدی و حضاره خطاباً « بوایش سز کدر ، کیمسه نک آنده حق یوقدر . سز کیمی ایستر ایسه کز خلیفه اودر . دون بر قرار اوزره آیرلمش ایدک که من ایستمیه رک سوز و یروب سز ایسه همه حال بنی انتخابده اصرار ایتمش یدیکز » دیدکده جمله سی « بز دونکی قرار اوزره یز » دیملریله حضرت علی رضی الله عنه « شاهد اول یارب » دیدی .

ابتدا طلحه و وزیر رضی الله عنهما کتورلدی . حضرت علی آنلره « ایسترایسه کز من سزه بیعت ایلیه یم » دیدکده « یوق بلکه بز سکا بیعت ایلرز » دیه رک بیعت ایلدیلر .  
اک ابتدا بیعت ایلین طلحه حضرتلرینک الی چولاق اولغله بعض ناس آندن تشاوم ایتشیدی .

زیرده بیان اولنه جنی وجهله درت آی صکره طلحه وزیر « بزجان قورقوسیه مجبوراً بیعت ایلشیدک » دیدکلری مرویدر . حال بوکه بروجّه بالا مسجد شریفه کتورلملری مجرد جماعتدن آیرلما لری مقصدینه منی اوله رق صورت جبریّه ده وقوع بولمش ایسه ده امر بیعتده کندولرینه معامله جبریّه اجرا اولنماشدر . حین بیعتده رأی و ملاحظه لرینی سربستجه بیان ایده . بیلورلردی . حتی آنلر بیعت ایلدکدن صکره سعد بن ابی وقاص رضی الله عنه مسجد شریفه کتوریلوب حضرت علی آکا « بیعت ایت » دیدکده « ناس بیعت

ایلسون بن ده بیعت ایلم ، بنم تأخر مده والله بر بآس یوقدر « دیمکله حضرت علی « آنی براغکز » دیو بیوردی .

آندن صکره عبدالله بن عمر رضی الله عنهما کتوریلوب اودخی بووجهله بیعتده تأخرایتدی و حضرت علی « بکا کفیل ویر » دیدکده « کفیل یوقدر » دیمکله اشتر « بنی براغکز شونک بوینی اورهیم » دیدی . حضرت علی « آنی براغکز بن آکا کفیل » دیو بیوردی .

بعده انصار بیعت ایلدی . فقط حضرت عثمان زماننده مهم مأموریتلرده بولنش اولان محمد بن مسلمه و زید بن ثابت و کعب بن مالک و شاعر مشهور حسان بن ثابت و ابو سعید الخدری ایله صغار صحابه دن نعمان بن بشیر و دیگر بر قاچ ذات بیعتده تأخر ایلدیلر .

کذک عبدالله بن سلام و صهیب بن سنان و اسامة بن زید و قدامة بن مظعون و مغیره بن شعبه دخی بیعتده تأخر ایتدیلر .

و نعمان بن بشیر حضرت عثمانک قانلی کوملکنی و زوجہ سی نائله نک کسلمش پارمقلرینی آلوب شامه فرار ایله آنلری شام و ایسی بولنوب تحصیل امارت سوداسنه دوشمش اولان معاویه بن ابی سفیانہ تقدیم ایتش و او دخی مؤخرآ بولنری زیرده بیان اولنه جنی و جهله دمشق شام جامعک منبرینه تعلیق ایله شامیلیری حضرت علی علیه تحریک ایلشدر .

بروجه بالا حضرت علی یه بیعت اولنغله مصریلرک آرزولری حصوله کله رک کوفه لیلر و بصره لیلر آنلره تابع قالمغله کوجنمشلر وزیر و طلحه حضرتلرینه خلافتی قبول ایتدکلری ایچون حدتلمشدر ایدی .

بیعتدن صکره حضرت علی ، نائله نک یانسه واردی و « عثمانی کیم قتل ایتدی » دیو صورتی . اودخی « طانمیدیم ایکی کشی کیردی ، محمد بن ابی بکر دخی برابر ایدی » دیو جواب ویردی .

حضرت علی همان محمد بن ابی بکری جلب ایلدی و آکا نائله نک دیدیکنی سویلدی . اودخی « نائله نک سوزی یالان دکل . والله بن عثمانی قتل ایتک اوزره کیردم . لکن بکا پدریمک نامنی یاد ایلدی ، بن ده تائب و مستغفر اوله رق

چيقدم. والله آني قتل ايتدم وآني طوتمدم « ديد كده نائله » اوت ، اويله اما او آدملى ايجرويه بو ، قودى « ديدى .

بعده حضرت على سعادتيخانه سنه كيتد كده طلحه وزير وديكر بعض اصحاب كرام كلديلر « يا على بيعتده حدود الله بك اجراسنى شرط ايلدك . بو قوم ايسه عثمانك قتلنده متشار كدرلر . آنلر حقنده حكم شرعى اجرا ايتليسين » ديديلر . حضرت على « بنده سزك رايكزده يم . لكن نياپه يم بر قومه كه آنلر بزه مال كدر ، بز آنلره مالك دكلز . سزك قوللريكز آنلره قارشدى ، سزكه مخلوطدرلر . سزه ديلدكلرينى تكليف ايدرلر ، شمديكى حالده سزك ديديككى اجرايه قدرت يوقدر ، شمدي ناسك افكارى مختلفدر . بر فرقه سى سزك رايكزده و بر فرقه سى مخالف رايده در . ديكر بر فرقه سى نه آنده در ، نه بونده در . لكن بوايش جاهليت ايشيدر ، چوق سورمز بر طرف اولور . صبر ايديكز ، اورته لق ياتشسون وناس راحتته وارسونده بزده احقاق حقه قيام ايدلم » ديدى . آنلرده بو قرار اوزره قالقوب كيتديلر . واقعا امارت وامامتن مقصد اصلى ، احقاق حقوق عباد و حفظ آسائش بلاد مصلحتى ايسه ده زور بارك جمعيتى هنوز طاغلاماش اولدينى جهتله حضرت عثمانك قاتلرينى تفريق ايله امر قصاصك اجراسى قابل اولمديغندن وقت فرصته انتظار ايله تاخيرينه مجبوريت وار ايدى .

لكن بويله اك مهم بر امرك تاخير اجراسى قريشه پك كوچ كلدى وامويلرك طاعيلوب قاجلرى خلقه شاشقينلق ويردى . شرانك حضرت عثمان حقنده سويلدكلرى مرثيله ايسه افكار عاميه هيجان ويرمكده ايدى . بوجهتله بين الناس افكارجه اختلافلر پيدا اولدى . كفتكو چو غالدى . كيمى حضرت عليك راي وروشنى استحسان ايدر و كيمى آنك كفايتندن بحث ايلر و كيمى « بز همان وظيفه مزى اجرا ايتمه لى يز » دير ايدى .

بيعتدن اوچ كون صكره حضرت على منبره چيقوب ناسه نصيحت ايدرك جلب واستمالت يولنده سوزلر سويلدى وعربانك آرتق مدينه دن چيقوب كندى يوردلرينه كيتلرينى امر ايلدى .

(سَبَّأِيَّة) گروهی یعنی (عبدالله بن سبا) به منسوب اولان شیعه طائفه می  
سویزندیلر، میرلاندیلر وامره اطاعت ایلدیلر. عربان دخی آنلرک سوزلرینه  
آلداندیلر وامیرالمؤمنینک امرینی دکلهمدیلر .

آنک اوزرینه حضرت علی سعادتخانه سنه کیتدی . طلحه وزیر دخی  
کلوب مشاوره ایتدیلر. حضرت طلحه «بکا رخصت ویر. بصره به کیده یم،  
برچوق عسکر طویلایوب کلورم» دیدی. حضرت زبیر «بن ده کوفه به کیده یم،  
کلی عسکر کتوریرم» دیدی. حضرت علی «هله براز صبر ایدیکز باقم»  
دیه رک امهال وتأخیر ایتدی وظهوراته منتظر اولوب قالدی .

الحاصل حضرت عثمانک قاتلترینی قصاص ایتک شرعاً لازم اولوب احکام  
شرعیه نک اجرایی ایسه امیرالمؤمنینه عائد اولغله خلق بو حکم شرعینک  
اجراسنی حضرت علیدن بکلمکده ایدی . قاتلر ایسه باغیلر ایچنده بولغله  
امرقصاصک اجرایی قابل دکل ایدی . حضرت علی باغیلرک طاغلملرینی  
امر ایتدیسده اطاعت ایلیوب هیئت مجموعه لریله واطوار سرکشانه ایله  
مدینه ده طولاشمقده ایدیلر .

عبدالله بن عباس رضی الله عنها که حضرت عثمان محصور ایکن امیرالحج  
اوله رق ام المؤمنین عایشه رضی الله عنها ایله برلکده مکّه مکرمه به کیتمشیدی.  
بعدالحج مدینه منوره به عودت ایله دارالخلافه به کلدکده کورمش که دهات  
عربدن مشهور مغیره بن شعبه حضرت علی ایله کیزلو مصاحبت ایدیور .  
مغیره قالقوب کیتدکده دیمش که «بو آدم نه دیور» حضرت علی بیورمش که «دون  
کلدی، معاویه بی وابن عامری وسائر امرای عثمانیه بی مأموریتلرنده ابقایت.  
بیعت ایلسونلر، ناسده ساکن اولسون . صکره دیلدیککی عزل ایدرسین .  
دیدی . بن قبول ایتدم. بوکون کلدی، لاقردی بی ده کیشدیردی وبکا حق  
ویردی»

عبدالله بن عباس دیمش که «دون مغیره» سکاخیر خواهانه نصیحت ایلش وبوکون  
دسیسه کارانه سوزلر سویلش . چونکه معاویه ودیکر امرای امویه، اهل



يادر. ابقا ايدرسهك ايليشيك ايتزلر واکر عزل ايدرسهك سنی اتهام ايله  
م وعراق اهايلسنى سنك عليكه قيام ايتديرلر .

مع هذا بن طلحه وزبيردن دخى امين دكلم . معاويه يي ابقا ايت ، سكا  
مت ايلسون. صكره آنى یرندن قوپارمى بن تعهد ايلرم ،

ابن عباسك بو اخطاراتى خالصانه وخيرخواهانه ايدى . حضرت على  
به اويله دسيسهكارلق يولنده ايش كورمكى كندوسنك علو جنبانه منافى  
رمكله اول اخطاراتى رد ايلش. ابن عباس دخى « يا اميرالمؤمنين ! شجاع  
مسين ، لكن اهل رأى وتدير دكلسين » ديمش .

بونك اوزرينه حضرت على « سن رأيكى سنويه ، صكره بنم امرىمى ديكله .  
سنى شام واليسى ايتدم . قالق ، شامه كيت » ديدكده عبدالله بن عباس « بو بر  
ى دكلدر . معاويه ، بنى اميه دندر وعثمانك عمزاده سيدر . سكا قرابتم حسييله  
نمده ايده چكى معامله نك اهو نى بنى حبس ايتمكدر . هله بركره معاويه يه  
، بيعته دعوت ايله » ديمش ايسه ده حضرت على بونى ده قبول ايتما مشدر .  
مغيره بن شعبه ايسه « بن على يه نصيحت ايلدم ، دكله مدى . بن ده صكره  
ريل لسان ايلدم ، غل وغشلى سوزلر سويلدم » ديه رك صاووشوب مكه يه  
مشدر .

حضرت على ، بحق خليفه رسول الله اولوب تام زهد وتقوى يولنده  
ردى . وماء صافى كى صاف وخالص اولان امر خطير خلافتى خدعه  
داهنه ايله بولاندرمقدن بغايت احتراز ايدردى .

زمانى حضرت عمرك زمانه قياس ايلردى . بو زمان ايسه اوزمان  
ل ايدى . اوزمان ملت اسلاميه ده تفرقه اوليوب اميرالمؤمنينك اوامرينه  
مسسه طرفندن مخالفت كوسترلمزدى . آردن خيلى مدت كچدى . خلق  
كين اولدى ، حب دنياه طالدى . اغراض شخصيه چوغالدى . فرقه لر  
بور ايتدى . امويلر زياده قوت بولدى . صكره ده اختلال ظهوريله مركز  
لافت زوربالر الندّه قالدى .

شواحواله نظراً عبداً بن عباسك اخطاراتى ايجاب حال وزمانه اوفق



ایدی . لکن حضرت علی به کوره زمانه به او بمق ایچون تبدیل مسلك ایتک  
مشکل ایدی . ( وکان امرالله مفعولا )

### وفات سلمان الفارسی

سلمان فارسی رضی الله عنه حضرت تبری خواص اصحاب کرامدن و اخیار  
وزهاد و فضلادن بر ذات جلیل القدر ایدی .  
انس و ابن عباس کبی اجله اصحاب کرامدن نیچه بیوک ذاتلر آندر  
حدیث روایت ایلشلردر .

رسول اکرم صلی الله علیه وسلم بیورمش که « جنت اوچ کشی به ، یعن  
علی و عمار و سلمان مشتا قدر »  
کیجه لری بیلر رسول اکرم صلی الله علیه وسلم حضرت لریله تنهجه پک  
چوق مصاحبت ایلردی .

آنک حال و درجه سی حضرت علیدن سؤال اولندقدن « علوم او لینی و علو  
آخرینی تحصیل ایتش تمز ، توکنمز بر بحر در و بزدن ، یعنی اهل بیت نبوتند  
دیو بیورمش . فی الاصل ایران اهالیسندن و مجوسی طائفه سندن ایکن دیز  
عیسوی به داخل اوله رق بیوک راهلردن تحصیل علوم دینه ایتدکن صکر  
مدینه منوره به کلوب نه وجهله مسلمان اولدینی بشنجی سنه هجریه وقایع  
صره سنده بیان اولمشیدی . خندق غزا سنده و آندن صکره کی غزوان  
نبویه ده رسول الله صلی الله علیه وسلم ایله برلکده بولمشدر . و خندق  
غزا سنده مدینه منوره نک اطرافنه خندق قازلسنی رسول اکرمه او اخطار  
ایلشیدی .

بشنجی جزءده بیان اولدینی اوزره حضرت عمر آنی اصحاب بدر  
الحاق ایدرک کندیسنه سنوی بشیک درهم عطیه تخصیص ایتمشیدی  
عطیه سی چیققدقه جمله سنی تصدق ایدوب کندی کسب یدیه تعیش  
ایدردی .

اشبو اوتوز بش سنه سی اواخرنده وعلی روایه اوتوز آلتی سنه سی  
 ائلنده عازم دارجنت اولمشدی. ایکی یوزاللی وعلی روایه اوج یوز اللی  
 یشامش اولدینی بعض کتب سیر وتواریخده مسطوردر .

## وقایع سنه ۳۶

### وفات صدیقه

صاحب سرّ نبی اولان حذیفه بن یمان رضی الله عنهما حضرت عثمانک  
 بادندن قرق کون صکره عازم دارجنان اولدی .

خواص اصحاب کزیندن اولوب حضرت عمر وعلی رضی الله عنهما  
 ندن حدیث روایت ایتمشلردر .

دردنجی جزئک اوائلنده وبشنجی جزئک اواخرنده و آلتنجی جزءده  
 کر اولندینی اوزره رسول اکرم صلی الله علیه وسلم حضرتلری  
 ژینه سویلدیکی نیجه اسراری حذیفه حضرتلرینه بیلدیرمشیدی .

اهل اسلام آره سنده نه قدر منافق وارایسه اوییلوردی، لکن کیمسه یه  
 ویلزیدی . حتی بر جنازه ظهورنده حضرت عمر آنی کوزلردی. حذیفه  
 ورسه اودخی جنازه نمازینه حاضر اولوردی والاحاضر اولمازدی .

برکون حضرت عمر آندن « بنم مأمورلم ایچنده منافق وارمی » دیو  
 ورمش او دخی « بر آدم وار » دیو جواب ویرمش . حضرت عمر  
 او کیمدر « دیدکده « آدینی سویلم » دیمش . لکن حضرت عمر، ملهم  
 لهرق اول مأموری عزل ایتمش اولدینی حذیفه دن مرویدر .

حضرت حذیفه پک چوق محاربه لرده بولنمشدر. ایرانده امیرالجیش اولان  
 مان بن مقرر شهید اولدقده سنجانی حذیفه آلوب (همدان) و (ری)  
 (دینور) ولایتلری آنک النده فتح اولنمشدر .

حضرت عمر برکون بعض اصحابه «جناب حقدن نه تمی ایدرسکز» دیدکده  
 براوطه طولوسی التون وجواهر اولسه ده فی سبیل الله صرف ایتسه ک دیو  
 ی ایدرز، دیمشله. حضرت عمر « بنده ابو عبیده ومعاذ بن جبل وحذیفه بن

یمان کبی آدم لر اولسه ده آنلری فی سبیل الله استخدام ایتسه دیو تمنی ایدرم دیمش .

ایشته حضرت علی دخی او مللومأمر لر استخدام ایتک ایستردی . حال بوک آنلر حضرت عمر زماننده آز ایدی ، صکره کیتدجکه آزادلی و کیدنلرک یرلری بوش قالدی .

و حضرت عمرک مثال اوله رق سویله دیکی اوچ ذاتدن ایکسی اولجه فور اولوب اوچنجیسی اولان حذیفه دخی بوجه بالا بوکره عازم دارعقا اولدی ابن سیرین دیرکه : عمر نصب ایتدیکی والیرک فرمانلرنده اهاییه خطاباً « سز فلانی کوندردم واکاشویله بویله امر لر ویردم » دیو یازاردی . حذیفه نی ایرانک پای تخت قدیمی اولان مدائن امارتنه نصب ایله آکا ویردیکی فرمانده ایسه « آن دیکله یکر واکا اطاعت ایلیکیز ونه ایسترایسه ویریکز » دیو یازمشیدی مداینه واردقده وجوه بلده آنی استقبال ایتدی . فرماتی او قودقده « ایسترسه ک امرایت » دیدیلر . حذیفه « بوراده بولندیغم مدتجه کندیماچونا کمد و حارم ایچون علف ایسترم » دیدی و بر پوست نشین مرشد کامل کبی مداینه بکلک سوردی . صکره حضرت عمر آنی مدینه یه دعوت بیوردی . اوزما والیلکله کیدنلر ، کیتدکاری کبی کلیوب اکثریا اموال و حیوانات ایدینه را حال ودرجه لرینه کوره ثروت و سامان ایله عودت ایدرلردی . حذیفه نلک ورودی حضرت عمره خبر ویرلدکده چیقوب آنک کله جکی یولک بر طرفند کیزلندی . کوردی که : حذیفه ده نه آت وار ، نه دوه . کیتدیکی کبی فقیرانه کلیور آندن ممنون اولدی وهان حذیفه نک بوینه صارلدی « سن بم قرن داشمسین بنده سنک قرن داشگم » دیو بیوردی . حضرت حذیفه « رسول الله صلی اله علیه وسلم بکا ایکی شی خبر ویردی . برنی کوردم ، دیکرینه منتظرم » دیمش مرادی نه ایدی بیلمم . فقط بشنچی و آلتنجی جزملرک آخرنده بیان اولندیغم اوزره منتظر اولان فتنه عظماتک حضرت عمر دن صکره ظهور ایده جکده خبر ویرمشیدی . کندوسی حضرت عثمانک شهادتی کوردی . لکن بوفاجعه نلک نتایجندن اولان ( جَمَل ) و ( صِفِّین ) وقعه لرینی و حضرت علینک انجام حاله

ورمدي . كندوسنك نصيحت ووصيتي اوزره ايكي اوغلي حضرت عليدن  
برليوب ايكي سى ده صفينده شهيد اولمشلردر .

حذيفه حضرتلري مختصر اولدوقده « ايشته بودنيانك صوك دميدر . يارب  
لورسين كه بن سنى سورم . سكا ملاقاتى مبارك قيل » ديمش وتسلیم روح  
نشدرد . ( رضى الله عنه وارضاه )

## ولایاته والیر کونده رلدیكى

امیر المؤمنین علی رضى الله عنه حضرتلري اشبو اوتوز آلتی سنه سى  
اثلنده ایالاته امرأ نصب وارسال بیوردی .

یعنی ( قیس بن سعد بن عبادة الانصارى ) نى مصره و ( سهل بن حنیف  
انصارى ) نى شامه و مهاجریندن ( عمارة بن شهاب ) ی کوفه یه و ( عثمان بن حنیف  
انصارى ) نى بصره یه و ( عبیدالله بن عباس ) ی یمنه کوندردی . رضى الله عنهم .  
قیس بن سعد ، مصره واردقده ناسك برفرقه سى عثمانك قاتللری قتل  
لنمدقجه اطاعت ایلیمه جکلرینی افاده ایتمشلر ایسه ده سائر ناس اطاعت  
شدر .

اما ، سهل بن حنیف شامه متوجهاً بلقایه واردقده بر بلوك سوارى قارشو  
وب « سن کیمسین » دیمش . « امیرم » دیدکده « اکر سنى عثمان کوندرمش  
مه پك اعلى واکر بشقه سى کوندرمش ایسه کیرو دون » دیملریله اودخی  
نوب مدینه منوره یه واردی و کیفیتى حضرت علی یه خبر ویردی . کوفه  
الیسی ایسه امیرلری اولان ابو موسی الاشعریدن خوشنود اولوب تبدیلنه  
ضى اولدق لرندن عماره ، کوفه یه داخل اولدن اعاده اولنمغله اودخی مدینه یه  
وب وقوع حالى حضرت علی یه بیلدردی .

عثمان بن حنیف ، بصره یه واردقده ناسك برفرقه سى اطاعت و برفرقه سى  
قلم اهل مدینه نه یاپارسه بزده آنلره او یارزه دهرک توقف ایتمش . سابق  
مره امیری عبدالله بن عامر دخی بصره دن چیقوب مککه کیتمش ایدی .

اما عبيدالله بن عباس، يمينه وارد قدده اهالی اكا اطاعت ايلوب سبا  
يمن اميرى يعلى بن ميه دخى موجود اولان اموال اميره يي اخذ ايله مك  
كوتوردى .

حضرت على بو خبرلى آلدقن صكره مبد اسلمى ايله ابو موسى  
الاشعريه و ( سبره جهنى ) ايله معاويه بر مکتوب كوندردى .

ابو موسى الاشعري كوفه اهاليسنك اطاعت و بيعت ايلش اولدقن  
بيانيله جواب يازدى .

اما معاويه بر مدت جواب و يرميوب سبره يي اويالاندردى . ص  
تعليلات مخصوص ايله عس قيله سندن ( قيصه ) نام كيمسه يي مأمور ايدو  
يدينه مهرلى بر قطعه مکتوب و يردى و سبره ايله بر لكده مدينه منور  
كوندردى .

مكتوبك عنوانى ( معاويه دن على يه ) ديو محرر اولوب دروننده  
يازى يوق ايدى .

قيصه ، « سبره ايله برابر شامدن حركت ايله خلال ربيع الاولده مدينه  
واصل و حضور خليفه يه داخل اوله رق مکتوبى تقديم ايتدى .

حضرت على مکتوبى آچوب خالى اولديغنى كورنجه « بونه » ديه رك شام  
حالى صوردى . و قيصه « امينمى يم » ديدكده « الحى يه زوال يوقدر » ديو بيورد

قيصه او طرفده بر قوم براقدم كه قصاصدن بشقه برشيئه راضى اولماز  
ديدى . و حضرت على « قصاصى كيمدن ايستيورلر » ديجه « سندن ايستيو

و آلتش بيك اختيار براقدم كه عثمانك جامع دمشق منبرى اوزرينه قو  
اولان قانلى كوملكى آلتنده آغلايورلر » ديمكده حضرت على « يارب عثمانك قتل

برى اولديغم سكا معلومدر » ديو بيوردى و قيصه نك عودتنه رخصت و يرد  
سبانيه ديو معروف اولان شيعه گروهى « شوكلې قتل ايديكز » ديا

صيحه و هجوم ايتديلر . اللرندن قيصه كوچ حال ايله قورتاريه بيلدى .  
قيصه نك بو وجهله عودتى محاربه علامتى ايدى . حضرت على دخى

نبتده اولديغنى بيلدردى و همان تداركات سفر يه ايله مشغول اولدى .

طلحه وزیرایسه اهل اسلام آره سنه عظیم تفرقه دوشه جکنی آکلایوب  
 مان زیارت بیت الله ایچون حضرت علیدن رخصت آلهرق مکهیه کیتدیلر .  
 حضرت علی اهل شام ایله محاربه ایتمک اوزره اهل مدینه یی دعوت  
 تشویق ایتدی . واوغلی محمد بن حنفیه یه سنجانی تسلیم وعبدالله بن  
 یاسی میمنه یه وعمر و بن ابی سلمه یی میسره یه وابوعبیده بن الجراحک برادر  
 اده سی اولان ابولیلی بن عمر بن الجراحی مقدمه الجیشه مأمور وتمام بن عباسی  
 دینه یه وُقْم بن عباسی مکهیه قائم مقام نصب ایتدی وحضرت عثمان اوزرینه  
 تروج ایتمش اولانلردن بریسی مأمور ایتدی وناسی شام سفرینه دعوت  
 ملک اوزره مصر امیری قیس بن سعه و بصره امیری عثمان بن حنیفه  
 کوفه امیری ابو موسی الاشعری یه امر نامه لر کوندردی .  
 متعاقباً زیرده بیان اولنه جنی اوزره مکهک اختلال احوالی خبری وارد  
 بلغله حضرت علی شام سفرندن فارغ اولمشدر .

### مبادی ووقعه جمل

حضرت عثمانک اجرا آتیه اک زیاده اعتراض ایدنلردن بری ام المؤمنین  
 یشه رضی الله عنها ایدی .  
 حتی رسول اکرم صلی الله علیه وسلم حضرت تلرینک مبارک کوملکنی  
 فیللرینی چیقاروب «ایشته کوملکی وقیللری اسکیمدی ، لکن شریعی  
 مکیدی» دیو حضرت عثمانک طور وحرکته تعریض ایلردی . لکن ایشک  
 درجهیه واره جغنی اوممازدی . بعدالحج حضرت عایشه مدینه یه کمک  
 زره مکهدن چیقدقده حضرت عثمانک شهادتیه حضرت علینک خلافتیه  
 تخاب اولندیغنی خبر آلتجه فوق العاده کدرلنه رک همان عودت ایله مکهیه  
 یتمش ودم عثمانی طلب ایتمک اوزره ناسی تشویقه ابتدار ایتمشدر .

حضرت عثمان طرفندن امیرمکه اولان عبدالله بن عامر الحَضَرَمی جمله دن  
 ول بو دعوته اجابت ایلمش وحضرت عثمانک شهادتی اوزرینه مدینه دن



فرار ايله مكهيه وارمش اولان سعيد بن العاص ووليد بن عقبه وساثر بنو اميه دخى اكا تبعت ايلش در .

الحاصل دم عثمانى طلب ايتمك داعيه سيلاه مكده حضرت على به مخالف بر فرقه پيدا اولمش وكتبدكجه چو غالب قوت بولمشدر .

وسابق بصره اميرى عبدالله بن عامر بصره دن چوق مال كتورمش وسابق

يمن اميرى يعلى بن منيه دخى آلتى يوز دوه و آلتى يوز بيك درهم كتوروش

ویرمشدر. كذلك حضرت عثمان حقنه اك شدتلى اعتراض ايدن طلحه نك

مرامى امويلرك يولسر ايشلرينى منع ايتمكدن عبارت اولدينى حالده ظهور

ايدن فتنه كسب اشتداد ايله حضرت عثمان مقتول اولنجه طلحه بك زياد

متاثر ومكدر اوله رق عثمانك قاتنى طلب يولنده كندى قاتنى دوكمكه قرا

ویرمشيدى. زير ايسه اوته دنبرو طلحه دن آيرلمازدى.

بناءً عليه بالاده بيان اولندينى اوزره ايكيى برلكده مدينه دن چيقوب

مكهيه عزيمت ايلشلا ايدى . بو صروده مكهيه واروب حضرت عايشه ايا

كورشمشلا وديكر رؤسا ايله برلكده دم عثمانى طلب ايتمك امرنده مشاوره يا

كيرشمشلا در .

اوزمان ملت اسلاميه ده حضرت علي دن صكره اك بيوك طائمش

اولان بوايكي ذاتك التحاقى حسيبله حضرت عايشه نك جمعيتى بك زياد

قوت بولمشدر .

لدى المشاوره حضرت عايشه « همان مدينه اوزرينه يورويلم » ديمش

ايسه ده بعضيلر « اهل مدينه على به بيعت ايلش اولدقلرندن مدافعه به قيا

ايدرلر. بز اوراده كى قوته غلبه ايدمه يز » ديهرك شام طرفه كيتمكى مناسب

كورمشلا . سابق بصره اميرى ابن عامر ايسه « شام طرفه معاويه كافيدر

بصره به كيدهلم ، بنم اوراده نيجه طرفدارلرم وار . بصره ليلر طلحه به دخى

مائدلرلر، مكه اهاليسنى قيام ايتديرديكمز كى بصره ليلرى دخى قيام ايتديريرز

ديمكله بصره به كيتمك اوزره قرار ویرمشلا .

وبيك قدر اهل قيام ايله مكه دن چيقوب خارجدن برطاقم خلق دخى

قاتله‌رق اوچ بیک نفره بالغ و حضرت عثمانک اَبان وولید نام ایکی اوغلی  
دخی برابر اوله‌رق حجاج عراقک میقاتی اولان ذات عرق نام موقفه  
وارمشلر .

حضرت علی بروجه‌بالا شامه سفر ایتک اوزره حاضرلانوور ایکن عایشه  
وطلحه وزیرک حال وحرکتلرندن خبردار اولنجه شام ایچون کوردیکی  
تدارکات ایله آنلرک اوزرینه یوریمکه قرار ویردی واهل مدینه‌نی سفره  
دعوت بیوردی .

اهل مدینه ایسه آغر طاورانمغله حضرت علی ، عبدالله بن عمری  
جلب‌ایله برلکده کیتمک اوزره امر ایتدکده « بن اهل مدینه‌دم آنلر ایله  
برابر سکا بیعت‌ایلدیم . آنلر کیدرسه بن‌ده کیدرم » دیدی وکیجه صاووشوب  
مکه‌یه کیتدی .

صباحلین بعضیلر حضرت علی‌یه کلوب « بوکیجه عایشه وطلحه وزیر  
حادثه‌سندن ده‌ها شدید برحادثه ظهور ایتمش ، یعنی عبدالله بن عمر شامه  
کیتمش » دیو تلاش ویردیلر .

لکن حضرت علینک کریمه‌سی و حضرت عمر الفاروقک زوجه‌سی  
اولان ام‌کلتوم ، پدرینک یاننه واردی و عبدالله بن عمرک امیرالمؤمنینه اطاعتده  
ثبات اوزره بولندیغنی و آنجق زیارت بیت‌الله ایچون مکه‌یه کیتمش اولدیغنی  
خبر ویردی .

فی‌الواقع عبدالله بن عمر مکه‌یه واردینی صررده بروجه‌بالا اهل قیام  
حضرت عایشه اردوسیله مکه‌دن چیقار ایکن برلکده کیتمک اوزره عبدالله‌نی  
دعوت ایلدکلرند « بن اهل مدینه‌دم . نه‌یاپارلر ایسه آنلره او یارم » دیو  
جواب ویرمشدر .

سائر امهات مؤمنین رضی‌اه عنهن مدینه‌یه عودت ایلک نیتیه حضرت  
عایشه‌یه رفاقت ایلوب بصره سفری ظهورنده آندن آیرلمشدر ، یالکز  
حضرت عمرک قری حفصه رضی‌اه عنها آنکله برابر کیده‌جک اولمش  
ایسه‌ده آنی‌ده برادری عبدالله بن عمر منع ایتمشدر .

اصحاب كرامك اعلم وافضل واشجعی وداماد پیغمبری اولان علی بن ابی طالب رضی الله عنه حضرتلری بحق خلیفه رسول اولدینی حالدہ امہات مؤمنینك اعلم و افضل اولان عایشہ صدیقہ آنك علیہ قیام و خروج ایدوبده برچوق اهل قیامی باشنه بریکدیرمسی تعجب ایدہ جك وقوعاتدن ، ولید بن عقبہ وسعید بن العاص کبی کبار بنی امیہ نك اكا اتباعی جای تعجب دكل ایسهده عشره مبشره دن اولان طلحه وزیر حضرتلری مدینه منورهده حضرت علی یه بیعت ایلیشیکن مکده اهل قیامه ملتحق اولملری ذہنلره حیرت ویره جك حالاتدن ایدی .

بومثللو حالات غریبه مقتضای بشریت اولان خطا وغفلت آثارندندر . کوچوکار یا کیلورده بیوکار یا کماز دكل آ. آنلرده یا کیلور، خطا ایدر، یا کلس یوله کیدر . حضرت طلحه وحضرت زبیر، دفع فتنه ایچون عامه ناسك تابع اوله جنی بر ذاته بیعت اولنق رأی واجتهادنده بولنوب حضرت عایشه نك اهل اسلام ایچنده معلوم اولان حرمت و شرفنی اتحاد افکار عامه یه وسیله مناسبه عد ایلیهرك آنك جمعیتنه داخل اولملر ایدی .

حالبوکه قبول عامه یه بادی اولان اوصاف مطلوبه سائرندن زیاده حضرت علی ده وار ایدی و بین الناس ظهور ایدن تفرقه نك تحولات وانقلابات عصریه ایجاباتندن اولدینی درکار ایدی .

شویله که زمان سعادت اوزاد قجه اخوت اسلامیه یه ضعف کله نك زمان جاهلیتده کی غیرت قومیه اماره لری ظهور ایتمشیدی و اغراض دنیویه چوغالوب مزاج زمانه فسادہ یوز طوتمشیدی . قریشك بر بیوک قسمی اولان امویلر ایسه زیاده قوت بولوب بردولت امویه تشکیلی املنه دوشملر ایدی .

بروجه بالا مکدن چیقان اهل قیام اردوسنك جهت وحدتی حضرت عایشه ایسهده طائفه نسادن بولدینی جهتله طلحه وزیردن برینك امیرالیش اولسی لازم کلور ایکن هنوز بریسی تعین ایتوب اردولری

اشبوغسز بر غلبه لکدن عبارت ایدی . ایکسی اتفاق ایتسه لر بیله کندولرینک توابع ولواحق بر برینی قصاقمقدن کیری طورمازلر وایکسنده احت ویرمزلر ایدی .

حتی مکدن چیققلرنده مروان بن الحکم اذان ویرمش وبعده طلحه زبیرک یانه وارمش و « نمازده قغیکز امامت ایده جک ، امارتی قغیکزه تسلیم یدیم » دیو صورمش . آنک اوزرینه عبدالله بن زبیر « بابامه » و محمد بن طلحه « بنم بابامه » دهرک مجادله یه باشلامش لر .

حضرت عایشه بونی ایشدیکی کبی ( ایچمزه نفاقی دوشوره جکسین نازی همشیره زاده م ، یعنی عبدالله بن زبیر قیلدیرسون ) دیو مروانه خبر کوندرمش . ایشه بونک اوزرینه معاذ بن عبدالله دیمش که « والله بز مظفر ولسه ق بر برمزه مقاتله ایدرز . زیرا امارتی نه طلحه زبیره ویرر ، نه ده زبیر آکا ترک ایدر »

حال بوکه بالاده بیان اولندینی اوزره حضرت عایشه آچیقدن آچیغه حضرت عثمانک افعالنه اعتراض ایدر ایدی . برنجی درجه ده معترضلردن ریده طلحه حضرتلری ایدی .

معترضلرک مقصدی حضرت عثمانی امویلره تسلیم امور ایتمکدن ازچورمک اوزره نصیحتدن عبارت اولوب ایشک بو درجه یه واره جغنی و مازلردی . حضرت عثمان مقتول اولنجه جمله سی متأثر و متالم اوله رق بایشه وطلحه وزیر آنک قاتی طلب یولنده میدانه چیقیدیلر .

امویلر ایسه سبیتی معترضلره عطف ایدرک جمله سنی قاتللر صره سنده سایارلردی و بعضیلری همان الده اولانلرینی اعدام ایدیویرمک اینستردی . بعضیلری ایسه آنلری بر برینه چارپشدیره رق ضعیفلندردکدن صکره جمله سنی احما ایتک فکرنده ایدیلر .

شوحاله نظراً اهل قیام اردوسی ظاهراً متفق و باطناً متفرق اولدقلری طالده بروجه بالا ذات عرق نام میقاته واردقلرنده سعید بن العاص ، مروان و رفقا سیله کوریشوب « انتقام کزی کیر و براغوبده نره یه کیدیورسکز . ابتدا

عائشه و طلحه و زبیر قتل ایدیکز، بعدہ خانہ لربکزہ کیدیکز « دیدکد » مأمول کہ عثمانک بالجملہ قاتلارینی قتل ایدرز « دیو جواب ویرمشر .

بعدہ سعید بن العاص ، طلحه و زبیر ایله کوریشوب « مظفر اولدیغکز د قغیکز امیر المؤمنین اوله جق » دیو صورمش . آنلرده « ناس قغیمزی ایسه ایسه امیر اولور » دیو جواب ویرمشر « وسعیدسز عثمانک قاتنی طلب ایچور خروج ایتمش اولدیغکزہ نظرآ امارتہ عثمانک اوغلارندن برینی کچورملیسکز دیدکده « شیوخ مهاجرینی براغوبده یتیملیمی امیر ایدلم » دیمشر .

آنک اوزرینه سعید حد تلنہ رک دونوب کیتمش و مغیرہ ابن شعبہ « رأی آنجق سعیدک دیدیکدر » دیہ رک اودخی کندو قیلہ سی اولان بنی ثقیف ایله برابر عودت ایتمشدر .

یعلی بن منیہ ، سکسان آلتونہ آلمش اولدینی جملی ، یعنی ارکک دوه یو تقدیم ایدوب حضرت عائشہ دخی آکا بنمش اولدیغندن آنکله طلحه و زبیر تابع اولان اهل قیامہ ( اصحاب جمل ) دینلمشدر .

حضرت عائشہ اول دوه یه بنوب ذات عمر قدن حرکت ایدہ جکی وقتہ سائر امہات مؤمنین آکا وداع ایدرکن فریاد و فغان ایدرک آغلا یوب اصحاب جملی دخی آغلا تمشر .

حضرت عائشہ ایسه طلحه و زبیر و سائر اهل قیام ایله برلکده بصرہ عازم اولوب کیدرکن ( حَوَّابُ ) صوینہ واروب کوپکدر اوومکہ باشلامش و « بونہ صویدر » دیو صور دقدہ قلاغوز « حَوَّابُ صویدر » دینجہ حضرت عائشہ فریادہ آغاز ایله « انالله وانا الیه راجعون . بن رسول الله صلی الله علیہ و سہ حضرتلرندن ایشتم . دیگر ناسی دخی یاننده اولدینی حالده ( نوله بیلسم ) قغیکزہ حَوَّابُ کوپکدری اورو یه جک ) دیو بیورمشیدی . مکر حَوَّابُ صویدر صاحبہ سی بن ایمشم . امان بنی کیرو چویرک، کیرو چویرک « دیہ رک دوه سؤ چو کرتمش . خلق دخی آنک اطرافنہ اینوب برکون برکیجه اوراد قالمشر .

دردنچی جزء ده بیان اولندینی اوزره «حوأب کوپکری قغیکزه اورویه جک»  
 بو بیوردینی زمان (سلمی) نام خاتون دخی حضور نبویده حاضر ایتمش.  
 ابوبکر الصدیق رضی الله عنه حضر تلرینک اوائل خلافتنده خالد بن الولید  
 رضی الله عنه مرتدلر اوزرینه مأمور اولدقده بو (سلمی) برفرقه عاصیه ایله  
 حوأب نام موقعی طوتوب حضرت خالد ایله جنک ایتمش اولدیغندن  
 زمان ذکر اولنان حدیث شریف بوسلمی وقعه سیله تأویل اولنمشیدی .  
 بو کره حضرت عایشه اول موقعه واروبده کوپکر اورودکده حوأب  
 یوی دینلیدیکی کبی اول حدیث شریف خاطرینه کلمکله «مکر حوأب  
 ویکلرینک اورویه جکی خاتون بن ایتمش» دیو تلاش ایدرک «امان بنی کیرو  
 ویرک» دیو فریاد ایلدیسده آنک عودتی اوزرینه اردو طاعلمق لازم  
 له جکندن همشیره زاده سی اولان (عبدالله بن زبیر) «قلاغوز یالان سویلش  
 صو حوأب صوی دکل ایتمش» دیرک حضرت عایشه یی اقناعه چالیشمقده  
 او دخی امتناع ایتکده ایکن «امان علی، کلی عسکرله کلیورمش» دیو  
 دش کوستریله رک همان اورادن حرکت ایتمشلر .

اوله جغه چاره یوق . معجزه پیغمبری اولان اول حدیث شریفی عایشه  
 صدیقه روایت ویکرمی درت ساعت یرنده اقامت ایله کیرو دونمک  
 سته مشیکن اصحاب جمله انتباه کلیوب آتی یرندن قالدیره رق بصره یه طوغری  
 کردوب کیتمشلر .

### اصحاب جملک بصره یه دخوللاری

اصحاب جمل بصره یه یاقلاشدقلرنده حضرت علی طرفندن بصره امیری  
 لان عثمان بن حنیف رضی الله عنه ووجوه بلده ایله لدی المخابره بصره لیلرک  
 قسمی عثمان بن حنیفک امرینه اطاعت و دیگر قسمی اکا مخالفت ایتشلر .  
 بصره وجوهندن بعضیلری طلحه وزیر ایله کوریشوب «سز علی یه بیعت  
 لمدیکنمی» دیدکده «اوت بیعت ایلرک اما قلیج باشمزک اوزرنده ایدی»  
 یتشلر .



اصحاب جل ایلرویہ حرکت ایلہ بصرہ خارجه گلشیر، عثمان بن حنیف  
دخی اهلیدن کندوسنه تابع اولئر ایلہ بصره دن چیقوب آنلره قارشو  
صف باغلامشیر .

طلحه وزیر و صکره عایشه حضراتی عثمانک قاتلیرینی قصاص ایل  
کتاب اللهک حکمنی اجرا ایتک لازم اولدیغنه دائر خطبه لر ایلہ ناسی کندو  
طرفلرینه دعوت وتشویق ایلشیر .

آنک اوزرینه عثمان بن حنیفک عسکرندن بعضلری آنلری تصدیق  
وبعضلری تکذیب ایلش ومخاوره ، مشاجره یه منجر اوله رق ناس بربرینی  
طاشلامغه باشلامش .

بوصره ده بنی سعددن بر قیز چیقوب وعایشه صدیقه نک یاننه واروب  
دیمش که « یا ام المؤمنین ! عثمانک قتلی سنک اوکدن خروج ایلہ بوملعون دو  
اوزرنده کندیکی سلاحه هدف ایتمه کدن اهنودر. الله طرفدن سنک ایچور  
برده وحرمت وار ایدی. سن پرده کی ییرتدک، حرمتکی ازاله ایتدک. سنکا  
مقاتله یی روا کورن سنک قتلکی ده روا کورر. اکر بزه کندی ارادتک ایل  
کلدک ایسه دون، کندی اویگه کیت واکر کرها وجرأ کلدک ایسه جبارله  
علینه بزدن استعانه ایت . »

ینه بنی سعددن بردلیقانی چیقوب طلحه وزیره طوقوناقلی سوزلر  
سویلش وبوصره ده طرفین حربیه باشلامشدر .

اول کون وفرداسی طرفین یورولنجیه دک جنک ایدوب ایکی طرفدر  
پک چوق آدملر تلف ومجروح اولدقدن صکره صلحه یاتمشیر وطلحه وزیر  
اکر جبری اوله رق بیعت ایلشیر ایسه عثمان بن حنیف حکومتی آنلر  
تسلیم ایتک واکر رضالریله بیعت ایلشیر ایسه آنلر صاوشوب کیتک  
اوزره قرار ویریله رک حقیقت حالی آکلامق ایچون کعب بن سورالقاضی  
مدینه یه اعزام ایتمشیر .

کعب بن سور، برجمعه کونی مدینه یه کلوب مسجدشریفه کیردی کیفی  
جماعت مسلمیندن موردی . هرکس سکوته واردی .

اسامة بن زید رضی اللہ عنہما جوابہ ابتدار ایله « طلحه وزیر کرہا بیعت ایلدیلر » ده یخه ناس آنک اوزرینه هجوم ایله او قدر دو کدیلر که آز قالدی تلف اوله یازدی .

هله صهیب و ابو ایوب الانصاری و محمد بن مسلمة الانصاری رضی اللہ عنہم کوچ حال ایله اسامه یی قورتاروب خانه سنه اولاشدیره بیلدیلر . حضرت علی کیفیتدن خبردار اوله رق عثمان بن حنیفه یازدینی مکتوبده « طلحه وزیر جماعت مسلمیندن آیرلق اوزره جبر اولندی . آنجق جماعت و فضیلت اوزره کندولرینه جبر اولندی . مرادلری خلع ایسه معذور اولمازلر . بشقه مراملری واریسه باقملم ، آنلرده باقسونلر » دیو بیورمشدر . کعب بن سور بصره یه واروبده کیفیتی افاده ایتدکده طلحه وزیر همان عثمان بن حنیفی دعوت ایلشدر . عثمان ایسه حضرت علینک مکتوبنه استناد ایدرک آنلر ایله کورشمکدن امتناع ایتمشدر .

آنک اوزرینه طلحه وزیر بر صغوق و قرا کللق کیجه ناسی جمع ایله یاتسو اذانی او قوندقدن صکره بصره مسجدینه وارمشلر واوراده بولنان قرق قدر آدمی اولدیرمشلر .

عثمان بن حنیف هنوز مسجدده وارمامش اولدیغندن حکومت قوناغنه کوندریلن عسکر عثمان بن حنیفی اخذ و ضرب و حبس ایله حکومتی ضبط ایلشدر .

بعده طلحه وزیر بصره لیلری حضرت علی ایله جنک ایتک اوزره تشویق یولنده پک چوق سوزلر سویلشدر .

اوصره ده بنی قیس قبیله سندن بر آدم چیقوب « ای مهاجرین ! سزدعوت اسلامه اجابت ایلنلرک اولیسکز بو جهتله فضل و شرفکز وار ایدی . بناء علیه کراراً خلیفه انتخاب ایتدیکز و بزمه مشورت ایلدیکز . لکن بز قبول ایتدک . بر خلیفه یی قتل ایتدیکز و علی یی انتخاب ایتدیکز ، کذلک بزمه مشورت ایلدیکز . شمدی بزی آنکله جنکه دعوت ایدیورسکز . آنک حقنده بو مرتبه شته سبب نه درکه آنکله مقاتله ایدلم ، بغیر حق بر ایشمی یاپدی که

آنك علمېنه سزكله برابر اولهلم « دنجې اصحاب جمل آنی قتل ایتمك ایستمشلر ایسه ده عشرتی مانع اولمشدر . لکن فرداسی اصحاب جمل آنك و آنكله برابر اولانلرك اوزرلرینه هجوم ایله یتمش کشی قتل ایتمشلردر .

عبدالقیس قبیله سی شیخی حکیم بن جبله که قومی ایچنده شریف ومطاع وغایت بهادر وشجیع بر آدم ایدی ومقدما (سند) بکی اولوب او طرفده چوق غزالر ایتمشیدی . صکره معزول اوله رق کلوب بصره ده اقامت ایلشیدی . عثمان بن حنیفك اوغرا دینی فلا کتی ایشتدکده آکا یاردم ایتمك اوزره یدی یوز الی کشی ایله کلوب عبده بن زیر ایله کورشمش وعثمان بن حنیفك صالیورلمسی وحضرت علینك ورودینه دکن طرفینك بولندقلری حال اوزره قالملری خصوصلری تکلین ایتمش و « سزالله دن قورقازمیسکنز ، بغیر حق بو قدر قان دوکدیکز » دیمش .

عبدالله بن زیر « بز عثمانك قانی ایچون قان دوکهورز » دیدکده حکیم بن جبله « عثمانی سزك اولدیردیککنز آدملرمی قتل ایتدی » دیواعتراض ایتمکه عبدالله بن زیرك « سن علی ی خلع ایتدکجه بز عثمان بن حنیف صالیورمه یز » دیمسی اوزرینه دعوانك فصلی قلیجه حواله ایدلمش واشبو اتوز آلتی سنه سی ربیع الاخرینك اواخرنده طرفین میانه لرنده برشدلی مقاتله وقوع بولمشدر . شویله که حکیم بن جبله کندو جماعتیله میدان چیقوب اصحاب جمل دخی آنلرك اوزرینه هجوم ایتدکده شدلی برمقاتله وقوع بولمش حکیم ایله بك چوق آدملری مقتول اولمش ، معیتده کی رؤسادن یالکز خرقوص بن زهیر رضی الله عنه کندو جماعتیله قبیله سی اولان ( بنی سعد ) یانه قاچوب قورتلمشدر . بو جهتله بنی سعد قبیله سی بر طرفه چکیلوب مخالفتده دوام ایتدکلری کی عبدالله بن حنیف قبیله سی و ( بکر بن وائل ) ک چونغی غضبه کله رك حضرت علینك یولی اوزرنده اجتماع ایله آنك ورودینه منتظر اولوب طورمشلردر .

وقت سعادتدنبرو فتوحات اسلامیه بذل جهدا یلین فازیلردن نیچهلرینك بویله بیهوده یره تلف اولدیغنه تأسف ایتمه مک ممکن دکدر .

نه چاره که فتنه ایامنده ناسک قلب کوزلری باغلامق و صکرده انسانی  
فون ایده جک حادثه لر کوریلوب آغلامق بو عالم کون وفسادک احوال  
عیه سندندر .

اصحاب جمل ، بوجه بالا غلبه ایتدکن صکره حکومتی تمامیه اله آلوب  
دالرحمن بن ابی بکرالصديق رضی الله عنهما بیتمال مأموری نصب  
دیلر .

بعده حضرت عایشه طرفدن اتفاقه دعوت ضمننده کوفه و مدینه و یمامه  
لیسنه مکتوبلر یازلدی . شام والیسی معاویه به دخی معلومات ویرلدی .  
ویه ایسه طرفین ، محاربه لر ایله ضعیف دوشوبده میدان کندوسنه قالمق  
د وانتظارنده ایدی .

بوصرده عثمان بن حنیف صالیویرلش ایسهده صقالی و قاشلری یولتمش  
و کندن او یله یوزی یولوق اولدینی حالد بصره دن صا ووشوب حضرت علی  
فنه عزیمت ایتلشدر .

### حضرت علینک بصره یه عزیمتی

امیرالمؤمنین علی المرتضی کرم الله وجهه ورضی الله عنه حضرت تبری شام  
فرینه حائرلانوور ایکن عایشه وطلحه وزیر رضی الله عنهمک مکهدن  
وجلری خبری کلنجه شام ایچون کوردیکی تدارکات ایله آنلرک اوزرینه  
کتی تصمیم ایتدی ووجوه ناسه خطاباً « درت کشی ، یعنی ناسک اک  
غیسی واک زیاده جن فکریلیسی اولان طلحه و اشجع ناس اولان زبیر  
ندالناس اک زیاده مطاع و محترم اولان عایشه واک زیاده زنکین اولان  
بن منیه ، بنم باشمه بلا اولدیلر . والله حقمنده میدانه قویه حق منکر  
یرکین برشی بوله مدیلر . نفسم ایچون اموال مسلمیندن برشی آلمدم ، هوا  
وسه مائل اولدم . عثمانه آنلر بدن زیاده اعتراض ایتشلر ایدی . صکره  
بیعت ایلدیلر وعدل وجوریمی تجربه ایتدن بیعتی نقض ایتدیلر .

بن اللهك حكمنه راضى يم. مع هذا آنلرى دعوت ايله جكم. قبول ايدر ايسه توبه مقبولدر. ابا ايدرلر ايسه آنلره قليجك يوزيخى كوستيريم. قليب حقى باطلدن فرق وتيمز ايدر ، ديدى واهل مدينه يي سفره دعوت وتشويد ايتدى .

اهل مدينه ابتدا آغر طاورانمشلر ايسه ده صحابه كزيندن زياد خَنَظَلَه هان امير المؤمنينك دعوتنه اجابت ايله « بن سندن آيرلم، هروق سنكله برلكده عاصيلر ايله مقاتله ايدر » ديدى. انصار دن وصلاحى امتد بعض ذوات كرام دخى دعوت امير المؤمنينه اجابت ايلدى .

ابوقَتَادَةَ الانصارى رضى عنه النبأى قالقوب « يا امير المؤمنين! بوقليجي رسول الله صلى الله عليه وسلم قوشاتدى . خيلى وقتدر قيننده طورويور. آ امتك ايچنه القاي فساد ايدن بوظالملك اوزرينه صيره جغم » ديدى. امها مؤمنيندن ام سلمه رضى الله عنه حضرتلرى دخى « يا امير المؤمنين! قبو ايتمه جككى بيلورم، يوقسه سنكله برابر چيقار ايدم . ايشته بو عمزاده مد وغندمه نفسمدن ده اعز زدر. سنكله برابر كيتسون . هر يرده سنكله برا جنك ايتسون » ديهرك عمزاده سنى تسليم ايلدى .

بو صورتله اهل مدينه دن يك چوق خلق ، امير المؤمنين ايله برلك سفره آماده اولديلر . ايجلارنده اهل بدر دن يالكز التى كشى وار ايد رضى الله عنهم اجمعين .

بونك اوزرينه حضرت على ، اهل بدر دن سهل بن حنيف الانصار رضى الله عنهي مدينه قائم مقاملغنه تعيين ايتدى . واهل مدينه دن كندوس تابع اولانلر ايله برابر اوتوز آلتى سنه هجريه سى ربيع الاخرنده مدينه چيقوب ( رَبَذَه ) قريه سنه كيتدى. مدينه ده بولنان كوفه وبصره اهاليسند طقوز يوز قدر كوكللى دخى اكا تبعيت ايلدى .

حضرت على مدينه دن چيقار ايكن عبدالله بن سلام رضى الله عنه قارن كلدى، آتلك ديز كيندن طوتدى « يا امير المؤمنين! مدينه دن چيقمه . آ چيقار ايسه ك والله ابدى بورايه امارت اسلاميه كيرمز » ديدى.



ناس آنی سبایله اوزرینه هجوم ایتدیلر. حضرت علی « آنی براغیکز. محمد صلی الله علیه وسلم حضرتلرینک اصحابندن نه کوزل آدمدر » دیدی. عبدالله بن سلامک سوزی طوغری چیقمشدرکه آندن صکره مدینه مقر خلافت اولمامشدر. زیرا حضرت علی کوفده بولنوب آندن صکره دمشق شام ، امویلره و بغداد ، عباسیلره پای تخت سلطنت اولمشدر .

حضرت علی ربذهیه واردینی ائنده بیوک اوغلی حسن رضی الله حضرتلری اورایه کلوب پدریله کورشدهکه « عثمان محاصره اولندقدده مدینهدن چیق ، آنک قتلده مدینهده بولمه . دیدم . دکه مدک . عثمان قتل اولندقدده قبائل عرب واهالی بلاد سکا تبعیت ایدنجیه دک بیعت آله ، آنلر سنسز برایش بجره مزلر. دیدم ، دیکله مدک . بوقادین ایله بوایکی آدم خروج ایتدکه خلق باریشوبده غوغا یاتشنجیه قدر خانه گده اوتور ، فساد ظهور ایدمه جک اولورسه بشقه لرینک اللرنده ظهور ایتمش اولسون . دیدم ، دکه مدک . شمدی ایش بیودی نه یابه جقسین » دیدی . اکا جواباً حضرت علی دخی ( اوغلجغزم ! عثمان محصور اولدقدده مدینهدن چیقمانک یولی یوق ایدی . زیرا بزمده اطرافلر احاطه اولمشیدی . بیعت خصوصنه کلنجه بوایش اهل مدینه نک حقیدر . بوحقک آنلرک الندن چیقمنسی روا کورمدم . رسول الله صلی الله علیه وسلم حضرتلرینک وفاتنده ناس ابوبکره وبعده عمره بیعت ایلدیلر ، بنده ایلدم . عمرک وفاتنده اهل شوری اولان آلتی کشیدن بریسی بن ایدم . عثمانه بیعت اولندی . بن آکاده بیعت ایلدم . انک قتلندن صکره ناس کندو رضالریله بکا بیعت ایلدیلر ، بن آرتق مخالفت ایلنلرایله جنک ایدرم . اللهک حکمنه راضیم . طلحه وزیرک خروجلری اوزرینه شمدی خلنه مه قانوب طور مق فصل اوله بیلور . امر خلافتک اداره سی بنم وظیفه مدر . اکا بن باقدیغم تقدیرده کیم باقه جق . سن بوافکاردن وازکج اوغلم » دیدی .

حضرت علی اهل قیامدن اول بصرهیه وارمق اوزره مدینهدن چیقمش ایکن ربذهیه واصل اولدقدده آنلرک بصرهیه طوغری کیتمش اولدقلرینی خبر النجه نه یابه جغنی مطالعه و مشاوره ایتک اوزره ربذهیه توقف بیوردی .



کوفه امیری ابو موسی الاشعری رضی الله عنہی جلب و دعوت ایچون محمد ابی بکر الصدیق ایله محمد بن جعفر رضی الله عنہمی کوفه یه کوندردی و اهل کوفه یه خطاباً «اللہک دینہ یاردچی اولکیز. قالقکیز، یانمزہ کلیکیز. بز آنجق اصلاح حال ایسترز، تاکہ بوامت اولکی کبی اخوان اوله لر» دیو مکتوب یازدی و اسباب سفریه نک اتمامه اهتمام ایتدی و قالقوب عسکره خطاباً بر خطبہ بلیغه او قودی .

شویله که (الله تبارک و تعالی اسلام ایله بز ی عزیز و شامزی یوجه قیلدی و جملہ من ذلندہ و بر بریمزه بغض و عداوتده ایکن بز لری اتحاد اسلام ایله هپ اخوان قیلدی . تا بو فتنه حادث اولنجیه دک ناس هپ بو حال اوزره بولنه رق کتاب اللهه توفیق حرکت ایلمکده ایدیلر. ام سالفه ، فرقه فرقه اولدق لری کبی بوامت دخی البته اوله فرقه فرقه اوله جقدر. واقع اولان حالک شرندن اللهه صیغورز) دیدکن صکره دونوب (بهر حال اوله جق، اولور. بوامت یتش اوچ فرقه اولور . ایشته بکا عداوت ایدن فرقه یی کوردم . ایمدی دینک زده ثبات ایدیکنز و بنم کوستردیکم یوله کیدیکنز. پیغمبریکنزک یولی بودر. آنک سنتنه اتباع ایدیکنز. برمشکل ظهورنده قرآنه مراجعت و آنک حکمنه توفیق حرکت ایدیکنز) دیو بیوردی .

بوصرده سعید بن عید الطانی ایله طی قبیله سنندن بر جماعت کلوب امیر المؤمنینہ عرض اخلاص ایتدیلر .

بعده امیر المؤمنین علی المرتضی رضی الله عنه حضرت لری بر قزیل دوه اوزرنده اولدینی ویدکنده کمیت یعنی کستانه طوروسی برقصراق بولندینی حالده عسکرله ربذه دن حرکت بیوردی .

صاغ جناخنده حسن و صول جناخنده حسین اولوب دیگر اوغلی محمد بن حنفیه دخی علمدار ایدی . و سوار ی اوزرینه عمار بن یاسر و پیاده اوزرینه محمد بن ابی بکر الصدیق و مقدمه الجیشہ عبدالله بن عباس حضرت اقی مأمور ایدیلر . رضی الله عنهم .

معیتندہ درت بیک قدر عسکر وار ایدی که سکزیوزی انصاردن و درت

یوزی شجره رضوان آلتنده بیعت ایلمش اولان صحابه کرامدن ایدی. ایچلرنده اهل بدردن و خواص اصحاب کزیندن مبارک و محترم ذاتلر وار ایدی . ائنانی راهده کوفه دن عامر شیبانی کلوب کورشدی. امیر المؤمنین آندن کوفه امیری بولنان ابوموسی الاشعرینک حالفی صورتدی. اودخی «صلح ایستر ایسه ک ابوموسی صلح آمیدر واکر جنک ایستر ایسه ک او جنک اری دکلدرد» دیو جواب ویردی . امیر المؤمنین « بنده صلح ایستم » دیو بیوردی .

( ذی قار ) نام منزله وارد قلرنده عثمان بن حنیف یوزی یولوق اولدینی حالده کلوب کورشدی «یا امیر المؤمنین! بنی صفاللی کوندرمشیدک، شمدی سکا صفالسز کلدیم » دیدی حضرت علی آکا « اجر و خیره نائل اولدک » دیهرک نسلیت ویردی .

بعده حضرت علی « بندن اول ایکی ذات خلیفه اولوب کتاب و سنت یله عمل ایتدیلر. صکره اوچنجیسی حقنده شویله ایتدیلر، بویله ایشلدیلر. بعده بکا بیعت ایلدیلر. اوزمان طلحه وزیر دخی بیعت ایلیشکن بیعتی نقض ایتدیلر. ابوبکر و عمر و عثمانه اتقیاد ایدوبده بکا مخالفت ایللری تعجب ایدجک رکیفیتدر . والله بنم سلفلرمدن دون اولمديغمی ایکیسی ده بیلور . یارب آنلرک باغلادقلری دوکومی چوزو عمللرینک قنالغنی کندولرینه کوستر» دیدی. و بروجه بالا ربذه دن کوفه یه کوندرمش اولدینی محمد بن ابی بکر ایله محمد بن جعفرک عودتلرینه قدر ذی قار منزلده منتظر اولوب طوردی .

بو ایکی محمد کوفه یه واروب امیر المؤمنینک امرنامه سنی ابو موسی - الاشعری یه ویردکلرنده ابوموسی « قیام اتمک دنیا یولیدر ، اوتورمق آخرت یولیدر. بزايسه آخرتی ترجیح ایلرز » دیوب نامی دخی بیطرقلغه تشویق اتمکله ایکیسی ده حدتله رک عودت ایله ذی قاره کلوب کیفیتی حضرت علی یه خبر ویردیلر .

حضرت علی ، ینه ابو موسایی قاندرمق ایچون عبدالله بن عباس ایله شتری کوندردی. آنلرده کوفه یه واروب ابوموسایی اقناع ایدمه رک مأیوسا ذی قاره عودت ایله حضرت علی یه عرض و بیان حال ایتدیلر .

بعده حضرت علی، اوغلی حضرت حسن ایله خواص اصحاب کرامدر  
عمار بن یاسر رضی الله عنهمای کوندردی. آنلرده کوفه یه وارمشر و طوغری  
مسجد شریفه کیرمشر .

ابوموسی، حفید نبوینک مسجده اولدیغنی ایشدیکی کبی همان مسجد  
کیتمش و حضرت حسنی باغرینه باصوب اظهار محبت و اخلاص ایتمش .  
عمار بن یاسر « یا اباموسی ! علی بی ترک ایله فجره یه التحاق ایتدک  
دیدکه ابوموسی « بن او یله برایشده بولمدم » دیمش .

حضرت حسن « او یله ایسه نیچون کوفه اهالیسنی بزه اعانه دن  
ایدیورسین . بزین المسلمین اصلاح حالدن غیری بر شی ایستیمورز » دی  
بیورمش .

ابوموسی « نام بابام سکافدا اولسون . بیوردیغکز صحیحدر . لکن رسول الله  
صلی الله علیه وسلم حضرت لرندن ایشتم که قریباً بین المسلمین فتنه حادث  
اوله جقدر . آنده اوتوران ، آیاقده طوراندن و آیاقده طوران ، یورویندر  
ویوروین ، حیوان صرتمده کیدندن خیرلودر . اهل اسلام هپ اخوانده  
قانلری و ماللری یکدیگره حرامدر دیدی » دیو جواب ویرمش .

بونک اوزرینه عمار بن یاسر حدتله رک ابوموسیایه عتاب ایش، ناسدر  
بعضیلری دخی عماره آغر سوزلر سویلش . بوجهتله ناسه هیجان کلش  
ایسه ده ابوموسی تسکین ایتمشر .

« ابوموسی الاشعری بی طرفلنی رأی و اجتهاد ایدوب اجتهادنده خطاسی  
اولسه دخی معذور و معفو اولور، لکن بوصورتده خلافته مربوط اولار  
کوفه امارتندن چکلمسی لازم کلور » دیو هدف اعتراض اولمشیدی .  
اول ائنده حضرت عایشه کوفه وجوهندن زید بن صوحانه برمکتوب  
کوندروب یا خانه سنده قبانوب اوتورمسنی، یاخود کندوسنه نصرت ایلسی  
امر ایتمشیدی ینه بومالده کوفه اهالیسنه دخی برمکتوب کوندرمش ایدی  
زید بن صوحان، مسجد قپوسنده آیاق اوزره طوروب اومکتوبلری اوقومشر

جرح و تزئیف ایتش . حضاردن بری آکا اعتراض ایتکله ینه بین الناس هیجان پیدا اولمش .

همان ابو موسی الاشعری قالقوب « ای ناس ! بکا اطاعت ایدیکز، بری عرف جماعت اولکیز . فتنه ظهور ایتدکده انسانی حیرت و شهادت دوشورور . یقینی بیلنمز برحاله کتور و زائل اولدوقده حقیقت حالی میدان چقارور . نه یورک آغریسی کبی برداهیهدر . آنده هر نوع روز کار لر اسر ، عقلا چوجق بی حیران قالور ، قیج لکزی قینلرینه صوقکیز ، قارغیلر کزی قیریکنز ، قارکزی پاره پاره ایدیکز ، خانه لر کزدن آیرلیکیز . قریش داره جرتدن یقوب و اهل علمدن آیریلوب ده امرا ایله قارش دقلرنده آنلرک ایشنه رشمیکنز . بنم نصیحتمی دکله یکنز . دنیا و آخرتده سلامت بولورسکنز » بدی .

زیدن صوحان ، قالقوب ابو موسایه خطاباً « فراتی کیر و چویر . اگر کلدیکی ه دونوب کیدرسه سن ده دیدیککی اجرا ایده بیلورسین . آکلامدیگ ایشدن زکچ . ای ناس ! یورویکنز ، امیر المؤمنینک یانه کیدیکز ، حقه اصابت لرسکنز » دیدی .

بهادر ( قَعْقَاع ) قالقوب ه عالمه نظام ویره جک و مظلومک حقنی ظالمدن لیویره جک بر امارت لازمدر . ایشته امیر المؤمنین سزی اصلاحه دعوت یور . آنک دعوتنه اجابت ایدیکز و همان یانه کیدیکز » دیدی . ینه وجوه رفدن عبدالحیر نام ذات دخی « یا ابا موسی ! طلحه وزیر علی یه بیعت دیلرمی » دیووردی . ابو موسی « اوت » دیو جواب ویردی و ابو الحیر « آندن سکره علی نقض بیعتی موجب اوله جق بر شی یادی می » دیدکده ابو موسی یلمبورم » دیمکله ابو الحیر « او یله ایسه سن بوراسنی او کر نجه دک بزسنی ترک رز . ناس شمدی درت فرقه در . علی کوفه نک آرقه سنده ، طلحه وزیر سرده ، معاویه شامده در . بر فرقه دخی حجازده وار . آنلرک کفایتی لمیوب بر دشمن دخی آنلر ایله مقاتله ایتز » دینجه ابو موسی « ایشته ناسک یرلوسی آنلردر » دیمکله ابو الحیر « آرتق کین و غیظ درونک سکا غلبه ایتش

یا اباموسی» دیو سوزی کسدردی . بعده حضرت حسن بن علی رضی  
عنهما پک مؤثر سوزلر سویلدی وناس هپ آنک طرفه میل وتوجه ایلدی  
بوصرده طی قبیله سندن برجماعت کلوب ( عدی بن حاتم ) ه « نه اء

ایدرسین » دیدکارنده اودخی « بز حضرت علی یه بیعت ایلدک . بزى براء  
عظیمه دعوت ایلدی ، بز کیدرز » دیو جواب ویردی .

رؤسادن هند بن عمرو قالقوب « امیر المؤمنین بزى دعوت بیورد  
وبزه مبعوثلر کوندردی ، حتی حفید نبوی اولان اوغلی ده کلدی . هاید  
امیرکزک یانه کیدیکز و آکا هر وجهله یاردم ایدیکز » دیوناسی تشویق ایلده  
حجر بن عدی دخی بویولده سوزلر سویلدی .

اول ائناده ایسه خلق حکومت قوناغنه هجوم ایشلر ایدی . شویله ک  
حضرت علی ، اوغلی حسن ایله عمارى کوندردکن صکره آرقلرندن اشتر  
دخی کوندرمش . اشتر ، کوفیه واردقده مسجده کیرمش و کورمش  
حضرت حسن و عمار ابو موسی ایله منازعه ایدیور همان چیقوب و اوک  
کلن خلقی سوروب حکومت قوناغنه وارمش . وبر صیحه ایدو  
ابوموسانک آدملرینی طیشارو چیقارمش . آنلر دخی « ای ابوموسی ! انه  
کلدی ، قصر حکومته کیردی ، بزى ضرب و طرد ایتدی » دیو باغرمشلر  
بعده ابو موسی کلدکده اشتر آنی دخی طرد ایش ایسه ده ابو موسی  
« بو اخشاملق بکامساعده ایت » دیو یالوارمش ، اوده روی مساعده کوسترمش  
حسن بن علی رضی الله عنهما حضرتلری ایسه « ای ناس ! بن یارین صباحا  
حرکت ایده جکم . کله جک اولنلر بنمه برابر کلسون » دیو بیوردی .

فرداسی حسن و عمار رضی الله عنهما ایله برابر کوفه دن طقوز بیـ  
قدر عسکر حرکت ایله امیر المؤمنین جانبنه عزیمت ایلدیلر .

ذی قار موقعنه واصل اولدقلرنده حضرت علی آنلری تلطیف بیورد  
و دیدی که « ای اهل کوفه ! سز ملوک عجم ایله جنک ایتدیکز ، آنلرک جمعیتلر  
طاغندیکز ، حتی میرائلری سزه قالدی . بو کره سزى دعوت ایلدم . تا  
برلکده بصره ده کی اخوانمزه کیده لم آنلری حقه دعوت ایده لم » .

## وقعة جمل

بروجه بالا ( ذی قار ) موقعده خیلی عسکر طوپیلاندى . عبدالقیس قیله سی دخی امیرالمؤمنینک یولی اوزرنده آنک ورودینه منتظر ایدیلر . حضرت علی ، کوفه رؤساسندن ( قَعْقَاع ) رضی الله عنہی تعلیمات مخصوصه یله بصره یه کوندردی .

قَعْقَاع ، بصره یه واردقده ابتدا حضرت عایشه نك یاننه وارمش « ای والده من ! بوبلده یه نیچون کلدک » دیو صورمش . اوده « امتک حالی اصلاح یچون » دیو جواب ویرمش .

بونک اوزرینه قَعْقَاع « طلحه وزبیری دعوت ایله . کلسونلرده آنلر ایله محاوره مزى دیکله » دیمکله حضرت عایشه دخی آنلره خبر کوندرمش . طلحه زبیر کلوب قَعْقَاع ، کیفیتی آنلردن سوال ایتدکده آنلرده حضرت عایشه نك موزینی تأیید ایلشلر .

قَعْقَاع دخی « اصلاح دیدیککز نه در ، بکا خبر ویریکز » دیمکله « عثمانک اتلاری حقنده قصاصک اجرا سیدرکه ترک اولنورسه کتاب اللهم حکمنی رک دیمک اولور » دیمشلردر .

قَعْقَاع دیمشکه « سز بصره اها لیسندن آلتی یوز آدم قتل ایتدیککز . سزه آلتی بیک آدم غضب ایلدی . ( خَرْقُوصُ بن زُهَير ) ی طوتمق ایستدیککز . آلتی بیک آدم آنی حمایه ایتدی . اکر آنلری بو حال اوزره ترک ایدرسه کز یدیککز محذورده واقع اولورسکز واکر هپ سزدن آیری طورانلرایله حرب ایده جک اولورسه کز بتون ( مُضَر ) و ( ربیعہ ) قبیله لری سزک لمیکز قیام ایدرلر . اصلاح نره ده قالور » .

حضرت عایشه « او یله ایسه بو خصوصده سنک رایک نه در » دیمکله قَعْقَاع « بودردک دواسی فتنه یی تسکیندر . فتنه ساکن اولنجه عثمان اوزرینه تروج ایتمش اولانلر خلجان وحیرته قالورلر . بو فرصتی غنیمت بیلکز ،



خيرہ آلت اولگنز. بزی بلايه صوقايكز والاطرفينك هلاكنه بادی اولور،  
دیو جواب ویرمش .

آنلر دخی « رأیگده اصابت ایلدك وکوزل سویلدك. اکر علی ده سنك  
رأیگده اوله رق بورایه کلورسه ایش بیتر ، فساد بر طرف اولوب کیدر »  
دیملری اوزرینه قعقاع ممنون اوله رق عودت ایلشدر .

حال بوکه او اتئاده بصره لیلردن بر چوق خلق ( ذی قار ) ه کلوب اهل  
کوفه دن اولان اخوانلری ایله کوروش مشلر و مجرد صلح و صلاح نیتند  
اولدقلرینی بیلدیر مشلر ، کوفه لیلر دخی آنلره بو وجهله سویلیه رك آنلری  
امیر المؤمنینك حضورینه چیقار مشلر .

الحاصل بصره دن کلمش اولان مسافرلر ، ملتفت و ممنون اوله رق عودت  
ایلیوب قعقاع دخی مصالحه و مسالمة خبریله ( ذی قار ) ه واصل اولنجه آرتق  
صلح و صلاح طرفی قوت بولدی و هر کس ممنون و منشرح اولدی .

آنك اوزرینه حضرت علی قالقوب برکوزل خطبه اوقودی. شویله که :  
جناب حقه حمد و شکر ایتدی و عربك زمان جاهلیتده کی بدبختلغنی و بعدالاسلام  
بختیارلغنی و زمان سعادتدن صکره بلطفه تعالی اوچ خلیفه بیعت ایله متفق  
و مجتمع قالدیغنی و بو حادثیه آنحق دنیایي طلب و بشقه سنه حسد ایدرك  
هر شیئی کیر و چویرمك خولیا سننده بولنان اقوامك باعث اولدیغنی ذکر  
ایتدی . بعده « یارین صباح بصره یه عزیمت ایده جکم. عثمان علیهنه خروج  
ایدنلردن و آنلره اعانه ایلینلردن کیمسه بنمله برابر گلسون » دیو بیوردی .  
( ابن سودا ) دیو معروف اولان و سبائیة کروهنك رئیس بولناز

( عبدالله بن سبأ ) و ( خالد بن ملجم ) و ( اشتر ) کبی مقدما حضرت  
عثمان علیهنه خروج ایتمش اولان رؤسا ، حضرت علینك بو امرندن  
قوشقولانمشلر و کیجه طویلانوب مشاوره ایتمشلر و دیمشلر که « علی ،  
کتاب اللهك احکامنی اهل جلدن اعلی بیلور و اجراسنه ده ا زیاده اقدام  
ایدر. عثمان علیهنه خروج ایتمش اولانلر ، شمدی هپ آنك یاننده اولدیغنی  
حاله باقك نه دیور ، ایکی طرف باریشینجه نه اوله حق دوشونملی یز . »

ایچلرندن اشتر، دیمش که « والله ، بزم حقمزده ایکی طرفک رأی بردر .  
 بارشدقلری کبی بزی اعدامه قیام ایدرلر . کلیگز، طلحه نك اوزرینه هجوم ایله  
 آنی عثمانه الحاق ایدلم . آندن صکره بزم راحت طورمه مزه راضی اولورلر  
 وبونکله اکتفا ایدوب ایلروسنه کیتملر « دیدکده ابن سودا ، دیمش که  
 « طلحه نك یاننده بشییک قدر آدم وار . سز ایسه بوراده ایکی بیك بشیوز  
 قدر آدمسکز . بو دیدیککیزی یاپه مازسکز » .

( عَلِيَّاهُ بْنُ هَيْثَمٍ ) « ایکی فرقه دن ده آریله لم وانجام کاره منتظر اوله لم .  
 دیدکده ابن سودا ، دیمش که « ناس سزك یالکز قالدیغکیزی ایسترلر وسزی  
 یالکز کوردکلری کبی اوزریکزه هجوم ایدرلر »

( عَدِيَّ بْنِ حَاتِمٍ ) دیمش که « بن نه عثمان اوزرینه خروج وحرکته رضا  
 کوستردم ، نه ده بونی کریه کوردم . اما دیدیکگز واقع اولوب ده ایش  
 بوراده یه کلورسه بزمده آتمز وار ، سلاحمز وار . سز ایلرو کیدرسه کز  
 بن ده کیده رم ، کیرو قالورسه کز بن ده قالورم » .

بعده ( سالم بن ثعلبه ) و ( سُوَيْدُ بْنُ أَوْفَى ) « ایشکزه برقرار ویریگز »  
 دیمکله ابن سودا « ای قوم ! سزك عزت وقوتکز ناس ایله اختلاطده دره  
 شمدی آنلره مداهنه ایدیکز وایکی طرف یکدیگره ملاقی اولدقده آره لرنده  
 بر غوغا چیقاریکز که یکدیگریله جنکه مجبور ومشغول اولسونلر ، سزده  
 قورقدیغکزدن قورتیله سکز » دیوب دیگرلری دخی آنی تصدیق ایتمکله  
 ینه اردودن دور اولماق اوزره قرار ویرمشلر وبوقرار اوزره طاعلمشلر .  
 سائر ناس آنلرک بو اتفاقدن آگاه دکل ایدیلر .

حضرت علی ، صباحلین حرکت ایله عبدالقیس قبیله سنک اولدیغی محله  
 ایندی . آنلرده آکا قاتلدی . وآنلر ایله برلکده حرکت ایدرک (زاویه)  
 نام قریه یه قوندی و آندن بصریه عازم اولدی .

اصحاب جمل دخی ایلر وحرکت ایله (عبدالله بن زیاد) ک قصری پیشگاهنده  
 متلاقی اولدیلر .

بکر بن وائل قبیله‌سی، عبدالقیس ایله خبرلشدیلر وکلوب حضرت علی ایله برلشدیلر . بو ایکی بیوک قبیله‌نک التحاقی ایسه خلیفه اردوسنه خلی قوت وانظار ناسده مهابت ویرمشدر .

بصره‌نک بیوک شیخلرندن اولان ( احنف بن قیس ) حج ایچون مکه‌یه کیدرکن مدینه‌یه اوغرا دینی وقت حضرت عثمان محصور اولوب احنف آنک نهایت مقتول اوله جغنی آ کلامش و او زمان حضرت عایشه مدینه‌ده بولمغله احنف ، آ کا وطلحه وزیره واروب « عثماندن صکره کیمه بیعت ایلیه‌یم » دیدکده اوچی‌ده « علی‌یه » دیمشدر . متعاقباً حضرت عثمان مقتول اولوب حضرت علی خلیفه اولمغله احنف ، مکهدن عودتنده مدینه‌یه کلوب حضرت علی‌یه بیعت وبعده بصره‌یه عودت ایلش و عایشه وطلحه وزیر بصره‌یه واروب احنفی ، علی ایله محاربه‌یه دعوت ایلدکلرنده احنف حیرته قالمش و « سز بکا علی‌یه بیعت ایله دیمدیگز می » دیو صورمش . « اوت دیمشیدک اما ، او صکره تبدیل وتغیر حال ایتدی » دیمشدر . احنف دخی « بن بیعتی نقض ایتم ، ام المؤمنین ایله محاربه‌ده ایله‌م . لکن جمعیتک ایچندن چیقوب بر طرفه چکیلیرم » دهرک آلتی بیک قدر آدم ایله بصره‌یه ایکی ساعت مسافه‌سی اولان ( جلجا ) نام موقعه چکلمش ایدی .

بوکره احنف بن قیس ، امیر المؤمنینک حضورینه کلدی . ماجرای حکایه ایتدی و « دیلر سه‌ک سنکله برلکده جنک ایدیم و دیلر سه‌ک اون بیک قلیجی محاربه‌دن منع ایتمک اوزره بی طرف طورهم » دیدی .

حضرت علی ایکنجی صورتی ترجیح بیوردیفندن احنف هان ( تمیم ) و ( بنی سعد ) قبیله‌لرینه ندا ایتمکله جمله‌سی آ کا تابع اولدی . اودخی آنلر ایله برلکده بی طرف قالمق اوزره کافی السابق چکیلوب جمعیتدن خارج قالدی . بالاده بیان اولندیغی اوزره قعقاع ایله اصحاب جل آرهلرنده ویرمش اولان قرار اوزره مصالحه شقی قوت بولمش ایسه‌ده ینه ایکی طرفده جنک ایستینلر چوق ایدی .

حتی اصحاب جلدن بعضیلری، همان حربه مباشرت اولمسنی (زبیر بن العوام).  
حضرتلرینه تکلیف ایتمش، او دخی قعقاع ایله ویریلان قراردن بچمله  
اعتذار ایلش.

برو طرفدهده بعضیلر، همان حربه مباشرت اولمسنی حضرت علییه  
اخطار ایتدکده او دخی جنکی منع بیوردی وطلحه وزیره «اگر قعقاع  
ایله ویرمش اولدیغکز قرار اوزره ثابت ایسه کز محاربه صددرلندن واز  
چیککز. اینهلم، ایشمزه باقهلم» دیو خبر کوندردی.

او ائناده طلحه وزیره، ایلروچیقمغله حضرت علی دخی میدان چیقوب  
آنلرک یاننه واردی وآنلره خطاباً «مقاتلهیه حاضر اولمش سکز اما حضور  
باریده بر عذر و سبب دخی حاضر ایتدیکزمی. بن سزک دین قرنداشکز  
دکلی یم، سزه نیم قائمی حلال قیلاجق بر سبب حادث اولدیمی» دیو  
بیوردی.

بعده طلحهیه خطاباً «یا طلحه! کندی حرمکی خانه سسندده ترک ایله  
رسول الله صلی الله علیه وسلم حضرتلرینک حرمی بورایه کتوروبده آنکله  
برلکده مقاتله می ایده جکسین. سن بکا بیعت ایلدکمی» دیدکده طلحه  
«اوت اما قلیج بویمک اوزرنده ایدی» دیو جواب ویردی.  
مع مافیه حضرت علینک سوزلرندن متأثر اوله رق حضرت طلحهیه  
بعض مرتبه تردد وندامت کلدیکی دخی مرویدر.

بعده حضرت علی، حضرت زبیره خطاباً «یا زبیر! خاطر گده میدرکه  
بر کون رسول الله صلی الله علیه وسلم حضرتلری سکا خطاباً: (سن ظالم  
اولدیغک حالدده علی ایله مقاتله ایده جکسین) دیو بیورمشدی» ذه نیجه حدیث  
شریف، زبیرک خاطرینه کلدی. صانکه بردرین اویقودن اویانوبده کندینه  
کلدی. «اوت یارب» دیدی، و «اگر بو حدیث شریف اولجه خاطریمه  
کسه یدی بورایه کلزدم، والله ابدأ سنکله مقاتله ایتم» دیو یمین ایتدی.  
بوقرار اوزره آیریلوب حضرت علی عودتنده اصحابنه «زبیر، سزکله  
جنگ ایتمه مک اوزره یمین ایتدی» دیو بیورمش.

زير دخي رفقاسي ياننه وارمش ، کيفتي بيلديرمش وعائشه صديقه  
 « نه يابه جقسين » ديو صورددقه « صاووشوب کيده جکم » ديو جواب  
 ويرمش .

اوغلي . ( عبدالله ) ايسه آکا اعتراض ايله « ايکي فته يي بريره کتوردك .  
 تمام اوروشه جقلى وقت صاووشمق ايترسين ، بودکل ، آسن ابن ابى طالبك  
 بيراقلى آلتنده كي يکيتلردن قورقدك » ديمکله زير « نه يابه يم ، يمين ايتدم »  
 ديدکده عبدالله « يمينگه کفارت ويرده ينه على ايله جنك ايت » ديه رک  
 کوله سي . ( مکحول ) ي آزاد ايتديرمش اولديني مرويدر .

طلحه وزير ، عشره مبشره دن اولدقلى حالده رأى واجتهادلرنده  
 خطا ايده رک فته نك بويومه سنه بادی اولمشلر ايسه ده وقوعاتك سياق  
 وسباقنه نظراً آکلاشي لورکه آنلرک بومرتبه ايلرو کيتملرينه اوغللى  
 سبب اولمشدر . على الخصوص حضرت زير ، سالف الذکر حديث شريفى  
 تخطر ايده رک حضرت على ايله محاربه ايتمه مک اوزره يمين ايتمشيکن اوغلنک  
 اومرتبه جنک اوزرينه اصرارى بادی تعجيدر .

بدرلر بارشمق ايتستور ، اوغللى راضى اوليور . طوغريسي بوکه  
 انسانه مال واولادی بيوک فته در .

اصحاب کرام ، کندولرني حقلی ظن ايده رک مقاتله ايتدکلرندن اجتهادلرنده  
 خطا ايتسه لر بيله معذور اولورلر . اما دنيا ايچون جنک ايدن سائر ناس ،  
 ظالم اولدقلى حالده مقتول اولورلر .

اويله اولسون ، بويله اولسون . فتوحات اسلاميه نصرت ايده جک اولان  
 بونجه شجعانک بربريني قتل ايتملرينه تأسف ايتماک ممکن دکدر .

نه غريب تماشا ونصل فته عظمادرکه : حضرت على خليفه رسول الله  
 اولوب اوغللى سبطين مکرمين وعمار بن ياسر کي خواص اصحاب کرامدن  
 برذات واصحاب بدردن وشجره رضوان آلتنده بيعت ايلين صحابه کزيندن  
 نيچه ذوات موجود اولديني حالده قارشوسنده جنکه مهيا اولان بيگلرجه  
 باغيلر دخي طلحه وزير کي کبار اصحاب کرامدن ايکي ذات جليل القدرك



امرینه تابع ایدیلر و آنلره ظہیر اولان عایشہ صدیقہ نك بر برادری کندی یاننده و دیگر بر برادری دخی امیر المؤمنینك معیتده ایدی .

اوزمان بصره اہالیسی اوچ فرقه اولوب بری (احنف بن قیس) و (عمران بن حصین) کبی بی طرف ایدی . دیگر بری امیر المؤمنینہ و دیگر بر فرقه سی دخی اصحاب جملہ تابع ایدیلر .

بوصورتلہ ایکی قسمہ منقسم اولان قبیلہ لرك بر قسمی ، دیگر قسمہ مقابل اولہ رق قونمشلر ایدی .

شویلہ کہ کوفہ (مُضر) یلری، بصرہ (مضر) یلرینہ و کوفہ (ربیعہ) سی، بصرہ (ربیعہ) سنہ و سائر قبیلہ لرك دخی ہر قسمی ، کندی ہم جنسنہ قارشو قونوب ایکی طرف ، بربرینہ خصم جان اولہ رق جنکہ حاضر لائمشلر ایدی . امیر المؤمنینك اردوسی یکر می بیك نفر دن عبارت ایکن اصحاب جملك معیتده کی باغیلر اوتوز بیك نفرہ بالغ ایدیلر .

طرفین بو وجہلہ حربہ آمادہ اولدقلری خالدہ مصالحہ وقوعنی قویاً مأمول ایتمکده ایدیلر .

طلحہ وزیر « بز قعقاع ایلہ ویردیکمز قرار اوزرہ یز » دیو امیر المؤمنینہ خبر کوندر دیلر . (عبدالله بن عباس) آنلرك یانہ کیتدی . (محمد بن طلحہ) دخی برو طرفہ کلوب امیر المؤمنین ایلہ کوروشدی . طرفین بربرینہ یاقلاشدی ، مسالہ و مصالحہ مذاکرہ سنہ کیرشدی .

حال بوکہ حضرت عثمانك (فسیکفیکہم اللہ ..) آیت کریمہ سی اوزرینہ طاملامش اولان قانی ایچون اقدمجہ طلحہ وزیر ایلہ عثمان بن حنیفك دوکدیککی قانلر بر خلیفہ نك قان بہاسی اولمیوب دہا پك چوق قانلر دوکلك لازمہ حالدن ایدی . ا کرچہ بروجہ بالا مصالحہ همان فعلاہ کلہ جك کبی گورینوردی . لکن ایچ یوزندہ محاربہ اسبابی حاضر لئمقدہ ایدی .

شویلہ کہ : طرفین بارشدقلری کبی حضرت عثمان علمینہ خروج ایتمش اولانلرك تأدینہ قیام اولئق مقرر اولدیغدن آنلرك (عبدالله بن سبأ) و (خالد بن ملجم) و (مالک اشتر) کبی رؤسائی نفسلرینك سلامتی ایچون طرفینی جنکہ



طوتشدير مق اوزره كيجه اجتماع و مذاكره ايدرك و يردكاري قرار اوزره همان اصحاب جل اوزرينه هجوم ايشلر و حقيقت حالدن كيمسه نك خبري اولمديني جهته هر قيله قارشوسنده كي هم جنسيه جنكه باشلامشلا . طلحه وزير ، صاغ وصول قوللره آدملا كوندرمشلا . كندولري ده قلب عسكركه كلوب « بو نه » ديو صورمشلا . ناس دخي « اهل كوفه كيجه لين بزي باصدي » ديوجواب ويرمشلا . ايكي سي ده « علي ، قان دو كمدكجه واز كچميه جك » ديو آنك حقنده سوء ظن ايشلا .

حضرت علي صيحه لري ايشيدنجه « بو نه » ديو سوردی . سبائه گروهی ايسه آنك يانه بر جاسوس كوندرمشلا ایدی . ايشته اوجاسوس حضرت علي به « نه اولديغني بيلمورز . اصحاب جملك بر فرقه سي كيجه لين بزي باصدي ، بزده دفع ايلك واصحاب جملي جنكه مهيا بولدق » ديو جواب ویردی .

آنك اوزرينه حضرت علي ، صاغ وصوله مأمورلر كوندردی و « طلحه وزير ، قان دو كمدكجه بوايشدن واز كچميه جكلر » ديو بيوردی .

( كعب بن سور ) دخي نزد عايشه يه واردی و آنی خانه سندن چيقاردی . معهود دوه نك اوزرينه بيندردی . محففسنه زهرلر كيدردي . دوه نك يولارندن طوتوب يده رك خارج شهرده غوغايي ايشيده جك بر موقعه كتوردی . طرفين سبيتي بربرينه عطف ايده كورسون ، آرتق عسكرك اوكنی آلمق قابل اوليوب طرف طرف يكديكري اوزرينه هجوم ايلديلر و غايت شدتلي و خونريزانه بر محاربه يه باشلاديلر . بو صورته سبائه گروهی دخي مرادينه ایردی .

زير رضي الله عنه ، بوجه بالا حضرت علي ايله جنك ايمه مك اوزره يمين ايتمشكن اوغلي ( عبدالله ) آنی آليقومشیدی . بوكره بغته محاربه ظهور ايدنجه نه ياپه جغني شاشيرمش و همان اوغلي عبدالله ي چاغيرمش « بو كون يا ظالم ، يا مظلوم قتل اولنه جق . بن ظن ايدرم كه مظلوما قتل اولنه جغم . اك

بیوک غم و غصه بوجلرمدر. اموالی صات، بوجلریمی ویر « دیمش وایستر ایسته مز میدان حربه آت سورمش ایدی.

أَبُو الْقِظَّانْ، یعنی عمار بن یاسر، قارغی ایله زییرك اوزرینه حمله ایتدی. زییر دخی آنك حمله سنی صاوشدوردی. لکن حیرتده قالدی ودرین فکرلره طالدی.

زیرا رسول اکرم صلی الله علیه وسلم حضرتلری « هر کیم عماره بغض ایدرسه الله آکا بغض ایدر» دیو بیورمش وبرکون (واه واه عماری برفئه باغیه، یعنی بر باغی جماعت قتل ایده جک) دیمش وینه برکون (عمار! سکا مرده. سنی برفئه باغیه قتل ایده جک) دیو عماری شهادت ایله تبشیر بیورمش ایدی.

بو حدیث شریفلرک مقتضالرینه نظراً عمار، اکر بو محاربه ده قتل اولته جق اولور ایسه اصحاب جملک باغی اولدقلری ثابت اوله جق. زییر ایسه آنلری حقلی ظن ایتمکله آنلره قارشیمشیدی.

بناءً علیه عمار رضی الله عنه، زییر رضی الله عنه اوزرینه قارغی سنی طوغرولندقجه زییر آنی دفع ایدردی. لکن بالمقابله آنك اوزرینه حمله و هجوم ایتزدی.

یوقسه عمار، پک اختیار وضعیف البنیه اولوب زییر ایسه قیلیج اورمقده فوق العاده ماهر و مشهور بر جندی اولدیغندن ایسته سه بر اورشده عماری قارغی سیله برابر یره دوشوردی.

عمار دخی زییر کبی عشره مبشره دن بر ذات جلیل القدره قیامازدی. لکن حضرت علینک حقلی اولدیغنی بیلدیکندن وظیفه دینه سنی ایفا ایچون کندوسنی جنکه مجبور کورویور و زییرك اوزه رینه پیدرپی حمله ایدیور ایدی.

زییر ایسه آکا هجوم ایده مدیکندن «یا ابا القظان! بنی اولدرمکی ایستیور سین» ده یینجه عمار دخی «خیر. سنی اولدرمک ایستمم. لکن

بورادن صاووش، کیت، دیدی. زیرایسه بورایه کلدیکنه پشیمان اولدیغندن همان صاووشوب کیتدی.

بو ائنده ایسه طرفین هر قولدن بربری اوزرینه هجوم ایدرک حرب وضرب پک زیاده شدت بولدی. عسکرک قورقونج صیحه لری و آجی آجی فریاد لری آره سنده چکرکه آلای کبی هواده اوچان اوقلرک ویزلدیسی ایشیدلمز اولدی. آت لرک آیقلری آلتندن قات قات قالقان توزلردن هوا بوز، بولانیق اولوب کوز کوزی کورمز اولدی. قلیجلر ایسه بلوت ایچنده لمعان ایدن شیمشکلر کبی پارلایوب کوزلری قاشدیر یوردی.

نهایت خلیفه عسکری غلبه چالدى واصحاب جمل فنا حالده بوزولدی وپراکنده وپریشان اوله رق بصره یه طوغری فرار ایدوب خلیفه عسکری ایسه آنلری تعقیب ایدیوردی.

اواننده طلحه، دوچار تردد و حیرت اوله رق صفرلک آره سنه چکیلوب طور مقده ایدی. ناگاه کندوسنه بر اوق طوقوندى. یاره سی پک آغر اولقله درون شهره نقل اولندی.

طلحه ایسه بویننده بیعت اولمדיنی حالده آخر ته کیتمکدن خوف ایتمکله حضرت علینک عسا کردند برینه راست کلدکده «سن امیر المؤمنینک اصحابندیمسین» دیوب اودخی «اوت» دیمکله «الکئی ویر. آنک ایچون سکا بیعت ایدهیم» دیه رک بالواسطه حضرت علی یه بیعت ایلشدر.

بصره یه کیررایکن ندامتی مشعر بیتلر اوقویوردی. بر خراب خانه ده اسکان ایدلدى. قانی دیندیر یله میوب چوق چکمکسزین فوت اولمشدر. بو اوقی آتان، ( مروان بن الحکم ) ایتمش که بالاده بیان اولندیغی اوزره طلحه یی حضرت عثمانک قاتل لردن عد و اعتقاد ایدر اولدیغنه مبنی بو قارغشه لنی فرصت اتخاذا ایدرک همان بر اوق آتوب آنی شهید ایلش و حضرت عثمانک اوغلی (ابان) ه «بابا کک قاتل لردن بعضیسی قتل ایتمدم. آرتق انتقام سوداسنه دوشم» دیمش.

حضرت عایشه یه کلنجه: بروجه بالا خارج شهرده معهود دوه اوزرنده

طورر ایکن بریوک فریاد وواویلا ایشدکده یاننده کیله « بونه » دیمش .  
 « عسکرک فریادی » دیمش . « خیرمی ، شرمی » دیو صورمش . « شر »  
 دیو جواب ویرمش . ایشه اوصرده زیررضی الله عنه حضرتلری میدان  
 محاربه دن صاووشوب حضرت عایشه نك نظرگاهندن مرورایله ( وادی سباع )  
 طوغری کیتمش و آرقه سندن بوزغون عسکر کلوب چاتمش ایدی .  
 حضرت زیر برکوله سیله برابر وادی سباعه کیدرکن احنف بن قیسک  
 عسکری یانندن مرور ایتدکده برآدم کلوب « ایشه زیر کیدیور » دیمکله  
 احنف دخی « ایکی عسکری بربرینه دوشوروبده کندوسی دوندیمی »  
 دیمش .

اوراده بولنان ( عمرو بن جرموز ) زیرک آرقه سنه دوشمش وایکی  
 رفیقيله برابر ایلغار ایدرک وادی سباعده زیره یتشمش . نماز قیلماق  
 ایچون حیوانلرندن ایندکلرنده ابن جرموز حضرت زیرک آرقه سنه قاله رق  
 هان آتی زره نك یاقه سندن اوروب شهید ایلدکن صکره قلنجنی آلوب  
 احنفک یانه کش وکیفیتی بیان ایتمش .

احنف « ایومی ایتدک ، قنمی بيلم » دیمکله ابن جرموز ، او قلیجی  
 بارگاه خلافته کتوردی وزیرک قاتلی اولدیغنی پرده جیه خبر ووروب حضور  
 خلیفه کیرمک ایچون اذن ایسته دی .

برده جی ایچروکیروب کیفیتی عرض ایتدکده حضرت علی « رسول الله  
 صلی الله علیه وسلمدن ایشتم ( زیرک قاتلنه نار ایله مژده ایدیگز ) دیو  
 بیوردی . هایدی وار ، ابن جرموزه جهنم ایله مژده ویر » دیدی .

ابن جرموز، زیری قتل ایتدیکنندن طولای مژده بها اوله رق حضرت  
 علیدن کیتلو عطیه اومار ایکن اوله برچیرکین مژده یی آلتجه غضبه کلوب  
 شکایت وتزیف یوللو سوزلر سویلیهرک جهنم اولوب کیتمشدر .

حضرت عایشه کلتجه بوجه بالا معهود ( عسکر ) نام دوه اوزرنده  
 وبر احتیاط اردوسی مقامنده طوروب کندی عسکرینک پریشان اوله رق  
 کلدکلرینه کال حزن وتأسف ایله نظر ایدیوردی .

بوزغون عسکر ، بصره یه قدر کلدکده دوهی و یاننده آتلولری کورنجه دونوب اوراده اجتماع ایلدیلر . کندولرینی ددروب طوپلادیلر و تکرار جنکه حاضر اوله رق صف باغلادیلر .

امیر المؤمنینک مقدمه الجیشی ایسه اورایه یاقلاشمش اولدیغندن حضرت عایشه ، کعب بن سوره بر مصحف شریف و یروب « دوهنک یولارینی براقده ایلری کیت وناسی بوکا دعوت ایت » دیدی .

کعب ایلرولدی و کلنلری قرآن کریمه دعوت ایلدی . سبایه کروهی آنی اوق ایله اوروب اعدام ایتدیلر و حضرت عایشه نك محفه سنی اوقه طوتدیلر . حضرت عایشه فریاد ایله اطرافدن امداد ایستدی . صاغ و صوله آدمیر کوندروب ناسی جنکه تشویق ایلدی .

مضر قبیله سنك بصریونی ایله کوفیونی ایلرولدیلر و دوهنک اوکنده یکدیگری اوزرینه جمله و هجوم ایلدیلر . بوضورتله تکرار برقانی محاربه یه باشلاندی .

کوفه رجاندن اولوب کوفه مضریلری ایله برابر بولان (زید بن صوحان) و برادری (سیحان) شهید اولدی و برادرلری (صعصعه بن صوحان) یاره لاندی و محاربه کیتدکجه شدتلندی . کوفه نك ینیلری ایله ربیعهمی کیر و قالمشالر ایکن ایلرولوب برشدتلی محاربه یه کیرشدیلر . ایکی طرفک شجعانی « صبر و ثبات » دیو باغرشدیلر .

عسکرک اوقلری بیتدی ، قارغیلر ایله اورشدیلر . قارغیلری قیرادی ، کوکس کوکسه کلدیلر و بعده شدتلو برقلیج محاربه سنه کیرشدیلر .

پیدرپی بیراقدارلردن بری دوشدکده یرینه دیکری کچردی . بوضورتله بیراقلر آلتنده پک چوق آدمیر تلف اولدی و نیچه خانلر قپاندی .

محاربه و مضاربه دوهنک اوکنه کلدی . دوه ، برسنجاق مقامنه قائم اولدی . یولارینی طوتانلر دوشدکجه یرینه دیکرلری کچردی . بو صورتله دوهنک یولاری اوزرنده یالکنز قریشدن قرق کشی قتل اولندی و (مروان بن حکم) ایله (عبدالله بن زبیر) یاره لاندی .

(اَزْد) قبیله سمندن برآدم دوهنك يولارینی طوتار ایکن اهل بیتدن اون اوچ کشتی ایله برابر اعدام قیلندی .

الحاصل دوهنك يولاری اوزرنده نیچه الله کسیددی و نیچه جانلر بدندن جدا اولدی . نهایت حضرت علی «دوهنی سیکیرله یك» یعنی آیاقلرینك سیکیرلرینی کسیک ، دوه یره دوشدیکی کبی باغیلر طاغیلور «دیو ندا بیوردی .

هان عسکردن بری دوهنك آیاغنه اوردی . دوه بر یاننه دوریلور ایکن يك شدید و عجیب بر صیحه ایله حایقردی .

دوه دوشدیکی کبی باغیلر طاغیلوب فراره یوز طوتدیلر . هان حضرت علینك امریله دالالر (قاچانلرك آرقه سسنه دوشمیک ، یاره لولری اولدیرمیک ، خانه لرده کیرمیک ) دیو ندا ایتدیلر .

حضرت علی ، ( محمد بن ابی بکر الصدیق ) ی چاغردی . « وار ، عایشه ایچون بر چادر قور و یازه سی بره سی وارمی ، باقده خبر کتور » دیو بیوردی .

محمد بن ابی بکر الصدیق و عمار بن یاسر رضی الله عنهم واردیلر ، دوهنك اوزرنده کی محفه یی یوکلنوب مقتوللر آره سندن چیقاردیلر و بر خالی محله کتوردیلر .

محفه یه او قدر اوق صاپلانمشدی که کیرینییه دونمشیدی . لکن اوزرنده زره اولدیغندن اوقلر ایچرو ایشله ممشیدی .

صکره امیر المؤمنین حضرتلری ، حضرت عایشه نك یاننه واردی . حال و خاطرینی صورتی .

بعده کوفه رجالتدن بعض ذوات ایله قعقاع رضی الله عنه کیدوب کوروشدکرنده حضرت عایشه «کشکه بوندن یکرمی سنه مقدم وقات ایلمش اولیدم » دیو بیوردی .

اخشام اولنجه حضرت عایشه یی برادری محمد آلوب بصره ایچنده برقوناغه کوتوردی که اوراده برطاقم قادینلر آغلا یورلردی .



زیرا قوناق صاحبی حضرت عایشه طرفنده و برادری حضرت علی طرفنده بولنوب ایکسی ده محاربه ده مقتول اولمشلر ایدی .  
کیجه لین یاره لیلر ، مقتوللر آره سندن برر برر صیویشدیلر و بصره یه کیروب خانه لرینه ایرشدیلر ، اولاد و عیال لر یه کوروشدیلر .  
فرداسی حضرت علی ، مقتوللری طولاشدی . حضرت طلحه یی توز ، طوپراق ایچنده یاتور کورنجه آغلامغه باشلادی و یوزندن توزلری سیله رک « انالله وانا الیه راجعون . والله ، بن برقریشی بی بویه یره دوشوب سرباش کورمک ایستمزدم » دیه رک عظیم تأسف ایلدی . او صره ده ( محمد بن طلحه ) یی دخی مقتوللر آره سنده کوروب و آکاده بشقه جه تأسف ایدوب آغلادی .

بعده حضرت علی ، مقتوللرک دفنه رخصت ویردی . بصره اهالیسی شهردن چیقوب موتالرنی دفن ایتدیلر .  
خلیفه عسکرینک شهداسی ایله اصحاب جملک مقتوللری صاییلدی . مجموعی اون بیکه بالغ اولدی .

اولجه دخی اوچییک قدر آدم قتل اولمش ایدوکندن جل وقعه لرنده مقتول اولنلرک مجموعی اون اوچ بیکه بالغ اولمشدر .  
عسکر النده نه قدر مال وار ایسه حضرت علی آنلری جمع ایتدیردی . و بصره مسجدینه کوندردی . اوزرنده میری تمغاسی اولانلرندن ماعداسنی اصحابنه ویردی .

حضرت علیدن اصحاب جملک احوالی سؤال اولندقد « دین قرنداشلریمز اولوب اوزریمزه بنی و خروج ایتدیلر » دیو بیوردی .  
امام اعظم ابوحنیفه رحمه الله علیه رحمه واسعه حضرتلرندن مرویدرکه « حضرت علینک و امیر واعمالی معلوممز اولمسه باغیلر حقنده نه معامله اولنق لازم کله جکنی بیله مز ایدک » دیمش و کفاره غلبه اولندقد ماللری بین الغزاة تقسیم و اولاد و عیاللری اسیر ایدیه کلدیکنه قیاساً بعض ناس ، اصحاب جل حقنده دخی اول وجهله معامله اولمنسنی ایستدکلرنده حضرت علی

« عایشه کیمک حصه سنه اصابت ایلجه جک » دهرک آنلری اسکات ایلش اولدینی مرویدر .

عقیب وقعه ده اخف بن قیس، بنی سعد قبیله سیله برابر کلوب امیر المؤمنینه عرض مطاوعت ایلدیلر .

وقعه جل، واسطه جاذی الاخره ده پنجشنبه کونی اولوب اوچ کون حضرت علی، بصره خارچنده قالدقن صکره بازار ایرتسی کونی درون شهره کوردی . بالجله بصره اهالیسی، حتی یاره لولری بیله بیراقلری آلتنده کلوب آکا بیعت ایلدیلر ،

بعده امیر المؤمنین حضرتلری، عبدالله بن عباس رضی الله عنہی بصره امیری نصب ایتدی وبصره وجوهندن (زیاد بن ابیه) ی خراج ویت المال اوزرینه مأمور ایدوب آنک رائنه توفیق حرکت ایلک اوزره ابن عباسه امر ویردی .

(زیاد بن ابیه) دهات عربدن وفصحای خطبادن برآدم اولوب حضرت عمر، آنی بصره جه بعض مناصبه استخدام بویورمشدی . بعده حضرت علی، حضرت عایشه نك مدینه یه قدر اولان لوازم راهنی تهیه بیوردی وآنکله برلکده بصره یه کلش اولانلرک ینه برلکده عودت لرینه رخصت ویردی و آنی برادری محمد بن ابی بکر ایله برلکده کوندردی . حضرت عایشه، بصره نساوندن انتخاب ایتدیکی قرق خانونی برابر کوتوردی .

یوم حرکتی که غره رجب ایدی حضرت علی کیدوب آنکله وداع وبرمیل مسافه یه قدر تشیع ایتدی . اوغللری حسن وحسین ومحمد بن حنیفه ایسه برکونلک مسافه یه قدر تشیع ایتدیلر (رضی الله عنها وعنهم) حضرت عایشه طوغری مکیه وبعدالحج مدینه یه کیدوب وفاته قدر اوراده گوشه نشین عزلت اوله رق کندوسندن صدور ایتمش اولان اشبو خطایی یاد ایله آغلامشدر .

طلمه نك ترجمه مالی

(طلحه بن عیدالله) رضی الله عنه حضرتلری، حضرت صدیقک

دعوتی اوزرینه اوّل باوّل ایمان ایدن بش کشیدن وعشره مبشره دن بریدر. اُحد غزاسنده کندوسنی رسول الله صلی الله علیه وسلم حضرتلرینه سپر ایتدی، باشندن مجروح اولدی وبرکافرك رسول اکرمه حواله ایتدیکی قلیجه قارشو النی طوتدی، آندن الی چولاق قالدی.

رسول اکرم صلی الله علیه وسلم حضرتلری « طلحه و زبیر جنتده بنم قومشولر مدر، دیو بیورمش وبوحدیث شریفی حضرت علی روایت ایلشدر. حضرت طلحه: قرمزی یه مائل بیاض رنگلی و کوزل یوزلو واورته بویلو ایدی. اون اوغلی ودرت قزی وار ایدی. وپک چوق ثروتی اولوب یومیه بیک آقچه ایرادی وار ایدی. حضرت عثمانک بعض اجرا آتسه شدتلی بر لسان ایله اعتراض ایدردی. فتنه ظهور ایله حضرت عثمان قتل اولندقدف فوق العاده متأثر و مکدر اوله رق دم عثمانی طلب یولنده فدای جان ایتکی تصمیم ایتشیدی. بروجه بالا یوم جمله قتل اولندی. لکن خلیفه عسکری طرفدن قتل اولنیوب مروانک خیانه آتدینی براوق ایله مغدوراً و مظلوماً شهید اولدی. اوزمان سنی آلمشی متجاوز ایدی. رضی الله عنه

### زبیرک ترجمه مالی

عشره مبشره دن زبیر رضی الله عنه حضرتلرینک پدری اولان عوام، زوجة رسول الله اولان خدیجة الکبری رضی الله عنها حضرتلرینک برادریدر. والده سی دخی رسول اکرمک خاله سی اولان (صفیه بنت عبدالمطلب) در. نوجوان ایکن ابوبکر الصدیق رضی الله عنه حضرتلرندن آرزو صکره ایمان ایتشدر. اوّل باوّل ایمان ایدنلرک دردنجیسی، یاخود بشنجیسیدر. ابتدا حبشه وبعده مدینه یه هجرت ایلشدر.

اسلامده ابتدا فی سبیل الله سلّ سیف ایدن اودر. رسول الله صلی الله علیه وسلم حضرتلری بیورمش که (هر پیغمبرک حواریسی واردر. بنمده حواریم، زبیر بن العوامدر).

اورته بویلو واسمراللون وخفیف اللحیه وسمیزجه وقوی البنیه ایدی.

حضرت ابی بکر الصدیقؓ بیوک کریمه سی (اسما) یی تزوج ایدوب آندن  
(عبدالله) و (عاصم) و (عمروه) و (منذر) نام درت اوغلی و (ام الحسن)  
نام کریمه سی تولد ایلشدر .

بیك كوله سی اولوب آکا خراج ویرلردی . كتوردكلى خراجدن  
بردرهمنی خانه سنده آلیقومیوب یاننده بولمالرله تصدق ایدردی .

مصرده و کوفه ده برر و بصره ده ایکی و مدینه ده اون بر باب خانه سی ودها  
بك چوق املاك و اراضی سی وار ایدی . (عوالی) مدینه ده و قتيله یوز یتمش  
بیك درهمه صاتون آلمش اولدینی اراضی واسعه ، ترکه سندن بر ملیون آتی یوز  
بیك درهمه صاتلش و اثمائی داینلرینه ویرلمشدر .

بالاده بیان اولندیغی اوزره یوم جمله جنکدن چکیلوب وادی سباعه  
واردقده (ابن جرmoz) نام ملعون آتی غدرآ و خیانه اوروب شهید  
ایلشدر . سنی یتشی تجاوز ایتمشیدی . رضی الله عنه

### بعضه وفیات

سابقا مصر والیسی اولان (عبدالله بن سعد بن ابی سرح) که حضرت  
عثمانك شهادتندن صکره (عسقلان) ده کوشه عزلت و انزوایه چکلمشیدی .  
علی و معاویه دن برینه بیعت ایلکسزین بوسنه فوت اولمشدی .  
مصر دن حضرت عثمان علیهنه کلش اولان اهل قیامك رؤساسندن  
(عبدالرحمن بن عدیس) که شجره رضوان آلتنده بیعت ایلنلردندر ، اودخی  
بوسنه وفات ایلشدر .

اصحاب بدر دن ایکی ذات ، یعنی (قدامة بن مظعون) و (عمرو بن ابی عمرو  
بن ضبة الفهری) دخی بوسنه وفات ایلشدر . رضی الله عنهم اجمعین .

حضرت علینک بصره دن کوفه یه عزیمتی

وشامدن ماعدا ولایتلرک بیعتی

بالاده بیان اولدینی اوزره حضرت علی ، اصحاب جملک ماللرینی اموال غنائم کبی بین العسا کر تقسیم ایتدیکندن طولانی سبائییه کروهی ناخشنود قالدیلر و « باغیلرک قانلرینی هدر ایدوبده ماللرینی حرام ویزی غنیمتدن محروم قیلمغه سبب ندر » دیهرک حضرت علی بی طعن ایدر اولدیلر و حضرت علیدن رخصت آلمقسزین قالقوب کوفه یه کلدیلر .

حضرت علی ، بصره حوالیسینک احوالی اصلاح ایچون بر مدت بصره ده اقامت ایلمک نیتنده ایکن شایدکه سبائییه نک بر کونه نیت فاسده لری وار ایسه آنلره میدان ویرمه مک اوزره همان اودخی بصره دن قالقوب کوفه یه کلشدر .

عراق وفارس وخراسان ویمین ویمامه وحجاز ومصر ولایتلری اهاالیسی حضرت علی یه بیعت ومطاواعت ایلوب فقط شام والیسی معاویه ، بیعتدن امتناع واهل شام دخی اکا اتباع ایتشدر .

بناء علی ذلک حضرت علی ، معاوییه بی بیعت واطاعته دعوت ایلمک وایا ایدرسه شام اوزرینه یوریمک نیتنده بولمغله آکا کوره اسباب لازمه نک تدارک واستکمالنه تشبث ایلشدر .

بعض وقایع ایران

وقعه جملدن صکره (مُسکة بن عَتَّاب الحِطَی) و (عِمْرَان بن فَضیل البرُجَی) عرب سرسریلرندن بر کروه ایله برلکده امام المسلمینک اطاعتندن خروج ایله سیجستانه کیتدیلر و بعض بلادی ضبط ایتدیلر . حضرت علی آنلره (عبدالرحمن بن جزء الطائی) بی کوندردی .

مسکه ، آنی قتل ایتمکله حضرت علی ، سجستانه بروالی کوندرمک ایچون  
بصره امیری عبدالله بن عباسه امرنامه کوندردی .

ابن عباس دخی ( رَبِیِّ ابْنِ کَاسِ الْعَنْبَرِی ) یی والی نصب ایدوب درت  
بیک عسکرله سجستانه کوندردی . ( حُصَیْنُ بْنُ ابْنِ الْحَرَّالْعَنْبَرِی ) دخی  
آنکله برابر ایدی .

سجستانه واردقلرنده (مسکه) آنرله مقاتله یه قیام ایتدی . لکن کندوسی  
مقتول وعسکری منهزم اولغله ربی ، سجستانی ید ضبطنه آلدی وبلاد  
سجستان حسن انتظام بولدی .

ینه او اثناده نیسابور طرفنده دخی عصیان ظهور ایتمکله حضرت علی ،  
( خَلِیدُ بْنُ قُرَّة ) یی اورایه کوندرمشدر .

### محمد بن ابی حذیفه نك احوالی

کبار اصحاب کرامدن، معاویه بن ابی سفیانک دایسی اولان (ابوحذیفه) ،  
رضی الله عنه ( یمامه ) جنکنده شهید اولدقده اوغلی محمد کوچوک قالمغله  
حضرت عثمان آنی آلوب اوز اولادی کبی تربیه ایتمشیدی .  
برکون سرخوش اولغله حضرت عثمان آکا حدشرب اوردی . آندن  
صکره کندوسی تائب ومستغفر اوله رق زهد وتقوی یولنی طوتدی وعبادات  
ایله مشغول اولدی .

حضرت عثمانن والیک استدعا ایتدکده « سن والیکه اهل دکلسین »  
دیمکله غزا وجهاد ایچون مصره کیتمک اوزره اذن آلدی . آنک اوزرینه  
مصره کیدوب مصر والیمی ( ابن ابی سرح ) ایله دکز جنککلرنده بولندی  
ومحمد بن ابی بکرالصديق ایله برلشوب ایکیمی دخی زهد وصلاح  
مسلکنده اولدقلری جهته بین الناس محترم اولدقلری حالده ابن ابی سرح  
حقنده و آنی والی ایتدیکی ایچون حضرت عثمان حقنده طعن وتشنیعه  
قیام ایتدیلر .



ابن ابی سرح، آنردن شکایت یولنده حضرت عثمانه عریضه کوندردی. حضرت عثمان آکا یازدینی جوابنامه ده « ابن ابی بکری، باباسنه وعایشه به باغشلامی. ابن ابی حذیفه ایسه بنم اوغلغمدر وبر قریش یاوروسیدر » دیو بیوردی.

بوکا جواباً ابن ابی سرح « بویاورو؛ بیودی، توپلندی. اوچسیقالدی، دیو تکرار عریضه کوندرمکله حضرت عثمان، ابن ابی حذیفه یی جلب واستماله ایچون کندوسنه اوتوز بیک درهم وبر یوک البسه کوندردی. ابو حذیفه بونلری مسجده کوتوردی، میدانه قودی « ای جماعت مسلمین! عثمانه باقک. بکا خدعه ایدوب امر دینده قیدسزلق ایتک ایچون بکا رشوت ویریور. بن دینی دنیایه دکیشورمییم » یوللو سوزلر سویله رک اذهان ناسی خلجانه کتوردی. ناس آرتق ابن ابی حذیفه یه اولکیدن زیاده تعظیم واحترام وحضرت عثمانه طعن وتشنیع ایدر اولدیلر. متعاقباً مصرده حضرت عثمان علیهنه خروج ایدن اهل قیام ایله محمد بن ابی بکر، مدینه یه عزیمت ایلدکده ابن ابی حذیفه مصرده قالمش ویوقاروده بیان اولدینی اوزره حکومتی اله آلمش وخود بخود مصره والی اولمش ایدی. بروجه بالا حضرت علی، خلیفه اولوب ایالاته امرانصب واعزام ایتدیکی صررده مصرده (قیس بن سعد) ی والی ایتمکله ابن ابی حذیفه، حضرت علی یه دخی کوجندی و بیک قدر آدملریله مصردن چیقوب (غزه) یه کلدی وایکی طرفکده توجه ومجبتندن محروم اولدی. مؤخرأ شام والیسی معاویه نك الله دوشوب برمدت آنك حبسنده قالدی.

قیس بن سعدك عزایله یرینه محمد بن ابی بکرک

والی مصر اولدینی

بالاده اشعار اولدینی اوزره حضرت علی، قیس بن سعد رضی الله عنهمای خلال صفرده مصر والیسی نصب ایدرک « عسکرله مصره کیت » دیمشیدی.

قیس ایسه « مدینه دن کوتوره جکم عسکرله مصره کیره مزایسه م فیما بعد کیره م . بو عسکری بوراده براقهیم . سن آنلری مهم ایشلرکده استخدام ایدرسین » دیدی ویدی نفر آدمیله چیقوب کیتدی .

مصره واردی ، منبره چیقدی ، مأموریتنه دائر اولان امر عالی . او قودی وبعده خطبه سنده « ای ناس ! بز ، پیغمبریمزدن صکره اک خیرلو بیلدیکمز ذاته بیعت ایلدک . سزده آکا کتاب الله وسنت رسول الله اوزره بیعت ایلدیکمز » دیدی .

مصر اهالیسی ، همان حضرت علییه بیعت وقیسه مطاوعت ایلدیلر . قیس دخی ایالت مصری ید ضبط واداره سنه کچوردی وهر طرفه مأمورلر کوندردی .

الا (خریبتا) [\*] ناحیه سنده (یزید بن الحارث) و (مسلمة بن مخلد الحزرجی) رضی الله عنهما وآنلره تابع برجماعت ، دم عثمانی طلبده مصر اوله رق بیعتدن خارج قالدیلر .

(یزید بن الحارث) اصحاب بدر دندر . (مسلمة بن مخلد) دخی فتح مصرده بولنوب اوراده ساکن اولان و مؤخرأ معاویه طرفندن مصر و مغرب والیسی نصب ایدیلن مشهور بر آدمدر . قیس ، آنلری بیعت و اطاعته اجبار ایسه شام والیسی معاویهیه تابع اولملری ملحوظ اولدیغندن اوزرلرینه وارمدی و آنلری مداهنه و مدارا ایله قوللاندی .

ایشته قیس بن سعد ، بو صورتله ولایت مصری ضبط ایدرک واردات امیرییه بلامنازع تحصیل ایدر اولدی .

بالاده بیان اولندینی اوزره معاویه ، بیعت و اطاعتدن امتناع ایتمکله حضرت علینک شام اوزرینه حرکتی درکار اولدیغندن معاویه آکا قارشو چیقماق نیتنده ایدی . او حالده ایسه آرقه سندن قیس دخی مصر عسکرله یوریمک احتمال و ملاحظه سی معاویهیه موجب فکر و اندیشه ایدی .

[\*] خربتا لفظنک ؛ خانک فتحی ، رانک کسری و بانک سکونی ایله مضبوط بولندی کی رانک فتحیله ده مذکور اولدینی (معجم البلدان ده) محرردر .

چونکه قیس، اکابر انصاردن اولان (سعد بن عبادہ) نك اوغلی اولوب قومنك عندنده شریف و محترم و ذاتاً شجاع و صاحب جود و کرم و مدبر امور و حیلہ و خدعه یوللرینی بیلور بر ذات ایدی و رسول اکرم ایلہ برلکده انصارك بیراغنی چکردی، خدمت مخصوصه نبویهده بولنوردی و صحیحاً دهات عربدن ایدی.

بناءً علیہ معاویه، قیس ایلہ مخبره یه کیریشدی و یک چوق وعدو و عیدلر ایلہ آنی کندو طرفنه جلب و اماله یه چالیشدی. قیس دخی آکا آلدانور کبی کورینه رک و سررشته و یرمیه رک آنی آلداتمغه چالیشوردی. الحاصل بوایکی داهیه، یکدی کیرینی آلداتمغه چالشدیلر ایسه دهه ایکینسک دهه مساعیسی ثمره سز قالدی.

معاویه، قیسی اغفال ایدمه یه جکنی آکلاینجه جانب خلافتی اغفاله قیام ایتدی. شویله که اهل شامه «قیسک علیهنده اولمیکنز. او بزمدر. کورمیور میسکنز، سزک اخوانکنز اولان خربتا دلاورلرینی بسلیور و آنلره عطیه لر و یرور و بزه محرمانه مکتوبلری کلیور» دیدی و قیسک آغزندن دم عثمانی طلبده برابر اولدیغنه دائر بر مکتوب دوزدی و آنی اهل شامه اوقوددی.

بو دوزمه حوادثی، جاسوسلر واسطه سیله (محمد بن ابی بکر الصدیق) و (محمد بن جعفر بن ابی طالب) ایشیتدیلر و حضرت علی یه اخبار ایتدیلر. حضرت علی، همان اوغللری حسن و حسین ایلہ عبدالله بن جعفری چاغردی و کیفیتی آنلره بیلدیردی. ابن جعفر «یا امیر المؤمنین! شبیه لی یولی ترک ایلہ، شبیه سز یوله کیت. قیسی مصردن عزل ایت» دیدی. حضرت علی «بن بو حوادثی تصدیق ایدمه» دیو پیوردی.

او صره دهه (خربتا) ناحیه سنده بی طرف قالان کروه حقنده مسامحه اولندیغنه دائر قیسک مکتوبی کلدی. ابن جعفر «قورقارم، بوده قیسک انلر حقنده بر مساعده سی اولمسون. قیسه امرایت: اول کروه ایلہ مقاتله ایتسون» دیدی. حضرت علی دخی قیسه او مآلده امرنامه کوندردی.

قیس، بواسطه نامه جواباً تحریر و تقدیم ایتدیکی مکتوبده « تعجب ایدرم که سکا ضرری اولیان بر قوم ایله مقاتله ایتمه می امر ایدیورسین. آنلرله مقاتله یه نیام ایدرسه ک دشمنلریکه معین اولورلر. و مادام که عزلت و انزوا اوزره درلر. رأی صواب، آنلری حاللری اوزره ترك ایتمکدر » دیو جواب ویردی. حضرت علی، بو مکتوبی او قودقده ابن جعفر، اولکی رأیی تکرار و قیسک عزلیله یرینه محمد بن ابی بکر الصدیقک نصبی اخطار ایتمکه حضرت علی دخی قیس بن سعدی مصر والی لکنندن عزل ایله یرینه محمد بن ابی بکر صی نصب ایتدی.

ابن جعفر، عمی اولان امیر المؤمنینه صادق اولق طبعی ایسه ده تجربه سزلیکی حسیله دهات عرب آره سنده دونن دولاب حیل و خدعه یی آکلایه مدیغندن عمی بویله بر یا ککش یوله سوق ایتشدی. محمد بن ابی بکر، مصره واروب حامل اولدینی امر عالی یی علی ملا الناس قرائت ایلدکن صکره بر کوزل خطبه او قومش ورؤیت امور ایالته شروع ایتشدر.

قیس بن سعد، بو معامله دن دلگیر اوله رق همان مصر دن حرکت ایله مدینه یه کیتدی. مروان بن الحکم، او زمان مدینه ده بولنوب قیسه سوء معامله ایدرک آنی کو چنדר دیکندن قیس دخی (سهل بن حنیف) ایله برابر مدینه دن چیقوب حضرت علینک یانه کلدیلر.

معاویه، قیسک بو وجهله حضرت علی نزدینه کیتدیکنی خبر آلدقه مروانه تکدیر نامه یازوب « علی یه یوز بیک عسکر ایله معاونت ایلسه ک بکله کوره قیسک علی نزدینه کیتمسندن اهون اولوردی » دیو عتاب ایلشدر. واقعا قیس بن سعد کبی دهات دن و اشراف و شجعان عرب دن بر ذاتک بر اردوده بولمنی بک بیوک بر قوت ایدی.

قیس بن سعد، حضرت علی ایله کوریشوب حقایق احوالی بر تفصیل

عرض ایتدکده حضرت علی، دهاتک [۱] بومثللو حیلہ و خدعه لرندن طولانی بویله مهم امورده چوق زحمت و مشقتلر چکیله جکنی آکلامش و قیسک معروضاتی وقوعات آتیه برر برر تأیید ایلدجکه آنک حقنده امنیت و اعتمادی تزاید ایشدر. محمد بن ابی بکره کلنجه: بوجه بالا ایشه مباشرتدن برآی صکره (خربتا) ناحیه سنده بی طرف طوران خلقه «یا اطاعت ایدیکز، یا خود بو دیاردن کیدیکز» دیو خبر کوندر دکده «شمذیلک بزى براق، باقلم ایش نه یه منجر اوله جق آکلایه لم» دیمش لر ایسه ده محمد آنلرک اعتدارلرینی قبول ایتدیکندن آنلرده سلاحه صارلدیلر و امارت مصریه نک باشنه بیوک بلا اولدیلر.

ایشته بوضورتله مصر ایالتنده معاوییه برچوق طرفدار پیدا اولمش وزیرده بیان اولنه جق صفین وقعه سنه دکین مصرک احوالی کشاکشده قالمشدر.

### فأمره

بالاده بیان اولدینی اوزره وقعه جمله (زیاد بن ابیه) بصره ده عزلت و اتزوا اوزره اولوب عقیب وقعه ده حضرت علی، آنی بصره امور مالیه سی مدیری نصب ایتشیدی.

بناء علیه بوائتاده زیادک آدی سویلنمز اولدیغندن عربلر بش کشییه (دهات) دیدیلر. بونلر، سالف الذکر معاوییه و عمر و بن العاص و مغیره ایله قیس بن سعد بن عباده و عبدالله بن بدیل بن الورقادر.

عبدالله بن بدیل، حضرت علینک یاننده ایدی. قیس بن سعد دخی بوجه بالا امارت مصریه دن منفصل اولدقدن صکره حضرت علینک نزدینه

[۱] دهات: داهیه لر دیمکدر. داهیه: غایت ذکی وجودت رأی و حسن تدبیر صاحبی آدمه دینورکه لسانمزده (جین فکری) تعبیر اولنور.

عربلر اوتهدنبرو درت کشییه (دهات اربعه) دیرلردی که: معاوییه و عمر و بن العاص و مغیره ابن شعبه و زیاد بن ابیه در.



گمشیدی. ایکسیدہ لطائف الحیل حکیمانہ ایله بیوک ایشلرک عہدہ سندن کلور آدملر ایدی .

لکن حضرت علینک علو جنابی او یله حیله و خدعه ایله ایش کورمکه مانع ایدی. زیرا آب صافی خلافتی بولاندرمغه راضی دکل ایدی. نه چاره که عالمک احوالی بولانمش و حیله و دیسه ایله ایش کورمکه باشلانمش ایدی . مغیره بن شعبه ، کندی بلده سی اولان طائفده عزلت واتزوا اوزره اولوب روش احواله نظر ایتمکده ایدی .

عمر و بن العاص دخی ارض فلسطینده کی خانه سنده منزوی ایکن بروجہ آتی بو ائنادہ معاویہ تزدینہ کلوب بو ایکی داهیہ برلشمشدر .

### عمر و بن العاصک معاویہ یه متابعتی

بالاده اشعار اولندیغی اوزره حضرت عثمان محصور اولدقده (عمر و بن العاص) ایشک نه یه منجر اوله جغنی جفر عقلی ایله استخراج ایدرک اوغللری (عبدالله) و (محمد) ایله برلکده ارض فلسطینه کلوب و خانه سنده قانوب قالمش و حضرت عثمانک شهادتی خبرینی آنجه قاریلر کی آغلامغه باشلامش و طلحه نک خلافتی آرزو ایدر ایکن حضرت علینک خلافتہ انتخاب اولندیغی ایشیدنجه پک زیاده مکدر و اندیشه ناک اولمش و طلحه و زبیرک حضرت علی علیه نه خروجلرینی ایشیدنجه امیدہ دوشمشیکن . وقعہ جملده حضرت علینک مظفریتی خبرینی آملغه درین افکاره طالمش . بعده شام والینی معاویہ نک حضرت علی یه مخالفت اوزره اولدیغی ایشتدکده «نصل حرکت ایلیم» دیو اوغللری عبدالله و محمد دن صورمش .

عبدالله که پدرندن اول اسلام ایله مشرف اولمشیدی . فضلا وفقهای صحابه دن بر ذات جلیل القدر ایدی «رسول الله صلی الله علیه وسلم و ابوبکر و عمر سندن راضی اولدقلری حالدہ دارعقبایه کیتدیلر. ناس بر فکر اوزرینه



اجتماع ايدنجيه دك سن خانه گدن طيشارو چيقمامليسين « ديو پدرينه نصيحت ويرمش .

ديكر اوغلي محمدكه پدري كبي شجاعان عربدن ايدى . پدرينه « سن يوقومك اولولرندنسين . سنسز بوايشك ختام بولسى لايقى » ديدكه عمرو بن العاص « يا عبدالله ! سن بكا آخرتجه خيرلو اولان حال وحركتى رآى ايدورسين . محمدده دنياجه فائده لو اولان يوله دلالت ايدور ، ديمش .

صكره حرص شان وجاه ايله دمشق شامه عزيمتى تصميم ايدوب اكرچه عبدالله او طرفه كيتمكدن ابائيله « بارى كوفه يه كيدهم » ديمش ايسه ده عمرو بن العاص « عليك شجاعت وفضيلتى واسلامده قدمى ورسول الله قرايتى حسييله بزم كيلره احتياجى يوقدر . بزم ايشمزه معاويه الويرر . اولادك والدينه اطاعتى دخى واجبرر . هايدى قالقك كيدهم » ديمش وعبدالله بركون رسول اكرم صلى الله عليه وسلم حضرتلى ( پدريكه اطاعت ايله ) ديو بيورمغله او دخى هر خصوصده پدرينه اطاعت ايده كلش اولديغدن عمرو بن العاص ايكي اوغلي ايله برلكده شامه كلديلر .

معاويه ، اوچنه دخى عطيه لر ويرمش ايسه ده عبدالله ، على يه مائل ومحب اولديغنه بنى معاويه نك عطيه سنى قبولدن امتناع ايلديكي مرويدر . عمرو بن العاص كورمش كه شام اهالىسى دم عثمانى طلبده اصرار ايدورلر . آنلره « سز حقيلىسكز » ديه رك عزيمتلىرى تاييد ايش وعندالظفر كندوسى مصر واليسى اولمق شرطيله على عليه معاويه ايله اتفاق ايتمشدر .

### عبيدالله بن عمر ك اهل شامه التحاق

بشنجى جزده بيان اولنديغى اوزره حضرت عمر ك اوغلي ( عبيدالله ) بغير حق ( هر مزان ) ي قتل ايتدكه حضرت عثمان ، آنك ديتى ويروب عبيداللهى قصاددن عفو ايتمش ايسه ده حضرت على ، امر قصاصك اجراسى رآينده بولمش ايدوكنه بنى عبيدالله ، آندن خوف واحتراز اوزره بولمغله آنك ياننه واره ميوب شامه كله رك باغيله قارشمش ايدى .

عید اللهک ملتجه بیوک برادرى ( عبدالله ) قدر شان و حیثیتى بیوک دکل ایسه ده کندوسى شجعان عربدن اولوب پدرینک نام و شانى ایسه پک بیوک اولدیغندن معاویه آنی کندی مرانک ترویجی یولنده قوللامق ایسته مشدر .

شویله که : معاویه ، عید اللهی مجلس خاصنه جلب و حضرت عثمانک مظلوماً قتل اولدیغندن بحث ایله منبرده بو خصوصه دائر حضرت علی بنی اتهام ایده حک سوزلر سویلسنی امر ایتدکه عید الله « علی بن ابی طالب کی کمالات انسانیه یی جمع ایله سرافراز و تأییدات صمدانیه ایله ممتاز اولان بر ذات عالی قدری نه وجهله طعن و آنی دم عثمان ایله نصل اتهام ایله یم ، مکر خاطر یکز ایچون یالان سویلیه یم » دیمش .

عمرو بن العاص دخی « آجانم ! غرض اصلی ، ناسک قلوبندن علی محبتی اخراج ایده حک سوزلر اشاعه سندن عبارتدر . بو یوله بر ایکی سوز سویلیویر « دیمکه عید الله « پک انی » دهرک قالقمش و منبره چیقوب خطبه او قوش ایسه ده عثمان و علی بختنه دائر بر سوز سویلکسزین منبردن اینمش .

معاویه آکا « نیچون و عدیکی ایفا ایتدک » دیدکه « اللهدن اوتاندم . علی ملا الناس یالان سویلیه مدم » دیمکه معاویه کوجنمش ایسه ده چند روز صکره عید الله ، حضرت عثمانک مظلوماً قتل اولمش ایدوکنه دائر بر مرثیه سویلش اولدیغندن معاویه ینه آکا روی توجه و التفات کوستر مشدر .

### معاویه نک قیصره نامه کوندر دیکى

بو ائاده معاویه بروجه مشروح امیر المؤمنینه قارشو چیقماق اوزره عظیم تدارکات حربیه ایله مشغول ایکن قیصر رومک دیار شامه سفر ایده جکی مسموعی اولنجه قیصره تهدید نامه کوندر مشدر .

شویله که « اکر شام اوزرینه عزیزتک تحقق ایدرسه صاحبمله ( یعنی

حضرت علی ایله ) مصالحه ایدرم و آکا مقدمه الجیش اوله رق سنک اوزریکه واریرم و بالله الکریم پای تختک اولان سیسلی ، دومانی قسطنطینیہ شهرینی ییاقوب یاقوب قاپ قاره کمور ایدرم و یردن هاوچ چکیلوب قوبارلدینی کبی سنی ملککدن چکوب چیقاریرم و سنی طوموز چوبانی ایدرم ، دیو یازمشدر .

فی الواقع معاویه ، بو دیدیکنی خالصاً لوجه الله یاپسیدی ده اوزمان قسطنطینیہ فتح اولنه بیلوردی . زیرا ( البته قسطنطینیہ فتح اولنه جقدر . ایمدی آنک امیری نه کوزل امیردر و بو عسکر نه کوزل عسکردر ) دیو بر حدیث شریف روایت اولمغله قسطنطینیہ نك فتحی اهل اسلامک قلوبنده مرکوز بر آرزو ایدوکندن قسطنطینیہ سفری اعلان اولدینی کبی بی طرف طوران صحابه کزین و کبار تابعین هپ جهاد و غزایه مجبور اولور و بالجمله بلاد اسلامیه ده موجود اولان حرب و ضرب اصحابی سکروب کلور و بو صورتله امیرالمؤمنینک شام ایچون ترتیب ایلدیکی عسکر قات قات زیاده لشور ایدی . ایشته معاویه ایله بر جسم اردویه مقدمه الجیش اوله رق قسطنطینیہ اوزرینه یوریش اولسیدی قیصر آکا تاب آور اوله مازدی . نه چاره که آنک ذهنی استقلال سلطنت سوداسی بوریش اولدیغندن و احتمال که فتح قسطنطینیہ منحصر آکندوسنه میسر اولمق املنده بولندیغندن امیرالمؤمنینه مخالفتده دوام ایدرک اويله بر فتح جلیک عهده سندن کله بیله جک دلاوران اسلامک چوغی زیرده بیان اولنه جق صفین محاربه لرنده تلف اولمش و قسطنطینیہ فتحنک شرف و شانی ( قانع سلطان محمدخان ) حضر ت لرینه قالمشدر . انسان چالیشوب چابالار . یزدان دیلدیکن یاپار .

### جریر بچلینک شامه عزیمت وعودتی

وقعه جملدن صکره حضرت علی شام اوزرینه یوریمکی تصمیم اییش اولمغله کوفیه کلدکه همدان والیسی ( جریر بن عبدالله البجلی ) ایله

آذر بايجان واليسى (أشعث بن قيس الكندی) بی کوفه یه دعوت بیورمشیدی .

ایکیسی ده حضرت عثمانك نصب کرده سی اولان امرادن اولدقلری حالده ایالتلری خلقیله برابر حضرت علی یه بیعت وامره اطاعت ایله کوفه یه کلمشار ایدی .

جریر بن عبدالله (بجیلَه) قبیله سی رئیس اولوب رسول اکرم صلی الله علیه وسلم حضرتلرینک وفاتندن قرق کون مقدم بر جماعت ایله مدینه یه کلوب اسلام ایله مشرف واکرام والتفات نبوی یه مظهر اولمشدی . عراق محاربه لرنده چوق ایشه یارادی . بعده کوفه ده متوطن اولدی . کوفه رجالتک اک مشهور ومحترم لردن بری ایدی .

اشعث بن قیس دخی (کنده) مشایخندن اولوب هجرتک اونجی سنه سنده آلتش کشی ایله مدینه یه کلس واسلام ایله مشرف اوله رق حضرت ابی بکر الصدیقک قز قرداشنی تزوج ایتش ایدی . عراق وایران فتوحاتنده بولنوب صکره کوفه ده ساکن اولمشدر . کوفه رجالتک مشاهیر ومتحیزانندن ایدی .

معاویه یه وقعه جملک مبادی ونتایجی بیان وآنی مهاجرین وانصارک داخل اولدقلری دائره اطاعته دعوت ایله آندن بیعت آلق اوزره اصحاب کرامدن بر ذاتک شامه عزیمتی حضرت علی مناسب کوردی ، کیمک کوندرلمسی مناسب اوله جغنی حاضر بالجلس اولانلردن صورتی .

جریر « بونم ایشمدر . زیرا معاویه ایله الفت سابقم واردر . اونم سوزیمی اصغایدر » دیدکده مالک اشتر « آنک شامه کوندرلمسی مناسب ولماز . زیرا وقعه جملده بولمندی ، همده آنک معاویه یه میل ومحبی واردر » یدیسده حضرت علی آنک سوزینی دیکله میوب جریری شامه کوندردی ، جریر بجلی ، دمشق شامه واردر . معاویه آکا پک زیاده روی تفات کوستردی . لکن لا ونم بر جواب قطعی ویرمیوب آنی

اویلا ندردی و عمرو بن العاصک و رودینه قدر لیت و لعل ایلہ وقت کچوردی .

چونکہ آکا جواب قطعی ویرسه حضرت علینک شام اوزرینه حرکت ایلہ جکی درکار ایدی . بواننده ایسه استانبول قیصرینک سوریه طرفه حرکت ایلک اوزره عسکر جمع ایتمکده اولدینی ایشیدیلوردی و برده بالاده بیان اولندینی اوزره بر تقریبله اله کچوریلوبده دمشق شامده محبوس اولان ( محمد بن حذیفه ) بواننده محبوسدن فرار ایتمکله ذاتاً جسور و زهد صلاح ایلہ معروف و مشهور بر آدم اولدینی حالده نه طرفه کیتدیکی مجهول اولمغله آنک طرفندن دخی و سوسه سی وار ایدی .

بو جهتلرله معاویه ، متردد و متحیر اوله رق « اوج امر مشکل ارسنده قالدق ، نه یاپه لم » دیو عمرو بن العاصدن صورمش او دخی « محمد بن حذیفه ایشی قولایدرد . آرقه سندن آدملر کوندر ، آنی طوتسونلر . اله کچمز ایسه ده او سکا برشی یاپه ماز . قیصر طرفندن دخی اندیشه ایتمه . بلاد شامده نه قدر اسرای عیسویّه وار ایسه آنلری قیصره تسلیم ایتک اوزره مصالحه و مسالمه یه رغبت کوسترد . عیسویلر سندن خوشنود اولوب راحت اوزره طورلر . ایشک مشکل اولان جهتی علی بن ابی طالب مسئله سیدر . زیرا اسلامده سبق و تقدیمی و رسول اکرمه قرابتی و صلاح و عفتی و علم و فضیلتی و فوق العاده شجاعتی حسیله او سکا غالبدر . ناس آنی سکا ترجیح ایدرد . سن حیلہ و خدعه یولنده چاره آرا میلسین » دیو جواب ویرمش .

فی الواقع معاویه طرفندن کوندریلن آدملر ( حوران ) جهتنده ( محمد بن حذیفه ) بی بولوب اعدام ایتمشلر . قیصر طرفندن دخی بر حرکت رونما اولما مشدر . معاویه « علی حقده نه یاپه لم » دیو عمرو بن العاصک رأینی صورددقه « شَرَحِیلُ بْنُ السَّمِطِ الْکِنْدِیُّ یی بورایه جلبایت . آنی لطائف الحیل حکیمانه ایلہ بویولده قوللانه لم » دیمش .



(شرحیل کندی) که معاویه طرفدن حص سنجانی امیری ایدی. وقت سعاده یتشمش اولان مشاهیردن ودم عثمانی طلبده تعصب ایدن امرای شامدن ایدی و جریر بجلی ایله بینلرنده اسکیدن عداوت اولدیعدن جریرک موفقیتی ایسته مزدی .

عمرو بن العاصک تعلیمی اوزره معاویه ، آنی دمشق شامه دعوت ایله سکز، اون قدر آدمه تعلیمات خفیه ویرمش و شرحیلک یولی اوزرنده نقطه دیزلمش کبی متفرقاً طورمق اوزره آنلری حص جهتنه چیقارمش .

شرحیل کلورکن او آدملرک برنجیسی آکا قارشو چیقوب « علی بن ابی طالبه نه دیرسین، عثمانک قتلنده مشارک وقاتلیری محرک ایمش . شویله ایتمش ، بویله ایتمش » یوللو سوزلر سویلش . بعده دیکرلری برر برر شرحیلک اوکنه چیقوب اولکینک سوزلرینی تأیید ایلش اولدقلرندن شرحیل کندی ، بودوزمه لاقردیلری تواتر درجه سنه وارمش روایات صحیحهدن عدايله متأثر وپر آتش غضب اوله رق دمشقه کلوب طوغری معاویه نک مجلسنه کیتدی و « امنیت ایلدیکم بر چوق آدملردن ایشتم که : علی ، عثمانه غدر و ظلم ایتمش . ا کر سن آکا بیعت ایلرسه ک بز سنی شامدن چیقاریرز » دیدی .

معاویه « بن سزه نصل مخالفت ایلده بیلورم که بنده سزدم و سز بنم الم وایاغمسکز » دیمکله شرحیل کندی « اویله ایسه جریر بجلی یه رخصت ویر کیتسون » دیدکده معاویه « عجله ایتمه ، هله سن بلاد شامی طولاش . هپ اهالی بزمله متفق اولسونلرده اوزمان جریری اعاده ایده لم » دیدی .

بونک اوزرینه شرحیل کندی ، بلاد شامی دور ایله « علی ، عثمانه غدر و ظلم ایتمش وبتون ممالکی ضبط ایلش وکلی عسکر جمع ایله بو طرفه هجوم واقتحام وبتون اهالی شامی قتل عام ایده جک ایمش . آکا معاویه دن بشقه کیمسه سد راه اوله ماز . همان آنک باشنه طویلانکز ، مدافعه یه حاضر اولکز » دیه رک کندوسنک آلدانمش اولدینی یالانلره ساده دلان اهل شامی دخی ایناندرمش وهپ اهل شامی حضرت علی ایله جنک ایتک اوزره قاندرمش ایدی .



آلتنجی جزءده بیان اولندی اوزره (نعمان بن بشیر) حضرت عثمانک قانلی کوملکنی وزوجه سی (نائله) نک کسیامش پارمقلرینی شامه کوتورمش ایدی. معاویه دخی آنلری جامع دمشق منبری اوزرینه وضع ایله جمعه کونلری ناسه زیارت ایتدیرر ایدی. عمرو بن العاص کلدکده «آنلرک زیارتی بویله مبذول ایتمه. آنلری بر محله کوزلجه حفظ ایله. محاربه وقتنده ناسه عرض ایت. تا که ناسک غیرت و حیت طمرلری حرکت کله رک علی ایله جنکه حرصلانسونلر «دیوب معاویه دخی اول وجهله عمل ایدر اولمشیدی.

بوکره تمام صره سی کلکله معاویه، ناسی جامع دمشق دعوت ایلدی. حضرت عثمانک قانلی کوملکنی منبر اوزرینه سردی، نائله نک پارمقلرینی دخی منبره تعلیق ایتدیردی و کندوسی منبر اوزرنده اولدینی خالده بر مدت عسکر آنلره باقوب آغلادیلر و عثمانک قاتلرندن انتقام آلدقجه دوشک اوستنده یا تمامق اوزره یمین ایلدیلر.

معاویه، ایشی بو وجهله ایسته دیکی کرتیه کتوردکن صکره جریرک عودتنه رخصت ویردی. او دخی بروجه مشروح درت آی قدر شامده اکلندکن صکره مأیوساً کوفیه کلوب کوردیکنی وایشتدیکنی حضرت علی یه بیلدیردی.

اشتر، اوزمان حضرت علی یه «بن جریری کوندرمه دیمدمی. ایشته معاویه یه وقت قازاندردی. هپ اهل شامک دم عثمانی طلبده آنکله اتفاقه میدان ویردی وشمدی ایش بیودی «دیدی.

جریر، بوسوزلردن منفعل اوله رق صاووشوب «نهر خابور» اوزرنده واقع (قرقیسیا) بلده سنه کیتمش، معاویه ایسه بودرلو فرصتلی فوت ایلز اولدیغندن جریر ایله مخابره ایدرک آنی کندی طرفه جلب ایتشدر.

جریرک اول وجهله اعاده اولمنسی اعلان حرب دیمک اولدیغندن حضرت علی کوفه دن چیقوب خارج شهرده اردو قورمش و معاویه دخی اردوسنه چکی دوزن ویرمشدر.

## شامك کیفیت بنی وعصیانی

یوقارولرده بیان اولندیغی اوزره بدر غزاسنده قریشك رؤسای تلف اولدقدن صکره (ابوسفیان) میدانی خالی بولدی . رئیس قریش اولدی . فتح مکیه قدر ریاستده مستقل ومنفرد قالدی .

بعدالفتح اوغللریله برابر شرف اسلام ایله مشرف اولوب مدینه منوره یه نقل خانه ایتدیلر . رضی الله عنهم

بیوک اوغلی (یزید) شامده سنجاقل بکی ایکن فوت اولدقده حضرت عمر، آنک یرینه برادری معاویه بن ابی سفیانی نصب وتعیین بیوردی . معاویه ایسه احتشام وسلطتی سور بر آدم ایدی . حتی حضرت عمر، شامه کلدکده آنی بر طور محتشانده کورنجه « بو آدم عربك کسراسیدر » دیمشدی .

بعده حضرت عثمان ، دیگر سوریه سنجاقلرینی برر برر بروجه الحاق معاویه یه توجیه ایتمکله معاویه، بتون سوریه قطعه سنه والی وحدود مصریه دن نهر فرات وادیسنه قدر حکمی صوکی جاری اولدی ، دیار رومه غزا ایدرک نیچه بلده لری ید ضبط وتسخیرینه آلدی .

بوصورتله معاویه ، مدت مدیده بالاستقلال سوریه والیکنده بولندی وپک چوق سامان وثروت قازاندی وامر سیاستده ماهر اولدیغندن شامده سلطنته شبیه برحکومت قاهره تأسیس ایتدی .

حضرت عثماندن صکره معاویه ، بنی امیه نك رئیس اولق ملابسه سیله آنک یرینه امیر المؤمنین اولق املنه دوشدی و « عثمانك عمزاده سی اولدیغیم جهته آنک ولیسی یم » دهرک دم عثمانی طلب ودعوا یه قالقشدی وبودعوائی ترویج مرامنه وسیله مناسبه اتخاذ ایلدی .

حضرت عثمانك ایام خلافتده سائر امویلر دخی خیلدن خیلی ثروت وسامانه مالک اولدقلری حالده هپ معاویه یه تابع ایدیلر . سائر محب دنیا

وحريص جاه اولانلر دخى آكا مائل ايديلر وهر نه سببدن ناشى اولورسه اولسون حضرت على به مخالفت اوزره بولنلر پيدربى شامه كلوب معاويه به عرض تبعيت ايلكده ايديلر .

الحاصل معاويه ، شامده خيلى قوت بولدى ودم عثمانى طلب ودعوى داعيه سيله باشنه بك چوق خلق اوشدى وپدريك زمان جاهليتده رئيس قريش ايدوكنه وكندوسى ده حضرت عثماندن صكره امويلرك رئيسى اولديغنه بناءً ويسار واقتدارينه اغتراراً امارت و سلطنت سوداسنه دوشدى .

حال بوكه قوميتجه و ثروتجه تفوق وتقدم داعيه لرى ، بعدالاسلام متروك ومهجور اولمغله اصحاب كرام آنجق اسلامده سابقه وتقدملرينه ودين اسلامه واقع اولان خدمتلرينه كوره يكديكره نسبتله بيوك وافضل اعتبار اولنورلر .

شويله كه : اولاً عشره مبشره وهجرتدن مقدم ايمان ايدن وبدر مظفريتده بولنان مهاجرين وانصار وبعده احد غزاسنده بولنان صحابه كزين وبعده شجره رضوان آلتنده بيعت ايلين وبعده فتح مكه به قدر ايمان ايدن اصحاب كرام ، درجه درجه يكديكره نسبتله افضلدر . بيعت رضواندن فتح مكه به قدر ايمان ايله هجرت ايلينلر ، مهاجرينك خاتمه سيدر . ايسته ابوموسى الاشعري وعمرو بن العاص وعبدالله بن بديل آنلردندر . اصحاب كرامك اڭ صوك طبقه سى ، بعدالفتح اسلام ايله مشرف اولانلردر . فتح مكهدن صكره هجرت معتبر اولمامغله بعدالفتح مدينه به نقل خانه ايدنلر ، مهاجريندن عد اولمازلر . ايسته معاويه ، بو اڭ صوك طبقه ده بولنان اصحاب كرامدن اولديغى حالده طبقه عليانك برنجى درجه سنده بولنان وامير المؤمنين اولان على المرتضايه تقدم ايله اميرالاسلام اولمق املنه دوشمشيدى .

حضرت عثمان زماننده مهم ايشلرده بولنه رق خيلى ثروت قزانش اولان (يعلى بن منيه) دخى بو اڭ صوك طبقه ده بولنان اصحاب كرامدندركه

صحاب جملك اكابرندن اولدينى حالدە مؤخرأ حضرت على يە تابع  
ولمشدر.

(سعد بن ابى وقاص) و (عبدالله بن عمر) و (زيد بن ثابت) و (اسامة بن زيد)  
(ابو موسى الاشعري) و (محمد بن مسلمه) كې بعض اصحاب كرام « اكر كفار  
يله محاربه اولورسه كیده رز ، اما اهل قبله ايله جنك ایتمه يز » ديه رك مقدم  
مؤخر عزلتى اختيار ایتشلر ایدی . مع مافیه حضرت علینك فضلنى اعتراف  
یدرلر و آنك غیرتنی کودرلر ایدی .

حتى ابو هريره « معاوية نك طعامى ادمم (یعنی یاغلی) وعلینك آرقه سنده  
ماز اتم (یعنی اكمل و قصورسز) و ترك حرب اسلام در » ديه رك بی طرف  
نالمشیدی . (رضی الله عنهم اجمعین)

شو حالدە عمرو بن العاصك شامه کلیورمسی معاویه یه ایجه قوت  
ویرمش ایسه ده حضرت علینك یاننده آندن افضل نیجه مهاجرین و انصار  
وار ایدی . حضرت علینك ملت اسلامیه ده قدری پك بیوك و كعبی پك  
عالی ایدو كندن افكار عمومیة اسلامیه آکا مائل و محب ایدی . بناء علی  
ذلك معاویه ، كبار مهاجرین و انصار دن بعض ذواتك بروجه آتی جلبنه  
زوم کورمشدر .

### معاویه نك بعض اصحاب كرام ايله مكاتبه سی

حضرت علی ، امیر المؤمنین و خلیفه سید المرسلین اولوب معیتده بولنان  
اصحاب کزین ايله کزیده تابعینك مرادلری مجرد دین اسلامه خدمت  
ایدی .

معاویه نك یاننده بولنانلر ایسه مال و جاه ایچون چالیشان بر کروم  
اولغله معاویه نك روحانی و معنوی قوتی دم عثمانی طلبدن عبارت ایدی .  
بناء علی ذلك معاویه ، افکار اسلامیه یی جلب ایچون اهل مدینه یه دعوتنامه  
کوندردمک ایستدکده عمرو بن العاص « بونك فائده سی اولماز . زیرا جماعت

شمعی اوج فرقه اولمشدر . بفرقه‌سی علی بن طالب ایله برابر اولوب آنلر سکا اصلاً میل ایتزلر . محب عثمان اولان فرقه ایسه عاجزدر . اوچنجی فرقه‌سی که عثمان وعلی غوغاسندن کچوب عزلت ایلینلردر . آنلر سنک ایچون یرلرندن قیلمدامازلر . لکن مادام آرزو ایدیورسین . باری برمکتوب یاز که فائده‌سی اولماز ایسه ضرری ده اولسون ، دیمش .

بونک اوزرینه معاویه طرفندن اهل مدینه خطاباً (ایام فتنه بن مدینه ده بولندیغمدن حقیقت حاله واقف دکم . لکن علی ، عثمانک قاتلاری ایله متفق اولوب حالا قاتلار آنک یاننده در وبن که عثمانک ولیسی یم . آنک قاتنی طلب ایدرم وقاتلاری علیدن ایسترم . ویررسه قصاص ایدوب خلافتی دخی عمرک یاپدینی کبی شورایه حواله ایدرم واکر علی قاتلاری ویرمزایسه آنکله جنک ایلرم . عثمانی سونلر همان بورایه کلسونلر ) دیو مکتوب یازلمشدر .

اهل مدینه بو مکتوبی آلوب اووقودقه حدتله رک معاویه ایله عمرو بن العاصک عظیم خطاده بولندقلرندن بحثله تکدیرنامه قیلقلو بر قطعه جوابنامه یازدیلر .

معاویه ، بوجوابنامه‌یی آلوب اووقودقه « مدینه ده عبدالله بن عمر بن الخطاب وسعد بن ابی وقاص و محمد بن مسلمة الانصاری کبی بیوک ذاتلر وواو ایکن آنلره یازمیوبده افراد اهالی یه مکتوب یازمقده خطا ایتمش » دیهرک بو اوج ذاته برر مکتوب یازمغی مناسب کورمش .

عمرو بن العاص ایسه « سن بوسودادن واز کچ . زیرا آنلر سندن افضل اولان طلحه وزیر وعایشه موافقت ایلویوبده بی طرفلغی اختیار ایلش اولدقلرینه نظراً سکا اصلاً موافقت ایتزلر » دیهرک معاویه یه نصیحت ویرمش .

(سعد بن ابی وقاص) که ابتدا ایمان ایدنلرک دردنجیسی وعلی روایت یشنجیسیدر وابتدا فی سبیل الله قان دوکن واولق آتان وایرانی فتح ایدن اودر . بالجمله غزالده رسول اکرم صلی الله علیه وسلم حضرتلریله برابر



والمشدر وعشره مبشره دندر . على العموم ملت اسلاميه ده قدر وشانى  
ك بيوك ايدى . حضرت علين صكره اوزمان موجود اولان صحابه نك .  
فضلى ايدى . محمد بن مسلمه دخى اصحاب بدر دن واكابر انصار كرامدن  
ذات جليل القدر ايدى . ( عبدالله بن عمر ) ايسه فضلاى صحابه دن بر ذات  
جميل الصفات اولوب اهل شامك آكا بك زياده ميل ومحبتى وار ايدى .  
ناء على ذلك معاويه آنلك كندى طرفه جلبنى ذهنده قورمش .

حال بوكه سعد بن ابى وقاص ، فتنه ظهورنده بى طرف قالمش وعالم عزتله  
چكلمش ايدى وبر طرفه ميل ايدى جك اولسه حضرت على ايله برابر اوله جنى  
ركار ايدى . محمد بن مسلمه دخى حضرت عثمانك شهادتى اوزرينه قليجنى  
يروب آغاجدن قليچ يامش وخانه سنه قبانوب عزلى اختيار ايتمش ايدى .  
« رسول اكرم بك بر قليچ ويردى ، و ( بونى مشركينه قارشواستعمال ايت  
اهل اسلام آره سنه اختلاف دوشد كده آنى طاشه اور ، قير ، آت ) ديو  
يوردى » دير ايدى . عبدالله بن عمر ايسه امور دينيه ده بك زياده اتقا  
احتياط اوزره طاورانور وامر فتواده چوق دوشونور وخطادن بك  
زياده صاقنور ايدى . بناء عليه علم فقهده شهرتى علم حديثه اولان شهرتى  
فدر دكل ايدى . ايشته بى طرف طور مسنك سببى بو ايدى . مع مافيه عصات  
وبغات محاربه لرنده حضرت على ايله برلكده بولنديغنه صكره دن نادام اوله رق  
بوندن طولايى الى آخر العمر تأسف ايتمشدر .

بوتفضيلا ته كوره معاويه نك بو اوچ ذاتى جلبه چالشمسى بك بيهوده  
وعمر وبن العاصك بو خصوصده اولان مطالعه سى طوغرى ايدى .  
معاويه ايسه اويله اكابر مهاجرين وانصار دن بر قاچ ذاتك كندو ياننده  
بولنسنه لزوم كورمكه وعلى روايه ( عبيد الله بن عمر ) دخى بيوك برادرى  
عبداللهك وسعد ايله محمد بن مسلمه نك دعوتى تنسيب ايتمكه معاويه اوچنده ده  
برر مکتوب يازدى . بومكتوبلرك خلاصه مألورى دم عثمانى طلبده كندوسنه  
معاونت ايچون اوچنى ده شام اردوسنه كلملى ايچون دعوتدن عبارت  
ايدى .



فقط سعد بن ابی وقاصه کوندرديکي مکتوبده « نسيجه واسلامده قدبجه سکا دنک اولان طلحه وزير، دم عثمانی طلب ايله خروج ايتديلر. عايشهده آنره موافقت ايلدی . سنده آنلرک مسلکني ترجيح ايتميسين » ديو يازمشیدی .

محمد بن مسلميه کوندرديکي مکتوبده عثمانه معاونتده اهل اولنش ايدوکندن مظلوماً قتل اولنديغنه دائر سوزلر وار ایدی وعبدالله بن عمره کوندرديکي مکتوبده کويا عبداللهک علیيه مخالف اولديغدن ناشی اختيار عزلت ايلش اولديغدن بحث ايتمشیدی .

سعد بن ابی وقاص حضرتلری ، معاويهک مذکور مکتوبنه جواباً « مکتوبک اوقوندى ، مالى معلوم اولدی . بنی بر باطل يوله دعوت ايلديکک آکلاشلدى . معلومک اولسونک : بن علی ايله اصلاً محاربه ايتم و آنک عليهنده سنکله اتفاق ايلم . بن اهل اسلام آره سنده ظهور ايدن فتنه دن احتراز و اتقا ايله اختيار انزوا ايدوب خانه ويرانمه چکلمشم . طلحه وزير دخی علی عليهنه خروج ايتمسيديلر حقلرنده خيرلو اولوردی . الله تعالى آنلرک خطالرينی عفو ايتسون والسلام » ديو يازمشدر .

محمد بن مسلمه دخی معاويهيه يازدينی جوابنامه سنده « بنم عندمده تحقق ايتدی که سنک غرضک ملک و سلطنتدر . يوقسه عثمانک عليهنده بولنانلردن اخذ انتقام دکدر . معلومک اولسونک بن سنی اصلاً علیيه ترجيح ايتم و سنک خاطرک ايچون آنک عليهنده بولنم . ای معاويه ! عثمانک عهد خلافتنده برفته يوز کوسترمکه باشلادی . کوردم که آنک دفعنه مقتدر دکلم و بنم کبی آدملرک نصيحتی مفید دکدر . همان قلیجی می قيردم ، گوشه انزوايه چکلدم . کندو سعيلىرينک مفید اولميه جفنی آکلایان اصحاب رسول اللهدن بر جماعت دخی انزوا خصوصنده بکا مشارکت ايلديلر . تعجب اولنورکه عثمانک محصور و متحير اولدينی زمان بالدفعات استمداد يولنده شامه خبرلر کوندريلوب سنده مقتدر ايکن امداد واعانهده تکاسل و تغافل ايتدک ، ولی نعمتکک حق نعمتی ایفا ايتدک . دشمنلری آکا ظفرياب

اولور میدان سکا قالور، سنده مرادیکه ایررسین صاندک. شمیدی آنک قاتی طلب و دعوی بهانه سیله تاج حکومتی باشکه کیمک ایستیورسین « دیمشدر .

عبدالله بن عمر ایسه معاویه به بو وجهله جواب یازمشدرکه « مکتوبک وصول بولدی، مالی معلوم اولدی. تعجب ایدیورم که بنی دائرة تبعیته دعوت و مهاجرین و انصار ایله جنکه تشویق ایدیورسین. یقیناً معلوم اولدی که سنک دم عثمانی طلبدن غرضک، جاء و منصبدن بشقه برشی دکلدر. علی طرفنی ترک ایدوب ده سنک محکوم حکمک اولورم ظننده بولماک عظیم خطادر و کویا علی به مخالفت سببیه اختیار عزلت ایشم ظننده بولماک دخی بر بشقه خطادر. معاذالله بن علی به مخالفت و آنکه عناد ایلیهیم. ای معاویه! معلومک اولسون که: بن اهل اسلام ایله جدال و قتالدن کیر و طورمش ایسه مده باطناً امیر المؤمنین ایله متفق و برطرفی ترجیح ایده جک اولدیغ تقدیرده علی، اولادر. زیرا آنک اسلامده قدری پک بیوکر و عندالله مرتبه سی یوجهدر. خلافتیه احقدر. اصحاب رسول اللهک افضیلدر و رسول الله جمله دن اقربدر. آنجق اهل اسلام اوزرینه قلیج چکمک مزاجه مخالف اولدیغی جهته اختیار عزلت ایشم. سکا نصل تابع اولهیم که بن، سندن افضل و یدرم و مادرم، سنک پدر و مادر کدن اشرفدر لر. شمیدی بن خانه می عبادتخانه اتخاذ ایدوب الله عبادت ایله مشغول. کشکه ابنای زمانه ایله بتون بتون اختلاطدن منقطع اوله جق بریرده سا کن اولیدم. چونکه زمانه بی وفادر. آهولرک حالی نه اعلادر که معموره دن خارج و خراب یرلرده سا کن اولور لر، دیمشدی .

معاویه، بو جوابنامه لر ی آلوب او قودوقده عمرو بن العاص « بن سکا آنلر ایله مکاتبه ایتمه، دیمدمی « دیو سرزنش ایتمش معاویه دخی « حقک وار ایش. بزه آنلردن امداد یوق، بزکندی باشمک چاره سنه باقلی ز و هان اسباب محاربه نک اکماله چالشملی ز، « دیمش و منبره چیقوب خطبه اوقومش و ناسی حضرت علی علیه تحریک و تشویق ایشمدر .

شويله كه « عثمانك مظلوماً قتل اولنديني محققدر و جناب حق قرآن كريمنده (ومن قتل مظلوماً فقد جعلنا لوليه سلطاناً) بيورمشدر . عثمانك وليسي بنم . عمره اتباعاً عثمان ، بكا ولايت شامى توجيه ايدوب وفاتنه دك عزل ايتدى . ايمدى بكا مخالفت ايلينر باغى وعاصيدر واهل فتنه ، خليفه يي قتل وقتلاره اغانه ايدنلردر . على ايسه مسند خلافته كچوب قاتللىرى خواصى ومقربينى صره سنه كچورمشدر وعساكر كليه جمع ايدرك بزمه جنكه توجه ايتكم اوزره در . اكرچه عراق عسكرى جسور ايسه ده بنده سرك صبر وثباتكزه اعتماد ايلرم » ديدى .

امراى شامدن (ابو عورسلى) سوزه آغاز ايله « عثمانك بيعتى هنوز بوينمزده ايكن مظلوماً قتل اولدى . سن آنك وليسى وعمراده سى سين . على ايسه آكا اغانه ايتيوب آنى كروه مخالفينك اللرينه ترك ايتمشيدى . نه وقت امرايدرسه ك بزانكله جنك ايدرز » ديدى .

بعده (حمير) قيله سى مشايخندن (ذوالكلاع) كلامه ابتدار ايله « يامعاويه ! عثمان سنى بتون ولايت شامه والى ايتدى سن ايسه آكا وقت اضطرابنده ياردم ايتدك . شمدى آرتق آنك دمنى طلب ايتمليسين بالمله قبائل عرب سندن يوز چويرسeler بز عشار و اقربامزله سنك خدمتكدن آيرميز » ديدى .

وبعده حمير قيله سندن بر آدم قالقوب « اى اهل شام ! ايچكزده الله ايچون طوغرى سويلين كيمسه يوقيدر . على بن ابى طالبك رسول الله صلى الله عليه وسلم حضرتلرينه قرابتى وحسن سلوك وسيرتى وعلم وفضل وشجاعتى وتعداده كلز بونجه محاسن وفضائل حسييله خلافته او جمله دن احقدر . بو ديارى استيلا ايدرسه كيمسه يه ضرر كلز ، هر كسك مرادى حصوله كلور » دنجه معاويه آنك اخذ وجبسنى امر ايتدى . همان آنى طوتديلر ، اعدامنه قصد ايتديلر . لكن قومك شفاعتيله تخليص كريبان ايتدى وبرتقريبه صاوشوب امير المؤمنينك يانه كيتدى .

مقدمه معاويه ، حضرت على ايله واقع اولان مخبره سنده دخی وليسى

اولدیغندن بمحله عثمان علیه سعى و خروج ایتیش اولانلری قصاص ایچون حضرت علیدن ایسته مشیدی. حضرت علی ، دخی معاویه طرفندن کلمش اولان آدمه « رسول الله صلی الله علیه وسلم حضرتلرینک ملاء اعلایه ارتحالنده عهم عباس ایله معاویه نك پدری ابوسفیان همان بکا بیعت اینک ایستدکلرنده اصحاب رسول الله آره سنه تفرقه دوشمک احتمال وملاحظه سنه مبنی خلافتی قبولدن امتناع ایتمشیدم. بوکره مهاجرین وانصارک ابرامیله خلافتی قبوله مجبور اولدم. معاویه یه لازم اولان دخی بکا بیعت ایلمکدر. صکره عثمانک اولادی ، اقامه دعوی و شرعاً اثبات مدعا ایدوب ده آکا کوره امر قصاصک اجراسی لازم کلور . بوده امیر المؤمنینه عائد بروظیفه در ، دیو جواب ویرمشیدی .

بوجواب ، عین صواب ایدی ومعاویه نك بروجه بالا منبرده لاجل الاستدلال او قودینی نظم جلیل ، کندی علیه دلیل ایدی.

زیرا ( ومن قتل مظلوما فقد جعلنا لولیه سلطانا ) نظم جلیلنک معناسی ( کیم که مظلوماً ، یعنی بغیر حق قتل اولنه . آنک و لیسنه حق تسلط ویردک که قاتل اوزرینه مسلط اولوب اقتضاسنه کوره آکا قصاص ایله واقتضاسنه کوره دیت ایله مؤاخذه ایلر ) دیمک اولور .

وبوراده ولی ، بالفعل وارث دیمک اولوب سائر اقرایه شامل اولماز . معاویه ایسه عثمانک عمزاده لرندن بری ایدی .

شویله که: حضرت عثمان ، ابن عفان بن ابی العاص بن امیه بن عبدالشمس اولوب معاویه دخی ، ابن ابی سفیان بن حرب بن امیه اولمقله اوچ بطن یوقاروده برلشورلر و حضرت عثمانک معاویه کبی دها نیجه عمزاده لری وار ایدی. عبدالشمس ، هاشمک برادرلی اولمقله حضرت علی دخی حضرت عثمانک عمزاده لرندن ایدی .

اگرچه علی یه نسبتله معاویه ، عثمانه اقرب ایسه ده عثمانک اولادی اولمقله دعوی قصاص ، آنلرک حق اولوب قریب وبعید عمزاده لرندن هیچ بریسی ولی قصاص اوله مازلردی . بناءً علی ذلک معاویه نك بروجه بالا عثمانک

« ولسی یم » دیمسنه بروجہ شرعی یوق ایدی و قرآن کریمی او یولده تفسیر و تاویل ایتیمی خطا و یا کلش ایدی .

قبل الاسلام بین العرب قان دعواسی کوتمک و قاتل ، یاخود عشیرتندن و یاخود متفقلرندن قنغیسی راست کلورسه قتل ایتمک عادت قاری ایدی . و اوزمان عشیرت شیخلری دخی بودرلو ایشارک آرقه سنه دوشردی . شریعت اسلامیه ده ایسه بومثللو عادات جاهلیه ممنوع و هر کیمک قاتل اولدینی ثابت اولورسه مجرد آنک قصاص ایدلمسی مشروع اولدی .

بناءً علی ذلک معاویه ، عثمانک عمرزاده سی و بنی امیه نک رئیسی اولمق ملابسہ سیلہ « عثمانک ولسی یم » دیهرک آنک دمنی طلب یولنده میدانہ حیقمسی عادات جاهلیه یه او یار بردعوی ایدی .

لکن مقدما شامده ساکن اولان فقهای صحابه منقرض اولوب سائر رجال شامک اکثری احکام قرآنیہ کرمکی کبی واقف اولدیغدن معاویه نک خطالرینی فرق و تمیز ایدہ مزلردی ، اولدقجه واقف اولانلر دخی آغز آچامازلردی .

حتی فضلا و فقهای صحابه دن ( عبدالله بن عمرو بن العاص ) که بالاده بیان اولندینی اوزره پدرینک زوریلہ کوکلسز اوله رق شامہ کلش ایدی . پدرینه طوغری بی سویلمکدن چکنمز و معاویه نک طورینی بکنمز اولدینی حالده سکوتہ مجبور اولوب پدری یاننده بیکانہ ایدی .

اوانئاده فقها و علما مدینه ده و مکده اولوب آنلرک اکثری ایسه حضرت علینک یاننده ایدی و جمله سنک اعظم و افضلی حضرت علی اولوب قرآن کریمک احکام و مزایاسنی جمله دن اعلی بیلوردی .

رسول اکرم صلی الله علیه وسلم حضرتلری ( بن علمک مدینه سی یم و علی قپوسیدر . علمی ایستین قپوسنه کلسون ) دیو بیورمشدر .

و ابن عباس رضی الله عنهما « ناسه ویریلن علمک بشده دردی ، علی یه ویرلدی . باقی خمسنده دخی علی ، ناسه مشارکدر » دیمش اولدینی ثقه دن هر ویدر .



الحاصل حضرت علی اصحاب کرامک اعلمی ایدی . شامده عالم وفقیه کچینانلرک آکا قارشو مسائل شرعیه مباحثه سنه قالقشمیری کدیلرک آرسلا نه قارشو میرلدانملرینه بکزرردی .

معاویه ایسه کندی قصور و خطا لرندن غافل اوله رق حضرت علی یی تحطئه ایتمکده ایدی . حتی بو ائنده حضرت علی یه کوندردیکی مکتوبنده ( عثمانک قتلی خصوصنده سندن صادر اولان خطادن ناشی سکا بیعت ایلم و بوندن اول اهل حجاز ، حق و صدق اوزره حرکت ایده کلدکلرندن حل و عقد امور آنلرک اللرنده ایدی . اما شمدی مداهنه یولنی طوتدقلرندن انتخاب خلیفه و تنفیذ امور دینه حق ، اهل شامه انتقال ایتمشدر ) دیو یازمشدی .

حضرت علی دخی آنک جوابنده ( بنم وقعۀ عثمانده اصلا مدخلم یوقدر . بن اوزمان افراد مهاجریندن بریسی ایدم . شامده قریشدن ایکی کشی ظهور و خروج ایتمکله اهل شامک خلافت کبی بر امر خطیره مداخله یه حقاری اوله ماز . همده سز کندوکزی طلحه وزیره قیاس ایتمک . آره کزده چوق فرق واردر . زیرا آنلر اهل بدردندر و مهاجرین و انصارک بیعت ایلدکلرینه بیعت ایلمک سائر ناسک اوزرینه واجبدر ) دیو یازمشدر .

لکن معاویه نک ذهننی سودای امارت صارمش اولدیغندن بو مثللو نصیحتلر هپ تأثیرسز قالدی . مکاتبه و محاوره یه ختام ویرلدی و دعوانک فصلی قلیجه حواله ایدلدی .

### معارفات صریه

بالاده بیان اولندیغنی وجهله جریر بچلینک شامدن عودتی اوزرینه امیر المؤمنین علی کرم الله وجهه حضرتلری ( ابو مسعود الانصاری ) رضی الله عنهمی کوفه قائم مقاملغنه تعیین بیوردی و کندوسی موجود معیتی اولان عسکرله کوفه دن چیقوب ( نخيله ) نام موقعنده اردو قوردی . عسکرینه انتظام ویردی و جلب و جمع عساکر ایچون اطرافه سور بچیلر کوندردی .



متعاقباً بصره واليسى عبدالله بن عباس رضى الله عنهما بصره عسكريله  
كلوب اردوى هايونه ملحق اولدى . ديكر طرفلردن دخى پيدىرپى عسكر  
كلهرك اردوى هايون خيلى قوت بولدى .

حتى اردوى هايونده اهل بدردن سكرسان وشجره رضوان آلتنده  
بيعت ايلش اولانلردن سكر يوز اصحاب كزين اجتماع ايتش اولدينى بعض  
تواريخنده مسطوردر .

آنك اوزرينه حضرت على المرتضى ، عسكره خطاباً فايت فصيحانه  
وبليغانه برخطبه اوقودى وانلرى عصات وبغات ايله حرب وضربه تشويق  
بيوردى .

( اشتر ) دينكله معروف اولان بهادر ( مالك ) « يا امير المؤمنين ! بز  
هيچ بر وقت سندن آيرليز . اوغور هايوننگده جان فدا ايلرز ، ديهرك  
دعوت امير المؤمنينه اجابته سائره مسابقت كوستردى .

سابقين اوليندن واهل ( بدردن عمار بن ياسر ) وينه اهل بدردن  
( سهل بن حنيف الانصارى ) واصحاب كرامدن مشهور ( عدى بن حاتم طائى )  
كې اكابر ملت رضى الله عنهم دخى عصات وبغات ايله محاربه كمال صدق  
واخلاص ايله حاضر اولدقلىرى عرض ايلديلر . مشايخ قبائل دخى امير المؤمنينه  
مطيع ومخلص اولدقلىرى سويلديلر .

بعض ناس ، اهل اسلام اوزرينه قليچ چكمك خصوصنده تردد  
واشتباه اوزره بولندقلىرىدن حضرت على « بكا ، حقندن عدول ايله جماعتندن  
خروج ايدوب آيريلانلر ايله ، يعنى خوارج ايله مقاتله ايتك اوزره امر  
اولندى « ديو بيورمىدى .

بعض ذوات ، اوزمان حضرت على ايله برابر بولنان ( ابو ايوب الانصارى )  
حضرتلرينه كلوب « سن رسول الله صلى الله عليه وسلم ايله برلكده اوله رق  
مشرकिन ايله مقاتله ايتدك . شمدى اهل اسلام ايله مقاتله ايتك اوزره  
بورايه كلكدك « ديدكلرنده « رسول الله صلى الله عليه وسلم حضرتلرى بكا  
نقض عهد ايدن وجور وظلم ايلين وحقندن عدول ايله جماعتندن خروج

ایدوب آریلان کیمسه لر ایله مقاتله ایلمک اوزره امر ایتدی « دیو جواب ویرمشیدی .

لکن ( عبدالله بن مسعود ) رضی الله عنہک اصحابی اولان قرآدن بر جماعت قلیله بو سفردن تخلف ایتدیلر . و « یا امیر المؤمنین ! سنک علو شان و درجه کئی اعتراف ایله برابر ، بز اهل قبله ایله قتاله تردد و اشتباه اوزره یز . اکر کفار ایله جنک ایلمک و سرحد بکلمک اوزره بزی حدود و ثغور اسلامیه دن بر یره کوندرر ایسه ک حقمزه لطف و عنایت بیورمش اولورسین » دیدیلر .

حضرت علی دخی آنلرک رجالینه مساعدده بیوردی و کندولرینه « ربیع بن خشم » ی سرکرده نصب ایدوب بر سنجاق ویردی و آنلری ( ری ) و ( قزوین ) حدودینه کوندردی .

( مرة الهمدانی ) ایله ( مسروق ) رضی الله عنه دخی عطیه لرینی آلدقن صکره آنلر ایله برابر قزوینه کیتدیلر . لکن مسروق ، صکره بوتخلفدن نادم اوله رق آخر عمرینه قدر توبه و استغفار ایتمیشدر .

اوصرده سید التابعین اولان مشهور ( و بس القرنی ) رحمة الله علیه رحه واسعه حضر نلری نخیله یه کلهرک امیر المؤمنین ایله کوریشوب و فرقه ناجیه یه قاریشوب برلکده سفره عزیمت ایلش اولدینی مرویدر .

معاویه دخی شامده اردوسنی تنظیم ایتدیکی صرده عمر و بن العاصه و اوغلارینه آروجه بر سنجاق ویردکن بشقه حضرت علینک آزادلوسی اولان مشهور ( قنبر ) ه سنجاق ویرمش اولدیغنه قیاساً معاویه دخی عمر و بن العاصک کوله سی اولان ( وردان ) ه بر سنجاق ویرمکله عمر و بن العاص ممنون و مقتخر اوله رق فخریه لر سویلشدر .

حضرت علی بونی ایشدکده « بر کون صباحین یتش بیک باشی باغلی و آتلی ، دوه لی کزیده عسکری اول عاصینک اوغلی عاصی اوزرینه سوق ایده جکم » دیوب ، بومآله شعرلر نظم ایلشدر .

معاویه کیفیتیه مطلع اولوب « والله علی ، اصلسز گفتکو ایلز و اویله

جسیم قوته مالک اولسه بویله سوزلر سوزیلز ، دیهرك خوف وانديشه ایدوردی .

عمرو بن العاص ایسه «علینک عسکری آذرر . بصره اهالیسی آکا یار ویاور دکلدرد . کوفه عسکری دخی وقعه جملده چوق زده لئشلردر » دیهرك معاویه تسلیت ویریوردی .

### وقعه صفین

امیر المؤمنین علی رضی الله عنه حضرتلری ، بروجه بالا اسباب سفریه سنی ا کمال ایتدکن صکره مقدمه الجیش اولمق اوزره سکنز بیک عسکرله (زیاد بن النضر) ی ودرت بیک عسکرله (شریح بن هانی) ی ایلرو سوق ایتدی .

کندوسی اردوی هایون ایله نخیله دن قالقوب بابل خرابه سی جوارندن کچهرک (ساباط) ه واردی وکیجه اوراده قالوب فرداسی ، قبل الفتح پای تخت ایران اولان (مداین) ه کیتدی .

موصل جهتنک عسا کرینی سوق ایتک اوزره اوچ بیک سواری ایله (مَعْقِل بن قیس) ی موصله کوندردی و (رَقَه) ده کندوسنه ملاقی اولمق اوزره آکا تعلیمات ویردی .

مشهور (مختار بن ابی عیید) ک عمی اولان (سعد بن مسعود الثقفی) نی مداین قائممقامی نصب و تعیین ایدوب کندوسی او حوالی عسکرینی دخی برابر آله رق رقهیه عزیمت بیوردی .

حضرت علی ، اردوی هایون ایله رقهیه کلدکده فرات اوزرینه کوپری قورلمسنی امر ایتدیهده اهالی آندن امتناع ایدوب اردویی امرار ایچون قایقلرینی احضار ایتدیلر .

حال بوکه اوילה برجسیم اردونک اوفق تفک قایقلر ایله بویله بر بیوک

نهردن کچمسی متعسر اولدیغندن حضرت علی (منبج) کوپریسندن کچمک اوزره یوقاری طوغری حرکتی قرار ویردی .

اشتر ایسه اهالی بی تهدید ایله فرات اوزرینه بر جسیم کوپری قوردردی . حضرت علی دخی همان اردوی هایون ایله فراتک جهت غربیه سینه کچیوردی . علی المرتضی ، ابوبکر الصدیق و عمر الفاروق زمانلرنده اولدینی کبی ناسی بر سوز ایله اداره ایتک و قرقنی بر قیل ایله یدمک ایستر و کیمسه حقنده معامله جبریہ اجراسندن احتراز ایلر ایدی .

مزاج زمانه ایسه فاسد اولدیغندن ایش کوره بیلیمک ایچون اشتر کبی جری و جربزه لی و چاقور پنجه لی آدم لره حاجت مس ایدر اولمشیدی . اکر اشترک جبر و زوری ایله رقه ده کوپری قورلیوب ده منبج کوپری سینه قدر چیقلسیدی خیلی طولاشلمش و چوق وقت ضایع ایدلمش اولوردی و بوندن معاویه استفاده ایده بیلوردی .

بروجه بالا مقدمه الجیشه مأمور اولان (زیاد) و (شریح) فرات کنار ایله یوقاری طوغری حرکت ایله رک (عانه) یه کلدکلرنده معاویه نکه بیوک اردوسیله حرکت ایلدیکنی ایشتمش لر وینلرنده مشاوره ایشملر . «امیر المؤمنین اردوسیله آره مزده بویله بر بیوک نهر اولدینی حالد ایلرو کیدیلوب ده بویله آره عسکرله معاویه نکه بیوک اردوسنه تصادف اولنورسه خیرلو بر شی اولماز» دیمش لر وهمان عانه دن فراتک جهت شرقیه سینه کچمک ایسته مشلر ایسه ده اهالیسی مانع اولدیغندن کیرو دونمشلر و (هیت) دن فراتی کچمشلر . وهمان ایلرو حرکت ایله (قرقیسیا) یاننده امیر المؤمنین اردوسنه قاوشدیلر .

حضرت علی ، آنلری کورنجه «نه عجب که بنم مقدمه الجیشم کیرودن کلیور» دیدی و آنلر کیفیتی عرض و بیان ایتدکلرنده «اصابت ایلمشگنز» دیو بیوردی . بروجه بالا رقه کوپریسندن فراتک جهت غربیه سینه عبور اولندقه حضرت علی آنلری کافی السابق مقدمه الجیش اوله رق اون ایکی ییک عسکرله ایلرو کوندردی .

معاویه ایسه بر بیوک اردو ایله دمشق شامدن جیقوب مشی و حرکتند  
تأنی ایدرک و اطرافنی کوزه درک فرات یالیسنه طوغری کلکده اولدینی حالد  
بر بیوجک فرقه عسکریه ایله ( ابوالاعور سلمی ) یی ایلرو یورتمشیدی .

زیاد و شریح ، اشته بو فرقه یه تصادف ایله توقف ایدرک حضرت علی یه  
خبر کوندر دیلر . او دخی اوچییک سواری ایله آنلره امداد ایچون اشتری  
تعیین بیوردی . و « سیر سریع ایله مقدمه الجیشک امدادینه ایرش . زیاد ایله  
شریحی بر طرفکه آل . حد تلنوبده همان جنکه کیرشمه . وقار و تأنی  
اوزره حرکت ایله . عصاتی مکرراً اطاعته دعوت ایله و ممکن اولورسه  
بن کلنجیه دک آنلری اوایلاندر » دیو اشته تعلیمات ویردی . زیاده و شریحه  
دخی اشته اطاعت ایللری ایچون امرنامه کوندردی .

اشتر ، کمال سرعت ایله حرکت ایللرک مقدمه الجیشه یتشدی و آلدینی  
تعلیماته توفیق حرکت ایله نه آنلردن خوف ایدرکی اوزاق طوردی ، نه ده  
حربی قیزشدره جق مرتبه یاقلاشدی . بو وجهله آخشامه قدر طرفین  
اوزاقدن یکدیگره ناظر و منتظر اولوب قالدیلر .

بعده ابوالاعور ، بر حمله ایتدی اشتر دخی ثبات تام کوستردی و بر ساعت  
قدر جنک ایتدکدن صکره شاملیلر کیر و دو نمکله طرفین بر بندن آیرلدیلر .  
فرداسی اشتر ، بر آدم کوندر و ابوالاعوری مبارزه یه دعوت ایلدی .  
ابوالاعور ، مبارزه دن امتناع و کیدن آدمی شتم ایدرک اعاده ایتدی . فرداسی  
علی الصباح حضرت علی ، اردوی هایون ایله کلوب اردو قورمق اوزره بر  
مناسب یر تحریرسنه باشلادی .

معاویه ایسه اولجه ارض صفینه کلوب بر دوز و واسع موقع انتخاب ایله  
اردوسنی قورمش و فراتک موردینی ، یعنی صو آله جق یرینی ضبط ایله  
سوق الجیش فتنجه مهارت کوسترمش ایدی .

بوکره بوجه بالا حضرت علی دخی کلوب آنک اردو کاهنه قریب محله  
اردوسنی قوردی . عسکر صو آله جق ایچون فراتک مذکور موردینه واردی .  
معاویه نک عسکری صورت ممانعت کوستردی .



بو جهتله امیر المؤمنین عسکری ، فراتدن صو آله مدیلر . تحری ایتدیلر ،  
یشقه بر مورد دخی بوله مدیلر . همان کلوب حضرت علی یه عرض شکایت  
ایلدیلر .

امیر المؤمنین حضرتلری ، معاویه یه مأمور مخصوص کوندردی و « بزم  
یتیمز ابتدا مخبره و محاوره ایدی . حقه مقرون برسوزیکز وار ایسه استماع  
ایده جک ایدک . لکن ابوالاعور جنکه ابتدار ایدیورمش . بو جهتله  
میانه ده بر محاربه جک کچمش . شمدی مباح اولان صوی منعه حقکزیوقدر .  
اصرار ایدرسه کز محاربه بوندن صکره باشالایه جق . وبالی بوینگزه »  
دیو بیوردی .

معاویه ، امراسنی جمع ایله مشاوره ایتدکده عمرو بن العاص « صوبک منعی  
مناسب اولماز » دیمش ایسه ده ( ولید بن عقبه ) وامثالی رؤسا « آنلرنصل  
عثمانی صوسز قودیلر ایسه سزده آنلری صوسز براقکز . برکیجه صوسز  
قالورلر ایسه رجعته مجبور اولورلر و رجعتلری برنوع هزیمت اولور » دیمکه  
معاویه صو طریقنک سدی ایچون بر فرقه عسکریه ایله ابوالاعوری کوندردی .  
حضرت علی ایسه قان دوکمک ایچون شرعاً حق قازانق ایستردی . بونک  
اوزرینه همان عسکره خطاباً « صو آلمق حق اوزرینه باغیلر ایله حرب  
ایدیکز » دیو امر ویردی . اشعث بن قیس الکنندی « بن کیدهیم » دیه رک  
عسکریله قالقوب کیتدی . ابوالاعور ، آکا قارشوکلدی . ابتدا اوق آتشدیلر  
صکره قارغی وبعده قلیج محاربه سنه کیریشدیلر . معاویه ، ابوالاعوره امداد  
ایچون سواری ایله ( یزید بن اسد البجلی ) یی سوق ایتمکه حضرت علی  
دخی ( شیت بن ربیع ) یی سوق و تسیر بیوردی .

وبعده معاویه ، عسا کر کثیره ایله عمرو بن العاصی کوندرمکه حضرت  
علی دخی آکا مقابل عسا کر کثیره ایله اشتی کوندردی .

بر شدتلی محاربه وقوع بولدی . نهایت فرقه ناجیه مظفر اولدی .  
باغیلر صوسز قالدی . لکن حضرت علی « ماء جاری مباحدر . بین الناس  
مشرکدر . لزومی قدر صو آکگز ، اما صو طریقنی سد ایله شاملیلری



صودن محروم ایتیکز، دیو کندو امراسنه خبر کوندردی وباغیره حسن مثال کوستردی.

ایکی کون، حال سکون وسکوت اوزره کچدی. ذی القعدة تمام اولدی. غره ذی الحجة ده حضرت علی، معاویه به نصیحت و آنی اطاعته دعوت ایلک اوزره مأمورلر کوندردی.

مأمورلر کیتدیلر، معاویه به نصیح و بند ایتدیلر ایسه ده معاویه، عثمانک قاتنی آلتق اوزره آنک علیه خروج ایتیش اولانلرک تسلیمنی طلبدن بشقه بر صورت مسالیه یناشمیوب مأمورلری مایوساً کبرو چویردی.

حال بوکه حضرت عثمان علیه خروج ایتیش اولان نیجه بیک کشینک طوتیلوب ده عادت جاهلیه اوزره اعدام ایدلک ایچون معاویه به تسلیمی قابل اولیه جفتی معاویه دخی بیلوردی. لکن کندوسنجه موقعنی محافظه ایچون محاربه دن بشقه چاره اولیوب عوام ناسی حربه تحریک وتشویق ایچون دخی النده دم عثمانی طلبدن غیری سر رشته اولدیننی جهتله اولیه تکلیف مالایطاق ایدیوردی.

بناءً علی ذلک قلم ولسان یرینه سیف و سنان اوینامق لازم کلدی وهان حربیه مباشرت اولندی. لکن ایکی اردو بردن یکدیگری اوزرینه هجوم واقتحام ایتسه عظیم تلفاتی موجب اوله جنی درکار اولمغله طرفین بوندن صرف نظرله هر کون و بعضاً کونده ایکی دفعه، ایکی طرفک اشراف ورؤساندن برر ذات، برر فرقه ایله میدانه چیقوب جنک ایدرلردی.

حضرت علی طرفندن اکثراً (اشتر) چیقاردی. و بعضاً بالمناوبه (حجر بن عدی الکندی) و (شیت بن ربیع) و (خالد بن المعمر) و (زیاد بن النضر الحارثی) و (زیاد بن حصافة التیمی) و (سعد بن قیس الهمدانی) و (مَعْقِل بن قیس الریاحی) و (قیس بن سعد الانصاری) چیقارلردی.

معاویه طرفندن دخی آنلره قارشو بالمناوبه (عبدالرحمن بن خالد بن الولید) و (ابوالاعور سلمی) و (حبيب بن مسلمة الفهری) و (ذوالکلاع الحمیری)

( عیدالله بن عمر بن الخطاب ) و ( شرحیل بن السمط الکندی ) و ( حمرة بن مالك الهمدانی ) چیقارلردی .

ذی الحجة الشریفه غایتته قدر وجه مشروح اوزره محاربه ایتدیلر . اکثریا محاربه لر ، مبارزه طرزنده کچدی . بعده ( شایدکه مصالحه میسر اولور ) دیو طرفین متارکیه قرار ویردی .

### وقایع سنه ۳۷

اشبو اوتوزیدی سنه هجریه سی محرم الحرامی غایه سنه قدر متارکیه قرار ویرلش اولدیغندن خلال محرمده اصلا مقاتله وقوع بولمادی .

طرفیندن مبعوثلر کیدوب کلدی . انواع ادله شرعی و عقلیه ایراد اولندی ، مصالحه چاره آراندی ، لکن میسر اولمادی .

سلخ محرمده حضرت علی امر ایتدی . بر منادی میدان چیقوب « ای اهل شام ! امیر المؤمنین دیورکه : حق رجوع ایدرسکنز دیو تائی ایتدم . سز ایسه طغیانکنزدن واز کچمدیکنز ، حق قبول ایتدیکنز ، متارکه و مساعدہ زمانی کچدی » دیو ندا ایلدی .

آنک اوزرینه عسا کر شامیه آمرلرینه مراجعت ایلدیلر . همان معاویه و عمرو بن العاص ، فرقه لری ترتیه و عسکرلرینی تعییه باشلادیلر . معاویه میمنه سنه ( ذوالکلاع الحمیری ) یی و میسرده سنه ( حبيب بن مسلمة الفهری ) یی و مقدمه الجیشنه ( ابوالاعور ) یی و دمشق شام آتولوسنه ( عمرو بن العاص ) یی و پیاده سنه ( مسلم بن عقبه المسمری ) یی سرکرده و جمله سنک اوزرینه شجعان عربدن ( ضحاک بن قیس ) یی سردار نصب ایتدی . عسا کر شامیه دن برکروم فدائیلر اولوم اوزرینه ، یعنی « اولمه وار ، دونه یوق » دیو بیعت ایلدیلر ، و بش صف اوله رق صاریقارلیله کندولرینی بربرینه باغلادیلر .

حضرت علی دخی عسکرینی تعییه و صبر و ثباته تشویق ایتدیکی صردهده « باغیلر جنکه مباشرت ایلدکجه سز باشلامیکز و آنلری بوزدیغکنزده فراریلرینی تعقیب ایلیمیکز . یاره لولرینی اولدیرمیکز ، مقتوللرینک بورتی .

قولاغنی کسمیکز . کیمسه نك عورت یرینی آهمیکز . خانه لره کیرمیکز ، مال آلمیکز . قاریلری سزی ، یاخود بیوکلر کزدن برینی سب ایتسه لر بيله آنلره طوقنمیکز . زیرا آنلرک خلقتجه و اخلاقجه ضعف حاللری واردر . دیو نصیحت ایلدی .

فرداسی صباحلین حضرت علی کوفه آتلوسی اوزرینه ( اشتر ) ی و پیاده سی اوزرینه ( عمار بن یاسر ) ی و بصره سواریسی اوزرینه ( سهل بن حنیف ) ی و پیاده سی اوزرینه ( قیس بن سعد بن عباده ) ی سرکرده نصب ایتدی و سنجانی شجعان عربدن و اخیار فضالادن سعد بن ابی وقاصک برادرزاده سی اولان ( هاشم بن عتبة بن ابی وقاص ) ه و یردی . و ( مسعر بن فدک ) ی قرآء کوفه و قرآء بصره اوزرینه مأمور بیوردی .

ابتدا میدان حربیه چیقان کوفه عسکریله ( اشتر ) اولوب آکا قارشو ( حبيب بن مسلمه ) چیقدی بتون کون شدتلی جنک ایتدیلر . ایکنجی کونی بر فرقه عسکریه ایله ( هاشم بن عتبة المرقال ) چیقدی . ( ابوالاعور ) آکا قارشو کلدی . آنلرده شدتلی جنک ایتدیلر و آخشام ایریشوب بربرندن آیرلدیلر .

اوچنجی کونی ( عمار بن یاسر ) چیقوب آکا قارشو بفرقه شامیه ایله ( عمرو بن العاص ) چیقدی ، فوق العاده شدتلی مقاتله ایتدکلری صروده عمار « ای اهل عراق ! شو باغییه قارشو ثبات ایلیکز » دیه رک آنلری عمرو بن العاص ایله مقاتلهیه تشویق ایتدکدن صکره سواری اوزرینه مأمور اولان ( زیاد بن النضر ) ه « حمله ایت » دیو امر و یردی . او دخی حمله ایتدی . عسا کر شامیه ایسه ثبات کوستردی . طرفین بربرینه کیردی . عمار ، هان بتون موجود معیتی ایله بر شدتلی هجوم ایدوب عمرو بن العاصی برندن قالدردی . بعده زیاد بن النضر ، میدان مبارزهیه چیقوب اردیلدی . بنی المتفقدن ( عمرو بن معاویه ) آکا قارشو چیقدی . حال بوکه آنلر آنا بر قرنداش ایملر . بربرینه یا قلاشدقلرنده بیلشدیلر و همان بربرندن آیریلوب کیرو دوندیلر .

فرداسی حضرت علی نك كوچوك اوغلي ( محمد بن حنیفه ) میدان حربہ چیقدی . ( عیدالله بن عمر بن الخطاب ) آکا قارشو کلدی . معیتلرندہ برر بیوک فرقه عسکریہ وار ایدی . غایت شدتلی مقاتله ایتدیلر . عیدالله ، محمد بن حنیفه ی مبارزه دعوت ایلدی . اودخی آتتی ایلر سوردی . لکن حضرت علی ، اوغلنی کیرو چویردی وبالذات عیدالله قارشو مبارزه چیقدی . عیدالله ، آنی کورنجه کیرو دوندی . محمد بن حنیفه ، پدرینه « بنی براقسیدك مأمول كه آنی قتل ایدردم . یا امیر المؤمنین ! بوفاسق ایله نیچون مبارزه تنزل ایدیورسین والله بنم سکا رغبتم آنك پدرندن زیاده در » دیدکده حضرت علی « اوغلجغزم ! آنك پدری حقنده خیر ایله یادایلکدن غیری سوز سویله » دیو بیوردی .

بشنجی کونی ( عبدالله بن عباس ) چیقدی . ( ولید بن عقبه ) آکا قارشو کلدی . شدتلی مقاتله ایتدیلر . ولید ، اوصرده بنی عبدالمطلبه سب ایتمکله عبدالله آتی مبارزه دعوت ایلدی . لکن ولید آنکله مبارزه چیقیشه مدی .

آلتنجی کونی ( قیس بن سعد الانصاری ) چیقدی و آکا قارشو ( ابن ذی الکلاع الحمیری ) چیقدی . آنلر دخی شدتلی محاربه لر ایتدکدن صکره بربرندن ایرلایلر .

یدنجی صالی کونی ینه ( اشتر ) ایله ( حیب ) چیقوب پك شدتلی جنك ایتدیلر ، بربرندن ایجه انتقام آلدیلر و اوילה وقتی یکدیگرندن ایرلایلر . آنك اوزرینه حضرت علی « نیجه یه دك بو عاصیلر ایله فرقه فرقه جنك ایده جکز . نیچون هیئت مجموعه مزله آنلرك اوزرینه هجوم واقتحام ایتیمورز » دیدی و قالقوب جماعته خطاباً غایت مؤثر برخطبه اوقودی و کیجه عسکرك تعیه سیله مشغول اولدی . فرداسی چهارشنبه کونی صباحلین اهل شامك قیله لرینی سوردی ، موقعلرینی اوکرنندی هر قبیله یه کندی طرفنده کی هم جنسلرینی قارشو تعیه ایتدی .

« هر قبیله کندی قرنداشلرینه قارشو طورسون » دیدی . ( بحیله ) کی .

شامده قرداداشلری بولمیانلری دخی (لحم) قیله سنه قارشو وضع وتعییه بیوردی وهان بتون اردوسیه حرکت ایلدی . معاویه دخی شام اردوسیه میدانه چیقدی . اخشامه قدر غایت شدتلی بر محاربه وقوع بولدی . بر طرف غالب اولمق سزین کیرو دوندیلر .

فرداسی پنجشنبه کونی حضرت علی، صباح نمازینی آلاجه قراکلقده قیلدی واردوسیه حرکت واهل شام اوزرینه هجوم ایتدی . میمنه سنده (خزاعه) قیله سنک شیخی اولان (عبدالله بن بدیل بن ورقاء الخزاعی) ومیسره سنده (عبدالله بن عباس) وار ایدی . قرآء دخی (عمار) و (قیس بن سعد) و (عبدالله بن بدیل) معیتلرنده اوچ قسم اولمشلر ایدی . حضرت علی، اهل مدینه ایله قلب عسکرده واهل کوفه واهل بصره آرمه سنده ایدی . اهل مدینه نك اکثری انصار اولوب برمقدارده (خزاعه) و (کنانه) و قبائل سائرهدن وار ایدی . معاویه دخی بر بیوک قبه چادر قوردورمش و اطرافنی دمشق آتوسی احاطه ایتمش و اکثر اهل شام معاویه یه اولوم اوزرینه بیعت ایش ایدی .

عبدالله بن بدیل ، معاویه نك میسره سنده بولنان (حبيب بن مسلمه) نك فرقه سی اوزرینه هجوم و او یله وقتنه قدر قانلی و شدتلی محاربه ایدرک شام آتوسنی بوزدی و آنلری معاویه نك چادرینه دک رجعتیه مجبور ایتدی . معاویه همان اطرافنده کی فداییلری حبیبک یانه سوق ایتدی . اودخی انلر ایله قوت بوله رق ابن بدیلک فرقه سی اوزرینه بر شدتلی هجوم ایدنجه ابن بدیلک عسکری طاعیلدی ، یاننده یالکز ایکی اوچ یوز قدر قرآء قالدی یوزغون عسکرک براوجی حضرت علی نك یانه قدر کلدی . حضرت علی، آنلره امداد ایچون اهل مدینه ایله (سهل بن خنیف) ی کوندردی . لکن اهل شامک بیوک بیوک فرقه لری آنلری استقبال ایله حرکتلرینه مانع اولدی .

بوصرمده میسرهمده بولنان مضر قیله سی آچیلدی ایسه ده ربیعہ قیله سی ثبات کوسترمکله حضرت علی آنلری تشویق ایچون اوغللری حسن وحسین



وابن حنیفه ایله برابر اولدقلری حالده پیاده اوله رق ربیعه یانه کیدرکن ابوسفیانک آزادلوسی (احمر) قارشو کلدی حضرت علینک آزادلوسی (کیسان) آرمه کیردی. احمر، آنی قتل ایدنجه حضرت علی، احمرک کمرندن طوتوب یره چاریدی. احمرک قوللری قیرلدی، اوموزلری خورد و خاش اولدی. بعده حضرت علی، ربیعه یه یاقلاشدی و آنلری صبر و ثباته ترغیب و تشویق بیوردی. آنلر دخی بربرینه «ای بنی ربیعه! امیر المؤمنین ایچیکزده ایکن اکا بر حال اولورسه بین العرب رسوا اولورسکز» دیو باغرشدیلر و غایت شدتلی بر جنکه کیرشدیلر. بناءً علیه حضرت علی آنلرک حقنده برقصیده مدحیه نظم ایلشدر.

و بوجه بالا حضرت علی میسر یه کیدرکن اشته راست کلمشیدی که میعنه ده کی فزع و فریادی ایشیدنجه آتی تپوب او طرفه طوغری کیدیوردی. حضرت علی آکا «یا اشته! اول قومه صورکه اولومدن قاجوب ده نزه یه کیدیورلر. اولومدن قورتلنک بر چاره سی واری» دیو بیورمش اولدیغندن اشته، بوزغون عسکرک یانه واروب حضرت علینک کلامنی تبلیغ ایلدی و غایت مؤثر سوزلر سویلادی.

بوزغون عسکر، اشته سنی ایشیدوب سوزنی دکلیه رک جسارتلندیلر و آنک باشنه طوپلانیدیلر. اودخی بوقوت ایله همان شاملیلرک اوزرینه شدتلی هجوملر و قاتلی محاربه لر ایدرک آنلری معاویه نک یانه قدر سوردی و (ابن بدیل) ک یانه واردی که ایکی اوچ یوز قدر قرآ ایله برابر یاتوب یره یاشمش اولدقلرندن صانکه یره یایلش چرکه لرکی کورینه رک شاملیلر آنلرک اوزرلرینه و ارامامشلر ایدی. یولداشلرینی کورنجه طاوراندیلر و «امیر المؤمنین نه حالده در» دیو سوردیلر. اشته دخی میسرده حرب ایلکده اولدیغنی افاده ایلدی.

عبدالله ابن بدیل رضی الله عنهما «هایدی طوغری معاویه نک اوزرینه هجوم ایده لم» دیدی، اشته رضا و یرمدی. ابن بدیل، آنی دکله میوب همان کندی آرقداشلریله برابر هجوم ایتدی و اوکنه کلنلری کسوب ییچهرک



تا معاویہ نك یانہ قدر واردی . حال بوكه معاویہ نك اطرافنده طاغیر کی عسکر پیغیلوب یا قلاشانلره امان زمان ویرمیورلردی . هان ابن بدیلک اطرافنی آدلیر، آنی و آرقداشلرندن برچوغنی شهید ایلدیلر . بقیه سی دخی مجروح اوله رق رجعته مجبور اولدیلر . باغیلر ایسه آنلری تعقیب ایتمکده اولدقلرندن اشتر بر مقدار عسکر ایله (حارث بن جهمان) ی کوندروب آنلری قورتاردی و سمت سلامتہ چیقاردی .

وهان اشتر (همدان) قبیله سی یکتیلریله طوائف سائرہ نی جمع ایدرك هیئت مجموعہ سیله باغیلرك اوزرینه هجوم ایتدی و آنلری یرلرندن قالدردی و معاویہ نك یاننده یکدیگیرینه صارقلریله مربوط اوله رق بش صف اولان فداییلرك یانہ قدر سوردی . بعده بر هجوم دها ایتدی ، بوصفلرك دردنی یاردی ، یرہ دوشوردی . آنک اوزرینه معاویہ قیصر اغنی ایستیوب بندی وانہزای قورمش ایکن حمیت عربیہ سی مانع اوله رق متردد بولندینی حالہ عمرو بن العاص یوزینه باقوب « بوکون صبر ، یارین فخر » دیه رك جسارت ویردی . معاویہ دخی غیرتہ کلہ رك طیانوب طورمش ایدی . هان اهل شامہ غیرت ویردی و عسکرینی طویلا یوب اشترک باشنه اوشوردی .

او اثناده محاربه شدتلنوب مبارزلر و محاربلیر میدانہ چیقہ رق یکدیگیرہ حملہ لر ایتدیلر ، متاع حیاتی بادہوا آلوب صائدیلر و اوصرہ ده (عبدالله بن ابی الحصین الازدی) عمار بن یاسرک یاننده کی قرآء ایله جیقوب شاملیلری بربرینه قاتدیلر .

(عقبہ بن حدید النیری) دخی « دنیا مرعاسی قوریدی ، آغاچلری چالی ، چیرپی اولدی . یکیزی اسکیدی ، طادی قاچدی . بن دنیادن اوصاندم . هر جنسکه کیدیورم ، هر غارته سکر دیورم ، شهادتی تمی ایدیورم . الله میسر ایتدی ، بنی بوکونه یتشدردی . شمدی قطعاً شهید اولوق املنده یم . عباد الله ! نه طورہ یورسکز . الله دشمنی اولان باغیلر ایله جهاد ایچون دها نہ یه منتظر اوله یورسکز » دیه رك ایلر وکتدی . برادرلری (عبدالله) و (عوف) و (مالک)

دخی « سندن صکره بزده دنیا رزقی ایستیمیز » دیرهك آنك ارقه سندن کیتدیلر و جمله سی شهید اولنجیهك جنك ایتدیلر .

( قیس بن مکشوح ) که ( بحیله ) سنجانی آنده ایدی . سنجانی چکوب قومك اوکنه دوشدی ، شهید اولنجیهك دوکشدی . همان سنجانی عمزاده لرندن بری آلدی . اودخی شهید اولدی . بعده سنجانی ( عقیف بن ایاس ) آلمش و حربك صوکنه قدر بهادرانه جنك ایدرك موقعنده ثابت قالمش و بحیله دن ( ابو حازم ) عجبانی رضی الله عنه و اوغلی ( حازم ) کبی نیچه معتبر ذاتلر شهید اولمشدر .

حضرت علی ، بوجه بالا میسرده جنك ایدركن میمنه سنده کی عسکرینك بوزلمش ایکن دوزلمش و اولکی موقعلرینه کلمش اولدقلرینی کورنجه یانلرینه وارمش ، یوزلرینه قارشو ثنا و دعا ایدرك آنلره تسلیت و یرمش و کندولرینی صبر و ثباته تشویق بیورمشدر .

هر طرفدن مبارزلر و محاربلر میدان چیقوب شدتلی جنکه طوتشدیلر . حضرت علی طرفدن ( طئی ) و ( نَخَع ) دلاورلری ایلرولیوب بر قانلی محاربه کیرشدیلر . مشاهیردن نیچه ذاتلر شهید اولدی . محاربه کیتدکجه شدت بولدی .

اهل شامک میمنه سنده بولنان قبیله ( حَمِیر ) و آنلره ملحق اولانلر ایله ( ذوالکلاع الحمیری ) ایلرو حرکت ایلدی ( عیدالله بن عمر بن الخطاب ) دخی برابر ایدی . اهل عراقک میسر سنده و عبدالله بن عباسک معیتده بولنان ( ربیع ) قبیله سی اوزرینه غایت شدتلی هجوم ایتدیلر . ضعفا کروهی بوزلدیلر ایسه ده شجان ربیع کوزل مدافعه ایدرك طیاندیلر . قاچانلر دخی سنجاقلرینک یرلورنده قائم اولدیغنی کورنجه جسارتلندیلر و کیرو دوندیلر . اوصرده عبدالله بن قیس قبیله سی کلوب آنلرك امدادینه ایرشدیلر و برقانلی مقاتله کیرشدیلر بوجهتله محاربه دهاز یاده شدت بولدی ، ذوالکلاع ایله عیدالله بن عمر ایکسی ده مقتول اولدی .

ایشته اوصرده ، خواص اصحاب رسول الله دن اولان عمار بن یاسر رضی الله

عنه حضرتلری میدانہ چیقدی. حربہ سی النده والی اختیارلقدن دترہ مکده ایدی. « یارب بوکون سنک عندگده بوفاسقلر ایله جهاد ایلمکدن دها مرضی ومقبول برایش بیلمیورم. بیلم آنی یاپاردم » دیدکدن صکره ناسه خطاباً « رضای باری ایچون سعی ایدوبده مال واولاده رجوع ایتیه جک کیم وار » دیو ندا ایتدی وهمان باشنه برچوق خلق طوپلاندقده « هایدی یورویکیز بوباغیلرک اوزرلرینه کیده لم. والله مراملری دم عثمانی طلب دکلدرد. آنلر دنیانک طسادینی طاتیدیلر ودنیایه طمع ایتیدیلر. بیلولرلرک حق میدانہ چیقنجه اغراض فاسده لرینک حصولنه مانع اوله جق. کندولرینک اسلامده سابقه وقدملری اولمدینی جهته امارت وولایته استحقاقلری اولمديغندن دم عثمانی طلب سوزيله کندی تبعه لرینی آلداتیدیلر. یوخسه آنلره ایکی کشی تابع اولماز » دهرک وجناب حقدن فرقه ناجیه یه نصرت ایستیه رک حرکت ایددی.

عمار بن یاسر، بریر روشن ضمیر اولوب آرلرک بکی کبی هر زرده بولنسه وصفینک قنی وادیسنده کورنسه اصحاب کزین وکبار تابعین آنک باشنه اوشرلر و آرقه سنه دوشرلر ایدی. حضرت علینک سنجاقدارلری اولان (هاشم بن عتبہ بن ابی وقاص) ک یاننه واردقده « یا هاشم! جنت قلیجلاک کولکه سی آلتنده در. اولوم دخی مزراق اوجنده در. کوک قپولری آجیلدی، حور عین بزندی » دهرک هاشمی حرکتہ تشویق ایتدی ویاننده مجتمع اولان عسکر ایله ایلرو کتیدی. حتی عمرو بن العاصک یاننه یاقلاشدی « یاعمرو! یازیق سکا که دینکی مصره دکشدک » دیو توبیخ ایددی وعمرو « اوله دکل. بن دم عثمانی طلب ایدیورم » دیدکده عمار « بن عن علم شهادت ایلرم که سن هیچ برایشده رضای باری یی آراماز سین. یاعمرو! بوکون قتل اولماز ایسه ک یارین اوله جک سین. هرکسه نیتنه کوره جزا ویريله جکی کون سن ده نیتک نه ایسه کوررسین. بوسنجاق صاحبی رسول الله ایله برابر اولدینی حالده (یعنی سن هنوز ایمانه گلدن) اوج دفعه آنکه محاربه ایتمش ایدک. بو دردنجیسی اولکیلردن ابی دکلدرد » دیدی.

فی الواقع قرآن کریم آیت بآیت طرف الٰهیدن تنزیل بیورلقدہ ایکن  
مشرکرا ایمان ایتیموب رسول اکرم صلی الله علیه وسلم حضرتلریله جنک  
ایدرلردی .

اوزمان ( ابو سفیان ) رئیس قریش اولوب هپ امویلر ایله برابر  
عمرو بن العاص دخی آنک معیتندہ ایدی . حضرت علی ایسه دائما رسول  
اکرمک یاننده اوله رق بالدفعات آنلره مقابله ایتشدی . بو کره حضرت  
پیغمبرک سنجانغی ، خلیفه سی اولان علی المرتضیٰ حضرتلرنده اولدینغی حالده  
ابو سفیانک اوغلی معاویه باغیلره رئیس اوله رق آنکله جنک ایدیلوردی  
وهپ امویلر ایله برابر عمرو بن العاص دخی آنک معیتندہ ایدی .

فقط ابوسفیان اوزمان قرآن کریمک تنزیلی اوزرینه جنک ایدیلوردی .  
اوغلی معاویه ایسه بو کره قرآن کریمک تأویلی اوزرینه جنک ایتکده  
ایدی که بالاده ذکر اولندیغی اوزره بعض آیات قرآنیہنی کندی مرانہ  
موافق صورتده تفسیر وتأویل ایدرک امیرالمؤمنین ایله منازعه ومحاربه  
ایدیلوردی .

رسول اکرم صلی الله علیه وسلم حضرتلری ایسه ( یاعلی ! بن قرآنک  
تنزیلی اوزرینه مقاتله ایتدم . سنده تأویلی اوزرینه مقاتله ایدہ جکسین )  
دیو بیورمشیدی .

ایشته بو کره او حدیث شریفک معناسی کونش کبی ظاهر  
اولدی .

بناء علی ذلک عمار بن یاسر حضرتلری « بز نصل که مقدا سزکله  
قرآن کریمک تنزیلی اوزرینه مقاتله ایتدک ایسه شمدی ده تأویلی اوزرینه  
مقاتله ایدرز » دیه رک باغیلر اوزرینه هجوم ایله بر قانلی محاربه یه  
طوتشدی .

کندوسنی حرارت باصمغله بر آراق دونوب صو ایستدکده بر خاتون  
آکا بر قدح صولو سوت ویردی . « صدق رسول الله » دیه رک سودی  
ایچدی و « بوکون بن یارانه ، محمدہ واصحابنه قاووشه جغم . زیرا رسول الله

صلى الله عليه وسلم بكا ( دنيا ده صوځ رزقك صولوسوتدر ) ديوبور مشيدى .  
ديوب كيتدى وباغيلىر اوزرينه هجوم ايتدى و بردها دونموب شهيد اولنجيهك  
دو كشدى . رضى الله عنه وارضاه .

( حبة الجوين العرفى ) ديدى كه : صاحب سر نبي اولان ( حذيفة ابن اليمان )  
« بز فتنه دن قورقويورز . بزه معلومات وير » ديديكمد « ابن سميه » نك ،  
يعنى عمارك بولندينى فتنه دن صاقنگز . زيرا رسول الله صلى الله عليه وسلم دن  
ايشتم ( عمارى ، يولدن صاپان فئه باغيه قتل ايدى جك واڭ صوكره كى  
رزقى صولوسوت اوله جق ) ديوبوردى « ديمشيدى . عمارى قتل اولندينى  
كون كوردم » بكا صوځ رزقى كتوريكز « ديور ايدى . بر قدح صولو  
سوت ويرلدى . بر كنيش قدح ايدى و كنارنده برقرمزى حلقه وارايدى .  
آنى ايجدى و « بن بوكون احبابه ، محمد و اصحابنه قاوشه جغ » ديدى .  
حذيفه ، قتل قدر خطا ايتدى .

عمارك قاتلى كيم اولديغنه اختلاف اولنمشدر . روايت مشهوره كوره  
آنى ( ابو العاديه ) اوروب يره دوشورمش و ديكر برباغى آنك باشنى كسوب  
معاويه كتورمش . « ايكي سى ده عمارى بن اولدرم » ديهرك معاويه ايله  
عمرو بن العاصك حضور لرنده منازعه ايتمشل عمرو « ايكي گزده اهل جهنم سكز »  
ديمش . حريفلىر كيتدكن صكره معاويه « بزم ايچون جان و باش فدا ايدن  
آدملره نيچون اويله سويلدك » ديوب عمروه عتاب ايتمش . عمرو دنى « والله  
اويله در . سنده اويله اولديغنى بيلورسين . كشكه يكرمى سنه مقدم فوت  
اولوبده بو حالى كورميدم » ديمش .

عمار بن ياسرى فئه باغيه نك قتل ايدى جكنه دائر اولان حديث شريفى  
( ذوالكلاع الحميرى ) ايشيدوب عمرو بن العاصه « واه واه » يازيق سكايامرو  
بوندر « ديدكه عمرو « قريبا عمار بزم طرفه دونر » ديوب جواب ويرمش .  
او كون ابتدا ( ذوالكلاع ) وبعده عمار قتل اولندقد عمرو بن العاص  
معاويه « بيلم قنغيسنك قتيلاه ده زياده مسرور اولملى . عمارك قتيلاه مى ،  
يوخسه ذوالكلاعك قتيلاه مى . والله ذوالكلاع ، اكر عماردن صكره يه



قالسیدی بتون اهل شامی علیہ میل ایتدیرردی « دیمش وماجرائی حکایه ایتمش .

عبدالرحمن سلمینک بیانہ : کورہ معاویہ وعمر وبن العاص ایله اوغلی عبدالله وابوالاعور مصاحبت ایدرلرکن عبدالله « بوکون سز بو آدمی ، یعنی عماری قتل ایتدیکنز . حال بوکه مدینہ منورہده مسجد نبوی بنا اولنور ایکن هر کس برر کرییچ نقل ایدردی . عمار ایسه ایکشر کرییچ نقل ایدرک بایلوب دوشدکده رسول الله صلی الله علیه وسلم حضرتلری آنک یانہ کلوب مبارک الیه یوزینک توزینی سیلهرک ( واه واه ، ناس برر کرییچ نقل ایدرکن ابن سمیه نک ، یعنی عمارک ثوابه رغبتی زیاده اولدیغندن ایکشر کرییچ نقل ایدیور . مع هذا آنی فئه باغیه قتل ایده جک ) دیو بیورمشیدی . ده نیجه عمرو بن العاص ، معاویہ « ایشتمیورمیسین عبدالله نه دیور » دیمش ومعاویہ « نه دیور » دیمکه اوغلی عبداللهک دیدیکی افاده ایتمش .

معاویہ ، همان اوحدیث شریفک معناسی تأویل ایله « عماری بزمی قتل ایتدک . آنی آنجق بورایه کتورن قتل ایتدی » دیمش . متعاقباً بر چوق خلق « عماری بورایه کتورن قتل ایتدی » دیهرک چادرلردن طیشارو چیقمشلر . « بيلم معاویہ نک تأویلمی ، یوخسه بو آدملرک سوزلریمی دها زیاده عجیبدر » دیهرک عبدالرحمن بیان حیرت وتعجب ایتمشدر . لکن تعجب ایتمه ملیدر . زیرا حب دنیا ، انسانی شاشیرتیر ودرلو تأویلاته دوشورر . عاقلی غافل قیلار ، غافل عاقل کوسترر .

اهل بدردن ( خزیمه بن ثابت الانصاری ) که رسول الله صلی الله علیه وسلم حضرتلری آنک شهادتی ایکی آدمک شهادتنه مقابل قیلمش ایدوکندن ( ذوالشهادتین ) دینلور . وقعہ جملده حضرت علی ایله برابر ایکن جنک ایتامش اولدیغی کبی بوکره صفینده دخی حضرت علی ایله برلکده بولندیغی حالده جنک ایتیوردی . عمارک بروجه بالا قتل اولندیغی کورنجه « رسول الله صلی الله علیه وسلمدن ایشتم ( عماری فئه باغیه قتل ایده جک ) دیو



بيوردي « دهرک همان قليجی چکوب شهيد اولنجه يه دك جنك ايتدی .  
رضی الله عنه وارضاه .

حضرت علی المرتضی ایسه عمار بن یاسر قتل اولندی کي ربیعہ و همدان  
قبیلہ لرینه « سز بنم زهرهم وسلاحم سکز » دیمکله اون ایکی بیک قدر دلاور  
سیجیلدی . حضرت علی آنلرک اوکنه دوشوب عاصیلر اوزرینه اوپله  
شدتلی هجوم ایتدی که شاملیلرک بوزلدق صفلی قلمدی .

حضرت علی « باغیلری قتل ایدیورم اما آنلری آزدیران، کوزلری  
حقیق وقارنی بیوک معاویہ یی کورمیورم » دیر ایدی . نهایت اوکنه کلنلری  
کسوب ییچهرک معاویہ نك یانته قدر واردی . « یامعاویہ ! خلق بزم ایچون  
نیه بربرینی قیرسون . میدان مبارزه یه چیق ، سنکله مرافعه مزی اللهه  
حواله ایدلم ، هرکیم خصمنی قتل ایدرسه ایش بلا منازع آکا قالور » دیو  
بیوردی .

عمرو بن العاص ، معاویہ یه « عمزاده ک انصاف ایتدی » دینجه معاویہ  
« اوت اما سن انصاف ایتمیورسین . یک اعلی بیلورسین که هرکیم آنکله  
مبارزه یه چیق دیسه مقتول اولدی » دیمکله عمرو بن العاص « آرتق بونک  
اوزرینه میدان چیقماق سکا کوره یاقیشماز » دیدکده معاویہ « سن بندن  
صکره امارته طمع ایدیورسین » دیمش .

حضرت علینک سنجاقداری ( هاشم بن عتبة بن ابی وقاص ) ایسه  
« اللهی سون و آخرتی ایستین یانمه کلسون » دینجه یانته بر چوق دلاورلر  
طوپلانندی . اخشام اوستی هاشم مکرراً باغیلر اوزرینه حمله ایتدی، لکن  
باغیلر طیانندی . هاشم کندی عسکرینه خطاباً « آنلرک صبر وثباتی برحمت  
عربیهدر، یوقسه آنلر ضلالت اوزره درلر . سزلر ایسه حق اوزره سکز »  
دیهرک یاننده کی جماعت قرآء ایله برابر غایت شدتلو هجوم ایتمکله ینه برقانلی  
محاربه یه باشلانندی .

اوصره ده فرقه باغیه ایچندن میدان برنوجوان چیقدی . « بن ملوک غسان  
اولادندنم . عثمانک قاتنی طلب ایدرم . بزم قرآمن نه اولمش ایسه بزه خبر

ویردیلر . علی التحقیق علی ، عثمانی قتل ایتمش « دهرک و سب و لعن ایدرک  
 حمله ایدر و قلیجی بر آدمه طوقدرمدقجه کیرو دونمز ایدی . هاشم آکا  
 « یاهو ! اولاً مکالمه ، سکره محاربه . سن نه دیدیکگی بیلورمیسین . اللهدن  
 قورق . الله سکا بوکونی سوأل ایدر « دیدکده او یکیت « بن سزکله مقاتله  
 ایدرم . زیرا سزک امیرگز نماز قیلماز، سزده نماز قیلمازسکز و سزک امیرگز  
 بزم خلیفه مزی قتل ایتمش، سزده اکا اعانه ایتمشسکز « دینجه هاشم دخی  
 « عثمانی رسول الله صلی الله علیه وسلم حضرتلرینک اصحابی و آنلرک اولادی  
 و ناسک قرآسیمی قتل ایتدی . آنلر اهل دین و اهل علمدر . امردینی بر آن  
 اهل ایتمه مشلردر . ابتدا رسول اکرمه اویوب نماز قیلان بزم امیرمزدور  
 و امردینده ناسک افقه و اعلمی اودر . بویانمده کی آدملر ایسه هب قاری  
 قرأندر . کیجه لری اویومیوب تهجد قیلارلر . سن او شقیله آدانمه « دیمکله  
 او بهادر یکیت ، هاشمک نصایحی قبول ایتدی و همان تائب و مستغفر  
 اوله رق دونوب کتدی .

فرقه باغیه نک رؤسای ، بر طاقم جاهل و ساده دل آدملری نه ذرلو حیله  
 و دسیسه لر ایله اغفال و اضلال ایدرک فرقه ناجیه ایله جنکه سوق ایده کلدکلری  
 بو حکایه ایله عیان و آشکار اولور .

هاشم و آرقداش لری ، وجه مشروح اوزره شدتلی مقاتله ایدرک مظفریت  
 اماره لرینی کور مشلر ایکن وقت غروب شمسده تنوخ قبیله سنک بر بیوک  
 فرقه سی کلوب هجوم ایتمکله هاشم آنلره قارشو واردی ، طقوز اون قدر  
 باغی اولدردی . مظفریت اماره لرینی کوردی . لکن ( حارث بن منذرتنوخ )  
 یناشوب هاشمی اوردی ، یره دوشوردی .

ایشته اوزمان حضرت علی طرفندن بر مأمور کلوب ( ایلرو حرکت )  
 امرینی کتوردی . هاشم ایسه آغیر یاره لو اوله رق سفر آخرته آماده  
 اولمشیدی . رضی الله عنه و ارضاه . حضرت علی ایلرو حرکت ایلهرک اهل  
 شامدن غسان قبیله سنک بر موقعه میخ چیقینی اولوب طور دقلرینی کوردی .

همان برفرقه‌یه اوغلی محمد بن حنیفه‌ی رئیس ایدرك آنلرك اوزرینه کوندردی. واردیلر، آنلری یرلرندن قالدردیلر و نیچه‌لرینی اولدردیلر.

اشبو جمعه کیجه‌سی محاربه صباحه‌قدر دوام ایتدی، او قلوبندی. مزارقار قیرلدی، سس صدا کسیدلی. قراکلق باصوب کوز کوزی کورمن اولدی آنجق قلیج اوینار و بر میرلدی ایشیدیلور ایدی. حضرت علی دخی میمنه و میسره آره‌سند طولا شوب همان ایلرو حرکت امرینی ویرردی. صباح اولنجه کورلدی که حضرت علی، قلب عسکرده واشتر میمنه‌ده و عبدالله بن عباس میسرده اولدق‌لری حالده میدان محاربه آرقه‌لرنده قالمش. بوایسه علامت غلبه و ظفر ایدی.

اشتر پنجشنبه کونی اخشام اوستی میمنه‌یه مأمور اولوب اشبو جمعه کوننک صباحنه قدر شدتلی حرب ایدرك آدیم آدیم ایلروله‌مشیدی. صاحب‌لین ینه عسکرینی ایلرو ایلرو سورمکده ایدی عسکر ایسه حرب و ضربدن یورلمش واکثری بیتاب اولمش ایدی.

اشتر آنی کورنجه آتیه‌بندی. «یامظفر اولمق، یاخود مولایه‌قاوشمق اوزره اشتر ایله یولداش اوله‌جق و ارمی» دهرک میمنه‌نک بر اوجندن او بر اوجنه‌دک کیدوب کلدی، باشنه یورلماز و جنگدن اوصانماز بر چوق بهادرلری طویلادی. همان «چک سنجغانی سنجقدار» دهرک ایلرو حرکت ایله باغیلری اردوگاه‌لرینه قدر سوروب اوراده مقاتله‌یه باشلادی.

الحاصل میمنه‌ده مظفریت اماره‌لری بلوردی. حضرت علی آنی کورنجه اشتره امداد ایچون بر فرقه‌ عسکریه کوندردی. اشتر ده‌ها زیاده شدت ایله هجوم و اقتحامه قیام ایتدی و شاملیلر انهم‌یه یوز طوتدی. عمرو بن العاص، بو حالی کورنجه اورکدی و نتیجه‌سندن قورقدی. معاویه‌یه خطاباً «سکا بر تدبیر عرض ایده‌جکم. بشقه چاره‌من قالمدی. عسکره امر ایت: مصحف‌لری یوقارو قالدروسونلر» دینجه معاویه امر ایتدی مصحف‌لری مزارقارک اوج‌لرینه قویوب یوقارو قالدردیلر. «سزی کتاب‌اللهه دعوت ایلرز» دیو باغردیلر.

برو طرفده بعض ناس « مادم که کتاب الله دعوت ایدیورلر . اجابت ایلیم » دینجه حضرت علی « سز ایشکزه دوام ایدیکنز . معاویه وعمر بن العاص وابن ابی معیط وضحاک بن قیس اهل قرآن دکلردر . بن آنلرک احوالی سزدن و کتاب اللهک احکامنی جمله کزدن اعلا بیلورم . آنلرک مصحفلری قالدیرملری مجرد حیلہ و خدعه در » دیدکده « کتاب الله دعوت اولندیغمزده اجابتدن غیری برشی یاپه میز » دیملری اوزرینه حضرت علی « بنده آنلر ایلہ کتاب الله اطاعت ایلسونلر » دیو جنک ایدیورم . زیرا آنلر اللهک امرینه عاصی اولدیلر « دیو بیوردی .

همان ( مسعر بن فدک التمیمی ) و ( زید بن الحصین الطائی ) مؤخرآ خوارجہ ملحق اولان برکروه ایلہ برلکده « یا علی ! کتاب الله اجابت ایلہ والا سنی دشمنلریکده تسلیم ایده رز ، یاخود ابن عفّانه یادیغمزی سکاده یاپارز » دیدیلر .

حضرت علی « بو سوزیکزی اونو تمیکیز ، بنم دیدیکمی ده بلله یکنز . بکا مطیع ایسه کز محاربه ده دوام ایلیکنز . عاصی ایسه کز دیلدیکنزی ایشله یکنز » دیدکده « اشتره آدم کوندر ، محاربه دن ال چکوب کلسون ، دیدیلر . او دخی ناچار اشتری دعوت ایچون ( یزید بن هانی ) یی کوندردی .

یزید بن هانی کیتدی ، اشتری دعوت ایتدی . اشتر ایسه پیدرپی حمله وهجوم ایدرک باغیلره غلبه چالمش وشام اردوسنی بتون بتون پریشان اوله حق راده یه کتورمش اولدیغندن « شمدی بنم موقعمدن آریله حق وقت وساعتم دکلدر » دهرک یزیدی کیرو چویردی . اودخی دوئوب کیفیتی امیر المؤمنینہ بیلدیردی . بونک اوزرینه کروه مخالفین ذها زیاده حدتلندیلر ، میرلاندیلر ، سسویلندیلر . کورلتی بیودی ، سسلر یوکسلدی . سوز آیاغه دوشدی . امیر المؤمنین اردوسنده بیانی اختلال وعصیان اماره لری رونما اولدی . نهایت « یا علی ! اشتره خبر کوندر کلسون والا سندن آریلورز »

ديدلر . ناچار اودخی تکرار یزیدی کوندردی . یزید کیدوب فتنه ظهورینی اخبار ایله اشتری قاندردی و آلوب اردوی هایونه کتوردی .

بوخالفینک چوغنی کروه قرآء ایدی که اکثر اوقاتده تلاوت و عبادت ایله مشغول اولورلردی و اولاد عربدن اولدقلری جهتله الفاظ قرآنیه کن معنایینی بیلورلردی . لکن بر آدم قرآن کریمه تحت اللفظ معنی و یرمکه عالم وفقیه اوله ماز و قرآن کریمدن احکام شرعیه بی استنباط ایله مز . بوکروه قرآء دخی فقیه اولدقلرندن احکام شرعیه کن حقایقه واقف اوله میوب ورطه تعصبه دوشمشلردی .

حتی بوکروه قرآء ؛ عثمانیلره ، یعنی حضرت عثمانک طرفدارلرینه دینسز و مذهبسز نظریله باقوب علویلکده افراط ایلشلا ریکن بوکره حضرت علییه مخالفت ایتدیلر و پیشمش آشه صغوق صو قاتدیلر . فقهایی ، حفاظ و قرآدن فرق و تمیز ایده مین عوام ناسک چوغنی دخی آنلرک ظاهر حاللرینه آلدانه رق یا کلش یوله کیتدیلر . ایشته بو جهتله اکثریت آرا متارکه صورتنده یوز کوستردی .

زیرده بیان اولنه جنی اوزره بو فرقه مخالفه ، متعاقباً خارجی ، یعنی امام المسلمین اولان حضرت علییه باص بیانی عاصی و باغی اولمشلر و شیعی طورنده ایکن ( خوارج ) نامنی آلمشلردر . ایشته ( مسعر بن فدک ) و ( زید بن الحصین ) و ( اشعث بن القیس ) بوخوارج کروهنک اکابرندن اولوب آنلره ریاست ایدرلردی .

اشتر ، بوجه بالا مجبوراً موقع مقاتله بی ترک ایله اردوکاهه کلوب بو حال اغتشاشی کورنجه « ای اهل عراق ، ای ذلیل و مسکین آدملر ! شیمدی محاربه دن ال چکمنک و قتیمی . هنوز میدان آلدیکز . دشمنلریکزه غلبه چالدیکز . آنلرده مقهور و مضحمل اوله جقلرینی آکلادیلر و ناچار قالوب سزی کتاب اللهک حکمنه دعوت ایلدیلر . والله آنلر چوقدنبرو اللهک اوامرینی و رسولنک سنتی اهماک ایتمشلردر . بکا آز برمدت و یریکنز هیچ اولماز ایسه بر آت سکیردیمی قدر مهلت و یریکنز . زیرا فتح و ظفر



زه یوز کوستردی « دیدکده » اولماز ، زیرا بزده سنک وبالکله مشارکتی بول ایتمش اولورز . یاشر ! بواشدن واز کچ . بز آنلر ایله الله ایچون عاربه ایتدک . شمیدی ده الله ایچون محاربه بی ترک ایدهرز « دیملری وزرینه اشر دخی « یازیق سزه که اومکارلرک مکر و خدعه سنه آلدان دیکز . متارکه فکرنده بولندیکز . ای یوزلری قاره اوله سی حریفلر ! بز سزک لایوت و عبادتکزی زهد و صلاحکزدن و لقاء الله کمال اشتیاقکزدن . نئی ظن ایدردک . مکر سزک اعمالکز ریا و مرامکز دنیا ایتمش . سز وندن صکره ابدی عز و شرف کوره جک دکلسکز . او ظالملر بزدن ایراغ ولدقلری کبی سزده ایراغ اولکز « دینجه آکا سب ایتدیلر . او دخی نلره سب ایتدی . همان حضرت علی ، آکا و آنلره « صوسکز » دیو عایقیردی و منازعه یه نهایت ویردی .

اوصره ده ( اشعث بن قیس ) حضرت علینک یاننه کلوب « کوره یورم که س معاویه نک دعوتنه اجابت ایلک فکرنده بولنه یورلر . امر ایدر ایسه ک ن معاویه نک یاننه کیده ییم و مرامنی سؤال و استیضاح ایده ییم « دیدی . حضرت علی دخی ناچار آکا رخصت ویردی .

( اشعث بن قیس ) معاویه نک یاننه واردی . « مصاحفی رفع ایتمکدن مرادیکز نه در « دیو صورتی . معاویه دخی « مرادیمز کتاب الله مراجعتدر که طرفیندن برر حکم انتخاب اولنوب و آنلردن کتاب الله مطابق برقرار ویرملری ایچون عهد آلتوب ده طرفین آنلرک ویره جکلری راره تابع اولمقدن عبارتدر « دیو جواب ویردی . اشعث دخی « بو یدیکک حقدرد « دیه رک دونوب کلدی . مجلس امیر المؤمنینه کیردی ، کیفیتی بیلدیردی . ناس دخی تحکیمی ، یعنی او وجهله طرفیندن برر حکم صبنی مناسب کوردی .

آرتق حضرت علی یه کوره بر دیه جک قالمیوب اودخی تحکیمی قبوله مجبور اولدی و بر طبعی متارکه وقوع بولدی . اشرک غلبه سی ثمره سز الدی و بوضورتله عمرو بن العاص مرادینه ایردی .



الحاصل اردوی هایونده تفرقه پیدا اولدی ، گروه مخالفین میدان آلدی . حل و عقد امور آنلرك اللرنده قالدی و ایش بشقه شکله کیردی .

حکملرك انتخابی خصوصنه کلنجه ( اشعث بن قیس ) ایله همپالری « بزم طرفزدن ابوموسی الاشعری حکم اولسون » دیدیلر و حضرت علی « اوّل امرده بکا عاصی اولدیکز . باری بو خصوصده عاصی اولمیکز . بن ابو موسایی مناسب کورم » دیدکده اشعث ایله برابر زید بن الحصین و مسعر بن فدک دخی « بز ابو موسایی ایستز » دیو اصرار ایتدیلر ، حضرت علی « ابوموسی بو خصوصده ثقه دکلدر . زیرا بدنن آیرلدی و ناسک امداد و اعانه سنهده مانع اولدی . بعده فرار ایتدی . برقاج آی صکره آتی تأمین ایتدم . آنک انتخابی جائز اولماز . لکن عبدالله بن عباس مناسب اولور و آندن اولادر » دیدکده « اوسنک عمزاده کدر . بز ایسه بر بیطرف آدم ایستز » دیدیلر و حضرت علی « اشتی انتخاب ایده لم » دیدکده « بو ایشی علولندیرن اودکلکی » دهرک آنی ده قبول ایتدیلر .

و حضرت علی « دیمک اولیورکه سز ابوموسادن بشقه سنی قبول ایتیه جکسکز » دیدکده « اوت » دیمه لر ایله حضرت علی « او یله ایسه عقلکزه کلنی یاپکز » ده نیجه همان ابوموسیایه بر مأمور کوندردیلر . ابوموسی ایسه اوزمان محاربه دن اجتناب و اتقا ایله زاویه نشین عزلت و اتزوا ایدی . کیدن مأمور آکا ناس بارشدی « دیدکده « الحمد لله » دیدی و « سنی حکم انتخاب ایتدیلر » ده نیجه ( انالله وانا الیه راجعون ) دهرک قالقوب اردوی هایونه کلدی . اهل شام طرفدن دخی عمرو بن العاص انتخاب ایدلمشیدی .

حال بوکه ابوموسی الاشعری ، ذاتا فن بحث وجدلده عمرو بن العاص کی برداهییه معادل دکل ایدی . زیرا ابوموسانک لسانی صحیحاً قلبنک ترجمانی ایدی . عمرو ایسه مافی الضمیرینی کتم ایله آدم آلداتمده ماهر ایدی . برده ابوموسی ، هر نصل اولورسه اولسون مقاتله نك بر طرف اولسی فکرنده اولوب عمرو ایسه مصر والیلکنه نائل اولق اوزره معاویه ایچون جان

کوکلدن چالیشوردی . بعض عقلا ایشته بودقیقه لری ملاحظه ایله دوچار ندیشه اولمشیدی .

حتی ( احنف بن قیس ) حکم اولمغه صالح و مقتدر بر ذات اولدینی حالد یامیر المؤمنین ! ابوموسی بو ایشک رجلی دکلدرد . اکر بنی حاکم نصب بدرسه ک بر حسن نتیجه استحصال ایده یلورم . بو اوله ماز ایسه باری بنی بکنجی ، یاخود اوچنجی حاکم نصب و تعیین بیوریکز « دیمش ایسه ده ناس قنی دخی قبول ایتدیکندن ایش منحصرأ ابوموسانک انه قالمشیدی .

شوراسنی ده نظر دقته آلمیدرکه صفین وقعه لرنده پک چوق آدم لر تلف ولدیغندن ایکی طرفک دخی مقاتله دن کوزلری ییلمشیدی . شاملیلرک ضایعاتی ده ا زیاده ایسه ده معاویه نک اردوسنده انضباط وار ایدی . زیرا معاویه ، دائماً عسکرینی مکافات مالیه ایله تشویق ایتکده اولدینی حالد یالایجاب مجازات سیاسیه دن دخی کیرو طورماز ایدی . حضرت علینک مکافات و مجازاتی ایسه اخروی اولدینی حالد صرف آخرت ایچون جان فدا یدنلرک چوغنی صفین وقعه لرنده شهید اولمشلر ایدی . وکوندن کونه آتلازالمقده واهل دنیا چوغالمقده ایدی .

### تحکیمنامه نک تحریر و تنظیمی

بروجه بالا اساساً تحکیمه قرار ویرلمش و امیر المؤمنین طرفندن ابوموسی الاشعری و معاویه طرفندن عمرو بن العاص انتخاب ایدلمش ایدی .

اشبو اوتوز یدی سنه هجریه سی صفرینک اون اوچنجی چهارشنبه کونی عمرو بن العاص اردوی هایونه کلوب امیر المؤمنین حضورنده ابوموسی الاشعری ایله لدی الاجتماع تحکیمنامه نک تحریرینه بدأ اولنه رق ( امیر المؤمنین علی ایله معاویه بیننده برقرار نامه در ) دیو یازلدقده عمرو بن العاص « اوسرک امیر کزدر ، اما بزم امیر من دکلدرد . امیر المؤمنین لفظی محو ایدیکز » ده نیجه احنف بن قیس « بتون خلق بر برینی قیرسه بز ( امیر المؤمنین ) عنواتی محو

ایتمه یز « دیمکله حضرت علی بر مدت توقف ایتدیه ده اشعث بن قیس » بوعبارده  
 محوایت « دیو اصرار ایتمکله حضرت علی آنی محو ایتدی و « الله اکبر  
 نظیره ، نظیره . والله بن یوم حدییه ده رسول الله صلی الله علیه و  
 حضرتلرینک کاتبی ایدم . عهد نامه نك باشنه ( محمد رسول الله ) دیو یازدم  
 کفار ، سن رسول الله دکل سین . گندی آدیگی و پدریگک آدینی یاز دیدیلر  
 رسول الله صلی الله علیه وسلم ( رسول الله لفظنی محوایت ) دیدی . بن آ  
 مقتدر دکل دیدم ( اولفظی بکا کوستر ) دیدی . بن ده کوستر دم . آنی کندی  
 الیه محو ایتدی و ( قریباً سکاده بویه بر تکلیف واقع اولور ، سن ده اجاب  
 ایلر سین ) دیو بیوردی « ده نیجه عمرو بن العاص « سبحان الله ! بزی  
 کفارہ تشییه ایدیور سین ، بز ایسه مسلماتر » دیدکده حضرت علی آ  
 « یاسن نه زمان فاسقلره معین و مسلمانلره مهین اولدک » دیدی ، آنک  
 اوزرینه عمرو بن العاص « فیما بعد سنگله بر مجلسده بولنم » دیدی . حضرت  
 علی دخی « بن جناب حقدن رجا ایدرم که بنم مجلسی سندن وسنک کیلردز  
 تطهیر ایله » دیو بیوردی .

بعده تحکیمنامه نك تحریرینه شروع ایله ( بو وثیقه ، علی بن ابی طالب ایله  
 معاویه بن ابی سفیان بیننده برقرار نامهدر . علی ، اهل عراق ایله متفقلری  
 ایچون و معاویه اهل شام ایله متفقلری ایچون تعهد ایلدیلر که اللهک حکمت  
 و کتابنه راضی اوله رق کتاب اللهک احیا ایتدیکنی احیا و احیا ایتدیکنی  
 احیا ایلهلر . ایمدی حکملر که ابو موسی ایله عمرو بن العاصدر ، کتاب اللهده  
 بولدقلری احکام ایله و آنده بوله مدقلری خصوصده سنت عادلئ نبویه ایله  
 عمل ایدهلر ) دیو یازلدی .

و حکملر نفسلری و اولاد و عیاللری حقنده امین و امت آنلرک  
 ویره جکلری حکم و قراره معین اوله جقلرینه دائر علی و معاویه دن و ایکی  
 طرفک عسا کردند عهد آلدیلر و کندولری دخی بوامت آره سننده  
 کتاب الله ایله حکم ایتمک اوزره عهد و میثاق ایتدیلر و حکمی رمضان

وايسترلر ايسه ده صكرمه تاخير ايتك و اجتماعلری ، اهل كوفه و اهل شام آرمنده متوسط بر محله اولق اوزره قرار ویردیلر .

رجال عراقدن ( اشعث بن قیس ) ایله دیگر سکز کشی و رجال شامدن ( ابوالاعور ) و ( حیب بن مسلمه ) و ( عبدالرحمن بن خالد ) ایله دیگر بر قاق کشی شاهد اوله رق تحکیمنامه یی امضا ایتدیلر . ( اشتر ) ه دخی امضا ایتسی تکلیف اولندقدن لسان شدت ایله رد ایلدی و ، اشعث « کل امضا ایت بزدن آیرمه » دیدکده اشتر آنی تهدید و تکدیر ایتدی .

اشعث بن قیس ، تحکیمنامه یی آلدی و حقیقوب ناسه او قودی . بنی تیمدن بر طائفه ایچنده بولنان ( عروه بن ادیه ) « اللهك امرنده آدملری تحکیم ایدیورسکز . حال بوکه کسه نك حکمی یوقدر . حکم انجیق اللهکدر » دیدی و اشعثه کندی قومی و اهل یمندن بر چوق خلق دخی غضب ایتدی . اشتر ايسه تحکیمنامه یی امضادن امتناع ایله ذاتاً محاربه فکرنده ایدی .

اوصرده بعض ناس ، حضرت علی یه کلوب آنی اعاده حربه تشویق ایتدکلرنده « ویریلان قراره بن ذاتاً راضی دکل ایدم . سزك موافقتکزی ده ایستمزدم . لکن اعدانك تکلیفی قبولده اصرار ایتدیکز . بن ده قبوله مجبور اولدم . بعدالرضا رجوع و بعدالاقرار تبدیل ايسه جائز اوله ماز . سز برایش یاپدیکز که قوته وهن کتوردی . اعدا کزه فائق و غالب ایکن آنلرك دسیسه لرینه آلداندیکز . ایستدکلرینی ویردیکز . بوندن صکره بر طوغری یول اتخازینه موفق اولورسکز ظننده دکل » دیدی .

### صفینه مقتول و شهید اولاند

صفین وقعه لرنده فرقه باغیه دن قرق بشیك آدم مقتول اولدی . ایچلرنده مشاهیر شجاعانن نیچه آدملر وار ایدی . فرقه ناجیه دن دخی یکر می بشیك آدم شهید اولدی که یکر می آلتیسی اهل بدردن ایدی .

از جمله بالاده بیان اولندی اوزره خواص اصحاب رسول الله دن عمار

بن یاسر رضی الله عنهما وشهادتی ایکی شهادت یرینه کچن ( حزیمة بن ثابت ) و ( سہیل بن عمرو الانصاری ) و ( ابو عمر الانصاری ) و ( ابو فضالة الانصاری ) هپ صفینده شهید اولدیلر .

اهل بدردن وانصارک اون ایکی نقیبلرندن بریسی اولان ( ابوالہتیم بن تیمان ) و آنک برادری اولان اصحاب احدثن ( عییدالله بن تیمان ) رضی الله عنهما و افضل تابعین اولان ( اویس القرنی ) رحمۃ الله علیه حضراتی دخی روایت صحیحہ کوره کذلک صفینده شهید اولمشلردر .  
اصحاب کرامدن ( یعلی بن منبہ ) رضی الله بالاده ذکر اولدینی اوزره اصحاب جملک اکابرندن ایکن بو کره صفینده حضرت علی ایله برلکده بولندینی حالده شهید اولمشدر .

صحابہ دن ( حابس بن سعد الطائی ) رضی الله عنه که حضرت عمر آنی جلب ایله « سنی حمص قاضیسی نصب ایتمک ایسترم . فصل یاپه بیلور میسین » دیدکده « رأیمله اجتهاد ایلرم ؛ هم مجلس اولانلر ایله ده مشاوره ایدرم » دیمکله حضرت عمر ، آنی حمصه کوندرمشیدی و چوق کچمیوب عودت ایله « یا امیر المؤمنین ! بر عجیب رؤیا کوردوم . سکا عرض ایتمک ایسترم . عالم منامده کوردوم که : کونش مشرقدن کلدی . یاننده بر چوق ملکر وار ایدی . آی دخی مغربدن کلدی یاننده بر چوق ییلدیزلر وار ایدی » دیدکده حضرت عمر « سن قننی طرفده ایدک » دیو صوردی . حابس « آی طرفده ایدم » ده نیجه حضرت عمر « سن ضیاسی محو اولان آیات و علامات ایله برابر اولدیغکدن بن آرتق سنی استخدام ایتم » دیوب عزل ایتدی . غریبدرکه حابس ، بو کره معاویه ایله برابر بولندی و صفینده قتل اولندی .

### وفات ضباب

( خَبَّاب بن الْأَرْت ) رضی الله عنه حضرت تبری ، ابوبکر الصدیق رضی الله عنه حضرت تلریله برابر اوّل باوّل اسلامی اعلان ایدنلردن بریدر . رسول



اکرمی، عمی (ابوطالب) حمایه ایتدیکبی کبی حضرت صدیقی دخی قومی حمایه ایدیوردی. (خبّاب) و (بلال) و (عمار) ک ایسه حامیلری اولدیغندن مشرکینک آنلر حقنده ایتدکبری اذا وجفا قالمامشیدی. هله خبّابک آرقه سنی قیزغین تیمورلر ایله داغلامق و کونشک قارشوسنده طوتمق کبی تحمل اولنیه جق اشکنجه لر ایدرلردی.

خبّاب ایسه بو اذیتلره تحمل ایدرک کله توحیده دوام ایلردی. رسول الله صلی الله علیه وسلم حضرتلری دخی (یارب خبّابه نصرت ایله) دیو دعا ایدردی.

اوزمان حضرت علی، هنوز سن بلوغه واصل اولیوب بیت نبوته بر آرسلان یاوروسی کبی تربیه اولنمقده اولدینی حالدّه او فدایی مسلمانلر ایله برابر نماز قیلاردی. لکن پدری ابو طالب، رئیس قریش بولنمغله آکا کیمسه طوقونه مازدی. بر کون حضرت عمر رضی الله عنه خبّابه مشرکلردن چکدیکبی اذیتلری سؤال ایتدکده آرقه سنی آچوب کوستردی. بسبتون یانیق اولدینی کورلدی. کورنلر دلخون اولدی. کندوسنک درد اورتاغی اولان (عمار) بروجه بالا صفینده شهید اولدینی کبی او دخی کوفده عازم دارالنعم اولدی.

ایشته حضرت علینک قدرینی او مثللو سابقین اولیندن اولان ذاتلر بیلوردی. فقط حضرت علی صفینه کیدر ایکن خبّاب حضرتلری نامزاج بولنمغله اسیر فراش اوله رق کوفده قالمشیدی. اصحاب کرامدن بر قاچ ذات عیادت ایچون آنک یانه واروب «مژده سکا یاخبّاب که حوض کوثر یاننده اخوانکه قاووشه جقسین» دیدکلرنده «آه اواخوانی خاطریمه کتوردیکز که آنلر دنیاده اجرلرندن برشیئه نائل اولمقسزین. کوچوب کیتدیلر. آخرتلرینی وجه مطلوب اوزره معمور ایتدیلر. بز کیرو قالدق. دنیادن بر مقدار حصه آلدق که عمللریمک اجر و مثوباتنه محسوب ایدلسون دیو خوف ایدیورز» دیدی. واقعا شهدای بدر و احد، اسلامه بیوک خدمتلر ایتمش اولدقلری حالدّه فتوحات اسلامیه دن مستفید اولمقسزین ملاء اعلایه کیتمش



اولدقلرندن آنلره غبطه اولنور. حضرت خبّاب ، ايشته آنلرك حالته غبطه ايدرك داربقايه ارتحال ايتشدور .

اوزمانه قدر كوفه اهالي سي موتالريني خانهلري حوليلرنده وقبولري ياننده دفن ايدرلردى . حضرت خبّاب كندوسنك كوفه خارجنده دفن اولمسنى وصيت ايلمكله خارج شهرده دفن اولندى . آندن صكره سائر ناس دخي موتالريني تبركاً آنك ياننده دفن ايدر اولديلر . بو صورتله كوفه خارجنده بر مزارلق پيدا اولمشدر .

### صفينمه عودت اولنمريفي

ايكي اردو ، صفينده يوز اون كون مكث وتوقفدن صكره بروجه بالا تحكيمنامه امضا اولنديغي كبي عساكر شاميه شامه ، واردوى هايون ، كوفيه عودت ايلديلر .

حضرت على ، كوفيه ياقلاشدقه ( عبدالله بن وديعة الانصارى ) رضى الله عنه آكا ملاقى اولدى وحضرت على آكا ياقلاشوب « خلق بزم ايشمز حقتنه نهديور » ديو صوردى . ابن وديعه « كيمي خوش كورويور و كيمي خوش كورميور » ديو جواب ويردى . حضرت على « اصحاب رأى نهديورلر » ديدى وابن وديعه آنلر دخي « علينك بيوك جمعيتي وار ايدى ، طاغندي وبر متين قلعه سي وار ايدى ، هدم ايتدى . قلعه يي نه زمان يابه جق ، متفرق جمعيتي نه زمان طويلايه جق . حال بوكه يا ظفر بولق ، يا هلاك اولق اوزره كندوسنه مطيع اولانلر ايله هان عاصيلر اوزرينه هجوم واقتحام ايتسидى اولى اولوردى ديورلر » ديدكده حضرت على « قلعه يي بنى هدم ايتدم ، يوخسه آنلرمى . جمعيتي بنى طاغيتدم ، يوخسه آنلرمى . هان هرچه باد آباد عاصيلر اوزرينه هجوم ايتمك كنجه بوديقه يي بيلمز دكل ايدم ونفسمه سائرندن ده زياته جو مردم . جانمى هيچ اسركم . لكن بو ايكي سي ، يعنى حسن وحسين يانمدن ، آيرلديلر . كوردم كه آنلر تلف اولسه رسول الله صلى الله عليه وسلم حضرتلرينك نسلى منقطع اوله جق . ايشته

نوکا وجدانم راضی اولدی . بردھا او باغیلر ایله جنک ایدہ جنک اولورسم  
ایکسنی ده برابر کوتورم « دیو بیوردی .

محمد بن حنیفه دن « نیچون پدرک مقاتله یه سنی سوق ایدیورده بیوک  
برادرلرک حسن وحسینی سوق ایتیور » دیو سؤال اولندقدہ « آنلر پدریمک  
ایکی کوزی کی در . بنده الی ، آیانگی کی یم » دیو جواب ویرمش اولدینی  
مرویدر .

بعده حضرت علی ، بروجہ بالا خبّاب رضی اللہ عنہ حضرتلرینک کوفہ  
خارجنده دفن اولندینی محله کلدکده یدی قبر کوردی « کیملرک قبرلری » دیو  
صوردی . « یا امیر المؤمنین ! صفینہ عزیمتکزدن صکرہ خبّاب بن الارت  
وفات ایلدی . وصیتی اوزره خارج شهرہ دفن اولنوب ناس دخی موتالری  
آنک یاننه دفن ایتمکه باشلادی » دیدکلرنده حضرت علی ، خبّابه وسائر مسلمین  
ومسلماته دعا ایتدکن صکرہ خباب کی الک اسکی دین قرنداشلرندن  
برینک قبرینی کورمکله مکدر اوله رق کوفہ یه داخل اولدی وصفینده شهید  
اولانلرک خانہ لری اوکسندن کچرکن آنلرک آغلامقده اولان عیاللرینک  
فریاد وفغانلرندن متأثر اوله رق قصر امارته وصول بولدی .

### ظہور خوارج

بروجہ بالا اردوی هایونده اختلاف آرا وقوعه کلوب اکثریت ایله  
تحکیمه قرار ویرلش وبوصورتله متارکه ایدلش ایدی .

ناسک بر فرقه سی ایسه تحکیم ومتارکه یی رد وهله اهل اسلام قانی  
مباح قیلان عمرو بن العاصک حکم نصبی بیوک کنه اد ایلدیلر و « قاری  
قوجه دعواری کی منازعاتده ناسک تحکیمی مشروع ایسه ده مسلمان  
قانی دوکمک کی بر امر مهمده ناسک تحکیمی جائز اوله ماز » دیدیلر .  
حضرت علی ایله برابر کوفہ یه کیرمیوب ( حرورا ) قریه سنه کیتدیلر  
واوراده اون ایکی بیک کشی یه بالغ اولدقلری خالدہ ( شیت بن ربی ) یی

امير حرب ، يعنى سرعسكر و ( عبدالله بن الكوّاء الشكرى ) يى امير صلات ، يعنى كندولرينه نماز قيلدرمق اوزره امام نصب وتعيين ايتديلر . و « بيعت آنجق الله تعالىه در وطريق حق ، امر بالمعروف ونهى عن المنكر و اداره مملكت شورادر ، ديهرك امامت و خلافتى انكار و صرف جمهوريت يولنى اختيار ايلديلر .

اشبو ( طائفة حروريه ) امير المؤمنينه اطاعتدن خروج ايله اهل سنت و جماعتدن آيرلمش اولدقلرندن كندولرينه ( خوارج ) دنيلدى .

حضرت علينك شيعهسى ، يعنى خواص اتباع و انصار و اقرباسى خوارجك سوزلرينى ايشتكده حضرت علىيه كلوب « شمدى بزم بوخنه بريعت ثانيه بورج اولدى كه سنك دوستكه دوست و دشمنكه دشمن اولق اوزره بيعتدر « ديدلر .

خوارج ، آنلرك بوييقتلرينى ايشيدنجه « سز ، اهل شام ايله آت باشى برابر طريق ضلالتكه كيدورسكز . اهل شام سوهرك ، سوميهرك معاويه بيعت ايلديلر . سزده علىيه نصل اولورسه اولسون دوستنه دوست ، دشمننه دشمن اولق اوزره بيعت ايلديكز ، ديو اعتراض ايتديلر .

( زياد بن النضر ) دخى خوارجه جواباً « بزه علىيه آنجق اللهك كتابى و رسولنك سنتى اوزره بيعت ايلدك . صكره سز ، مخالفت ايلوب آيرلديكز . علينك شيعهسى دخى آ كا كلوب بزه ، سنك دوستكه دوست و دشمنكه دشمنز ديدلر . بزه بوسوز اوزره بزهكه على ، حق و هدايت اوزره در و آ كا مخالفت ايلينلر ضال و مضلدر « ديدى .

حضرت على بو اختلافى رفع ايچون هان عبدالله بن عباسى ( حرورا ) قريه سنه كوندردى . آرقه سندن كندوسى دخى كيتدى و خوارجك عندنده اك زياده سوزى نافذ اولان ( يزيد بن قيس ) ك چادرينه ايندى . آنى ( اصفهان ) و ( رى ) اياالتلرينه والى نصب ايتدى .

اوصرهده ابن عباس ، خوارج ايله بحث و جدال اوزره ايدى .

حضرت علی هان آنلرک یاننه واردی . « رئیس ومعمدکز کیمدر » دیو  
 صورتی .

( ابن کوا ) یی کوستردیله . حضرت علی آندن « نیچون بزم علیهمزه  
 خروج ایتدیکنز » دیو صورتی . ابن کوا « سنک صفینده کی حکومتک  
 ایچون خروج ایتدک » دیو جواب ویردی .

حضرت علی « الله تعالى شاهددرکه اهل شام مغلوب اولنجه  
 مصحفاری مزراقلرک اوچلرینه صاپلایوب یوقارو رفع ایتدکلرنده آنلر  
 اهل قرآن دکلدر ، خدعهلرینه آلدانیکیکنز . دیدم . سز دکهلمدیکنز ،  
 آنلرک دعوتنه اجابت ایلدیکنز . بنده موافقه مجبور اولدم . مع هذا بن  
 حکملره کتاب الله ایله حکم ایتملرینی شرط قیلدم . اگر قرآنک احکامنه  
 مطابق برحکم ویررلر ایسه بزمده دیه جکمز قالماز والا بز آنلرک حکمندن  
 بری یز » دیدی وخوارجک شبهلرینی فایت فصیحانه وبلغانه جوابلر ایله  
 حل ایتدی و « هایدی کلیکنز ، شهریکیزه داخل اولکنز » دیو بیوردی .  
 آنلرده حضرت علینک نطقنه مفتون وحکمنه قانع اولدیله وکوفه شهرینه  
 دخول ایله حکملرک اجتماعه منتظر اولوب قالدیلر .

## حکملرک اجتماع وحکملری

حکملرک وقت اجتماعی اولان شهر رمضان تقرب ایتمکه حضرت  
 علی ، ابوموسی الاشعری یی محل اجتماعه کوندره جک اولدقده رؤسای  
 خوارجدن بعضیلری کلوب « یاعلی ! کناهک توبه وامر تحکیمدن رجوع  
 ایت » دیملریله حضرت علی « برقرار نامه امضا اولندی . عهد ایله باغلاندق .  
 عهدده وفا ایسه واجبدر » ده یینجه « حکم آنجق اللهکدر . آدملری تحکیم  
 ایتک کناهدر . آندن توبه ایتلی » دیدیلر .

حضرت علی « بو برکناه دکلدر ، بلکه رأیدن عجزدره . وقیله بن سزی  
 بویوله کیتمکدن منع ایتشیدم . دکهلمدیکنز . شمدی حکم عهدی ایفادن غیری

چاره یوقدر « دیو بیوردی وهان درتیوز آدم ایله ابو موسی الاشعری بی کوفه دن چیقاردی و بو عسکره مشهور کوفه قاضیسی ( شریح بن هانی ) بی امیر ایدوب نماز قیلدرمق ایچون دخی عبدالله بن عباسی کوندردی . معاویه دخی درتیوز آدم ایله عمرو بن العاصی یوللادی . ایکی فرقه دخی ( دُومَةُ الْجَنْدَلِ ) ناحیه سنه کیتدیلر و بالاتفاق ( اَذْرَحْ ) نام قریه ده اجتماع ایتدیلر .

( عبدالله بن عمر الفاروق ) و ( عبدالرحمن بن ابی بکر الصدیق ) و ( عبدالله بن الزبیر ) و صفار صحابه دن و فضلی امتدن ( عبدالرحمن بن الحارث بن هشام ) و عظمای قریشدن ( ابوجهم بن حذیفه ) و ( عبدالرحمن بن یغوث الزهری ) و دهات عربدن مشهور ( مغیره بن شعبه ) دخی کلوب اول جمعیتده حاضر بولندیلر .

عمرو بن العاص ، ابو موسای ایلرو سوروب و آنی بر فاقه باصدیروبده اقرارینه باصهرق خدعه ایله بر ایش کوره بیلیمک اوزره ابو موسایه « سن اصحاب رسول الله ندسین . همده بندن یاشلیسین » دیه رک حضورنده دیز چو کمک و او سوزه باشلامد قجه سوزه باشلاماق کی معاملات تعظیمیه ایله صورت احترام کوستردی .

مذاکره ایچون اجتماع علرنده عمرو بن العاص ، ابو موسایه « بیلورسین که عثمان ، مظلوماً قتل اولندی . معاویه و قومی ایسه آنک و لیسیدر و معاویه نک قریش ایچنده نه مرتبه شرف و اعتباری اولدینی معلومکدر . آنک خلافته انتخاب اولمنسنه نه مانع وار . اکرچه معاویه نک اسلامده سابقه سی و قدیمی یوق ایسه ده خلیفه مظلومک و لیسیدر و آنک دمنی طالبدر و حسن سیاست و تدبیر صاحبدر و زوجه رسول الله اولان ( ام حبیبه ) نک برادریدر . و رسول الله کاتبلرندندر » دیدی و ابو موسایه ولایت و یریه جکنی ده ایما ایتدی .

ابو موسی الاشعری « یاعمر و ! الله دن قورق . خلافته استحقاق ، آنجق دینجه فضل و مزیت ایله اولور . قومیتجه شرف حسب و نسب ایله اولماز .

مع هذا خلافتی قبیله قریشك اشرفنه ویره جك اولسه م علی بن ابی طالبه ویرردم . معاویه ، دم عثمانی طلب ایدیورمش دیومهاجرین اوّلینی براغوبده آتی خلافته انتخاب ایدهم . منصب و ولایت بختنه کلنجه والله معاویه بتون وارینی بکا ویرسه آتی خلافته انتخاب ایتم و حکم الّهیده رشوت آلم . لکن عمر بن الخطابك نامنی احیا ایتمك ایسترسهك اوغلی عبداللهی انتخاب ایدهم « دیدی .

عمرو بن العاص « یا اباموسی ! امارت و خلافته آنجق برمدبر آدم ، صالح اولور . عبدالله بن عمر ایسه قیدسز برآمددر . اوغلم عبداللهك انتخابنه نه مانع وار . آنك فضل و صلاحی معلومکدر « دیدکده ابو موسی « اوغلك عبدالله ، صادق برذاتدر . لکن سن آنی فتنه یه طالدردك ، بولاشدردك « دیدی و بوضره ده عبدالله بن زبیرك دخی لاقردیسی کچدی .

نهایت ابوموسی « یاعمرو ! عرب هنوز بر بیوک محاربه دن قورتیلوب سکا اعتماد ایلدیلر . آنلری ینه بر محاربه یه القا ایتمك انصاف دکدر « دیدکده عمرو بن العاص « سنك رأیک ندر « دیمکله ابو موسی « بنم رأیم بودرکه بو ایکی آدمی ، یعنی علی ایله معاویه یی خلع وایشی شورایه حواله ایدهم . مسلمین ایستدکلرینی انتخاب ایسونلر « ده نیجه عمرو بن العاص « ایشته رأی بودر « دیوب بوقرار اوزره اتفاق ایلدیلر .

بعده ایکیسی برلکده میسدانه چیقوب آنلره منتظر اولان خلقه خطاباً ابوموسی الاشعری « بزعمرو ایله بر رأی اوزرینه اتفاق ایتدك . آنکله اومارمکه الله تعالی بوامتك حالتی اصلاح ایلیه « دیدی .

عمرو بن العاص دخی آنی تصدیق ایتدی و ابو موسایه « هایدی بیور ، ناسه قرارمزی بیلدر « دیدی .

عبدالله بن عباس ، ابوموسانك یاننه واردی « امان یا اباموسی ! قورقارم عمرو سنی آلداتمسون . بر شیئه قرار ویردیکز ایسه آنی ایلرو سور ، ابتدا اوسویلسون ، زیرا آکا امنیت اولماز « دیو نصیحت ایلدی .

ابوموسی « یوق ، بز آنکله اتفاق ایتدك « دهرک ایلرو کچدی « ای



ناس! عمرو ايله برلكده بوامتك ايشنه باقدق . اڭ صالح رأى اوزرينه اتفاق ايتدك كه على ومعاويه يي خلع ايدوبده ناس ايسنديكنى انتخاب ايلكدن عبارتدر . ايشته بن على يي ومعاويه يي خلع ايتدم . سز ايشكزه باقكز ، اهل كورديككزى انتخاب ايديكز ، ديوب كيرو چكلدى .

بعده عمرو بن العاص آنك يرينه كچدى « اى ناس! ابوموسانك ديديكنى ايشنديكز . على يي خلع ايتدى . بن ده آنك كچى على يي خلع ايتدم ومعاويه يي مقامنده ثابت قيلدم . زيرا عثمانك وليسيدر وقاتنى طالبدر . آنك مقامنه سائرندن احقدر » ده نيجه ابوموسى شاشوب قالدى واو زمان عمروك خدعه سنه مطلع اولدى .

عبدالله بن عباس ، ابوموسايه لوم ايتدكده « نه ياپهيم . عمرو بكا موافقت ايلشيكن سوزندن دوندى » ديهرك صانكه اعتذار ايتدى . ابن عباس « صوج سنده دكل ، سنى بومقامه كتورندهدر » ديدى .

ابوموسى ينه « نه ياپهيم ، عمرو بن العاص سوزنده طورمدى ، بكا غدر ايتدى » ده نيجه عبدالله بن عمر الفاروق « باق ، شو امتك حالى نه يه منجر اولدى . بي پروا نه ياپهيم ديسوين بر آدمك الله قالدى » ديهرك تأسف ايلدى .

عبدالرحمن بن ابى بكر الصديق دى « اشعرى ، بر كون اول فوت اولسه يدى حقنده خيرلو اولوردى » ديدى ودها طوقوناقلى سوزلر سويلدى .

آنك اوزرينه ابو موسى الاشعرى غيرته كلهرك عمرو بن العاصه « الله سنى موفق ايتسون حريف ! بكا غدر ايلدك ، بيوك كناه ايشلدك » ديدى .

قاضى شريح ايسه قامچى ايله عمروك باشنه اوردى . عمروك اوغلى دى آكا مقابله ايتدى . ناس آره يه كيروب آيرديلر . لکن شريح قامچى ايله اوروبده قليجله عمروك باشنه اورمدينى ايجون اظهار ندامت ايده كلشدر .

عمرو بن العاص ، اهل شام ايله برلكده عودت ايليوب معاويه خلافتي تبريك ايتديلر . ابن عباس ايله قاضي شريح دخی كوفيه عودت ايله حضرت علي يه عرض و بيان كيفيت ايلديلر . بعده ابن عباس ، مركز امارتي اولان بصره كيتدی .

ابوموسی الاشعري ايسه ناسدن اوتانوب مكه يه فرار ايتدی . چه فائده كه آندن صكره حضرت علي نك حكومتی ضعف و تنزله و معاويه نك قوتی ترايد و ترقيه يوز طوتدی .

حضرت علي بو حالدن متأثر و متألم اوله رق صباح نمازندن صكره معاويه و عمرو بن العاص و حبيب و عبدالرحمن بن مخالد و ضحاک بن قيس و ووليد و ابوالاعوره بددعا ايتمه باشلادی . معاويه آني ايشته دكه اودخی علي و ابن عباس و حسن و حسين و اشتره بددعا ايتمه باشلادی .

### ضاظره

حقيقت كوزيله باقيلورسه انسانك خياله اوليله كلوركه ديار عربده برملايم جنوب روزكاري اسركن حضرت عثمانك ايام خلافتنده سرين سرين برشمال روزكاري اسكه و عربك دماغنه تمدن و تنعم قوقولري كلهكه باشلادی . بوايكي روزكارك تصادمندن پيدا اولان قاصيرغه ، عربستاني هرج مرج ايلدی . ايشته حضرت عمر الفاروقك قورقديني و ( حذيفة بن اليمان ) دن صورديني فتنه عظمي بودركه : آنده حضرت عثمان شهيد اولدی و آندن طولايي بصره و صفين صحرا رنده سكسان يلكدن زياده دلاوران اسلام نابيد اولدی . امويلرك باشلارنده ايسه سوداي امارت يللري اسردی و شبان عربك اكثری او واديلرده طولاشوب كزردی . بناءً علي ذلك حضرت علي نك حكومتی ضعف بولمده و معاويه نك حكمی قوت آلمده ایدی .

### احوال خوارج و وقعة نهروان

بالاده بيان اولنديني اوزره اردوی هايونده تفرقه ظهوريله خارجيلر حضرت علي بي متاركه يه و تحكيمنامه امضاسنه و ابوموسی الاشعري نك حكم نصب اولمسنه مجبور ايتمشلر ايكن ايجلرندن برچوغي تبديل افكار ايدرك

تحکیمک ابطالنه قیام ایتمشلر ایسه ده حضرت علی آنلرک سوزلرینه باقیوب ابوموسیای محل حکمه اعزام ایله عهدی ایفا بیورمشیدی .

کوفه ده بولنان کروه خوارج ایسه بینلرنده بالما کره ( عبدالله بن وهب ) ی امارته انتخاب ایله شوالک اوننده آکا بیعت ایلدیلر . و ( جسر نهروان ) ده اجتماع ایتک اوزره قرار ویروب بصره ده کی یولداشلرینی دخی اورایه دعوت ایلدیلر وطاقم طاقم کوفه دن چیقوب نهروانه روان اولدیلر . بصره ده کی خارجیلر دخی کیندولرینه ( مسعر بن فدک التمیمی ) یی رئیس نصب ایدرک عازم نهروان اولدیلر .

ایشته او ائساده حکملرک بروجه بالا غریب حکملری میدان چیقدی و ابوموسی الاشعری ناسدن اوتانوب مکیه فرار ایتدی .

آنک اوزرینه حضرت علی کوفه ده او قودینی خطبه سنده « معصیت ، موجب حسرت و ندامت اولور . بن امر تحکیمده و حکملرک انتخابی خصوصنده سزه امر و رأیمی بیان ایتشیدم . سز دکه مدیگنر ، دیلدیگنری ایشلدیگنر ، صکره پشیمان اولدیگنر . حکملر ایسه ، حکم قرآنی کیرو براغوب کندو هوالرینه اویدیلر و رأیلرنده اختلاف ایتدیلر وایکیسی ده حق و صوابه اصابت ایده مدیلر . آنلرک حکملرندن الله ورسولی و صلحای امت ، بریدر . هایدی شام سفرینه حاضر اولکنر » دیو بیوردی .

نهروانده کی خوارجه دخی امر نامه یازوب « حکملر ؛ هوالرینه اویدیلر ، کتاب الله مخالفت ایلدیلر ، سنت نبویه ایله عمل ایتدیلر . آنلرک حکملرندن الله ورسولی و مؤمنلر بریدر . همان بو طرفه کلیگنر ، دشمنلر مزک اوزرینه کیده لم . بز ، اول بولندیغمز حال اوزره یز » دیو بیوردی .

خوارج ایسه « بز ، امر تحکیمی قبول ایله کافر و صکره تائب و مستغفر اولدق » دیه رک بر غریب تعصب و ضلالت یولانی طوتمشلر ایدی . حضرت علی یه دخی « سن ابتدا کافر اولدیغکی اقرار ایله توبه ایتده ایجابنه باقه لم » دیو جواب ویردیلر .

حضرت علی ، خوار جدن مایوس اوله رق آنلری حاللری اوزره ترك بوبده شام اوزرینه حرکتی مناسب کوردی و اهل کوفه یی بویوله تشویق اقناع بیوردی . بصره عسکرینک جمع و سوقی ایچون دخی ابن عباسه سرنامه کوندردی .

ابن عباس ، ناسی سفره دعوت ایلدی . بیک بشیوز عسکر طوپلانندی . بن عباس « سزک آلتشییک حرب و ضربه قادر آدم لکز وار ایکن یر المؤمنینه بیک بشیوز عسکر کوندرمک عیب اولمازمی » دهرک تکرار عل بصره یی تشویق ایلدکده بیک یدی یوز آدم دها سچیلدی . بوصورتله بن عباس بصره دن کوچ حال ایله اوچییک ایکوز عسکر چیقاره بیلدی .

حضرت علی ، کوفه وجوه ورؤسانی جلب و جمع ایله غایت مؤثر خطبه او قوددی . بصره ده بوقدر چوق عسکر وار ایکن وارد اولان عسره عسکرینک اوچییک ایکوز نفر دن عبارت اولدیغنی سویلدی . « و بنم عوان و انصارم سز لرسکمز » دهرک و آنلری تلطف ایدرک بالجمله کوفه سکرینک جمع و سوقی ایچون آنلری تشویق بیوردی .

کوفه وجوه ورؤسانی « سمعاً و طاعة » دیدیلر و کوفه دن آلتش بش . سکر ترتیب ایتدیلر . بصره دن کلن عسکرله برابر مجموعی آلتش سکر بیک بکی یوزه بالغ اولدی . همان حضرت علی ، مداین عسکرینک دخی جمع سوق اولنسی ایچون ( سعد بن مسعود الثقفی ) یه امر نامه کوندردی و شام اوزرینه حرکته حاضر اولکز » دیو امر ویردی .

حال بوکه بصره دن چیقان خوارجک بر مفرزه سی نهروانه کلورکن کورمشلرکه : نهروان قربنده بر حمار اوزرنده برخاتون کیدیور ، بر آدمده کیرو دن حماری سوق ایدیور « طور » دیملریله بیچاره اورکوب طورمش . مکر ( عبدالله بن خباب ) رضی الله عنهما اولوب او خاتون دخی آنک زوجه سی ایمش و طوغورمسی یاقین حامله ایمش . خارجیلر آکا « سن کیمسین » دیملریله اصحاب رسول الله دن خبابک اوغلی عبدالله هم « دیدکده » قورقمه ، بزه نافع بر حدیث روایت ایله « دیمشیلر او دخی » پدرمدن ایشتم ، او دخی

رسول الله صلی الله علیه وسلم حضرت لری بیورمش که  
 ( برفتنه اوله حق ، آنده کشینک بدنی اولدیکی کبی قلبی ده اوله جک . کشو  
 مؤمن اوله رق آخشاملایوب کافر اوله رق صبا حلالر و کافر اوله رق  
 صبا حلالایوب مؤمن اوله رق آخشاملار ) دیو روایت ایلدکه « بز بو حدیث  
 ایچون سکا صوردق ، ایمدی ابوبکر و عمر حقارنده نه دیرسین » دیمشله  
 و آنلری خیرایله یاد و ثنا ایتدکه « عثمان حقنده خلافتنک اولنده و آخرنده  
 نه دیرسین » دیمشله . « اول و آخر بحق ایدی » دیدکه « علی حقنده  
 قبل التحکیم و بعد التحکیم نه دیرسین » دیمشله . « علی ، جناب حق جمله کزدن  
 اعلمدر و دیننده سائرندن زیاده تقوی اوزره در و جمله دن زیاده بصیرت  
 صاحبدر » ده نیجه « سن هوایه تابع اوله یورسین ، اسم و شهرته آلدانه رق  
 آکا کوره ناسه موالات و طرفدارلق اید یورسین ؛ عملرینه نظر ایت یورسین .  
 بزده کسه حقنده اجرا ایتدیکمز بر صورتله سنی قتل ایدلم ، دیه رک آنی  
 و زوجه سنی طوتوب بر خورما اغاضنک آلتنه کتوردکلری صرده ده  
 اغاجدن برپاره خورما دوشوب خارجیلردن بری آنی آغزینه قودقده  
 دیکر بری « خورمائی صاحبی حلال ایتدن ، یا خود نمئی ویرمدن آلدک »  
 دیو اعتراض ایتمکه در حال خورمائی آغزندن چیقاروب آتمش و او  
 صرده ده اهل ذمت رعایادن برینک بر خنزیری اورایه کلدکه خارجیلردن  
 بری آنی قلیچ ایله اورنجه دیکرلری « بو سنک ایتدیگنک یر یوزنده فساد  
 دیمکدر » دیمشله . او دخی خنزیرک صاحبی اولان ذمی بی بولوب ارضا  
 ایتمش . ( عبدالله بن خطاب ) آنی کورنجه « بو کوردیکم حالرده صادق  
 ایسه کز سزدن بکا بر ضرر کلز . زیرا بن مسلمانم و اسلامده بر سیئه  
 ایشلمدم » دیدکه آنی یاتوروب قیون بوغازلار کبی بوغازلامشله  
 و زوجه سنک قارتی یارمشله و طی قبیله سندن اوچ خاتونی دخی اعدام  
 ایلشله .

خوارجک بو حال و حرکتلری صحیحاً عبرت آله حق حالات غریبه دندر  
 بر خورمائی صاحبنک رضائی اولمقسزین ییکی جائز کورمین و بر خنزیری

فایتمکله صاحبی ارضایه مجبور اولان متعصبلره باق که اصحاب  
سول اللهدن بر ذاتک صغار صحابهدن اولان اوغلنی بغیر حق  
غازلامقدن چکنمبورلر وملت اسلامیهده قاریلر ، قنی دین ومذهبده  
لورسه اولسون هر درلو تعرضدن مصون ایکن آی ، کونی تمام اولمش  
حامله خاتونک قارنی یارمق کبی غایت چیرکین بر جنایتی رتکابدن  
ماقنمبورلر . بارد وباطل تعصبک انسانی نه مرتبه نامشروع ونا معقول یوللره  
وق ایده ییله چکی وایام فتنهک نصل مخاطره لی ودهشتلی وقتلر اولدینی  
یوقعه ایله رعنا معلوم اولور .

حضرت علی ، بووقعهدن پک زیاده مکدر ومتأثر اوله رق تحقیق احوال  
بچون بر آدم کوندردی . خوارچ آنی ده اعدام ایتدیلر .

آنک اوزرینه وجوه واشراف ورؤسا « یامیر المؤمنین ! بز بوظالمیری  
رقعهده براغوبده نصل شام طرفه کیده لم ، عیال واولاد واموالزی کیمه  
دیعی ایدلم » دیدیلر . ( اشعث بن قیس ) صفینده متارکینی ترویج ایتمکله  
خوارجه مائل ظن اولتور ایکن اودخی دیگر وجوه ورؤسانک بوسوزلرینی  
عدیق وتأید ایلدی .

بناءً علی ذلک حضرت علی ، شام سفرینی تأخیر ایله نهروان اوزرینه  
حرکت بیوردی . وابتدا ( قیس بن سعد ) رضی الله عنهما خوارجک یاننه  
اردی . بعده ( ابو ایوب الانصاری ) رضی الله عنه کیدوب آنلره  
صیحت ویردی وبعده حضرت علی واروب آنلری تهدید ایلدی ، اصلا  
فید اولدی .

آنک اوزرینه حضرت علی ، عسکرینی ترتیب وتعییه ایتدی و « سزک  
هداگز اونه بالغ اولماز ؛ خوارجدن دخی اون کشتی قورتماز » دیدی .  
آکا قارشو خوارج دخی درت بیسک نفره بالغ اولدقلری حالده محاربه یه  
ماضر اولدیلر .

بعده حضرت علی ، ابو ایوب الانصاری یه رأی وامان سنجاغنی  
یردی . اودخی سنجاغنی آلوب میدانه چیقدی . « هرکیم بو سنجاغک



آلثنه کلورسه امیندر ، هرکیم جنک ایتمز و تعرض ایلز ایسه امیندر ، هرکیم کوفهیه ومداینه کیدر و بو جماعتدن آریلور ایسه امیندر « دیو ندا ایتدی .

رؤسای خوارجدن فَرَّوْه بن تَوَفَّل الاشجعی « بن علی ایله نیچون حرب ایده جکمی بیلمیورم . شمدی بن کیدیورم . حقیقت حال کرکی کی میداننه چیققدقه علی ایله محاربه ، یاخود آکا متابعت ایلرم « دیهرک بشیوز آتلو ایله آریلوب ( دَسْکَرَه ) طرفه کیتدی . خوارجک بر قسمی دخی متفرق اوله رق کلوب کوفهیه کیردیلر ، بر مقداری دخی حضرت علی طرفه کچدیلر .

عبدالله بن وهبک یاننده درت بیک خوارجدن بیک سکز یوز نفر قالدقلمی حالده بی محابا ایکی قسم اوله رق صاغ و صول جناحلمه هجوم ایتدیلر . لکن ایلرو کلنلر ، اولقره هدف اولدیلر وهمان سواری وپیاده هر طرفدن اوزرلرینه هجوم ایتمکله کافه سی ( ابن وهب ) ایله برابر آن واحده تلف اولدیلر .

مقتوللردن بری ده مشهور ( حَرْقُوص بن زُهَیْر ) در که صحابیدر و ( سُوقُ أَهْوَز ) ک فاتیحدر . اصحاب جل ایله حرب ایدوب صکره صفینده دخی حضرت علی ایله برابر بولنش ایکن مؤخرأً خوارجه ملحق و بوکره آنلر ایله برابر مقتول اولمشدر .

فرقه ناجیه دن یالکزیدی کشی شهید اولدی . برنجیسی اصحاب احددن ( یزید بن نُویْرَة الانصاری ) حضرتلمی ایدی . رضی الله عنه

حضرت علی ، نهروان سفرندن کوفهیه عودتنده هان شام اوزرینه یوریمک ایستدی لکن ( اشعث بن قیس ) ایله دیگر بعضیلری « چوق یوردلق ، براز دکنه لم و سلاخلریمزی تعمیر و نقصانلریمزی اکمال ایده لم ، حاضرلانه لم « دیو اعتدار ایتدیلر و هرته قدر تشویق اولندیلر ایسه ده آغیر طاوراندیلر . حضرت علینک جانی صیقلدی ، لکن نه چاره کوفهده توقفه مجبور اولدی .

## وقایع سنه ۳۸

## عمرو بنه امارت مصری استیلاسی

بالاده بیان اولندیغی اوزره مصر اهالیسی حضرت علی به بیعت ایلشله  
ایسه ده ایچلرندن برکروه، بیعتدن خارج قاله رق (خربتا) ناحیه سنده اجتماع  
ایله بی طرف طور مغله مصر والیسی بولنان قیس بن سعد رضی الله عنهما  
آنلری مدارا ایله اداره ایتمکده ایکن آنک عزلیله یرینه مصر والیسی  
اولان (محمد بن ابی بکر الصدیق) رضی الله عنهما آنلری تضییق ایدنجه  
سلاحه صاریله رق آکا قارشو طور مشلر ابدی .

صفین وقعه سندن صکره تحکیمه قرار ویرلدکده خربتایاران، امارت  
مصریه بی کوزلرینه کس دیروب آچیقندن آچیفه اعلان حرب ایتدیلر .  
و محمد بن ابی بکر طرفندن برفرقة عسکریه ایله (محمد بن الحارث بن جهمان)  
کوندرلدکده لدی المحاربه محمد بن الحارث مقتول اولنجه کروه مخالفین قوت  
بولدی .

اوصره ده (معاویه بن خدیج) ناسی دم عثمانی طلب و دعوایه دعوت  
و برچوق خلق اکا اجابت ایتمکله امارت مصریه نك مشکلاتی مزداد اولدی .  
شام والیسی معاویه بن ابی سفیان ایسه برطرفدن (مسلمه بن مخلد)  
و (معاویه بن خدیج) ایله مخابره ایدرک آنلری عصیان تشویق ایله مصرک  
استیلاسی اسبابی استکماله چالشمقده ایدی .

حضرت علی، بو احواله مطلع اولنجه جزیره والیسی اولوب (نصیین)  
بلده سنده بولنان (اشتر) ی جلب و مصر ایالتی اکا توجیه و تعلیمات لازمه  
اعطا ایتمکله اشتر همان اسباب سفرینی تهیه و مصره متوجها عراقدن  
حرکت ایلش ایسه ده بحر قلزم، یعنی سویش دکزی ساحلنه واردقده  
فوت اولمشدر . رحمه الله علیه رحمة واسعة .

معاویه بن ابی سفیانک بحر قلزم جهتنده کی مأموری زهرلی بال شربت

ایله اشتری تسمیم ایتمش و معاویه آنی ایشدکده « اللهک بالدن عسکری واردر » دیمش اولدینی مرویدر .

حضرت علی ، اشترک وفاتی خبرینی آلتجه ، ائالله و ائانا ایله راجعون ، دیرک فوق العاده مکدر و محزون اولدی .

معاویه بن ابی سفیان ایسه ولایت مصری عمرو بن العاصه وعد ایلش ایدوکندن همان آتی بیک عسکرله آنی جانب مصره کوندردی .

عمرو بن العاص کیدوب حدود مصر اوزرنده طوردی . عثمان طرفدارانی آنک باشنه طویلاندی . عمروک قوتی آرتدی . همان محمد بن ابی بکره بر مکتوب یازوب ، ای ابو بکرک اوغلی ! کندیگی صاقین . بدن سکا بر ضرر گلشنی ایستتم . بوملکت اهالیسی ، سنک علیگه دوشمشلر ، سنی تسلیم ایده جککر . سکا نصیحت ایلرم . بورادن صاوش ، دیلدیگک طرفه کیت ، دیو اشعار ایتدی وینه بومأله معاویه دن کلن مکتوبی دخی کوندردی که : عثمانک محاصره سنه قصد ایلش ایدوکنی یاد ایله تهدیدی متضمن ایدی .

محمد بن ابی بکر ، بو ایکی مکتوبی حضرت علی به کوندردی . و مصر لولرک حرب ایچون دعوته اجابته اغیر طاوراندقلرینی بیلدردی و امداد ایستدی .

حضرت علی دخی مصره امداد ایچون عسکر کوندره جککنی محمد بن ابی بکره وعد ایله برابر کندی طرفداراتی جمع ایله امدادک ورودینه قدر صبر و ثبات ایلشنی امر ایلدی .

آنک اوزرنه محمد بن ابی بکر ، ناسی جنکه دعوت و تشویق ایدرک اوّل باوّل اجتماع ایدن ایکی بیک عسکره ( کنانه بن بشر ) ی باشبوغ ایدوب مقدمه الجیش اولق اوزره ایلرو سوق ایتدی . کندوسی دخی ایکی بیک عسکرله کیرودن کیتدی .

عمرو بن العاص ، کنانه اوزرنه فرقه فرقه عسکرینی یورتدی . کنانه آنلری برر برر کیرو یوسکور تدی . معاویه بن خدیج کلوب شام عسکریه

بر لکده حرکت ایلده رک هر طرفدر کنانه یی قوشاندی . کنانه فوق العاده ثبات ایدرک شهید اولنجه یه دک جک ایتدی .

کنانه نک شهادتی خبری کیروون کلکده اولان محمد بن ابی بکره واصل اولنجه یاننده کی عسکر بوزیلوب طاغلدی و کسدوسی تنها قالدی وهمان عودت ايله بر خرابه ده مختبی اولدی .

معاویه بن خدیج ، آتی بولوب اعدام ایتدی . بر اشک لاشه سنک ایچنه قویوب احراق بالدار ایلدی ( عبدالرحمن ابی بکر ) عمرو بن العاصک معیتده بولمغله برادرینک بویه وحشیانه اعدام و احراق اولندیغنه اوزاقدن نظر تأسف وتلهف ايله باقوب قالدی .

حضرت عایشه کیمیتدن خبردار اولنجه فوق العاده محزون اوله رق نمازدن صکره معاویه و عمرو بن العاصه بددا ایدر اولدی .

عمرو بن العاص ایسه ایالت مصری معاویه نامه صبط ایدرک کندوسی دخی والیلکنده استقرار بولدی .

حضرت علی یه کلنجه ، مصره امداد ایچون ناسی پک چوق تشویق ایلدیه ده سفره رغبت ایلدیلر .

حال بوکه محمد بن ابی بکره عسکر ايله امداد ایده جکنی وعد ایش اولدیغدن وجوه و اشراف کوفی جمع ايله آنلره تویسخ ایتدی . آنک اوزرینه ( کعب بن مالک الارحبی ) ناسی دعوت ايله جمع ایتدیکی ایکی بیک عسکره کوفدن حرکت ایلدیه ده متعاقباً محمد بن ابی بکرک قتل اولندیغی و عمرو بن العاصک مصری استیلا ایلدیکی خبری واصل اولنجه حضرت علی او عسکری کیرو چویردی و ناسی جمع ايله کیفیت ییلدیردی و یانوب یاقیلر ق آنلره عتاب ایلدی و پک طوقوناقی سوزلر سویلدی .

چه فائده که اقلیم جسم مصر ، امیر المؤمنینک حکمندن چیقوب امارت شامیه یه ملحق و معاویه نک قوتی ایکی قات اولدی و باغیلر ده زیاده میدان آلدی .

## وقایع بصره

معاویه بوجه بالا مصر ایشی بتورددن صکره بصرهیه ال اوزاتدی .  
 شویه که : بصره اهالیسنی علیدن دم عثمانی طلب و دعوایه دعوت ایلک  
 اوزره ( عبدالله بن الحُضرمی ) یی بصرهیه کوندردی و سنت نبویه ایله  
 عمل ایده جکنه و بصره لولرک عطیه لرینی ایکی قات ایله جکنه دائر بصره  
 اهالیسنه خطاباً برقطعه مکتوب یازوب ابن الحُضرمییه ویردی .

ابن الحُضرمی ، بصرهیه وارد قدده ( بنی تمیم ) محله سنه ایندی . بنی امیه  
 طرفدار ی اولانلر آنک باشنه طویلاندی . اودخی دم عثمانی طلب ایلک  
 دعواسنی میدانه قودی و معاویه نك مکتوبی اوقودی ، وجوه و اشراف  
 بصره نك بعضیلری آنی قطعاً رد ایلدیلر ایسه ده بعضیلری دخی اجابته میل  
 کوستردی .

بصره والیسی اولان ( عبدالله بن عباس ) اولجه کوفهیه کلوب ( زیاد بن  
 ابیه ) ی بصره قائم مقاملغنه تعین ایتیش اولدیغندن زیاد ، بواحوالی حضرت  
 علییه عرض ایله برابر ابن الحُضرمی طرفدار لرینه قارشو کله بیله جک  
 وجوه بصره یی جلب ایله مملکتی اختلاندن محافظه یه غیرت ایلدی .

حضرت علی ، هان بنی تمیمی ، ابن حُضرمی دن آیرمق ایچون  
 ( اعین بن ضبیعه ) یی بصرهیه کوندردی . اودخی بصرهیه واروب ابن  
 حُضرمییه طرفدار اولانلره نصیحت ویردی . لکن دکله مدیلر . کیجه  
 خوارجدن بعضیلری ایسه خدعه ایله اعینی اعدام ایدیوردی ،

آنک اوزرینه حضرت علی ، بنی سعد قبیله سی رؤسا سندن واحنف  
 بن قیسک اقرباسندن اولان ( جاریه بن قدامه ) یی بشیوز آتلو ایله بصرهیه  
 کوندردی و بصره اهالیسنه خطاباً بر تهدید نامه یازوب آنک یدینه  
 ویردی .

جاریه بن قدامه ، بصرهیه واروب نامی اطاعته دعوت ایلدی و حضرت  
 علینک تهدید نامه سنی قرائت ایلدی . بصره وجوه نك اکثری « سمعاً

وطاعه « دیمکه همان ابن حضرمی اوزرینه هجوم ایتدی . بر از محاربه دن صکره ابن حضرمی بوزلدی . بصره لوردن آ کا تابع اولانلر طاغیلدی . کندوسی یتش قدر آدم ایله اسکیدن قلله بر خراب قلهیه کیردی . جاریه دخی او ، قلهیه آتش ویردی . ابن حضرمی ایله برابر رفیقلمی دخی کافه محترق اولدی و بوضورتله بصره غائله سی ختام بولدی .

### دفاع فارس

بنی ناجیه شیخی ( حرّیث بن راشد ) که جل وقعه سنده حضرت علی ایله برابر بولندقدن صکره اوچیوز کشی ایله بصره دن چیقوب کوفیه کلش وصفینده دخی حضرت علی ایله برابر بولنش ایدی . بوجه بالا تحکیمه قرار ویرلدهکده اوتوز نفر رفیقلمیله حضرت علینک یاننه کلوب « یاعلی ! بن آرتق سنک امریکه اطاعت ایلیه جکم و سنک آرقه کده نماز قیلیمه جغم و یارین سندن آریله جغم » دیدکده حضرت علی « کل ، اوتور . سکا قرآن و سنک احکامنی تفهیم ایدیم » دهرک نصیحت ایلش ایسه ده مفید اولماش و کیجه قومیه برابر کوفه دن صاوشوب کیتمش ایدی .

جماعتی آزاوادیغندن بوجهله عزلت ایلمی موجب اندیشه دکل ایسه ده اطرافدن بر چوق سرسریلرک التحاقیه تکثیر جمعیت ایلمی ملحوظ اولدیغنه بناءً ( زیاد بن حصّه ) یوز اوتوز آتلا ایله آرقه سندن سکرتمدی وائسای راهده یتشوب آ کا نصح و پند ایتدی . لکن مفید اولیوب محاوره لری محاربه یه منجر اولدی ، طرفیندن بر خیلی مقتول و مجروح وقوع بولدی . آخشام ایریشوب طرفین بربرندن آیرلدی و حرّیث ، کیجه لین صاوشوب ( اهواز ) ه و زیاد دخی مجروح اولقله یاره سنه تیمار ایتمک اوزره بصره یه کیتدی .

آنک اوزرینه حضرت علی ، ایکی بیک کوفه عسکریه ( معقل بن قیس ) ی کوندردی . و آکا « اللهم دن قورق . اهل قبله حقنده حدی تجاوز ایله ، اهل ذمت رعایایه ظلم ایتمه ، کبر کتورمه ، الله تعالی



متكبر اولانلری سومز « دیو نصیحت ویردی وبصره والیسی ابن عباسه امر نامه یازوب معقلك معیتته ایکی بیک قدر عسکر کوندرمینی اشعار بیوردی.

اهوازك یرلورلدن اولوب خراجدن قورتاق سوداسنده بولنانلردن وخرسز کروهندن وطوائف سائرهدن برچوق خلق حرّیك باشنه طوپلانوب فارس ایالتی سراپا حال اختلال واغتشاشه کتورمشلر ، حتی حضرت علی طرفندن امیر فارس اولان ( سهل بن حنیف ) رضی الله عنه حضرتلرینی فارسدن چیقارمشلر ایدی .

معقل بن قیس ، همان کوفهدن چیقوب سیر سریع ایله اهوازه واردی وآنده طورمیوب حرّیك آرقه سینه دوشدی . برکون صکره حرّیك جمعیتته ایرشدی وهمان حربه کیرشدی .

حرّیك یاننده کی عربلردن یتیم ویرلودن واکرadden اوچیوز قدر عونسی مقتول اولدی وبقیه سی طاغلدی . حرّیث دخی فرارایتدی وسوا حله طوغری کیتدی . زیرا او طرفلرده پك چوق طرفداری وار ایدی . کندوسنك جماعتی کچن سنه صفین وقایعی سببیه عشر وخراج ویرمدکری کبی بوسنه دخی ویرمك سوداسنده ایدیلر .

حرّیث ، کندی یاننده کی خوارجی « بن سزك رأیکزدهیم » دیهرك اغفال وبنی امیه طرفدارانسه دخی « عثمان مظلوماً قتل اولندی ، آنك انتقامنی آلملیدر » دیر ودیگرلرینه دخی « علی تحکیمه راضی اولدی حال بوکه کندو ، حکمی کندوسنی خلع ایتدی » یوللو سوزلر سویلر ویرلوری دخی عشر وخراجی مأمورلره ویره جگگزه کندو اولاد وعیا لگزك امورینه صرف ایدیکز ، دیهرك عصیانه تشویق ایلر ایدی . الحاصل هر صنفی خوشنود ایلیه جك وجهله لسان قوللانوردی . بوصورتله باشنه صنوف مختلفهدن برچوق خلق طوپلانمشیدی .

معقل ایسه سیر سریع ایله کیدوب آکا اولاشدی وبر امان سنجاغی رکز ایدوب « بوسنجاق آلتنه کلنلر امیندر » دیوندا ایتدردی . حرّیك

باشنده کی صنوف مختلفه نك اكثرى طاعلدى ، ياننده آژ آدم قالدی  
ولدی الحاربه کندوسی و یوز یتش قدر عونہ سی مقتول وبقیه سی صاغ و صوله  
پرا کنده اولدی .

بعده معقل ، کچن سنه دنبرو عشر و خراج ویرمکدن امتناع ایدنلری  
طوپلادی ایکی سنه لك عشر و خراجی دفعه تحویل ایلدی و جمله سندن  
امیر المؤمنین ایچون بیعت آلدی .

عصاته ملحق اولان نصاری اولاد و عیال لرله برابر بشیوز نفره بالغ  
اولدقلری حالده معقل ، آنلری اسیر ایتدی و عودتنده آنلری ده برابر  
آلوب یوله چیقاردی . آنلر ایسه وطنداشلری اولان اهل اسلامه آلمش  
اولدقلرندن اهل اسلام آنلری تشیعہ چیققدقه جمله سی آغلا یوب اهل  
اسلامی ده آغلادیلر و حضرت علی طرفندن ( اردشیر خره ) بلده سنک امیری  
اولان ( مَصْقَلَه بن هَبیره الشیبانی ) نك یانندن کچرلر ایکن اولاد و عیال لری  
آغلاشدیلر . کندولری ده مصقله یه خطاباً « ای فضل و احسان باباسی ، ای  
بیچاره کانک حامیسی ! حقمزده لطف و مروت بیور و بزی آزاد ایله » دیو  
باغرشدیلر .

مصقله ، آنک فریادینه طیانہ میوب « سزی آزاد ایلرم » دیومین ایتدی .  
و معقلان بشیوز بیک درهمه آنلری صاتون آلدی و کندولرینی کتابته  
کسوبده اوزرلرینه بر بدل طرح و تعیین ایتمکسزین جمله سنی آزاد ایلهرک  
کندوسی بیت الماله مدیون قالدی .

معقل « بو مبالغی هان امیر المؤمنینه کوندر » دیدکده مصقله « دفعه  
هپسنی کوندره م . بر مقدرارینی دفعه » و باقیسنی بالتسدریج ادا ایلرم «  
دیدى .

معقل ، کوفه یه کلوب کیفیتی عرض ایلدکده حضرت علی ، مصقله یه  
امر نامه کوندردی « یا او مبالغی کوندر ، یا خود بورایه کل » دیو  
بیوردی .

مصله ، ايكیوزبك درهم تدارك ايله آلوب كوفه يه كتوردی و ( ذهل بن حارث ) ی اخشام طعمانه دعوت ایلدی .

( ذهل ) دن مرویدر دیمش كه : اخشام طعامندن صكره مصله « بو مبالغك كافه سنی امیرالمؤمنین بدن ایستر ، بن ایسه درحال تدارك ایدم » دیدی و « برهفته ظرفنده تدارك ایده بیلورسین » دیدیکمده « قوممه بونی تحمیل ایدم . اما هندك اوغلی ، یعنی معاویه اولسه آنك ایچون بنی صیقیشدرمزدی ، عثمان بن عفان اولسه آنی بكا بخش ایدردی ، کورمزیدك هر سنه آذر بايجان اموالندن اشعث بن قيسه یوز بيك درهم احسان اینردی » دیدی « علینك رأيی اویله دكلدر . او بیت المالك بر حبه سندن كچمز . سن اومبالغك تداركنه باق » دیدم . مصله ، کیجه لین قرار ایتدی و معاویه نك یاننه کیتدی .

فی الواقع حضرت عثمان ، کندی رأيی واجتهادی ایجابجه بعض امرايه بول بول عطیه لر ویرردی . حضرت علینك رأيی واجتهادی ایسه آکا مخالف اولدیغندن اعتراض ایلر و اعتراضاتی حضرت عثمانه وجاهاً سویلر ایدی . حضرت علینك رأيی ، حکم شرعه مطابق و ابو بكر و عمر زمانلرینك ایجاباته موافق ایدی . لکن صكره کی زمانلرك ایجاباتی حضرت عثمانك رأيی واجتهادینه مطابق ایدی . هر برینك بروجهی وار . ازمانك تغیريله احكامك تغیری ایسه انكار اولنه ما .

### بقیه اموال خوارج

بالاده بیان اولنان نهروان وقعه سندن صكره ( دسكره ) ده وبعده ( ماسبدان ) ده و ( جُوحی ) طرفنده علی التوالی ظهور ایدن خوارج اوزرینه حضرت علی طرفندن سوق اولنان مفرزله مظفر اوله رق خوارجی طاغتمشله ایکن ( مداین ) جوارنده ینه بر گروه خارجیلر ظهور ایتمكه مداین امیری اولان ( سعد بن مسعود ) خلال رجبده آنلری اوروب طاغیتدی .

متعاقباً ( شهرزور ) طرفنده ظهور ایدن خوارج ، کوفه یه بش ساعتک مسافه یه قدر تجاوز ایتدکلرندده حضرت علی طرفندن یدی یوز نفر ایله ( شریح بن هانی ) کوندردلی ولدی المحاربه شریحک عسکری طاغلمغله حضرت علی بالذات چیقوب آنلری اوردی ، امحا ایتدی . فقط ایچلرندن استیمان ایدن یتمش کشی بی آلوب کوفه یه کتوردی .

### وفات سهل و صریح

اهل بدردن و غزوۀ احدده عساکر اسلامیه منهزم اولدقده ثبات ایدنلردن ( سهل بن حنیف الانصاری ) رضی الله عنه حضرتلری که صفینده حضرت علی ایله برابر بولندقدن صکره حضرت علی ، آنی فارس امیری نصب ایتشیدی و بروجّه بالا فارسده اختلال و عصیان ظهوریله اهاالی ، آنی فارسدن اخراج ایتشلر ایدی . بوئانده فوت اولدی و نمازی حضرت علی قیلدی .

خواص اصحاب کرامدن و سابقین اولیندن ( صَهِیب رُوحی ) رضی الله عنه حضرتلری دخی بوئانده یتمش یاشنی متجاوز اولدینی حالدّه وفات ایلدی . یوقارولرده نیچه مناقبی سبقت ایلدیکندن تکراره حاجت کورلر .

### وقایع سنه ۳۹

بالاده بیان اولسدینی اوزره فارس اهالیسی عصیان و عشر و خراج ویرمکدن امتناع ایله امیرلری اولان سهل بن حنیف فارسدن اخراج ایلاش اولدقلرندن حضرت علی ، بصره ده بیت المال مأموری اولان ( زیاد بن ابیه ) ی فارس و کرمان ایالتلرینه ولی نصب ایتدی و بو ایالتلر بصره امارتنک ملحقاتندن اولدیغنه مبنی زیادک فارسه اعزامی ایچون بصره امیری اولان عبدالله بن عباسه امرنامه یازدی . او دخی مقدار کافی عسکر ایله زیادی فارسه کوندردی .

(دیاد بن ابیه) ایسه دهاتدن ومدّبر و دور اندیش ذواتدن ایدی . معیتده کی عسکری اعماله محتاج اولیوب حسن تدبیر ایله ایش کوردی . شویله که : فارس و کرمانک رؤسائی حلب ایله آنلری بربرینه دوشوردی و بربرینه اوردیروب تربیه ایتدردی . آز وقت ظرفنده فارس و کرمان ایالتلرینی تحت انضباطه آلدی و سرکشلرینی امانه کتوردی .

### عسا کر شامک تجارزانی

معاویه بن ابی سفیان ، اشبو اوتوز طقوز سنه سنده چته لرینی طرف طرف طاغیتدی ، بلاد عراقه خیلی خسار ایتدی . حضرت علی ، عصات شامیه یی تادیب ایچون اهل که فیه یی دعوت ایلدی ، لکن کندولرنده اثر غیرت کورلمدی و منبره جیقوب آنلره خیلی طوقوناقلی سوزلر سویلدی ، ینه مفید اولدی .

حال بو که آلتیوز قدر عسا کر شامیه ( آنبار ) ه کیدوب اها لیسنک اموالی غضب ایله معاویه یه کتوردی و بیک یدی یوز عسا کر شامیه ( تیما ) یه کیتدی و معاویه یه بیعت ایلمک اوزره ناسه جبر ایتدی . فقط حضرت علی طرفندن کوندریلن ایکی بیک نفردن مرکب برمفرزه تیما یه واروب آنلری کپرو پوسکورتدی . متعاقبا معاویه ( ضحاک بن قیس ) ی اوچ بیک عسکرله ( ثعلبیه ) طرفه کوندردی . اکامقابل حضرت علی دخی درت بیک عسکرله ( حجر بن عدی ) یی تسیار بیوردی . ایکی عسکر ( تدمر ) ده بولشوب اخشامه قدر جنک ایتدیلر . ضحاک کیجه لین صاوشوب فرار ایلدی .

ینه بوانئاده معاویه ، بالذات شامدن حرکتله دجله ساحلنه قدر کیدوب کلدی و ( جزیره ) خلقنه برنمایش ایتدی .

ینه بوسنه معاویه ، اوچ بیک آتلو ایله ( یزید بن شجر ) ی نی مکیه کوندردی . امیر مکّه اولان ( قثم بن عباس ) حضرتلری آکا مدافعه ایچون اهل مکّه یی دعوت ایلدیه ده اجابت ایلدیلر .

یزید بن شجره ، موسم حجه مکيه کړدی . انصار کرامدن وکبار  
محدثیندن ( ابوسعید الخدری ) یی جلبله « امیر کزک ضعیفی معلومدر . آکا  
سویله ناسه نماز قیلدر مسون ، بنده امامته قیام ایتم . ناس ، ایستدکلرینی  
امامته انتخاب ایتمونلر ، دیدی . اودخی قشمه سویلدی وناس امامته عبدالدار  
اوغللرندن ( شبیه بن عثمانی ) انتخاب ایلدی .

شبیه ، انتخاب اهالی ایله امام اوله رق ناس حج ایتدی و مکه بی طرف  
برحاله قالدی . بوده معاویه نك ترقی اقتدارینه بر دلیل اولدی .

حضرت علی ، ابن شجره نك مکيه عزیمتی خبر آلدقه مکيه اوچ  
بیك آتلو کوندر دیسه ده آنلرک وصولنه قدر قافله شام عودت ایتش اولدیغندن  
ایکی عسکر بر بریله بولشه مدیلر .

او ائنده معاویه طرفندن بلاد جزیره اوزرینه سوق اولنان بر مفرزه  
( هیت ) موقعنده امیر المؤمنین طرفندن محافظ بولنان ( کَمیل ) ایله  
لدی المحاربه منهنماً عودت ایلدی . ( نصیبن ) بلده سنده محافظ بولنان  
( شیب بن عامر ) ایسه ( کَمیل ) ه امداد ایچون کلوب شاملیلرک منهنماً  
عودت ایلدکلرینی کورنجه آرقه لرینه دوشدی ، بعلبکه قدر کلوب کیتدی  
وبولدی حیواناتی سوروب کوتوردی .

( سماوه ) نك ویرکوسنی تحصیل ایچون معاویه طرفندن مأمور  
کوندرلدیکی کبی حضرت علی طرفندن دخی مأمورلر کوندرلدی .  
سماوه ملاقات ومقاتله ایتدکلرنده حضرت علینک مأمورلری مغلوب  
اولدی .

( دومة الجندل ) اهالیسی بر طرفه تابع اولیوب بی طرف قالدیلر  
کیدن مأمور ، آنلری معاویه بیعت ایتدکلر ایستدی ، قبول ایتدیلر .  
حضرت علی طرفندن کیدن مأموره دخی « اهل اسلام ، بر خلیفه اوزرینه  
اجتماع و اتفاق ایلدکجه بر طرفه بیعت ایتمیز ، دیو جواب ویردیلر .  
( حارث بن مرة العبدي ) بوسنه حضرت علیدن اذن آلوب کواکلو



اوله رق (سند) ه کیتدی ، غزا ایتدی ، پک چوق اموال غنائم آلدی .  
ایکی سنه قدر اوراده غزا ایله مشغول اولدی .

### بعضی رفیات

(عقبه) ده ایمان ایدن انصار کرامدن (ابومسعود) رضی الله عنه  
علی روایه بوسنه وفات ایلشدر .  
شاعر مشهور و مداح رسول اولان (حسان بن ثابت) رضی الله عنه  
دخی بوسنه یوز یکر می یاشنده ایکن مدینه وفات ایلدی . غایت قورقراق  
بر ذات اولدیغندن غزوات نبویه ده بولنه مامشدر .

### وقایع سنه ۴۰

اصحاب بدردن (حارث بن حُزیمه الانصاری) رضی الله عنه بوسنه وفات  
ایلشدر .  
(خوات بن جیر الانصاری) رضی الله عنه دخی بوسنه مدینه ده وفات  
ایلشدر .

رسول الله صلی الله علیه وسلم حضر تلرینک فارس لرندن ، یعنی سواریلرندن  
ایدی . بدر غزاسنه چیقمشیکن آیاغنه طاش طوقنوب مجروح اولمغله رسول  
اکرم آنی مدینه یه اعاده بیورمش و کندوسنه غنائم بدردن حصه ویرمشدر .  
نقبای انصاردن (ابولبابه بن المنذر) که بدر غزاسنه چیقمشیکن رسول اکرم  
آنی مدینه قائممقامی نصب و تعیین ایله کیرو چویرمش و آ کاده غنسام  
بدردن حصه ویرمش ایدی . او دخی حضرت علینک ایام خلافتنده عازم  
دار بقا اولمشدر .

اصحاب احدثدن و فضلاهی صحابه دن (ری) بلده سنک فاتحی اولان  
(قرظة بن کعب الانصاری) رضی الله عنه دخی حضرت علینک هپ غزالرند .  
برابر بولندقدن صکره کوفه ده عازم دار بقا اولمشدر .

## مبارک

قرق سنه هجريه سی خالانده معاویه ، اوج بیک نفر ایله (بسر بن ارطات) ی جانب حجازه کوندردی . او دخی هان مدینه یه واردی . امیر مدینه اولان ابویوب (انصاری) کوفیه فرار ایتمکه بسر ، بلا مانع و مزاحم مدینه یه یردی . بعده مکیه کیتدی و (ابو موسی الاشعری) قورقوب فرار بتدی . بسر ؛ کرک مدینه ، کرک مکه اهالیسنه جبر ایدرک خواه ناخواه معاویه یه بیعت ایتدردی و آندن یمنه کیتدی . امیر یمن اولان (عبیدالله بن عباس) فرار ایتدی . بسر ، اوراده محب علی اولانلردن برچوق آدم ولدردی .

حضرت علی ، بو حالدن خبردار اولنجه (جاریه بن قدامه) بی ایکی یك و (وهب بن مسعود) ی كذلك ایکی بیک نفر ایله جانب یمنه کوندردی . جاریه (نجران) ه واردی . بنی امیه طرفدارانسدن نیجه کسه لری اولدردی . بسر ، اورادن صاوشدی . جاریه ، آنک آرقه سنه وشدی و آتی تعقیب ایدرک مکیه کلدی . اهل مکهنک امیر المؤمنینه بیعتلریخی بجدید ایتدیردی . بعده مدینه یه کلدی ، اوراده ناسه نماز قیلدرمقده اولان (ابو هریره) قورقوب فرار ایتمکه جاریه «ا کر او، کدی باباسنی بولایدم ، بتل ایدردم» دیدی . هان کوفیه عودت ایلدی . ابوهریره دخی مدینه یه کلوب یمنه ناسه نماز قیلدرمغه باشلادی .

الحاصل علی و معاویه غوغاسیله بلاد اسلامیه کشاکشده قالدی ، ناس بو حالدن شکایت ایدر اولدی . آنک اوزرینه طرفین ییننده برچوق مخبراتدن صکره عراق جهتی امیر المؤمنینک و شام جهتی معاویه نک اولمق و طرفین بربرینک مملکتنه داخل اولماق اوزره بوسنه برمتارکه یاپلدی .

## ابن عباسک استغفاسی

او ائنده بصره امیری (عبدالله بن عباس) بصره قاضیسی (ابوالاسود) ی کوچندر مکله اودخی سعایت یوللو حضرت علی یه عرضه کوندردی . حضرت علی ،

ابن عباسدن استعلام ايتدی . ابن عباس دخی القا اولئان خبرلرک اصل  
اولدیغنه ویت الماله عائد اولان اموالک محافظه سنده قصور ایتدیکنه دار  
جوابنامه یازدی . آنک اوزرینه حضرت علی ، جزیه اموالک محاسبه سی  
ایستدی . ابن عباس آندن کوچندی و « سن ایشکه بشقه سنی کوندر  
دیو جواب یازدی وبصره ولایتی ترک ایله مککه کیتدی .

### سراوات علی المرتضی

خوارجک بقیه السیوفندن ( عبدالرحمن بن ملجم المرادی ) و ( برك بن  
عبدالله التميمي ) و ( عمرو بن بكر السعدی ) حجازده اجتماع وناسك اوغرا دیغ  
مشكلاتی مذاکره ونهروانده مقتول اولان یولداشلرینی تذکر وتأسف  
ایدرك « آنلردن صکره بزم دنیاده نه ایشمزم وار . باری ائمه ضالاتی قتل  
ایله ناسی آنلرک اللرنندن قورتارلم » دیمشله . آنک اوزرینه ، ابن ملجم  
« بن علی یه کافییم » برك « بن ده معاویه یه کافییم » عمرو بن بكر « بن ده  
عمرو بن العاصه کافییم » دیهرك بر کونده اوچنك دخی قتلنه قرار ویرمشله  
و « اولمه وار ، دوغمه یوق ، دیهرك بر زهرلی قلیچ آلوب رمضانك  
یکرمی یدیسنی تعیین ایتمشله وتعهد ایلدکلری جهتلره کیتمشله .

عمرو بن بكر ، مصره واروب رمضانك یکرمی یدنجه کیجه سی عمرو بن  
العاصك مسجده چیقه جنی رده آکا مترصد اولمش . عمرو بن العاص ایسه نامزاج  
اولغله کندوسنك ضابطه مأموری اولان ( خارجه بن حبیبه ) یی امامته  
توکیل ایتمش اولدیغندن خارجه ، ناسه نماز قیلدزمق اوزره جامعه کیدرکن  
( عمرو بن بكر ) آتی اوروب اولدردی . درحال طوتیلوب عمرو بن العاصك  
حضورینه کتورلدکده سن کیمی « قتل ایتدك » دیو ورددی . عمرو بن  
بكر « یا فاسق ! والله سندن بشقه سنی ظن ایتدم » دیمکله عمرو بن العاص  
« سن عمروی مراد ایلش سین . اللهم اراده سی ایسه خارجه ایش » دیوب  
هان آنک قتلنه امر ویردی .

برك دخی او کیجه شامده معاویه نك خروجنه مترصد اولوب معاویه

سباح نمازینی قیلدرمق اوزره جامعہ چیقار ایکن برک ، برقلیچ چالیدی .  
 معاویہ نك او یلوغنه راست کلدی . معاویہ نك حکومتی ایسه ملک وسلطنت  
 لرزنده اولوب درحال یاننده یاور وچاوش مقامنده اولان بکجیلر ، برکی  
 لوتدیلر . برک « بر مزدهم وار . سویلسم فائده سی اولورمی » دیدکده  
 معاویہ « اوت . سویله باقیم » دیمکله « شمدی بنم بر یولداشم ، علی یی قتل  
 یتمشدر » دیدی . معاویہ « نه بیلورسین . بلکه قتل ایده مه مشدر » دیدکده  
 البته قتل ایتمشدر ، زیرا علینک یاننده یاورلر و بکجیلر یوقدر » دیدی .  
 کن کندوسنجه فائده سی اولدی . معاویہ همان آنک قتلنه امر ویردی .  
 ( ساعدی ) نام طیبی جلب ایتدردی . ساعدی ، باقدی که بویاره یی آجان  
 لیج زهرلی ایش . « ایکی صورتدن برینی اختیار ایتلیسین . یا بر تیموری  
 یزدیروب یاره نك اوزرینه قوملی یز ، یا خود سکا بر شربت ایچورملی یم که  
 وزهری آلسون . لکن آندن صکره اولادک اولماز » دیدکده معاویہ « بن  
 آتسه طیانهم . اوغللرم یزید ایله عبدالله بکا یتشور » دیمکله ساعدی ، آکا  
 ر شربت ایچوردی . یاره یی ایولشدردی . لکن آندن صکره معاویہ نك  
 اولادی اولدی .

اما ( ابن ملجم ) که اهل مصر دن ایدی . کوفه یه کلوب خوارجدن  
 اولان یولداشلریله کورشدی ایسه ده آنلره کشف راز ایتدی . فقط  
 نهروانده قوجه سی وقرنداشی قتل اولنش غایت حسنا بر قاری وارایدی .  
 ابن ملجم آنی کورنجه کوکل ویرمش ، تزوجنه رغبت کوسترمش . اودخی  
 امر ازدواجده علینک قتانی شرط ایتمش . ابن ملجم « والله بن بورایه آنحق  
 آنک ایچون کلدیم ، دیدیکک اولسون » دیوب قاری دخی آکا معاونت  
 ایچون کندی اقرباسندن ( وردان ) نامنده برینی قاتمش و ابن ملجم ،  
 بویولده کندوسنه معاونت ایچون ( شیب ) نامنده برینک ذهنی چلمش .  
 اودخی ابن ملجمک یانسه کلش اوچی برلشوب وقت موعوده منتظر  
 اولمشلرکه رمضانک یکریمی یدنجی کیجه سی ایدی . سائر خوارجک بوندن  
 خبرلری یوق ایدی . فقط ( اشعث بن قیس ) که بوسره واقف اولدیعی

سياق خالدن آكلاشيلور . زیرا او كيجه ابن ملجم ، اشعث ايله مصاحبت ايلوب سحر وقتي آنك يانندن آيرلش و صباحين اشعث ، اوغلي تحقيق حال ايجون دارالاماره كوندرمش اولديني مرويدر . هر نه حال ايسه ابن ملجم ، يولداش ايله برابر جامعه وارمشلر و حضرت عليك چيقه جني قبو او كنده طورمشلر .

امير المؤمنين حضرتلري مسجد شريفه كيتمك اوزره بر معتاد مؤذني او كنده ( الصلوة الصلوة يا ايها الناس ) ديهرك واوغلي حسن آرقه سندن يورويهرك سعادخانه سنك قپوسندن چيقار ايكن پوصوده كي خائرك اوچي بردن هجوم ايتديلر . شيبك قليجي قپونك كمرينه طوقوندي . ابن ملجم ايسه « يا علي ! حكم آنجق اللهكدر ، سنك و امحابكك دكلدر » ديو تحكي مي قبول ايتمش اولديغندن طولاي توبيخ ايدرك قليجله حضرت عليك باشنه اوردى . بر آغر ياره آچدى . ( وردان ) و ( شيب ) قاچدى . ناس اوشوب ابن ملجمي طوتديلر .

حضرت علي ، صباح نمازني قيلدرمق اوزره همشيره سي ( ام هاني ) نك اوغلي ( جعده بن هيره ) ني امامته توكيل بيوردى ، اوده مسجد شريفه كيروب ناسه صباح نمازني قيلدردى .

بعده ابن ملجمي ، قوللري باغلو اولديني حالده حضور خليفه يه كتوريلر . حضرت علي « بن سكا احسان ايتدمي » ديو صوردي « اوت ايتدك » ديو جواب ويردى . « يا بو خيانته سبب ندر » ديدكه ابن ملجم « بن بوقليجي قرق كون بيله دم ، آنكه خلقك اك شيرينك قتل اولمسنى اللهدن ديله دم » ده نجبه حضرت علي « كوره يورم كه سن او قليجله قتل اولنه جقسين . بيلورم كه سن خلقك اك شيرلرندن سين » ديو بيوردى .

بعده حضرت علي « بن فوت اولورسم بوني ده قصاصاً قتل ايديكز . اي عبدالمطلب اوغللري ! امير المؤمنين قتل اولندي ديهرك مسلمينك قاتلرينه طالليكز ، بنم ايجون آنجق بنم قاتلم قتل اولنور » ديدى . اوصرمده ( جندب بن عبدالله ) كلدى « يا امير المؤمنين ! الله بزه

سنگ اکسکلکچی کو سترمسون . اما شاید سکا بر حال اولورسه بز اوغلك حسنه بيعت ايلرز » دیدی . حضرت علی « بن بو خصوصده سزه نه امر ایدرم ، نه ده نهی ایدرم . سز ایشکزی ده اعلی بیلورسکز » دهرک سوزی کسدردی .

بعده حضرت علی ، اوغللرینه وصیت ایلدی . شویله که : حسن و حسین رضی الله عنهما به خطاباً « سزه تقوی ایله وصیت ایلرم . دنیایه رغبت ایلیکز ، ضایعکز ایچون آغلامیکز ، دائماً طوغری سویلیکز ، کتاب الله ایله عمل ایلیکز . ظالمه قارشو خصیم ومظلومه معین اولیکز ، احکام شرعیه ده لوم لائمدن احتراز ایتمیکز » دیدکن صکره ( محمد بن حنیفه ) نك یوزینه باقدی « برادرلریکه ایتدیکم وصیتی بلله دکمی ، سکا ده وصیت او وجهله در . برده سکا وصیت ایلرم که برادرلریکه تعظیم واحترام ایت و آنلرک رأینه توفیق حرکت ایله » دیدی ، آنی حسن رضی الله عنهما به امانت وتوصیه ایتدی وبعده حسن رضی الله عنه حضرتلرینه صورت مخصوصده بشقهجه وصیت ایلدی .

امیر المؤمنین وخلیفه سید المرسلین علی المرتضی رضی الله عنه وارضاه حضرتلری او وجهله وصیتلرینی ایفا ایتدکن صکره دنیا کلامی سویلیدی کلمه توحید ایله ختم کلام ایلدی . بی وفا دنیادن کچدی . آلتش اوچ یاشنده و آق صقاللی اولدیغی حالده دارعقبایه کوچدی . نمازینی اوغلی حسن رضی الله عنه قیلدی . مدت خلافتی ، بش سنه دن اوچ آی ناقصدر . ابن ملجم ، حضرت حسنک حضورینه کتورلدکده « بن علی ومعاویه بی قتل ایتک اوزره کعبه ده الله ایله عهد ایتشیدم . بکا میدان ویر ، کیدوب معاویه بی ده قتل ایدیم . صاغ قالورسم کلوب کنیدی سکا تسلیم ایدرم » دیدی ایسه ده مفید اولیوب حضرت حسن آنی قصاصاً قتل ایتدی .

شیعیلرک بر قسمی ، حضرت علینک قیامتدن اول دیریه جکنه ذاهب اولمغله حضرت حسندن سؤال اولندقدده بو اعتقادک باطل اولدیغی بیان مقامنده « اوله اولسه بز آنک میراثی تقسیم ایتزدک » دیو بیورمشدر .



يوقاروده بيان اولنديغى اوزره حضرت على ، عراقه كيتمك اوزره  
مدينه دن چيقار ايكن بر آياغى اوزنكده اولديغى حالده ( عبدالله بن سلام )  
رضي الله عنه كلوب « يا امير المؤمنين ! عراقه كيتمه ، قورقارم اوراده سكا  
قليجك اوجى طوقونور » ديدكده حضرت على « آنى بكا رسول الله صلى الله  
عليه وسلم خبر وIRMشيدى » ديهرك بنوب كيتمشيدى .

في الواقع رسول اكرم صلى الله عليه وسلم حضرتلرى ، عليك قاتلى  
ناسك ان شقيسى اولديغى اخبار ايتمشيدى .

اشبورق سنه سى رمضان شريفى حلول ايتدكده طعامدن كسيلىدى ،  
وقت افطارده اوج لقمه دن زياده يمز اولدى ، امرالتهيك آچ ايكن وروديني  
آرزو ايدرم ، دير ايدى . نه ايت بر ايكي كونلك عمرى قالمش اولديغى  
خبر ويردى . رمضان شريفك يكرمى يدنجي كيجه سى عالم منامده رسول الله  
صلى الله عليه وسلم حضرتلرينى كوروب امتدن شكايت ايلدكده ( آنلرك  
عليه دعا ايت ) ديو بيورمغله اودخى « يارب ! بكا آنلردن خيرلوسنى وير ،  
آنلرمده بدن قناسى وير » ديو دعا ايلش وهان اويانوب روياسنى اوغلى  
حسن رضي الله عنه حضرتلرينه سويلدى . حال بوكه وقت صبح اولمغله  
مؤذن اذان اوقودى . حضرت على ، مسجد شريفه متوجه اولدقده  
حوليدمه كي اوردكلر آنك اوزرينه چاغرشمغله ياننده كيلر ، آنلرى  
قوغمق ايستدكلرند « طوقونميكنز . آنلر نوايحدر » ديو بيورمش .  
قپودن چيقاركن بروجه بالا ناسك ان شقيسى اولان ابن ملجم قليجله آنى  
اورمش ايدى .

( نوايح ) ميتك خانه سنده وجنازه آرقه سنده ميتك محاسنى ياد و فرياد  
ايله بكا ايدن قاريلردر . عربستانده بويله آغلامق ايجون اجرتله طوتيلور  
قاريلر واردر .

بو حاللردن آكلاشيلوركه حضرت على اوله جكي ييل و آى وكونى  
بيدورمش ديو ( اسدالغابه ) نام كتاب مستطابده مصر حدر .

حضرت علینک بومثللو کراماتی پک چوقدر . فضائلنه دائر یوقار و لورده  
نیجه مناقبی سبق ایتمکله تکراره حاجت یوقدر . فقط بومقامده اجمالاً ترجمه  
احوالنک بیانی مناسب کورلشددر .

## حضرت علینک اجمال احوالی

امیر المؤمنین علی المرتضی رضی الله عنه وارضاه حضرتلری ، بابادن آنادن  
هاشمیدر . زیرا پدری ( ابوطالب بن عبدالمطلب بن هاشم ) در . والده سی  
دخی ( فاطمه بنت اسد بن هاشم ) در .

رسول الله صلی الله علیه وسلم حضرتلری بابادن و آنادن یتیم قالوب ابتدا  
جدی عبدالمطلب و بعده عمی ابوطالبک یاننده بیومش اولدینی کچی کندوسی  
دخی علی بن ابی طالبی کوچوک ایکن خانه سعادتنه آلوب بیومش و تربیه  
ایتمشدر .

رسول اکرمه نبوت کلدکده ابتدا ( خدیجه الکبری ) رضی الله عنها  
حضرتلری ایمان ایدوب آنکله برابر نماز قیلمش و بر کون صکره حضرت  
علی ، مراهق اولدینی حالدده اسلام ایله مشرف اولمشدر . بوجهتله حضرت  
علی ، مؤمن اولدینی حالدده سنّ بلوغه واصل اوله رق اصلاً بتلره سجده  
ایتمه مشدر . کرم الله وجهه .

اسمراللون ، بیوک صقاللو ، بیوک کوزلو ، کولر یوزلو ، اورته بویلو  
ایکی اوموزلرینک آده سی کنیش ، بازولری و بالدرلری قالین ، مفصللری  
اینجه ، آرسلان کچی نیجه لری قوی و غایت شجیع و الحاصل انسان کوزلی  
واللهک بر آرسلانی اولوب هر کیمکله جنک ایتدیه غالب کلشددر .  
مع هذا حلیم و سلیم و متواضع و سخی و کریم و زاهد و عادل بر ذات جلیل القدر  
بی معادل ایدی .

بدرده و سائر غزوات نبویه ده بولنوب بیوک ایشلر کورمش  
و فوق العاده مردلک و یارارلق کوسترمشدر . فقط ( تبوک ) غزاسنده

رسول اکرم آنی مدینه ده قائم مقام بر اقله او غزاده بولنه مامشدر .  
 حقنه نیچه آیات کریمه نازل و نیچه احادیث شریفه وارد اولمشدر . ( احمد بن  
 حنبل ) رحمه الله علیه حضرت تری دیرکه : علی حقنه وارد اولان اثرلر  
 اصحاب کرامدن هیچ برینک حقنه وارد اولمامشدر .

صفینه کیدرکن دوشورمش اولدینی زرهنی ، عودتنده بر نصرانی یدنده  
 بولوب آنی کوفه قاضی ( شریح ) رحمه الله علیه حضورینه کوتوردی .  
 « بوزره بندر » دیو دعوی ایتدی و نصرانی انکار ایتمکه قاضی شریح  
 حضرت تری ، شاهد ایستدی . حضرت علینک شاهدلری اوغلی ( حسن ) ایله  
 آزادلوسی ( قبر ) ایدی . حفید حضرت پیغمبرینک یالان یره شهادت  
 ایلیه جکی جمله غنده مجزوم ایسه ده خصم جاحده قارشو اولادک باباسی لهنه  
 شهادتی مقبول اولدیغندن قاضی شریح حضرت حسنک یرینه باشقه  
 شاهد ایستدی و حضرت علینک بشقه شاهی اولدیغندن شریح ، آنی  
 معارضه دن منع ایتدی . حضرت علی ، بوندن اصلا متأثر اولیوب  
 کوله یوردی . نصرانی ایسه بوحاله حیران اوله رق زرهی آلوب براز  
 کیتدکن صکره طوردی ، دوشوندی ، کیرودوندی . « بوا حکام آنجق  
 انبیا احکامیدر » دیرک اسلام ایله مشرف اولدی و زرهی حضرت علینک  
 صفینه کیدرکن دوشورمش اولدینی اقرار ایله کیرو ویردی . لکن  
 حضرت علی ، زرهی آکا باغشادی ، برده آت احسان ایلدی .

کندوسی نه یر ونه کیر ایسه خدمتکار و کوله لرینه دخی آنی یدیرر  
 و آنی کیدیرر ایدی . ( ابوالنوار ) نام بزازدن مرویدر . دیمش که : برکون  
 علی ، کوله سیله برابر کلدی . ایکی کوملک صاتون آلدی . کوله سینه  
 « بکندیکنی آل » دیو امر ایتدی . کوله بریسنی آلدی . دیکرینی دخی علی  
 کیوب کیتدی .

رسول اکرم صلی الله علیه وسلم حضرت تری ، اک سوکیلی کریمه سی  
 اولان ( فاطمة الزهرا ) رضی الله عنها حضرت لرینی حضرت علی به ویردی .  
 اندن سبطین مکرمین ، یعنی ( حسن ) و ( حسین ) ایله ( محسن ) نام

اوغللری و ( زینب کبری ) و ( امّ کلثوم کبری ) نام کریمه لری طوغدی .  
و ( محسن ) چکوک ایکن فوت اولدی .

( زینب کبری ) ( عبدالله بن جعفر طیار ) ه واردی و آندن ( عون )  
و ( علی ) و ( عباس ) ایله ( امّ کلثوم ) ی طوغوردی .

امّ کلثوم کبری ، حضرت پیغمبرک وفاتندن مقدّمه دنیا به کلمشیدی  
حضرت عمر خلیفه ایکن آتی تزوجه طالب اولدی . حضرت علی « آلتی »  
یدی یاشنده در ، دیو اعتذار ایتدیسده حضرت عمر « مرام » آنجق خاندان  
نبوّته انتسابدر ، دهرک الحاح ایتمکله جزء خامسده بیان اولدینی اوزره  
حضرت عمره تزویج اولندی و آندن ( رقیّه ) نام کریمه سیله ( زید ) نام  
اوغلی تولد ایلدی و حضرت عمرک وفاتندن صکره ( محمد بن جعفر طیار ) ه  
واروب آندن دخی ( جاریه ) نام کریمه سی تولد ایلشدر .

حضرت علی ، حضرت فاطمه نك اوزرینه باشقه خاتون آلمدی و تسری  
ایتمدی . اما آنک وفاتندن صکره بشقه خاتونلر آلوب و جاریه لر طوتوب  
آنلردن دیگر اولادی اولمشدر . اسامیسی بوجه آتی تحریر اولنور .

ذکور :

محمد الاکبر ، عباس ، عثمان ، جعفر ، عبدالله ، محمد الاوسط ، یحیی ، عون ،  
عمر الاکبر ، محمد الاصغر ، عبیدالله ، ابوبکر .

اناث :

رقیه ، ام الحسن ، رمله الکبری ، ام هانی ، میمونه ، زینب الصغری ، رمله الصغری ،  
ام کلثوم الصغری ، فاطمه ، ام الکرام ، ام سلمه ، ام جعفر ، جانه ، امامه ، نفیسه  
( محمد الاکبر ) ک والده سی ( بنی حنیفه ) قبیله سندن اولمغله ( محمد بن  
الحنیفه ) دیو معروف اولمشدر . غایت بهادر و سخی و فصیح برذات عالیقدر  
ایدی . حضرت علینک نسل و ذرتی حسن و حسین و محمد بن حنیفه و عباس  
و عمر دن منتشر اولوب سائر اولادینک نسلی منقرض اولمشدر .

موضوع

رسول اکرم صلی الله علیه وسلم حضرت تلمیذ ، حضرت علی به ( سن کعبه منزله سنده سین . سکا کلورلر ، سن کیتمز سین . بوقوم ، اکر سکا کلوبده ایشی تسلیم ایدرلر سه قبول ایت . کلزلر سه سن ایلرو وارمه ) دیو بیورمش ، اودخی بوا مرشریفه امتثال ایده کلشدر .

شویله که ، حبیب خدا ، عازم دار بقا اولدقده یوقاروده بر تفصیل بیان اولندیغی اوزره انصار کرام ، ایچلرندن برینی خلافته انتخاب ایتک ایستدیلر . مهاجرین ایسه « خلیفه نك قرشی اولمسی لازمدر » دیدیلر ودر حال ابوبکر الصدیقه بیعت اولنه رق مهاجرین ایله انصار آره سنده کی اختلاف برطرف اولدی . لکن عمّ رسول اولان ( عباس بن عبدالمطلب ) و ( زبیر بن العوّام ) کبی بعض اصحاب کزین ، خلیفه نك هاشمی اولمسی رأینده بولنه رق علی بن ابی طالبه بیعت ایلک ایستدیلر . بنی امیه نك رئیس و معاویه نك باباسی اولان ابوسفیان دخی بورأیده ایدی .

حضرت علی ایسه ، اصحاب کرام آره سنه تفرقه دوشمسون دیو آنلرک بیعتلرینی قبول ایتیموب کندوسی حضرت صدّیقه بیعت ایلکله آنلردخی بیعت ایلدیلر . بوجهتله هب افکار اسلامیه ، برقطه ده مجتمع اولدی و خلافت اسلامیه قوت بولدی .

ابوبکر الصدیق حضرت تلمیذ ، حضرت عمری ولی عهد ایلدکه ابتدا حضرت علی قبول و بیعت ایلدی و حضرت عمر ، مصاب اولدقده خلافتی شورایه حواله ایتدی . اصحاب شورادن بری ده حضرت علی ایدی . لدی المشاوره خلافت ، علی و عثمان آره سنده دائر اولوب ( عبدالرحمن بن عوف ) حکم اوله رق حضرت عثمانی ترجیح ایلدی . حضرت علی آکا بیعتده دخی تردد ایتمه دی .

حضرت عثمان زماننده واقع اولان فتوحات جسیمه ایله ممالک اسلامیه وسعت بولدی ، واردات میریه چوغالدی . عرب زنکین اولدی ، حب دنیایه

طالدى و كبار بنى اميه ، مناصبى استيلا و كندولرينه مأكل و مالكانه اتخاذ ايدوب اسلامده سابقهسى اولان اكابر اصحاب كيرو قالدى . بوايسه ناسه على الخصوص هاشميره كران كلدى . خلق بوندن طولايي كوچنوب حضرت عثمان عليهنده سوز سويلمكه باشلاديلر . او ائساد شيعه گروهى ظهور ايله ناسى عصيان و اختلاله تشويق ايتديلر . آنك اوزرينه مصر و بصره و كوفه دن برر فرقه عاصيه خروج ايله مدينه يه كلوب عثمانى محاصره و نهايت شهيد ايلديلر و حضرت على يه بيعت ايلك ايتديلر ايسه ده قبول ايتدى . لكن اهل مدينه نك الحاح و ابراميله اهل بدر طولانوب آنى خلافته انتخاب ايتمكه اودخى قبوله مجبور اولدى .

الحاصل حضرت على ، زوربالرك بيعتنه اعتبار ايتيوب اسلامى كى آنجق اصحاب حل و عقد اولان اهل مدينه نك و على الخصوص اصحاب ، بدرك انتخابيله بحق خليفه اولدى . و شامدن ماعدا ايالات اهاليسى كندوسنه بيعت ايلدى . فقط مدينه ده مجتمع اولان زوربالرى طاغتمغه وقت بوله ميوب نه طرفه توجه ايتديسه چاره سز آنلرده اردوى هايونده سائر ناس ايله مخلوط اوله رق قالديلر . شام و اليسى معاويه ، بيعتن امتناع ايتمكه شام اوزرينه حركت اولنه جنى صرمده دم عثمانى طلب و دعوى مسئلهسى ميدانه چيقره رق ( وقعه جمل ) ظهوره كلدى . حضرت على آنده مظفر اولدقدن صكره صفين وقوعاى ظهور ايتدى . حضرت على آنده دخی غالب كلشيكن ( تحكيم مسئلهسى ) ميدانه چيقدى و اردوى هايونده اختلاف آرا وقوع بولدى . گروه مخالفينك جبر و زورى ايله حضرت على تحكيمنامه يي امضايه مجبور اولدى .

آنك اوزرينه خوارج طائفهسى ظهور ايله تحكيمك فسخ و ابطالانى تكليف ايتديلر . حضرت على ، عهده وفا امرنده ثبات كوستردى . امر تحكيم ايسه موجب تأسف اوله حق برنتيجه ويردى ، نفوذ خلافته ضعف كتوردى . شام اهاليسى معاويه يه بيعت ايلدى . ملت اسلاميه ايكيه منقسم اولدى . بعده عمرو بن العاص مصرى استيلا و شامه الحاق ايتمكه معاويه نك



حکومتی بر مرتبه دها قوت بولدی . بروطرفده ایسه تفرق و تشتت افکار وقوعه کلدی . شویله که : شیعه طائفه سی ، حضرت علی یه محبتده افراط ایله یالکز حضرت عثمانک دکل ، حضرت صدیق وفاروقک بیهل خلافتلرینه اعتراض ایله ضالته قالدیلر . خوارج طائفه سی دخی تحکیمه موافقت اولندیغدن طولایی حضرت علی یه بغض و عداوت ایلمکله هلاک اولدیلر .

رسول اکرم صلی الله علیه وسلم حضرتلری ، حضرت علی یه خطاباً (عیسایه یهودیلر ، بغض و عداوتله و نصاری فرط محبتله ضالته دوشدکلری کبی سنک ایچون دخی غلو محبت و بغض و عداوت ایله ایکی فرقه هلاک اولور ) دیو بیورمش اولدینی مرویدر . ایشته بوحدیث شریفک معناسی دها اوزمان ظاهر اولمشیدی .

ابن عساکرک روایتیه کوره ( سَوید بن عَقَلَه ) دیمش که : برکون شیعه دن برقاچ کشینک مجلسنه کیتدم . ابوبکر و عمر علیهنده سوز سویلورلردی . هان علینک یاننه واروب « یا امیر المؤمنین ! سنک اصحابکدن برقاچ کشینک یاننه کیتدم ، ابوبکر و عمر حقارنده ناسزا سوزلر سویلورلردی . آنلرک علناً سویلدکلری شیلر سنک قلبکده مضمهر اولماسه آنلرده بوکا جرأت ایلمزلردی . » دیدیکمده علی ؛ متأثر اولدی ، کوزلری طولدی . هان بکا ایدرک و « اول ایکی بیوک ذات حقنده اضمارکین ایدنلره الله تعالی لغت ایلسون » دیهرک قالدی ، المی طوتدی ، مسجده کیتدی ، منبره چیقدی ، اوتوردی . آق صقالتی طوتوب برکره نظر ایتدی و قالقوب غایت بلیغ و مختصر بر خطبه اوقودی و بیوردی که « نه در اوقومک حال و شانکی که قریشک اولولری و مسلمینک بابالری اولان ایکی ذاتی لسانه آلیورلر . مؤمن تقی اولانلر بوایکی ذاتی سور . بونلره آنحق فاجر و دنی اولانلر بغض ایدر . ایکیسی ده رسول الله صلی الله علیه وسلم حضرتلرینه صدق و وفا ایله یار و همد اولدیلر . رسول الله ایکیسی قدر کیمسه بی سومزدی و آنلرک رأیلری قدر کیمسه نک رأینه اعتبار ایتزدی . رسول الله ایکیسندن ده راضی اولدینی حالدده عالم عقبایه کیتدی و ایکیسی ده مؤمنلر کندولرندن راضی اولدقلری حالدده دار بقایه کیتدیلر .

رسول اکرمک امریله ابوبکر امام اولوب یدی کون مؤمنینه نماز قیلدیردی و رسول اکرمک وفاتنده مؤمنلر ، بالطوع والرضا ابوبکره بیعت ایلدیلر . بنی عبدالمطلبدن آکا ابتدا بیعت ایله بن بن ایدم . کندوسی خلافتی ایستمزدی . بزلردن بریمزک بو ، یوکی یوکلنمسنی آرزو ایدردی . بالله باقیلرک اک خیرلیسی و مرحمتلیسی و اتقاسی و سنأ و اسلامأ اقدمی ایدی . رسول الله صلی الله علیه وسلمک سیرتی اوزره کیتدی . آندن صکره عمر ، ولی الامر اولدقده ناسک بعضیسی خوشنود و بعضیسی ناخوشنود اولدیلر . لکن ناخوشنود اولانلرده صکره خوشنود قالدیلر . اوده حضرت پیغمبرک وصاحبک اثرلینه اقتفا ایتدی . تالله اوده رحیم ایدی . مظلومه نصرت و مرحمت ایلردی . اللهمک امرنده لوم لائمدن خوف و احتراز ایتزدی . جناب حق آنی حق و صدق اوزره نطقه موفق ایتمشیدی . ظن ایدردک که آنک لسانی اوزره بر ملک نطق ایدیور . الله تعالی آنک اسلامیه دین اسلامی عزیز قیلدی و آنکله منافقلرک قلوبنه خوف و خشیت و مؤمنینک قلوبنه میل و محبت و یردی . آنک کبی کیمی بوله بیلورسکیز . الله تعالی بوایکینسک مسلکی اوزره کیتمکه بزلری موفق ایلسون . آنلرک درجه سنه وارمق آنجق آنلرک اثرلینه اقتفا و آنلره محبت ایله اولور . بنی سون ایکیسنی ده سوسون . آنلره بغض ایدن کیمسه بکا بغض ایتمش اولور . بنده او کیمسه دن بری اولورم . آکا اولاکیزکه پیغمبرلردن صکره بوامتک اک خیرلوسی ابوبکر و عمردر . بوندن صکره آنلری لسانه آلان اولورسه حقنده مفتری جزاسی اجرا ایدرم . استغفر الله لی ولکم . حضرت علی ، خوارجی قهر و تدمیر ایتدیکی کبی شیعیلری دخی بوجه بالا تعذیر و تکدیر ایتمش و بعضیلر بنی اعدام و رئیسلری اولان ( عبدالله بن سبا ) یی شهرمداینه نفی و تغریب ایلمش ایسه ده آنلر ، ینه تصحیح مذهب ایلدیلر و افراط اوزره سودکاری علینک نصیحتی آصلا دکه مدیلر .

خوارج ایله شیعیلر ، یکدیگری تکفیر ایدوب اهل سنت و جماعت دخی

اردهه متحیر قالدیلر . معاویه ایسه بو حاللردن استفاده ایله کیتدجه قوتی تزیید و کندیته تابع اولمیان ایالاتی تهدید ایلکده ایدی .  
 حضرت علی ، کوفه رجائی سفره دعوت و تشویق ایتدجه آنرلیت و لعل ایله امرار ایام ایلکده اولدقلری حالدہ انجامنک و خیم اوله جنی معلوم اولدیغنه منی اهل عراقدن قرق بیك کشی اولوم اوزرینه حضرت علی یه بیعت ایلکده اودخی شام سفرینه حاضر لانتقمده ایکن بروجہ بالا بقیۀ خوارجدن اولان خائن ( ابن ملجم ) آتی شهید ایلشدر .

### خلافت حسن

حضرت علی، شهید اولدقدہ بروجہ بالا کندوسنه اولوم اوزرینه بیعت ایلش اولان قرق بیك کشی، اوغلی (حسن) رضی الله عنه حضرت لرینه بیعت ایلدیلر . ابتدا بیعت ایلین ( قیس بن سعد الانصاری ) رضی الله عنهما ایدی که « الکی اوزات . کتاب الله و سنت رسول الله اوزرینه و ملحدین ایله مقاتله ایتنک اوزره سکا بیعت ایلیم » دیدکده حضرت حسن، کتاب و سنت اوزرینه بیعت آلدی و « بوایکسی هر شرطی جامعدر » دیدی . بعده سائر ناس دخی بیعت ایلدجه « بکا اطاعت ایتنک و مصالح اولدیغ کیمسه ایله مصالح و محارب اولدیغ کیمسه ایله محارب اولمق اوزره » دیرک بیعت آلدی . بعده ایران و مکہ و مدینه و حجاز و یمن اهالیسی و الحاصل حضرت علی یه بیعت ایلش اولانلر چندماه ظرفده هپ اوغلی حضرت حسنه بیعت ایلدیلر . یالکز شام و مصر ایلتلری خارج قالدی .

چونکه بالاده بیان اولندی اوزره حکملرک اجتماع وعودتلرنده شام اهالیسی معاویه یه بیعت ایلوب آکا ( امیر الشام ) دیرلردی . مؤخرأ مصر دخی شامه الحاق اولندی . بو کره حضرت علینک قتل اولندی خبری شامه واصل اولدقدہ اهل شام ، معاویه یه بیعتلرینی تجدید ایلدی . و کندوسنه ( امیر المؤمنین ) دینلور اولدی . بو وجهله ایکی خلیفه نک اجتماعی ایسه بر محاربه وقوعنه علامت ایدی .

## بعضه رفات

کوفه رجالدن مشهور ( اشعث بن القیس الکندی ) رضی الله عنه . بوائنده فات ایلدی . هجرت نبویه نك اونجی سنه سنده یمندن آلتمش راكب ايله مدینه منوره یه کله رك اسلام ايله مشرف اولمشیدی . حضرت عثمان آنی ( آذربایجان ) امارتسنده استخدام ایلدی . بعده صفینده حضرت علی ايله برابر بولندی و حضرت علی بی قبول تحکیمه مجبور ایدن رؤسادن اولدیغی حالده صکره تحکیمک فسخته قیام ایدن کروه خوارجه قارشیدی و بو کره حضرت حسنه بیعت ایلدی و چوق کچمیوب فوت اولدی . نمازینی حضرت حسن قیلدی . کوفه رجالدنك ا کابردن ایدی . قیزی ( جعدّه ) حضرت حسنک زوجه سی ایدی .

رجال شامک ا کابردن اولوب معاویه طرفدن امیر حمص اولان و بالاده بیان اولندیغی اوزره اهل شامی حضرت علی علیهنه تحریک و تشویق ایدن ( شرحیل بن السمط الکندی ) دخی بوائنده فوت اولشدر .

## وقایع سنه ۴۲

بروجه بالا حضرت علی شهید اولنجه میدان امویلره قالدی و معاویه خلافتی کندوسنه مقرر بیلدی و ( امیر المؤمنین ) عنواتی آلدی .

حال بوکه کوفه ده حفید حضرت پیغمبری اولان حسن بن علی حضرت لرینه بیعت اولنمغله معاویه نك آرزوسنه سدّ ممانعت چکلمش اولدی .

بناء علی ذلک حضرت حسنک خلافتی هنوز کرکی کبی استقرار بولدن معاویه آنی بیعتنه مجبور ایتمک اوزره بر بیوک اردو ايله کوفه اوزرینه یوریدی .

آ کا مقابل حضرت حسن دخی قرق بیک عراق عسکريله کوفه دن چیقدی و مقدمه الجیش اولمق اوزره اون ایکی بیک عسکرله ( قیس بن سعد ) ی ایلری کوندردی .

لكن اهل عراق ايجنه شقاق ونفاق دوشـمـش ايدو كـنـدن حضرت  
حسنك اردوسنده انضباط وانتظام يوق ایدی . بناءً عليه « قيس بن سعد  
قتل اولمش » دیو بر یالان سوز شایع اولمغه ناسه دهشت ویردی . اردو  
خالق بر برینه کیردی . بر طاقم سرسریلر ، بارگاه خلافت هجوم ایله حضرت  
حسنك اموال و اشیاسنی یغما ایلدیلر و بو قارغشه لقمه کندوسنی دخی  
اویلوغندن یاره لدیلر .

حضرت حسن ، ذاتاً قان دوکمی سوی ایکن عسکرك بویله یولسز  
حرکتی کورنجه محاربه دن بتون بتون نفرت ایلدی و بویله رابطه سز عسکرله  
حربه کیرشمکدن بر نتیجه حسنه حاصل اوله میه جغنی کرکی کبی آکلادی ،  
چونکه عربك اسکی ساده دللی قالمیوب بینلرنده اغراض دنیویه چوغالمش  
ودرلو اختلافلر پیدا اولمش و اولکی کبی یالکیز خلیفه نك امریله ناسك  
ضبط وربطی قابل اولمیوب معاویه کبی بر حکمدار قاهرک وجودینه لزوم  
کورلمش ایدی .

برده رسول الله صلی الله علیه وسلم حضرتلری ( بندن صکره خلافت  
اوتوز سنه در . صکره ملک و سلطنت اولور ) دیو بیورمش اولدیغنی  
رسول اکرمك آزادلولرندن ( سفینه ) رضی الله عنه روایت ایلشیدی .  
روش حال وزمان دخی بو حدیث شریفك مفادینه موافق کورنمشدرکه  
خلفای اربعه نك مدت خلافتلری یکریمی طقوز بوچق سنه اولوب حضرت  
حسنك آلتی آی قدر مدت خلافتیله اوتوز سنه یه بالغ اولمشیدی .  
خلافت نبویه ، بر ریاست عامه دینیه و دنیویه درکه محضا کمال عدالت ایله  
عبادالله خدمت وعین عبادتدر . ملک و سلطنت ایسه قوه قاهره ایله ناس  
اوزرینه اجرای نفوذ و حکومتدر .

حضرت حسن ، حقایق احوالی کوزجله مطالعه و موازنه ایله نیجه  
بیک دلاوران اسلامك قانی دوکمدکن ایسه خلافتدن استعفا ایتکی ترجیح  
بیوردی .

دیوتی تأدیه ایچون کوفه خزینه سنده موجود اولان بش میلیون

درهم کند و سینه ترك اولمق و اداره سینه كافي واردات تخصیص قیلمق كبی بعض شروط ایله حضرت حسن خلافتدن كف یدایلیه جگنه دائر معاویهیه مکتوب کوندردی .

برادری حضرت ( حسین ) رضی الله عنه ایله عمزاده سی ( عبدالله بن جعفر ) رضی الله عنهما بو حاله واقف اولنجه اعتراض ایتدی لر ایسه ده حضرت حسن « بن حقایق احوالی ده اعلی بیلورم » دیه رك عزمنده ثبات کوستردی . معاویه ایسه امارتده مستقل قالمق ایچون هر درلو شروطی جانسه منت بیلدی کندن هر شرطه راضی اوله جغی حضرت حسنه بیلدردی . بناءً علی ذلک حضرت حسن میانه ده مقرر اولان شروط ایله خلافتدن استعفا ایتدی و معاویه کوفهیه کیروب ناس آکا بیعت ایلدی .

حضرت حسن قالمقوب مدینهیه کیتدی و بو صورتله بر معجزه نبویه ظهور ایتدی .

شویله که : حضرت حسن کوچوك ایکن رسول الله صلی الله علیه و سلم حضرتلری اكا اشارت ایلهرك ( بو او غلم سیددر . اومارم که آنسکه جناب حق ایکی جماعت اسلامیه نك آره سنی اصلاح ایلیه ) دیو بیورمشیدی .

حضرت حسن ، اهل یتي و اتباعی ایله کوفه دن حیقار ایکن بتون اهالی آغلادی . حضرت حسنه « نیچون بویله ایتدك » ده نیلده که « دنیادن استکراه ایتدم و کوردم که هر کیم اهل کوفهیه اعتماد ایلر ایسه مغلوب اولور . زیرا بر رأی و آرزوده یکدیگره موافقتلری یوق . بابام آنرك یوزندن بیوك غائله ره اوغرادی . عجا بنندن صکره کیملر ایله اویوشه جقلمر . اكا ابتدا خراب اوله جق بلده کوفه شهریدر » بیوردی .

فی الواقع کوفه شهری اووقت مقرر خلافت و بعده بر مدت دخی مرکز علم و معرفت اولمش ایکن چوق کچمیوب خرابه یوز طومش و زمانه آنی اوله خراب ایتمش درکه شمعی یرنده یلار اسر .

بروجه بالا حضرت حسن ، معاویه ایله ایله عقد مصالحه ایتدکه کیفیتي



قیس بن سعدہ اشعار بیورمش و آنک ده معاویہ بیعت ایلمسی لزومنی بیلدیرمش  
ایدی .

قیس ایسه دهاتدن وهم بهادر، هم مدبر ذواتدن اولوب برچوق علویلی  
باشنه بریکدرمش و جنکه مهیا اوله رق معاویہ اطاعتدن امتناع کوسترم  
ایدی .

بونک اوزرینه معاویہ ، قیسی بیعتہ دعوت ایلدکده قیس مال ،  
و منفعت قیدنده اولیوب آنجق علویلرک ایام فتنه ده ایقاع ایلمش اولدق  
قتل و نهب کبی افعالدن طولای کیدولری مؤاخذه اولنماق والارنده کی اموال  
آلنماق شرطلرینی درمیان ایتدی .

عمرو بن العاص ، قیسک اوزرینه سوق عسکراولنسی رأینده بولندیسده  
معاویہ آنک رأینہ التفات ایلیوب همان قیسک درمیان ایتدیکی شرطلری قبول  
وقیس دخی معیتده کی علویلر ایله برابر آکا بیعت ایلمکله بوغانلده بتدی .  
بعده سائر اهل عراق دخی بیعت ایلمکله معاویہ امارتده استقرار  
بولدی . و هرکس بر خلیفه یه تابع اولمغله بوسنه یه ( سنه جماعت ) دنیلدی .  
و عشره مبشره دن فاتح عراق اولان ( ابو اسحق ) یعنی ( سعد بن ابی  
وقاص ) رضی الله عنه حضرتلرینک تبریکله امر بیعت تمام اولدی .

شویله که : سعد رضی الله عنه حضرتلری ، معاویہ نک حضورینه  
کلدی ( السلام علیک ایها الملك ) دیدی و معاویہ کوله رک « یا ابر المؤمنین  
دیسه ک اولمازمی یا اسحق » دیدکده سعد حضرتلری « صحیحاً سن بونی  
ممنون اوله رقی دیورسین . والله بن سنک منصبکه انتخاب اولنسم ممنون اولم »  
دیو جواب و یردی .

معاویہ ، حلیم و حول و مدبر برذات ایدی . مستجاب الدعوه اولان  
برذاتک تبریکی ایسه کندوسنجه موجب شرف و مباهاات ایدی . بناء علیه  
حضرت سعدک تعریضنه قارشو لطف ایله معامله ایدرک روی التفات  
کوستردی .

فی الواقع حضرت حسنک امر خطیر خلافتی کندوسنه تسلیم ایتمیله

معاویه خلیفه اولش و امیرالمؤمنین عنواتی آلمش ایسه ده آنک خلافتیه خلفاء راشدینک خلافتلری آره سنده بیوک فرق وار ایدی .

زیرا خلفای راشدینک خلافته انتخابلری مجرد اصحاب حل و عقدک اجماع و اختیارلری ایله حاصل اولوب امارتلری بر خلافت محضه ایدی . معاویه نك امارتی ایسه عصیت ایله حاصل اولان قهر و غلبه یه مستند و مبتنی اوله رق ملک و سلطنت طرزنده بر حکومت اولوب خلافت آنک ضمننده متحقق ایدی .

معاویه نك مبادی احوالی، بنی و خروج علی الامام دیمک اولدینی حالدہ حضرت حسنک اکا خلافتی تسلیم ایتسی و سعد بن ابی وقاص کبی اکابر امتک بیعت ایلسی آنک حکومتی مشروع برحاله قومشیدی . لکن حکومتی قوه قاهره ایله حصوله کلمش ملک و سلطنت قیلندن اولدینی جهتله سعد بن ابی وقاص حضرتلری آکا ( ای ملک ) دیو خطاب ایلش و کندوسی بویله برامارته انتخاب اولنق ایستمدیکنی سویلش ایدی .

فی الواقع سابقین اولیندن اولان صحابه کزین، علی الخصوص عشره مبشره ، ملک و سلطنت داعیه سندن ایراغ ایدیلر . معاویه ایسه اصحاب کرامدن اولدینی حالدہ بومرتبه یه قوه قاهره سیله کلمشیدی ، لکن زمان بونی ایجاب ایدیوردی . ناس اولکی کبی یالکزر خلیفه نك سوزیله قوللانیله میوب ایجابنه کوره قوه جبریہ اجراسنه حاجت مس ایتمشیدی .

الحاصل ملک و سلطنت دوری کلوب اوزمان ایسه بوایشه معاویه احق واولی ایدی . رضی الله عنه .

اگر معاویه ، وجه مشروح اوزره مصالح امتک اداره سنی درعهده ایتسه عمر و بن العاصک خلافت دعواسنه قیام ایتسی و کبار امویه نك آکا مخالفتله میانده ینه مقاتله لر وقوع بولسی قویاً ملحقوظ ایدی .

بروجه مشروح معاویه ، خلافتی حضرت حسندن تسلیم ایتش و بتون

خلق آکا بیعت ایلش ایکن بقیه خوارج، طرف طرف باش قالدردیلر  
 واوزلرینه سوق اولنان عسا کر شامیه ی پریشان ایتدیلر. آنک اوزرینه  
 معاویه کوفه رؤساسنی طوپلایوب «یا چیقیکز و بو عاصیلری اوروب  
 طاغیدیکز، یاخود بن سزی محو ایدرم» دهرک تهدید ایلدی. کوفه لیلر  
 «زید ایچون عمروه عتاب اولماز» دیه مدیلر وهان چیقوب و خوارجی  
 اوروب پریشان و مضحل ایتدیلر. بو صورتله خوارج غائله سی بر طرف  
 اولدی و معاویه مقامنده مستقل قالدی.

### فصلکده

زمان جاهلیته قبل و عشائر عربک اجتماع و اتفاقی و اختلاف و افتراق  
 مجرد قومیت و عصیت اوزرینه مبتنی ایکن نور نبوت محمدیه، آفاق و انفسی  
 تنویر ایدنجه قلوب انام، انوار اسلام ایله طولدی. اصول و رسوم جاهلیه  
 اونودولدی. (اتحاد عصیت) رینه (اخوت اسلامیه) قائم اولدی.

او زمان هم کسک ذکر و فکری یزدان ایدی. اهل اسلام هب  
 اخوان ایدی. نظر شرعده جمله سی سیان ایدی. فقط اسلامده سابقه  
 و اعمال حسنه و خدمات فائمه بینلرنده مدار فضل و رجحان ایدی. کمال  
 عدالت و تمام فضیلت دوری اوزمان ایدی.

شمس جهانتاب رسالت، افق بقاده غروب ایدنجه آفاق و انفسی، آلاجه  
 قراکلق باصمغه باشلادی. فقط عصرت نبوت قریب اولدیغندن حضرت  
 صدیق و فاروقک ایام خلافتلریله حضرت عثمانک اوائل عهد خلافتی وقت  
 سعادت کبی کچدی.

وقت سعادت اوزادجه قراکلق زیاده لشدی. عالمک طورى دکشدی.  
 ناس ایچنه اختلاف دوشدی. شیعه طائفه سی ظهور ایله بو اختلافی اختلافه  
 منجر قیلدی. فتنه عظاما ظهوریله حضرت عثمانک قانی مصحف شریف  
 اوزرینه دوکولدی.

بعده حضرت علی خلیفه اولوب شفق ابیض کی عالمه بر آیدیناق ویردی . لکن اختلاف بر طرف اولمدقن بشقه شیعیله ضد تام اولان خوارج طائفه سی ظهور ایله اختلاف و اختلالی آرتردی . حضرت علی ، خوارجی قهر و تدمیر ایتدیسه ده نهایت کندوسی دخی بر خارجی یدنده شهید اولدی .

آنک اوزرینه کوفه ده حضرت حسنه بیعت اولندیسه ده شامده دخی داعیه عصیت ایله معاویه بن ابی سفیانہ بیعت اولمش ایدی و دور سلطنت حلول ایتمش اولدیغندن مصالح امتک رؤیت و تمشیقی قوه قاهره یه محتاج اولوب بو یولده اداره مصلحتہ معاویه انسب کورنمش ایدی .

بناءً علی ذلک حضرت حسن ، خلافتدن استعفا ایله مصالح اقی امویلرک رئیس و شام و مصرک امیری اولان معاویه یه تسلیم و تودیع ایلدی .

الحاصل خلافت نبویه ، ابتدا غایت ساده وهر تکلفدن آزاده اوله رق برشعار ارشاد ایچنده مجرد بر ریاست روحانیه کی کورندی . صکره طورینی تبدیل ایدرک قبای سلطنته بوروندی .

ایشته بو صورتله ( دولت امویّه ) ظهور ایلدی و احکام شرعیّه مجرد خلیفه نک بر امریله اجرا اولنور ایکن آندن صکره قوت سلطنت ایله اجرا اولنمغه باشلادی .

مقصد اصلی ایسه احکام شرعیّه نک اجرایی اولدیغندن او زمان موجود اولان اصحاب کرام ، معاویه یه بیعت ایلدی . رضوان الله علیهم اجمعین .

ختم





## جزء ثامن

### مقدمه

اشرف قبائل عرب اولان قبیلهٔ قریش ایچنده ( بنی عبد مناف ) ك  
فضل ورجحانی اولوب سائر بطون قریش آنلك ریاسته معارض اولمازلردی .  
بنی عبد مناف ایچنده دخی ( بنی عبد شمس ) ایله ( بنی هاشم )  
سائرلرندن ممتاز اولوب هپ قریش بوايكي بطنك ریاستنی قبولده تردد  
ایلزدی وبنی عبد شمسك ، بنی هاشمه نسبتله عدد نفوسی دها زیاده اولوب  
غلبه ایسه کثرت ایله اولدیغندن قبل الاسلام ( بنی امیه بن عبد شمس ) ك  
قوت و نفوذی دها زیاده ایدی .

فقط عبدالمطلبك زمزم قویوسنی حفر ایله حجاجی سقی ایتیمی و اخلاق  
حسنه و فضائل ذاتیه صاحبی اولسی بیوك شان و شهرت قازانمسنه باعث  
اولدی . اولادی دخی آنلك نفوذ و حیثیتته وارث اولدی .

متعاقباً امر وحی و نبوت و نزول ملائكه و ظهور خوارق عاده جمله  
ناسه دهشت و حیرت و یردی . اهل اسلام ، شرعاً عادات جاهلیه دن ممنوع  
اولغله غیرت جاهلیه بی ترك ایتدیلر . مشرکین دخی بو انقلابات عظیمه ایله  
مشغول اوله رق موقتاً داعیهٔ عصیبتی اونوتدیلر .

صكره مهاجرت وقوع بولدی و بنی هاشمك اكثری مدینه یه هجرت  
ایلكله مكده میدان ، امویلره قالدی .

مبدأ مظفریت اسلام اولان ( یوم بدر ) ده بنی عبد شمسك ( ربیعہ )  
( و عتبہ ) و ( عقبه ) کی اکبری تلف اولنجه ریاست مكه ( ابوسفیان بن



صخره بن حرب بن امیّه بن عبد شمس ( ده قالدی ابو سفیان رئیس قریش اولدی .

فتح مکه ده ابو سفیان و اوغللری اسلام ایله مشرف اولدیلر، اهل اسلام عندنده دخی حرمت و اعتبار بولدیلر . لکن بالطبع مهاجرین اولینک درجه سندن دون قالدیلر .

کبار بنی امیّه ، بو حالدن ناخوشنود اوله رق حضرت ابی بکره شکایت ایلدیلر . اودخی آنلری مرتدین محاربه لرنده استخدام بیوردی و بر درجه یه قدر کندولرینه شرف و یردی .

بعده عمر الفاروق حضرتلری آنلری دیار شامه آتدی و ابو سفیانک ییوک اوغلی ( یزید ) ی ( دمشق شام ) سنجاغنه امیر ایتدی و یزیدک وفاتنده یرینه برادری ( معاویه ) بی تعیین بیوردی .

حضرت عثمان خلیفه اولدقده دیگر سوریه سنجاقلریخی دخی برر برر بروجه الحاق معاویه یه توجیه ایتدی و آنک شان و اعتبارینی فوق العاده بیوتدی .

بو صورتله معاویه ، بتون سوریه و ملحقاتی و ایسی اولوب کوندن کونه ثروت و اقتداری وسعت و ترقی بولمقده ایدی .

اول او انده زهد و تقوی اصحابی ، اهل دنیا دن یادن آیرلمقده و محب دنیا اولانلر امویلره قائلقمده ایدی . بنی هاشمک امر نبوت ایله مشغول اولوب ده دنیای اللرندن آتدقلری و الله رسولی ایله تقریبی دنیایه بدل اتخاذه ایتدکلی ایامده بنی امیّه نك عهد ریاستلری هنوز ناسک اذهاندن چیقما مش اولدینی جهتله قریش ، آنلرک ریاستنی طانور اولدقلرندن اسلامده استحصال ایتدکلی ریاستلری قبل الفتح اولان ریاستلرینه متصل اولمش وینه داعیه عصبيت میدانه کلشدر .

حضرت علی خلیفه اولدقده معاویه بیعتدن امتناع ایله بی پروا مقاومت قیام ایتدی و اگرچه حضرت علینک دینجه فضلی درکار اولدیغندن و مقام خلافتده بولندیغندن عسکری دها زیاده ایسه ده ربیعه و یمن قبیله لرندن

وقبائل سائر مدد مرکب و متفرق اولوب معاویہ نیک باشندہ کی جمعیتلر ایسہ  
حین فتح دنیرو قریشدن حدود و ثغوره کلوب یرلشمش اولان شام عسکری  
ایدی که ( بنی مضر ) ک جمع شوکت و صولتی اولمغله معاویہ نیک عسکری ده  
مضبوط و عصیبتجه ده قوی ایدی .

معاویہ ، صفین محاربه لرنده حربی قازانه مدیسه ده کندوسنه موافق بر متارکه  
ایله ایشک ایچندن صیریلوب چیقدی و عمرو بن العاصک واسطه سیله مصری  
اله کچوردی .

خوارجک ظهوری ایسہ حصرت علینک شوکت و قوتنی قیردی .  
حضرت علینک وفاتنده اوغلی ( حسن ) رضی الله عنه حضرتلرینه  
بیعت اولندیسه ده اوزمان خلق نبوت و معجزاتک حال و شاتی اونو تمش  
وافکار عامه عصیته رجوع ایتش ایدی .

بناء علی ذلک جزء سابعده بیان اولدینی اوزره معاویہ ، شام عسکريله  
بی پروا کوفه اوزرینه یوریدی . حضرت حسن دخی عراق اردوسيله  
آنی قارشولدی . لکن اهل عراق ایچنده شقاق و نفاق ظاهر اولمغله بیهوده  
قان دو کمکدن اجتناب ایله امارتی معاویہ یه ترک ایلدی .

معاویہ ، بنی و عصیان یولنده باشلامش اولدینی حکومتی ایشته بووجهله  
صورت مشروعه یه قودی . بنی امیه ، سائر قبائل عربیه غالب اولوب معاویہ  
آنلرک اولوسی اولدیغندن کندوسنه معارض و مزاحم قالمیوب مقام امارتده  
استقلال بولدی . عصری دور سلطنت اولمغله عالم بر بشقه عالم اولدی .

شو حاله نظرآ معاویہ ، سلاطین اسلامیه نیک برنجیسی دیمک اولوب  
آنحقی آنک ایام سلطنتی ، خلفاء راشدین حضراتنک عهد خلافتلرینه شیبه  
ایدی . زیرا عصرنده نیچه اصحاب کزین و کبار تابعین بر حیات ایدی .  
کندوسی دخی اصحاب کرامدن و التفات نبوی یه نائل اولان اکابر قریشدن  
بر ذات ایدی . بو مقام عالی یه قوت عصیه ایله ترقی ایتش ایسه ده آنک  
قوه قاهره سی سایه سنده خلافت نبویه یه مترتب اولان مصالح مسلمین

کورلمکده بولنش و خلافت صانکه قبای سلطنته بورونمش اولدیغنه نظرآ  
آکا ( خلیفه رسول الله ) و اخلافنه دخی ( خلفا ) دنیلمشدر .

شیعه کروهی ، حضرت حسنک خلافتی ترک ایلسندن طولایی آکا  
کوجنوب حق خلافت ، اهل بیتک اولدیغی بینلرنده کیزلوجه سویلشور  
اولدیلر وناسی حضرت حسین ، امتناع وبو ایشی معاویه نك وفاتنه تعلیق ایتمکه  
انلرده ( محمد بن حنیفه ) یه مراجعت وامکان مساعد اولدینی زمان خروج  
ایله خلافتی طلب ایلک اوزره خنی اوله رق آکا بیعت ایلشور . آنک  
اوزرینه ابن حنیفه دخی خفیاً هر بلده ده بر مأمور اقامه ایتمش . معاویه  
ایسه کروه شیعه دن باش کوسترنلر حقنده اجرای سیاستدن خالی اولمازدی .  
نته کیم زیرده بیان اولنه جنی اوزره بین الناس فوق العاده محترم اولان  
( حجر بن عدی ) ایله رفقاسی حقلرنده زیاده شدت کوسترمشدر . مع هذا  
اهل بیتک تقدم واستحقاق دعوالرینی مسامحه ایله کچیشدیرر ( نه دوه قالدسون ،  
نه چاڭ چالنسون ) وادیسنده معامله ایلر ایدی .

( دولت امویّه ) تاریخی برتفصیل یازمق صدندنه دکلم . لکن اوزمان  
اصحاب کرامک بقایاسی موجود اولوب آنلر ایسه نور نبوت ایله منور  
اولان زمان سعادتدن قالله نجوم هدایت اولدقلرندن اجمالاً آنلرک تراجم  
احوالنی بیلدیرمک وبو صروده دولت امویّه نك کلیات امور سیاسیه لرینه  
دائر معلومات اجمالیّه ویرمک نیتدهیم .

### ایام خدمت معاویه

قرق بر سنه هجریه سنده معاویه مقام خلافته کچدی . اکبر امراسی ،  
دهات اربعه دن مصر والیسی ( عمرو بن العاص ) ایدی . معاویه ، آتی ممتاز  
ومستثنا طوتار و آندن احتراز ایدر ایدی .

چونکه : معاویه ، دوراندیش برذات اولوب دائماً احتیاطه رعایت ایله

کندوسنه مخالفت ایله جک و علیهنده سوز سویله بیله جک آدم لری مدارا  
ایله قوللانونور و بین الناس اختلاف و قوعندن پک زیاده صاقینور ایدی .  
بناء علی ذلك دهات اربعة دن ( مغیره بن شعبه ) یی کوفه والیسی نصب  
ایتدی . حضرت عمرک نصب کرده سی اولان مشهور ( قاضی شریح ) دخی  
کوفه قاضیغنده پایدار ایدی .

بو صورتله معاویه نك اوامری هر طرفده جریانہ باشلادی . فقط دهات  
اربعة دن بری و ایالت فارس امیری اولان ( زیاد بن ابیه ) هنوز بیعت  
ایلمه مش اولدیغنه مبنی معاویه نك شرق جهندن تلاش و اندیشه سی و ارایدی .  
( زیاد ) ك اولادی ایسه بصره ده بولندیغندن آنلری تضییق ایله کندوسنی  
اطاعته اجبار ایچون معاویه خواص امراسندن ( بسر بن ارطأت ) ی  
بصره یه کوندردی . او دخی بصره یه واروب منبرده حضرت علی یی سب  
ایتدی و « الله ایچون بنی صادق بیلن تصدیق ایتسون و کاذب بیلن تکذیب  
ایلسون » دیدکده اصحاب کرامدن و بصره رجالندن ابوبکره « والله ، بزسنی  
کاذب بیلورز » دیمکله بسر ، آنی اعدام ایتمک ایستدیسده بعض ذوات ،  
حمایه و معاویه دخی بسر یی شامه اعاده ایلشدر .

او اثناده معاویه ، اکابر بنی امیه دن ( عبدالله بن عامر ) ی بصره  
والیسی نصب ایدوب خراسان و سجستانی دخی بصره ایالتنه الحاق ایتدی .  
و قرق ایکی سنه سنده ( مروان بن حکم ) ی مدینه و ( خالد بن العاص بن  
هشام ) ی مکه امیری و برادری ( عبّنه بن ابی سفیان ) ی امیر الحج  
نصب ایتدی .

او اثناده شیعه کروهی زیر پرده خفاده مستتر و وقت فرصته منتظر  
ایکن خوارج طائفه سی طرف طرف حرکت و خروج ایتمکده ایسه لرده  
دولت امویّه نك قوتی آنلری تنکیله کافی ایدی .

حتی ( عبدالله بن عامر ) ك بصره والیسی اولدیغنی اثناده ظهور ایدن  
خوارج ، لدی المحاربه مغلوب اوله رق ابن عامردن امان دیلدیلر . او دخی  
امان ویردی . لکن خوارجی بویله مدارا ایله قوللانمسی شامجه بگه نیلمدی .

بعده کوفه ده خوارج ظهور ایدوب حتی رئیسری اولان (مُسْتَوْرِد) امیر المؤمنین عنوانی آلدی. لکن کوفه والیسی (مغیره بن شعبه) یدنده مقتول ومغیره نك خدمتی نزد معاویه ده مقبول اولدی . ابن عامر ، کریم ومقتدر برذات ایسه ده اووقتک مزاجنه کوره لزومندن زیاده ملایم اولوب حتی خوارجی دخی بروجه بالا مدارا ایله قوللانور ایدی . بصره سفهایسی ایسه یوز بولمش ومملکت ضبط وربطدن قالمش ایدوکنه بناء قرق درت سنه سنده ابن عامر عزل ایدیلوب یرینه ( حارث بن عبدالله الازدی ) بصره والیسی اولدی .

### بعضی فنومات

جمل وصفین وقعه لرنده پك چوق دلاوران اسلام ضایع وتلف اولمش ایسه ده ملت اسلامیة نك کنجلك زمانی اولدیغندن ناس ایچنه دوشمش اولان اختلاف افکار برطرف اولنجه ینه جهاد وغزایه قیام اولندی . شام جهتنده دخی عساکر اسلامیة ، دیار رومه غزا ایتمکده ایکن دیگر طرفدن داغستانه ودیار ( سند ) سفر ایتمکده ایدیلر . شویله که : مصر والیسی عمرو بن العاصک تیزه زاده سی ( عقبه بن نافع ) ی قرق برسنه سنده برفرقة عسکریه ایله آفریقیه اوزرینه سوق ایتمشیدی . عقبه ، آفریقا قطع سنک ایچرولرینه غزا ایدرک ( غدامس ) و ( ودان ) کچی نیچه ممالکی فتح ایتمش وبعده ( قیروان ) شهرینی آلمشدر . قرق اوچ سنه سنده ( بسر بن ارطاط ) قسطنطینییه قدر کلش وقرق درت سنه سنده کابل ودیار هندن دها نیچه بلده لر فتح ایدلمشدر .

### وفیات اعیانه

شاعر مشهور ( لَیْثُ بن رَیْبَعَه ) که معلقه سی واشعار سائره سی بین الادبا معروفدر ، وقت سعادتده حضور نبوییه کلوب اسلام ایله مشرف اولدقدن



صکریه شعر سویلکدن واز کچمشیدی . حضرت عمر الفاروق . برکون « یالید ! بزه اشعارکدن بر شی اوقو » دیدکده « بقره و آل عمران سوره لرینی ایشیتدکدن صکریه شعر اوقومقدن واز کچدم » دیو جواب ویرمشیدی . قرق بر سنه هجریه سنده سنی یوزاللی بی متجاوز اولدینی حالده کوفده وفات ایلشدر . ( رضی الله عنه ) . ینه بوسنه ام المؤمنین ( حفصه بنت عمر الفاروق ) عنزم داربقا ایتشدر ( رضی الله عنها )

قرق ایکی سنه سنده دخی ( عثمان بن طلحه ) و ( صفوان بن امیه ) و ( هانی بن نیار الانصاری ) وفات ایلشدر . ( رضی الله عنهم ) .

( عثمان بن طلحه ) کبار قریشدن و ( عبدالدار ) اوغللردن اولوب ( خالد بن الولید ) و ( عمرو بن العاص ) ایله برلکده مدینه منوره یه کله رک اسلام ایله مشرف اولمشلر ایدی وفتح مکده رسول الله صلی الله علیه وسلم حضرتلری مفتاح کعبه بی اشبو عثمان بن طلحه ایله عزماده سی ( شیه ) یه تسلیم بیورمشیدی .

( صفوان بن امیه ) دخی اکابر قریشدن اولوب فتح مکده اسلام ایله مشرف اولمشیدی .

( ابو برده هانی بن نیار ) اهل بدردن و بیعت عقبه ده بولنمش اولان انصار کرامند . و ( برّاء بن عازب ) ک دایسیدر .

انصارک اون ایکی نقیندن بری اولوب احده شهید اولان ( رافع بن مالک ) ک اوغلی ( رفّاعه ) که اهل بدردن و ( عقبه ) ده ایمان ایدن انصار کرامدن اولوب جل و صفین وقعه لرنده دخی حضرت علی یه ظهیر و معین اولمشیدی اودخی اوائل ایّام معاویه ده داربقایه ارتحال ایتشدر . رضی الله عنه .

قرق اوچنجی سنه هجریه ده دخی اهل بدردن و اکابر انصاردن ( محمد بن مسلمه ) و علماء یهوددن اولوب هجرت نبویه ده اسلام ایله مشرف اولان ( عبدالله بن سلام ) مدینه ده وفات ایلشدر . ایکسینکده احوالنه دائر یوقارولرده نیچه قصه لر یازلمش اولدیغدن تکراره حاجت یوقدر . رضی الله عنهما .



دهات وشجعان عربدن والى مصر اولان ( عمرو بن العاص ) دخى  
اشبو قرق اوچ سنه سنده عيد فطر كيجه سى فوت اولمشدر . وفات ايده چكى  
وقت آغلامغله اوغلى عبد الله « نيجون آغلايورسين ، اولومدنمى قورقيورسين »  
ديدكده « خير ، اولومدن قورقم . لكن صكره سنندن قورقويورم . زيرا بن  
اوچ طبقه ده بولاندم . اوللا كافر ايدم ومله دن زياده رسول الله صلى الله  
عليه وسلم حضر تلرينك عليهنده ايدم . اووقت فوت اوليدم ، بكا جهنم واجب  
اولوردى . بعده رسول الله دن حيا ايدن بن ايدم . اووقت فوت اوليدم ، ناس  
نى تبريك ايلردى واسلام ايله مشرف اولوب خيراوزره اولدينى حالده كيتدى  
ديرلردى وبنم ايچون جنت مأمول ايديلوردى . صكره ملك وسلطنت البسه سى  
كيدم . شمدى نه حالده يم بيلميورم . وفاتمه بكا آغلاميكيز . نواحه لر ،  
يعنى صاويچيلر آرقه دن كلمسون ( نواحه قاريلر ايله جنازه تشيع اولنمق  
عادتى حالا مصرده جاريدر ) قبرم اوزرينه طاش و آغاج قوميكيز . بنى  
طوپراق ايله اورتدكن صكره بر قربان كسوب اتلر نى قطعه قطعه ايدنجيه دك  
ياتمده طوريكيز . تا كه سزگله انسيت ايله يم وربكم ملكرينك اوامرى  
نهر آكلاييم » ديدى وتوبه استغفار ايدرك ارتحال ايتدى . ( رضى الله عنه )  
فاتح مصر اولوب حضرت عمر ك زماننده درت سنه و حضرت عثمانك  
زماننده درت سنه دن ايكي آى ا كسيك ودور معاويه ده ايكي سنه دن بر اى  
ا كسيك مصر و ايلكننده بولندى .

وفاتنده اوغلى ( عبدالله ) رضى الله عنه مصر واليسى اولديسه ده ايكي  
سنه صكره معاويه آنى عزل ايله اعجاب كرامدن وامراى عثمانيه دن ( معاويه  
بن خديج ) ى نصب ايتمشدر .

### اموال زياد

مشهور ( زياد بن ابيه ) كه هجرت نبويه سنه سنده ابوسفيانك صلبندن  
تولد ايلشيدى . لكن ولد زنا اولمغله آكا نسبت اولنه ميوب ( زياد بن ابيه )  
يعنى باباسنك اوغلى ديو معروف اولمشدى . سر آمدان اذكيادن وفصحاي

خطباند بر ذات اولوب بصره والیسی ( ابو موسی الاشعری ) نك خدمت کتابتنده بولنمش وحضرت عمر زماننده بصره جه بعض امورده استخدام اولنمش ایدی .

حضرت علی وقعه جملدن صکره زیادی بصره ده مال مأموری و صکره بلاد فارس امیری نصب ایتدی . اوده مدبر و مقتدر بر آدم اولدیغندن اقلیم فارسى پك كوزل انضباط آلتنه آلمش ومؤخرآ معاویه آنی نسبنه الحاق ایتکله کندوسنه ( زیاد بن ابی سفیان ) ده نیلمشدر .

شویله که : جانب عراقده واقع بعض فتوحاتی عرض ایچسون مژده جی اوله رق مدینه یه کلوب کبار مهاجرین وانصار حاضر اولدقلری حالده حضرت عمرک مجلسنه داخل اولدقده اوفتوحاتی کمال فصاحت وطلاقت لسان ایله عرض و بیان ایلش و او قدر کوزل سویلش که حضاره حیرت الویرمش . عمرو بن العاص « بویکیت ، قریشی اولسیدی عصایله عربی سوق ایدردی ، دیدکده حضرت علینک یاننده اوتوران ابوسفیان ، آکا « والله ، بن بونی آنا رحمنه وضع ایدنه بیلورم » دیمش وحضرت علی « کیمدر » دیدکده « بنم » ده یینجه « صوص یا ابا سفیان ! عمر بونی ایشیدرسه حقه کده اصلا مساحه ایتمز » دیو بیورمش . بوقصه ، معاویه نك مسموعی اولمغله حضرت علی ، زیادی فارس امیری نصب ایتدکده معاویه ، زیاده مکتوب یازوب بو خصوصی حکایه ایله زیادی کندی طرفنه جلب و اماله یه تشبث ایتمش وموافق ایلدیکی تقدیرده حقنده مضر اوله جغنی بیان ایلش .

زیاد ایسه بو کیفیتی اعلان ومعاویه یه علناً طمن ایله برابر او مکتوبی حضرت علی یه کوندر مکله حضرت علی ، زیاده کوندر دیکی مکتوبده « بن ، سنی بو ولایته تعیین ایتدم وسن عندمده بوایشه اهل سین . اما عمر زماننده ابوسفیانک آغزندن چیقیورمش اولان برسوز ایله سن آنک نسب ومیراثنه مستحق اوله مازسین . معاویه ایسه شیطان کبی کشینک او کندن ، آرقه سندن صاغندن ، صولندن کلور . آندن حذر ایت حذر ، دیو بیورمش .

لکن بو قضیه زیادک قلبنده یر ایتمشیدی . زیرا ابو سفیان کبی رئیس

قریش اولان بر آدمک نسبته قارشمق کندوسنجه بر بیوک مزیت و سرمایه مفخرت ایدی .

حضرت حسنک استغفاسی اوزرینه شرق و غرب اهالیسی معاویه بیعت ایلدکده زیاد ، برقلعهده تحصن ایدرک بیعتدن امتناع ایتکله معاویه تلاش واندیشه اوزره ایدی .

حتی قرق ایکی سنه هجریه سنده کوفه والیسی ( مغیره بن شعبه ) کلوب معاویه ایله کورشدکده معاویه آنکله حسبحال ایدرک « بوکیجه ، زیادک فارسده استقرارینی دوشوندیم ، کوزیمه اویقو کیرمدی » ده نیجه مغیره « آندن بو قدر اندیشه ایده جک نه وار ، دیمکله « زیاد ، عربک برداهیه سیدر . فارسک اموالی ده النده در . قورقارم که اهل بیتدن برینه بیعت ایلرده محاربه یی اعاده ایدر » دیمسی اوزرینه مغیره « اذن ویررسه کز بن زیادی بورایه کتوریرم » دیوب او دخی ممنون اوله رق « پک اعلی » دیمش و مغیره نک زیاد ایله آره سی پک ایو اولدیغندن آ کاتأمینات ویرمش و معاویه دخی زیاده اماننامه کوندرمش اولدیغنه مبنی زیاد ، هان سیر سریع ایله معاویه نک یانه کلدی . کورشدیلر ، بارشدیلر .

زیادک آرزوسی ابوسفیانک نسبته التحاق اولوب معاویه ایسه ده اؤل بونی آ کاکلیف ایلمش اولدیغندن زیاد بو صروده بعض وسائط ایله ابوسفیانک اوغلی اولدیغنی بین الناس اشاعه ایتدردی . معاویه دخی آنی خوش کوردی و بو خصوصده بینلرنده اتفاق حاصل اولدی .

بناء علی ذلک هجرتک قرق دردنجی سنه سنده بر بیوک مجلسده شاهد استماع اوله رق ابو سفیانک ( سمیه ) نام فاحشه ایله زنا ایتدیکی و آندن زیادک تولد ایلدیکی اثبات اولندی . معاویه آنی نسبته الحاق ایله لاب برادری اولمق اوزره قبول ایتدی . بوا یسه شرع شریفه مغایر ایدی . زیر آ رسول الله صلی الله علیه وسلم ، اولادی فراشه ، یعنی بر اجتماع مشروعه تابع قیلوب زنا کاره ده طاش دیو بیورمشدیر .

بناء على ذلك ( ابن ابيه — باباسنك اوغلى ) يرينه ( ابن ابى سفيان — ابو سفيان زاده ) تعبيرى كبار امته قبول ايتديرمك مشكل ايدى .

زياد بو خصوصه بر تدبير قوردى ، يعنى ( ابوسفيان زاده زياد دن ام المؤمنين عايشه ) ديو بر مكتوب يازدى . مراعى بو عنوان ايله بر جوابه نائل اولمق و آنى كندوسنجه سند اتخاذا قيلمق ايدى . فى الواقع ام المؤمنين عايشه رضى الله عنها حضرت تلو نردن اويله بر جوابنامه كلسه كندوسنه بر حجت قويه اولوردى . حضرت عايشه ايسه يازدينى جوابنامه نك عنواننده ( ام المؤمنين عايشه دن باباسنك اوغلى زياده ) ديو يازمقله زيادك قورونديسى بوشه چيقدى . بومسئله اهل اسلامه كران كلدى . على الخصوص بنى اميه ، كندى نسلبرينه پيچ قارشديرلمش اولديغدن يك زياده دلكير اولديلر و يك چوق كفتكو ايتديلر . حتى مروانك برادرى ( عبدالرحمن بن الحكم ) « يا معاويه ! باباكت زانى اولديغنه نصل راضى اوله بورسين » ديهرك معاويه يى هجو ايتمشيدى .

معاويه يى تصحبايدنلر « زمان جاهليتده درلو نكاحلروار ايدى . صكره شريعت اسلاميه آنلرى نهى ايتدى . زياد دخى اوزمان عادت جاهليه اوزره ابوسفيا نك صلبندن تولد ايلش اولدينى جهتهل آنك نسنه الحاق اولندى » ديو تاويل ايله اعتذاره قيام ايتديلر ايسه ده برو طرفدن « زمان جاهليتده دخى بر نكاح معروف اولوب نكاحسنر حاصل اولان چوجقلر پيچ عد اولنه رق نسلبرى مردود اولوردى .

بناء عليه زيادك امثالسنر اوله رق تصديق نسي ، معاويه نك بر فاحش خطاسيدر « ديو اعتراض اولنمقده ايدى . فى الواقع زمان جاهليتده درلو عادات سيئه وار ايدى . لكن اوزمان دخى معتاد و معروف بر نكاح اولوب آنسنر نسا ايله مقارنت زنا عد اولنوردى . ايشته زياد دخى اوزمان زنادن حاصل اولمش ايدو كندن آنى نسنه الحاق ايتكم مشروع دكل ايدى .

قرق بش سنه هجرية سنده معاويه ، زيادى بصره و خراسان و سجستان و اليسى ايتدى . صكر بحرین و عمانى دخى الحاق ايلدى .

زیاد ، سنه مزبورہ ربیع الآخرندہ بصرہیہ واردی . او وقت بصرہدہ فسق وفجور شایع اولمشیدی . زیاد ، منبرہ چیقدی غایت فصیحانہ وبلغانہ بر خطبہ او قودی ، ناسی فسق وفجور دن منع و تحذیر ایتدی و اصلاح حال ایچون ناسه مدت معینہ ایله مهلت ویردی . بعده یاتسو نمازینی کیچجه قیلدیرر و سورة بقرهیی، یاخود دیکر سورة لردن او قدر آیات قرآنیہیی قرائت ایله ناسی کجیکدیرر وبعده بصرهك اڭ اوزاق محلهك کیديله بیلهك قدر مهلت ویرر و آندن صکره ضبطیه مدیرینی اسواقه چیقارر ، اوده هر کیمی زقاقده بولورسه اولدیرر اولدی و بو درلو اجراآت عرفیه و سیاسیه ایله بصره شهرینی تمامیه انضباط آلتنه آلدی .

ابتدا معاویهك سطوت و سلطنتی احکام و تشدید ایلین وظن و شبهه اوزرینه جزا ایدن زیاددر .

ناس ، آندن او قدر خوف ایدر اولدی که زقاقده بر آدمک بر شیئی دوشسه صاحبی کلوبده آلنجیه قدر کمسه ال سورمز و کیمسه قپوسنی کلیدله مز ایدی . زیاد ، اون بیک عسا کر ضبطیه ترتیب ایتدی و بروجہ بالا بصره شهرینی تحت تأمینہ آلدقن صکره خارجه چیقوب طرق و مسالکی تأمین ایلدی . الحاصل حضرت عمر زماننده اولدینی کی بصرهك داخل و خارجنده امنیت برکال ایدی . فقط او زمانده کی امنیت الله قورقوسندن ناشی ایدی ، بودفعه کی امنیت ایسه زیادك قورقوسیله حاصل اولمشدی .

زیاد ، بویله اجراآت سیاسیه اعتنا ایله برابر اصحاب کرامدن ( عمران بن حصین الحزاعی ) و ( انس بن مالک ) و ( عبدالرحمن بن سمره ) و ( سمره بن جندب ) رضی الله عنهم کی نیچه محترم ذاتلری استخدام ایدرک آنلردن دخی استعانه و استفاده ایلردی .

ابن عامرک مساعدده و مسامحه سندن استفاده ایدرک آنک رأی وامانی سایه سنده خوش نشین اولان خارجیلرینه باش کوستردیلر ایسه ده زیاد آنلره امان و زمان و یرمیوب رئیس لرینی اعدام و کندولرینی کنام ایلشدر .



## وفیات اعیانہ

قرق درت سنہ ہجریہ ۷۵۰ امہات مؤمنیندن (ام حبیبہ) رضی اللہ عنہا  
حضرتلری دار بقایہ ارتحال ایتدی .

ام حبیبہ ، ابوسفیانک قیزی و معاویہ نك همشیره سیدر . اوّل باوّل ایمان  
ایندلردن اولوب زوجیلہ برابر حبشه هجرت ایلشیدی . زوجی اوراده  
فوت اولمش ، اوزمان پدری مکده رئیس قریش ایکن اوطرفه میل ایتیموب  
دیار غربتده طول و بیكس اولدینی حالدہ اسلام اوزره ثابت قالمش ایدی .  
بو حالی جالب نظر شفقت اولمغله رسول الله صلی الله علیه وسلم حضرتلری  
آنی تسلیت ایچون تزوجنه رغبت بیوروب کیفیتی نجاشییه بیلدیرمش ،  
او دخی حبشه رسول اکرمه نکاحنی عقد ایله ام حبیبہ بی مدینه منورهیه  
کوندیرمش ایدی .

معاویہ ، همشیره سنك امہات مؤمنیندن اولمسیلہ مباحات ایلردی ،  
اما ام حبیبہ برادرینك (امیر المؤمنین) عنواتی آلمسیلہ افتخار ایلزدی .  
رضی الله عنها وارضاهما ،

وحی کاتبلرندن اولوب حضرت ابی بکر و عثمانك عهد خلافتلرندہ  
قرآن کریمی جمع ایدن (زید بن ثابت الانصاری) رضی الله عنه حضرتلری  
قرق بشنجی سنہ ہجریہ خلالتندہ ختم درس حیات ایلدی .

حضرت عثمان زمانندہ بیت المال مأموری اولمش و آنك شهادتندہ  
بی طرف قلوب کوشه اتزوایه چکلمش ایدی ، لکن حضرت علینك فضائی  
اعلان ایلردی . علمای راسخیندن و فضلاى اصحاب کزیندن ایدی .  
وفاتندہ ابو هريره رضی الله عنه «بو کون ، بو امك عالم و داناسی فوت  
اولدی . مأمول که جناب حق ابن عباسی آکا خلف قیلہ» دیدی .  
فی الواقع عبدالله بن عباس رضی الله عنهما آکا خیر الخلف اولوب قرآن  
کریمك تفسیرینه برقبو آچمشدر .



شجره رضوان آلتنده بيعت ايلين احباب كرامدن ( ثابت بن ضحاک )  
دخی قرق بش سنه سنده ارتحال ايله دفين خاك عطرناك اولمشدر .  
رضی الله عنه

ينه بو سنه احباب بدردن ( عاصم بن عدی الانصاری ) يوز يكرمی  
ياشني متجاوز وكذلك اهل بدردن وعقبه ده بيعت ايلين انصار كرامدن  
( مسلمة بن سلامه ) يتمش ياشنه بالغ اولدقلى حالده عزيم دار بقا ايلديلر .  
رضی الله عنهما

( خالد بن الوليد ) رضی الله عنه حضرتلرينك اوغلى ( عبد الرحمن )  
عليه الرحمة والغفران كه ديار رومه غزالر ايدرك اعمال مبروره موفق  
اولشیدی وكرك پدرينك ديار شامده كي شهرتندن كرك كندوسنك ديار  
رومده واقع مظفر يتندن طولاي شام اهايلسي كندوسنه مائل ومتوجه  
اولوب حتى معاويه آندن خوف ايدر اولمشیدی . قرق آلتنجي سنه هجريه  
خلالنده ديار رومدن حصه عودتنده مسموماً وفات ايلكله معاويه حقنده  
سوء ظنه بادی اولمشدر .

### غزاه قسطنطينيه

عساكر اسلاميه ، يازين ديار رومه غزا ايدر وييلديرم كبي اوغرادقلى  
يرلى اوروب كچرلر وعلائم شتا بلوروب ده صوغوقلر قارشو كلنجه دونوب  
كلورلر ايكن برقاق سنه دنبرو ديار رومده قشلامغه وآره ، صره بحرآ دخی  
غزا ايتمكه باشلاديلر . قرق طقوز سنه سنده معاويه ، ( سفیان بن عوف ) ی  
بر بيوك اردو ايله ديار رومه كوندردی واوغلى ( يزيد ) ك دخی برابر  
كيتمسنی امر ايتدی . بوندن مرامی اوغلنه شان وشهرت قازاندرمق ایدی .  
يزيد ايسه ترفه وتنم ايله مألوف اولوب بويله مشقتلى ايشلرده بولنق  
ايستمديكندن آغير طاورانه رق كيرو قالدی . معاويه همان يزيديك اردويه  
يتشمسی ايچون كندوسنه تهديدنامه كوندردی . يزيد دخی ناچار بر فرقه  
عسكريه ايله حركت ايلديرك اردويه ايريشدی . بو عسكر ك ايچنده ابن عباس

(ابن عمر) و (ابن زبیر) و (ابوایوب الانصاری خالد) رضی الله عنهم و مشاهیر نجعان عربیدن (عبدالغزیز بن زرارہ) حضراتی دخی موجود ایدی .  
 عسا کر اسلامیہ ایلر و لیوب قسطنطینیہ واصل اولدیلر . بالدفعات و ملر ایله شدتلی محاربه لر ایتدیلر . نهایت برکون (عبدالغزیز) شدتلی بر هجوم ایله اوغربنه کلن روملری اوروب قتل ایدرک ایچلرینه طالیدی، روملر ده مرطرفدن اوزرینه هجوم ایله آنی شهید ایلدیلر .

ابوایوب الانصاری رضی الله عنه حضرتلری ده او ائنده عازم دار بقا ولدی و قسطنطینیہ سورینه قریب بر محله دفن ایدلدی . آندن صکره عسا کر اسلامیہ دخی یزید ایله برابر شامه عودت ایلدیلر .

اجزای سالفه ده ابوایوب الانصاری ده دائر چوق قصه لر یکم شد، تکراره حاجت یوقدر . تره سی حالا شهر قسطنطینیہ خارچنده زیارتگاه انا مدر .

عسا کر اسلامیہ آندن صکره ده جهاد و غزادن خالی قالماشدر . حتی الی اوج سنه هجریه سننده ردوس جزیره سنی فتح ایشلر والی درتده دیکر بعض جزائی استیلا ایتملردر .

### عزل مروانه

اکابر بنی امیه دن اولوب خلی وقتدنبرو امیر مدینه بولنان (مروان بن حکم) ک بعض اطواریدن طولای معاویه مغبر اولوب قرق طقوز سنه سننده آنی عزل ایله یرینه (سعید بن العاصی) بی نصب ایتدی .

بو، سعید دخی اکابر بنی امیه دن وصغار صحابه دن واسیخیا و فصیحای عربدن اولوب حضرت عثمان زماننده کوفه والیسی اوله رق طبرستان و جرجانی فتح ایتشیدی . حضرت عثمانک شهادتده عزلت و ازوایی اختیار ایله حمل وصفین وقعه لرنده بولمادی . معاویه، امارتده مستقل اولدقدن صکره کلوب آنکله کورشدکده معاویه اکالوم ایتدیسه ده سعید اعتذار و اودخی آنک عذرینی قبول ایتدی و بوکره آنی مرانک یرینه مدینه امیری نصب ایلدی .

## وفات حسن بن علی

حسن بن علی رضی الله عنهما حضرت تبری که سیده النساء فاطمة الزهرا رضی الله عنهما حضرت تیرینک ایلک اوغلیدر و رسول اکرم صلی الله علیه وسلم حضرت تیرینک حفید سعیدیدر. رسول اکرمه آنک قدر بکزر کیمسه یوق ایدی. غایت حلیم و کریم ایدی. حرب و فتنه یی سومزدی و پک زیاده متقی اولوب فوق العاده اتقاسی آکاملک و دنیایی ترک ایتدردی. پدرندن صکره خلافته انتخاب اولوب آانی آی قدر مقام خلافتده بولندقدن صکره خلافتدن استعفا ایله اختیار کوشه عزلت و ازوا ایتدی. قرق طقوزسنه هجریه سنده قرق یدی یا شنده ایکن دارفادن کذار ایله عالم عقبایه کیتدی. اوزبش ارکک و سکز قیز اولادی قالدی.

مسموماً وفات ایلدیکی و آانی تسمیم ایدن کندوسنک زوجه سی واشعث بن قیسک قیزی (جعدۀ) اولدینی مشهوردر.

قاری بوشامغه مائل اولوب حتی پدری کوفه ده ایکن «حسنه قیز و یرمیکز، زیرا بوشار» دیدکده کوفه رجالی «بز، آکا ایستدیکی قیزی و یریرز، ایستر آلیقوسون، ایستر بوشاسون» دیدیلر. آلدینی خاتون جان و کولکلدن آکا عاشق اولوردی. اما جعده، هر نه سبیدن ناشی ایسه آندن دلکیر اوله رق جاننه قیمشدر. مرض موتنده ایکن جد امجدی رسول الله صلی الله علیه وسلم حضرت تیرینک یاننده دفن اولمسی ایچون حضرت عایشه دن اذن آلمشیدی. وفاتندن اولجه برادر اکرمی حسین رضی الله عنه حضرت تیرینی چاغردی «امر خلافت، ابتدا پدریمزه توجه ایتمشیکن ابوبکره و صکره عمره کچدی. بعده شوراده آنک خلیفه اولمسی جای تردد دکل ایکن عثمانه تحویل اولندی. عثمان قتل اولندقدن پدریمز خلیفه اولدیسده مخالفلر ظهور ایتمکه قلیچ چکوب بوقدر جنک وجدال ایتمشیکن استقلال تام میسر اولمادی. بنم آکلادیغمه کوره بزکه اهل بیتز، الله تعالی نبوت ایله

خلافتی بزده جمع ائمه جك . لكن قورقارم كه كوفه سفهاسی سنی راحت  
براقیوب دعوايه قیام ایتدیرلر . بن اقدبجه عایشه دن اذن آلمشیدم .  
وفاتمه ینه استیدان ایله . اذن ویررسه رسول اکرمك یاننده دفن ایت . اما  
فته قورقوسی اولورسه مقابر مسلمین آره سنده دفن ایدیور « دیو وصیت  
بیوردی . وفاتنده حضرت حسین کیدوب حضرت عایشه دن اذن آله رق  
آنی حجره سعادته دفن ایتك تدارکنده ایکن معزولاً مدینه ده بولسان  
مروان بن الحکم خبر آلتجه بنی امیه یی باشنه جمع ایله « بز، حجره سعادته  
کیسه یی دفن ایتدیرمیز » دیه رك مخالفته قیام ایتلریله حضرت حسین دخی  
بنی هاشم ایله سلاخلانوب مقابله یه قیام ایلدی .

ابوهریره رضی الله عنه آنی ایشیدنجه « حسنك جد امجدی یاننده دفته  
مانع اولمق ظلمدر . بیوك كناهدر » دیه کوردی . امویلره نصیحت ویردی ،  
لكن مفید اولمدیغنی کورنجه دفع فته ایچون همان حضرت حسینك یانه  
واردی « برادرك سكا فته قورقوسی اولماز ایسه بنی حجره سعادته دفن  
ایت دیمشیدی . بو حال ایسه فته در » دیه رك اونیتدن واز کچوردی و حضرت  
حسین همان برادرینی ( بقیع ) مزارستانده دفن بیوردی . حضرت حسنك  
جنازه سنه بنی امیه دن آنجق امیر مدینه اولان ( سعید بن العاصی ) حاضر اولدی  
وبرمعتاد نمازینی دخی اوقیلدردی .

### مغیره ایله دیگر بعضه زرات کرامك وفاتلری

اللتی سنه هجریه ده طاعون ظهور ایتكله كوفه والیسی ( مغیره بن  
شعبه ) فرار ایتمشیدی . طاعون زائل اولدی ، مغیره كوفه یه عودت ایلدی .  
بحکمه الله خلال شعبانده مطعوناً وفات ایتدی .

دهات اربعه دن بری اولوب وفاتنده سنی یتشه یتمش ایدی . شجره  
رضوان آلتنده بیعت ایلین اصحاب کرامدندر . رضی الله عنه .

ینه بوسنه زوجات مطهراتدن ( صفیه بنت حی ) رضی الله عنها و ایران  
فاتحلردن اولان ( عثمان بن ابی العاص الثقفی ) ایله ( عبدالرحمن بن سمیره )

رضی الله عنهما وصفینده ایکی حکمدن بری اولوب ده محجوباً مکّه صاوشمش اولان (ابوموسی الاشعری) و حدیبیه سفرنده حاضر بولنان و فتح مکّه کونی (جهینه) بیراغنی حامل اولان (زید بن خالد الجهنی) و بدرده و سائر غزوات نبویه ده حاضر بولنان (مدلاج بن عمر السملی) رضی الله عنهم حضراتی دخی عازم دار بقا اولمشدر در .

خراسان امیری (حکم بن عمرو الغفاری) رضی الله عنه حضر تلمری دخی اشبو اللنجی سنه موتنی تمنی ایدرک عازم دارالقرار اولمشدر .

شویله که : زیاد ، بروجّه بالا قرق بش سنه هجریه سنده بصره والیسی اولدقده عثمان بن ابی العاصک برادری اولان (حکم بن ابی العاص الثقفی) یی خراسان امیری نصب ایتمک اوزره دعوت ایلدکه دعوتجی یا کلشلقله (حکم بن عمرو الغفاری) یی دعوت ایلش اولدیغندن حکم غفاری ، حضور زیاده کلنجه « بن سنی اراده ایتدم ، اما الله سنی اراده ایتمش » دهرک آنی خراسان امیری نصب ایلشیدی . حکم غفاری ، خراسانه کیتدی . طخارستانه غزا ایتدی . پک چوق اموال غنائم آلدی . لکن اغتنام اولنان درهم و دنانیر ، بین الغزاة تقسیم اولنمیوبده کاملاً شام خزینه سنه کوندرلمسی ایچون معاویه طرفندن زیاده امرنامه کوندرلمش اولدیغنه مبنی زیادک حکم غفاری یه کوندردیکی تعلیماتده « معاویه نك بکا کوندردیکی امرنامه ده درهم و دنانیرک کندوسی ایچون افراز اولنمسی محرر اولدیغندن درهم و دنانیری بین الغانمین تقسیم ایتمه » دیو امر اولنمشیدی . بوکا جواباً حکم دخی یازدینی تحریراتده « امیر المؤمنینک سکا یازدینی امر بکا بالغ اولدی . نجّه اللهک کتابی امیر المؤمنینک مکتوبندن مقدمدر » دیو اشعار و ناسه دخی « عطیه لریکزی آلکز . مال لریکزی آلکز » دهرک بالجمله اموال غنائمی تقسیم ایتدکدن صکره « یارب ! سنک عندکده بنم ایچون خیر و حسنات وار ایسه روحمی قبض ایت » دیو دعا ایتمش و دعاسی مقبول اولوب هان ارتحال داربقا ایتمشدر .

## بعضی نومبرہات

بالادہ بیان اولندینی اوزرہ کوفہ والیسی مغیرہ بن شعبہ اللہجی سنہ ہجریہ دہ وفات ایلدکدہ کوفہ ایالتی بروجہ الحاق بصرہ والیسی زیادہ توجیہ ایدلدی و بویکی ایالت جسیمہ برلشدیرلدی .

ممالک ایرانہ ایسہ ایکی قسمہ منقسم اولوب بر قسمی بصرہ و قسم دیگر کی کوفہ یہ مربوط اولدیغندن زیاد بالجللہ بلاد شرقیہ نک حکمداری اولدی .

زیاد ، همان کوفہ یہ واروب بصرہ دہ اصحاب کرامدن (سمرة بن جندب) قائم مقام براقدی ، فقط ایران فاتح لرینک مقرری اولان کوفہ و بصرہ شهرلری اوتہ دنبرو کرسی ایالت اولغلہ هر قغیسی مرکز ایالت اتخاذ اولنسہ دیگری آنی قصقانه جغندن زیاد ، آلتی آئی برنده و آلتی آئی دیگرندہ اقامت ایله کندوسی هر قغیسنده بولنور ایسہ دیگرندہ دخی (سمرة) بولنوردی . سمرہ ، خوارج حقندہ زاده شدت کوستر مکده اولدینی جهتله زیاد آندن امین ایدی . زیاد کوفہ دہ ایکن بصرہ دہ خوارج ظهور ایتدیسه دہ سمرہ ، آنلری مضحل قیلمش و او صرہ دہ رؤسای شیعه دن بعضیلری دخی اعدام ایدلمشدر .

بوصورتله معاویہ ، شرق جهتندن امین اولدینی کبی ینہ اشباللنجی سنہ مصر والیسی (معاویہ بن خدیج) ی عزل ایله یرینه کندی خواص امراسندن وصغار صحابه دن (مسلمة بن مخلد الانصاری) یی نصب و آفریقیہ والیلکنی بروجہ الحاق آکا توجیہ ایله غرب جهتندن دخی مطمئن البال اولمشدر .

## امویلرک بعضی مظالمی

حضرت علینک کینه سی (ابو الحسن) در . لکن بر کون رسول اکرم آنی توز ، طوپراق ایچنده کورنجه (ابو تراب) دیو خطاب ایلش اولدیغندن حضرت علی ، کندوسنه ابو تراب دینلورسه ممنون اولوردی .



امرای بنی امیه ایسه منبرده حضرت عثمانہ دعا ایتدکن صکره ابوتراہ  
سب ایلر وعلویلره ( ترایلر ) تعبیر ایدرلر ایدی . اهل شامك عوامی ،  
ابوتراہك کیم اولدیغنی بیلمزلردی . حتی بر کون بر کیمسه اهل شامدن  
برینه « خطیلریکزك منبرده سب ایلدکلری ابوتراہ کیم » در دیو سوال  
ایتدکه « ظن ایدرم که بر حیدود اولق کرکدر » دیو جواب ویرمش  
اولدیغنی مرویدر .

مغیره بن شعبه ، کوفه والیسی اولدقده امویلره عرض خلوص ایچون  
جمعه کونلری منبرده ابوتراہ بددعا ایتدکجه ( حجر بن عدی بن حاتم طی )  
وآنکله برابر بر جماعت آنی رد ایدرلردی . مغیره دخی مساحجه ایدوب  
آنلره بر شی دیمزدی . بروجه بالا زیاد کوفه والیسی اولوبده منبرده  
حضرت عثمانہ دعا ایتدکن صکره ابوتراہ سب ایدنجه کافی السابق حجر ،  
قالقوب حضرت علی یی ثنا ایتدکه ( زیاد ) اوفکه لنوب آنی ورفقاسی  
اولان اون اوچ کشی یی اخذ وکرفت ایله تیمور بند ایتدردی وجمه سنی  
شامه کوندردی . ایچلرندن آلتیسنه عشرتلی شفاعت ایتمکله صالیورلدیلر .  
باقی یدیسيله ( حجر بن عدی ) اعدام ایدلدیلر . حجر ایسه ملتجه پک بیوک  
بر ذات اولدیغندن طولانی چوق کیمسه لر معاویه یی طعن ایدر اولدیلر .

( حسن بصری ) دن مرویدر . دیمش که معاویه نك درت ایشی واردرکه  
هربری مهلکه در . اولاً : بقایای صحابه واصحاب فضیلت وار ایکن مشورتسز  
خلافتی سیف ایله آلدی . ثانیاً : اوغلی یزیدی ولی عهد ایلدی ، یزید ایسه  
خمرایچر وحریر کبیر وطنبور چالارایدی . ثالثاً : زیادی نسنه الحاق ایلدی .  
رابعاً : حجر بن عدی یی قتل ایتدی .

### نقل منبر مسئلہ سی

او زمانك احوالنه عطف نظر دقت اولنورسه کوریلورکه شامده  
تشکل ایدن دولت امویہ ، برقارتال قوشنه بکزردی که باشی حجاز وقلبی شام  
اولوب مصر وعراق اوزرینه بررقنادینی آتمش وایاقلرینی دیار رومه

اوزاتمش ایدی . بالاده بیان اولدینی اوزره مصر و عراق وایلری برر حکمدار قوی الاقدار ایدی . دمشق شام ایسه مقرر خلافت و سلطنت اولدیغندن بوراده جهات سائرهدن زیاده قوتی وار ایدی . اما باش طرفنده او قدر قوتی اولیوب امرای امویّه ، جانب حجازده ایستدکلری کچی بالاپروازلحق ایده مزلردی . زیرا مکه و مدینه ده اکابر اصحاب کرامدن نیجه ذوات وار ایدی و کعبه مکرمه مطاف انام اولدینی کچی مسجد شریف نبوی ایله روضه مطهره دخی مطمح انظار زوآرایدی .

بناء علی ذلك معاویه ، مرکز خلافت اولان دمشق شامه شرف و یرمک و قلوب انامی اورایه توجه ایتدیرمک اوزره اشبالذبحی سنه هجریه خالانده منبر شریف نبوی ایله مؤذن نبوی ( سعد القرظ ) رضی الله عنه یدنده امانت اوله رق محفوظ بولنان عصای نبوینک دمشق شام جامعنه نقللرینی امر ایتمشیدی .

اتفاقا اوکون کونش طوتلدی ، عالمی ظلمت قاپلادی . ناس بونی منبر نبوینک نقلی داعیه سنه حمل واسناد ایله فریاد ایلدی . علی روایه جابر و ابوهریره رضی الله عنهما نزد معاویه یه واروب « یا امیر المؤمنین ! منبر شریفک یرندن تحریکی و عصای نبوینک شامه نقلی جائز اولماز » دیو نصیحت ایلدیلر . آنک اوزرینه معاویه اظهار ندامت ایله اعتذار ایدرک او ، امری کیر و آلدی و منبر شریفه آلتی باصامق زیاده قیلدی .

### استقرار

خلفای امویهدن عبدالملک بن مروان خلیفه اولدقده منبر شریفک شامه نقلی امرایدنجه ( قیصه بن ذویب ) آکا نصیحت ایلدی و معاویه بوکا عزیمت ایلشیکن امرینی کیر و آلمش اولدیغنی سویلیدی . اوده بوندن واز کچدی . کذلک اوغلی ( ولید ) خلیفه اولوب ده حج ایتدکده بو امر خطیره عزیمت ایلدیسده مدینه ده سیدالتابعین اولان ( سعید بن المسیب ) حضرتلری ( عمر بن العبد العزیز ) حضرتلرینه خبر کوندروب « صاحبک سویله مسجد

شریفه تعرض ایتسون ، اللهك غضبندن قورقسون « دیو بیورمش اودخی ولیده سویلیوب آتی بونیتندن واز کچورمشدر . بعده ( سلیمان بن عبدالمک ) خلیفه ایکن حج ایلدکده ( عمر بن عبدالعزیز ) بوکیفیتی آکا حکایه ایتمکله « امیرالمؤمنین عبدالمک وولید حقلرندده بودرلو سوزلرک سویلنمسنی ایستتم . بویله شیر ، بزم نه مزه لازم . بز دنیای آلدق ، المزده در . اویله شعار اسلامدن اولوبده ناسک زیارت ایله کلدیکی شیئه قصد ایلک بزه یاقیشورمی ، دیمشدر .

### فرار فرزدق

شاعر مشهور ( فرزدق ) معاویه پی هجو ایتمش اولدیغدن زیاد ، آتی بصرده ایکن طوتمق ایستمش ایسهده فرزدق طویوب کوفیه کیتمش ایدی . زیاد آنک اخذ وکرفت ایچون کوفیه کی قائمقامنه امرنامه کوندرمش ایسهده فرزدق ایشیدوب جانب حجازه صاوشمش وکبار بنی امیه دن سعید بن العاصی به دخیل دوشمش . او وقتک حکمنحه سعید دخی آتی حمایه ایتمکله فرزدق آنک حقده مدحیه سویلشدر وزیادک وفاتنه قدر جانب عراقه کله میوب کاه مکده وکاه مدینهده اقامت ایلشدر .

### ( وفات سعید بن زید ربیع بمصره وفیات )

اللی برنجی سنه هجریه خلالنده عشره مبشره دن ( سعید بن زید ) حضرتلری داربقایه ارتحال ایتدی رضی الله عنه وارضاه . حضرت عمر الفاروقک انشته سی و عمرزاده سیدر و آندن اول اسلام ایله مشرف اولانلردندر . وفاتنده ( سعید بن ابی وقاص ) غسل ایدوب نمازنی دخی ( ابن عمر ) قیلمشدر . ثقه دن روایت اولندیفی اوزره دائماً ابوبکر و عمر و عثمان و علی وطلحه و زبیر و سعید بن ابی وقاص و عبدالرحمن بن عوف و سعید بن زید محاربده رسول اکرمک اوکنده و نمازده آرقه سنده بولورلرایمش . ینه اللی برسنه سنده اصحاب کرامدن ( جریر بن عبدالله البجلی )

و ( ابوبکر بن الحارث ) رضی الله عنهما و ام المؤمنین ( میمونہ ) رضی الله عنہا دار بقایہ ارتحال ایتدیلر .

اللی ایکنجی سنہ دخی فقہا و فضلائی صحابہ دن و مستجاب الدعویہ ذوات دن ( عمران بن الحصین ) رضی الله عنه بصرہ دہ وفات ایلدی .

اللی اوچنجی سنہ دخی ( عمرو بن حزم الانصاری ) و دمشق شام قاضیسی اولان ( فضالہ بن عیید الانصاری ) رضی الله عنہما وفات ایلدیلر .

فضالہ ، اصحاب احدثن اولوب معاویہ خلیفہ اولدقده آنی قاضی نصب ایتمشیدی بوکرہ و فاتندہ معاویہ ، بالذات آنک تابوتنی حامل اولدی و اوغلی عبداللہہ « کل ، بکا اعانہ ایت ، بوندن صکرہ بویله بر جنازہ طاشیمیه جقسین » دیدی .

### وفات زیار

( زیاد بن ابیہ ) برادری معاویہ یه مکتوب کوندروب « بن عراقی صول الملہ ضبط ایلدیم ، صاغ الم بوشدر . آنی ده حجاز ایله مشغول ایدرم » دیو عرض ایتمکله معاویہ اللی اوچ سنہ هجریه سنده حجازی بروجہ الحاق آکا توجیه ایله فرماننی کوندردی .

اهل حجاز آندن خبردار اولنجه تلاشہ دوشمشلر و بر جماعت ( عبدالله بن عمر ) حضر تلرینک یاننه واروب عرض کیفیت ایلدکلرنده ابن عمر ، اللرینی قالدیروب « یارب ! بزى زیادك شرندن حفظ ایت » دیو دعا ایتمش ، آنلرده « آمین » دیمشلر . بحکمة الله تعالی زیاد ، همان کوفه ده ایکن اللی اوچ یاشندہ اولدینی حالده اشبو اللی اوچ سنہ سنده وفات ایلدی . بعض شعرا آنک ایچون مرثیه یاپدی فرزدق ایسه هجویه سویلدی .

### نومبرهات

معاویہ ، اکابر اصحاب کرامک اعتراضندن احتراز ایلدیکی کبی کندوسنک اقرانی اولان کبار بنی امییه دن دخی صاقوردی .

از جمله عمزاده سی اولان ( مروان بن الحکم ) که معاویه شام والیسی  
ایکن او دخی حضرت عثمانک سرکاتبی و مستشار خاصی ایدی . کذلک  
سعید بن العاصی که حضرت عثمان ، آنی تربیه ایله رجال قریش صرہ سنه  
قومشیدی . ایکسی ده خاطری صاییلور امرای امویہ دن اولدقلری حائده  
مدینه ده متوطن ایدیلر . مروان ، مدت مدیده مدینه امارتنده بولتمش  
ایکن معاویه آنی عزل ایله یرینه سعیدی نصب ایتمشدی . بوکره دخی  
سعیدی عزل ایله یرینه مروانی نصب ایلدی . مرامی ایکسینی یکدیگری  
علینہ دوشوروب ده ایکسینی ده انظار ناسده کوچوک دوشورمک ایدی .  
آنلر ایسه او دورده حکم فرما اولان غیرت عصیبه خلل کتورمدیلر .  
یکدیگره ضرر ویرمدیلر .

بروجه بالا زیادک وفاتنده اوغلی ( عیدالله ) شامه کلدی . معاویه  
آننی خراسان امیری نصب ایتدی . عیدالله ، او زمان یکریمی بش  
یاشنده ایدی . خراسانه کیتدی . نهر جیحونی کچوب بخارادن نیچه  
مملکتلر فتح ایتدی .

پک چوق اموال غنائم آلدی و اللی بش سنه سنده بصره والیسی  
اولدی و او زمان ضحاک بن قیس دخی کوفه والیلکنه تعین  
ایلدی .

### بعضی رقیبات

فتح مکده اسلام ایله مشرف اولان اصحاب کرامدن ( سعید بن ربوع )  
یوز یکریمی درت یاشنده و ( خویطب بن عبدالعزی ) یوز یکریمی یاشنده  
واصحاب بدردن ( ابوقتاده الانصاری ) یتمش یاشنده ایکن اللی درت سنه  
هجریه سنده وفات ایلدیلر . رضی الله عنهم .

ینه بوسنه رسول اکرم صلی الله علیه وسلم حضرتلرینک آ زادلولرندن  
( ثوبان ) رضی الله عنه عنزم داربقا ایلدی .

رسول اکرمک آخرت اوغلی ( اُسامة بن زید ) رضی الله عنهما ایله  
( عبدالله بن انیس الانصاری ) رضی الله عنه دخی علی روایة بوسنه وفات  
ایلشردر .

اللی بش سنه سنده دخی ( ابو الیسر کعب بن عمرو الانصاری ) رضی الله  
عنه وفات ایلشدر .

### وفات سعد

عشره مبشره دن سعد بن ابی وقاص رضی الله عنه حضرتلری  
علی روایة اشبو اللی بش سنه هجریه سنده عازم دار بقا اولمشدر .  
اون یدی یاشنده ایکن اسلام ایله مشرف اولوب ابتدا فی سبیل الله قان  
دوکن و اوق آتان اودر . بدر و احده و سائر غزوات نبویه ده هپ  
رسول الله صلی الله علیه وسلم حضرتلریله برابر بولنمشدر . ایران اردولرینی  
بوزان و پای تخت ایران اولان مداخی فتح ایدن و کوفه شهرینی بنا ایلین  
اودر . مستجاب الدعوه اولوب هر خصوصده دعاسی اوق کبی ایشلردی .  
هر کس آنک دعاسندن خوف ایلردی . حضرت عمرک وفاتنده ( اصحاب  
شوری ) دن بریسی ایدی . حضرت عثمان قتل اولندقدن عزلت و اتزوایی  
اختیار ایدی . اوغلی ( عمر بن سعد ) و برادر زاده سی ( هاشم بن عتبہ )  
عثماندن صکره ناسی کندوسنه بیعت ایچون دعوت ایلک ایستدیلر ایسه ده  
اوقبول ایتیوب سمت سلامتی ترجیح ایلدی . بوجهتله جل و صفین وقعه لرنده  
بولمادی . معاویه ، دم عثمانی طلب دعواسیله میدانده چیققدقه آنی جلبه  
چالشدی . سعید ایسه « بن ، بر کونلک مصاحبی سنک مدت حیات  
و ممتکدن دها خیرلو اولان علییه موافقت ایلوب ده بی طرفلنی اختیار  
ایتمش ایکن بنی نصل موافقته دعوت ایلورسین . تعجب ایدیورم » دهرک  
معاویهیه رد ایله جواب ویرمشیدی . صکره حضرت حسن ، امر خلافتی  
معاویهیه تسلیم ایدوب ده جمله ناس معاویهیه بیعت ایلینجه سعد حضرتلری  
دخی جماعتدن آیرلمدی . لکن یوزینه قارشو ( ملک ) تعبیر ایدوب



( خليفه ) ياخود ( امير المؤمنين ) ديمدی . قیزی ( عایشه ) به ديمش که « هنوز اسلام ايله مشرف اولمدن عالم منامده کورددم که : قرا کلق ايجنده قالمشم . ناکاه بر آی کورددم . آکا طوغری واردم . زيد بن حارثه ايله علی بن ابی طالبی وابو بکری کورددم . سز بورايه نه وقت کلديکيز ديو صوردم . شمدی کلديک دیدیلر . بورؤیایي کوردکدن صکره رسول الله صلی الله عليه وسلم حضرتلرينک کيزلوجه ناسی دعوت ایلديکني ایشتمدم . همان ياننه کيتدم ، ایمان ایتدم . ايشته بو اوچندن بشقه بکا اسلامده سبق ایدن اولدی » انتهى .

سعد حضرتلری مدینه یه یدی میل مسافه سی اولان ( عقیق ) نام محله وفات ایلدی . ناس آنی اوموزلرنده طاشییبوب مدینه یه کوتوردیلر . مسجد شریفه ادخال اولندی . نمازینی امیر مدینه اولان مروان قیلدی . حین وفاتنده صوفدن معمول اسکی جبّه سنی ایشه مش « بنی بونکله تکفین ایدیکيز . زیرا بن بدرده مشرکینه ملاقی اولدیغمده بوجبه صرتمده ایدی . آنی بوکون ايجون صاقلادم » ديمش ، ايشته او جبّه ايله آنی دفن ایلدیلر عشره مبشره دن اک صکره وفات ایدن اودر .

رسول اکرم دن مرویدر . بیورمش که ( ابو بکر جتنده در ، عمر جتنده در ، عثمان جتنده در ، علی جتنده در ، طلحه جتنده در ، زبیر جتنده در ، عبدالرحمن بن عوف جتنده در ، سعد بن ابی وقاص جتنده در ، سعید بن زيد جتنده در ، ابو عبیده بن الجراح جتنده در ) .

### ببرک ولی عمره لکی

معاویه ، اوغلی یزیدی ولی عهد ایتمهکله الی آلتی سنه سنده ناس بووجهله یزیده بیعت ایلدی . معاویه نکه اک بیوک خطا لرندن بری بودر . ابتدا آنی بوداعیه یه دوشورن ( مغیره بن شعبه ) ایمش .

شویله که : معاویه ، مغیره یی کوفه والیدکندن عزل ايله یرینه سعید بن العاصی یی نصب ایتمهک فکرنده بولندیغنه مغیره مطلع اولنجه کویا

کندوسی ولایتی ایستمیورمش کبی ناسه کوسترش ایتمک مقصدیه استعفا  
ایتمک اوزره شامه کلدی و معاویه ایله کورشدکدن صکره اوغلی یزیدک  
یانه کوروب دیمش که « رسول الله صلی الله علیه وسلم حضرتلرینک اعیان  
اصحابی و قریشک کبراسی و آنلرک اقرانی کیتدی ، آنجق اوغللری قالدی .  
سن ایسه آنلرک رأیاً افضل و احسنی و سنت و سیاستجه اعلمی سئک .  
سئک ایچون بر بیعت عقد ایلمکدن امیرالمؤمنینی نه منع ایدیور . »

یزید ، بوسوزدن حظ ایدوب « عجبا بودیدیکک شی باشه چیقه بیلورمی »  
دیدکده مغیره « اوت » دیمکله یزید همان پدرینک یانه وارمش . کیفیتی خبر  
ویرمش . معاویه ، مغیره یی چاغروب صورمش . مغیره « یا امیرالمؤمنین !  
کوردک که عثماندن صکره نصل اختلاف وقوع بولدی ، نقدر قانلر  
دوکولدی . یزیدی ولی عهد ایت . اکر سکا بر حال اولورسه ناسه ملجأ  
وسکا خیر الخلف اولور . فتنه واقع اولماز ، قان دوکولمز » ده نیجه معاویه  
« بوخصوصده بکا کیم نصرت ایلر » دیدکده مغیره « بن ، اهل کوفه ایچون  
کافی یم . زیاد دخی بصره یه کافی اولور . بواکی شهردن صکره سکا مخالفت  
ایلیه جک بلده یوقدر » دیمکله معاویه « هایدی ایشکک باشنه کیت و معتمدک  
اولان آدملرله مشاوره و مقاوله ایت » دهرک مغیره یی کوفه یه اعاده ایتمشدر .  
مغیره کوفه یه کیتدی و عزلدن قورتلدیغنه تشکر آ بنی امیه طرفدارانیله  
مشاوره و یزیدک ولی عهد لکنی ترویج ایتدی . آنلرده موافقت ایلدیلر .  
مغیره آنلرک ایچندن اون کیشی سچوب اوغلیله برابر شامه کوندردی .  
آنلرده شامه کلوب معاویه ایله کورشدیلر و یزیده بیعتی ترویج ایلدیلر .  
معاویه آنلره « بوخصوصک اعلاننده عجله ایتمیکنز فقط رأیکزده ثبات  
ایلیکنز » دیدی .

آنلر بوقرار اوزره کوفه یه عودت ایلدیلر معاویه نکه ده بوخصوصده  
عزیمتی قوت بولغله کیفیت بصره والیسی زیاده یازدی .  
یزید ایسه هوا وهوسنه تابع بر شخص مذموم الاطوار اولدیغندن زیاد ،  
بوخصوصده عجله اولنماسنی معاویه یه اشعار و یزیده دخی تهذیب اخلاق

وتعديل اطوار ايلسى لزومنى بالواسطه اخطار ايتدى . يزید دخی بعض افعال مذمومه سندن واز كچه رك بعض مرتبه احوال واطوارى تعديل واصلح ايلدى .

معاويه بنى بومزلقهيه دوشورن مغيره وفات ايلدىكى كې بوخصوصه تانى اولئسنى اخطار ونصيحت ايلن زياد دخی فوت اولدى . لكن معاويه نك بوبابده اولان عزيمتى قوت بولدى . و بوخصوصه موافقت ايچون عبدالرحمن بن ابى بكر ايله عبدالله بن عمره كائى عطيله كوندردى ايسه ده آنلر سمت قبوله يناشمديلر .

آنك اوزرينه معاويه ، امير مدينه اولان مروان بن حكمه امرنامه يازوب « بنم ستم كاله كلدى ، كيكلرم اينجلدى . بدن صكره امت آره سنده اختلاف وقوعندن خوف ايدبيورم . يرمى طوته جق برىنى ولى عهد ايلك ايتيورم . لكن سنكله مشاوره ايتمن برقرار قطعى اتخاذهنى مناسب كورمدم . بوراسنى خيار امت ايله مشاوره ايت . نه ديرلر ايسه بكاييلدر » ديدى .

مروان كىفيتى ناسه بيلدردكده « معاويه اصابت ايلر و اومارزكه حق وصوابى تحريده قصور ايتمز » ديمه ليله مروان كىفيتى معاويه عريض ايتدى . آنك اوزرينه معاويه يازدينى امرنامه ده اوغلى يزىدى ذكر ايتمكله مروان ، آنى ناسه بيان ايتدكده عبدالرحمن بن ابى بكر « سزخلافتى قيصر اق حكمنه قومق ايتيورسكز » ديه رك لسان شدت ايله جواب رد ويردى . برده آرقه سنده بولنان ام المؤمنين عايشه صديقه دخی مروانى تكدير ايتدى . حضرت حسين بن على وعبدالله بن عمر وابن زبير دخی برر برر قالقوب معاويه نك بوتكليفنى رد ايلدى .

معاويه ايسه بلاد سائره كى مأمورلرينه امرنامه لر كوندروب يزىدى تذكار و آنك ايچون مركزه مبعوثلر كوندلمسنى اشعار ايلش اولدينى جهتله اطرافدن دمشق شامه مبعوثلر كلدى . معاويه آنلرى حضورينه جلب ايتدى . خواص امراسندن اولوب كندوسنه تعليمات مخصوصه ويرلش اولان (ضحاك بن قيس الفهرى) سوزده آغاز ايله « يا امير المؤمنين ! سندن

صکره نامه مرجع اوله جق بر ذات لازمدرکه مسلمینک قانلری دو کولمه یه وناسک اموری اصلاح وطرق ومعابر تأمین اولنه. یزید ایسه صاحب رأیدر وعلماً وحلماً افضلمزدر. آنی ولی عهد ایت « دیدی. رجال شامدن بعضیلری دخی قالقوب آنک سوزینی تأیید ایلدیلر. معاویه، بصره مبعوثلرینک رئیس اولان (احنف بن قیس) « سن نه دیر سین » دیدکده، « طوغربسنی سویلیه جک اولسه ق سنندن قورقارز، یالان سویلیه جک، اولسه ق اللهدن قورقارز. سن امیر المؤمنین سین. یزیدک خفی وجلی احوالتی، جمله دن اعلی بیلور سین. اکر آنی الله ایچون وامت ایچون خیرلو کورر ایسه ک بزمه مشورت ایله والا سن آخرته کیدرکن دنیا ایچون آنک حقنمه تدارک کورمه. بزه آنجق سمعاً وطاعة دیمک دوشر » دیدی. آنک اوزرینه اهل شامدن بری قالقوب « بو عراقی نه دیور. بزم سمعاً وطاعة دیمکدن بشقه نه صلاحیتمز وار » دیدی. بونک اوزرینه مجلس طاغلدی. لکن هر کس احنفک نقطقی حکایه ایله سویلشور اولدی.

معاویه ایسه لطف ومدارا ایله اهل عراقک اکثرینی جلب ایتدی. بناءً علیه اهل شام کبی اهل عراق دخی یزیده بیعت ایلدیلر.

فقط حضرت حسین و عبدالرحمن بن ابی بکر و عبدالله بن عمر و ابن زبیر مخالفت ایلدکلرندن اهل حجاز بیعت ایلدیلر. بناءً علیه معاویه بر مقدار سواری ایله جانب حجازه کیتدی. مدینه یه واردقده اول حضرت حسین و عبدالله بن عمر و ابن زبیر و عبدالرحمن بن ابی بکره روی التفات کوسترمدی آنلرده چیقوب مکیه کیتدیلر. ایشته اول ائنده عبدالرحمن بن ابی بکر وفات ایلکله معاویه یه مخالف اولانلردن بری اکسیلمش اولدی. معاویه، مدینه ده منبر نبوی یه چیقوب خطبه اوقوددی و اوغلی یزیدی وصف و ثنا ایتدی « خلافته آندن احق کیم وار » دیدی و بوبابده مخالف اولانلری قتل ایله تهدید ایلدی.

بعده ام المؤمنین عایشه صدیقنک یاننه واردقده حضرت عایشه آکا بو طورندن طولانی تویسخ یوللو نصیحت ایلدی ایسه ده معاویه « نه یاپه یم. بن

یزیده بیعت ایلمد، ناس ده بیعت ایلدی، شمدی بویعقی نقض ایدهلمی « دیو .  
اعتذار ایتدی وبعده چیقوب مکیه کیتدی .

حضرت حسینه « یا ابن رسول الله ، یاسید شباب المسلمین » دهرک روی  
التفات کوستردی . عبدالله بن زبیر وعبدالله بن عمر حقلرنده دخی لطفله  
معامله ایتدی . هرکون اوچنکده حال و خاطرلرینی صوراردی . لکن  
ولی عهدک حقنده آنلره برشی آچازدی . نهایت مناسک حجی ایفا ایلدی .  
آغراقتی یوکلتمدی . وقت حرکتی تقرب ایلدکده اوچنی بردن احضار  
ایتدی و آنلره خطاباً « سزگله اولان حقوقه رعایتمی کوره یورسکنز . یزید  
سزک قرنداشکنز وعمزاده کزدر . آنک خلافتی اقرار ایلمکزی آرزو ایتدم  
او شرطله که عزل ونصب وجبات و تقسیم اموال هپ سزک الکنزده اوله  
وبرخصوصده او سزه معارض اولیه » دیدکده اوچی ده سکوت ایلدیلر .  
تکرار جواب ایتدی . برشی سویلدیلر . نهایت عبدالله بن زبیره توجیه خطاب  
ایتدکده ابن زبیر آکا جواباً « سنی اوچ صورتله مخیر قیلارز . رسول اللهک  
یابدینی کبی یاپ » یاخود ابوبکرک ویا عمرک یابدقلمی کبی یاپ » دیدی .

معاویه « آنلر نه یابدیلر » دیو صوردی . ابن زبیر « رسول الله صلی الله  
علیه وسلم حضرتلری عزم داربقا ایلدی ، کیمسه بی خلافته تعیین ایتدی .  
ناس ، ابوبکره راضی اولدی » ده یینجه معاویه « ایچکزده ابوبکره مانند  
کیمسه یوق » دیمکله ابن زبیر « حقک وار . اوله ایسه ابوبکرک یابدینی کبی  
یاپ که قریشک بنی امیه دن اولمیان برشعبه سندن خلیفه انتخاب ایلدی وایستر  
ایسهک عمر کبی یاپ که خلافتی آتی کشی بینده شورایه حواله ایتدی .  
بو آلتینک ایچنده کندوسنک و باباسنک اوغللری یوق ایدی » دیو جواب  
ویردی . معاویه « بشقه بر دیه جگک واری » دیدکده ابن زبیر « خیر »  
دیمکله معاویه ، دیکر ایکسنه صوردی . آنلر « بزمده سوزیمز آنک  
سوزیدر » دیدیلر .

آنک اوزرینه منبره چیقوب خطبه او قودوی وناسه خطاباً « خیارات ،  
هپ یزیده بیعت ایلدیلر سزده بیعت ایلیکنز » دیو امر ایتدی . ناس دخی



هپ خیار امت بیعت ایلش ظن ایدرک بیعت ایلدیلر . معاویه درحال بنوب مدینه عودت ایلدی . اهل مکة ، حسین بن علی و عبدالله بن عمر و ابن زبیر حضراتنه « سز بیعت ایلمه جک ایدیکز » دیدکلرنده « والله بز بیعت ایلدک » دیملریله ناسه حیرت کلدی . معاویه ایسه مدینه کلوب اهل مدینه دخی رسم بیعتی اجرا ایتدیردکن صکره شامه عودت ایلدی . اوغلنی ولی عهد ائک اخص آمالی ایدی ، آکاده نائل اولدی و کمال مسار و افتخار ایله دمشق شامه واصل اولدی .

### نومبرات ربعمه و فوعات

حضرت عثمانک بن عفانک اوغلی ( سعید ) نزد معاویه کلوب پدرینک کندو - قنده واقع اولان الطاف و عنایتندن بحثله بر مأموریت ایستدی ، اودخی سعیدی اشواللی آلتنجی سنه هجریه سی ایچنده خران والیسی نصب ایتدی . سعید ، خراسانه واروب نهر جیحونی عبور ایله سمر قنده کیتدی و حرب ایتدی . پدرینک صیتی بیوک اولدیغندن عسکر کندوسنه یاور اولغله خیلی فتوحاته مظهر اولدی . ایشته او محاربه ده ( قثم بن عباس ) رضی الله عنهما شهید اولمشدر . اکابر اصحاب کرامدن معاویه نک احتراز ایده جکی ذوات کرام دار بقایه عازم اولدی . کندو اجرا آتنه معارض اوله بیله جک ذاتلر پک آرز قالدی . معاویه آرتق آنلری ده استتقال ایدر اولدی . بناء علیه امیر مدینه اولان مروان بن الحکمى اللى یدی سنه سنده عزل ایله یرینه کندی برادری ( عتبه بن ابی سفیان ) ک اوغلی ( ولید ) ی نصب ایتدی .

معاویه ، بو وجهله هراستدیکنی یامغه مقتدر اولدینی حالده اختیار اولغله عالمه سی ایشه قاریشور اولدی . علی الخصوص همشیره سی ( ام حکم ) ک زیاده نفوذ و اعتباری وار ایدی . بناء علی ذلک کوفه والیسی بولسان مشهور احنف یعنی ضحاک بن قیس ، اشراف عربدن رأى و حکمت صاحبی برذات ایکن اللى سکز سنه سنده معاویه آنی عزل ایله ام حکمک اوغلی عبدالرحمن الثقفی کوفه والیسی نصب ایلدی .



اواناده كوفه طرفنده خوارج ظهور ايتمكله كوفه دن عسكر چيقوب آنلری طاغتمش ايسه ده عبدالرحمانك سوء حال وحركتندن ناشی اهل كوفه آياغه قالقوب آنی طرد ايلدكلرندن ( نعمان بن بشير ) كوفه واليسى نصب اولمشدر .

عبدالرحمن ، شامه عودت ايلدكده والده سنك خاطری ايچون مصر واليسى نصب اولندی ايسه ده بودرلو اجرا آت نابجايه دولت امويه اكبرى قارشو كلمكه مجبور اولديلر .

حتى عبدالرحمن ، مصره عزيمت ايلدكده رجال مصردن مشهور ( معاويه بن خديج ) ايكي قوناقاتي مېدن آنی قارشو ليوب « كوفه ده ياپديغكي بوراده ياپه مزسين . هايدی كیرو كیت « ديمكله » اودخی شامه عودت ايله عرض شكایت ايلشدر .

معاويه بن خديج ايسه مصرك دولت امويه انه كچمسنه اك بيوك خدمت ايلينلردن بری اولغله شامجه پك زياده مظهر اعزاز واحترام ایدی . حتى نزد معاويه به كلكدكده كندوسنه احتراماً يوللر فسلكنلر ايله تزئين اولنوردی . بوكره بروجه بالا عبدالرحمانی مصردن طرد ايلدكدن صكره شامه كلوبده معاويه بن ابی سفيانك حضورينه چيققدقه ام حكم اوراده حاضر بولنغله بو « كيم » در . ديو صورمش ابن ابی سفيان دخی « معاويه بن خديج » در دينجه ام حكم « مرحبا ديه جك آدم دكلدر » ديوب ابن خديج آنی ايشتمكله « لطف ايت يام حكم ! سن تزوج ايتدك ، اما اي اي اولاد ية مدمردك . سن فاسق اوغللك بزم اوزريمزه والی اولوبده كوفه ده کی اخوانمه ياپديغنی بزه ده ياپمسنی ايستدك . او كوفه ده ياپديغنی مصرده ياپه ایدی والله شو اوتوران ( يعنی معاويه بن ابی سفيان ) كریه كورسه بيله بز سنك اوغللكی اويله دوكردك كه باشی آشاغی كلوردی « دينجه معاويه ، همشيره سی ام الحكمه « سن صوص » ديمكله اوده سكوته وارمشدر .

اللی سكر سنه سنده بصره ده دخی خوارج ظهور ايتمش ايسه ده

بصره والیسی ( عیّدالله بن زیاد ) آنلری اوروب پریشان ومضمحل  
یتمشدر .

زیادك خدماقی نزد معاویه ده مقبول اولوب اوغللری دخی پدرلری  
سلککنده بولندقلرندن اللی طقوز سنه سنده معاویه ، عبدالرحمن بن زیادى  
خراسان امیری نصب ایتمشدر .

### وفات اعیانه

هجرت نبویه نك اللى آلتنجی سنه سنده امّ المؤمنین ( جَوْرِيَه ) رضی الله  
عنها دار بقایه ارتحال ایتدی . ترجمه حالى آلتنجی سنه هجریه وقایعی  
صره سنده مرور ایتمشدر .

اللى یدنجی سنه دخی صغار صحابه دن وکبار بنی امیه دن وایران  
فاتح لرندن حضرت عثمانك دایى زاده سی اولان ( عبدالله بن عامر ) واصحاب  
کرامدن ( عبدالله بن قدامة السعدی ) و ( جیر بن مطعم القرشی ) و عبدالدار  
وغللرندن واکابر قریشدن ( عثمان بن شیبه بن ابی طلحه ) رضی الله عنهم  
وامّ المؤمنین ( امّ سلمه ) رضی الله عنها حضراتی دار عقبایه ارتحال ایتدیلر .  
بو ، عثمان بن شیبه حالا کعبه نك مفتاحی اللرنده اولان ( بنی شیبه ) نك  
جد اعلا سیدر .

( امّ سلمه ) ابو سلمه نك زوجه سیدر ، ابو سلمه نك والده سی ( برّه  
نت عبدالمطلب ) اولمغله رسول اکرمك خاله زاده سیدر . اول باول  
یمان ایدنلردن اولوب زوجه سی ام سلمه ایله برلکده ابتدا حبشه وبعده  
مدینه یه هجرت ایلشدر . احد جنککنده آلدینی یازده دن فوت اولمغله  
ام سلمه طول قالمشیدی . اصیل زاده وصاحبه حسن وجمال اولوب ابوبکر  
وعمر آنك ازدواجنه طالب اولدیلر ایسه ده قبول ایتهمشیدی . صکره  
رسول اکرم ایستدی . آکا موافقت ایتمکله رسول اکرمه تزویج اولنمشیدی .  
نایت محترمه برسیده ایدی .

اللی سکز سنه سنده دخی ام المؤمنین عایشه صدیقه رضی الله عنها عزم داربقا ایلدی . رضی الله عنها . آکا دائر یوقارولرده نیچه قصه لر یازلمش اولدیغندن تکراره حاجت یوقدر .

ینه بو سنه صفینده معاویه ایله برلکده بولنان صحابه دن ( عقبه بن عامر الجهنی ) وینه صحابه دن ( سمره بن جندب ) و ( مالک بن عباد الغافی ) رضی الله عنهم وفات ایشلردر .

خدیجه الکبری رضی الله عنها حضرتلرینک برادر زاده سی اولوب فتح مکده اسلام ایله مشرف اولان مشهور ( حکیم بن حزام بن خویلد ) رضی الله عنه بوسنه یوز یکر می بوقدر یاشنده اولدینی حالدہ دنیادن کوچوب عالم عقبایه کوچمشدر .

اللی طقوز سنه سنده دخی دهات وشجعان عربدن مشهور ( قیس بن عباد الانصاری ) رضی الله عنه حضرتلری مدینه ده وفات ایلدی . سخنی وعلیجناب و معاویه نك صایوب صاقیندینی بر ذات حصافت نصاب ایدی صفینده مشاهده اولنان یارارلقلری جزء سابعده محرردر .

صغار صحابه دن و اخیار بنی امیه دن واو وقتک حکمنجه خاطری صایلور ذواتدن ( سعید بن العاصی ) و اصحاب کرامدن ( مرّة بن کعب السلمی ) و مؤذن نبوی ( ابو محذوره ) ایله اصحاب صفه دن ( ابو هریره ) رضی الله عنهم حضرت آتی دخی اشبو اللی طقوز سنه هجریه سنده عازم دار بقا اولمشلردر .

ابو هریره ، مصالحة ( حدیبه ) سنه سنده اسلام ایله مشرف و اصحاب صفیه ملحق اولدقدن صکره بر آن خدمت مخصوصه نبویه دن آیرلدی آنکچون چوق حدیث حفظ وروایت ایشلدر .

« رأس ستینده ، یعنی آلتش سنه سنده واقع اوله جق مصیبتدن الله صیغینورز » دیر ایش . بونی بالذات رسول اکرم صلی الله علیه و سلم حضرتلرندن می ایشتمش ، یوخسه همراز نبی اولان حذیفه بن الیماندن مو بیلم . فقط دیدیکی وقوع بولمشدر که بروجه آتی آلتش سنه سنده کربله فاجعه سنک مبادیسی ظهور ایشلدر .

اصحاب احدثن اولوب آلتینجی سنه هجریه ده سفارتله قیصره کوندرمش اولان مشهور ( دحیه کلبی ) وفضلائی صحابه دن واهل بدردن ( حارثه بن نعمان الانصاری ) وسابقین اولیندن وابتدا حبشه وبعده مدینه منوره یه هجرت ایلین اصحاب کزیندن اولوب ترجمه حالی جزء رابعده امرای عسکریه صره سنده سبق ایدن ( عمرو بن امیه الضمری ) واصحاب احدثن اولوب وقعه جلدن اولجه حضرت علی طرفدن بصره والیسی اولان ( عثمان بن حنیف الانصاری ) وبنی ثقیف قبیله سنک مبعوثلری مدینه منوره یه کلوبده طرف نبویدن آنلره امیر نصب اولنان ( عثمان بن ابی العاص الثقفی ) واهل بدردن ( عتب بن مالک الانصاری ) و( سراقه بن عمرو الانصاری ) واصحاب کرامدن ( سهل بن الحنظله بن الربیع الانصاری ) و ( عبدالله بن مالک الازدی ) وبیعت رضوانده حاضر اولان اصحاب کرامدن ( معقل بن یسار ) و ( ناجیه بن جندب ) و ( عبدالله بن مغفل ) و ( هند بن حارثه ) و ( ابوعلبه الحشنی ) وعظمای قریشدن ( ابو جهم وعقبه ده ) و بدرده حاضر اولان ( نعیان بن عمرو بن رفاعه الانصاری ) هپ بو ائنده عازم دارالقرار اولمشلردر . رضی الله عنهم . اصحاب کرامدن ( ابوقیس الجهنی ) و خندق غزاسنه حاضر اولان ( صفوان بن المعطل ) وفتح مکه کونی ( مزینه ) بیراغنی حامل اولان ( بلال بن الحارث ) رضی الله عنهم دخی آلتینجی سنه وفات ایشلردر .

ینه بوسنه اصحاب کرامدن ( وائل بن حجر الحضرمی ) وفات ایشلردر . قبیله اولاد ملوک دندر . پدری حضر موتک بر قطعه سنده مشهور بر حکمدار ایدی . فتح مکه دن صکره خلق هر طرفدن فوج فوج مدینه منوره یه کله رک اسلام ایله مشرف اولدقلری صره ده ( وائل ) دخی اسلامه راغب اوله رق مدینه یه کله شدی . رسول الله صلی الله علیه وسلم حضرتلری اولجه آنک کله جکنی اصحابنه بیلدرمش و اوزاق محلدن وائل کلیور دیو خبر ویرمش ومدینه یه کلوب حضور نبوی یه داخل اولدقده رسول اکرم آکا زیاده اکرام والتفات بیورمش ایدی . حتی رداء شریفی آنک آلتنه دوشه مش وهر کس جامعه کلسون دیو ندا ایتدرمش ایدی .

وائل، حضور نبويده اسلام ايله مشرف اولدقده رسول اکرم آکا خير ايله دعا وباشنى مبارك ايله مسح ايتيش وعشر ويرمك اوزره زير تصرفده يولان يرلري آکا تملك بيورمش ايدى .

آنى مدينه منوره حارجنده (حرّه) موقعه قوندرمق اوزره معاويه بن ابى سفيانى مأمور ايتمكه وائل دوه سنه بنوب معاويه دخى يايان ويالين آياق آنكه برابر كيدركن حرارت شمس ايله قيزمش اولان قوملردن آياقلىر يانمغله « بنى رديف قيل » يعنى تركيگه آل ديوب وائل ايسه « سن ملوكه رديف اوله جق ذواتدن دكلسين » ديمكه معاويه « اويله ايسه بارى نعللريگي وير، كيهيم. زيرا يرلرك صيجاغندن آياقلم يانيور » ديدكده وائل « افراد ناس ، ملوك نعللريني كيه مز ، فقط بنم دوه مك كولكه سنده يورى. بوشرف سكايتشور » ديمش ايدى. مؤخرأ وائل ، كوفه ده ساكن اوله رق صفينده حضرت على ايله برلكده بولندى ومعاويه مقام خلافته كچدكن صكره وائل كابوب آنكه كورشدكده معاويه، آنى كندى سريرى اوزرينه چيقاروب ياننده اوتورتدى وماجراني كندوسنه حكايه واخطار ايتدى . وائل « كشكه سنى تركيمه دكل ، اوكمه آلمش » اولاديم ديدى . سبحان محول الحول والاحوال. وائل، جزيرة العربك براوجنده كوچوك برقطعه يه متصرف اولان برملاك اوغلى اولدينى جهتله رؤساي قريشدن اولان ابو سفيانك اوغلنى تركيسنه آلمغه ونعللريني كيدرملكه تنزل ايتديكى حالده معاويه ، قوت وقدرت خلافت ايله بتون ممالك اسلاميه د، كيف مائشا متصرف اولدينى زمان آنى سريرينه چيقارمش وشيمه كريمه اسلامك بر اثر جليلنى كوسترمشدر .

### فترت

بالاده بيان اولندينى اوزره معاويه نك صاقدنيى كبار اصحاب كزين دار بقايه كيتدى كندوسنه اقران كچين كبار بنى اميه دخى ارتحال ايتدى.



کندوسنک اقراندن اولان مروان بن الحکم اگرچه بر حیات ایسه ده اوده معزولاً ومنکوباً مدینه ده مقیم ایدی .

الحاصل معاویه نك اقرانی انقراض بولدی . میدان کندوسنه قالدی وطالعی یاوراوولوب هر مرارنه نائل اولدی . کندوسنک خلافتی ملک وسلطنت قیلندن اولوب سلطنتک تواریثی ایسه امور طبعیه دن اولدیغنه مبنی اوغلی یزیدی ولی عهد ایلك هوسنه دوشدی . یزید ، اگرچه هوا وهوسنه تابع سفهادر ایسه ده انسان کندی قصورینی کورمیدی کی اولادی نه قدر کوتو اولسه آنک ده عیوبنی کورمز . بناء علیه یزیدی ولی عهد ایدوب ناسی آکا بیعت ایتدردی وستنی سکسنه قریب اولدیغدن دنیاچه بشقه ایلشیکی قالمشیدی . فقط حسین بن علی و عبدالله بن عمر و عبدالله بن زبیر ، یزیده بیعتدن امتناع ایلش اولدقلرندن آنلری اقناع وارضایه چوق چالشدی ، چاره بوله مدی . کندوسنک وفاتندن صکره اوغلی یزید حقنده بو اوچی طرفندن ایقاع مشکلات اولمق وبوسبيله اهل اسلام آرمسند قان دوکلمک خاطره سی کندوسنه داغ درون ایدی .

واقعا ناس اوچنه ده مائل ومتوجه ایدی . فقط عبدالله بن عمر ، عبادات ایله مشغول برذات کریم الصفات اوله رق اوغراشمی سومزیدی . شوقدر وارکه ناس آتی خلافته انتخاب ایده جک اولورلر ایسه رد ایلزدی . اما عبدالله بن زبیر ، اوغراشیجی برذات اولمغله بنی امیه آندن خوف واحتراز ایلردی . لکن حفید سعید نبوی حسین بن علی وار ایکن آنلره نوبت کلزدی . افکار ملیه هپ آکا متوجه ایدی .

مرویدرکه : برکون مسجد رسولده اصحاب کرامدن ابوسعید الخدری و عبدالله بن عمرو بن العاص و دیگر بعض ذوات رضی الله عنهم بر خلقه اولوب اوتورلر ایکن حسین بن علی رضی الله عنهما یانلرندن کچوب سلام ویردکه سلامنی آلمشله فقط عبدالله سکوت ایدوب آنلر فارغ اولدقه صوت جهیر ایله « وعلیک السلام ورحمة الله وبرکاته » دیدکدن صکره « اهل ارضدن اهل سمایه اک سوکیلی کیمدر ، سزه خبر ویره میی ، دیمش آنلرده » پک اعلی



خبر وير « ديدكړنده » ايسته بويكندركه ايام صفيندن صكره بكا برسوز  
 سويلدى. بندن راضى اولمى غنډمه جهان ده كر « ديمكله ابوسعيدالحدري  
 « عذر ديله سهك اولمازمى « ديوب عبدالله دخى « بلى « ديمش. همان فرداسى  
 صباحلين حضرت حسينك حضورينه وارمق اوزره قرار وىرمشلى و وارمشلى،  
 حضرت حسينك حضورينه كيىرمشلى. ابوسعيدالحدري ، عبداللهك مسجد  
 شريفده سويلديكنى حكايه ايتمش. حضرت حسين دخى « يا عبدالله ! اهل  
 ارضك سمايه اك سوكيليسى بن اولديغمى بيلورميسين « ديدكده « رب كعبه  
 حقيقچون اويله در « ده بنجه حضرت حسين « اويله ايسه نچون صفينده هم  
 بنمله، هم پدرمله محاربه ايتدك . حال بوكه پدرم بندن خيرلو ايدى « ديو  
 بيورمش. عبدالله دخى « اوت اويله در. لکن پدرم، برکون بندن رسول اکرمه  
 شكایت ايليوب يار رسول الله عبدالله بتون كيجه قائم اولور و کوندوزين صائم  
 اولور « ديدكده رسول اکرم ( يا عبدالله نماز قيل واويو . اوروج طوت  
 و افطار ايت و عمروه (يعنى پدريکه ) اطاعت ايله ) ديو بيورمشيدى. صفين  
 کونی اوزريمه يمين ايتدى . بن ده ميدان حربه چيقمغه مجبور اولدم . اما  
 والله قليچ چکمدم ، سونکو استعمال ايتدم ، اوق آتدم « ديواعتذار  
 ايلشدر .

ايسته حضرت حسين ايله محاربه ايدنلر بيله آنك علو قدريني بويله  
 اعتراف ايدرلردى . بناء عليه آنك مخالفتي اوزرينه يزيدك تحت سلطنتده  
 راحت طورده ميه جنى خاطره سى هر كسك خاطرينه كلوردى (والله يفعل مايشا)

### ( ذنات معاويه )

آلتمشجي سنه هجريّه خالانده معاويه ، برکون منبره چيقدى . خطبه  
 او قودقدن صكره « اى ناس ! اوزريکزده مدت امارتم اوزادى . سزى  
 اوصاندردم ، بن ده سزدن اوصاندم . بن سزدن افتراقى آرزو ايدر اولدم ،  
 سزده بنم افتراقى آرزو ايدر اولديکز . لکن بندن صكره سزه بندن  
 خيرلوسى کلز . نته کيم اول کانلر ، بندن خيرلو ايديلر . دنيلمشدرکه هر کيم

لقاء باری نی ایستر ایسه باری تعالی دخی آنک لقاسنی ایستر. یارب! بن سنک ملاقاتکی ایستیورم، سنده بنم ملاقاتمی اراده بیور و بی مبارک ومسعود قیل « دیدی. متعاقباً خستهلندی واوغلی یزیدی حضورینه جلب ایتدی. یزیده دیمش که « اوغلجغزم! بن سنی سفرلر ایله طولاشمقدن مستغنی وهرایشی سکا آسان قیلدم. دشمنلری یموشاتدم. عربی سکا سرفرو ایتدردم. کیمسه نك جمع ایتدیکی اسباب واموالی جمع ایتدم. ایمدی اهل حجازی کوزته که آنلر سنک اصلگدر وسکا کله جکلك اكه محترمدرلر. اهل عراقی ده کوزته، هرکون سندن برماورک عزانی ایستلر ایسه عزل ایت. برماوری عزل ایتک، کندو اوزریکه یوزبیک قلیجی تشهر ایتدرمکدن اهنودر.

اهل شامی ده کوزته که آنلر سکا همراز اولورلر. اکر دشمندن شههك اولورسه آنلردن استعانه وایش بتدیکی کبی آنلری یرلرینه اعاده ایت. زیرا بشقه دیارده چوق اکلورلر ایسه آنلرکده اخلاقی بوزیلور. بن سنک ایچون کیمسه دن قورقم، الا حسین بن علی و عبدالله بن عمر و عبدالله بن زبیردن قورقارم. فقط ابن عمر، عبادات و طاعاته منهك وطریق تقوايه سالکدر. هرکس سکا بیعت ایلینجه اوده بیعت ایلر. اما حسین بن علی، خفیف برذاقدر! اهل کوفه آنی، سنک اوزریکه خروج ایتدیرم بیلورلر. آکا ظفریاب اولدیغکده عفو وصفح ایله معامله ایت. آنک بزه قراتی و بیوک حتی وارد و سبطنیدر. سنک اوزریکه ارسلان کبی هجوم ایده جک آنجق عبدالله بن زبیردر. آکا ظفریاب اولورسهك امان وزمان ویرمه، آنی پاره پاره ایت «

بعده معاویه نك خستهلکی آغرا لاشدقده « رسول الله صلی الله علیه وسلم حضرتلری بکا برکوملک کیدرمشیدی. تبرکاً آنی بوکونه قدر حفظ ایتدم و برکون کسدیکی طرناقلری برشیشه ایچنه قویوب صاقلامشیدم. و فاتمه اوکوملکی بکا کیدریکنز و او طرناقلری سحوق ایله کوزلریمه و آغزیمه قویکنز. بلکه آنلرک حرمتنه جناب حق بنی عفو ایدر « دیدکدن صکره

« بن اولديكم زمان جود وسخا دخى بنمله برابر اولور ونجه ناسك عطيله لرى منقطع اولور . سائلرك اللرى بوش قالور ، ديدى وحياتندن مايوس اولدقده » ( ذى طوى ) نام محله ساكن برقرشى اولوبده امارت ايله مشغول اولمايه يدم ، ديو بيان تأسف ايتدى وآلتش سنه هجريه سى رجبنده وفات ايلدى . رضى الله وعفى عنه .

ضحاك بن قيس ، هان معاويه نك كفنلرني آلوب منبره چيقدى برخطبه اووقودى وديدى كه « معاويه ، عربك دست قوت و قدرتى ايدى . الله تعالى آنكله فتنه بي دفع ايلدى وآنى قوللرى اوزرينه حكمدار قيلدى وبر وبحرده عسكرينى يورتدى وآنكله نجه بلده لرى فتح ايتدى . لكن اوده اللهك برقولى ايدى . شمدى وفات ايلدى . ايشته كفنلرى بودر . آنى بوكفنلر ايچنه صاروب قبره قويه جنز وآنى عمليه له مشيت آلهيه يه ترك ايليه جكرز آندن صكره قيامته دك دنيا هرج مرجدر .

ضحاك ، بووجهله خطبه سنه ختام ويردكدن صكره معاويه نك نمازنى قيلدى ويزيد بن معاويه جالس سرير سلطنت اولدى .

معاويه نك اوچ اوغلى اولوب برى بوزيد وديكرلرى عبدالرحمن وعبدالله در . عبدالرحمن كوچوك ايكن فوت اولمشدر . عبدالله دخى احمق برشخص ايدى .

معاويه ، اوزون بويلو ، بياض رنكللى ، مهيب و غايت صبور وحليم ايدى . حلمى ، بين العرب ضرب مثل اولمشدر . بركون ، حضورينه بر آدم كلوب پك آغر و غليظ معامله ايتديكى حالد معاويه سكوت اياكله « بوكاده مى صبر و تحمل ايدو جكسين » دنيلد كده « بزمك وسلطنتمزه تعرض ومداخله ايتمينلرك سوزينه ايلشميز » ديمش . « الك زياده كيمى سورسين » دنيلد كده « بنى ناسه الك زياده سوديرنى سورم » ديو جواب ويرمش .

كعب الاخبار رحمة الله عليه « بوامتدن كيمسه ، معاويه قدر صاحب ملك اوليه جقدر » ديمش ومعاويه نك خلافتدن اول وفات ايلش وسوزى طوغرى چيقمشدر كه معاويه يكرمى سنه قدر شامده بلكلك ايتدكدن صكره

یکرمی سنه به قریب بلا منازع و مزاحم مقام خلافتده بولندی ، اما اخلاقه منازع و مخالف ظهور ایتدی و بعض ممالك اللرندن کیتدی . ملت اسلامیهده ابتدا حرمده طواشی قوللانان و باشی اوجنده بکجیلر اقامه ایدن معاویه در .

ممالك اسلامیهده اساس تمدنی وضع ایدن و حتی پوسته اصولنی تأسیس ایله بلدهدن بلدهیه تاتار ایشلهتن دخی اودر . ابن عباس رضی الله عنهما حضرتلری « ملک و سلطنته معاویهدن چسبان کیمسه کورمدم » دیمش اولدینی مرویدر . علی بن ابی طالب رضی الله عنهما حضرتلرندن مرویدرکه « معاویه نك امارتنی بكده اوقدر کریه کورمیکز . زیرا آنی غائب ایدرسه کز باشرك آرقه دن ظهور ایتدیکنی کوررسکز » دیو بیورمش . فی الواقع او یله اولدی . نته کیم وقایع آتیه دن معلوم اولور .

### دور بنیر

بروجه بالا آلتش اوچ سنه هجریه سی رجبنده ( یزید بن معاویه ) یه بیعت اولادی . اوزمان مدینه ده ( واید بن عتبہ بن ابی سفیان ) وده که ده ( عمرو بن سعید بن اادی ) و بصره ده ( عیدالله بن زیاد ) و کوفه ده ( نعمان بن بشیر ) امیر ایدلر .

یزیدک ، باباسی زماننده کندوسنه بیعتدن امتناع ایتش اولان اوچ ذاتدن بشقه فکر و اندیشه سی یوق ایدی . بناءً علیه ولیده معاویه نك وفاتی مشعر تحریرات یازدی و بشقه جه بر شقه کوندروب « بهمه حال حسین بن علی ایله عبدالله بن عمر و عبدالله بن زبیردن بیعت آله سین » دیو قطعاً امر ایتدی .

ولید بو امرلری آلتجه سابقا امیر مدینه اولان مروانی دعوت ایله آنک رأینی صورددی . مروان « شمندی اوچنی ده جلب ایت و یزیده بیعت ایتدر . قبول ایتزلر ایسه بیونلرینی اور . عبدالله بن عمر ، قتالی سومر

و خلافت کند و سنه تکلیف اولمه دجه ادعای خلافت قیام ایتمز . اما دیگر  
ایکیسی معاویه نك وفاتنی ایشته دکلری کبی برر ناحیه کیدوب ناسی بیعت  
دعوت ایدر لر « دیمکله ولید همان حضرت حسین ایله ابن زبیره مباشر  
کوندروب آنلری دعوت ایلدی « هایدی سن کیت ، بزده کلور ز « دیدیلر .  
لکن ولیدك مصالح ناس ایله مشغول اولدینی بر وقت اولمغه ایکیسی ده  
شبهه دوشدیلر .

حضرت حسین ، اهل بیتنی و آدم لرینی جمع ایله حکومت قوناغنه کیتدی  
و آنلری قبوده براغوب « بر سس ایشیدیر سه کز همان ایچرو کیریگز »  
دیو تنیه ایتدی . کندوسی ولیدك یانه کیردی ، سلام ویردی ، اوتوردی .  
مروان دخی حاضر ایدی . ولید مکتوبلری اوقودی حضرت حسین  
« اَللّٰه وَاَنَا اِلَيْهِ رَاجِعُونَ . معاویه به الله رحمت ایلسون . بیعت بحثه  
کلنجه بنم کبی بر آدم کیزلو بیعت ایتمز . سن ناسی جمع ایدوب بزیه دعوت  
ایلی سین » دیدی . ولید ، صلح و مسالمتی سور بر ذات اولدیغندن حضرت  
حسینك عودتنه رخصت ویردی . مروان ایسه بنی هاشمه عدو اکبر  
اولدیغندن « حسین ، شمدی بیعت ایلدن صاوشوب کیدر سه صکره  
طرفیندن بر چوق آدم لر قتل اولمه دجه آنی اله کچوره مز سین . آنی  
حبس ایله و بیعت ایتمز ایسه قتل ایت « ده نیجه حضرت حسین یرندن  
فیرلایوب مروانه سبب ایدرک قبودن طیشارو چیقدی و سعادتخانه سنه  
کیتدی .

مروان ، ولیده خطاباً « بر دها بو فرصتی اله کچوره مز سین » دیدکده  
ولید آکا جواباً « یا مروان ! والله بتون دنیا ملکی بکا ویرله جک اولسه  
حسینی قتل ایدم . والله یارین حضور باریده دم حسینك حسابنی ویره جک  
کشینک حالی یماندر » دیدی .

حضرت حسیننه بر حال اولسه بنی هاشمه کلی ضعف و پریشانلق  
کلوردی . فقط آندن بتون افکار ملیه متأثر اوله رق دولت یزید دخی  
تمنیدن صار صیلوردی . مروان اکرچه بنی هاشمک سرکاره کچمسنی

ایستمزدی . لکن معاویه دن صکره کندوسی بنی امیه نك اولوسی اولدینی جهتله یزید کبی بر سفیهک کندو اوکنه کچمسندن طولایی متأثر اولسی دخی طیبی ایدی . بناء علیه حضرت حسینی آرهدن چیقارمق همده دولت یزیدک زوالنه بر یول آچق اوزره اورته لقه بر قاریش یقلق وقارغشه لق ظهوری مروانک منفعتنه موافق دوشردی . ولید ایسه ملت اسلامیه عندنده بتون بتون منفور و ملمون اولق درجه سینه قدر فدا کارلق ایده مزدی . امویلرک ایچنده دهآ آنک کیلر دخی ا کیسک دکل ایدی .

اما عبدالله بن زبیر ، ولیدک یانه وارمیوب همان خانه سینه کیتدی و آدملرینی و طرفدارلرینی جمع ایتدی . ولیدک آدملری کلوب آنک خانه سنی محاصره ایتدکه برادری ( جعفر بن زبیر ) ی ولیده کوندردی . جعفر ولیدک حضورینه چیقوب « برادرم عبدالله اورکش ، کله مدی . بو کون مساعده ایت . ان شاء الله یارین کلور ، دیدی ، ولید دخی موافقت ایلدی .

عبدالله ، برادری جعفرایله برلکده کیجه مدینه دن چیقوب فرع یولیه مکیه کیتدیلر . ولید ، آرقه لرندن عسکر کوندردیسه ده آنره ایریشه مدیلر . ولید و آدملری آنلرایله مشغول ایکن فرداسی کیجه حضرت حسین دخی اوغللرینی و برادرلرینی و برادر زاده لرینی و بالجه اهل بیتی آلوب جانب مکیه عزیمت بیوردی . فقط برادری محمد بن حنیفه ، مدینه ده قالدی . و حضرت حسینه نصیحت یوزندن « قرداشم ! ناس ایچنده ائک زیاده سودیکم سنسین و عندمده هرکسدن عزیزسین . هرکسدن زیاده سکا مخلص و خیرخواهم . یزیده بیعتدن ایراغ اول و ممکن اولدینی قدرشهرلرده اکلنمه . ناسه مأمورلر کوندر ، کندیگه دعوت ایله . بیعت ایدرلرسه الله تشکر ایدرسین . بشقه سینه بیعت ایئک اوزره اتفاق ایدرلرسه سنک دین و عقل و عروتگه نقصان کلز . بن آندن قورقارمکه بر بلده یه وارد یغکده ناس اختلافه دوشر . بر طائفه سی سنکله اولور ، دیکر طائفه سی علیگده بولنور . ایکی طائفه مقاتله ایدرلر ، ایئک مزراق سکا طوقونور . سنک کبی ذاتاً و اباً



واما بوامتك اك خيرلونسى اولان بر بيوك آدمك دى هدر واهلى ذليل اولور » ديدكده حضرت حسين « يازمه كيديم برادر » ديو صورمش محمد بن حنفيه « مكه كيت. اوراده مطمئن اولورسه كه نه اعلا، والا بلده بلده طولاشورسين، انجام كاره منتظر اولورسين » ديو جواب ويرمش. حضرت حسين « نصيحتكى قبول ايتدم » ديهرك برادرينه وداع ايدوب و مدينه دن چيقوب مكه و ارمشدر .

ابن زير ايسه مكه واروب « بيت شريفه التجا ايتدم » ديهرك رفقاسيله برابر بر كوشه ده عبادات ايله مشغول اولمقده ايدى . بيت شريفه التجا ايدنلرك تعرضدن مصون اولدقلى معلومدر .

حضرت حسين ايله ابن زير مدينه دن چيققدن صكره وليد، عبدالله بن عمره خبر كوندروب آنى بيعته دعوت ايلدكده « ناس بيعت ايلرسه بن دمه بيعت ايلرم » ديو جواب ويرمكله و آندن ديكر ايكيسى قدر خوف اولنماغله وليد آنى حالى اوزره ترك ايتمشدر .

بونك اوزرينه يزيد بن معاويه ، وليدى عزل ايله مدينه امارتى دخى مكه اميرى (عمرو بن سعيد بن العاصى) يه توجيه ايتدى. اودخى مدينه يه كلدى و (عمرو بن زير) قورنداشى عبدالله بن زيره دشمن اولديغندن آنى كندوسنه ضابطه مديرى نصب ايتدى و ايكى بيك نفرله آنى مكه اوزرينه سوق ايلدى. عمرو بن زير ، مكه يه تقربنده برادري عبدالله ي اطاعته دعوت ايلدى. عبدالله دخى اهل مكه دن كندوسنه اطاعت ايدنلر ايله چيقوب لدى الحاربه مظفر اولدى و برادري عمرو طوتدى ، حبس ايتدى. عمرو، تاوافاته قدر محبوس قالدى .

بوصورتله عبدالله بن زير ، جانب حجازده شان و شهرت قازاندى . لكن حضرت حسين اوراده ايكن آندن غيرى يه كسه نك بيت ايله جكي دركار ايدى . بناء عليه عبدالله بن زير ، دائما زوار ايله برلكده حضرت حسينى زيارت ايلر و آنك مجلس مشورته داخل اولور ايدى. لكن ميدان كندوسنه قورسه دعوايه قيام ايمكه مستعد ايدى .

## حضرت حسینک کوفیه عزیمتی

حضرت حسین، بروجہ بالا مدینہ دن چیقوب دہ مکہ کی درکن انتخاب کزیندن (عبدالله بن مطیع) آکا ملاقی اولوب (اوغورلر اولسون. مکہ یه وارد یغکده صاقین کوفیه کیمیه سین. اوراسی برمشئوم بلده در. اورادم پدرك مقتول و برادرک مخذول اولدی. حرم شریفدن ایرله. سن سیدالعرب سین.. اهل حجاز سکا هیچ کسه یی معادل طوتماز. ناس هر طرفدن طوپلانونب سکا کلور) دیمشیدی.

اهل کوفه ایسه معاویه نك وفاتی و حضرت حسین ایله عبدالله بن عمر و عبدالله بن زبیرک بیعتدن ابا ایتدکلرینی ایشدکلری کبی حضرت حسینی. کوفیه دعوت ایلدیلر و کوفیه ورودنده نعمان بن بشیری طرد ایله جکلرینی اشعار ایتدیلر. بومأله کندوسنه یوز اللی قدر مکتوب کوندردیلر.

حضرت حسین دخی آنلره عمزاده سی (مسلم بن عقیل بن ابی طالب) ی کوندردی. مسلم، کوفیه واردقده اوتوز بیکه قرب آدم، حسینه بیعت ایلدی.

بعض رجال کوفه طرفندن یزیده عریضه لر تقدیم اولنه رق نعمان بن بشیرک ضعف ورخاوتندن بحثله «بورایه امریکگی انفاذ ایده جک قوی الاقدار بر آدم کوندردی» دنیلمکله یزید دخی نعمان بن بشیری عزل ایله کوفه والیلکنی بصره والیسی (عبیدالله بن زیاد) ه توجیه ایتدی.

ابن زیاد کوفیه کلوب احواله واقف اولنجه ناسی اطاعته دعوت وتشویق ایتدی. حضرت حسینه بیعت ایلش اولانلر ایسه مسلمک باشنه اجتماع ایله ابن زیاد ی محاصره ایتدیلر. لکن ابن زیادک تشویقاتیله بوجمیت طاغلدی. ابن زیاد، مسلمی طوتدی واشبو آلتمش سنه سی ذی الحجه سنک سکزنجی کونی آنی اعدام ایتدی. ایشته او کون حضرت حسین دخی مکهدن جانب عراقه عزیمت بیورمشیدی.

شویله که : کوفه لیلک دعوتی اوزرینه حضرت حسین کوفه یه کیده جک اولدقدہ عبدالله بن عمر آ کا نصیحت اوله رق « خروج ایتمه . زیرا جناب حق رسول الله صلی الله علیه وسلم حضرت لرینی دنیا و آخرت آرسنده مخیر قیلدقدہ رسول اکرم آخرتی اختیار ایتدی . سن آنک لهندن برپاره سین ، دنیایه نائل اولماز سین » دیدی . حسین ایسه عزمنده ثابت اولدیغدن ابن عمر بکا ایدرک وداع ایتدی . عبدالله بن عباس دخی ( یا عززادهم ! بن سنک ایچون اهل کوفه دن خوف ایدرم آنلر غدار بر قومدر . بوبلدهده اقامت ایله . سن اهل حجازک سیدی سین و بهمه حال بورادن چیقہ جق ایسه ک باری یمنه کیت . زیرا اوراده پدریکک شیعه می و طرفدارانی واردر . اوراده قلعه لر و منیع موقعلر واردر » دیدکده حضرت حسین « ای عززادم ! والله بیلورم که سن ناصح مشفق سین . لکن نه چاره نیت و عزیمت ایلش بواندم » دینجه ابن عباس « باری اولاد و عیالکی برلکده کوتورمه . قورقارم عثمان کبی اولاد و عیاللریکک کوزلری اوکنده مقتول اولور سین » دیدکدن صکره حضرت حسینک عزمنده ثابت اولدیغنی آ کلاینجہ « طوغریسی مکدن خروجک ایله عبدالله بن زبیری دلشاد ایلسه ک کرک . زیرا سن بوراده ایکن آ کا کیمسه نظر ایتمز » دیوب یانندن چیقدی و ابن زبیرک یاننه کلوب « کوزک آیدین . میدان سکا قاله جق . ایشته حسین ، جانب عراقه کیدیور ، حجازی سکا ترک ایدیور » دیدی .

حضرت حسین ، بالجمله اهل بیتی و متعلقاتی ایله برلکده ذی الحجه نک سکرنجی کونی مکدن چیقوب کوفه یه عزیمت ایلدی . یاننه عرباندن پک چوق جمعیتلر طوبلاندى . اثنای راهده شاعر مشهور ( فرزدق ) آ کا قارشو کلوب عرض اخلاص ایتدی و « ناسک قلوبی سنکله در . اما سیوفی بنی امیه ایله در . قضا ایسه کوکدن اینر والله تعالی دیلدیکنی ایشلر » دیدی . حضرت حسین « دیدیکک طوغریدر . امر اللهکدر . دیلدیکنی یاپار . قضا اکر مطلبه موافق دوشرایسه اللهه حمدایلرم و خلاف مأمول ظهور ایدر ایسه نیتی حق و قلبی تقوی اوزره اولان کیمسه آنی قید ایتمز » دیدی .

بعده عمزاده سی مسلمك كوفه ده مقتول و آ كا تابع اولانلرك پریشان و مخذول اولدقلری خبرینی آلتجه کیفیتی یاننده کی خلقه بیلدردی و (ایستین عودت ایلسون « دیو بیوردی . آنك اوزرینه یاننده کی جمعیتلر صاغه ، صوله طاغیلدی . معیتنده یالکیز مکدن کندوسیه برابر چیقمش اولانلر قالدی .

( بطن عقبه ) یه واصل اولدقده بر عرب قارشو کلدی « الله ایچون کیرو دون . زیرا مزراقلرك اوجنه وقلیجلرك یالمانه قارشو کیدیورسین » دیدی . حضرت حسین ، آ کا دخی « دیدیکك بکا خفی دکلدر . لکن اللهك امرینه کیمسه غلبه ایده مز » دیدی .

### وقایع سنه ۶۲

بروجه بالا حضرت حسین کوفه یه طوغری عزیمتله ( سیراف ) نام محله واصل اولدقده ( عیدالله بن زیاد ) ك سرکرده لرندن ( حر بن یزید التمیمی ) ایکی بیک سواری ایله ( قادسیه ) طرفدن کلوب حضرت حسینك یاننه وصول بولدی .

حضرت حسین ، آنلره وعظ و نصیحت ایتدی و « بن ، بورایه سزك دعوتنامه لریکنز ایله کلدیم . اکر سز عهد کزدن نکول ایتدیکیز ایسه بن ده کیرو دونوب کلدیکم یره کیدرم » دیو بیوردی .

حر بن یزید « بنم اويله دعوتنامه لردن خبرم یوق . بن سزی کوفه یه ، عیدالله بن زیادك حضورینه کتورنجیه دک یانکزدن آیرلامغه مأمورم » دیدکده حضرت حسین « اولوم بوندن اچوندر » دیدی وهان عودت ایلك اوزره اصحابنه « ینکیز » دیو امر ویردی . لکن ، حر آ کا مانع اولدی . حضرت حسین ، قادسیه طریقك صول طرفنه میل ایتدی . حر دخی برابرنبجه کیدیوردی .

اثنای راهده حضرت حسین ، درت کشی یه راست کلدی . کوفه نك حالتی صوردی . ایچلرندن بریسی که ( مجمع عامری ) ایدی . « اشراف

و رؤسا چوق رشوت آلوب حرارلرني طولدرديلر . جمله سي سنك عليه كنده در . سائر ناسك قلبلري سكا مائل ايسه ده . يارين قيليجلري سنك اوزريكه تشهير اولنور » ديدى .

ينه او درت دن بريسي كه ( طرناح بن عدى ) ايدى » كوفه دن چيقديغمده كوفه خارجنده چوق عسكر كوردم . ممكن ايسه آنلره برقارش ياقلاشمه » ديدى .

لكن حضرت حسين ، كوفه يولنه دوزلمش اولديغندن كيرو دونه ميوب چاره سز يولنه دوام وكيجه بر آزار او يويوب آرام ايتدى .

فرداسي كه محرمك ايكنجي پنجشنبه كوني ايدى . صباحلين حضرت حسين رفقا سيله برابر حركت ايلدى وصول طرفه ميل ايتدكجه حر ، آنلري شدت ايله كوفه طريقه دونديرر ايدى . بر محله قوندقارنده ابن زياد طرفندن بر مباشر ايله بر مکتوب كلدى كه ، « بو مکتوب هر زرده الكه واصل اولورسه حسيني توقيف ايت و آني صوسز وايصسز بر محله قوندر » ديو يازلمشدى . حر ، بوكيفتي حضرت حسينه بيلديردى . حضرت حسين جوارده كائن بر قريه يه قونقم ايستدى . حر ، « بن بوگا مقتدر دكلم .

بو مباشر ، امير طرفندن جاسوسدر و بن آنك رأييله عمل ايتمكه مأمورم » ديدى و حضرت حسيني بر صوسز محله قوندردي . حضرت حسين « بو يرك آدى ندر » ديو صوردي . « كربلا » در . ديدكارنده « بوراسي كرب و بلا صاحبي بر يردر . غرائب احوال دندر كه پدرم ، صفينه كيدر كن برابر ايدم . بورايه او غرا ديغمزده بو يرك آدى ندر؟ ديدى . كربلا ديدكارنده حكم قضاء الهى بويله در كه آل محمد صلى الله عليه وسلم دن بر طائفه بورايه نزول ايده جك و آنلرك باشلرينه : كله جك كله جكدر . ديمشيدى » ديدى و قضاء الهى يه تسليم اولدى .

### فاجعه كربلا

فرداسي كوفه دن ( سعد بن ابى وقاص ) رضى الله عنه حضرت تلمرينك



اوغلی ( عمر ) درت بیك سواری ایله کربلايه کلدی . سببی بو ایدی که :  
( دیلم ) قیله سنك عصیانی اوزرینه ( ابن زیاد ) آنی ( ری ) امیری نصب  
ایدرک یدینه امر نامه سنی ویرمش ودرت بیك سواری ایله آنی او طرفه  
کیتمك اوزره نامزد قيلمش ایدی . حضرت حسینك کوفه یه طوغری  
عزیمتی تحقق ایدنجه ابن زیاد ، آنی چاغروب « معیتکده کی عسکرله حسین  
اوزرینه کیت . آنك غائله سی بر طرف اولدقدن صکره محل مأموریتکه  
کیدرسین » دیمکه عمر ، بو ایشدن عفویخی استدعا ایتدکه ابن زیاد « پك  
اعلی . اويله ایسه ری ایچون ویردیکمز امر نامه یی کیرو ویر » دیمکه  
عمر « فرداسی کونه قدر دوشونهیم » دیهرك مهلت ایسته مش ، ابن زیاد  
دخی مهلت ویرمشیدی .

عمر ، کلوب اصداقاسیله مشاوره ایتدکه جمله سی آنی حسین اوزرینه  
کیتمکدن نهی ایتمش وکندوسنك همشیره زاده سی اولان ( حمزة بن مغیره  
بن شعبه ) کلوب « دایی ! الله ایچون اولسون حسیننه قارشو کیتمه .  
کناهارک اولورسین . والله یر یوزینك ملک وسلطنتدن آیرلق شويله  
طورسون ، دنیادن چیقوب کیتمك حسینك قانه کیروبده او حالده حضور  
باری یه وارمقدن خیرلودر » دیمکه عمرده « پك اعلی » دیمش وکیجه درین  
افکاره طالب « نه یاپهیم ، ری امارتندیمی کچهیم ، یوخسه حسینك قتلیله  
رسوامی اولایم ، حسینك قتلنده محقق آتش وار . ملک ری دخی طاتلی  
شی » دیهرك دوشونوب تردد وحیرته قالمش .

فرداسی ابن زیاد واروب « سز ، بنی بو منصبه تعیین ایتدیکمز .  
ناسده ایشدی . بنی محل مأموریتکه کوندرسه کزده حسین اوزرینه اشراف  
کوفه دن برینی کوندرسه کز » دیدی وبعض ذواتك اسملرینی سویلیدی .  
ابن زیاد « بن ، سنکله مشاوره ایدمك دکم . سن عسکریمزله کیدرسهك  
فها والا بزم امر نامه مزی کیرو ویر » ده یینجه عمر « کیدرم » دیوب  
بروجه بالا کربلايه کلشدر .

حب مال وجاه انسانی نه مرتبه شاشیر وفضل چاه فلا کته دوشورر .



سعد بن ابی وقاص رضی الله عنه حضرت نلری ، دنیایی آیاغی آلتنه آلوب  
عندنده مال وجاهك اصلا قدر و قیمتی یوق ایدی . لكن بر حیات ایکن  
جنتله مبشر اولدینی حالدہ طوپراق اوزرنده کزردی . عمر ، او بابانک  
اوغلی ایدی . لكن آ ز وقت ظرفنده افکار واطوار عالم او قدر تغیر  
وتبدل ایتشیدی که عمر بن سعد ، حضرت حسینک علو قدر و شانتی بیلور  
ایکن ری منصبندن کچہ میوب کوز کوره کندوسنی نار جهنمه نامزد ایلمکه  
جسارت ایلمشدر . ( حب الدنيا رأس کل خطیئة )

عمر بن سعد ، کربلا یه کلدکده حضرت حسینہ آدم کوندروب  
مأموریتنی بیلدردی . حضرت حسین دخی « بن بورایه اهلینک دعوتیه  
کلدم . ایستمز ایسه کز دونوب کیدرم » دیوب خبر کوندردی .  
عمر ، کیفیتی ابن زیادہ یازدی . اودخی « حسین بزم پنجه مزه دوشد کدن  
صکره قورتمقی ایستور . سن آ کا تکلیف ایت . یزیدہ بیعت ایلسونده  
اوزمان بن ده ایجابنی دوشونورم و بیعتدن امتناع ایدرسه آ کا صو ویرمه »  
دیو جواب یازدی .

بناءً علیه عمر بشیوز آتو کوندردی . واروب حضرت حسینک  
نهردن صو آلمسنه حائل و مانع اولق اوزره آنک قوندینی محل ایله نهر  
آرهنه قوندیلر .

ایچلرندن ( عبدالله بن ابی الحسین الازدی ) حیقوب « یا حسین !  
اوزاقدن صویه نظر ایدرسین . اما صوسزلقدن اولنجیه دک برقطره سنی  
طاده مزسین » دیو ندا ایتدی .

حضرت حسین آنک بو طورندن متأثر اوله رق « یارب ! بونی صوسزقله  
تلف ایت » دیو دعا ایتدی . دعایی هدف قبوله اصابت ایلدی که صکره  
بوخشین حریف ، برمدش علنه مبتلا اولوب برقطره صوایچسه قوصار  
وحرارت باصوب ینه صو ایچر وینه قوصاردی . نهایت بویله صوسزقله  
جان ویرمشدر .

بروجه بالا وقوع بولان صو منازعه سندن صکره حضرت حسین ،

عمر بن سعدہ خبر کوندروب ایکی عسکر آره سنده بولشدیلر ، کورشدیلر ، نه سولشدکاری لایقیله معلوم اولمדיسه ده روایت موثوقه یه نظراً حضرت حسین « بکار خست و یریکز ، کیر و دونهیم و یاخود ثغور و حدود اسلامیه دن بر محله واروب بر مرابط نفرکی دین اسلامه خدمت ایلیهیم و علی روایه یاخود دمشق شامه وارهیم » دیمش . عمر دخی بونی ترویج یوللو ابن زیاد یازمش . ابن زیاد ، خواص امراسنی جمع ایدوب کیفیتی در میان ایتدکده ( شمر بن ذی الجوشن ) قالقوب « حسین سنک الکه دوشمش ایکن آنک بوتکلیفنی قبولی ایده جکسین . والله او بووجهله صاووشوب کیدر سه قوتی زیاده لشور و سنک قوتک ضعفه یوز طوتار . کړک حسین ، کړک اصحابی سنک حکمکه راضی اوله رق تسلیم اولمیدرلر . سن ولی الامر سین . دیلر سه ک عفو ایدر سین . والله بن تحقیق ایتدم که عمر ، ایکی عسکر آره سنده حسین ایله بتون کیجه کوریشوب قونوشو یورمش « ده نیجه ابن زیاد « حقک وار » دیهرک عمره خطاباً ( حسین و اصحابی ، بنم حکممه راضی اوله رق تسلیم اولورلر ایسه آنلری سالماً بکا کوندروا کر امتناع ایدرلر ایسه حرب ایت و آنلری آتله چیکننت . اکر سن ده امریمی اجرا ایتمز ایسه ک باشبو غلقدن واز کچ و عسکری شمره تسلیم ایت ) دیو بر امرنامه یازدی . شمره دخی « آل بو امرنامه یی عمره کوتور . اکر موجبنه حرکت ایلر سه آنی دیکله و امرینه اطاعت ایله والا سن آنک و عسکرینک اوزرینه امیر سین . ایشکی کور ، عمر کده بوینی اور ، باشنی بکا کوندروا دیوب بومأله الله برده امرنامه ویردی .

شمر ، کربلایه واردی . او امرنامه یی عمره ویردی . عمر « وای الله جزاکئی ویرسون . نه چیرکین خبرله کلدک بنم مرام اصلاح ایدی . حسین ، والله تسلیم اولماز . ( الولد سرا بیه ) دیدی .

شمر « نه یاپه جقسین » دیو واردی عمر « نه یاپهیم » چاره سز حکمنی انفاذ ایده جکم « دیهرک همان عسکرینی حضرت حسینک اوزرینه یورتدی . اوزمان محرمک طقوزنجی پنجنه کونی وقت عصر ایدی .

حضرت حسين، چادرينك او كنده باشنى ايكي ديزلرى اوزرينه قويوب  
 طالمشيدى. همشيره سى (زينب) ياننه كلوب اوياندردى. حضرت حسين  
 «شمى عالم منامده رسول الله صلى الله عليه وسلم حضرتلرني كوردم (بزه  
 كله جكسين) ديو بيوردى» ده نيجه زينب «واه بزلره يازيق» ديهرك اللريني  
 يوزينه اوردى. حضرت حسين «قزقزداشجغم! سزه نه وار. الله تعالى  
 سزه لطف و عنایت ايلر» ديدى. همان برادري (عباس) كلوب «بو عسكر  
 سنك اوزريگه كليور» ديدى. حضرت حسين، آنى عمره كوندروب  
 يارينه قدر مهلت ايستدى اودخى رؤساي عسكرله مشاوره ايدوب يارينه  
 قدر مهلت وىردى و عسكريني كيرو چويردى.

بعده حضرت حسين، اصحابنى جمع ايله بر كوزل خطبه اوقودى و آنلره  
 دعا ايتدى. بعده «سزه اذن وىردم. كيجه قراكلوغنده صاوشكز. هر يركز  
 اهل بيتمدن برينك النى طوته رق بلاد و قرايه طاغللكز. جناب حق جمله كزه  
 خيرايله مكافات بيورسون. دشمنلر آنحق بنى طلب ايدرلر، بكا ظفرياب  
 اولدقلىرنده سائرينك آرقه سنه دوشمزلر» ديدكده برادرلرى و برادر  
 زاده لرى و عمزاده لرى «بزبوني ياپه ميز. الله كوسترمسون سكا بر حال اولورسه  
 بز آندن صكره صاغلاق ايستميز» ديملريله حضرت حسين (بنى عقيل) ه  
 خطاباً «ايچكزدن مسلمك اولجه شهادتى سزك ايچون يتشور. بارى  
 سز صاوشوب كيديكز» ديينجه «صكره ناسه نه ديهلم. بيوكمزي و افنديمزي  
 واك خيولو عمزاده لريمزي ترك ايتدك، آنلره برلكده اوق آتمدق، قليج  
 اورمدق، آنلرك نه ياپدقلىرني بيلميمزي ديهلم. والله بزبوني ياپه ميز. بزه  
 سندن صكره ياشامق حرام اولسون» ديديلر.

حضرت حسينك فداكار يولداشلارندن (مسلم بن عوسجه الاسدى)  
 قالقوب «بز سنك حقكى ادا ايله حضور باريده معذور اولميهلمى. والله  
 اودشمنلرك كو كسلارنده مزارغمي قيروبده قليجله باشلرينه اورمدقجه

سندن آیرلم. سلاح اولمسه ده اولنجیه دک طاش ایله جنک ایدرم « دیدی . سائر یولداشلری دخی بویه سویلدیلر .

آنک اوزرینه حضرت حسین « چادرلریکزی صیقلاشدیریکنز وایپلرینی بربرینه طولاشدیریکنز . آرقه کزی وصاغ وصولکزی چادرلر ایله محفوظ قیلوب ده یالکنز دشمنه قارشو طوریکز « دیدی . آنرده ایله یابدیلر وکیجه لین برچوق اودون وقاش طوپلایوب چادرلرک آرقه سنده کی آلچق محله آنلری ییغیدیلر وبرنوع استحکام یاپوب بردرجه یه قدر آرقه لرینی تأمین ایتدیلر .

فرداسی که یوم عاشورا ایدی . عمر، علی الصباح عسکری نی یورتدی . حضرت حسین دخی عسکری نی تعییه ایتدی . عمرک عسکری آتی بیک قدر اولوب حضرت حسینک عسکری ایسه اوتوز ایکی سواری و قرق پیاده فداییلردن عبارت ایدی .

بروجه بالا چادرلرک آرقه سنده کی اودون وقاش ییغنه آتش ویرلدی یانمغه باشلایوب آرقه ده آتشدن براستحکام پیدا اولدی .

حضرت حسین، دوه سنه بنوب میدانه چیقدی . دشمنلره خطاباً « ای ناس ! بنم کیم اولدیغمی دوشونکنز ، صکره ده وجدانکنزه رجوع ایدیکنز . باقکنز که بنم قلم وهتک حرمت سزه حلال اولورمی . بن سزک پیغمبریکزک قیزینک اوغلی دکلی یم ، وصیسی وعمزاده سی اولان ذاتک اوغلی دکلی یم . رسول الله صلی الله علیه وسلم حضرتلرینک حدیث شریفی سزه واصل اولمیدی که برادریم ایله بنم ایچون ( سز شباب اهل بیتک سیدلری سگزر و اهل سنتک سروردیده سی سگزر ) دیو بیورمشیدی . اکر اینانماز ایسه کز ایچکزده بونی خبر ویره جک ذاتلر واردر . ( جابر بن عبدالله ) ، و ( ابوسعید ) و ( زید بن ارقم ) ه صوریکز . آنلر رسول اکرم دن بو حدیث شریفی ایشدکلرینی سزه خبر ویرلر . بندن نه ایستیورسکنز . ایچکزدن برینی قتل ایتدمی ، یا خود اموالکزی غصب ایتدمی . یافلان ویا فلان ! بورایه کل دیو بکا دعوتنامه کوندرمدیکزمی . اکر بنی ایستیورسه کز براغکنز ، کیرو دونوب محله

کیده‌یم « دیدی و (قیس بن اشعث ) « سز، ابن زیادك حکمی اوزرینه تسلیم اولسه گز اولمازمی « دیدکده « خیر . والله اولماز. سزه ذل و مسکنت ایله کندی می تسلیم ایده‌م « دیوب دوه‌سندن ایندی .

حضرت حسینك صاغ قول سرکرده‌سی اولان ( زُهَیر بن القَین ) بر قصر اوق اوزرنده مسلح اوله‌رق میدانه چیقوب « ای ناس ! بز سزی جبّار اوغلی جبّار اولان عیدالله بن زیادك علیه دعوت ایدیورز « دیدی . اشقیا ، زهیری سبّ و ابن زیادی ثنا ایتدیلر و « بز، سنك صاحبگی و معیتده کیلری قتل ، یاخود اخذ و گرفت ایله ابن زیاده تسلیم ایتدکجه بورادن آریلیر « دیدیلر . زهیر دخی « یا عبادالله ! فاطمه‌نك اوغلی نصرته ، سمیه‌نك اوغلندن احقدر واکر آکا نصرت ایلجه‌ك ایه‌کز آنی قتلدن صاقنکز . آنک یولنی آچکز . باری دمشق شامه کیتسون . شهه ایتم که عمراده‌سی ( یزید بن معاویه ) بوندن ممنون اولور « دیدی .

آنک اوزرینه عمرک صول قول سرکرده‌سی اولان شمر ، آکا براوق آتدی ، زهیر دخی آنی سبّ ایتدی . و « بن سکا خطاب ایتیورم . سن بر حیوانسین . ظن ایتم که کتاب‌اللهدن ایکی آیتی درست اوقویه بیله‌سین . یوم قیامتده سنی عذاب الیم ایله تبشیر ایدرم « ده‌نجه شمر « الله سنی ده صاحبگی ده هلاک ایتسون « دیدکده زهیر « سن بنی اولوم ایله می قورقودویورسین . والله سننگله مخلص اولمقدن ایه‌سه اولومی ترجیح ایدرم « دیدکدن صکره یوکسک سس ایله « عبادالله ! بو آلق و جانی حریف سزی آلداتسون . والله ذریت محمدك قاتنی دوکنلر ، محمدك شفاعة نائل اولمازلر « دیدی . بعده حصرت حسینك امریله کیرو دوندی .

عمر ، بوجه بالا اردوسیه حضرت حسین اوزرینه حرکت ایلدکده سرکرده‌لرندن ( حرّ بن یزید ) آنک یاننه کلوب « الله سنی اصلاح ایتسون . بوذات ایله مقاتله ایده‌جکمی‌سین « دیمش و عمر « اوت ایده‌جکم « ده‌نجه حرّ بن یزید « یا اوزاتک تکلیف ایتدیکی وجهلردن برنی قبول ایتسه‌ك اولمازمی « دیدکده عمر « اوت والله بنجه اولور ، امانه یاپه‌یم که سنك امیرك

قبول ایتیمور « دیو جواب ویرمش . حرّ ایسه یواش یواش حضرت حسینه یا قلاشد قجه کندیوسنه رعشه کلکه باشلامش . کندی قومندن ( مهاجر بن اوس ) « والله سنک حالک غریبدر . هیچ بر وقعهده سندن بو حال کورمدم . اهل کوفه نك اشجی کیمدر ده نیلسه سنی کوستردم « ده نیجه حرّ آکا جواباً « والله نفسی جنت ایله جهنم آره سنده مخیر قیلیورم و جنتک اوزرینه بشقه شی ترجیح ایدم یورم « دیدکن صکره قصر اغنی تپدی و حضرت حسینک یانه کلدی « الله بنی سکا فدا قیلسون . یا ابن رسول الله ! سنک عودتکّه مانع اولان و سنی بوراده توقیفایدن نم . والله قومه عرض ایتدیکم صورتی قبول ایتیه جکارینی وایشک بو پره سهیه کله جکنی بیلدم . بن شمدی سکا کنه مهن توبه ایدرک کلدیم . او ککده اولنجیه دک چالیشه جقم . بو عزیمتم عجبا توبه نصوح اولورمی « دیو صورددی . حضرت حسین دخی « الله تعالی سنی عفو ایدر « دیو بیوردی .

حرّ هان کندو قومنک پیشکاهنه طوغری ایلر ولدی . ( ای قوم ! حسینک تکالیفندن برینی قبول ایتیمز میسکنز که الله تعالی ده سزی عفو ایتسون ) دیو ندا ایلدی . عمر بن سعد « بوکا بریول بولسم بنده حصولی آرزو ایدردم « دیدی . حرّ سوزینه دوام ایدرک ( ای اهل کوفه ! سز حسینی دعوت ایلدیکز . اوغورنده جان فدا ایدرز دیو سویلدیکز . صکره قتلنه قصد ایلوب اطرافنی احاطه ایتدیکز . بوراده محصور قالدی . آنی نصاری و یهودی و مجوسک ایچدیکی فرات صویندن محروم قیلدیکز . اهل بیتی ایله برابر صوسزلتمدن بی مجال اولدی . محمدک ذریقی حقنده نه فنا معامله ایدیورسکنز . اکر تائب و مستغفر اولوبده بو حالدن کچمز ایسه کنز الله تعالی سزی صوسزلق کوننده سقی ایتمز « ده نیجه دشمنلر آنی سبّ ایتدیلر و اوزرینه اوق آتدیلر . اوده دونوب کلدی . حضرت حسینک حضورنده طورددی . عمر بن سعد که کوکلسز اوله رق بر باشبوغ اولوب آنجق بلای حب جاه ایله بویله بر چیرکین ایشده بولنه یوردی . هان



عسکرى يوروتدى و براوق آلوب آتدى « شاهد اولكيز. ابتدا اوق آتان  
بنم » ديهرك ناسى اشهاد ايتدى وعسكرى اوق جنكنا باشلاتدى .

زيادك معقلرندن ( يسار ) ميدان مبارزه چيقوب ار ديلدى . ( عبدالله  
بن عمير الكلبى ) آ كا قارشو چيقوب آنى اعدام ايلدى .

بعده ، عبيدالله بن زيادك معقلرندن ( سالم ) چيقوب عبدالله حمله  
ايتدى . عبدالله آنى ده اولدردى . لكن النى سپر ايتمش اولديغندن آنك ده  
پارمقلى كسيلمش ايدى .

هان عبداللهك زوجه سى ( ام وهب ) انه بر عمود آلوب قوجه سنك  
يانه واردى « آنام بابام سكا فدا اولسون . اولاد فاطمهك اوغورنده  
مقاتله ايت » ديدى . عبدالله آ كا « سن كىرو دون » ديدكده « سنكله  
برابر اولدكجه دونم » ديديسده حضرت حسينك امريله كىرو دوندى ،

دشمن اردوسنك صاغ قول سركرده سى اولان ( عمرو بن الحجاج  
الزبيدى ) سواريسى ايله هجوم ايتدكده برو طرفدن اوزرلرينه اوق  
ياغديرلدى . كيمى مقتول كيمى مجروح اولدى .

ايچلرندن ( ابن حوزه ) نامنده بر جاهل حريظه شاشمازميسين كه  
« اى حسين ! سنى جهنم ايله تبشير ايدرم » ديمسونمى !

حضرت حسين آ كا خطاباً « سن كاذبسين . سنك ديديكك كى دكل .  
بلكه بن رحيم و شفيع و مطاع اولان ربك حضورينه كيدرم » ديدكدن  
صكره « يارب بوشخصى جهنمه سوق ايت » ديدى .

ابن حوزه ، غضبه كلوب حدت و شدت ايله آتى سوردى . آتى  
اوركوب دوشدى . خيئك آياغى اوزنكیده قالدى . آت قاجوب آنى  
سوروكلهرك و طاشدن طاشه چارپه رق تلف ايتدى .

( مسروق بن وائل الحضرمى ) « عجبا حسينك باشنى اله كچوروب ده  
ابن زياددن بر رتبه نائل اوله بيلورمى يم » ديو دوشونوب طورر ايكن  
حضرت حسينك دعاسى اوزرينه ابن حوزهك نصل اذيتلى بر اولوم ايله

جانی جهنمه اصارلیوب کیتدیکنی کورنجه « بن، فیما بعد اهل بیت ایله مقاتله ایتم » دهرک صاوشوب کیتدی .

محاربه قیزشدقده شقیلر طرفندن ( یزید بن معقل ) میدانه چیقوب حضرت حسینک خواص اصحابندن ( بریر بن حضیر ) خطاباً « یا بریر ! کوریورمیسین . ربک سکا نه یابدی » دیدکده او دخی « ربم حقمده خیر وسنک حقکده شر، خلق ایتدی » دیمکله یزید آکا « سن یالان سویلیورسین » ده نجه بریر « کل سنکله مباحله ایدلم ، یعنی لعنله شهلمده صکره مبارزه یه چیقلم » دیوب او دخی موافقت، ایلکله هان « الله تعالی کاذبه لعنت ومبطلی هلاک ایتسون » دهرک مباحله وملاعنه ایتدکن صکره مبارزه یه چیقدیلر . ابتدا یزید بر حمله ایتدی . بریره ضرر ایدمده ، بعده بریر بر قلیج اوردی . یزیدک مغفرینی یاردی قلیجک اوجی دماغنه ایردی .

بعده بریرک اوزرینه ( رضی بن منقده عبده ) هجوم ایتکله قوجاق قوجاغه کلدیلر . نهایت بریر ، آنی یقیدی کوکسنه اوتوردی . ( لکن کعب بن جابر الازدی ) کلوب بریری آرقه سندن مزراق ایله اوردی و قلیج ایله ایشنی بتوردی . رحمة الله علیه . بعده کعب دونوب کیر و کلدکده زوجه سی قارشولیوب « یا کعب ! سن ابن فاطمه نك دشمنلرینه اعانه وسید اهل قرآء اولان بریری اعدام ایتدک . بوندن صکره ابدی سنکله لاقیردی ایتم » دیدی .

بعده ( عمرو بن قرظة الانصاری ) میدانه چیقوب حضرت حسینک اوغورنده شهید اولنجه دك مقاتله ایتدی . برادری اشقیا طرفنده بولمغله « یا حسین ، یا کذاب بن کذاب ! قرنداشمی اضلال ایتدک ، قتلنه سبب اولدک » دیو ندا ایتکله حضرت حسین دخی « الله تعالی سنک قرنداشکه هدایت وسنی اضلال ایتدی » ده نجه اودخی « سنی قتل ایتمز ایسم الله بنی هلاک ایتسون » دهرک هجوم ایتدی هان ( نافع بن هلال ) قارشو چیقوب او خیتی اوردی ، یره دوشوردی . لکن رفقاسی یتشوب قورتاردی . بالاده ذکر ی سبق ایدن ( حر بن یزید ) حضرت حسین اوغورنده

غایت شدتلی محاربه ومقاتله ایدیوردی . بوآراق یزید بن سفیان ، آنکله مبارزه چیقشدی . حرّ، آکا امان وزمان ویرمه رک اوروب اولدردی . اوسره ده ( مُزَاهِم بن حَرِیْث ) میدان چیقوب اردیلدی . آنی ده ( نافع بن هلال ) قارشولوب اعدام ایلدی .

کوفه اردوسی، حضرت حسینک عسکرینه نسبتله بره التمش راده سنده، یاخود دها زیاده اولدیغندن حضرت حسینک غلبه سنه مادهٔ احتمال ویرلمز ایسه ده باشبوغ اولان عمر بن سعد، بوجه بالا کولکسز اوله رق بومأموریتی قبول اتمش اولوب معیتنده کی سرکرده لر ایچنده دخی قلباً حضرت حسین طرقدار اولانلر بولندیخی حالده حضرت حسین طرفنده بولنان فداایلرک مبارزه ده غلبه لری کوفه رؤسانی اورکوتدی .

بناءً علیه صاغ قول سرکرده سی اولان عمرو بن الحجاج ( ای ناس ! بیلورمیسکز کیملرله محاربه ایدیورسکز . اقلّ قلیل برجمات ایله . اگر بر طاش آتسه کز آنلری محو ایدرسکز . ای اهل کوفه ! انضباط و اطاعت آلتنده بولنکیز . دیندن آریلوب ده امامه عاصی اولانلرک قتلنده تردد و اشتباه ایمیگز ) دیدکده عمر بن سعد دخی « رأی بودر » دهرک جمعیت ایله هجوم ایتمک اوزره ناسی مبارزه دن منع ایتدی .

حضرت حسین آنی ایشیدنجه « ای عمرو بن الحجاج ! سن ناسی نم عایمه می تحریک وتشویق ایدیورسن . والله روحلریکز قبض اولنور ایکن دیندن آریلوب چیقان کیملر اولدیغنی اوکرنورسکز » دیو بیوردی .

عمرو ایسه نصیحت قبول ایدر کروهدن اولیوب همان فرات جهندن هجوم ایتدی و ( مسلم بن عوسجه ) ایله مقاتله ایدرک آنی یره دوشوردکن صکره دونوب کیتدی .

مسلم، هنوز تسلیم روح ایتدن حضرت حسینک صول قول سرکرده سی ( حبیب بن مظاهر ) آنک یانه واردی « سنک سقوطک بکا پک تأثیر ایتدی . سنی جتله تبشیر ایدرم . اگر آرقه کدن سکا لاحق اوله جغمی بیلمسم .

ایستردم که بکا بروصیت ایلیه سین ده بن ده سنک وصیتکی یرینه کتوره یم « دیدکده مسلم ، الیه حضرت حسینیه اشارت ایلیه رک « ایشته بونک اوغورنده جان ویره سین. دیو سکا وصیت ایلم « دیدی وتسلیم روح ایتدی (رحمة الله علیه رحمة واسعة) مسلمک شهادتی ، رفقاسنک پک کوجنه کیتمشیدی . لکن اوده نفسنی اوجوز صامیوب نیچه یارارقلر ابرازیله نیچه اشقیایی جرح واعدام ایتمشیدی .

مسلم ، تسلیم روح ایدنبجه جاریه سی « واه ، یا ابن عوسجه « دیو فریاد ایتمکله عمروک آدمیری دخی « مسلمی قتل ایتدک « دیو ندا ایتدکده دشمنک پیاده سر کرده سی اولان ( شیت بن ربی ) ایشیدوب ( الله بلاکزی فرسون . سز کندی اللریکز ایله کندیگز ی افنا ایدیورسکز . مسلم کبی یرمردک قتلیم می نمون ومفتخر اولیورسکز . والله بن آذربایجان محاربه سنده آنک آلتی مشرکی قتل ایتدیکنی کوردم . اولیه برذاتک قتلیمه افتخار اولنورمی « دیدی وپک زیاده متأثر اولدی .

چونکه بوابن ربی ، کندی همشهریلرندن آیریله میوب موقعی محافظه ایتمکده ایسه ده اول و آخر بو محاربه بی کریه کورو یوردی . حتی « الله تعالی یوبلد هالینسه اصلا خیر ویرمز . تعجب ایتزمیسکز که : بزلر ، علی بن ابی طالب و اوغلاری ایله برلکده اوله رق بش سنه آل ابی سفیان ایله محاربه ایتدک ، صکره بو اوغلنک علیهنه قیام ایلدک که او شمدی یر یوزنده کی خلقک اک خیر لوسیدر . بز شمدی آل معاویه وابن سمیه زانیه ایله برابر اوله رق آنکله مقاتله ایدیورز . بونه بیوک ضالته در ، دیر ایدی .

اوصره ده صول قول سر کرده سی اولان معهود ( شمر ) دخی برشدتلی هجوم ایتدی . حضرت حسینک فدایی یکیتلری ده غایت مردانه مقابله ومقاتله ایتدیلر . هله سواریلری اوتوز ایکی نفردن عبارت اولدقلری حالده قیلان کبی هر نه طرفه هجوم ایدرلر سه کوفه سواریلرینی یاروب طایغیدیورلردی . ایشته اوصره ده ( عبدالله بن عمیر ) فوق العاده بهادرلق ایدوب دشمنک

بللو باشلیلرندن ایکیسنی اولدرمش و نیچه لرینی اوروب یره دوشورمش ایدی. نهایت کندوسی دخی رتبه شهادته نائل اولمشدر.

کوفه سواریسنک سرکرده سی اولان (عروۃ بن قیس) باشوغلری اولان عمر بن سعه خبر کوندروب «کورمیورمیسین بو جزئی سواریدن سواریمز نه لر چکیور» دیه رک پیاده سرکرده سی (شیت بن ربیع) یه «سن کیت» دیوب شیت ایسه بروجه بالا بو محاربه دن متنفر بولن دیغنه مبنی «بندن بشقه آدم بوله میورمیسین» دیه رک اعتذار ایلدیکندن عمر دخی آندن واز کچوب، بشیوز تیرانداز ایله (حصین بن نمیر) ی کوندردی.

تیراندازلر کلوب حضرت حسینک سواریلری اوزرینه اوق یاغدرمغله آنلر دخی آتلرندن اینوب پیاده اوله رق مدافعه یه مجبور اولدیلر. ایشته اوصرده (حر بن یزید) غایت مردانه مقاتله ایتمشدر.

حضرت حسین، بروجه بالا چادرلری صیقلاشدیروب یکدیگره ربط ایتدرمش اولدیغندن اعدا یالکیز جهه سندن هجوم ایده بیلورلردی و کندی عسکرلری جماعت حسینیه نک اضاعاف مضاعفی ایکن آنلری هر طرفدن احاطه ایده میورلردی. بناء علیه صاغ وصولدن چادرلری آچق اوزره عمر بن سعد، برچوق آدم لر کوندردی. آنلر چادرلری آچق و بولدقلرینی یغما ایتک ایله مشغول ایکن جماعت حسینیه دن دخی اوچر بشر کشی چادرلرک آرملرینه کیروب او حریفلری برر برر اتلاف ایدیور یورلردی.

آنک اوزرینه عمرک امریله چادرلره آتش اورلدی. لکن دشمنک مقصدی حاصل اولدی. زیرا صاغدن صولدن چادرلر یانمغه باشلانجه آتشدن بر استحکام شکلنه کیروب دشمنلرک هجومه مانع اولدی. فقط اوچادرلرده بولنان نسوان و صبیان آچقده قالدی.

اوزمان (عبدالله بن عمر) رحمه الله علیهم جنازه سی میدانده یاتیور ایدی. زرجه سی (ام وهب) چادرندن چیق دینی کبی آنک باشی اوچنه کچوب یوزندن توزلری سیلر و (عافیت اولسون نعیم جنته ایرشدک) دیر ایدی.

ملعون (شمر) آنی کوروب حدتلندی وهان کوله سنه امر ایدوب  
اودخی یچاره قادینک باشنه بر عمود اوروب اولدردی . اوده قوجه سنک  
یانه سریلوب قالدی (رحمة الله علیها)

مشرک لک نسون و صیاننه بیله تعرض، شرعاً منهی و عقلاً منکر ایکن  
بر مسلمنه حقنده بو چیرکین معامله نك روا کورلمسی ملعونک نه قدر قلبی  
قرارمش ونه مرتبه کوزی قیزمش اولدیغنه دلیل کافیدر .

شمر، بوایتدیکی وحشیلکه قناعت ایلوب بر مفرزه ایله حضرت حسینک  
بیوک چادرینه یاقلاشدی « آتش کتوریکز ، بوای ایچنده کیلر ایله برابر  
یا قهیم » دیدی . ایچنده کی نسون و صیان فریاد ایله طیشارو اوغرا دیلر .  
حضرت حسین ایشیدوب شمره « الله سنی آتش ایله احراق ایتسون » دیو  
صیحه ایتدی .

رؤسای اعدادن (حمید بن مسلم) شمره خطاباً « بوحرکتک پک  
چیرکیندر . آتش ایله عذاب ایتمک الله مخصوصدر . سن اللهک عذابیله می  
عذاب ایده جکسین . نسون و صیانی قتل می ایله جکسین . سنک امیرکده بوکا  
راضی اولماز » دیدی شمر ، آنی اصفا ایتدی . لکن (شیت بن ربی) «  
کلوب آنی نهی ایتمکله ملعون ، موقه اولسون جهنم اولوب کیتدی .

وقت ظهر اولغله (ابو ثمامة الصائدی) « یا حسین ! جانم سکا فدا  
اولسون . اعدا سکا یاقلاشدی . والله بن سنک اوغورکده اولدجه سن  
قتل اولماز سین . فقط بونمازی ده سنک آرقه کده قیلوب ده ربمه او یله ملاقی  
اولق ایسترم » ده نیجه حضرت حسین باشنی قالدردی « نمازی خاطره  
کتوردک . الله سنی مصلین ذا کریندن قیلسون . اوت ، نماز وقتی اولمش .  
آنلردن سوال ایدیکنز . نماز قیلنجیه دک متارکه ایدر لر می » دیو بیوردی .  
دشمندن متارکه ایستلده (حصین بن نمیر) « سزک نمازیکنز مقبول  
اولماز ، ده نیجه حضرت حسینک صول قول سرکرده سی اولان (حبيب بن  
مظاهر) « آل رسول اللهک نمازی مقبول اولماز ده سنک نماز گمی مقبول



اولور اشك حريف « دیدی . حصین آنك اوزرینه حمله ایتدی . حبیب قلیجله آنك قصر اغنك باشنه اوردی . قصر اق شاهلاندی . حصین یره دوشدی . لکن آرقداشلی آنی قورتاردی . حبیب ، شدتلو جنکه قیام وبی تیمدن برنی اعدام ایتدی . همان تیمیلر ، اوشوندی ایدرك حبیبی شهید ایلدیلر ( رحمة الله علیه ) حضرت حسین آندن پك زیاده متأثر و محزون اولدی .

حضرت حسینك صاغ قول سر کرده سی زهیر بن القین و حر بن یزید غایت شدتلی مقاتله ایتدیلر . برسی اعدانك صفلرینی دملر ، ایلچلرینه طالار دیکری آنی تخلص ایدر ایدی . برمدت بو وجهله حربه دوام ایتدیلر ، نهایت دشمنك پیاده لری هجوم واقفحام ایله حرّی شهید ایلدیلر . ( رحمة الله علیه ) بوسروده ( ابو ثامة الصائدی ) دخی دشمن طرفده بولان بر عمزاده سنی اعدام ایلشدر .

بعده اعدا نمازه طور مغله حضرت حسین دخی صلات خوف قیلدی . نمازدن صکره مقاتله شدت بولدی . اعدا حضرت حسینك یاننه قدر کلدی . ( زهیر بن القین ) رحمة الله علیه شدتلی مقاتله ایدرك شهید اولدی . ( نافع بن هلال البجلی ) مسموم اوقلرك اوستنه اسمنی یازارودشمنلره آتار ایدی . بو وجهله ایلچلرندن اون ایکیسنی قتل و نیجه سنی جرح ایتدی و نهایت ایکی قولنی اوروب قیردیلر و آنی اسیر ایتدیلر . شمر ، آنی آلوب عمرک یاننه کوتوردی . نافعک یوزندن قان آقارق عمرک حضورینه وارد قدده « سزدن یاره لدیکم اشخاصدن بشقه اون ایکی کشی قتل ایتدم . اکر بر قولم صاغ اولسیدی . سز بنی اسیر ایده مزدیکنز » دیدی و شمر آنی اولدرمک ایچون قلیجی صیرر ایکن « سن اکر اهل اسلامدن اولایدك بزم قانلریمز ایله حضور باری یه چیقماق سکا کوچ کوردی . الحمد لله که جناب حق بزم اولومیزی شرار خلقی النده مقدر قیلشدر » ده نیجه شمر آنی قتل ایتدی . ( نافع رحمت ، شمر لعنت )

بعده ، شمر شدتلی هجوم ایتدی . حضرت حسینك اصحابی کوردیلر که

شقا چوغالدی . آرتق حضرت حسینی و کندیلرینی محافظه ایدمه جکله .  
مان آنک اوکنده اولمک اوزره بربرینه مسابقت ایدر اولدیلر .

اولا (عروة الغفاری) نك ايكي اوغلی کلوب حضرت حسینک اوکنده  
قاتله به باشلا دیلر . ( حَنْظَلَةُ بْنُ اسْعَدِ الشَّيْبَانِي ) کلوب حضرت حسین  
سلام ویردی وایلری کچوب حربه کیردی . کذلک بنی جابردن ایکی عززاده لر  
کلوب حضرت حسینه وداع و حربه قیام ایتدیلر . ایشته بونلر هپ شهید  
ولنجیه دك جنك ایلدیلر ( رحمة الله عليهم ) .

بعده ( عابس بن ابی شیب ) ایله کوله سی ( شوذب ) کلوب حضرت  
حسینه سلام ویردیلر وایلر و کچوب حربه کیردیلر . ( شوذب ) شهید اولنجیه  
( عابس ) میدان مبارزه به چیقوب ار دیلدی . کسه قارشو چیقمه مدی .  
عمر بن سعد « آتی طاشه طوتکز » دیو امر ایلدی . هر طرفدن اوزرینه  
طاش آتمغه باشلا دیلر . او دخی زرهنی و مغفرینی آتدی و بر حمله ایدوب  
اعدایی بربرینه قاتدی و آنلری بوزوب پریشان ایتدی . اعدا دونوب  
کرتله اوزرینه هجوم و اقتحام ایله آنی ده شهید ایلدیلر . ( رحمة الله عليه )

( ضحاک بن عبد الله المشرقي ) حضرت حسینک یانه کلدی .  
« ای رسول اللهک اوغلی ! بیلورسین که سنک یانگده مقاتل اولدقجه  
بن ده مقاتله ایدرم . دیو سوز ویرمشیدم . مقاتل قالمینجه بکا عودت حالدر »  
دیدکده حضرت حسین « طوغریدر ، حقک وار . اما نصل چیقوب قورتیله .  
بیلورسین » دیو بیوردی و « علی بختک » دیه رخصت ویردی . او دخی  
صون صمدانی ایله صاوشوب قورتلدی .

شویله که : بروجه بالا حضرت حسینک سواریلری حیوانلرینک سیکرلرینی  
کسوب ده پیاده اولدقلرنده ضحاک کندی قصراغنی سالم اوله رق برکوچوک  
چادرده صاقلایوب او ، آنه قدر پیاده اوله رق جنک ایتمشیدی . بوکره  
حضرت حسیندن اذن آلدیغی کبی کیدوب قصراغنی آلدی و بنوب اعدا  
اوزرینه هجوم ایله ایچلرینه کیردی ، جمعیتلرینی یاردی ، اوته طرفه کچدی . اون

اون بش كشي آرقه سنه دوشدى . طوته مديلىر ، ضحاك قاجوب اللرندن قورتلدى ، سلامت بولدى .

( ابوالشحاء الكندى ) ديو معروف اولان ( يزيد بن زياد ) كه كوفه دن عمر بن سعد ايله برلكده چيقمشيدى . بروجه بالا حضرت حسينك تكاليفي رد اولندوقده اودنخى عمر ك يانندن آيريلوب حضرت حسينك عسكرينه التحاق ايله مقاتله ايتكمده ايدى . حضرت حسينك ياننه كلوب اوكنده ديز چوكدى . بشيوز اوق آتدى . بشى خطا ايتدى . هر آتيشنده حضرت حسين آكا خير ايله دعا ايدردي . نهايت اودنخى حضرت حسينك اوكنده رتبه شهادته نائل اولمشدر . ( رضى الله عليه )

مقدمجه مجروح اولوب ده چادرلرك اوكنده ياتانلر دنخى دشمنك اورايه وصولنده هب قتاله قيام ايله جمله سى بريده شهيد ايدلدير . ( رحمه الله عليهم ) اوكون اهل بيتدن ابتدا شهيد اولان حضرت حسينك اوغلى ( على اكبر ) ايدى كه آرسلان كي اعدا ايله جنك ايدرك مرتبه شهادتي بولمشدر .

بعده حضرت حسينك ( عبدالله ) نام اوغلى و برادري حسن رضى الله عنه حضرتلرينك ( ابوبكر ) و ( قاسم ) نام اوغللرى و لابلر برادرلرى ، يعنى على كرم الله وجهه حضرتلرينك ( عباس ) و ( جعفر ) و ( عبدالله ) و ( عثمان ) و ( محمد ) و ( ابوبكر ) نام اوغللرى و عمزاده لرى يعنى عبدالله بن جعفر بن ابى طالبك ايكي اوغلى ( عون ) و ( محمد ) و عقيل بن ابى طالبك اوغللرى ( جعفر ) و ( عبدالرحمن ) و ( عبدالله ) و مسلم بن عقيلك اوغلى ( عبدالله ) و ابو سعيد بن عقيلك اوغلى ( محمد ) مردانه جنك ايدرك جمله سى شهيد اولمشلردر .

حضرت حسين ، برمدت ميدانده توقف بيوردى . دشمنلردن هر كيم ياننه كلسه قتلى بيوك كناه اولديفنندن اورمغه جسارت ايده ميوب دونر كيدر ايدى .

اوصره ده حضرت حسينك صبي اوغلى ( على اصغر ) ياننده اوطورر

ایکن بر اوق کلوب طوقمغله بیچاره صبی شهید ایلدی. پدری پک زیاده متأوانوب شقیلرعلینه دعا ایدرک آغلادی. صوسزلق غلبه ایتکله حضرت حسین صو ایچمک اوزره فراهه میل و تقرب ایلدکده اعدا طرفدن بر اوق کلوب مبارک آغزینه طوقندی. الیه آغزندن قانلری سیله رکینه اوشقیلرک علینه دعا ایلدی.

بعده شمر، برمفرزه ایله کلوب حضرت حسین ایله حرم چادرلری آره سنده حائل اولدی.

حضرت حسین « یازیق سزله ، دینکتر یوق ایسه ، روز جزادن قورقماز ایسه کز باری حسب ونسب صاحبی حر آدم لر اولکنز. بنم اموال و عیالمی طانی و جاهل آدم کزدن صیانت و حمایه ایلیکنز » دیدکده « اوله اولسون یا ابن فاطمه » دیدیلر.

شمر ایسه حضرت حسینک اطرافنی صارمش اولان خذله بی آنک علینه تحریک و تشویق ایتکده ایدی.

حضرت حسین دخی کوکره مش آرسلان کبی صاغ وصوله هجوم ایتدکجه اشقیا کچی سوریلری کبی آچیلوب طاغیلورلردی. ایشته اوصره ده حضرت حسینک همشیره سی زینب رضی الله عنها حضرتلری چیقدی. اورایه تقرب ایتمش اولان عمر بن سعدده خطاباً « یا عمر! سنک کوزیکک اوکنده حسین بن فاطمه قتل اولنه جقمی » دیدکده عمر، ایکی کوزلرینک یاشلری یناقلرینه و صفالنه طاملامغه باشلادیغی حالده یوزینی دیگر طرفه چویردی. حضرت حسین ایسه « بنی قتل ایچونمی طوپلانديکنز. بوندن صکره الله سزه فلاح ویرمز. جناب حق خیال و خاطر کزه کلدک صورتلره سزدن بنم انتقامی آلور. اللهک عذاب الیمنه دوچار اولورسکنز » دیهرک میدانده طولاشیوردی. خیلی وقت بویله میدانده قالدی. ناس اکر ایستسه آنی اعدام ایدیورلری. لکن بریسی بوجناتی ایشله مکّه جسارت ایده میوردی و بو وبال عظیمه بشقه سی کیرسون دیو باقنوب طورویورلردی.

نهایت شمرلین، ناسه خطاباً «الله بلا کزی ویرسون. نه باقیورسکز، نیچون بو آدمی قتل ایتیمورسکز» دیو ندا ایتدی. آنک اوزرینه هر طرفدن شقیلر اوشوندی ایتدیلر. (زُرْعَة بن شریک التیمی) حضرت حسینک صول اله و دیگر برملعون دخی صول اوموزینه قلیجله اوردی. حضرت حسین دوشوب قالقار ایکن (سنان بن انس نخعی) مزراق ایله اوروب یره دوشوردی. و (خولی بن یزید الاصبیحی) یه «باشنی کس» دیدی. خولی، بوجنایته مباشرت ایده جک اولدقه اله رعشه کلدی. همان سنان اینوب سرمبارکنی بدنندن جدا ایدرک خولی یه ویردی.

(سنان) و (بحرین کعب) و (قیس بن الاشعث) و (اسود ازدی) شهید سیدک البسه و اسلحه سنی پایلاشدیلر. سائر شقیلر دخی چادرلره هجوم ایله دوشمه و البسه و دودولرینی و اشپای سائره سنی حتی نسوانک اوزرلرنده کی اشپایی بیله یغما ایتدیلر.

حضرت حسین، اووقت اللی بش یاشنده ایدی. مبارک بدننده کوریلن نیجه اوق یارلرندن بشقه اوتوز اوچ مزراق یارمسی و اوتوز درت ضربه اثری بولندی. (رضی الله عنه وارضاه)

(سُویَد بن المطاع) که آغر یارملی اولدینی حالده دوشوب مقتوللر آره سنده قالمشیدی. اشقیانک «حسین قتل اولندی» دیدکلرینی ایشیدنجه صیچرایوب یاننده قالمش اولان بر بجاغیله خلیجه مقاتله ایتدکدن صکره شهید اولمشدر. ایشته حضرت حسینک امحاربندن اک صکره قتل اولنان بودر (رحمة الله علیه رحمة واسعة).

حضرت حسینک علی نامنده اوچ اوغلی وار ایدی (علی اکبر) و (علی اصغر) بروجه بالا هنکام محاربه ده شهید اولدیلر. (علی اوسط) که «زین العابدین» دیو معروفدر. اوزمان یکریمی بوقدر یاشنده بریکیت ایدی. لکن خسته اولدینی جهتله حربه کیره میوب حرم چادرلره یاتیسوردی. اشقیانک یانه کلدکلرنده شمر آنک ده قتلنی امر ایتدی. لکن (حمید بن



مسلم) آکا مانع اولدی. عمر بن سعد کلوب « بوقادینلرک چادرینه کیمسه کیرمسون وبوخسته چوجغه تعرض اولنسون وبونلرک هر نه سی آلمش ایسه رد اولنسون » دیو امر ایتدیسده هیچ برشی رد اولمادی .

حضرت حسینک ( حسن ) و ( عمر ) نامنده ایکی اوغلی وار ایدی . لکن پک کوچوک ایدیلر . بوجهتله اشقیا آلره دخی تعرض ایلمدی .

قاتل حسین اولان ( سنان ) ه سائر اشقیا « سن علینک و بنت رسول اولان فاطمه نك اوغلنی قتل ایتدك . عربك اعظمنی قتل ایتدك كه بوقومك اللرندن حكومتی آله جق ایدی . سن بونلرک امیرینه کیت ، مكافاتگی طلب ایت . بتون ماللرینی سکا ویرسه لر آذر » دیدیلر

سنان دخی غایت جرأتلی برشاعمر شوریده دماغ اولدیغندن درحال عمر بن سعدك چادرینه کیدوب قوسی اوکنده طوردی . ( بکا کومشدن پک آخر اوزنکی یادر و آلتون ایله یالیزلات . بن غایت اولو برکشی یی قتل ایتدم . ناسك ابا واما اك خیرلوسنی قتل ایتدم . ناسك حسب ونسبجه اك خیرلوسنی قتل ایتدم ) مألنده شعرلر سویلیدی .

عمر بن سعد « شودلی یی ایچروکتوریکز » دیدی و « ای مجنون ! حریف ! نیچون بویله سوزلر سویلیورسین ! ابن زیاد طویارسه سینك بوینگکی اورر » دیه رك آنی عصا ایله دوکدی .

حضرت حسینك اصحابندن شهید اولانلر یتمش ایکی کشی ایدی . عمر بن سعدك عسکرندن ایسه غیراز مجروحین مقتول اولنلر سکسان کشی ایدی . عمر بن سعد ، رؤس شهدای خولی بن یزید و حمید بن مسلم الازدی ایله ابن زیاده کوندردی .

خولی ، کچ وقت کوفیه واردقه حکومت قوناغنی قبالو بولدیغندن کندی خانه سنه کیتدی ورأس سعادت یی برکردل آلتنه قودی ودوشکنه کیردی وقاریسنه دیدی که « سکا دنیا دکر بر ثروت کتوردم . ایشته حسینك باشی حولیمزده در » .



قاریسی « واه سکا یازقلر اولسون. خلق آلتون ، کوموش کتوردی. سن رسول ا کر مک اوغلنک باشی کتورمش سین . والله بوندن صکره سنکله بریاصدیغه باش قوم » دیدی ویتاغندن قالقوب طیشارو چیقدی . بو خاتوندن مرویدر . دیمش که « طیشارو چیققدقه بو گردله کوزیمی دیکوب طوردم . اوزرینه نوردن بر دیرک اینشیدی واطرافده بر بیاض قوش طولاشیوردی . »

صبح اولنجه رأس سعادت ( عبیدالله بن زیاد ) ک دیوانه کتورلدی . ( شمر ) و ( قیس بن الاشعث ) و ( عمرو بن الحجاج ) و ( عروه بن القیس ) حاضر ایدیلر . سائر شهدای کربلا نك باشلری دخی آنک حضورینه کتورلدی .

ابن زیاد ، بر دکنک ایله حضرت حسینک دوداقلری آره سینه طوقونوب طورویوردی . ( زید بن ارقم ) رضی الله عنه حضرتلری همان « دکنکی قالدر . والله بن رسول الله صلی الله علیه وسلم حضرتلرینک دوداقلرینی بو دوداقلری اوپر ایکن کوردیم » دیرک آغلامغه باشلانجه ابن زیاد « الله سنک ایکی کوزیگی آغلاتسون . ا کر عته کتورمش بر اختیار اولسه ک سنک بوینگی اوروردم » دیدی . زید همان « ای بوندن صکره قول اوله جق اولان جماعت عرب ! سز فاطمه نك اوغلنی قتل ایتدیکز ، ( مرجانه ) نك اوغلنی ( یعنی ابن زیادی ) اوزریکزه امیر ایتدیکز . او سزک اختیارکزی اولدیرر ، اشرارکزی کندوسنه قول ایدر . سز بو مذلته راضی اولدیکز ، مذلته راضی اولانلر بزدن ایراغ اولسون » دیرک چیقوب کیتدی .

( عمر بن سعد ) ایکی کون کربلا ده اقامتدن صکره کوفه یه کلدی و حضرت حسینک قیزلرینی و همشیره لرینی و آنرله برابر بولنان اولادوعلالی برلکده کتوردی و کلورکن شهدای کربلا نك جنازه لری یانندن کچوردی ، قادینلر ، آنلری کورنجه آغلادیلر و صیحه و فریاد ایلدیلر . حضرت حسینک همشیره سی ( زینب بنت فاطمه ) « یا محمد آه ! سکا ملائکه سما

صلاة وسلام کتورسون . ایشته حسین قانلره غرق اولمش ، اعضاسی کسيلمش ، قیزلرک اسیر ، ذریتک مقتول « دهرک آغلادی و یار واغیاری آغلادی .

کوفه یه کلوبده آنلری ابن زیادک حضورینه کتوردکلرنده حضرت زینب ، اک خور و حقیر البسه سنی کیوب متکسر برقیافته کیرمش و جاریه لری اطرافنی احاطه ایتمش ایدی .

ابن زیاد « بو اوتوران کیم » در . دیو اوچ کره صورددی . زینب حضرتلری ، بر شی سویلیدی . فقط جاریه لرندن بری « زینب بنت فاطمه » دیو جواب ویردی .

ابن زیاد « سزی ترذیل ایدن و ماصالریکزی یالانه چیقاران اللهه حمد اولسون » دیدی .

حضرت زینب دخی « اللهه حمد ایدرم که بزه محمد ایله اکرام ایلدی و بزی تطهیر ایتدی تطهیر . یوخسه سنک دیدیکک کبی دکلدر . فاسق اولان مقتضج و فاجر اولان کاذبدر » دیدی .

بعده ابن زیاد ، نامزاج بولنان ( زین العابدین ) حضرتلرینه نظرایدوب « آدک ندر » دیو صورددی . او دخی « علی » دیو جواب ویردی . ابن زیاد « علی بن حسینی ، الله قتل ایتدی » دیدی .

زین العابدین دخی « علی نامنده بشقه بر برادرم وار ایدی . ناس آنی قتل ایتدی » دیدکده ابن زیاد « انی ، الله قتل ایتدی » دیدکده زین العابدین سکوت بیوردی و ابن زیاد « نیچون سویلیورسین » دیدکده ( الله یتوفی الانفس حین موتها الخ ) آیت کریمه سنی اوقوددی که ( انفسی ، یعنی جانلری حین وقاتلرنده الله قبض ایدر ) دیدکدر . بو حالدہ مقتوللرک ارواحی ده قبض ایدن الله تعالی اولوب اما قاتلر مستحق عذاب اولور . دیمک اوله جفندن زین العابدین حضرتلرینک بو جوابندن ابن زیادک جانی صیقلمغله « والله سنده آنلردنسین » دهرک آنکده قتلی امر ایدنجه زینب حضرتلری ، فریاد ایتدی و « یاعیبدالله ! اکرمؤمن ایسهک آنی قتل ایتدیکک تقدیرده

بنی ده قتل ایت « دیدی . زین العابدین دخی » یا عیدالله ! اگر خاندان نبوته نسبتك وار ایسه بنی قتل ایتدیکگده نسوانه بر متقی آدم ترفیق ایت که مسلمانجه آنلری حمایه ایدرك محملرینه ایصال ایله « دیهرك وصیت سیاقده نصیحت ایلدی . ابن زیاد ، بر مدت نظر حیرت ایله باقدی و آنی قتلدن واز کچوب بر اقدی و « هرکس جامعه کلسون » دیو ندا ایتدردی .

ناس ، جامعه طوپلانندی . ابن زیاد ، منبره چیقوب « الله حمد ایدرم که حق اظهار وامیر المؤمنین یزیده و جماعته نصرت ایلدی ویالانجینك اوغلی یالانجی حسین بن علی ! بی و آنك شیعه سنی قتل ایتدی » دیدی .

( عبدالله بن عقیف الازدی ) که حضرت علی ایله برابر اولدینی حالده بر کوزی یوم جمله و دیگر کوزی صفینده کیتمکه ایکی کوزی اعمی اولدینی حالده کوندزلری کیجه یه قدر جامعه عبادات ایله مشغول اولوب صکره خانه سینه عودت ایلردی . ابن زیادك بو هذیانلرینی ایشیدنجه هان یرندن صیچرادی . « ای مرجانهك اوغلی ! یالانجی اوغلی یالانجی باباك ایله سنسین . پیغمبر اوغللرینی اولدیروبده صدیقین سوزینی سویلیورسین » دیمکه ابن زیاد ، در حال آنی جامع ایچنده صلب ایتدیردی .

ابن زیاد ، بوصورته ناسك کوزینی قورقوتمقده ایسه ده حضرت حسینك قتلی اهل اسلام عننده پك بیوك بر جنایت اولدیغندن انجام کاری دخی دوشونویوردی . بناء علیه عمر بن سعد ، بوجه بالا کر بلادن عودت ایلدکه ابن زیاد « یا عمر ! حسینك قتلنه دائر سکا یازمش اولدیغم مکتوبی کیر ویر » ده نیجه « بن ، آنك احکامنی تنفیذ ایتدم . مکتوبده ضایع اولدی » دیوب ابن زیاد « همه حال بولوب کتوره جکسین » دیو اصرار ایتمکه عمر دخی « والله لاجل الاعتذار عجائز قریشه او قومق اوزره حفظ اولندی . والله بن سکا حسین حقنده بر نصیحت ایلدم که اگر سعد بن ابی وقاصه ایتسیدم بابا بقی حقنی ایفا ایتمش اولوردم » دیدکه عیداللهك برادری ( عثمان بن زیاد ) « عمر ، طوغری سویلدی . والله کشکه یوم

قیامته قدر بنی زیادك برونلرنده برر خلقه اولایدی ده تك حسین قتل اولنمیدی « دیدی عیدالله دخی بونی رد وانکار ایده مدی .

عیدالله بن زیادك والدهسی (مرجانه) دخی آکا خطاباً « یا خبیث ! پیغمبر اوغلنی اولدوردك . ابدی جنت یوزی کورمیه جکسین » دیدی . ابن زیادك اوقدر کوزی قیزمش وقلبی قرارمش ایدی که کندوسنه بر درلو سوز تأثیر ایتموردی .

بعده ، ابن زیاد حضرت حسینك سرسعداتی وسائر شهدای کربلا نك رؤس سعیده لرینی ونسوان وصیانی شامه کوندردی . زین العابدین دخی آنلره برابر اولوب آنجق اللرینه بیلدکجه وبوینته زنجیر اوردردی .

شامه واردقلرنده (زهیر بن قیس) یزیدك حضورینه کیردی ، مژده ویردی ، کربلا وقعه سنك تفصیلاتی بیلدردی . یزیدك کوزلری یاش ایله طولدی . « الله ، ابن سمیه لهنت ایلسون » دیدی وحضرت حسینه رحمت اوقودی « بکا کلسیدی آنی عفو ایدردم » دیدی وزهیره بر شی ویرمدی .

مریودرکه رأس سعادتی یزیدك حضورینه وضع ایله کیفیتی بیان ایتدکلرنده (عامر بن کزیر) ك قیزی اولوب یزیدك تحت نکاحنده بولنان (هند) بوسوزلری ایشیدنجه چارشافه بورینوب چیقدی « یا امیر المؤمنین ! رسول الله صلی الله علیه وسلم حضرتلرینك قیزی فاطمه نك اوغلی اولان حسینك باشیمی » دیدکده « اوت اودر . بنت رسول اللهك اوغلنه ماتم ایت . الله بالاسنی ویرسون ابن زیاد ، عجله ایدوب آنی قتل ایتدی » دیدی .

بعده یزید ، اذن ویروبده ناس ایچرو کیردکده سر سعادت اوکنده ایدی . النده کی دکنکی حضرت حسینك آغزینه قویوب اوینایوردی . (ابو برزة الاسلمی) رضی الله عنه « دکنکی حسینك آغزینه قویوب اکلنورمیسین . چوق دفعه کورمشم که رسول الله صلی الله علیه وسلم حضرتلری بو آغزه آزار آزار صو ایچریوردی . یا یزید ! میدان حشره

کلورسکز، سنک شفیعک ابن زیاددر، بونک شفیعی محمد علیه الصلاة والسلامدر « دیوب قالدی و حیقوب کتدی .

یزید دیدی که « بیلورمیسکز، بونه دن اولدی . بوذات بنم بابام علی ، آنک باباسندن خیرلورد و آنام فاطمه ، آنک آناسندن خیرلورد و جدم رسول الله آنک جندن خیرلورد ، بنده آندن خیرلوریم و خلافته آندن احقّم دیدی . آنک پدریله بنم پدرم ایشی حکملره حواله ایتدیلر . قنغیسنک قازاندیغی معلومدر . الله ایچون آناسی ( فاطمه بنت رسول الله ) بنم آنامدن خیرلورد . جددینه کلنجه الله و یوم آخرته ایمان ایدن کیمسه رسول الله کیمسه یی معادل کوره مز . لکن حسین ، فقه و اجتهدای حسبیله سویلدی و ( قل اللهم مالک المملک تؤتی المملک من تشاء ) آیتنی مطالعه ایتدی .

بعده قادینلر ، زین العابدین ایله برلکده دیوان یزیده کتورلدکده حضرت حسینک سر سعادت یزیدک حضورنده ایدی . قادینلر ، آنی کورنجه صیحه و فریاد ایلدیلر . یزیدک نسااسی و معاویهک قیزلری ده ولوله ایتدیلر . حضرت حسینک کریمه سی ( فاطمه ) « یازید ! رسول اللهک قیزلری اسیرمیدر » دیدکده یزید « ای برادر زاده ! بن بونی ایستمزدم » دیدی .

صکره قادینلر ، یزیدک حرم دائره سنه ادخال اولندیلر . هپ سرای خلقی اولان قادینلر کلوب آنلره تعزیت و آنلره برابر ماتم ایتدیلر و نه لری اخذ و غضب اولنمش ایسه صورددیلر ، ضایعاتلرینی قات قات و یردیلر بناء علیه حضرت حسینک قیزی ( سکینه ) « یزید بن معاویه دن خیرلو برکافر کورمدم » دیر ایدی .

بعده یزید ، زین العابدین حضرتلرینک تیمورلرینی چوزدردی . آنی یانه کتوردی و آنی ونسااسی حرمنده آیروجه برداثریه قوندردی . آخشام ، صبح سفره سنه دعوت ایلردی .

اهل کوفه ، رأس سعادتی دمشق شام مسجدینه کتوردکارنده مروان بن الحکم کلوب صوردی وقوع حالی بیان ایتدکارنده همان دونوب کیتدی . بعده برادری ( یحیی بن الحکم ) کلوب صوردی آکاده او وجهله بیان حال ایتدکارنده « سز ، یوم قیامتده رسول الله صلی الله علیه وسلم حضر تلرینک حضورینه کیرمدن محروم سکز . بن فیما بعد سزگله برابر برایشده بولنم » دیدی و آنلردن آیرلدی . بعده یزیدک حضورینه کیردکارنده ( یحیی بن الحکم ) کربلا وقعه سندن طولایی حزن واسفنی وابن سمیه نک ذمنی مشعر شعرلر سویلدی . یزید آنک کوکسنه اوروب « صوص ! » دیدی . دیگر بعض شعرا ایسه حضرت حسین حقنده مؤثر مرثیهلر سویلکه واهل اسلامی داغدار ایلمکه باشلادیلر .

یزید ، اهل بیتک لوازم راهیلرینی تهیه وعسکر ترفیق ایله آنلری مدینهیه کوندردی وزین العابدین ایله وداع ایدرکن « الله تعالی ، ابن مرجانهیه لعنت ایلسون . والله بن اولسم پدریکک هردرلو تکلیفنی قبول ایدردم . لکن قدر الهی بویله ایمش نهچاره . هر نه حاجتک وار ایسه بکا یاز . اسعاف اولنور » دیدی .

عبیدالله بن زیاد ، کربلا وقعه سنک عقبنده مدینهیه مژده کوندرمشیدی مژده جی ، مدینهیه واردقده کیفیت ( عمرو بن سعید ) ه بیلدردی . اودخی دلائل واسطه سیله وقوعاتی اعلان ایتدردی . نسوان بنی هاشم ، فریاد وفغان ایتدی . مدینهده صانکه قیامت قوپدی ( عقیل بن ابی طالب ) ک قیزی غایت مؤثر بیتلر سویلدی ، ناسک قلوبنی داغدار وکوزلرینی اشکبار ایلدی . عمرو بن سعید ایشیدوب کولدی « بوده عثمانک قتلی فاجعه سی کی بروقه در » دیدی . اهل اسلام ایسه بوفاجعه دن ناشی فوق العاده متألم ومتکدر وبنی امیه دن متنفر اولمشیدی .

مرویدرکه یزید ، بوکربلا وقعه سندن ناشی قلوب اهل اسلامک پک زیاده متأثر اولدیغنی کورنجه « الله او ، ابن مرجانهیه لعنت ایلسون . حسینک تکلیفنی قبول ایتدردی و آنک قلیله ناسی بکا کوجندردی .



قلوب انامده بنم ایچون عداوت تخمی ا کدردی . بر وفاجر هپ خلق ، حسینک قتلنی اعظام ایدرک بکا بغض ایدر اولدیلر « دیر ایش .

### بعض رفیات

بوقوعات مؤله آره سنده اهل بدردن ( جابر بن عتبک ) و اصحاب کرامدن ( حمزة بن عمرو الاسلمی ) رضی الله عنهما ایکسی ده یتمش برر یاشنده اولدقلری حاله دار عقبایه ارتحال ایتشلردر .  
اصحاب کرامدن و کوفه رجالندن ( خالد بن عرفطه ) رضی الله عنه دخی بوسنه وفات ایلشدر .

ینه او ائنده بیعت رضوان اصحابندن ( عاذن بن عمرو المزنی ) و اصحاب کرامدن مشهور ( قیس بن خرشه ) و اصحاب احدثن ( ابوخیثمه الانصاری ) و اهل بدردن ( عتبان بن مالک الانصاری ) رضی الله عنهم حضراتی عازم دار عقبا اولشلردر .

### اموال ابن زبیر

حضرت حسینک وجه مشروح اوزره شهادتی و خاندان نبوت حقنده بنی امیه نك خاطرله کلمک صورتده اهانتیه جراتی اوزرینه افکار اسلامیه اوقدر متأثر اولدی که دولت امویّه تمکندن صارصلدی .

مکده عبدالله بن زبیر ، ناسه بر خطبه بلیغه اوقودی . حضرت حسینک قتل نه مرتبه بیوک جنایت اولدیغنی سویلدی و اهل کوفه فی طعن و تشنیع ایلدی . یمامه ده دخی ( نجدة بن عامر الحنفی ) بنی امیه علیه خروچ ایتدی .

اهل مکه ، ابن زبیره « میدانیه چیق ، ناسدن بیعت آل . زیرا حسیندن صکره سکا مانع و مزاحم اوله حق کیمسه یوقدر « دیدیلر . ابن زبیر ايسه کیزلو بیعت آلوب « عجله ایتمیکز » دیر ایدی . زیرا امیر مکه

اولان (عمرو بن سعید) آنک حقنده پک بغیظ و شدید اولوب فقط رفق و مدارا ایله معامله ایلردی .

یزید بن معاویه ، عبدالله بن زبیرک مکده برچوق خلقی کندو طرفه جلب ایتدیکنی استخبار ایتدکه آنی زنجیر بند ایلمک اوزره یمین ایتمش ویر کوموش زنجیر ایله مخصوص مباشرلر کوندرمش اولدیغندن ابن زبیر دخی یزیدک آدملرندن صاقنوب احتیاطکارانه حرکت ایلردی .

صرفاتده (ولید) وقفه دن افاضه و حرکت ایلدکه حجاج دخی آکا تبعیت ایلدیلر ایسه ده ابن زبیر کندو طرفدارانیله برابر آیروجه طوروب صکره حرکت ایلدی . (جعه بن عامر) دخی آنی تعقیب ایتدی . لکن جعه ، ابن زبیره کلوب کیدر اولدیغندن ناس آنک دخی قریباً «زبیره بیعت ایله جکفی امید ایلردی .

اوصرده (ولید بن عتبه بن ابی سفیان) ایله دیگر بعض امرای امویّه «عمرو بن سعید ایستسه ابن زبیری طوتوب سکا کوندرردی «دیدرک آنی یزیده غمز و سعایت ایلمکله یزید ، همان اشبو آلتمش بر سنه سی اوآخرنده عمروی عزل ایله حجاز امارتی (ولید بن عتبه) یه توجیه ایتدی .

ولید بن عتبه ، جانب حجازه والی اولنجه مکده اقامت ایلمه رک بر تقریبه ابن زبیری اخذ و گرفت ایلمک اوزره فرصت کوزه دردی .

ابن زبیر دخی آندن احتراز ایله احتیاطه رعایت ایتدکه اولدینی حلاله آلتمش ایکی سنه سی اوائلده ولید حقنده برخدعه یاپدی .

شویله که : یزیده مکتوب یازوب «سن بزه برشاقین آدم کوندردک . حکیمانه حرکت ایده میور . اگر عاقل و اخلاقی ملایم بر آدم کوندرسه ک مأمول که اموری تسهیل و بو احوال پریشانی جمع ایله ، دیو اشعار ایتدی . یزید دخی ولیدی عزل ایله یرینه (عثمان بن محمد بن ابی سفیان) ی نصب ایتدی . عثمان ایسه حدیث السن و تجربه سز بر آدم ایدی . صانکه اهل مدینه بی جلب و استماله ایچون مدینه دن شامه بر هیئت مبعوثه کوندردی که ایچلرنده شهدای احدثن مشهور (حَنْظَلَه) نک اوغلی (عبدالله) و

اصحاب کرامدن (عبدالله عمروالمخزومی) و (منذر بن زبیر) و اشراف مدینه دن دیگر ذوات وار ایدی.

یزید آنلره چوق رعایت و احترام ایتدی، حتی فاضل و عابد و قومی عننده محترم و سید اولان (عبدالله بن خنظله) یه یوز بیک و برابر بولان سکیز اوغلنه اونر بیک و (منذر بن زبیر) ۵۰ یوز بیک درهم عطیه ویردی.

آنلر ایسه یزیدک اوزاقدن ایشتدکلری سیأتی یاقیندن عیاناً تحقیق و مشاهده ایله آندن بالکلیه نفرت ایلشیر ایدی. بناءً علیه مدینه یه عودت لرنده علناً آنک سیأتندن بحثله «بز، برآدمک یانندن کلپورزکه: دینی یوق، خر ایچیور. حتی سرخوش اولوب نمازی ترک ایدیور. طنبور چالیور، اوکنده کوچکلر اوینایور. نشهد بالله، بز آنی خلع ایتدک» دیدیلر. عبدالله بن خنظله دخی قالدی «بز، برآدمک یانندن کلدک که بو اوغللرمدن بشقه کیمسه یی بوله مسم یالکیز آنلر ایله بو آدمه قارشو جنک ایدرم. عطیه سنی قبول ایدیشم دخی آکا قارشو قوت حاصل ایتک ایچوندر دیدی.

آنک اوزرینه اهل مدینه یزیدی خلع ایله (عبدالله بن خنظله) یه بیعت ایلدیلر.

یزید، بوکا واقف اولنجه (نعمان بن بشیر الانصاری) یی مدینه یه کوندردی. اودخی واروب اهل مدینه یه نصیحت ایلدی. «سز شام عسکرینه مقاومت ایده مزسکیز» دیدی دیگله مدیلر. اوده شامه عودت ایلدی.

اهل مدینه، آتمش اوچ سنه سی اوائلنده امیرلری اولان (عثمان بن محمد) ی مدینه دن اخراج و بنی امیه یی بیک نفره بالغ اولدقلری حالده مروان بن الحکمک خانه سنده محاصره ایتدیلر. آنلرده شامه مکتوب یازوب یزیددن استمداد ایلدیلر و برآراق رأی و امان ایله حیقوب مدینه دن صاووشدیلر.

یزید ، همان ( عمرو بن سعید ) ی مدینه مأمور ایتدیسده ( عمرو بن سعید ) « سنك ایچون ایشلری تنظیم ایدرك بلادی تحت انضباطه آلمش ایدم . اما شمدی قریشك قانلرینی دوكمك لازم كله جك . بن ده بو خدمتده بولنق ایستهم » دیو جواب ویردی .

بعده یزید ، همان كوفه والیسی ( عییدالله بن زیاد ) ه امر نامه یازدی . « مدینه یه كیت ومكه ده ابن زیبری محاصره ایت » دیو امر ایتدی . ابن زیاد دخی « بر فاسقده ایکی جنایتی ، یعنی رسول الله اوغلنی اولدورمك ومكه یه غزا ایتك جنایتلرینی جمع ایتك اولماز » دیو اعتذار ایلدی .

آنك اوزرینه یزید ، ( مسلم بن عقبه المری ) بی مأمور ایتدی . مسلم ، بك مسن وعلیل بر آدم اولدینی حالدله ایفای مأموریتیه قیام ایتدی . واون ایکی بیك کزیده عسکرله جانب حجازه کیتدی . ابتدا مدینه بی محاصره ایدوب ( عبدالله بن حنظله ) دخی اهل مدینه ایله مدافعه ومقابله یه قیام ایتدی . ( فضل بن عباس بن ربیعہ بن الحارث بن عبدالمطلب ) بر مقدار سواری ایله غایت شدتلی بر هجوم ایدرك دشمنك صفلرینه یاردی ، مسلمك یانه قدر واردی ومسلم ظنیله كوله سنی اولدوردی . لکن فضل وآنكله برابر ( زید بن عبدالرحمن بن عوف ) دخی شهید اولدیلر . آنك اوزرینه عساكر شامیه ، ابن حنظله اوزرینه هجوم واقتحام ایتدیلر . او دخی فوق العاده مردانه مدافعه ایتدی وغایت قانلی بر محاربه وقوع بولدی . اوغللری برر برر کندی اوکنده شهید اولدقن صکره کندوسی وبرادرلری واشراف مدینه دن نیچه ذاتلر دخی شهید اولدیلر . بوجهتله اهل مدینه بوزولدی .

( محمد بن سعد بن ابی وقاص ) دخی بك چوق یارارلقلر کوستردکدن صکره ناچار او دخی منهزمینه قاتیلدی .

مسلم ، اوچ کون مدینه بی عسکرینه مباح قیلدی . آنلرده مدینه یه

کیروب اوچ کون دیلد کلرینی قتل و بولدقلری اموال و اشیا بی غصب ایتدیلر . الحاصل عسا کر شامیه ، مدینه رسول اللهی تماماً غارت و تخریب ایلدیلر .

ظاهر « ابوذر » رضی الله عنه حضرتلرینک جزء سادسده بیان اولدینی اوزره « اهل مدینه یه قتل و غارت ایله مژده » دیو خبر ویرمش اولدینی فاجعه بو اولمیدر .

بوفاجعهده مشاهیردن پک چوق ذوات مقتول اولمشدر . ( زین العابدین بن حسین ) حضرتلری بو وقعهده ناسه قارشمیوب بی طرف طور دیغه مبنی حقهده مسلم طرفندن سؤ معامله اولمدی .

بو حادثه نك وقوعنده آلتش اوچ سنه سی ذی الحجه سنك انقضاسنه ایکی کون قالمشیدی .

بو سنه موسم حجده ناس ایله عبدالله بن زبیر دخی حج ایتدی . مدینه فاجعه سنك خبری ، آلتش درت سنه سی محرم نك غره سنده مکیه واصل اولدی و مسلمك مکیه هجوم ایده جکی آ کلاشلدی .

مسلم ، بروجه بالا مدینه بی غارت ایلدکن صکره اردوسیله مکه اوزرینه حرکت ایلدی . لکن ( مُشَلَّل ) نام محله وارد قده فوت اولدی . وفات ایده جکی وقت ، رؤسادن ( حصین بن نمیر ) ی چاغردی « ای اشك پالانك تكلتیسى ! ( تیلتیسى ) بکا قالسه سنی بو عسکره باشبوغ ایتزدیم . لکن امیر المؤمنین ، بندن صکره باشبوغله سنی تعیین ایتمشیدی . اردو ایله چابوق کیت ، حربی تعجیل ایت ، قریشه میدان ویرمه » دیوب وفات ایدنجه ( حصین ) اردو ایله حرکت ایلدی و صفره درت کون قاله مکیه واردی .

اهل مکه و اهل حجاز ایسه ( عبدالله بن زبیر ) ه بیعت ایلهرک آنك باشنه طویلأتمشله و اهل مدینه دن فرار ایدنلر دخی اورایه سیغنمشله ایدی .

(نجدۃ بن عامر الحنفی) دخی بیت شریفی محافظہ ایچون بر کروہ خارجیلر ایله مکئیه کلشیدی .

مشهور (أَبُو عِيْنَةَ الثَّقَفِي) نك اوغلی (مختار) كه مؤخرأ شیعیلره رئیس اوله رق کوفه ده امویلر علیهنه قیام ایتمشدر . او دخی بو صر ده ابن زیرك یاننه کلشدر .

عسا کر شامیه ، عبدالله بن زیری محاصره ایلدیلر . ربیع الاولک اوچنه قدر شدید و مدید محاربه لر وقوع بولدی . خارجیلر غایت خونریزانه وفدا کارانه حرب ایستکلری کبی (مختار ثقفی) نك دخی پك چوق مردانه حرکاتی کورلدی .

حرم شریفده مقاتله منهی ایکن شاملیلر ، حرمت حرمی هتک ایله کعبه اوزرینه مانجینیقلر آتدیلر . بیت شریفک اورتیسی واخشابی محترق اولدی . غره ربیع الآخرده (یزید بن معاویه) نك وفاتی خبری کانجیه دک عسا کر شامیه او وجهله حصر وتضیقده دوام ایلدیلر .

### یزیدک ربعه ارغلنک وفاتلری

یزید بن معاویه ، اوتوز بو قدر یاشنده ایکن آلتش دوت سنه سی ربیع الاولک اون بشنده دار مجازاته کوچدی .

اوغلی کوچوک (معاویه) یکر می بر یاشنده ایکن آنک یرینه کچدی . یزیدک ، وفاتی خبری مکئیه واصل اولنجیه (حصین بن نمیر) آرتق

امر محاصره یی ترک و عبدالله بن زیر ایله مخابره ایدرک (أَبَطَح) نام محله بولشوب کوروشدی و «سن خلافته احقسین . کل سبکا بیعت ایلیه لم وبرلکده شامه کیده لم . معیتمده کی عسکر ، هپ وجوه اهل شامدر . والله کمسه سندن تخلف ایتمز . همان دوکیان قانلری هدر ایدرک عفو عمومی اعلان ایله ناسی تأمین ایده لم» دیدکده ابن زیر «بن بو قانلری هدر ایده لم . والله اهل حرمدن مقتول اولان بر آدم ایچون سزدن اون کشی



قتل اولنسه قانع اولم « دیدی و حصین، آکا خفیاً سویلر ایکن اوجهر ایله « والله اولماز، بالله یاهم » دیر ایدی .

حصین بن نمیر « الله جزاکئی ویرسون، بن سنی اهل رأی بر آدم صانوردم . بن سنی خلافته دعوت ایدیورم، سن قتل و هلاک ایستیورسین » دیرهك آندن آریلوب عسکريله برابر مدینهیه عزیمت ایدی .

ابن زبیر، نادم اوله رق « شامه کیتتم . بکا بوراده بیعت ایلیکیز . سزی تأمین ایدرم وحقکزده اجرای عدالت ایلرم » دیو ابن نمیره آرقه سندن خبر کوندردی . ابن نمیر ایسه « بالذات گلز ایسه کز بوایش تمام اولماز . زیرا بنی امیه دن خلافته طالب اولانلر واردر » دیدی و یولنه دوام ایدرهك مدینهیه لدی الوصول اوراده بولتان بنی امیه ایله برلکده شامه کلدیله . اهل شام ( معاویه بن یزید ) . بیعت ایلش اولدقلرندن آنلرده بیعت ایدیوریدیلر .

مورخینک تحقیقاتنه نظراً عبدالله بن زبیر، شجعان عربدن وفضلاى صحابه دن عابد و زاهد بر ذات کثیر المحامد و خلافته مستحق ایدی . لکن کندوسنده لازمه امارته موافق اولمیان ایکی خصلت وار ایدی که بنحیل ایدی و برده رأی و تدبیری ضعیف ایدی . اکر حصین ایله برلکده شامه کلش اولسیدی بتون خلق آکا بیعت ایلردی . زیرا کربلا وقعه سندن طولایي قلوب اهل ایمان پک زیاده متأثر و متعاقباً مدینه رسول اللهک ضرب و نهب اولنسندن و بیت اللهک تحت محاصرهیه آلمسندن ناشی افکار اسلامیه، دولت امویه دن متنفر و ظرف طرف اختلال اماره لری ظاهر اولمشیدی .

کوچوک معاویه ایسه غایت منصف و متدین بر نوجوان اولوب احوال عالمی نظر عبرتدن کچوردی . ایشک نه مرتبه آغر اولدیغنی کوردی و کندی دولتندن مایوس و متنفر اوله رق همان برکون « ناس جامعه کلسون » دیوندا ایتمرددی .

ناس، جامعه کلوب طویلاندقلرنده منبره چیقدی . خطبه او قودی . « ای ناس ! بن سزک امورکزی رؤیتدن عاجزم . سزک ایچون عمر کبی

بر آدم آرام ، بوله مدم . مشورت ایچون اهل شوری کبی آلتی کشی .  
آرام ، بوله مدم . سز خلافته بکنندیکگزى اختیار و انتخاب ایدیکز ، دیوب  
منبردن ایندی و کیدوب خانه سنده قیاندی و آرتق میدان چقمدی . ( ضحاک  
بن قیس ) بالوکاله نمازده امامت ایدیوردی . بنی امیه شاشیروب قالدی .  
آرەسى چوق کچمیوب معاویه ده فوت اولدی . مدت خلافتی اوچ آیدر  
وعلى رواية قرق کوندن عبارتدر . ( رحمة الله عليه )

وفاتنده بعض ناس ، آنک کوچوک برادری ( خالد ) ک خلافته انتخابی  
ایستردی . على الخصوص فلسطين امیری ( حسان بن مالك ) آنی پک  
زیاده التزام ایلردی . چونکه حسان بن مالك ، یمیه دن یعنی وقیله یمندن  
کلوبده شام طرفده یرلشمش قبائلدن اولان ( بنی کلب ) قبیله سنک شیخی  
اولوب یزید بن معاویه نك والدهسى ( میسون ) دخی بو قبیله دن اولدیغی  
جهتله حسان آنک ، یعنی یزیدک داییسى دیمک اولدیغندن اوغللری پک  
زیاده تصاحب ایلردی و کندوسى سوریه ده خیلی قوت صاحبی ایدی . لکن  
افکار اسلامیه ، امویلر علیهنده اوله رق طرف طرف عبده بن زبیر رضی الله  
عنهما حضرتلرینه بیعت اولتمقده ایدی .

حتى یزیدک وفاتنده عراق والیسی ( عبیدالله بن زیاد ) بصره ده بولنوب  
اهل عراقی کندوسنه بیعت ایتدرمک ایسته دیسه ده نائل امل اوله مدی  
وبصره ده وکوفه ده اختلالر پیدا اولدی . ابن زیاد ، کوچ حال ایله صاوشوب  
جانب شامه فرار ایله تخلیص جان ایده بیلدی . اهل مکه ومدینه وحجاز ویمین  
کبی اهل عراق دخی ابن زبیره بیعت ایلدیلر .

بعده ابن زبیر ، مصره آدم کوندروب اهل مصر دخی آکا بیعت  
ایلدی .

الحاصل دولت امویه غیرتنده یالکز سوریه امراسی قالدی . حال بوکه  
قتسرین امیری ( زفر بن الحارث الکلابی ) وخصص امیری ( نعمان بن بشیر  
الانصاری ) دخی ابن زبیره بیعت ایدیوردیلر .

دولت امویہ نك ركن ركنی اولان ( ضحاک بن قیس ) دخی سرآ  
ابن زبیرہ بیعت ایلمش و امرای بنی امیہ نك اك بیسوی اولان ( مروان  
بن الحکم ) همان مكیه كیدوبده ابن زبیرہ بیعت ایلمكه نیت ایلمش ایدی.

### بیعت مروان

مروان، بروجہ بالا عبدالله بن زبیرہ بیعت ایلمك نیتده ایكن عراقدن  
( عیدالله بن زیاد ) شامه كلدی و آنك ذهنی چلدی .

شویله كه : مروانك افكارینه واقف اولنجه آنكه كوریشوب « سن  
قریشك شیخی و بر اولو كشی اولدیغك حالدہ كیدوبده ابن زبیرہ بیعت  
ایلرسهك بن سنك ایچون حیا ایدرم » دیمكه مروان آندن جسارت آلوب  
میدانه چیقنجه جمله بنی امیہ و متعلقانی و آزادلولری هپ باشنه طوبلانیدیلر.  
قبائل یمیه دخی آنلره قاتلدی . و حسن بن مالك، اردنه كلوب خلقی بنی  
امیہ یه دعوت ایله مشغول اولدی . بعده دمشق شامه كلدی و خالد بن یزیدك  
خلافته انتخابی التزام ایتدی . لکن « مروان كبی بر شیخ القریش وار  
ایكن خالد كبی بر چوجغه نصل بیعت ایلمهلم » دیو حسانی كند و طرفدارانی  
قاندردی . اوصردده عبدالله بن عمر رضی الله عنهما حضرت تلمینك خلافته  
انتخابی سوزی كچدی ، لکن « ضعیفدر ، امر خلافتی اداره ایدمهز »  
ده نیلهرك اوده كیرو قالدی . هپ امویلر ، مروانہ طرفدار اولدی . یمیلر  
دخی آنك طرفنده بولمغله آنك فرقه سنه ( یمیه ) ده نیلیدی . ضحاک بن  
قیس ایله آنك طرفدارانی ایسه ناسی ابن زبیرك طرفه دعوتده ثبات  
ایلیوب بوفرقيه دخی ( قیسیه ) ده نیلیدی .

بوايكي فرقه آرسنده چوق محاوره و منازعه لر جاری اولدی . نهایت  
اشبو آلتمش درت سنه سی ذی القعدة سننده دمشق شامك خارجنده واقع  
( مرج راهط ) ده غایت قانلی بر محاربه وقوع بولدی . اشراف و مشاهیر  
شامدن نیچه ذوات ایله برابر ضحاک بن قیس مقتول و قیسیه بك فنا حالده

منهزم و پریشان اولنجه مروان ، دمشق شامه کیروب معاویه بن ابی سفیانک سراینه نزول ایتدی و جمله ناس آ کا بیعت ایلدی .

نعمان بن بشیر ، ضحّا که امداد ایچون خمصدن عسکر کوندرمشیدی بو عسکر دخی ( مرج راهط ) ده بولنه رق منهزماً عودت ایلینجه نعمان ، کیجه خمصدن فرار ایتدیسده اهالیدن بعضلری آرقه سندن یتشوب آنی . اعدام ایتدیلر .

قنسرین امیری ، زفر بن الحارث الکلابی دخی قیسیه نک هزیمتی خبرینی . آلنجه صاووشوب قر قیسایه واردی واوراده کی ( قیس عیلان ) قبیله سیله برلشهرک ابن زیبره تابع اولمق اوزره مروانه قارشو طور مغنه قرار ویردی .

بعده مروان ( عمرو بن سعید ) ایله برلکده مصره کیتدی و ابن زیرک آدم لرخی طرد ایله مصری ضبط و اوغلی ( عبدالعزیز ) ی مصر والیسی نصب ایتدی . او اثناده عبدالله بن زیبر دخی بر مقدار عسکرله برادری ( مصعب ) ی شام اوزرینه کوندرمشیدی . مروان مصردن عودتنده کیفیتدن خبردار اولنجه آ کا قارشو عسا کر کافیه ایله ( عمرو بن سعید ) ی کوندردی ولدی المحاربه مصعب بوزولدی . مروان دخی غائله سزجه کلوب دمشق شامه داخل اولدی . مصرده آنک النده قالدی . لکن حجاز و عراق طرفدن اندیشه ناک ایدی . حال بوکه اوزمان ، محل شقاق و نفاق اولان دیار عراقده نیجه اسباب اختلاف و اختلال حاضر لقمده ایدی .

شویله که بالاده بیان اولندیغی اوزره ( حصین بن نمیر ) عسا کر شامیه ایله ابن زیرک اوزرینه توجه ایتدکده خوارج کروهی کعبه یی محافظه ایچون مکیه کیتمشلر و عسا کر شام ایله مردانه جنک ایتمشلر ایدی . خوارج کروهی حضرت عثمانی سومزلر ایدی . لکن محاربه اثناسنده مذهب بحی آچمه وقت بوله میوب یزیدک وفاتی اوزره عسا کر شامیه عودت ایلینجه ابن زیرک اعتقادینی صوروب آنک محب عثمان اولدیغنی آ کلاد قلدنمه

یابندن آیرلدیلر ویمامه وبصره طرفلرینه طاغلدیلر . ایچلرندن بر فرقه‌سی  
بوئانده اهوازه کیدوب اورانک اموالی جایت ایدر اولدیلر .

شیعه طائفه‌سی دخی ( تواین ) عنوانیله کوفه‌ده کیزلوجه عقد جمیع  
ایله‌رک اسباب و آلات حربیه تدارکیله مشغول ووقت فرصته منتظر ایدیلر .  
شویله‌که کربلا وقعہ‌سی اوزرینه کندولرینه عظیم ندامت کله‌رک و « بز  
حسینی دعوت ایلدک ، کلدی . صکره آکا نصرت ایلدک . اوده یالکز  
قالدی وناحق یره مقتول اولدی . بوکا بز سبب اولدق . بز آنک قاتلارینی  
قتل ایتدیکه اوزریمزدن بو عار لکھسی زائل اولماز » دیهرک تائب و مستغفر  
اولوب دم حسینی طلب ایله قیام و آنک قاتلرندن اخذ وانتقام ایتک اوزره  
عهد وپیمان ایتشلر و بش رئیس لرندن بریسی اصحاب کرامدن ( سلیمان بن  
صرد الحزاعی ) رضی الله عنه اولوب آنی کندولرینه امیر نصب ایتشلر  
ایدی . آنک اوزرینه ( سلیمان بن صرد ) مدائنده وبصره‌ده اولان  
شیعیلر ایله مخبره ایلر و سرآ ناسی دم حسینی طلب ایتک اوزره قیامه دعوت  
و آلات حربیه جمع و تدارکنه غیرت ایدر اولدی .

بروجه بالا مکھنک محصوریتده ابن زییر ایله برلکده بولسان ( مختار  
ثقفی ) یزیدک وفاتندن صکره دخی بر مدت ابن زییرک یاننده بولنش ایسه‌ده  
مأمول ایتدیکی مأموریتلره نائل اوله‌مدیغندن جانی صیقلمش وجانب  
عراقه عزیمت ایله آلتمش درت سنه‌سی رمضانک واسطنده کوفه‌یه کلمش  
وشعیلر ایله کوریشوب « بن ، مهدی محمد بن حنیفه‌نک یابندن کلیورم .  
بخ سزه وزیر و امین اولق اوزره کوندردی » دیمکله شیعیلرک بر گروهی  
آکا تابع اولمش ایدی .

بیعت رضوان اصحابندن اولوب ابن زییر طرفندن کوفه والیسی نصب  
اولتان ( عبدالله بن یزید الانصاری ) رضی الله عنه ایله خراج کوفه اوزرینه  
مأمور اولان ( ابراهیم بن محمد بن طلحه ) دخی مختارک قدومندن بر هفته  
صکره ، یعنی رمضانک و اخرنده کوفه‌یه واصل اولمشلر ایدی .



بروجه بالا بنی کلب شیخی حسان بن مالک ، مروانک مقام خلافتہ کتورلمسنه سبب اولمش ایسه ده مرواندن صکره خالد بن یزیدک خلیفه اولمی ادعاسنده ایدی . بو جهتله مروانک خالدن وسوسه سی غالب اولمغله اهمیتنی کیده رمک اوزره آنک والده سی ویزیدک زوجہ سی اولان اولان ( ام هاشم ) ی تزوج ایتمشیدی . عمرو بن سعید ایسه بروجہ بالا مصرک ضبطنه معاونت و مصعب بن زبیرہ غلبه ایتمکله کبرلنهرک « مرواندن صکره خلافت بنم حقمدر » دیدیکی مروانک مسموعی اولمغله آلتش بش سنه سی خلائنده اسحاب حلّ و عقدی جمع و ( عبدالملک ) و ( عبدالعزیز ) نام اوغللرینی ولی عهد ایدرک ناسی آنلره بیعت ایتدردی و دائماً خالدی انظار ناسده اعتباردن دوشورمک ایستردی . حتی برکون مجلسنده بر جماعت حاضر ایکن خالدی الفاظ مستهجنه ایله سب و تحقیر ایتدیکندن اودخی والده سنه شکایت ایلش ، والده سی ده مروانه کین باغلامش و فرصتی کوزه دوب اشبو آلتش بش سنه سی رمضانی اوائلنده مروان آنک خانه سنده او یورکن یوزینه بر یاصدیق قویوب و جاریه لرله برابر اوزرینه اوتوروب مروانی بوغدقدن صکره « امیر المؤمنین فجأة فوت اولدی » دیوصیحه ایتشدرد .

مروانک بو وجهله وفاتنده یرینه اوغلی ( عبدالملک ) خلیفه اولدی . دیکر اوغلی ( عبد العزیز ) دخی عبدالملکه تابع اولمق اولمق اوزره مصر والیلکنده قالدی .

مروان ، برحیات ایکن ایکی اردو تجهیز ایله برینی مدینه یه و دیکرینی عبیدالله بن زیادک معیتله جانب عراقه کوندرمشیدی . مدینه یه کیدن اردو منهزم و پریشان اولمشدر . ابن زیاد معیتله کیدن اردو دخی ( قر قیسیا ) یه واروب و ( زفر بن حارث ) ی اوروب قر قیسیا ایشنی بتوردکن صکره کیدوب عراقی ضبط ایله جهک ایدی . مروانک وفاتنده اوغلی عبدالملک ، عبیدالله بن زیادی ابقا و امرینی تجدید و تأیید ایلدی .

او اثناده ایسه شیعیلردن برکروه فداییلر ، تجمع ایله حدود شامیه یه طوغری کلکده ایدی .



شویله که : ( سلیمان بن صرد ) بوجه بالا ( تواین ) عنوانیله کندوسنه تابع اولان شیعیله خروج وحرکت ایلک اوزره اشبو آلتش بش سنه سی ربیع الاخرینک غره سنی تعیین وبیان ایش اولدیغندن او کون کوفه شهرندن چیقوب ( نخيله ) نام موقعه قوندی وباشنه درت بیک قدر شیعی طوپلاندی . کندو دفترنده ایسه اون آلتی بیک نفر مقید اولمغله «تواینک بقیه سی زرده » دیووردی . ایکی بیک مقداری « مختار ثقفی آیارتدی ، کندوسنه تابع قیلدی » دیدکلرنده « باقی اون بیکی زرده قالدی . بونلرک دین وایمانی یوقی ، عهد وپیمانلری زرده » دیدی وکوفه ده « حسینک انتقامنی آلمق ایچون کلیکیز ای تواین » دیو ندا ایتدردی . نهایت بیک قدر آدم دها مجتمع اولدی . « کولکسز عسکرک نه فائده سی اولور ، ایشته صدق واخلاص ایله حرکت ایلجهک فدایلر ، بوندن عبارتدر » دهنیلدی . بویله دعوالرده قوال چوق اولور ، فعال آز بولور . سلیمانک دفترنده مقید اولان اون آلتی بیک کشیدن آنجق بش بیکی طوپلانه بیلدی .

کوفه والیسی ( عبدالله بن یزید ) ایسه عیدالله بن زیادک بریوک اردو ایله حرکتی ارکرنش اولدیغندن کوفه نك تقلیل قوتی ایستمزدی . بناء علیه بعض اشراف بلده ایله برلکده ( نخيله ) یه چیقوب سلیمان بن صرد ایله کوروشدی . « سز بزم اخوانمزسکز ، بوبلده نك اشرافیسکز ، بزدن آریلیسکز و بزم قوتمزی تنقیص ایتیمکز ، دشمنمکز قدومنده هپ برابر مدافعه ایدلم » دیو نصیحت ایلدی . سلیمان ورفقاسی ایسه حضرت حسینی کوفه یه دعوت ایدوبده کربلا یه تشریفنده یاردیمه سکرتمدکلرندن ناشی ایشله مش اولدقلری ذنب عظیمی دوشونه دوشونه سودا زده تأثر وتأسف اوله رق بو اوغورده فدای جان ایتکی قورمش اولدقلری جهته بردرلو نصیحت کندولرینه تأثیر ایتدیکندن عزم و نیتلرنده اصرار ایله « بز ، قضایه راضی اوله رق متوکلاً علی الله کیده جکز » دیو جواب ویردیلر . شیعیلر ، کربلا وقعه سندن اول بو قدر فدا کارلنی ایتش اولسیدیلر

ایش بشقه شکله کیرمش اولوردی . اما ندامتک فائده سی اولیه جق بر  
وقتده نادم اولوبده فوران غضب ایله خود سرانه حرکتلی کندولرینی  
تهلکه یه القا دیمک ایدی .

مع مافیه بر مرتب اردوده بولنسه لر خیلی ایش کوره بیلورلردی .  
بناء علیه عبدالله بن یزید « صبر ایدیکز . باری سزکله برابر کیتمک  
اوزره بر مقدار عسکر ترتیب ایدمده دشمنه قارشو قوتلو بولنه سکز »  
دیدیسده مفید اولیوب سلیمان بن صرد ، همان ربیع الآخرک بشنچی جمعه  
کونی اوکله دن صکره حرکت امرینی ویردی . توآبندن بر چوغی آندن  
آریلوب کیرو قالدی . سلیمان بونی ده قید ایتیموب « او یله حیتسز لک  
وجودلرندن ایسه عدملری اولادر » دهرک حرکت ایدیوردی وفرداسی  
کربلایه واردی .

اشبو گروه توآیین ، حضرت حسینک تربه سنه واردقلری کبی صیحه  
وفریاد ایلدیلر . کنه لرندن توبه واستغفار ایتدیلر ویکرمی درت ساعت  
اوراده طوروب آغلادیلر . بعده ، برر برر تربیه وداع ایدرک حرکت  
ایله ( آنبار ) عزیمت ایلدیلر .

کوفه والیسی عبدالله ، آنلرک بویله پراکنده وانتظامسز حرکتلرینه  
باقوب « بو جماعتدن ایلك آله جغمز خبر ، آنلرک محو واضمحلاللری  
خبر تأثر اثریدر » دهرک تأسف ایتدی .

شیعیلر ، انباردن قیام ایله قرقیسیایه واصل اولدقلرنده ( زفر بن الحارث )  
قلعه دن چیقوب آنلرایله کوروشدی ، کندولرینه اکرام ایتدی . « بوراده  
قالکز ، بزمه برابر اولیکز . دشمن پک قوتلو کلیور . برلکده مدافعه  
ومقابله چالیشه لم » دیدی . سلیمان بن صرد ایسه « بلده من اهالیسی ده  
بزه بویله دیدیلر . اما دیکله میوب حرکت ایلدک . بوراده ده طوریحیلردن  
دکلز » دهرک قرقیسیادن حرکتله عین ورده ( رأس العین ) نام محله  
ایندیلر . بش کون اوراده اقامت واستراحت ایلدیلر . عیبدالله بن زیاد  
دخی بر بیوک اردو ایله اورایه بر کونلک مسافه سی اولان محله کلشیدی .

سليمان بن صرد طرفندن ايلرويه سوق اولنان دوت يوز آتلو ، شامليلرك بر مفرزه سنه راست كلهرك اوروب بوزديلر وشامليلرك حيواناتي اغتنام ايتديلر .

عبدالله بن زياد ، خبردار اولنجه اون ايكي بيك عسكرله ( حصين بن نمير ) ي ايلرو سوق ايلدي . سليمان بن صرد دخي آني قارشولدي . جمادي الاولى نك يكرمي آلتيسنده طرفين بربرينه ملاقي اولديلر .

شامليلر ، شيعيلري اطاعته دعوت ايلديلر . آنلرده « خاندان مرواني خلع ايله ابن زيادي بزه تسليم ايديكز . بزه عراقدن عبدالله بن زبيرك مأمورلريني طرد ايليهلم . خلافت ، اهل بيت نبوتّه قالسون » ديديلر . طرفين ، بربرينك تكليفني قبول ايدمديكندن يكديكري اوزرينه حمله ايتديلر . اقشامه قدر محاربه متمد اولدي . غلبه دائما شيعيله يوز كوسترمكده ايدى . فرداسي صباحين ابن زياد طرفندن حصينه امداد ايچون سكز بيك عسكر كلدي . شيعيلر ، فوق العاده شدت ايله مقاتله ايتديلر . طرفيندن بك چوق كيمسeler مقتول ومجروح اولدي . نهايت اخشام ايريشوب حربيه فاصله وئرلدي . فرداسي جمعه كوني صباحين ابن زياد طرفندن ده اون بيك قدر امداد عسكري كلدي . على الصباح غايت شدتلى محاربه لر وقوع بولدي . عساكر شاميه بك زياده لشهرك هر طرفدن توآبيني قوشاتمغه باشلاديلر . سليمان بن صرد آني كورونجه همان « چابوق ربّنه قاووشمق ايسينلر يانمه كلسون ، ديهرك قيليجنك قيني قيدى . عسكرندن برچوغي دخي آ كا اتباع ايله قيليجلرينك قينلريني قيديلر وفداكارانه شامليلر اوزرينه هجوم واقتحام ايله غايت خونريزانه بر جنكه كيرشديلر . شامليلردن بك چوق خلق قتل وجرح ايتديلر .

حصين كوردى كه ايش يمان . بوفدايلر بك شدتلى صالديرورلر . همان پياده او قجيلر جلب ايله او فداييلر اوزرينه اوق ياغدردى . سليمان بن صرد رضى الله عنه مقتول اولدي . آنك وصيتي اوزرينه على الترتيب سنجاني آلان رئيسلر دخي برر برر دوشوب مقتول اولديلر .

توآینده مقاومتہ مجال قالدی . لکن ینہ آقشامہ قدر طیانیدیلر . قراقلق باصنجه شاملیلر ، اردو کاہلرینہ عودت ایلدیلر . رؤسادن ( رفاعہ بن شداد البجلی ) ہان بقیۃ السیوف اولان توآینی طویلا یوب معرکہ کاهی ترک ایلہ فرار ایتدیلر وپریشان وپرا کندہ اولہرق قرقیسیایہ جان آتدیلر و اوج کون اورادہ قالدقدن صکرہ کوفیہ عودت ایلدیلر . آندن صکرہ ابن زیاد دخی قرقیسیا محاربہ لریلہ مشغول قالمشدر .

او ائنادہ بصرہ واهواز طرفلرندہ دخی خارجیلر ظهور ایلہ پک چوق محاربہ لر وقوع بولمش ونہایت اہالینک اقدام وغیرتی ایلہ جمعیتلری طاغیدلمش ونیچہ آزیلی وبللو باشلی رئیسلری اتلاف ایدلمشدر .

### تعمیر کعبہ

عبدالله بن زبیر رضی اللہ عنہما بو ائنادہ صغار صحابہ دن ( عبدالله بن مطیع ) رضی اللہ عنہی کوفہ والیسی نصب ایتمشدر . کچن سنہ حصین بن نمیرک آتدینی مانجینیق طاشلرندن کعبہ مکرمہ نیک دیوارلرینہ وھن کلش اولدیغندن ابن زبیر ، کعبہ دیوارلرینی کاملاً ہدم ایلہ مجدداً بنا وتعمیر ایلدی وقریش مقدماً کعبہ یی بنا ایتدکدہ ( خطیم ) حجری خارجدہ براقش اولدقلرندن ابن زبیر ، بوکرہ اساس ابراھیم اوزرہ بنا وحجرى بیت شریفہ ادخال ایتدی .

### وفات عبداللہ بن عمرو

عمرو بن عاصک اوغلی ( عبدالله ) آلتش بش سنہ سی خلالندہ ختم درس حیات ایلدی . رضی اللہ عنہ

پدرندن اون ایکی یاش کوچوک اولوب پدرندن اوّل اسلام ایلہ مشرف اولمشیدی . پدرینک زوریلہ صفیندہ آنکلہ برابر بولندیسہدہ استعمال سلاح ایتدی . معافیہ « کشکہ یکرمی سنہ اوّل وفات ایدیدمده صفیندہ

بولمیسدم» دیر ایمش . غایت عالم وفاضل بر ذات ایدی . ابو هریره رضی الله عنه دیر ایمش که « بندن زیاده حدیث نبوی حفظ ایدن یوقدر ، الا عبدالله بن عمرو بن العاص که او یازاردی بن یازمازدم . »

### خروج مختار

بروجه بالا ( مختار ثقفی ) کوفه یه کلوب « مهدی محمد بن حنیفه نك وزیر و امینی یم » دیه رك سرأ شیعیری دعوته قیام ایتمکه شیعه طائفه سندن بر گروه آکا اتباع ایتمشلر ایدی . ( سلیمان بن سرد ) مقتول و جمعیتی پریشان اولدقدن صکره میدان کندوسنه قالدی . کیتدکجه یارانی چوغالدی مشهور ( اشتر ) ك اوغلی و کوفه ده عشیرت وقوت و قدرت صاحبی اولان ( ابراهیم ) ی ده بر آراق جلب ایتمکه مختار ك قوتی ازدیاد بولدی و کوفه ده سرأ کندوسنه بیعت ایلینلر ك عددی اون ایکی بیکه بالغ اولدی . آنك اوزرینه آلتش آلتی سنه سی ربیع الاولنك اون دردنجی پنجشنبه کیجه سی خروج ایتك اوزره قرار و یردی و بو قرارینی یاراننه بیلدردی . حال بوکه « مختار ، شو ایکی کیجه نك برنده خروج ایده جك ایمش » دیو کوفه والیسی ( عبدالله بن مطیع ) ه خبر و یرلش اولدیفندن او دخی میدانلره و لازم کلان موقعلره عساكر ضبطیه ایله مخصوص مأمورلر کوندرمشیدی . غروب شمسدن صکره ( ابراهیم بن اشتر ) بر مقدار مسلح آدملریله مختار ك یاننه کیدرکن ابن مطیعك مأمورلری آتی کیرو چو یرمك ایستدکلرندن محاربه یه باشلانندی و شیعیلر طرفندن « آل محمدك امینی خروج ایتدی ، شهدای اهل بیتك انتقاملرینی آلمق ایستینلر کلسون » دیو ندا اولندی .

همان مختاره بیعت ایلش اولانلر طرف طرف طویلائمغه باشلادیلر . ابن مطیع ، طرفندن دخی درحال یدی سکز بیک عسکر جمع وسوق اولندی و بر قانلی محاربه یه باشلانندی . ابن اشتر ، باباسی کبی مردانه

وفدا کارانه هجوم و اقتحام ایدرك محاربه‌ی قازاندی . ابن مطیع ناچار  
 صاووشوب ( دارابی موسی ) ده کیزلندی و ابن اشتر کلوب حکومت  
 قوناغنی ضبط ایلدی . درحال مختار کلوب قصر حکومتی کردی . علی الصباح  
 اشراف کوفه ، مسجد و باب حکومتی کلوب طویلانیدیر . مختار ، مسجد  
 کیتدی . منبره چیقوب غایت بلیغانه بر خطبه اوقوندی . ( ای ناس !  
 بیعت هدایت ایله بیعت ایلدیکز . والله ، علی ابن ابی طالب ایله آل علینک  
 بیعتدن صکره بویله بر بیعت ایلدیکز ) دیوب ایندی . اشراف کوفه  
 کلوب کتاب الله و سنت رسول الله اتباع و اهل بیتک قانلرینی طلب  
 وضعفای حمایه ایتک اوزره بیعت ایلوب کوفه‌ده بر حکومت شیعیه تشکیل  
 ایدیوردی .

مختار ، هرکسه التفات و حسن معامله ایدرك ناسی کوزل کوزل امیدلره  
 دوشوردی و ابن مطیعک دارابی موسی‌ده مخفی اولدیغنی اوکرمکله  
 صاووشوب کیتسی ایچون کندوسنه یوز بیک درهم خرج راه کوندردی  
 اودخی صاووشوب بصره‌یه کیتدی .

مختار ، بیت المالد طقوز ملیون درهم بولوب آنلری کندوسنک  
 سلاح آرقداشرینه تقسیم ایتدی و اشترک برادری ( عبدالله بن الحارث ) ه  
 سنجاق و یروب آنی ( ارمیه ) جهتنه و ( محمد بن عمیر بن عطارد ) ی  
 آذر بایجان و ( عبدالرحمن بن سعید بن قیس ) ی موصله و ( اسحق بن  
 مسعود ) ی مداین طرفه و ( سعد بن حذیفه بن الیمان ) ی حلوانه مأمور  
 ایتدی . ابن زبیر طرفندن امیر موصل اولان ( محمد بن اشعث بن قیس )  
 دخی بونک اوزرینه انجام کاره منتظر اولق اوزره موصلدن قالقبوب تکریته  
 کیتدی صکره کلوب مختاره بیعت ایلشدر .

بعده مختار ، دیوان قوروب احقاق حقوق عباد ایله اشتغاله باشلادی  
 و صکره « مصالحک کثرتی امر قضا ایله اشتغاله مانع اولیور » دهرک امر  
 قضایی کفای السابق قاضی شریحه احاله ایلدی .



### ابن زيادك محاربه سى

بروجه بالا عبيدالله بن زياد ، بر بيوك اردو ايله قرقيسيا اوزرينه كلوب و ( زفر ) ك كارخى اتمام ايتدكدن صكره واروب عراقك ضبطنه مأمور ايدى . توأين فرقه سنى پریشان ايتدكدن صكره قرقيسياي تضيقه دوام ايتمشيدى . زفر ايسه ( قيس عيلان ) قبيله سيله برلكده شديدآ مقاومت ايلدكلرندن ابن زياد آرتق اوجهتدن فراغت ايله بوأئنده اردوسيله موصل اوزرينه يوريدى . مختار طرفندن بروجه بالا موصله كوندرلمش اولان ( عبدالرحمن بن سعيد ) تكريت طرفنه چكيله رك كيفيتي مختاره بيلدردى . اودنخى اوچيك كزیده سوارى ايله ( يزيد بن انس الاسدى ) ي موصل طرفه كوندردى .

يزيد بن انس ، مدين اوزرندن موصله طوغرى حركت ايلدى و موصل حدودنى تجاوز ايله ( باتلى ) نام موقعه قوندى . ابن زياد ايسه آنك حركتنى ايشيدنجه آكا قارشو موصلدن اوچرييكلك ايكي فرقه سوق ايتدى . بوفرقلرك بريسي بركون اول چيقوب يزيد بن انسه ملاقى اولدى . عرفه كونى صباحلين محاربه به باشلاندى . شام عسكرى بوزلدى . سركرده لرى مقتول اولدى . كيرودن كلان فرقه بوزغون عسكرى آلوب برلكده باتلى به كلديلر و فرداسى قربان بيرامى كونى على الصباح جنكه كيرشديلر . آنلرده فحالده بوزلديلر ، كيمى مقتول و كيمى مجروح واسير اولديلر .

يزيد بن انس ايسه آغر خسته اولدينى حالده عسكره قومانده ايدرك بو مظفرتى كوردكدن صكره اوكون اخشام اوستى وفات ايلدى . وصيتى اوزره ( ورقاء بن عازب الاسدى ) سركرده اولدى و سائر رؤسا ايله لى المشاوره « ابن زياد ، سكرسان بيكلك براردوايله كلش . بزآكانصل مقاومت ايده بيلورز . حربى بوكون قازانور ايسه ك يارين غائب ايدرز » دنيله رك اورادن كيرو عودت ايلديلر . مختار ، بونى خبر آلنجه ( ابراهيم بن اشتر ) ي يدى بيك عسكرله اوجانبه كوندردى .

## قَدُّ مَسِينَك نَتِي

کوفه اشرفی ، مختارک تغلب و تحکمندن دلکیر و اندیشه ناک اولدقلری  
 خالد بروجہ بالا ابن اشترک موصل جانبہ عزیمتی فرصت بیلہ رک ہان  
 مختارک علیہ قیام ایتدیلر و کوفہ خارجندہ کی میدانلرہ طویلاندیلر .  
 مختار ، بوندن خبردار اولنجه ہان اشترک عودتی ایچون کندوسنہ امر  
 کوندردی و اهل قیامی برمدت مخابرہ و برمدت محاربہ ایلہ اوایلاندردی .  
 ابن اشتردخی سیرسریع ایلہ کلوب یتشدی و ( میدان سبیع ) دہ برقانلی محاربہ یہ  
 طوتشدی . اهل قیام بوزلدی ، بک چوغی قیرلدی . بشیوز نفرلری اسیر  
 ایدیلوب مختارک حضورینہ کتورلدی . « بونلرک قنغیلری کربلا وقعہ سندہ  
 حاضر ایدی . تحقیق اولنسون » دیوامرایتدی . لدی التحقیق ایکوز قرق  
 سکزینک کربلا دہ حاضر بولندقلری آکلاشلغلہ آنلر اعدام ایدیلدی  
 و باقیسی صلیورلدی .

ملعون ( شمر ) بو وقعہ دہ حاضر ایکن فرار ایتش و فرات کنارندہ  
 برقریہ یہ کیتمش ایدی . عقبگیران طرفندن اوریلوب اتلاف وجہ سی کوپکلرہ  
 القا ایدلدی .

بو وقعہ ذی الحجہ نک اواخرندہ وقوع بولدی . اشراف ورؤسای  
 کوفہ نک بقیہ السیوفی بصریہ قاچوب قورتلدی . مختار دخی آل محمدک  
 قاتلارینی تحرّی ایلہ مشغول اولدی .

شویلہ کہ : حضرت حسینک قتلندہ اُلی و مدخلی اولان والبسہ و اشیا سنی  
 یغما ایدن اشرفی برر برر بولدیروب اولدردی و بعضیلری حقندہ اللرینی  
 آیاقلرینی کسوب دہ دبہ لئہ رک تلف اولمق کبی اشکنجہ لر اجرا ایتدی . کربلا دہ  
 ابن زیاد طرفندن باشبوغ اولان ( عمر بن سعد بن ابی وقاص ) ہ تأمینات ویرمش  
 ایکن آنک و اوغلی ( حفص بن عمر ) ک باشلرینی کسدیروب « بری حسین ایچون  
 و دیگر علی بن حسین ایچون » دیہ رک ( محمد بن حنفیہ ) یہ کوندردی و سرسعادتی  
 حامل اولان ( حولی ) نک تحرّیسنہ مأمورلر کوندردلکدہ خانہ سنک برطرفندہ

باشنه بر سپد کچوروب کيزلنشىدى زوجهسى ايسه بالاده بيان اولندينى اوزره قوجهسى ، سر سعادتي خانهسنه کتوروبده بر کردل آلتنه قودينى زماندنبرو آندن نفرت ايلش وبغض و کين باغلامش ايدوکندن آرايچيلر کلوبده « قوجهك نروده » ديدکلرنده لساناً « بيلم » دهرک ايله اوسپدک اولدینى طرفه اشارت ايلمکله آرايچيلر آنى بولوب اعدام وجهسنى احراق ايتشلردر .

### ابن اشترک غلبهسى رابن زيادك قتل

مختار ، بروجه بالا کوفهدهكى خلافگيرلرينى قهر وتدمير ايتدکدن صکره اواخر ذى الحجهده بر بيوک اردو ايله ابراهيم بن اشترى ، ابن زياد اوزرينه کوندردى .

ابراهيم بن الاشتر ، سير سريع ايله کيدوب آلتمش یدی سنهسى اوائلنده موصل ملحقانندن ( بارشيا ) نام قريهيه واردى . عبيدالله بن زياد دخی موصل طرفندن کلوب آکا قریب محلهده و ( نهر حازار ) کنارنده اردوسنى قوردى .

فرداسى على الصباح غایت قاتلى وپك شدتلى بر محاربهيه کيرشديلر ، ابن زيادك عسکرى قات قات زياده ايسهده ابن اشترک ياننده دخی پك چوق حرب اری وفدايى آدملر بولنديغندن طرفين پك شدتلى دوکوشوب اوروشديلر . طرفيندن پك چوق آدملر مقتول اولدى . نهايت ابن زياد واوغلى و نيجه سرکردهلری دوشوب شام اردوسى پك فنا حالده منهزم اولدى . کوفهليلر ، آنلری او قدر شدتله تعقيب اينديلرکه اسلحه ايله مقتول اولانلرندن زيادهسى نهرده بوغولدى . ابن زيادك اردوسنده نهوار ايسه هپ ابن اشترک النده قالدى . ابن اشتر ، او زمان مدائنده بولنان مختاره مژدهجى کوندردى .

ابراهيم بن الاشتر ، موصلده اقامت ايله ابن زيادك وسرکردهلرندن بعضيلرينك رؤس مقطوعهلرينى مختاره کوندرمش اولديغندن بو رؤس

مقطوعه ، قصر حکومتہ کتورلدکده بر سیلان بر قاچ دفعه ابن زیادک  
آغزندن کیروب بورنندن و بورنندن کیروب آغزندن چیقمش اولدینی  
مر ویدر .

شام اردوسنک بو وجهله انہزام و اضمحلالی دولت امویہ جه عظیم  
ضایعاتدن اولدینی کبی مختارک بویله بر مظفریت عظیمہ یه مظهریتندن طولانی  
عبدالله بن زبیر دخی ضرر دیده اولمشدر . زیرا ابن اشتر ، بو مظفریتک  
عقبندہ طرف طرف بلاد موصلہ مأمورلر کوندر دیک صرہده برادری  
( عبدالرحمن بن عبدالله ) ی نصیبیہ کوندر دی و الجزیرہده واقع سنجار  
وحوالیسنی ضبط ایتدر دی و ( خاتم بن النعمان الباهلی ) حران  
و اورفینی ترک ایدوب کیتمکله بورالری هپ مختارک پنجه تحکمنہ کیردی .

### مختار طرفندہ مرینہ عسکر کوندر ایلکی

بروجه بالا شام و مصر ، عبدالملک بن مروانک الذہ و حرمین و حجاز  
و یمن و بصرہ عبدالله بن زبیرک زیر حکمنده اولوب کوفہده دخی مختارثقی  
تغلب ایتمشیدی .

عبدالملک ، دولت امویہ یی حال سابقہ ارجاع ایتک ایتدر دی . ابن زبیر  
دخی جملہ بلادک ضبطنہ جهد ایلر دی . مختار ایسه ایکینسی ده محو ایتک  
اوزره محمد بن حنیفہ نامنہ خلقی دعوت ایلکده اولوب آنجق مجموع قوتیلہ  
شیعیلرک خصم جانی اولان امویلر اوزرینہ یوریمک ایچون بر مدتجک  
ابن زبیری آوودوب آلداتمق داعیہ سنندہ بولنور و ابن زبیرہ نه عاصی ،  
نہده مطیع ، بلکه ایکینسی اورتہسی مشکوک بر حالده کورونیور ایدی .  
ابن زبیر دخی آنی بومہم و مشکوک حالدن چیقاروبده صراحتہ کندوسنہ  
بیعت ایتدرمک اوزره بیہوده یرہ بیعتہ دعوت ایلوردی .

عبدالملک ، شامده خلافتہ انتخاب اولدینی کبی ( عروہ بن انیف ) ی آلتی  
بیک نفرلہ مدینہ یه کوندرمش ، فقط مدینہ یه کیرمیوبده خارجده طورمسی  
ایچون کندوسنہ امر ویرمش ایدی . عروہ ، مدینہ یه واردی . خارج

شهرده اردو قوردی . فقط جمعه کونلری مدینه یه کیروب مسجد شریفده جمعه نمازینی ادا ایدر و دونوب اردو کاهنه کیدر ایدی . بر آی صکره عبدالملک امریله عودت ایلشدر .

چونکه عبد الملک کندوسنه چکی دوزن و یروبده مرکزینی احکامه محتاج اولدیغندن قوتنک بر قسمی مدینه ده حبس ایتک ، آ کا کوره ایجاب حال وزمانه موافق دکل ایدی . بناءً علیه مدینه نك ضبط و محافظه سیله مقید اولامشدر .

لکن جانب حجازدن خوف و اندیشه سی اولدیغندن حجاز یوانی طومتق و عساکر ابن زبیرک اطرافه انتشار ایله برو طرفلره تجاوزلرینه مانع اولق اوزره وادی القریایه درت بیک عسکر کوندردی . ابن زبیر دخی آنلری طرد ایله مدینه یی محافظه ایتک اوزره او طرفه سوق عساکر ایتکده اولدیغندن جابجا طرفین عسکرلری آره سنده جنک وجدال وقوعبولمقدمه ایدی .

مختار ایسه بو احوال اغتشاشیه یی فرصت اتخاذا ایله ظاهر آ ابن زبیره معاونت ایلک و باطناً ابن حنیفه نامنه حرکت ایله مدینه یی ضبط ایدیورمک اوزره او طرفه اوچ بیک عسکر کوندرمش ایسه ده کوفه عسکرینک سوء نیتلری آ کلاشامغله ابن زبیرک عسکر ی بغته آنلرک اوزرینه هجوم ایله جمله سنی پریشان ایتشلردر .

مختارک مرامی ، محمد بن حنیفه نك همان میدانده چیقوبده دعوا ی خلافتیه قیام ایتسی خصوصندن عبارت اولوب ابن حنیفه ایسه نفسی ایچون قان دوکمکدن محترز ایدی .

بناء علی ذلک محمد بن حنیفه و عبدالله بن عباس اولاد و عیاللری ایله برلکده مکّه مکرمه یه واروب آنده اختیار اقامت ایلشدر ایدی . کوفه رجالندن اون یدی کشی دخی آنلرله برابر بولونیوردی که بونلردن بریسی کوفه اشرافندن و صحابه دن ( ابوطیفیل ) ایدی .

کوفه شیعیلری ایسه ابن حنیفه دعوتی اعلان ایتش اولدقلرندن

شایدکه افکار عمومی آنک طرفه میل ایدیورر دیو ابن زیر، خوفه تابع اولدیغندن ابن حنیفه بی جماعتیه برابر بیعته دعوت ایلدکه ایام فتنه کجوبده ناس بر خلیفه اوزرینه اتفاق ایدنجیه دک بی طرف طوره جقلرینی بیان ایله اعتذار ایتدیلر ایسه ده ابن زیر، همان ابن حنیفه بی حبس ایله مدت معینه ظرفنده بیعت ایلدکری تقدیرده جمله سنی اعدام ایده جکنی بیان ایله تهدید و انداز ایلدی. آنک اوزرینه ابوطفیل رضی الله عنه کوفه یه واردی. کیفیت اهل کوفه یه بیلدردی. بو صورت ایسه تمام مختارک آرادینی بر فرصت اولدیغندن منبره چیقدی، غایت مؤثر بر خطبه اوقودی. «ایشته مهدیکز، سائر اهل بیت نبوت ایله برلکده قیون کبی محبوس اولوب نه وقت ذبح اولنه جقلر دیو بکلیورلر» ده نیجه اذهان ناسه فوق العاده غلیان کلکله درت بیک قدر فدایی سچیلوب طاقم طاقم جانب مکیه عازم اولدیلر وابتدا (ذات عرق) واران (ابو عبدالله جدلی) همان معیتده مجتمع اولان بر گروه ایله بلده حرامده شهر سلاح ایتمش اولماق ایچون اللرینه برر اودون آله رق مکة مکرمه یه کیردیلر و محمد بن حنیفه بی محبسدن چیقاردیلر. کیروده کیلری دخی گروه گروه کلوب مکة، هب کوزلری قرامش، باشلرینه قان چیقمش کوفه فداییلر یله طولدی. عبدالله بن زیر دوچار خوف و حیرت اولدی.

بو فداییلر، همان ابن زیر اوزرینه هجوم ایتمک ایستدیلر ایسه ده عبدالله بن عباس «بلده حرامده مقاتله جائز دکدر» دیو منع ایلدی. ابن حنیفه دخی (شعب علی) یه چیقوب یاننده مجتمع اولان درت بیک قدر آدمله اوراده تمکن و مختار طرفندن کندوسنه کوندرلش اولان درت یوز بیک درهمی یاننده کیلره تقسیم ایتدی.

### قتل مختار

کوفه جهتنک اهمیتی کوندن کونه زیاده لشمکده اولدیغندن عبدالله بن زیر، برادری (مصعب بن زیر) ی بصره والیسی نصب ایتدی.



بالاده بیان اولندینی اوزره وقعه سیعده منہزم اولوبده بصرہ فرار  
ایتمش اولان کوفہ اشرافی دخی مصعبی مختارک علیہنہ تحریک وتشویق  
ایلدیلر .

مصعب ، حد ذاتندہ ہمدار بر آدم اولدینی حالده بصرہ دیارینک  
قہرمانی وفارس امیری اولان ( مہلب ) ی دعوت ایلدی . مہلب ، یک چوق  
مال وعسکرلہ بصرہ کلنجه مصعبہ جسارت کلدی وہان بصرہ عشائری  
جلب وهر برینک اوزرینہ مقتدر باشبوغلر نصب ایتدی . حتی بنی تمیم  
قبیلہ سنک باشبوغی مشہور ( احنف بن قیس ) ایدی . ایشتہ مصعب ، بویلہ  
برمکمل اردو ایلہ ہان کوفہ اوزرینہ حرکت ایلدی .

مختار ، بوندن خبردار اولنجه دوچار تلاش اولوب کوفہ دیارینک  
قہرمانی اولان ( ابراہیم بن اشتر ) ایسہ موصلده بولمغله مختار ہان ( احمر بن  
شمیط ) ی سر عسکر نصب ایدرک بر بیوک اردو ایلہ مصعبہ قارشو  
چیقاردی .

ابن شمیط ( مذار ) نام موقعہ واردی . مصعب دخی کلوب آکا  
قارشو اردو قوردی . چرخہ جیلر اوروشدی ، محاربہ قیزشدی .  
مہلبده کوفہ اردوسنک مقدمۃ الجیشی ایلہ بر آرز چارپیشدی . بعدہ سلاح  
آرقداشلرینی هجومہ تشویق ایتکله جملہ سی بر اوغوردن هجوم ایلہ دفعہ  
بر چوق خلق ابن شمیطک باشنہ اوشدی . اودخی مردانہ مقابلہ ایتدیسہده  
نہایت اوریلوب یرہ دوشدی .

ابن شمیط ، بوصورتلہ مقتول اولنجه کوفہ اردوسی فنا حالده بوزولدی .  
بصرہ لیلر ایسہ آنلرہ امان وزمان ویرمیوب کوفہ یه طوغری کمال شدت  
ایلہ تعقیب وراست کلدکلرینی اتلاف ایتکله منہزمینک چوغی قیریلوب  
یوللرده قالدی .

مختار ، بو ہزیمت فاحشہدن خبر آلنجه ہان مصعبی کوفہ یه اوغراتمامق  
ایچون موجود معیتی اولان عسکرلہ ( حرور ) یه چیقدی کہ مقدما اورادہ

مسجد و قلعه و حصار یا پدرمشیدی . عسکرینی اوراده تعیبه ایتدی . مصعب دخی سیر سریع ایله کلوب چاتدی .

محمد بن الاشعث ، مقدما مختار دن قاچوب ده بصره یه کیتمش اولان کوفه اشرافیه برلکده کلوب مصعبک اوکنه کچدی و مختار ایله مردانه و انتقام جویانه حرب ایتدی . مختار ایسه او قدر شدتلی بر هجوم ایتدی که ابن اشعث رفقاسیله برابر محو اولوب کیتدی . مصعبک باشنده کی عسکر دخی طاغیلوب آز قالدی او دخی تلف اوله یازدی . لکن بو میدان حربک قهرمانی اولان مهلب ، غایت شدتلی هجوملر ایدرک کوفه عسکرینی بوزدی . مختار یالکز قاهره جزئی عسکرله حصاره کیروب قبانندی و ما کولات و مشروباتدن محروم اولغله نهایت فداایلیک یولنده طیشارو اوغرادای . اوغرینه کلنلری طوغرادای ، کندوسی ده بر نفر کبی قتل اولندی .

مختارک قتلی آلتمش یدی سنه سی رمضانک اون دردنده واقع اولوب مختار ، او زمان آلتمش یدی یاشنده ایدی . بو محاربه ده کوفه لیلرک تلفاتی یدی بیکه بالغ اولمشیدی .

اهل قبله محاربه لرنده فراریلری تعقیب و یارده لولری اتلاف ایتمک جائز دکل ایکن مصعب ، بو کره بوزغون عسکری شدت ایله تعقیب و راست کلدیکی یرلرده اتلاف ایتدیرمش اولدینی جهته بین الناس دوچار طعن و تشنیع اولدی . مختاری اعدم ایله امر غلبه یی اتمام ایتدکدن و محاربه بیتدکدن صکره مشهور (حجر بن عدی) نک (عبدالرحمن) و (عبدالرب) نام ایکی اوغلنی و (حذیفه بن یمان) ک اوغلی (عمران) ی طوتوب قتل ایتمکه بوده انظار انامده پک چیرکین کورولدی .

مصعب ، صکره عبدالله بن عمر رضی الله عنهما حضر تلریله لدی الملاقاة . سلام و یروب « برادر زاده کز مصعب » ده نیجه ابن عمر « سن بر کونده اهل قبله دن یدی بیک کشینک قاتلیسین » دیو توبیخ ایتمش و مصعب

« آنلر کفره و فجّره ایدی » دیدکده « والله بدرکدن موروث قیون سوریلری اولسه برکونده بوقدرینی اتلاف ، عین اسرافدر » دیمش اولدینی مرویدر .

مصعب ، بوجه بالا کوفه یی ضبط ایله اطرافه مأمورلر کوندردیکی صرمده ابراهیم بن اشتره خبر کوندروب « اکر بکا اطاعت ایلر ایسه ک آل زیر ، مقام خلافتده بولندقجه شام ایالتی و غربیه طوغری فتح ایده جگک یرلر هپ سنک اولسون » دیمش . عبدالمملک بن مروان دخی « اکر بکایبعت ایلر ایسه ک عراق تمامیه سنک اولسون » دیو ابن اشتره خبر کوندرمش . ابن اشتر ، کندی یارانیه لدی المشاوره اختلاف ایتشلر . او دخی « اکر ابن زیادی و بونجه اشراف شامی اتلاف ایتش اولمسیدم عبدالمملکه بیعت ایلردم » دیهرک هان مصعبه موافقت جوابی و یردی و آنک دعوتی اوزره کوفه یه واردی . مصعب دخی آنک منصبی ، یعنی موصل و الجزیره وارمنیه و آذر بایجان قطعه لرینک امارتی مهلبه و یردی .

بو سنه فارس و عراقده خوارج طائفه لری غلو ایدرک مدائنه قدر تحطی و تعدی و قتل نفوس و نهب امواله تصدی ایلدکلرندن مصعب ، ینه فارسه مهلبی مأمور ایدوب ابن اشتری دخی موصله کوندردی .

خوارجدن اولوب یمامه ده تغلب ایدن ( نجده بن عامر الحنفی ) ایسه بحرین و عمان طرفلرینه تجاوز ایله دیار نجدی کاملاً قبضه تحکمنه کچوردی .

چند سنه دنبرو حجاج ایله عبدالله بن زیر حج ایلدیکی کبی اشبو آلتش سگز سنه سی موسم حجنده دخی حجاج ایله ینه او حج ایلدی . لکن بو سنه عرفاتده دوت سنجاق کورولدی . بری ( محمد بن حنیفه ) ایله اصحابنک و دیگر ( عبدالله بن زیر ) ایله تبعه سنک و دیگر بری ( بنی امیه ) نک و دیگر بری ده ( نجده بن عامر حنفی ) نک ایدی و اسلم طوائف ، ابن حنیفه نک جماعتی ایدی . دیگر اوچ طائفه میانه لرنده خصومت و رقابت

قویہ وار ایدی . لکن بر وقعہ ظہور ایتیموب موسم حج غائبہ سزجہ کچیرلدی .

### عمرو بن سعیدك قتی

( عمرو بن سعید بن العاص ) اکابر امرای امویہ دن اولوب عصر معاویہ ده ( مروان بن حکم ) ایله خلف و سلف اوله رق مکرراً مدینہ امارتنده بولمیشیدی . مروانك مصر اوزرینه حرکتده بیوک خدمت ایلش واو صرہ ده شام اوزرینه هجوم ایدن ( مصعب بن زبیر ) ه غلبه ایتمش اولدیغنه مغرور اوله رق مروان دن صکره خلافت کندوسنك حقی اولوق ادعاسنده بولندینی خالدہ مروانك کندی اوغللری ( عبد الملك ) ایله ( عبدالعزیز ) ی ولی عهد ایلسندن وبعده عبدالمملکک جلوسندن طولانی مغیر الحاطر اوله رق باری آندن صکره کندوسنك خلیفه اولسی حقنده بر قرار ویرلمسنى ایستردی . عبدالملاک ایسه اورالره یناشمده یعنندن عمرو بن سعید پک زیاده دلکیر ایدی .

آلتش طقوز سنه سی خلالنده عبدالملاک ( قرقیسیا ) اوزرینه حرکت ایلوب عمرو بن سعیدی دخی برابر کوتوردی . حلب جوارینه واردقلرنده عمرو بن سعید ، کیجه لین اردودن آیریلوب عودت ایله دمشق شامی ضبط ایدیوردی . عبد الملك دخی صباحین کیفیتدن آگاه اولنجه عودت ایلهرک عمرو ایله جنکه کیریشدیله . لکن مصلحینك توسطیله یکدیکره تأمینات قویہ اعطا و بینلرنده بر عهد نامه امضا ایدرک باریشوب کوروشدیله .

درت کون صکره عبدالملاک ، عمرو بن سعیدی سرای حکومته جلب و غدرأ اعدام ایله بر بیوک رقییدن قورتلدی . لکن عهد شکنك ایله ملوم و متهم اولدی .

عمروك بروجہ بالا عصیانى اوزرینه حما طرفنده واقع ( جبل لکام ) ده بر بیوک عصیان و اختلال ظہور ایتمشیدی . عبدالملاک سوق عسکرله عاصیلری

قهر و تدمیر ایلدی . قطعۀ شامیه ، هر درلو عاصی و مخالفلردن خالی و بری قالدی .

### ابن حنیفه نك بعضه اموالی و ابن عباسك ارخالی

بروجه بالا مختارك قتلی اوزرینه عبدالله بن زبیرك حكومتی كسب قوت و متانت ایلنجه برادرى ( عروه بن زبیر ) ى ابن حنیفه یه كوندردی . جماعتیله برابر كندوسنه بیعت ایلزلر ایسه اوزرلینه سوق عسكرایده جكنی ییلدیردی . ابن حنیفه « برادرك نه عنود آدمدر . اللهك غضبندن قورقيور » دیدكدن صكره یاننده كی جماعته « بن ، متوكلا » علی الله بوراده اقامت ایلیه جكم . جانی ایستین صاووشوب كیتسون « دیهرك آنلرك مفارقت وعودتلینه رخصت ویردی . كوفه رؤساسندن ( ابو عبدالله جدلی ) و دیگرلری « بز ، سندن آیرلمیز » دیدیلر . ابن زبیر دخی تكلیفنده اصرار كوستردی .

ایشته بوصره ده ابن حنیفه ایله عبدالملك آره سنده برمخابره وقوع بولدی . شویله كه : امور امت بر صورت تسویه بولنجیهك اقامت ایلك اوزره ابن حنیفه شامه كلورسه حقنده حرمت و رعایت ایلیه جكنی عبدالملك وعد و اشعار ایتدی . ابن حنیفه دخی جماعتیله برابر جانب شامه عازم اولدی . ابن حنیفه ، مدینه یه وصولنده عبدالملكك بروجه بالا عهد و وعدینه مخالف اوله رق قیجه لكه عمرو بن سعیدى قتل ایتمش اولدیغنی خبر آلدی و بوحر كتنه نادم اوله رق ( آیلَه ) ده قالدی .

بوئانده ابن حنیفه نك ، زهد و صلاحنه و درجه فضل و كمالنه دائر بین الناس برچوق سوزلر شایع اولغله عبدالملك دخی آنك دیار شامیه ده بو وجهله انتشار صیت و شهرتندن اوركوب آنی دعوت ایلدیكنه نادم اولدی .

بونك اوزرینه عبدالملك « بز ، بیعت ایلینلرك مملكتمزده اقامتی اصول سلطتمه اویماز » دیو خبر كوندرمكله ابن حنیفه ، جانب مكیه عودت

و شَعْب ابْنِ طَالِبْدَه اَخْتِيَار اقامت ايلدى . لَكِن عَبْدَالله بِن زَبِير آ كا راحت و يرميُوب تَكْلِيْفَات و تَضِيْقَاتِنْدَه اولكيدِن زِيَادَه اَصْرَار كوستردى . ابن حَنِيفَه نَك جَمَاعَتِي ، ابن زَبِير ايله حَرْب اَيْتْمَك اوزره اسْتِيْذَان ايتدِيلَر ايسَهْدَه اذن و يرمدى و هَمَان ( يَارَبَّ ابْنِ زَبِيرَه ذَلَّتْ و قورقو لَبَاسِنِي كِيدِر و آ كا و اتبَاعِنه رَنج و اِذَا اَيْدِه جَكْ آدَم كُونْدِر ) دِيو دَعَا ايتدى و قَالِقُوب طَافْه كَيْتدى .

### رَفِيَات اَعْيَانِه

عَبْدَالله بِن عَبَّاس دَخِي عَبْدَالله بِن زَبِيرَك يَانَه و اَرُوب آ كا پَكْ آغَرِ سَوَزَلَر سَوِيلدى و هَمَان طَافْه هَجْرَت و چوق كُچْمِيُوب يَتْمَش سَنَه هَجْرِيَّه سِي خَلَالْنْدَه سَكْسَان بُوْقْدِر ياشْنْدَه اَيْكِن طَافْده دَار نَعِيْمَه رَحْلَت ايلدى .

نَمَازِنِي ابْن حَنِيفَه قِيلدى « بُو كُون بُو اَيْتْمَكْ عَالَم و دَانَاسِي فُوت اولدى ، دِيدِي . فِى الْوَاْقِع عَبْدَالله بِن عَبَّاس حَضْرَتْلَرِي ، عَصْرِيْنَكْ اَعْلَم و اَفْضَلِي ايدى . عِلْم تَفْسِيْرَكْ وَاَضْعِي دَخِي اودِر ( رَضِيَ اللهُ عَنْه و اَرْضَاهُ )

يَتْمَش بَر سَنَه سَنْدَه دَخِي اَصْحَاب كِرَامْدِن ( بَرَاءَ بِن عَازِبِ الْاَنْصَارِي ) رَضِيَ اللهُ عَنْه كُوفَهْدَه و فَات ايلدى . غَزْوَه بَدْرَه چِيْقَمَشِيْكِن صَغِير اولدِيْنِي اِيْچُون رَسُوْلُ اللهِ صَلَّى اِلَهِ عَلَيْهِ و سَلَم حَضْرَتْلَرِي آ نِي كِيرو چُوِيْرْمَشِيْدِي ، صَكْرَه اَحْدَدَه و دِيْكَر غَزَوَات نَبُوِيَّهْدَه بُولْمَشْدِر .

يَنَه بُو سَنَه اَصْحَاب كِرَامْدِن ( عَبْدَالله بِن اَدْرَدِ اسْلَمِي ) رَضِيَ اللهُ عَنْه دَخِي كُوفَهْدَه و فَات ايلشْدِر .

### عَبْدُ الْمَلِكِ عِرَاقِي اسْتِيْلَاسِي

عَبْدَالله ابْن زَبِير حَضْرَتْلَرِيْنَكْ بَرُوجَه بِالَا اِيْجَاب حَال و زَمَانَه مُوَافَقِ اولمِيَان طُور و حَرَكَتِي ، ابْن حَنِيفَه نَكْ و سَاثَرِ اَهْل بَيْتِ نَبُوْتَكْ جَالِبِ نَفَرْتِي



اولوب حتی بنی هاشمک اک بیوک دشمنلری بنی امیه ایکن عبدالله بن عباس حضرتلری ، عبدالمملکی ابن زبیره ترجیح ایدر اولمشیدی .

الحاصل عبدالله بن زبیر ، بالجمله محبّ اهل بیت اولانلری کوجندرمش واعداسی الارینه معنوی سلاحلر ویرمش ایدی . عبدالمملک ایسه هرفرستدن استفاده ایدرک مادی ومعنوی اسباب سفریه سنی اکماله چالیشیوردی .

شویله که : عراق سفری کندوسنک مطمح نظری اولوب حتی آلتش طقوز سنه سنده قرقیسیا اوزرینه حرکت ایلشیکن ( عمرو بن سعید ) ک عصبانی و بعض نواحینک اختلالی سببیه کیرو قالمشیدی . لیکن مخالفلری قهر و تدمیر ایله قطعۀ شامیه یی حسن انتظام وانضباط آلتنه آلمشیدی . مدینه یولنی محافظه ایتمک اوزره حضرت عثمانک موالیسندن یعنی کوله منلرندن ( طارق بن عمرو ) ی دخی عسکر ایله او طرفه کوندرمش و ( ایله ) ایله ( وادی القری ) آره سنده اقامت وامر محافظه یه دقت ایلسی ایچون کندوسنه امر ویرمش ایدی .

الجزیره قطعده سنده ایسه بو سنه بعض عشائر و قبائل ، بربریه مقاتله ویکدیگری حقنده شرع وانصافه صیغمیه جق صورتده وحشیانه معاملهلر اجرا ایدیورلر .

دیار فارس وعراقده دخی خوارج محاربه لری دوام ایدوب مصعب بن زبیرک اک مدبر ومقتدر امراسی متفرق اوله رق کندوسی کوفه ده یالکیز قالمشیدی .

بناء علی ذلک ، حال وزمان عبدالمملکک مقصدینه موافق وکندوسنک اداره سی مضبوط وامراسی کندوسنه خیرخواه وصادق اولغله همان اسباب سفریه سنی اکماله چالیشیوردی وکوفه رجالیه بله اخباره انواع مواعید ایله آنلری جلب وامالیه سعی ایدوب برخیلیسندن موافق جوابلر وبعضیسندن عادتاً دعوتنامه لر آلمشیدی .

فقط اوتهدنبرو عسا کر اسلامیه ، موسم صیفده دیار رومه غزا ایده کلشلر ایکن معاویه نک وفاتندن صکره ظهوره کلن فتنه لرذن ناشی بو اصول

معطل قالدی . روملر دخی بوندن استفاده ایدرك دیارشامه تخطی اوتجاوز ایدر اولدیلر .

عبدالملك ، ايسه وار قوتيله ابن زيره قارشو طورمق مجبوریتده بولنديغندن دفع بلا ایچون یتمش سنه هجریه سنده بهر هفته بیگر آلتون ویرمك اوزره استانبول ایمپراطوريله بر مصالحه نامه عقد ایلدی .

عبدالملك ، بو وجهله روم طرفندن کسب امتیت ایلدکدن صکره همان یتمش بر سنه هجریه سی خلالنده عراق اوزرینه حرکتی نیت ایلوب اکابر امراسنی حضورینه جلب ایله عقد مجلس مشاوره ایتدی . حضارک بعضیسی شام ایله قناعت وسفر عراقدن فراغت اولنمق رأینده بولندی . عبدالملك بورأی قطعیاً رد ایلدی . بعضیلری دخی « ایکی سنه سفر ایله اوغراشیلدی ، بو سنه ده بوللق دکل » دهرک سفر عراقک سنه آتیهیه ترکی مناسب کوردی . برادری محمد بن مروان ايسه « یا امیر المؤمنین ! همان یورویکیز ، حقکزی آرایکیز » دیمکله بعضیلر دخی « سز بوراده اقامت ایله خاندانکزدن برینی کوندریکیز » دیدی . عبدالملك دخی « بو ایشک باشنده صاحب رأی بر قرشی بولنمق لازمدر . احتمالکه بر شجیع آدم انتخاب ایلرمده صاحب رأی اولماز . بن اصول حربی بیلورم . لازم کلورسه قلیج ایلده اثبات شجاعت ایده بیلورم . مصعب ، اگرچه بر بیت شجاعتمدن پک شجیع بر ذاتدر . لکن فن حرب بیلمز واطرافنده مخالفلری وار . بنم آدملم ايسه هپ بکا خیر خواهدر » دهرک همان حرکتی قرار ویردی .

فی الواقع مصعب بن زير ، برادری کبی شجیع و بهادر بر ذات ایدی . لکن رأی وتدییرجه عبدالملك آکا فائق ایدی . ( والرأی قبل شجاعة الشجعان )

عبدالملك ، همان پک مکمل وغایت مضبوط براردو ایله شامدن حرکت ایلدی وابتدا کندوسنه سد راه اولان ( زفر بن الحارث ) اوزرینه کیتدی وقرقیسیا قاعه سنده آنی محاصره ایتدی .

مانجنيق قوردی ، حصارك بر برجی ییقدردی ، عسكرينه شدتلی هجوملر ایتدردی. زفر ايسه فن حربده ماهر ومثلی نادر بر بهادر اولوب اويله قوتلی مدافعه ایتدی و او قدر مردانه مقاومت ایلدی که جمله حیرت الیریدی . شاملیلر ، پك چوق هجوملر ایدوب پك چوق تلفات ویرمشلر ایکن قلعه یه ظفریاب اوله مدیلر . حال بوکه آنلر مانجنيق ايله اوغراشورلر ایکن زفر ، اوغلی ( هُذَیل ) ی سوار ی ايله طیشارو چیقاردی . اودخی شاهین کبی شام عسکرینی اوردی ، صفلرینی یاردی ، عبد الملک اوتاغنه قدر واردی . قلیچ ايله اوتاغك بر قاچ اپنی کسدکدن صکره دونوب کیتدی و سلماً حصاره کیردی .

عبد الملک ، هر نصل اولورسه اولسون زفرله مصالحه یه راضی اولوب برادری محمد بن مروانی مذاکره یه مأمور ایتدی اوده هذیل ايله سویلشدی . هذیل ، باباسنك یانه کیدوب « بونجه ناس ، عبد الملکه بیعت ایلش . سن ده آنکله اویوشیورسه ك . بو آدم سکا ابن زیردن خیرلودر » دیدکده باباسی « ابن زیرك بیعتی بونجده در . نصل تقض ایده یم » دهرک بعض شرائط ايله مصالحه یه موافقت ایلدی . عبد الملک ده بو شرطلری قبول ایتدی .

شویله که : زفر ومعیتنده کی عسکر مال وجانلرندن امین اولمق وابن زیرك وفاتته قدر زفر ، عبد الملکه بیعت ايله مه مک وعسکرينه تقسیم ایچون کندوسنه عبد الملک طرفندن بر مقدار مال ویرمک اوزره مصالحه یه قرار ویرلدی . فقط عبد الملک عمرو بن سعید حقنده واقع اولان غدیرنی تذکر ايله زفر آنک یانه وارمقدن محتنب اولدیغنه بناءً عبد الملک آنی تأمین ایچون رسول اکرم صلی الله علیه وسلم حضر تلرینک قضیبنی ( یعنی عصاصنی ) کوندردی. زفرده آکا امنیت ایلهرک قلعه دن چیقوب عبد الملک یانه واردی . کوروشدیلر ، بارشدیلر .

عبد الملک ، بو وجهله قرقیسیا غائله سنی برطرف ایدنجه اوکنده بشقه بر حائل قالمدیغدن همان اردوسیله ایلرو حرکت ایلدی . مصعب بن زیر ،

بصره ده ایکن عبدالملک شامدن حرکتنی خبر آلدقده مهلب کبی بیوک محاربه لرده شایان اعتماد اولان بصره امراسی ، فارس طرفنده خوارج محاربه لریله مشغول اولدقلرندن درحال آنلری جلب ایله کوفه کلوب کوفه امراسنی جمع وکوفه امراسنک اک بهادر ومدبری اولان ( ابراهیم بن اشتر ) ی دخی موصلدن جلب ایدرک وار قوتیله عبدالملک قارشو وارمق لازم کلوردی .

زیرا عبدالملک غلبه ایتدیکی تقدیرده متفرق خوارج طائفه لرنی برر برر اوروپ طاغیتق کندوسنجه قولای ایدی . اما عبدالملک غلبه سی تقدیرنده خوارجه قارشو طورمامک نه فائده سی واردی .

مصعب ایسه خوارج محاربه لرنه زیاده اهمیت ویرمکله مهلب کبی اک مقتدر امرای عسکرلریله برابر فارس جهتلرنده براقوب یالکز مشهور ( اخنف بن قیس ) ی استصحاب ایله کوفه کلبدی . اخنفده کوفه ده فوت اولدی . مصعبک یاننده بصره عسکرینی اداره یه مقتدر بر بیوک آدم قلمدی .

مصعب ، همان ( ابراهیم بن اشتر ) ی جلب ایدرک عبدالملک قارشو چیقدی . حال بوکه ایکی اردو آرسنده ایکی اوچ مرحله قالدقده عبدالملک اشراف عراقدن مقدما مخاربه سی سبق ایدنلره تأکیداً ومخاربه سی سبق ایتیلره مجدداً مکتوبلر یازوب هر برینه بررشی وعد ایلدیکی صره ده ابن اشتره دخی برمکتوب کوندروب عراق والیلکنی وعد ایلشیدی . ابن اشتر ، مکتوبی آچیوب مهرلی اولدینگی حالدده مصعبه تسلیم ایلدی . اودخی اوقویوب مائی آکا سویلیدی . ابن اشتر « هپ امراکزه بویله مکتوبلر کلشدر . لکن آنلر کتم ایدیور . همان آنلری قتل ایت ، یاخود جمله سنی حبس ایله . باشلرینه مأمورلر اقامه ایت که مغلوب اولورسه ک جمله سنی قتل ایتسونلر وغالب کلورسه ک آنلرک سیبللرنی تخلیه ایله عسیرتلرینه منت ایلش اولورسین » دیدی . مصعب ، نصل مشکل برحال وموقعده بولندیغنی واهل عراقک نصل اهل شقاق ونفاق اولدقلرنی آکلادی .

« احنف بن قيسه الله رحمت ايلسون . اهل عراق ، هر کون بر قوجه ايستين روسي قاري کي هر کون برامير ايسترلر دير ایدی . طوغريدر . لکن ديدیکک تدبيرک اجراسنه شمديکي حالمز مساعد دکلدرد ، ديهرك همان اردوسيله ايلرو حرکت ایلدی .

خلال جمادی الآخره نهر ( دُجیل ) ناحیه سنده و ( دِيرْجَانْلِق ) جوارنده تلاقی فریقین واقع اولدی . مقدمه الجیشه مصعب طرفدن ( ابن اشتر ) و عبدالمک طرفدن برادری ( محمد بن مروان ) مأمور اولدیلر .

همان بر شدتلی جنکه باشلاندی . محمد بن مروانک سنجاقداري قتل اولندی . ابن اشتر ، آنک فرقه سنی یرندن قالدردی ، کيرو سوردی . عبدالمک برادرینه امداد کوندردی ، محاربه دها زیاده شدتلندی . مصعب دخی ( عتاب بن ورقا ) یی ابن اشترک امدادینه کوندردی . عتاب ایسه عبدالمکک مجلوی اولدیغندن بوزغونلق کوستردی . همان ابن اشترک باشنده کی عسکر بوزولدی وابن اشتر مقتول اولدی . آنک اوزرینه عساکر شامیه ، طوغری مصعبک اوزرینه هجوم ایدنجه آنک باشنده کی عسکرده طاغیلدی . مصعب ، اون یدی آدمیه یالکز قالدی و قلیج النده جنک ایدرک اوتوز آلتی یاشنده ایکن اوده بر نفر کي مقتول اولدی .

عبدالمک همان عراق عسکرینی بیعتہ دعوت ایلدی . آنلرده بیعت ایدیوریدیلر . بو صورتله غوغا بیتدی . کورولتی باصلدی . عبدالمک کوفیه کیتدی . قرق کون ( نخيله ) ده توقف ایتدی . عراق وفارس هپ آنک الله کچدی . عبدالله بن زبیرک النده یالکز حجاز و یمن قالدی و قوتنه کلّی ضعف کلدی .

عبدالمک ، بوجه بالا عراق وفارسی قبضه تصرفه کچیرمش و طرف طرف امرا و مأمورین کوندرمش ایدی . یتمش ایکی سنه سی خلانده بو امرا ، یک چوق خوارج محاربه لريله مشغول اولمشلردرد . لکن خوارج

ایله باشه چیقهدقلرندن عبدالملک دخی خوارج ایشلرنده مشهور مهلبی  
استخدامه مجبور اولمشدر . خوارج کروهی ، حکومتلره عاصی اولوب  
آنحقی افکارجه آنلرک بیننده دخی بربرینه مخالف فرقهلر وار ایدی .  
بالاده اشعار اولندیغی اوزره یمامده ظهورایدن (نجدۃ بن عامر الحنفی)  
نام خارجی عمان و بحرینه قدر تجاوز ایله کرک ابن زیره کرک دولت  
اموییه معارض بولمیش ایدی . بوسنه آکا ضد اولان خوارجدن (ابو  
فدیک) نام خارجی ظهور و بحرینی استیلا ایله نجدیه ایدام ایشدر .  
صکره کوفه و بصره عسکری بحرینه سوق اولنه رق ابو فدیک دخی  
قتل اولمشدر .

### مجاهدک جانب مجازه مأموریتی

عبدالملک بوجه بالا عراقی استیلا ایتدکدن صکره (حجاج بن یوسف  
الثقفی) که بین الناس (حجاج ظالم) دیو معروفدر . عبدالملک کلوب  
« بن عالم منامده کوردم که ابن زیری طوتوب دریسنی یوزمشم . بنی  
آنکله محاربهیه مأمورایت » دیمکه عبدالملک دخی آنی اوچ بیس قدر  
شام عسکريله جانب مجازه کوندردی . حجاج ، یتش ایکی سنه سی  
جمادی الاولاسنده عزم سفر ایتدی و مدینهیه اوغرامیوب طوغری بنی  
ثقیفک وطنی اولان طائفه کتدی . آباواجدادینک یوردی اولدیغندن  
و ابن زیردن منکسر الخاطر اولان ابن حنیفه یاران یاراده بولندیغندن  
حجاج اوراده کندوسنه خیلی هوادار بولمشدر .

حجاج ثقفی ، طائفدن عرفاته سواری کونده در ، ابن زیرک سواریسی  
دخی اورایه کلوب جنک ایدرلر و هر وقت ابن زیرک سواریسی مغلوب  
و منهزم اوله رق دونوب مکیه کیدرلر ایدی .

### ابن زیرک سرانگی و عبدالملک استغفرلی

حجاج ، عبدالله بن زیرک ضعفنی و عسکرینک متفرق اولدیغنی عبدالملک  
انها ایله آنی محاصره ایتک اوزره مکیه کیتمک ایچون استیذان واستمداد



ايلككه عبدالملك دخى حجاجه التحاق ايتك ايچون (وادى القرى) ناحيه سنك  
محافظه سنه مأمور اولان (طارق) ه امر نامه كوندردى كندن طارق ،  
همان ايتمش ايكي سنه سى ذى القعدة سنده مدينه كوروب ابن زبير طرفندن  
امير مدينه اولان (طلحة الندا) يي طرد واهل شامدن برينى يرينه  
قائم مقام نصب ايلدكدن صكره كندوسى بشيك عسكرله چيقوب سلخ  
ذى الحجه ده مكيه وارمشدر .

حجاج ايسه خلال ذى القعدة ده مكيه كلوب احرامه كيرمش وناس ايله  
برابر حج ايتمش ايسه ده ابن زبيرك ممانعتندن ناشى بيت شريفى طواف  
و (صفا) و (مرؤه) آره سنده سعى ايدمه دى . ابن زبير ايله اصحابى دخى  
عرفاته چيقه مدقلى جهتله حج ايدمه ديلر و تمام موسم حجه حجاج (جبل  
ابى قيس) اوزرينه مانجنيق قوروب ابن زبير اوزرينه طاش آتمغه باشلادى  
وبوسنه عبدالله بن عمر رضى الله عنهما حضرتلرى حج ايچون مكيه كلش  
اولديغندن حجاجه « اللهم قورق. سن شهر حرام ده وبلد حرام ده سين .  
اقطار ارضدن ايفاي فريضه حج ايچون بونجه ناس كلوب طوپلانمش .  
مانجنيق ، آنلرك طوافنه مانع اوليور. آنلر ايفاي حج ايدنجه يه دك طاش  
آتمقن واز كچ « ديو خبر كوندرمككه او دخى موقه مانجنيق تعطيل  
ايلدى . ابن زبير دخى حجاج كرامى طواف وسعيدن منع ايتدى . طواف  
زيارتدن فارغ اولدقلى كبي حجاجك مناديسى ه هايدى آرتق ملكتلى كزه  
كيدى كز . زيرا بز ينه طاش آتمغه باشلايه جغز « ديو ندا ايتدى .

حجاج كرام عودت ايلدى . حجاج ظالم ده مانجنيق ايشلمكه باشلادى .  
كعبه اوزرينه ابتدا مانجنيق آتلاقدنه شمشكلر پارلادى . كوزلرى  
قماشدردى . پك زياده كوك كورله دى ، مانجنيق كورلديسنى باصددردى .  
اهل شام اوركوب اللرينى مانجنيقن چكديلر . حجاج ، مانجنيق طاشنى  
آلوب كندى ايله مانجنيقه وضع ايتدى و آنلرله برابر آتدى . حال بوكه  
ايكى كون پيدرپى ييلديرملر ايندى . حجاجك عسكرندن اون ايكي سنى  
اوروب اولدردى . اهل شام قورقوب طاغيلويوردى . حجاج « اى اهل

شام قورقيىكز . بو يىلديرملر تهامه نك وقوعات عاديه سىندندر . فتح ايسه قىربدر . سزه تبشير ايدرم « ديهرك عسكرينه جسارت وىردىكى صروده يىلديرملر ابن زىيرك آدملىرىدن بر قاچ كشى يه اصابت ايلينجه حجاج « كورميورمىسكز ، يىلديرملر آنلرده اصابت ايدىيور . حال بوكه سز طاعت اوزره سكر و آنلر عصيان اوزره درلر « ديهرك عسكرىنى قاندردى وينه مانجنىق ايشلتمكه باشلادى وامر محاصره يى تشديد ايلدى .

عبدالله بن زىير ، نماز قىلار ايكن طاشلار اوكنه دوشردى . لكن اصلا قيد ايتمز وساووشوب بر طرفه كىتمز ايدى . بو صورته محاربه ومحاصره تمتد اولدى . حجاجك عسكرى قرق بيكه بالغ اوله رق هر طرفدن مكىي قوشامش اولدىنى جهته خارجدن مكىه بر شى ادخال اولنه مديغندن مكده ييهك بولماز اولدى . ناس آج قالدى . ابن زىير دخى انبارلرنده كى ذخيره يى سدد رمق ايديهيلهك مقدار اوزره توزيع ايلردى . اهل شام ايشته بو ذخيره نكده توكنمسنه منتظر ايدى .

نهايت ناس آچلقدن بيتاب اوله رق اون بيك كشى حجاجدن امان آنوب طيشارو چىقديلر . عبدالله بن زىيرك ( حمزه ) و ( خيب ) نام اوغللرى دخى چيقانلرك ايجنده ايدىلر . عبدالله ، ديكر اوغلى ( زىير ) « سنده برادرلرك كى حجاجدن امان آل . بن سنك بر حيات قالمكى اىسترم » دىكدكه زىير « بن سندن آريله م » ديهرك مقتول اولنجيهك پدرندن آرىلدى .

عبدالله ، والده سى ( اسماء ) رضى الله عنهما حضرتلرينك ياننه كىتىدى « والده ! ناس بندن آرىلدىلر . يانمده بك آز آدم قالدى . آنلرده بك آز برمدت طيانه بىلورلر . دشمن ايسه بكا ديله دىكم قدر دنيالق وىريور . سنك رايك نه در » دىكدكه حضرت اسماء « سن كندىكى دها اىي بىلورسىن . اكر حق اوزره ايسهك وناسى حقه دعوت ايدىورسهك بونى اجرا ايت كه بو يولده خيلى احبابك مقتول اولدى . ارتق بو يولده دوام ايت وبخىاميه اوغلانلرينه كندىكى مسخره ايتمه واكر مرامك دنيا ايسه س نه فنا آدم

ایمش سین که هم کندیگی همدہ معیتکده کیلری هلاک ایتمش اوله جقسین  
 وا کر بن حق اوزره ایدم ، اما اصحابه وهن کلنجه بن ده ضعیف دوشدم ،  
 دیرسهک بوده احرار واهل دین ایشی دکلدر . دنیاده دها نه قدر قاله جقسین .  
 اولوم دها ایدر « دیمکله عبدالله » بنمده رأیم وشمدی یه قدر مسلکم بودر .  
 دنیایه اصلا میل ایتدم بو یوله خروج ، آنجق شرع شریفه مخالف ایشلر  
 ایشلندیکندن طولای بغض فی الله ایچوندرد . فقط سنک رأیگی بیلکم  
 ایستدم . سنده نم بصیرتمی مزداد ایلدک . باق والدہ ! بن بو کون مقتول  
 اولورم . حزنک مشدد اولسون . امری ، اللهه تسلیم ایت . اوغلک برامر  
 منکری اختیار ایلدی ، فحشیتدن بر ایش ایشلمدی ، جور وغدر یولنه  
 کیتمدی ومأمورلرندن برینک یولسز حرکتنه واقف اولنجه رد وانکارده  
 تجویز قصور ایتدی . عندمده ربمک رضاسندن اعزّ برشی یوقدر . یارب !  
 بونی تزکیه نفس ایچون سویلیورم . آنجق والدہمه تعزیت وتسلیت ایچون  
 سویلیورم « دیدی . اسما حضرتلری « اومارم که صبر جمیل اوزره بولنورم .  
 سن بندن اول فوت اولورسهک جناب حقندن اجر ومکافات ایسترم واکر  
 مظفر اولورسهک مسرور اولورم . چیق اوغلم ! کورهیم انجام کار ، نه یه  
 منجر اولور « دیدکدن صکره اوغلنه دعا ایدرک « یارب ! آنی سنک  
 امریکه تسلیم ایتدم وحکم وقضاگه راضی اولدم . بکا صابرین وشا کرین  
 ثوابی ویر « دیدی . وداع ایچون اوغلنی قوچوب اوپرکن الی ، آنک زرهنه  
 طوقوندی . « آ بو نه ! بو ، او یله فدا ییلک یولنی اختیار ایدنلرک ایشی دکلدر .  
 یاچه لر یگی صیوا ، مردانه حرکت ایله « دینجه عبدالله ، زرهنی چیقاردی .  
 قوللرینی وپاچه لرینی صیوادی وجیقوب یاننده قالان فدایی آرقداشلریله  
 برلکده دال قلیج اوله رق طیشارو اوغرا دیلر . حجاجک برفرقه عسکرینی  
 کسوب طوغرا دیلر . لکن اعدایه نسبتله اقلّ قلیل اولدقلرندن چاره سز  
 رحعت ایتدیلر . حجاجک عسکری دخی تقرّب ایدرک کلوب قپولری  
 طوتدیلر وهر طرفدن هجومه ابتدار ایتدیلر . ابن زییر ایسه آرسلان کی

ناه او طرفه وکاه بو طرفه سکیردیر ومهاجینی کیرو پوسکوردر و آرقه لرندن نووالار ، کیمسه یاننه یا قلاشه مازایدی .

حجّاج ، بو حالی کوروب اوفکه لندی وهان آتندن ایندی . پیاده . وله رق عسکری آرقه لرندن سورمکه و آنلری ابن زیرک علمداری اوزرینه هجوم ایتدرمکه باشلادی .

ابن زیر ، هان علمدارک اوکنه کچوب آرسلان کبی اوزرلرینه هجوم ایلدی . آنلرده آچیلدیلر و حجّاج ایله برابر کیرو چکلیدیلر . بعده ابن زیر ، مقام ابراهیمه کلوب ایکی رکعت نماز قیلدینی ائنده اعداء عودت وهجوم ایله علمداری قتل وسنجانغی اخذ ایتدیلر . ابن زیر ، نمازدن صکره ایلرولوب سنجا قسز اوله رق غایت مردانه مقاتله یه قیام ایتدی . ( عبدالله بن مطیع ) آنکله برابر جنک ایدرکن اوریلوب دوشدی . ابن زیر ، قیلان کبی دشمنلر اوزرینه هجوم ایتدی و ( حجون ) قدر کیتدی . اوصرده یوزینه برطاش اصابت ایلدی . یوزندن قان آقغه باشلادی . ینه شدتلی مقاتله ایدرکن دشمنلر اطرافنی احاطه ایلدیلر ونهایت یره دوشوروب قتل ایتدیلر .

حجّاج و طارق ، یانه کلوب طور دیلر . طارق « قاریلر ، بوندن ارکک و مرد بزچوجق طوغور مامشدر » دینجه حجّاج « سن امیر المؤمنینک مخالفنی مدحی ایدورسین » دیدی . طارق « اوت . اوله اولمسه بز معذور اولمازایدک . زیرا یدی آیدنبرو بز آنی محاصره ایتدک . عسکری وقلعه سی وعونه سی اولمدینی حالدک . بزه مقابل وبلکه بزه فائق ایدی » دیوجواب ویردی . بو محاوره لری عبدالملکک بالغ اولدقده انصاف ایدوب طارقه حق ویرمش اولدینی مرویدر .

بونک اوزرینه حجّاج ظالم ، مکّه یه کیردی . اهل مکّه یی عبدالملکک بیعت ایتدردی . بعده مسجد حرامک سپوریلوب طاشلردن تطهیر اولنسی ایچون امر ویردی . ابن زیرک سرمق طوعنی شامه کوندردی وجنه سنی صلب ایتدردی . والده سی اسما رضی الله عنها حضرتلرینی احضار ایچون آدم کوندردی . حضرت اسما کیتدی . حجّاج تکرار آدم کوندروب

«ياكسون، ياخود آنی صاچندن طوتوب سوروكليهرك كتوره جك مباشر كوندريرم» دیدی. اسماینه کیتمدی. هان حجاج قالقوب آنك یانسه واردی. «عبدالله حقنده اولان معامله می نصل کوردك» دیو موردی. حضرت اسماء «اویله کوردم که سن اوغلمك دنیاسنی افساد ایلدك، اوده سنك آخرتکی افساد ایلدی. رسول الله صلی الله علیه وسلم حضرتلری بزه قیفده برکذاب وبرمهلك اولدیغنی خبرویردی. کذابی (مختاری) کوردك. مهلك ده سنسین» دیو جواب ویردی.

عبدالله بن زبیر، کیجهلری قائم، کوندزلری صائم وزاهد وعادل برذات نادرالامائل ایدی. مدت امارتی طقوز سنه در. یتیم اوچ یاشنده ایکن یتیم اوچ سنه سی حمادی الاولاسنك اون یدنجی صالی کونی بروجه بالا حجاج ظالمك عسکری یدنده مقتول اولمشدر. رضی الله عنه

ابن زبیرك بروجه بالاشهادتی اوزرینه بالجمله حجاز ویمین اهالیسی دخی عبدالملکک بیعت ایلدی ومحمد بن حنیفه نك بیعتیله بیعت عامه تمام اولدی وعبدالملک مقام خلافتده استقلال بولدی.

### وفیات اعیانه

عبدالله بن زبیرك بروجه بالا شهادتندن هنوز برآی مرور ایتمدن والده سی (ذات النطاقین) دیومعروف اولان (اسماء بنت ابی بکر الصدیق) حضرتلری دخی مکة مکرمه ده عزم داربقا ایلدی.

رسول الله صلی الله علیه وسلم حضرتلری هجرت کونی مخفیاً ابوبکر الصدیق رضی الله عنہک خانه سنه کلوبده اورادن غاره عزیمت بیوردقلرنده حضرت اسماء، آنلر ایچون حاضرلادیغنی سفره یی باغلامق اوزره برشی بوله مدیغندن کندی نطاقنی، یعنی فوطه سنی ایکی شق ایدرك بریله سفره یی ودیکریله مطره یی باغلامش ورسول اکرم آنی جنت ایله تبشیر و (ذات النطاقین) دیو تلقیب ایلیش ایدی.



حضرت اسماء ، بوجله آخرتی معمور ایتدکن صکره چوق معمور اولدی . اوغلی عبدالله خلافتی و شهادتی کوردی و آخر عمرنده کوزلری کورمز اولدی و یوز یاشنه واردی . بعده عازم دارجسان اولدی . (رضی الله عنها وارضاه)

( رافع بن خدیج ) الانصاری رضی الله عنه حضرتلری که احدغزاسنده یاره لشمش و بعده اکثر غزوات نبویهده حاضر و صفینده حضرت علی ایله برابر بولشمش ایدی . اودخی سکسان یاشنده ایکن بواثنده عازم دارعقبا اولدی .

اصحاب کرامدن واعظم رجال مصردن مشهور ( معاویه بن خدیج السکونی ) و فتح مکه کونی ( اشجع ) قبیله سنک سنجاغنی حامل اولان ( عوف بن مالک الاشجعی ) و سنی یوزه بالغ اولان ( معبد بن خالد الجهنی ) رضی الله عنهم دخی او ائنده وفات ایلدیلر .

( عبدالله بن عمر بن الخطاب ) دخی سکسان آلتی یاشنده ایکن عبدالله بن زبیرک شهادتدن اوچ آی صکره و علی روایة سکسان یدی یاشنده ایکن یتمش دردنجی سنه هجریهده مکده وفات ایلشدر .

هنوز سن بلوغه وارمادن پدریله برلکده اسلام ایله مشرف اولمشیدی . کبار محدثیندن اولوب امر دینده پک زیاده اتقا و احتیاط اوزره بولندیغندن اهل قبله محاربه لرنده بولمندی و اهل شام ، آکا زیاده مائل و محب اولدقلری . جهتله یزیدک وفاتندن صکره آنی خلافته انتخاب ایتمک ایستدیلر ایسهده . اورغت کوسترمدی . ( جابر بن عبدالله الانصاری ) رضی الله عنه حضرتلری . دیر ایش که « بزم ایچمزرده کندوسنه دنیا میل ایدوبده اعراض ایدن عمر بن الخطاب ایله اوغلی عبدالله ایدی » .

بیعت رضوان اصحابندن ( سلمة بن اکوع ) و فضلی صحابه دن و کبار محدثیندن ( ابوسعید الخدری ) رضی الله عنهما دخی یتمش اوچ و علی روایة یتمش درت سنه سنده وفات ایلشدر .



کوفه رجالدن (جابر بن سمره) وانصاردن (ابوسعید بن معلی)  
 یتیمش دوت سنه‌سنده و اصحاب صفه‌دن (عرباض بن ساریه) یتیمش بش  
 سنه‌سنده وفات ایلدیلر (رضی الله عنهم).  
 (جابر بن عبدالله بن عمر والانصاری) حضرتلری دخی علی روایه  
 یتیمش دوت و علی روایه یتیمش یدی سنه‌سنده مدینه‌ده وفات ایلشدر.  
 (رضی الله عنه)

### عبدالملک ایام استقامتی

یتیمش اوچ سنه هجریه‌سی موسم حجنده مکه و مدینه و یمامه و الیسی اولان  
 حجاج بن یوسف الثقفی ناس ایله حج ایتدی  
 حضرت عمر بن الخطابک نصب کرده‌سی اولان (قاضی شریح)  
 عبدالله بن زبیر دورنده اولدینی کبی عبدالملک زماننده دخی کوفه قاضی‌لغنده  
 ابقا اولندی. بصره قاضیسی دخی کافی السابق (هشام بن هبیره) ایدی.  
 یتیمش دردنجی سنه حجاج ثقفی، مدینه‌یه کلوب برایکی آی قدر اقامت  
 ایلدیکی اثناده جیران رسول‌اللهی «سز، عثمانک قاتلر یسکیز» دهرک  
 تکدیر و (جابر بن عبدالله) و (سهل بن سعد) کبی اصحاب کرامی تحقیر  
 ایتشیدی.

بعده مکه‌یه کیتدی و کعبه‌ی هدم ایله یکیدن بنا ایتدی و عبدالله بن  
 زبیرک بناسنی تغیر ایله قریشک یابدینی کبی حجری خارجه‌ده براقیدی. حالا  
 اووضع و حال اوزره باقیدر.

برو قندبری بربر طوائفی، طغیان ایله آفریقه‌بلده‌سنی استیلا ایدوب  
 عبدالملک ایسه ابن زبیر ایله مشغول اولدیغندن دیار مغرب ایشلرینه  
 باقمه‌امشیدی. اشبو یتیمش دوت سنه‌سنده او طرفه عساکر کلیه کونرددی.  
 جانب مشرق دخی غوائلدن خالی دکل ایدی. شویله که سجستان  
 طرفنده عساکر اسلامیّه مشرکین ایله محاربه ایلکده ایدیلر. خوارج  
 طائفه‌لری ایسه پک زیاده طغیان ایله ایران قطعه‌سنی تالان ایتکده ایدیلر.

بناءً علی ذلك بوسنه مشهور (مُهَلَّب) سرعسكر نصب اولنه رق بصره  
عسكريله خوارج اوزرينه مأمور ايدلدى. كوفه عسكرى دخى آنك معيته  
كوندرلدى.

مُهَلَّب (رَامُهرْمُز) ده خوارجه ملاقى اولوب همان اردوسنى قوردى  
واطرافه خندق چويروب استحکام ویردى و حربيه مهيا اولدى. حال بوکه  
عراق واليسى (بشير بن مروان) ك بصره ده وفات ايلديكى خبرى كلنجه  
بصره و كوفه عساكرى آنى بهانه ايدرك مملكتلرينه عودت ايلديلر.

يتمش بش سنه سى اوائلنده روملر، مرعش طرفندن باش كوسترمكله  
الجزيره واليسى (محمد بن مروان) اوطرفه سكردوب كيتدى. خوارج  
ايشلري ايسه كوندن كونه كسب اهميت ايلديكندن عبدالملك، حجاجى عراق  
واليسى نصب ايتدى.

حجاج، اوزمان مدينه ده ايدى. عبدالملكك فرمانى كندوسنه واصل  
اولنجه اون ايكي بيك كزیده سواری ايله قالقوب كوفه يه كيتدى. بقتة  
صباحين ارکنجه كوفه يه واردى، مسجده كيردى، منبره چيقدى، ناسى  
جمع ايتدى، براوزون خطبه اوquدى.

قلبي قاتی، يوزى پك، لسانی فصیح وجدی برظالم كشی ایدی.  
بوخطبه سنده (بنم حال وشانم جمله نك معلوميدر. بن عالمك گرم وسردینی  
كورمش بر آدمم. بن كوتولكي محملنه حمل ایدرم. فعليله مؤاخذه ومثيله  
مجازات ایلرم. كسیم ودوشیرمه موسمی كلش اولغون باشلر كوریورم.  
قانلره بولانه جق صاریققره وصق اللره باقیورم) دیدكن صكره «ای  
اهل عراق! سز نائل اولدیغكنز نعمتلك قدرینی بیلمیوب كفران  
نعمت ایلدیكنز. امیرالمؤمنین، اوقلرینی یایدی، برر برر یوقلادی، اك  
قویسی واك صلابتلیسی بنی بولدی، بورایه والی ایتدی، سزك بوغازلریكزه  
آتدی. چونكه اهل بنی وخلاف وشقاق ونفاق سگزر. خیلی وقندنبرو  
آزدیكنز، آرزغینانی عادت ایلدیكنز. سوزیمه اعتماد ایلدیكنز. طریق  
مستقیم اوزره كیدىكنز. والله سزه لذت ذاتی طئانديریرم. ده ریكزی

یوزرم ، سزی اودون کبی کسرم . بن دیدیکمی یاپارم . بن جمعیت وجهوریت ایستم . هرکس کندی باشنه ایشیله کوچیله مشغول اولسون . اراجیفدن وقیل قالدن واز کیکیز . والله استقامت اوزره اولماز ایسه کز بوینگیزی اوریرم . قاریلرگیزی طول وچوجقارگیزی یتیم براغیرم . مهلبک یانندن صاووشوب کلدیکگیزی اوکرندم . اوچ کونه قدر آنک یاننه وارمایانلرک بیونلرینی اورده جغم ، خانهلرینی یغما ایده جکم . « دیه رک اهل کوفه بی تهدید و اخافه ایتدی و فرمانی اوقوتدی . بعده بصره یه کیتدی . اوراده دخی بویله برخطبه اوقودی و کرک کوفه ده کرک بصره ده جزئی بهانه لر ایله اشرافدن بعض ذواتی اولدردی و سائره عبرت کوستردی .

جزء سابع ده بیان اولندی بنی اوزره حضرت علی کرم الله وجهه اهل عراقه چوق نصیحت ایلدی . لکن دیگله مدیلر . اهل شامک تعصبنه قارشو خالصانه غیرت ایلدیلر . حضرت علی ده آنلره انکسار ایله « یارب ! بن آنلردن بزدم ، اوصاندم . آنلرده بندن بزدرلر ، اوصاندرلر . آنلره تقیف یکیدی مسلط قیل که جانلری و ماللری حقنده احکام جاهلیه موجبنجه عمل ایتسون و مملکتک محصولاتتی ییسون ، کورکلرینی کیسون . یعنی هر درلو منافعدن متمتع اولسون » دیو دعا ایتشیدی . دعاسی مقبول اولمش که اوسنه حجاج بن یوسف الثقفی طوغمش ایدی . آنکچون بعض علما دیمشدر که ( حجاجک حجاز و عراقی استیلاسی ، من طرف الله تسلیط دیمکدر . )

بصره اهالیسی ، حجاجک مظالمته تحمل ایده میوب ( عبدالله بن جارود ) که تحت ریاستده اوله رق بر جمعیت تشکیل ایله حجاجک علیه نه قیام و اطرافنی احاطه ایتدیلر ولدی المحاربه غالب کلشدر ایکن ابن جارود ، اوریلوب دوشنجه بوزیلوب طاغلدیلر . بو صورتله حجاج قورتلدی ودها زیاده ظلم و تعدی ایدر اولدی . حتی ( انس بن مالک ) رضی الله عنه حضرترلرینک اوغلی عبدالله ، اهل قیام ایچنده بولنه رق مقتول اولقله حجاج

بصره به کلدکده حضرت انسك مالنی مصادره و کندوسنی تکدیر و تحقیر ایتمکه اودخی عبدالمکه شکایتنامه کوندرمشیدی .

عبدالمکه طرفندن مباشر مخصوص ایله حضرت انسه التفاتنامه و حجاجه غایت شدتلی تکدیرنامه کوندردی . حجاج ، بو تکدیرنامه بی اوقویوب زیاده تلاشه دوشندی وهان انس ایله کورشدی و روی التفات کوستروب طاتلی دیل ایله اعتذاره کیرشدی . حضرت انس « بن چوق صبر ایتدم . سزدن شکایت ایلدم . تا که سن بزه ( اشرار ) دیدک . الله تعالی حضرتلری ایسه بزی ( انصار ) تسمیه ایتمشدر . سن بزه اهل نفاق دیدک . بز ایسه هجرت نبویه ده مکان و ایمان حاضرلامش ایدک . سنکله بزم آره مزده الله تعالی حاکمدر . او حق و باطلی تفریق ایدر . سکا قارشو قوتم یوق ایدی . سنی جناب حقه و صکره امیر المؤمنینه حواله ایتدم . اوده سنک رعایت ایلدیگک حقه رعایت ایلدی . والله ، نصاری ، عیسی بن مریمه بر کون خدمت ایش بر آدم کورسه لر آنک قدرینی بیلورلردی . بن ایسه اون سنه رسول الله صلی الله علیه وسلم حضرتلرینه خدمت ایلدم . ینه خیر کوررسم جناب حقه شکر ایدرم ، خلافتی کوررسم صبر ایدرم . والله المستعان » دیدی . حجاجده اعتذار ایدرک آنک اموالنی کیرو ویردی .

بروجه بالا مهلبك معینه بصره دن و کوفه دن مرتب اولان عسا کر ، حجاجك تهدیداتی اوزرینه سریعاً موقع مأموریتلرینه واروب مهلب ، آنلر ایله کسب قوت ایدرک خوارج اوزرینه هجوم ایتدکه خوارج همان ( رامهرمز ) موقعندن چکیلوب ( کازرون ) ه کتیدیلر . مهلب دخی آرقه لرندن حرکت ایله کازرونه واردقده خوارج ، غایت شدتلی مقاومت و مقاتله ایدوب طرفیندن پک چوق مجروح و تلفات وقوع بولمش و آندن صکره مهلب بر سنه قدر ( سابور ) ده اقامت ایلهرک خوارج محاربه لرله مشغول اولمشدر .

یتش بش سنه سی موسم حجنده عبد الملك حج ایتدی . منبرده

جماعته خطاباً ايراد ايلديكى متعظمانه خطبه سنده « بو امت، كسب صلاح ايدنجيه دك قليج ايله علاج ايدرم . بكا مهاجرين اولنيك عمللريه عمل ايت ديو تكليف ايدورسكز . حال بوكه سز آنلك عمللريه عامل دكلسكز . والله بوندن صكره هم، كيم بكا اويله بر تكليف ايدر ايسه بويني اوريرم » ديوب منبردن ايندى . او وقته قدر ناسى امر بالمعروفدن منع ايتك امرانك هيچ برنده واقع اولماشدر .

خوارجندن ( صفرية ) مذهبنه ذاهب و ارض داراده مقيم اولان ( صالح بن مسرح ) ايله ( شيب ) و ( سويد ) و ( بطين ) كبي رؤساي خوارجندن بعضيلرى دخى بوسنه حج ايتشلر ايدى . بونلر غايت صوفى و متعصب و عبدالملك و امراسنك طور و حركتلرينه معترض آدملر ايدى . شيب ايسه بك فتاك و چلاك بر آدم اوله رق بر تقريبله عبدالملكى اوروب اعدام ايديورمك اوزره فرصت كوزه تمكده بولنديغى عبد الملكه اخبار اولمغله او دخى احتياط اوزره بولمغله برابر آنلك سوء نيتلر بى حجاجه يازمش اولديغندن حجاج آنلك آرقه لرينه دوشمشيدى .

صالحك الجزيره ده و ارض موصلده بر چوق يارانى اولوب آنلر ايله و خصوصاً شيب ايله مخابره ايدرك تمش آلتى سنه سى صفرينك غره سنده خروج ايتك اوزره قرار و ير مكله صفرك برنجى كيجه سى يوز يكرمى كشى اولدقلى حالده صالحك باشنه طويلانديلر و بقتة الجزيره واليسى محمد بن مروانك حيواناتنى اخذ و اغتنام ايله محاربه ايچون اك اعلى حيوانات ايدنديلر . دارا و نصيين اهاليسى قورقوب قلعه لر قانديلر .

محمد بن مروان، طرفندن كوندريلن بيك سواري، صالح ايله لى التقابل بوزولدى . بعده بيك بشيوز سواري كوندرلدى و لى المحاربه صالح، مقتول اولديسه ده آنك يرينه شيب كچدى و ( امير المؤمنين ) عنوانى آلدى و حكومتك باشنه دها بيوك بر بلا اولدى .

شيب ، الجزيره و موصل و كوفه نواحي سنده جرد آتلا ايله طولاشور و اوزرينه كئيتلو عسكر كوندريلور ايسه بر طرفه صاووشور و آز عسكر



اولورسه بقتۀ اوروب طاغیدیر ومغلوب ومنهزم اولانلری کندوسنه بیعت  
ایتدیرر ایدی. کندوسنه مطیع اولان اهلای بی حمایه ایدر وقارشو طورانلری  
اورور، چالار چارپار ایدی. والدہ سی (جہیزہ) بر شاشقین خاتون  
ایدی. لکن پک شجیع اولوب میدان حربده بالذات مقاتله ایدردی.  
زوجه سی (غزاله) ایسه اصحاب علم و فضیلتدن اولدینی حالدہ غایت بہادر  
وجندیلکده ماهر اوله رق اودخی بالذات مقاتله ایلردی.

ابتدا حجاجک امریله مدائنندن چیقان بشیوز سواری بی شیب ،  
یوز بو قدر سواری ایله اوروب طاغیتمش و آنک اوزرینه حجاج کوفہ دن  
درتیک عسکر سوق ایتدکده شیب بر تقریبه آنلری غافل اولایوب  
یوز آلتش سواری ایله ایچلریه طالہ رق باشبوغلرینی اعدام وعسکرینی  
پریشان ایتش ایدی.

بعده شیب ، موصل اوزرندن آذر بایجانہ کیدوب کوفہ دن تباعد  
ایلکله حجاج دخی (عروۃ بن مغیرہ بن شعبہ) بی کوفہ ده یرینه قائم مقام  
براغوب کندوسی بصرہ یه کیتدی.

ناکھان شیبک کوفہ اوزرینه کلکده اولدیغی خبری کلنجه سریعاً  
حجاجک کوفہ یه کلسی ایچون عروہ ، کندوسنه خبر اوچوردی.  
حجاج، هان ایکی قوناغی برایدرك سکیردوب شیبیدن اول کوفہ یه ایرشدی.  
شویله که: وقت عصرده کوفہ یه کلوب قصر حکومت کیردی. لکن هنوز  
عسکر جمعنه وقتی اولیوب شیب دخی آ خشامدن صکره جه یتشدی.  
کوفہ یه کوروب النده کی عمود ایله قصر حکومت قپوسنه اوردی. حجاجی  
سب و تهدید ایلہ رک مسجد کوفہ ده بولدینی ویوللرده مصادف اولدینی  
آدملری اولدوردی.

حجاج ایسه قندیل ایله قصر حکومت قپوسنک اوزرنده طوروب  
دلالرہ ندا ایتدردی. شیبک زوجه سی (غزاله) کوفہ جامع شریفنده  
بر صبح نمازی قلوب ایلک رکعتنده سورہ بقرہ یی وایکنجی رکعتنده



سوره آل عمرانی او قومنی نذرا یتمش اولدینی جهتله بوفرستدن استفاده ایدرک وقت فجرده یتمش کشی ایله کوفه جامعه کیدوب ندزینی یرینه کتورمش اولدینی مرویدر .

بعده شیب، بی پروا کوفه خارجه چیقدی. حجاج دخی درحال نفیرعام صورتیه آلتی بیک قدر آدم جمع و آنلری اوچ آلایه تقسیم وهر یرینه برر بک نصب و تعیین ایله جمله سنی شیبیک آرقه سنه دوشوردی . بو عسکر ، فراتک آشانی طرفه طوغری توجه ایتدی. شیب ایسه او جهتی ترک ایله قادسیه طرفه کیتدی . حجاج دخی آتی تعقیب ایچون بیک سکز یوز جرد آتلو کوندردی .

ناسک کوزلری شیبیدن او قدر یلمش ایدی که آتک اوزرینه کوندریلن عسکر، سلخانه یه سوق اولنان قیون سوریلری کبی خائف ولرزان اولورلردی. شیبیک عسکری ایسه بیک بلادن آرته قالمش ، اولوم اری اولمش ، چاپک وچالاک وفتاک، جندیلکده ماهر و غایت متعصب فدا ییلر ایدی. شیب دخی دایما فرصت کوزه ده رک بر تقریبه خصمی اولان سر کرده یی چارپوب یره دوشورمکه عسکرینی پریشان ایدیورمک کبی تدابیر حربیه اجرا سنده پک ماهر ایدی. بوجه بالا حجاجک سوق ایتدیکی جرد آتلو کوفه دن چیقوب سیر سریع ایله شیبیه ایرشیدیلر و کثرتلرینه مغرور اوله رق همان حربیه کیرشیدیلر . شیب ایسه آنلرک قلیکاهلرینه شدتلی هجوم ایدرک سر کرده لرینی دوشورمکه آنلری پریشان ایدیوردی. بعده سالف الذکر اوچ آلایک زرده اولدق لرینی تحرّی یه قیام ایتدی .

بو آلایلر ایسه شیبی تحرّی ضمننده طورنه قطاری کبی فراتک آشانی طرفه طوغری یاییله رق کوفه دن یکر می درت ساعت قدر تباعد ایتمشلر و (رود بار) ه قدر کیتمشلر ایدی . شیب ، آندن خبردار اولنجه او طرفه کیتدی و برکون آخشام اوستی آنلره چاتدی و عسکرینی اوچ بلوک ایتدی . بری کندوسنک و دیگر برادر (مُصاد) ک و دیگر بری دخی اوزمان اشجع عرب اولان (سوید) ک معیتده ایدی .

سويد ، بك یرتيجی و ماھر برجندی اولوب مکرراً شدتلی هجوملر ايله کوفه اردوسنک صاغ قولنی اوردی ، پریشان ایتدی . محاربه بتون کیجه دوام ایدوب سحر وقتی شیب ، بفرصت دوشوردی و دشمنک قلبکاهنه شدتلی هجوم ايله باشوغلرینی اوروب اولدردی . آنک اوزرینه کوفه لیلر نه یاپه جقلرینی شاشردی . شیب همان آنلری بیعتہ دعوت ایلدی . آنلرده بیعت ایلدیلر .

بیعت ایلینلرک بری ده ( ابو موسی الاشعری ) رضی الله عنہک اوغلی ( ابو بردہ ) ایدی . شیب ، آنی کورنجه « ایشته ایکی حکمندن برینک اوغلی ، دیدی خارجیلر ایسه حکملره عدو اکبر اولدقلرندن ابو بردہ یی اعدامه قیام ایتدیلر . لکن شیب « بونک نه صوچی وار » دیه رک آنی قورتاردی . فرداسی شیب ، همان کوفه اوزرینه وارمق ایستدیسده عسکرینک اکثری یارملی اولدیغندن آز بر جمعیت ايله ( خانیچار ) طرفه صاوشدی . حجاج ایسه شیب واروب ده مدائنی ضبط ایلر دیو تلاشه دوشدی . زیرا مدائن بلده سی ، کوفه نک قبوسی و سواد عراقک هر طرفه حاکم بر نقطه سی ایدی ،

بناء علی ذلک حجاج ، کندی امراسندن ( عثمان بن قطن ) ی مدائن و جوخی و انبار امیری نصب ایدرک همان مدائن طرفه کوندردی . و ( عبدالرحمن بن محمد بن اشعث ) ی باشوغ نصب ایدرک آلتی بیک کزیده سواری ايله شیبیک آرقه سنه دوشوردی .

شیب ، او ائاده ( شهرزور ) طرفه صاوشدی . عبدالرحمن دخی آنک آرقه سنه دوشدی . شیب ، آنی غافل آولایوب ده چارمق ویا برکیجه بقتہ باصمق ایچون فرصت کوزه دوردی . عبدالرحمن ایسه کوندوزین تعیه و احتیاط اوزره بولنوب کیجه لری دخی اطرافنه خندق چویرمکده اولدیغندن او یاقلاشدقجه شیب بشقه طرفه طولاشور و او بوطرفه توّجه ایدنجه شیب ده اوزاق بر محله صاوشور و غایت صعب و صارپ محالره قونار ایدی . بوصورتله ( خاقین ) و ( سامرا ) طرفلرینی دور ایتدکن

صكره شيب ، موصل ايلتنگ حدودى داخلنده و (صولاپا) نام نهر ك جوارنده واقع (بَت) نام قريه يه ايندى . عبدالرحمن دخى نهر مذكور كنارينه قوندى . ونهر ك طولامباج يرلرني كندوسنه خندق كبي برنوع استحكام اتخاذايتدى . لكن عسكرى يورلش و آتلى بى تاب و توان اولمش ايدى . حال بوكه عيضا حى تقرب ايتمكه شيب طرفندن ايام مباركه نك انقضاسنه قدر برمتار كه تكليف اولنوب عبدالرحمن طرفندن دخى قبول اولمغله ايكي طرف دخى استراحت و واردى .

مدائن اميرى عثمان بن قطن ايسه حجاجه بر عريضه يازوب «عبدالرحمن ، خندق و استحكام ياقم ايجون بتون جوخى اراضيسنى حفر ايتدى ، خراجنى كسرايتدى و اهالي سنى مأكل ايتك اوزره شيبى سربست براقدى» ديو انها ايتمكه حجاج همان عبدالرحمانى عزل و آنك يرينه همان شيبى قهر و تدمير ايتك اوزره عثمانى باشبوغ نصب ايدوب (مطرف بن مغيرة بن شعبه) نى دخى مدائنه كوندردى .

عثمان بن قطن ، همان اردوگاهه كيتدى و لااباليانه شيب اوزرينه هجوم ايتدى . شيب دخى يوز سكسان بر سوارى ايله آكا قارشو واردى و صاغدن صولدن براز شاشقينلق و يردى . بعده كمال شدت و سرعت ايله طوغرى عثمانك اوزرينه هجوم ايدرك آنى اوردى ، اولدردى . عسكرى دخى بالطبع منزم اوليويردى .

بك صيحا ق موسم اولديغندن شيب ، بووجهله محاربه يه ختام و يردكدن صكره يايلاغه چيقدى . يتمش يدى سنه سى اوائلنى يايلاقده كچوردى . او ائشاده برخيلى فراديلر و سرسريلر آنك ياننه طوپلاندى . اوچ آي يايلاقدن صكره شيب ، سكز يوز سوارى ايله يايلاقدن ايندى . و مدائنه كلوب مدينه (بهرشير) ه قوندى . مدائن اميرى اولان مطرف بن مغيرة دخى ايوان كسرانك بولنديغى مدينه عتيقه ده اولوب جسرى قيردى و تحفظى حر كته قرار و يردى . بونكه برابر خوارجه تمايل كوستردى و آنلر ايله كيزلو مخابره و محاوره ده بولندى .

شویله که : مطرّف بن مغیره ، رؤسای خوارجدن بر قاجنی جلب ایله « مادام که سز دفع و رفع مظالم ایچون خروج ایتمش سکنز ، همان عبدالملکی خلع و حجّاجی دفع ایله امر خلافتی حضرت عمرک یابدیغی کبی شورایه حواله ایتمک اوزره بکا بیعت ایلیکنز ، دیوب خارجیلر ایسه شیبیه بیعت ایلمش اولدقلرندن آنک تکلیفنی قبول ایده مدکلری جهتله بومذا کره خفیّه نتیجه سز قالدی .

حجّاج ایسه عراق عسکریله ایش کوره میه جکنی آکلایوب عبدالملکدن استمداد ایلمش ایدوکنه مبنی او دخی آلتی بیک عسکر کوندرمکه شام عسکری کوفه یه طوغری کلکده ایکن حجّاج ، کوفه اهالیسنی دخی شیب علینه تشویق ایله قرق بیکدن زیاده عسکر ترتیب ایتدی و مشاهیر شجعاندن اولوب فارس جهتنده بولنان ( عتاب بن ورقا ) یی جلب و آنی سرعسکر نصب ایله شیب اوزرینه سوق ایلدی .

شیبیک یاننده مجتمع اولان سوارى ، بیک قدر اولوب آنجق بونلر هپ قره قوش کبی یرتیجی وفدایى و حرب اری آدملر اولمغله شیبیه قارشو سوق اولنان نفیر عام غلبه لکی شاهینه قارشو طورنه آیلیری حکمنده ایدی .

عتاب ، اويله بر بیوک اردو ایله مداین اوزرینه کیتدی . شیب دخی قارشو چیقوب آخشام اوستی عتابک اردوسنه چاتدی و کندوسی میمنده طوروب قلیکاهه ( مُحَلِّل بن وائل ) ی ، میسریه ( سويد ) ی مأمور ایتدی .

غروب شمس ایله یاتسو آره سنده آی طوغنجه شیب ، همان بر هجوم ناکهانی ایله کوفه اردوسنک صول قولنی اوروب طاغیتدی وهان عتابک اوزرینه هجوم ایتدیکی صروده سويد دخی صاغ قول اوزرینه حمله ایدوب اوغراشمقده ایکن « عتاب قتل اولندی » صداسی ایشیدیلنجه کوفه اردوسی تارمار اولدی .

شیب ، ایکی کون دیکلندکدن صکره حرکتله کوفه شهرینک خارجنه

کلدی . حال بوکه شام عسکری کلوب کوفیه کیرمش و حجاج دخی کوله منلرینی زقاق باشلرینه یرلشدیرمش و کندوسنه کرکی کبی چکی دوزن ویرمش ایدی .

شام عسکری خارج شهره چیقوب صف باغلادی . شیب دخی آنلرک اوزرینه کراراً و مراراً هجوم و اقتحام ایلدی . لکن عسا کر شامیه انضباط تام تحتنده اولمغله مزراقلرینه طیانوب دیوار کبی ثابت و پایدار اولدیلر .

شیبک زوجه سی غزاله ، بعض مصادمات آره سنده حجاجک اوزرینه هجوم ایتمش ایسه ده حجاج آنک اوغورندن صاووشوب فرار ایتمکه بعض شعرا آنی تعیب ایله هجومیه سویلشیر ایدی . لکن بو مقاتلات آره سنده کرک غزاله ، کرک شیبک والده سی جهیزه و برادری مصاد ایله بر خیلی یولداشلری مقتول و کندوسی دخی آرتق ظفردن مأیوس اولنجه رجعت واهوازدن طولاشه رق کرمانه کیدوب برمدت اوراده رفقاسیله برابر استراحت ایلدی .

حجاج ، آنی تعقیب ایچون عسا کر شامیه یی جانباهواز کوندردی . شیب دخی کرماندن حرکتله اهوازده آنره قارشو کلدی . بر کون آخشامه قدر غایت شدتلی جنک ایتدیلر ، شاملیلرک چوق آدملری تلف اولدی ، نهایت قرا کلک باصمغله یکدیگردن ایرلدیلر و شیب کیجه عسکريله برابر دجیل اهواز کو پر یسندن کچرکن آلتنده کی آت شاهلانمغله صویه دوشوب غرق اولدی و یولداشلری طاغیلدی . حجاج ده بیوک بر بلادن قورتیلدی .

مطرف ، بوجه بالا خوارچ ایله اولان مخابره و محاوره سنی خفی طوتمش ایسه ده طولایسیله حجاجک سمعنه واصل اولمق ملحوظ قوی اولدیغسندن آرتق میدانده طوره میوب جبال طرفنه چکلدی وبعده قم و قاشانه کیتدی و امر خلافتی شورایه حواله ایتک دعواسنی اعلان ایتدی .



بو دعوی اوزرینه مطرّفه پك چوق ناس بیعت ایلدی . حجاجك امريله ( ری ) بلده سنده مجتمع اولان آلتی بیك عسکرده آنك اوزرینه حرکت ایلدی . لدی التقابل غایت شدتلی بر محاربه وقوع بولدی . نهایت مطرّف مقتول و یارانی پریشان اولدی . حجاج ، بو وجهله او غايله دنده قورتولدی .

کرمان و حوالیسی ، خوارجدن ( آزارقه ) دینلن فرقه السده اولوب بر سنه دنبرو فارس امیری مهلب ، آنلر ایله ( سابور ) اوزرنده غایت شدتلی جنکله ایتمکده ایدی . اشبو یتیمشیدی سنه سی خلالنده ازارقه آره سنه اختلاف دوشوب یکدیگریله جنکه باشلادیلر . مهلب دنخی بو صرمده فرصت بولوب کرمانی ضبط ایتدی و ازارقه یی طاغیتدی .

خراسان و سجستان ایالتلری حجاجك حکمندن خارج ایکن یتیمش سکز سنه سنده عبدالملک ، بوایکی ایالتی عراق امارتنه الحاق ایتمکله حجاج کندو طرفندن مهلبی خراسان امیری و ( عیدالله بن ابی بکره ) یی سجستان امیری نصب ایتدی .

عیدالله بن ابی بکره ، بصره و کوفه عسکرلریله دیار ترکه غزا ایتمک اوزره حجاج طرفندن مأمور اولوب کوفه عسکرینک امیری دنخی مشهور ( قاضی شریح ) ایدی که اون سکز سنه هجریه سنده حضرت عمر طرفندن کوفه قاضیسی نصب اولنمش و او وقتدنبرو کوفه ده قاضیلق ایدوب صفین جنکنده دنخی حضرت علی ایله برابر بولنمش و بونجه انقلابات ایچنده یووارلانه رق آرتق ممرّ و قوعات نیک و بد اولان دنیادن اوصانمش برذات جلیل القدر ایدی .

یتیمش طقوز سنه سنده عیدالله بن ابی بکره ، بصره و کوفه عساکریله سجستاندن حرکت و دیار ترکه عزیمت ایلدی . مظفر اولدی ، پك چوق اموال غنائم آلدی ، چوق خانلر یاقدی و چوق قلعه لر ییقدی . لکن عربلر ایلرولدیجه ترکلر کیرو چکلدی و عیدالله ، اون سکز ساعت قدر



حدوددن آيرلدى. ايشته اوزمان تركلر، كىرو دونوب وعساكر اسلاميه نك خط رجعتلرني كسوب بوغازلرى طوتديلر وچيدلرني سد ايتديلر .

عبيدالله ، بوجله دوشديكي مهلكدن خلاصى ايچون يدي يوز اللهى بيك درهم ويرمك اوزره تركلر ايله صلحه ياتدى . قاضى شريح ايسه آكا اعتراض ايتدى . و « بن چوق ياشادم ، چوق وقدينبرو رتبه شهادته نائل اولمق ايستردم . بوكونده اورتبه يه نائل اولماز ايسم آرتق اولنجيه دك نائل اولامام . اى مسلمين ! بالاتفاق دشمن اوزرينه يورويكز » ديدكده عبيدالله « سن بربوناق اختيارسين » ديدى . قاضى شريح « سكا عبيداللهك بستانى ، عبيداللهك حامى دينمك يتشور » ديهرك آلك سوزيني رد ايتدكدن صكره « اى اهل اسلام ! شهادت ايستينلر يانمه كلسون » ديينجه حفاظدن وكوكلى كروهندن خيلى كيمسلر اكا اتباع ايتدى .

آلك اوزرينه شريح حضرتلرى « مشركلرله چوق زمان طولاشدم . صكره زمان سعادت اولاشدم . صديق وعمر دورلرينى كوردوم . صكره چوق غوغالر كوروب كچوردوم . نيجه فرقه لرله طولاشدم ، كزدم . آم بوقدر ياشامقدن بزدم » مآلنده شعرلر سويلهرك وسلاح آرقداشلرينى تشويق ايلهرك اعدا اوزرينه كيتدى ولابالايانه هجوم ايتدى . كندوسى ويولداشلرندن اكثريسي شهيد اولدى وبقية سى صاووشوب سلامت بولدى . ( رحمة الله عليه وعلى اعوانه رحمة واسعة )

( محمد بن حنيفة ) ديو معروف اولان ( محمد بن على بن ابى طالب ) رضى الله عنهما حضرتلرى ، سكسان سنه سى خاللنده عازم دارالقرار اولدى . يوقارولرده چوق منقبه لرى كچدى . تكراره حاجت يوقدر .

ابن حنيفة ، بنى اميه نك تحكمندن قورتلق ايچون وقت فرصته مترقب اولان شيعه على يه مرجع ايدى . اكرچه اوزمان اولاد فاطمه دن ( زين العابدين بن حسين ) حضرتلرى بر حيات ايسه ده دائما عبادت ايله مشغول اوله رق امارت داعيه سندن اوزاق طور مقده ايدى .

بنام عليه امويلر ، آندن امين اولوب انجق ابن حنيفة دن اندیشه اوزره

ایدیلر . وفاتیله بواندیشه دن وارسته اولدیلر ایسه ده محمد بن حنیفه نك اوغلی (ابوهاشم علی) کندوسنك یرینی طوتمش وشعیلره مرجع اولمشدر .

### عبدالرحمن کنری بهت اولندیغی

بالاده بیان اولندیغی اوزره سجستان امیری عبیدالله بن ابی بکره نك واقع اولان انهزامی اوزره حجاج ، همان بصره دن وکوفه دن یکر میشر بیک عسکر ترتیب و (عبدالرحمن بن محمد بن اشعث الکندی) ینی سرعسکر نصب ایدرک دیار ترکه غزا ایتک اوزره سکسان سنه سنده سجستانه کوندرمشیدی .

یوقارولرده ذکر اولندیغی اوزره (اشعث ابن قیس) فی الاصل قبائل یمندن ، کنده قبیله سنك مشایخندندر . حضور نبویه اسلام ایله مشرق اولدقدن صکره ابوبکر الصدیق همشیره سنی تزوج ایتمشیدی . اوغلی (محمد) دخی مشاهیر امرای عربدن ایدی . ایشته (عبدالرحمن کندی) دیدیکمز بو (محمد بن اشعث) ك اوغلی و ، صیت وشهرت صاحبی برذات ایدی .

عبدالرحمن ، قرق بیک تازه عسکرله سجستانه واردی ، بلاد ترکه کیردی . خیلی یرلری استیلا ایتدی . لکن کچن سنه واقع اولان ابی بکره هزیمتی تذکر ایله بردن بره ایچرولره طالمیوب آلدیغی یرلره مستحفظلر اقامه وبوغازلرده وقورقولولرلرده بکلمه لر انشا ایدرک احتیاط اوزره حرکت ایلکده اولدیغی حجاجه بیلدیردی .

حجاج ، آکا جوابنامه یازوب « سنك مسلکک سلم واستراحت یولیدر . اعدا ایسه کچن سنه اخوانمزدن بوقدر آدم تلف ایتدیلر . همان بلاد اعدایه طال وشهدانك انتقامنی آل » دیو امر ویردی . متعاقبا بومالده برتأکیدنامه یازدی ودفعه نائله اوله رق « امریمی طوت ، دیدیکم یوله کیت والّا برادرک (اسحق بن محمد) امیرالجیشدر . همان دیار اعدایه هجوم واقتحام اولنسون » دیهرک قطعی المفاد امرنامه کوندردی .

عبدالرحمن ، امرا ورؤسایي جلب ایله کیفیتی افاده ایدرک « بن سزک

حق‌گزارده خیرخواهلق ایدیورم . سزك منافعگیزی موجب اوله‌جق مسلك اوزره كیدیورم . حجاج ایسه بویه امرایدیور . بن‌ده سزدن بریگزم . سز كیدرسه‌گزر بن‌ده كیدرم ، سز ابا ایدرسه‌گزر بن‌ده ابا ایدرم ، دینجه رؤسا حجاجك علینه قیام و « آنی عراقدن دفع ایتك اوزره عبدالرحمانه بیعت وتبعیت ایلیم » دیوب عسکر دخی بونك اوزرینه اتفاق ایتمكه سكسان بر سنه‌سی خلانده عبدالرحمانه بیعت ایلدیلر .

عبدالرحمن دخی ملك ترك ایله عقد مصالحه و لازم كلان محللره مأمورلر تعیین ایتدكن صكره عراق اردرسيله برلكده سبختاندن چیقوب بصریه توجه ایلدی وائناى راهده عبدالملكى خلع ایتك وناسی كتاب اللهه وسنه رسول اللهه دعوت ایلك سوزلری دخی میدانه چیقدی .

حجاج ، بو احوالدين خبردار اولنجه کیفیتى عبدالملكه عرض ایلدی . او دخی پیدربی شامدين عراقه عسکر سوق ایتمكه باشلادی .

عبدالرحمانی اوزاقدن قارشولامق اوزره حجاج، بصریه و آندن (تستر)ه کیتدی و مقدمه الجیش اولمق اوزره (دجیل)ه کوندردیكى عسکر عیداضحی کونی عبدالرحمانك سواریسنه تصادف ایتدی ولدی المحاربه فناحاله بوزملغله حجاج اورالرده طوره میوب عودته مجبور اولدی . فقط بصره شهرینه کیرمیوب (زاویه) ده اردو قوردی و اطرافنه خندق چویردی . عبدالرحمن دخی کلوب بصریه کیردی وهپ اهالی بصره آکا تبعیت ایدیویردی . اوده شهر بصره‌نك اطرافنه خندق قازدردی .

سكسان ایکی سنه هجریه‌سی محرمنده بالدفاعات شدتلی محاربه‌لر واقع اولدی و آخر محرمد محاربه پك زیاده شدت بولدی و حجاجك عسکری انهمزه یوز طوتمشیکن امرای شامیه‌دن (سفیان کلبی) بر شدتلی هجوم ایدنجه عبدالرحمن اردوسنك میمنه‌سی بوزملقه بتون عراق عسکری بوزولدی . وقرآء کروهندن چوق ذاتلر مقتول اولدی . عبدالرحمن دخی عسکرله صاووشوب کوفه‌یه کلدی .

حجاج ایسه کندوسنه چکی دوزن ویردكن صكره کوفه اوزرینه

حرکت ایله کلوب (دَیْرَی قَرَه) نام محله ایندی. عبدالرحمن دخی کوفه دن چیقوب ربیع الاولک اوچنده (دَیْرَجَاچِم) نام محله قوندی.

عبدالرحمانک یاننه بصره وکوفه اها لیسندن وقراء وفقهادن اعطیه آلور یوزبیک عسکر طوپلانوب براوقدرده سائر افراد اهای واریدی. فقها ایچنده (سعید بن جُبَیْر) و (عامر شعبی) و (ابوالبختر الطائی) و (عبدالرحمن بن ابی لیلی) کبی بیوک مجتهدلر و مشاهیر و فضلادن ذاتلر اولوب بونلر بالذات حربیه کیررلر و ناسی حربیه تشویق ایدرلر ایدی. بو ایکی یوز بیک قدر خلقلک جمله سی عبدالملکی خلع ایله عبدالرحمانه بیعت ایلدیلر.

بووقته قدر خلفا، هپ قریشدن ایکن عبدالملک ایله حجاجک مظلمندن خلق اوقدر بیزار اولشلر ایدی که بو مظلمن خلاص اولق ایچون هر شینه راضی اوله رق قرشیلک قیدندن دخی صرقظرله (کنده) قبیله سندن برامیره بیعتی اختیار ایتشلر ایدی.

کرک حجاج، کرک عبدالرحمن، ایکسی ده اردو کاهلرینک اطرافنه خندق چویردیلر. محاربه، یوز کون متمد اولدی و بو مدت ظرفنده پک چوق مضاربه و محاربه لر وقوع بولدی. نهایت جمادی الاخره نک اون دردنچی کونی حجاجک عسکری انهزامه یوز طوتمشیکن ینه امرای شامیه دن (سفیان کلبی) هجوم ایدنجه عبدالرحمانک میمنه سی اصلا مقاومت ایلکسزین بوزولدی. خلق بربری اوزرینه بندی. هپ صفر بوزیلوب عساکر عراق طاعلدی. همان حجاج کلوب کوفه نی ضبط ایتدی. عبدالرحمن دخی بوزغون عسکرله بصریه کیتدی. اطرافدن دخی بر خیلی ناس طوپلانندی و بصره ده ینه حجاجه مخالف برفرقه پیدا اولدی.

حجاجک عراقده ناسه ایتدیکی ظلم و اذا قالدی و اهالی خانه لرینه عسکر قونمق مسبوق بالمثل دکل ایکن حجاج بو کره عسکرینی کوفه اها لیسنک خانه لرینه کوندردی و بر آی کوفه ده اقامتن صکره عسکرینی آلوب بصره جانبیه کیتدی. عبدالرحمن دخی بصره دن چیقوب

(مسکن) نام محله اردو قوردی . خلال شعبانده اون بش کون متوالیا محاربه ایتدیلر . طرفندن کلّی تلفات وقوع بولدی . علی الخصوص عبدالرحمانك طرفده افاحم فقهادن ( عبدالرحمن ابن ابی لیلی ) و ( ابوالبختری الطائی ) مقتول اولدی ونهایت اردوسی بوزولدی .

عبدالرحمن ، آرتق عراقده طورهمیوب سجستانه کیتدی . حجاج ایسه هر طرفدن سوق عسکر ایله تعقیبه دوام ایتدی . بوجهتله عبدالرحمن سجستانده دخی طورهمیوب ملک ترکه التجا ایتدی . او دخی کندوسنه حرمت ورعایت ایلدی . لکن حجاج ، آنک رفقاسیله برابر طرفنه تسلیم اولملرینی طلب وتسلیم اولمازلر ایسه عسا کر کلّیه ایله واروب دیار ترکی پایمال ایده جکی بیانیله تهدید ایلدیکندن ملک ترک دخی عبدالرحمانی قرق نفر رفیقارلیله برابر حجاجك مأمورلرینه تسلیم ایتدی . آنلرده بو ملتجیلری آلوب حجاجه کتوررلر ایکن انشای راهده عبد الرحمن کندوسنی بر یوکسك طامدن آشانی آتوب تلف ایتدی . غوغا باصلدی ، عربده بیتدی .

(دیر حجاج) وقعه سندن صکره حجاج « هرکیم — ری امیری اولان ( قُتیبَه بن مسلم ) ه تسلیم اولورسه امین در » دیو اعلان ایتمش اولدیغندن فقهادن سالف الذکر شعبی ، آنک یاننه وارمش وبعده کلوب حجاج ایله ملاقات واعتذار ایدرک شرنندن خلاص بولمشدر . اما ( سعید بن جبیر ) فرار ایله اصفهانده قرار قيلمشدر .

## وقایع شتی

عبدالملاک ، بوجه بالا محاربات داخلیه ایله مشغول اولدیغندن روملر فرجه یاب فرصت اوله رق حدود اسلامیه تجاوز ایله یتمش طقوز سنه هجریه سنده انطاکیه یی محاصره ایتمشولرولکن نهایت الامر مغلوب ومنهزم اولوب کیتمشلردر .



سکسان اوچ سنه سنده حجاج کوفه ایله بصره آره سنده بر مرکز اولق اوزره مدینه ( واسط ) ی تأسیس واوراده بر مسجد بنا ایتدی .  
عبدالمک ، علی الدوام حرب وغزا ایله مشغول اولدینی حالد بر طرفدن دخی خسته خانه لر و غربا ایچون خانلر انشاسیله اعمار بلاده صرف مساعیدن خالی قالمزدی .

### وفات عبدالعزیز وعبدالمک و جلوس ولید

بلاده بیان اولدینی اوزره مروان بن الحکم ، اوغللری عبدالمک وعبدالعزیز ولی عهد ایدرک کندی حیاتنده ناسی آنلره بیعت ایتدرمش اولدیغندن وفاتنده عبدالمک جلوس ایدوب عبدالعزیز دخی مصر والیلکنده مستقر اولمش وعبدالمکدن صکره جلوسی مقرر بولنمش ایدی .

عبدالمک ایسه برادرینی ولایت عهددن چیقاروب ده اوغلی ولیدی ولی عهد ایلک مراقبه دوشدی . قرناسندن بعضیلری ، آنک بو آرزوسنی ترویج وبعضیلری تقبیح ایتمکله کندوسی بر حال تردد اوزره ایکن سکسان بش سنه سی جمادی الاولاسنده عبدالعزیز مصرده وفاتی خبری کلنجه عبدالمک ، اوغللری ( ولید ) ایله ( سلیمان ) ی ولی عهد ایدوب ناسی آنلره بیعت ایتدردی . ولایاته یازدی . سائر خلق دخی بیعت ایلدی .

فقط مدینه ده سیدالتابعین و پیشوای علمای عاملین اولان ( سعید بن المسیب ) « عبدالمک بر حیات اولدقجه بشقه سنه بیعت ایلیم » دهرک بیعتدن امتناع ایتمکله مدینه امیری اولان ( هشام ) آنی پک شدتلی ضرب واسواق وپازارده طولاشدیروب شهیر ایدرک آدم قتل و صلب اولنه کلان محله کوتورلمشیکن اعاده وحبس ایتدردی .

سعیدک آیاغنده قیلدن معمول بر طون وار ایدی . او وجهله مقتلدن محبسده اعاده اولندقدده « بن ، صلب ایده جککر صاندده عورت یرم آچلمسون دیو بو طونی کیمشیدم . آصمیه جقلرینی بیلیدم ، عادی کنیش البسه می کیردم ، دیدی .



عبدالملك، بوحاله واقف اولنجه هشامه مغبر اولوب «سعيدده شقاق ونفاق يوقدر. او، عبدالله بن زبيره دخى بيعتن امتناع ايتمش وناس بر ذاتك اوزرينه اتفاق ايدنجهيكه بيعت ايلم ديمش اولديغندن ابن زبير طرفدن اميرمدينه اولان (جابر بن اسود) آكا التمش قامچي اورمش اولديغي ابن زبيرك معلومى اولنجه سعيده تعرض ايمديهرك جابري تكدير ايتمشيدي، ديو هشامه عتابنامه كوندردى.

سكسان آلتى سنهسى شوالنك واسطنده عبدالملك، آلتمش ياشنده ايكن دار آخرته كوچدى ويرينه اوغلى (وليد) كچدى.

عبدالعزيزك خلافتدن نصيبى يوق ايمش كه وقتسز وفات ايلدى. لكن اوغلى عمر، مؤخرآ خليفه اولدى كه فوق العاده عدالت ايله موصوف و (عمرالعدل) ديو معروف اولان (عمر بن عبدالعزيز) در. احوال واوصافى زيرده بيان اولنه جقدر.

### ابام وليد

(وليد بن عبدالملك) زماننده فتوحات عظيمه ظهور ايتمشدر. شويلاه كه: اناطولى قطعه سنده يك چوق يرلر فتح اولنه رق عساكر اسلاميه نك بفرقه سى طقسان ايكي سنه سنده قسطنطينيه بوغازينه قدر كلوب كيتمشدر وخراسان واليسى، ماوراء النهرده نيچه فتوحاته نائل اوله رق بخارا و سمرقند وفرغانه وكاشغرى فتح ايله چين حدودينه قدر كيتمش واواننده حجاج طرفندن سوق اولتان فرقه عسكريه، سندی ونيچه بلاد هندی فتح ايتمشدر.

عساكر اسلاميه، مشرقده بويلاه مظهر ظفر اولمقدمه ايكن افريقه واليسى (موسى بن نصير) دخى مغربده فتوحات عظيمه نائل اوله رق بحر اوقيانوس ساحلنه قدر كيتمش وكندوسنك كوله منلرندن طنجه اميرى نصب ايتمش اولدينى (طارق بن زياد) طقسان ايكي سنه سنده (اندلس) ياقه سنه كچوب بعده موسى دخى آرقه سندن عبور ايله اندلس قطعه سنى فتح و (ساردنيا) جزيره سنى استيلا ايتمش ايدى.

شرقاً سمرقند و بخاراده و غرباً طنجه و قرطبه ده لسان عربی تدریس اولنور و قرآن کریم کمال احترام ایله اوقونور اولدی . ترك و هند و بربر و سودان حجاجی مکده اجتماع ایله عربجه سویلشور اولدیلر .  
ولید ، بویله فتوحات جلیله مظهر اولدینی ائنده ایتامی تربیه ایتک و فقها وضعفا و فقرایه تعینات و یرمک کبی امور خیریه و طرق و معابرک اصلاح و تسویه سی و مناسب موقعلرده قوییلر حفر اولنمی کبی اسباب اعماریه عتتا ایلردی .

ابنیه انشاسنه مراقی اولدیغندن زماننده پک چوق ابنیه نفیسه یاپیلمشدر . دمشق شامده مبالغ کلیه صرف ایله مشهور (جامع اموی) نی امثالسر اوله رق انشا و تزین ایتدیکی کبی بروجہ آتی مسجد شریف مدینه یی دخی توسیع و مجدداً انشا و تعمیر ایتمشدر .

### عمر بن عبدالعزیزک امیر حرمین اولدیفی

ولید بن عبدالملک ، سکسان یدی سنه سنده عمزاده سی سالف الذکر ( عمر بن عبدالعزیز ) ی حرمین امیری نصب ایتدی .

بو ذات ایسه امرای امویه نک هیچ برینه بکزه مزدی . غایت عالم و فاضل و زاهد و عادل بر ذات نادرالامثال ایدی .

مدینه یه واردیفی کبی فقهادن اون کشی انتخاب و دعوت ایلدی و حضورینه داخل اولدقلرنده « سزی آنحق بکا مشاور و معاون اولمق ایچون جلب ایتدم . کندی رأیمله بر ایش کورمک ایستم . هر خصوصده سزگله مشاوره ایده جکم و برده بنم مأمورلرمدن برینک ناسه ظلم و تعدی ایتدیکنی طویار ایسه گز بکا افاده ایتلیسکز » دیدی . فقها ، آنک بو سوزلرندن فوق العاده ممنون اوله رق عودت ایلدیلر .

بو اون کشی ( عمروه بن زبیر بن العوام ) و ( عبیدالله بن عبدالله بن عتبه بن مسعود ) و ( ابوبکر بن عبدالرحمن ) و ( ابوبکر بن سلیمان ) و ( سلیمان بن یسار ) و ( قاسم بن محمد بن ابی بکر الصدیق ) و ( سالم بن

عبدالله بن عمر بن الخطاب) و (عبدالله بن عبدالله بن عمر) و (عبدالله بن عامر بن ربیعہ) و (خارجہ بن زید) در . بونلر عمر بن عبدالعزیزک دیوانه دوام ایدرک دفع و رفع مظالم خصوصندہ آکا معاونت ایدرلردی . عمر بن عبدالعزیز دخی کنج ایکن بو فقہادن تعلم وتدرس ایدرک آنلرک اخطاراتنه توفیق حرکت ایلردی .

سکسان سکز سنه سنده ولید بن عبدالملک طرفندن وارد اولان امر قطعی موجبنجہ عمر بن عبدالعزیز ، امہات مؤمنینک حجرہ لرینی ہدم واطرافدن برچوق خانہلر اشترایلہ مسجد نبویہ علاوہ ایدرک توسیع ومبالغ کلیہ صرف ایلہ مجدداً تعمیر وانشا ایتدردی ومدینہدہ بردہ فسقیہ یاپدردی .

عمر بن عبدالعزیز ، مکہ وطائفک دخی امیری اولوب بو سنہ موسم حججہ ناس ایلہ حجج ایتک اوزرہ مکہیہ عزیمت ایلدی . میقات (تنعیم) ہ واردقدہ مکدہ صو آز اولوب حجاج ایچون صوسزلقدن خوف اولنمقدہ اولدینی کندوسنہ افادہ اولنغلہ همان جناب حقہ دعا ایتدی . حجاج دخی (آمین) دیدیلر . آنلر کعبہیہ وارمدن بول بول یاغمورلر یاغدی ، خلق صویہ قاندی .

طقسان بر سنہ سنده ولید ، حجج ایتک اوزرہ مکہیہ کیدرکن مدینہیہ واردقدہ عمر بن عبدالعزیزک یاپدرمش اولدینی فسقیہی کوردی ، پک بکندی ومجدداً تعمیر وتوسیع اولنان مسجد نبویہ کیتدکدہ ہب ناس طیشارو چیقارلدی . فقط سیدالتابعین اولان (سعید بن المسیب) قالدی . آنی چیقارمغہ کیمسہ جسارت ایدہمدی . «سنده قالقیورسہک» دیدکلرنده سائر کونلر قالدیم وقت کلدجکہ قالمم» دیدی . «باری سلام ایچون قیام ایتسہک» دیدکلرنده «آنی دہ یاپہم» دیدی .

سعید ، کندی عصرینک اعلم وافضلی اولدینی حالہ دنیادن کچوب (موتوا قبل ان تموتوا) سرینہ مظهر اولمش . امرا وکبرا ایلہ آلیش ویریشی قالماش اولدیغدن عمر ، آنی معذور کورور وقدرینی بیلور ایدی .

لکن دور سلطنتک ایجاب ابتدیی رسوم و تشریفات جدیدیه رعایت دخی لازمه خالدن کوریلوردی و بیکی اصولی اسکی عقوله سیغدرمق مشکل اولدینی کجی بیکی اصول ایله مآلوف اولانلره دخی اسکیلرک طورى کران کلوردی . بناءً علیه ولید بن عبدالملک ، مسجد شریفده طولاشورایکن سعیدی کورمسون دیو عمر ، آنک بولندینی طرفه کچهرک حائل اولوردی . ولیدایسه قبله جانبیه عطف نظر ایدرک سعیدی کوردی . « بو اختیار کیم در » دیو صوردی . عمر دخی « سعیددر ، شویله بویله بر ذاتدر . بیلسه قیام ایدردی . لکن ضعف بصری واردر » دهرک اعتذار صد دنده بولندی . ولید « بن آنک حائی بیلورم . بز آنک یاننه وارلم » دهرک برلکده یاننه وار دیلر . ولید « نصلسین اختیار » دیدی اوده « الحمد لله ای حالده یم . امیر المؤمنین نصلدر ، کیفی ایمیدر » دیدی واصلایرندن قیلمدانمدی . ولید ، همان عمره خطاباً « ایشته ناسک فقهی بودر » دهرک کیرو دوندی .

### فقرای مریه

اوزمان مدینه ده پک چوق فقهای عظام وار ایدی و ایچلرنده یدیسی پک زیاده شهرت بولملر ایدی که برنجیسی : سالف الذکر سعید بن مسیدر . ایکنجیسی : عشره مبشره دن زیر بن العوام حضرتلرینک اوغلی (عروه) درکه والده سی (ذات النطاقین) اولوب (عبدالله بن زیر) ک لابوین برادریدر . اوچنجیسی (عیدالله بن عبدالله بن عتبه بن مسعود) درکه (عبدالله بن مسعود) حضرتلرینک برادر زاده سیدر . دردنجیسی بنی مخزومدن (ابوبکر بن عبدالرحمن بن الحارث) در . بشنجیسی (سلیمان بن یسار) درکه ام المؤمنین (میمونه) حضرتلرینک آزاد لوسیدر . آلتنجیسی (قاسم بن ابی بکر الصدیق) در یدنجیسی (زید بن ثابت الانصاری) حضرتلرینک اوغلی (خارجه) در . بو آلتیسی ، بروجه بالا عمر بن عبدالعزیزک انتخاب ایتمش اولدینی فقهای عشره داخلنده ایدیلر .

بوفقهای سبعة ، اکا بر مجتهدین دیمک اولوب فقه وفتوی آنلردن

منتشر اولمشد. ايشته عمر بن عبدالعزيز، بويله بيوك زانلردن اخذ وتلّمذ ايتمشیدی. اوفقهانك عصرنده وآنلرك طبقه سنده (سالم بن عبدالله بن عمر) کبی مدینه ده دیکر بعض فقهای عظام دخی وار ایدی. لکن اصحاب کرامدن صکره فتوی آنلره منحصر اولوب ساڑی فتوی ویرمن ایدی وجهله فقهانك اولوسی (سعید بن المسیب) حضرتلری ایدی که علم فقه وحديثی وزهد وتقوای جمع ایتمشیدی. عطیه قبول ایتزدی. زيت آلوب ساتار وآنکله تعیش ایدر ایدی.

ائمة حدیثدن (زهری) و(مکحول). «کورشدیککنز آدملا ایچنده ائک زیاده فقیه کیمدر» دیو سؤال اولندقد «سعید بن مسیبر و او، فقیه الفقهار، دیو جواب ویرمن اولدقلرینی (امام آوزاعی) روایت ایلشدر.

بصره وکوفه ده دخی اوزمان پک چوق قرآ و محدثین وفقها وارایدی وجهله سنك اولوسی (سعید بن جیر) ایدی. بونلرك چوغی، بروجه بالا حجاج ایله عبدالرحمن کنسینك محاربه لرنده مقتول اولدی وبقیه سی حجاجك شرندن فرار ایله اطرافه طاغدی.

### عمر بن عبدالعزیزك عزلی

حجاجك مظلومندن فرار ایدنلر مکه و مدینه یه التجا ایدرلردی. ملتجیلرك ایچنده کبار مجتهدیندن واکابر تابعیندن (سعید بن جیر) و(مجاهد) کبی زانلر وار ایدی. عمر بن عبدالعزيز، حجاجك اهل عراقه ظلم وجفا ایتدیکنی ولیده عرض ایتدی. حجاج، آکا مطاع اولنجه «عراقك اهل شقاق و نفاق، مکه و مدینه یه التجا ایله اورالرده بارینیورلر، بو ایسه نفوذ حکومته وهن کتوره یور، دیو ولیده عرض شکایت ایلدی. ولید، آنک اوزرینه حجاج ایله بالخابره عمر بن عبدالعزيزی طقسان اوج سنه سی شعباننده مدینه و مکه امارتندن عزل ایله (خالد بن عبدالله) ی مکه و (عثمان بن حیان) ی مدینه امارتلرینه نصب ایتدی.



خالد، مکيه و اردی و همان اوراده بولسان اهل عراقی جبراً مکدن  
چیقاردی و اهل عراقی خانه سنه قوندورانلری و آنلره خانه ایجار ایدنلری  
اخافه و تهدید ایلدی. اهل مدینه حقه دخی بو وجهله معامله شددیده  
اجرا اولندی. آرتق حجاجک ظلمندن فرار ایدنلره جای التجا قالمدی.

### سعید بن مهیرک قنلی

بالاده بیان اولندیغی اوزره (دیر حجاج) وقعه سننده عبدالرحمن،  
منهزم اولدقدن صکره سعید بن جبیر، اصفهانه فرار ایتمشیدی. حجاج،  
آندن خبردار اولنجه طوتیلوب طرفنه کوندرلمسنی اصفهان امیرینه اشعار  
ایتمش ایسه ده سعید، او وقتک افاحم فقها سندن و بین الناس یک محترم  
ذواتدن اولمغله آنک فلا کتته بادی اولمقدن هر کس محتنب اولدیغنه مبنی  
اصفهان امیری، سعیده صاووشوب دیکر بر ولایتیه کیتمسنی خفياً اخطار  
ایتمکله او دخی اصفهانندن فرار ایله آذربایجانده قرار قيلمشیدی. بر مدت  
اوراده اقامتدن صکره جانی صیقیلوب اورادن دخی صاووشه رق مکيه کیتمش  
وینه فقها دن (مجاهد) و (طَلِقُ بْنُ خَيْبٍ) کبی اسمنی اخفا ایله اختفا  
ایتمشیدی.

خالد، امیرمکه اولدقده «بوبر فنا آدمدر. مکدن بر طرفه صاووشه ک»  
دیو سعیده اخطار اولدقده «قاچدم قاچدم، بورایه کلدیم. بورادن نره یه  
کیدیم. ربمدن اوتانور اولدم. آنک قدرندن نصل فرار ایدیم» دیمش.  
حجاج ایسه سعید و مجاهد و طلق بن خبیبک کوفیه کوندرلملرینی  
طلب ایلدیکندن خالد اوچنی ده قید و بند ایله طقسان درت سنه سننده کوفیه  
کوندردی. طلق بن خبیب، اثنای راهده فوت اولدی. مباشرلر ایکیسنی  
کوفیه کونوردیلر و سعیدی خانه سنه ایندردیلر. کوفه نك جمله قرآء و فقهای  
سعیدک زیارتنه کلدیلر. آیاغنده کی بوقاغینی کورنجه بکایلدیلر. سعید ایسه  
کولر و بلافتور سوز سویلر ایدی. بعده حجاج، آنی حضورینه جلب  
ایله سب و تحقیر ایتدکدن صکره امر ایتدی حضورنده بوینی اوردیلر.



باشی دوشد کده اوچ کره کلمه شهادت کتوردی و برنجیسنی پک فصیح اوله رق سویلدی. حلال مشکلات انام و پیشوای فقهایی بنام اولان برذاتک بو وجهله قتلی هر کسی دلخون ایلدی. آنک اوزرینه حجاجک شعورینه دخی بعض مرتبه خلل کلدی، کندی کندینه سویلنور اولدی و کیجه لری سعید، آنک رؤیاسنه کیروب یاقه سنه یاپشور «یا عدو الله! بنی نیچون قتل ایتدک» دیر و حجاج دخی قورقوب اویانور و «سعید بن جییر، بنم نهمه لازمدی» دهرک کندی کندینه سویلنور ایدی. آندن صکره کیمسه بی قتل ایتدی. امام مجاهد دخی حجاجک وفاته قدر مجبوس قالدی.

### وفیات اعیانه

(عبدالله بن جعفر بن ابی طالب) رضی الله عنهما علی روایة سکسان بش و علی روایة سکسان آلتی سنه سنده وفات ایتشد. بیعت رضوان اصحابدن (عبدالله بن ابی اوفی) کوفه ده علی روایة سکسان آلتی و علی روایة سکسان یدی سنه سنده عزم دربقا ایتشد. اصحاب رسول الله کوفه ده اک صکره وفات ایدن اودر. رضی الله عنه. (عبیدالله بن عباس) رضی الله عنهما سکسان یدی سنه هجریه سنده عازم داربقا اولدی. بیوک برادری عبد الله ک علم و فضلی نه قدر واسع ایسه عبیدالله کده جود و سنجاسی اوقدر واسع و طعامی بول ایدی. ینه اصحاب کرامدن (مقداد بن معدیکرب) بوسنه طقسان بر یاشنده ایکن عازم داربقا اولدی رضی الله عنه.

ینه اصحاب کرامدن (سهل بن سعد الساعدی) سکسان سکر سنه سنده طقسان آلتی یاشنده ایکن مدینه ده عزم داربقا ایلدی. رضی الله عنه رسول الله صلی الله علیه وسلم حضر تلمرینه اون سنه قدر خدمت ایلش اولان (انس بن مالک الانصاری) رضی الله عنه دخی یوز یاشنی متجاوز اولدینی حالده طقسان و علی روایة طقسان ایکی و علی روایة طقسان اوچ سنه سنده ارتحال داربقا ایتشد. بصره ده اک صکره وفات ایدن صحابی اودر.

رسول اکرم آکا کثرت اموال و اولاد ایله دعا ایتمش اولدیغندن سکسان ارکک وایکی قیز اولادی اولمشیدی . وفاتنده یوز یکرمی اولاد واحفادی قالدی ومالنده برکت اولوب حسن زندگانی ایله یاشامشیدی .

( امام زین العابدین علی بن حسین ) رضی الله عنها حضرتلری ، طقسان درت سنه سنده اللی سکنز یاشنده ایکن مدینه ده عزم داربقا ایلدی . خیر و فاضل و کرامات مشهوره صاحبی بر ذات جلیل القدر ایدی . اهل بیت نبوتک آبرویی اولوب وفاتنده یرینی اوغلی ( امام محمد باقر ) حضرتلری طوتدی که غایت عالم و فاضل بر ذات نادرالامثال در .

ینه بوسنه بالاده مذکور اولان فقهای سبعة دن اوچ بیوک ذات وفات ایلدی که مدینه ده سیدالتابعین اولان ( سعید بن المسیب ) و ( عروة بن الزیر ) و ( ابوبکر بن عبدالرحمن بن الحارث ) در . ( رحمة الله عليهم رحمة واسعه ) ینه بوسنه بالاده بیان اولندیغی اوزره فقهای عراق دن ( طلق بن خیب ) کوفیه کوتوریلور ایکن یوله وفات ایلش و ( سعید بن جیر ) ی دخی حجاج اعدام ایتمش ایدی .

برسنه نك ایچنده بو قدر بیوک ذاتلرک وفاتی ضایعات عظیمه دن معدود اوله رق اشبو طقسان درت سنه سنه ( سنة الفقهاء ) دن یلمشدر . طقسان بش سنه سنده رسول الله صلی الله علیه وسلم حضرتلرینک آزادلوسی ( سفینه ) رضی الله عنه ساحل عقبایه واصل اولدی .

ینه بو سنه ( ابو عثمان النهدی ) یوز اوتوز یاشنده و ( سعد بن آیاس شیبانی ) یوز یکرمی یاشنده ایکن وفات ایلمشدر .

ینه بو سنه عراق و بالجمله بلاد شرق والیسی اولان ( حجاج بن یوسف الثقفی ) دار مجازاته کیتدی . سببی بو وجهله مرویدرکه : عمر بن عبدالعزیزک یاننده حجاجک وسائر ولایة امورك مظالمندن بحثله بٹ شکوی اولندقدم عمر بن عبدالعزیز حضرتلری ( عراق ده حجاج ، شام ده ولید ، مصر دم قره ، مدینه ده عثمان ، مکده خالد . یارب ! دنیا ظلم و جور ایله طولدی .

آرتق ناسی آنلرك ظلمندن خلاص ایت ( دیو دعا ایتدی . مقدا ( زیاد بن ابیه ) حقنده ( عبدالله بن عمر ) ك دعاسی نصل كه سریع التأثير اولدیه بو كره عمر بن عبدالعزيزك دعاسی دخی او وجهله مقبول ومؤثر اوله رق هان اشبو طقسان بش سنه سی شوالنده حجاج و بر آی مرور ایتمدن مصر والیسی قره وفات ایلدیلر و چوق زمان كچمیوب بروجّه آتی ولیدك وفاتی و عثمان و خالدك عزللری وقوعه ككشد .

حجاجه دائر یوقارولرده چوق سوز كجدی . تكراره حاجت یوقدر . آنك ترجمه حالی ییلان حكایه سیدر ، تفصیله قیام اولنسه سوز اوزار . بختی قیصه كسمك اولادر .

### وفات ولید روملر - المیمانیه بن عبدالملك

ولید بن عبدالملك ، برادری ( سلیمان ) ی ولایت عهددن اخراج ایله كندوسندن صكره خلیفه اولق اوزره اوغلی ( عبد العزیز ) . ناسی بیعت ایتدیرمك مراقه دوشدی . بونكه مشغول ایكن اجل ایرشدی . طقسان آلتی سنه سی واسطنده وفات ایلدی و برادری ( سلیمان بن عبدالملك ) تخت خلافت وسلطنته جلوس ایتدی . سلیمان ، عمزاده سی عمر بن عبد العزیزی سوهر وا كثریا آنك نصایحیه عمل ایدر ایدی . وزیر ی ( رجا ) دخی بر خیر آدم ایدی . بناء علیه خلیفه اولدینی كبی حجاجك زنداننده محبوس اولانلری اطلاق و آنك طرفندن منصوب اولان مأمورلری عزل ایتدی .

او زمان اهل اسلام ایله روملر آره سنده محاربه تجدد ایلكله سلیمان بن عبدالملك ، طقسان یدی سنه سنده قسطنطنیه طرفه عسکر كونوردی و ( عمر بن هیره ) بحرأ غزا ایدرك بو سنه دیار رومده قیشلادی و طقسان سكز سنه سنده سلیمان بن عبدالملك ، عمر بن عبدالعزيز ایله برلكده حلب جانبّه عزیمتله ( دابق ) صحراسنده اردو قوردی و برادری ( مسلمه بن عبدالملك ) ی عسكرله قسطنطنیه اوزرینه سوق ایتدی و كندوسی دابقده اقامتله فتوحاته منتظر اولوب قالدی .

## بعضی رڼیات

سليمان بن عبدالملکک ولی عهدی اولان اوغلی ( داود ) اشبو طقسان  
 سکز سنه سی خلانده وفات ایلدی . ( رحمة الله عليه )  
 ینه بو سنه مدینه ده فقهای سبعة دن ( عبيدالله بن عبدالله بن عتبة بن  
 مسعود ) وفات ایلدی . ( رحمة الله عليه رحمة واسعة )  
 طقسان طقوز سنه سنده دخی محمد بن حنیفه نک اوغلی ( ابو هاشم علی )  
 مسموماً وفات ایلدی . ( قدس سره الاعلی )

## دعوت عباسیه نک مفتای

سليمان بن عبدالملکک ، خیار بنی امیه دن معدود ایسه ده سالف الذکر  
 ابو هاشم علینک تسمیعی ماده سی آنک صحیفه اعمالی لکه دار ایتشد .  
 شویله که : بالاده بیان اولندی بنی اوزره محمد بن حنیفه وفات ایلدکده  
 اوغلی ( ابو هاشم علی ) آنک یرینه قائم وشعیلره مرجع اولمشیدی . بو ائنده  
 شامه عزیمت ایله بلقادن مرورنده ( حمیمه ) قریه سنده ساکن اولان  
 ( علی بن عبدالله بن عباس ) ک اوغلی ( محمد ) چیقوب آنکله ملاقات  
 وحسن مصاحبت ایلدی . ابو هاشم ، شامه کلوب سليمان بن عبدالملکک ایله  
 کوروشدکده سليمان ، آکا پک زیاده اکرام واحتیاجاتی ایفا ایتدی . لکن  
 درجه علم وفصاحتنه حسد وآندن خوف وانديشه ایتکله بو کره آتی  
 تسمیم ایتک اوزره یولی اوزرنده بر مأمور بولندرمش . او دخی سوده  
 زهر قاتوب ابو هاشمه ایچیرمش .

ابو هاشم کندوسنده فئالق حسن ایدنجه ( حمیمه ) قریه سنه کیتمش  
 ومحمد بن علی یه مسافر اولوب بعض اسرار غیبیه دأر آکا معلومات  
 ویردیکی صرءه امامتی آکا تودیعی ویاننده کی شعیلره خلافتک بنی عباسه  
 انتقال ایده جکنی افاده وبوندن صکره محمد بن علی یه مراجعت ایللرینی  
 توصیه ایلدکدن صکره عزم دار بقا ایتشد . آنک اوزرینه کندوسنک

شیعه‌سی، یعنی جماعتی همان (امام محمد بن علی) به بیعت ایلشار و اطراف واکناه یاییلوب سرآ خلقی دعوتیه باشلامشردر.

سلیمان بن عبدالمملک، ابو هاشمک و فاتیله بر بیوک رقییدن قورتلش اولمق زعمنده بولنوب حال بوکه کندی دولتی احما ایدم‌جک اولان دعوت عباسیه یول آچیلمش و کندوسنک عمری ده پک آز قالمش ایدی.

### وفات سلیمان بن عبدالمملک و حضرت عمر بن عبدالعزیز

سلیمان بن عبدالمملک، دابقده ایکن طقسان طقوزسنه‌سی صفرنده آغر خسته اولوب اولوم دوشکنه دوشدی و وزیر (رجا) ایله سویلشدی. ولی عهدی بروجه بالا وفات ایلوب دیکر ایکی اوغلی دخی صغیر اولمغله کندوسندن صکره عمزاده‌سی عمر بن عبدالعزیز و آندن صکره کندوسنک برادری (یزید بن عبدالمملک) خلیفه اولمق اوزره بر عهد نامه یازوب مختوم اوله‌رق رجایه ویردی. بو سرّه رجادن بشقه کیمسه واقف دکل ایدی. خلال صفرده سلیمان فوت اولنجه رجا، همان امرایی، دابق مسجدینه دعوت ایلدی و عهد نامه‌یی میدانه قودی و مهرینی فک ایله آچوب او قودی.

عمر بن عبدالعزیز، صرف آخرت آدمی اولوب بارکران امارت آلتنه کیرمکدن بغایت متخاشی ایکن اسمی او قوندینی کبی طوکه قالدی واستعفا صدندده بولندی. لکن التفات اولنوب رجا، همان آنک قولتوغنه کیردی. منبره چیقاردی، ناسده بیعت ایدی ویردی. خواه و ناخواه اودخی ناسدن بیعت آلدی و بعده سلیمانک نمازینی قیلدی.

### محاصره قسطنطنیه

بالاده بیان اولندینی اوزره سلیمان بن عبدالمملک، طقسان سکر

سنة سنده برادری مسلمه یی عسا کر کلیه ایله قسطنطنیه اوزرینه سوق ایتشیدی . قیصر دخی اولجه خلیفه نك تشبثاتندن خبردار اوله رق اوله رق اسباب مدافعه نك استکمالنه قیام و قلعہ دیوارلرینی اصلاح و احکام ایلہ مانجینقلر وضع و تعییه و اوزمان روملرده موجود و صکره منسی و مفقود اولان صو ایلہ سونمز آتشک مواد و ترتیباتی تهیه ایتدرمش و سسکان شهره اوچ سنه لك ذخیره و لوازم ساثره ادخار ایتلری و بی قدرت اولانلرک شهردن چیقوب کیتملری ایچون امر ویرمش ایدی .

سفائن اسلامیه یی اوزاقدن قارشولیوب یاقق اوزره برچوق روملر ایلر و کیتمشلر ایسه ده ایچلرنده اختلال ظهور ایتمکله سنجاقلرینی ردوده براغوب اطرافه طاغلمشلر ایدی .

مسلمه ایسه یوز یکر می بیک کزیده عسکرله آناطولی قطعه سنی یاروب کچهرک و پک چوق بلده لری فتح ایدرک آق دکر بوغازینه کلدی . و سفینه لرله کلیبولی به کچدی و ساحل بویله حرکت ایلهرک کلوب قسطنطنیه یی محاصره ایتدی .

روملر ، خوف و تلاشه دوچار اوله رق نفوس باشنه سنوی برر آلتون جزیه ویرمک اوزره مصالحه طلب ایلدیلر . لکن مسلمه ، فتح قسطنطنیه شرفی احراز ایلک سوداسنه دوشمش اولدیغندن موافقت ایلدی . چونکه برآلشام ساحلندن چیقمش اولان عرب دوئماسی ، فرانسه سواحلنده طولاشان مصر دوئماسی دخی برابر آله رق قسطنطنیه جانبنه عزیمتله بوصره ده قسطنطنیه پیشگاهنه کلش اولدقلرندن مسلمه ، برآ و بحرآ شهر اوزرینه برشدتی هجوم ترتیب ایدیوردی .

اکرچه بوکملر اوفاق ، تفک شیلر اولوب اک بیوکی مهماتیلہ برابر آنجق یوز عسکر آله بیلوردی . لکن ایکی دوئمانک مجموعی بیک سکر یوز قطعه سفینه اولمغله اووقته کوره بریوک قوت ایدی .

بودوئمارک ورودنده روملر خلیج آغزینه کریش اولان زنجیری قالدردیلر . عربلر زنجیر محله ککنجه رفعی بردسیسه اولسون دیو تردد



و توقف ایلدیلر . ناکاه روملر هر طرفدن معهود صو ایله سسونمز آتشی اشعال ایله اوسفینه لری احراق و ایچلرنده کی عساکری اتلاف ایلدیلر .  
 صکره قیش کلدی ، قار باصدی . سلیمان امداد ایدممدی . مسلمه باراقلر یاپدردی . لکن بوسنه قیش پک شدید و مدید اولدی . قارلر ، یوز کون یریوزنده قالدی . صغوقدن و طاعوندن مسلمنه ک چوق عسکری قیرلدی و سلیمان فوت اولدی . مسلمه ، حیرت و اضطرابده قالدی . موسم بهار کلنجه عربلر ینه جانلاندی . عمر بن عبدالعزیز طرفندن ذخیره و سائره کوندردی . اسکندریه دن درتیوز و افریقان اوچیوز آلتش کمی چیقوب قسطنطنیه پیشگاهنه وصول بولدی . مسلمنه ک اردوسنه حیات تازه کلدی . لکن روملر ، بو کیلری دخی اولکیلر کی یاقدیلر . ایچلرندن پک آزی قورتلدی . مسلمنه ک اردوسنده ذخیره قالمیوب عسکری ، اوت کوکی و آچاق قبوغی یمکه باشلادیلر . اوصرده قیصر ، بالقانلر طرفندن عسکر جلب ایتمکله واقع اولان محاربه لرده دخی مسلمنه ک خیلی عسکری شهید اولدی و روملره امداد ایچون فرنکستانده کلی عسکر تجهیز ایدلمکده اولدینی حوادی شیوع بولدی . حال بوکه عمر بن عبدالعزیز طرفندن مسلمنه یه عودت امری گلشدی .

بناء علیه مسلمه ، قسطنطنیه شهرینی اون اوچ آی محاصره ایتدکن صکره رجعت و کلیولی بوغازندن عبور ایله شامه عودت ایلشدر .  
 بو وقوعاتدن صکره عربلر فتح قسطنطنیه سوداسندن فارغ اولدیلر . اندلسده کی عساکر اسلامیه ایسه کوندن کونه اوروپانک ایچرولرینه طوغری ایلروله مکده ایدیلر .

### عمر بن عبدالعزیزک ایام خروفتی

عمر بن عبدالعزیز عالم و فاضل و علمیه عامل بر ذات کثیر الفضائل ایدی . فقها دن ( میمون بن مهران ) دیدی که « علما ، عمر بن عبدالعزیزک یاننده تلامذه ایدی » ینه مشاهیر فقها دن و عمر بن عبدالعزیزک اساتذه سندن

(مجاهد) دیدی که «بز، عمر بن عبدالعزیزی تعلیم ایچون کلدک . حال بوکه دائما آندن تعلّم ایدر اولدق)

(سفیان ثوری) حضرتلری «خلفا، بشدر : ابوبکر و عمر و عثمان و علی و عمر بن عبدالعزیزدر» دیدی. امام شافعی حضرتلری ده بویله سویلدی .  
(امام باقر بن زین العابدین بن حسین) رضی الله عنهم حضرتلری دخی .  
«هر قومک برنجیجی واردر. بنی امیهنک نجیجی دخی عمر بن عبدالعزیزدر .  
ویوم قیامتده او ، یالکز باشنه برامّت اوله رق بعث اولنه جقدر ، دیو بیوردی .

فی الواقع دولت امویّه عصرنده عمر بن عبدالعزیزک عهد خلافتی بر یاغز آنک آلتنده کی بیاض کییدر . ایکی سنه ، بش آی ممتد اولان مدت خلافتنده نیجه سنت سنیه لری احیا و بونجه ییلاردنبرو یرلشمش و کوکلشمش اولان بدعت سیئه لری احیا و ظلم ایله طولمش اولان عالمی عدل ایله املا ایتمشدر . بناءً علیه زمان خلافتی ، خلفای اربعه نك ايام خلافتلرینه ملحق و کندوسی ده خلفای راشدیندن معدود اولمشدر .

لکن مظلّم و تعدّیاته و انواع سوء استعمالاته آلشمش اولان امرای امویّه، آنک عدالتندن دلکیر اوله رق جاننه سوء قصد ایلک درجه سنه قدر واردیلر و آکا خلف اولان (یزید) آنک اصول عدلیّه سنی دفعه تغییر ایلشدر .

بواجمالک شمدی برمرتبه ده تفصیل و ایضاحنه ابتدار ایدم .  
شویله که : عمر بن عبدالعزیز، ابتدای امرده خطوب جسیمة خلافتی اداره ایدمه میه جک کبی ضعیف کورندی . لکن خلفای راشدین طرزنده و عمر بن الخطاب طورنده ایشه باشلانجه بیوکلکنی کوستردی .

ایلك خطبه سنده جناب حقّه حمد و ثنادن صکره (ای ناس! بزه رفاقت ایدمه جک اولان کیمسه بش شرطله ، یعنی بزه عرض حال ایدمه میه جک اولانلرک حالی عرض و افاده و امور خیریه ده بزه اعانه و خیره دلالت ایلک

وكمسه حقنده غیت ایلهمك ومالایعی ایلهم مشغول اولماق شرطلرله رفاقت ایلسون والا بزه یا قلاشمسون) دیمکله شعرا و خطباء میدان چیقوب آنک مدح و ثناسنی ورد زبان ایلدیلر. زهاد وفقها دخی «بز» بو ذاتک قولنه مخالف فعلنی کورمدکجه آندن آیرلیز» دیدیلر. (رضی الله عنه)

بروجه بالا کندوسنه بیعت اولندقدن صکره بارگاه خلافته کورتورمک اوزره آلائی آتلی کتورلدکده «بونلرله» دیدی. «خلافته مخصوص بینکلردر» دینلدکده «بنم دابه» بنم حاله اوفقدر «دیه رک سلطنت بینکلرینی کیرو چویروب کندی حیوانه بندی «خلافت اوتاغنده سلیمانک عالمه سی وار. بن آنلرک راحتسز اولملرینی تجویز ایتیم. آنلر یرله شنجیه دک بنم قیل چادریم بکا الیرر» دیه رک کندی اوینه کیتدی.

لکن پک مغموم و متفکر اولدیغندن آزادلو کوله سی «فکرواندیشه کز تهر» دیو صوردی. خلیفه حضرتلری دخی «مشرقدن مغربه قدر اولان امت محمدک حقوقنی ایفاء بکا وظیفه اولدی. بوندن بیوک اندیشه ایده جک شی اولورمی» دیو جواب ویردی.

ایلك ایشی بو اولدی که : زوجه سی و عمی قیزی اولان (فاطمه بنت عبدالملک) ک یانه واردی. «اگر بنمله برلکده یاشامق ایسترسه ک حلیات و مرصعاتکی بیت المال مسلمینه رد و تسلیم ایت. زیرا آنلرسنک یانگده ایکن بن سنکله برابر اولامام» دینجه فاطمه، بالجمله حلیاتی بیت الماله کوندردی و فاطمة الزهرا رضی الله عنها حضرتلری کبی حلیات مغویه و مزیات روحانیه ایلهم یشامغه قرار ویردی.

غریبدرکه عمر بن عبدالعزیزک وفاتنده آکا خلف اولان یزید بن عبدالملکک ایلك ایشی بو اولدی که : او، حلیاتی بیت المالدن کتوردوب همشیره سی فاطمه یه «بن بیلورم که عمر سکا ظلم ایتدی. آل حلیاتکی» دیه رک اعاده ایتدکده فاطمه «والله قبول ایتیم. بن، عمره حال حیاتنده مطیع اولوبده وفاتندن صکره عاصیمی اوله جغم» دیه رک قبولدن قطعاً امتناع ایتدی. یزید دخی او حلیاتی کندی عالمه سنه توزیع ایتدی.

یوقادینک علوجنابنه باقوبده عبرت آلملی، برادری یزیدک طمع وارتکابنهده باقوب متحیر قالملی .

امیرالمؤمنین عمر بن عبدالعزیز حضرتلری، ابتدا نفسنجه و خانه سنجه اجرای عدالت ایلدکدن صکره اسلافی اولان امرای امویّه طرفندن احداث اولمش اولان بدعتلرک رفعنه قیام ایتدی و او یولده هر طرفه فرمانلر کوندردی و بعض ولایه عظامه یازدیغی امرنامه سنده «الله تعالی حضرتلرینک بکا توجیه بیوردینی وظیفه نك ایفاسی قولای برایش دکلدر . اکر اتخاذا ازواجه و ادخار امواله رغبتم اولسه دیه جک یوق ایدی . بن ایسه برشدتلی حسابدن و برغلیظ مسئله دن قورقورم . مکرکه جناب حق عفو و مرحمت ایلله » دیو یازدی و هپ امرایه اجرای عدالت ایللرینی توصیه بیوردی . ظلمه دن اولان امرای و مأمورینی عزل ایلله محق و مستحق آدملر انتخاب ایلدی . مشاهیر فقها دن (شعی) یی کوفه و (حسن بصری) یی بصره قاضیسی نصب ایتدی . صکره حسن بصری، استعفا ایتمکله (ایاس بن معاویه) بصره قاضیسی اولمشدر .

حسن بن علی رضی الله عنهما حضرتلرینک خلافتدن استعفا ایتدیکی تاریخدنبرو امرای بنی امیه، خطبه لرده حضرت علی یی سب ایتکی عادت ایلشلر ایدی . عمر بن عبدالعزیز ایسه پیدشوی اهل فتوی و آب روی ارباب تقوی اولمغله بو خصوصده نه یایه جغه انتظار اولنور ایکن جمعه کونی منبره چیقدی و بر کوزل خطبه او قودی . سب علی بختنه کلنجه بو بدعت سیئه یی ترک ایلله آکا بدل «ان الله یأمرکم بالعدل والاحسان وایتاء ذی القربی وینهی عن الفحشاء والمنکر والبغی یعظکم لعلکم تذرّون» آیت کریمه سنی او قودی و بلاد سائرده دخی بو وجهله عمل اولتمق اوزره ولایه و امرایه فرمانلر کوندردی . بتون ممالک اسلامیهده سب علی عادت کریمه سی، دفعه خطبه لرده چیقوردی و آندن صکره منبرلرده بو آیت کریمه نك قرائتی عادت مستحسنه اولدی .

عمر بن عبدالعزیزک حضرت علی یه محبتک سببی، بو وجهله

کندوسندن مرویدرکه : مدینه ده تحصیل علوم ایله مشغول ایکن فقههای سبعة دن (عیدالله بن عبدالله) ه ملازمت ایلمکده اولدینی حالد ه سائر امرای امویہ کی آنک ده حضرت علی بی ذکر خیر ایله یاد ایلدیکی عیداللهک مسموعی اولمغله برکون عیدالله ه مسجد نبویه نماز قیلار ایکن عمر کیدوب آنک یانه اوتورمش . عیدالله ، سلام ویردکن صکره ه یا عمر ! « الله تعالی اهل بدردن بیعت رضوان اصحابندن راضی اولمشیکن صکره آنلره بغض ایتدیکنه دائر برشی اوکرندگمی ، دیدکده ه خیر . اويله برشی ایشتمدم ه دیش . عیدالله ه یاسنده علی علیهنده سوز سويليورمش سین بونه ه ده نیجه عمر بن عبدالعزیز هان متنبه و آگاه اولوب توبه واستغفار ایدرک عیداللهدن عذر دیله مش و آندن صکره حضرت علی یه محبت ایلش . برده پدری ( عبدالعزیز ) خطبه اوقور ایکن سب علی بحثنه کلنجه دیلی طولاشوب کله لری چیکنرمش . عمر ، بونک سر و حکمتی پدردن سؤال ایتدکده ه سن بوکا دقت ایلدگمی ، دیمکله ه اوت ه دیدکده پدری ه اوغلجغزم ! ناس ، بزم علی حقنده بیلدیکمزی بیلسلر بزم باشمزدن طاغیلوب اولاد علینک یانه کیدرلر ه دیش .

عمر بن عبدالعزیزک ایسه دنیایه میل ورغتی اولدیغندن بروجه بالا خلیفه اولدینی کی او بدعت سیئه بی رفع وازاله ایلدی وبوندن طولانی اکابر امت عننده ممدوح اولوب شعرای عصر دخی حقنده مدحیه لر سويلدی .

جزء خامسده بیان اولندینی اوزره مروان بن الحکم ، اوقاف نبویه دن اولان ( فدک ) قریه سنی اراضی امیریه دن عد ایله بروجه مقاطعه یدتصرفنه کچورمشدی و آندن بالتوارث اولادینه انتقال ایدرک عمر بن عبدالعزیزه کچمش ایدی . آنک بو وجهله تصرفی ایسه کندوسنک رأی واجتهادینه مغایر دوشدیکندن حال اصلیسنه ارجاع ایتکی تصمیم ایتدی و آزادلوسی ( مُزاحم ) ایله سويلشدی ه خاندانم ، بکا مقاطعه ویردیلر . حال بوکه



نه آنلرک بونی ویرمه حقلری وار ایدی ، نه ده بنم آلفه حقم وار ایدی .  
 آنی رد ایله جکم ، دینجه مزاحم « یا اولادیکی نه یاهه جقسین » دیدکه  
 عمرک کوزلرندن یاش کلدی و « آنلری الله اصمارلادم » دیدی . مزاحم ،  
 آنک یانندن چیقوب عمرک اوغلی ( عبدالملک ) ک یاننه کیتدی و پدیرینک نیتنی  
 حکایه ایدرک « بوسزه مضردر » دینجه عبدالملک « سن ، خلیفه نک نه فنا  
 وزیرسین » دهرک قالقوب پدیرینک یاننه واردی . مزاحمک افاده سندن  
 بخله پدیرینک فکرینی صوردی . او دخی « اوت . مقاطعه بی حال اصلیسنه  
 ارجاع ایتمک نیتندهیم » دیو جواب ویردی . عبدالملک ، همان اجراسنه مسارعت  
 اولمنسی اخطار ایدنجه پدیری « جناب حقّه حمد اولسون . ذریتمدن امر دین ده  
 بکا معاون ویردی » دیدی وهمان وجوه و اشراف ناسی احضار ایله آنلره  
 خطاباً « فدک اراضیسی ، رسول الله صلی الله علیه وسلم حضرتلرینک النده  
 ایدی . وارداتی اللهک کوستردیکی محله صرف ایدردی . ابوبکر و عمرده  
 او وجهله عمل ایتمدیلر . صکره جدّم مروان ، آنی مقاطعه ایتدی .  
 شمدی بکا قالدی . حال بوکه بنم مالم دکلدیر . شاهد اولکزکه بن ، آنی  
 عهد رسول اللهده اولدینی حاله ارجاع ایتدم ، دیدی .

آندن صکره ( عمر العدل ) حضرت عمر بن الخطاب کبی یومیّه  
 بیت المسالدين نفقه آلور اولدی . فقط آلدینی شی پک جزئی ایدی .  
 حتی بعض روایاته نظراً آلدینی نفقه یومیّه ایکیشر درهمدن عبارت  
 ایمش .

ذاتنک و خانه سنک اداره سنی بو حاله قوینجه ناسک دخی آکا توفیق  
 حرکت ایلسی طیبی ایدی . فقط مستحقینک ، علی الخصوص خاندان نبوتک  
 حقوقنی ایفاده اصلاً تجویز و تقصیر ایتمزدی . حتی ( فاطمه بنت حسین بن  
 علی ) رضی الله عنهم حضرتلری « عمر بن عبدالعزیز قالسیدی . بز بر شیئه  
 محتاج اولمازدق » دیو بیورمشدر .

لکن عمر العدلک بو اوضاع مشروعه سی ، بونجه ییللردنبرو ترقّه  
 وسفاخته آلیشمش اولان امرای بنی امیه دهشت ویرمکه خاندانلرینک



اك بيوكى اولان (فاطمه بنت مروان) ك يانه طويلانوب فرياد ايلدير . او دخى كلوب عمر بن عبدالعزيز ايله كوروشدى سويلشدى ، و آندن بر جواب موجه ايستدى . خليفه حضرتلى آ كا جواباً « الله تعالى محمد عليه الصلوة والسلام حضرتلى عالمه رحمت كوندردى ، عذاب ديو كوندردى . رسول اكرم ، عالم عليينه كيتدى . ناسه حق شربى سيان بر نهر عظيم ترك ايتدى . ابوبكر وعمر ، موجبنجه عمل وحركت ايلدير . صكره يزيد ومروان و اوغلى عبدالملك و آنك اوغللى وليد وسليمان بونهردن مستسقى اولدير . نوبت بكا كلى . حال بوكه نهر عظيم قوريمش ايدى . حال اصيلسنه ارجاع اولندقجه اصحابى قاندرماز » ده نجه فاطمه « نهديك ايستديككى آ كلادم . تفصيله حاجت يوق . فقط بنى اميه بر كون فرصت بولوب سكا بر ضرر ايدرلر » ديدكه خليفه حضرتلى غضبه كلوب « هر قورقديغم كون ، قيامت كونندن دها قورقونج دكل در » ديدى . فاطمه ، عودت وامرا ايله ملاقات ايليه رك بيان كيفيت ايلدى و « بو حاله سبب سز اولديكنزكه عمر بن الخطاب خاندانندن قيز آليكنز . آندن بويله بر چوجق طوغدى . خطاب اوغلنك أوندن قيز آلانلرك انجام حالى بويله اولور » ديدى . آنلرده سكوت ايلدير . لىكن عمر العدلك النذن قورتلق ايچون بر چاره آرامغه باشلاديلر .

عمر بن الخطاب رضى الله عنه حضرتلى ، عمر بن عبدالعزيز والدهسى طرفندن جءاعلا سيدر . شويله كه : عمر بن الخطاب حضرتلى عهد خلافتنده كيجه قول كزر كن صباحه قارشو بر خانه دن برس ايشتمش . قولاق طوتمش . خانه صاحبهسى اولان قارى ، قيزينه « قالىق ، سوده صو قات » ديورمش . قيز دخى « امير المؤمنين ، سوده صو قائمى يساغ ايتدى » ديدكه والدهسى « امير المؤمنين نره دن طويه جق » دنجه قيز دخى « ظاهرده آ كا اطاعت ايدوب ده كيزلو عصيانمى ايدلم » ديمش . حضرت عمر ، اوخانه ي بلله يوب دارالخلافيه كلدكه اوغلى (عاصم) ي چاغروب « فلان محله ده ، فلان خانه ده بر قيز وار . اكر كمسه نك عقد نكاحنده دكل ايسه

وار، آنی کندیکه نکاح ایت. بلکه جناب حق آندن خیرلو اولاد احسان ایدر « دیمکه عاصم دخی واروب اوقیزی تزوج ایتدی و آندن (ام عاصم) نام قیز طوغوب آنی عبدالعزیز تزوج ایتمکه آندن دخی عمر بن عبدالعزیز تولد ایتدی و عدالتجه بیوک پدرینک طور و مسلکنی طوتدی . آنک کبی امر دینده لوم لاثمدن صاقماز ، اللهدن بشقه کیمسه دن قورقماز ایدی .

زوجه سی فاطمه بنت عبدالملکدن مرویدر. دیمش که : « برکون عمر بن عبدالعزیز نماز قیلار ایکن یانه واردم . کوز یاشلری صفالئک اوزرینه دوکیلوردی . یکی برحادثه می وقوعه کلدی دیدم ، دیدی که : « اقطار ارضه اولان امت محمدک احوالی دوشندم . ایچلرنده آچ و محتاج و علیل و فقیر وار، مظلوم و مقهور و غریب و اسیر وار ودها نیجه محتاج اعانه ییچاره لر وار . یوم قیامتده ربم آنلری بندن صوره جق ، دعوا جیمده محمد صلی الله علیه وسلم حضرتلری اوله جق . تبرئه ذمت ایده من ایسم حالم نزهیه وار ه جق دیو دوشونهرک نفسمه آجیدمه آغلادم »

ولید بن عبدالملک ، ابنیه مراقده ایدی ناس دخی ابنیه مراقه دوشدی . مجالس و محافله انشا آندن بحث اولنوردی . سلیمان بن عبدالملک ، یک اکول ایدی . ناس دخی یمک ، ایچمک لاقردیلر یله و قتلرینی اسراف ایدرلردی . عمر بن عبدالعزیز ، عابد و زاهد ایدی آنک زمانده دخی خلق ، عبادات و طاعات یولنه کیردی . مجلسلرنده « بوکیجه اورادک نه ایدی ، قرآن کریمدن قاچ آیت حفظ ایتدک ، بوآی قاچ کون اوروچ طوتدک » کبی سوزلر سویلنور اولدی . ( الناس علی سلوک ملوکهم )

بوصورتله عمر بن عبدالعزیزه متخذی اولان مسلک اتقاده نیجه معاونلر پیدا اولدی . بالاده بیان اولندیغی اوزره زوجه سی فاطمه دخی عبدالملک قیزی ایکن بویولده زوجه اویدی . اوغلی ( عبدالملک ) دخی تمامیه کندی افکارینه اوینغون ایدی . حتی برکون ، عبدالملک پدری عمرالعدله « اللهم امرینی اجراده هیچ برشیئی قید ایتمه . کرک کندیکی و کرک بنی بویولده فدا ایت » دیدکده عمرالعدل حضرتلری آکا « اوغلم ! اکر سنک دیدیکک

يوله كيتسهك ناس بزي قليجه محتاج ايدر . حال بوكه احياسى قليجه موقوف اولان خيره خيروقدر ، ديمس .

ينه بركون عبدالملك پدرينه « يامير المؤمنين ! احي ايتديك برحق واحما ايتديك برباطل قالورسه ربكك حضورينه وارديفكده نه ديه جكسين » ديدكده پدرى « اوغلم ! سنك اجدادك ، ناسى حقندن انحرافه دعوت ايلديلر . ايشلر چغرنندن چيقارلدى . شر چوغالدى ، خير آزالدى . شمدي نوبت بكا كلدى . مادام كه بواحوالك دفعهٔ اصلاحى قابل دكل . ايبسى بودكللى كه هركون برحقى احياء بر باطلى احما ايدهيم واولنجيهك هركون بويولده كيدهيم ، ديو جواب ويرمش .

الحاصل عمر بن عبدالعزيز مصالح دينيهده اوغلى عبدالملك ، اڭ بيوك معاون ايدى . هله امر بالمعروف ونهى عن المنكر خصوصلرندنه آندن دها ايلرو كيديوردى . لكن چوق يشاميوب اون يدى ياشنده ايكن پدرينك حياتنده وفات ايلدى (رحمة الله عليه رحمة واسعة)

يوز سنه سنده (ابوالطفيل عامر بن وائل) رضى الله عنه مكده وفات ايلدى . اڭ صكره وفات ايلين صحابي اودر . غزوهٔ احد سنه سى تولد ايليوب رسول الله صلى الله عليه وسلم حضرتلرينك وفاتنده سكر ياشنده ايمش . آندن صكره يريوزنده رسول اكرمك وجه پاكنى كورن قالمدى . ناس ، آرتق اصحاب كرامى كورنلر ايله تبرك ايدر اولديلر .

مدينهده فقهاى سبعة دن (خارج بن زيد بن ثابت) على رواية طقسان طقوز وعلى رواية اشبو يوز سنه سنده وفات ايلشدر (رحمة الله عليه) ينه يوز سنه سى خلالتده (جوخي) ناحيه سنده (بنى يشكر) قيله سندن (شوذب) ديو معروف (بسطام) نام خارجى ، سكرسان نفر خوارج ايله ظهور ايدرك علناً خلقى دولت امويه عليهنه دعوته قيام ايتدى . عمر بن عبدالعزيز ، كوفه واليسنه امرنامه يازوب « خارجيلر ، قان دوكمكه وفعلاً افساده قيام ايتدجكه اوزرلرينه وارليوب اما اويله برحر كته جرأت

ایلدکلی کی تادیب اولنملری ضمنده طرفلرینه براحتیاطکار مأمور ایله مقدار کافی عسکر کوندرلسون « دیو بیوردی . او دخی ایکی بیک عسکرله ( محمد بن جریر ) ی کوندردی . ابن جریر ، واروب بسطامه قارشو قوندی وتعرض ایتدی . طرفین یکدیگرک حال وحرکتته منتظر اولوب طوردی .

چونکه عمر بن عبدالعزیز حضرتلری ، کوفه والیسنه اووجهله امر ویردیکی کبی بسطامه دخی مکتوب یازوب « ایشتم که بغض فی الله یولنده خروج ایتمش سین . حال بوکه بوبابده سن بدن احق دکل سین . یانمه کل . سنگله مناظره ایدم . اکر حق بزم یدمزده ایسه سن ده ناسک کیردیکی یوله کیرواکر حق سنک یدکده ایسه ایجابنه باقم « دیو بیورمش ایدی .

آنک اوزرینه بسطام دخی خلیفه حضرتلرینه یازدینی جوابنامهده « طوغریسی انصاف ایتمش سین . بن ده سنگله مدارسه و مناظره ایتک اوزره ایکی آدم کوندردم « دیمش و ( بنی شیبان ) کوله منلرندن ( عاصم ) نام حبشی ایله ( بنی یشکر ) دن برآدم کوندرمش ایدی .

بوایکی مبعوث کلوب ( خناصره ) ده عمر بن عبدالعزیز ایله کورشدیلر و مناظره یه کیریشدیلر . شویله که : خلیفه حضرتلری « خروجکزه سبب نه در ، کریه کوردیکگزر نه در « دیو استفسار بیوردی .

عاصم دخی « سنک سیرتکّه اعتراض یوق . سن عدل واحسان ایله مجازات و مکافات ایدیورسین . لکن بزه خبر ویرکه امر خلافته قیامک ، ناسک مشورت و رضالریله می اولدی ، یوقسه تغلبائی وقوع بولدی « دیو صورتی .

خلیفه حضرتلری « بن ناسدن امارت ایستمدم وقوه ظالبه ایله منصب امارتی ضبط ایلدم . فقط بومقامده بندن اول بری وار ایدی . بنی ولیعهد ایلدی . بن ده ایشه مباشرت ایلدم . کیسه کریه کورمندی وردوانکار ایتدی . سزایسه ناسدن عدل وانصاف ایله موصوف اولان هرکیم اولورسه اولسون آنک امارتی قبول ایتک رأی واجتهادنده بولنیورسکز . اکر بن حقه

مخالفت وحقدن عدول ایدرسم اوزمان سزده بکا مطاوعت ایلیکیز « دیو  
جواب ویردی .

اوزمان خارجیلر « سزگله آره مزده برمسئله قالدی » ده نیجه خلیفه  
« نهدر » دیمکله ایکسی ده « سن اهل بیتکه مخالفت ایلدک وانلرک عمللرینی  
مظالم تسمیه ایتدک. ایمدی اکر سن هدایت اوزره اولوبده آنلر ضلالت  
اوزره ایسه لر آنلره لغت ایدرک آنلردن بری اول « دیدیلر . چونکه :  
خارجیلر ، عمرالعدک اعمال وحرکاتنده اعتراض ایده جک برشی بوله میوب  
آنحجق آنلرک عنندنه عثمان وعلی ودیکر بعض اصحاب کرامه وعلی العموم  
امرای بنی امیه یه لغت ایلمک ملتزم برعادت سیئه اولدیغندن خلیفه حضرتلرینی  
بوورطه ضلالتله دوشورمک ایستدیلر .

آنک اوزرینه خلیفه حضرتلری « آکلادم . سزک خروچکز د  
ایچون اولیوب آخرت ایچوندر . لکن طریقنده خطا ایتمش سکیز . ا  
عزوجل حضرتلری ، رسولی محمد صلی الله علیه وسلم حضرتلرینی لغتله  
کوندردمدی وابراهیم علیه السلام ( کیم که بکا تابع اولورسه بندنر وکبر  
عاصی اولورسه یارب! سن غفور رحیم سین) دیدی . جناب حق دخی آنلر  
اقتدا ایله امر ایتدی . بن ایسه اهل بیتک اعمالی ظلم تسمیه ایتدیم  
بو قدر ذم یتشور . اهل ذنوبه لغت ایلمک فرض دکلدرد . اکر فرض  
ایسه صورارم سکا که سن نه وقت فرعونه لغت ایلدک « دیدکده خارجی  
« خاطریمه کلیور » ده نیجه خلیفه حضرتلری « فرعون ، اخبث واثر ناس  
ایکن آکا لغتی التزام ایتممک سکا الویریورده نماز قیلان واوروج طوتان  
اهل بیتمه لغت ایلممک بکا نیچون جائز اولیور ، دیو بیوردی .

خارجی « آنلر ، ظلملری سببیه کافر دکلمی در » دیدکده خلیفه  
حضرتلری « کافر دکلدردر . زیرا رسول الله صلی الله علیه وسلم حضرتلری  
ناسی ایمانه دعوت ایلدی . اقرار ایدنلر قبول اولندی . صکره بیوک کناه  
ایشیلینلر حقنده حد شرعی اقامه قیلندی . « دیدکده خارجی « رسول الله  
صلی الله علیه وسلم ناسی توحید باری یه وآنک طرفندن نازل اولان احکامی



اقراره دعوت ایلدی « دیمکه خلیفه حضرتلری « قومز ، احکام شرعیہ یی رد وانکار ایتدیلر . لکن بدبختلق کندولرینه غلبه ایدوب حرام اولدیغنی بیلرک بعض افعالی ایشلدیلر وهوا وهوسلری اوغورلده اسراف ایلدیلر » دیو جواب ویردی .

ینه بویولده جریان ایدن بعض مباحثات آره سنده خلیفه حضرتلری خارجیلر « اللهدن قورقکمز ، کله شهادت کتورن کیمسه لر ، نزد رسول اللهم جانندن ومالندن امین اولور ایکن سنک یانکزده اولیورلرده ادیان سائر اصحابندن اولانلر امین اولیورلر » دیو بیوردی .

الحاصل خارجیلر ، فاسق اولان مسلمینی تکفیر وبر حیات اولانلرینک قتلی وفوت اولانلرینه لغتی التزام ایدوب بو اعتقادلرینی ابطال ایچون خلیفه حضرتلرینک ویردیکی تفصیلاته مبعوثلر بر دیه جک بوله مدیلر .

فقط یشکری ، بحث آخره انتقال ایله « بر آدم ، بر قومه امیر ولوب وحقلرند اجماعی عدالت ایلوبده صکره ایشی اهل ومستحق ولمان بر شخصه ترك ایتسه اوزرینه لازم اولان حق اللهی ادا ایتمش ولورمی » دیدکده خلیفه حضرتلری « اولماز » دینجه یشکری « یاسن ، زیدک خلافتده حق اوزره قائم اولیه جغنی بیلدیگک حالده بو ایشی آکا تسلیم ایده جکمیسین » دیدی . خلیفه حضرتلری آکا جواباً « زیدی ولی عهد ایدن بن دگم ، بشقه سیدر . بندن صکره ایسه مسلمون ، کندی ایشلرینی کورمکده سائرندن احق واولادرلر » دیدکده یشکری « آنی ولی عهد ایده نک صنعنی حق کوررمیسین » دینجه خلیفه حضرتلری ، مدافعه دن عاجز قالوب آغلادی و « اوچ کون صکره کلیکمز ، سوبلشم » دیدی . کیتدیلر ، بعده کلدیلر . عاصم ، « بن سنک حق اوزره اولدیغکه شهادت ایلرم » دیدکده خلیفه ، یشکری یه « سن نه دیرسین » دیدی . اودخی « افاداتک پک کوزلدر . لکن بر کره کیفیت قومه عرض ایدیم . حجت وسندلری ندر باقیم » دیدی ومخبریه تعلیق مصلحت ایلدی .

لکن عمر بن عبدالعزیز حضرتلری ، زیدک ولی عهدلکی خصوصنده



مبعوثلری اقناع ایدہ جک جواب بولامدیغندن طولای متاثر اوله رق « یزید ، بنی هلاک ایتدی . آنک حقنده اولان مباحثه ده مغلوب اولدم ، دهرک استغفار ایلردی .

### وفات عمر بن عبدالعزیز

امرای بنی امیّه ایسه کوردیلرکه : عمر بن عبدالعزیزک مدت خلافتی تمتد اولورسه احتمال ، یزیدی ولایت عهددن اخراج ایله خلافته صالح بر ذاتی ولی عهد ایلر وایش بتون بتون آنلرک اللرندن چیقار دیو دوچار خوف واندیشه اوله رق آنی تسمیم ایچون اوزرینه بر آدم مأمور ایتدیلر . چوق وقت کچمیوب عمر بن عبدالعزیز حضرتلری مسموماً خسته اولدی .

قاین برادری ( مسلمه بن عبدالملک ) آنک عیادتنه واردی . عمرک صرتمده بر کیرلی کوملک وار ایدی . همشیره سی فاطمه یه « امیر المؤمنینک انوابی ییقایکنز ، دیو تنیه ایتدی وفرداسی کیتدی . کوردی که : کوملکی ییقاغماش . فاطمه یه « بن سزه کوملکی ییقایکنز دیو امر ایتدیمی ، دیو تکدیر ایتدی . فاطمه « واللہ بشقه کوملکی یوق که آنی کیدیره لمده بونی ییقایه لم ، دیدی . متعاقباً عمر بن عبدالعزیز حضرتلری ، یوز بر سنه سی رجینک سلخنه بش کون قاله جمعه کونی قرق یاشنده ایکن عازم دار النعیم اولدی . رضی الله عنه

### ملوس یزید بن عبدالملک

اوکون ( یزید بن عبدالملک ) ه بیعت اولندی ویزید ، همان عمر بن عبدالعزیزک اجرا آت حسنه سندن هواسنه اویمیان شیلری تغیر ایتدی . نه خلقدن اوتانندی ، نه ده مسئولیت اخرویه دن صاقدی .

بالاده بیان اولندیفی وجهله ( بسطام خارجی ) اوزرینه مأمور اولان ( محمد بن جریر ) خوارج ایله قارشو قارشویه طوروب طرفین متارکه حالنده بولنه رق بسطامک مبعوثلری اولان عاصم ایله رفیقنک عودتلرینه انتظار اولنمقده ایکن کوفه والیسی یزیدک جلوسنی خبر آلدیفی کبی آنک توجهنی قازانمق ایچون همان ابن جریره خوارجی ضرب وتنکیل ایتسنی امر و اشعار ایلدی . اودخی حرکات حربیه یه باشلادی . بسطام ، آنک تشبثات حربیه سنی کورنجه کندوسنه آدم کوندروب « تعجیله سبب نه در ؟

مقاله من مبعوثلک عودت لرینه انتظار ایتک دکلیدی « دیووردی . ابن جریر  
 « بز ، آرتق سزی بو حال اوزره براقه میه جغز » دیو جواب ویردی . خارجیلر  
 « او ، رجل صالح وفات ایلش اولق کرکدر » دیدیلر وهان مدافعه یه قیام ایتدیلر .  
 خوارجدن چند نفر قتل اولندیسه ده ، ابن جریر ، مجروح و عسکرینک  
 چوغنی تلف و بقیه سی منهزم اولدی . بسطام ، آنلری کوفه یه قدر تعقیب  
 ایلدی و آندن صکره دونوب اسکی موقعه کلدی و مبعوثلرینک عودت لرینه  
 منتظر اولوب قالدی . متعاقباً آنلرده کلوب کیفیتی سبب ویردیلر .  
 بعده یزید ، خوارجک اوزرینه ایکی بیک کشی ایله بر سر کرده  
 کوندردی . بسطام ، هان یزیده و سر کرده سنه لعنت ایدرک اوزرینه هجوم  
 ایله سر کرده بی و عسکرینک چوغنی قانیجدن کچیردی . بقیه السیوفک  
 کیمیمی کوفه یه و کیمیمی یزیدک نزدینه فرار ایتدیلر .  
 بعده یزید ، ایکی بیک عسکرله بر سر کرده کوندردی . بسطام آنی ده  
 قتل و عسکرینی پریشان ایتدی و موقعه پایدار قالدی .  
 نهایت یزید ، کندی برادری مسلمه بی کوفه یه کوندردی . او دخی  
 خوارج اوزرینه اون بیک عسکر سوق ایتدی . آنلره نسبتله خوارجک  
 عددی اقلّ قلیل ایکن وقوع بولان برخونیزانه محاربه ده آز قالدی شام  
 عسکری ده منهزم اوله یازدی . فقط هیئت مجموعه لرله شدتلی هجوم و خوارجی  
 احاطه ایتدکلرنده بسطام ، مقتول و عسکری منهزم و پریشان اولمشدر .  
 ینه یوز بر سنه سی خلالنده سابقا عراق و ایسی اولان ( یزید بن  
 مهلب ) عصیان و خروج ایله بصریه کیردی و ناسی کتاب و سننه دعوت  
 ایلدی و بصره دن چیقوب ( واسط ) ه کلدی و یوز ایکی سنه سی خلالنده  
 واسطدن کوفه یه طوغری حرکت ایلدی . مسلمه بن عبد الملك ایسه  
 یوز یکریمی بیک عسکرله آکا قارشو کیتدی و لدی التقابل آکا غلبه  
 ایتدی . یزید بن مهلب مقتول و اردوسی پریشان اولدی .  
 بعده شوراده ، بوراده ظهور ایدن خارجیلر دخی برر صورتله قهر  
 و تنکیل ایله مضرتلری برطرف ایلدی .  
 بلاد مشرق بو وجهله دوچار اختلال و اغتشاش اولدینی صره ده دیار  
 مغرب دخی اختلاله یوز طومئشیدی .

یوز درت سنه سنده بر فرقه اسلامیہ کردستان طرفدن حرکتله دیار ( خزر )ه داخل اولدوقده خزر قبائلی اجتماع و دشت قبیچاق تاتارلرندن بر چوق خلق آنلره اعانه ایدرک اهل اسلام اوزرینه هجوم و اقطاع ایتمکله عساکر اسلامیہ منهزم و پریشان اوله رق عظیم تلفات و خساراته اوغرا مشلردر .

یزید بن عبدالملک ایسه فی الاصل اهل ذوق و لهو و طرب اولوب صکره لری بتون بتون لذات و شهواته منهزمک اولدیغندن امور دولتی دوشونمکه و قتی یوق ایدی . ( حبابه ) نام جاریه نک حسنه و ( سلامه ) نام مغنیه نک سسنه و تغنیسنه مفتون و حیران و کیجه کوندوز آنلر ایله مشغول ایدی .

### بعضه رفیات و مجلسی هشام

یزید بن عبدالملک زماننده مشاهیر فقهان امام ( مجاهد ) سکسان اوچ یاشنده و امام ( شعبی ) یتیم ایدی یاشنده ایکن ختم درس حیات ایلشلردر .

یوز بش سنه سی خلائنده ( عبدالله بن عمر ) ک اوغلی ( عبدالله و دیگر اوغلی ( عبیدالله ) وفات ایلدیلر . ( رحمه الله علیهم رحمه واسعه )

ینه یوز بش سنه سی شعباننده یزید بن عبدالملک معشوقه سی اولان سالفه الذکر ( حبابه ) لهو و طرب دنیادن کچدی . محله خاموشانه کوچدی .

یزید او قدر مکدر اولدی که حرم دائره سنه چکلدی و بتون بتون الفت و اختلاطدن کسلدی . آرتق کسه ایله کورشمز اولدی و بر هفتقه صوکره یعنی یوز بش سنه سی شعبانک اواخرنده وفات ایله سودیکنک یاننه کیتدی . ولی عهد اولان برادری ( هشام بن عبد الملک ) او زمان ( رصافه ) ده ایدی . مژده جی ، خاتم و قضیبی کندوسنه کوتوردی . اودخی همان دمشق شامه کلوب تخت خلافته جلوس ایتدی .

یزید بن عبدالملک ، بروجه بالا لهو و طربه مائل اولمغله عمر بن عبدالعزیزک اصلاحاتندن آنجیق کندو هواسنه موافق اولیانلرینی الفا ایدوب اما سائر مواد مشروعیه طوقنماشیدی . خلفی و برادری اولان هشام بن عبدالملک ایسه آکا نسبتله اهون و قلیل الشر برذات ایدی .

یوز آلتی سنه سی موسم حجنده هشام ، موکب حج ایله کیدوب مکّه کیرر ایکن امرای بنی امیه دن بری ، آنک یاننه واردی ، اهل بیتگز ، بو

مقامات عالی‌دهه ابوزرابه لعنت ایدرلردی. سزده بواصوله رعایت ایلمیسگز ، دیوز عنجه نصیحت و بردی . امویلرک آبروی اولان عمر بن عبدالعزیز رضی الله عنه ایسه بوعادت سیئی رفیع و انفا ایتیش اولدیغندن ناشی هشام ، بوسوزدن صقیلوب « بزبورایه آنجق حج ایچون کلدک ، برکیمسهیه شتم و لعن ایچون کلدک » دهرک یوزنی اکشیتدی و همان مناسک حج بحثنه نقل کلام ایتدی . الحاصل هشام ، پک حلیم و ملایم و اخلاقی کوزل و عقیده سی درست بر ذات ایدی . لکن پک طمعکار و ممسک و جمع وادخار امواله حریص و متهالک اولوب امراسی دخی آکا جمیله کوسترمک اوزره جبایت اموالده تشدید و افراط ایلمکده ایدیلر . امرای امویّه نک ذکر و فکرلری جمع ماله منحصر اولوب بوجهته ارتکاب ورشوت قبولری دخی آچیلمشیدی . خاقان ترک ، بو ائنده بلاد اسلامیه ته تجاوز ایتدی . خراسان و ایسی ( اشرس ) بو غائله عظیمه ایله مشغول ایکن امرای امویّه دن برینک شکایتی اوزرینه یوز اون بر سنه سنده عزلی و قول بوئدی .

شویله که : امرادن ( جنید ) مقدا هشامک زوجه سنه بر مجوهر کردنک اهدا ایدوب هشامک منظوری اولدوقده پک بکنمش اولدیغندن جنید ، آکا دخی اویله بر کردنک تقدیم ایتمشیدی . بوجه بالا اشرس علیه وقوع بولان اشتکا وسیله اتخاذا اولته رق عزل ایله یرینه جنید ، خراسان و ایسی اولدی . جنید ، خراسانه کیتدی . خاقان ایله نیچه محاربه لر ایتدی ، نیچه زحمتلر چکدی و چوق مخاطره لر آشوردی و پک چوق تلفات ویردی و خاقان ، خیلی تجاوز ایدرک سمرقند و بخارای تضییق ایتدی .

جنید ، ایسه هشامک منفوری اولان آل مهلبدن بر قیز تزوج ایاش اولدینی هشامک مسموعی اولنجه یوز اون آلتی سنه سنده آنی عزل ایله یرینه ( عاصم هلالی ) یی خراسان و ایسی نصب ایتدی .

او ائنده ایسه خراسان ایالتنک حالی مختل و مشوش اولوب اهالینک بر بیوک قسمی حکومت محلیه علیه بولتمغله عاصم هلالی ، بو اختلالات داخلیه نک رفع و ازاله سندن عاجز قالدی . مدت ولایتی بر سنه یه وارمدن

یوز اون یدی سنه سنده عزل ایله یرینه عراق والیسی ( خالد قسری ) نك برادری ( اسد قسری ) خراسان والیسی اولدی .

خالد ایسه حجاج ثانی و برادری ده آکا مشابه ومدانی ایدی . خالدك ظلم وتعدیسندن ناشی کوفه وموصل ایالتلرنده متوالیاً فرقه فرقه خوارج ظهور ایتشیدی واکرچه بونلرك اوزرلرینه اردولر سوق اولنه رق جمله سی استیصال اولنش ایسه ده خلیفه عسا کردند دخی چوق آدملر تلف اولمشیدی . مع مافیه آنك مظالم وتعدیاتنه اهمیت ویرلیوب حال بوکه کب وتعظمی علو جناب خلافتك تحمل ایدمه جکی درجه یه واردیغندن یوز یکرمی سنه سی خلالنده هشام ، آنی عزل ایتشیدی . برادری اسد ایسه اولجه وفات ایلش اولدیغندن یرینه ( نصر بن سیار ) خراسان والیسی نصب اولمشدر .

#### وفیات اعیانه

یوز یدی سنه سنده فقزای سبعة دن ( سلیمان بن یسار ) ویوز سکزر سنه سنده ینه فقهای سبعة دن ( قاسم بن محمد بن ابی بکر الصدیق ) ویوز اون سنه سنده مشاهیر فقهان و کبار تابعیندن سنی سکسان یدی یه بالغ اولان ( حسن بصری ) وینه کبار تابعیندن علم تعبیر رؤیاده ماهر و سنی سکسان بره بالغ اولان ( محمد بن سیرین ) و طقسان بر یاشنده بولنان شاعر مشهور ( فرزدق ) و مشاهیر فقهان و رجال شامدن امام ( مکحول ) ویوز اون یدی سنه سنده عبدالله بن عمر رضی الله عنهم انک آزادلوسی وتلمیزی اولان مشاهیر محدثیندن ( نافع ) وفات ایلدیلر . ( رحمهم الله رحمة واسعة ) ( امام محمد باقر بن زین العابدین بن الحسین بن علی المرتضی ) رضی الله عنهم حضرتلری ، علی روایه یوز اون آلتی و علی روایه اون یدی و علی روایه اون سکزر سنه سنده دار عقبایه عازم و یرینه اوغنی ( امام جعفر صادق ) حضرتلری قائم اولمشدر .

دعات عباسیه نك امام ومقتداسی اولان محمدك پدری ( علی بن عبدالله بن عباس ) رضی الله عنهم دخی یوز اون سکزر سنه سنده وفات ایلدی . انطاکیه رجالنندن مشهور ( بطال غازی ) که دائماً دیار رومه غزا



ایدردی. یوز یکر می ایکی سنه سنده روملر ایله جنک، ایدرکن شهید اولمشدر. آنک غزواتنه مخصوص بر کتاب تألیف اولمشدر .

عمر بن عبد العزیزک عهد خلافتنده بصره قاضیسی نصب اولئان وفرط ذکا وفراست ایله معروف اولان (ایس بن معاویه) دخی یوز یکر می ایکی سنه سنده طی سبئل حیات ایلمشدر .

کبار تابعیندن واکابر محدثیندن امام (زهری) رحمه الله علیه حضرت تری دخی یوز یکر می درت سنه سنده وفات ایلمشدر. ابتدا تحریر علم حدیث ایدن اودر. یوز یکر می سکر سنه سنده دخی مشاهیر قرآدن (عاصم) رحمه الله علیه ویوز او توز سنه سنده امام (مالک) حضرت ترینک اساتیدندن وکبار تابعیندن فقیه مدینه اولان امام (ربیع بن فروج) رحمه الله علیه حضرت تری و او توز برده رئیس معتزله اولان (واصل بن عطا) عفی عنه عازم دار بقا اولمشدر.

#### رقعه زید

(زید بن زین العابدین) امام محمد باقرک برادری اولوب زید آکا «سن، امامته جمله دن احق سین. حقکی دعوی ایت» دیو آنی خروجه تشویق ایتدیکه محمد باقر دخی «پدریمز زین العابدین، جمله دن احق واولی ایکن دعوی امامت ایله خروج ایتدی» دهرک آنی الزام ایلردی وبرده (زید) رئیس طائفه معتزله اولان (واصل بن عطا) دن تلمذ ایتمش اولدیغندن باقر، آنی مذهب اعتزله میل ایله انهام ایلردی .

محمد باقرک وفاتندن سکره میدان، برادری مشارالیه زید بن زین العابدینه قالمغله یوز یکر می برسنه سنده دعوی امامته قیام وکوفه ده اختفا ایله ناسی کندوسنه بیعته دعوت ایلدی وکوفه اهالیسندن کندوسنه پک چوق آدم سراً بیعت ایلدی .

حکومت بوندن خبر آله رق زیدی تحرییه اعتنا ایتدیکی صره ده شیعه طائفه سی رؤسائندن اولوب شیخیندن تبری ایتک اعتقادنده بولئان برکروه آنک حضورینه چیقوب «ابوبکر و عمر حقارنده نه دیر سین» دیدکلرنده «الله آنلره رحمت ایلسون. اهل بیتمدن آنلر حقنده خیردن



بشقه برشی ایشتمدم . بوبابده اك شدتلی سویلیه بیله جكم سوز بودركه خلافت نبویه به بز سائرندن احق ایکن ناس بزّه مانع اولدی . لکن بوده کفره مؤدی برشی دکلدر . آنلرده عدالت ایلدیلر و کتاب وسنت ایله عمل ایتدیلر « ده نیجه » امام حق کچدی ( یعنی امام باقر وفات ایلدی ) آندن صکره بزم امامز ، آنک اوغلی جعفر صادق در ، دیهرک زیددن آرلدیلر . اوده آنلری ( رافضی ) تسمیه ایتدی .

بو وجهله زیدک یولداشلری آزالدی . حکومت مأمورلری ایسه صیقی صیقی به زیدی تحری ایدیلرلردی . همان یوز یکریمی ایکی سنه سنده زید حضرتلری ، کوفه ده خروج ایتدی و اوزرینه سوق اولنان شام عسکرینه غلبه چالیدی . لکن نهایت باشنه براوق طوقونمقله فوت اولدی . ( رحمه الله ) اوغلی ( یحیی ) فرارایله خراسان طرفنه کیدوب بلخده برداتک نزدنده اختفا ایدرک دعوائ خلافت ایچون فرصت کوزتمکده بولنمشدر .

#### وفات هشام و قتل یحیی بن زید

یوز یکریمی بش سنه سی ربیع الاولک اوائلنده هشام بن عبدالمملک وفات ایلدی . اون طقوز سنه ، طقوز آی ، یکریمی برکون ممتداولان مدت خلافتنده او قدر چوق مال جمع ایتمشیدی که اسلافی ایچنده او قدر مال جمع ایدن یوقدر . عبرت آله حق وقایع دندرکه هشامک وفاتنده ولی عهد اولان ( ولید بن یزید بن عبدالمملک ) بریده بولنوب آنجق کاتبی ( عیاض ) هشامک یاننده ایدی . هشام فوت اولنجه عیاض ، بالجمله خزینهلری و انبارلری مهرلدی و هشامی غسل ایچون آدملری صو ایصتمق اوزره بر قازان ایستدکلرنده ویرمدی . آنلرده قومشولردن عاریت بر قازان آلوب صو ایصیتدیلر و کفن بولنمدینی جهتله هشامک کوله سی ( غالب ) آنی تکفین ایلدی .

#### ایام ولید بن زید بن عبدالمملک

هشامک بوجه بالا وفاتی اوزرینه ( ولید بن یزید بن عبدالمملک ) بریده ن کلوب تحت سلطنته جلوس ایتدی و هشامک بریکدرمش اولایینی اموال لاتحصایی ضبط ایله تام میراث یدیلک یوانی طوتدی .

او ائناده (یحیی بن زید) میدانه چقبوب خراسان والیسی طرفندن  
اوزرینه سوق اولئان عسکرله شدتلی محاربه ایتدیسده نهایت اوق ایله  
اوریلوب مقتول و آدملری پریشان اولمشدر .

ولید بن یزید ، بروجه بالا تحت سلطنته جلوس ایتدیکی کبی فی الاصل  
مبتلا اولدینی فسق وفجور و فحشیات ، محرّماتی استحلال ایدرجه سنه علنی  
صورتده اجرایه باشلادیغندن اقرباسی آنک ملحد اولدیغنی اشاعه ایلدیلر .

### ابام یزید بن ولید بن عبدالملک

او صرمده ولید بن یزیدک عمزاده سی اولان ( یزید بن ولید بن  
عبدالملک ) خروج ایدنجه ناس آکا تابع اوله رق یوزیکرمی آلتی سنه سی  
جمادی الآخره سنده ولیدی خلغ وبعده قتل ایله یرینه یزیدی اجلاس ایتدیلر .  
لکن بو جهتله رابطۀ حکومته خلل کله رک طرف طرف عصیان  
واختلالر ظهور ایله دولت اموییه عظیم تزلزل کلدی .

شویله که : ولیدک قتلی اوزرینه خمس اهالیسی عصیان ایله یزیده  
بیعتدن ابا ایتدیلر ولدی المحاربه مغلوب واطاعته مجبور اولدیلر ایسه ده  
او صرمده اهل فلسطین دخی عصیان ایتمکه بر چوق محاربه ومقاتله لر  
وقوع بولدی وفساد وفته کوچ حال ایله باصدیریله بیلدی وهر نروده  
عصیان واختلال ظهور ایتسه دولت اموییه ، عاصیلری عسا کر شامیه ایله  
تأدیب ایده کلبشیکن قطعۀ شامیه ده بویله اختلاف واختلال ظهور ایدنجه  
دیگر ایالاتده نفوذ حکومت عظیم خلل کلدی . بناءً علیه یمامه ده فتنه  
ظهور ایله شدتلی مقاتله لر وقوع بولمقده وعراق دخی انواع شقاق ونفاق  
ایله دوچار اختلال اولمقده ایدی .

ایشته او ائناده خراسان والیسی ( نصر بن سیار ) عزل ایله یرینه  
دیگری نصب اولندیسه ده نصر ، بونی قبولدن امتناع ایله خلفی طانیدیغندن  
خواه وناخواه خراسان والیکنده تقریر وابقا اولنمشدر . لکن خراسانده  
دخی اختلال ظهور ایتمکه اهلینک بر فرقه سی نصره علناً مخالفت ایلدیلر .  
او زمان دیار مغرب دخی انواع اختلالاته دوچار ایدی ، لکن بلاد

مشرقك اهمیتی زیاده اولدیفندن مغرب طرفنه عطف نظر ایتمهک دولت  
امویه نك وقتی یوق ایدی .

ابراهیم بن ولید بن عبدالملک دبعره مردانه بن محمد بن

مردانه بیعت اولندی

مروان بن حکمك حفیدی اولان والجزیره والیسی بولنان ( مروان  
بن محمد بن مروان ) یزید بن ولیده اعلان مخالفت ایلوب بالمخبره هنوز  
آره لری بولنش ایکن یزید ، یوز یکر می آلتی سنه سی ذی الحجه سنده فوت  
اولغله برادری ( ابراهیم بن ولید بن عبدالملک ) ه بیعت اولندیسنده هنوز  
بیعت عامه واقع اولیوب گاه خلیفه وگاه امیر دنیلمکده ایکن ( مروان بن  
محمد ) آنک علیه خروج و غلبه ایتمهک ( ابراهیم ) خلافتدن استعفا ایله  
برطرفه چکلدی ویوز یکر می یدی سنه سی اوائلنده مروانه بیعت اولدی .  
بعده ابراهیم ، دخی کلوب آکا بیعت ایلکه اختلاف برطرف اولدی .  
مروان بن محمد ، غایت مقدم و محنت و مشقتله متحمل بر آدم اولدینندن  
( مروان حمار ) دیو تلقیب اولمشدر . پک جسور و غیور و احتیاطکار  
ایدی . لکن دولت امویه نك ضعف و هدمی زمانه مصادف اولدیفندن  
کندوسنك اقدامی و احتیاطی مشر و مؤثر اولامشدر و زماننده دعای  
عباسیه نك امیری اولان ( ابو مسلم ) خروج ایله دولت عباسیه تشکل ایتمهک  
کندوسی خلفای امویه نك خاتمه سی اولمشدر .

بنی امیه نك اسباب انقراضی و دولت عباسیه نك کیفیت تشکلی ان شاء الله  
تعالی جزء تاسعه ده بیان اولنور .

نحمد الله على حسن الاختتام ونصلی  
على خیر الانام وعلى آله واصحابه الکرام

ختمام جزء ثامن











3 1761 07294537 1